


Bëngbe Bëtsa  
Cabëngaftaca  
Entsoyebuambna



New Testament in Camsá

Bëngbe Bëtsa Cabëngaftaca Entsoyebuambna  
New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

---

PDF generated using Haiola and XeLaTeX on 4 Mar 2019 from source files dated 14 Dec 2018

19104c0e-9046-5ff3-82fb-eb838c88dcf9

## Contents

San Mateo . . . . .	1
San Marcos . . . . .	63
San Lucas . . . . .	100
San Juan . . . . .	162
Hechos . . . . .	208
Romanos . . . . .	265
1 Corintios . . . . .	297
2 Corintios . . . . .	327
Gálatas . . . . .	346
Efesios . . . . .	358
Filipenses . . . . .	369
Colosenses . . . . .	376
1 Tesalonicenses . . . . .	384
2 Tesalonicenses . . . . .	390
1 Timoteo . . . . .	394
2 Timoteo . . . . .	403
Tito . . . . .	409
Filemón . . . . .	413
Hebreos . . . . .	415
Santiago . . . . .	440
1 San Pedro . . . . .	448
2 San Pedro . . . . .	457
1 San Juan . . . . .	463
2 San Juan . . . . .	470
3 San Juan . . . . .	471
San Judas . . . . .	473
Apocalipsis . . . . .	476

## San Mateo

*Jesusbe bēts taitanga*

*(Lc 3.23-38)*

<sup>1</sup> Quemēnga innamna Jesucristbe bēts taitanga: Jesucristna Rey David y Abrahám-bentšana entšá inamna.

<sup>2-6</sup> Abraham yojamna Isaacbe taitá;

Isaacna Jacobēbe taitá

y Jacob, Judá y chabe catšátangbe taitá.

Judá, Fares y Zarabe taitá; y chatbe mamá Tamar yojamna;

Fares Esrombe taitá

y mua Arambe taitá.

Aram Aminadabēbe taitá;

Aminadab Naasonbe taitá

y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna;

y Obedna Isaibe taitá.

Isaí Rey Davidbe taitá;

David Salomonbe taitá y muabe mamá yojamna chë Uríasbe shema inamná.

<sup>7-11</sup> Salomón Roboambe taitá;

Roboam Abíasbe taitá

y Abíasna Asabe taitá;

Asa Josafatbe taitá;

Josafat Jorambe taitá

y Joramna Uzíasbe taitá.

Uzías Jotambe taitá,

Jotam Acazbe taitá

y Acazna Ezequíasbe taitá.

Ezequías Manasesbe taitá;

Manasés Amonbe taitá

y Amón Josíasbe taitá.

Josíasna Jeconías y chabe catšátangbe taitá yojamna.

Chë Babilonioca entšanga chë israelitēnga tmojánishēche y choca imojanētámena ora, Josías chë básenga yojánabamna.

<sup>12-16</sup> Ya Babilonioca ndutámenēnga ora;

Jeconías Salatielbe taitá;

Salatiel Zorobabelbe taitá.

Zorobabel Abiudbe taitá;

Abiud Eliaquimbe taitá

y Eliaquimna Azorbe taitá.

Azor Sadochebe taitá;

Sadoc Aquimbe taitá

y Aquimna Eliudbe taitá.

Eliud Eleazarbe taitá;

Eleazar Matanbe taitá

y Matán Jacobēbe taitá.

Jacob Josebe taitá yojamna y Josena Mariybe boyá.

María Jesusbe mamá, Jesús chë Bēngbe Bētsabe Uámana Uabuayaná, chë Cristo ca uabainá.

<sup>17</sup> Chcasna, Abrahám-bentšana Davidbentscoñe bnétsana canta bēts pamíllanga imojētsemna. Davidbentšana y chë israelitēnga Babilonioca imojanētamenēntscuana inye

bnétsana canta bêts pamíllanga; y inye bnétsana canta bêts pamíllanga chë Israeloca entsanga imojanëtamentsana, chë Cristo tojanonýnántscõe.

*Jesucristo tojanonýná*  
(Lc 2.1-7)

<sup>18</sup> Jesucristo jónýnanamna mëntšá tojanopasá: María tbojanšbuachená Joséftaca jobouamayama, pero cabá ndoñe cánýiñe ibontsiyena ora, tojanopasá Mariyna ngomaná yojoquéda chë Uámana Espíritbe obenánaca. <sup>19</sup> José, Mariybe boyá, canye nyetsca soyënguñe tšabá jamama bošá inamna. Cha ndoñe yontseboše entsangbe delante cha mal jaquédana; chíyecna tojanjuabó nye iytëcana Mariybentsana jtsojuánañana. <sup>20</sup> Y chca yojtsejuabnantscuana, mo otjenayoquécá canye Bëngbe Bëtsabe ángel tbojáninye y chana Josébioye tbojanianyana: “José, Davídbentsana entsá, ndoñe matenócochinýenana Maríaftaca jobouamayama, er chë bochantsebomna šëšona chë Uámana Espíritbe obenánaca cha bochantsebomna. <sup>21</sup> María canye šëšona bochantsebomna y cha Jesús ca cochjuabaye. Chca echantsabaina er cha chabe entsanga chëngbe bacna soyënguentšana echanjâtsebacaye ca” —chë ángel tbojanianyana.

<sup>22</sup> Lempe chca tojanochnëngo, cachcá chaotsemnama ntšamo Bëngbe Bëtsá chabe juabna oyebuambnayëngbiajana tojanayancá. Chë oyebuambnayá mëntšá tojánayana:

<sup>23</sup> Chë cabá boyabása nduabuatmá ngomamaná echanjoquéda y canye šëšona boyabásetema bochantsebomna, y cha mochanjuabaye Emanuel ca.

(Emanuel endayana “Bëngbe Bëtsá béngaftaca ca”.)

<sup>24</sup> José chë otjénayentsana tojanofšená ora, tojanma ntšamo chë Bëngbe Bëtsabe ángel tbojanmandacá y Maríaftaca tojanobouamá. <sup>25</sup> Pero ndoñe cánýiñe ibontsaniyena, sinó nye chë šëšonatema tojanonýná orscana. Chë šëšonatema tojanonýná orna, José chábioye Jesús ca tbojanabaye.

## 2

*Reyes Magos Jesúsbioye tmojána*

<sup>1</sup> Herodes judiëngbe rey yojamna ora, canye pueblo Judeoca, Belén ca uabáinentše Jesús tojanonýná. Chentšana, báseftanga, estrellënga uatsjëndayënga, magos ca uabáinënga, canye bêts puebløye Jerusalén ca uabáinoye tmojánashajna. Chënga tmojánabo shinýe bocanoye luarëngocana. <sup>2</sup> Jerusalemocna chënga, Heródesbioye tmojána y tmojanënoticiá: “¿Ndayentše yojtsemna chë judiëngbe rey jtsemnama tojonýná cha ca? Bëngbe luarëngoca shinýe bocanoye chabe onýnana estrella fsënjinýe y as muentše cha jaboadorama tifjabo ca.”

<sup>3</sup> Rey Herodes chca tojanuena ora, corente yojtsenócochinýena, y nyetsca chë Jerusalemëntše oyenëngnaca. <sup>4</sup> Chentšana chë rey tojánachembo nyetsca chë judiëngbe bachnangbe amëndayënga y chë judiëngbe ley abuatambayënga jenoyeunayëngama. Mëntšá tojanatjá: —¿Ndayentše chë Bëngbe Bëtsabe Uámana Uabuayaná, chë Cristo ca uabainá, jónýnama ibomna ca?

<sup>5</sup> Chënga tmojanjuá: —Judeoca, Belén pueblentše ca. Bayté entsemna chë Bëngbe Bëtsabe juabna oyebuambnayá Miqueas mëntšá tojanábema:

<sup>6</sup> Y tšëngaftanga, Judeoca Belenëntše oyenënga, canye mandayá tšëngaftangbentsana echanjabo.

Cha nyetsca chë Judeoca mándayëngbiama más uamaná echántsemna, y atšbe entsanga Israeloca echántsanýena.

Chíyecna tšëngaftangbe pueblo ndoñe nye batšá uámana pueblo quenátsmëna ca.

<sup>7</sup> Chora Herodes iytëcana chë maguënga tojánachembo y cuedádoca tojanatjá ntseco ora chë estrella tmojáninýama. <sup>8</sup> Herodes chë soyënga yojtsetátšëmbo ora, Belenoye chë maguënga tojanichamó, y mëntšá tojanéyana: “Choye motsajna y tšabá chë šëšona

šmochjánguango. Chašmojínýena ora, šmochjabëuenaye, as átšnaca chayobená jama chë šešona jadórana ca.”

<sup>9</sup> Rey Herodes chë soyënga tojánëyanentsana, chë maguënga tmojtsatanoë. Chora cachiñe tmojtaniñye chë chëngbe luarëngoca tmojáninýe estrella y yojtsanebnatsana chë šešona yojtsemnéntsoñe. Chentša juatsbuacá chë estrella yojójaiye. <sup>10</sup> Chë maguënga chë estrella tmojáninýe orna, corente oyejuayënga imojtsemna. <sup>11</sup> Chë yebnoye tmojánamashjna ora, chë šešona tmojáninýe chabe mamá Mariáftaca. Chorna, tmojanoshamentsé y chë šešonatema tmojanadorá. Chora chëngbe cajontémënga tmojanëtsécaca y tmojanatštá castellano, inciense y canýe botamana uanguëtse soye, mirra ca uabáiniye. <sup>12</sup> Chentšana, mo canýe otjenayoquécá Bëngbe Bëtsá chë maguënga tojanabuayená rey Herodesbiajana ndoñe chamondeshëcuanama. As chënga chentšana inýe benachëjana cachëngbe luarëngoye tmojésanshëcuana.

#### *Egiptó luaroye tmojtsanachá*

<sup>13</sup> Chë maguënga tmojtsatanoë ora, otjénayoca José canýe Bëngbe Bëtsabe ángelbioye tbojáninýe y cha mëntšá tbojaniyana: “Motsbaná, chë šešonatema y chabe mamá mesébiatše y Egiptoye motsachá. Herodes chë šešonatema bochanjánguango jtsóbama, chíyeca choca cochtsoquedañe atše chacbochjábuayenantscuana ca.”

<sup>14</sup> As José tojantsbaná, chë šešonatema y chabe mamá tojesanébiatše y ibeta Egiptó benache tojéftsanbocna. <sup>15</sup> Y choca imojtsanomñe Herodes tojanóbanëntscuana. Chca tojanopasá, cachcá chaotsemnama ntšamo Bëngbe Bëtsá chabe juabna oyebuambnayanabianayana tojanayancá. Chë oyebuambnayá mëntšá tojánayana: “Egiptocana atše uaquiñá sënjanchembo ca.”

#### *Herodes tojanmandá basetémënga jtsëbáyama*

<sup>16</sup> Chë maguënga tmojtsaningñema Herodes tojántatšëmbona ora, puerte tbojánetna, y tojanmandá lempe jtsëbáyama base boyabásetemënga uta uata bomnënga y cabá uta uata ndbomnënga, Belén y chë juachañe pueblënguentsënga. Uta uatama cha tojanjuabó, er uta uata yojtsemna chë maguënga chë estrella tmojáninýama. <sup>17</sup> Ntšamo chë Bëngbe Bëtsabe juabna oyebuambnayá Jeremías tojanoyebuambacá, cachcá tojanochnëngo:

<sup>18</sup> Ramá ca uabaina pueblentše canýe oyebuambnayana tmojanuena, ngménaca ošachiyana y becá tsetšanánaca oyebuambnayana. Raquel yojamna chabe básengbiama ošachiyiñe, pero ndoñe yontseboše chamuatebiajuama, chabe básenga ya obanënga causa ca —cha tojanábema.

<sup>19</sup> José cabá Egiptoca yojtsomñe ora, Herodes tojanóbana. Chentšana, otjénayoca José canýe Bëngbe Bëtsabe ángelbioye tbojáninýe y cha mëntšá tbojaniyana: <sup>20</sup> “Motsbaná, chë šešonatema y chabe mamá mesébiatše y Israeloye cochtá. Chë šešonatema jóbama bošënga ya obanënga montsemna ca.”

<sup>21</sup> As José tojantsbaná y chë šešonatema y chabe mamá Israel luaroye tojtésanébiatše. <sup>22</sup> Arquelao Judeoca yojanmánda chabe taitá Heródesbe cuentiñe, y José chca tojántatšëmbona orna, yojtsauatja choye jama. Pero otjénayoca Bëngbe Bëtsá Josébioye tbojanbuayená; chíyeca Josena Galilea ca uabaina luaroye tojána. <sup>23</sup> Choye tojánashjango ora, José tojána canýe pueblo Nazaret ca uabainoye chentše joyénanama. Chca tojanochnëngo cachcá chaotsemnama ntšamo chë Bëngbe Bëtsabe juabna oyebuambnayanënga tmojanayancá. Chënga tmojánayana: “Nazaretocá ca Jesús mochantsábobaina ca.”

<sup>1</sup> Chë tempo, Juan chë Ubayaná, entsanga ndoyena luaroye Judeoca tojánbocna, Bëngbe Bëtsabe soyëngama jábuayenama. <sup>2</sup> Mëntšá cha yojanëtsësnaye: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

<sup>3</sup> Juan yojamna canya ndabiana chë Bëngbe Bëtsabe juabna oyebuambnayá Isaías mëntšá tojánayana:

Entsanga ndoyena luaroca canya enduáyebuache:

“Bëngbe Utabná echanjabo ca;

mo nda canye benache tojtseprontacá canye uámana entsá jashjanguama,

tšëngaftángnaca cachcá, Bëngbe Utabná jabama ainaniñe tšabe juabnéngaca šmochtseprontana ca” —cha tojánayana.

<sup>4</sup> Juanbe entsáyá inauapormana camellbe stjénasheca y bobache yojanasnana. Cha inasaye chapulinatémënga y tjoca tjouangbe méloye. <sup>5</sup> Jerusalemoca entsanga, nyetsca Judea luarentša entsanga y chë Jordán ca uabaina béjaye béconana oyenënga imojánbocana Juan joyeunayama. <sup>6</sup> Bëngbe Bëtsábioye chëngbe bacna soyëngama jaimpáda chentšana, Juan chë Jordán béjajiñe chënga yojanébáyana.

<sup>7</sup> Pero Juan tojáninje ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseye-unanama; as chora tojanéyana: “¡Mëtšcuaye entsanga! ¿Nda tcmënjáuyana chë echanjóshjango uabouana castigüentšana šmochjotsbocá ca? <sup>8</sup> Bëngbe Bëtsábeñe ndegombre ošbuáchiyënga šmochtsemna, as chca chaotsinyna chë bacna soyënga amana tšëngaftanga ndegombre šmojtšajbanama. <sup>9</sup> Y ndoñe šmattsejuabnaye cach tšëngaftangbiana jayanama: ‘Abrahámbentšana entsanga fsëndmëna ca’. Er atše šcuayana, Bëngbe Bëtsá quem ndëtšbéngacnaca Abrahámbentšana entsanga nanjábiana. <sup>10</sup> Chë tatšniá ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tonteshajo, jtseshatëtšana y iñoye jtsatmetšana. Tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

<sup>11</sup> “Ndegombre, atšna béjayeca cbondubáyana Bëngbe Bëtsabe benache chašmutishachama. Pero chë atšbe ústonoye echanjabá, atšbiana más obenana bomná comna, y atše merecido taitstobuajoñe ni mo chabe shecochëtjonëshe jtsámabanama. Chë chabe benache añe chamojtishachëngbiana Bëngbe Bëtsá echanjama chë echanjabábeyeca, chë Uámana Espiritu chëngbe ainaniñe cháumashënguama. Pero chë benache ndoñe chamontishachëngbiana, Bëngbe Bëtsá echanjama chë echanjabábeyeca, corente castigánënga chamotsemnana, mo iñeshequécá. <sup>12</sup> Canye entsá chabe mëtštá cucuatšinë jiyëbana, chabe trigo jtsóbobemana y chë ndoservena shácuanënga jtsejashtsëtsana. Chabe trigo chë grano uaquëcnaye tsañe jtsabuájuana, y chë ndoservena shácuanëngna iñoye jtsatmetšana. Cachcá, chë atšbe ústonoye echanjabana, chë tšabe entsanga echanjúbuaja, y chë bacna entsangna canye íñeshiñe echantsacastígaye, y chë iñe ndocna te queochátsfsana ca” —cha tojanéyana.

*Juan, Jesúsbioye tbojanabaye*

*(Mc 1.9-11; Lc 3.21-22)*

<sup>13</sup> As Jesús, Galileocana tojána Jordán béjayoye, Juan yojtsemnoye, cha chabuabayama.

<sup>14</sup> Pero Juan ndoñe yontseboše Jesús juabayama, y mëntšá tbojanianya: —Atše šontsemna aca chašcuabayey, y ¿más atše aca cbochjuabayey ca?

<sup>15</sup> Chora Jesús tbojanjá: —Morna chca chaotsemna. Entsemna lempe ntšamo Bëngbe Bëtsá tojamandacá jobedésana ca.

As Juan yojouena Jesús juabayama. <sup>16</sup> Jesús ya uabainá yojtsemna ora, chë buyeshoicana tojtanshëbébocna. Chorna Jesús tsbanánoye yojontješiye y tojáninje chë celoca atëfjniñe y chë Uámana Espiritu mo canye palomatemcá chábioye yojtsastjajuana.

<sup>17</sup> Chora celocana Bëngbe Bëtsá mëntšá tojánayana: “Mua atšbe bonshana uaquiñá endmëna. Chabiamana corente sëntsoyejuá ca.”

## 4

*Jesús tojanobená Satanás jayénjanama*

(Mc 1.12-13; Lc 4.1-13)

<sup>1</sup> Chentšana chë Uámana Espíritu entsanga ndoyena luaroye Jesús tbojanánatse, as Satanás chauábama cha jisháchichiyama.

<sup>2</sup> Chentše canta bnétsana te y canta bnétsana ibeta ntjascá tbojanjétana; chíyeca chora tbojaneshéntsena. <sup>3</sup> As Satanás tbojanobobeconá y tbojaniyana: —Aca ndegombre Bëngbe Bëtsabe Uaquiñá tcomnëse, momandá quem ndëtsbenga tandëse chaobiama ca.

<sup>4</sup> Pero Jesús tbojanjuá: —Bëngbe Bëtsabe uabemana palabrënguiñe mëntšá endayana: “Entšá nÿe tandëšeca ndoñe vida ntsebomnana, sinó entšá endobena jtsiyenana lempe ntšamo Bëngbe Bëtsá tojayancá tbojtseyeunanëse ca.”

<sup>5</sup> Chentšana Satanás, Jerusalén, chë uámana bëts pueblo ca uabáinoye Jesús tbojanánatse, y chë Bëngbe Bëtsabe bëts yebnentše chë más tsbanánoca tbojanatsá. <sup>6</sup> Chentše Satanás mëntšá tbojaniyana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, er Bëngbe Bëtsabe uabemana palabrënguiñe endayana:

Bëngbe Bëtsá chabe angelënga echanjichamuá, chacmotsinÿenama.

Chënga buacuatšëngaca cmochanjishache, shecuatše ndëtsbeñe ndocá chacondomama ca —cha tbojaniyana.

<sup>7</sup> Chora Jesús tbojanjuá: —Cach Bëngbe Bëtsabe uabemana palabrënguiñe mëntšá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

<sup>8</sup> Cabana, Satanás tbojanánatse canÿe bëts tjoye y betscó nÿetsca quem luarentša amëndayëngbenache y chentša nÿetsca uámana soyënga Jesúsbioye tbojaninÿinÿé. <sup>9</sup> As Satanás tbojaniyana: —Aca chacojoshëntsamentšé y chašcojadorase, lempe chë soyënga cbochjatštaye ca.

<sup>10</sup> Y Jesús tbojanjuá: —¡Satanás, átšbentšana mojuaná! Bëngbe Bëtsabe uabemana palabrënguiñe mëntšá endayana: “Bëngbe Bëtsá cochtsadorana y nÿe cha cochtseservena ca.”

<sup>11</sup> As Satanás cachcá tbojanonÿá. Cachora Bëngbe Bëtsábiocana angelotëmënga tmojánabo Jesús jtseservënama.

*Jesús tojanontšé Galileoca chabe trabajo jamana*

(Mc 1.14-15; Lc 4.14-15)

<sup>12</sup> Juan chë Ubayaná cárceloye tmojanëtámiamana Jesús tojanuena ora, Galilea luaroye cha tojtaná. <sup>13</sup> Pero ndoñe tonjanoquedá Nazaret pueblentše, sinó Capernaumoca, uafjajónaye tsachañe; choye tojána joyénanama, chë uámana bëts taitata Zabulón y Neftalibe luariñe. <sup>14</sup> Chca tojanochnëngo, cachcá chaotsemnana ntšamo chë Bëngbe Bëtsabe juabna oyebuambnayá Isaías tojanayancá. Isaías tojánayana:

<sup>15</sup> Zabulón y Neftalibe luare, Jordán béjaye chenguánoica, uafjajónaye tsachañe; Galilea luariñe, ndoñe judío entsanga oyenentše.

<sup>16</sup> Chë mo ibetiñe cuaftsiyencá imojoyena entsanga, Bëngbe Bëtsabe soyënga nduabu-atma causa, tmojinÿe canÿa entsangbe juabnënga binÿnayá.

Chë chëngbe juabnënga binÿnayá entsebuashinÿinÿayana chë Bëngbe Bëtsábioye nduabu-atmëngbiamana,

y chë causa chabiamana imomna mo obanëngcá, ndoñe binÿniñe jtsiyenëse ca —cha tojanábema.



<sup>17</sup> Cach orscana Jesús tojanontsé entsānga jábuayenama: “Bēngbe Bētsabe améndayana ya echanjóshjango. Ngménaca šmochtenójuaboye tšēngaftangbe bacna soyēngama y chca amana šmochtsajbaná ca.”

*Jesús tojánachembo canta boyabásēga beonga ashebuánayēnga cha chamuastama*  
(Mc 1.16-20; Lc 5.1-11)

<sup>18</sup> Canýe te, Jesús chē Galilea uafjónaye tsachajana yojtsaye y ndeolpe uta boyabásata tojanýe: canýa yojamna Simón, chē Pedro cánaca uabainá, y chabe uabentsá Andrés. Chatna atarraiēshangá ibnetsashbuétsetšaňe, er beonga ashebuánayata ibnamna.

<sup>19</sup> Jesús tojanéyana: “Atšeftaca mabata; atše cbochanjábiama Bēngbe Bētsabiama entsānga anguayata, y morscana nýe beonga ashebuánayata ya ndoňe quešochátsmēna ca.” <sup>20</sup> Cachora chatbe atarraiēshangá cachcá tbojésanaboshjuana y Jesús tmojanasto.

<sup>21</sup> Y más chcoye, Jesús inýe uta catsátata tojánanýe: Santiago y Juan, chē Zebedeobe uaquiñata. Chata ibojtsomňe canýe barquēshaňe, chatbe taitáftaca, chēngbe atarraiēshangá atapórmayíňe. Jesús tojánachembo, <sup>22</sup> y cachora chē barquēsha tbojésanaboshjona, chē taitá cachentše imojéseboshjona y Jesús tmojanasto.

*Jesús ba entsānga yojanabuatambá y yojánashnaye*  
(Lc 6.17-19)

<sup>23</sup> Jesús nýets Galilea luarējana yojánana, chentše judiēngbe enefjuana yebnēngue-nache abuátambaye. Chē tšabe noticiēnga Bēngbe Bētsabe améndayama entsānga yojanabuayiná y nýetsca šocanēngama y tsetšanēngama yojánashnaye. <sup>24</sup> Nýets Siria luarējana entsānga cha imojtsebáyana. As entsānga nýetsca šocana bomnēnga Jesúsbioye imojtsēnachaye: šoquēnga y tsetšanana bomnēnga, bacna bayējbe juabna uambayēnga, ataque osháchichanēnga y jama ndobenēnga. Jesús nýetscanga yojánashnaye.

<sup>25</sup> Mallajta entsānga Galileocana, Decápolis luarocana, Jerusalenocana, Judeocana y chē Jordán bējaye chengvanoicana Jesús imojústona.

## 5

*Ndayá Jesús tjoca tojanabuatambá*

<sup>1</sup> Jesús chē mallajta entsānga tojánanýe ora, batsjoye tojánantsjua y tojanótbema. Chabe ústonēnga tmojanobobeconá y <sup>2</sup> Jesús tojanontsé mēntšá jabuátambana:

*Ndēmuanýēnga imomna chē ndegombre oyejuayana bomnēnga*  
(Lc 6.20-23)

<sup>3</sup> “Puerte oyejuayēnga mochántsemna chē Bēngbe Bētsabe soyēnga tša imuajaboto ca juabnayēnga. Chca entsānga mochántsemna chē Bēngbe Bētsabe améndayoca mochtsiyenēnga.

<sup>4</sup> “Puerte oyejuayēnga mochántsemna chē mondbétsošachiyēnga; chēnga Bēngbe Bētsá entsējabuáchana ngménaca ndoňe chamondétsemnama.

<sup>5</sup> “Puerte oyejuayēnga mochántsemna chē uámanēnga ndoňe mondbétsenobi-amnayēnga, er chēnga mo chēngbe otocana soycá quem luare mochanjóyēngacňe.

<sup>6</sup> “Puerte oyejuayēnga mochántsemna chē nýetsca soyēnguiňe tšabá jamama bošēnga. Chēngbe bošana entsemna mo chē oshēntsiyá y uajuendayabe bošancá. Chē nýetsca soyēnguiňe tšabá jamama bošēnga mochanjobenaye jēftsinýana lempe ntšamo tmojtsebošcá.

<sup>7</sup> “Puerte oyejuayēnga mochántsemna chē ínýengbiama ongmiayēnga, er Bēngbe Bētsá chēngbiama bochanjóngmia.

<sup>8</sup> “Puerte oyejuayēnga mochántsemna chē nýe tšabe juabnēnga ainaniňe bomnēnga; chēnga Bēngbe Bētsá mochanjinýe.

<sup>9</sup> “Puerte oyejuayēnga mochántsemna chē nýetscanga natjémbana chamotsiyenama amēnga, er chēnga Bēngbe Bētsabe básēnga ca mochantsabaina.

<sup>10</sup> “Puerte oyejuayënga mochántsemna chë ínyënga tmojama chamotsesufrínënga, ntšamo Bëngbe Bëtsá yobošcá bétsamama; chca entšanga mochántsemna chë Bëngbe Bëtsabe améndayoca mochtsiyenënga.

<sup>11</sup> “Puerte oyejuayënga tšëngaftanga šmochtsemna, entšanga chacmojoyánguango y chacmojtšécamena ora y nyetscna soyéngaca chacmojtšëbuayatsenaye ora, atšbe ústonënga bétsemnama. <sup>12</sup> Móyejuanga, puerte móyejuanga, tšëngaftanga celoca becá šmochanjóyëngacñe. Er ntšamo entšanga tšëngaftanga cmécamena, cachcá chë Bëngbe Bëtsabe juabna oyebuambnayéngbioye, chë tšëngaftangbe natsana monjaniyenéngbioye entšanga monjanécamena ca” —Jesús tojánayana.

*Ošbuáchiyënga jtsemnana mo tamocá y binýnayënga quem luarentša entšangbiana*  
(Mc 9.50; Lc 14.34-35)

<sup>13</sup> “Tšëngaftanga, quem luarentša entšanga jtsëjabuáchanëse šmojtšiyena, Bëngbe Bëtsabe soyënga chamotsetatšëmbuama, as chëngbiana šmochántsemna mo chë mëntšena ndoñe chaondóndbemama tcojatboto tamocá. Pero chë tamó fténana tojtsóbemëse, ndoñe ntsopodénana tempcá sanana cachiñe jtëtšmënana. Chca, ya tondayama ntsoservénana; chíyeca chë tamó tsáshenoye jtsëtšenana y entšanga jtsebotájayana.

<sup>14</sup> “Tšëngaftanga, ntšamo tšabá yomncá šmojtšiyenëse, as quem luarentša entšangbiana šmochántsemna mo chë ibetiñe tojtsebínýna soycá. Canye bëts pueblo batsjo juatsbuañe tomnëse, ndoñe ntsopodénana iytëmencá jtsemnana. <sup>15</sup> Canye uajuinýanëshu tcojuajuinýena ora, ndoñe cajonëshu tajsoye jtsabuájuama, sinó tsbanánoca juajájuama, chca, nyetsca entšanga chë yebnentše tmojtsemnëngbiana chaotsebínýnama. <sup>16</sup> Cachcá tšëngaftanga, entšangbe delante mo binýnayëngcá šmochtsemna, as chënga tšëngaftanga tšabe soyënga šmuamama chamuinýama, y chca, chënga chamuinýanjé chë Taitá, Bëngbe Bëtsá celoca endmëná, corente uamaná y obená bétsemnama ca” —Jesús tojánayana.

*Chë Moisesbe leyama Jesús tojanabuatambá*

<sup>17</sup> “Ndoñe šmattsejuabnaye, ntšamo Moisesbe leyiñe iuayancá y chë Bëngbe Bëtsabe juabna oyebuambnayënga tmojanayancá jabétsepochochama atše tijabo ca. Atše ndoñe chiyátabo chë soyënga jabétsepochochama, sinó jabábuayenama ndayá chë soyënga ndegombre bétsayanama. <sup>18</sup> Ndegombre šcuayana: Celoca y quem luare chaojëftsemnëntscuana, ndocná queochatobenaye ni canye punto, ni canye letra chë leyënguëntšana jtsejuánana, lempe ntšamo jochnënguama yomncá chaojtsemnëntscuana. <sup>19</sup> Chíyeca, nda nye mo canye mando chë leyënguiñe ndoñe tonjoyeuná cha, masque nye base soye chë mando tojtsemna, y chë ínyënga cachcá tojtsabuatambá, cha Bëngbe Bëtsabe améndayoca chë más nduamaná echántsemna. Pero ndëmuanýënga tmojtsama ntšamo Bëngbe Bëtsá tojamëndacá y chë ínyënga cachcá chamotsamama tmojtsabuátambase, chënga Bëngbe Bëtsabe améndayoca uamanënga mochántsemna. <sup>20</sup> Chë soyëngamna mëntšá šcuayana: Tšëngaftanga chë ley abuatambayënga y fariseúngbioye ndoñe šmontsayënjanase, jtsamama ntšamo Bëngbe Bëtsá tcmojamëndacá, ndocna te Bëngbe Bëtsabe améndayoye quešmochátamashjna.

*Ndayá chë ínyëngaftaca tbojetnama Jesús tojanabuatambá*

<sup>21</sup> “Tšëngaftanga šmojouena ntšamo Bëngbe Bëtsá tšëngaftangbe bëts taitanga tojanamëndacá: ‘Ndoñe catjóba ca. Chca ochjajnyá bontsemna jobuambayana chë entšangbiana tšabá o ndoñe tšabá tmonjamama endbayanabe delante, ndáyeca chca ca.’ <sup>22</sup> Pero atše šcuayana, nda cachabe catšátaftaca tbojetna, chánaca bontsemna jobuambayana chë entšangbiana tšabá o ndoñe tšabá tmonjamama endbayanabe delante, ndáyeca chca ca. Nda cachabe catšátbioye puerte tbojtsáboyënja, cha bontsemna chë Sanedrín ca uabaina mándayëngbe delante jobuambayana ndáyeca chca ca; y nda

cachabe catsatbiamama opjema ca tojayana, ntšamo cha bétsamama, cha bontsemna chë infiernoca íñeshoye jama.

<sup>23</sup> “Chíyeca, nderado ndayá Bëngbe Bëtsabe bëts yebnoye tcojuamba Bëngbe Bëtsá jëtschuayama y chora tcojenojuabó acbe catsáta ácaftaca etonaná yojtsemna ca, <sup>24</sup> as chë tcojiyëbo soye chë altarentša natsanoica cochjéseboshjona, cochtá y acbe catsátaftaca cochtenoyántsia. Chentšana cocayé altaroye cochjá y chë tcojuamba sóyeca Bëngbe Bëtsá cochjëtschuaye.

<sup>25</sup> “Nderado nda tcmojademanda y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandado josticiëngbe cucuatšíñe cmochanjáboshjona y chënga cárceloye cmochanjutame. <sup>26</sup> Ndegombre cbéyana: Chentšana ndoñe quecochtétsbocna lempe candesopagantscuana ca” —Jesús tojánayana.

#### *Chë boyá o shémbioye ín्याftaca íngñayama Jesús tojanabuatambá*

<sup>27</sup> “Tšëngaftanga šmojouena ntšamo Bëngbe Bëtsá tojanmandacá: ‘Acbe boyá o acbe shémbioye ín्याftaca ndoñe catjaíngña.’ <sup>28</sup> Pero atše cbéyana: Nderado canye boyabása ndëmuanýe shembásabioye tbojinýe y tojajuabó ‘malaye cha ca’, chë boyabása chca tojajuabose, ainanoca ya chë inýe shembásaftaca cachabe shémbioye tbojtseingñé.

<sup>29</sup> “Chíyeca, nderado acbe catsábioica bomínýeca bacna soye tcojinýe y cachca soye tcojamëse, más tšabá nántsemna chë bominýe cochtsenobuchjatsëca y cochtsétsëna. Nýets cuerpo jtsebomnana y lémpeca infiernoye jama chacmotsétsënamna, acbiama más tšabá nántsemna nýe canye soye acbe cuerpentšana chacoperdé. <sup>30</sup> Nderado acbe catsábioica cucuatšëca bacna soye tcojamëse, más tšabá nántsemna chë cucuatšë cochtsenástjango y cochtsétsëna. Nýets cuerpo jtsebomnana y lémpeca infiernoye chacmotsétsënamna, acbiama más tšabá nántsemna nýe canye soye acbe cuerpentšana chacoperdé ca” —Jesús tojánayana.

#### *Chë bouamnata enëtšanama Jesús tojanabuatambá (Mt 19.9; Mc 10.11-12; Lc 16.18)*

<sup>31</sup> “Mëntšánaca leyiñe enduábemana: ‘Ndëmuanýe boyá chabe shémaftaca tbojtšenétsëna, chë boyá bontsemna chabe shema canye tsbuanácha juiyiyana, ndayéchañe chaotsayana cha ya ndoñe chabe shema yontsemna ca.’ <sup>32</sup> Pero atše cbéyana: Nda chabe shémaftaca tbojtšenétsëna y chca tojopasá ndoñe chë shema ín्याftaca tbontseingñé causa, as chë boyá jtsamana cha chabotseingñema, chë shema ín्याftaca tojtóbouamase. Y nda chë útsëna shémaftaca tojtobouamá, chana canye uabuatmá jtsebomnana, y chca, chë tsëm boyánaca canye bacna soye jamana ca” —Jesús tojánayana.

#### *Chë entsanga júrayama Jesús tojanabuatambá*

<sup>33</sup> “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado tcojayana: De Dios chë soye chanjama ca; ojal chë soye ndoñe catjama ca.’ <sup>34</sup> Pero atše cbéyana: Tondayama šmattsejúraye; ni celocama, er choca Bëngbe Bëtsabe tbemaniñe endmëna. <sup>35</sup> Ni quem luarama, er Bëngbe Bëtsabiamama mo tšenëtemcá endmëna, chiñe chabe shecuatšënga jacjayama; ni Jerusalenama, er chë pueblo endmëna Bëngbe Bëtsá chë Bëts Reybe bëts pueblo. <sup>36</sup> Ni tšëngaftangbe bestšašama cach ndoñe, er tšëngaftanga ndoñe quešmatobena ni mo canye stjénashe ftsenguëshe o fjantsëshe jabemana. <sup>37</sup> Tšëngaftanga aíñe ca jayanama šmojtsebošëse, nýe aíñe ca šmochjayana, y ndoñe casna nýe ndoñe. Ndayá chentšana más šmojatichamo soye, Satanásbiocana jtsóbocanana ca” —Jesús tojánayana.

#### *Chë entsanga mondbátenachnënguama Jesús tojanabuatambá (Lc 6.29-30)*

<sup>38</sup> “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado nda tcmojtsebuchjatsëca, ácnaca derecho contsebmoma canyëbé cha jëtsbuchjatsëcama ca; y nderado nda canyë juatsaše tcmojtsásiye, ácnaca derecho contsebmoma cányëše cha jtašiyama ca.’ <sup>39</sup> Pero atše cbéyana: Ndoñe matsbošana chë ndayánaca tcmojaborlábioye jtachnénguama; chamna, ndánaca catšbioica tcmojajuebiantsetase, cochjomiye chë ínyoica cachcá chacmomama. <sup>40</sup> Nderado nda tcmojademandá y tojtseboše acbe shabuanguanéjua jtsabocñama, cha molesenciá acbe quëfšaiyanaca chauetsácñama. <sup>41</sup> Nderado nda tcmojuasmá y tcmojamandá bnëtsana cuadroca juyambama, inyë bnëtsana cuadro cochjuyamba. <sup>42</sup> Nda ndaye soye tcmojotjañëse, cochjatštaye; y nda ndaye soye tcmojuátjase, cha ndoñe stëtšoye catjaquéda ca” —Jesús tojánayana.

*Chë uayayëngbiana bonshánana jtsebmomana*  
(Lc 6.27-28, 32-36)

<sup>43</sup> “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Acbe amigo cochtsebomshana y acbe uayayá cochtsaboyënja ca.’ <sup>44</sup> Pero atše cbéyana: Tšëngaftangbe uayayënga šmochtsababuányëshana, y chë cmécamenëngbiana Bëngbe Bëtsá šmochtseimpadana. <sup>45</sup> Chca tšëngaftanga, chë Taitá, Bëngbe Bëtsá, chë celoca endmënabe básenga šmochántsemna; Bëngbe Bëtsá endbëtsama tšabe y bacna entšángbeñe chabe shinyë chaotsebinynayama, y endbëtsama chë nyetsca soyënguiñe tšabá jamama bošënga y ndoñe chca entšángbeñe chauaftema. <sup>46</sup> Tšëngaftanga nyë chë tšëngaftanga tcmojtsababuányëshanënga šmojtsababuányëshanëse, ¿Bëngbe Bëtsábiocana ndayá šmochjuacaná? Romocama crocénana entšángbioye atjanayégnaca chca monduamana. <sup>47</sup> Y nyë chë amiguëngbioye šmojtsacheuanase, ¿ndaye bëts soye šmojtsama? Chë ndoñe judiëgnaca chca mondbëtsama. <sup>48</sup> Tšëngaftangbe Taitá, Bëngbe Bëtsá celoca endmëná, nyetsca tšabe soyënga bomná y amá endmëná. Tšëngaftángnaca cachcá šmochtsemna ca” —Jesús tojánayana.

## 6

*Jesús tojanabuatambá ntšamo tšabe soyënga ínnyëngbiana jamana*

<sup>1</sup> “Cuedado šmochtsebmoma ndoñe ntsamama entšángbeñe tšëngaftangbe tšabe soyënga, nyë chënga chca chamuinýama. Chca šmojamëse, tšëngaftangbe Taitá, Bëngbe Bëtsá, celoca endmëná ndocna uacanana soye quecmochtëtatštaye.

<sup>2</sup> “Chcasna, nderado nda caridá tcojábemëse, chca ndoñe šmatjama chë ntšamo šmojtsamama nyetscanga chamotsetatšëmbuama, mo canyë trompetëfjua cuaftsajatë-tancá, chë caridá šmojábemama chaotsótatšëmbuama; chca monduamana chë bacna entšanga chë ntšamo ndegombre tmojuabnacá ndinýinynayënga, chë judiëngbe enefjuana yebnënguenache y tsáshenañe. Ndegombre cbéyana, chë chca amënga ya chëngbe uacanana soye tmojóyëngacñe, ntšamo chënga tmojamama entšanga tšabá chëngbiana tmojtsoyebuambná ora. <sup>3</sup> Chcasna, nda caridá tcojábema ora, ndocná más chaondëtsetatšëmbo, mo chë uañicuayoica cucuatše ndoñe queondbatstatšëmbcá ndayá chë catšbioica cucuatše tojtsamama, <sup>4</sup> chca, acbe caridá iytëcana chaotsemnama. As, tšëngaftangbe Taitá, nda bominyë endbësequëcnaye chë iytëmencá tcojtsama soye, acbe uacanana soye cmochántatštaye ca” —Jesús tojánayana.

*Jesús tojanabuatambá ntšamo Bëngbe Bëtsáftaca jencuëntana*  
(Lc 11.2-4)

<sup>5</sup> “Bëngbe Bëtsáftaca šmojtsencuënta ora, ndoñe šmattsama chë bacna entšanga ntšamo ndegombre tmojuabnacá ndinýinynayëngcá. Chënga corente jtsogusetánana chë judiëngbe enefjuana yebnënguenache tsanana y tsashená tsëntsaca Bëngbe Bëtsáftaca jtsencuëntayana, chca, nyë entšanga chë soye chamuinýama. Ndegombre

šcuayana: chënga nÿe morscama ya montsábouacanana, chënga tšabá imojtsama ca entšanga tmojayana ora. <sup>6</sup> Pero aca Bëngbe Bëtsáftaca jencuéntama orna, acbe tsoye cochtamáshëngo, bësháša cochtatame y cháftaca cochjencuénta. Chánaca chë iytémenentše ácaftaca echántsemna. Bëngbe Taitá lempe bominye endetsequëcñá, masque cánÿenga šmojtsemna ora šmojtsama soyéngnaca. As Bëngbe Bëtsá, chca cháftaca chacojtsencuénta ora, cachá acbe uacanana soye cmochántatštaye.

<sup>7</sup> “Bëngbe Bëtsáftaca šmojtsencuénta ora, ndoñe nÿe cachcá ndoservena palabrënga ba soye šmattsichamo. Chca mondbétsama chë Bëngbe Bëtsábioye nduabuát-mënga. Chënga jtsejuabnayana becá chca tmojtsichámësna, Bëngbe Bëtsá chënga más yochjóyaunaye ca. <sup>8</sup> Ndoñe chëngcá šmattsemna. Cabá nduyana ora, Bëngbe Bëtsá ya jtsetatšëmbuana ntšamo tšëngaftanga cmojtsëjabotcá. <sup>9</sup> Chamna tšëngaftanga mëntšá cmontsétocana Bëngbe Bëtsáftaca jencuéntana:

Bëngbe Taitá, celoca icotsomñe.

Acbe uabaina chë más uámana uabainana chauesomñe.

<sup>10</sup> Acbe améndayana chaóshjango.

Celoca yojtsemna ntšamo icobošcá;

quem luaríñnaca cachcá chaotsemna.

<sup>11</sup> Mënté šmiyatšatá cada te šnetsëjaboto tandëše.

<sup>12</sup> Bacna soyënga bënga fsënjama: šmotsaperdónaye;

cachcá ntšamo chë bëngbiana bacna soyënga amënga fsëndbetsaperdonaycá.

<sup>13</sup> Bacna soyënga jamama šojocohëngo ora, šcochjujabuache chca ndenobuíyama.

Nÿetsca bacna soyënguentšana šmatsebacaye.

<sup>14</sup> “Chë tšëngaftangbiana bacna soyënga amënga šmojtsaperdónasna, Bëngbe Taitá chë celoca endëtsomñá, tšëngaftanga cmochanjáperdonaye. <sup>15</sup> Pero chë tšëngaftangbiana bacna soyënga amënga ndoñe šmontsaperdónasna, Bëngbe Taitá cachcá, tšëngaftanga ndoñe quecmochátaperdonaye ca” —Jesús tojánayana.

#### *Chë Bëngbe Bëtsáftaca jencuéntama tondaye ntjascá*

<sup>16</sup> “Y nderado tšëngaftanga inÿe ora tondaye ntjascá šmojtsemna Bëngbe Bëtsáftaca jencuéntama, juebëngménënga ndoñe šmattsemna, ntšamo chë bacna entšanga chë ndegombre tmojuabnacá ndinÿinÿayënga mondbetsamcá, as chca, chënga imojtsayúnama entšanga chamuinÿama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entšanga tšabá chëngbiana tmojtsoyebuambná ora. <sup>17</sup> Aca nderado tcojtsayúna ora, cochtsojuebjabebiyé y aceitíyeca botamana cochtenochquëca, <sup>18</sup> as chca, entšanga ndoñe chamondétsetatšëmbo aca tondaye ntjascá cojtsemnama. Nÿe acbe Taitá, lempe chë mo iytémencá yomna soyëngama tatsëmbuá, chama echántsetatšëmbo. Y cha, chë iytémencá tcojama soye bominye endbetsequëcñayá, acbe uacanana soye cmochántatštaye ca” —Jesús tojánayana.

#### *Chë celoca bomnana*

*(Lc 12.33-34)*

<sup>19</sup> “Bomnana quem luarentše ndoñe šmattsëjuabaye. Muentšna chë mejojón y inÿe pochócaye soyënga lempe jtsendbiamana, chë atbëbanënga jtsamashjnana y chë juabana soyënga jesatbëbana. <sup>20</sup> Más tšabá tšëngaftangbiana entsemna, mora quem luarentše tšabe soyënga šmojtsamamna, uacanana soyënga celoca chaotsójuabaye. Chentše ni chë mejojón, ni chë inÿe pochócaye soyënga acbe soyënga quemochatspochóca, ni atbëbanënga quemochátamashjna jatbëbama. <sup>21</sup> Er chë ndayentše acbe bomnana tojtsemnentšá soyëngama acbe ainánaca cochántsejuabnaye ca” —Jesús tojánayana.

#### *Chë cuerpama uajuinÿanëshá*

*(Lc 11.34-36)*

<sup>22-23</sup> “Acbe bominye tšabá totsomñëse, mo canÿe uajuinÿanëshacá acbe cuerpama jtsemnana, chíyeca aca jtsobenana ntšamo tcojtsamcá chë bomínÿyeca jtsonÿayana. Chë

bominje ndoñe tšabá tontsemnësna, chë bominje tondaye ntsobenana jamana, ntšamo tcojtsamcá chacobená jinjama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësna, lempe ntšamo chacojtsamcá ndoñe tšabá queochátsmëna. Y chca, aca cochantsiyena soyënga jtsamëse mo puerte ibetiñcá ca” —Jesús tojánayana.

*Chë Bëngbe Bëtsabiama bonshánana o chë nye quem luarentša soyënga jtsebošana*  
(Lc 16.13)

<sup>24</sup> “Ndocná ntsobenana uta mandayata jtsaservénana: cánjyabioye bochantšáboyënja y chë ínjabioyna bochantsebobonshana, o cánjyabiama tšabá echántsetrabajaye y chë ínjabiamna ndoñe tšabá. Ndoñe quecátobena Bëngbe Bëtsá jtsebobonshánana, nye quem luarentša soyënga jtsebomnana yapa tcojtsebošëse ca” —Jesús tojánayana.

*Bëngbe Bëtsá chabe básenga jtsanyënana*  
(Lc 12.22-31)

<sup>25</sup> “Chcasna atše šcuayana: Ndoñe šmattsenócochinjéna ndayá šmochjase o šmochjofšiye vida jtsebomnana, ni ndaye entšayá šmochjuíchëtjuama cach ndoñe. Ndegombre, vida chë sanama más enduámána y cuerpo chë entšayama más. <sup>26</sup> Šmochjanje chë shloftšënga jtsongüefjnayana. Chënga tondaye ntjájena, ni jaja saná ntjátbanana, ni chë grano uaquëcjnaye yebnënguñe quemnatsquëcjná; pero Bëngbe Bëtsá, celoca endmëná, chënga saná jtsatšatnayana. ¡Y tšëngaftanga chë shloftšetémëngbiama puerte más šmonduámána! <sup>27</sup> Masque chca endmëna, canya masque tša tojtsenócochinjéna, ¿ntšamo nanjobenaye jamana chë ntsachetšá vida yochtsebomnentšana, canye hora vida más jabotiyana?

<sup>28</sup> “Y ndayá šmochjuíchëtjuama, ¿ndáyeca šmojtsenócochinjéna? Šmochjinje chë jajañe lirio uantšefjushangá jtsajuajnana: ndoñe ntsetrabájayana, ni ntseshabiamnayana. <sup>29</sup> Pero atše cbéyana, ndegombre ni mo Rey Salomón nyetsca chabe bomnánaca nyetšá botamana mo chë lirio uantšefjushangacá quenjatspormana. <sup>30</sup> Bëngbe Bëtsá tša botamana shácuaana tojuama, y chë shácuaana mënté jajoca jtsamnana, yëfsana iñoca. Chca chë shácuanaca cha tojamëse, ndegombre tšëngaftangbiámna Bëngbe Bëtsá echanjama entšayá chašmotsábomnana, jentšanga nye batšá Bëngbe Bëtsábeñe ošbuáchiyënga! <sup>31</sup> Ndoñe šmattsenócochinjéna, mëntšá jtsichámëse: ‘¿Ndayá mochjase?’ o ‘¿Ndayá mochjofšiye?’ o ‘¿Ndayá mochtichëtjo ca?’ <sup>32</sup> Chë soyëngama, chë Bëngbe Bëtsábioye nduabuátmënga mondbétsenocochinjéna, pero tšëngaftanga ndoñe. Tšëngaftangbe Taitá, Bëngbe Bëtsá, ndayá cmojtséjabetama endétatšëmbo. <sup>33</sup> Chíyeca, tšëngaftangna natsana šmochjshëtseboše Bëngbe Bëtsá tšëngaftangbe ainaniñe chaotsemándama y lempe ntšamo cha tojamandacá šmochtsama. Chca šmojamëse, Bëngbe Bëtsá lempe ntšamo cmojtséjabetcá cmochanjátšataye. <sup>34</sup> Ndoñe matenócochinjéna ndayá yëfse yochjochnënguama. Yëfse luare cochántsebomna chë soyënga jinjama y jamama. Cada tescama endbétsemna yapa totcá soyënga jájandmanama ca” —Jesús tojánayana.

## 7

*Ndoñe ntsichámuana chë ínjenja tšabá o ndoñe tšabá tmonjamama*  
(Lc 6.37-38, 41-42)

<sup>1</sup> “Ndocá ínjenjbiama šmattschamo chë ndoñe tšabá tmontsamama. Chca, Bëngbe Bëtsá ndoñe queochátichamo tšëngaftanga ndoñe tšabá šmonjama ca. <sup>2</sup> Chë ntšamo tšëngaftanga ínjenjbiama šmojtsichamcá tšabá o ndoñe tšabá tmontsamama, cachcá Bëngbe Bëtsá tšëngaftangbiama chë ntšamo šmojamama echántschamo. Y ntšamo ínjenjbioye chašmojábiamna, uabouana o ndoñe jabuache soyënga, cachcá Bëngbe Bëtsá tšëngaftangbioye cmochanjábiamna.

<sup>3-5</sup> “Nderado canya chabe bominyiñe canye niñefja tojtsebomñese, cha ndoñe ntsobenana chabe catšata jauyanama: ‘Acbe bominyentšana canye polvështema jtsebuchjâtsécama šmolesenciá ca’. Natsana cha bontsemna cachabe bominyentšana chë niñefja jtse nobuchjâtsécana tšabá jinýama jobenayama, chabe catšatbe bominyentša polvështema jtsebuchjâtsécama. Cachcá entsemna acbiana, ¡bacna entšá chë ntšamo ndegombre tcojuabnacá ndinýinýnáyá!, chë tša bacna soye cojtsama ca acbe catšata tcojauyana ora, cach aca tša bëts bacna soyënga cojtsamama ntjenuabuoycá; y chca, aca jamana canye bacna soye. Natsana cmontsemna chë cach aca ndoñe tšabe soyënga cojtsamama ngménaca jshatenójuaboyana y chca amana jtsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama.

<sup>6</sup> “Chë Bëngbe Bëtsabe soyëngama josértama ndéboše entšanga ndoñe šmattsabuayinyaye. Aíñese nántsemna mo chë Bëngbe Bëtsabe bëts yebnoça uátšëmbona mëntšena quešënga cuaftsëbuajocá; chorna chënga jobuértanana, jobotjajuana y jtsáshantsana. O mo chë uámana ndëtšëtémënga cotšëngbiöye cuaftsëtšancá, chënga nye jtsebotájayana ca” —Jesús tojánayana.

*Šmochjotjañe, šmochjúanguo y šmochjachembo*  
(Lc 11.9-13; 6.31)

<sup>7</sup> “Šmochjotjañe y Bëngbe Bëtsá cmochanjátšataye; šmochjúanguo y šmochanjínýena; šmochjachembo y bëšáša cmochanjébëtafjo. <sup>8</sup> Er ndánaca tojtsotjanañá, jóyëngacñana; y nda tojtsenguá cha, jónýenana; y nda tojtsechembuanábioye jebiatëfjuana.

<sup>9</sup> “¿Ndëmuanyë boyabása tšëngaftanguentšá, canye tandëše chabe uaquiñá tbojtsotjanañe ora, canye ndëtšbé chábioye buanjatštaye? <sup>10</sup> ¿O canye mëtsçuaye buanjatštaye, beona tbojtsotjanañe ora? <sup>11</sup> Y chca, tšëngaftanga, bacna soye amënga, tšëngaftangbe basetémënga tšabe soyënga jatsatayama šmojtsamanëse, ¡más tšëngaftangbe Taitá, Bëngbe Bëtsá celoca endmëná, chë tmojtsotjanañënga tšabe soyënga echanjátšataye!

<sup>12</sup> “Inýëngaftaca šmochtsama ntšamo chë inýënga tšëngaftangaftaca chamotsamama šmojtsebošcá. Chca endmëna ntšamo Moisesbe leyíñe y chë Bëngbe Bëtsabe juabna oyebuambnayëngbe buatëmbana soyënguñe endayancá ca” —Jesús tojánayana.

*Chë base utëntšá bëšáša*  
(Lc 13.24)

<sup>13</sup> “Chë base utëntšá bëšášajana šmochjámashjna. Chë utëntšá bëšášajana y chë paselo jóyenama benache, infiernoye cmochanjuánatse y banga chëjana mondámashjuana. <sup>14</sup> Chë tšabe vida binýnoye jamna base utëntšá bëšášajana endmëna y ndoñe paselo jóyenama benache, y chiñe báseftanga mondbínýena.

*Chë Bëngbe Bëtsabe ndoñe ndegombre juabna oyebuambnayënga*  
(Lc 6.43-44)

<sup>15</sup> “Cuedado šmochtsebomna chë Bëngbe Bëtsabe ndoñe ndegombre juabna oyebuambnayëngbiama. Chëngna mo oveshëngcá tšëngaftangbiöye mochanjabo, pero ndegombre chënga mondmëna mo tšátjaye tjañe quešëngcá. <sup>16</sup> Tšëngaftanga betiyënga jtsabuatmana ntšamo cada ona tojtseshajcá; cachcá tšëngaftanga chcanga šmochantsëbuatma, ndayá chënga mochtsamama. Uchmašëshe betiyentšana ndoñe uvas ntjuátatabiana, ni higuëbé cardo betiyentšana. <sup>17</sup> Chca, nyetsca tšabe betiyiñe tšabe soye jashájonana; y chë ndoñe tšabeshiñna podesca soye. <sup>18</sup> Canye tšabe betiyiñe quenátopodena podesca soyënga jashájonana, ni canye ndoñe tšabe betiyiñe tšabe soyënga jashájonana. <sup>19</sup> Ndaye betiyë podesca shajuanëshe jtseshatëtšana y iñoje jtsatmetšana. <sup>20</sup> As chca tšëngaftanga chënga šmochantsëbuatma, ndayá chënga mochtsamama ca” —Jesús tojánayana.

*Bëngbe Bëtsabe amëndayoye ndoñe nyetscanga jamashjnana*  
(Lc 13.25-27)

<sup>21</sup> “Ndoñe nyetscanga chë ‘¡Utabná! ¡Utabná ca!’ atše šmojtsatsëtsnanga, Bëngbe Bëtsabe amëndayoye quemochátamashjna. Nye ntšamo atšbe Taitá, celoca endmëná, tojtsebošcá amëngna aíñe. <sup>22</sup> Quem luare jopochócama te banga atše šmochanjauyana: ‘¡Bëngbe Utabná! ¡Bëngbe Utabná! Aca jótšëmbonëse, ácbëñe betsošbuáchema, bënga fsëndoyebuambná, y ácbeyeca bacna bayëjëngbe juabna entsángbentšana fsëndëtabocana, y ácbeyeca bëts soyënga fsëndama ca.’ <sup>23</sup> Chora atše chanjójuaye: ‘Ndocna te checbaisëbuátmana. Atšbentšana mojuánanga, bacna soye ama entsanga ca’ ” —Jesús tojánayana.

*Chë uta ucuatjoniñe*

*(Mc 1.22; Lc 6.47-49)*

<sup>24</sup> “Chcasna, nda atše šojoyeuná y chë ntšamo sentsichamcá tojtsama, endmëna mo canye tšabá juabnaye boyabasacá. Chë boyabásana ndëtsbeñe chabe yebna yojajebo. <sup>25</sup> Uaftena yojuáshjango, chë béjayënga yojóftjajna, chë yebnoye puerte yojtsebinýiaye, pero chë yebna ndoñe ntjuáshajayana, chë yebna ndëtsbeñe inajéboyeca. <sup>26</sup> Pero nda atšbe palabra tojouena y ntšamo sentsichamcá ndoñe tontsama, endmëna mo canye ndëjuabnaye boyabasacá. Chë boyabásana chabe yebna cascajuiñe yojajebo. <sup>27</sup> Uaftena yojuáshjango, chë béjayënga yojóftjajna, chë yebnoye puerte yojtsebinýiaye y chë yebna uabouancá yojtsáshajaye ca” —Jesús tojánayana.

<sup>28</sup> Jesús chë soyënga jóyebuambayama tojanpochocá ora, chë entsanga ojanánënga imojtsemna ntšamo cha tojánabuatambama. <sup>29</sup> Jesús tojanabuatambá nyets obenánaca, mo canya mando bomnacá y ndoñe nye mo chë ley abuatambayëngcá.

## 8

*Jesús, canya bacna nguayanánaca šocábioye tbojanshná*

*(Mc 1.40-45; Lc 5.12-16)*

<sup>1</sup> Jesús tjoicana tojtantsmá ora, ba entsanga tmojanasto. <sup>2</sup> Chora canye boyabása bacna nguayanánaca šocá Jesúsbioye tojanobeconá, chabe delante yojoshamentšiyey y tbojaniyana: —Utabná, aca tcojtsebošëse, catjobenaye atšbe šocana jtsebojuánana ca.

<sup>3</sup> As Jesús tojanacuenyanëjaná, chë boyabásabioye tbojánbojajo y tbojaniyana: —Aíñe, séntsebošë. Šocana cbotsebojuaná ca.

Y cachora chabe šocana tbojtsanóbojuanañe. <sup>4</sup> Jesús chë shnanábioye tbojaniyana: —Mouena, ndocnábeñe cattsecuëntaye; nye chë Jerusalemoca báchnëbioye motsa, y cha cochjinýinýiye mora aca ya tšabá cojtsatsmënama. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nyetscanga chamotatsëmbona mora aca ya ndoñe šocá contsemnama ca —Jesús tbojaniyana.

*Jesús canye Romano soldadëngbe amëndayabe bochichnayábioye tbojanshná*

*(Lc 7.1-10)*

<sup>5</sup> Jesús Capernaumoye tojánamashëngo ora, canye Romano soldadëngbe amëndayá Jesúsbioye tojanobeconá canye pavorama jaimpádama. <sup>6</sup> Jesúsbioye tbojaniyana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsobësná ca.

<sup>7</sup> Chora Jesús tbojanjúá: —Cha jáshnama chanjá ca.

<sup>8</sup> As chë soldadëngbe amëndayá tbojaniyana: —Señor, atše merecido taitsatobuajoye atšbe yebnentšë chacuamashënguama; nye mayana y atšbe bochichnayá tšabá echántsmëna. <sup>9</sup> Atšbioye mándayënga atše sëndábamna y átšnaca soldadëngbe amëndayá sëndmëna. Atše canye soldado stjauyana “motsa ca”, cha cachora jana; y inya stjauyana “mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chë soye jamana ca —cha tojánayana.

<sup>10</sup> Jesús chca tojanuena ora, tojanenjananá y chë ústonënga tojanéyana: —Ndegombre cbéyana, ni mo nyets Israelentše ni canya quem boyabasacá Bëngbe Bëtsábeñe nyetsá



ošbuachiyá chiyátinýena. <sup>11</sup> Y šcuayana, shinýe bocanoicana y shinýe uenatjémbambanoicana bētsca entšanga mochanjabo, y Abraham, Isaac y Jacob, chē judiēngbe tempsca uámana bēts taitángaftaca mochanjotbiana Bēngbe Bētsabe amēndayoca, cānyīñe juasama. <sup>12</sup> Ba Israeloca entšanga, chē ndēmuanýengbiana Bēngbe Bētsabe amēndayana natsana yochtsanmēna, chocana mochantēbuacana chē ndēbinýna luaroje, infiernoje. Chentše puerte mochanjenóbošachna y chē tsetšanama juatsašēnga mochantseoftésjojnaye ca —Jesús tojánayana.

<sup>13</sup> Chora Jesús chē soldadēngbe amēndayábioje tbojaniyana: —Acbe yebnoye motsatá y chē ntšamo cojtsošbuachecá cachcá chaotsemna ca.

Cachora chē bochichnayá tšabá vojtsatsmēna.

*Jesús, Pédrēbe uambén mamábioje tbojanshná*

(Mc 1.29-31; Lc 4.38-39)

<sup>14</sup> Chentšana Jesús, Pédrēbe yebnoye tojána. Chentše Pédrēbe uambén mamá šocá calentóracca yojtsejutsnajona. <sup>15</sup> Chora Jesús chē uambén mamabe cucuatše tojánbojajo y cachora chē calentora tbojtsanóbojuanañe. Chorna chē uambén mamá tojtantsbaná y tojanontsé chēnga jobuácuedana.

*Jesús ba šoquēnga tojanashná*

(Mc 1.32-34; Lc 4.40-41)

<sup>16</sup> Chē te jaibétatama ora, Jesús yojtsemnoye banga bacna bayējēngbe juabna uambaye entšanga tmojanēnatse. Chora, nýe canýe Jesús jóyebuambayēse chē bacna bayējēnga imojtsaisebocana y nýetsca šoquēnga tojanashná. <sup>17</sup> Chca Jesús tojanma, cachcá chaotsemnama ntšamo chē Bēngbe Bētsabe juabna oyebuambnayá Isaías tojanayancá. Cha mēntšá tojánayana: “Cha bēngbe šocanēnga tonjaftsanca y bēngbe nýetsca tsetšanana chábeñe tonjanoquedá ca.”

*Chē Jesús juastama bošēnga*

(Lc 9.57-62)

<sup>18</sup> Jesús tojánanye mallajta entšanga chabe shéconana; as tojanmandá uafjajónaye chenguana jama. <sup>19</sup> Chorna, canýe ley abuatambayá Jesúsbioje tbojanobobconá y tbojaniyana: —Buatēmbayá, atše séntseboše aca juastama, ndémoye chacojtsá choye ca.

<sup>20</sup> As Jesús tbojaniyana: —Chē zorrēnga mondbomna cuevëshēnga ndayentše jtsiyenama y chē shloftšēngna uajajonēshangá, pero chē Bēngbe Bētsá Entšá tbojanbemá ndoñe quenátsbomna ndayentše jóchnama ca.

<sup>21</sup> Chora inýa, cach uatsjendayēnguentšá, Jesúsbioje tbojaniyana: —Bēngbe Utabná, šmolesenciá atšbe taitá chjshesabotbontsañe ca.

<sup>22</sup> Chora Jesús tbojanjuá: —Nýe šmasto. Chē Bēngbe Bētsabiana mo obanēngcá, ntšamo Bēngbe Bētsá yomandacá ndoñe tmontsama causa, chēnga cachēngbe obanēnga chamotsétebuantsañe ca.

*Jesús chē binýia y chē bėjaye bonguana yojétsbema*

(Mc 4.35-41; Lc 8.22-25)

<sup>23</sup> Chentšana Jesús canýe barquëshoye tojánamashēngo y chabe uatsjēndayēnga imojtsetjēmbambnaye. <sup>24</sup> Ndeolpe tša jabuache binýia chē uafjajónaye bėjayiñe yojóshjango; nýetsá jabuachana yojtsemna, chē olëshēnga barquëshá imojtsétsbotsana. Y Jesús chora inétsomañe. <sup>25</sup> As chabe uatsjēndayēnga tmojána Jesús jetsefšenama y tmojaniyana: —¡Bēngbe Utabná, šmatsebacá. Montsenatjēmbambana ca!

<sup>26</sup> Chora Jesús tojanéyana: —¿Ndáyeca tša šmojtsauatja? ¿Tša batšatema šmojtsošbuaché, Bēngbe Bētsá tšēngaftanga jujuabuáchama yobenama ca?

Chca tojanéyana y tojantsbaná. Chora tojanmandá chë binjia y chë búyeshe bonguana chaotsatsmënama, y lempe natjémbana yojsatsmëna. <sup>27</sup> Chabe uatsjéndayënga ojanánënga imojtsemna y mëntšá imojtsichamo: “¿Nda quem boyabása yomna? Cha tonjayana y chë binjia y chë búyeshe tmonjoyeuná ca.”

*Chë Gadara luaroca entsáta, bacna bayëjbe juabna uambayata*  
(Mc 5.1-20; Lc 8.26-39)

<sup>28</sup> Jesús uafjajónaye chenguana tojánashjango, canye luare Gadara ca uabáinentše. Chorna chë utabuantsánëngbentsána útata, bayëjbe juabna uambayata, tbojánbocna y Jesúsbioye tbojanobobéconata. Puerte tšatjayata ibnamna, chíyeca entsánga ndoñe ntsobenana chëjana jtsachnjëjuanana; <sup>29</sup> y chora tbojanontsé chë bacna bayëjéngbeyeca mëntšá uayebuáchana: —¿Ndayá béngaftaca cojtseboše, Jesús, Bëngbe Bëtsabe Uaquiñá? ¿Moye tcojabo bënga chafsufrima, chama cabá ndoñe chë tempo yontsemna ora ca?

<sup>30</sup> Y chentša béconana ba cotšënga inmajena y chënga inmëtsosañe. <sup>31</sup> Y chë bayëjënga Jesús tmojanimpadá: —Muentšana jésebocanama aca tcojamëse, cochjama bënga chë cotšëngbeñe fchayamashjna ca.

<sup>32</sup> Y Jesús tojanéyana: —Motsajna ca.

Chora chë bayëjënga chë boyabásatbentsána tmojésanbocana y chë cotšëngbeñe tmojánamashjna; cachora chë cotšënga batsjocana penëšëjana uafjajónayoye imojtsoshbuetše y yojsatajo.

<sup>33</sup> Chora chë cotšënga anjënënga tmojtsanacheta, y chë puebloye tmojánashjajna ora, tmojanontsé lempe ntšamo yojochnëngcá jacuéntana y ntšamo chë bayëjbe juabna uambayátaftaca tojanopasámnaca. <sup>34</sup> Chora nyetsca entsánga chë pueblentsána tmojánbocana y Jesús yojtsemnoye tmojána. Chë entsánga Jesús tmojáninje ora, tmojanimpadá chë luarentšana chaueseboconama.

## 9

*Jesús, canye jama ndobenábioye tbojanshná*  
(Mc 2.1-12; Lc 5.17-26)

<sup>1</sup> Chca tojanopasá chentšana, Jesús canye barquéshoye tojánamashëngo, uafjajónaye chenguana tojána y cachabe puebloye Capernaumoye tojtashjango. <sup>2</sup> Chora, canye jama ndobená, tjuashiñe jajoná, Jesús yojtsemnoye básefta boyabásënga tmojanamba. Jesús tojáninje chënga tša imojtsošbuáchema chë šocábioye jáshnama cha bétsobenama; as chë šocábioye tbojanianyana: “Sobreno, añemo matsca; acbe bacna soyënga tcbontsebooperdoná ca.”

<sup>3</sup> Chca causa, báseftanga ley abuátambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiamá; mo chábioye cuafjoyengucá entsemna ca.” <sup>4</sup> Pero Jesús yojtsetátšëmbo ntšamo chënga imojtsejuabnycá; chíyeca tojanéyana: “¿Ndáyeca nyetšá bacna juabnënga ainaniñe šmojtseboamna ca? <sup>5</sup> ¿Tšëngaftangbiama ndayá más paselo nántsemna tšëngaftangbe delante jayanama: ‘Acbe bacna soyënga tcbontsebooperdoná’ o ‘Matëtsbaná y motsa ca?’ <sup>6</sup> Atše cbochanjínjanyiyë ntšamo chë Bëngbe Bëtsá Entšá tbojanbemá quem luarentše mando yobomnama, entsánga bacna soyëngama jáperdonama ca” —Jesús tojanéyana.

As chë jama ndobenábioye tbojanianyana: “Matëtsbaná, acbe tjuashe mesocñe y acbe yebnoye motsatoñe ca.”

<sup>7</sup> Chorna chë jama ndobená tojtantsbaná y cachabe yebnoye yojsatoñe. <sup>8</sup> Chca tmojáninjama chë entsánga auatjanánënga imojtsemna y Bëngbe Bëtsá imojtsatschuanaye, cha chca obenana entsánga tojánatšatama.

*Jesús, Matéobioye tbojanchembo chabuastama*  
(Mc 2.13-17; Lc 5.27-32)

<sup>9</sup> Jesús chentšana tojtsanoñe y canye entšábioye tbojáninje, Mateo ca uabainá, chë Romocama impuesto entšángbioye atjanayentše inétsotbemañe. Chora Jesús tbojanianya: “Šmasto ca.” As Mateo chentšana tojéftsantsbaná y tbojanasto.

<sup>10</sup> Jesús cach Mateobe yebnentše yojtseye ora, banga Romocama impuesto entšángbioye atjanayenga y ínjenja bacna soye amenga tmojánashjajna y meséshentše Jesús y chabe uatsjéndayéngaftaca imojotbiamá. <sup>11</sup> Chë fariseunga chca tmojáninje ora, Jesusbe uatsjéndayéngbioye tmojanatjá: —¿Ntšamo chca yojtsemna, tšéngaftangbe buatëmbayá chë impuesto atjanayenga y bacna soye améngaftaca entsesá ca?

<sup>12</sup> Jesús chca tojanuena y chë fariseunga tojanéyana: —Chë salud bomnenga ashnayá ndoñe ntsëjabótana, pero chë šoquenga aíñe. <sup>13</sup> Šmochjá y ntšamo ndegombre iuayanca šmochjuatsjinje quem Bëngbe Bëtsabe uabemana palabrenguiñe:

Atše séntseboše tšéngaftanga lastemadenga chašmotsemna,

y ndoñe nje bayenga chašmotsébánaye Bëngbe Bëtsá jëtschuayama ca.

Atše ndoñe chiyátabo chë Bëngbe Bëtsabe bominyiñe tšabá amenga jabáchembuama, sinó chë bacna soye amenga imomna ca juabnayenga jabáchembuama ca —Jesús tojánayana.

*Jesús tmojantjá chë Bëngbe Bëtsáftaca jencuéntama tondaye saytescama*

*(Mc 2.18-22; Lc 5.33-39)*

<sup>14</sup> Chentšana, Juan chë Ubayanabe ústonenga tmojanobeconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuéntama. ¿Ndáyeca acbe uatsjéndayenga ndoñe chca ca?

<sup>15</sup> As Jesús tojanéjua: —Chë casamentoye ófjanenga chë boyabása bouamná chéngaftaca tojtsemnëntscuana, chéngbioye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentšana mochantsánatseñe; chora cocayé chë ófjanenga tondaye más jasama quemochátsbomna. Ntšamo chë tojobouamá cha y chë ofjanéngaftaca endmëncá, cachcá endmëna atše y atšbe uatsjéndayéngaftacnaca.

<sup>16</sup> “Ndocná canye uatanguá entšayá base tsëm entšéjuaca jtarmëndana. Er chë tsëm entšéjua jtsabéconana y chë uatanguá entšayá más jtsatanécanana, y chca chë uátanëcniñe más bëtsiñe jtsabemana. <sup>17</sup> Y cach ndoñe chë tojtseshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshébëfjuana y chë vínoye jtsabuáshana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámana; y chca, chë jasabenga y chë vínoye jtsoservénana ca” —Jesús tojánayana.

*Jesús canye shembásabioye tbojanshná y tojanma Jairëbe bembetema cháuatayenama*

*(Mc 5.21-43; Lc 8.40-56)*

<sup>18</sup> Jesús entšanga yojtsetsëtsnantscuana, chë judiëngbe enefjuana yebnentša canye mandayá tojánashjango y Jesusbe shecuatšentše yojoshamentšiyë. Chë mandayá tbojanianya: “Atšbe bembe tontsóbana. Diosmanda atšbe yebnoye mabo; cochjabojajo y cha echántayena ca.”

<sup>19</sup> Chentšana Jesús y chabe uatsjéndayenga chë mandayá tmojanasto. <sup>20-21</sup> Imojtsaye ora, canye shembása stëtšoicana Jesúsbioye yojobeconá. Bnétsana uta uatama oboftjajuanánaca cha inapadecena. Chë šocá Jesúsbioye yojobeconá ora, yojtsejuabnaye: “Masque nje mo chabe entšayá sibiájua chaijuábojajo, salud chantinjena ca.” Chentšana chë šocá Jesusbe entšayá tojanábojajo.

<sup>22</sup> Tojanábojajo ora, Jesús tojanobuértana, chë shembásabioye tbojáninje y tbojanianya: “Añemo matsca, shembása. Bëngbe Bëtsábeñe icošbuachéyeca, mora tšabá contsatsmëna ca.” Y cach orscana cha tšabá yojtatsmëna.

<sup>23</sup> Chënga tmojtëtanontsé ayana y chora chë mandayábioca chënga tmojánashajna. Chentše Jesús tojánanye, ínÿengna chë veloriamá imojtsanflautaye y ínÿengna tša imojtsošachiye. <sup>24</sup> Chora Jesús tojanéyana: “Muentšana mobocnënga. Chë shembásetema cabá ndoñe obaná quenátsmëna; nÿe endëtsomañe ca.”

Pero chë entšanga Jesúsbioye nÿe imojtsáfchaye. <sup>25</sup> Pero Jesús pronto chënga chë yebnentšana tojanëbuacna. Chora Jesús tojánamashëngo chë shembásetema yojtsemnoye; cucuatše tbojanábuacueshache y cachora chë shembásetema tojtantsbaná. <sup>26</sup> Y nÿets chë luarëjana ndayá Jesús yojamama nÿetsca entšanga imojátatšëmbona.

#### *Jesús uta jtanata tojanashná*

<sup>27</sup> Jesús chentšana tojëftsanbocna ora, uta jtanata tbojanasto y mëntšá ibojtsaiuáye-buache: —¡Davídbentšana Entšá, bëndata šmotsalastemá ca!

<sup>28</sup> Jesús chë yebnoye tojánamashëngo ora, chë jtanata tbojanóbobeconata. As Jesús tojanatjá: —¿Tsëndata šojtsošbuaché atše chca jamama chjobenaye ca?

Y tmojanjuá: —Arseñor. Aíñe ca.

<sup>29</sup> Chora Jesús tojánabuchbojajo y tojanéyana: —Ntšamo tsëndatbe ošbuáchiyana yomncá, cachcá chaotsemna ca.

<sup>30</sup> Y cachora jinÿama ibojtsobena. Jesús bëtscá chata mëntšá tojanamëndá: —Ndocná más quem soye chaondëtsetatšëmbo ca.

<sup>31</sup> Pero chata chentšana tojëftsanbocna y cachora tbojanontsé ndayá Jesús chátaftaca tojanmama nÿets chë luarëjana jacúntana.

#### *Jesús, canÿe ndëbiábioye tbojanshná*

<sup>32</sup> Chë jtanata ibojtsebocanëntscuana, básefta entšanga canÿe ndëbiá, bacna bayëjbe juabna uambayá, Jesúsbioye tmojanamba. <sup>33</sup> Jesús chë bacna bayëja chárentšana tbojtanábocna y cachora chë ndëbiá tojtanontsé oyebuambnayana. Entšanga ojanánënga imojtsichamo: “¡Ndocna te Israelentše chca bëts soye chemuáisinÿe ca!”

<sup>34</sup> Pero chë fariseunga imojtsichamo: “Cach bacna bayëjengbe amëndayá, Satanás, muábioye obenana tbojatštá chë bayëjenga entšangbentšana jtëbuacanama ca.”

#### *Jesús entšangbiama tbojanongmé*

<sup>35</sup> Jesús nÿetsca pueblënguëjana y luarënguëjana yojtsachnëjuana y chë judiëngbe nefjuana yebnënguenache entšanga yojtsabuátambaye. Yojanabuayiyná chë tšabe noticiënga Bëngbe Bëtsabe amëndayama, y nÿetsca šocanëngama y tsetšanama yojánashnaye. <sup>36</sup> Y chë entšanga tojánanye ora, puerte tbojanongmé. Er chënga imojtsemna mo abujénÿa ndbomna oveshëngcá, puerte uamëntšnayënga ba soyëngama padecena causa, y chaujúabuachama ndocná ntsebomncá. <sup>37</sup> Chora chabe uatsjëndayënga tojanéyana: “Canÿe bëts jajañe bëtscá játbanama entsemna, pero peonga nÿe báseftanga. Cachcá quem luarentše, bëtscá entšanga Bëngbe Bëtsábioye nduabuátmënga montsemna, y chëngbioye chabiamá abuayiynayënga nÿe báseftanga. <sup>38</sup> Peonga tmojtsashbenëse chë nduíñbioye jaimpádana ba peonga chauichamoma chë jaja saná játbanama. Cachcá, Bëngbe Bëtsábioye moimpadanga ba abuayiynayënga chauichamoma, quem entšanga chábioye chamúbuajama ca” —Jesús tojanéyana.

## 10

#### *Jesús chë bnëtsana uta uatsjëndayënga tojanabacacá*

(Mc 3.13-19; Lc 6.12-16)

<sup>1</sup> Chentšana Jesús tojánachembo chabe bnëtsana uta uatsjëndayënga, y obenana tojanatšatá bacna bayëjengbe juabna entšangbentšana jtabocnama y nÿetsca šocanëngama y tsetšanama jashnayama.

<sup>2</sup> Chë bnëtsana uta uatsjëndayënga mëntšá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe

uaquiñata; <sup>3</sup> Felipe y Bartolomé; Tomás y Mateo, chë Romocama impuesto entšángbioye atjanayá; Santiago, Alfeobe uaquiñá y Tadeo; <sup>4</sup> Simón, chë celote ca uabobainá y Judas Iscariote, chë uayayëngbe cucuatšíñe Jesúsbioye boshjuaná.

*Jesús, chabe bnétsana uta uatsjédayënga tojanichamó, Bëngbe Bëtsabe amédayama jábuayenama*

*(Mc 6.7-13; Lc 9.1-6)*

<sup>5</sup> Jesús chë bnétsana uta boyabásenga tojanichamó chë tšabe noticiënga entšanga jabuátambama, y mëntšá tojanabuayená: “Chë ndoñe judiëngbeñe ndoñe šmattsana y ndaye pueblentše Samaria luaroca ndoñe šmatjéftsamashjna. <sup>6</sup> Nye Israeloca pueblëngoye šmochjá. Choca entšanga mo ótsena oveshëngcá montsemna, Bëngbe Bëtsábioye corente nduabatma causa. <sup>7</sup> Šmochjá y entšanga šmochjábuayenaye Bëngbe Bëtsabe amédayana echanjóshjanguama. <sup>8</sup> Chë šoquënga šmochjášnaye, šmochjama chë obanënga chámuatayenama, bacna nguayanánaca šoquënga šmochjášnaye y bacna bayëjëngbe juabna entšángbentšana šmochtábocna. Chë obenana šmonjójyëngacñe tondaye ntjëtšajuacá; cachcá, chë soyënga šmojtsamama tondaye entšanga šmattsayëngacaye.

<sup>9</sup> “Ndoñe šmattsambaye crocénana uasnanëchiñe. <sup>10</sup> Ni shecnaja sanaca benachiñama, ni inye entšayá jtsenomódama, ni shecchëtjonëshënga, ni jatjonëfja, er chë tšabe trabajayá jtsomerecénana ntšamo tbojtsajabotcá jójyëngacñama.

<sup>11</sup> “Nderado canye bëts pueblentše o base pueblentše chašmojášhajna ora, šmochjánguango canye tšabe entšá, ín'yëngbioye ndaingñayá, y chabe yebnentše šmochtsoquedañe, inye puebloye játantscuana. <sup>12</sup> Canye yebnoye chašmojámashjna ora, nyetsca chentša oyenënga mëntšá šmochjácheuaye: ‘Chë bëngbe ainaniñe tšabe ebionana tšëngaftangbe ainaniñe chaotsemna ca.’ <sup>13</sup> Chë yebnentša entšanga ainaniñe tšabe ebionana jtsebomnama merecido tmojtsebuajonëse, chë tšëngaftangbe ainaniñe tšabe ebionana chëngaftaca chaotsemna. Ndóñesna, nye cach tšëngaftangftaca chaotsomñe. <sup>14</sup> Y nderado canye pueblentše o bëts pueblentše chë entšanga ndoñe tcmonjúbuaia y ndoñe tcmonjójyaunase, chentšana šmochjésebocana y chë shecuatšentša polvëshe šmochjésenstoto. Chca, chë entšanga mochántsetatšëmbo chënga tšëngaftangftaca ndoñe tšabá tmonjamama. <sup>15</sup> Ndegombre šcuayana, quem luare jopochócama te, chë ndoñe chacmonjúbuaia y ndoñe chacmonjójyauná entšanga Bëngbe Bëtsá puerte jabuache echantsacastígaye, y chë bacna entšanga Sodoma y Gomorra luaroquëngna ndoñe nya nyëtšá jabuache queochatacastígaye ca” —Jesús tojánayana.

*Ntšamo chë uatsjédayënga mochjansúfria*

<sup>16</sup> “Šmochjouena. Atše cbontsachamná mo oveshënga cuenta tjañe quešëngbeñe. Chíyeca studio bomnënga mo mëtscuayëngcá šmochtsemna y uamanënga mo palomatemëngcá. <sup>17</sup> Entšángbiamá cuedado šmochtsebomna, chëngbe pueblentša amédayëngbe cucuatšíñe tšëngaftanga cmochanjábashejuana y chëngbe enefjuana yebnënguenache cmochanjátsetšenaye. <sup>18</sup> Atšbe ústonënga bëtsemnama, mandadëngbioye y reyëngbioye cmochanjutatse. Y chca, tšëngaftanga šmochanjobenaye chëngbeñe y chë ndoñe judiëngbeñe ntšamo atšbiamá šmotatšëmbcá jójyebuambayama. <sup>19</sup> Pero chë mandadëngbe cucuatšíñe chacmojábashejuana ora, ntšamo o ndayá šmochjayanama ndoñe šmattsenócochinýena. Chca orna, Bëngbe Bëtsá tšëngaftanga cmochanjabuayená ntšamo o ndayá jójyebuambayama. <sup>20</sup> Tšëngaftanga ndoñe chë oyebuambayënga quešmochátsmëna, sinó chë tšëngaftangbe Taitá, Bëngbe Bëtsabe Espíritu, tšëngaftangbiajana echantsójyebuambayana.

<sup>21</sup> “Y canye entšá cachabe catšátbioye uayayëngbe cucuatšíñe bochanjáboshjona chamotsóbama; y canye taitá cachabe uaquiñábioynaca. Y chë básenga chëngbe bëtsëtšangbe contra mochántsemna y uayayëngbe cucuatšíñe mochanjábashhejuana chamotsëbáyama. <sup>22</sup> Tšëngaftanga atšbe ústonënga bëtsemnama, nyetsca entšanga

cmochantsébuayënja; pero nda nyets tempo átsbeñe ošbuachiyá chaotsomñá, atsbocaná echántsemna. <sup>23</sup> Canye pueblentse chacmojtsécamera ora, inye puebloye šmochtsacheta. Ndegombre cbéyana, Israelentša nyetsca pueblëngoye cabá nda ora, chë Bëngbe Bëtsá Entšá tbojanbemá ya quem luaroye echanjabáshjango.

<sup>24</sup> “Ni canye uatsjendayá chabe buatëmbayabiamá más uamaná ntsemnana, ni chë oservená chabe nduiñbiamá más uamaná. <sup>25</sup> Chë uatsjendayá ya cachabe buatëmbayacá jtsemnana tojashjáchése, ndayá más nanjatsboše. Cachcá endmëna chë oservenáftaca, cachabe nduiñcá tojtsemnëse. Atše sëndmëna mo canye yebnentša taitacá y tšëngaftangna mo cach yebnentša basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntsámo chënga tšëngaftanga cmochtsëbobuatma ca?” —Jesús tojanéyana.

*Nda ndegombre cuantsebiauatja*

*(Lc 12.2-7)*

<sup>26</sup> “Chíyeca entšangbiamá ndoñe matauatjëngana. Chë yoiytémëna soyentsána tondaye ntjinýcá queochaisoquéda, y chë ndótatsëmbo soye, ntsotatsëmbcá queochaisoquéda. <sup>27</sup> Chë mora cbontsëtsësná soyënga, chë entšangbiamá mo ibetiñe cuaftsemncá soyënga, tšëngaftanga šmochjama entšanga botamana chama chamotsetatsëmbuama. Y chë iytëcana cbontsëtsësná soyënga nyetsca entšanga šmochtsabuayiynaye, mo nda canye yebnentša tsbanánocana noticiënga tojtsayebuachcá. <sup>28</sup> Ndoñe matauatjëngana nye chë tšëngaftangbe cuerpo japochócama imobenëngbiamá y ainana jtsepochoçama ndoñe ntsoyëngana. Más šmochtsëbiauatja chë nda endobena tšëngaftangbe cuerpo y tšëngaftangbe ainana jtsepochoçama, nyetsca tescama infiernoca.

<sup>29</sup> “Uta jaja shloftšëtëmata nye canye denario crocenánama mondbétsena. Masque chca, ni cányetema obanatemala fshantsoye jotsatšana, tšëngaftangbe Taitá, Bëngbe Bëtsá ndoñe tontsebošëse. <sup>30</sup> Y tšëngaftangbiamá, Bëngbe Bëtsá botamana jtsantješnana, y chca, cha lempe tšëngaftangbiamá jtsetatsëmbuana, bueta stjënashënga tšëngaftangbe bestšašinë yomnámna. <sup>31</sup> Chíyeca ndoñe matauatjëngana, tšëngaftanga ba jaja shloftšëtëmëngbiamá corente más šmonduámna ca” —Jesús tojánayana.

*Ndabiamá Jesucristo yochjayana chabe entšá yomna ca*

*(Lc 12.8-9)*

<sup>32</sup> “Nda atšbe entšá yomna ca entšangbe delante tojayanabiamá, átšnaca, atšbe Taitá, chë celoca endmënabe delante chanjayana cha atšbe entšá yomna ca. <sup>33</sup> Pero nda entšangbe delante atšbe entšá ndoñe yondmëna ca tojayanabiamá, átšnaca, atšbe Taitá, chë celoca endmënabe delante chanjayana cha atšbe entšá ndoñe yondmëna ca” —Jesús tojanéyana.

*Jesube causa, entšangbeñe más jtsentsjanayana*

*(Lc 12.51-53; 14.26-27)*

<sup>34</sup> “Ndoñe šmattsejuabnaye atše quem luaroye tijabo nyetsca entšanga natjëmbana chamotsiyenama. Atše chama ndoñe chiyátabo; atše sënjabo causa, entšanga más mochántsejtsjanaye. <sup>35</sup> Atše sënjabo chë uaquiñá cachabe taitabe contra chaotsemnana, chë bembé cachabe mamabe contra y chë bebinuá chabe uambén mamabe contra chaotsemnana. <sup>36</sup> Y chca, ba entšangbe uayayënga cachëngbe pamíllanga mochántsemna.

<sup>37</sup> “Nda cachabe taitá o mamábioye atšbiamá más tbojtsebobonshánëse, cha ndoñe ntsoyëngana atšbe entšá jtsemnana. Nda cachabe uaquiñá o bémbëbioye atšbiamá más tbojtsebobonshánëse, cha cach ndoñe. <sup>38</sup> Y nda nyetsca chabe quem luare soyënga ndoñe tonjësebošjona atše juastama, y atšbiamá jasúfriama ndoñe tontseprontana y cruciñe jobanámna, cha ndoñe ntsoyëngana atšbe entšá jtsemnana. <sup>39</sup> Nda tojtsentšëna quem luarentse bëtscá soyënga jtseboynama y atšbiamá jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem

luarentša soyënga cachcá tojesonýá atše juastama, masque chaóbana, chë nyetsca tescama yomna tšabe vida echántsebmoma ca” —Jesús tojánayana.

*Chë uacanana soyënga  
(Mc 9.41)*

<sup>40</sup> “Nda tšëngaftanga chacmojúbuaja, átšnaca cha šochanjofja; y nda atše chašojofja, chë nda šojichmóbioynaca cha bochanjofja. <sup>41</sup> Nda canýe Bëngbe Bëtsabe juabna oyebuambnayábioye tbojoyeuná, cha chca bétsemnama, chábioye Bëngbe Bëtsá canýe uacanana soye bochántatšetaye, mo cach Bëngbe Bëtsabe juabna oyebuambnayabe uacanana soycá. Y nda canýe nyetsca soyënguiñe tšabá amábioye tbojofja, cha chca uamanama, chábioye Bëngbe Bëtsá canýe uacanana soye bochántatšetaye, mo cach nyetsca soyënguiñe tšabá amabe uacanana soycá. <sup>42</sup> Y ndánaca, tšëngaftanguentšá canýe nduamanábioye masque nýe mo base búyeshtema tbojuabuatšetá, atšbe ustoná bétsemnayeca, ndegombre Bëngbe Bëtsá canýe uacanana soye chábioye bochántatšetaye ca” —Jesús tojánayana.

## 11

*Juan chë Ubayanabe ichmónënga  
(Lc 7.18-35)*

<sup>1</sup> Jesús tojanpochocá chabe bnétsana uta uatsjédayënga jábuayenama, y chentšana tojtsanoñe chë luariñe pueblënguenache oyena entšanga Bëngbe Bëtsabe palabra jabuá-tambama y jábuayenama.

<sup>2</sup> Chë tempo Juan chë Ubayaná cárceloye tmojanëtame. Choca cha yojouena ndayá Jesús yojtsamama. Y as, Jesús yojtsemnoye, básefta chabe ústonënga tojanichamó, <sup>3</sup> mëntšá jatjayama: —¿Aca ndegombre cojtsemna chë jabama ibojanmëná, chë Uámana Uabuayaná, o šojtsamna ínýabiana jatobátmama ca?

<sup>4</sup> Chca tmojantjá orna, Jesús tojanéjua: —Šmochjá y Juan šmochjauyana ntšamo šmojouena y šmojinýcá. <sup>5</sup> Cha šmochjacuénta: Chë jtanënga tšabá entsatëbinýna, chë coshetënga tšabá montsatana, chë bacna nguayanánaca šoquënga shnánënga montsatsmëna y chë tësmënga montsuenana, chë obanënga tmontayena y chë ndbom-nëjmëngbioye chë tšabe noticiënga montsabuyayiná ca. <sup>6</sup> ¡Puerte oyejuayá chaotsemna chë nda atše bacna soye ndoñe stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanéyana.

<sup>7</sup> Chënga tmojtsatanoñe ora, Jesús tojanontšé Juanbiana chë entšanga jáuyanana, mëntšá: “Juan jinýama šmojánbocana ora, ¿ndayá jinýama chë entšanga ndoyena luaroye šmojánbocana? ¿Canýe entšá ainaniñe tondaye añemo ndbomná, mo canýe šëse bínýiaca shatiyeynëšcá? <sup>8</sup> Y ndóñese, ¿ndayá jinýama choye šmojánbocana? ¿Canýe boyabása uámana entšayaca bopormaná? Ndoñe. Tšëngaftanga šmondétatšëmbo chë boyabásënga uámana entšayaca bopormánëngna chë mándayëngbe yebnënguiñe mondbétsiyenama. <sup>9</sup> Y asna, ¿ndayama choye šmojánbocana? ¿Canýe Bëngbe Bëtsabe juabna oyebuambnayá jinýama? Ndegombre, aíñe; y cbéyana, ndegombre cha canýe Bëngbe Bëtsabe juabna oyebuambnayabiana más bëtsá endmëna. <sup>10</sup> Cha, Juan, endmëna ndabiana Bëngbe Bëtsá chabe uabemana palabrënguiñe tojánayana mo chabe ichmonacá, mëntšá tojánayana ora:

Cristo, atšbe entšá natsana sënjichmó acbiana chaóyebuambama, entšanga jábuayenama aca jabama ainaniñe tšabe juabnéngaca chamotseprontánama ca.

<sup>11</sup> Ndegombre cbéyana: Nyets tempo entšangbeñe, ndocná quenátsmëna Juan chë Ubayanabiana más bëtsá; masque chca, Bëngbe Bëtsabe amëndayoca chë más batšá uamaná, más bëtsá echántsemna ntšamo mora Juan yomnama.

<sup>12</sup> “Juan chë Ubayaná tojánabo orscana méntscõñama, bëtscá entsãnga tša mondboše Bëngbe Bëtsabe amëndayoye jamashënguama, y chë Bëngbe Bëtsabe amëndayama contra imomnëngna, chëngbe nyets añémoca montseboše chë mándayana jtsepochócama. <sup>13</sup> Juan candabëntscuana, nyetsca Bëngbe Bëtsabe juabna oyebuambnayënga y Moisesbe Ley nye Bëngbe Bëtsabe amëndayama tmonjanobuambá. <sup>14</sup> Y tšëngaftanga chë soyënga jóyëngacñama šmojtsebošëse, Juan entsemna chë Bëngbe Bëtsabe juabna oyebuambnayá Eliascá, chë jabama ibojamná. <sup>15</sup> Chë jouenama tmojtsobenënga, chamouena ca” —Jesús tojánayana.

<sup>16</sup> Mëntšánaca Jesús tojánayana: “¿Ndayacá morsca entsãnga imomna? Chënga mondmëna mo chë plazëngoca mondbetsetbiámama basetemëngcá; chënga chëngbe enutëngbioye jtsayebuáchana <sup>17</sup> y mëntšá jtsichámuana: ‘Tšëngaftangbiamama fsënjaflautá y ndoñe chešmatslantsá; ngmënaca fsënjaversiá y ndoñe chešmatošachna ca.’ <sup>18</sup> Juan tonjánabo, y bëtscá entsãngbeñe ndoñe quenjatamana ni jasana, ni jofšiyana, y entsãnga montsanichamo chana bacna bayëjbe juabna uambayá yojamna ca. <sup>19</sup> Morna, chë Bëngbe Bëtsá Entšá tbojanbemá tonjabo, y chana añe entsamana bëtscá entsãngbeñe jtsesayana y jtsofšëšnyana, y entsãnga montsichamo chana yapa uasayá y vínoye tmoyá entsemna ca y Romocama impuesto entsãngbioye atjanayënga y bacna soye amëngbe amigo ca. Pero Bëngbe Bëtsá endbétsinñanñayaye cha nyets osertánana bomná yomnama, chë ndayá cha tojama ora ndayá chentšana tojóbcna soyëngaca ca” —Jesús tojánayana.

*Chë nduauenana entsãnga*

*(Lc 10.13-15)*

<sup>20</sup> Chentšana Jesús tojanontsé jucácanana chë entsãnga, ndëmuanýënga imojoyena chë pueblënguiñe ndayenache ba chabe bëtš soyënga tojanma, chënga bacna soyënga amana ndoñe tmontsanajbanama y Bëngbe Bëtsabe benache ndoñe tmontanishachama. Mëntšá yojsichamo: <sup>21</sup> “¡Tša lastema, Corazín puebloca entsãngbiamama! ¡Tša lastema, Betsaida puebloca entsãngbiámna! Chë chentše sënjama bëtš soyënga, Tiro y Sidón bëtš pueblënguentše matënjochnënguse, chentša bacna entsãnga ya tempo ngmënaca matmëntenojuabó chëngbe bacna soyëngama y Bëngbe Bëtsabe benache matmëntishache; y chca tmojamama chaotsótatšëmbuama uajojšha entsãyangaca matmëntopormanga y chëngbe bestšašinë jatinýá matmënjenotbótoto. <sup>22</sup> Pero ndegombre cbéyana, ntšamo entsãnga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëtš castigo šmochántsebmna, chë Tiro y Sidonoca bacna entsãngbe castiguama. <sup>23</sup> Y tšëngaftanga, Capernaumoca entsãnga, ¿šmojtsejuabná celóntscoca atsebánanënga šmochtsemna ca? ¡Chë uabouana infiernoye cmochantsésetjango! Chë muentše sënjama bëtš soyënga Sodomoca matënjochnënguse, choca entsãnga ya tempo ngmënaca chëngbe bacna soyëngama matmëntenojuabó y Bëngbe Bëtsabe benache matmëntishache, y chë bëtš pueblo cabá cachcá mëntscuana mantsomñe. <sup>24</sup> Pero ndegombre cbéyana, quem luare jopochócama te, Bëngbe Bëtsá puerta jabuache cmochantsacastígaye, y chë Sodoma luaroca entsãngbioye ndoñe nyetsá jabuache quemochatacastígaye ca” —Jesús tojánayana.

*“Atšbioye mabënga y šmochjóchna”*

*(Lc 10.21-22)*

<sup>25</sup> Chë tempo, Jesús tojánayana: “Atše cbatschuá, Taita, celoca y quem luarentša Utabná. Aca, chë nye batšá tatšëmbënga tcojanñanýé, chë tša tatšëmbënga y osertánëngbiamama tcojaiytëme soyënga. <sup>26</sup> Añe, chama cbontsadorana, Taita, chca chaotsemnama tcojábosënyeyca.

<sup>27</sup> “Atšbe Taitá lempe chca šonjatštá. Chë Uaquiñábioye ndocná corente quebnatábutma; nye chë Taitá añe. Y chë Taitábioye ndocná corente quebnatábutma; nye chë Uaquiñá añe, y ndábioye chë Uaquiñá tojtseboše nda chë Taitá yomnama jinñanñiyama, chánaca chë Taitábioye bochantšábutma.



<sup>28</sup> “Atšbioye mabënga nyetsca tšëngaftanga uamëntšnayënga y bëtská trabajo uang-ménënga, y atše chanjama tšëngaftanga chašmochnama. <sup>29</sup> Ntšamo canye entšá, uacná yuguëšiñe juabatsëcana juanatsama, cachcá, tšëngaftanga atše šmochjaleséncia jobnatsayama y jabuátambama. Atšbentsana šmochjuatsjinýe: atše uantado mëná sëndmëna y ndoñe quetsatamana yapa uamaná jatenobiamnayana. Y chca, tšabá jóchnama šmochantsobena y ainaniñe más añemo šmochántsebmna. <sup>30</sup> Mo canye uacnacá, ndoñe tishuta yuguëšeca o ndoñe uauta uasmanéshaca, paselo jama jobenayana, cachcá tšëngaftanga šmochántsemna atše cbojtsabnatsana y cbojtsabuátambase; y chca, tšëngaftanga más oyejuayënga šmochántsemna y más paselo nyetsca soyënga jamama echántsemna ca” —Jesús tojánayana.

## 12

### *Jesusbe uatsjédayënga ochnayté trigo tmojanátabebe*

(Mc 2.23-28; Lc 6.1-5)

<sup>1</sup> Chë tempo, Jesús canye ochnayté canye jajajana yojtsachñëjuana. Chabe uatsjédayëngna shéntseca imojtsemna, chíyeca tmojanontsé trigo juatabebiana y chë meshënga jasana. <sup>2</sup> Chë fariseunga chca tmojaninýe ora, Jesús tmojanianya: —Minýe, acbe uatsjédayënga canye soye montsama y chë soye ochnayté jamama ndoñe quenátslesenciana ca.

<sup>3</sup> As Jesús tojanéyana: —¿Ndoñe šmëndualía y šmondétatšëmbo ndayá David y chabe enutënga tmojanmama, shéntseca imojtsemna ora? <sup>4</sup> Chca orna, David, Bëngbe Bëtsabe bëts yebnoye yojámashëngo y chë Bëngbe Bëtsá chentše yojamnama inýinýnaye tandëšënga yojase. Chë tandëše nýe ndánaca jasama ndoñe yonjalesenciana, ni David-biama, ni chabe enutëngbiama. Nýe bachnangbiama belesenciana chë tandëše jasama. Masque David chca tojanma, Bëngbe Bëtsá chora ndoñe tonjánayana David canye bacna soye tojanma ca. <sup>5</sup> ¿O ndoñe šmëndualía y šmondétatšëmbo, Moisesbe leyiñe, chë bachnanga ochnayté Bëngbe Bëtsabe bëts yebnentše jtsetrabájayana, pero ndoñe bacna soye ntsemnana chë bachnanga ochnayté ndoñe mondbóchnama? <sup>6</sup> Y atše šcuayana: Muentše canya entsemna, cha chë Bëngbe Bëtsabe bëts yebnentša bachnangbiama más uamaná endmëna y chabe amëndayoca soyënga más entsámama chë bachnangbe mándayentša soyëngama. <sup>7</sup> Bëngbe Bëtsabe uabemana palabrënguñe mëntšá endayana: Atše séntseboše tšëngaftanga lastemadënga chašmotsemna, y ndoñe nýe bayënga chašmotsëbánaye Bëngbe Bëtsá jëtschuayama ca. Ntšamo chiñe entsayancá ndegombre cmojtsësertánëse, tšëngaftanga ndoñe chëngbe contra šmattsichamo, chë ochnayté chca tmojtsamëngbiama. <sup>8</sup> Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca —Jesús tojánayana.

### *Chë buashana cucuatše bomna entšá*

(Mc 3.1-6; Lc 6.6-11)

<sup>9</sup> Chentšana Jesús tojtsanoñe y chentša judiëngbe enefjuana yebnoye tojánamashëngo. <sup>10</sup> Chentše yojtsemna canye boyabása buashana buacuatše bomná. Chë fariseunga imojtsenguaye ndayánaca, as chca chënga jtsebomnama ndaye sóyeca Jesús mal jaquédama. Chcasna, chora chënga Jesús tmojantjá: —¿Queojtselesenciana canye ochnayté šocá jáshnama ca?

<sup>11</sup> Y Jesús tojanéjua: —¿Nda tšëngaftanguentšá, canye oveshá tbojtsebmna y nýa chë ochnayté canye fshantsentše atëfjnoye chë oveshá tojtsótsatše, chora chë boyabása nanjá o ndoñe chë oveshá jatábocnama? <sup>12</sup> ¿Entšá oveshabiana puerte más uamaná endmëna! Chcasna, entelesenciana chë ochnayté tšabe soye jamama ca —Jesús tojanéyana.

<sup>13</sup> Chora Jesús chë buashana buacuatše bomnábioye tbojanianya: “Macuenyanëjana ca.” Y chë boyabásana tojanacuenyanëjaná y chora chëtša tšabá yojtsatamna mo cach

injetšacá. <sup>14</sup> Pero chë fariseunga tmojésanbocana ora, tmojanontsé juabnayana ntšamo jamëse Jesús jóbama.

*Ndayá chë Bëngbe Bëtsabe juabna oyebuambnayá Jesusbiana tojánayana*

<sup>15</sup> Jesús chë soye tojántatsëmbona ora, chentšana tojtsanoñe y ba entšanga tmojanasto. Nyetsca šoquënga tojanashná, <sup>16</sup> y tojanamëndá chabiana entšangbeñe ndoñe chamondëtsóyebuambnama. <sup>17</sup> Chca tojanamëndá, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana:

<sup>18</sup> Muentše atšbe oservená entsemna. Atše cha sënjabocacá, atšbe bonshaná, y atše corente chabiana sëntsoyejuá.

Atše chanjama atšbe Espiritu chabe ainaniñe chaotsemnama y entšanga echanjabuayená, Bëngbe Bëtsá nyetsca luarënguentsana entšangbiana yochjayanama chënga tšabá o ndoñe tšabá tmonjamama.

<sup>19</sup> Cha ndoñe queochátayajuatsana, ni queochátschembumbuana. Chabe oyebuambnayana tsáshenañe ndocná queochatuena.

<sup>20</sup> Mo nda chë atcana šëše ndoñe más jatsndbemana, chë ndobenënga cha ndoñe queochátapochocaye.

Mo nda chë quinýenëfjua nye uabojátšena uajuinýnëfjua ndoñe ntsafsanana, chë Bëngbe Bëtsabeñe jtsošbuáchiyama imojtsebojátšangbe obatmanana chábeñe, cha ndoñe queochátabuajuanaye.

Cha nyets añémoca echanjëftsetrabája, entšanga chëngbe ainaniñe Bëngbe Bëtsabe ndegombre soyënga chamóyëngacñëntscuana.

<sup>21</sup> Y nyetsca luarënguentsana entšanga chábeñe mochantsobátmana ca —cha tojánayana.

*Fariseunga tmojánayana Jesús Satanásbentšana obenana tojanóyëngacñe ca (Mc 3.20-30; Lc 11.14-23; 12.10)*

<sup>22</sup> Chora, Jesús yojtsemnoye canye boyabása jtaná y ndëbiá tmojanánatse. Chana bacna bayëjbe juabna uambayá inamna; y Jesús chábioye tbojanshná, chabuatabínýnama y chabuatauénanama. <sup>23</sup> Y nyetsca entšanga ojnánánënga imojtsichamo: “¿Mua yojtsemna chë Davidbentšana Uámana Entšá, chë Cristo ca?”

<sup>24</sup> Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjngbe amëndayá, quem boyabásabioye obenana tbojatštá chë bayëjnga chauatëbuacnama ca.”

<sup>25</sup> Y Jesús yojtsetátšëmbo ntšamo chënga imojtsejuabnayama; as tojanéyana: “Canye amëndayentše entšanga tmojtsenojatá y tmojtsenáyase, cachënga jenpochócana. Cachcá, canye bëts pueblentša entšanga o canye yebnentša pamíllanga tmojtsenojatá y ndoñe tmontsenëyeunanëse, chënga ndoñe tšabá nyets tempo quemochátsmëna.

<sup>26</sup> Cachcá, Satanás cachabe bayëjnga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntšamo nantsobena chabe mándayana quem luarentše jëftsebomnana? <sup>27</sup> Tšëngaftanga šmontsichamo atše Beelzebube obenána chë bayëjnga stsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebomna chë bacna bayëjnga jtëbuacnama? Chíyecna, chënga montsinýinýná ntšamo ndegombre yomnana y tšëngaftanga ndoñe ndegombre soye šmontsichámuama. <sup>28</sup> Y atšna, chë Bëngbe Bëtsabe Espiritbeyeca chë bayëjnga entšangbentšana sëndëtëbuacana; y chë soye entsinýinýná Bëngbe Bëtsabe amëndayana tšëngaftangbioye tojóshjanguama.

<sup>29</sup> “¿Ntšamo nda nanjobenaye canye corente añemo bomna entšabe yebnoye jamashënguana y chabe soyënga jtsebocana, ndoñe natsana chábioye tconjshëtsebat-sëquëse? Nye tcojshëtsebat-sëquësna aíñe cuanjobenaye cha jefcana. Atše ya chca Satanássoftaca sënjama.

<sup>30</sup> “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana.

<sup>31</sup> “Chíyeca cbéyana, Bëngbe Bëtsá entsānga echanjáperdonaye nyetsca chëngbe bacna soyënga y chë Bëngbe Bëtsabiama puerte bacá oyebuambnayana, mo chábioye cuafjoyenguangá; pero ndoñe queochátaperdonaye chë Uámana Espíritbiama puerte bacá ichámënga. <sup>32</sup> Bëngbe Bëtsá bochanjaperdóna chë Cha Entšá tbojanbemabiama ndoñe tšabá ichamuábioye; pero chë Uámana Espíritbiama ndoñe tšabá ichamuábioyna, ni quem luarentše, ni ndocna te quebochatsperdóna ca” —Jesús tojánayana.

*Tšabe betiye o ndoñe tšabe betiye tondmënama, jtsotatsëmbuana ntšamo tojashajoncá*  
(Lc 6.43-45)

<sup>33</sup> “Canye betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbomna. Chë betiye tšabe betiye o ndoñe tšabe betiye tondmënama, jtsotatsëmbuana ntšamo chëshe tojashajoncá. <sup>34</sup> ¡Mëtscuaye entsānga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna entsānga šmojtsemnëse? Er ndayá ainanoca becá tomnama entsá jtsóyebuambnayana. <sup>35</sup> Chë tšabe entsá, chë ainanoca tšabe juabnënga bomnentsāna jtsóyebuambnayana, y chë bacna entsāna chë ainanoca bacna juabnënga tobomnentsāna jtsóyebuambnayana. <sup>36</sup> Y ndegombre cbéyana, chë entsāngbiama tšabá o ndoñe tšabá tmonjamama jayanama tempo chaojobuache ora, ndaye ndoservena palabra šmojóyebuambama, Bëngbe Bëtsabe delante šmochanjayana ndáyeca chca ca. <sup>37</sup> Er ntšamo tcojtsóyebuambnama Bëngbe Bëtsá echanjayana tšabá o ndoñe tšabá tconjamama, y cmochanjauyana aiñe o ndoñe cmontsemna castiganá jtsemnana ca” —Jesús tojánayana.

*Chë bacna entsānga Jesús tmojanimpadá canye bëts soye chaoma, chabe obenana jinýama*  
(Lc 11.29-32)

<sup>38</sup> Chentšana, bāsefta fariseunga y Moisesbe ley abuátambayënga Jesús tmojan-tjá: —Buatëmbayá, bënga fséntseboše aca canye bëts soye chacoma, acbe obenana chašcuinýanýema ca.

<sup>39</sup> As Jesús tojanéjua: —Quem puerte bacna entsānga y ndošbuáchiyënga montseboše atše canye bëts soye chaima, atšbe obenana jinýanýiyama; pero chca soye ndoñe quemochátinýe, sinó nýe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá. <sup>40</sup> Ntšamo Jonás unga te y unga ibeta chë bëts beonbe uafsbioye yojéftsemncá, cachcá chë Bëngbe Bëtsá Entšá tbojanbemá unga te y unga ibeta fshantse jashenoye echanjéftsemna. <sup>41</sup> Morsca entsānga tšabá o ndoñe tšabá tmonjamama Bëngbe Bëtsá yochjayana te, Nínive bëts puebloca entsānga mochanjotsaye y morsca entsāngbiama mochanjayana ndoñe tšabá tmonjama ca; er chënga, Jonás yojtsabuayiynaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiama más uamaná endmëna. <sup>42</sup> Morsca entsānga tšabá o ndoñe tšabá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca entsāngbiama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrënga jouenama, y chë mora muentše entsemnana, Salomonbiama más uamaná endmëna ca —Jesús tojánayana.

*Ndayá inopása chë bacna entsāngaftaca*  
(Lc 11.24-26)

<sup>43</sup> Jesús mëntšánaca tojánayana: “Canye bacna bayëja canye entsábentšana tojése-bocna ora, chë bayëjna bojojo luarënguenache jtsanana ndayentše jóchnama onguay-iñe, y canye luare ndoñe tonjínýena ora cha jenójuaboyana: <sup>44</sup> ‘Atšbe oyenoye, chë ndayentšana sënjëftsebochnoye chanjeshhécona ca’. Y choye tojtashjango orna, jinýenana lempe tšabá cha jtesamashënguama, mo chentše ndocná tontsiyencá, tsjajniñe y

lempe botamaniñe cuaftsemncá. <sup>45</sup> Chorna chë bayëjna jana y inye canyësëfta bayëjenga chabiama más opëjenga jobiatšana y nyetscanga choye jamashjnana chë boyabásabeñe joyéanama. Y chca, chë boyabása tempscama más bacna entsá jtsemnana, chora chë natsanama más bayëjenga abamna causa. Morsca puerte bacna entsángaftaca cachcá echanjochnëngo ca” —Jesús tojánayana.

*Chë Jesusbe ndegombre pamíllanguentsënga*

*(Mc 3.31-35; Lc 8.19-21)*

<sup>46</sup> Jesús cabá entsanga yojtsëtsësnaye ora, chabe mamá y catsátanga tmojánashjajna y imojtseboşe Jesúsëftaca jóyebuambayama. Nye shjoca imojtsemna; <sup>47</sup> asna, canye boyabása Jesúsbioye tbojanbuayená: —Acbe mamá y acbe catsátanga shjoca montsemna y montseboşe ácaftaca jóyebuambayama ca.

<sup>48</sup> Pero Jesús chë jauenayama tojánabioye tbojanianyana: —¿Nda atšbe mamá yomna, y ndëmuanyënga atšbe catsátanga ca?

<sup>49</sup> Y cachora chabe cucuatše tojanatsbaná, chabe uatsjëndayënga tojanënyänyé y tojánayana: —Quemënga montsemna mo atšbe mamá y mo atšbe catsátangcá. <sup>50</sup> Er ndánaca, ntšamo atšbe Taitá, celoca endmëná yobošcá tojtsama, jtsemnana atšbe catsata, atšbe uabena y atšbe mamá, atšbe ndegombre pamíllanguentsá ca —Jesús tojánayana.

## 13

*Chë jenabe cuento*

*(Mc 4.1-9; Lc 8.4-8)*

<sup>1</sup> Cach te, Jesús yebnentšana tojëftsanbocna y uafjajónaye tsachoca tojanótbema.

<sup>2</sup> Mallajta entsanga choye tmojanobeconá; as Jesús, chë uafjajónayentše yojanamna canye barquëshoye tojánašëngo, tojanótbema; y chë entsangna tsachoca imojtsemna.

<sup>3</sup> Chorna ba soyëngama cuentëngaca chënga tojanabuatambá.

Mëntšá tojanéyana: “Canye jená chë jénaye jaujquëshama yojëftsebocna.

<sup>4</sup> Yojtsëjquëshaye orna, básiëfta jénaye benache juachañe yojuatquécjana, pero chë jaja shloftšënga imojástjajna y lempe imojtsósañe. <sup>5</sup> Inye meshëngna ndëtsbenguiñe yojuatquécjana, ndoñe yapa fshantse binyentše. Chiñna betscó yojuábocna, fshantse ndoñe jashenocana yonjanmëna causa, <sup>6</sup> pero shinye yojábocna ora, puerte yojojënyána y yojtsancta; y yojtsábojo, bëtscá tbëtëjenga tondaye causa. <sup>7</sup> Inye meshëngna uchmëshangañe yojuatquécjana, y chë uchmëshangá yojuájua orna, lempe yojtsatscué. <sup>8</sup> Y inye meshëngna, uanguanëshiñe yojuatquécjana y puerte botamana chiñe yojuashajo: ínyenache nye canye jénayentšana mo patse meshënga yojuashájona, ínyeñna mo chnénguana bnëtsana meshe y ínyeñna mo unga bnëtsana meshe.”

<sup>9</sup> Jesús chca jacuéntama tojanpochocá ora, mëntšá tojánayana: “Chë jouenama tmojtsobenënga, šmochjouena ca.”

*Ndáyeca Jesús cuentëngaca yojánabuatambaye*

*(Mc 4.10-12; Lc 8.9-10)*

<sup>10</sup> Chora chë uatsjëndayënga tmojanobeconá y Jesús tmojantjá: —¿Ndáyeca entsanga cuentëngaca cojtsabuatambá ca?

<sup>11</sup> As Jesús tojanéjua: —Bëngbe Bëtsá tšëngaftanga cmontsinjanyána nyetsca chë mo iytëmencá yomna soyënga chabe amëndayama, pero chë ínyingbioyna ndoñe.

<sup>12</sup> Nda tojtsebomnábioye más jatštayana y chca cha corente bëtscá jtsebomnana; pero chë tondaye tondbomnábioyna, chë batsatema tobomna sóynaca mochántseboca.

<sup>13</sup> Chíyeca atše cuentëngaca chënga sentsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinýama; y masque becá chë soyënga chamouena, ndoñe tšabá quemochátuenana, ni queochátësertana. <sup>14</sup> Chcáyecna,

chéngbeñe entsemna cachcá ntšamo chë Bëngbe Bëtsabe juabna oyebuambnayá Isaías tojanayancá:

Masque beca chamouena, ndoñe queochátësertana.

Masque puerte chamotsantješna, ndoñe quemochátinýe

<sup>15</sup> Quem entšanga ndoñe quemátsboše botamana jajuaboyana;

chënga uamatsáchtönënga montsemna

y chëngbe bomínýnaca cachcá.

Chca ndóñesna, chënga muantsobena jinýama, jouenama y ainaniñe josértama;

y chca, chënga bacna soyënga amana muantsajbaná y atšbe benache muantishache,

as atše chënga chayatsebacama ca —cha tojéftsanbema.

<sup>16</sup> “Tšëngaftangna oyejuayënga šmochanjoyena, er šmond bomna bominýe y matscuašënga Bëngbe Bëtsabe soyënga jinýama y jouenama. <sup>17</sup> Ndegombre cbéyana, banga Bëngbe Bëtsabe juabna oyebuambnayënga y nyetsca soyënguiñe tšabá amënga tmonjánbošena chë tšëngaftanga šmontsonýá soyënga jinýama, y ndoñe chemátaninýe; tmonjánbošena chë tšëngaftanga šmontsuenana soyënga jouenama, y ndoñe chemátanuena ca” —Jesús tojanéyana.

*Jesús chë jenabe cuentama tojanabuayená*

*(Mc 4.13-20; Lc 8.11-15)*

<sup>18</sup> “Chcasna, oído šmochjajajo; chë jenabe cuento mëntšá endayana: <sup>19</sup> Chë Bëngbe Bëtsabe amëndayama tmojouena y ndoñe tontsésertana entšanga mondmëna mo chë benache juachañe yojuatquécjana jenaycá; Satanás jabana Bëngbe Bëtsabe palabra chëngbe ainanentšana jabétsabuajuanama, chënga chiñe ndoñe chamondëtsošbuáchema. <sup>20</sup> Y chë ndëtšbenguiñe yojuatquécjana jénaye entsemna mo chë aiñe Bëngbe Bëtsabe palabra tmojouena y Bëngbe Bëtsabeñe jtsošbuáchiyama oyejuayënga tmojtsemna entšangcá; <sup>21</sup> pero ndoñe nyets tempo chana jocochájuana, y chca, ndoñe bayté Bëngbe Bëtsáftaca ntjéftsemnëngana, ndoñe yapa tmontsašbuaché causa. Inýenga chéngbioye mochantsébuayënja y Bëngbe Bëtsabeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonýaye. <sup>22</sup> Chë uchméshangañe yojuatquécjana jénaye entsemna mo chë Bëngbe Bëtsabe palabra tmojouena entšangcá, pero quem luarentša soyéngaca oyejuayënga jtsemnama yapa mochántsenojuabnaye y mallajta crocénana y ba soyënga jtsebomnana mochántseboše. Chíyeca chënga Bëngbe Bëtsabe palabra jtsebnétjombana y ntšamo cha tojayancá ndoñe ntsamana. <sup>23</sup> Pero chë uanganëshiñe yojuatquécjana jénaye entsemna mo chë Bëngbe Bëtsabe palabra tmojouena y botamana jósertana entšangcá. Mo canýe betiye puerte tšabá tojtseshajuancá, chënga bëtscá tšabe soyënga Bëngbe Bëtsabiana mochántsama. Inýengna ínýengbiana más bëtscá soyënga mochántsama, y chca, ínýenga jtsemnana mo chë patse meshënga tojanshajo jenaycá, ínýenga mo chë chnénguana bnëtsancá y ínýengna mo chë unga bnëtsana meshënga tojanshajo jenaycá ca” —Jesús tojanabuayená.

*Chë tríguañe bacna shacuanama cuento*

<sup>24</sup> Jesús mëntšánaca tojanacuntá: “Bëngbe Bëtsabe amëndayana endmëna mo chë tšabe jenaycá, canýe boyabása chabe jajañe yojáje. <sup>25</sup> Pero nyetscanga imojtsomañe orna, chabe uayayá yojáshjango y chë trigo jeniñe bacna shácuana yojesejé y yojtsatoñe. <sup>26</sup> Y chë trigo yojuájua y ya yojtseshajuana orna, chë bacna shácuañenaca yojuábocna. <sup>27</sup> As chë peonga imojá chë nduiño jauyanama: ‘Bacó, chë jajañe tšabe jénaye tconjanjé y as, ¿ndáyeca chë bacna shácuana chiñe tojuábocna ca?’ <sup>28</sup> Y chë nduiño yojáuyana: ‘Atšbe uayayá chca tojama ca.’ Chora chë peonga imojatjaye: ‘¿Quectseboše bënga fchayá chë bacna shácuana jetsejashtsëtsama ca?’ <sup>29</sup> Pero chë nduiño yojáuyana: ‘Ndoñe. Chë bacna shácuana šmojtsejashtsëtsana ora, chë trígnaca šmattsejashtse ca. <sup>30</sup> Más

tšabana, cachcá mochjonjaye cánjiñe chaójuama, chë jaja saná játbanama tempo chaojobuáchëntscuana. Chora chë trabájayenga chanjichamuá y chanjámëndaye natsana chë bacna shácuana chamotsejashtsëtse y chamotsentsacuacjuá jtsejuinjiyama, y chentsana chë shajuana chamuatbaná y atšbe grano uaquëcjnaye yebniñe chamotsatsuamá ca” — Jesús tojánayana.

*Chë mostaztiye jenayama cuento*

(Mc 4.30-32; Lc 13.18-19)

<sup>31</sup> Jesús mëntšánaca tojanacuntá: “Bëngbe Bëtsabe amëndayana endmëna mo canye mostaza betiye jenaycá, canye boyabása chabe jajañe yojáje. <sup>32</sup> Ndegombre, nyetsca jenayëngama chë mostaza jénaye chë más básetema endmëna, pero tojójua orna, chë jajañentše chë más bëts betiye jóbemana. Tša bëts betiye jtsemnana, chíyeca ba buacuashangá jtsabomnana y chë jaja shloftšënga jana y chiñe uajajonëtemënga jauábopormana ca” —Jesús tojánayana.

*Chë levadurama cuento*

(Lc 13.20-21)

<sup>33</sup> Quem inye cuéntnaca tojanéyana: “Bëngbe Bëtsabe amëndayana endmëna mo levadurcá; canye shembása chana jenájuabana unga medida arninñañe, nyetsana chauabochama ca.”

*Ndáyeca Jesús entsänga cuentëngaca yojanabuayiyná*

(Mc 4.33-34)

<sup>34</sup> Jesús nyetsca chë soyëngama lempe cuentëngaca entsänga jtsëtsëtsnayana, y cuentëngaca ndóñesna ndoñe yonjanoyebuambná. <sup>35</sup> Chca yojamna ndayá cachcá chaochnënguama ntšamo chë Bëngbe Bëtsabe juabna oyebuambnayá tojanayancá, mëntšá: Jabuátambamna cuentëngaca chanjóyebuambaye; chanjayana chë iytémena soyëngama y chë entsänga ndoñe mondétatšëmbo soyëngám-naca; Bëngbe Bëtsá quem luare tojanma orscana chë soyënga yomna ca —cha tojánayana.

*Chë tríguañe bacna shácuana cuentama Jesús tojanabuayená*

<sup>36</sup> Chentsana Jesús chë entsänga tojtanimamó y yebnoye tojtanamáshëngo. Chentsna chabe uatsjëndayënga tmojanimpadá ndayá chë bacna shacuanama cuento betsayancá chauabuayenama. <sup>37</sup> As Jesús tojanéyana: “Chë tšabe jénaye jená endmëna chë Bëngbe Bëtsá Entšá tbojanbemá, <sup>38</sup> y chë jajañna, quem luare. Chë tšabe jénaye entsemna chë Bëngbe Bëtsabe amëndayoye mochjámashjna entsänga, y chë bacna shácuana entsemna chë bacna bayëjëngbe amëndayabe entsänga, <sup>39</sup> y chë uayayá, chë bacna shácuana yojáje chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayëngna chë angelotëmënga. <sup>40</sup> Ntšamo chë bacna shácuana jtsejashtsëtsana y iñoye jtsatmetšana jtsejuinjiyama, cachcá echántsemna quem luare jopochócama te. <sup>41</sup> Chorna, chë Bëngbe Bëtsá Entšá tbojanbemá chabe angelotëmënga echanjichamuá chë ínÿenga bacna soye chamomama amënga y chë bacna soyënga amënga chabe amëndayentsana chamotsajuanayama. <sup>42</sup> Y chora chëngbiyoye chë uabouana íñeshoye mochantsësetjango y chentše puerte mochanjenóbošachna y chë tsetšanama juatsašënga mochantsenoftëšjoynaye. <sup>43</sup> Chora, chë ntšamo Bëngbe Bëtsá yomandacá amëngna corente mo shinycá mochantsebuashinjiñyana chëngbe Taitá, Bëngbe Bëtsabe amëndayoca. Chë jouenama tmojtsobenënga, šmochjouena ca” —chora Jesús tojánayana.

*Chë fshantsiñe uaiytëmena bomnanama cuento*

<sup>44</sup> “Bëngbe Bëtsabe amëndayana endmëna mo chë fshantsiñe uaiytëmena bomnancá. Canye boyabása chë bomnana yojuinÿena y chentsana iyteçcana cachentše yojesatbontsá.

Corente oyejuayá yojtá, nyetsca chabe bomna soyënga yojetsatobuiye y chentšana chë fshantse yojtobuámiñe ca” —Jesús tojánayana.

*Chë corente uámana fiantse ndëtsëtémama cuento*

<sup>45</sup> “Mo canye entśá uámana fiantse ndëtsëtémënga obuamnañacánaca endmëna chë Bëngbe Bëtsabe amëndayana. <sup>46</sup> Chana, canye corente uámana ndëtsëtëma yojínÿena ora, yojtá y lempe chë inabomna soyënga yojetsatobuiye y chë ndëtsëtëma yojtobuámiñe ca” —Jesús tojánayana.

*Chë atarraiëshama cuento*

<sup>47</sup> “Bëngbe Bëtsabe amëndayana endmëna mo canye atarraiëshacá, buyeshoye jutšenana y nyetsca beonga jashebuáyana. <sup>48</sup> Chë atarraiëshá jútjena tojtsamna orna, chë beonga ashebuánayënga jtsashëbjátsëcana, tsachoye juyambana y chentşe juatbëmana chë beonga jabocacayama; chë tsábënga sbarëquënguiñe juatsuámana y chë ndoñe tsábëngna jtsëtšanana. <sup>49</sup> Cachcá echanjochnëngo quem luare jopochócama tempo chaojobuache ora. Chë angelotëmënga mochanjábocana chë tsabe entśángbentšana bacna entśanga jaluárama, <sup>50</sup> y chë bacna entśangna chë uabouana íñeshoye mochántsatquëcjaye, y chentşe puerte mochanjenóbošachna y chë tsetšanama juat-sašënga mochantsenoftëšjojnaye ca” —Jesús tojanacuntá.

*Anteo y tsëm uámana bomnana*

<sup>51</sup> Chora chabe uatsjëndayënga Jesús tojanatjá: —¿Lempe chama quecmojtsësertana ca?

Y chënga tmojanjuá: —Arseñor, aíñe ca.

<sup>52</sup> As Jesús tojanéyana: —Canye ley abuatambayá jtsetatsëmbuana ndayá Bëngbe Bëtsá tempo Moisesbiajana yojanoyebuambná soyëngama. Ntsámo Bëngbe Bëtsabe amëndayana bëtsemnana cha tojtsatsjendá orna, mo canye yebnentša nduiñcá cha jtsemnana. Chë nduiñna chabe grano uaquëcjnaye yebnocana anteo y tsëm uámana bomnana juabocnana. Cachcá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëngnaca Bëngbe Bëtsabe amëndayama ca —tojanéyana.

*Jesús Nazaretoca*

*(Mc 6.1-6; Lc 4.16-30)*

<sup>53</sup> Jesús chë soyënga jacuéntama tojanpochocá ora, chentšana tojtsanoñe. <sup>54</sup> Y cachabe luaroye tojtanashjango y chentša judiëngbe enefjuana yebnentşe tojanontsé jabuátambama. Entśanga ojnanánënga imojtsichamo: —¿Chë lempe yojtsetatsëmbcá ndëmoca mua tojuatsjinÿe ca? ¿Ntsámo nantsobena chca bëts soyënga jamama ca? <sup>55</sup> ¿Mua ndoñe yondmëna chë calpinterbe uaquiñá y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata, <sup>56</sup> y chabe uabëngana ndoñe muentşe béngaftaca mondoyena? ¿Ndayentšana lempe chca mua yojtsebomna ca? —chënga imojtsichamo.

<sup>57</sup> Y chë causa chë entśanga tmojanotjayaná y ndoñe imontseboše cha joyeunayana. Pero Jesús tojanéyana: —Nyetsquénache canye Bëngbe Bëtsabe juabna oyeuambnayá bëtsá jabemëngana, pero cachabe luarentşe, cachabe yebnentşe ndoñe ca.

<sup>58</sup> Chíyeca chentşe Jesús ndoñe tonjëftsanma ba bëts soyënga Bëngbe Bëtsabe obenánaca, chë entśanga chábeñe ndoñe montsanošbuaché causa.

*Ntsámo Juan chë Ubayaná tojanóbana*

*(Mc 6.14-29; Lc 9.7-9)*

<sup>1</sup> Chë tempo, Rey Herodes, chë Galileoca mandayá tojanuena ntsámo nyetsca entśanga Jesucristbiana imojtsichamcá. <sup>2</sup> As cha chabe oservënënga tojanéyana: “Mua Juan

chë Ubayaná ctsemna, obanënguentšana tojtayena, chíyeca chca obenana bëts soyënga jamama yojtsebomna ca.”

<sup>3</sup> Juan cabá ainá ora, Herodes tojanmandá cha chamishache, cadenéjuangaca chamobátsëca y chca cárceloye jutámíama. Herodes chca tojanma Herodíasbe causa, chabe catšata Felipe shema. <sup>4</sup> Juan Heródesbioye mëntšá ibnauácacana: “Ndoñe quenátslesenciana aca acbe catšatbe shémaftaca jobouamayama, acbe catšata cabá ainá yotsomñe ora ca.”

<sup>5</sup> Y chama Herodes yojtseboše Juan jóbana, pero entšangbiama yojtsauatja, er chënga innajuabnaye Juan ndegombre Bëngbe Bëtsabe obenánaca yojanoyebuambná ca. <sup>6</sup> Pero Heródesbe cumpleño oboyejuaye ora, Herodíasbe bembe entšangbe delante tojanlantsá y Herodes puerte chama yojtsóyejuaye. <sup>7</sup> Chíyeca Herodes, jajúrase, tbojanšbuachená ndayánaca jatšetayana, ntšamo tbojotjañcá. <sup>8</sup> Y Herodíasna lempe bémbëbioye ibojabuayená ntšamo Herodes jojuama. As chë bembe tbojaníyana: “Canye šcneniñe Juan chë Ubayanabe bestšaše šmatšetá ca.”

<sup>9</sup> Herodes chë soyama tbojanongmé, pero chë ófjanëngbe delante jajúrase tbojanšbuachená causa, yojamánda chca chaotsemnama. <sup>10</sup> Y as tojanmandá chë Juan yojanëtámenoca chabe bestšaše chamuetséstjanguama. <sup>11</sup> Chentšana, canye šcneniñe chë bestšaše tmojanamba y chë tobišaše tmojanëntšabuaché y chana, chabe mamábioye.

<sup>12</sup> Chentšana, Juanbe ústonënga tmojánashjajna, chabe cuerpo tmojésanocñe y tmojána jauátbontsama. Y chora, Jesús yojtsemnoye chënga tmojána y chë soyëngama tmojancuentá.

*Jesús shachna uaranga boyabásenga saná tojanacaredadó*

*(Mc 6.30-44; Lc 9.10-17; Jn 6.1-14)*

<sup>13</sup> Jesús chca tojanuena ora, canye barquëshañe tojtsanoñe canye bën luaroye, entšanga ndoyena luaroye. Pero entšanga chama imojátatsëmbona y chë pueblënguentšana tmojánbocana shecuátšëca cha juastama. <sup>14</sup> Chentšana, chë barquëshoicana tojtastjango ora, Jesús ba entšanga tojánanye, chë cha tmojánguanguënga. Chëngbiama tbojanongmé y chë entšanguentšana ba šoquënga tojanashná. <sup>15</sup> Ya jetiñe yojtsemna, chíyeca chë uatsjëndayënga Jesúsbioye tmojanobconá y tmojaníyana: —Ya jetiñe entsemna y quem luariñe ndocná quenatíyena. Entšanga cuantichamuá, pueblotëmëngoye chamotsatoñama, saná chamobuámiñama ca.

<sup>16</sup> As Jesús tojanéjua: —Ndoñe quenátsiyta chënga chamotsatoñama. Tšëngaftanga saná šmochjacaredádaye ca.

<sup>17</sup> Y chënga tmojanjúá: —Muentše tondaye queftsátsbomna; nye shachna tandëše y uta beónata ca.

<sup>18</sup> As Jesús tojanéyana: —Chë soyënga moye miyëbo ca.

<sup>19</sup> Chentšana Jesús tojanmandá entšanga chamoshéntsjatbiamama. Chorna, chë shachna tandëše y chë uta beónata tojanca, cloye tojanontješé y Bëngbe Bëtsábioye chama tbojtanchuá. Chora chë saná tojanjatá, chabe uatsjëndayënga tojanëjåtaye, y chëngna nyetsca entšanga tmojanacaredadó. <sup>20</sup> Nyetsca entšanga tmojanse jtoshachaye nyetšá y cabá chë ojamnëtëmëngaca bnétsana uta sbarécua tmojanajutjé. <sup>21</sup> Chë tmojansënga imojamna mo shachna uaranga boyabásenga, shembásenga y básenga ntjacuntacá.

*Jesús béjaye juatsbuacá yojtsaye*

*(Mc 6.45-52; Jn 6.16-21)*

<sup>22</sup> Chentšana, Jesús chabe uatsjëndayënga tojanamëndá chë barquëshoye jtamashjnama y chë uafjajónaye chenguánoica chabe natsana jashjajnana. Chëntscuana Jesús entšanga yojtichamuá. <sup>23</sup> Nyetscanga tojtanichamó orna, Jesús canye tjoye tojántsjua canya jtsemnama, Bëngbe Bëtsáftaca jencuëntama. Yojaibétata ora, cha canya chentše



yojtsemna, <sup>24</sup> y chë barquëshana tsachocana bënoca yojtsemna. Y chë olëshenga chë barquëshana yojtšajantšetaye, chë binÿia chëngbe contra yojtsemna causa. <sup>25</sup> Ya bínÿanoyna, Jesús chëngbioye yojobeconá; bėjaye juatsbuacá yojtšaye. <sup>26</sup> Chabe uatsjéndayënga chca cha tmojáninÿe orna, tša imojocochauatjaná y puerte auatjanánënga tmojanoyó: — ¡Canÿe añemëse entsemna ca!

<sup>27</sup> Pero chora Jesús tojanéyana: — ¡Añemo šmochtsebomna, atše Jesús sëndmëna; ndoñe matauatjëngana ca!

<sup>28</sup> Chora Pedro, Jesúsbioye tbojanianyana: — Bëngbe Utabná, ndegombre aca tcojtsemnëse, momandá atše bėjaye juatsbuacá ácbioye chayá ca.

<sup>29</sup> Y Jesús tbojanianyana: — Mabo ca.

Chora Pedro chë barquëshoicana tojánastjango y tojanontšé bėjaye juatsbuacá Jesúsbioye jama. <sup>30</sup> Pero chë binÿia tša jabuache yojtsemnana tojáninÿe ora, Pedro puerte yojtšauatja y tbojanontšé jtsenatjëmbambana. Chíyeca cha jabuache tojanchembo: — ¡Bëngbe Utabná, šmatsbocá ca!

<sup>31</sup> Y cachora Jesús tbojtanobuácuētēntšiyē y tbojanianyana: — ¡Tša batšatema osbuachiyál! ¿Ndáyeca ndoñe bëtscá átšbeñe contsošbuaché ca?

<sup>32</sup> Chentšana chë barquëshoye chata tbojtanamáshëngo y cachora chë binÿia bonguana yojtšatsmëna. <sup>33</sup> Y chora, chë barquëshoye imojtsemnënga Jesusbe shecuatšentše tmojanoshamentšé y tmojanianyana: — ¡Aca ndegombre Bëngbe Bëtsabe Uaquiñá comna ca!

*Genesaret ca uabáinoca, Jesús ba šoquënga tojanashná  
(Mc 6.53-56)*

<sup>34</sup> Chë uafjajónaye tmojánenashbuachengo y canÿe luare Genesaret ca uabáinoye tmojánashjajna. <sup>35</sup> Chentša entšanga Jesús tmojantëmbá ora, chë luarentša nyetsca entšanga chama tmojantatšëmbona. As chë entšanga chëngbe šoquënga Jesúsbioye tmojanënatse. <sup>36</sup> Y imojtseimpadana nÿe mo chabe entšayá sibiájuanaca juabojajuama chë šoquënga chaualesenciama. Y nyetscanga chabe entšayá sibiájua tmojanábojajënga, shnánënga imojtsatoquédaye.

## 15

*Ndáyeca canÿe entšá Bëngbe Bëtsabe delante ndoñe tšabia nántsemna  
(Mc 7.1-23)*

<sup>1</sup> Chora básefta fariseunga y judiëngbe ley abuátambayënga, Jerusalenocana tmojánabënga, Jesúsbioye tmojanobeconá y tmojanianyana: <sup>2</sup> — ¡Ndáyeca acbe uatsjéndayënga ndoñe montsama chë ntšamo bëngbe bëts taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bënga chë judiënga fsënduamancá, Bëngbe Bëtsabe delante tšábënga jtsatsmënana ca?

<sup>3</sup> As Jesús tojanéjua: — ¡Y ndáyeca tšëngaftanga ndoñe šmontsama ntšamo Bëngbe Bëtsá tojanmandacá, nÿe cach tšëngaftangbe bëtsétsanga imnétsama soyënga jtsamama ca? <sup>4</sup> Bëngbe Bëtsá mëntšá tojanmandá: “Acbe bëtsétsata stëtšoye ndoñe catjáquedaye”, y “nda cachabe bëtsétsatbiama podësca tojóyebuambase, chana jóbanama jtsemnana ca.” <sup>5</sup> Pero tšëngaftanga šmondbétsichamo canÿe entšá canobena chabe taitá o chabe mamá jauyanana: “Lempe ntšamo sëndbomncá Bëngbe Bëtsá jaserviama entsemna, chíyeca tondaye quetsátsbomna aca juajabuáchama ca”; <sup>6</sup> y šmondbétsichamo nÿe ndánaca chca tojayanëse, ya ndoñe ntsemnana chabe taitá o chabe mamá stëtšoye ndoñe ntjaquédana, ni ntjuajabuáchana ca. Y chca, tšëngaftangbiama tondaye ntsámanana ntšamo Bëngbe Bëtsá tojanmandacá, y aíñe šmontsama ntšamo tšëngaftangbe bëtsétsanga imojanamancá. <sup>7</sup> ¡Bacna entšanga, ntšamo ndegombre šmojuabnacá ndinÿinÿinayënga! Nÿe tšabá chë Bëngbe Bëtsabe juabna oyebuambnayá Isaías tšëngaftangbiama tojanoyebuambá, mëntšá tojánayana ora:

<sup>8</sup> Bëngbe Bëtsá tonjayana: “Quem entsanga mondbétsichamo Bëngbe Bëtsá tša tšabia yomna ca; chca nÿe uayášaca,

pero chëngbe ainanentše atšbiamana ndocna tšabe juabnéngaca.

<sup>9</sup> Chënga nÿe bonamente mondbétsichamo: Bëngbe Bëtsá tša tšabia yomna ca; chënga nÿe entsangbe mandënga jtsabuátambayana y Bëngbe Bëtsabe mandënga ndoñe ca” —cha tojánayana.

<sup>10</sup> Chentšana Jesús entsanga tojánachembo y tojanéyana: —Šmochjouena y chacmësertá. <sup>11</sup> Ndayá entsá tojtsesacá, ndoñe quebochátsbema Bëngbe Bëtsabe delante ndoñe tšabia. Inÿetsá comna: ndayá entsá tojtsejuabná y tojtsoyebuambnacá endobena cha jabemana Bëngbe Bëtsabe delante ndoñe tšabia ca.

<sup>12</sup> Chora chë uatsjëndayënga Jesúsbioye tmojanobeconá y tmojanianyana: —¿Quéctsetatšëmbo, ntšamo tconjayanama chë fariseunga ndoñe tšabá chenatëuénana ca?

<sup>13</sup> As Jesús tojanéjua: —Ndaye betiye atšbe Taitá celocá ndoñe tonjájese, tbëtëjocana mochántsejashtse. Cachcá echanjama chë nÿe entsangbe buatëmbana soyëngaca.

<sup>14</sup> Cachcá mónÿaye; chënga montsemna mo jtanënga inÿe jtanënga unachayëngcá. Y canÿe jtaná inÿe jtaná tbojtsánachase, nÿets útata canÿe tbuabentše bochanjetsótsatše ca —Jesús tojánayana.

<sup>15</sup> Chora Pedro, Jesúsbioye tbojanianyana: —Ntšamo chë cuento bétsayanama šmabuayená ca.

<sup>16</sup> As Jesús tojanéjua: —¿Tšëngaftángnaca cabá ndoñe cmontsésertana ca? <sup>17</sup> ¿Cabá ndoñe cmontsésertana lempe ntšamo šmojascá uafsbioye jomashënguana y chentšana cuerpentšana jtabocnana? <sup>18</sup> Pero ntšamo šmojtsoyebuambnacana lempe ainanocana jtsóbocanana y chë soye endobena tšëngaftangbioye Bëngbe Bëtsabe delante ndoñe tšábënga jábiamana. <sup>19</sup> Ainanocana jtsóbocanana bacna juabnénga: jenóbama, shema o boyábioye ínÿaftaca jaíngñama, shembása o boyabásaftaca bacna soye jamama, jatbëbama, jobostérama y ínÿabiamana jtsayátsenayama. <sup>20</sup> Chë soyënga cocayé jtsobenana entsábioye Bëngbe Bëtsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsobenana Bëngbe Bëtsabe delante ndoñe tšabia jabemama ca —Jesús tojánayana.

*Canÿe shembása inÿe luarocana ashjanganá Jesúsbeñe yojtsošbuaché (Mc 7.24-30)*

<sup>21</sup> Jesús chentšana, Tiro y Sidón luarëngoye tojtsanoñe. <sup>22</sup> Canÿe shembása Caná luarocá chentše inoyena; cha Jesúsbioye yojobeconá y mëntšá yojtsáyebuache: —¿Utabná, Rey Davídbentšana Entšá, šmotselastemá! ¿Atšbe bembe puerte entsesufrina, bacna bayëjbe juabna entsebomna causa ca!

<sup>23</sup> Jesús ndocá tbonjanjuá. As chabe uatsjëndayënga tmojanobobeconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

<sup>24</sup> As Jesús tojánayana: —Bëngbe Bëtsá atše šonjichmó jtsanÿenama nÿe chë entsanga, chë mo ótšena oveshëngcá imomnénga Israeloquënga, y chë ndoñe judiëngna ndoñe ca.

<sup>25</sup> Pero chë shembása tojána, Jesusbe shecuatšentše tojanoshamentšé y tbojanianyana: —¿Utabná! Diosmanda pavor šmotsebema. ¿Šmotsajabuache ca!

<sup>26</sup> Y Jesús tbojanjuá: —Chë judiënga mondmëna mo Bëngbe Bëtsabe basëngcá y atše ácbioye tcojuajabuache y chëngbioye ndóñesna, nántsemna mo chë básëngbe saná chënga cuaftsëbaquëcá y quešënga ftsëbuajocá. Chca jamana ndoñe tšabá quenátšmëna ca.

<sup>27</sup> As cha tbojanjuá: —Arseñor. Pero chë quešëngnaca chëngbe nduiñëngbe mesëshentšana tmojatquëcjanatemënga mondbase, chë nduiñënga tmojtsesá ora. Chcasna, Diosmanda šmotsajabuache ca.

<sup>28</sup> Chora Jesús tbojanianyana:

—¡Shembása, Bëngbe Bëtsábeñe tša ošbuachiyá comna! Ntšamo cojtsebošcá chca chaotsemna ca.

Y cach orscana chabe bembe tšabá yojtatsmëna.

*Jesús ba šoquënga tojanashná*

<sup>29</sup> Jesús chentšana tojéftsanbocna y chë Galilea uafjajónaye tsachoye tojana. Chentšana, canye batsjoye tojántsjua y choca tojanótbema. <sup>30</sup> Mallajta entšanga Jesús yojtsemnentše tmojánashjajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatšëntše tmojanéshejango y cha nyetscanga tojanashná. <sup>31</sup> Y chca orna, chë entšanga tmojáninýe: chë ndëbianga imojtsatoyebuambná, chë tšabá jobónjuama ndobenënga tšabá imojtsatsmëna, chë coshetënga tšabá imojtsatana y chë jtanëngna yojtšëbinýna; y chama chënga corente ojanánënga imojtsemna. Chora chënga tmojanontšë jëtschuayana chë Israelentša entšanga imojánadorana Bëngbe Bëtsá.

*Jesús canta uaranga boyabásenga saná tojanacaredadó*

*(Mc 8.1-10)*

<sup>32</sup> Chentšana Jesús, chabe uatsjëndayënga tojánachembo y tojanéyana: —Quem entšangbiamá šontsengmena, er ya unga te chënga átšeftaca muentše montsemna y jasama tondaye quemátsbomna. Atše ndoñe quetsátsboše ntjascá cachëngbe yebnoye chënga jtichamuana, er benachiñe shëntsama nantsabuatëcja ca.

<sup>33</sup> As chabe uatsjëndayënga tmojantjá: —¿Ntšamo muatjobenaye quem luarentše, ndocna entšá ndoyenentše, chëfta entšangbiamá saná jinýenama ca?

<sup>34</sup> Y Jesús tojanatjá: —¿Bueta tandëše šmojtsebomna ca?

Y chënga tmojanjúá: —Canýsëfta tandëše y básefta beonatëmënga ca.

<sup>35</sup> Chora Jesús tojanamëndá nyetsca entšanga fshantsiñe chamotbiamama. <sup>36</sup> As chë canýsëfta tandëše y chë beonatëmënga tojanca; Bëngbe Bëtsábioye chama tbojtanchuá, chë saná tojanjatá y chabe uatsjëndayënga tojanëjatá. Chentšana nyetsca entšangbioye tmojanacaredadó. <sup>37</sup> Nyetsca entšanga tmojanse jtoshachaye nyetšá. Y chentšana cabá canýsëfta bëts sbarécua tmojanajutjé chë tojanójamëtemëngaca. <sup>38</sup> Chë tmojansënga imojamna canta uaranga boyabásenga, shembásenga y básenga ntjacuntacá. <sup>39</sup> Chentšana Jesús, chë entšanga tojtanichamó, barquëshoye tojanamashëngo y Magadán luaroye tojtsanoñe.

## 16

*Chë fariseunga y saduceunga tmojánbošëna Jesús chaoma canye bëts soye*

*(Mc 8.11-13; Lc 12.54-56)*

<sup>1</sup> Fariseunga y saduceunga tmojana Jesús jinýama, y jisháchichiyama imojtseimpadana canye bëts soye chaoma, as jtsetatšëmbuama Jesusbe obenana ndegombre Bëngbe Bëtsábicana tainóbocanama.

<sup>2</sup> Pero Jesús tojanéjua: “Tšëngaftanga jetiñoye šmondbétsichamo: ‘Yëfse tšabe te echántsemna, er celoca buánganiñe entsemna ca.’ <sup>3</sup> Y cachëse šmondbétsichamo: ‘Mënté echanjuafté, er celoca buánganiñe y ibetiñe entsemna ca.’ Tšëngaftanga celoye jontješiyëse, ntšamo chë tempo yochtsemnama tša tšabá jayanama šmojtsobenëse, ¿ndáyeca ndoñe šmontsobena jtsetatšëmbuana ndaye bëts soye Bëngbe Bëtsá quem tempo cmojtsinýanýnama? <sup>4</sup> Quem puerte bacna entšanga y ndošbuáchiyënga montseboše atše canye bëts soye chaima, obenana jinýanýiyama; pero ndoñe chca quemochátinýe, sinó nye chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá ca” —Jesús tojanayana.

Chora Jesús tojésanabashejuana y chentšana tojtsanoñe.

*Jesús tojanabuayená chë fariseungbe buatëmbana soyëngama*

*(Mc 8.14-21)*

<sup>5</sup> Chë uafjónaye chenguanocana chënga tmojtanabo ora, chë uatsjédayënga yojésebnëjtomba tandëse jesocñana. <sup>6</sup> Chora Jesús tojanéyana: —Šmochtsantješna; cuedado šmochtsebmna chë fariseunga y saduceungbe levadurama ca.

<sup>7</sup> Pero chë uatsjédayëngna imojtsenatsëtsnaye: —Chca entsichamo, bënga tandëse ndoñe tmonjesocñama ca.

<sup>8</sup> Jesús chë soye yojtsetátšëmbo; chíyeca mëntsá tojanéyana: —¿Ndáyeca tandëšama šmojtsenatsëtsná ca? ¡Tša batšatema ošbuáchiyana šmobomna! <sup>9</sup> ¿Cabá ndoñe cmontsésertana y ndoñe šmontsabouínýna chë shachna tandëšëntšana shachna uaranga entšanga sënjanëjuatšema y bnëtsana uta sbarécua šmonjánajutjema? <sup>10</sup> ¿Y ndoñe šmontsabouínýna chë canýsëfta tandëšëntšana canta uaranga entšanga sënjanëjuatšema y canýsëfta sbarécua šmonjánajutjema? <sup>11</sup> ¿Ndáyeca ndoñe cmontsésertana atše tandëšama ndoñe sëntsóyebuambnama? Cuedado šmochtsebmna fariseunga y saduceungbe levadurama ca —Jesús tojanéyana.

<sup>12</sup> As chora chë uatsjédayënga tojanësertá, Jesús ndoñe tonjánayana chë tandëšëntša levadurama cuedado jtsebmnnana ca, sinó ndayá chë fariseunga y saduceungbe buatëmbana soyëngama.

*Pedro tojánayana, Jesús chë Cristo bëtsemnama*  
(Mc 8.27-30; Lc 9.18-21)

<sup>13</sup> Jesús, Cesarea de Filipino luaroye tojánashjango ora, chabe uatsjédayënga tojanatjá: —¿Nda ca entšanga imojtsichamo chë Bëngbe Bëtsá Entšá tbojanbemá yojtsemna ca?

<sup>14</sup> Chënga tmojanjuá: —Báseftanga montsichamo Juan chë Ubayaná ca, ínýengna Elías ca, ínýengna Jeremías y ínýengna tempsca inýe Bëngbe Bëtsabe juabna oyeambuambayá ca.

<sup>15</sup> As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

<sup>16</sup> Chora Simón Pedro tbojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiñá ca.

<sup>17</sup> Y Jesús tbojanayana: —Simón, Jonasbe uaqiñá, oyejuayá cochanjoyena. Ndocna quem luarentša entšá chë soye checmatinýinýé, sinó atšbe Taitá, celoca endmëná. <sup>18</sup> Y mëntsánaca cbëyana: Mora acna Pedro o chë ndëtšbecá contsemna, y chë ndëtšbeñe atšbe bëts yebna chanjajebo, y ni Satanás, chabe obenánaca entšá jóbanama, queochatobenaye jtsephócama. <sup>19</sup> Atše cbochanjátšetaye obenana, mo llavëfjá, entšanga Bëngbe Bëtsabe amëndayoye jamashënguama chamobenama. Bëngbe Bëtsáftaca chacojtsencuënta ora, canýe soye ndoñe chaondëtsemna ca chacojayanëse, Bëngbe Bëtsá cachcá echanjayana. Y cháftaca chacojtsencuënta ora, canýe soye aíñe chaotsemna ca chacojayanëse, Bëngbe Bëtsá echanjayana aíñe chca chaotsemna ca —Jesús tbojanayana.

<sup>20</sup> Chentšana chabe uatsjédayënga tojanamëndá ndocnábeñe ntsecuëntayana cha, Jesús, chë Bëngbe Bëtsabe Uámana Uabuayaná, chë Cristo bëtsemnama.

*Jesús tojánayana cha ibojamna jóbanana y jtayenana ca*  
(Mc 8.31-9.1; Lc 9.22-27)

<sup>21</sup> Chorscana Jesús tojanontsé chabe uatsjédayënga jábuayenana cha ibojtsemna Jerusalenoye jama, y chocna chë bëtsëjemëngcá mándayënga, chë judiëngbe bachnangbe amëndayënga y chë ley abuátambayënga mochjanma cha puerta chaopadecema ca. Tojanéyana cha mochjanóba, pero unga tianoye yochtanayena ca. <sup>22</sup> Chora Pedro, Jesúseftaca tojanoluaré y tojanontsé mëntsá uatsëtsnayana: —¡Atšbe Uabná, Bëngbe Bëtsá ndoñe chaondëlesenciá chca chaopasama! ¡Ndocna te quenaisopodena chca ácaftaca jopásana ca!

<sup>23</sup> As Jesús tojanobuértana y Pédrëbioyë tbojanayana: —¡Satanás, átšbentšana mojuaná! ¡Aca contseboše atše canýe bacna soye chašócochënguama! Pedro, acbe juabnënga Bëngbe Bëtsábiocana ndoñe quenatóbocana, sinó nýe entšángbentšana ca.

<sup>24</sup> Chentšana Jesús chabe uatsjéndayënga tojanéyana: —Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidinë jtsemándayana ca, chabe quem luarentša soyënga cachcá chauesonýá atše juastama, y atšbiamá jasúfriama chaotseprontana y cruciñe jobanámna. <sup>25</sup> Nda tojtsama quem luarentše bëtscá soyënga jtsebomnama y atšbiamá jasúfriama ndoñe tontseprontana, chë nÿetsca tescama yomna tšabe vida echanjopérdia. Pero nda quem luarentša soyënga cachcá tojëftsonýá atše juastama, masque chaóbana, chë nÿetsca tescama yomna tšabe vida echántsebomna. <sup>26</sup> ¿Ndayama entšá buanjóservia nÿetsca quem luarentša soyënga jtsebomnana, chë nÿetsca tescama yomna tšabe vida tojtsoperdese? Ndegombre, canÿe entšá chë nÿetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nÿetsca tescama yomna tšabe vida jtsebomnama. <sup>27</sup> Chë Bëngbe Bëtsá Entšá tbojanbemá, chabe Taitabe obenánaca y puerte buashinÿinÿaniñe echanjabo chabe angelotémëngaftaca, y chora cada cánÿabioye bochántatšetaye cachcá ntšamo cada ona tojëftsemcá. <sup>28</sup> Ndegombre šcuayana: Báseftanga muentše montsemnënga ndoñe quemochatóbana, Bëngbe Bëtsá Entšá tbojanbemá amëndayacá jabana ntjëftsinÿcá ca —Jesús tojánayana.

## 17

### *Jesús inÿetšá tojanobinÿná* (Mc 9.2-13; Lc 9.28-36)

<sup>1</sup> Chentšana chnënguana tianoÿe, Jesús tojëftsanëbiatše Pedro, Santiago y chabe catšata Juan, y ínÿoye tojanënatse nÿe chënga, canÿe bëts tjoye. <sup>2</sup> Chentše, chëngbe delante inÿetšá cha tojanobinÿná. Chabe jubiá shinÿcá yojtsebuashinÿinÿyana, y chabe uichëtjonéjuangana mo binÿiniñcá uafjantsëjuangá yojtsamna. <sup>3</sup> Chca orna, chabe uatsjéndayënga tmojáninÿe Moisés y Elías tbojanobinÿná, Jesúseftaca encuëntaye.

<sup>4</sup> Chora Pedro, Jesúsbioÿe tbojanianya: “Bëngbe Utabná, ¡tša tšabá bëngbiamá cuanmëna muentše jtsemnana ca! Tcojtsebošëse, unga tambotémënga atše chjapórma: cánÿetema acbiamá, ínÿetema Moisesbiamá y ínÿetemna Elíasbiamá ca.”

<sup>5</sup> Pedro chca yojtsóyebuambnantscuana, canÿe buashinÿinÿyana jantšetëshe nÿetscanga yojáutsbotse. Y chë jantšetëshoicana canÿe oyebuambnayana tmojanuena mëntšá: “Mua atšbe bonshana Uaquiñá endmëna, atše chabiamá sëntsoyejuá. Cha šmochtseyeunana ca.”

<sup>6</sup> Y chë uatsjéndayënga chca tmojanuena ora, tmojanoshamentšë y jubiaca fshantsóntscoñe tmojanotsejbéna, puerte auatjanánënga. <sup>7</sup> Chora Jesús chabe uatsjéndayëngbioÿe tojanobeconá, tojánabojajo y tojanéyana: “Matëtsbananga; ndoñe matauatjëngana ca.”

<sup>8</sup> Y tsbanánoÿe tmojanontješë ora, Jesús nÿe canÿa tmojáninÿe, ndocná inÿa más.

<sup>9</sup> Chë tjocana imojtsatstsmaye ora, Jesús tojanamëndá: —Bëngbe Bëtsá Entšá tbojanbemá obanënguentshana candétayenëntscuana, ndocnábeñe chë šmonjinÿe soyama šmattsecuëntaye ca.

<sup>10</sup> As chë uatsjéndayënga Jesús tmojantjá: —¿Ndáyeca chë ley abuátambayënga mondbétsichamo, canmëna Elías jabana chë Bëngbe Bëtsabe Uámana Uabayana natsana ca?

<sup>11</sup> Chora Jesús tojanéjua: —Ndegombre canÿa Eliascá natsana echanjabo y ntšamo jtsemnama yomncá, lempe echánjabatsma ca. <sup>12</sup> Pero atše cbéyana, canÿa mo Eliascá ya tonjabo, entšanga ndoñe chematanotëmbá y cháftaca entšanga tmonjanma lempe ntšamo tmojanbošencá. Y cachcá, chë Bëngbe Bëtsá Entšá tbojanbemá entšangbe cucuatšinë echanjasúfria ca —Jesús tojánayana.

<sup>13</sup> Chora chë uatsjéndayënga tojanësertá, Juan chë Ubayanabiamá Jesús chca yojtsët-sëtswana.

*Jesús, canye bacna bayëja tbojanbojuaná*  
(Mc 9.14-29; Lc 9.37-43)

<sup>14</sup> Entšanga imojtsemnoye chënga tmojtashhajna ora, canye boyabása tojanobeconá, Jesusbe natsanoica yojshamentšiyey y tbojaniyana: <sup>15</sup> —Utabná, atšbe uaquiñá motse-lastemá. Cha ataque bontsësháchichana y puerte entsesufrina, er cha inye ora iñoey jtseshajayana y inye orna, buyeshoye jtsoshbuetšana. <sup>16</sup> Acbe uatsjéndayëngbiroye cha sënjuánatse y ndoñe chematobená jtseboshnama ca —cha tbojaniyana.

<sup>17</sup> As Jesús tojánayana: —¡Nyetšá ndošbuáchiyënga y bacna entšanga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? Moye chë básetema mánatse ca.

<sup>18</sup> Chora Jesús, chë basetëmeñe bacna bayëjbiroye tbojanácacana y chábentšana cha tojésanbocna. Cach orscana chë básetema tšabá yojsatsmëna.

<sup>19</sup> Chentšana, chë uatsjéndayënga luaroca Jesúseftaca tmojanoyebuambá y tmojaniyana: —¿Ndáyeca bënga ndoñe fsënjobená chë bacna bayëja jtabocnama ca?

<sup>20</sup> Y Jesús tojanéyana: —Tšëngaftanga tša batšatema ošbuáchiyana bomna causa. Ndegombre šcuayana: tšëngaftanga batšatema ošbuáchiyana šmojtsebomñese, masque nye mo canye mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tšëngaftanga lempe jamama šmattsobena. <sup>21</sup> Pero chca bayëjënga jtëbuacnamna jobenayana nye Bëngbe Bëtsáftaca jencuëntase y chama tondaye ntjascá jtsemñese ca —Jesús tojanéyana.

*Jesús cachiñe tojánayana cha ibojamna jóbanana y jtayenana ca*  
(Mc 9.30-32; Lc 9.43-45)

<sup>22</sup> Jesús y chabe uatsjéndayënga cánjiñe Galilea luaroye imojétsaye ora, cha tojanéyana: “Chë Bëngbe Bëtsá Entšá tbojanbemá entšangbe cucuatšiyne mochanjá-boshjona, <sup>23</sup> mochanjóba, pero unga tianoye echántayena ca.” Chë causa chë uatsjéndayënga puerte ngmënaca imojtsemna.

*Chë Bëngbe Bëtsabe bëts yebnama impuesto jtsatsquécjnayama*

<sup>24</sup> Jesús y chabe uatsjéndayënga Capernaumoye tmojánashhajna ora, chë Bëngbe Bëtsabe bëts yebnama entšángbiroye impuesto atjanayënga Pédrëbiroye tmojána y tmojantjá: —¿Acbe buatëmbayá Bëngbe Bëtsabe bëts yebnama impuesto queonýbetsatsquécjnaye ca?

<sup>25</sup> Y Pedro tojanéjua: —Aíñe, cha endbetsatsquécjnaye ca.

Chentšana, Pedro chë yebnoye tojánamashëngo ora, Jesús natsana mëntšá chábroye tbojaniyana: —Simón, ¿ntšamo catjájuaboye? ¿Quem luarentša reyënga ndémuanýngbiroye impuesto inmëtsayëngacaye y crocénana inmëtsatjanaye: cach luarentše oyenëngbiroye o chë inye luarocana ashjajnëngbiroye ca?

<sup>26</sup> As Pedro tbojanjúá: —Chë inye luarocana ashjajnëngbiroye ca.

Y Jesús tbojaniyana: —Chcasna, ndoñe quešnátsmëna chë atšbe Taitabe bëts yebnama impuesto jtsatsquécjnayana ca. <sup>27</sup> Pero ndocná mal chabonduínñanamna uafjajónayoye motsa, anzueléjua cochjútsëna y chë natsana chaojuásjana beona cochjuábocna. Cochjuayetëfjoná y choye crocénana cochanjínýena y chánaca echanjoshjache atšbiana y acbiana jëtsjájuama. Cochjëftsejatsëca y cochjatsboshjona ca —Jesús tbojaniyana.

## 18

*¿Nda chë más uamaná yomna?*  
(Mc 9.33-37; Lc 9.46-48)

<sup>1</sup> Chentšana chë uatsjéndayënga Jesúsbroye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

<sup>2</sup> Chora Jesús canye basetémbyoye tbojanchembo y chëngbe tsëntsaca tbojanatsá.  
<sup>3</sup> Y tojánayana: —Ndegombre cbéyana, nda mo basetemcá ndoñe tontóbema y ndoñe chacá Bëngbe Bëtsabe soyënga tonjójëngacñe, cha ndocna te queochatobenaye Bëngbe Bëtsabe amëndayoye jamashënguama. <sup>4</sup> Chca, nda tojtsejuabná canye nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna. <sup>5</sup> Y nda átšbeñe ošbuachiyá bëtsemnayeca, tbojofja canya mo quem basetembioycá, chana atše jofjana ca —Jesús tojánayana.

*Resjo yomna, nderado bacna soyënga cuanjama*  
*(Mc 9.42-48; Lc 17.1-2)*

<sup>6</sup> “Nda canye básetema átšbeñe ošbuachiyábbyoye tbojaingñé bacna soye jamama, chabiama más tšabá nántsemna canye bëts nantsnëbé chamotsetamošëntšbua y chë mar béjaye shbuatsëntsoye chamotsashbuëtše chabotsenatjëmbama. <sup>7</sup> ¡Tša lastema quem luarentša entšangbiama, chë ínÿenga bacna soye jamama chaócochënguama tmojtsamëngbiama! Nÿets tempo chca amënga mochanjëftsemna. Pero, ¡payajema chë inya bacna soye chaomama tojtsamá ca!

<sup>8</sup> “Chíyeca, acbe cucuatšeca o acbe shecuaštšeca bacna soye tcojamëse, cochtsenástjango y bënoye cochtsëtšena. Acbiama más tšabá nántsemna celoye jamashënguana chë nÿetsca tescama yomna tšabe vida jtsebomnana, cucuatše ndbomná o cosheto, y ndoñe nÿets uta cucuatšeca o shecuaštšeca chë nÿets tempo echanjesomñe ññeshoye chacmotsëtstjango. <sup>9</sup> Nderado acbe bomínÿeca bacna soye tcojinÿe y cachca soye tcojama, chë bominÿe cochtsenobuchjatsëca y bënoye cochtsëtšena. Acbiama más tšabá nántsemna, celoye jamashënguana nÿe canye bomínÿeca, y ndoñe nÿets uta bomínÿeca infiernoje chacmotsëtstjango, chë bëts ññeshoye ca” —Jesús tojánayana.

*Chë ótsëna oveshabiama cuento*  
*(Lc 15.3-7)*

<sup>10</sup> Mëntšánaca Jesús tojánayana: “Ni mo cánÿabyoye quem tsëm osbuáchiyënguentshana, chë mo basetemëngcá mondmënënga, mo nduamanacá šmattsonÿaye. Ndegombre cbéyana, chëngbe angelotëmënga celoca, sempre atšbe Taitá celocáftaca mondetsemna ca. <sup>11</sup> Er chë Bëngbe Bëtsá Entšá tbojanbemá tonjabo chë pochocánënga jtsemnana imojtsajnënga jabátsebacama.

<sup>12</sup> “¿Ntšamo tšëngaftanga šmatjájuaoye? Canye boyabása patse oveshënga tojtsabamna y ndeolpe canye chentša oveshá tojtsotše. ¿Chë boyabása ndoñe chë inÿe esconëfta bnëtsana y esconëfta oveshënga tjoca cachcá nanjesëñÿaye, jama chë ótsëna oveshá jetsenguanguama? <sup>13</sup> Y chë oveshá jetsinÿenama tojobenase, ndegombre chë boyabása más oyejuayá jtsemnana chë ótsëna oveshabiama, y ndoñe nÿa chca chë inÿe esconëfta bnëtsana y esconëfta oveshëngbiama chë ndoñe tmonjanotšëngbiama. <sup>14</sup> Cachcá, tšëngaftangbe Taitá, Bëngbe Bëtsá, chë celoca endmëná, ndoñe quenátšboše ni canya quem basenguentshana mo otšenacá chaotsemna, bacna soyënga jtsamëse oyena causa ca” —Jesús tojánayana.

*Ntšamo cuanjama inÿa japerdónama*  
*(Lc 17.3)*

<sup>15</sup> “Nderado acbe catšata, bacna soye tcmojaborlase, cochjá, cánÿata šochjencuënta y cochjama cha chauenójuaboma, ndegombre bacna soye tcmojaborlama. Cha chacmójoyeunasna, acbe catšata cachiñe tšabá ácaftaca echántsmëna. <sup>16</sup> Pero ndoñe tcmonjójoyeunasna, inÿe útata cochjáchembo chacmotjëmbambama, chca, chata chabouena ntšamo cochjauyanama y chamuayana ndegombre chca yomnama. <sup>17</sup> Y chata ndoñe tonjójayunase, chentša Bëngbe Bëtsábeñe ošbuáchiyënga macuntá. Y chënga ndoñe tonjójayunase, cochjayana cha yomna mo canya Bëngbe Bëtsábbyoye nduabuatmacá,

mo canye ndoñe judiyca ca o canye bacna entsá mo canya Romocama impuesto entsángbioye atjanayaca yomna ca.

<sup>18</sup> “Ndegombre cbéyana: Tšengaftanga Bëngbe Bëtsáftaca chašmojtsencuénta ora, chašmojayana canye soye ndoñe chaondétsemna ca, Bëngbe Bëtsá cachca echanjayana. Y cháftaca chašmojtsencuénta ora, chašmojayana canye soye aíñe chaotsemna ca, Bëngbe Bëtsá echanjayana aíñe chca chaotsemna ca.

<sup>19</sup> “Mëntšánaca cbéyana: Nderado útata tšengaftanguentsana quem luarentše tbojenoyeuná Bëngbe Bëtsáftaca jencuéntama ndayánaca jótjañama, Bëngbe Bëtsá chë celoca endmëná pronto chë soye cmochanjátšataye. <sup>20</sup> Ndayentše útata o únganga tmojénefjna, átšbeñe ošbuáchiyënga bëtsemnama, chentše atše chëngbe tsëntsaca chántsemna ca” —Jesús tojánayana.

<sup>21</sup> As Pedro tojána y Jesúsbioye tbojantjá: —Bëngbe Utabná, ¿atšbe catšata bacna soye šojaborlase, bueta soye šojtsemna cha japerdónana? ¿Canysëfta soye ca?

<sup>22</sup> Y Jesús tbojanjuá: —Ndoñe nye canysëfta soyama quecbatatsëtsná, sinó canysëfta bnëtsana soye canysëfta ca.

### *Ndayá inopása chë japerdónama ndëbošëngaftaca*

<sup>23</sup> Mëntšánaca Jesús tojanéyana: “Cbochanjáuyana ntšamo Bëngbe Bëtsabe améndayana yomnana. Endmëna ntšamo canye réyefraca tojanopasacá. Cha yojábošena chabe oservénënga crocénana jtsëtjañana. <sup>24</sup> Jtsëtjañama yojóntša orna, canye boyabása imojuánatse, chë réybioye mallajta crocénana ibnandebena. <sup>25</sup> Chë oservená tondaye yonjábomna chë ndebénama jëtsjájua; asna chë rey yojamánda cha chamotsiye nyets tempo nye ínÿabiama chaotsoservénama, chabe shema y chabe básengnaca, y lempe ntšamo yojanbomncánaca, y chca chë ndebénama jtopágama. <sup>26</sup> Chora chë oservená chë reybe shecuatšentše yojoshamentšiye y ibojtseimpáda: ‘Taita, Diosmanda šmotsëuantajema. Atše lempe cbochanjëtsëntšabuachiye ca.’ <sup>27</sup> Chë reyna chë boyabásabiama ibojóngmia; as chë ndebénana ibojtseperdóna y ibojëtsboshjona.

<sup>28</sup> “Chë oservenana chentšana yojésebocna y benachiñe inye oservenáftaca ibojenbetše, cach mandadbiama trabajayá. Chë inye oservenana nye batšatema crocénana chábioye ibnandebena. Chora chë oservená chë enutábioye tamošajentsana ibojishache y ibojóntša jtsëtajuashbebiana y mëntšá ibojauyana: ‘¡Ndebénana šmatsëntšabuaché ca!’ <sup>29</sup> Chora cha chë oservenabe shecuatšentše yojoshamentšiye y ibojtseimpáda: ‘Diosmanda šmotsëuantajema. Atše lempe cbochanjëtsëntšabuachiye ca.’ <sup>30</sup> Pero chë oservená ndoñe yonjábošena, sinó yojama chë inye oservenábioye cárceloye chamotšëtámia, chë ndebénana candëtsjájëntscuana. <sup>31</sup> Chë inye oservénënga chca imojinye ora, puerte yojóngmia y imojá lempe ntšamo yojopasacá chëngbe rey jacuéntama. <sup>32</sup> As chë rey yojamánda chë boyabása jobetšana, y ibojauyana: ‘¡Puerte bacna oservená! Šconjaimpadáyeca, nyets ndebénana tcbontseperdoná. <sup>33</sup> Acnaca cachcá cmondmëna chë cach aquécá muentša trabájayabiama jóngmiana, ntšamo atše acbiama šonjongmecá ca.’ <sup>34</sup> Y tša chë rey ibojtsetna; as yojamánda jabuache chamotsetsetšená nyets ndebénana candëtsjájuantscuana ca” —Jesús tojanacuntá.

<sup>35</sup> Chora Jesús tojánayana: “Atšbe Taitá, celoca endmëná, cachcá tšengaftangaftaca echanjama, tšengaftangbe catšata ndoñe ndegombre nyets ainánaca šmonjaperdonase ca.”

## 19

### *Ndayá Jesús tojanabuatambá chë bouamnënga tmojtsenëtšenama (Mc 10.1-12; Lc 16.18)*

<sup>1</sup> Chë soyënga tojánayanentsana, Jesús Galilea luarentšana tojtsanoñe y Judeoye tojánashjango, Jordán chenguánoica. <sup>2</sup> Ba entsanga tmojanasto y chentše šoquënga tojánashná.



<sup>3</sup> Básefta fariseunga Jesúsbioye tmojanobeconá y jisháchichiyama mēntšá tmojan-tjá: —¿Queojtselesenciana canye boyá nye ndayámnaca chabe shémbioye cachcá jesonýayama ca?

<sup>4</sup> As Jesús tojanéjua: —¿Tšēngaftanga ndoñe chē Bēngbe Bētsabe uabemana palabrēnguiñe šmēndualía, Bēngbe Bētsá, chē entsānga tojanabiamá, quem luare jobojátšama ora “boyá y shema tojánabiamama”? <sup>5</sup> Y Bēngbe Bētsá tojánayana: “Chíyeca boyabása chabe taitá y chabe mamá echanjésabashejuana, chabe shémaftaca jenútanama, y chē útata mo canýacá bochántsemna ca.” <sup>6</sup> Y chca, ya ndoñe útata quebochátsmēna, sinó mo nye canýacá. Chcasna, entsá ndoñe chaondéndbema ndayá Bēngbe Bētsá mo canýiñcá tojéftsema soye ca —Jesús tojánayana.

<sup>7</sup> Chora chē fariseunga tmojanianyana: —¿As, ndáyeca Moisés tojanmandá, chē shém-bioye canye uabemana tsbuanácha juiyiyana jtsenétšenama y cachcá jesonýayana ca?

<sup>8</sup> Y Jesús tojanéyana: —Tšēngaftanga Bēngbe Bētsabe mandēnga jójyēngacñama ndoñe quešmátsboše causa, Moisés tmojanalesenciá shémbioye jesétšenana. Pero quem luare jobojátšama orna, ndoñe chca quenjatsmēna. <sup>9</sup> Atše cbéyana, nda chabe shémaftaca tbojtsenétšena y chca tojopasá ndoñe chē shema chabe boyábioye ín्याftaca tbontseingñé causa, y chē boyá ín्याftaca tojtóbouamasna, cha chē natsana shémbioye ín्याftaca jtseingñayana ca —Jesús tojánayana.

<sup>10</sup> Chora chabe uatsjēndayēnga tmojanianyana: —Chca chē boyá y shémaftaca tojtsem-nēsna, ndoñe tšabá yontsemna jobouamayana ca.

<sup>11</sup> Y Jesús tojanéyana: —Nýetscanga ndoñe quemátobena chē palabrēnga jójyēngacñana, nye chē Bēngbe Bētsá tojama jójyēngacñama chamobenama, chēngna añe. <sup>12</sup> Ba soyēnga comna ndaye causa chē boyabásēnga ndoñe ntsobenana jobouamayana. Inyēnga jónýnana jobouamayama ndobenēnga, ínýēngbioye cach entsānga jábiamana jobouamayama ndobenēnga y ínýēngna, nýets tempo nye Bēngbe Bētsabe amēndayama oserverna causa ca —tojanéyana.

*Jesús, basetémēngbiana Bēngbe Bētsábioye tbojanimpadá  
(Mc 10.13-16; Lc 18.15-17)*

<sup>13</sup> Entšānga basetémēnga Jesúsbioye tmojanēnatse, cha chauabojajuama y Bēngbe Bētsábioye chēngbiana chaboimpadama. Pero chē uatsjēndayēngna tmojanontsé chē basetémēnga unachayēnga jtsēcācanana. <sup>14</sup> Chora Jesús tojanéyana: “Cachcá mónýaye chē basetémēnga átšbioye chamuabo y ndoñe matéuyanana; er Bēngbe Bētsabe amēndayana endmēna mo quem basetémēngcá imomnēngbiana ca.” <sup>15</sup> As chē basetémēnga tojánabojajo, Bēngbe Bētsá jaimpádase; y chentšana cha tojtsanoñe.

*Canye bomna bobontse Jesúsbioye tojána  
(Mc 10.17-31; Lc 18.18-30)*

<sup>16</sup> Chentšana, canye boyabása tojána Jesús jinýama y mēntšá tbojantjá: —Buatēmbayá, ¿ndaye tšabe soye chjama chē nýetsca tescama yomna tšabe vida jtsebomnama ca?

<sup>17</sup> Y Jesús tbojanjuá: —¿Ndáyeca chē tšabe soye ndayá bétsemnama šcojtsetjaná ca? Tšabia nye canya endmēna: Bēngbe Bētsá. Aca chē nýetsca tescama yomna tšabe vida jtsebomnama tcojtsebošēse, mandēnga cochtsobedecena ca.

<sup>18</sup> Chora chē bobontse tbojantjá: —¿Ndaye mandēnga ca?

Y Jesús tbojanjuá: —“Ndoñe catjóba, acbe shema ín्याftaca ndoñe cattseingñaye, ndoñe catjatbēba, ndoñe catjuaboínýena. <sup>19</sup> Acbe bētsétsata stētsoye ndoñe catjáquedaye y ndēmua entsānaca cochtsebobonshana ntšamo cach aca cuenobobonshancá ca” —Jesús tbojanianyana.

<sup>20</sup> Chora chē bobontse tbojanjuá: —Atše lempe chca nýets tempo sēndocumplina. ¿Ndayá más šojtsebuáshbena ca?

<sup>21</sup> As Jesús tbojaniyana: —Aca lempe tšabá jamama tcojtsebošëse, motsa, acbe bomna soyënga cochjetsatobuiye y chë crocénana, ndbomnjémënga cochtsatšataye; chca, bëts uacanana soye celoca cochántsebomna. Chentsana cochjabo y šcochjuasto ca.

<sup>22</sup> Chë bobontse chca tojanuena ora, ngménaca yojtsatoñe, cha corente bomná bemna causa.

<sup>23</sup> Chora Jesús chabe uatsjédayënga tojanéyana: —Ndegombre cbéyana, puerte totcá entsemna canye bomnabiama Bëngbe Bëtsabe améndayoye jamashënguama ca. <sup>24</sup> Chë bomnabiama cachiñe šcuatayana: Más paselo entsemna canye camello chë coshuf-jentša atëfjnëjana chauachnëngo, y ndoñe canye bomná Bëngbe Bëtsabe améndayoye jamashënguana ca.

<sup>25</sup> Chabe uatsjédayënga chca tmojanuena ora, puerte ojnanánënga imojtsemna y imojtsichamo: —As, ¿nda yochjobenaye atsocaná jtsemnama ca?

<sup>26</sup> Jesús chënga tojanënyané y tojanéyana: —Entšanga ndoñe quemátobena jamama canya atsocaná chaotsemnama, pero Bëngbe Bëtsá aíñe, er cha nyetsca soyënga jamama endobena ca.

<sup>27</sup> Chora Pedro tbojaniyana: —Aca contsonyá, bënga lempe chë fsëndbomna soyënga fsënjéseboshjona y ácaftaca fsëntsajna. As, ¿ndayá bënga fchjójyëngacñe ca?

<sup>28</sup> As Jesús tojanéyana: —Ndegombre cbéyana, nyetsca quem luarentša soyëngama mo tsmécá jtsemnama tempo chaojobuache ora, chë Bëngbe Bëtsá Entšá tbojanbemá chabe buashinýinyana bëts tšenëšiñe reycá echanjót'bema jtsemándayama; y tšëngaftanga, chë atšë šmëstonëngna, chora bnëtsana uta uámana tbemaniñe šmochanjot'biamama mo reyëngcá, chë Israeloca bnëtsana uta bëts pamillentsa entsangbiamama jayanama tšabá o ndoñe tšabá tmonjamama. <sup>29</sup> Y ndëmuanýënga, atšë jaserviama tmojëftseboshjona cachëngbe yebna, catsátanga o uabénanga, befta o bebmá, básënga o fshantsënga, chë soyëngama patse soye más mochanjójyëngacñe y chë nyetsca tescama yomna tšabe vídnaca. <sup>30</sup> Pero banga mora uámanënga imomnënga, nduámanënga mochántsemna; y banga mora nduámanënga imomnëngna, uámanënga mochántsemna ca —Jesús tojánayana.

## 20

### *Chë trabájayëngbiamama cuento*

<sup>1</sup> Mëntsánaca Jesús tojánayana: “Bëngbe Bëtsabe améndayana endmëna mo canye bëts jajañe nduiñcá. Chë nduiña canye te cabá cachëse yojábocna peonga janguanguama, chabe uvas betiyënga jajañe chamotrabajama. <sup>2</sup> Chë nduiño peonga yojánýena orna, imojenóyeunaye canye tescama canye denario crocénana jtëbuénayama. As chora yojichamuá chë uvas betiyënga jajoye jatrabájama. <sup>3</sup> Mo base mošenana ora, chë nduiño cachiñe yojábocna y plazoca atsanënga ínýënga yojanyë, tondaye ntsamcá. <sup>4</sup> As yojáyuyana: ‘Tšëngaftángnaca atšbe uvas betiyënga jajoye motsajna jatrabájama y ntšamo chašmojamcá cbochtëbuénaye ca.’ Y chë entsanga imojá. <sup>5</sup> Nyetsto ora y bëts mošenana ora, chë nduiño cachiñe yojábocna y cachiñe cachcá yojopása. <sup>6</sup> Mo la cinco ora, chë nduiño cachiñe yojábocna y chenache ínýënga yojánýena, tondaye ntsamcá. As yojátjaye: ‘¿Ndáyeca tšëngaftanga nyets día ntjatrabajacá muentšë šmotsomñe ca?’ <sup>7</sup> Y chënga imojojuá: ‘Ndocná bënga chešnataimpadá causa ca.’ As chë nduiño yojáyuyana: ‘Tšëngaftángnaca atšbe uvas betiyënga jajoye motsajna jatrabájama y cbochtëbuénaye ca.’

<sup>8</sup> “Y ya bien jetiñe yojtsemna orna, chë nduiño chabe caporálbioye ibojauyana: ‘Peonga metsachembo y cochtëbuénaye. Chë ústonoye tmojášhjajnënguentsana cochjabojátša y chë natsana tmojášhjajnënga ústonoye ca.’ <sup>9</sup> Y chë mo la cinco ora imojášhjajnënga imojobeconá, y cada ona canye denario crocénana yojtáyentsbuachiye. <sup>10</sup> Chentsana, chë natsana jatrabájama imojášhjajnënga yojtsamna jobéconama y chënga imojëtsejuabnaye más crocénana mochjanójyëngacñe ca. Pero chëngnaca cach canye

denario crocénana yojtëbuénaye. <sup>11</sup> Chca imojóyëngacñe orna, chënga imojóntša chë nduiñbiama bacá ichámuana, <sup>12</sup> mëntšá: ‘Quemënga chë ústonoye tmonjášhjajnënga nÿe canÿe horatema tmonjatrabajá; ntšamo bënga šcontëbuenacá, cachcá chënga contëbuená y bëngna nÿets día jabuache fsënjatrabajá y corente jënÿá fsënjauantá ca.’

<sup>13</sup> “Pero chë nduiño canÿa chca yojtsichamuábioye ibojojuá: ‘Sobreno, acbiama ndocna ndoñe tšabe soye chiyatsma. ¿Ndoñe canÿe denario crocénana canÿe tescama tbonjenoyeuná ca? <sup>14</sup> Chcasna, acbe uacanana crocénana mesocñe y motsatoñe. Atše séntseboše chë ústonoye jatrabájama tojashjanguá jtabuénayana, cachcá ntšamo aca tcojtabuenacá. <sup>15</sup> Chca entsemna, er atše sëndobena atšbe crocénánaca nÿe ndayánaca jamana. ¿O aca envidia cojtsebomna, atše tšabia tsmënama ca?’ ” —cha yojayana.

<sup>16</sup> Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnëngna, nduámanënga mochántsemna ca.”

*Jesús cachiñe tojánayana cha jóbanama y jtayenama*

*(Mc 10.32-34; Lc 18.31-34)*

<sup>17</sup> Chënga Jerusalenoye imojtsaye ora, Jesús barie tojánachembo chabe bnétsana uta uatsjédayënga y tojanéyana: <sup>18</sup> “Tšëngaftanga šmontsonÿá mora bënga Jerusalenoye montsajnama. Chocna chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšinë mochanjáboshjona, y chënga mochanjayana jóbanama cha ibojtsemna ca, <sup>19</sup> y chë ndoñe judiëngbe cucuatšinë mochanjáboshjona chënga chamotsáboyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

*Chë Santiago y Juanbe mamabe impadana soye*

*(Mc 10.35-45)*

<sup>20</sup> Chentšana, Zebedeobe uaquiñatbe mamá chabe uaquiñátaftaca Jesúsbioye tojanobeconá, chabe shecuatšëntše yoJoshamentšiyë canÿe pavorama jaimpádama. <sup>21</sup> As Jesús tbojantjá: —¿Ndayá cojtseboše ca?

Y chë shembása tbojaniyana: —Aca reycá chacojtsemánda ora, cochjamánda atšbe uaquiñata chabótbema canÿa acbe catšbioica y chë inÿa acbe uañicuayoica, ácaftaca chabotsemándama ca.

<sup>22</sup> Y Jesús tojanéjua: —Ntšamo šmontsotjanañama, tsëndata ndoñe quešnátstatšëmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjuá: —Aíñe, fchanjobenaye ca.

<sup>23</sup> Chora Jesús tojanéjua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catšbioica o atšbe uañicuayoica chašótbemama. Chë útentše entsemna ndëmuanÿengbiama atšbe Taitá tojaprontacá ca.

<sup>24</sup> Chë inÿe bnétsana uatsjédayënga chca tmojanuena ora, chë uta catšátaftaca tmojanotjayaná. <sup>25</sup> Chora Jesús chë uatsjédayënga tojánachembo y tojanéyana: —Tšëngaftanga šmondétatšëmbo, chë ndoñe judiëngbeñe chë reyënga lempe jtsemándayana nÿa mo nduiñënga cuaftsemncá; y chë bëtsëtsa entšangna chëngbe obenánaca jtsemándayana, ndayánaca jtsamëse, chë inÿe entšanga sempre chamotsayauanama. <sup>26</sup> Pero tšëngaftangbeñna ndoñe chca chaondétsemna. Inÿetšá; masna, nda tšëngaftanguentše chë más uamaná jtsemnama tojtsebošá bontsemna chë ínÿënga jtsaservénana. <sup>27</sup> Y ndánaca tšëngaftanguentšá chë más uamaná jtsemnama tojtsebošá bontsemna jtsemnana mo nÿe ínÿabiama nÿets tempo oservenacá. <sup>28</sup> Cachcá, chë Bëngbe Bëtsá Entšá tbojanbemá ndoñe chenátabo cha chamotseservénama, ndayá ínÿënga jabáserviama. Y mo nda ínÿënga játsebacama cuafjëtšajocá, cha echanjóbana, ba entšanga atsebácanënga chamotsemnama ca —Jesús tojánayana.

*Jesús uta jtanata tojanashná*

*(Mc 10.46-52; Lc 18.35-43)*

<sup>29</sup> Chënga, Jericó bëts pueblentšana tmojánbocana ora, ba entsanga Jesús imojtsés-tona. <sup>30</sup> Uta jtanata benache juachañe ibnatbemana. Jesús chëjana yojsachñëjuanama chata tbojanuena ora, tbojanontsé uayebuáchana: —¡Utabná, Davídbentšana Entśá, šmotsalastemá ca!

<sup>31</sup> Entśanga chë jtanátbioye tmojtsanëcácana iytëca chabotsemnana, pero chatna más ibojtsáyebuache: —¡Utabná, Davídbentšana Entśá, šmotsalastemá ca!

<sup>32</sup> As Jesús yojsaysaye, chë jtanata tojánachembo y tojanatjá: —¿Ndayá šojtseboše atše tsëndatbiamá chjamama ca?

<sup>33</sup> Y chata tbojanjuá: —Utabná, bëndata chabuatëbínýnama ca.

<sup>34</sup> Jesús chatbiamá tbojanongmé y tojánabuchbojajo. Cachora chë jtanata tšabá yojtëbinýna y Jesús tmojanasto.

## 21

### *Jesús Jerusalenoye tojánashjango*

*(Mc 11.1-11; Lc 19.28-40; Jn 12.12-19)*

<sup>1</sup> Ya Jerusalenoca béconana imojtsemna y canýe pueblo Betfagé ca uabáinoca tmojánashjango, canýe tjashe Olivos ca uabáinentše. Chora Jesús uta chabe uatsjéndayata tojanichamó, <sup>2</sup> y mëntśá tojanéyana: “Tsëndatbe natsana entsemna base pueplotémoye motsata. Cachora canýe burrá utsbuaná šochanjínýena y cháftaca canýe burrotema echántsemna. Šochjuafjoná y šochjuánatse. <sup>3</sup> Nderado nda ndayánaca chacmojáuyanëse, šochjauyana: ‘Bëngbe Utabná bontsájaboto y chentšana camuentše echanjabáisabashejuana ca.’ ”

<sup>4</sup> Chca tojanopasá, cachcá chaotsemnana ntšamo chë Bëngbe Bëtsabe juabna oyebuambnayá tojanayancá. Cha mëntśá tojanábema:

<sup>5</sup> Jerusalén bëts pueblentše oyenënga méyana:

“Minýënga, tšëngaftangbe Rey chentše tšëngaftangbioye entsabó, ndoñe mo canýa cachá bëtsá enobiamnayacá; canýe búrrbeñe enjaquená; canýe burrotémiñe, canýe uatrabájaye bayabe šëšónbeñe ca.”

<sup>6</sup> Chora chë uatsjéndayata tbojána y tbojanma ntšamo Jesús tojanamëndacá. <sup>7</sup> Chë uatsjéndayatna chë burrá y chë burrotema tmojanënatse, entsáyëjuangá chátbeñe tbojanájatse y chora Jesús chábeñe tojanenojayé. <sup>8</sup> Bëtscá entsanga chëngbe entsáyá chë benachëjana imojtsëtétsatsana, y ínýengna betiyeshënguiñe buacuafjënga imojtsetcoye y chiñe imojtsequëcñá. <sup>9</sup> Y chë natsana imojtsajnënga y chë ústonoyënga mëntśá imojtsaiuáyebuache: “¡Rey Davídbentšana Entśá matschuanga ca! ¡Corente bendición bomná, chë Bëngbe Utabnabe obenánaca tojabá! ¡Bëngbe Bëtsá celocá matschuanga ca!”

<sup>10</sup> Jesús Jerusalenoye tojánamashëngo ora, nýetsca entsanga imojtsenbouenana y banga imojtsenotíciaye: —¿Nda mua yojtsemna ca?

<sup>11</sup> Y chë entsanga imojtsëjuana: —Chë Bëngbe Bëtsabe juabna oyebuambnayá Jesús, chë Galileoca pueblo Nazaretocá ca.

### *Jesús, Bëngbe Bëtsabe bëts yebnentšana enënga y obuámnayënga tojtanëbuacna*

*(Mc 11.15-19; Lc 19.45-48; Jn 2.13-22)*

<sup>12</sup> Chentšana Jesús, Bëngbe Bëtsabe bëts yebnoye tojánamashëngo y chë entsanga chentše imojtsena y imojtsobuámnayënga chentšana tojtanëbuacna. Chéntšnaca imojtsemna entsanga canýe crocénana enënga, y chë crocénana nýe Bëngbe Bëtsabe bëts yebnentšama inoservena. Chëngbe mesëshangá tojtsanenásatajchquëca y chë palomatema enëngbe tšëñëšëgnaca. <sup>13</sup> Y tojanéyana: “Bëngbe Bëtsabe uabemana palabrënguiñe cha mëntśá tojánayana: ‘Atšbe bëts yebna echantsabaina átšeftaca encuéntaye yebna ca’; pero tšëngaftangna, atbëbanëngbe oyeniñe chë yebna šmojtsebema ca” —Jesús tojanéyana.

<sup>14</sup> Chentšana, Jesús yojtsemnoye Bëngbe Bëtsabe bëts yebnentše, jtanënga y coshetënga tmojanobeconá, y cha tojanashná. <sup>15</sup> Chë bachnangbe más uámana améndayënga y ley abuátambayënga, Jesús bëts soyënga yojtsamama tmojáninÿe ora, y chë basetémënga Bëngbe Bëtsabe bëts yebnentše imojtsayebuáchama tmojanuena ora, tša tmojanotjáyananga. Chë basetémënga mëntšá imojtsáyebuache: “¿Chë Rey Davidbentsana Entšá matschuanga ca!” <sup>16</sup> As Jesús tmojanianyana: —¿Ntšamo chë basetémënga montsichamcá quequetsuenana ca?

Y Jesús tojanéjua: —Aíñe, sentsuenana. Pero, ¿tšëngaftanga Bëngbe Bëtsabe uabemana palabrenguiñe chë soyama ndoñe šmëndualía? Chiñe mëntšá endayana:

Chë basetémënga y ochóchaye šešonatémëngbe canténgaca  
aca tcojama entšanga chacmotsatschuanama ca.

<sup>17</sup> Chora Jesús chënga tojésanabashejuana y Jerusalemëntšana Betania puebloye tojtsanoñe; y chentše chë ibeta tbojánbobyña.

*Jesús tojánayana canÿe higo betiye ndoñe más chaondëshájona ca*

*(Mc 11.12-14, 20-26)*

<sup>18</sup> Chë te cachëse, Jesús cach bëts puebloye yojtësa ora, tbojánishëntsena. <sup>19</sup> Chora canÿe higo betiye benache juachaca yojinÿe; as choye yojobeconá, pero nÿe ena tsbuanáchënga chiñe yojinÿena. As Jesús chë higo betiyoye tojánayana: “¿Ndocna te más chacondëshájona ca!” Y betsco chë higo betiye tojtsanbuashá.

<sup>20</sup> Chë uatsjëndayënga chca tmojáninÿe ora, imojenjnaná y Jesús tmojantjá: —¿Ntšamo chca chë higo betiye canÿe ora tojtsebuashá ca?

<sup>21</sup> Y Jesús tojanéjua: —Ndegombre cbéyana, tšëngaftanga Bëngbe Bëtsábeñe osbuáchiyana šmojtsebmoma y chabiamana ainaniñe ndoñe inÿetšá šmonjátsjuabnase, šmochantsobena jamama ndoñe nÿe ntšamo atše quem higo betiyeca sënjamcá, sinó quem tjoye, “muentšana mojuaná y uafjajónayoye moshbuetše ca” šmojayanëse, chca jochnënguana. <sup>22</sup> Y Bëngbe Bëtsáftaca chašmojtsebcuënta ora, chábeñe jtošoöbuáchiyëse, lempe ntšamo chašmojtjañcá šmochanjóyëngacñe ca —Jesús tojánayana.

*Jesusbe obenana*

*(Mc 11.27-33; Lc 20.1-8)*

<sup>23</sup> Chca tojanopasá chentšana, Jesús Bëngbe Bëtsabe bëts yebnoye tojánamashëngo. Chentše yojtsabuátambantscuana, bachnangbe améndayënga y judiëngbeñe bëtsëjemëngcá améndayënga tmojanobobeconá y tmojantjá: —¿Ndaye deréchoca chë consama soyënga aca cojtsama ca? ¿Chca jtsamama nda mando tcmënjatštá ca?

<sup>24</sup> As Jesús mëntšá tojanéjua: —Atšnaca canÿe soye sëntsebmoma tšëngaftanga jatjayama, y quešmojojuase, átšnaca cbochjáuyana ndaye deréchoca atše chca stsama.

<sup>25</sup> ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca? —Jesús tojanéyana.

Chama chënga tmojanontsé mëntšá enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As, ¿ndáyeca chë tcmojanabuayená soyënguiñe ndoñe šmonjanošbuaché ca?’ <sup>26</sup> Pero ndoñe quemuátobena jayanana ‘entšanga ca’; muentša entšangbiamana bënga montsauatja, er nÿetscanga mondëjuabná Juan ndegombre Bëngbe Bëtsabe juabna oyebuambnayá yomna ca.” <sup>27</sup> Chcasna chënga Jesús tmojanjuá: —Bënga ndoñe queftsátstatšëmbo ca.

Y as Jesús tojanéyana: —Atše cach ndoñe quebochatéyana ndaye deréchoca chca stsama ca.

*Chë uta uaquiñátbiamana cuento*

<sup>28</sup> Chora Jesús entšanga tojanatjá: —¿Ntšamo tšëngaftanga quem soyama šmatjayana? Canÿe boyabása uta uaquiñata yojánabamna, y cánÿabioye ibojauyana: “Uaquiñá, mënté motsa atšbe uvas betiyënga jajoye jatrabájama ca.” <sup>29</sup> Chë uaquiñá ibojojuá: “¿Jama ndoñe queftsátboše ca!” Pero botamana yojenójuaboye y pronto choye yojá.

<sup>30</sup> Chentšana chë taitá chë inye uaquiñábioye cachcá ibojauyana. As cha ibojojuá: “Arseñor, aínne chanjá ca.” Pero ndoñe yonjá. <sup>31</sup> ¿Chë útatentšana ndëmuanyá tojanma ntšamo chë taitá yojabošcá ca? —Jesús tojanatjá.

Y chënga tmojanjuá: —Chë natsaná ca.

Chora Jesús tojanéyana: —Ndegombre cbéyana, chë Romocama entšángbioye impuesto atjanayënga y chë bacna vida bomna shembásenga, tšëngaftangbiama más montseprontana Bëngbe Bëtsabe améndayoye jamashënguama. <sup>32</sup> Juan chë Ubayaná tonjánabo tšëngaftanga jábuayenama ntšamo jtsiyenana cmamnana, ntšamo Bëngbe Bëtsá yobošcá, y tšëngaftanga chë tmojanabuayená soyënguiñe ndoñe chešmatanošbuaché; y chë cuenta, chë Romocama entšángbioye impuesto atjanayënga y bacna vida bomna shembásengna aínne chábeñe montsanošbuaché. Y tšëngaftanga, masque ntšamo chënga Bëngbe Bëtsábeñe imojtsošbuáchema lempe šmojinýese, chë juabnayana ndoñe šmonjatrocá, chábeñe jtsošbuáchiyama ca —cha tojanéyana.

*Chë puerte bacna trabájayëngbiama cuento*  
(Mc 12.1-12; Lc 20.9-19)

<sup>33</sup> Mëntšánaca Jesús tojánayana: “Inye cuento šmochjatuena chašmuatsjínýama: Canye jajañe nduiño uvas betiyënga yojáje y chë shéconana yojajétja. Chë uvasëšangá juantšëtetjamna canye base luare yojajutjo y canye tsbanana jebna soye yojapórma chentše jtsaishanyama. Chentšana, inye trabájayënga chë jajañe yojárrendaye y chana inye luaroye yojtsoñe. <sup>34</sup> Chë uvasëšangá juashacama tempo yojobuache orna, chë jajañe nduiño básefta oservénënga yojichamuá chë arréndayënga jáuyanama ntsachetšá chë nduiño ibojtsotocánama. <sup>35</sup> Pero chë arréndayëngna chë oservénënga imojishëche: ínýengbioyna imojtsajantšetaye, ínýengbioye imojtsëbaye y chë ínýengbioyna ndëtšbéngaca imojtsatëchénganja. <sup>36</sup> As chë jajañe nduiño chë natsanama más ba oservénënga yojichamuá. Pero chë arréndayëngna, ntšamo chë natsanëngaftaca imojamcá, cachcá chora imojama.

<sup>37</sup> “Cabana, chë jajañe nduiño cachabe uaquiñá ibojíchmua; as mëntšá yojtsejuabnaye: ‘Atšbe uaquiñá cocayé mochanjóyeunaye ca.’ <sup>38</sup> Pero chë arréndayënga chë uaquiñá imojinýe orna, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga y lempe chabe otocana soyënga bëngbiama echanjoquéda ca.’ <sup>39</sup> As chë uaquiñá imojishache, chë uvas betiyënga jajañentšana imojtsábocna y imojtsóba.”

<sup>40</sup> Chca jacuéntama tojanpochocá orna, Jesús tojánayana: —Y morna, chë jajañe nduiño chaojabo ora, ¿ntšamo šmojtsejuabná chë arrendayëngaftaca cha yochjama ca?

<sup>41</sup> Y chënga tmojanjuá: —Chë puerte bacna arréndayënga ni mo batšatema ntjalastemaycá echantsëbaye. Chë jajañe ínýenga echanjárrendaye y chë uvasëšangá juashacama tempo chaojobuache ora, ntšamo chë nduiño chabojtsotocancá chënga mochantíyiye ca.

<sup>42</sup> Chora Jesús tojánayana: —¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana:

Chë yebna jebuanënga tmojtsanaboté ndëtšbé,

mora chë más bëts uashacuanëšentše entsejájona.

Chë soye Bëngbe Utabná, Bëngbe Bëtsá chca tojama,

y bënga chama ojnanánënga fséntsemna ca.

<sup>43</sup> Ntšamo chë nduiño chë arréndayënga chë fshantse echántsabaca y ínýenga echantsatšataye y chënga chabiama bëtscá shajuana mochanjatbanacá, cachcá, Bëngbe Bëtsabe améndayana tšëngaftangbentšana mochantsejuána y ínýengbioye mochantšatšataye. Chënga Bëngbe Bëtsabe soyëngama mochanjouena y chë soyëngama ínýengbioye

mochanjabuayená, Bëngbe Bëtsabe amëndayoye jamashënguama. <sup>44</sup> Ndánaca chë ndëtšëbe chaojotsatsá, chëbé bochántsacacaye; y chë ndëtšbé ndábeñnaca chaojotsatše, polvëshe bochántsebema ca —Jesús tojánayana.

<sup>45</sup> Chë bachnangbe amëndayënga y fariseunga, Jesús chë jabuátambama cuentënga yojtsëtsënma, tmojanenótatsëmbona chëngbiama chca yojtsóyebuambnama. <sup>46</sup> Chora chënga tmojánbošëna Jesús jishachana, pero entšangbiama imojtsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

## 22

### *Chë casamento fiestama cuento*

*(Lc 14.15-24)*

<sup>1</sup> Chentšana Jesús tojanontšë cachiñe cuentëngaca chënga jabuátambana. Mëntšá tojánayana: <sup>2</sup> “Cbochanjáuyana ntšamo Bëngbe Bëtsabe amëndayana yomnana. Endmëna mo ntšamo canye réyefraca tojanopasacá. Chë rey yojamánda canye bëts fiesta jamama, chabe uaquiñabe casamentama. <sup>3</sup> Chora chë rey chabe oservënga yojichamuá chë ófjanënga jobiatšama, pero chë ófjanëngna ndoñe imonjouena jama. <sup>4</sup> As chë rey inye oservënga yojichamuá y mëntšá yojámëndaye: ‘Chë ófjanënga šmochjáuyana, ya saná stseboprontana ca. Sënjamandá, atšbe uacnënga y uamna bayënga minyicánënga jobáyama y lempe entseprontana; y chamuabo chë casamento fiestama ca.’

<sup>5</sup> “Pero chë ófjanënga ndoñe imonjouena. Canya, cachabe fshantse inabomnoye yojtsoñe; ínÿana chabe obuámnayiñe trabajuama yojtsoñe; <sup>6</sup> y ínÿengna, chë reybe oservënga imojishëche, jabuache imojtsatsetšenaye y imojtsëbaye. <sup>7</sup> Y chë rey chë soyama yojouena ora, corente ibojtsetna. As chabe soldadënga yojichamuá chë oservënga obánayënga chamuetsëbáyama y chëngbe bëts pueblo jetsángbotjuama. <sup>8</sup> Chora chabe oservënga yojáyana: ‘Lempe entseprontana chë casamento fiestama, pero chë ófjanënga ndoñe quenjatëmerecena moye jabama. <sup>9</sup> Motsajna tsashenangoye y ndëmuanÿëngnaca chašmojánÿenënga, chë casamento fiestama šmochjúbuaja ca.’ <sup>10</sup> As chë oservënga tsashenangoye imojábocana y nyetscanga imojánÿenënga imojáchembo, cánÿiñe tšabe y bacna entšanga, y chca, chë tsobocanoica jútjena yojtsemna entšángaca.

<sup>11</sup> “Chë ófjanënga jányama chë rey yojámashëngo ora, chentšë cánÿabioye ibojinÿe y chana ndoñe yontsemna ntšamo canye casamento fiestama endbetsemncá uichëtjoná. <sup>12</sup> As chë rey ibojauyana: ‘Sobreno, ntšamo canye casamento fiestama endbetsemncá ndoñe quecatichëtjona. ¿Ntšamo chca moye tcojamáshëngo ca?’ Pero chë boyabásana nÿe iytëca yojtsemna. <sup>13</sup> As chë rey chë fiestentšë ujuatšnayënga yojámëndaye: ‘Shecuatšë y cucuatšë motsebatsëca y chë ndëbinÿna luaroye, infiernoye motsábocna. Chentšë puerte echanjenóbošachna y chë tsetšanama juatsasënga echantsenoftësjojnaye ca’ —cha yojayana.”

<sup>14</sup> Jesús chca jacuéntama tojanpochocá ora, mëntšá tojánayana: “Chë fiestama ófjanënga banga montsemna, pero chë bocacánënga choca jtsemnama nÿe báseftanga. Er Bëngbe Bëtsá banga jáchembuana chabe amëndayoye jamashënguama, pero nÿe báseftanga choca mochántsemna ca.”

### *Chë Romoca bëts mandadbiama impuesto jtsatsquécjnayama*

*(Mc 12.13-17; Lc 20.20-26)*

<sup>15</sup> Chentšana chë fariseunga tmojtsatanoñe y tmojanenoyeuná ntšamo Jesús tojaniñe cha jisháchichiyana, as chca, mandadëngbeñe cha mal jaquédama. <sup>16</sup> Chama chënga tmojanichamó básefta cachëngbe usetonënga y ínÿengna Heródesbe ústonënga, Jesús jauyanama: —Buatëmbayá, bënga fsëndétatsëmbo aca ndegombre soyënga cnetsabuátambama y contsabuatambá ndegombre tšabe vida jtsebomnama, ntšamo Bëngbe Bëtsá yomandacá, y ndoñe jatuenanana nÿe ntšamo entšanga tmojatichamcá,

er acbiamá tondaye quenatámána nda más uamaná o nduamaná tomnana. <sup>17</sup> Chcasna, ¿ntšamo catjájuaboye? ¿Tšabá tayojssemna, César, chë Romoca bëts mandadbiama, bënga impuesto jtsatsquécjnayana o ndoñe ca?

<sup>18</sup> Jesús yojtsetátšëmbo chëngbe bacna juabnëngama; chíyeca tojanéyana: —Bacna entsànga, ntšamo ndegombre šmojuabnacá ndinýinýnayënga. ¿Ndáyeca tšëngaftanga šmojtseboše chë sóyeca atše jisháchichiyama? <sup>19</sup> Chë šmatsquécjná crocénana šminýinýe ca.

As canýe crocénana tmojanoyé. <sup>20</sup> Jesús tojanatjá: —¿Ndabe jubiá quem crocenániñe yojtsemna, y ntšamo muentše entsabemancá nda chca iuabaina ca?

<sup>21</sup> Y chënga tmojanjuá: —Césarbe jubiá; cha chca enduabaina ca.

As Jesús tojanéyana: —Césarbioye šmochtoyiye cha ibotocana soye; y Bëngbe Bëtsana cha ibotocana soye ca.

<sup>22</sup> Chënga chca tmojanuena ora, ojanánënga imojtsemna. As chënga cachcá Jesús tmojanonýá y tmojtsatanoñe.

### *Obanënga jtayenama Jesús tmojantjá*

*(Mc 12.18-27; Lc 20.27-40)*

<sup>23</sup> Báseftanga judiëngbe amëndayënga, saduceos ca uabáinënga, imojanjuabná chë obanënga ndocna te ntayenana ca. Cach te, chë impuestama Jesús tojanoyebuambá te, básefta saduceunga tmojána y mëntšá tmojantjá: <sup>24</sup> —Buatëmbayá, Moisés tojánayana nderado canýe boyá tojóbana básenga ntjéftsabashejuancá, ana chabe uabentsá jtsemnana chë shémaftaca jtobouamayana, chca, chabe uabochená obanabiama básenga jtsabamnama ca. <sup>25</sup> Chcase, canýe béngbentše canýsëfta catsátanga monjamna. Chë natsaná tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tontanobouamá. <sup>26</sup> Y cháftaca cachcá tonjanopasá, chë inýe uabentsáftaca cachcá, y cachcá chë inýengaftaca y chë ústonoca uabentsáftacnaca. <sup>27</sup> Y chentšana chë shembásanaca tontsanóbana. <sup>28</sup> Y morna, chë obanënga chamojtayena ora, ¿ndabe chë canýsëfta catsatanguentšabe shema chë shembása yochtsemna, nýetscanga cháftaca tmojanobouamase ca? —chënga tmojantjá.

<sup>29</sup> As Jesús tojanéjua: —Ntšamo tšëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quecmátësertana causa. <sup>30</sup> Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëngcá. <sup>31</sup> Y chë obanënga jtayenamna, ¿ndoñe šmëndualía ntšamo cach Bëngbe Bëtsá chabe uabemana palabrënguñe tojánayanama? Cha tonjánayana: <sup>32</sup> “Atše sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entsàngbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

<sup>33</sup> Chë entsànga chca tmojanuena ora, ojanánënga imojtsemna ntšamo Jesús yojtsabuátambama.

### *Chë más bëts uámana mando*

*(Mc 12.28-34)*

<sup>34</sup> Jesús chë saduceúngbioye iytéca tojánabiamama fariseunga tmojántatšëmbona ora, chënga tmojánenefjna, <sup>35</sup> y canýa chënguentsá, ley abuatambayá, Jesúsbioye jisháchichiyama tbojantjá: <sup>36</sup> —Buatëmbayá, ¿Moisesbe leyiñe ndayá chë más bëts uámana mando yomna ca?

<sup>37</sup> As Jesús tbojanjuá: —“Utabná Bëngbe Bëtsá cochtsebobonshana nýets acbe ainánaca, nýets espíritoca y nýets juábna.” <sup>38</sup> Chë soye endmëna chë más bëts uámana mando y nýetsca mandëngama chë natsanoca entsemna. <sup>39</sup> Y quem inýe soye, chë natsana mandcá endenoparecena. Endayana: “Ndëmua entsánaca cochtsebobonshana, ntšamo cach aca cuenobobonshancá ca.” <sup>40</sup> Chë uta mandentšana endóbocana lempe



ntsamo Moisesbe leyíne endayancá y ntsamo chë Bëngbe Bëtsabe juabna oyebuamb-nayënga mondbetsabuatambacá ca —Jesús tbojaníyana.

*¿Cristo, ndabe entsábentsána yomna?*

*(Mc 12.35-37; Lc 20.41-44)*

<sup>41</sup> Chë fariseunga cabá cachentše imojtsemnëntscuana, <sup>42</sup> Jesús tojanatjá: —¿Ntsamo š-mojtsejuabná chë Bëngbe Bëtsabe Uámána Uabuayanabíama, chë Cristo? ¿Ndábentsána cha iuabó ca?

Y chënga tmojanjuá: —Davídbentsána ca.

<sup>43</sup> As Jesús tojanéyana: —¿Ntsamo chca nántsemna, cach David, chë Uámána Espíritbe mándoca, Crístbioye Utabná ca tbojtsabobuátmëse? David mëntšá tojánayana:

<sup>44</sup> Bëngbe Bëtsá, atšbe Utabná Crístbioye tbojaníyana:

atšbe catšbioica mótbema,

atšbe obenánaca acbe uayayënga acbe cucuatšíne chamoquedama chjamëntscuana ca.

<sup>45</sup> ¿Ntsámose Cristo, Davídbentsána Entšá nántsemna, cach David “Utabná ca” chábioye tbojtsabobuátmëse ca? —Jesús tojanatjá.

<sup>46</sup> Chora ndocná tonjanobená ni mo canye palabra jojuana. Y chë tescana ndocná yonjenñëmua Jesús más jatstjanayama.

## 23

*Jesús chë fariseungbíama y ley abuatambayëngbíama tojánayana, chënga ndoñe tsábá montsama ca*

*(Mc 12.38-40; Lc 11.37-54; 20.45-47)*

<sup>1</sup> Chora Jesús, entsánga y chabe uatsjëndayënga mëntšá tojanéyana: <sup>2</sup> “Chë fariseunga y chë ley abuatambayënga cmondbétsabuatambaye ntsamo Moisesbe leyënguíne iuayancá. <sup>3</sup> Chcasna, tsëngaftanga cmonsamna chënga joyaunayana y ntsamo tcmojauyancá, cachcá jtsamana. Pero ndoñe šmattsama ntsamo chënga mondbetsamcá, er chënga ndoñe ntsamana ntsamo mondbetsabuatambacá. <sup>4</sup> Mo canye entšá, couáybioye uauta uasmanésha juasmayana y cachá tondaye tontsasmancá, chënga entsánga jtsaméndayana bëtscá mandënga chamotsocumplínama, pero cachënga ni mo batsatema ntsamana chë mandënga jtsocumplínama. <sup>5</sup> Chënga lempe jtsamana nye entsánga chamotsénýama. Chënga chë ínýengbíama más Bëngbe Bëtsá imobobonshana ca chamotsejuabnama, chënga monduamana tëntša sëndachëjënguíne juabemana ntsamo Bëngbe Bëtsabe uabemana palabrënguíne endayancá, y juentsaca y buacuatšíne chëjënga jenábatsëcana y sibíajana nya tëntša uasebtotonanëjuangá jtsichëtjónana. <sup>6</sup> Chënga jtsebošana chë fiestënguíne nya quëfseroca jtsetbíamanama, y chë judiëngbe enefjuana yebnënguenache chë más uámána luarënguíne. <sup>7</sup> Chënga jtsebošana tsáshenañe entsánga nya respétoca chamotsacheuanama, y ‘abuatambayënga ca’ chamotsachembuanámnaca chënga jtsebošana.

<sup>8</sup> “Pero tsëngaftangna ndoñe šmattseboše entsánga ‘abuatambayënga ca’ chacmotsachembuanama, er nyetsca tsëngaftanga mo catsatangcá šmondmëna, Bëngbe Bëtsábeñe betsošbuachéyeca, y nye canya endmëna tsëngaftangbe Buatëmbayá. <sup>9</sup> Tsëngaftanga ‘taitá ca’ chë ley abuatambayënga šmondbétsachembuana, pero tsëngaftanga ndocna quem luarentšá ‘taitá ca’ šmattsechembuana; tsëngaftanga nye canye Taitá šmondbomna, chë celoca endmëná. <sup>10</sup> Ndoñe šmattseboše entsánga ‘mándayënga ca’ chacmotsachembuanama; er nye canye Mandayá endmëna y cha Cristo endmëna. <sup>11</sup> Nda tsëngaftangbeñe chë más uamaná tojtsemná bontsemna chë ínýenga jtsaservënana. <sup>12</sup> Nda cachá bëtsá tojtсенobíamná, nduamaná mochántsebema; y nda cachá nduamaná tojtсенobíamnana, más bëtsá mochanjábema.

<sup>13</sup> “¿Tša lastema tsëngaftangbíama, bacna entsánga ntsamo ndegombre šmojuabnacá ndinýinýayënga fariseunga y ley abuatambayënga! Tsëngaftanga šmonsama entsangbíama puerte totcá chaotsemna Bëngbe Bëtsabe améndayoye jamashënguama,

mo bëšáša cuaftsebiatamiancá. Pero ni cach tšëngaftanga choye quešmátamashjuana, ni ínÿenga choye jamashënguama bošëngbioye chama quešmátalesenciana. <sup>14</sup> ¡Tša lastema tšëngaftangbiana, ntšamo ndegombre šmojuabnacá ndinÿinÿayënga fariseunga y ley abuátambayënga! Tšëngaftanga chë viudángbioye chë tmobomna soyënga jtsabacayana, y entsangbe delante tšabá chacmotsëñyama y chënga šmojtsaíngñayama ndoñe chamondëtsetatsëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá tšëngaftanga más jabuache ínÿengbiana cmochanjácastigaye.

<sup>15</sup> “¡Tša lastema tšëngaftangbiana, bacna entsanga ntšamo ndegombre šmojuabnacá ndinÿinÿayënga fariseunga y ley abuátambayënga! Tšëngaftanga ba luarënguenache jtsajnana canÿa tšëngaftangbe ustoná onguayiñe, y šmojinÿena ora, tšëngaftanga jamana cha chaotsemna tšëngaftangbiana uta soye más merecido buajoná infierno y chaotsama.

<sup>16</sup> “¡Tša lastema tšëngaftangbiana; tšëngaftanga šmondmëna mo jtanënga entsanga unachayëngcá! Tšëngaftanga šmondbëtsichamo: ‘Nda ínÿabioye tbojašbuachená ndayánaca jamama y tojayana chë Bëngbe Bëtsabe bëts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bëts yebnentša castellanama cha tojajurasna, aíñe jtsemnana chë tbojašbuachená soye jamama ca.’ <sup>17</sup> ¡Obëjëmënga y nduabínÿnënga! ¿Ndayá más uámana soye yomna, chë castellano o Bëngbe Bëtsabe bëts yebna? Chë castellano Bëngbe Bëtsabiama josérviana jtsemnana, nÿe Bëngbe Bëtsabe bëts yebnocca chë castellano tojtsemnayeca. <sup>18</sup> Tšëngaftanga mëntšánaca šmondbëtsichamo: ‘Nda ínÿabioye tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiama altaroca tojtsejájona soyëngama tojajurasna, aíñe jtsemnana chë tbojašbuachená soye jamama ca.’ <sup>19</sup> ¡Nduabínÿnënga! ¿Ndayá más uámana soye yomna, chë Bëngbe Bëtsabiama tmojacjá soyënga o chë altar? Chë tmojacjá soyënga Bëngbe Bëtsabiama josérviana jtsemnana, nÿe chë altaroca chë soyënga tmojacjáyeca. <sup>20</sup> Nda chë altarama tojajurá, ndoñe nÿe chë altarama ntsejúraryana. Lempe chë altar juatsboca tojtsemnámncaca cha jtsejúraryana. <sup>21</sup> Nda Bëngbe Bëtsabe bëts yebnama tojajurá, ndoñe nÿe Bëngbe Bëtsabe bëts yebnama ntsejúraryana. Bëngbe Bëtsabiama cha jtsejúraryana, cha chë chentše oyená. <sup>22</sup> Y nda celocama tojajurá, chentše reycá Bëngbe Bëtsabe tbemaniñama cha jtsejúraryana y cachora Bëngbe Bëtsabiámncaca, chentše yotbemanabiama.

<sup>23</sup> “¡Tša lastema tšëngaftangbiana, bacna entsanga ntšamo ndegombre šmojuabnacá ndinÿinÿayënga fariseunga y ley abuátambayënga! Tšëngaftanga Bëngbe Bëtsabiama jtsequëcnayana chë jajañentša sananga bnëtsanentšana canÿe soye; chë binche matatëmënga menta, anis y chë cominentša sanángnaca. Pero tšëngaftanga nÿe batšá jtsamana chë leyentša más uámana soyënga, mo chë nÿetsca entsanga cachca derechënga chamotsebomnana, ínÿenga jtsalastemánana y chë tšabe soyënguiñe jtsiyenana, chca, entsanga tšëngaftangbeñe chamotsošbuáchema. Chë soyënga cocayé cmontsamna jtsamama, chë inÿe tšabe soyënga amana ntjajbanacá. <sup>24</sup> ¡Jtanënga entsanga unachayënga! Tšëngaftanga chë base soyënga jamama puerte jtsenócochinÿenana, pero jtsebnëtjombana uámana soyënga jamama, Bëngbe Bëtsá tojanmandá soyënga. Y chca, tšëngaftanga šmontsemna mo canÿe entšá ndayá tojtsabuchetjca bayëfja jtsejuánama, ndoñe ntjasama, jasama ndoñe yondëlesenciana ca chë leyíñe iuayana causa. Pero šmondmëna mo entsangcá ndëmuanÿënga camellbe mëntšena jasana, y chë leyíñe endayana chcana jasama ndoñe yondëlesenciana ca.

<sup>25</sup> “¡Tša lastema tšëngaftangbiana, bacna entsanga ntšamo ndegombre šmojuabnacá ndinÿinÿayënga fariseunga y ley abuátambayënga! Tšëngaftanga šmondmëna mo entsangcá ndëmuanÿënga platillëjënga y tazëšënga shjoicajana jtsóbojabiana, pero tsoyna nÿe cachcá jonÿayana. Tšëngaftanga tša jtsentšënanana entsangbiana mo

tšabengcá jtsinýnama, pero tšëngaftangbe ainanentše jútjena entsemna nye jtsatbëbanama y nye bëtscá soyënga jésebonnama juabnéngaca. <sup>26</sup> ¡Nduabinýna fariseo! Cochshetsajbaná ainaniñe bacna soyënga bomnana. Chamna nye tšabe juabnénga chentše cochtsebomna, y lempe ntšamo chacojtsamcá y entšanga chamojtsónýacá tšabá echántsemna.

<sup>27</sup> “¡Tša lastema tšëngaftangbiana, bacna entšanga ntšamo ndegombre šmojuabnacá ndinýinýnayënga fariseunga y ley abuátambayënga! Tšëngaftanga šmondmëna mo obanëngbe cuevëshënga botamana uafjantsenëshëngcá; shjoicajana puerte botamanëshënga, pero tsoyna jútjena obanëngbe betashëngaca y janjuana soyëngaca. <sup>28</sup> Tšëngaftanga chca šmondmëna: entšangbe delante tšëngaftanga jtsinýnana mo nyetsca soyënguiñe tšabá amëngcá, pero ndoñe chca quešmátsmëna. Tšëngaftangbe ainanentšna chë bacna entšanga ntšamo ndegombre tmojuabnacá ndinýinýnayëngcá y chë bacna soye amëngcá šmontsejuabná.

<sup>29</sup> “¡Tša lastema tšëngaftangbiana, bacna entšanga ntšamo ndegombre šmojuabnacá ndinýinýnayënga fariseunga y ley abuátambayënga! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entšanga chamotsemnama, chëngbe cuevëshënga jtsatspórmayëse. Tšëngaftanga cachcá jtsamana chë nyetsca soyënguiñe tšabá amëngaftaca, chë chëngbiana jtenójuaboyama pormániñe jtsatsbótamnayëse; <sup>30</sup> y chentšana šmondbëtsichamo: ‘Bënga chë bëngbe bëtsëjémëngbe tempo maftsjanienëse, chëngbioye ndoñe matmënjánéjabuache chë Bëngbe Bëtsabe juabna oyebuambnayënga jobáyama ca.’ Pero mo chëngcá canye buayenana sóyeca tmojabëngbioyna ndoñe ntsayaunanana. <sup>31</sup> Pero ntšamo šmojtsamcá jtsamëse, tšëngaftanga šmontsinýanýná ndegombre chë Bëngbe Bëtsabe juabna oyebuambnayëngbioye tmojanëbayëngbe entšanguentšana šmomnana. Y mora cach tšëngaftangbe bëts taitangcá tšëngaftanga šmontsama. <sup>32</sup> ¡Mopochocanga jamama chë bacna soyënga, chë tšëngaftangbe bëts taitanga tmojanbojatšé jamama soyënga!

<sup>33</sup> “¡Mëtšcuayënga, mëtšcuaye entšanga! ¿Ndayá šmochjama chë infiernoca uabouana castigüentšana jótsbocama? <sup>34</sup> Chíyeca atše tšëngaftangbioye chanjichamuá Bëngbe Bëtsabe juabna oyebuambnayënga, tšabe soye tatšëmbënga y abuátambayënga. Pero tšëngaftangna, ínýëngbioye šmochantsëbaye y šmochanjácrucificaye; ínýëngbioyna chë enefjuana yebnënguenache šmochanjátsetšenaye y nyetsca bëts pueblënguenache chënga šmochandúcama. <sup>35</sup> Chíyeca, tšëngaftangbiana nyets castigo echántsemna chë nyetsca soyënguiñe tšabá amënga tmojëftsóbanama; Abel, chë jóbanama chabotsemnama tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquiñana, Bëngbe Bëtsabe bëts yebnentše tmojanóba, altar y chë entšanga Bëngbe Bëtsábioye imojánadorana luariñe. <sup>36</sup> Ndegombre cbéyana, lempe chë soyëngama castigo morsca entšangbiana echántsemna ca” —Jesús tojánayana.

*Jesús tojanošachna Jerusalenoca entšangbiana  
(Lc 13.34-35)*

<sup>37</sup> Mëntšánaca Jesús tojánayana: “¡Jerusalenentša entšanga, Jerusalenentša entšanga! Tšëngaftanga chë Bëngbe Bëtsabe juabna oyebuambnayënga jtsëbáyana y chë Bëngbe Bëtsabe ichmónënga ndëtšbéngaca jtsatëchénganjana jtsëbáyama. Bueta soye atše sënjabošena tšëngaftanga átšbioye júbuajana, mo canye tuamba chabe bolletotémënga chabe juatëngmiáša tajsoye cuaftajayecá, pero tšëngaftanga ndoñe chešmátsbošena. <sup>38</sup> Y šmochjinýe, atše mora cachcá cbochanjesénýaye, y chca, atšna enánanga cbochanjéabashejuana, mo canye yebna cachcá tcojesonýa y énañe tcojeseboshjoncá. <sup>39</sup> Y atše cbéyana, ndegombre tšëngaftanga morscana atše ndoñe más quešmochátinýe; y atše šmochántinýe mëntšá chašmojtsichamo ora: ‘¡Corente bendición bomná, Bëngbe Utabnabe obenánaca tojabá ca!’ ”

## 24

*Jesús tojánayana chë Bëngbe Bëtsabe bëts yebna lempe mochjánpochocama*  
(Mc 13.1-2; Lc 21.5-6)

<sup>1</sup> Jesús Bëngbe Bëtsabe bëts yebnentšana tojëftsanbocna y ya yojtsaye. Chorna chë uatsjédayënga chábioye tmojanobeconá y tmojanontsé nyetsca chentša bëts yebnënga cha jinÿinÿiyana. <sup>2</sup> Chora Jesús tojanéyana: “Tšëngaftanga lempe šmontsonjá. Ndegombre šcuayana, quem Bëngbe Bëtsabe bëts yebnentše ndoñe queochaisoquéda ni mo canÿe ndëtšbé inÿe ndëtšbé juatsboye. Lempe mochantsepochoća ca.”

*Ntšamo yochtsemna quem luare jopochócama tempo chaojtsebeco ora*  
(Mc 13.3-23; Lc 21.7-24; 17.22-24)

<sup>3</sup> Chentšana chënga Olivos tjashoye tmojána. Jesús choca yojtsetbemana; as, chë uatsjédayënga tmojanobobeconá nÿe chëngbiamá jatjayama, mëntšá: —Šméyana. ¿Mocna ora chë soyënga Bëngbe Bëtsabe bëts yebnoca yochjochnëngo ca? ¿Ndayá yochjochnëngo bënga jinÿanÿiyama aca jésabama ora ya yojtsemnama y quem luare jopochócama tempo yojtsobecuama ca?

<sup>4</sup> As Jesús tojanjúá: —Cuedado šmochtsebomna ndocná chacmondáingñema. <sup>5</sup> Banga mochanjabo y mochantsabíchamo chënga atše imomna ca. Mochántsichamo: “Atše chë Cristo sëndmëna ca” y chca, ba entšángbioye mochanjáingñaye. <sup>6</sup> Tšëngaftanga šmochanjouena canÿe luarentša entšanga inÿe luaroca entšángaftaca imojtsentsjanama y nderado mochjentsjámna. Ndoñe matauatjëngana, er chca jochnënguama endmëna; pero masque chcase, quem luare jopochócama cabá ndoñe queochátsmëna. <sup>7</sup> Canÿe luarentša entšanga inÿe luaroca entšángaftaca mochántsentsjanaye, y canÿe amëndayábentša entšanga inÿe amëndayábioca entšángaftácnaca; y ba luarënguine shëntsana echanjóshjango y chentša fshantsënga echanjuangmëmëna. <sup>8</sup> Masque chca jasúfriase, más chcoye cabá más mochanjatsúfria.

<sup>9</sup> “Chora, entšanga ínÿengbe cucuatšínë cmochanjábashejuana chacmatsetšenama y cmochantsëbaye; y atšbe ústonënga bëtsemnayeca nyetsca luarënguentša entšanga cmochantsëbuayënja. <sup>10</sup> Chë tempo, banga mora átšbeñe ošbuáchiyënga, ošbuáchiyana mochantsajbaná y mochantsenáboyënja y jóbanama ínÿengbe cucuatšínë mochántsënboshjuana. <sup>11</sup> Banga Bëngbe Bëtsabe ndoñe ndegombre juabna oyebuambnayënga mochanjábocana y ba entšanga mochanjáingñaye. <sup>12</sup> Nyetsá bacna juabnënga entšangbe ainaniñe echanjésemna, y chë causa banga ndoñe quemochátenbobonshana. <sup>13</sup> Pero nda nyets tempo átšbeñe ošbuachiyá totsomñe, atsbocaná echántsemna. <sup>14</sup> Y quem tšabe noticiënga Bëngbe Bëtsabe amëndayama nyets quem luariñe entšángbioye mochántsabuayiyaye, chca, chë ndegombre soyënga Bëngbe Bëtsabiamá chënga chamotsetatšëmbuama. Chentšana cocayé quem luare jopochócama tempo echántsemna.

<sup>15</sup> “Chë Bëngbe Bëtsabe juabna oyebuambnayá Daniel chë puerte uabouana soye tojëftsanabema chë pochócaye soyama. Tšëngaftanga chë puerte uabouana soye chë uámana ca uabaina luarentše chašmojinÿe ora (nda tojtsalía, chabosertá), šmochántsetatšëmbo chë puerte ngmënana tempo tojóshjanguama; <sup>16</sup> entšanga Judeoca chamojtsemnënga, batsjabengoye chamotsacheta. <sup>17</sup> Y nda cachabe yebnentša tsbanánoca chaojtsemna, chaotsachá chocana ntjtastjangcá ndayá tsoicana jëftsábocnama. <sup>18</sup> Y nda jajoca chaojtsemna, yebnoye ndoñe chaondéta ni mo chabe quëfsaiya jesácñama. <sup>19</sup> ¿Tša lastema chë tempo ngomámanënga chamojtsemnëngbiamá o ochóchaye šëšonga chamojtsabamnëngbiamá! <sup>20</sup> Bëngbe Bëtsá šmochtseimpadana chë tšëngaftanga jachetama, uaftena tempo ora o canÿe ochnayté ndoñe chaondëtsemnama. <sup>21</sup> Chca, chora puerte ngmënana echántsemna. Tša jabuache ngmenancá, quem luare jabo-játšama orscana y mëntscóñama y más chcoye, cachcá ngmënana ndoñe ntjamnana. <sup>22</sup> Chë puerte ngmënana tempo yapa bën ndoñe chaondëtsemnama Bëngbe Bëtsá

ndoñe tonjalesenciase, ndocná quentatsbocá; pero chabe ubuáyanënga cha corente endábabuanÿeshanayeca, echanjama yapa bën tempo ndoñe chaondétsemnama.

<sup>23</sup> “Chora nderado nda cmochanjáuyana: ‘Minÿënga, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. <sup>24</sup> Chora mochanjábo-cana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayéngnaca; y chënga mochanjama bëts soyënga chëngbe obenana jinÿanÿiyama, entšanga jáingñama, y tmojobenase, chë Bëngbe Bëtsabe bocacánëngnaca. <sup>25</sup> Atše ya chama tcbonjabuayená chë tempo cabá ndóshjango ora. <sup>26</sup> Chíyeca, nderado chënga chacmojáuyana: ‘Minÿënga, chentše chë Cristo entsemna, entšanga ndoyenoca ca’, choye ndoñe šmatjá; o chacmojáuyana: ‘Cha canÿe tsoca entsemna ca’, chama ndoñe šmattsayaunana. <sup>27</sup> Er ntšamo chë tojatcuinÿe ora, shinÿe bocanoicana y shinÿe uenatjëmbambanéntscõe jabuashinÿinÿenancá y ba luarënguenache entšanga jobenayana jinÿama, cachcá, Bëngbe Bëtsá Entšá tbojanbemá quem luaroye chaojésabo te, entšanga nÿets luarentše mochanjobenaye cha jinÿama. <sup>28</sup> Canÿe obanabe cuerpo tojtsemnama chë gallinacënga tmojátatšëmbona y cachora chë béconana jojtana. Cachcá, chë castigo echántsemna nÿa chama chë tempo chaojtsemna ora ca” —Jesús tojánayana.

*Bëngbe Bëtsá Entšá tbojanbemá quem luaroye echanjésabo*

*(Mc 13.24-37; Lc 21.25-33; 17.26-30, 34-36)*

<sup>29</sup> Mëntšánaca Jesús tojánayana: “Chë puerte ngménana tempo chaojochnëngüentšana, shinÿe ndoñe queochátsbuashinÿinÿana, juashcona ndoñe queochátsbinÿnaye, celocana estrellënga echanjatquécjana y quem luarentša tsbanánoca espíritënga obenana bomnënga echanjángmëmmana. <sup>30</sup> Chora canÿe soye celoca echanjónÿna entšanga jinÿanÿiyama Bëngbe Bëtsá Entšá tbojanbemá ya iuaisaboma, y nÿets luarenache entšanga mochanjenóbošachna, y Bëngbe Bëtsá Entšá tbojanbemábioye mochanjinÿe celoca jantšetëshiñe echántsaboye, puerte obenánaca y corente buashinÿinÿaniñe. <sup>31</sup> Y canÿe trompetéjua jabuache chaojuénana ora, cha chabe angelotëmënga echanjichamuá Bëngbe Bëtsabe ubuáyanënga júbuajama, nÿets luarëngocana, celoca cánÿoica juachoicana y chë ínÿoica juachóntscoñe.

<sup>32</sup> “Ntšamo higo betíyeca endbëtsopasanama šmochjuatsjinÿe: Tojtsaisabuacuana y tojtsaiséjotsana ora, chë tšabe tempo ya tojtsaisobecuama jtsotatšëmbuana. <sup>33</sup> Cachcá, lempe chë ndayama tšëngaftanga tcbonjauyancá chašmojinÿe ora, šmochántsetatšëmbo Bëngbe Bëtsá Entšá tbojanbemá ya jésabama yojtsemnama. <sup>34</sup> Ndegombre cbéyana, lempe chca echanjochnëngo, morsca entšanga cabá ndóbana ora. <sup>35</sup> Celoca y quem luare echanjopochóca, pero atšbe palabra ndocna te queochaisopochóca.

<sup>36</sup> “Pero ndayté y ntseco ora Bëngbe Bëtsá Entšá tbojanbemá yochjésabama, ndocná quenátstatšëmbo, ni chë celoca angelotëmënga, ni Bëngbe Bëtsabe Uaquiñá. Nÿe chë Taitá chama yotátšëmbo.

<sup>37</sup> “Ntšamo Noé yojëftsiyena ora tojanopasacá, cachcá echanjopása chë Bëngbe Bëtsá Entšá tbojanbemá chaojésabo ora. <sup>38</sup> Noebe tempo, chë uabouana uaftena cabá nduáshjango ora, entšanga imnasaye, imnofšëšnaye y imnóbouamnaye; natjëmbana imojtsiyeñe, y chca imojtsomñe Noé chë barquëshoye tojánamashënguëntscuana. <sup>39</sup> Chënga tondaye imonjántatšëmbo, nÿe chë uabouana uaftena tojánashjango y nÿetscanga tojtsanëyamba ora cocayé. Cachcá echántsemna Bëngbe Bëtsá Entšá tbojanbemá chaojésabo ora; ya chaojochnëngo ora, entšanga chama mochanjátatšëmbona. <sup>40</sup> Chora uta boyabásata jajoca bochántsemna; canÿa mochanjesbetše y chë ínÿana ndoñe. <sup>41</sup> Uta shembásata bochántsejanÿcoye; canÿa mochanjesbetše y chë ínÿana ndoñe.

<sup>42</sup> “Chíyeca cuedado šmochtsebomna y yejuana šmochtsantješna, er ndoñe quešmátstatšëmbo ndayté tšëngaftangbe Utabná yochjésabama. <sup>43</sup> Pero quem soye tšabá

chacmësertá: Chë yebnentša nduiño, ntseco ora ibeta atbëbaná yochjabama tojtsetatšëmbëse, cha nantsefsna y ndocnábioye buanjaleséncia jushañe chaotseendbemama tsoye jtsamashënguama y jtsatbëbama. <sup>44</sup> Chíyeca, tšëngaftángnaca šmochtseprontana, er Bëngbe Bëtsá Entšá tbojanbemá echanjésabo, entšanga chama tondaye chamontsejuabná ora ca” —Jesús tojánayana.

*Chë tšabe oservená y chë ndoñe tšabe oservená*

*(Lc 12.41-48)*

<sup>45</sup> “¿Nda yomna chë oservená ntšamo chë nduiño tojtsebošcá amá y nyets juáb-naca amá? Cha jtsemnana nda chë nduiño bochjëftsebošhona chë yebnentšënga chaotsanýenama y jasama tojtsemna ora chaújuatšema. <sup>46</sup> Chë nduiño tojtashjango ora, chë oservenábioye tbojínýena ntšamo ibomncá jtsamëse, chë oservená puerte oyejuayá echántsemna. <sup>47</sup> Ndegombre cbéyana, chë nduiño chábioye bochanjaimpáda lempe chabe soyënga chabotsinýeñama. <sup>48</sup> Pero chë oservená bacna entšá tomnësna, jajuaboyana chë nduiño ndoñe betseco yochantabo ca, <sup>49</sup> y as, cha jóntšana chë inýe oservénënga jtsajantšetayana, becá jtsesana y jtsetmuana inýe tëmiëngaftaca. <sup>50</sup> Y chabe nduiño jtashjanguama ndoñe tontsejuabná te y ndoñe tontsetátšëmbo ora, cha echántashjango. <sup>51</sup> Chora chë nduiño jabuache bochantsecastíga, y ntšamo chë bacna entšanga ndayá ndegombre tmojuabnacá ndinýinýayënga jasúfriama entsamncá, cha echanjasúfria. Chora cha puerte echanjenóbošachna y chë tsetšanama juatsašënga echantsenoftšëjjojnaye ca” —Jesús tojánayana.

## 25

*Chë bnëtsana tobiasëngbiamama cuento*

<sup>1</sup> Mëntšánaca Jesús tojánayana: “Chë te chaojóshjango ora, Bëngbe Bëtsabe amëndayana echántsemna mo ntšamo canýe casamento fiestentšë tojanopasacá. Mëntšá yojopása: Bnëtsana tobiasënga chëngbe querosine uajuinýanëshangá imojëftsájaca y imojábocana chë casamentero boyabása jajëbenguama. <sup>2</sup> Chë bnëtsana tobiasënguentshana, shachnënga sempre enójuabnayënga imnamna, y chë inýe shachnëngna, ndenójuabnayënga. <sup>3</sup> Chë ndenójuabnayëngna chëngbe uajuinýanëshangá imojëftsájaca, pero querosine ndoñe imonjuabuyamba chë uajuinýanëshangañe cachiñe jtaftsúamama. <sup>4</sup> Pero chë sempre enójuabnayëngna chëngbe uajuinýanëshangá imojëftsájaca y querosinënaca botellëšënguiñe imojuabuyamba. <sup>5</sup> Chë casamentero boyabásana ndoñe betseco yonjabo, chíyeca nyetsca tobiasënga ocnayana yojubuache y imojtsomaná. <sup>6</sup> Mo tsëntseto orna, chënga imojouena mëntšá uayebuáchana: ‘¿Chë casamentero boyabása ya endabó! ¿Jajëbenguama mobocana ca!’ <sup>7</sup> Asna, nyetsca tobiasënga imojotsbaná y imojóntša chë uajuinýanëshangá juabopróntana. <sup>8</sup> Chorna, chë shachna ndenójuabnaye tobiasënga chë inýe shachnënga sempre enójuabnayëngbioye imojáuyana: ‘Diosmanda tšëngaftangbe querosinentšana baseytema šmëbuatšatá, bëngbe uajuinýanëshangá tojontšë jtsafsanana ca.’ <sup>9</sup> Pero chë sempre enójuabnayëngna imojayana: ‘Ndoñe. Tbojubuatšatase, tšëngaftangbiamama y bëngbiámnaca querosine echántashbe. Más tšabá entsemna, chë querosine mondbétsenoye chašma y tšëngaftangbiamama chašmauábuamiñe ca.’

<sup>10</sup> “Chorna, chë shachna ndenójuabnaye tobiasënga imojá chë querosine jauabuámiyama; pero chëntscuana chë casamentero boyabása yojáshjango y chë sempre enójuabnayënga cháftaca chë casamento fiestoye imojámashjna, y chentša bëshása imojtatame. <sup>11</sup> Chentšana chë inýe tobiasënga imojáshjajna y mëntšá imojtsichamo: ‘¿Taita, Taita, šmebëtafjo ca!’ <sup>12</sup> Pero chë casamentero boyabása yojójua: ‘Ndegombre cbéyana, tšëngaftanga ndoñe quecbatëbuatma ca.’

<sup>13</sup> “Cachcá echántsemna Bëngbe Bëtsá Entšá tbojanbemá chaojésabo ora; chíyeca šmochtseprontana, tšëngaftanga ndoñe quešmátstatsëmbo ndayté, ni mocna ora chca yochjopásama ca” —Jesús tojánayana.

*Chë crocenánama cuento  
(Lc 19.11-27)*

<sup>14</sup> “Bëngbe Bëtsabe amëndayana endmëna mo ntšamo canje boyabásaftaca tojanopasacá. Cha ibojtsemna inje luaroye jtsoñama; as chabe oservénënga yojáchembo y yojaimpádaye chabe crocénana chamotsinjenama. <sup>15</sup> Cánjábioye ibojántšabuachiye shachna uaranga crocénana, ínjbioyna uta uaranga y ínjbioyna canje uaranga. Chca yojamna ntšamo cada ona ibojobiashjachcá. Y as chë boyabása yojtsoñe. <sup>16</sup> Cachora chë shachna uaranga yojoyëngacñá yojá trato jabemama, y chca, inje shachna uaranga crocénana yojábotiye. <sup>17</sup> Chë uta uaranga yojoyëngacñá cachcá yojama y inje uta uaranga yojábotiye. <sup>18</sup> Pero chë canje uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

<sup>19</sup> “Chentšana baytese chë oservénëngbe amëndayá yojtashjango y yojóntša chë crocenánama chënga jatjayana. <sup>20</sup> Natsana yojáshjango chë shachna uaranga yojoyëngacñá y chabe mandayábioye inje shachna uaranga crocénana ibojántšabuachiye y mëntšá ibojauyana: ‘Taita, aca shachna uaranga šconjanoyé y muentše entsemna inje shachna uaranga sënjaboté ca.’ <sup>21</sup> As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tcojamandacá tcojámayeca, atše cbochanjaimpáda más bëtscá chašcotsinjeñama. Mamáshëngo y átšeftaca cochjóyejuaye ca.’ <sup>22</sup> Chentšana chë uta uaranga yojoyëngacñá yojáshjango y chë mandayábioye ibojauyana: ‘Taita, aca uta uaranga šconjanoyé y muentše entsemna inje uta uaranga sënjaboté ca.’ <sup>23</sup> As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tcojamandacá tcojámayeca, atše cbochanjaimpáda más bëtscá chašcotsinjeñama. Mamáshëngo y átšeftaca cochjóyejuaye ca.’

<sup>24</sup> “Pero chë canje uaranga yojoyëngacñe oservená yojáshjango orna, chabe mandayábioye ibojauyana: ‘Taita, atše sëndétatšëmbo aca canje tšátjaye entšá comnama; acna chë ndoñe tconjajé chentše saná jocñana y chë ndoñe tconjujukëshe luarentše jobuátbanana. <sup>25</sup> Chama atše uatjana šjuábuache, chíyeca atše sënjá y fshantsiñe chë crocénana sënjetseitëme. Pero muentše acbe crocénana entsatsmëna ca.’ <sup>26</sup> As chë mandayá ibojajuá: ‘¡Bacna oservená y oyënjayá! Chë ndayentše ndoñe tijajé chentše saná jocñana y chë ndoñe tijujukëshe luarentše jobuátbanana atše tsuamanama icojátatšëmbëse, <sup>27</sup> aca cmonjamna atšbe crocénana bancoca jetsobuájua y atše matijtabo ora, atšbe crocénana matijtóyëngacñe y chë chentšana tojoboté crocénanënaca ca.’ <sup>28</sup> Y as yojamënda: ‘Chë uaranga motseboca y chë bnëtsana uaranga entsebomnábioye chana motsatšetá ca. <sup>29</sup> Er nda tojtsebomnábioye, más jatšetayana, y chca cha corente bëtscá jtsebomnana; pero tondaye tondbomnábioyna, chë batšatema tobomna sóynaca jtsebocana ca.’

<sup>30</sup> “Y chora cha yojayana: ‘Quem ndoservena trabajayá shjoca ibetoye matábocna; choca puerte echanjenóbošachna y chë tšetšanama juatsašënga echantsenoftéšjojnaye ca’ ” —Jesús tojánéyana.

*Ntšamo chë quem luare jopochócama ora, nyetsca entsangbiama mochjayana*

<sup>31</sup> Mëntšánaca Jesús tojánayana: “Chë Bëngbe Bëtsá Entšá tbojanbemá chabe obenána, buashinjinjaniñe y nyetsca chabe angelotémëngaftaca chaojésabo ora, chë reybiama puerte buashinjinjána tbemaniñe echanjótbema. <sup>32</sup> Chora nyets luarëngoca entsanga chabe natsanoica mochanjénefjna, y cha, entsanguentšana ínjenega echanjábacacaye, mo chë oveshënga abujénjya oveshënga chivëngbentšana endbetsabacacnaycá. <sup>33</sup> Chë abujénjyana, oveshënga chabe catšbioica echanjáchembo y chivëngna chabe

uañicuayoica. Bëngbe Bëtsá Entśá tbojanbemá cachcá echanjama: chë ubuáyanënga chabe catsbioica echanjúbuaja y chë bacna entsangna chabe uañicuayoica echanjásaye.

<sup>34</sup> “Chorna chë Rey, Bëngbe Utabná, chabe catsbioica chamojtsemna entsanga echanjáuyana: ‘Tšëngaftanga, Atšbe Taitá tšábeñe cmétabna, mabënga ca; atšbe améndaye luare mo tšëngaftangbiana otocana soycá mosháchiñënga; tšëngaftangbiana endëprontana, Bëngbe Bëtsá quem luare tonjanma orscana. <sup>35</sup> Er atše šonjanishëntsana y tšëngaftanga saná šmonjancaredadó; šonjanajuendá y tšëngaftanga šmonjanafsé; inye luarocana ashjargonacá sënjánana y posada šmonjanántšame. <sup>36</sup> Enaśá sënjánana y entsáyá šmonjanëtšetá jtichëtjuama; šocá sënjanájona y šmonjanatsëtsaye; cárceloca sënjanëtámena y jabëuatsëtsayama šmonjánabo ca.’

<sup>37</sup> “As chë Bëngbe Bëtsá chabe bominyiñe tšábënga tojábiamënga mochanjatjaye: ‘Bëngbe Utabná, ¿ntseco shéntseca tcbënjáninye y tcbënjajuatšé? ¿Ntseco uajuendayá tcbënjáninye y tcbënjanafsé? <sup>38</sup> ¿O ntseco inye luarocana ashjargonacá tcbënjáninye y posada tcbënjanaftšame, o enaśá y entsáyá jtichëtjuama tcbënjanaftšetá? <sup>39</sup> ¿O ntseco šocá o cárceloca utamená tcbënjáninye y jauatsëtsayama tifjána ca?’

<sup>40</sup> “As chë Utabná echanjóju: ‘Ndegombre cbéyana, lempe ntšamo chë atšbe catsátanguentsana chë más batśá uámanëngaftaca šmojamcá, cach átšeftaca šmonjanma ca.’

<sup>41</sup> “Chentsana chë Utabná chabe uañicuayoica chamojtsemna entsanga echanjáuyana: ‘Atšbentsana mojuánanga atšbe Bëtsabe uabotënënga. Infiernoye motsajna, chë ndocna te queochátsfsana íñeshoye; choca endëprontana Satanás y chabe ustonëngbiana. <sup>42</sup> Er atše shéntseca sënjánana y tšëngaftanga saná ndoñe chešmatancaredadó; šonjanajuendá y ndoñe chešmatanafsé; <sup>43</sup> inye luarocana ashjargonacá sënjánana y ndoñe posada chešmatanaftšame. Enaśá sënjánana y ndoñe entsáyá chešmatanëtšetá; šocá sënjanájona y cárceloca sënjanëtámena y ndoñe chešmatanatsëtsá ca.’

<sup>44</sup> “As chënga mochanjatjaye: ‘Bëngbe Utabná, ¿ntseco tcbënjáninye shéntseca o uajuendayá, o inye luarocana ashjargonacá, o enaśá, o šocá o cárceloca utamená y ndoñe tcbënjanajabuache ca?’

<sup>45</sup> “Y chë Utabná echanjóju: ‘Ndegombre cbéyana, tšëngaftanga ntšamo chë atšbe catsátanguentsana chë más batśá uámanëngaftaca, ndoñe šmonjanmcá, átšeftaca cach ndoñe chešmatanma ca.’

<sup>46</sup> “Chëngna infiernoye nyetsca tescama mochantsësetjango, y chë Bëngbe Bëtsá chabe bominyiñe tšábënga tojábiamëngna chë nyetsca tescama yomna tšabe vida mochántsebmna ca” —Jesús tojánayana.

## 26

*Entšanga tmojanjuabó ntšamo jamëse Jesús jishachama  
(Mc 14.1-2; Lc 22.1-2; Jn 11.45-53)*

<sup>1</sup> Lempe chca tojánayanentšana, Jesús chabe uatsjëndayënga tojanéyana: <sup>2</sup> “Tšëngaftanga šmondétatšëmbo, uta te y chë Bashco fiesta echántsemna y Bëngbe Bëtsá Entśá tbojanbemá ínëngbe cucuatšinë mochanjáboshjona chamocrucificama ca.” Chë fiesta inamna jtenójuaboyama Bëngbe Bëtsá chë judiëngbe bëts taitanga Egiptocana tojánatsebacama.

<sup>3</sup> Chëntscuana, chë bachnangbe améndayënga y chë judiëngbeñe bëtsëjemëngcá mándayënga tmojánenefjna, Caifás, chë bachnangbe más uámana amëndayabe bëts yebnentše. <sup>4</sup> Tmojanenuabó y tmojanenoyeuná jtseíngñase Jesús jishachama, y jt-sóbama. <sup>5</sup> Pero imojsichamo: “Quem fiestëntscuana ndoñe, entsanga yapa muanjónťša enbouenanana ca.”

*Canye shembása botamana uanguëtše béjaye Jesusbe bestšásiñe tbojanbuešcja  
(Mc 14.3-9; Jn 12.1-8)*



<sup>6</sup> Jesús Betania pueblentše yojtsemna, Simón chë bacna nguayanánaca šocá ca uabobuatmabe yebnentše. <sup>7</sup> Chëntscuana canye shembása Jesúsbioye tojanabeconá. Chë shembásana tojanamba canye alabastro jarrëtema, jútjena canye puerte uámana botamana uanguëtše béjayeca. Jesús mesëshentše yojtsemnëntscuana, chë shembása chabe bestšašini chë botamana uanguëtše béjaye tbojanbuešcja.

<sup>8</sup> Chë uatsjéndayënga chca tmojáninnye orna, tmojanotjayaná y tmojanontšë ichámuana: —¿Ndáyeca nye bonamente chë soye chca yojtsemna ca? <sup>9</sup> Chamna, matmënjobenanga chë béjaye beca crocenánama juiyana y chánaca ndbomnjëmënga matmënjújabuache ca.

<sup>10</sup> Jesús chë soye tojanuena; as tojanéyana: —¿Ndáyeca ndoñe cachcá quem shembása šmochanjonýaye ca? Ntšamo tonjamcá tšabá entsemna. <sup>11</sup> Er chë ndbomnjëmëngna nyets tempo tšëngaftangbeñe mochanjéftsemna, pero atše tšëngaftangaftaca ndoñe nyets tempo quichásemna. <sup>12</sup> Ntšamo chë shembása tojamcá, chë botamana uanguëtše béjaye atšbe cuerpiñe jabuéšcjëse, cha šontsepróna atše juatbontsa tescama. <sup>13</sup> Ndegombre cbéyana, quem luariñe ndayéntšnaca Bëngbe Bëtsabe soyëngama chamojtsabuayiyiná chentše, ntšamo quem shembása tojamámnaca beca mochanjéftsóyebuambaye, chca, entšanga chabiamama chamotsenójuabnama ca —Jesús tojanéyana.

*Judas tojána bachnangbe amëndayëngbioye, Jesús chamuishachama  
(Mc 14.10-11; Lc 22.3-6)*

<sup>14</sup> Canya chë bnétsana uta uatsjéndayënguentsá, Judas Iscariote ca uabainá, tojána bachnangbe amëndayëngaftaca jencuéntama. <sup>15</sup> Y tojanatjá: “¿Ntsachetšá šmatjtabué-naye y Jesús tšëngaftangbe cucuatšini cbochjayentšbashejuana ca?”

As chëngna, unga bnétsana ralbenga tmojtanabuená. <sup>16</sup> Y cach orscana Judas yojtsenguaye ntšámose y ntseco ora, Jesús chëngbe cucuatšini jayentšbashejuanama.

*Jesús chabe uatsjéndayëngaftaca Bashco saná tojanse  
(Mc 14.12-25; Lc 22.7-23; Jn 13.21-30; 1 Co 11.23-26)*

<sup>17</sup> Chë Bashco fiesta bojatšenté, chë levadúraca ndëpormana tandëse jasama fiestëntscuana, chë uatsjéndayënga Jesúsbioye tmojanobeconá y tmojantjá: —¿Ndémoca aca cojtseboše bënga fchajprontama Bashco saná chacosama ca?

<sup>18</sup> Y Jesús tojanéyana: —Chë bëts puebloye motsajna canye bacobe yebnoye y cha šmochjauyana: “Buatëmbayá tonjayana: ‘Atšbe ora ya echanjobuache, y atšbe acbe yebnoye sentsá, Bashco fiesta jamama atšbe uatsjéndayëngaftaca ca.’ ”

<sup>19</sup> As chë uatsjéndayënga tmojanma ntšamo Jesús tojanamëndacá y chë Bashco fiesta saná tmojanprontá.

<sup>20</sup> Y tojanibétata orna, Jesús chë bnétsana uta uatsjéndayëngaftaca mesëshentše yojtsemna. <sup>21</sup> Y imojtsesantscuana, Jesús tojanéyana: —Ndegombre cbéyana, canya tšëngaftanguentsá uayayëngbe cucuatšini šochanjáboshjona ca.

<sup>22</sup> Chora chë uatsjéndayënga puerte ngménaca imojtsemna y tmojanontšë canyánja Jesús jatjayama: —Bëngbe Utabná, ¿nderado atšbe cha chtsemna ca?

<sup>23</sup> As Jesús tojanéjua: —Canya nda chabe tandëse entsefchecuacná cach atšbe sëntsefchecuacná šcnenentše, cha uayayëngbe cucuatšini šochanjáboshjona. <sup>24</sup> Ndegombre, Bëngbe Bëtsá Entšá tbojanbemáftaca echanjopása ntšamo Bëngbe Bëtsabe uabemana palabrenguiñe chabiamama iuayancá; pero, ¡tša lastema chë bochjáboshjonabiamama! Más tšabá chabiamama manjamna ndoñe ntjónynana ca.

<sup>25</sup> As Judas, chë boshjuaná, Jesúsbioye tbojantjá: —Buatëmbayá, ¿nderado atšbe chtsemna ca?

Y Jesús tbojanjuá: —Ndegombre tcjayana ca.

<sup>26</sup> Imojtsesantscuana, Jesús tandëse tojanca, Bëngbe Bëtsábioye chama tbojtanchuá, tojanjatá y chë uatsjédayënga tojanatšatá. Y mëntšá tojánayana: “Mocñënga, mosënga. Atšbe cuerpo entsemna ca.”

<sup>27</sup> Chentšana, canye coptema vínoyeca tojanaca, Bëngbe Bëtsábioye tbojtanchuá y chë uatsjédayënga tojanëfšasé. Y mëntšá tojánayana: “Njetscanga quem coptémentšana mofšënga. <sup>28</sup> Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojanašebuachenacá aïñe yochjochnënguama. Chë buiñe bëtsá entšangbiama echanjuábuashana, chëngbe bacna soyëngama perdonánënga chamotsemnama. <sup>29</sup> Y ndegombre cbëyana, morskana atšë ya ndoñe más chë uvasentšana obocniye quichaisofšiyë. Chë tsëm vínoye tšëngaftangaftaca chanjofšiyë, atšbe Taitabe amëndayoca chamojtsemna ora ca” —Jesús tojánayana.

*Jesús tojánayana, chábioye ndoñe bonjanabuátma ca Pedro yochjánayanama*  
(Mc 14.26-31; Lc 22.31-34; Jn 13.36-38)

<sup>30</sup> Bëngbe Bëtsá jëtschuayama tmojancantá chentšana, Olivos tjashoye tmojëftsanbocana. <sup>31</sup> Choca Jesús tojanéyana: —Tšëngaftanga njetscanga quem ibeta átšbeñe ošbuáchiyana šmochantsobuetše y šmochántacheta, er Bëngbe Bëtsabe uabemana palabrenguiñe, cha mëntšá tojánayana: “Chë oveshëngbe abujénja chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora. <sup>32</sup> Pero obanënguentšana chaitayenentšana, tšëngaftangbe natsana Galileoye chanjá ca —cha tojanéyana.

<sup>33</sup> Chora Pedro tbojanjuá: —Masque njetscanga áceñe ošbuáchiyana chamotsobuetše y chamotsacheta, ntšamo ácaftaca yochjopása causa, atšë ndocna te ca.

<sup>34</sup> As Jesús tbojanayana: —Ndegombre cbëyana, cam ibeta, ngallo cabá ndëcánta ora, aca unga soye cochanjayana ndoñe šconduabuatma ca.

<sup>35</sup> Pero Pedro tbojanayana: —Masque chašotsemna ácaftaca jóbanama, atšë ndoñe quichátayana ndoñe cbonduabuatma ca.

Y njetsca uatsjédayëngnaca cachcá imojtsichamo.

*Getsemaní luarentše Jesús Bëngbe Bëtsáftaca tbojanencuentá*  
(Mc 14.32-42; Lc 22.39-46)

<sup>36</sup> Chentšana, Jesús chabe uatsjédayëngaftaca canye luare Getsemaní ca uabáinoye tojána. Choca tojanéyana: “Muentše motbiama, chëntscuana atšë choye chanjá Bëngbe Bëtsáftaca jencuéntama ca.”

<sup>37</sup> Y Pedro y chë Zebedeobe uta uaquiñata tojëftsanëbiatše. Choca yojóntša puerte ngménaca y corente cochtsetšenaná jtsemnama. <sup>38</sup> Jesús tojanéyana: “Atšbe ainana puerte ngménaca entsemna, mo jobanamcá. Muentše moquedanga y átšëftaca šmochtsefšna ca.”

<sup>39</sup> Chora Jesús más natsanoye tojána, tojanoshamentšé y fshantsóntscoca yojotsejbéna, y mëntšá Bëngbe Bëtsáftaca tbojanencuentá: “Atšbe Taitá, jopódianëse moma atšë japadésama ndoñe chašondëtsemnama. Pero ntšamo atšë stsebošcá ndoñe chaondëtsemna, sinó ntšamo aca cojtsebošcá ca.”

<sup>40</sup> Chentšana, Jesús chabe unga uatsjédayëngbiyë tojtanabo y chëngna inmët-somañe. Chca tojánanyëna ora, Pédrëbioye tbojanayana: “¿Ni mo canye horatema tšëngaftanga šmonjobená átšëftaca jtsefšnana ca? <sup>41</sup> Šmochtsefšna y Bëngbe Bëtsáftaca šmochtsencuëntaye, chca, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayama, pero cuerpiñe añemo ndoñe quešmátsbomna ca” —Jesús tojanéyana.

<sup>42</sup> Uta soyama tojtesaná y mēntšá Bēngbe Bētsáftaca tbojanencuentá: “Atšbe Taitá, atše japadésama ndoñe chašondétsemnama jamama ndoñe jopódianēsna, n̄ye ntšamo aca cojtsebošcá chaotsemna ca.”

<sup>43</sup> Y tojtanabo ora, chē uatsjéndayēnga cachiñe inmētsomañe; yapa ocnaye causa n̄ye imojtsefshétana. <sup>44</sup> As Jesús cachcá yojéftsén̄yaye, y ungama cachiñe tojtesaná Bēngbe Bētsáftaca jencuéntama, y cach palabrenga tojánayana.

<sup>45</sup> Chora chē uatsjéndayēngbioye tojtanabo y tojanéyana: “¿Cabá šmotsomañe y šmotsochñañe ca? Ya ora tocjobuache, Bēngbe Bētsá Entšá tbojanbemá bacna soye amēngbe cucuatšīñe mochanjáboshjona. <sup>46</sup> Motsbananga, cuajna. Min̄yēnga, chē boshjuaná ya entsebeconá ca.”

*Uayayēnga Jesús tmojánishache*

(Mc 14.43-50; Lc 22.47-53; Jn 18.2-11)

<sup>47</sup> Jesús cabá yojtsóyebuambnantscuana, Judas, can̄ye chē bnētsana uta uatsjēndayēnguentsá, tojánashjango, y cháftaca imojtsemna ba entšanga espadéjangaca y ngarotbéngaca prontánēnga. Chēnga imojamna chē bachnangbe amēndayēnga y chē judiēngbeñe bētsēmēngcá amēndayēngbe ichmónēnga. <sup>48</sup> Judas, chē boshjuaná, tojanjuabó ntšamo jamana entšanga jin̄yan̄iyama ndēmua Jesús bētsemnana. Chíyeca yojáuyana: “Nda chajiauámocho, cha echántsemna. Šmochjishache ca.” <sup>49</sup> Cachora Judas Jesúsbioye tojanobeconá y tbojanчуá: —Buajtana, Buatēmbayá ca.

Y tbojtanámocho.

<sup>50</sup> Jesús tbojaniyana: —Enutá, moma chē ndayá jabomama tcojabo ca.

Chorna, chē entšanga tmojanobeconá, Jesús tmojánishache y tmojanánatse.

<sup>51</sup> Chca orna, can̄ye enutá Jesúseftaca yojtsemná, chabe espadéja tojanenoséngbotētšena, y chē bachnangbe más uámana amēndayabe oservenábioye can̄ye matscuaše tbojtsanéstjango.

<sup>52</sup> As Jesús tbojaniyana: “Espadéja matosēngbuajon̄yá. Nda espadéjaca tbojóba chana, cach espadéjaca echanjóbana. <sup>53</sup> ¿Aca ndoñe condétatšēmbo, atše atšbe Taitábioye stjaimpádase, cha cachora atšbiana nanjichamuá bnētsana utama más ejércitēnga angelotēmēngaca? <sup>54</sup> Pero chcasna, ¿ndayá Bēngbe Bētsabe uabemana palabrenguiñe endayancá ntšamo nanjochnēngo? Chiñe endayana ntšamo entsopasancá jochnēnguama canmēna ca.”

<sup>55</sup> Cachora Jesús entšanga tojanatjá: “¿Ndáyeca šmojabo espadéjangaca y ngarotbéngaca atše jishachama, mo atše can̄ye bacá uamana entšá cuaftsemncá ca? Atše cada te Bēngbe Bētsabe bēts yebnoca tšēngaftangaftaca sēnjántbemana abuatambaye, y choca ndoñe chešmánishache. <sup>56</sup> Pero lempe quem soyēnga chca entsopasana, cachcá chaotsemnama ntšamo Bēngbe Bētsabe uabemana palabrenguiñe chē Bēngbe Bētsabe juabna oyebuambnayēnga tmojanayancá ca” —Jesús tojánayana.

Cachora n̄yetsca uatsjéndayēnga tmojtsanēuatjaná y tmojtsanacheta, y Jesús chē uayayēngaftaca cachcá tmojesanon̄yá.

*Jesús tmojanánatse chē judiēngbe más uámana amēndayēngbioye*

(Mc 14.53-65; Lc 22.54-55, 63-71; Jn 18.12-14, 19-24)

<sup>57</sup> Chē Jesús tmojánishachēnga, tmojanánatse, Caifás chē bachnangbe más uámana amēndayabe yebnoye. Chentše chē ley abuatambayēnga y chē judiēngbeñe bētsēmēngcá amēndayēnga tmojánenefjna. <sup>58</sup> Pedro bēnocana Jesús tbojanasto, chē bachnangbe más uámana amēndayabe chashjón̄tscoñe; choye tojánamashēngo y chē Bēngbe Bētsabe bēts yebnoca josticiēngaftaca yojótbema, chca, jtsetatšēmbuama ntšamo yochjopásama.

<sup>59</sup> Chë bachnangbe amëndayënga, chë bëtsëjemëngcá amëndayënga y ínÿenga judiëngbe amëndayënga imojtsenguaye ndánaca masque uayátsenaye soye Jesusbe contra cháuyanama, as chënga jobenayama cha chaóbana ca jayanama, <sup>60</sup> pero ndoñe tmonjáninÿena, masque banga tmojánashjajna Jesusbe contra uayátsenaye soyënga jayanama. Cabana, útata tbojánashjango, <sup>61</sup> y chata tbojánayana: “Quem boyabása tonjayana canobena Bëngbe Bëtsabe bëts yebna jtsenásatajhcana y nÿe unga tese jtëtsjebuana ca.”

<sup>62</sup> As chë bachnangbe más uámana amëndayá tojantsá y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

<sup>63</sup> Pero Jesús nÿe iytëca yojtsemna. Chíyeca chë bachnangbe más uámana amëndayá tbojaniyana: —Bëngbe Bëtsá Ainabe mándoca cbomandá chašcuyana aca ndegombre chë Cristo, chë Bëngbe Bëtsabe Uaquiñá comna o ndoñe ca.

<sup>64</sup> Chora Jesús tbojanjuá: —Aca ndegombre yomncá tcjayana. Y quem sóynaca cbéyana: Tšëngaftanga šmochanjinÿe, atše, Bëngbe Bëtsá Entšá tbojanbemá, chë nÿets obenana bomnabe catšbioica jtsetbemanana y celoca jantšetëshiñe jtsaboyana ca.

<sup>65</sup> Chora chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¿Ntšamo quem boyabása tonjoyebuambacá, Bëngbe Bëtsabiama entsemna mo cha cuafjoyenguangcá, chë chabe Uaquiñá yomna ca cha tonjayana ora! ¿Ndayama más entšanga šochjátëjajoboto Jesusbe contra chamuayanama? <sup>66</sup> ¿Ntšamo šmatjayana ca? —cha tojanatjá.

As chë entšanga tmojanjuá: —Ndegombre cha bëts bacna soye entsebomna; jóbanama bontsemna ca.

<sup>67</sup> Chora tmojanontsé Jesús juebëbuashëtjnayana, jabuache jantšetayana y ínÿengna imojtsejuëbjantšetaye, <sup>68</sup> y imojtsatsëtsnaye: “Cristo, aca ndegombre Bëngbe Bëtsabe juabna oyebuambnayá tcomnëse, ¡momalisiá nda tcmënjajantšetá ca!”

*Pedro tojánayana Jesúsbioye ndoñe bonjanabuátma ca*

*(Mc 14.66-72; Lc 22.55-62; Jn 18.16-18, 25-27)*

<sup>69</sup> Chëntscuana Pédrëna shjoca yojtsemna, chashjoca yojtsetbemana. Chora, canÿe shembása chentša oservená tbojanobobconá y tbojaniyana: —Acnaca, Jesús chë Galileocáftaca conjánana ca.

<sup>70</sup> Pero Pédrëna, nÿetscangbe delante tojánayana chábioye ndoñe bonjanabuátma ca, mëntšá jayanëse: —Ntšamo contsichamcá, ndoñe quešnátësertana ca.

<sup>71</sup> Chora Pedro bëšoye yojábocna. Chentšna, inÿe shembása oservená chábioye tbojáninÿe y chë inÿe entšanga tojanéyana: —Cha, Jesús chë Nazaretocáftaca enjánana ca.

<sup>72</sup> Pedro cachiñe tojánayana ndoñe bonjanabuátma ca, y mëntšá yojtsejúraye: —¿Chë boyabása ndoñe quetsatabuatma ca!

<sup>73</sup> Chentšana, chë chentše imojtsemnënga Pédrëbioye tmojanobconá y tmojaniyana: —Ndegombre, ácnaca chë uatsjendayënguentsá condmëna. Chë contsoyebuambnacá contsoyátëmbana ca.

<sup>74</sup> Chora Pedro tojanontsé ichámuana, Bëngbe Bëtsá chašotsecastigá ndoñe ndegombre soye stsichámëse ca; yojtsejúraye y yojtsichamo: —¿Chë boyabása ndoñe quetsatabuatma ca!

Y cachora canÿe ngallo yojacánta. <sup>75</sup> Y Pedro yojenójuaboye ntšamo Jesús tbojaniyanama. Cha mëntšá tbojaniyana: “Cabá ngallo ndëcánta ora, aca unga soye cochanjayana ndoñe šconduabuatma ca.” Y chentšana tojésanbocna y corente ngmënaca yojtsenóbošachna.

<sup>1</sup> Tojanbinýna ora, nyetsca chë bachnangbe améndayënga y judiëngbeñe bëtsëjemëngcá améndayënga tmojánenefjna jenóyeunayama ntšamo jamëse Jesús chaóbanama. <sup>2</sup> As, Jesús tmojanëcuébatšëca y tmojanánatse, y chca, Pilato, chë Judeoca Romano mandadbe cucuatšinë tmojánboshjona.

#### *Ntšamo Judas tojanóbana*

<sup>3</sup> Judas, chë boshjuaná, Jesús jóbanama ibojtsemnana tojanuena ora, puerte yojtsenó-cochinýena ntšamo tojánchjanguama, y chë unga bnétsana ralbenga chë bachnangbe améndayënga y bëtsëjemëngbiöye tojtanamba, <sup>4</sup> y mëntšá tojanéyana: —Puerte bacna soye tijama. Atšë canýe bacna soye ndbomná tšëngaftangbe cucuatšinë tijáboshjona chaóbanama ca.

Pero chënga tmojanjuá: —¿Chë soye ndayá bëngbiama? Cach aca cochátotatšëmbñe ca.

<sup>5</sup> As Judas chë ralbenga Bëngbe Bëtsabe bëts yebnentšë yojesëtšana, y yojá y yojét-sentšëšaye.

<sup>6</sup> Chë bachnangbe améndayëngna chë ralbenga tmojtanatbaná y tmojánayana: —Quem crocenánama buiñe echanjuábuashana; ntšamo leyiñe endayancá, bënga ndoñe quemuátobena chë Bëngbe Bëtsabiama soyënga quëcjnyëtëmiñe chana jasegórana ca.

<sup>7</sup> Chcasna, chënga tmojanenoyeuná, chë crocenánacna chë Alfarerbe Luare ca uabaina fshantse jabuámiyana, y chca, canýe luare jtsebomnana ndayentšë chë inýe luarëngocana entšanga áshjajnënga jutabuantsama. <sup>8</sup> Chíyeca, chë fshantse mëntscoñama Buiñe Luare ca iuabaina. <sup>9</sup> Chca, tojanochnëngo ntšamo Jeremías, chë Bëngbe Bëtsabe juabna oyebuambnayá, tempscá tojanayancá, ndayá yochjanchnënguama. Chana mëntšá tojánayana: “Y chë unga bnétsana ralbenga tmonjanca, ntsachetšá chë Israeloca entšanga cha tmojanamananacá, <sup>10</sup> y chánaca chë Alfarerbe Luare tmonjanbuamé, ntšamo Bëngbe Bëtsá šonjanmandacá ca.”

#### *Jesús Pilatbe delante*

*(Mc 15.2-5; Lc 23.2-5; Jn 18.33-38)*

<sup>11</sup> Chentšana Jesús, chë mandado Pilátbioye tmojanánatse y cha mëntšá tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>12</sup> Chë bachnangbe améndayënga y chë bëtsëjemënga Jesús mal imojtsequédantscuana, cha ndocá ntjojuana. <sup>13</sup> Chíyeca Pilato tbojantjá: —¿Ndoñe contsuenana lempe ntšamo acbe contra montsichamcá ca?

<sup>14</sup> Pero Jesús ni canýe palabra ndoñe ntjojuana. Chë causa, chë mandado ndoñe yontsetátšëmbo ntšamo jajuaboyana.

#### *Jesús chaóbana ca tmojánayana*

*(Mc 15.6-20; Lc 23.13-25; Jn 18.38-19.16)*

<sup>15</sup> Bashco fiesta ora, chë mandado yojanamana canýe utamená jëtsboshjonana, nda entšanga tmojuabuayaná. <sup>16</sup> Chë tempo canýe uachuana utamená inamna, Jesús Barrabás ca uabainá. <sup>17</sup> Nyetsca entšanga chentšë imojtsemna ora, Pilato tojanatjá: “¿Tšëngaftanga nda šmojtsebošë atšë chjëtsboshjonama, Jesús Barrabás o Jesús, chë Cristo ca monduabobuatmá ca?”

<sup>18</sup> Er chë mandado yojtsetátšëmbo, entšangna envidia causa Jesús chabe cucuatšinë tmojánboshjonama.

<sup>19</sup> Pilato chë tribunal ca uabáinentšë yojtsetbemanëntscuana, chabe shema canýa tbojanichmó mëntšá cha jauyanama: “Chë nyetsca soyënguiñe tšabá ama entšábioye ndocá matsborlánana; chabe causa ibeta otjénayoca puerte sënjasufrí ca.”

<sup>20</sup> Pero chë bachnangbe améndayënga y chë bëtsëjemënga entšanga tmojanayëñaná, Barrabás jëtsboshjonama y Jesús chaóbana ca chamuayanama. <sup>21</sup> Chora chë mandado cachiñe tojanatjá: —¿Chë útatentšana nda šmojtsebošë atšë chjëtsboshjonama ca?

Y chënga tmojánayana: —¡Barrabás ca!

<sup>22</sup> Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nyetscanga tmojanjuá: —¡Motsecrucificá ca!

<sup>23</sup> Chora Pilato tojtëtanatjá: —¿Ndáyeca? ¿Ntšamo cha tojobuachjanguá ca?

Pero chënga cachiñe tmojanáyebuachena: —¡Motsecrucificá ca!

<sup>24</sup> Ndocá jamama yontsobenama y entšanga más jabuache enbouenanama tmojanontšema Pilato tojáninye ora, cha tojanmandá búyeshe juabuíyëboñana y nyetscangbe delante yojtsenacuentšabiá. Mëntšá tojánayana: —Atše ndocá chiyátayana, ni chiyatsma quem boyabása chaóbanama. Tšëngaftanga lempe šmonjama ca.

<sup>25</sup> Chora nyetsca entšanga tmojanjuá: —¡Quemuá yochjóbanama, bënga y bëngbe básengbiama castigo chaotsemna ca!

<sup>26</sup> As Pilato, Barrabás tbojtanboshjona; tojanmandá soldadënga Jesús jabuache chamotsetsetšenama y chentšana entšangbe cucuatšične tbojánboshjona chamocrucificama.

<sup>27</sup> Chentšana, chë mandadbe soldadënga Jesús tmojanánatse chë mandadbe bëts yebnentša chashjoye y choca nyetsca soldadënga chabe shéconana tmojanójoto. <sup>28</sup> Chorna, entšayá tmojtsanabotsca y shbuenda uafjatsenga entšayá mo reycá tmojanichëtjo.

<sup>29</sup> Canye coronésha tmojanapormá uchmašëfjangaca y tmojanabestšajó, y catšbioica cucuatšične canye niñëfja. Chorna, chabe shecuatšëntše imojtsofshëntsaméntšenaye y imojtsáboyejuana. Mëntšá imojtsichamo: “¡Bayté judiëngbe Rey cochtsemna ca!”

<sup>30</sup> Chëngnaca imojtsanbuashëtjnaye y cach niñëfjaca bestšašëntše imojtsétsjanjnaye.

<sup>31</sup> Y chca imnaftsáboyejuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y chora, jacrucificama tmojanánatse.

### *Jesús tmojanrucificá*

*(Mc 15.21-32; Lc 23.26-43; Jn 19.17-27)*

<sup>32</sup> Chë entšanga chentšana tmojánbocana ora, tmojánenbetše canye bacóftaca, Simón ca uabainá, Cirene pueblócá. As, cha tmojanmandá Jesusbe cruz chauetsocutsama.

<sup>33</sup> Canye luare Gólgota ca uabáinoca tmojánashjajna ora (hebreo biyañe chca endayana “Obanabe Bestšashe Luare ca”), <sup>34</sup> Jesúsbioye vínoye hiéloyeca enájuañniye tmojanabuiyé chaofšema; pero yojaftántia y ndoñe yonjábošena chiye jofšiyama.

<sup>35</sup> Ya tmojanrucificá orna, chë soldadënga Jesusbe entšayamna, tsbanánoye tmojanétšena, chca, jtsetatšëmbuama ndabiama yochjanáquedama. <sup>36</sup> Y chora chënga chentše tmojanotbiama Jesús jtsebojanjama. <sup>37</sup> Y chabe bestšaše juatsboicna canye uabemana soye tmojananjo. Chiñe yojétsayana ndáyeca cha tmojanrucificama, mëntšá: MUA JESÚS ENDMËNA, CHË JUDIËNGBE REY ca.

<sup>38</sup> Utata bacna soye ochjajnayátnaca chënga chentše tmojanrucificá, canya Jesusbe catšbioica y chë ínñana chabe uañicuayoica. <sup>39</sup> Y chëjana imojtsachnëjuana entšangna, Jesús imojtsóyenguaye, imojtsobestšfshanenaye <sup>40</sup> y imojtsatsaye: “¡Aca chë icobena Bëngbe Bëtsabe bëts yebna jtsenásatajchcana y nye unga tese jëtsjebuana, cach aca mentsbocá! ¡Ndegombre Bëngbe Bëtsabe Uaquiñá tcomnëse, chë cruzocana matastjango ca!”

<sup>41</sup> Chë bachnangbe amëndayënga, ley abuátambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntšá imojtsichamo: <sup>42</sup> “Cha ínñyenga tojëftsatsebacá, pero cachá jéntsbecama ndoñe quenátobena. Cha Israeloca entšangbe Rey tojtsemnëse, chë cruzocana chauatastjango, y chca, bënga chábeñe fchtsošbuáchiye.

<sup>43</sup> Cha tojayana Bëngbe Bëtsabeñe puerte yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobobonshánëse!, er cha tonjánayana Bëngbe Bëtsabe Uaquiñá canmëna ca” —chënga imojtsichamo.

<sup>44</sup> Y chë bacna soye ochjajnayata, Jesúseftaca ibojtsecrucificanátnaca cachcá ibojtsóyenguaye.

*Jesús tojanóbana**(Mc 15.33-41; Lc 23.44-49; Jn 19.28-30)*

<sup>45</sup> Njëtsto orscana las treséntscoñe, njëts quem luare yojtseibétata. <sup>46</sup> Chca orna, Jesús chabe biyañe tojanáyebuachena: “Elí, Elí, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýa ca?”)

<sup>47</sup> Chca tmojanuena ora, báseftanga chentše imojtsemna entšanguentšana imojtsichamo: “Cha Elías, chë Bëngbe Bëtsabe juabna oyebuambnayá, bontsechembuana ca.”

<sup>48</sup> As chora, chentša canya tojëftsánótjajo canye esponjëshe janguanguama, untja vínoyeca chëshe tojanfchecuacúa, canye niñëfjiñe tojananguësëtjo y Jesúsbioye tojanbeconá chaofšema. <sup>49</sup> Pero ínÿengna tmojánayana: “Cachcá mochjonýaye, er Elías tayochjabo jabátsbocama ca.”

<sup>50</sup> Pero Jesús cachiñe jabuache tojanoyó y tojanóbana. <sup>51</sup> Y cachora, Bëngbe Bëngbe Bëtsabe bëts yebnoca yojújonýana entšéjua tséntsaca yojtsenájataye, tsbanánocana fshantsoye. Chëjua bënëjua inauamna y chë tsatséntsaca inauónýana. Fshantse yojuangmémana, ndëtsbenga yojtsashtëtšana, <sup>52</sup> y chë cuevëshenga obanéngaca yojtsëtëfjo y banga Bëngbe Bëtsabe entšanga tmojtanayena. <sup>53</sup> Y chënga, Jesús tojtanayenentšana, chë cuevëshënguentsana tmojánbocana, y Jerusalén, chë uámana bëts pueblo ca uabáinoye tmojánamashjna y ba entšángbioye tmojánëbëbuacana.

<sup>54</sup> Chë soldadëngbe amëndayá y chë ínÿenga, Jesús jtsebojanýama cháftaca tmojanoquedanga, chë fshantse yojuangmémanama tmojáninýe ora, y njëtscá chë yojtsëchnëjuana soyëngama, puerte auatjanánënga imojtsemna y tmojánayana: “¿Ndegombre quem boyabása Bëngbe Bëtsabe Uaquiñá yomna ca!”

<sup>55</sup> Ba shembásengnaca chentše imojtsemna y bënocana imojtserreparana. Chëngna, Galileocana Jesús tmojanasto y cha imojanájabuachana. <sup>56</sup> Chë shembásengbeñe imojtsemna María Magdalena; María, Santiago y Josebe mamá; y Zebedeobe uaqiñatbe mamá.

*Jesús tmojanatbontsá**(Mc 15.42-47; Lc 23.50-56; Jn 19.38-42)*

<sup>57</sup> Ya yojtseibétatana ora, canye bomna boyabása, José ca uabainá, tojánashjango. Cha inamna Arimatea luarocá y Jesusbe ustoná. <sup>58</sup> José tojána Pilato jinýama, Jesusbe cuerpo jotjañama. As Pilato tojanmandá chë cuerpo chamontšabuáchema. <sup>59</sup> José chë cuerpo tojanca y canye nduatsenga lino entšéjuaca tbojanandmaná. <sup>60</sup> Y canye chabe tsëm cuevëshiñe tbojanjajó. Tempo cha inamánda chë cuevëshna ndëtsbenguiñe chamopormama. Canye bëts ndëtsbé tojansjoná y chë cuevëshoye amashjuanentše tojánachto; y chentšana José yojtsatoñe. <sup>61</sup> Pero María Magdalena y chë inýe Mariyna chentše tbojtsanoquedañe y chë cuevëshe ndirichiñe tbojanótbema.

*Soldadënga tmojána Jesús yojtsatbontsánentše jtsebojanýama*

<sup>62</sup> Yëfsana, chë ochnayté, chë bachnangbe amëndayënga y chë fariseunga cánýiñe tmojána Pilato jinýama. <sup>63</sup> Tmojanayana: —Taita, bënga fsëntsejuabná ntšamo chë bostero cabá ainá ora tonjánayanama, chë unga tianoye cha jtayenama ca. <sup>64</sup> Chíyeca, momandá chë cuevëshe soldadënga chamotsashanýa unga tentscuana. Chca, chabe uatsjëndayënga ndoñe ibeta chamondabo chabe cuerpo jabétsatbëbama, y chentšana chënga entšanga chamúyana, Jesús tojtayena ca. Y chca, chabiamá quem ústonoye bostero soye, chë cachabiamá tojánayana soyëngama puerte más bacá nántsemna ca — chënga tmojanayana.

<sup>65</sup> As Pilato tojanéyana: —Tšëngaftanga cach tšëngaftangbiama soldadënga šmondábamna. Motsajna y chë cuevëshe cuedádoca šmochtsashanýa, ntšamo šmondëtatšëmbcá ca.

<sup>66</sup> Chora chënga tmojána chë cuevëshe jtsashanjama; chë ndëtšbena, tsengájašeca imojuinynaná, ntsotatšëmbcá ndocná choye chaondámashënguama, y soldadënga chentšë tmojëftsanashejuana.

## 28

### *Jesús tojtanayena*

(Mc 16.1-8; Lc 24.1-12; Jn 20.1-10)

<sup>1</sup> Ochnayté chentšana, chë inye semana bojatšenté yojtsebínjána ora, María Magdalena y chë inye María tbojána cuevëshoye jarrepárama. <sup>2</sup> Ndeolpe fshantse tojanangmémana, er Bëngbe Bëtsabe canye ángel celocana tojántasma, chë cuevëshoye tojanobeconá, chë atamiana ndëtšbé tojtsanjuaná y chiñe tojanótbema. <sup>3</sup> Chë ángelna mo canye tcuinjëjca yojtsebuashinjinjána, y chabe uichëtjonëjuangá uafjantsëjuangá mo jantšëtëshcá yojtsamna. <sup>4</sup> Chë soldadënga chca tmojáninje ora, de auatja yojtsangmëmnaye y mo obanëngcá imojtsemna.

<sup>5</sup> Chora chë ángel chë shembásatbioye tojanéyana: “Ndoñe batauatjana. Atšë séntsetatšëmbo tšëngaftanga Jesús, chë tmonjancrucificá cha šmojtsenguama. <sup>6</sup> Cha muentšë ndoñe quenátsmëna; cha tontayena, ntšamo cachá tonjanayancá. Mabata y šochjinje cha endëtšesegoranentšë. <sup>7</sup> Betsco motsata y chë uatsjéndayënga šochjáuyana: ‘Jesús tontayena y tšëngaftangbe natsana Galileoye echanjá; choca šmochanjinje ca.’ ” Y chora cha tojánayana: “Chca šondmëna tšëngaftanga jauyanana ca.”

<sup>8</sup> Cachora chë shembásata chë cuevëshentšana tbojésanbocna, auatjanánata pero puerte oyejuayata, y tbojëftsantjajo chë soye chë uatsjéndayëngbeñe jobuambayama. <sup>9</sup> Y ndeolpe Jesús chata tojánëbëbuacna y tojanacheuá. Chatna, chábioye tbojanobëconata, tbojtánadorata y chabe shecuatšë shéconana imojtbojcuá. <sup>10</sup> Y Jesús tojanéyana: “Ndoñe batauatjana. Motsata atšbe uatsjéndayënga, atšbe catšátanga jáuyanama Galileoye chamotsá y choca atšë šmochjinje ca.”

### *Ntšamo chë soldadënga tmojánayana ndayá tojanochnënguama*

<sup>11</sup> Chë shembásata ibojtsayëntscuana, básefta soldadënga chë bëts puebløye tmojána y ntšamo tojanopasacá lempe chë bachnangbe amëndayëngbeñe tmojanobuambá. <sup>12</sup> As chë bachnangbe amëndayënga, chë judiëngbeñe bëtsëjemëngcá mandayëngaftaca tmojánenëfjna jenóyeunayama. Chëngna chë soldadëngbioye bëtscá crocénana tmojtánatšatá, <sup>13</sup> y mëntšá tmojanabuayená: “Tšëngaftanga šmochjayana, ibeta šmot-somáñëntscuana, Jesusbe uatsjéndayënga tmojabo y chabe cuerpo tmojabétsatbëba ca. <sup>14</sup> Y chë mandado chë soyama chaojátatšëmbonëse, bënga lempe cháftaca fchjenóyeunaye, chca, tšëngaftangaftaca ndocá chaondopasama ca” —chënga tmojanéyana.

<sup>15</sup> As chë soldadënga chë crocénana tmojanóyëngacñe y tmojanma ntšamo chë mándayënga tmojanabuayenacá. Ba entšanga chë cuento tmojanuena y mëntšcoñama judiënga cachcá mondbëtsichamo.

### *Jesús chë uatsjéndayënga tojanichamó, Bëngbe Bëtsabe soyëngama nyetsquénache jábuayenama*

(Mc 16.14-18; Lc 24.36-49; Jn 20.19-23)

<sup>16</sup> Chentšana, chë bnëtsana canye uatsjéndayënga Galileoye tmojána, chë ndëmua tjøye Jesús chënga tojanabuayená choye. <sup>17</sup> Y Jesús tmojáninje ora, tmojtánadorá. Pero báseftangna imojëtsejuabnaye nderado cha ndoñe Jesús yontsemna ca. <sup>18</sup> Jesús chëngbioye tojanobeconá y tojanéyana: “Bëngbe Bëtsá nyets mando atšë šonjatšëta celoca y quem luarentšë. <sup>19</sup> Chcasna, motsajna, nyets luarënguenache oyenënga atšbe uatsjéndayënga šmochjábiamá. Entšanga šmochjubaye atšbe Taitá, atšë chabe Uaquiñá y chë Uámána Espiritbe uabaina jayanëse, átšbeñe šmošbuachéyeca, <sup>20</sup> y šmochjabu-atambá lempe ntšamo atšë tbojamëndacá chënga chamóyeunama. Y ndegombre atšë



njets tempo tsëngaftangaftaca chanjéftsemna, quem luare jopochócantscuana ca” —  
Jesús tojanéyana.

## San Marcos

*Juan chë Ubayaná entsānga yojanabuayiyná*

(Mt 3.1-12; Lc 3.1-9, 15-17; Jn 1.19-28)

<sup>1</sup> Měntšá tojanobojatšé chë tšabe noticiēnga Běngbe Bětsabe Uaquiñá Jesucristbiamā.

<sup>2</sup> Ntšamo bayté entsemna, chë Běngbe Bětsabe juabna oyebuambnayá Isaías chabe libréšaňe yojěftsayancá, ntšamo Běngbe Bětsá chabe Uaquiñábioye ibojauyanama cha tojanábema ora:

Minýe, atšbe abuayiyayá acbe natsana sěntsichamná,

chë aca jabama lempe echanjaprónta cha.

<sup>3</sup> Entšānga ndoyena luaroca cha enduáyebuache mēntšá:

“Běngbe Utabná echanjabo ca;

mo nda canýe benache tojtseprontacá canýe uámana entšá jashjanguama,

cachcá tšěngaftānga, cha jabama ainaniňe tšabe juabnéngaca šmochtseprontana ca” —  
cha tojanábema.

<sup>4</sup> Chcase, Běngbe Bětsá Juan tbojanichmó, y cha tojánbocna entšānga ndoyena luaroca, Běngbe Bětsabe soyēngama abuayiyayē y entšānga ubáyana. Cha entšānga yojanětsětsnaye: “Tšěngaftāngbe bacna soyēngama ngmēnaca šmochtenójuaboýe, chca amana šochtsajbaná, y Běngbe Bětsabe benache šmochtishache. Chora cbochjúbaye, y Běngbe Bětsá tšěngaftāngbe bacna soyēngama cmochanjáperdonaye ca.” <sup>5</sup> Nýets Judea luarocana chábioye entšānga imojánbocana, y Jerusalenentšāna nýetsca entšāngnaca, y Běngbe Bětsábioye chěngbe bacna soyēngama jaimpáda chentšāna, Juan Jordán ca uabaina bėjaiňe chěnga yojaněbáyana.

<sup>6</sup> Juanbe entšayá inauapormana camellbe stjěnasheca y bobache yojanasnana; chapulinatémēnga y tjaňe méloye inasaye. <sup>7</sup> Y mēntšá entšānga yojanětsětsnaye: “Atšbe ústonoye inýa echanjabo, atšbiamā más obenana bomná; chíyeca atše mercedo taitstato-buajoňe, ni mo jotsejbiyana chabe shecchětjoněshentša corriēja jajafjonama. <sup>8</sup> Atšna búyeshēca cbonděubáyana, pero chë echanjabábeyecna, Běngbe Bětsá bochanjíchmuā chë Uámana Espiritu tšěngaftāngbe ainaniňe cháuamashěnguama ca.”

*Juan, Jesúsbioye tbojanabaye*

(Mt 3.13-17; Lc 3.21-22)

<sup>9</sup> Chë tempo, Galilea luarocana Nazaret pueblentšāna Jesús yojěftsebocna, y Juan yojtsemnoye tojána; y Jordán bėjaiňe Jesúsbioye cha tbojanabaye. <sup>10</sup> Bejajoicana yojtashěbēbocna orna, tojáninýe celoca atěfjniňe, y chë Uámana Espiritu chábioye mo palomatemcá yojtsastjajuana. <sup>11</sup> Y celocana Běngbe Bětsá mēntšá tbojanianyana: “Acna atšbe bonshana Uaquiñá condmēna; acbiamā corente sěntsoyejuá ca.”

*Jesús tojanobená Satanás jayěňjanama*

(Mt 4.1-11; Lc 4.1-13)

<sup>12</sup> Chentšāna chë Uámana Espiritu Jesúsbioye entšānga ndoyena luaroye tbojanánatse.

<sup>13</sup> Canta bnětsana te chë entšānga ndoyena luaroca tbojanjětana, y Satanasna yojanábó jisháchichiyama. Chë luarentše tšátjaye bayēnga imnajena; chentšāna, Běngbe Bětsabe angelēnga cha imojtseserverna.

*Jesús tojanontšé Galileoca chabe trabajo jamana*

(Mt 4.12-17; Lc 4.14-15)

<sup>14</sup> Juan cárceloye tmojanětámentšāna, Jesús Galileoye tojesaná; y chiňe cha yojanabuayiyná chë tšabe noticiēnga Běngbe Bětsabiamā. <sup>15</sup> Jesús entšānga yojanětsětsnaye: “Ora tocjobuache, Běngbe Bětsabe aměndayana echanjóshjango. Tšěngaftāngbe bacna soyēngama ngmēnaca šmochtenójuaboýe, y chca amana šmochtsajbaná y Běngbe

Bëtsabe benache šmochtishache; y ainaniñe chë tšabe noticiënga Bëngbe Bëtsabiana šmochjóyëngacñe ca.”

*Jesús tojánachembo canta boyabásenga beonga ashebuánayënga cha chamuastama*  
(Mt 4.18-22; Lc 5.1-11)

<sup>16</sup> Galilea uafjajónaye tsachajana Jesús yojtsaye ora, cha tojánanýe Simón y chabe uabentsá Andrés; chatna atarraiešhangá ibnetsashbuétsetšañe, er beonga ashebuánayata chata ibnamna. <sup>17</sup> Chora Jesús tojanéyana: “Atšeftaca mabata. Atše cbochanjábiama Bëngbe Bëtsabiana entšanga anguayata; y morscana, nýe beonga ashebuánayata ndoñe quešochátsmëna ca.”

<sup>18</sup> Y cachora chatbe atarraiešhangá cachcá tbojésanaboshjuana y Jesús tmojanasto.

<sup>19</sup> Más chcoye yojátaye orna, Jesús tojánanýe Santiago y chabe uabentsá Juan, Zebedeobe uaquiñata; chatna barquëshañe ibnetsotbemañe, chatbe atarraiešhangá atapórmayiñe. <sup>20</sup> Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peóngaftaca y Jesúseftaca tbojtsanoñe.

*Jesús, bacna bayëjbe juabna cányabioye tbojanbojuaná*  
(Lc 4.31-37)

<sup>21</sup> Chentšana, Jesús y chabe uatsjéndayënga Capernaum ca uabaina puebloca tmojánashjajna. Chë ochnayté, Jesús chë judiëngbe enefjuana yebnentše tojánamashëngo y yojóntša entšanga jabuátambama. <sup>22</sup> Entšanga imojtsenjnanaye ntšamo Jesús yojtsabuatambacá, er chama mo canýe mando bomnacá yojtsóyebuambnaye, ndoñe nýe ntšamo Moisesbe ley abuátambayënga imojanabuatambacá. <sup>23</sup> Chë pueblentše judiëngbe enefjuana yebnentše yojtsemna canýe entšá bacna bayëja uambayá, y chábeyeca chë boyabása yojóntša mëntšá uayebuáchana: <sup>24</sup> —¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndétatšëmbo nda aca comnama, aca chë Bëngbe Bëtsabe Uamaná ca.

<sup>25</sup> Chora Jesús chë bayëjbioye tbojtsanácacana, y tbojaniana: —¡Iytëca móbema y chábentšana maisebocna ca!

<sup>26</sup> Chora chë bacna bayëjna tojanma chë boyabása ataque chaboshachama, jabuache tojanoyó y chábentšana tojésanbocna. <sup>27</sup> Chama, nýetsca entšanga ojnanánënga imojtsemna, y mëntšá imojtsentjanaye: “¿Ndayá chca yojtsemna? ¿Canýe tsëm buatëmbana soye? ¡Quem boyabása mando bomnacá y obenacá entsabuatambá, y chca, chë bayëjënga cha jtsaméndayana y chéngnaca joyeunayana ca!”

<sup>28</sup> Y betscó nýets Galilea luarentša pueblënguenache Jesusbiana yojtsótatšëmbo.

*Jesús, Simón Pédrëbe uambén mamábioye tbojanashná*  
(Mt 8.14-15; Lc 4.38-39)

<sup>29</sup> Chentšana, chë enefjuana yebnentšana tmojánbocana y Santiago y Juánoftaca Jesús tojána, Simón y Andresbe yebnoye. <sup>30</sup> Simonbe uambén mamá šocá inajájona, jabuache calentóraca, y Jesúsbioye chë šocabiana tmojaniana. <sup>31</sup> As chora, Jesús tojanobeconá, chë šocábioye tbojanábuacushache y tbojanatsbaná. Cachora chë calentora tbojtsanóbojuanañe; y cachora cha tojtantsbaná y tojanontšë chënga jobuácuedana.

*Jesús ba šoquënga tojanashná*  
(Mt 8.16-17; Lc 4.40-41)

<sup>32</sup> Chë te jetiñe, shinýe ya yojuenatjëmbe ora, chë luarentša nýetsca šoquënga y bacna bayëjënga uambayënga Jesúsbioye tmojanënatse; <sup>33</sup> y nýetsca entšanga bëšoye imojobeconá. <sup>34</sup> Jesús banga tojanashná, nýetsca šocana bomnënga, y ba bacna bayëjënga entšanguentšana tojtanëbuacna; y ndoñe tonjanalesenciá chë bayëjënga chamóyebuambama, er chënga imnatátšëmbo cha chë Cristo bëtsemnama.

*Chë judiëngbe enefjuana yebnënguenache Bëngbe Bëtsabe soyëngama Jesús yojanabuayiyná*  
(Lc 4.42-44)

<sup>35</sup> Yëfsana cabá cachëse, cabá ibetcá, Jesús tojëftsantsbaná, chë pueblentsana tojëft-sanbocna y entsanga ndoyena luaroye tojtsanoñe, choca Bëngbe Bëtsáftaca jencuén-tama. <sup>36</sup> Pero Simón y chabe enutëngna tmojána jetsenguanguama; <sup>37</sup> y tmojtsaninyena ora tmojaniyana: —Nyetscanga cmontsenguá ca.

<sup>38</sup> Y Jesús tojanéyana: —Inyoye cuajna, cam béconana pueblëngoye, chíñnaca Bëngbe Bëtsabe soyëngama entsanga chayábuayenama; er chama atše sënjabo ca.

<sup>39</sup> Y chentšana, Jesús yojánana Bëngbe Bëtsabiamama entsanga abuayinyaye chë judiëngbe enefjuana yebnënguenache, nyets Galileiñe, y entsángbentsana bacna bayëjënga yojtëbuacana.

*Jesús, canya bacna nguayanánaca šocábioye tbojanshná*

*(Mt 8.1-4; Lc 5.12-16)*

<sup>40</sup> Chentšana, canye boyabása bacna nguayanánaca šocá Jesúsbioye tojanobeconá; y joshaméntšase mëntšá tbojanimpadá: —Aca tcojtsebošëse, aca catjobenaye atšbe šocana jtsebojuánama ca.

<sup>41</sup> Jesús chabiamama tbojanongmé; cucuátšeca tbojánbojajo y tbojaniyana: —Aíñe séntseboše. ¡Šocana cbotsebojuaná ca!

<sup>42</sup> Y cachora chë šocana tbojtsanóbojuanañe y tšabá yojtsatsmëna. <sup>43</sup> Chora Jesús chábioye tbojtanichmó, pero puerte mëntšá tbojanmandá: <sup>44</sup> —Mouena; ndocnábeñe quem soye cattsecuëntaye; nye Jerusalemoca báchnëbioye motsa y cha cochjinýinye aca mora ya tšabá cojtsatsmënama. Chora cochjuátšëmbona ntšamo Moisés chabe leyiñe tojanmandacá, Bëngbe Bëtsábioye chama jëtschuayama, chca, nyetsca entsanga chamotatšëmbona mora ya tšabá cojtsatsmënama ca.

<sup>45</sup> Pero chë boyabásana, chentšana tojëftsanbocna y cachora yojóntša nyetsquénache entsanga yapa acúntayana Jesús tbojanshnama. Chë causa, Jesús ndoñe yontsobena entsangbe delante pueblënguenache jtsanana, ndayá nye chë pueblënga béconana y nyetsca chë entsanga ndoyena luarënguñe yojánana; pero nyets luarëngocana chábioye entsanga imojánashjajuana.

## 2

*Jesús, canye jama ndobenábioye tbojanshná*

*(Mt 9.1-8; Lc 5.17-26)*

<sup>1</sup> Chentšana, Jesús Capernaumoye tojtashjango; y entsanga imojátatšëmbona, Jesús yebnentše yojtsatsmënama. <sup>2</sup> Mallajta entsanga chentše tmojanójoto; chë causa chë yebnentše ya tondaye más luare entsangbiama yontsemna, ni mo chë amashjuanentše, y Jesús Bëngbe Bëtsabe soyëngama yojtsabuayinyaye. <sup>3</sup> Chora tojanopasá, canta boyabásenga tmojánashjango, canye entsá jama ndobená imojtsaismana. <sup>4</sup> Pero ndoñe tmonjanobená Jesús yojtsemnoye cha juambana, tša entsanga causa. Chcasna, chë canta boyabásenga yebna tsbanánoca, Jesusbe tatsëtšoca batšá tmojánatëfjo y chëjana chë jama ndobená tjuashiñe tmojanéstjango. <sup>5</sup> Jesús tojáninye chënga tša imojtsošbuachë chë šocá jáshnama cha yojanobenama; as chë jama ndobenábioye tbojaniyana: “Sobreno, mouena; acbe bacna soyënga tcbontsebojperdoná ca.”

<sup>6</sup> Chentše báseftanga judiëngbe ley abuátambayënga imnatbemana; chënga chora mëntšá imojtsejuabnaye: <sup>7</sup> “¿Ntšámoyeca quem boyabása chca yojtsichamo? Jesús ndoñe tšabá Bëngbe Bëtsabiamama quenátichamo; mo chábioye cuafjoyenguangcá entsemna. Ndocna entsá quenátobena ínjabioye bacna soyëngama japerdónana; nye Bëngbe Bëtsana aíñe ca.”

<sup>8</sup> Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanéyana: “¿Ndáyeca chca tšëngaftanga ainaniñe šmojtsejuabná? <sup>9</sup> ¿Tšëngaftangbiama ndayá más paselo nántsemna tšëngaftangbe delante chë jama ndobenábioye atše jauyanana: ‘Acbe bacna soyënga tcbontsebojperdoná’, o ‘Matëtsbaná, acbe tjuashe mesocñe y motsa ca’? <sup>10</sup> Y chca, mora atše cbochanjínyanýiye Bëngbe

Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

Y chë jama ndobenábioye tbojaniana: <sup>11</sup> “Atše cbëyana, matëtsbaná, acbe tjuashe mesocñe y acbe yebnoye motsatoñe ca.”

<sup>12</sup> Cachora chë jama ndobená tojtantsbaná, chabe tjuashe yojescñe, y entšangbiajana chentšana yojésebcna. Chama nyetsca entšanga imojenjnaná y Bëngbe Bëtsábioye imojtsatschuanaye, y mëntšá imojtsichamo: “Nya ndocna te tša bëts soye chemuáisinje ca.”

*Jesús, Levíbioye tbojanchembo chabuastama*

*(Mt 9.9-13; Lc 5.27-32)*

<sup>13</sup> Chentšana, Jesús cachiñe chë uafjajónaye tsachoye tojesaná; ba entšanga chábioye imojobeconá, y Jesús yojtsabuátambaye. <sup>14</sup> Chentšana yojtsataye orna, Jesús tbojáninje Levíbioye, Alfeobe uaqiñá, yojtsanotbemañe, entšanga impuesto atjanayacá inëtsotrabajañe. Chora Jesús tbojaniana: “Šmasto ca.”

Y Leví tojantsbaná y tbojanasto.

<sup>15</sup> Tojanopasá, Jesús Levibe yebnentše yojtsesaye, y banga Romocama entšanga impuesto atjanayënga y inje bacna entšanga, mesëshentše cánjiñe imojtsetbiámana, Jesús y chabe uatsjëndayëngaftaca; er ba entšanga cha imojústona. <sup>16</sup> Chë fariseunga y chë ley abuátambayënga, chë entšangtaftaca Jesús yojtsesama tmojáninje ora, chabe uatsjëndayëngbioye tmojanatjá: —¿Ndáyeca tsëngaftangbe buatëmbayá, entšanga impuesto atjanayëngaftaca y bacna soye amëngaftaca yojtsesá ca?

<sup>17</sup> Jesús chca tojanuena; as mëntšá tojanéjua: —Chë salud tmotsobomñënga, ashnayá ndoñe ntsëjabótana, pero chë šoquëngna añe. Y atše ndoñe chiyátabo chë Bëngbe Bëtsabe bominiñe tšabá amënga jabáchembuama, ndayá chë bacna soye amënga imomna ca juabnayënga átšbioye jabáchembuama ca.

*Jesús tmojanatjá chë Bëngbe Bëtsáftaca jencuëntama tondaye saytescama*

*(Mt 9.14-17; Lc 5.33-39)*

<sup>18</sup> Canje, Juan chë Ubayanabe ústonënga y chë fariseungbe usetonënga, Bëngbe Bëtsáftaca jencuëntama tondaye ntjascá imojtsemna ora, básefta entšanga Jesúsbioye tmojanobeconá y mëntšá tmojaniana: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuëntama. ¿Ndáyeca acbe uatsjëndayënga ndoñe chca ca?

<sup>19</sup> As Jesús tojanéjua: —Chë casamento fiestentše, chë ófjanënga saná ndoñe ntsabuáshebenana. ¿Ntšamo chca ndoñe nántsemna? Chë tojobouamá entšá chëngaftaca tojtsemnëntscuana, chë ófjanënga bëtská jasana y cháftaca oyejuayënga jtsemnana. <sup>20</sup> Pero ora echanjobuache y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntšamo chë tojobouamá boyabása y chë ofjanëngaftaca endmëncá, cachcá endmëna atše y atšbe uatsjëndayëngaftacnaca.

<sup>21</sup> “Ndocná, canje tanguá entšayá, base tsëm entšëjuaca jtarmëndana; chca tcojamëse, chë tsëm entšëjua jtsabéconana y chë tanguá entšayá más jtsatanécanana, y chca, chë uátanëcniñe más bëtsiñe jtsabemana. <sup>22</sup> Y cach ndoñe, chë tojtseshayana vínoye tanguá jasabenguiñe ntjataftsuámayana; er chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámana; chca, chë jasabenga y chë vínoye josérviana ca” —Jesús tojánayana.

*Jesube uatsjëndayënga canje ochnayté trigo tmojanátabebe*

*(Mt 12.1-8; Lc 6.1-5)*

<sup>23</sup> Canye ochnayté, Jesús canye jajajana yojtsaye; y chabe uatsjédayënga chëjana imojtsachnéjuana ora, tmojanontsé trigo juatabebiana. <sup>24</sup> Chë fariseunga chca imojinje ora, Jesúsbioye tmojanianyana: —Minje. ¿Ntšamo acbe uatsjédayënga montsamcá, ndoñe quenátslesenciana ochnayté jtsamama ca?

<sup>25</sup> Pero cha tojanéjua: —¿Ndoñe šmëndualía y šmondétatšëmbo ntšamo Rey David y chabe enutënga tmojanmama shéntseca imojtsemna ora y jasama yojtsëjamoto ora?

<sup>26</sup> Chca ora, Abiatar chë judiëngbe bachnangbe más uámana amëndayá inamna ora, David Bëngbe Bëtsabe yebnoye yojámashëngo, y chë luarentse Bëngbe Bëtsá yojamnama injinyñaye tandëšënga yojase; y chë cháftaca imojánajna entšágnaca yojátšataye. Y chë tandëšna nye bachnangbiamama belesenciana jasama. Masque David chca tojanma, Bëngbe Bëtsá ndoñe tonjánayana David canye bacna soye tojanma ca.

<sup>27</sup> Y Jesús más tojánayana: —Bëngbe Bëtsá ochnayté entšabiamama tojama y entšá ndoñe tbonjábema nye chë ochnayté ndoñe chaondëtrabajama. <sup>28</sup> Chíyeca, Bëngbe Bëtsá Entšá tbojanbemá, ndayá entšá ochnayté tojtsama sóynaca jtsemándayana ca.

### 3

#### *Chë buashana cucuatše bomna entšá (Mt 12.9-14; Lc 6.6-11)*

<sup>1</sup> Chentšana, Jesús cachiñe chë judiëngbe enefjuana yebnoye tojésanamashëngo; y chentše canye boyabása yojtsemna, buashana cucuatše bomná. <sup>2</sup> Chë fariseunga chiñe imojtserrondana jinýama nderado Jesús chë ochnayté chábioye tabuanjashnama, as chca chënga jtsebomnama ndaye sóyeca cha mal jaquédana. <sup>3</sup> Chora Jesús chë buashana cucuatše bomnábioye tbojanianyana: —Chentše, entšangbe delante motsa ca.

<sup>4</sup> Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtsepochoçama ca?

Pero chënga ndocá tmonjanjuá, nye iyteca imojobiama. <sup>5</sup> Chora Jesús rábiaca y ngménaca chë fariseunga tojanënyañé, chënga ainaniñe josértama ndoñe montseboše causa; y chë buashana cucuatše bomnábioye tbojanianyana: —Macuenýañëjaná ca.

As chë boyabása tojanacuenýañëjaná, y chora tšabá chëtša yojtsatamna cach inýetšacá. <sup>6</sup> Pero chë fariseungna, chentšana tmojésanbocana ora, Rey Heródesbe ustonéngaftaca tmojanenoyeuná Jesusbe contra, y tmojanontsé juabnayana ntšamo jamëse Jesús jóbama.

#### *Mallajta entšanga Jesúsbioye tmojanobeconá*

<sup>7</sup> Chentšana, Jesús chabe uatsjédayëngaftaca tojanoluaré mar béjaye tsachoye, y Galileocana bëtscá entšanga tmojanasto. <sup>8</sup> Inje entšágnaca chábioye tmojanobeconá Judeocana, Jerusalenocana, Idumea ca uabaina luarocana, Jordán béjaye chenguanoicana, Tiro y Sidón pueblëngocana. Chënga tmojanobeconá, Jesús tša bëts soyënga yojtsamama tmojanuena ora. <sup>9</sup> Jesús chabe uatsjédayënga tojanéyana: “Motsajna y canye barquësha atšbiamama šmochjuapróna, tša entšanga ndoñe chašmondëtsatsëntšnama ca.” <sup>10</sup> Er cha banga tojanashná, y chë causa, nyetscanga šocana bomnënga chábioye tmojanajuatsëntšëná cha jabojuama.

<sup>11</sup> Y chë bacna bayëjënga uambayëngna, Jesús tmojinje ora, betscó chabe shecutšëntše imojtsofshëntsaméntšënyaye, y chë bacna bayëjëngbeyeca mëntšá imojtsáye-buache: “¡Aca Bëngbe Bëtsabe Uaquiñá condmëna ca!”

<sup>12</sup> Pero Jesús puerte tojanamëndá, nda cha bëtsemnama entšangbe delante ndoñe chamondëtsichámuama.

#### *Jesús chë bnëtsana uta uatsjédayënga tojanabacacá (Mt 10.1-4; Lc 6.12-16)*

<sup>13</sup> Chentšana, Jesús canye batsjoye tojántsjua, y ndëmuanýënga tšabá tbojanínýënanënga tojánachembo. Y chëngna chábioye tmojanobeconá. <sup>14</sup> Chora, chënguentšana

bnétsana útata tojanëbuáyana, chamotsetjembambnama, y Bëngbe Bëtsabe soyëngama entšanga chámabuayenama; <sup>15</sup> y chënga obenana tojanatsatá entšangbentšana bacna bayëjënga jtëbuacanama. <sup>16</sup> Mënga mondmëna chë bnétsana uta bocacánënga: Simón, chë ndábioye Pedro ca Jesús tbojanabaye; <sup>17</sup> Santiago y chabe uabentsá Juan, Zebedeobe uaquiñata, chata tojanëbaye “boanerges ca”, y chca endayana “uajuesayabe uaquiñata ca”; <sup>18</sup> Andrés, Felipe, Bartolomé, Mateo, Tomás, Santiago, Alfeobe uaquiñá; Tadeo, Simón chë celote ca uabobainá; <sup>19</sup> y Judas Iscariote, chë chentšana ndoñe baytesna, Jesús uayayëngbe cucuatšinë bochjanboshjoná.

*Ley abuátambayënga tmojánayana, Jesús Satanásbentšana obenana tojanóyëngacñe ca (Mt 12.22-32; Lc 11.14-23; 12.10)*

<sup>20</sup> Chentšana, Jesús yebnoye tojtanamáshëngo, y tša entšanga chentše tmojanójoto; chë causa, ni cha ni chabe uatsjëndayënga, ni mo jasama luare ndoñe imontsebmoma. <sup>21</sup> Jesusbe pamíllanga ntšamo cha yojtsepásama tmojántatšëmbona ora, tmojána cha jetsbetšama, er entšanga imojtsencuëntaye cha opa tojtsanóbema ca.

<sup>22</sup> Y chë ley abuátambayënga Jerusalenocana tmojánashjajnëngna Jesusbiama mëntšá imojtsichamo: “Chabe ndegombre mandayá Beelzebú, cach Satanás yojtsemna. Cha, chë bacna bayëjënga amëndayá, Jesúsbioye obenana tbojatšetá entšangbentšana bacna bayëjënga chauatëbuacnama ca.”

<sup>23</sup> Chënga chca imojtsichámuama, Jesús chënga tojánachembo, y cuentëngaca tojanontsé jáuyanana, jinýanýiyama chënga canye ndoñe ndegombre soyiñe imojtsemnama, mëntšá: “¿Ntšamo Satanás nantsobena cachá jtenábocnama ca? <sup>24</sup> Canye amëndayábentše entšanga tmojtsenojatá y tmojtsenáyase, chë amëndayana ndoñe ntjatotonana. <sup>25</sup> Cachá, canye yebnentše pamíllanga tmojtsenojatá y tmojtsenáyase, chë pamíllanga ndoñe tšabá nyets tempo quemochátsmëna. <sup>26</sup> Y cachá, Satanás y chábenga ndoñe tmontsenëyeunana y cachabe contra tojtsemnëse, chabe amëndayana ndoñe más queochátstotona; y cha ya ndoñe más chëngbe amëndayá quemochátsmëna.

<sup>27</sup> “Ndocná quenátobena canye corente añemo bomna entšabe yebnoye jamashënguana y chabe soyënga jtsebocana, ndoñe natsana tconjshëtsebatsëquëse. Nye tcojshëtsebatsëquëse cocayé cuanjobenaye cha jefcana.

<sup>28</sup> “Ndegombre cbéyana, Bëngbe Bëtsá entšangbe nyetsca bacna soyënga echanjáperdonaye, y ntšamo Bëngbe Bëtsabiama y ínýengbiama ndoñe tšabá tmontsichamo soyëngnaca; <sup>29</sup> pero chë Uámana Espíritbiama ndoñe tšabá ichámëngna ndocna te queochátaperdonaye, er nyetsca tescama castigánënga jtsemnama chënga jtsamnana ca” —Jesús tojánayana.

<sup>30</sup> Jesús chca tojanéyana, er chënga imojtsichamo cha bacna bayëja ibojtsambá ca.

*Chë Jesusbe ndegombre pamíllanguentšënga (Mt 12.46-50; Lc 8.19-21)*

<sup>31</sup> Chëntscuana, Jesusbe mamá y catsátanga choye tmojánashjajna, pero nye shjoca imojtsemna; y canya tmojanichmó cha jachembuama. <sup>32</sup> Chë ba entšanga chentše chabe shëconana imojtsetbiámanëngna, chora tmojaniyana: —Acbe mamá, acbe catsátanga y uabëngana shjoca montsemna; aca cmontsenguá ca.

<sup>33</sup> Chora cha tojanéjua: —¿Nda atšbe mamá yomna, y ndëmuanýënga atšbe catsátanga ca?

<sup>34</sup> Chentšana, chë chabe shëconanana tbiamanëngbioye jarrepárase, tojánayana: —Quemënga mondmëna atšbe mamá y atšbe catsátanga. <sup>35</sup> Er ndánaca, ntšamo Bëngbe Bëtsá yobošcá tojtsamá, jtsemnana atšbe catsata, atšbe uabena y atšbe mamá, atšbe ndegombre pamíllanguentšá ca.

## 4

*Chë jenabe cuento**(Mt 13.1-9; Lc 8.4-8)*

<sup>1</sup> Chentshana, uafjajónaye tsachoca Jesús tojtëtanontsé Bëngbe Bëtsabe soyëngama jabuátambama. Mallajta entšanga tmojanobeconá causa, chë uafjajónayentše yojanamna canye barquëshoye Jesús tojánasëngo y tojanótbema; y chë entšanga tsachoca imojtsemna. <sup>2</sup> Chora cuentëngaca ba soyëngama tojanabuatambá.

Mëntšá tojanéyana: <sup>3</sup> “Šmochjouena; canye jená chë jénaye jaujquëshama yojéftse-bocna. <sup>4</sup> Yojsëjquëshaye orna, básefta jénaye benache juachañe yojuatquécjana; pero jaja shloftšënga imojástjajna y lempe imojtsósañe. <sup>5</sup> Inye meshëngna ndëtšbenguiñe yojuatquécjana, ndoñe yapa fshantse binyentše. Chiñna betscó yojuábocna, ndoñe yapa jashenocana fshantse yojanmëna causa; <sup>6</sup> pero yojuábocna orna, puerte yojo-jënyána y yojsancta; y yojsábojo yapa tbëtëjënga tondaye causa. <sup>7</sup> Inye meshëngna uchmëshangañe yojuatquécjana; chë uchmashá yojuájua ora, lempe yojsatscué, y chca, chë jénayentšana tondaye yonjuashájona. <sup>8</sup> Pero inye meshëngna, uanguaniñe yojuatquécjana, y bëtsá tšabe shajuanënga chiñe yojóbcna: ínjenache, canye meshentšana unga bnëtsana meshënga yojóbcna; ínjenachna, chnénguana bnëtsana meshënga; y ínjenachna patse meshënga ca” —cha tojánayana.

<sup>9</sup> Y chentshana, Jesús más tojánayana: “Chë jouenama tmojtsobenënga, šmochjouena ca.”

*Ndayeca Jesús cuentëngaca yojánabuatambaye**(Mt 13.10-17; Lc 8.9-10)*

<sup>10</sup> Chentshana, Jesús canya yojoquéda ora, chë chabe béconana imojtsemnënga chabe bnëtsana uta uatsjëndayëngaftaca, tmojantjá ndayá chë cuento bëtsayanama. <sup>11</sup> As Jesús tojanéjua: “Bëngbe Bëtsá tšëngaftanga cmontsinyanýná nyetsca chë mo iytëmencá yomna soyënga chabe amëndayama, pero chë ínÿengbioye ndoñe; chë soyëngama chënga lempe cuentëngaca sentsëtsëtsná. <sup>12</sup> Chca, masque beca chamotsafšna, ndoñe chamondobená chë Bëngbe Bëtsabe soyënga jinýama; y masque beca chë soyënga chamouena, ndoñe queochátësertana, chënga Bëngbe Bëtsábioye ndoñe chamondëtobéconama, y cha ndoñe chaondáperdonama ca.”

*Jesús chë jenabe cuentama tojanabuayená**(Mt 13.18-23; Lc 8.11-15)*

<sup>13</sup> Chentshana, Jesús tojanéyana: “¿Quem cuentama ndoñe tcmónjósertase, ntšamo chcace nyetsca cuentëngama cmochjóserta ca? <sup>14</sup> Chë jená endmëna chë tšabe noti-ciëngama abuayiynayá. <sup>15</sup> Básefta entšanga mondmëna mo chë benache juachañe yojuatquécjana jenaycá. Chëngna Bëngbe Bëtsabiamá soyënga jouenana; pero chora Satanás betscó jabana, chëngbe ainaniñe yojtsemna Bëngbe Bëtsabe palabra jabétsabuanama, chënga chiñe ndoñe chamondëtsošbuáchema. <sup>16</sup> Inye entšanga mondmëna mo chë ndëtšbenguiñe yojuatquécjana jenaycá; chëngna Bëngbe Bëtsabe palabra jouenana y oyejuayënga jtsemnana; <sup>17</sup> pero ndoñe nyets tempo chana jochájua; y chca, ndoñe baytë Bëngbe Bëtsáftaca ntjëftsemnëngana, ndoñe yapa tmonsasbuaché causa. Inyënga mochantsëbuayënja, y Bëngbe Bëtsabeñe betsošbuáchiyama mochanjasúfri-anga; chíyeca chënga Bëngbe Bëtsabe palabra cachcá mochanjesonýyaye. <sup>18</sup> Inyënga mondmëna mo chë uchmëshangañe yojuatquécjana jenaycá. Chënga Bëngbe Bëtsabe palabra mochanjouena, <sup>19</sup> pero quem luarentša soyëngaca oyejuayënga jtsemnana yapa mochántseboše, y nye bomnana jëftsebomnana yapa mochanjésenuabnaye. Chë soyama y inye ba soyëngama yapa enócochinýena causa, Bëngbe Bëtsabe soyëngama echantsebnëtjomba, y ndoñe quemochátama ntšamo Bëngbe Bëtsá tojayancá. <sup>20</sup> Pero



ínýenga mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; nyets ainánaca mochántseprontana chiñe jtsošbuáchiyama. Mo canýe betiye becá tsábá tojtseshajuancá, chënga bëtscá tsabe soyënga Bëngbe Bëtsabiana mochántsama. Inýenga ínýengbiana más bëtscá soyënga mochanjama; y chca, ínýenga mochántsemna mo chë unga bnëtsana meshe tojanshajo jenaycá, ínýenga mo chë chñénguana bnëtsancá, y ínýengna mo chë patse meshënga tojanboté jenaycá ca” —Jesús tojánayana.

*Chë uajuinýanëshama cuento*  
(Lc 8.16-18)

<sup>21</sup> Mëntsánaca Jesús tojánayana: “Ndocná juiyëbana canýe uajuinýanëshama cajonëshe o jutsnëshama tajsoye juajájuama. Ndoñe; uajuinýanëshama juiyëbana tsbanánoca juajájuama, lempe chaotsebínýnama. <sup>22</sup> Ndocna yoiytëmena soye ntjinýencá queochaisoquéda, y chë ndótatšëmbo soye ntsotatšëmbcá queochaisoquéda. <sup>23</sup> Chë jouenama tmojtsobenënga, šmochjouena ca.”

<sup>24</sup> Y mëntsánaca Jesús tojanéyana: “Tsábá šmochjájuaboye ntšamo šmojtsuenanama. Nýe batšatema šmojouenëse, nýe batšatema cmochanjósertaye; pero aíñe tsábá šmojouenëse, chama corente cmochanjósertaye; y Bëngbe Bëtsá echanjama tsëngaftanga más soyëngama chacmósertama. <sup>25</sup> Er nda Bëngbe Bëtsabe soyëngama tsábá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama josértama ndoñe tontsebošá, chë nýe batšá ibosertana soyëngama bochantsebnatjëmba ca” —cha tojánayana.

*Chë ojuajna jenayama cuento*

<sup>26</sup> Jesús mëntsánaca tojanéyana: “Bëngbe Bëtsabe amëndayana endmëna mo ntšamo canýe boyabása jénaye tojuatbontsá ora echandbopasacá: <sup>27</sup> masque cha cada ibeta jtsojájuana y bnëtë jotsbanama, ibeta o bnëtë, chë jénayentšana juabocnana y juájuana, ntšamo chca yojtsájuañnama chë boyabása ntjatstatšëmbcá. <sup>28</sup> Chë fshantse cachabe ponto jamana ndayánaca chiñe chaójuama; natsana tsbuanachëtëma jóbocnana, chentšana chë espiga, y chentšana chë meshënga jashájonana. <sup>29</sup> Y chë meshënga ya tojtsebóchichna orna, játbanama jabocnana, chë saná josháchiñama ora ya tojobuácheyeca ca” —Jesús tojánayana.

*Chë mostaztiye jenayama cuento*  
(Mt 13.31-32; Lc 13.18-19)

<sup>30</sup> Jesús mëntsánaca tojanéyana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenama? <sup>31</sup> Endmëna mo canýe mostaza jénaye jajoca tcojajecá. Ndegombre, nyetsca quem luarentša jenayëngama, mostaza jénaye chë más básëtema endmëna; <sup>32</sup> pero tcojajé orna, jójuana, y jajañe chë más bëts betiye jóbëmana, ba bëts buacuashëngaca; chíyeca chë jaja shloftšënga jana y chiñe uajajonëtëmëngá jauábopormana ca.”

*Ndayëca Jesús cuentëngaca entšanga yojanabuayiyná*  
(Mt 13.34-35)

<sup>33</sup> Chca Jesús Bëngbe Bëtsabe soyëngama entšanga yojanabuatambá, ba cuentënguentšana, mo chë tmonjouena cuentcá, ntsachëtšá chë entšanga josértama tmojobenacá. <sup>34</sup> Tondaye yonjanabuatambá ndoñe cuentëngaca ntsemëncá; pero chabe uatsjëndayëngna lempe yojanabuayiyná, cánýënga tmojtsemna ora.

*Jesús chë binýia y chë béjaye bonguana yojétsbema*  
(Mt 8.23-27; Lc 8.22-25)

<sup>35</sup> Cach te, yojtseibëtatana ora, Jesús chabe uatsjëndayënga tojanéyana: “Uafjónaye chenguana cuajna ca.”

<sup>36</sup> Chorna, chë entsänga jesabáshejuanëse, chë uatsjéndayënga Jesús tmojtsanánat-señe, cach yojánenjaquena barquëshañe; y inye entsángnaca inye barquëshangañe tmojanasto. <sup>37</sup> Chentshana, chë uafjajónaye béjayañe tša jabuache binýia yojóshjango; olëshënga chë barquëshá imojtsétsbotsana, y chë causa chë barquëshá yojóntša búyeshéca jtsobuajútjiana. <sup>38</sup> Y chëntscuana, barquëshá stëtsoica, tsëntshenëshañe Jesús yojtsomañe. Chora chë uatsjéndayënga tmojtsanfshená y tmojanianyana: —¡Buatëmbayá! ¿Tondayana cmontsentšamna bënga chašotsënatjëmbama ca?

<sup>39</sup> As Jesús tojantsbaná, chë binýia tbojanácacana, y chë bëts uafjajónayoye tojánayana: —¡Natjëmbana cochtsemnal ¡Bonguana ca!

Y cachora chë binýia yojëtstëcja, y lempe bonguana yojtsatsmëna. <sup>40</sup> Chora chabe uatsjéndayënga tojanéyana: —¿Ndáyeca tša šmojtsauatja? ¿Bëngbe Bëtsá tsëngaftanga jujabuáchama yobenama cabá ndoñe šmontsošbuaché ca?

<sup>41</sup> Chama, chënga puerte auatjanánënga imojtsemna y mëntšá imojtsenatsëtsnaye: “¿Nda quem boyabása yomna? Cha tonjayana y chë binýia y chë béjaye tmonjoyeuná ca.”

## 5

### *Chë Gerasa luaroca bacna bayëja uambayá*

*(Mt 8.28-34; Lc 8.26-39)*

<sup>1</sup> Chentshana, uafjajónaye chenguánoica tmojánashjajna, Geraseno ca uabaina entsangbe luaroye. <sup>2</sup> Jesús barquëshoicana tojánastjango, y cachora, chë obanëngbe cuevëshënguentshana canýe entsá, bacna bayëjbe juabna uambayá, tojánbocna y tbojanjéngö. <sup>3</sup> Chë boyabásana, obanëngbe cuevëshënguenache inoyena, y ndocná yonjobena cha jtsebátsëcana, ni mo cadenëjuangaca; <sup>4</sup> er ba soye cadenëjuangaca y inye soyëngaca cha nyetsá tmojanbatsëca, pero cha nyetsca soye yojtsátabebe y yojtsenájaca, y ndocná yonjobenaye cha bonguana chaotsemnama. <sup>5</sup> Nyets tempo, bnëté y íbeta, obanëngbe cuevëshënguenache y tjañenache yojánana yoye, y ndëtšbëngaca enotsetshenaye. <sup>6</sup> Jesúsbiyoe bënocana tbojáninye ora, chábioyoe tojanótjajo y chabe natsanoica yojshëntsamentšiyë; <sup>7</sup> y mëntšá yojtsáyebuache: —¿Ndayá átšeftaca cojtseboše, Jesús, celoca Bëngbe Bëtsabe Uaquiñá? ¡Bëngbe Bëtsabe delante cboimpadá, ndoñe šcatjatsëšená ca!

<sup>8</sup> Chca tbojanianyana, er Jesús chábioyoe tbojanianyana: —¡Bacna bayëjbe juabna, chábentšana maisebocna ca!

<sup>9</sup> Chentshana Jesús tbojantjá: —¿Ntšamo cabaina ca?

Y chë bacna bayëjëngbe juábnaca cha tbojanjuá: —Atšna Legión ca sënduabaina, bëtsçanga fsëndmëna causa ca.

<sup>10</sup> Y tša Jesús ibojtserruana chë luarentšana ndoñe chaondëtëbuacanama. <sup>11</sup> Chentša béconana ba cotšënga imnajena, batsjoca imnëtsosañe; <sup>12</sup> as chë bacna bayëjënga Jesúsbiyoe tmojanimpadá: —Chë cotšëngbiyoe šmichamó, chëngbeñe fchayamashjna ca.

<sup>13</sup> Y Jesús aíñe tojanalesenciá; as chë bacna bayëjënga chë entsábentšana tmojésanbocana y chë cotšëngbeñe tmojánamashjna. Cachora chë mo uta uaranga cotšënga batsjocana peñëšëjana uafjajónayoye imojtsoshbuetše y yojtsatajo.

<sup>14</sup> Chora, chë cotšënga anýenënga tmojtsanacheta auatjanánënga, y tmojána chama jacuéntama chë puebloca y chabuenache; y entsänga tmojánabo ntšamo tojanopasacá jinýama. <sup>15</sup> Jesús yojtsemnoyoye chë entsänga tmojánashjajna ora, tmojáninye chë tempo bacna bayëjënga uambayá, inëtsoibemañe, entsáyá uichëtjoná y chabe nyets juábnaca. Y chë entsänga chama imojtsëuatjaná. <sup>16</sup> Chë tmojáninyënga imojtsecuëntayey, ntšamo chë bayëjbe juabna uambayáftaca tojanopasama, y chë cotšëngaftaca ntšamo tojanopasámnaca. <sup>17</sup> Chora chë entsänga tmojanontšé Jesús impadánana chë luarentšana chaotsatoñama.

<sup>18</sup> Jesús chë barquëshoye tojtanášengo ora, chë tempo bacna bayëjbe juabna uambayá tbojanimpadá chabolesenciá cháftaca jama ca. <sup>19</sup> Pero ndoñe tbonjanlesenciá, sínó mëntšá tbojaniana: “Acbe yebnoye motsatoñe, acbe pamíllangbioye, y cochjácuntaye ndayá Bëngbe Utabná ácaftaca tojamama, y ntšamo cha ácbioye tcmojalastemama ca.”

<sup>20</sup> Chentšana, chë entšá yojtsatoñe y tojanontšé Decápolis uabaina pueblënguenache jacúntana lempe ntšamo Jesús cháftaca tojanmca; y nyetscanga imojtsenjnanaye.

*Jesús canye shembásabioye tbojanshná y Jairëbe bembetëmbioye tbojtananená*  
(Mt 9.18-26; Lc 8.40-56)

<sup>21</sup> Chentšana, Jesús cachiñe chë uafjónaye chenguana tojesaná barquëshañe. Chocna ba entšanga tmojanobuashconá, y Jesús chë uafjónaye tsachañe yojtsemna. <sup>22</sup> Chorna, tojánashjango chë judiëngbe enefjuana yebnentša canye mandayá, Jairo ca uabainá. Jesúsbioye tbojáninye ora, chábentše tojanoshëntsamentšé, <sup>23</sup> y tša ibojtseimpadana, mëntšá: —Atšbe bembetema ya echantsóbana; Diosmanda mabo, acbe cucuatšënga chábeñe cochjájajua, salud chauatinyenama y cháuatayenama ca.

<sup>24</sup> As Jesús cháftaca tojána; pero bëtsca entšanga imojtséstona, chábioye imojtsenatsëntšenaye. <sup>25</sup> Chë entšanguentše yojtsaye canye shembása šocá; cha ya bnétsana uta uata oboftjajuanánaca inapadecena. <sup>26</sup> Cha puerte tojansufrí, ba ashnayëngbe cucuatšëñe, y lempe ntsachetšá inabomncá tojanpochocá jenóshnama; pero ndoñe ibontsatstécacjana, nye más peor ibojtsobiamnaye. <sup>27</sup> Chë shembása vojouena ntšamo Jesús ba šoquënga tojánashnama, y as stëtšoicana entšangbe tsëntsajana vojobeconá, y Jesusbe entšayá yojauábojajo. <sup>28</sup> Cha chca tojanma, er yojtsejuabnaye: “Masque nye mo chabe entšayá sibiájua chajjuábojajo, y salud chantsatsbomna ca.” <sup>29</sup> Y cachora chë oboftjajuanana ibojtsobojuána; y chabe cuerpiñe ibojebiónana ya tšabá yojtsatsmënama. <sup>30</sup> Chora Jesús yojasëntia chábentšana obenana yojóbocnama, mo ndábioye tbojashná orca; as cha tojanobuértana entšangbeñe y tojanatjá: —¿Nda atšbe entšayá tojuabojajo ca?

<sup>31</sup> Chabe uatsjëndayënga tmojanjuá: —Aca contsonjá chë entšanga cmontsat-sëntšená, y cabá cochjátsnoticiaye nda entšayá tojuabojajo ca.

<sup>32</sup> Pero Jesús cátoye yojtserreparana jinýama nda tbojánbojajuama. <sup>33</sup> As chë shembása, chë ntšamo cháftaca yojopásama jtsetatšëmbëse, tojanobeconá ngmëmnyá y auatjananá, chabe natsanoica tojanoshëntsamentšé, y lempe ntšamo ndegombre cháftaca tojanopasacá Jesúsbioye tbojaniana. <sup>34</sup> Chora Jesús tbojaniana: —Bembe, Bëngbe Bëtsábeñe icošbuachéyeca shnaná contsatsmëna. Natjëmbana motsatoñe; acbe šocana tontsopochocá ca.

<sup>35</sup> Jesús cabá yojtsóyebuambnantscuana, bášeftanga tmojánashjajna chë judiëngbe enefjuana yebnentša mandayabe yebnocana, y chë shembásetembe taitá tmojaniana: —Acbe bembe tontsóbana; ¿ndayama más Buatëmbayá chama cochjátebëyaboma ca?

<sup>36</sup> Y Jesús, ntšamo chënga imojtsichamcá ntjatuenancá chë judiëngbe enefjuana yebnentša mandayábioye tbojaniana: —Ndoñe matauatjana. Nye Bëngbe Bëtsábeñe cochtsošbuáchiye cha tšabá chaotsatsmënama ca.

<sup>37</sup> Y Jesús ndoñe tonjanalesenciá Jairëbe yebnoye banga chamuastama; nye Pedro, Santiago y Juan, Santiagbe uabentsana, aíñe. <sup>38</sup> Chentšana, chë mandayabe yebnoye tmojánashjajna ora, Jesús tojánanye entšanga tša imojtsenbouenana, entšanga imojtsošachiye y puerte ngménaca imojtseyoye. <sup>39</sup> As chë yebnoye tojánamashëngo y chë entšanga tojanényana: “¿Ndayama tša šmojtsenbouenana y tša šmojtsendëntjana? Chë shembásetema ndoñe chenatóbana, nye endëtsomañe ca.”

<sup>40</sup> Pero entšanga nye imojtsáfchaye. As Jesús nyetsca entšanga shjoye tojtanébuacna, y tojëftsanébiatše chë basetembe bëtsétsata y chabe enutënga; y chë shembásetema yojtsemnoye tojánamashëngo. <sup>41</sup> Chora Jesús tbojanábuacueshache y cachëngbe biyañe tbojaniana: “Talita, cum ca.” (Chca endayana “Shembásetema, matëtsbaná ca”.)

<sup>42</sup> Cachora, chë bnétsana uta uata bomna shembásetema tojtantsbaná y yojtsobena jama. Y chë entsánga chama imojtsenjnanaye. <sup>43</sup> Pero Jesús corente tojanamëndá ndocnábeñe chama ntsecuéntayana ca, y tojanamëndá chë bássetema saná chamuiyé chaosama.

## 6

### *Jesús Nazaret puebloca* (Mt 13.53-58; Lc 4.16-30)

<sup>1</sup> Chentšana Jesús tojéftsanbocna y cachabe luaroye tojtanashjango, y chabe uatsjéndayënga cháftaca tmojána. <sup>2</sup> Ochnayté tojanobuache ora, Jesús tojanontsé chë judiëngbe nefjuana yebnentše entsánga jabuátambana.

Chë ba entsánga cha jóyebuambayama tmojanuenënga, imojenjnaná y tmojánayana: “¿Ndémoca quem boyabása lempe chca tojuatsjinýe? ¿Ndaye osertánana mua tmojatšetá, y ntšámoyeca cha yojtsobena chca bëts soyënga jtsamana ca? <sup>3</sup> ¿Mua ndoñe chë calpintero yondmëna, Mariybe uaqiñá, y chabe catsátanga ndoñe mondmëna Santiago, José, Judas y Simón; y chabe uabénangnaca muentše ndoñe béngaftaca mondoyena ca?” —chënga imojtsichamo.

Chë causa chënga tmojanotjyaná, y ndoñe montseboše joyeunayana. <sup>4</sup> As Jesús tojanéyana: “Nýetsca luarënguenache canýe Bëngbe Bëtsabe juabna oyebuambnayábioye bëtsá jabemana, pero ndoñe chca cachabe luarentše, ni cachabe pamíllangbenache, ni cachabe yebnentše ca.”

<sup>5</sup> Chë entsánga chentše chábeñe ndoñe montsanošbuaché causa, Jesús ndoñe tonjanobená ni canýe bëts soye Bëngbe Bëtsabe obenánaca chentše jéftsemana; nýe básefta šoquëngbeñe cucuatšënga tojanajó y tojanashná. <sup>6</sup> Jesús ojnananá yojtsemna cachábentša entsánga chábeñe ndoñe montsanošbuaché causa.

### *Jesús, chabe uatsjéndayënga tojanichamó Bëngbe Bëtsabe amëndayama jábuayenama* (Mt 10.5-15; Lc 9.1-6)

Chentšana, chë chaboye base pueblënguenache Jesús yojánana, Bëngbe Bëtsabe soyëngama abuátambaye. <sup>7</sup> Y chë bnétsana uta uatsjéndayënga Jesús tojánachembo, y utáta ínýoye tojanichamó, entsángbentšana bacna bayëjënga jtëbuacnama obenana jatšatayëse; <sup>8</sup> y mëntšá yojáuyana: “Benachiñama tondaye šmattsambaye, nýe canýe jatjonëfja; ndoñe šmattsambaye saná, ni shecnaja, ni crocénana uasnanëchiñe. <sup>9</sup> Nduámanëshe šmochjesóshecochëtjo, y nýe canýájua šmochjesíchëtjo ca.”

<sup>10</sup> Mëntšánaca tojanéyana: “Posada chacmojúyentšame yebnentše šmochtsoquedañe inýe puebloye játantscuana. <sup>11</sup> Canýe luaroye chašmojáshjajna y ndocná posada chacmonjuyentšame, y joyeunayama ndoñe chamontsebošëse, chentšana šmochjésebocana, y shecuatšentša polvëshe šmochjésenstoto, chca, chëngbioye jinýanýiyama chënga ndoñe tšabá tšëngaftangaftaca tmonjamama ca.”

<sup>12</sup> Chentšana, chë uatsjéndayënga tmojéftsanbocana y entsánga imojánabuayinaye, chë tšabe benache chámuatishachama, bacna soyënga amana jtsajbanase. <sup>13</sup> Entšángbentšana ba bacna bayëjënga tmojtanëbuacna, y ba šoquënga aceitíyeca tmojananëttojto y tmojanashná.

### *Ntšamo Juan chë Ubayaná tojanóbana* (Mt 14.1-12; Lc 9.7-9)

<sup>14</sup> Rey Herodes Jesusbiana yojátatšëmbona, er nýetsquénache nýetsca entsánga chabiana imojtsóyebuambnaye. Entšanga Jesusbiana imojtsichamo: “Juan chë Ubayaná obanënguentšana tojtayena, chíyeca cha chca obenana yojtsebomna ca.”

<sup>15</sup> Inýengna imojtsichamo: “Cha entsemna chë Bëngbe Bëtsabe juabna oyebuambnayá Elías ca.”

Y ínÿengna: “Muana canÿa Bëngbe Bëtsabe juabna oyebuambnayá, mo chë temp-squëngcá ca.”

<sup>16</sup> Heródesna ntšamo entšanga Jesusbiamá imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotsëstjanguamá, mora obanënguentshana tojtayena ca.”

<sup>17</sup> Juan cabá ainá ora, Herodes tojanmandá cha chamishache, cadenéjuangaca chamobátsëca y chca cárceloje jutámiamá. Herodes chca tojanma Herodíasbe causa, chabe uabentsá Felipebe shema. Herodes chë shémaftaca tojanobouamá, Felipe cabá ainá ora. <sup>18</sup> Y chama, Heródesbioye Juan ibojánbuayiynaye: “Ndoñe quenátslesenciana acbe uabentsabe shema acbe shema chaotsemnama ca.”

<sup>19</sup> Chë causa, Herodías Juánbioye puerte ibojuáya, y yojánboše jtsóbama; pero ndoñe yontsobena, <sup>20</sup> er Herodes yojántatšëmbo, Juan canÿe nÿetsca soyënguiñe tšabá amá, nÿe Bëngbe Bëtsábioye sempre oservená inamnama. Chama cha yojánauatja y ndoñe yon-janalesencia cha chamóbama. Y Juan Bëngbe Bëtsabe soyëngama Heródesbioye tbojtse-buayiyná ora, ntšamo jajuaboyana ndoñe yontsetátšëmbo, pero masque chca, oyejuayá Juánbioye ibnayeunana. <sup>21</sup> Pero Herodías tojáninÿena mocna ora Juan chamóbama. Heródesbe cumpleño oboyejuaye ora, bëtscá saná tmojanprontá, y Herodes yojúbuaja chabe amëndayënga, soldadëngbe amëndayënga y Galileoca uámana entšanga. <sup>22</sup> Chora, chë oboyejuaye luaroye Herodíasbe bembe tojánamashëngo, tojanlantsá, y Herodes y nÿetsca ófjanënga chama tša imojtsóyejuaye. As chë rey, chë tobiášbioye tbojaniyana: —Ndayánaca šmotjañe y atše cbochjátšetaye ca.

<sup>23</sup> Y jajúrase, mëntšá tbojanšbuachená: —Ntšamo chašcojotjañcá cbochjátšetaye, masque atšbe amëndayentša bomnanentšana tséntsañnaca ca.

<sup>24</sup> Chentšana, chë tobiáše yojéftsebozna y chabe mamábioye ibojatjaye: —¿Ndayá chjotjañe ca?

Y chabe mamá ibojojuá: —Juan chë Ubayanabe bestšaše ca.

<sup>25</sup> Cachora chë tobiáše betscó chë rey yojtsemnoye tojtanamáshëngo, y tbojaniyana: —Atše séntseboše, cam ora Juan chë Ubayanabe bestšaše canÿe šcnenëšiñe chašcuatšeta ca.

<sup>26</sup> Herodes chama corente tbojanongmé, pero chë entšangbe delante y jajúrase tbojanšbuachená causa, ndoñe yonjobenaye ntšamo tbojaniyancá jebëbuetámenana. <sup>27</sup> Cachora chë rey canÿe soldado ibojíchnua, Juanbe bestšaše chauiyëbama. <sup>28</sup> As chë soldado cárceloje tojána, Juánbioye bestšaše tbojtsanéstjango, y canÿe šcnenëšiñe tojanamba. Chë tobiášbioye tbojanëntšabuaché, y chana, chabe mamábioye.

<sup>29</sup> Juanbe ústonënga chama imojátatšëmbona ora, choye tmojánashjajna, chabe cuerpo tmojésanocñe y jauátbontsama tmojána.

*Jesús shachna uaranga boyabásenga saná tojanacaredadó  
(Mt 14.13-21; Lc 9.10-17; Jn 6.1-14)*

<sup>30</sup> Chë Jesús tojánichamonga chábioye tmojtjanashjajna ora, lempe ntšamo tmojan-mama y tmojanabuatambama cha tmojancuentá. <sup>31</sup> Chora Jesús tojanéyana: “Cuajna ínÿoye, entšanga ndoyena luaroye, batšatema jóchnama ca.” Cha chca tojánayana, er tša entšanga imojtsaye y imojtsabëbana; ni mo jasama ndoñe luare imontsebozna.

<sup>32</sup> As cánÿenga barquëshañe tmojtsanoñe, entšanga ndëbínÿnoye. <sup>33</sup> Pero chënga imojtsoñama entšanga tmojánanye, y ndëmuanÿenga imojamnama imojtsetátšëmbo; chcasna, chë entšanga shecuátšeca betscó tmojána, nÿetsca pueblënguentshana, y chëngbe natsana choye tmojánashjajna. <sup>34</sup> Chentšana, chë barquëshoicana tojánast-jango ora, Jesús ba entšanga tojánanye; chëngbiamá tbojanongmé, er imojtsemna mo abujénÿa ndbomna oveshëngcá; y tojanontsé ba soyëngama jajuátambana.

<sup>35</sup> Ya jetiñe yojtsemna orna, chabe uatsjéndayënga tmojanobobeconá y tmojanianyana: —Ya jetiñe entsemna, y quem luariñe ndocná quenatinyena. <sup>36</sup> Entšanga cuantichamuá, pueblotémëngoye y inye luarëngoye chamotsoñama, ndayánaca jasama chamobuámiñama ca.

<sup>37</sup> Y Jesús tojanéyana: —Tšëngaftanga saná chëngbioye šmochjacaredádaye ca.

Chora chënga tmojanianyana: —Crocénana queftsátsbomna, uta patse denario nyetšá, chëfta entšangbiama saná jabuámiyama ca.

<sup>38</sup> As Jesús tojanéyana: —¿Bueta tandëše šmojtsebomna? Marrepárange ca.

Ya imojtsetátšëmbo ora, tmojanianyana: —Shachna tandëše y uta beónata fséntsebomna ca.

<sup>39</sup> Chora Jesús entšanga tojanamëndá ínÿoca ínÿoca chamoshéntsjatbiamama. <sup>40</sup> As chënga tmojanotbiama patse patsënga y shachna bnëtsátsanënga. <sup>41</sup> Chora Jesús chë shachna tandëše y chë uta beónata tojanca, y celoye jontjesiyëse, Bëngbe Bëtsábioye chama tbojtanchuá. Chentsana chë tandëšënga tojanjatá y chabe uatsjéndayënga tojanayentšbuaché chë entšanga jatšatayama. Y chë uta beónatnaca nyetscanga tojanëjáyate. <sup>42</sup> Nyetscanga tmojanse jtoshachaye nyetšá. <sup>43</sup> Y chentsana, chë tandëše y chë beonentsana ojamnëtmënga tmojanatbaná, y bnëtsana uta sbarécua tmojanajutjé. <sup>44</sup> Chë saná tmojansënga imojamna shachna uaranga boyabásenga, shembásenga y básenga ntjacuntacá.

#### *Jesús béjaye juatsbuacá yojtsaye*

*(Mt 14.22-27; Jn 6.16-21)*

<sup>45</sup> Chentsana, Jesús chabe uatsjéndayënga tojanamëndá chë barquëshoye jtašjnama, chë uafjónaye chenguana jangana y chabe natsana Betsaida ca uabaina puebloca jashjajnana. Chënga imojtsebocanëntscuana, Jesús chë entšanga yojtichamuá. <sup>46</sup> Nyetscanga tojtanadiošoftá ora, tjoye cha tojtsanoñe Bëngbe Bëtsáftaca jencuëntama.

<sup>47</sup> Yojtseibétatana ora, chë barquëshu uafjónaye tsëntsaca yojtsamna, y Jesús, canya fshantsoca. <sup>48</sup> Jesús tojáninÿe chëngbiama totcá yojtsemna, chë barquëshaca natsanoye jtsayana, er binÿia chëngbe contra yojtsemna. Ya binÿana ora, chëngbioye yojbeconá, béjaye juatsbuacá yojtsaye, y ya chëngbiajana nÿe ndericho jachnënguama yojtsemna. <sup>49</sup> Y chënga, chë béjaye juatsbuacá cha yojtsayama tmojáninÿe ora, tmojanjuabó cha canÿe añemëse yojtsemna ca, y tmojanontšé yoyana; <sup>50</sup> er nyetscanga chca tmojáninÿe y cochautjanánënga imojtsemna. Pero Jesús cachora tojanéyana: “¡Añemo šmochtsebomna; atše Jesús sëndmëna; ndoñe matauatjëngana ca!”

<sup>51</sup> Chorna, chënga imojtsemna barquëshoye cha tojánasëngo, y chë jabuache binÿia tojanëjbana, y nyetscanga puerte auatjanánënga y ojnanánënga imojtsemna. <sup>52</sup> Chënga tmojáninÿe chëfta entšanga tandëše jujátayana, pero chëngbe ainanoca cabá ndoñe imontsobena josértana, Jesús lempe jamama obená bëtsemnama.

#### *Genesaret ca uabáinoca Jesús ba šoquënga tojanashná*

*(Mt 14.34-36)*

<sup>53</sup> Chë uafjónaye tmojánenashbuachengo ora, Genesaret ca uabaina luaroye tmojánashjajna, y chë uafjónaye tsachoca chë barquëshu tmojanétsbua. <sup>54</sup> Chë barquëshoicana tmojánastjajna y cachora entšanga Jesús tmojantëmbá. <sup>55</sup> Chíyeca, chë luariñe yebnënguenache betscó chënga tmojána, y tmojanontšé chë šoquënga tjuashënguiñe juyambana, chë ndëmoye tmojanuena Jesús yojtsemna luaroye. <sup>56</sup> Y ndayentšé cha tojámashëngüentšé, pueblënguiñe, bëtscó pueblënguiñe y base pueblotémënguiñnaca, chë šoquënga benachoye imojtsëbuacana, y Jesús corente imojtseimpadana chë šoquënga chaualesenciá, nÿe mo chabe entšayá sibuájua juabojajuana. Y nyetscanga tmojuábojajënga tšabá imojtsatsmëna.

## 7

*Ndáyeca canye entsá Bëngbe Bëtsabe delante ndoñe tšabia nántsemna*  
(Mt 15.1-20)

<sup>1</sup> Chentšana, fariseunga Jesúsbioye tmojanobeconá y báseftanga ley abuatambayëng-naca, Jerusalenocana áshjajnënga. <sup>2</sup> Chënga tmojáninýe básefta Jesusbe uatsjëndayënga, cabá ndase ora, ndoñe montsacuentšabiá ntšamo chë judiënga imojanamancá. <sup>3</sup> Er chë fariseunga y nyetsca judiënga imojanamana jtsacuéntšabiana ba soye, ndayá jasama ora, ntšamo chëngbe bëts taitanga imojanamancá. Chënga imojanjuabná, chca jtsamëse Bëngbe Bëtsabe delante tšábenga jtsatsmënema ca. <sup>4</sup> Chë sananga enocana tmojtashjango ora, ba soye ndoñe tmontsácuentšabese, tondaye ntjasana; y ba soyëngnaca imojánama, pero nýe chëngbe bëts taitanga chca jamana imojanamánayeca, mo chë béjayeca juabáyana tazëšënga, matbajënga, calderëshënga y jutsnëshangá. <sup>5</sup> Chë causa, chë fariseunga y chë ley abuatambayënga Jesús tmojantjá: —¿Ndáyeca acbe uatsjëndayënga ndoñe montsama ntšamo bëngbe bëts taitanga monjanamancá, y montsesá ntsacuéntšabiase, ndoñe ntšamo bënga judiënga fsënduamancá, Bëngbe Bëtsabe delante tšabá jtsatsmënema ca?

<sup>6</sup> Chora Jesús tojanéyana: —Nýe tšabá chë Bëngbe Bëtsabe juabna oyebuambnayá Isaías tšëngaftangbiama tojánayana, bacna entsanga chë ntšamo ndegombre šmojuabnací ndinýinýayënga ca, mëntšá enduabemanentše: Quem entsanga mondbétsichamo Bëngbe Bëtsá tša tšabia yomna ca; chca nýe uayásaca, pero chëngbe ainanentše ndocna tšabe juabnéngaca.

<sup>7</sup> Pero chënga nýe bonamente mondbétsichamo Bëngbe Bëtsá tša tšabia yomna ca; chënga nýe entsangbe mandënga jtsabuátambayana, y Bëngbe Bëtsabe mandënga ndoñe ca —cha tojánayana.

<sup>8</sup> Chora Jesús tojanéyana: —Ntšamo Bëngbe Bëtsá tojanmandacá stëtsoye tšëngaftanga šmojtsequedá, nýe ntšamo entsanga monduamancá jtsamama ca.

<sup>9</sup> Y mëntšánaca tojanéyana: “Tšëngaftanga ntšamo Bëngbe Bëtsá tojanmandacá stëtsoye jtsequédana, nýe ntšamo tšëngaftangbe anteunga imojanamancá jtsamama. Tšëngaftanga jtsejuabnayana tšabá šmojtsama ca chca šmojtsama ora. <sup>10</sup> Moisés tonjánayana: ‘Acbe bëtšétsata ndoñe stëtsoye catjáquedaye’, y ‘nda chabe bëtšétsatbiama ndoñe tšabá tonjoyebuambá chana, jóbanama jtsemnana ca.’ <sup>11</sup> Pero tšëngaftanga šmondbétsichamo, canye entsá yobena chabe taitá o chabe mamá jáuyanana: ‘Lempe séndbomna soyënga corbán entsemna, chíyeca ndoñe quetsátobena juajabuáchana ca’ (corbán endayana “Bëngbe Bëtsabiana uátšëmbona soyënga ca”). <sup>12</sup> Tšëngaftanga šmondbétsichamo, nda chca tojayanëse, ya ndoñe obligaciónaca ntsemnana chabe taitá o mamabiana ndayánaca jamama ca. <sup>13</sup> Chca, tšëngaftanga šmontsama entsanga Bëngbe Bëtsabe palabra stëtsoye chamoquedama, mo tondaye tontsamancá, chë cuenta jtsamama ntšamo anteunga imojanamancá, ntšamo entsángbeñe tempscana y méntscóñama yochnéjuancá. Y ba soyënga tšëngaftanga cachcá šmontsama ca” —Jesús tojánayana.

<sup>14</sup> Chora Jesús, cachiñe entsanga tojtanachembo y tojanéyana: “Nyetscanga šmochjouena y chacmësertá. <sup>15</sup> Ndayá entsá tojtsesacá, ndoñe ntjábemana ndoñe tšabia Bëngbe Bëtsabe delante. Inýetšá comna: ntšamo entsá tojtsejuabná y tojtsoyebuambnací endobena jabemana ndoñe tšabia Bëngbe Bëtsabe delante. <sup>16</sup> Chë jouenama tmojtsobenënga, šmochjouena ca” —cha tojánayana.

<sup>17</sup> Jesús entsanga tojéftsanabashejuana y yebnoye tojtanamáshëngo ora, chabe uatsjëndayënga tmojantjá ntšamo cha tojánayanama. <sup>18</sup> As cha tojanéyana: “¿Tšëngaftangnaca cabá ndoñe cmontsésertana ca? ¿Cabá ndoñe cmontsésertana, lempe ntšamo entsá tojascá ndoñe ntsobenana chábioye jabemana ndoñe tšabia Bëngbe Bëtsabe delante; <sup>19</sup> er ainanoye ndoñe ntjómashënguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana njetsca sananga tšabá jasama yomna ca y chë saná ndoñe ntjamana canye entšá bacna soye chaotsamama ca. <sup>20</sup> Y mëntšánaca tojánayana: “Ntšamo chë entšá tojtsejuabná y tojtsoyebuambnacá, chë soye cocayé endobena entšá jabemana ndoñe tšabia Bëngbe Bëtsabe delante. <sup>21</sup> Er ainanocana jtsóbocanana bacna juabnënga: shembásaftaca o boyabásaftaca bacna soye jamama, jatbëbama, jóbama, <sup>22</sup> bacna juabnënga boyá o shémbioye ínÿaftaca jáingñama, jtsatbomnayama, njetsca bacna soyënga jamama, ínÿenga jáingñama, nye cachá jenomándama ntsobencá jt-siyenama, ínÿabioye jtsántšabošama, ínÿabiama jtsayátsenayama, jtsenábotamnayama y nye opënga jtsobiamnayama. <sup>23</sup> Njetsca quem bacna soyënga entšabe ainanocana jóbocnana, y cha jabemana ndoñe tšabia Bëngbe Bëtsabe delante ca” —cha tojánayana.

*Canye shembása inÿe luarocana ashjargoná Jesúsbeñe yojtsošbuaché*  
(Mt 15.21-28)

<sup>24</sup> Jesús chentšana, Tiro ca uabaina luaroye tojtsanoñe, y canye yebnentše tojánamashëngo. Cha yojtseboše ndocná chama chaondétsetatšëmbuama; pero ndoñe yonjobenaye iytëmenana jatsmënana. <sup>25</sup> Y betesco, canye shembása, canye bembe bacna bayëjbe juabna uambayá ibnabomná, Jesusbiam a oyebuambnayana yojouena ora, chábioye tojánabo y chabe shecuatšentše tojanoshëntsamentšé. <sup>26</sup> Chë shembása ndoñe yonjamna judiá, sinó Sirofenicia luarocá. Tojánabo y Jesúsbioye tbojanimpadá chabe bembetëmbentšana bacna bayëja chabuatábocnama. <sup>27</sup> Pero Jesús tbojaniyana: —Atše šondmëna natsana judío entšangbiam chë soyënga jamana; chentšana cocayé chanjobenaye chca inÿe entšangbiam jamana. Atše acbiam, canye ndoñe judiá, soyënga stjämëse, nántsemna mo chë básengbe saná quešënga cuaftsëbuajocá ca.

<sup>28</sup> Y cha tbojanjuá: —Arseñor, chca jtsemnana. Pero chë quešëgnaca mondbase chë básenga tmojtsesá ora tmojatquécjanatemënga. Chcasna, Diosmanda átšnaca šmotsajabuache ca.

<sup>29</sup> As Jesús tbojaniyana: —Tšabá tcjayana; chcasna, acbe yebnoye motsatoñe. Chë bacna bayëja acbe bembetëmbentšana tonjësebozna ca.

<sup>30</sup> Chentšana, chë shembása chabe yebnoye tojtaná, y tbojáninÿena chë bembetema jutsnéshentše yojtsojájone, y chë bacna bayëja ya ndoñe chábeñe yontsemna.

*Jesús, canye boyabása tësmá y ndëbiábioye tbojanshná*

<sup>31</sup> Tiro pueblentšana Jesús tojéftsanbocna, y Sidón y Decápolis luarentša pueblënguëjana jachnënguse, Galilea uafjónayoye tojánashjango. <sup>32</sup> Cha chentše yojtsemna ora, chábioye tmojanánatse canye entšá tësmá y ndëbiá, y tmojanimpadá chabe cucuatšënga chë šocábeñe chaojájoma, chaboshnama. <sup>33</sup> Chorna Jesús entšangbentšana luaroye tbojanánatse, cánÿata. Chora chë šocabe matscuašoye ntšabuafjënga yojajué, cucuatšinë yojabuashëtjo, y chë šocabe bichtaja yojábojajo. <sup>34</sup> Chentšana, Jesús celoye tojanontješé, jabuache yojáshachna, y hebreo palabriñe tbojaniyana: “¡Efata ca!” (Chca endayana “¡Chacmotsauenana ca!”)

<sup>35</sup> Cachora, chë boyabásabe matscuaše tšabá yojtsatmëna y tšabá yojtsuenana; chë bichtaja tšabá yojtóbema y tšabá yojtsóyebuambnaye. <sup>36</sup> Y Jesús chë entšanga tojanamëndá chama ndocnábeñe ntsecuëntayana. Pero masque tša chama yojtsamëndaye, entšanga más chabiam a imojtsencuëntaye. <sup>37</sup> Chama chë entšanga puerte imojtsenjnanaye, y mëntšá imojtsichamo: “¡Lempe tšabá entsama! Chë tësmënga chamouenama, y chë ndëbianga chamóyebuambama entsama ca.”



<sup>1</sup> Chë tempo, ba entsanga Jesúsbioye cachiñe tmojanobeconá, y jasama tondaye imontsebmoma. As Jesús chabe uatsjéndayënga tojánachembo y tojanéyana: <sup>2</sup> — Quem entsangbiamá šontsengmena, er ya unga te átšeftaca montsemna y mora jasama tondaye quemátsbmoma. <sup>3</sup> Cachëngbe yebnoye tondaye ntjascá stichamuase, shëntsama benachëjana nantsabuatëcja; y báseftanga bën luarocana tmojabo ca.

<sup>4</sup> As chabe uatsjéndayënga tmojanianya: —¿Ntšamo nda nanjobenaye quem luarentše, ndocna entšá ndoyenentše, chëfta entsangbiamá saná jinýenama ca?

<sup>5</sup> Chora cha tojanatjá: —¿Bueta tandëše šmojtsebmoma ca?

Y chënga tmojanjuá: —Canýsëftaše ca.

<sup>6</sup> Chentšana, Jesús tojanamëndá entsanga chamoshëntsjatbiamama. Chorna, chë canýsëfta tandëše tojanca y Bëngbe Bëtsábioye chama tbojtanchuá. Chentšana tojanjatá, chabe uatsjéndayënga tojanëjatá, y chëngna chë entsangbioye. <sup>7</sup> Básefta beonatémëngnaca imnabomna; as Jesús, Bëngbe Bëtsábioye chama tbojtanchuá y chabe uatsjéndayënga tojanamëndá entsanga jujátayama. <sup>8</sup> Nýetscanga tmojanse jtoshachaye nýetsá. Chentšana cabá canýsëfta bëts sbarécua tmojanajutjé chë ojamnëtémëngaca. <sup>9</sup> Chë tmojansënga imojamna mo canta uaranga nýetsá. Chentšana Jesús chë entsanga tojtanadiošoftá. <sup>10</sup> Chora Jesús barquëshañe tojánenojayiye chabe uatsjéndayëngaftaca, y tmojtsanoñe Dalmanuta ca uabaina luaroye.

*Chë fariseunga tmojánbošena, Jesús chaoma canýe bëts soye, chabe ndegombre obenana jinýama*

(Mt 16.1-4; Lc 12.54-56)

<sup>11</sup> Chentšana, fariseunga tmojánabo y tmojanontšé Jesúseftaca enatsëtsnayana. Y jisháchichiyama, imojtseimpadana canýe bëts soye chaoma, as jtsetatšëmbuama Jesusbe obenana Bëngbe Bëtsábioyana ndegombre tainóbocanama. <sup>12</sup> Y Jesús ngménaca, jabuache yojáshachnëse, mëntsá tojánayana: “¿Ndáyeca tšëngaftanga, chë mora oyenënga, šmojtseboše canýe bëts soye chaimama tšëngaftanga atšbe obenana jinýanjíyama ca? Ndegombre cbéyana, quem entsanga ndocna chca soye quemochátinýe ca.”

<sup>13</sup> Chorna chë entsanga cachcá tojesanënyá, chë barquëshoye yojtamáshëngo, y uafjajónaye chenguana yojtsoñe.

*Jesús tojanabuayená fariseungbe buatëmbana soyëngama*

(Mt 16.5-12)

<sup>14</sup> Chë uatsjéndayënga yojésebnëtjomba ndaye soye jasama jesocñama, y chë barquëshoye nýe canýe tandëše imojtsebmoma. <sup>15</sup> Jesús tojanéyana: —Šmochtsantješna; cuedado šmochtsebmoma fariseunga y Heródesbe levadurama ca.

<sup>16</sup> Chora chë uatsjéndayënga tmojanontšé enatsëtsnayana: —Chca entsichamo, bënga tandëše ndoñe tmonjesocñama ca.

<sup>17</sup> Jesús yojtsetátšëmbo, chabe uatsjéndayënga imojtsejuabnaye chana tandëšama yojtsëtsësnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyënga jtsamëse imojoyenama. Chcasna, mëntsá tojanéyana: — ¿Ndáyeca tandëšama šmojtsoyebuambná? ¿Cabá ndoñe cmontsésertana, ni šmontsetátšëmbo? ¿Ainanoca ndoñe šmontseboše chacmésertama? <sup>18</sup> Bominýe šmondobomna, pero ndoñe quešmátobena jinýana; jouenama šmondobena, y ndoñe quešmátuenana, y ndayá tijamama ndoñe quešmatsjuabná. <sup>19</sup> Chë shachna uaranga entsanga shachna tandëšentšana sënjanëjatá chentšana, ¿bueta sbarécua chë ojamnëtémëngaca šmënjanajutjé ca? —cha tojanatjá.

Y chënga tmojanjuá: —Bnétsana utácua ca.

<sup>20</sup> —Y chë canýsëfta tandëšentšana canta uaranga entsanga sënjanëjatá chentšana, ¿bueta bëts sbarécua chë ojamnëtémëngaca šmënjanajutjé ca?

Y chënga tmojanjuá: —Canÿsëftácuca ca.

<sup>21</sup> As Jesús tojanéyana: —¿Y cabá ndoñe cmontsésertana ca?

*Jesús canÿe jtanábioye tbojanshná, Betsaida puebloca*

<sup>22</sup> Chentšana tmojánashjajna Betsaida puebloca; y chora, entšanga canÿe boyabása jtaná Jesúsbioye tmojanánatse, y tmojanimpadá cha jabojuana chabotseshnama. <sup>23</sup> As, chë jtanábioye tbojanábuacueshache, y chë pueblo chaboye tbojanánatse. Chorna, yebuáyeca ibojabuchanëtjo, y chábeñe cucuatšënga yojajájua, y tbojantjá nderado ndayá jinÿama tayojtsanobena ca. <sup>24</sup> As chë jtaná yojontješiye y tojánayana: —Boyabásenga sentsénÿa; mo betiyëngcá montsemna, pero montsobonjná ca.

<sup>25</sup> Chora Jesús, chë jtanabe fšñeñe cachiñe cucuatšënga yojajájua. Y chë boyabása yojtsobena lempe tšabá jinÿama; ya shnaná yojtoquéda. Y yojtsobena nyetsca soyënga botamana jinÿana. <sup>26</sup> Chentšana, Jesús cachabe yebnoye tbojtanchimó y mëntšá tbojanayana: —Chë puebløye ndoñe catjëftsamashëngo ca.

*Pedro tojánayana, Jesús chë Cristo bëtsemnama*

*(Mt 16.13-20; Lc 9.18-21)*

<sup>27</sup> Chentšana, Jesús tojánbocna chabe uatsjëndayëngaftaca Cesarea de Filipo luaroca puablëngoye, y benachiñe chabe uatsjëndayënga tojanatjá: —¿Nda atše bëtsemnama ca entšanga imojtsichamo ca?

<sup>28</sup> Y chënga tmojanayana: —Inÿenga montsichamo Juan chë Ubayaná ca, ínÿengna Elías ca, y ínÿengna, canÿe Bëngbe Bëtsabe juabna oyebuambnayá ca.

<sup>29</sup> As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

<sup>30</sup> Chentšana Jesús corente chënga tojanamëndá, chë nda cha yojamnama ndocnábeñe ntsecuéntayana.

*Jesús tojánayana cha ibojamna jóbanana y jtsayenana ca*

*(Mt 16.21-28; Lc 9.22-27)*

<sup>31</sup> Y Jesús tojanontsé chabe uatsjëndayënga jabuátambana, cha, chë Bëngbe Bëtsá Entšá tbojanbemá, ibojamna puerte jasúfriana ca; chë judiëngbeñe bëtsëjemëngcá amëndayëngbiana, chë judiëngbe más uámana bachnangbe amëndayënga y ley abuatambayëngbiana uabotená jtsemnana ca. Entšanga mochjanóba, pero unga tianoye yochtanayena ca. <sup>32</sup> Nyetscanga catafjosertaycá chama yojtsóyebuambnaye. As Pedro, Jesúsbioye luaroye tbojanánatse, y tojanontsé jtsáuyanana. <sup>33</sup> Pero Jesús yojobuértana, chabe uatsjëndayënga tojanëñyanÿe, y Pédrëbioye mëntšá tbojtsanbochembo: “¡Satanás, átšbentšana mojuaná! Pedro, acbe juabnënga Bëngbe Bëtsábocana ndoñe quenatóbocana, sinó nÿe entšángbentšana ca.”

<sup>34</sup> Chentšana, Jesús chabe uatsjëndayënga y chë inÿe entšanga tojánachembo chamouenama, y tojanéyana: “Nda atšbe uatsjëndayá jtsemnama tojtseboše, cháuyana nÿe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonÿá atše juastama, y atšbiana jasúfriama chaotseprontana y cruciñe jobanámna. <sup>35</sup> Nda tojtsama quem luarentše bëtscá soyënga jtsebomnama y atšbiana jasúfriama ndoñe tontseprontana, chë nyetsca tescama yomna tšabe vida echanjopérdia. Pero nda quem luarentša soyënga cachcá tojëftsonÿá atše juastama, y chë tšabe noticiënga atšbiana abuatambaye causa, masque chaóbana, chë nyetsca tescama yomna tšabe vida echántsebomna. <sup>36</sup> ¿Ndayama entšá buanjósërvia nyetsca quem luarentša soyënga jtsebomnana, chë nyetsca tescama yomna tšabe vida tojtsoperdese? <sup>37</sup> Er canÿe entšá chë nyetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nyetsca tescama yomna tšabe vida jtsebomnama. <sup>38</sup> Chcasna, nda mora atšbiana y atšbe buayenana soyëngama tojtsëuatja

entsángbeñe, chënga chë Bëngbe Bëtsabiama nduauenanënga y bacna soye amënga, chë Bëngbe Bëtsá Entśá tbojanbemánaca chabiama echantsëuatja, chabe Taitabe bëts obenánaca y chabe angeléngaftaca chaojésabo ora ca” —cha tojanéyana.

## 9

<sup>1</sup> Mëntśánaca Jesús tojanéyana: “Ndegombre cbéyana, báseftanga muentşe montsemnënga ndoñe quemochatóbana, Bëngbe Bëtsá entsángbeñe chabe obenánaca jabomán-dama jabana ntjëftsinyá ca.”

*Jesús inyetsá tojanobinyá*

(Mt 17.1-13; Lc 9.28-36)

<sup>2</sup> Chentśana chnénguana tianoye, Jesús tojëftsanébiatşe Pedro, Santiago y Juan, y ínjoye tojanënatse nye chënga, canye bëts tjoye. Y chëngbe delante Jesús inyetsá tojanobinyá; <sup>3</sup> chabe uichëtjonëjuangá tša yojsabuashinyána; corente uafjantsëjuangá yojsamna; nya chca juafjantsama ndocná quem luarentşe quentatobenaye. <sup>4</sup> Chca orna, chë uatsjëndayënga tmojáninye, Moisés y Elías tbojanobinyá Jesúseftaca encuéntaye.

<sup>5</sup> Chora Pedro, Jesúsbioye tbojanianyana: “¡Buatëmbayá, tša tšabá bëngbiama cuanmëna muentşe jtsemnana ca! Mora fchanjapórma unga tambotëmënga: cányetema acbiama, inyetema Moisesbiama y inyetema Elíasbiama ca.”

<sup>6</sup> Chca tojánayana, chë uatsjëndayënga yapa auatjanánënga imojtsemna causa, y Pedro ndoñe yontsetátšëmbo ntšamo jayanana. <sup>7</sup> Chora canye jantsetëshe yojóbema, y chëngbiyoye yojáutsbotse; y chë jantsetëshoicana canye oyebuambnayana tojanóbocna, mëntśá: “Mua atšbe bonshana Uaquiñá endmëna; cha šmochtseyeunana ca.”

<sup>8</sup> Y ndeolpe, chëngbe shéconana tmojanrrepará ora, ya ndocná más tmonjáninye; nye Jesús canya chëngaftaca yojtsemna.

<sup>9</sup> Chë tjocana imojtsatstsmaye ora, Jesús chë uatsjëndayënga tojanamëndá: —Bëngbe Bëtsá Entśá tbojanbemá obanënguentsana candétayenëntscuana, chë mënté tjoca šmonjinye soyama ndocnábeñe šmattsecuéntaye ca.

<sup>10</sup> Chë uatsjëndayënga añe chca tmojanuena; pero chënga imojtsentjanaye ndayá cha yojsentsáyana, cha yochtanayena ca cha tojánayana ora. <sup>11</sup> Y Jesúsbioye imojtsetjanaye: —¿Ndayeca chë ley abuátambayënga mondbétsichamo, canmëna Bëngbe Bëtsabe Uámana Uabuayanabe natsana Elías jabana ca?

<sup>12</sup> As cha tojanéjua: —Ndegombre, canya Eliascá natsana echanjabo, y ntšamo jtsemnama yomncá lempe echánjabatsma. Pero ntšamo Bëngbe Bëtsabe uabemana palabrenguiñe endayancana, Bëngbe Bëtsá Entśá tbojanbemá puerte caochjasúfria, y ínÿenga puerte camochtsáboyënja ca. <sup>13</sup> Ndegombre cbéyana, canya Eliascá ya tonjabo, y cháftaca entsanga tmonjanma lempe ntšamo tmojabošencá, ntšamo chaochnënguama Bëngbe Bëtsabe uabemana palabrenguiñe endayancá.

*Jesús, canye basa bayëjbe juabna uambayábiyoye tbojanshá*

(Mt 17.14-21; Lc 9.37-43)

<sup>14</sup> Chentśana, chënga tmojtaná chë inye uatsjëndayëngbiyoye. Chora, Jesús tojáninye ba entsanga chë uatsjëndayëngbe shéconana imojtsemnama, y básefta ley abuátambayëngna chëngaftaca imojtsenatsëtsnaye. <sup>15</sup> Nyetsca entsanga cha tmojáninye ora, imojenjnaná y tmojanótjajo cha jachuayama. <sup>16</sup> Chora Jesús chënga tojanatjá: —¿Ndayama chëngaftaca šmenatsëtsná ca?

<sup>17</sup> Y canya entsanguentsá tbojanjuá: —Buatëmbayá, muentşe ácbioye sënjuánatse atšbe uaquiñá; bacna bayëjbe juabna entsambá, y chë causa, jóyebuambayama ndoñe quenátobena. <sup>18</sup> Nye ndayéntśnaca cha tojtsemnentşe, chë bayëja chábioyey jishachana y jtsenajuáchesënjana; chentşe uayoicana shashiye jtsabocanana, jtsenoftëšfjoynayana

y obanacá jtsatsjájonana. Acbe uatsjéndayënga sënjaïmpadá chë bacna bayëja chamu-atábocnama, pero ndoñe chematobená ca —cha tbojaniana.

<sup>19</sup> As Jesús tojánayana: —¡Nýetšá ndošbuáchiyënga ca! ¿Buetayté šojtsemna tsëngaftangaftaca jëftsemnana? ¿Buetayté uantado tsëngaftangaftaca chjëftsemna? ¡Moye chë básetema mánatse ca!

<sup>20</sup> Chora chë básetema chábioye tmojanánatse; y chë bayëja Jesúsbioye tbojáninye ora, tojanma chë basa ataque chaboshachama, y chë basa fshantsoye yojashajaye, yojtsojanduounaye y uayoicana shashiye yojtsábocana. <sup>21</sup> As Jesús chë básabe taitábioye tbojantjá: —¿Buetayté chca yojtsepása ca?

Y cha tbojanjá: —Bássetema orscana chca; <sup>22</sup> ba soye, chë bayëja chábioye iñoie jtsatmetšana y buyeshoye jtashbuetšana, jtsóbama. Chíyeca, nderado ndayá chabiama jamama tcojtsobenëse, bënga šmotsalastemá y šmotséjabuache ca.

<sup>23</sup> Chora Jesús tbojaniana: —¿Ndáyeca “ndayá jamama tcojtsobenëse ca” šcjauyana? Nda Bëngbe Bëtsábeñe tojtsošbuáchebiama lempe endopodena ca.

<sup>24</sup> Y cachora chë básabe taitá tojanáyebuachena: —Aíñe, Bëngbe Bëtsábeñe sëntsošbuaché; Diosmanda, ¡más jtošbuáchiyama šmajabuache ca!

<sup>25</sup> Y bëtsá entšanga imojtsójotoma Jesús tojáninye ora, chë bacna bayëja tbojtsanbochembo mëntšá: —¡Bacna bayëja, chë bássetema tësmá y ndëbiá biamnáyá; chábentšana maisebocna y ndocna te más chábeñe catjésamashëngo ca!

<sup>26</sup> Y chë bayëja chábentšana yojésebocna, yojtseyoye y chë básabioye jabuache ibojeshatiyiyé; y chë básana mo obanacá tojanoquedá, y chë causa banga imojtsichamo cha obaná yojtsemna ca. <sup>27</sup> Pero Jesús tbojanábuacueshache y tbojtanatsbaná; y chë básana yojtëtsaye.

<sup>28</sup> Chentšana, Jesús canye yebnoye tojánamashëngo, y chabe uatsjéndayëngna luaroca cha tmojantjá: —¿Ndáyeca bënga ndoñe fsënjobená chë bayëja jtabocnana ca?

<sup>29</sup> Y Jesús tojanéjua: —Chca bayëjënga jtëbuacanamna jobenayana nýe Bëngbe Bëtsáftaca jencuëntase, chabuájabuachama jaimpádase ca.

*Jesús cachiñe tojánayana cha ibojamna jóbanana y jtayenana ca*

*(Mt 17.22-23; Lc 9.43-45)*

<sup>30</sup> Chentšana tmojëftsanbocna ora, Galilea luarëjana imojtsajna; y Jesús yojtseboše chama ndocná chaondëtsetatsëmbuama, <sup>31</sup> er cha chabe uatsjéndayënga yojtsabuátambaye. Mëntšá cachabiama yojanëtsëtsnaye: “Bëngbe Bëtsá Entšá tbojanbemá entsangbe cucuatšíñe mochanjáboshjona; mochanjóba, pero chentšana unga tianoye echántayena ca.”

<sup>32</sup> Pero chënga ndoñe yontsósertana ntšamo Jesús yojtsanëtsëtsnacá, y chama jatstjanayamna chënga imojtsauatja.

*¿Nda chë más uamaná yomna?*

*(Mt 18.1-5; Lc 9.46-48)*

<sup>33</sup> Chora Capernaum puebloye chënga tmojánashjajna; y cach yebnentše imojtsemna ora, Jesús chë uatsjéndayënga tojanatjá: “¿Ndayama benachiñe šmabáyenatsëtsnaye ca?” <sup>34</sup> Chëngna nýe iytëca tmojanobiama, er benachëjana chënga imnayénatsëtsnaye, chënguentšá nda chë más uamaná bëtsemnama. <sup>35</sup> As Jesús tojanótbema, chabe bnëtšana uta uatsjéndayënga tojánachembo y tojanéyana: “Ndánaca nýetscangbiama chë más uamaná jtsemnama tojtsebošëse, cha chë más nduamaná chaóbema y nýetscanga chaotsaserverna ca.” <sup>36</sup> Chora Jesús canye bássetema tbojánishache, chëngbe tsëntsaca tbojanatsá, tbojantbá y chënga tojanéyana: <sup>37</sup> “Ndánaca, átšbeñe ošbuachiyá bëtsemnayeca, tbojofja canýa mo quem basetemcá, chana atše jofjana; y nda atše šojofja, chora cha nýe atše ndoñe ntjofjana, sinó chë šojichmó chábioynaca jofjana ca.”

*Nda ndoñe bëngbe contra tontsemná, bëngaftaca jtsemnana*

*(Mt 10.42; Lc 9.49-50)*

<sup>38</sup> Juan, Jesúsbioye tbojanianya: —Buatëmbayá, bënga fsënjinye canye boyabása, y cha aca jótšëmbonëse, bacna bayëjbe juabna entšangbentsana endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

<sup>39</sup> As Jesús tbojanjuá: —Ndoñe šmatjuauyaná; er ndocná quenátobena canye bëts soye jamana Bëngbe Bëtsabe obenánaca, atše jótšëmbonëse, y chentšana atšbe contra jatóyebuambnayana. <sup>40</sup> Ndegombre, nda ndoñe bëngbe contra tontsemná, bëngaftaca jtsemnana. <sup>41</sup> Y ndánaca, masque nye býeshtema tšëngaftanga tcmojubuatšatá, tšëngaftanga átšbenga bëtsemnayeca, chábioye Bëngbe Bëtsá canye uacanana soye bochantatšetaye, cha chë tšabe soye tojamama ca.

*Resjo yomna, nderado bacna soyënga cuanjama*

*(Mt 18.6-9; Lc 17.1-2)*

<sup>42</sup> Chentšana Jesús tojánayana: “Canya átšbeñe ošbuachiyábioye mo quem basetemcá, nda tbojaingñé atše ustonama chaotsajbanama, más tšabá chabiamana nántsemna canye bëts nantsnëbé chamotsetamosëntšbua y mar béjayoye asentoye chamotsashbuetše chabotsenatjëmbama. <sup>43</sup> Nderado acbe cucuatšëca bacna soye tcojama, más tšabá nántsemna chë cucuatše chacotsenacuéstjango. Acbiamana más tšabá endmëna celoye jamashënguana nyetsca tescama vida jtsebomnana, nye canye cucuatše bomná, y ndoñe nyets útátšëca infiernoye chacmotocá jama, chë ndocna te yochanjáfsana íñeshoye; <sup>44</sup> choca útšënga puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

<sup>45</sup> “Nderado acbe shecuaštëca bacna soye tcojama, acbiamana más tšabá nántsemna chë shecuaštë chacotsenashëcuástjango. Acbiamana más tšabá endmëna cosheto celoye jamashënguana nyetsca tescama vida jtsebomnana, y ndoñe nyets útátšëca infiernoye chacmotsëtšëna; <sup>46</sup> choca útšënga puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

<sup>47</sup> “Nderado acbe bomínycaca bacna soye tcojinye y cachca soye tcojama, más tšabá nántsemna chë bominye chacotsenobuchjásëca. Acbiamana más tšabá endmëna Bëngbe Bëtsabe amëndayoye jamashënguana nye canye bominye bomná, y ndoñe nyets útabëca infiernoye chacmotsëtšëna; <sup>48</sup> choca útšënga puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

<sup>49</sup> “Tamó tšabe soye endmëna. Ntšamo chë tamó canye tšabe soye endmëncá, Bëngbe Bëtsá echanjama nyetsca tšëngaftangbiamana tšábënga chašmotsemnana, chë átšbeñe betsošbuáchëma šmojtsepadecena ora šmojauantase. <sup>50</sup> Tamó tšabe soye endmëna. Pero chë tamó fténana tojtsóbemëse, ndoñe quešmatobëna jamana cachiñe chabe tempsca sanana chaotsatsbomnana, ni saná jatamuama. Mo tšabe tamocá entšangbiamana šmochtsemna, chëngbeñe jtsiyenëse ntšamo Bëngbe Bëtsá yobošcá, y nyetscángaftaca natjëmbana šmochtsiyëna ca” —cha tojánayana.

## 10

*Ndayá Jesús tojanabuatambá bouamnënga tmojtšëntšënama*

*(Mt 19.1-12; Lc 16.18)*

<sup>1</sup> Chentšana, Jesús chë luarentšana tojëftsanbocna y tojána Judea luaroye y Jordán chenguana. Entšanga cachiñe chábioye tmojánabo, y cha chënga yojtšabuátambaye, chë ntšamo jamana yojanamancá. <sup>2</sup> Básefta fariseunga chábioye tmojanobeconá, y jisháchichiyama mëntšá imojtsetjanaye: —¿Queojtselesenciana canye boyá chabe shëmbioye cachcá jesonýayama ca?

<sup>3</sup> Chora cha tojanéjua: —¿Ntšamo Moisés chë soyëngama tcmënjanamëndaye ca?

<sup>4</sup> Y chënga tmojanayana: —Moisés tojanalesenciá chë boyá chabe shémbioye chabuiyé canye tsbuanácha, ndayéchañe chaotsayana cha ya ndoñe chabe shema yontsemna ca, y chora cachcá chabe shema chabuesonýa ca.

<sup>5</sup> Chora Jesús tojanéyana: —Tšëngaftanga Bëngbe Bëtsabe mandënga ainaniñe jóyëngacñiama ndoñe quešmátsboše causa, Moisés chca tšëngaftanga tcmojëftsanamëndá. <sup>6</sup> Pero quem luare jobojátšama orna, “Bëngbe Bëtsá canye boyabása y canye shembása tonjánabiama. <sup>7</sup> Chíyeca, chë boyabása chabe taitá y chabe mamá echanjésabashejuana, chabe shémaftaca jenútanama, <sup>8</sup> y chë útatna mo canýacá bochántsemna.” Y chca, ya ndoñe útata quebochátsmëna, sinó nýe mo canýacá. <sup>9</sup> Chcasna, entšá ndoñe chaondëndbema ndayá Bëngbe Bëtsá mo canýiñcá tojëftsema soye ca —cha tojanayana.

<sup>10</sup> Ya cach yebnoca imojtsatsmëna ora, chabe uatsjédayënga cach soyama imojtëtstjaye. <sup>11</sup> Y Jesús tojanéyana: “Nda chabe shémbioye cachcá tbojesonýa y ínÿaftaca tojtóbouamase, cha chë natsana shémbioye inýe shembásaftaca jtseíngñayana; chana canye uabuatmá jtsebomnana. <sup>12</sup> Y chë shema chabe boyábioye cachcá tbojesonýa, y ínÿaftaca tojtóbouamase, chánaca chë natsana boyábioye ínÿaftaca jtseíngñayana; canye uabuatmá jtsebomnana ca” —Jesús tojanayana.

*Jesús, basetëmëngbiama Bëngbe Bëtsábioye tbojanimpadá  
(Mt 19.13-15; Lc 18.15-17)*

<sup>13</sup> Entšanga, basetëmënga Jesúsbioye tmojanënatse, chauabájajuama y Bëngbe Bëtsábioye chëngbiama chaboimpadama; pero chabe uatsjédayëngna tmojanontsé chë basetëmënga unachayënga jtsëcácanana. <sup>14</sup> Jesús chca tojáninýe ora, tbojánetna y chë uatsjédayënga tojanéyana: “Cachcá mónýaye chë basetëmënga átšbioye chamuabo y ndoñe matéuyanana; er Bëngbe Bëtsabe amëndayana endmëna chë mo quem basetëmëngcá imomnëngbiama. <sup>15</sup> Ndegombre cbéyana, nda Bëngbe Bëtsabe soyënga ndoñe tonjóyëngacñe mo canye basetëmcá jtsošbuáchiyëse, cha ndoñe queochatobeyana Bëngbe Bëtsabe amëndayoye jamashënguama ca.”

<sup>16</sup> Y chë basetëmënga tojanchebá, y chëngbeñe cucuatšënga jajájuase, Bëngbe Bëtsábioye tbojanimpadá tšabe bendicionënga chëngbeñe chaotsemnana.

*Canye bomna entšá Jesúsbioye tojana  
(Mt 19.16-30; Lc 18.18-30)*

<sup>17</sup> Jesús jama tojtëtanontsé ora, canye boyabása chábioye tojanótjajo, chabe shecuatšentše tojanoshëntsamentšé, y mëntšá tbojantjá: —Tšabe Buatëmbayá, ¿ndayá šojtsemna jamana chë nýetsca tescama yomna tšabe vida jtsebomnana ca?

<sup>18</sup> Y Jesús tbojanjuá: —¿Ndáyeca “tšabia ca” šcjayuana? Tšabia nýe canya endmëna: Bëngbe Bëtsá. <sup>19</sup> Aca icotátšëmbo Bëngbe Bëtsá tojanmandacá: “Ndoñe catjóba, acbe shema ínÿaftaca ndoñe cattseíngñaye, ndoñe catjatbëba, ndoñe catjuaboínýena, ínÿëngbioye ndoñe catjáingñaye ndayánaca jabacama, y acbe bëtsétsata ndoñe stëtšoye catjáquedaye ca.”

<sup>20</sup> Chora chë boyabása tbojanjuá: —Buatëmbayá, atše lempe chë mandënga básetema orscana sëndocumplina ca.

<sup>21</sup> Jesús bonshánaca tbojanonýinýe y mëntšá tbojaniyana: —Canye soye cmontsebuáshbena jamana: Motsa, lempe ntšamo icobomncá cochjetsatobuiye, y chë crocénana, ndbomnëjëmënga cochtsatšataye; chca, celoca canye bëts bomnana cochántsebomna. Chentšana, cochjabo y šcochjuasto ca.

<sup>22</sup> Pero chë bobóntšbioye inýetšá ibojtsínýnana Jesús chca tbojaniyanama; y puerte ngmënacá yojtá, cha puerte bomná inamna causa.

<sup>23</sup> Chora Jesús cátoye tojanrrepará y chabe uatsjédayënga tojanéyana: —¿Puerte totcá entsemna bomnëngbiama Bëngbe Bëtsabe amëndayoye jamashënguama ca!

<sup>24</sup> Chca imojouena ora, chë uatsjédayënga ojnánënga imojtsemna, pero Jesús cachiñe tojanoyebuambá y mëntšá tojanéyana: —Atšbe básenga; ¡puerte totcá entsemna Bëngbe Bëtsabe amédayoye jamashënguama! <sup>25</sup> Ndegombre, más paselo endmëna chë coshufjentša atëfjnëjana canye camello chauachnëngo, y ndoñe canye bomná Bëngbe Bëtsabe amédayoye jamashënguana ca.

<sup>26</sup> Pero chë uatsjédayënga nje más imojtsenjnanaye y imojtsentjanaye: —¿As, nda yochjobenaye atsbocaná jtsemnana ca?

<sup>27</sup> Chora Jesús tojanënyané y tojanéyana: —Entšanga ndoñe quemátobena jamana canya atsbocaná chaotsemnana, pero Bëngbe Bëtsá aíñe; er Bëngbe Bëtsá lempe jamama endobena ca.

<sup>28</sup> Chora Pedro tbojanianyana: —Aca contsonyá, bënga lempe chë fsëndbomna soyënga fsënjéseboshjona y ácaftaca fsëntsajna ca.

<sup>29</sup> As Jesús tojánayana: —Ndegombre cbéyana, ndánaca átšbioye jaserviama y chë tšabe noticiënga jábuayenama, tojéseboshjona chabe yebna, catšátanga o uabëంగా, bebmá o befta, o básenga, o fshantsënga, <sup>30</sup> cha mora quem luarentše echanjójyëngacñe chama patse soye más yebnënga, catšátanga, uabëంగా, bebmanga, básenga y fshantsënga, masque puerte chaosufrima ínÿenga mochántsama; y chë inÿe luarocna, chë nyetsca tescama yomna tšabe vida echanjójyëna. <sup>31</sup> Pero banga, mora uámanënga imomnënga, nduámanënga mochántsemna; y banga, mora nduámanënga imomnënga, uámanënga mochántsemna ca —Jesús tojánayana.

*Jesús cachiñe tojánayana cha jóbanama y jtayenama*  
(Mt 20.17-19; Lc 18.31-34)

<sup>32</sup> Chentšana Jerusalenoye imojtsaye, y Jesús yojtsebñatsana. Chë uatsjédayënga puerte ojnánënga imojtsemna, Jesús ndauatjá choye yojtsayama; y inÿe becá entšanga ústonoye imojtsajnënga, imojtsayáuatja. Jesús cachiñe chabe bnétsana uta uatsjédayënga barie tojánachembo y tojanontšé jáuyanana ntšamo cháftaca jopásama yojtsemnana. <sup>33</sup> Mëntšá tojanéyana: “Tšëngaftanga šmontsonyá, Jerusalenoye bënga mora montsajnama. Chocna, chë Bëngbe Bëtsá Entšá tbojanbemá, chë bachnangbe amédayënga y ley abuátambayëngbe cucuatšñe mochanjáboshjona, y chënga mochanjayana cha chaóbana ca; y ndoñe judiëngbe cucuatšñe mochanjáboshjona. <sup>34</sup> Chënga mochantsáboyejuana, mochántsebuashëttoj, mochántsetjanja y mochanjóba, pero chentšana unga tianoye cha echántayena ca.”

*Santiago y Juan, Jesús tmojanimpadá canye pavor cháuabiamama*  
(Mt 20.20-28)

<sup>35</sup> Chora, Santiago y Juan, Zebedeobe uaquiñata, Jesúsbioye tbojanobeconá y tmojanianyana: —Buatëmbayá, bëndata fsëntseboše pavor chašcuabiamama ntšamo chacbojaimpadacá ca.

<sup>36</sup> Y Jesús tojanatjá: —¿Ndayá šojtseboše atše tsëndatbiama chjamama ca?

<sup>37</sup> Y chata tbojanianyana: —Aca reycá chacojtsemánda ora, cochjaleséncia bëndata fchayobená jótbemana, canya acbe catšbioica y inÿa acbe uañicuayoica ca.

<sup>38</sup> As Jesús tojanéjua: —Ntšamo šmontsotjanañama tsëndata ndoñe quešnátstatšëmbo. ¿Ntšamo atše chaitsesufrincá, tsëndátnaca cachcá jasúfriama tašatjobenaye? ¿Y entšanga puerte bacá chacmojtsebuatsená ora, tašochjauáanta, ntšamo atše chjauantacá ca?

<sup>39</sup> Y chata tbojanianyana: —Aíñe fchanjobenaye ca.

Y Jesús tojanéyana: —Ndegombre tsëndátnaca atšcá šochanjasúfria, y atšbe causa cmochántsamna bëtscá soyëngama jasúfria. <sup>40</sup> Pero atše ndoñe quetsátobena jamán-dana nda atšbe catšbioica y atšbe uañicuayoica chaótbemama. Chë útentše entsemna ndëmuanÿengbiama atšbe Taitá tojaprontacá ca.

<sup>41</sup> Chë inye bnétsana uatsjédayënga chca tmojanuena ora, tmojanontsé Santiago y Juánoftaca jotjáyanana. <sup>42</sup> Pero Jesús nyetsca uatsjédayënga tojánachembo y tojanéyana: “Tšëngaftanga šmondétatsëmbo, quem luarentša améndayënga lempe jtsemándayana, nýa mo nduiñënga cuaftsemncá; y chë bëtsëtsa entšanga chëngbe obenánaca jtsemándayana, ntšámnaca jtsamëse, chë inye entšanga sempre chamotsayau-nanama. <sup>43</sup> Pero tšëngaftangbeñe ndoñe chca chaondétsemna. Inyetsá; masna, nda tšëngaftangbeñe chë más uamaná jtsemnana tojtseboše, cha bontsemna chë ínýenga jtsaservénana; <sup>44</sup> y ndánaca tšëngaftanguentšá chë más uamaná jtsemnana tojtsebošá, bontsemna jtsemnana nyetscangbiama, mo nýe ínýabiama nyets tempo oservenacá. <sup>45</sup> Cachcá, Bëngbe Bëtsá Entšá tbojanbemá ndoñe chenátabo cha chamotseservénama, ndayá ínýenga jabáserviama. Y mo nda, ínýenga játsebacama cuafjopagacá, cha echanjóbana ba entšanga atsebácanënga chamotsemnana ca” —cha tojánayana.

*Jesús canye jtanábioye tbojanshná*

*(Mt 20.29-34; Lc 18.35-43)*

<sup>46</sup> Chentsána, Jesús y chabe uatsjédayënga Jericó uabaina puebloye tmojánashjajna. Y Jesús chabe uatsjédayëngaftaca y bëtscá entšangftaca Jericó pueblentšana yojt-saisibocana ora, Timeobe uaquiñá, Bartimeo ca uabainá, canye jtaná lemošna otjanañá, benache juachañe yojtsetbemana. <sup>47</sup> Y Jesús Nazaretocá chëjana yojtsachñëjuanama cha yojátatšëmbona ora, tojanontsé mëntšá uayebuáchana: —¡Jesús, Davídbentšana Entšá, šmotselastemá ca!

<sup>48</sup> Chorna, banga chë jtaná imojtsácacana iytëca chaóbemama. Pero cha más yojtsáyebuache: —¡Davídbentšana Entšá, šmotselastemá ca!

<sup>49</sup> Chora Jesús tojantsá y chë ínýenga tojanéyana: —Chë jtaná mochembo ca.

As chë jtaná tmojanchembo, y mëntšá tmojanianyana: —¡Añemo cochtsebonna; mots-baná! Jesús cmontsechembuana ca.

<sup>50</sup> Y chë jtaná, quefsáiya jtsenátsejquëse, yojontsënja y betscó Jesúsbioye yojobeconá.

<sup>51</sup> Chora, Jesús chë jtanábioye tbojantjá: —¿Ndayá cojtseboše atše acbiama chjamama ca? Y chë jtaná tbojanjuá: —¡Buatëmbayá, šmolesenciá atše chašuatabínýnama ca!

<sup>52</sup> As Jesús tbojanianyana: —Motsatoñe. Tšabá jtsatsmënana Bëngbe Bëtsábeñe icošbuachéyeca, tšabá contsatsmëna ca.

Y cachora cha tšabá ibojtabinýna, y Jesúsbioye benachëjana ibojtséstona.

## 11

*Jesús Jerusalenoye tojánashjango*

*(Mt 21.1-11; Lc 19.28-40; Jn 12.12-19)*

<sup>1</sup> Ya Jerusalenoye imojtsebeconá ora, Betfagé y Betania pueblënga béconana, Olivos ca uabaina tjashe juachañe, Jesús uta chabe uatsjédayata tojanichamó, <sup>2</sup> y mëntšá tojanéyana: “Tsëndatbe natsana entsemna base pueblotémoye motsata. Chašojáshjango y cachora šochanjínýena canye burrotema utsbuaná; chábeñe cabá ndocná tonjenojayé. Šochjuajafjoná y šochjuánatse. <sup>3</sup> Nderado nda, ¿ndáyeca šmojtsanachá ca? chacmoját-jase, šochjojuá: ‘Bëngbe Utabná bontsájaboto y chora bochantabáiseboshjona ca.’ ”

<sup>4</sup> As chata tbojána, y tbojáninýena chë burrotema tsáshenañe, canye bëšášañe utsbuaná, y imojuajafjoná.

<sup>5</sup> Y básefta entšanga chiñe imojtsemnënga, chátbioye tmojanéyana: “¿Ndayá šojt-sama? ¿Ndayeca chë burrotema šojtsajafjná ca?”

<sup>6</sup> As chata tbojanjuá ntšamo Jesús tojanëyancá; y chë entšanga tmojanalesenciá chë burrotema chamuánatsama. <sup>7</sup> Chentsána, chë burrotema Jesúsbioye tmojanánatse; chë burrotëbeñe chatbe entšayá tbojanátatse, y Jesús chábeñe tojanenojayé. <sup>8</sup> Bëtscá entšanga chëngbe entšayá chë benachëjana imojtsanëtétsatsana, y ínýengna chë jajoca imojuatëtsetše buacuashangá chiñe imojuacjaye. <sup>9</sup> Y chë natsana imojtsajnënga y



chë ústonoyënga mëntšá imojtsaiuáyebuache: “¡Bëngbe Bëtsá matschuanga! ¡Corente bendición bomná, chë Bëngbe Utabnabe obenánaca tojabá! <sup>10</sup> ¡Tša tšabá chë echanjósh-jango améndayana, bëngbe bëts taitá David yojëftsemánda orcá! ¡Bëngbe Bëtsá celocá matschuanga ca!”

<sup>11</sup> Jesús Jerusalenoye tojánashjango, y Bëngbe Bëtsabe bëts yebnoye tojánamashëngo. Chabe shéconana lempe yojëftserrepárase, y ya yojtseibétatana causa, chabe bnétsana uta uatsjéndayëngaftaca tojëftsanbocna, Betania puebloye.

*Jesús tojánayana canye betiye ndoñe más chaondëshájona ca*  
(Mt 21.18-19)

<sup>12</sup> Yëfsana, Betaniocana Jerusalenoye chënga imojtésajna ora, Jesús tbojánishëntsena. <sup>13</sup> Bënocana canye higo betiye yojinýe; as tojána jontješiyama tainashajo o ndoñe. Pero nýe tsbuanáchënga chiñe yojínýena, chora ndoñe shajo tempo bésemna causa. <sup>14</sup> As Jesús chë higo betiyoye tojánayana: “¡Ndocna te más chacondëshájona entsanga chamosama ca!”

Y chabe uatsjéndayënga imojouena ntšamo cha tojanayancá.

*Jesús, Bëngbe Bëtsabe bëts yebnentsána enënga y obuámnayënga tojtanébuacna*  
(Mt 21.12-17; Lc 19.45-48; Jn 2.13-22)

<sup>15</sup> Jerusalenoye tmojánashajntšana, Jesús Bëngbe Bëtsabe bëts yebnoye tojánamashëngo, y tojanontsé chentšana jtëbuacnana chë chentše imojtsena y imojtsobuámnanañënga. Chéntšnaca imojtsemna entsanga canye crocénana enënga, y chë crocénana nýe Bëngbe Bëtsabe bëts yebnentsáma inoserverna. Chë entsanga crocénana atrocayëngbe mesëshangá tojtsanenásatajchquëca, y chë palomatémënga enëngbe tšenëšëgnaca; <sup>16</sup> y ndoñe tonjanalesenciá ndocná Bëngbe Bëtsabe bëts yebnëjana chë soyënga chaotsëchnëjuanama. <sup>17</sup> Y tojanontsé entsanga mëntšá jabuátambana: “Ndegombre, Bëngbe Bëtsabe uabemana palabrénguiñe cha mëntšá tojánayana: ‘Átsbe bëts yebna echantsabaina nýetsca luarentša entsangbiamá átšeftaca encuéntaye yebna ca’; pero tšëngaftangna atbëbanëngbe oyeniñe chë yebna šmojtsebema ca” —Jesús tojanéyana.

<sup>18</sup> Chë bachnangbe más uámana améndayënga y chë ley abuátambayënga tmojántatšëmbona ntšamo yojochnënguama; as tmojanontsé enójuabnayana ntšamo jobenayana cha jóbana, cha imojtsebiauatja causa, er nýetsca entsanga imojtsenjnanaye ntšamo cha yojanabuátambama. <sup>19</sup> Pero yojtseibétatana ora, Jesús chabe uatsjéndayëngaftaca chë bëts pueblentšana yojesóbocñe.

*Chë higo betiye tojtsanbuashá*  
(Mt 21.20-22)

<sup>20</sup> Yëfsana cachëse, cachëjana imojtésachnëjuana ora, tmojáninýe chë higo betiye parejo tbëtëjéngaca yojtsebuashá. <sup>21</sup> Chora Pedro yojenójuaboye ntšamo yojopásama; as Jesúsbioye tbojanayana: —¡Buatëmbayá, minýe; chë tconjayana ndocna te más tšabe betiye chaotsemnana betiye tojtsebuashá ca!

<sup>22</sup> Y Jesús tbojanayana: —Bëngbe Bëtsábeñe šmochtsošbuáchiye. <sup>23</sup> Ndegombre cbéyana, nderado nda quem tjoye tojayana, “¡chentšana mojuaná y bëts uafjajónayoye motsëshbuetše ca!” y chca tojayana ainaniñe inýetšá juabna ntjatsbomncá, y ainaniñe puerte tojtsošbuaché ntšamo tojayancá aíñe yochjochnënguama, ndegombre chca echanjóchnëngo. <sup>24</sup> Chíyeca cbochanjúyana, lempe ntšamo Bëngbe Bëtsáftaca chašmojtsencuénta ora chašmojtsotjanañama, ainaniñe corente šmochtsejuabnaye ya šmojóyëngacñe ca, y ndegombre chca šmochántsebmna. <sup>25</sup> Y Bëngbe Bëtsáftaca chašmojtsencuénta ora, šmochjenójuaboye nderado nda ndaye bacna soye tšëngaftangbiamá tojamama, y cháftaca cabá etonánënga šmojtsemnëse, šmochtseperdóna; chca, Bëngbe Bëtsá, celoca endmëná, tšëngaftangbe bacna soyëngama chacmotsaperdonama. <sup>26</sup> Pero

inÿa ndoñe šmonjaperdonasna, Bëngbe Taitá, celoca endmëná, cach ndoñe tšëngaftanga quecmochátaperdonaye ca —cha tojánayana.

*Jesusbe obenana*

(Mt 21.23-27; Lc 20.1-8)

<sup>27</sup> Chca tojanopasá chentšana, Jerusalenoye chënga tmojesaná. Jesús Bëngbe Bëtsabe bëts yebnëjana yojtsobuertanëntscuana, chábioye tmojanobeconá bachnangbe amëndayënga, ley abuátambayënga y chë judiéngbeñe bëtsëjemëngcá amëndayënga, <sup>28</sup> y mëntšá tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda obenana tcmënjatšetá ca?

<sup>29</sup> As Jesús tojanéyana: —Atšnaca séntsebmoma canÿe soye tšëngaftanga jatjayama. Chašmojojuase, átšnaca cbochjáuyana ndaye deréchoca atše chca stsama. <sup>30</sup> ¿Nda Juan chë Ubayaná tbojanichmó entsänga jubáyama, Bëngbe Bëtsá o entsänga? Šméyana ca.

<sup>31</sup> Chora chënga tmojanontsé mëntšá enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chë cha tcmojanabuayená soyënguiñe ndoñe šmonjanošbuaché ca?’ <sup>32</sup> Pero ndoñe quemuátobena jayanana ‘entsänga ca.’” Chca tmojánayana, er chënga entsängbiama imojánauatja, er nyetscanga imojanjuabná, Juan ndegombre Bëngbe Bëtsabe juabna oyebuambnayá yojamnama. <sup>33</sup> Chcasna, chënga tmojanjuá: —Bënga ndoñe queftsátstatšëmbo ca.

Y Jesús tojanéyana: —As atše cach ndoñe quebochatéyana ndaye deréchoca atše chca stsama ca.

## 12

*Chë puerte bacna trabájayëngbiama cuento*

(Mt 21.33-46; Lc 20.9-19)

<sup>1</sup> Chora Jesús tojanontsé cuentëngaca jabuátambana. Mëntšá tojanéyana: “Canÿe entsá bëtská uvas betiyënga yojáje, y chë shéconana yojajëtja. Chë uvasëšangá juantšëtetjamna canÿe base luare yojajutjo; y canÿe tsbanana jebna soye yojapórma chiñe jtsashanÿama. Chentšana, inÿe trabájayënga chë jajañe yojúyentsame, y chana inÿe luaroye yojtsoñe. <sup>2</sup> Chë uvasëšangá juashacama tempo yojobuache orna, chë jajañe nduiño canÿe oservená ibojíchmua chë arrëndayënga jáuyanama ntsachetšá chë nduiño ibojtsotocánama. <sup>3</sup> Pero chëngna, cha imojishache, imojtsejantšetaye, y tondaye ntajatacá imojtichmuá. <sup>4</sup> Chentšana, chë nduiño inÿe oservená ibojíchmua; pero chana, bestšaše imojtselisia y podescá imojtsóyenguango. <sup>5</sup> Chentšana inÿa ibojatichmuá, y chana chë arrëndayënga imojtsóba. Y bángnaca yojichamuá; pero chëngna, ínÿengna imojtsajantšetaye y ínÿengna imojtsëbaye.

<sup>6</sup> “Chë nduiño cabá canÿa ibojtsábojamna jíchmuama: cachabe bonshana uaquiñá. Cabana, cha ibojíchmua y mëntšá yojtsejuabnaye: ‘Atšbe uaquiñá cocayé mochanjóyeyunaye ca.’ <sup>7</sup> Pero chë arrëndayënga cha imojinÿe ora, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga, y lempe chabe otocana soyënga bëngbiama echanjoquéda ca.’ <sup>8</sup> Chcasna, cha imojishache, imojtsóba y chë uvas betiyënga jajañentšana más chcoye imojetsëtšena ca” —Jesús tojancuentá.

<sup>9</sup> Jesús chca jacuéntama tojanpochocá ora, tojánayana: “Y asna, ¿ndayá chë fshantse nduiño yochjama ca? Cha co echanjá y chë trabájayënga echanjetsëbaye, y inÿe trabájayënga chë uvas betiyënga jajañe echanjárrendaye.

<sup>10</sup> “¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana:

Chë yebna jebuanënga tmojtsanaboté ndëtšbé,  
mora chë más bëts uashacuanëšentše entsejájona.

<sup>11</sup> Chë soye Bëngbe Utabná, Bëngbe Bëtsá chca tojama, y bënga chama ojanánënga fšëntsemna ca.”

<sup>12</sup> Chora, chë bachnangbe amëndayënga y chë bëtsëjemëngcá mándayënga tmojánbošena Jesús jishachana, er chënga tmojanenótatsëmbona cha chca tojancuentá jinñanyiyama chënga mo chë puerte bacna trabajayëngcá imojanmënama. Pero entšangbiama imojtsauatja, chíyeca cachcá tmojanonýá y chentšana imojtsóñenga.

*Chë Romoca bëts mandadbiama impuesto jtsatsquécjnayama*

*(Mt 22.15-22; Lc 20.20-26)*

<sup>13</sup> Chentšana chënga, básipta fariseunga y Heródesbe ústonënga Jesúsbioye tmojanichamó, ndayá cha tojayaniñe jisháchichiyama, as chca jtsebomnana ndaye sóyeca mandadéngbeñe cha mal jaquédana. <sup>14</sup> Chënga tmojána y Jesús tmojaniana: —Buatëmbayá, bënga fsëndétatsëmbo aca ndegombre soyënga cnetsabuátambama, y ndoñe jatuenanana nýe ntšamo entšanga tmojatichamcá, er acbiama tondaye quenatámana nda más uamaná o nduamaná tomnana; y contsabuatambá ndegombre tšabe vida jtsebomnana, ntšamo Bëngbe Bëtsá yomandacá. Chcasna, ¿tšabá tanántsemana, César, chë Romoca bëts mandadbiama bënga impuesto jtsatsquécjnayana? ¿Fchtsatsquécjnaye o ndoñe ca? —chënga tmojantjá.

<sup>15</sup> Jesús yojtsetátšëmbo, chënga bacna entšanga ntšamo ndegombre tmojuabnacá ndinýinýnayënga imojamnama; chíyeca tojanéyana: —¿Ndáyeca tšëngaftanga šmojtseboše chë sóyeca atše jisháchichiyama? Canýe denario crocénana šmiyëboñe, atše chayobená jinýama ca.

<sup>16</sup> As canýe crocénana tmojanoyé y Jesús tojanéyana: —¿Ndabe jubíá quem crocénaniñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubíá; cha chca enduabaina ca.

<sup>17</sup> Chora Jesús tojanéyana: —Chcasna, César šmochtoyie cha ibotocana soye; y Bëngbe Bëtsana cha ibotocana soye ca.

Y nýetscanga chama imojenjaná.

*Obanënga jtayenama Jesús tmojantjá*

*(Mt 22.23-33; Lc 20.27-40)*

<sup>18</sup> Chentšana, básiptanga saduceo ca uabaina entšanga tmojána Jesús jinýama. Chënga imojanjuabná obanënga ndocna te ntayenana ca. Chíyeca, Jesús mëntšá tmojaniana: <sup>19</sup> —Buatëmbayá, Moisés tojéftsanabema, nderado canýe boyá tojóbana y básenga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chabe uabochená obanabiama básenga jtsabamnama ca. <sup>20</sup> Y chcase, canýe, canýsëfta catšátanga monjamna. Chë natsaná tonjanobouamá y tontsanóbana básenga ntjëftsabashejuancá. <sup>21</sup> Chentšana, chë ústona uabentsá chë shémaftaca tonjanobouamá, pero chana tontsanóbana, básenga ntjëftsabashejuancá; chë inýe uabentsáftaca cachcá tonjanopasá. <sup>22</sup> Chca, nýetsca canýsëfta catšátangaftaca cha tonjanobouamá, pero ndocná básenga ntjëftsabáshejuanana. Y chentšana chë shembásanaca tontsanóbana. <sup>23</sup> Y morna, chë obanënga chamojtayena ora, ¿ndabe chë canýsëfta catšátanguentšabe shema chë shembása yochtsemna, nýetscanga cháftaca tmojanobouamase ca? —chënga tmojantjá.

<sup>24</sup> As Jesús tojanéyana: —Ntšamo Bëngbe Bëtsabe uabemana palabrënguiñe endayancá ndoñe tcomjosertá, ni Bëngbe Bëtsabe obenanama. Chíyeca ntšamo ndoñe yondmëncá šmontsichamo. <sup>25</sup> Er obanënga chamojtayena ora, ni boyabásenga ni shembásenga quemochatóbouamnaye, y chca, chënga mochántsemna mo celoca angelotemëngcá.

<sup>26</sup> Y chë obanënga jtayenama, ¿Moisesbe librësáñe ndoñe šmëndualía ntšamo Bëngbe Bëtsá tbojanianama, chë betiyetema yojtsángbototjuana ora? Bëngbe Bëtsá mëntšá tbojaniana: “Atše sëndmëna Abraham, Isaac y Jacobëbe Bëtsá ca.” <sup>27</sup> Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entšangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena. Tšëngaftanga canýe ndoñe ndegombre soyiñe šmontsemna ca —tojanéyana.

*Chë más bëts uámana mando*  
(Mt 22.34-40)

<sup>28</sup> Chentše yojtsemna canye ley abuatambayá. Cha yojouena ntšamo Jesús y chënga imojtsenatsëtsnayana, y yojtsetátšëmbo Jesús tšabá tojanéjuama. As, tojanobeconá y Jesúsbioye tbojantjá: —¿Ndayá chë más bëts uámana mando yomna ca?

<sup>29</sup> Y Jesús tbojanjuá: —Chë más uámana mando mëntšá endmëna: “Israeloquënga šmochjouena, Utabná, Bëngbe Bëtsá endmëna, y nÿe canye Bëngbe Utabná endmëna, ndocná más. <sup>30</sup> Utabná Bëngbe Bëtsá cochtsebobonshana nÿets acbe ainánaca, nÿets espíritoca, nÿets juábnaca y nÿets añémoca.” <sup>31</sup> Y chentšana quem inÿe mándnaca: “Ndëmua entsánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámana ca —Jesús tojánayana.

<sup>32</sup> Chora, chë ley abuatambayá Jesúsbioye tbojanijana: —Buatëmbayá, puerte tšabá tcjayana. Ndegombre yomncá contsíchamo, nÿe canye Utabná endmëna y ndocná más. <sup>33</sup> Y cha jtsebobonshánana nÿets ainánaca, juábnaca y añémoca, y ndëmua entsánaca jtsebobonshánana cachá cuenobobonshancá, puerte cuámana. Cach nÿetsá ndoñe quenatámana bayënga jtsëbánayana, ni chë uátšëmbona soyënga Bëngbe Bëtsá jëtschuayama ca.

<sup>34</sup> Cha nÿets juábnaca tbojanjuama Jesús tojáninÿe ora, tbojanijana: —Batšatema cmontsebuáshbena jtseprontánama, Bëngbe Bëtsá chacolesenciama acbe ainanentše jtsemándayama ca.

Y chentšana, ya ndocná yonjenñëmua Jesús más jatstjanayama.

*¿Cristo ndabe entsábentšana yomna?*  
(Mt 22.41-46; Lc 20.41-44)

<sup>35</sup> Jesús Bëngbe Bëtsabe bëts yebnentše yojtsabuátambaye ora, tojánayana: “¿Ndáyeca chë ley abuátambayënga mondbëtsichamo chë Uámana Uabuayaná Davídbentšana iuabó ca? <sup>36</sup> Cach David, chë Uámana Espiritbe mándoca mëntšá tojánayana:

Bëngbe Bëtsá, atšbe Utabná Crístbioye tbonjanijana:

atšbe catšbioica mótbema,

atšbe obenánaca, acbe uayayënga acbe cucuatšinë chamoquedama chjamëntscuana ca.

<sup>37</sup> ¿Ntšámose Cristo Davídbentšana Entšá nántsemna, cach David ‘Utabná ca’ chábioye tbojtsabobuátmëse ca?” —cha tojanéyana.

Y chë bëtsá entsanga, oyejuayënga imojtsuenana.

*Jesús chë ley abuátambayëngbiama tojánayana, chënga ndoñe tšabá montsama ca*  
(Mt 23.1-36; Lc 11.37-54; 20.45-47)

<sup>38</sup> Mëntšánaca Jesús chënga yojtsabuátambaye: “Cuedado šmochtsebobomna y ndoñe šmattsama chë ley abuatambayëngcá. Chënga jtsogusetánana bënëna entsayangaca jtsajnana y jtsebošana tsáshenañe entsanga nÿa respétoca chamotsacheuanama. <sup>39</sup> Chë judiëngbe enefjuana yebnënguenache, chë más uámana luarënguiñe jtsetbiámanana, y chë fiestënguenache nÿa quëfseroca. <sup>40</sup> Pero chënga, viudángbioye chë tmobomna soyënga jtsabacayana, y entsangbe delante tšabá chamotsënyama, y chëngbioye imojtsaíngñama ndoñe chaondëtsótatšëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá inÿengbiama más chënga echanjácastigaye ca” —Jesús tojánayana.

*Jesús yojtsënyaye chë crocénana quëcjnyayënga*  
(Lc 21.1-4)

<sup>41</sup> Jesús jabuátambama tojanpochocá ora, tojanótbema Bëngbe Bëtsabe bëts yebnentše, chë crocénana quëcjnyayëtema ndirichiñe; y chë crocénana quëcjnyayënga yojtsënyaye. Bëtsá bomnëngna beca crocénana imojtsequëcjnyaye. <sup>42</sup> Chora, canye viudá ndbomnëjémnaca yojobeconá y nÿe uta crocénana chëtémiñe yojaftsesegóra. <sup>43</sup> Chora Jesús chabe uatsjëndayënga tojánachembo chamobéconama, y mëntšá tojanéyana:

“Ndegombre cbéyana, quem viudá ndbomnjema, Bëngbe Bëtsabiana nyetscangbiana más tonjëftsesegorá. <sup>44</sup> Chë bomnëngna chë vojtsóyentsjamentšana tmonjëftsesegorá, y cabá bomnana imotsóbonne; y chë viudana tonjëftsesegorá lempe ntsachetśá yobomncá; masque tša ndbomnjema, chë vida jtsebomnama lempe ntsachetśá yobomncá tonjëftsesegorá ca.”

## 13

*Jesús tojánayana chë Bëngbe Bëtsabe bëts yebna lempe mochjápochocama*  
(Mt 24.1-2; Lc 21.5-6)

<sup>1</sup> Jesús Bëngbe Bëtsabe bëts yebnentšana tojëftsanbocna ora, canye chabe uatsjendayá tbojaniana: —Buatëmbayá, minye, jtša bëts ndëtšbenga, y tša botamana bëts yebnënga ca!

<sup>2</sup> Chora Jesús tbojaniana: —Tšabá cochjinye tša botamana bëts yebnënga. Pero muentše ndoñe queochaisoquéda ni mo canye ndëtšbé inyebé juatsboye. Lempe mochantsepochóca ca.

*Ntsamo yochtsemna quem luare jopochóca te chaojtsobeco ora*  
(Mt 24.3-28; Lc 21.7-24; 17.22-24)

<sup>3</sup> Chentšana, Olivos tjashoye chënga tmojána. Bëngbe Bëtsabe bëts yebnentša ndirichiñe yojamna; y Jesús tojanótbema ora, Pedro, Santiago, Juan y Andrés iytëcana tmojantjá, <sup>4</sup> ntsamo cha tojanayancá ntseco yochjanopásama, y chca jopásama ya tojtsobecuama entšanga chamotsetatšëmbuama, ndayá Bëngbe Bëtsá yochjanma ca.

<sup>5</sup> Chora Jesús tojanéjua: “Cuedado šmochtsebomna ndocná chacmondáingñema.

<sup>6</sup> Banga mochanjabo y mochantsabíchamo chënga Jesús imomna ca. Mochántsihomo: ‘Atše chë Cristo sëndmëna ca’, y chca, ba entšanga mochanjáingñaye.

<sup>7</sup> “Entšanga tmojtsentsjanama y nderado mochjentsjámna tšëngaftanga chašmojouena ora, ndoñe šmattsauatja; er chca chaohnënguama entsemna, pero masque chca, chora chë quem luare jopochóca tempo cabá ndoñe queochátmëna. <sup>8</sup> Canye luarentša entšanga inye luaroca entšangaftaca mochántsihomo, y canye amëndayábentša entšanga inye amëndayábioca entšangaftácnaca; ba luarënguenache fshantse echanjuangmémana y bëts shëntsana echanjóshjango. Masque chca jasúfriase, más chcoye cabá más mochanjatssúfria.

<sup>9</sup> “Pero tšëngaftangna cach tšëngaftangbiana šmochtsantješna; entšanga cmochanjíshëche y amëndayëngbe cucuatšinë cmochanjábashejuana, judiëngbe enefjuana yebnënguenache cmochanjátsetšenaye. Atšbe ústonënga bëtsemna causa, mandadéngbioye y reyëngbioye cmochanjunatse, choca, chëngbe delante ntšamo atšbiana šmotatšëmbcá chašmuayanama. <sup>10</sup> Er entseyta, quem luare cabá ndopochóca ora, Bëngbe Bëtsabe tšabe noticiënga nyetsca luarënguentša entšangbioye chaóshjanguama. <sup>11</sup> Y inyëngbe cucuatšinë jabáshejuana chacmojtsénachá ora, ndoñe šmattsenócochinýena ntšamo chora šmochjayanama. Chora šmochjayana ntšamo Bëngbe Bëtsá yochjamcá tšëngaftanga chašmuayanama, er tšëngaftanga cánýenga ndoñe chora quešmochátoyebuambnaye, ndayá chë Uámana Espiritu tšëngaftangbiajana echantsóyebuambnaye.

<sup>12</sup> “Canye catšata cachabe catšata inyëngbe cucuatšinë bochanjáboshjona chamotsóbama, y bëtsétsanga cachëngbe básenga mochanjábashhejuana chamotsébáyama; y chë básengna chëngbe bëtsétsangbe contra mochántsemna y chamotsébáyama mochanjábashhejuana. <sup>13</sup> Atšbe ústonënga bëtsemna causa, nyetsca luarënguentša entšanga cmochantsébuayënja; pero nda nyets tempo átšbeñe ošbuachiyá totsomñe, atsbocaná echántsemna.

<sup>14</sup> “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochóca tojëftsanabema. Chë puerte uabouana soye, chca jtsemnama

ínjoca tšëngaftanga chašmojinje ora (nda tojtsalía, chabosertá), šmochántsetatšëmbo chë puerte ngménana tempo tojóshjanguama; chorna, chë Judeoca chamojtsemna entsanga, batsjabengoye chamotsacheta; <sup>15</sup> chama, nda cachabe yebnentša tsbanánoca chaojtsemna, chocana ndoñe chaondétastjango, ni chaondétamashëngo tsoicana ndayá jesábocnama; <sup>16</sup> y nda jajoca chaojtsemna, yebnoye ndoñe chaondéta ni mo chabe quëfsaiya jesácñama. <sup>17</sup> ¡Tša lastema chë tempo ngomámanënga o ochóchaye šešonga chamojtsabamna shembásengbiama! <sup>18</sup> Bëngbe Bëtsá šmochtseimpadana chë ngménana tempo ndoñe chaondóshjango uaftena tempo ora, <sup>19</sup> er chora puerte ngmenancá echántsemna. Tša jabuache ngmenancá, quem luare jobojátšama orscana y méntscóñama y más chcoye, cachcá ngménana ndoñe ntjamnana. <sup>20</sup> Chë puerte ngménana tempo, yapa bën ndoñe chaondétsemnama Bëngbe Bëtsá ndoñe tonjalesenciase, ndocná quentatsbocá; pero cha, chabe ubuáyanënga, chabe bocacánënga corente endábabuanjeshanayeca, echanjama yapa bën tempo ndoñe chaondétsemnama.

<sup>21</sup> “Chora nderado nda chacmojáuyana: ‘Minje, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. <sup>22</sup> Er mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëgnaca; y chënga mochanjama bëts soyënga chëngbe obenana jinjanyiyama, entsanga jáingñama, y tmojobenase, chë Bëngbe Bëtsabe bocacánëgnaca. <sup>23</sup> ¡Cuedado šmochtsebomna! Cabá chca ndochñëngo ora, lempe tcbonjabuayená ca” —Jesús tojanéyana.

*Bëngbe Bëtsá Entšá tbojanbemá quem luaroye echanjésabo  
(Mt 24.29-44; Lc 21.25-36)*

<sup>24</sup> Mëntšánaca Jesús tojanéyana: “Pero chë tempo, entsanga puerte chamojasufrí chentšana, shinje ndoñe queochátsbuashinjinjyana, juashcona ndoñe queochátsbinjyane, <sup>25</sup> celocana estrellënga echanjatquëcjana, y quem luarentša tsbanánoca espíritu obenana bomnënga echanjángmëmana. <sup>26</sup> Y chora, entsanga mochanjinje, Bëngbe Bëtsá Entšá tbojanbemá jantšetëshiñe echántsaboye, corente obenánaca y corente buashinjinjaniñe. <sup>27</sup> Chora cha chabe angelënga echanjámëndaye chë Bëngbe Bëtsabe ubuáyanënga júbuajama, nyets luarëngocana, quem fshantsoca cánjyoica juachocana, celoca ínjoica juachóntscoñe.

<sup>28</sup> “Chë higo betiyama šmochjuatsjinje: Tsëm buacuafjënga tojtsebomna ora y tojtsaiséjotsana, jtsotatšëmbuana chë tšabe tempo ya tojtsaisobecuama. <sup>29</sup> Cachcá, chë soyënga ndayama tšëngaftanga tcbonjauyancá chašmojinje ora, šmochántsetatšëmbo Bëngbe Bëtsá Entšá tbojanbemá ya jésabama yojtsemnama. <sup>30</sup> Ndegombre cbéyana, lempe chca echanjochnëngo, morsca entsanga cabá ndóbana ora. <sup>31</sup> Celoca y quem luare echanjopochóca, pero atšbe palabra ndocna te queochaisopochóca.

<sup>32</sup> “Pero Bëngbe Bëtsá Entšá tbojanbemá ndayté y ntseco ora yochjésabama, ndocná quenátstatšëmbo, ni chë celoca angelënga, ni Bëngbe Bëtsabe Uaquiñá. Nje chë Taitá chama yotátšëmbo.

<sup>33</sup> “Chíyeca, cuedado šmochtsebomna y yejuana šmochtsantješna, er ndoñe quešmátstatšëmbo mocna ora yochtsemna Bëngbe Bëtsá Entšá tbojanbemá jésabama tempo. <sup>34</sup> Echántsemna mo canje entsacá; chana inje luaroye ya jëftsebocnama ora, chabe oservëngënga jëftsamëndana chabe yebna chamotsinjenama. Cada ona canje trabajo jëftsebóniyana, y chë shanyá jëftsemándana botamana chaotsantješnama. <sup>35</sup> Chcasna, cuedado šmochtsebomna, šmochtsantješna, er ntšamo chë trabajayëngcá chë yebna nduiño ntseco jtashjanguama, ndoñe ntsetatšëmbuana, mo nderado jétatana, tséntseto ora, bínyanoye o cachëse, tšëngaftanga cachcá, Bëngbe Bëtsá Entšá tbojanbemá ntseco jésabama ndoñe quešmátstatšëmbo; <sup>36</sup> ndoñe cuedado šmontsebomñëse, nderado cha

nje ndeolpe nántashjango, tšengaftanga ndēprontánēnga šmojtsemna ora, mo ftso-  
mañe cuenta. <sup>37</sup> Chíyeca, ntšamo tšengaftanga cbochanjauyancá, nyetscanga chan-  
jáuyana: ¡Puerte cuedado šmochtsebomna ca!” —Jesús tojánayana.

## 14

*Entšanga imojtsejuabnaye ntšamo jamēse Jesús jishachama*

(Mt 26.1-5; Lc 22.1-2; Jn 11.45-53)

<sup>1</sup> Bashco fiestama uta te yojetsájamna, chē Bēngbe Bētsá Egiptocana judiēngbe bēts  
taitanga tojánatsebacama jtenójuaboyama fiesta, chē levadúraca ndēpormana tandēse  
sayora. Chē judiēngbe bachnangbe amēndayēnga y chē ley abuátambayēnga imojt-  
senguaye ntšamo Jesús jishachana jtseíngñase, y jtsóbama. <sup>2</sup> Báseftanga imojtsichamo:  
“Quem fiestēntscuana ndoñe, er nderado entšanga yapa muanjótša enbouenanana ca.”

*Canye shembása botamana uanguētše bėjaye Jesusbe bestšašīne tbojanbuešcja*

(Mt 26.6-13; Jn 12.1-8)

<sup>3</sup> Jesús Betanioca yojtsemna, Simón chē bacna nguayanánaca šocá ca uabobuatmabe  
yebnentše; mesēshentše Jesús yojtsemna ora, canye shembása tojánashjango. Chē  
shembása yojúshjango canye alabastro jarrētema jútjena canye becá uamana y bo-  
tamana uanguētše bėjayeca, ena nardana uanguētšiye; chana chē jarrētema yojátsba  
y chē bėjaye Jesusbe bestšašīne tbojanbuešcja. <sup>4</sup> Chca tmojáninye ora, báseftanga  
chentše imojtsemnēnga tmojanotjayaná y mēntšá imojtsenatsētsnaye: —¿Ndáyeca nye  
bonamente chē soye yojtsemna ca? <sup>5</sup> Chamna, matmēnjobenanga chē bėjaye unga patse  
denario crocenánama juiyana, y chánaca ndbomnjémēnga matmēnjújabuache ca.

Y chē shembásabiama podesca imojtsichamo.

<sup>6</sup> Chora Jesús tojanéyana: —¿Ndáyeca quem shembása ndoñe cachcá šmochanjonýaye  
ca? ¡Ndocá matatsana! Atšbiama tšabe soye tonjama. <sup>7</sup> Er ndbomnjémēnga nyets  
tempo tšengaftangbeñe mochanjéftsemna, ndayténaca šmojábošena ora, šmatjobe-  
naye tšabe soye chēngbiama jamana; er atše tšengaftangaftaca ndoñe nyets tempo  
quichásemna. <sup>8</sup> Quem shembása lempe ntšamo tojobenacá atšbiama tonjama. Chca  
tonjama ora, atšbe cuerpo tonjaprontá atše juatbontsa tescama, cabá ndoñe obaná  
séntsemna ora. <sup>9</sup> Ndegombre cbéyana, quem luaroca ndayéntšnaca Bēngbe Bētsabe  
tšabe noticiēnga chamojtsabuayiná chentše, ntšamo quem shembása tojamámna  
becá mochanjéftsóyebuambaye, chca, entšanga chabiama chamotsenójuabnama ca —  
cha tojanéyana.

*Judas tojána bachnangbe amēndayēngbioye, Jesús chamuishachama*

(Mt 26.14-16; Lc 22.3-6)

<sup>10</sup> Chentšana, Judas Iscariote, canye chē bnétsana uta uatsjendayēnguentsá, tojána chē  
bachnangbe amēndayēngaftaca jencuéntama, Jesús chēngbe cucuatšīne jaboshjonama.  
<sup>11</sup> Chca tmojanuena ora, chēnga imojóyejuaye y tmojanšbuachená crocénana jtabué-  
nayana. Y cach orscana Judas yojtsenguaye ntšamo jamana y ndēmua ora, Jesús chēngbe  
cucuatšīne jaboshjonana.

*Jesús chabe uatsjendayēngaftaca Bashco saná tojanse*

(Mt 26.17-29; Lc 22.7-23; Jn 13.21-30; 1 Co 11.23-26)

<sup>12</sup> Chē Bashco fiesta bojatsenté, chē levadúraca ndēpormana tandēse sayté, chē  
uatsjendayēnga Jesús tmojantjá: —¿Ndémoca cojtseboše bēnga fchaiprontama, Bashco  
saná chacosama ca?

Chca te chē judiēnga imojanamana, Bēngbe Bētsá jētschuayamna canye oveshá jóbana  
chora jasama, chē Egiptocana chēngbe bēts taitanga Bēngbe Bētsá tojánatsebacama  
jtenójuaboyama.

<sup>13</sup> As Jesús uta chabe uatsjédayata tojanichamó y mēntšá tojanéyana: —Chē bēts puebloye motsata. Chašojáshjango ora, canye bacó cmochanjóbiatše, matbajiñe búyeshe echantsabuyambaye; cha šochjuasto y šochtserreparana ndēmuanye yebnentše yochjámashēnguama; <sup>14</sup> y chē yebna nduiño šochjauyana: “Buatēmbayá tonjayana: ¿Ndayentše chē tsañe yojtsemna, Bashco saná atše atšbe uatsjédayēngaftaca jasama ca?” <sup>15</sup> As cha cmochanjínjānyīye canye bēts tsañe, tsbanana pisoca, lempe prontániñe; chentše šochjapróna bēnga mochjasama ca.

<sup>16</sup> As chē uatsjédayata tbojána y tbojáninyena lempe ntšamo Jesús tojanéyancá; y chentše chē Bashco saná tbojanprontata.

<sup>17</sup> Tojanibétata ora, Jesús chē yebnoca tojánashjango, chabe bnétsana uta uatsjédayēngaftaca. <sup>18</sup> Y meséshentše imojtsesaye ora, Jesús tojanéyana: —Ndegombre cbéyana, canya tšēngaftanguentšá, átšeftaca entsesá cha, uayayēngbe cucuatšīñe šochanjáboshjona ca.

<sup>19</sup> Chorna chē uatsjédayēnga ngménaca imojtsemna, y tmojanontsé canyánya cha jatjayana: —¿Atše chtsemna ca?

<sup>20</sup> Y Jesús tojanéjua: —Canya chē bnétsana utatentšá entsemna. Chabe tandēse cach atše sēntsefchecuacná šcnenentše cha entsefchecuacná. <sup>21</sup> Ndegombre, Bēngbe Bētsá Entšá tbojanbemáftaca echanjopása ntšamo chabiamá Bēngbe Bētsabe uabemana palabrenguiñe endayancá. Pero, ¡tša lastema chē bochjáboshjonabiamá! Chabiamá más tšabá manjamna ndoñe ntjónynana ca —Jesús tojánayana.

<sup>22</sup> Imojtsesantscuana, tandēse tojanca, Bēngbe Bētsábioye chama tbojtanchuá, tojanjataye y chabe uatsjédayēnga tojanéjatá, y mēntšá tojánayana: “Mocñēnga, mosēnga, atšbe cuerpo entsemna ca.”

<sup>23</sup> Chentšana, canye coptema vínoyeca tojanaca, Bēngbe Bētsábioye tbojtanchuá, chabe uatsjédayēnga tojanéšasé, y nyetscanga tmojanofšé. <sup>24</sup> Mēntšá tojánayana: “Quem vínoye atšbe buiñe entsemna. Atšbe buiñe echanjuábuashana entšanga chamotsetatšēmbuama ntšamo Bēngbe Bētsá entšanga tojašebuachenacá ndegombre yochjochnēnguama. Chē buiñe bētsca entšangbe tšabiamá echanjuábuashana. <sup>25</sup> Y ndegombre cbéyana, morscana ya ndoñe más chē uvasēšentšana obocniye quichaisofšīye. Chē tsēm vínoye tšēngaftangaftaca chanjofšīye, Bēngbe Bētsabe amēndayoca chamojtsemna ora ca” —tojánayana.

*Jesús tojánayana, chábioye ndoñe bonjanabuátma ca Pedro yochjánayanama*  
(Mt 26.30-35; Lc 22.31-34; Jn 13.36-38)

<sup>26</sup> Bēngbe Bētsábioye jētschuayama tmojancantá chentšana, Olivos tjashoye tmojéftsanbocana. <sup>27</sup> Jesús tojanéyana: —Nyetsca tšēngaftanga quem ibeta átšbeñe ošbuáchiyana šmochantsobuetše y šmochantsacheta, er Bēngbe Bētsabe uabemana palabrenguiñe, cha mēntšá tojánayana: “Chē oveshēnga abujénya chanjóba y chē oveshēnga mochantsáshana ca.” Chca tšēngaftangaftaca echanjopása, uayayēnga chašmojishache ora. <sup>28</sup> Pero obanēnguentšana chaitayenentšana, tšēngaftangbe natsana Galileoye chanjá ca —cha tojanéyana.

<sup>29</sup> Chora Pedro tbojanianyana: —Masque nyetscanga áceñe ošbuáchiyana chamot-sobuetše y chamotsacheta, atše nya ndocna te ca.

<sup>30</sup> Chora Jesús tbojanianyana: —Ndegombre cbéyana, cam ibeta, ngallo cabá uta soye ndécánta ora, aca unga soye cochanjayana ndoñe šconduabuatma ca.

<sup>31</sup> Pero Pedro más yojtsichamo: —Masque chašotsemna ácaftaca jóbánama, atše ndoñe quichátayana ndoñe cbonduabuatma ca.

Y nyetscanga cachcá imojtsichamo.

*Getsemaní luarentše Jesús, Bēngbe Bētsáftaca tbojanencuentá*  
(Mt 26.36-46; Lc 22.39-46)



<sup>32</sup> Chentšana, canje luare Getsemaní ca uabáinoye tmojána. Chocna Jesús tojanéyana: “Muentše motbiamá, chéntscuana atše choye chanjá, Bëngbe Bëtsáftaca jencuéntama ca.”

<sup>33</sup> Y tojéftsanébiatše Pedro, Santiago y Juan. Choca cha yojóntša puerte ngménaca jtsemnama y corente cochtsetšenaná. <sup>34</sup> Chéngbioye tojanéyana: “Atšbe ainana puerte ngménaca entsemna, mo jobanamcá. Muentše moquedanga y šmochtsefšna ca.”

<sup>35</sup> Chentšana, Jesús más natsanoye tojána, tojanoshèntsamentšé y fshantsóntscoca tojanotsejbéna y Bëngbe Bëtsábioye tbojanimpadá, jopódianése, chë tša japadésa ora ndoñe chaondóshjanguama. <sup>36</sup> Mëntšá yojtsichamo: “Atšbe Taitá, aca lempe jamama condobena; tojopodese, cochjama atše japadésama ndoñe chašondétsemnama. Pero ntšamo atše stsebošcá ndoñe chaondétsemna, sinó ntšamo aca cojtsebošcá ca.”

<sup>37</sup> Chentšana, chabe unga uatsjéndayëngbioye tojtanabo, y chëngna imnétsomañe. Chca tojánanýena ora, Pédrëbioye tbojaniyana: “Simón, ¿cotsomañe? ¿Ni mo nýe canje hora jtsefšnama ndoñe tconjobená? <sup>38</sup> Šmochtsefšna y Bëngbe Bëtsáftaca šmochtsencuéntaye, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayana, pero cuerpiñe ndoñe añemo quešmátsbomna ca.”

<sup>39</sup> Jesús cachiñe tojesaná y Bëngbe Bëtsáftaca tbojanencuentá, cach palabrénga jayanése. <sup>40</sup> Yojtabo orna, chë uatsjéndayënga cachiñe imnétsomañe; chënga imojtsefshétana ocnaye causa, y ndoñe imontsobena ntšamo jojuana.

<sup>41</sup> Chentšana, tojtesaná y tojtanabo ora tojanéyana: “¿Cabá šmotsomañe y šmotsochñañe? Nýe nýetšá; hora tocjobuache, Bëngbe Bëtsá Entšá tbojanbemá bacna soye amëngbe cucuatšíñe mochanjábošhona. <sup>42</sup> Motsbananga, cuajna. Minýënga, atše boshjuaná ya entsebeconá ca.”

#### *Uayayënga Jesús tmojánishache*

*(Mt 26.47-56; Lc 22.47-53; Jn 18.2-11)*

<sup>43</sup> Jesús cabá yojtsóyebuambnantscuana, Judas, canje chë bnétsana uta uatsjéndayënguentšá, tojánashjango y cháftaca ba entsänga espadéjangaca y ngarotbéngaca prontánënga. Chënga imojamna chë bachnangbe amëndayënga, ley abuátambayënga y judiëngbeñe bëtsëjemëngcá mándayëngbe ichmónënga. <sup>44</sup> Judas, chë boshjuaná, tojanjuabó ntšamo jamana entsänga jinýanýiyama ndëmua Jesús bëtsemnana. Chíyeca, yojáuyana: “Nda chaijauámocho, cha echántsemna; šmochjishache y cuedádoca šmochjuánatse ca.” <sup>45</sup> Chcasna, Judas Jesúsbioye tojanobeconá y tbojaniyana: “¡Buatëmbayá ca!”

Y tbojanámocho. <sup>46</sup> Chora chë entsänga tmojánishache y tmojanánatse.

<sup>47</sup> Pero canya chentše Jesúseftaca yojtsemná, chabe espadéja yojenosëngboténtšena, y chë bachnangbe más uamana amëndayabe oservená canje matscuáše tbojtsanéštjango.

<sup>48</sup> Y Jesús chë entsänga tojanatjá: “¿Ndáyeca šmojabo espadéjangaca y ngarotbéngaca atše jishachama, mo atše canje bacá uamana entšá cuaftsemncá ca? <sup>49</sup> Atše cada te tšëngaftangbeñe sëndétsemna Bëngbe Bëtsabe bëts yebnoca abuátambaye, y ndocna te choca chešmátanishache. Pero tšëngaftanga chca átšeftaca šmontsama, cachcá ntšamo Bëngbe Bëtsabe uabemana palabrénguiñe endayancá chaotsemnama ca” —tojánayana.

<sup>50</sup> Chorna, nýetsca uatsjéndayënga tmojtsanéuatjaná y tmojtsanacheta, y Jesús cachcá chë uayayëngaftaca tmojesanonýá. <sup>51</sup> Canje bobontse Jesúsbioye ibojtséstona, nýe canje uafjantse entšéjua uichëtjoná. Cha chë entsänga tmojánishache, <sup>52</sup> pero chëngbe cucuatšíñe chë entšéjua jesáboshjonése, chë bobontsna enašá yojtsachá.

#### *Jesús tmojanánatse chë judiëngbe uamana amëndayëngbioye*

*(Mt 26.57-68; Lc 22.54-55, 63-71; Jn 18.12-14, 19-24)*

<sup>53</sup> Chentšana, Jesús tmojanánatse chë bachnangbe más uámana amëndayábioye; y chocna, nyetsca chë bachnangbe amëndayënga, bëtsëjemëngcá amëndayënga y ley abuátambayënga tmojánenefjna. <sup>54</sup> Pedro bënocana Jesús tbojanasto, chë bachnangbe más uámana amëndayabe yebnentša chashjónscoñe; y chentše tojanoquedá. Chë Bëngbe Bëtsabe bëts yebnoca josticiëngaftaca yojtsetbemana; iñe juachaca yojtsešbonena.

<sup>55</sup> Chë bachnangbe amëndayënga y chë judiëngbe uámana mándayënga imojtsenguaye canya, nda ndayánaca Jesusbe contra cháuyana, as jobenayama cha chaóbana ca jayanama; pero ndoñe montsaninyana. <sup>56</sup> Er masque banga Jesusbe contra uayátsenaye soyënga imojtsichamo, nyetscanga ndoñe cachca soye montsanichamo.

<sup>57</sup> Báseftanga imojtsaye y mëntšá Jesusbe contra, ndoñe ndegombre betsemnca tmojánayana: <sup>58</sup> “Bënga cha fsënjoyeuná mëntšá: ‘Atše quem Bëngbe Bëtsabe bëts yebna, entšangbe pormana yebna, chantsepochoça; y unga tese inye Bëngbe Bëtsabe bëts yebna, entšangbeyeca ndëpormana yebna chanjësjebo ca.’ ”

<sup>59</sup> Pero masque chca imojtsichamo, nyetscanga ndoñe cachca soye montsanichamo.

<sup>60</sup> Chorna, chë bachnangbe más uámana amëndayá yojotsbaná, nyetscangbe tsëntsaca yojtsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

<sup>61</sup> Pero cha nye iytëca yojtsemna y ndocá ibontsëjuana. Chë bachnangbe más uámana amëndayá cachiñe tbojtëtantjá, mëntšá: —¿Aca chë Cristo icomna, Bëngbe Bëtsá chë nda fsëndadoranabe Uaquiñá ca?

<sup>62</sup> Y Jesús tbojanjuá: —Arseñor, atše cha sëndmëna; y tsëngaftanga šmochanjinye, atše, Bëngbe Bëtsá Entšá tbojanbemá, chë nyets obenana bomnabe catšbioica chantsetbemana, y celoca jantšëtëshiñe chántsaboye ca.

<sup>63</sup> Chora, chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¿Ndayama más entšanga šochjátëjaboto Jesusbe contra chamuayanama ca? <sup>64</sup> Tsëngaftanga šmonjouena ntšamo chë entšá entsichamcá, y chca Bëngbe Bëtsabiama entsemna mo cha cuafjoyenguangcá, chë chabe Uaquiñá yomna ca cha tonjayana ora. ¿Ntšamo tsëngaftanga šmatjayana ca? —cha tojanéyana.

Y nyetscanga tmojánayana, cha ndegombre bacna soye yojtsebomna y jóbanama ibojtsemna ca.

<sup>65</sup> Chorna báseftanga tmojanontsé Jesús buashëtjnayana; jubiá imojútsbotse, imojtsetantšaye y imojtsetjanaye: “¡Momalisiá nda tcmënjajantšetá ca!” Y chë Bëngbe Bëtsabe bëts yebnoca josticiëngna imojtsajuebjantšetaye.

*Pedro tojánayana Jesúsbioye ndoñe bonjanabuátma ca  
(Mt 26.69-75; Lc 22.56-62; Jn 18.15-18, 25-29)*

<sup>66</sup> Pédrëna, tsmanoca yojtsemna chashjoca. Chora, canye shembása, chë bachnangbe más uámana amëndayabe oservená yojáshjango; <sup>67</sup> y Pédrëbioye tbojáninye ora, cha iñe juachaca yojtsanšbonena, yejuana ibojonjinyiye y tbojanayana: —Acnaca, Jesús Nazaretocáftaca conjánana ca.

<sup>68</sup> Pero Pedro tojánayana chábioye ndoñe bonjanabuátma ca; y mëntšá tojánayana: —Ndayama cojtsichámuama ndoñe quetsátstatšëmbo, ni quešnátësertana ca.

Y shjoye, amashjuanóntscóne yojábocna; y chora canye ngallo yojacánta. <sup>69</sup> Chë oservená cachiñe Pédrëbioye tbojáninye y tojanontsé chë inyënga jauyanana: —Muánaca Jesusbe uatsjendayënguentšá entsemna ca.

<sup>70</sup> Pero chana cachiñe tojánayana Jesúsbioye ndoñe bonjanabuátma ca. Chentšana, chë chentše imojtsemnënga Pedro tmojátaniyana: —Ndegombre aca chënguentšá contsemna; ácnaca Galileocá contsemna ca.

<sup>71</sup> Pero Pedro tojanontsé ichámuana: —¡Bëngbe Bëtsá chašotsecastigá ndoñe ndegombre soye stsichámese ca! —y yojóntša júrayana— ¡Atše chë entsá ndoñe quetsatabuatma, ndabiama tšëngaftanga šmontsatsëtsná ca!

<sup>72</sup> Y cachora chë ngallo uta soyama yojacánta, y Pedro yojenójuaboye ntšamo Jesús tbojaniyanama: “Ngallo cabá uta soye ndécánta ora, aca unga soye cochanjayana ndoñe šconduabuatma ca.” Y tojanontsé enóbošachiyana.

## 15

### *Jesús Pilátbioye tmojanánatse*

(Mt 27.1-2, 11-14; Lc 23.1-5; Jn 18.28-38)

<sup>1</sup> Tojanbinýna ora, chë bachnangbe améndayënga, chë judiëngbeñe bëtsëjemëngcá améndayënga y ley abuatambayënga cánýentše tmojánenefjna, nyetsca chë luarentša más uámana mandayëngaftaca, jenóyeunayama ntšamo jamëse Jesús jóbama. Jesús tmojanëcuébatseca y tmojanánatse, y Pilato, chë Judeoca mandadbe cucuatšinë tmojánboshjona.

<sup>2</sup> Pilato Jesúsbioye tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>3</sup> Chë bachnangbe améndayënga bëtscá soyënga Jesusbe contra imojtsichamo; <sup>4</sup> chíyeca Pilato cachiñe Jesúsbioye tbojantjá: —¿Ndocá šcochanjojuá ca? Minýe; bëtscá soyënga acbe contra montsichamo ca.

<sup>5</sup> Pero Jesús ndoñe más tbonjanjuá; chë causa, Pilato ndoñe yontsetátšëmbo ntšamo jajuaboyana.

### *Jesús chaóbana ca tmojánayana*

(Mt 27.15-31; Lc 23.13-25; Jn 18.38-19.16)

<sup>6</sup> Cada Bashco fiesta ora, Pilato yojanamana canýe utamená jëtsboshjonana, ndánaca entšanga tmojuabuayaná. <sup>7</sup> Chë tempo yojamna canýa Barrabás ca uabainá; cárceloye inautámena chabe enutëngaftaca. Chëngna entšanga tmojtsanëbaye, mandadëngbe entšangftaca imojentsjaná ora. <sup>8</sup> Chora, entšanga tmojánashhajna y tmojanontsé Pilátbioye jauyanana, ntšamo Bashco fiesta ora jamama yojanamancá chaomama. <sup>9</sup> Y Pilato tojanéjua: —¿Tšëngaftanga šmojtseboše tšëngaftangbe rey atše chjëtsboshjona ca?

<sup>10</sup> Chca tojánayana, er Pilato yojtsetátšëmbo, chë bachnangbe améndayëngna envidia causa Jesús chabe cucuatšinë tmojánboshjonama. <sup>11</sup> Pero chë bachnangbe améndayëngna entšanga tmojanañemó chamuenbouénanama, Pilato jauyanama chëngbiana Barrabás chabuatsboshjona ca. <sup>12</sup> Y Pilato tojanatjá: —¿Y ntšamo chjama chë “judiëngbe Rey ca” šmonduabobuatmáftaca ca?

<sup>13</sup> Y chënga tmojanáyebuachena: —¡Motsecrucificá ca!

<sup>14</sup> Y Pilato entšanga tojanéyana: —¿Ndáyeca? ¿Ntšamo cha tojobuachjanguá ca?

Pero chëngna más añémoca tmojtétanayebuachena: —¡Motsecrucificá ca!

<sup>15</sup> As Pilato, entšangftaca tšabá joquédama yojtsebóšeyecna, Barrabás tbojtanboshjona. Yojámëndaye soldadënga jabuache Jesús chamotsetšenama; y chentšana soldadëngbe cucuatšinë tbojánboshjona, chamocrucificama.

<sup>16</sup> Chentšana, chë soldadënga Jesús tmojanánatse chë mandadbe bëts yebnentša chashjoye, y nyetsca soldadënga tmojánachembo chamobéconama. <sup>17</sup> Shbuenda uafjatsenga uinýna entšayá mo reycá tmojanichëtjo; canýe coronésha tmojanapormá uchmašëfjangaca y tmojanabestšajó. <sup>18</sup> Y chentšana tmojanontsé jachuyana: “¡Bayté judiëngbe Rey cochtsemna ca!”

<sup>19</sup> Canýe niñëfjaca Jesús bestšašinë imojtsëtsjanjaye, imojtsebuashëtjnaye, y chabe delante imojtsofshëntsaméntšenaye. <sup>20</sup> Y chca imnaftsáboyejuanentšana, chë shbuenda

uafjatsenga entšayá tmojtsanabotsca y cachabe entšayá tmojtanichëtjo, y pueblo chaboye tmojanánatse jacrucificama.

### *Jesús tmojancrucificá*

(Mt 27.32-44; Lc 23.26-43; Jn 19.17-27)

<sup>21</sup> Chora, canye entšá chëjana yojsatashjajuana, Simón ca uabainá, Cirene pueblóca, Alejandro y Rufbe taitá; jajocana yojsatachnëjuana; y chë soldadëngna imojuatária Jesusbe cruz jëftsocutsayama.

<sup>22</sup> Jesús tmojanánatse Gólgota ca uabaina luaroye (hebreo biyañe endayana “Obanabe Bestšashe Luare ca”); <sup>23</sup> y tmojanabuiyé vínoye mírraca enájuabniye, pero Jesús ndoñe yonjuáyëngacñe. <sup>24</sup> Y chentšana tmojancrucificá; y chabe entšayangamna, tsbanánoye tmojanétšena jinýama ndayá cada ona yochjëftsanácñama.

<sup>25</sup> Cachëse, base mošenana ora Jesús tmojancrucificá. <sup>26</sup> Y chabe bestšaše juatsboicna canye uabemana soye tmojananjo. Chiñe yojsayana ndáyeca cha tmojancrucificama, mëntšá: MUA CHË JUDIËNGBE REY ENDMËNA ca.

<sup>27</sup> Y cháftaca útata bacna soye ochjajnayátnaca tmojanacrucificá, canya chabe catšbioica, y ínýana chabe uañicuayoica. <sup>28</sup> Chca cháftaca tmojanma, chaohnënguama ntšamo Bëngbe Bëtsabe uabemana palabrenguiñe chabiana iuayancá, mëntšá: “Y chábioye tmonjáninýe mo chë puerte bacna soye amënguentšá canya cuaftsemncá ca.”

<sup>29</sup> Y chëjana imojsaschnëjuana entšanga, Jesús imojsóyenguaye, imojtsobestšfshane-naye y imojsatsaye: “¡Aca chë Bëngbe Bëtsabe bëts yebna cochtsánenasatajchca y nýe unga tese cochtanjebo, <sup>30</sup> cach aca mentsbocá y cruzocana matastjango ca!”

<sup>31</sup> Cachcá chë bachnangbe amëndayënga y chë ley abuátambayënga imojtsáboyejuana, y chënga imojtsenatsësnaye: “Cha ínýenga tojëftsatsëbacá, pero cachá jéntsboicama ndoñe quenátobena. <sup>32</sup> ¡Chë Cristo, chë Israeloca Rey! ¡Cruzocana chauatastjango, bënga jinýama y chábeñe chaftsošbuachema ca!”

Y cháftaca ibojtsecrucificanátnaca ibojtsóyenguaye.

### *Jesús tojanóbana*

(Mt 27.45-56; Lc 23.44-49; Jn 19.28-30)

<sup>33</sup> Nýetsto orscana y las tresëntscoñe, nýets quem luare yojsëibétata. <sup>34</sup> Chca orna, Jesús chabe biyañe tojanáyebuachena: “Eloi, Eloi, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýa ca?”)

<sup>35</sup> Chca tmojanuena ora, báseftanga chentše imojtsemnënga imojtsichamo: “Mouenënga, chë Bëngbe Bëtsabe juabna oyebuambnayá Elías bontsechembuana ca.”

<sup>36</sup> As chora, canya tojanótjajo, untja vínoyeca canye esponjëshe tojanfchecuacuá, canye niñëfjiñe tojananguësëtjo y Jesúsbioye tojanbeconá chaofšema; y tojánayana: “Cachcá mochjonýaye, er Elías tayochjabo jabátëstjanguama ca.”

<sup>37</sup> Pero Jesusna, jabuache tojanoyó y tojanóbana. <sup>38</sup> Y chë Bëngbe Bëtsabe bëts yebnoca yojújonýana entšëjua tsëntsaca yojsenájataye, tsbanánocana fshantsoye. Chëjua bënëjua inauamna y chë tsatsëntsaca inaujonýana. <sup>39</sup> Chë romano soldadëngbe amëndayá, Jesusbe ndirichiñe yojssemna; y ntšamo cha tojanobancá tbojáninýe ora, tojánayana: “¡Ndegombre quem boyabása Bëngbe Bëtsabe Uaquiñá yomna ca!”

<sup>40</sup> Básefta shembásengnaca chentše imojtsemna, bënocana imojtserreparana; chënguentše imojtsemna María Magdalena; María, Santiago chë más basa y Josebe mamá; y Salomé. <sup>41</sup> Chë shembásengna Jesús tmojanasto y tmojanájabuache cha Galileoca yojamna ora; y inýe ba shembásengnaca chentše imojtsemna, chë cháftaca Jerusalenoye tmojánanga.

### *Jesús tmojanatbontsá*

(Mt 27.57-61; Lc 23.50-56; Jn 19.38-42)

<sup>42</sup> Chë yëfsana ochnayté yojtsémnayeca, cach te yojánamna saná japróntana chë yëfsana jasama. Ya yojtseibétatana ora, <sup>43</sup> Pilato yojtsemnoye tojána canye boyabása, José ca uabainá, Arimatea pueblócá; cha inamna canye chë luarentša uámana mandayënguentšá. Cha Bëngbe Bëtsábeñe yojtsošbuáchiye y yojanobátmana chabe améndayana chaóshjanguama. Ndauatjca Pilátbioye Jesusbe cuerpo tbojanotjañe. <sup>44</sup> Pilato yojenjnaná Jesús tša betesco yojóbanama; as tojanmandá chë soldadëngbe améndayá chamuachembo, jatjayama Jesús ya bën obaná tayojétsemnama. <sup>45</sup> Chë soldadëngbe améndayana Pilátbioye ibojauyana Jesús ya obaná yojtsemna ca; y as chora, Josébioye tbojanlesenciá Jesusbe cuerpo chabotsámabañama. <sup>46</sup> Chora, José canye uafjantse lino entšéjua tojanabuamé, Jesusbe cuerpo cruzocana tbojanéstjango, chë lino entšéjuaca tbojanandmaná, y canye cuevēshiñe ndëtšbeñe pormánēshiñe tbojanajó; chentšana canye ndëtšbé tojansjoná, y chë cuevēshoye amashjuanentše tojánachto. <sup>47</sup> María Magdalena y María, chë José y Santiagbe mamá, tbojáninye ndayentše Jesusbe cuerpo tbojanjájoma.

## 16

### *Jesús tojtanayena*

(Mt 28.1-10; Lc 24.1-12; Jn 20.1-10)

<sup>1</sup> Ochnayté tojanopasá ora, María Magdalena, María Santiagbe mamá, y Salomé, botamana uanguëtše bėjaye tmojanabuamé, chíyeca jama Jesusbe cuerpo janëtjuama; <sup>2</sup> y tmenguse, chë semana bojatšéntena, cabá cachëse, shinye yojábocna ora, chë cuevēshoye tmojána. <sup>3</sup> Imojtsaye ora imojtsayénatsëtsnaye: “¿Chë cuevēshoye amashjuanentša ndëtšbé nda bochtsabuajuána ca?”

<sup>4</sup> Pero imojontješiye ora, tmojáninye chë cuevēshoye amashjuanentša bëts ndëtšbé, chentšana juanániñe. <sup>5</sup> As chënga choye tmojánamashjna y choye tmojáninye canye bobontse bën uafjantse entšéjua uichëtjoná, chë cuevēshentša catsbioica inétsotbemañe; y chë shembásenga imojouatjaná. <sup>6</sup> Pero chë bobontse tojanéyana: “Ndoñe matauatjëngana; tšëngaftanga šmondënguá Jesús Nazaretocá, chë tmonjancrucificá cha. Cha ya tontayena; muentše ndoñe quenátsmëna. Minyënga cha enjëftsejajonentše. <sup>7</sup> Motsajna, y Pedro y chë inye uatsjëndayënga šmochjáuyana: ‘Jesús tšëngaftangbe natsana Galileoye echanjá. Choca cha šmochanjinye, ntšamo cachá tmojanëyancá ca.’”

<sup>8</sup> As chë shembásenga betesco chë cuevēshentšana tmojésanbocana, er puerte auatjanánënga imojtsemna y ngmëmnyënga imojtsemna; y chë causa, chë soyama ndocná tmonjaniana.

### *Jesús, María Magdalénbioye tbojanebëbocna*

(Jn 20.11-18)

<sup>9</sup> Jesús tojtanayenentšana, chë semana bojatšénté, Jesús natsana María Magdalénbioye tbojanebëbocna. Tempo Jesús chábentšana canysëfta bacna bayëjënga tojtanébuacana. <sup>10</sup> Cha Jesúsbioye ainá tbojáninjëntšana, tojána Jesúsëftaca imojánajnënga chama jaunayama; chëngna ngmënaca y šachénaca imojtsemna. <sup>11</sup> Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninye ca tmojanuena ora.

### *Uta ustonata Jesúsbioye tbojáninye*

(Lc 24.13-35)

<sup>12</sup> Chentšana, uta ustonátbioye, bésefta yebnënga yojamna luaroye ibojétsaye ora, Jesús tojanebëbuacna, mo inya cuaftsemncá. <sup>13</sup> Chora chata tbojésanshëcona chë inyënga chama jacúntama; pero chëngna cach ndoñe ndegombre ca tmojanjuabó.

*Jesús chë uatsjédayënga tojanichamó, Bëngbe Bëtsabe soyëngama nyetsquénache jábuayenama*

*(Mt 28.16-20; Lc 24.36-49; Jn 20.19-23)*

<sup>14</sup> Cabana, Jesús chë bnétsana canye uatsjédayënga tojánëbëbuacna, chënga imojtsesaye ora; y tojanécácana chë cha ainá yojtsemnama ndoñe ndegombre yontsemna ca tmojánjuaboma y nyets ainánaca chábeñe ndoñe montsanošbuachema, er cha ainá tmojáninyënga chama tmojanacuntá ora, chca ndoñe ndegombre yontsemna ca chë uatsjédayënga tmojánayana.

<sup>15</sup> Chentšana Jesús tojanéyana: “Nyets luarëngoye motsajna, y nyetsca entšanga chë tšabe noticiëngama šmochtsabuayinyaye. <sup>16</sup> Nda chiñe chaojtsošbuaché y tšëngaftanga chašmojuabaye, cha atsbocaná echántsemna; pero nda ndoñe tontsošbuaché, cha nyets tempo castiganá echántsemna. <sup>17</sup> Chë átšbeñe ošbuáchiyënga ndegombre soyënga imojtsabuayinama, entšanga mëntšá mochántsetatšëmbo: atše jótšëmbonëse, átšbeñe betsošbuachéyeca, entšángbentšana bacna bayëjëngbe juabna mochántábocna; tempo chënga ndmabiyañe mochantsóyebuambnaye. <sup>18</sup> Masque nderado cucuatšiče mëtscuayënga tmojishache o veneno tmojofšënga, ndocá quemochatspása; y šoquëngbeñe cucuatšënga chamojacjá ora, chënga shnánënga mochántsatšëmna ca” —Jesús tojanéyana.

*Jesús Bëngbe Bëtsábioye tojtaná*

*(Lc 24.50-53)*

<sup>19</sup> Bëngbe Utabná Jesús jóyëbuambayama tojanpochocá chentšana, celoye cha tmojtanatšbaná, y uámana luarentše, Bëngbe Bëtsabe catšbioica yojtóbema jtsemándayama. <sup>20</sup> Y chë uatsjédayëngna tmojánbocana y Bëngbe Bëtsabe soyëngama nyetsquénache entšanga tmojanabuayená. Cach Bëngbe Utabná chënga yojanéjabuáchana, y yojánama entšanga chamotsetatšëmbuama chë buayenana soye ndegombre Bëngbe Bëtsabe soyënga bëtsemnama, chë uatsjédayënga bëtš soyënga jamama obenana chamotse-bomnama cha jtsamëse.

## San Lucas

### *Jabojátsama*

<sup>1</sup> Ba entšanga Jesusbe historia tmojuábema, ntšamo béngbeñe ndegombre tojopasacá. <sup>2</sup> Chë historia juabemamna, chënga tmojanuena ntšamo Jesusbe uatsjédayënga y inye entšanga chabiamna innencuentaycá. Chë entšangna tmojáninye y tmojanuena ndayá Jesús tojanmama y ntšamo tojanayancá, y chentšana chabe tšabe noticiënga entšángbioye tmojanabuayená. <sup>3</sup> As, átšnaca sënjontsé cuedádoca juanotíciana lempe ntšamo Jesusbiamna imojtsichamcá, tojanobojatsëntšana méntscoñe. Mora šontsinýana tšabá yojtsemna acbiamna juabemana ntšamo ndegombre yomncá, uámana taitá Teófilo, chë tijuannoticiá soyëngama, ntšamo ndegombre béngbeñe tojopasacá. <sup>4</sup> Ba soyënga Jesusbiamna tcmojabuátëmbanga, y atše séntseboše aca chacotsetátšëmbo, ntšamo tcojouencá ndegombre yomnana.

### *Canye ángel tojanabuayená Juan chë Ubayaná jónýnama*

<sup>5</sup> Herodes Judea luaroca rey inamna ora, yojamna canye judiëngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentšana entšá inamna (Aarón, chë más uámana bachnangbe natsana amëndayá). <sup>6</sup> Chatna tšabá amata ibnamna Bëngbe Bëtsabe bominyiñe, y ntšamo Bëngbe Bëtsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca. <sup>7</sup> Básënga tondaye ibonjánabamna, Isabel šešona jtsebomnana ndobena causa, y chatna ya bëtsanánata ibojtsemna.

<sup>8-9</sup> Chë bachnanga Bëngbe Bëtsabe bëts yebnentše tmojtsoservena ora, sempre imojanamana jabocacayana, nda tšabá tbojtsonyená, Bëngbe Bëtsábioye atschuanaye luaroye cháuama incienso jajuinýiyama. Canye, Zacaríasbe entšanga Bëngbe Bëtsabe bëts yebnoca, Bëngbe Bëtsábentše imojtsoservena orna, Zacaríasbioye tšabá ibojonýena; y chca, cha ibojotóca jana incienso jajuinýiyana. <sup>10</sup> Zacarías, incienso yojtsejuiný-nantscuana, ba entšanga shjoca imojtsemna, Bëngbe Bëtsáftaca encuëntaye. <sup>11</sup> Nýe ndeolpe, Bëngbe Utabnabe canye ángel tojanonýná chë incienso jajuinýiyama altar-entša catšbioica. <sup>12</sup> Zacarías chábioye tbojáninye ora, tojanenjnaná y corente uatjana tbojanábuache.

<sup>13</sup> Chora chë ángel tbojanianyana: —Zacarías, ndoñe matauatjana. Bëngbe Bëtsá tonjouena ntšamo tconjaimpadacá. Acbe shema Isabel canye šešona bochántse-bomna, boyabásetema, y chana Juan ca cochjuabaye. <sup>14</sup> Chama aca corente oyejuayá cochántsemna, y bëtsacá entšanga mochanjóyejuaye acbe uaquiñá tojonýnama. <sup>15</sup> Er cha, Bëngbe Bëtsabiamna canye uámana entšá echántsemna. Ndocna te queochaisofšiye vínoye, ni jabuáchiye. Chë Uámana Espíritu chabe ainaniñe echantsemándaye, cha cabá ndonýna orscana. <sup>16</sup> Banga Israeloca entšanga, ntšamo cha chaojayanama mochanjontsé joyeunayana Bëngbe Bëtsá, chëngbe Utabná. <sup>17</sup> Cha echanjášhjangó chë Bëngbe Bëtsabe Uámana Uabuayanabe natsana, y echántsebomna obenana y canye espíritu ntšamo chë Bëngbe Bëtsabe juabna oyebuambnayá Elías inabomncá. Chabe natsana echanjášhjangó, bëtsétsanga chëngbe básëngaftaca ndoñe chamondétsentsjanama, y chë nduauenanënga cachiñe chamotsatsjuabnama ntšamo chë Bëngbe Bëtsabe bominyiñe tšabá amënga mondbetsejuabnaycá. Y chca, entšanga cha echantsapróntaye Bëngbe Utabná jabama orscama ca —chë ángel tbojanianyana.

<sup>18</sup> As Zacarías chë ángelbioye tbojantjá: —¿Ntšamo atše stjobenaye jtsetatšëmbuana chë šcontsatsá soye ndegombre bëtsemnama? Er atše ya bëtsëjema séntsemna y atšbe shémnaca cachcá ca.

<sup>19</sup> Chora chë ángel tbojanjuá: —Zacarías, atše ángel Gabriel sëndmëna; atše Bëngbe Bëtsábioica sëndoservena. Cha šonjichmó chë tšabe noticiënga aca jauyanama y

juenayama. <sup>20</sup> Morna, chë cbontsatsá soyiñe ndoñe quecatošbuaché causa, ndëbiá cochanojóquéda, y ntšamo cbontsatsacá chaojopasá ora, chama tempo chaojtsemna ora, chora jóyebuambayama cochantobenaye ca.

<sup>21</sup> Chë ángel Zacaríaseftaca yojtsóyebuambnantscuana, entšanga shjoca Zacarías-biama imojtsobátmana, y mëntšá imojtsejuabnaye: “¿Ndáyeca tša bën Bëngbe Bëtsabe bëts yebnentše ibojtsobiamná ca?” <sup>22</sup> Zacarías tojtanbocna ora, ndoñe yontsobena chë entšángaftaca jóyebuambayana. Chënga tmojántatšëmbona, chë Bëngbe Bëtsábioye atschuanayentše Zacarías mo otjenayoquécá Bëngbe Bëtsábocana canye soye tojáninyama, er chéngbioye jatšëmbombonana yojáuyana, ndëbiá yojoquéda causa.

<sup>23</sup> Chabe tempo, chë Bëngbe Bëtsabe bëts yebnentše jtsetrabájayama tojanpochocá ora, Zacarías cachabe yebnoye tojtaná. <sup>24</sup> Chentšana baseftaytese, chabe shema Isabel ngomamaná yojoquéda, y chë causa, chë shema shachna ishinye cach tsoca yebnentše totanoquéda. <sup>25</sup> Cha mëntšá yojtsichamo: “Bëngbe Utabná mora atšbiama tojtenojuabó, entšángbentše atšbe ngménana jtsebojuánama, básenga tondaye béntsabamna causa ca.”

### *Canye ángel tojanabuayená Jesús jónynama*

<sup>26</sup> Isabel chnénguana ishinye ngomamaná yojtsemna ora, Bëngbe Bëtsá, ángel Gabriel tbojanichmó Galilea luaroye, Nazaret ca uabaina puebloye, <sup>27</sup> canye shembása María ca uabainá jauatsëtsayama. Mariyna cabá boyabása nduabuatmá inamna, pero Joséftaca jobouamayama tbojanšbuachená. Y Josena, rey Davidbentšana entšá inamna. <sup>28</sup> Chë ángel Mariybioye tojána y mëntšá tbojanчуá: —¡Mouena. Bëngbe Bëtsá tšabe bendición acbiama tonjama! ¡Bëngbe Utabná ácaftaca entsemna ca!

<sup>29</sup> Chca tojanuena ora, María yojenjnaná chë soyama, y yojtsejuabnaye ndáyeca chë ángel chca tbojanчуama.

<sup>30</sup> Chora chë ángel tbojanianyana: —María, ndoñe matauatjana, Bëngbe Bëtsá entsama tšabe bendicionënga chacotsebomnama. <sup>31</sup> Aca ngomamaná cochanojóquéda y canye šëšona boyabásetema cochántsebomna, y chana Jesús ca cochjuabaye. <sup>32</sup> Cha puerta echantsámana, y entšangna Bëngbe Bëtsabe Uaquiñá ca chábioye mochantsábobuatma. Y Bëngbe Bëtsá chë Utabná, chábioye canye rey bochanjábema, ntšamo David yojamncá, <sup>33</sup> y Jacóebentšana entšanga nyetsca tescama echantsamëndaye, y chabe mándayana ndocna te queochaisopochóca ca —chë ángel tbojanianyana.

<sup>34</sup> Chentšana María chë ángelbioye tbojantjá: —¿Ntšamo chca yochjopása, cabá ndoñe boyá sëntsebomñëse ca?

<sup>35</sup> Y chë ángel tbojanчуá: —Chë Uámana Espíritu echanjabo nyets ácebeñe, y Bëngbe Bëtsabe obenánaca ngomamaná cochanojóquéda. Chabe obenana mo jantšëtëshcá cmochanjaboušbotse; chíyeca chë echanjónyna šëšona Uamaná echántsemna, y chábioye Bëngbe Bëtsabe Uaquiñá ca mochantsábobuatma. <sup>36</sup> Mouena, Isabel, acbe primá, canye šëšona bochantsebomna, masque ya bëtsananá cha entsemna; chë “šëšona ndbomná ca” monjanabobuatmá, mora ya chnénguana ishinye ngomamaná entsemna, <sup>37</sup> er Bëngbe Bëtsá lempe jamama endobena ca —cha tojánayana.

<sup>38</sup> Chora María chë ángelbioye tbojanianyana: —Bëngbe Bëtsabe oservená atšë sëntsemna. Bëngbe Bëtsá átšeftaca chaoma ntšamo šcojauyancá ca.

Y chentšana chë ángel tojtsatanoñe.

### *María tojána Isabel jabuáchama*

<sup>39</sup> Chentšana, María tojanoprontá y tojanochëmo canye puebloye, Judeoca tjañe-nache luariñe. <sup>40</sup> Chocna cha, Zacaríasbe yebnentše tojánamashëngo y Isabelbioye tbojanчуá. <sup>41</sup> Isabel ntšamo María tbojanчуama tojanuena ora, Isabelbe šëšona chabe uafsbioye tojanobonjó, y chë Uámana Espíritu Isabelbeñe tojánamashëngo chabe ainaniñe jtsemándayama. <sup>42</sup> Chcasna, Isabel jabuache tojánayana: —¡Bëngbe Bëtsá



acbiama más tšabe bendicionënga entsama nyetsca shembásengbiama, y chë cochántse-bomna šešonbiámnaca cachcá! <sup>43</sup> Atše merecido taitatobuajoñe, atšbe Utabnabe mamá chašubobuáchama; <sup>44</sup> er atše sënjouena ntšamo šconjachuá, y cachora atšbe šešona oyejuayá atšbe uafsbioye tonjobonjó. <sup>45</sup> ¡Aca Bëngbe Bëtsábeñe tcojošbuaché; cojtsetátšëmbo Bëngbe Bëtsá ntšamo tcmojašbuachenacá yochjamama; chíyeca puerte oyejuayá cochántsemna ca!

<sup>46</sup> Chora María tojánayana:

“Nyets ainánaca Bëngbe Utabná chantsadorana,

<sup>47</sup> y Bëngbe Bëtsá, atšbe Atsbocayabiama corente chanjóyejuaye.

<sup>48</sup> Bëngbe Bëtsá atšbiama tojtenujuabó, atše chabe oservénjema.

Er morscana muentša entsanga nyetscanga puerte oyejuayá ca šmochantsábobuatma.

<sup>49</sup> Bëngbe Bëtsá, chë nyets obenana bomná, chabe obenánaca bëts soyënga atšbiama tonjama.

¡Bëngbe Bëtsá puerte Uamaná ca entsabaina!

<sup>50</sup> ¡Morsca entsanga y más chcoyënga, chábioye yeunanëngbiama, cha sempre bochántseñgmena!

<sup>51</sup> Cha, chabe obenánaca bëts soyënga tojama,

y chë nye cachënga bëtsétsanga enobiamnyëngbe juabna tojtsepochochá;

<sup>52</sup> reyëngbioye chëngbe mándayentšana tojtsatsatše;

pero chë nye cachënga bëtsétsanga ndenobiamnyëngbioye, uámanënga tojábiamna.

<sup>53</sup> Chë shéntseca imomnéngbioye, chamosama bëtsca cha tojatšatá,

pero chë bomnéngbioyna tondaye tonjatšatá.

<sup>54</sup> Cha tojanéjabuache chabe entsanga Israeloca, chabe oservénënga,

y ndoñe tbonjánebnatjëmna jtsalastemánana,

<sup>55</sup> nyetsca tescama chë Abraham y chábentšana entsángbioye,

ntšamo bëngbe bëts taitanga Bëngbe Bëtsá tojanašebuachenacá ca” —cha tojánayana.

<sup>56</sup> Mariyna unga ishinýe Isabéaftaca tojanoquedá, y chentšana cachabe yebnoye tojtaná.

#### *Juan chë Ubayaná tojanonýná*

<sup>57</sup> Isabel jtsesócanama tojanóntšabuache ora, canýe šešona boyabásetema tojanonýná.

<sup>58</sup> Isabelbe juachañe oyenënga y chabe pamíllanga tmojántatšëmbona ntšamo Bëngbe Bëtsá chábioye ibojalastemama, y chama corente Isabéaftaca tmojanoyeuanga. <sup>59</sup> Chë šešona posuftayté yojtsebomna ora, tmojánashjango y chëtémbioye chë más delicadentše base bobachtema tmojantëtše, ntšamo chë judiënga imojanamancá. Chënga imojétseboše chë šešónbioye Zacarías ca juabáyana, cach beftcá; <sup>60</sup> pero chabe mamá tojanéyana: —Ndoñe. Quem šešona echantsabaina Juan ca.

<sup>61</sup> As chënga Isabélbioye tmojanianyana: —Acbe pamíllangbeñe ndocná chca que-natabaina ca.

<sup>62</sup> Chora chënga jatšëmbombonana Zacaríasbioye tmojantjá, ntšamo chë šešona chaotsabainama cha yojtseboše ca. <sup>63</sup> Zacaríasna jatšëmbombonana canýe tablëbé tojanéyá y chiñe tojanábema: “Cha entsabaina Juan ca”. Y chë causa, nyetscanga ojnánanënga imojtsemna. <sup>64</sup> Y cachora Zacarías jóyebuambayama yojtobenaye, y yojontsé Bëngbe Bëtsábioye jëtschuayana. <sup>65</sup> Chë juachañe oyenënga nyetscanga tmojanëuatjaná, y Judeoca nyetsca chë tjañenache luariñe entsanga chë soyëngama imojtsencuéntaye. <sup>66</sup> Nyetscanga chë soyëngama tmojántatšëmbona ora, chéngnaca corente chama imojtsejuabnaye y mëntšá imojtsichamo: “¿Chë bássetema, bëtsá ora nda yochtsemna ca?” Y ndegombre, Bëngbe Bëtsabe obenana cháftaca yojtsemna.

#### *Zacarías, Bëngbe Bëtsábioye jëtschuayama*

<sup>67</sup> Chë Uámana Espiritu tbojanmandá ora, Zacarías, chë basetembe taitá, Bëngbe Bëtsabe mándoca jtsóyebuambayëse, mëntšá tojánayana:

<sup>68</sup> “¡Chë Utabná, chë Israeloca entšangbe Bëtsá matschuanga, er cha tonjabo chabe entšanga jabújabuachama y jabátsebacama!  
<sup>69</sup> Cha bochanjíchmuá canýe atsebacayá puerte obenana bomná, y cha echántsemna Bëngbe Bëtsabe oservená Davídbentšana entšá;  
<sup>70</sup> ntšamo Bëngbe Bëtsá bayté entsemna, chë chabe juabna oyebuambnayëngbiajana, chë chábinga imomnëngbiajana bënga šojanašebuachenacá, mëntšá:  
<sup>71</sup> Cha canýa bochjanichmuá bëngbe uayayënga y nyetsca uaboyënjëngbiama bënga jabátsebacama;  
<sup>72</sup> bëngbe bëtsétsangbioye jálastemama, y jenójuaboyama y jamama chabe uámana trato,  
<sup>73</sup> ntšamo Bëngbe Bëtsá, bëts taitá Abrahámbioye tbojanšbuachenacá.  
<sup>74</sup> Cha tbojanšbuachená bëngbe uayayëngbiama bënga jabátsebacama, chca, bënga ndauatjá Bëngbe Bëtsá jaserviama,  
<sup>75</sup> y chabe entšangcá, nyetsca soyënguiñe tšabá amënga, Bëngbe Bëtsabe delante nyetsca te bëngbe vidënguiñe jëftsiyenama.  
<sup>76-77</sup> Y aca, atšbe básetemna, Bëngbe Bëtsabe juabna oyebuambnayá ca cmochantsábobuatma, entšangbioye Bëngbe Bëtsabe soyëngama cochtsabuayiynama, Bëngbe Utabná cabá ndáshjango ora, bacna soyënga amana chamuajbanama; as Bëngbe Bëtsá chëngbe bacna soyënga echanjáperdonaye, y Bëngbe Utabná jabama mochantsopróntaye.  
<sup>78-79</sup> Bëngbe Bëtsá bënga puerte šualastemánayeca, canýa bëngbe juabnënga binýnayá bochanjíchmuá, bënga chë bacna soyënga causa mo ibetiñcá y obanëngbe luarentšcá vida bomnëngbioye jabátsebacama,  
y jabuátambama ntšamo natjëmbana jtsiyenana ca” —cha tojánayana.

<sup>80</sup> Chë básetema yojontsé jobóchana y chabe espíritu naca puerte. Bayté, entšanga ndoyena luarënguenache cha yojëftsiyena, Bëngbe Bëtsá Israeloca entšangbioye cha tojáninýanýentscuana. Chentšana, chamuábuatmanamna tojanontsé Israeloca entšangbeñe jóyebuambayana.

## 2

### *Jesucristo tojanonýná* (Mt 1.18-25)

<sup>1</sup> Chë tempo yojamna canýe Romoca bëts mandado, Augusto ca uabainá; y cha, chë natsanama tojanmandá nyetsca entšanga chamuenábemama. <sup>2</sup> Chë soye tojanochnëngo Cirenio ca uabainá Siroca mandado yojamna ora. <sup>3</sup> Chamna, nyetscanga tojanotocá jtangana jenábemëngama, cada ona ndémoca chëngbe bëts taitanga imojëftsiyena puebloye.

<sup>4</sup> As, Josénaca Galilea luarentšana Nazaretocana yojëftsebecna y Judeoye, Belén puebloye, tojtaná. Tempo, Josebe bëts taitá rey David, Belenoca inoyena. Y José, Davídbentšana entšá inámnayecna, choye jenábemama tojtaná. <sup>5</sup> Maríaftaca tojána jenábemama, y muana tbojanšbuachená Josëftaca jobouamayama. María ngomamaná yojtsemna, <sup>6</sup> y Belenoca ibojtsemnëntscuana, chë ora tbojanóntšabuache jtsešócanama. <sup>7</sup> Y chentše María ibojtsebomna chabe natsana šësona, canýe boyabásetema. Posadoca tondaye luare yontsemna causna, chata nýe uacnëngbe átana tambuentše tbojanoquedá. Y Jesús tojanonýná orna, María tbojtanëntsacjuá y canýe bachetémiñe tbojanjajó.

### *Chë angelotëmënga y chë oveshënga abujéñýanga*

<sup>8</sup> Belén béconana, chë ibeta, oveshënga abujéñýanga shëntsjoa cachëngbe oveshëngaftaca imojtsemna. <sup>9</sup> Nýe ndeolpe, Bëngbe Bëtsábiocana canýe ángel tojánebëbuacna,

y Bëngbe Bëtsábentšana corente yojtsebuashinjyana chëngbe shëconániñe. Chama chënga puerte imojocochauatjaná.

<sup>10</sup> Chora chë ángel tojanéyana: “Ndoñe matauatjëngana. Sënjabo tšabe soyënga tonjopasama jábuayenama, nyetscanga chamóyejuama. <sup>11</sup> Mora chë David tonjanonýná pueblentše canýe šëšona tonjonýná. Cha tšëngaftangbe atsebacayá echántsemna y tšëngaftangbe entšangbiámnaca. Cha endmëna chë Bëngbe Bëtsabe Uámana Uabuayaná, Cristo ca uabainá, y Bëngbe Utabná. <sup>12</sup> Ndegombre chca entsemnama mëntšá šmochanjátatšëmbona: canýe šëšona ntsacjuaná y uacnëngbe bachetëmiñe jajoná šmochanjinyena ca” —cha tojanéyana.

<sup>13</sup> Cachora, celocana mallajta angelënga chë natsana ángelbentše tmojánbocana y Bëngbe Bëtsábioye mëntšá imojtsatschuanaye:

<sup>14</sup> “¡Bëngbe Bëtsá, celoca entsemná matschuanga!

Bëngbe Bëtsábioye yeunanëngbiama, Bëngbe Bëtsá corente entsoyejuá; quem luariñe chëngbeñe puerte tšabá chaotsemna ca.”

<sup>15</sup> Chentšana chë angelënga celoye tmojésanshëcuana. Y chora chë oveshënga abujéyanga tmojanontšë jeniyanana: “Belenoye cuajna, chë quem tojopasá soye jinýama. Ndegombre, Bëngbe Bëtsá chë soye šojanýanyé ca.”

<sup>16</sup> As betesco tmojána y tmojánanyëna María, José y chë šëšonatema bachetëmiñe jajoná. <sup>17</sup> Chë šëšona tmojáninyë ora, chënga tmojanacuntá Jesusbe bëtsétsata y chë inýengbioye, ntšamo chë šëšonbiama chë ángel tojanëyancá. <sup>18</sup> Nyetscanga chë tmojanuenënga tmojanenjaná ndayá chë oveshënga abujéyanga imojtsacúntama. <sup>19</sup> Pero Mariyna nýe cachabe ainanoca quem soyëngama más bën inétsenujubnañe.

<sup>20</sup> Chentšana, chë oveshënga abujéyanga tmojtaná Bëngbe Bëtsá atschuanaye, ndayá tmojáninyama y tmojanuenama. Nyëtšá tojanopasá lempe ntšamo chë ángel tojanëyancá.

### *Bëngbe Bëtsabe bëts yebnoye Jesús tmojanamba*

<sup>21</sup> Posufta te tojánashjache ora, chë basetëmbioye chë más delicentše base bobachtëma tmojantëtše, Bëngbe Bëtsabe entšá bëtsemnama chaotsinýnama, ntšamo judiënga imojanamancá; y Jesús ca tmojanabaye, ntšamo chë ángel tbojanianyancá, María cabá ndoñe ngomamaná yontsemna ora.

<sup>22</sup> Y chë tempo tojanóshjango, ndaye ora José y María yojtsamna jamana ntšamo Moisesbe leyiñe iuayancá, ndayá jamama yojanmëncá, canýe shembása Bëngbe Bëtsabe delante tšabia jtsatsmënama, canýe šëšona tbojtsebomnentšana. Asna, Jerusalemoye tbojánata y chë básëtema tmojanamba, Bëngbe Bëtsabe bëts yebnoca jinýinyiyama, <sup>23</sup> ntšamo chë Bëngbe Utabná Moisésbioye tbojaniyé leyënguñe iuayancá, mëntšá: “Canýe yebnentše chë natsana šëšona boyabása tojtsemnëšna, Bëngbe Bëtsábioye cha jinýinyiyana chábioye chabotseservénama ca.” Chcasna, chë básëtema Bëngbe Bëtsabe bëts yebnoye tmojanamba. <sup>24</sup> Y tmojanamba janshana uta shloftše, Bëngbe Bëtsá jëtschuayama, ntšamo Bëngbe Utabnabe leyiñe yomandancá. Chiñe mëntšá endayana: “Chë natsana šëšona chaojonýná ora, boyabásëtema tojtsemnëšna, janshana šmochjuamba uta fchetnatëmata o uta šëšona palomatëmata, Bëngbe Bëtsá jëtschuayama ca.”

<sup>25</sup> Jerusalemoca inamna canýe bacó, Simeón ca uabainá; cha inamna nyetsca soyënguñe tšabá amá, y yojaniyena ntšamo Bëngbe Bëtsá yomandacá. Cha yojanobátmana chë tempo ndaye ora, Bëngbe Bëtsá bochjanichmuá canýa Israeloca entšanga cháuatsebacama. Y chë Uámana Espiritu chabe ainaniñe yojtsemna; <sup>26</sup> chíyeca, cabá lempe chca ndopása ora, cha yojtsetátšëmbo cha ndoñe yochjanóbanama, chë Bëngbe Bëtsabe Uámana Uabuayaná ntjëftsinyá. <sup>27</sup> Chë Uámana Espiritu tbojanmandáyeca, Simeón Bëngbe Bëtsabe bëts yebnoye tojána; y Jesusbe bëtsétsata chë básëtema tmojanamba

ora, ntšamo Moisesbe leyiñe iuayancá chabiama jamama ora, <sup>28</sup> Simeón tbojanocutsá y Běngbe Bětsábioye tbojtanchuá. Cha mēntšá tojánayana:

<sup>29</sup> “Běngbe Utabná, mora šmolesenciá, atše acbe oservená natjěmbana jóbanana, er ya tconjama ntšamo šconjanšbuachenacá;

<sup>30</sup> atše chě entšangbe Atsebacayá sěnjinye.

<sup>31</sup> Aca cha tcojichmó njęts luarenache entšangbiama.

<sup>32</sup> Cha chě ndoñe judiěngbe juabnėnga binynayá echántsemna; y chábeyeca, njęts quem luarentše mochanjátatšěmbona, chě acbe entšangbiama, Israeloquěngbiama ca” —cha tojánayana.

<sup>33</sup> José y María ibojenjanata ntšamo Simeón Jesusbiama yojtsichámuama. <sup>34-35</sup> Chentšana, Simeón Běngbe Bětsábioye tbojanimpadá tšabe bendicionėnga chata chabotsebomnama chaomama; y María, chě Jesusbe mamábioye tbojaniana: “Quem soyėnga corente cmochanjacochtsetšenaná, mo ainana espadějaca cuafjeněchnėngcá. Cha Israeloca banga echanjápochocaye y banga echanjátsebacaye; y chca, ntšamo banga ainaniñe imojuabnacá echantsótatšěmbo. Israeloca banga quem básetema mochantsábotena y chabe palabréngnaca ca” —cha tbojaniana.

<sup>36</sup> Chéntšnaca yojtsemna canye shembása Běngbe Bětsabe juabna oyebuambnayá, Ana ca uabainá; cha yojamna Fanuelbe bembe y Aserbe pamillentšá; ya bėtsananá cha inamna. Nye canysėfta uata cha yojętsebouamna; <sup>37</sup> y chabe boyá tojanóbanentšana, cha posufta bnėtsana y canta uata viudá inamna. Ndocna te Běngbe Bětsabe bėts yebnentšana yonjábocana, y chentše tojanoquedá bněté y ibeta, Běngbe Bětsáftaca encuéntaye y cha atschuanaye; y chama, ba soye yojanamana tondaye ntjascá jtsemnana.

<sup>38</sup> Simeón, María y Josébioye yojtsėtsėtsnaye ora, Ana chėngbioye yojobeconá, y chě Atsebacayá tojanonynama Běngbe Bětsábioye tbojtanchuá chentšana, Jerusalenoca entšangbioye, chě canye atsebacayá Israeloca entšangbiama imojanobatmanėngbioye tojanėyana, chana Jesús yojętsemna ca.

#### *Jesús Nazaret puebloca*

<sup>39</sup> José y María lempe ntšamo chě Utabnabe leyėnguiñe iuayancá tbojanma ora, Galilea luaroye tbojtanata, cachėngbe puebloye, Nazaretoye. <sup>40</sup> Y chě básetema yojtsobóchaye, y más añemo yojtsejacana y más osertánana yojtsebomna. Y Běngbe Bětsá yojánama cha bėtscá tšabe bendicionėnga chaotsebomnama.

#### *Jesús Běngbe Bětsabe bėts yebnoca*

<sup>41</sup> Chabe bėtsėtsata ibojanamana cada uata Jerusalenoye jana Bashco fiestama, chě Běngbe Bětsá chě judiěngbe bėts taitangbioye Egiptocana tojánatsebacama jtenójuaboyama fiesta. <sup>42</sup> Jesús bnėtsana uta uata tojánashjache ora, Jerusalenoye tmojána, ntšamo imojanamancá. <sup>43</sup> Chě fiesta tojanopochocá chentšana, chabe bėtsėtsata yebnoye ibojtsataye, y chata ntsetatšěmbcá, Jesusna Jerusalenoca yojtsoquedañe. <sup>44</sup> Chata ibojėtsejuabnaye Jesús chě inye entšangaftaca yojtsataboye ca; chcasna, canye te njętsá benachėjana tbojánata ora, tbojanontšé chabe pamílangbeñe y ubuatmėngbeñe jtsenguanguana, <sup>45</sup> pero ndoñe ibonjobenaye jtsinjenana. As, chata chora Jerusalenoye tbojėsanshėcona choca cha jetsenguanguama.

<sup>46</sup> Unga tianoye chata tbojanobená Běngbe Bětsabe bėts yebnentše cha jetsinjenana. Chana chě Moisesbe ley abuatambayėngbe tsėntsaca inėtsotbemañe, chėngbioye inayaunana, inatjanaye. <sup>47</sup> Njętsca ouenanėnga imojtsenjanaye Jesús tša osertaná inamnana, y tša tšabá jojuama cha yojtsobenama. <sup>48</sup> Chabe bėtsėtsata chca tbojáninye ora, chátnaca ibojenjaná. Chora, chabe mamá tbojaniana: —Uaquiñá, ĩndáyeca chca bėndátaftaca tcojama? Taitá y atše corente enócochinjenata cbondėnguá ca.

<sup>49</sup> As Jesús tojanėyana: —ĩNdáyeca atše šmonguá? ĩNdoñe šondėtatšěmbo atše šomna atšbe Taitabe yebnentše jtsemnana ca?

<sup>50</sup> Pero chë bëtsétsata ndoñe tonjanësertá ntšamo cha tojanëyanca.

<sup>51</sup> Chentšana Jesús chë bëtsétsataftaca Nazaretoye tojtaná y chata yojtsayaunana. Y chabe mamana nÿe cachabe ainanoca chë soyëngama más bën inétsenojuabnañe.

<sup>52</sup> Jesús yojtsobóchaye y más juabna yojtsebomna; y Bëngbe Bëtsá y nÿetsca entšanga corente oyejuayënga chabiamama imojtsemna.

### 3

*Juan chë Ubayaná entšanga yojanabuayiyiná*  
(Mt 3.1-12; Mc 1.1-8; Jn 1.19-28)

<sup>1</sup> Bnëtsana shachna uatama Tiberio César Romoca bëts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey. <sup>2</sup> Anás y Caifás chë bachnangbe más uámana amëndayata ibojamna. Cach tempo, canÿe luare entšanga ndoyenentše Bëngbe Bëtsá tbojanatsétsá Juánbioye; Juan, Zacaríasbe uaquiñá. <sup>3</sup> As Juan nÿetsca luarënguëjana Jordán béjaye béconana tojánachnëngo, entšanga mëntšá utsëtsnaye: “Tšëngaftangbe bacna soyëngama ngménaca šmochtenójuaboje, chca amana šmochtsajbaná y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.” <sup>4</sup> Chë soye tojanopasá, cachcá ntšamo chë Bëngbe Bëtsabe juabna oyebuambnayá Isaías chabe librësañe yojëftsabemcá. Cha mëntšá tojanábema:

Entšanga ndoyena luaroca canÿa enduáyebuache:

“Bëngbe Utabná echanjabo ca; mo nda canÿe benache tojtseprontacá canÿe uámana entšá jashjanguama,

cachcá, tšëngaftánacana, Bëngbe Utabná jabama ainanentše tšabe juabnéngaca šmochtseprontana.

<sup>5</sup> Nÿetsca jachañe echantojútjia, y tjañe y batsjabenga mochantenájachibiaye.

Chë scundma benachënga ndirichëjënga echántsmëna, y chë bacá mana benachënga mochantenájachibiaye.

Mo chë chca tmojtsamëngcá, canÿe benache japróntana canÿe rey cháuashjanguama, tšëngaftánacana bëtscá šmochtseprontana tšëngaftangbe ainaniñe, Bëngbe Utabná jabama.

<sup>6</sup> Y nÿetsca entšanga mochanjinÿe chë Atsebacayá Bëngbe Bëtsábentšana jabana ca” — cha tojanábema.

<sup>7</sup> Chë entšanga Juan chaubáyama imojánbocana ora, Juan yojanëtsëtsnaye: “¡Mëtšcuaye entšanga! ¿Nda tcmënjáuyana chë echanjóshjango uabouana castigüentšana šmochjotsbocá ca? <sup>8</sup> Bëngbe Bëtsábeñe ndegombre ošbuáchiyënga šmochtsemna, as chca chaotsinÿna, tšëngaftanga chë bacna soyënga amana ndegombre šmojtsajbanama. Y ndoñe šmattsejuabnaye cach tšëngaftangbiama jayanama: ‘Bëngna Abrahábentšana entšanga, Bëngbe Bëtsabe entšanga fsëndmëna ca’. Er atše chanjayana, Bëngbe Bëtsá quem ndëtsbéngacnaca Abrahábentšana entšanga nanjábiamama. <sup>9</sup> Tatšniá ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tonjashájona, jtseshatëtšana y iñoye jtsatmetšana; tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye ca” —cha yojanëtsëtsnaye.

<sup>10</sup> —¿Y as, ndayá jamama šojtsamna ca? —chora chë entšanga tmojantjá.

<sup>11</sup> Y Juan tojanéjua: —Chë uta quëfsaíya uabomná bontsemna canÿiyá jutštayana chë tondaye tonduabomná. Saná bomná bontsemna juajatayana chë tondaye saná tondbomnábioye ca.

<sup>12</sup> Romocama entšángbioye impuesto atjanayëngnaca jenábayama tmojánabo. Chënga Juánbioye tmojantjá: —Buatëmbayá, ¿ndayá jamama šojtsamna ca?

<sup>13</sup> Y Juan tojanéyana: —Nýe ntšamo chë leyiñe yomandancá entsángbioye crocénana šmochtsayëngacaye ca.

<sup>14</sup> Básefta soldadéngnaca chábioye tmojantjá: —¿Ndayá jamama šojtsamna ca?

Y Juan tojanéyana: —Ndocnábioye tondaye šmatjáboca, ni jauátjanase, ni nýe ndayámna bonamente jobuáchëse; y nýe ntsachetšá šmacaná crocenánaca oyejuayënga šmochtsomñe ca.

<sup>15</sup> Entšanga chë Bëngbe Bëtsabe Uámana Uabuayanabiama imojtsobátmana, y chëngna Juanbiama imojétsejuabnaye nderado cha chë Bëngbe Bëtsabe Uámana Uabuayaná nanjamna ca; <sup>16</sup> pero Juan tojanéyana: “Ndegombre, atše béjayeca cbon-dubáyana. Pero chë echanjabá atšbiana corente más obenana endbomna, y atše mercedo taitatobuajoñe ni mo jotsejbiyana chabe shecochëtjonëshentša corriëja jajafjonama. Chë Bëngbe Bëtsabe benache chamojtishachëngbiama, Bëngbe Bëtsá echanjama chë echanjabábeyeca, chë Uámana Espiritu chëngbe ainaniñe cháúamashënguama. Pero chë ndoñe chamontishachëngbiama, Bëngbe Bëtsá echanjama chë echanjabábeyeca, chënga corente castigánënga chamotsemnama, mo ñeshëquécá. <sup>17</sup> Canýe entšá chabe mëtštá cucuatšinë jiyëbana, chabe trigo jtsóbobemama, y chë ndoservena shácuanënga jtsejashtsëtsana. Chabe trigo chë grano uaquëcjnaye tsañe jtsabuájua, y chë ndoservena shácuanëngna ñeshoye jtsatmetšana. Cachcá, chë átšbentšana echanjabá, chë tšabe entsanga echanjúbuaja, y chë bacna entsangna ñeshiñe echantsacastígye, y chë ñe ndocna te queochátsfsana ca” —cha tojanéyana.

<sup>18</sup> Chca y inýe palabrëngaca Juan chë tšabe noticiëngama yojanabuayiñá. <sup>19</sup> Tempo, Juan Heródesbioye tbojanácacana, cha tojanobouamama cachabe catšata Felipe shëmaftaca, Felipe cabá oyena ora; chana Herodías ca uabainá. Chama Juan tbojanácacana y nyetsca bacna soyënga Herodes tojanmámna. <sup>20</sup> Pero Herodes Juánbioye joyeunaye luariña, cabá inýe más bëts bacna soye tojátanma: Juánbioye cárceloye tbojtsanëtame.

*Juan, Jesúsbioye tbojanabaye*

*(Mt 3.13-17; Mc 1.9-11)*

<sup>21</sup> Pero Herodes Juánbioye cabá ndutame ora, Juan ba entsanga tojanëbaye, y Jesúsnaca tojánabo jenábyama. Ibojtsabayanëntscuana, Jesús Bëngbe Bëtsáftaca ibojtsencuëntaye; y chora celoca yojotëfjo, <sup>22</sup> y chë Uámana Espiritu mo canýe palomatemcá Jesúsbioye yojtsastjajuana; y celocana Bëngbe Bëtsá tbojaniyana: “Acna atšbe bonshana Uaquiñá condmëna. Acbiama corente sëntsoyejuá ca.”

*Jesube bëts taitanga*

*(Mt 1.1-17)*

<sup>23-38</sup> Jesús unga bnëtsana uata yojtsebomna, entsángbeñe Bëngbe Bëtsabe soyëngama jóyebuambayama yojontšë ora. Entšanga imojanjuabná Jesús Josebe uaqiñá yojamna ca.

José yojamna Elibe uaqiñá.

Elí Matatbe uaqiñá

y Matatna Levibe uaqiñá.

Leví yojamna Melquibe uaqiñá,

Melqui Janabe uaqiñá

y Jana Josebe uaqiñá.

José yojamna Matatíasbe uaqiñá,

Matatíasna Amosbe uaqiñá.

Amós Nahumbe uaqiñá,

Nahúm Eslibe uaqiñá

y Esli yojamna Nagaibe uaqiñá.

Nagai yojamna Maatbe uaqiñá,

Maatna Matatíasbe uaqiñá.

Matatías Semeibe uaqiñá,

Semei Josecbe uaquiñá  
y Josec yojamna Judabe uaquiñá.  
Judá yojamna Joananbe uaquiñá  
y Joanán Resabe uaquiñá.  
Resa Zorobabelbe uaquiñá,  
Zorobabel Salatielbe uaquiñá,  
y Salatielna Neribe uaquiñá yojamna.  
Neri yojamna Melquibe uaquiñá,  
Melqui Adibe uaquiñá.  
Adi Cosambe uaquiñá,  
Cosam Elmadambe uaquiñá,  
y Elmadamna yojamna Erbe uaquiñá.  
Er yojamna Jesusbe uaquiñá  
y Jesús Eliezerbe uaquiñá.  
Eliezer Jorimbe uaquiñá  
y Jorimna Matatbe uaquiñá.  
Matat yojamna Levibe uaquiñá,  
Leví Simeonbe uaquiñá  
y Simeón Judabe uaquiñá.  
Judá Josebe uaquiñá,  
José Jonambe uaquiñá,  
y Jonamna yojamna Eliaquimbe uaquiñá.  
Eliaquim yojamna Meleabe uaquiñá,  
Melea Menabe uaquiñá.  
Mena Matatbe uaquiñá,  
y Matata yojamna Natanbe uaquiñá.  
Natán yojamna Davidbe uaquiñá,  
David Isaíbe uaquiñá  
y Isaína Obedbe uaquiñá.  
Obed Boozbe uaquiñá,  
Booz Salabe uaquiñá  
y Sala yojamna Naasonbe uaquiñá.  
Naasón yojamna Aminadabëbe uaquiñá,  
Aminadab Adminbe uaquiñá  
y Admin Arnibe uaquiñá.  
Arni Esrombe uaquiñá,  
Esrom Fáresbe uaquiñá  
y Fáresna yojamna Judabe uaquiñá.  
Judá yojamna Jacobëbe uaquiñá,  
Jacob Isaacbe uaquiñá  
y Isaacna Abrahambe uaquiñá.  
Abraham Tarebe uaquiñá  
y Taré yojamna Nacorbe uaquiñá.  
Nacor yojamna Serugbe uaquiñá,  
Serug Ragaube uaquiñá  
y Ragauna Pelegbe uaquiñá.  
Peleg Heberbe uaquiñá,  
y Heber yojamna Salabe uaquiñá.  
Sala yojamna Cainanbe uaquiñá,  
Cainán Arfaxadbe uaquiñá  
y Arfaxadna Sembe uaquiñá.  
Sem Noebe uaquiñá

y Noé yojamna Lamecbe uaquiñá.  
 Lamec yojamna Matusalenbe uaquiñá,  
 Matusalén Enocbe uaquiñá  
 y Enocna Jaredbe uaquiñá.  
 Jared Mahalaleelbe uaquiñá,  
 y Mahalaleelna yojamna Cainanbe uaquiñá.  
 Cainán yojamna Enosbe uaquiñá,  
 Enós Setbe uaquiñá,  
 Set Adanbe uaquiñá  
 y Adán Bëngbe Bëtsabe uaquiñá.

## 4

*Jesús tojanobená Satanás jayénjanama*  
 (Mt 4.1-11; Mc 1.12-13)

<sup>1</sup> Juan, Jesúsbioye tbojanabáyentsana, chë Uámana Espiritu Jesusbe ainaniñe yojtsemándaye. Jesús Jordán bejajoicana tojtaná y chë Uámana Espiritna entsanga ndoyena luaroye tbojanánatse. <sup>2</sup> Chentše canta bnétsana te tbojanjétana, y Satanasna yojanabó Jesús jisháchichiyama. Chë canta bnétsana tentscuana Jesús tondaye tonjanse, y cabana ibojeshéntsena.

<sup>3</sup> Chora Satanás tojésanabo y tbojaniyana: —Aca ndegombre Bëngbe Bëtsabe Uaquiñá tcomnëse, momandá quem ndëtšbenga tandëse chaobiama ca.

<sup>4</sup> As Jesús tbojanjuá: —Bëngbe Bëtsabe uabemana palabrenguiñe mëntšá endayana: “Entšá nÿe tandëšeca ndoñe vida ntsebomnana ca.”

<sup>5</sup> Chentšana, Satanás canÿe bëts tjoye tbojanánatse y betesco nÿetsca quem luarentša amëndayëngbenache tbojaninÿinÿé. <sup>6</sup> Chora Satanás tbojaniyana: —Atše nÿets obenana cbochjátsetaye y lempe quem amëndayëngbenache yobinÿna soyégnaca. Atše lempe chca sënjójyëngacñe y sëntsobena jatsetayama nda stsebošábioye. <sup>7</sup> Aca chacojoshëntsamentšé y chašcojadorase, lempe nÿetšá acbiama echántsemna ca.

<sup>8</sup> Chora Jesús tbojanjuá: —Bëngbe Bëtsabe uabemana palabrenguiñe mëntšá endayana: “Acbe Bëtsá, chë Utabná cochtsadorana y nÿe cha cochtseserverna ca.”

<sup>9</sup> Chentšana, Satanás Jerusalenoye tbojanánatse y Bëngbe Bëtsabe bëts yebnentše chë más tsbanánoca tbojanatsá, y tbojaniyana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, <sup>10</sup> er Bëngbe Bëtsabe uabemana palabrenguiñe endayana:

Bëngbe Bëtsá chabe angelënga echanjichamuá, chacmotsinÿenama.

<sup>11</sup> Chënga buacuatšëngaca cmochanjishache, shecuatše ndocá ndëtšbeñe chacondomama ca —cha tbojaniyana.

<sup>12</sup> Chora Jesús tbojanjuá: —Bëngbe Bëtsabe uabemana palabrenguiñe mëntšá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

<sup>13</sup> Cabana, Satanás tojanajbaná bošana Jesúsbioye bacna soyëngama jacochënguama, y bënama Jesús bentšana tojtsanojuánañe.

*Jesús tojanontšé Galileoca chabe trabajo jamana*  
 (Mt 4.12-17; Mc 1.14-15)

<sup>14</sup> Chentšana, Jesús Galileoye tojesaná chë Uámana Espiritbe obenánaca, y nÿetsca entsanga chë luariñe chabiama imojtsencuëntaye. <sup>15</sup> Jesús yojtsabuátambaye chë judiëngbe enefjuana yebnënguenache, y nÿetscanga cha imojtsatschuanaye.

*Jesús Nazaret puebloca*  
 (Mt 13.53-58; Mc 6.1-6)



<sup>16</sup> Chentšana Jesús Nazaretoye tojtanashjango, chë pueblentše cha tojanoboché, y ochnayté, ntšamo cha yojanamancá, chë judiëngbe enefjuana yebnentše tojánamashëngo. Y chocna tojantsbaná Bëngbe Bëtsabe palabra jualíama. <sup>17</sup> Chë Bëngbe Bëtsabe juabna oyebuambnayá Isafasbe librëša tmojaníyé chaulíama. Chë librëša yojutëfjona orna, tojáninýena mëntšá uábemanentše:

<sup>18</sup> “Chë Utabnabe Espiritu átšeftaca entsemna,

er atše uabuayaná stsemna chë Bëngbe Bëtsabe tšabe noticiënga chë ndbomnéngbeñe jóyebuambayama.

Cha šonjichmó jábuayenama, chë utámenënga chentšana ya chamuáisebocanama;

jamama chë jtanënga chamobenama tšabá jubínýnama;

jamama chë ínýengbe causa imosufrínënga, tempcá cachcá tšabá chamotsatsmënama;

<sup>19</sup> y entšanga jáuyanama ndëmua ora chë Utabná chabe entšanga yochjatsebacaye ca.”

<sup>20</sup> Jesús jualíama tojanpochocá y chora chë uajabuachanábíoye chëša tbojtaniyé y tojtanoítbema. Nýetsca entšanga chë enefjuana yebnentše imojtsemnënga Jesúsbíoye imojtsobuáuatja. <sup>21</sup> Chora Jesús tojanontšé mëntšá jayanana: —Camënté tšëngaftangbeñe tonjopasá ntšamo quem librëšañe iuabemancá ca.

<sup>22</sup> Nýetscanga Jesusbíama tšabá imojtsencuëntaye y ojanánënga imojtsemna tša botamana cha yojsóyebuambnama. Y chënga imojtsentjanaye: —¿Quem boyabása ndoñe Josebe uaqiñá yondmëna ca?

<sup>23</sup> Jesús yojtsetátšëmbo ntšamo cha tojánayaniñe chënga ndoñe tmonjanóšbuachema. As tojanéyana: —Ndegombre tšëngaftanga ntšamo entšanga mondëntšayancá atše šmochanjauyana: “Ashnayá, cach aca menoshná ca”. Y tšëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tcojamama. Ntšamo contsichamcá ndegombre tojtsemnëse, cach acbe puebléntšnaca cachcá moma ca”.

<sup>24</sup> Y cachora Jesús más tojanoyebuambá, mëntšá: “Ndegombre cbéyana, ni canýe Bëngbe Bëtsabe juabna oyebuambnayábíoye cachabe pueblentše tšabá quematonýá.

<sup>25</sup> Ndegombre cbéyana, Elías, chë Bëngbe Bëtsabe juabna oyebuambnayá, Israeloca inamna ora, ba viudanga chentše imojamna. Chë tempo, unga uata y tsëntsañe nýetšá ndoñe tonjanafté y bëts shëntsana chë luariñe yojtsebinýna. <sup>26</sup> Pero Bëngbe Bëtsá, Elíasbíoye ndoñe tbonjanichmó ni mo canýe Israelentša viudábíoye, y aíñe tbojanichmó ínýoye, Sarepta ca uabáinoýe, Sidón béconana, canýe chentša viudábíoye. <sup>27</sup> Eliseo, chë Bëngbe Bëtsabe juabna oyebuambnayá, Israeloca inamna ora, chentše banga imojamna bacna nguayanánaca šoquënga, y ni mo canýa chentša šocábíoye tbonjanshná, pero aíñe canýe šocábíoye, Naamán ca uabainá, cach bacna nguayanánaca, Siriocá ca” —cha tojánayana.

<sup>28</sup> Chë judiëngbe enefjuana yebnentše imojtsemna entšanga chca tmojanuena ora, puerta tojánetëna. <sup>29</sup> As, chora chënga tmojantsbaná, chë pueblentšana Jesús imojtábocna y más tsjuanoye canýe peñëšëjana imojuánatse. Chënga imojanajebna cach peñëšiñe, y chë entšanga imojtseboše Jesús chocana jtsajuatsëntšana. <sup>30</sup> Pero Jesusna chëngbe tsëntsajana tojánachnëngo y ínýoye tojtsanoñe.

*Jesús, bayëjbe juabna cánýabíoye tbojanbojuaná*

*(Mc 1.21-28)*

<sup>31</sup> Chentšana, Jesús cach Galileoye tojesaná, Capernaum puebloye, y choca tojanontšé, chë ochnayté, chë judiëngbe enefjuana yebnentše entšanga jabuátambana. <sup>32</sup> Entšanga imojtsenjnanaye ntšamo Jesús yojsabuátambama, er chamna mo canýe mando bomnacá yojsóyebuambnaye.

<sup>33</sup> Chë enefjuana yebnentše, canýe boyabása bacna bayëja uambayá yojtsemna, y chabe causa chë boyabása tojanontšé mëntšá uayebuáchana: <sup>34</sup> —¿Cachcá šmonýá!

¿Ndayama béngbioye təcjabo, Jesús Nazaretocá? ¿Tcojabo bēnga jabétsapochocama? Atše sēndétatšēmbo nda aca comnama, aca chē Bēngbe Bētsabe Uamaná ca.

<sup>35</sup> Chora Jesús chē bacna bayējbioye tbojtsanácacana y tbojaniyana: —¡Iytēca móbema y chábentšana maisebocna ca!

As chora chē bayēja entsanguentše chē boyabásabioye tbojanshajayé, y ndocá ntjéftsemcá chábentšana yojésebocna. <sup>36</sup> Chē soyama nyetsca entsanga imojénjnanye y mēntšá imojtsenatsētsnaye: “¡Tša chca palabrenga! ¡Quem entšá mandayacá y obenacá chē bayējēnga entsamēnda, y chēnga montsaisebocana ca!”

<sup>37</sup> Y Galileoca nyetsca pueblēnguiñe Jesusbiana yojtsótatšēmbo.

*Jesús, Simón Pédrēbe uambén mamábioye tbojanshná*

*(Mt 8.14-15; Mc 1.29-31)*

<sup>38</sup> Chentšana, Jesús chē judiēngbe enefjuana yebnentšana tojéftsanbocna y Simonbe yebnentše tojánamashēngo. Simonbe uambén mamá šocá inajájona jabuache calentóracá, y chē chentše imojtsemna entsanga chabiana Jesúsbioye tmojanimpadá.

<sup>39</sup> Chora Jesús chē šocábioye yojotsejbéna y tojánayana: “¡Calentora mojuaná ca!” Y chē calentora tbojtsanóbojuanañe. Y cachora, cha tojtantsbaná y tojanontsé chēnga jobuácuedana.

*Jesús ba šoquēnga tojanashná*

*(Mt 8.16-17; Mc 1.32-34)*

<sup>40</sup> Shinye yojuenatjēmba ora, banga inye y inye šocana bomnēnga Jesúsbioye tmojanēnatse, y cha nyetsca šoquēngbeñe cucuatšēnga tojanajajó y tojanashná. <sup>41</sup> Chora, ba šoquēngbentšana bacna bayējēnga imojtsaisebocana y mēntšá imojtsanchembumbuana: “¡Aca chē Bēngbe Bētsabe Uaquiñá condmēna ca!” Pero Jesusna yojtsēcácana y ndoñe tonjanalesenciá chamóyebuambama, er chē bayējēnga imnatátšēmbo cha chē Cristo bétsemnama.

*Chē judiēngbe enefjuana yebnēnguenache, Bēngbe Bētsabe soyēngama Jesús entsanga yojanabuayiyiná*

*(Mc 1.35-39)*

<sup>42</sup> Yēfsana tojanbinýna ora, Jesús chē pueblentšana tojéftsanbocna, y canye luaroye, entsanga ndoyenoye tojtsanoñe. Pero entsanga tmojána cha jetsenguanguama, y cha yojtsemnoye tmojánashajna. Chēnga imojétseboše Jesús cach pueblentše chaotsoquedáñama, <sup>43</sup> pero Jesús tojanéyana: “Atše šontsemna chē tšabe noticiēnga Bēngbe Bētsabe amēndayama inye pueblēnguenáchnaca jábuayenana. Chama Bēngbe Bētsá šonjichmó ca.”

<sup>44</sup> Y chentšana, Jesús yojánana Bēngbe Bētsabiana entsángbioye abuyayinye, chē judiēngbe enefjuana yebnēnguenache Judeoca.

## 5

*Canye te mallajta beonga ashebuánaye te*

*(Mt 4.18-22; Mc 1.16-20)*

<sup>1</sup> Canye te, Jesús, Genesaret ca uabaina uafjónaye tsachañe yojtsemna ora, ba entsanga tmojánashajna, y chēnga tša imojtsenajuatsēntšnaye Bēngbe Bētsabe palabra jouenama. <sup>2</sup> Jesús, chē uafjónaye tsachañe bécoñe tojáninye uta ena barquēsha; chē beonga ashebuánayēngna barquēshanguentšana tmojéftsanbocna atarraiēshangá jetsáboshabiana. <sup>3</sup> Jesús canye barquēshañe tojánamashēngo; chēsha Simónbesha inauamna. Chora Simónbioye mēntšá tbojaniyana: “Quem tsacháñentšana chcoye mēyamba ca.”

<sup>4</sup> Tojanótbema ora, Jesús chë barquëshoicana tojanontsé entsanga jabuátambama. Jabuátambama tojanpochocá orna, Simónbioye tbojaniyana: —Shbuatsëntsoye barquëshá mēyamba y tšëngafangbe atarraiëshangá šmochjushbuetše, beonga jashebuáyama ca.

<sup>5</sup> Pero Simón tbojanjuá: —Buatēmbayá, nyets ibeta fsëndanguá y tondaye chibiátashebuaye. Pero aca chca tcjayánayecna, cachiñe atarraiëshá chantētēshbuetše ca.

<sup>6</sup> Tmojanëshbuetše orna, bētschá beonga tmojánishēche y chēngbe atarraiëshangá tojanontsé jtsatanēcanana. <sup>7</sup> As, chë inye barquëshañe imojtsemna enutēngbioye tmojánefjatsēmbo, jabújabuachama chamuábama. Chora chēnga tmojánabo, y nyets uta barquëshá beóngaca tmojanajutjé. Tša chēftanga causa, tojanontsé chë uta barquëshá jtsenatjēmbambana. <sup>8</sup> Simón Pedro chca tojáninye ora, Jesús bentše tojanoshēntsamenté y tbojaniyana: —¡Bēngbe Utabná, atše bacna soye amá sēndmēna, chíyeca átšbentšana mojuaná ca!

<sup>9</sup> Chë tša beonga jashebuáyama Jesús tojanmama, Simón y chë cháftaca imojtsemnēnga imojoutjaná. <sup>10</sup> Santiago y Juan, chë Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojaniyana: —Ndoñe matauatjana. Morscana, entsanga Bēngbe Bētsabiama cochántsanguaye, y nye beonga ashebuanayá ndoñe quecochátsmēna ca.

<sup>11</sup> As chora chë barquëshangá tsachoye tmojtanēyamba y lempe jéseboshjonēse, Jesús tmojanasto.

*Jesús, canya bacna nguayanánaca šocábioye tbojanshná*  
(Mt 8.1-4; Mc 1.40-45)

<sup>12</sup> Jesús canye pueblentše yojtsemna ora, chentše tojánashjango canye entšá bacna nguayanánaca šocá. Chë šocá Jesúsbioye tbojáninye ora, tojanoshēntsamenté y jubiaca fshantsóntscoñe yojotsejbéna y tbojanimpadá: —Bēngbe Utabná, aca tcojtsebošēse, aca catjobenaye atšbe šocana jtsebojuánana ca.

<sup>13</sup> As Jesús cucuátšeca tbojánbojajo y tbojaniyana: —Aíñe, séntseboše. ¡Šocana cbotsebojuaná ca!

Y cachora chë šocana tbojtsanóbojuanañe. <sup>14</sup> Chora Jesús tbojanmandá: —Ndocnábeñe chë soye cattsecuéntaye; nye Jerusalemoca báchnēbioye motsa, y cha cochjinjinye aca mora ya tšabá cojtsatsmēnama; y chora cochjuátšēmbona ntšamo Moisés chabe leyiñe tojanmandacá, Bēngbe Bētsábioye chama jētschuayama, chca, nyetsca entsanga chamotatšēmbona mora ya tšabá cojtsatsmēnama ca.

<sup>15</sup> Pero ndayá Jesús yojtsamama más entsanga imojátatšēmbona, y ba entsanga imojtsójotoye chábioye joyeunayama y chēngbe šocanēngama chauashnama. <sup>16</sup> Pero Jesús yojanamana jtsoñana entsanga ndoyena luarēngoye y choca Bēngbe Bētsáftaca ibnécuentaye.

*Jesús, canye jama ndobenábioye tbojanshná*  
(Mt 9.1-8; Mc 2.1-12)

<sup>17</sup> Canye te, Jesús yojtsabatambá ora, chentše básefta fariseunga y ley abuátambayēnga imojtsetbiámama, Galileoca nyetsca pueblēnguentšana áshjajnēnga, Judeoquēnga y Jerusalemocuēnga. Y chora Jesús šoquēnga yojtsashnaye, Bēngbe Bētsabe obenánaca. <sup>18</sup> Chora tojanopasá, básefta boyabásenga canye šocá, jama ndobená, tjuashiñe choye imojuamba. Chēnga imojétseboše tsoye cha juambana, Jesús yojtsemnoye, <sup>19</sup> pero jamashjnama ndoñe tmonjanobená, tša entsanga causa. Chcasna, gradasēšēnguéjana chë yebnentša tsbanánoye tmojánasēngo y batsá tejēshe tmojtsanjuaná. Chorna, chë atēfjnējana chë šocá tjuashiñe tmojanéstjango, entsangbe tsēntsaca, Jesusbe natsanoica. <sup>20</sup> Jesús tojáninye cha chë šocá jáshnama bētsobenama chēnga puerte imojtsošbuáchema. As, chë jama ndobenábioye tbojaniyana: “Bacó, acbe bacna soyēnga tcbontseboperdoná ca.”

<sup>21</sup> Chora chë ley abuátambayënga y chë fariseunga mëntšá tmojanontšë juabnayana: “Quem boyabása ndoñe tšabá Bëngbe Bëtsabiama quenátichamo; mo chábioye cuafjoyenguangcá entsemna. Ndocna entšá quenátobena bacna soyëngama inya japerdónana; nýe Bëngbe Bëtsá aíñe ca.”

<sup>22</sup> Pero Jesús yojtsetátšëmbo ntšamo chënga imojtsejuabnayama; as tojanéyana: “¿Ndáyeca tšëngaftangbe ainaniñe chca šmojtsejuabná? <sup>23</sup> ¿Tšëngaftangbiama ndayá más paselo nántsemna tšëngaftangbe delante jayanama: ‘Acbe bacna soyënga tcbontseperdoná’, o jayanana: ‘Matëtsbaná y motsa ca’? <sup>24</sup> Y chca, morna atše cbochanjínyanýiye, chë Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojanianyana: “Atše cbëyana, matëtsbaná, tjuashe mesocñe y acbe yebnoye motsatoñe ca.”

<sup>25</sup> Cachora chë jama ndobená tojtantsbaná entšangbe delante, chë cha inajájona tjuashe yojesocñe y Bëngbe Bëtsábioye atschuanaye chentšana yojtsatoñe. <sup>26</sup> Chama nýetsca entšanga imojénjnanaye y Bëngbe Bëtsá imojtsatschuanaye. Y corente auatjanánënga imojtsichamo: “Mënté bëts soyënga tmonjinýe ca.”

*Jesús, Levíbioye tbojanchembo chabuastama*

(Mt 9.9-13; Mc 2.13-17)

<sup>27</sup> Chca yojochnëngüentšana, Jesús chentšana tojëftsanbocna y canýe entšábioye tbojáninýe, Leví ca uabainá, chë entšángbioye impuesto Romocama atjanayentšë inëtsofbemañe. Chora Jesús tbojanianyana: “Šmasto ca.”

<sup>28</sup> Y Leví lempe tojësanboshjona, tojantsbaná y Jesús tbojanasto.

<sup>29</sup> Chentšana, Levina bëts fiesta chabe yebnentšë Jesusbiana yojama. Y chë fiestentšë imojtsemna banga impuesto atjanayënga; y inýe entšángnaca mesëshentšë imojtsetbiámama. <sup>30</sup> Chora, chë fariseunga y chë ley abuátambayënga tmojanontšë chë Jesusbe uatsjéndayëngbiama podescá oyebuambnayana; y chëngbioye mëntšá tmojanéyana: — ¿Ndáyeca tšëngaftanga impuesto atjanayëngaftaca y bacna soye amëngaftaca šmojtšesá y šmojtsofšëšná ca?

<sup>31</sup> Y Jesús tojanéjua: —Salud bomnënga ashnayá ndoñe ntsëjabótana, pero šoquëngna aíñe. <sup>32</sup> Y atše ndoñe chiyátabo chë Bëngbe Bëtsabe bominiñe tšabá amënga jabáchembuama, sinó chë bacna soye amënga imomna ca juabnayënga Bëngbe Bëtsábioye jabáchembuama ca.

*Jesús tmojantjá chë Bëngbe Bëtsáftaca jencuéntama tondaye saytescama*

(Mt 9.14-17; Mc 2.18-22)

<sup>33</sup> Chora chënga Jesúsbioye tmojanianyana: —Juan chë Ubayanabe uatsjéndayënga y chë fariseungbe usetonënga monduamana ba soye Bëngbe Bëtsáftaca jtsencuéntayana, y chama ba soye tondaye ntjascá jtsemnana; pero acbe uatsjéndayënga nýe nýets tempo jesosañana y jesofšëšnañana ca.

<sup>34-35</sup> Chora Jesús tojanéjua: —Chë boyabása bouamná chë ofjanëngaftaca tojtsemnëntscuana, chëngbioye saná ndoñe ntsabuáshebenana. ¿Ntšamo chca ndoñe nántsemna? Chë tojobouamá cha chëngaftaca tojtsemnëntscuana, chë ófjanënga bëtscá jasana y cháftaca oyejuayënga jtsemnana. Pero ora echanjóshjango y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntšamo chë tojobouamá cha y chë ofjanëngaftaca endmëncá, cachcá endmëna atše, atšbe uatsjéndayëngaftacnaca ca —cha tojanéjua.

<sup>36</sup> Jesús mëntšánaca tojanacuntá jabuátambama: “Ndocná queonybatatëtšë basájua tsëm entšayañe, tanguá entšayá jtarmëndama. Chca tcojamëse, chë tsëm entšayá jtsandbemana, y chë tcojuatëtšë entšëjua chë tanguájuañe ndoñe tšabá ntsinýnana.

<sup>37</sup> Y cach ndoñe, chë tojtseshayana vínoye tanguá jasabenguiñe ntjataftsuámayana.

Tcojuafsuamasna, chë jasabenga jtseshébëfjuana y chë vínoye jtsabuáshanana; y chca, chë vínoye y chë jasabenga tondayama ntjatoservénana. <sup>38</sup> Chíyeca co, chë tojtseshayana vínoyna tsëm jasabenguiñe juafsuámana. <sup>39</sup> Ndocná, chë bóchena vínoye tojatëmo y chentšana játsbošana chë tojtseshayana vínoye jatofsiyana; cha jayanana: ‘Chë bóchena vínoye tša tšabeye ca.’”

## 6

### *Jesusbe uatsjédayënga ochnayté trigo tmojanátabebe*

(Mt 12.1-8; Mc 2.23-28)

<sup>1</sup> Canye ochnayté, Jesús canye jajajana yojtsaye; chabe uatsjédayënga trigo imojtsaiuatabnaye, imojtsaiúshenëcaye, y imojtsaiuasaye. <sup>2</sup> Chë causa, básefta fariseunga tmojanatjaye: —¿Ndayeca šmojtsama chë ochnayté jamama ndoñe quenátslesenciana soye ca?

<sup>3</sup> Y Jesús tojanéjua: —¿Ndoñe šmëndualía y šmondétatšëmbo, ntšamo rey David y chabe enutënga tmojanmama shéntseca imojtsemna ora y jasama yojtsëjaboto ora? <sup>4</sup> Chca orna, David Bëngbe Bëtsabe bëts yebnentše yojámashëngo y chë Bëngbe Bëtsá chentše yojamnama inýinýnaye tandëšënga yojase, y chë cháftaca imojánajna entsángnaca yojátšataye. Y chë tandëšna nýe bachnanga belesenciana jasama. Masque David chca yojama, Bëngbe Bëtsá chora ndoñe tonjánayana David canye bacna soye tojanma ca —Jesús tojanéjua.

<sup>5</sup> Y Jesús más tojanéyana: “Chë Bëngbe Bëtsá Entšá tbojanbemá, chë entsá ochnayté tojtsama sóynaca jtsemándayana ca.”

### *Chë buashana cucuatše bomna entsá*

(Mt 12.9-14; Mc 3.1-6)

<sup>6</sup> Inýe ochnayté, chë judiëngbe enefjuana yebnoye Jesús tojánamashëngo y tojanontsé jabaúambana. Y chentše yojtsemna canye entsá, catšbioica cucuatše buashanëtše bomná; <sup>7</sup> y chë ley abuátambayënga y fariseunga chiñe imojtserrondana jinýama nderado Jesús chë ochnayté chábioye tabuanjashna, as chca chënga jtsebomnama ndaye sóyeca Jesús mal jaquédana. <sup>8</sup> Pero Jesús chëngbe juabna yojtsetátšëmbo; asna chë buashana cucuatše bomna boyabásabioye tbojanianyana: “¿Motsbaná y chentše tsëntsaca motsa ca!” Y chë entsá yojotsbaná y entsangbe tsëntsaca yojotsaye. <sup>9</sup> Chora Jesús chë inýengbioye tojanéyana: “¿Ndayá yojtselesenciana ochnayté jamana, canye tšabe soye o canye ndoñe tšabe soye? ¿Jatsbocana o jtsepochócana ca?”

<sup>10</sup> Y nýetscanga chabe chabuajana imojtsemnënga tojanënyänýé, y chë buashana cucuatše bomnábioye tbojanianyana: “Macuenýänëjaná ca.” Y chë boyabása tojanacuenýänëjaná, y tšabá chëtša yojtsatamna. <sup>11</sup> Pero chë inýengna puerte tmojanotjyaná, y tmojanontsé enatsëtsnayana ndayá muanjobenaye Jesusbe contra jamana ca.

### *Jesús chë bnétsana uta uatsjédayënga tojanabacacá*

(Mt 10.1-4; Mc 3.13-19)

<sup>12</sup> Chë tempo, Jesús tjoye tojána Bëngbe Bëtsáftaca jencuéntama; y nýets ibeta cháftaca tbojanencuentá. <sup>13</sup> Tojanbinýna ora, chabe ústonënga tojánachembo, y chënguentšana tojanëbuáyana bnétsana uta uatsjédayënga, chë ndëmuanýënga “chabe ichmónënga cánaca” tojanëbobaye. <sup>14</sup> Chënga imojamna: Simón, chë Pedro cánaca Jesús tbojanabobayá; Andrés, Simonbe catšata; Santiago y Juan, Felipe y Bartolomé, <sup>15</sup> Mateo y Tomás, Santiago, Alfeobe uaquiñá; Simón, chë celote ca uabobainá; <sup>16</sup> Judas, Santiagbe uaquiñá; y Judas Iscariote, chë más chcoye, Jesús uayayëngbe cucuatšiñe bochjanboshjoná.

### *Jesús ba entsánga yojanabuatambá y yojánashnaye*

(Mt 4.23-25)

<sup>17</sup> Chentshana, Jesús chéngaftaca chë tjocana tojtantsmá y canye jachañe tojanoquedá ba chabe ustonéngaftaca y ba inye entsángaftaca. Ba entsanga choye tmojánabo Judeocana, Jerusalenocana y Tiro y Sidón, chë mar béjaye béconana pueblénguentšana, Jesúsbioye oído jabuájuama y chéngbe šocanéngama chauashnama. <sup>18</sup> Y chábeyeca chë bacna bayëjbe juabna uambayënga tšabá imojtsatsmëna. <sup>19</sup> Njetsca entsanga tša imojtseboše y ndayánaca imojtsama Jesús jabojuama, er chábentshana bëts obenana yojsóvocana y njetscanga yojsashnaye.

*Chë ndegombre oyejuayana bomnénga y ndëmuanyëngbiama tša lastema yochtsemna (Mt 5.1-12)*

<sup>20</sup> Jesús chabe uatsjédayëngbioye tojanontješé y tojanéyana: “Puerte oyejuayënga tsëngaftanga, chë quem luarentša soyënga ndbomnénga, er Bëngbe Bëtsabe amëndayentša soyënga tsëngaftangbiama entsemna ca.

<sup>21</sup> “Puerte oyejuayënga tsëngaftanga chë mora oshëntsiyënga, er becá šmochantóshachaye ca.

“Puerte oyejuayënga tsëngaftanga chë mora šmošachenga, er chentshana šmochántsaténbiajuaye ca.

<sup>22</sup> “Puerte oyejuayënga šmochtsemna, entsanga chacmojtšébuayënja ora, chacmojtšatébuacana ora, chacmojtšëyanguá ora, y tsëngaftanga ndoñe tšabá šmontsama ca chënga chamojtsichamo ora, tsëngaftanga atšbe ústonënga bëtsemnama. <sup>23</sup> Chë te puerte šmochjóyejuaye, er celoca canye bëts uacanánana šmochántsebomna. Chéngbe bëts taitanga, cachcá chë Bëngbe Bëtsabe juabna oyebuambnayéngaftaca tmonjanma ca.

<sup>24</sup> “Pero jtša lastema tsëngaftanga bomnéngbiama, er mora oyejuayënga jtsemnama ya bëtscá šmojóyëngacñe ca!

<sup>25</sup> “¡Tša lastema tsëngaftanga chë mora shachanëngbiama, er shëntsana šmochántsebomna ca!

“¡Tša lastema tsëngaftanga chë mora oyejuayëngbiama, er ngménama šmochanjenóbošachna ca!

<sup>26</sup> “¡Tša lastema tsëngaftangbiama njetsca entsanga tšabá chamojtsoyebuambná ora; er cachcá chéngbe bëts taitanga monjánama chë Bëngbe Bëtsabe ndoñe ndegombre juabna oyebuambnayéngaftaca ca!” —Jesús tojanéyana.

*Chë uayayëngbiama bonshánana jtsebomnana (Mt 5.38-48; 7.12)*

<sup>27</sup> “Pero tsëngaftanga, átšbioye ouenanënga cbéyana: Tsëngaftangbe uayayënga šmochtsababuánjeshana; chë tcmojtsébuayënjëngbiama tšabe soyënga šmochtsama; <sup>28</sup> chë tsëngaftangbiama bacna soyënga bošëngbiama, Bëngbe Bëtsá šmochtseimpadana tšabe bendicionënga chamóyëngacñama; chë tcmojóyanguanguëngbiama, Bëngbe Bëtsá šmochtseimpadana. <sup>29</sup> Nderado ndánaca cánjóica tcmojajuebjantsetase, cochjomiye chë ínjóica cachcá chacmomama; nderado ndánaca quëfsaíya tcmojúabocana, cachcá cochjonýaye acbe shabuanguanéjuanaca chauetsácñama. <sup>30</sup> Ndánaca chacmojtjañábioyna, jatšetayana; y nda ndayánaca chacmojefcábioyna, ndoñe catjontšínýena chacmatoyema. <sup>31</sup> Inyëngaftaca šmochtsama, ntšamo chë ínýenga tsëngaftangaftaca chamotsamama šmojtsebošcá.

<sup>32</sup> “Tsëngaftanga, nýe chë tcmojtsababuánjeshanënga šmojtšababuánjeshanëse, ¿ndaye tšabe soye chca šmattsama?; er chë bacna entsángnaca chca mondbétsama. <sup>33</sup> O nderado, nýe chë tsëngaftangbiama tšabe soyënga tmojtsamëngbiama tšabe soyënga šmojtsamëse, ¿ndaye tšabe soye chca šmattsama?; er bacna entsángnaca chca mondbétsama. <sup>34</sup> O nýe chë cmochtëchenanguama šmojtsejuabnángbioye šmojúyentšamëse, ¿ndaye tšabe soye chca šmattsama?; er chë bacna entsángnaca mondbetsenántšami-ana, chéngbentshana cachcá jtóyëngacñama jtsobátmanëse. <sup>35</sup> Pero tsëngaftangna

cmontsamna chë uayayënga jtsababuányeshanana; y tšabe soyënga chëngbiamana jtsamana y júyentsamiana, chëngbentsana ndayánaca jtóyëngacñama ntjatobatmancá. Chca, tšëngaftanga uacanána cuenta canye bëts soye šmochanjóyëngacñe, y celoca endmëna Bëngbe Bëtsabe básenga šmochántsemna; Bëngbe Bëtsá chë ndochuanayëngaftaca y bacna entsãngaftácnaca tšabia comna. <sup>36</sup> Inyëngbiamana lastemadënga šmochtssemna, ntšamo tšëngaftangbe Taitá yomncá ca” —Jesús tojánayana.

*Ndoñe ntsichámuana chë ínÿenga tšabá o ndoñe tšabá tmonjamama*

(Mt 7.1-5)

<sup>37</sup> “Ndocá ínÿengbiamana šmattsichamo chë ndoñe tšabá tmontsamama, y Bëngbe Bëtsá ndoñe queochátichamo tšëngaftanga ndoñe tšabá šmonjama ca. Inyëngbiamana ndoñe šmattsichamo ndoñe tšabá tmonjama ca, y Bëngbe Bëtsá ndoñe queochátichamo tšëngaftanga ndoñe tšabá šmonjama ca. Inyënga šmochjáperdonaye y Bëngbe Bëtsá cmochanjáperdonaye. <sup>38</sup> Inyëngbioye šmochjatšataye y Bëngbe Bëtsá cmochántatšataye. Mo nda canye biaco medidiñe bëtscá tojajutjé, uashëshe y cmojtiyecá, Bëngbe Bëtsá cachcá cmochántatšataye. Ntšamo tšëngaftanga ínÿengbioye chašmojábiama, uabouana o ndoñe jabuache soyënga, Bëngbe Bëtsá cachcá tšëngaftangbioye cmochanjábiama ca” —Jesús tojánayana.

<sup>39</sup> Jesús quem cuéntnaca tojánayana jabuátambama: “¿Canye jtaná nantsobena inÿe jtaná jtsanachayama? ¿Chca ndoñe nÿets útata ndaye tbuabentše buanjótsatše? <sup>40</sup> Chë uatsjendayá ndoñe ntsemnana chë buatëmbayabiama más bëtscá. Pero chabe uatsjëndayana chaojapochocá ora, cach buatëmbayacá jtsemnana.

<sup>41-42</sup> “Canya chabe bominyiñe canye niñëfja tojtsebomnëse, cha ndoñe ntsobenana chabe catsátbioye jauyanana: ‘Acbe bominyëntšana canye polvështema jtsebuchjátsëcama šmolesenciá ca’. Natsana cha bontsemna cachabe bominyëntšana chë niñëfja jtsenobuchjátsëcana, tšabá jinÿama jobenayama, chabe catsátbe bominyëntšana chë polvotema jtsebuchjátsëcana. ¡Cachcá entsemna acbiama, bacna entsá chë ntšamo ndegombre tcojuabnacá ndinÿinÿayá! Chë tša bacna soye cojtsama ca acbe catsátbioye tcojauyana ora, cach aca tša bëtscá bacna soyënga cojtsamama ntjenujuaboycá; y chca, aca jamana canye bacna soye. Natsana cmontsemna chë cach aca ndoñe tšabe soyënga cojtsamama ngmënaca jshatenójuaboyana y chca amana jshétsajbanana, y chentšana cocayé cochantsobena acbe catsáta juajabuáchana ntšamo tšabá yomncá chaotsamama ca” —Jesús tojánayana.

*Tšabe betiye o ndoñe tšabe betiye tondmënana, jtsotatsëmbuana ntšamo tojashajoncá*

(Mt 7.17-20; 12.34-35)

<sup>43</sup> “Ndoñe queonÿbatsmëna, chë canye tšabe betiyeñe podescá soye jashájonana; ni canye ndoñe tšabe betiyeñe tšabe soye jashájonana. <sup>44</sup> Betiyënga jtsabuatomana ntšamo cada betiye tojtseshajcá. Uchmašëshentšana quenátotopodena higuëbé jocñana; ni uvašëša, shëshëntša betiyëntšana. <sup>45</sup> Chë tšabe entsana, chabe ainanoca tšabe juabnënga bomnëntšana jtsóyebuambnayana; y chë bacna entsana, chabe ainanoca ndoñe tšabe juabnënga bomnëntšana jtsóyebuambnayana. Er ndayá becá ainanoca tomnana entsá jtsóyebuambnayana ca” —Jesús tojánayana.

*Chë uta ucuatjoniñe*

(Mt 7.24-27)

<sup>46</sup> “¿Ndáyeca tšëngaftanga atše šmnétsatsaye, ‘Utabná, Utabná ca’, y ntšamo atše stsichamcá ndoñe ntsamana? <sup>47</sup> Cbochanjáuyana ndacá yomna nda átšbioye tojabo, atšbe palabra tojouena y ntšamo stsichamcá tojtsama: <sup>48</sup> Cha endmëna mo canye entsacá, nda canye yebna jajebuamna becá fshantse jashenoye yojajutjo y ndëtšbenguiñe yojúcuatjoye. Bëjayënga yojtsóftajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtšbenguiñe jabuache yojaúcuatjona. <sup>49</sup> Pero nda atšbe palabra tojouena y ntšamo stsichamcá ndoñe tontsama, endmëna mo canye

entsáca, nda canye yebna yojajebo nye fshantsiñe, tondayiñe ntjucuatjoycá. Béjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

## 7

*Jesús canye Romano soldadëngbe amëndayabe bochichnayábioye tbojanshná*

(Mt 8.5-13)

<sup>1</sup> Entšángbioye chca jáuyanana tojanpochocá ora, Jesús Capernaum puebloye tojána. <sup>2</sup> Chentše yojoyena canye romano soldadëngbe amëndayá. Cha ibnabomna canye bochichnayá puerte bonshaná, y chora cha šocá yojtsemna, ya jtsóbanama. <sup>3</sup> Jesús ba šoquëngbioye yojáshnama encuéntayana chë amëndayá yojouena ora, báseftanga bëtšëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnáñama. <sup>4</sup> Chënga Jesúsbioye tmojánashjango y tša imojtseimpadana, mëntšá: “Quem soldadëngbe amëndayá merecido entsebuájona chacotsájabuachama; <sup>5</sup> er cha bëngbe luarentša entšángbioye corente endábabuanýeshana, y cachá chë bëngbe enefjuana posada šonjayentšjebo ca.”

<sup>6</sup> Jesús chëngaftaca tojána. Pero chë mandayabe yebnoye imojtsebeconá ora, chë soldadëngbe amëndayá básefta amiguënga yojichamuá, Jesúsbioye mëntšá chamuauyanama: “Atšbe Utabná, ndoñe yapa matenócochinýenana átšbioye jabama. Atše merecido taitsatobuajoñe aca atšbe yebnoye chacuamashënguama; <sup>7</sup> chíyeca ni mo añemo chiyatentšetá jama aca jajébenguama. Morna nye cochjayana y atšbe bochichnayá tšabá echántatsmëna. <sup>8</sup> Er atše sëndábamna átšbioye mándayënga y átšnaca soldadëngbe amëndayá sëndmëna. Atše canye soldádbioye stjauyana ‘motsa ca’, cha cachora jana; y ínýabioye stjauyana ‘mabo ca’, cha cachora jabana; y nderado atšbe bochichnayábioye ndayánaca chaomama stjamánda, chánaca cachora chë soye jamana ca” —cha yojáuyana.

<sup>9</sup> Jesús chca tojanuena ora, chë mándayabiama yojenjnaná, y jobuértanëse chë ba entsanga cha ustonëngbioye tojanéyana: “Ndegombre cbéyana, ni mo nyets Israelentše, ni canya quem boyabasacá tša ošbuachiyá chiyátinýena ca.”

<sup>10</sup> Y chë ichmónënga yebnoye tmojtaná orna, tmojáninýena chë bochichnayá ya tšabá yojtsatsmëna.

*Jesús tojanma canye viudabe uaquiñá cháuatayenama*

<sup>11</sup> Chca tojanopasá chentšana, Jesús yojétsaye Naín ca uabaina puebloye, y cháftaca chabe uatsjëndayënga y ba entsanga imojtsaye. <sup>12</sup> Chë pueblo amashjuanoye yojtsebeconá orna, entsanga chë pueblentšana canye obaná imojtsábocana jauátbontsama; chë obaná canye viudabe uaquiñá inamna y nye cha uaquiñá. Bëtscá entsanga chë obanabe mamá imojtsetjëmbambnaye. <sup>13</sup> Bëngbe Utabná chë viudábioye tbojáninýe ora, chabiamama tbojanongmé y tbojanianyana: “Ndoñe matošachena ca.”

<sup>14</sup> Y jobéconase, chë ataúše tojánbojajo, y chë obaná atambayënga tmojantsá. Y Jesús chë obanábioye tbojanianyana: “Bobontse, atše cbéyana: ¡Matëtsbaná ca!”

<sup>15</sup> Chora chë obaná tojtantsbaná y tojanontsé oyebuambnayana; y chabe mamábioye Jesús chë bobontse tbojtánatse. <sup>16</sup> Nyetsca entsanga tša uatjana yojubuaache chca tmojáninýe ora, y Bëngbe Bëtšá imojtsatschuanaye, mëntšá jayanëse: “Bëngbentše canye Bëngbe Bëtšabe juabna oyebuambnayá cuatënjonýná ca.” Y mëntšánaca: “Bëngbe Bëtšá tojabo chabe entsanga jabújabuachama ca.”

<sup>17</sup> Y nyets Judea luarëjana y chë chábuañe luarenache entsanga imojátatšëmbona ndayá Jesús tojanmama.

*Juan chë Ubayanabe ichmónënga*

(Mt 11.2-19)

<sup>18</sup> Juan, lempe ntšamo Jesús yojtsamama yojátatšëmbona; er chabe ústonënga chama tmojancuentá. As Juan, chënguentshana útata tojánachembo, <sup>19</sup> y Jesúsbioye yojichamuá



jatjayama cha tayojamna chë Cristo, chë jabama ibojanmëná, chë Uámana Uabuayaná, o ínÿabiama jatobátmama tayojétsamna ca. <sup>20</sup> As chë Juanbe ichmónënga Jesúsbioye tmojanobeconá y tmojanianyana: —Juan chë Ubayaná šonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna ínÿabiama jatobátmama ca.

<sup>21</sup> Chë ichmónata tbojánashjango ora, Jesús banga yojtsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojtsatëbinÿna. <sup>22</sup> Chora Jesús mëntšá tojanéjua: —Motsata y Juánbioye šochjauyana ntšamo šojinÿe y šojouencá: Chë jtanënga tšabá entsatëbinÿna, chë coshetënga tšabá montsatana, chë bacna nguayanánaca šoquënga shnánënga montsatsmëna, chë tësmënga montsuenana, chë obanënga tmontayena, y chë ndbomnjëmëngbioye chë tšabe noticiënga montsabuyiyná. <sup>23</sup> ¡Puerte oyejuayá chaotsemna, nda atše ndoñe bacna soye stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanéyana.

<sup>24</sup> Chë Juanbe ichmónata chentšana tbojésanbocnentšana, Jesús tojanontšë Juanbiamana entsanga jáuyanana, mëntšá: “Juan jinÿama šmojánbocna ora, ¿ndayá jinÿama šmojánbocana entsanga ndoyena luaroye? ¿Canÿe entsá ainaniñe tondaye añemo ndbomná, mo canÿe šëše bínÿiaca shatiyeynëšcá? <sup>25</sup> Y ndoñese, ¿ndayá jinÿama choye šmojánbocana? ¿Canÿe boyabása uámana entsayaca bopormaná? Ndoñe. Tšëngaftanga šmondétatšëmbo chë uámana entsayaca bopormánënga y chë bëtscá bomnánaca nÿe tondayama ntsecochinÿencá vida bomnëngna, reyëngbe yebnënguiñe mondbëtsiyenama. <sup>26</sup> Asna, ¿ndayá jinÿama choye šmojánbocana? ¿Canÿa Bëngbe Bëtsabe juabna oyebuambnayá? Ndegombre; y cbéyana, canÿa Bëngbe Bëtsabe juabna oyebuambnayabiamana más bëtsá. <sup>27</sup> Cha, Juan, endmëna ndabiamana Bëngbe Bëtsá chabe uabemana palabrënguiñe tojánayana mo chabe ichmonacá, mëntšá tojánayana ora: Cristo, atšbe entsá natsana sënjichmó acbiamana chaóyebuambama, entsanga jábuayenama aca jabama ainaniñe tšabe juabnéngaca chamotseprontánama ca.

<sup>28</sup> Ndegombre cbéyana: Nÿets tempo entsángbeñe, ndocná quenátsmëna Juan chë Ubayanabiamana más bëtsá; masque chca, Bëngbe Bëtsabe amëndayoca chë más batšá uamaná, cha más bëtsá echántsemna ntšamo mora Juan yomnama ca” —Jesús tojánayana.

<sup>29</sup> “Nÿetsca entsanga chca Juánbioye tmojanóyeunanga y chë Romocama entsángbioye impuesto atjanayëngnaca, nÿets ainánaca tmojánayana Bëngbe Bëtsá nÿetsca soyënguiñe tšabá amá yomna ca; er tmojánenabaye ntšamo jubáyama Juan yojanamancá. <sup>30</sup> Pero chë fariseunga y ley abuatambayënga, ntšamo jubáyama Juan yojanamancá jóyëngacñama ndoñe tmonjánbošena ora, tmojtsanaboté ndayá Bëngbe Bëtsá chëngbiamana jamama yojanjuabnacá.”

<sup>31</sup> Jesús mëntšánaca tojánayana: “Cbochanjáuyana ndayacá morsca entsanga imomna, y ndayëngcá chënga imomna. <sup>32</sup> Chënga mondmëna mo chë plazëngoca mondbetssetbiámana basetemëngcá; chëngna mëntšá jabuache jtseñatsayana: ‘Tšëngaftangbiamana fsënjaflautá y ndoñe chešmatslantsá; ngmëñaca fsënjaversiá y ndoñe chešmatenóbošachna ca.’ <sup>33</sup> Juan chë Ubayaná tonjánabo y ndoñe quenjatamana bëtscá entsángbeñe jtsemnana, ni tandëše jasana, ni vínoye jofšiyana; y tšëngaftanga šmontsichamo chana bacna bayëjbe juabna uambayá inamna ca. <sup>34</sup> Morna, chë Bëngbe Bëtsá Entšá tbojanbemá tonjabo y chana aíñe entsamana bëtscá entsángbeñe jtseyayana y jtsofšëšnayana, y tšëngaftanga chabiamana šmontsichamo: ‘Chana yapa uasayá y vínoye tmoyá entsemna y Romocama entsángbioye impuesto atjanayënga y bacna soyënga amëngbe amigo ca’. <sup>35</sup> Pero Bëngbe Bëtsá endbëtsinÿinÿnaye cha nÿets osertánana bomná yomnama, chë ndayá cha tojama ora ndayá chentšana inobocna soyëngaca ca” —cha tojánayana.

*Jesús, chë fariseo Simonbe yebnentšë*

<sup>36</sup> Canÿe fariseo Jesúsbioye tbojanofja saná jauasama, y Jesús chabe yebnoye tojána y meséshentše yojótbema. <sup>37</sup> Chë pueblentše yojamna canÿe shembása, bacna vida bomná. Jesús chë fariseobe yebnentše yojtsesama chë shembása yojátatšëmbona; as cha chë yebnoye tojánashjango y tojanamba canÿe alabastro botellëše, jútjena canÿe botamana uanguëtše béjayeca. <sup>38</sup> Jesusbe shecuatšentše yojoshëntsamentšiye, šachénaca; shëchbuíyeca chabe shecuatšënga yojtsefchecuacná y cachabe stjënashaca ibojtsatsshécbojuaye. Chabe shecuatšënga yojtonguëtsëntšiye y chë botamana uanguëtše béjaye ibojtshëcbuëscacja. <sup>39</sup> Chë fariseo Jesúsbioye ofjaná chca tojáninÿe ora, mëntšá Jesusbiana yojtsejuabnaye: “Cha ndegombre canÿe Bëngbe Bëtsabe juabna oyebuambnayá tojtsemnëse, nantsetátšëmbo nda y mocna shembása yomna chë bontsebana shembása: canÿe bacna vida bomna shembása ca.” <sup>40</sup> As Jesús chë fariséobioye tbojaniana: —Simón, cuentado palabra šmotsoyeuná ca.

Y chë fariseo tbojanjá: —Arseñor, Buatëmbayá ca.

<sup>41</sup> Y Jesús tojánayana: —Canÿe entšá crocénana uyentšamianá, uta ndebénata yojánabamna. Canÿa shachna patse denario crocénana ibojandebena, y chë ínÿana, shachna bnëtsana. <sup>42</sup> Pero chë útata tondaye ibontsebomna ndayentšana cha jëtšëntšabuáchiyama; as chë uyentšamianá nyets útata chë ndebénana yojtsaperdónaye.

Chora chë fariséobioye tbojaniana: —Mora šmëyana, ¿chë útatentšana nda más chë uyentšamianábioye buantsebobonshana ca?

<sup>43</sup> Y Simón tbojanjá: —Atše šontsinÿana chë más bëtsca ndebená ca.

Y Jesús tbojaniana: —Ndegombre, ntšamo endmëncá tcjayana ca.

<sup>44</sup> Jesús, chë shembásabioye jontješiyëse, Simónbioye tbojaniana: —Minÿe quem shembása. Atše acbe yebnoye sënjamashëngo y aca búyeshe ndoñe chešcatabuätšetá atšbe shecuatšëngama. Y quem shembásana, cachabe shëchbuíyeca šontseshecjabebé y chabe stjënashaca šontseshecbojó. <sup>45</sup> Ndoñe chešcatámocho, pero cha tonjamashëngo orscana ndoñe ntjájbana atšbe shecuatšënga onguëtsëntšnaye.

<sup>46</sup> “Aca bestšašiniñe aceitiye ndoñe chešcatsbuešcja, y chana aiñe botamana uanguëtše béjaye šonjashëcbuešcja. <sup>47</sup> Chcasna atše cbëyana, cha šonjinÿanjé atšbiana corente bonshánana yojtsebomna, er atše chabe bëtsca bacna soyënga sëntseboperdoná; pero nda nÿe básefta bacna soyëngama stjaperdóna chana, nÿe batšatema bonshánana jtsebomnana ca.”

<sup>48</sup> Y chora Jesús chë shembásabioye tbojaniana: “Acbe bacna soyëngama perdonaná contsemna ca.”

<sup>49</sup> Chora chë ófjanënga chentše innatbiámanëngna tmojanontsé enatsëtsnayana: “¿Nda quem entšá yojtsemna, chë bacna soyëngámnaca entšángbioye jtsaperdónayana ca?”

<sup>50</sup> Y Jesús más chë shembásabioye tbojaniana: “Aca átšbeñe icošbuachéyeca, atsbočaná cochántsemna; natjëmbana motsatoñe ca.”

## 8

### *Chë Jesúsbioye imojanájabuachana shembásenga*

<sup>1</sup> Chca tojanopasá chentšana, Jesús bëts y base pueblënguëjana yojánana, tšabe noticiënga Bëngbe Bëtsabe amëndayama entšanga abuátambaye y abuayiynaye. Chë bnëtsana uta uatsjëndayëngna cháftaca imojtsajna. <sup>2</sup> Básefta shembásëngnaca imojtsetjëmbambnaye; chëngbentšana Jesús bacna bayëjënga tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentšana Jesús canÿsëfta bacna bayëjënga tojtanëbuacna; <sup>3</sup> Juana, Cuzbe shema (Cuza yojamna rey Heródesbe canÿe uajabuachaná); Susana y inÿe shembásenga; chëngna chë imojánbomna soyëngaca chëngbioye imojanéjabuáchana.

*Chë jenabe cuento*  
(Mt 13.1-9; Mc 4.1-9)

<sup>4</sup> Ba pueblënguentshana mallajta entsanga tmojánbocana Jesús jinýama. Ba entsanga jouenama tmojanobeconá ora, Jesús mëntšá tojanacuntá: <sup>5</sup> “Canýe, canýe jená jénaye jaujuéshama yojéftsebocna. Yojtsëjquëshaye orna, básefta jénaye benache juachañe yojuatquécjana; chiñna entsanga imojtsebotájaye, y jaja shloftšënga imojástjajna y imojtsósañe. <sup>6</sup> Inýe meshëngna ndëtsbenguiñe yojuatquécjana. Yojuábocna orna, betscó yojtsábojo, chë fshantsiñe ndoñe yapa búyeshe yonjamna causa. <sup>7</sup> Inýe meshëngna ucmëshangañe yojuatquécjana y chë ucmëshangá lempe yojtsatscué, chë jénayeca cánýiñe yojuábocna ora. <sup>8</sup> Inýe meshëngna, uanguaniñe yojuatquécjana. Yojuájua orna, bëtská yojuashájona; canýe jénayentshana nýa mo patse meshënga yojuashájona.”

Jesús chca jacuéntama tojanpochocá ora, tojanáyebuachena: “Chë jouenama tmojt-sobenënga, šmochjouena ca.”

*Ndáyeca Jesús cuenténgaca yojánabuatambaye*

*(Mt 13.10-17; Mc 4.10-12)*

<sup>9</sup> As chora chabe uatsjëndayënga tmojantjá: —¿Ntšamo chë cuento yojtsayana ca?

<sup>10</sup> Y Jesús tojanéyana: —Bëngbe Bëtsá tšëngaftanga cmontsinýanýná nýetsca chë mo iytëmencá yomna soyënga chabe amëndayama, pero chë ínýengbioyna ndoñe; chë soyëngama chënga lempe cuenténgaca sentsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinýama; y masque beca quem soyënga chamouena, ndoñe queochátësertana ca.

*Jesús chë jenabe cuentama tojanabuayená*

*(Mt 13.18-23; Mc 4.13-20)*

<sup>11</sup> “Chë cuento mëntšá endayana: Chë jénaye Bëngbe Bëtsabe palabra entsemna. <sup>12</sup> Chë benache juachañe yojuatquécjana básefta jénaye endayana chë básefta entsanga Bëngbe Bëtsabiamá soyënga tmojouenënga; pero chora Satanás betscó jabana chënga Bëngbe Bëtsabe palabra jabétsabuajuanama, chca, chënga ndoñe chamondëtsošbuáchema y bacna soyënguentshana ndatsebácanënga chamotsemnana. <sup>13</sup> Inýe entsanga mondmëna mo chë ndëtsbenguiñe yojuatquécjana jenaycá. Chë entsangna Bëngbe Bëtsabe palabra jouenana y oyejuayënga jtsemnana. Pero ndoñe nýets tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, cha ndoñe yapa tmontsašbuaché causa. Inýenga mochantsébuayënja y Bëngbe Bëtsábeñe betsošbuáchiyama mochanjasúfrianga; chë causa, Bëngbe Bëtsabe palabra cachcá chënga mochanjesonýaye. <sup>14</sup> Inýe entsanga mondmëna mo chë ucmëshangañe yojuatquécjana jenaycá. Chëngna Bëngbe Bëtsabe palabra jouenana, pero quem luarentša soyéngaca oyejuayënga jtsemnana yapa jesenójuabnayana, y mallajta crocénana y ba soyënga jtsebomnana yapa jésebošana; chama y ba soyëngama yapa enócochinýena causa, Bëngbe Bëtsabe soyëngama echantsebnétjomba y ndoñe quemochátama ntšamo Bëngbe Bëtsá tojayancá. <sup>15</sup> Inýe entsangna mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; tšabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canýe betiye puerte tšabá tojtseshajuancá, chënga bëtská tšabe soyënga Bëngbe Bëtsabiamá mochántsama. Chca mochántsama, Bëngbe Bëtsábeñe jtsošbuáchiyëse y nýetsca soyënguñe puerte uantadënga jtsemnëse ca” —Jesús tojanabuayená.

*Chë uajuinýanëshama cuento*

*(Mc 4.21-25)*

<sup>16</sup> “Ndocná canýe uajuinýanëshá juajuínýenana, chentshana ndaye sóyeca chësha jtsëstama o jutsnésha tajsoye jtsajájuama; juajuínýenana ndayá tsbanánoca juajájuama, chë luarentše amashjuanëngbiama chaotsebínýnama. <sup>17</sup> Er ndocna yoiytëmena soye,

ntjinýcá queochaisoquéda, y chë entsangbiamá ndótatsëmbo soye, ntsotatsëmbo cá queochaisoquéda.

<sup>18</sup> “Chcasna, botamana šmochjouena, er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama ndoñe tontsebošá, chë nýe batšá ibosertana soyëngama bochantseb-natjëmba ca” —Jesús tojánayana.

*Chë Jesusbe ndegombre pamíllanguentsënga*  
(Mt 12.46-50; Mc 3.31-35)

<sup>19</sup> Chora, chabe mamá y chabe catšátanga chë Jesús yojtsemnentše tmojánashjajna, pero ndoñe imontsobena chábioye jobéconana, yapa entsanga causa. <sup>20</sup> As canýa Jesúsbioye mëntsá tbojaniyana: —Acbe mamá y acbe catšátanga shjoca montsemna y montseboše aca jinýama ca.

<sup>21</sup> As Jesús tojánayana: —Chë Bëngbe Bëtsabe palabra tmojouenënga y ntšamo tmojouencá tmojtsamënga jtsemnana atšbe mamá y atšbe catšátanga, atšbe ndegombre pamíllanguentsënga ca.

*Jesús chë binýia y chë béjaye bonguana yojétsbema*  
(Mt 8.23-27; Mc 4.35-41)

<sup>22</sup> Canýe te, Jesús chabe uatsjéndayëngaftaca canýe barquëshoye tojánamashëngo y chënga tojanéyana: “Uafjónaye chenguana cuajna ca.”

As tmojána; <sup>23</sup> y imojtsenachnëjuanëntscuana Jesús yojtsomaná. Ndeolpe, chë béjayiñe corente jabuache binýia yojóshjango y yojontšé béjaye chë barquëshoye jt-sobuajútjiana. Y chca, chëngbiamá puerte resjo yojtsemna. <sup>24</sup> Chora chë uatsjéndayënga tmojána Jesús jetsefšenama y mëntsá tmojaniyana: —¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binýia y chë bëts olëshëngoye tojanmandá: “Bonguana šochtsemna ca.” Y chë binýiayana tojanéjbana y lempe bonguana yojtsatsmëna.

<sup>25</sup> Chentšana Jesús chabe uatsjéndayënga tojanéyana: —¿Bëngbe Bëtsá tšëngaftanga jujabuáchama yobenama, cabá ndoñe šmontsošbuaché ca?

Y chënga auatjanánënga y ojanánënga mëntsá imojtsenatsëtsnaye: —¿Nda quem boyabása yomna? ¡Cha tojamandá ora, masque chë binýia y chë béjaynaca joyeunayana ca!

*Chë Gerasa luaroca bacna bayëja uambayá*  
(Mc 8.28-34; Mc 5.1-20)

<sup>26</sup> Chentšana Gerasa ca uabaina luaroye tmojánashjajna, Galilea ndirichiñe. <sup>27</sup> Jesús fshantsoye tojánastjango ora, chë pueblcana canýe entsá chábioye tojánabo. Cha ya bayté bayëjbe juabna yojtsebomna, ndocna entsáyá yonjanichétjona; y yebniñe ndoñe yonjaniyena, sinó obanëngbe cuevëshënguenache. <sup>28</sup> Chë entsá, Jesúsbioye tbojáninýe ora, chabe natsanoica yojoshëntsamentšiyey y mëntsá yojtsáyebuache: — ¿Ndayá átšeftaca cojtseboše, Jesús chë celoca Bëngbe Bëtsabe Uaquiñá? ¡Diosmanda ndoñe šcatjatsetšená ca!

<sup>29</sup> Chca tbojaniyana, er Jesús tojanmandá chë bacna bayëjbe juabna chábentšana chaueseboconama. Ba soye chë bayëja yojánama chë entsá ndoñe tšabá chaotsemnama. Chë entsanga imojuamana cucuatšentšana y shecuatšentšana cha jtsëtsbuayana bonguana chaotsemnama, pero chana jtsatabebiana, y chë bacna bayëjbe mándoca entsanga ndoyena luarëngoye yojánachana. <sup>30</sup> Jesús chë boyabásabioye tbojantjá: — ¿Ntšamo cabaina ca?

Y cha tbojanjuá: —Atše sënduabaina Legión ca.

Cha chca tojánayana, er chábeñe ba bacna bayëjënga tmojánamashjna. <sup>31</sup> Y chë bayëjënga Jesús tmojanimpadá, chë corente uabouana tboye ndoñe chaondíchamuama.

<sup>32</sup> Chentša béconana ba cotšënga imnajena, tjoca imnëtsosañe; as chë bayëjënga

Jesús tmojanimpadá chë cotšéngbeñe jamashjna chaulaesciama, y Jesús aíñe chca tojanalesenciá. <sup>33</sup> As chë bayëjénga chë entsábentšana tmojésanbocana y chë cotšéngbeñe tmojánamashjna; y chentšana, chë cotšénga batsjocana peñëšëjana uafjajónayoye imojtsoshbuetše y vojtsatajo.

<sup>34</sup> Chë cotšénga anjénënga chca yojobásama tmojáninje ora, chentšana tmojtsanacheta y tmojána chë soye jacuéntama chë pueblota y chiñe luarenache. <sup>35</sup> Entšanga tmojánbocana ndayá tojanopasacá jinýama, y Jesús vojtsennoye tmojánashjajna ora, tmojáninje chë entsá chë ndábentšana bayëjénga tmojtanbocna, Jesusbe shecuatšentše vojtsótbemañe, entsáyá uichëtjoná y chabe nyets juábnaca. Y chë entsanga chama corente imojouatjaná. <sup>36</sup> Ntšamo yojobasacá tmojáninýëngna entsángbioye tmojanacuntá ntšamo chca chë bacna bayëjbe juabna uambayá chora ya tšabá vojtsatsmënana. <sup>37</sup> Chentšana, nyetscanga chë Gerasa luarentše oyenënga Jesúsbioye imojtseimpadana chë luarentšana ínjoye chaotsoñama, er chënga corente imojtsauatja. As Jesús chë barquëshoye tojtanamáshëngo y chentšana tojtsanoñe. <sup>38</sup> Chë entsá chë ndábentšana bacna bayëjénga tmojtanbocana, Jesúsbioye tbojanimpadá cháftaca jama chabolesenciama; pero cha ndoñe tbonjanlesenciá. Jesús tbojanmandá chauatoquedama y mëntšá tbojaniana: <sup>39</sup> “Acbe yebnoye motsatoñe y cochjácuntaye lempe ntšamo Bëngbe Bëtsá acbiana tojamcá ca.”

Chentšana chë boyabása vojtsatoñe, y nyets pueblëjana tojanacuntá ntšamo Jesús chabiana tojanmcá

*Jesús canye shembásabioye tbojanshná y tojanma Jairëbe bembetema cháuatayenama (Mt 9.18-26; Mc 5.21-43)*

<sup>40</sup> Jesús chë uafjajónaye chenguánoica tojtanashjango ora, nyetsca entsanga oyejuayénga tmojtanofja, er nyetscanga chabiana imojanobátmana. <sup>41</sup> Chora tojánashjango canye entsá, Jairo ca uabainá. Cha inamna chë pueblentše chë judiëngbe enefjuana yebnentša mandayá. Jesusbe shecuatšentše vojshëntsamentšiye y ibojtseimpadana chabe yebnoye cháuama; <sup>42</sup> er chë nye canye bembe cha ibnabomná, bnëtsana uta uata bomná, chora ya jóbanama vojtsenma.

Y Jesús vojtsayëntscuana, chë entsanga chábioye imojtsojuatsëntšenaye. <sup>43</sup> Chë entsanguentše vojtsaye canye shembása, oboftjajuanánaca šocá; cha ya bnëtsana uta uata chca inapadecena. Lempe ntšamo yojanbomncá ashnayëngbioye atóbocayiñe vojtsepochóca, y ndocná yonjobenaye cha jáshnana. <sup>44</sup> Chë shembásana stëtšaicana Jesúsbioye vojbeconá y chabe entsáyá sibujua tojanábojajo. Y cachora chë oboftjajuanana ibojtsobojuána. <sup>45</sup> Chora Jesús tojanatjá: —¿Nda šjabojajo ca?

Nyetscanga imojtsichamo ndoñe ca; as Pedro tojánayana: —Buatëmbayá, entsanga cmontsatsëntšená y cmontsayájuatsëntšenaye ca.

<sup>46</sup> Pero Jesús cachiñe tojánayana: —Pronto nda šjabojajo, er atše sënjasenté obenana átšbentšana jóbocnana, mo nda stjashna orcá ca.

<sup>47</sup> Chë shembása tojáninje Jesús vojtsatšëmbo cha tbojánbojajuama. As chora, ngmëmnyá tojána y Jesusbe shecuatšentše vojshëntsamentšiye; y nyetscangbe delante tojanobuambá, ndáyeca tbojánbojajuama, y ntšamo cachora tšabá tojtanoquedama.

<sup>48</sup> Chora Jesús tbojaniana: —Bembe. Bëngbe Bëtsábeñe icošbuachéyeca shnaná contsatsmëna. Natjëmbana motsatoñe ca.

<sup>49</sup> Jesús cabá vojtsóyebuambnantscuana, chë judiëngbe enefjuana yebnentša mandayábocana canya tojánashjango, y chë mandayábioye tbojaniana: —Acbe bembe ya tontsobana; ndoñe más chë Buatëmbayábioye matëbëyabomana ca.

<sup>50</sup> Pero Jesús chë soye tojanuena; as chë mandayábioye tbojaniana: —Ndoñe matauatjana. Nye Bëngbe Bëtsábeñe cochtsošbuáchiye y acbe bembe tšabá echantsatsmëna ca.

<sup>51</sup> Chë yebnoye tmojánashjajna ora, Jesús ndoñe tonjanalesenciá banga choye jamashjna, nye Pedro, Juan y Santiago y chë shembásetembe bëtsétsatna aíñe. <sup>52</sup> Nyetscanga

imojtsenóbošachiye y ngménaca imojtsóyebuambnaye, pero Jesús tojanéyana: “Ndoñe matenóbošachengana. Cha ndoñe chenatóbana; cha nye endétsomañe ca.”

<sup>53</sup> Chë entsánga Jesúsbioye nye imojtsáfchaye, er chénga imojtsetátšëmbo chë shembásetema obaná yojétsemnama. <sup>54</sup> Chora Jesús chábioye tbojanábuacueshache y jabuache tbojaniyana: “¡Shembásetema, matétsbaná ca!”

<sup>55</sup> Y cha tojtanayena y cachora tojtantsbaná; y Jesús tojanamëndá chë shembásetema saná chamuajuatšé, chaosama. <sup>56</sup> Chë shembásetembe bétšétsata puerte ojnanánata ibojtsemna; y Jesús tojanamëndá, ndayá tojanopasama ndocnábeñe ntsecuéntayana.

## 9

*Jesús, chabe uatsjéndayënga tojanichamó, Bëngbe Bëtsabe améndayama jábuayenama*  
(Mt 10.5-15; Mc 6.7-13)

<sup>1</sup> Chentšana, Jesús chabe bnétsana uta uatsjéndayënga tojánachembo, y mando y obenana tojanatšatá bacna bayëjënga entsángbentšana jtëbuacanama y šocanëngama jashnayama. <sup>2</sup> Tojanichamó Bëngbe Bëtsabe améndayama jábuayenama y entsángbioye jashnayama. <sup>3</sup> Y mëntšá tojanéyana: “Benachiñama tondaye šmattsambaye: ni jatjonëfja, ni shecnaja, ni saná, ni crocénana; ni inye entséjua jenotrócama cach ndoñe. <sup>4</sup> Canye yebnentše posada chacmojúyentšame ora, chentše šmochjoquéda inye puebloye játantscuana. <sup>5</sup> Nderado ndayentše posada ndoñe chacmonjuyentšame, chentšana šmochjésebocana y shecuatšentša polvëshe šmochjésenstoto, chca, chéngbioye jinýanýiyama chénga ndoñe tšabá tšëngaftangaftaca tmonjamama ca” —Jesús tojanabuayená.

<sup>6</sup> Asna chë uatsjéndayënga tmojëftsanbocana y tmojána, nyetsca chë base pueblotémënguenache chë tšabe noticiënga abuyayinaye y entsánga šocanëngama áshnaye.

*Herodes y Jesús*

(Mt 14.1-12; Mc 6.14-29)

<sup>7</sup> Jesusbiana y ntšamo yojtsanopasánama rey Herodes tojántatšëmbona; y ndoñe yontsetátšëmbo ntšamo jtsejuabnayana, er báseftanga imojtsanichamo Juan chë Ubayaná obanënguentšana tojtanayena ca, <sup>8</sup> ínýënga imojtsanichamo chë Bëngbe Bëtsabe juabna oyebuambnayá Elías cachiñe tojánbocna ca, y ínýëngna canya chë tempo imojanmëna Bëngbe Bëtsabe juabna oyebuambnayënguentšá obanënguentšana tojtanayena ca. <sup>9</sup> Pero Heródesna tojánayana: “Cach atše sënjanmandá Juanbe bestšaše chamotsétjanguama. ¿As, nda cha nántsemna, chë ndabiama chca soyënga jtsóyebuambnayana sëntsuenana ca?”

Chíyeca Herodes yojtsenguaye ntšamo jamëse Jesús jinýama.

*Jesús shachna uaranga boyabásënga saná tojanacaredadó*

(Mt 14.13-21; Mc 6.30-44; Jn 6.1-14)

<sup>10</sup> Chë Jesús tojánichamonga chábioye tmojtashjango ora, lempe ntšamo chénga tmojanmama tmojancuentá. Y Jesús, nye chénga jëftsëbiatšese ínýoye tojtsanoñe, Betsaida ca uabaina puebloye. <sup>11</sup> Pero chë entsánga chë soye tmojántatšëmbona, y as tmojanasto; y Jesusna tšabá chénga tojanébuaja, y Bëngbe Bëtsabe améndayama yojtsëtsësnaye, y chë šoquënga imojtsemnéngbioye tojanashná.

<sup>12</sup> Ya jetiñe yojtsobiamná orna, chë bnétsana uta uatsjéndayënga Jesúsbioye tmojanobeconá y mëntšá tmojaniyana: —Chë entsánga cuantichamuá, jóchnama y saná jonguangoñama chamotsama chë béconana pueblotémënguenache y luarënguenache; er quem luariñe ndocná quenatiyena ca.

<sup>13</sup> Jesús chora tojanéyana: —Tšëngaftanga saná chéngbioye šmochjacaredádaye ca.

Pero chënga tmojanjuá: —Nýe shachna tandëse y uta beónata fséntsebomna; nyetscangbiama saná jabuámiyama nderado nda tojasna, aíne cuanjacaredádaye ca.

<sup>14</sup> Er mo shachna uaranga boyabásenga immamna. Pero Jesusna chabe uatsjédayënga tojanéyana: —Mamëndá nyetscanga chamotbiamama shachna bnëtsásanënga ca.

<sup>15</sup> As chënga chca tmojanma y nyetsca entsänga tmojanotbiama. <sup>16</sup> Chora, Jesús chë shachna tandëse y chë uta beónata tojanca, y celoye tojanontjesé, Bëngbe Bëtsábioye chama tbojtanchuá, tojanjatá y chabe uatsjédayënga tojanantregá entsängbioye chamuatšatama. <sup>17</sup> Nyetsca entsänga tmojanse jtoshachaye nyetsá, y cabá bnëtsana uta sbarëco tmojanajutjé chë ojamnëtmëngaca.

*Pedro tojánayana, Jesús chë Cristo bëtsemnama*

*(Mt 16.13-19; Mc 8.27-29)*

<sup>18</sup> Canýe te, Jesús canýa Bëngbe Bëtsáftaca ibojtsencuéntaye ora, chabe uatsjédayënga cháftaca imojtsemna. Chora tojanatjá: —¿Nda atše bëtsemnama entsänga imojtsichamo ca?

<sup>19</sup> Y chënga tmojanjuá: —Báseftanga montsichamo Juan ca, ínýengna Elías ca, y ínýengna canýe Bëngbe Bëtsabe juabna oyebuambnayá tempscá mora tojtayena ca.

<sup>20</sup> As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

*Jesús tojánayana cha ibojamna jóbanana y jtuyenana*

*(Mt 16.20-28; Mc 8.30-9.1)*

<sup>21</sup> Pero Jesús corente chënga tojanamëndá ndocnábeñe chama ntsecuéntayana. <sup>22</sup> Y mëntšá cachabiama tojánayana: —Chë Bëngbe Bëtsá Entšá tbojanbemá bontsemna puerte jasúfriana, chë judiëngbeñe bëtšëjmëngcá amëndayëngbiama, chë judiëngbe bachnangbe más uámana amëndayëngbiama y ley abuátambayëngbiama uabotená jtsemnana. Entšanga mochanjóba, pero unga tianoye cha echántayena ca.

<sup>23</sup> Chentšana nyetsca entsänga tojanéyana: “Nda atšbe uatsjendayá jtsemnama tojtseboše, cháuyana nýe Bëngbe Bëtsá yobena sempre chabe vidíñe jtsemándayama, chabe quem luarentša soyënga cachcá chauesonýá atše juastama, y cada te chaotseprontana átšbeyeca jasúfriana, y cruciñe jobanámna. <sup>24</sup> Nda tojtsama quem luarentše bëtscá soyënga jtsebomnama y atšbiama jasúfriana ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojëftsonýá atše juastama, masque chaóbana, chë nyetsca tescama yomna tšabe vida echántsebomna. <sup>25</sup> Er ¿ndayama entšá buanjoservia nyetsca quem luarentša soyënga jtsebomnana, cha pochocaná jtsemnama tojtsá y chë nyetsca tescama yomna tšabe vida tojtsoperdese? <sup>26</sup> Er ndëmuanýe entšá, atšbiama o atšbe buayenana soyëngama tojtsëuatja, chë Bëngbe Bëtsá Entšá tbojanbemánaca chabiama echantsëuatja, cha chabe bëtš buashinýinýaniñe chaojésabo ora, chabe Taitabe bëtš obenánaca y chabe angelotëmëngaftaca adoraná. <sup>27</sup> Ndegombre cbéyana, báseftanga muentše montsemnënga quemochatóbana, Bëngbe Bëtsá chabe obenánaca entsängbeñe jabomándama jabana ntjëftsinýcá ca” —cha tojánayana.

*Jesús inýetšá tojanobinýná*

*(Mt 17.1-8; Mc 9.2-8)*

<sup>28</sup> Mëntšá tojanopasá: Chca palabrënga tojanoyebuambá chentšana posuftaytese, Jesús tojëftsanëbiatše Pedro, Santiago y Juan, y canýe tjoye tojántsjua, Bëngbe Bëtsáftaca jencuéntama. <sup>29</sup> Bëngbe Bëtsáftaca ibojtsencuéntantscuana, chabe jubíá inýetšá yojtsinýna, y chabe uichëtjonëjuangá tša uafjantsëjuangá yojtsamna y tša yojtsabuashinýinýana. <sup>30</sup> Chora uta boyabásata tbojanonýná, Jesúseftaca ibojtsencuéntaye. Chata

ibojamna Moisés y Elías; <sup>31</sup> corente buashinjinjaniñe ibojtsemna, y chënga imojtsencuëntaye ntšamo Jesús Jerusalenoca jasúfriana y jóbanana. <sup>32</sup> Masque Pedro y chabe enutata tša ocnayënga imojtsemna, nÿe imojtsefsna y tmojáninÿe Jesusbe juachañe tša yojtsebuashinjinÿana y chë uta boyabásata cháftaca ibojtsemna. <sup>33</sup> Chë uta boyabásata Jesúsbentšana ibojoluára ora, Pedro, Jesúsbioye tbojaniyana: “Buatëmbayá, ¡tša tšabá bëngbiama cuanmëna muentše jtsemnana ca! Mora fchanjapórma unga tambotémënga: cánÿetema acbiama, ínÿetema Moisesbiama y ínÿetemna Elíasbiama ca.”

Pero Pedro ndoñe yontsetátšëmbo ntšamo yojtsichámuama. <sup>34</sup> Y chca yojtsóyebuambnantscuana, canÿe jantšetëshe yojóbema, y chëngbioye yojáutsbotse, y chënga chë tsoye imojtsemnama tmojáninÿe ora, chë uatsjéndayënga chama imojtsauatja. <sup>35</sup> Chora chë jantšetëshoicana canÿe oyebuambnayana tojanóbocna, mëntšá: “Mua atšbe Uaquiñá endmëna, atšbe uabuayaná; cha šmochtseyeunana ca.”

<sup>36</sup> Chë oyebuambnayana tmojanuenentšana, tmojáninÿe Jesús canÿa yojtsemna. Chë uatsjéndayënga iyteca imojtsemna, y chë tempo ndocnábioye chama imonjuyenaye.

*Jesús, canÿe basa bacna bayëjbe juabna uambayábioye tbojanshná*

*(Mt 17.14-21; Mc 9.14-29)*

<sup>37</sup> Yëfsana, chë tjocana tmojtantsmá ora, ba entšanga tmojánbocana Jesús jajëbenguama. <sup>38</sup> Chora, chë entšanguentšana canÿe boyabása tojanontšë mëntšá uayebuáchana: —Buatëmbayá, Diosmanda atšbe uaquiñá minÿe. Nÿe cha atšbe uaquiñá endmëna; <sup>39</sup> y mora, bayëjbe juabna chábioye bontsësháchichana, y nÿe ndeolpe jóntšana yoyana, ataque joshachana y uayoicana shashiye jtsabocanana. Y chábentšana chë bayëja ndoñe betesco ntjésebocnana, y cuerpiñe corente maltrataná jeseboshjonana. <sup>40</sup> Acbe uatsjéndayënga sënjaimpadá chë bayëja chábentšana chamuatábocnama, pero ndoñe chematobená ca.

<sup>41</sup> As Jesús tojánayana: —¡Nÿetšá ndošbuáchiyënga y bacna entšanga! ¿Buetayté šojtsemna tšëngaftangaftaca jëftsemnana y jtsëuantánana ca?

Chora chë boyabásabioye tbojaniyana: —Moye chë uaquiñá mánatse ca.

<sup>42</sup> Chë basa yojtsebeconá ora, chë bacna bayëja chábioye tbojanshajayé y inÿe ataque tbojanëshache. Pero Jesús chë bayëjbioye tbojanácacana, chë basetëmbioye tbojanshná y chabe taitábioye tbojtanëntregá. <sup>43</sup> Y nÿetscanga puerte ojnanánënga imojtsemna, Bëngbe Bëtsá tša obenana bomná inamnana.

*Jesús cachiñe tojánayana cha ibojamna jóbanana y jtayenana ca*

*(Mt 17.22-23; Mc 9.30-32)*

Nÿetsca entšanga, ndayá Jesús yojtsamama ojnanánënga imojtsemnëntscuana, chabe uatsjéndayënga cha tojanéyana: <sup>44</sup> “Quem soye tšabá šmochjouena y ndoñe chacmondébnëjtjomba: Chë Bëngbe Bëtsá Entšá tbojanbemá entšangbe cucuatšinë mochanjáboshjona ca.”

<sup>45</sup> Pero chënga ndoñe yontsósertana ntšamo Jesús yojtsëtsëtsnacá, er Bëngbe Bëtsá ndoñe tonjanalesenciá chama chaósertama; y imojtsauatja Jesús jaimpádana chama chauabuayenama.

*¿Nda chë más uamaná yomna?*

*(Mt 18.1-5; Mc 9.33-37)*

<sup>46</sup> Chë tempo, chë uatsjéndayënga tmojanontšë enatsëtsnayana, nda chë más uamaná bëtsemnama. <sup>47</sup> Jesús yojtsetátšëmbo ntšamo chënga imojtsejuabnayama; asna, canÿe básetema tbojánishache, chabe juachaca tbojántbema, <sup>48</sup> y chëngbioye tojanéyana: “Nda atšbeñe ošbuachiyá bëtsemnama, quem basetëmbioye tbojofja, chana atšbe jofjana; y nda atšbe šojofja, chana chë nda šojichmó chábioynaca jofjana. Chíyeca, tšëngaftanguentšë chë más nduamaná, cha chë más uamaná entsemna ca.”

*Nda bëngbe contra ndoñe tontsemná, bëngaftaca jtsemnana*

*(Mc 9.38-40)*



<sup>49</sup> Juan, Jesúsbiroye tbojanianyana: —Buatëmbayá, bënga fsënjinye canye boyabása y cha aca jótšëmbonëse, entšangbentšana bacna bayëjbe juabna endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

<sup>50</sup> As Jesús tbojanjuá: —Ndoñe šmatjuauyaná; er nda bëngbe contra ndoñe tontsemná, bëngaftaca jtsemnana ca.

#### *Santiago y Juánbiroye Jesús tojanëcácana*

<sup>51</sup> Jesús céloye jtama yojtsobeco ora, nyets añémoca cha yojtsejuabnaye Jerusalemoye jama. <sup>52</sup> Natsana báseftanga tojanichamó, y chënga tmojána canye base pueblotémoye Samaria luaroca, posada chabiana janguangoñama; <sup>53</sup> pero chë luarentša entšanga ndoñe tmonjánbošena posada juantšamiana, er tmojántatšëmbona cha Jerusalemoye yojétsayama, chë chëngbe uayayëngbe uámana puebloye. <sup>54</sup> Chabe uatsjédayata, Santiago y Juan, chë soye tbojáninye ora, Jesús tmojanianyana: “Bëngbe Utabná, ¿quetseboše bëndata fchaimandá celocana ñeshe chaótsatše y quem entšanga chaotsapochócaye ca?”

<sup>55</sup> Pero Jesús yojobuértana y chátbiroye tojtsanëcácana, chca juabna bomna causa.

<sup>56</sup> Chentšana chënga inye pueblotémoye tmojtsanoñe.

#### *Chë Jesús juastama bošënga*

*(Mt 8.19-22)*

<sup>57</sup> Benachëjana imojtsajna ora, canye boyabása Jesúsbiroye tbojanianyana: —Atšbe Utabná, atše séntseboše aca juastana ndémoye chacojtsá choye ca.

<sup>58</sup> Y Jesús tbojanjuá: —Chë zorrënga cuevëshënga mondbomna ndayentše jtsiyenama y chë shloftsetëmëngna uajajonëshangá; pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

<sup>59</sup> Jesús inye entšábiroye tbojanianyana: —Šmasto ca.

Pero cha tbojanjuá: —Atšbe Utabná, šmoleseñciá atšbe taitá chjshesabotbontsañe ca.

<sup>60</sup> As Jesús tbojanianyana: —Chë Bëngbe Bëtsabiana mo obanëngcá imomnënga, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsétebuantsañe. Acna, motsa y Bëngbe Bëtsabe amëndayama entšanga cochabuayená ca.

<sup>61</sup> Inyana Jesúsbiroye tbojanianyana: —Atšbe Utabná, atše séntseboše aca juastama, pero šmoleseñciá natsana atšbe pamíllangbiana jaisodiósoftama ca.

<sup>62</sup> As Jesús tbojanianyana: —Nda cachabe soyëngama tbojtsengmena, Bëngbe Bëtsabe amëndayocama ndoñe ntoservénana; er cha jtsemnana mo canye arayacá, chë tojtsetrabája ora, stëtšoye tojtsaisantješncá ca.

## 10

### *Jesús canyëšfta bnëtsana y uta entšanga tojanichamó Bëngbe Bëtsabe soyëngama jábuayenama*

<sup>1</sup> Chë soyënga chentšana, Bëngbe Utabná Jesús inye canyëšfta bnëtsana y úatnaca tojanabacacá, y utáta chabe natsana tojanichamó, chë cha ibojtsemna jama pueblëngoye y luarëngoye.

<sup>2</sup> Mëntšá chënga tojanéyana: “Canye bëts jajañe bëtscá játbanama entsemna, pero peonga báseftanga; chíyeca, chentša nduínbiroye jaimpádana ba peonga chauichamó chë jaja saná játbanama. Cachcá, quem luarentše bëtscá entšanga montsemna Bëngbe Bëtsábiroye nduabuátmënga, y chëngbiroye chabiana abuayinyayënga nye báseftanga. Chíyeca, Bëngbe Bëtsá moimpadanga ba abuayinyayënga chauichamó quem entšanga chábroye jábuajama. <sup>3</sup> Motsajna; šmochjinye, atše tšëngaftanga cbontsichamná mo oveshënga cuenta, tjañe quešëngbeñe. <sup>4</sup> Ndoñe šmattsambaye shecnaja, ni crocénana šmattsaiuábuenana, ni shecochëtjonëshe; y nda chacmojacheuá ora, ndoñe yapa bën chentše šmatjáisënobiamnaye.

<sup>5</sup> “Ndaye yebnentše chašmojá mashjna ora, natsana šmochjayana: ‘Lempe tšabá quem yebnentše chaotsomñe ca’. <sup>6</sup> Y chë yebnentše chca juabna bomna entšanga tmomñesna, chë tšabiana ndegombre chentše echántsemna; pero ndóñese, chca tšabiana chentše ndoñe queochátsmëna. <sup>7</sup> Canye yebnentše šmochjoquéda, y šmochjase y šmochjofsiye ntšamo chentše chacmojacaredadaycá; er chë trabajayá merecido jtsebuájonana chca juácanama. Canye pueblentše nýe inýe y inýe yebnënguenache ndoñe matajnana.

<sup>8</sup> “Ndaye pueblentše chašmojá mashjna y tšabá chacmojú buajentše, šmochjase ntšamo chentše chacmojacaredadaycá; <sup>9</sup> chentša šoquënga šmochjáshnaye y šmochjáuyana: ‘Bëngbe Bëtsabe amëndayana tšëngaftangbeñe entsemna ca’. <sup>10</sup> Pero canye pueblentše chašmojáshjango y ndoñe chacmonjú buaja, chentša tsashenangoye šmochjá bocana y mëntšá šmochjayana: <sup>11</sup> ‘¡Chë tšëngaftangbe pueblentša polvëshe, chë bëngbe shecuatsënguñe tojuanjëshe, camuentše fscuesenstëtoná, chca, tšëngaftanga chašmotsetatšëmbuama ndoñe tšabá šmonjamama! Pero masque chca, šmochtsetátšëmbo chë Bëngbe Bëtsabe amëndayana tšëngaftangbeñe entsemnama ca.’ <sup>12</sup> Ndegombre cbéyana, quem luare jopochócama te, chë luarentša entšangbiyoye Bëngbe Bëtsá puerte jabuache echantsacastígaye, y Sodoma puebloca bacna entšangbiyoye ndoñe nýa nýetšá jabuache ca” —Jesús tojánayana.

### *Chë nduauenana entšanga*

(Mt 11.20-24)

<sup>13</sup> “¡Tša lastema Corazín puebloca entšangbiama! ¡Tša lastema Betsaida puebloca entšangbiama! Er chë muentše Bëngbe Bëtsabe obenánaca sënjama soyënga, chë bëts pueblënga Tiro y Sidonoca chca matënjochnënguse, chentša bacna entšanga ya tempo chëngbe bacna soyëngama ngmënaca matmëntenó juabonga y Bëngbe Bëtsabe benache matmëntishache, y chca tmojamama chaotsótatšëmbuama, uajojëssha entšayangaca matmëntopormanga y jatinýashiñe matmënjotbiama. <sup>14</sup> Pero ntšamo entšanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo šmochántse bomna, chë Tiro y Sidonoca bacna entšangbe castiguama. <sup>15</sup> Y tšëngaftanga, Capernaum pueblentša entšanga, ¿celóntscoca atsebá nanënga šmochtsemna ca šmojtsejuabnanga? ¡Chë uabouana infierno y cmochantsésetjango!

<sup>16</sup> “Nda tšëngaftanga tcmojoyauná, chana atše joyeunayana; y nda tšëngaftanga tcmojsëbaté, chana atše jtsabotena; y nda atše šojtsaboté, chana chë nda šojichmó chábioyey jtsabotena.”

### *Chë canýsëfta bnëtsana y uta entšanga tmojtanashjajna*

<sup>17</sup> Chë canýsëfta bnëtsana y úatna Jesús yojtsemnoyey tmojtanashjajna, puerte oyejuayënga; y chábioyey mëntšá tmojaniyana: —¡Bëngbe Utabná, aca jótšëmbonëse, chë bacna bayëjéngnaca šonjoyauná ca!

<sup>18</sup> Y Jesús tojanéyana: —Ndegombre. Y tšëngaftanga Satanásbiyoye chca šmontseyëñaná ora, entsemna mo Satanás celocana canye tcuinýcá jtsotsatšana stjinycá. <sup>19</sup> Atšna obenana tcbonjatšatá mëtscuayënga y alacranëngbeñe chašmotsajnama, y bëngbe uayayá Satanasbe nýets obenana jáyënjanama, tšëngaftanga ndocá ntjapasacá. <sup>20</sup> Pero móyejuanga, ndoñe chë bacna bayëjënga chacmóyaunama obenana šmojtse bomnama, sinó tšëngaftangbe uabaina celoca ya yojtsábemanama, er tšëngaftanga chë nýetsca tescama yomna tšabe vida šmochántse bomna ca —cha tojanéyana.

### *Jesús puerte tojanoyejuá*

(Mt 11.25-27; 13.16-17)

<sup>21</sup> Chora Jesús, chë Uámana Espíritbeyeca, corente oyejuayá tojánayana: “Atše cbatschuá, Taita, celoca y quem luarentša Utabná. Aca, chë nýe batšá tatšëmbënga tconjanýanyé, chë tša tatšëmbënga y osertánëngbiama tcojaiytëme soyënga. Añe, chama cbontsadorana, Taita, aca chca chaotsemnama tcojábošenayeca.

<sup>22</sup> “Atšbe Taitá lempe chca šonjatšetá. Chë Uaquiñábioye ndocná corente quebnatábuatma; nÿe chë Taitá aíñe. Y chë Taitábioye ndocná corente quebnatábuatma; nÿe chë Uaquiñá aíñe, y ndémuanÿengbioye chë Uaquiñá tojtseboše nda chë Taitá yomnama jinÿanjÿiyama, chéngnaca chë Taitábioye mochantsábuatma ca.”

<sup>23</sup> Chentšana, Jesús chabe uatsjéndayëngbioye tojanobuértana y nÿe chéngbioye tojanéyana: “¡Puerte oyejuayënga chë ntšamo tšëngaftanga šmontsonÿacá jinÿama tmojtsobenënga! <sup>24</sup> Er atše cbéyana, banga Bëngbe Bëtsabe juabna oyebuambnayënga y reyënga tmojánbošena chë tšëngaftanga šmontsonÿá soyënga jinÿana, pero ndoñe tmonjáninÿe; y tmojánbošena chë šmontsuenana soyënga jouenana, pero ndoñe tmonjanuena ca” —cha tojánayana.

#### *Chë Samarioca tšabe entšabiama cuento*

<sup>25</sup> Canÿe judiëngbe ley abuatambayá yojontsé Jesúseftaca jóyebuambayama, y jisháchichiyamna mëntšá tbojantjá: —Buatëmbayá, ¿ndayá šojtsemna jamana chë nÿetsca tescama yomna tšabe vida jtsebomnana ca?

<sup>26</sup> Y Jesús tbojanjuá: —¿Ntšamo leyinÿe iuábemana? ¿Ndayá chiñe condbétsaliaye ca?

<sup>27</sup> Chë ley abuatambayá tbojanjuá: —“Chë Utabná Bëngbe Bëtsá cochtsebobonshana nÿets ainánaca, nÿets espíritoca, nÿets añémoca y nÿets juábnaca”; y “ndëmua entšánaca cochtsebobonshana, ntšamo cach aca cuenobobonshancá ca.”

<sup>28</sup> Chora Jesús tbojanijana: —Tšabá šconjojuá. Chca cochtsama y chë nÿetsca tescama yomna tšabe vida cochántsebomna ca.

<sup>29</sup> Pero chë ley abuatambayá tšabá jenoquédamna Jesúsbioye tbojantjá: —Y ¿ndase chë ndëmua entšánaca yomna ca?

<sup>30</sup> As Jesús tbojanjuá: —Canÿe, Jerusalenocana Jericó benache canÿe entšá yojtsetsamá, y básefta salteadorënga imojébëbocna. Lempe imojtsefca, chë entšáyánaca; imojtsejantšetaye y chentšana imojtsatónënga, y chë entšá batšá obaná imojéseboshjona.

<sup>31</sup> Ndeolpe, chë benachëjana canÿe judiëngbe bachna yojtsachnéjuana. Chë entšábioye ibojinÿe ora, nÿe chabuacá yojtsëchnénguañe. <sup>32</sup> Cachcá, canÿe Levita, chë canÿe Bëngbe Bëtsabe bëts yebnoca trabajayá chëjana yojtsachnéjuana; y chë entšábioye ibojinÿe orna, nÿe chabuacá yojtsëchnénguañe.

<sup>33</sup> “Chorna, cach benachëjana canÿe samaritano ináboye. Chë entšábioye ibojinÿe orna, ibojóngmia. <sup>34</sup> Chábioye yojobeconá, aceitiye y vínoyeca ibojáshna, y lisianënguiñe entšëjuaca ibojuantsacjuá. Chabe couayinÿe ibojëftsenjayiye, canÿe yebnoye posada uyentšamianoye ibojuánatse, y chentše chábioye ibojëftsinÿena. <sup>35</sup> Yëfsana, chë samaritano uta denario crocénana yojenóbojatsëca, chë mo uta tesca trabajuama crocénana nÿetšá, y chë posada nduíñbioye ibojesabuenaye, y mëntšá ibojauyana: ‘Quem boyabása cochtsinÿena, y nderado más crocénana muabiama chacojenábojafjonasna, mëjana chaitšachnéjuana ora, cbochjabáisabuenaye ca.’ <sup>36</sup> Y chcasna, ¿chë unganguentšana nda cmojtsinÿana chë entšabiama yojtsejuabnaye cha cachacá entšá inamnama ca?”

<sup>37</sup> Y chë ley abuatambayá tbojanjuá: —Chë entšabiama tbojanongmé cha ca.

Y Jesús tbojanijana: —Asna, motsa y cachcá cochjama ca.

#### *Jesús, María y Martbe yebnentše*

<sup>38</sup> Chentšana, Jesús benachëjana yojtsaye y canÿe base pueblotémoye tojéftsana-mashëngo; y canÿe shembása Marta ca uabainá, chabe yebnentše tbojanofja. <sup>39</sup> Martna canÿe quenata ibnabomna, María ca uabainá. Cha Jesusbe shecuatšentše yojótbema chabe palabra jouenama; <sup>40</sup> y chëntscuana Marta ba soyënga yojtsama. Cha Jesúsbioye tojanobeconá y tbojanijana: —Utabná, ¿tondayana cmontsentšamna, atšbe quenata nÿe canÿa chašonÿá lempe jamama ca? Mëyana chašuájabuache ca.

<sup>41</sup> Chora Jesús tbojanjuá: —Marta, Marta, bëtská soyëngama contsenócochinÿena y contsenomantšná; <sup>42</sup> pero nÿe canÿe soye endmëna chë yoiyta soye jamama. María chca

jamama tojobuáyana, chë más tšabe soye, y ndocná queochatsma cha chaotsajbanama ca.

## 11

### *Ntšamo Bëngbe Bëtsáftaca cuanjencuénta* (Mt 6.9-15; 7.7-11)

<sup>1</sup> Canye, Jesús Bëngbe Bëtsáftaca ibojtsencuéntaye canye luarentše. Tojanpochocá orna, canya chabe uatsjendayënguentsá tbojanianyana: —Bëngbe Utabná, Bëngbe Bëtsáftaca jencuéntama šmabuatambá, ntšamo Juan chabe uatsjëndayëngaftaca tojanmcá ca.

<sup>2</sup> Y Jesús tojanéyana: —Bëngbe Bëtsáftaca chašmojtsencuénta ora, šmochjayana: Bëngbe Taitá, acbe uabaina chë más uámana uabainana chauesomñe.

Acbe amëndayana chaóshjango.

<sup>3</sup> Mënté šmiyatšatá, cada te šnetsëjaboto tandëše.

<sup>4</sup> Bacna soyënga fsënjama: šmotsaperdónaye;

er bëngnaca nyetscanga chë bëngbiana bacna soyënga amëngbioye fsëndbetsaperdónaye.

Bacna soyënga jamama šojocochëngo ora, šcochjuabuache chca ndenobuíyama.

<sup>5</sup> Jesús mëntsánaca tojanéyana: “Nderado aca acbe bacóbioye tséntseto ora tcojá y tcojauyana: ‘Bacó, Diosmanda unga tandëše šmotsemná, <sup>6</sup> er canye atšbe amigo yebnoca tonjáshjango y tondaye quetsátsbomna cha jonánjama ca.’ <sup>7</sup> Ndegombre, cha tsocana tcmojujá: ‘Ndoñe šmatébeyabomana. Bëšáša ya entsatámena y atše y atšbe básenga ya fsëntsocjá; ndoñe quetsátobena mora jotsbanana y chë tandëše jámnana ca.’

<sup>8</sup> Ndegombre, chë bacó ndoñe tonjotsbaná chë tandëše jámnana, cháftaca šuenatsëtsnámase, cha pronto jotsbanana chca uébëyabomana ndoñe tconjajbaná causa, y lempe ntšamo cmojtsajabotcá cha cmochanjoyiye. <sup>9</sup> Chcasna, atše cbéyana: Šmochjotjañe y Bëngbe Bëtsá cmochanjátšataye; šmochjánguango y šmochanjínýena; šmochjachembo y cmochanjébëtafjo. <sup>10</sup> Er ndánaca ndayá tojtsotjanañá, jóyëngacñana; y tojtsenguá cha, jónýenana; y nda tojtsechembuanábioye jebiatëfjuana ca.

<sup>11</sup> “¿Nda tsëngaftanguentsána nantsobena, taitá tojtsemñese, cachabe uaquiñábioye canye mëtscuaye jatštayana, beona tbojtsotjanañe ora; <sup>12</sup> o canye alacránashe joyiyana, shëmnëbé tbojtsotjanañe ora? <sup>13</sup> Y chca, tsëngaftanga, bacna soyënga amënga, tsëngaftangbe basetemëngbioye tšabe soyënga jatšatayama šmojtsamanëse, ¡más chë celoca Taitá, chë Uámana Espiritu echanjátšataye, chca tmojtsotjanañëngbioye ca!” —Jesús tojánayana.

### *Fariseunga tmojánayana Jesús Satanásbentsána obenana tojanóyëngacñe ca* (Mt 12.22-30; Mc 3.20-27)

<sup>14</sup> Jesús canye entsábentsána canye bacna bayëja tbojtánabocna. Chë bayëja ndëbiá chë entsábioye tbojánbema, y chábentsána tojésanbocna ora, chë ndëbiá tojtanontsé oyebuambnayana. Y chë entsánga chama imojenjnaná; <sup>15</sup> pero báseftanga imojtsichamo: “Beelzebú, cach Satanás, chë bacna bayëjengbe amëndayá, quem boyabásabioye obenana tbojatšetá chë bayëjënga chauatëbuacnama ca.”

<sup>16</sup> Y ínýenga, Jesús jisháchichiyamna tmojanimpadá canye bëts soye chaoma, jinýanyiyama cha celoca obenana inabomna o ndoñe. <sup>17</sup> Pero Jesús yojtsetátšëmbo ntšamo chëngbe juabna bëtsemnana. As tojanéyana: “Canye amëndayábentše entsánga tmojtsenojatá y tmojtsenáyase, cachënga jtsenpochócana; y canye yebnentše oyenënga tmojtsenojatá y tmojtsenáyase, chë pamíllanga tšabá nyets tempo ndoñe quemochátsmëna. <sup>18</sup> Cachcá, Satanás tojtsenojatá y cachabe contra tojtsemñese, ¿ntšamo nantsobena chabe mándayana quem luarentše jëftsebmomnana? Chca séntsichamo, er tsëngaftanga šmotsichamo Beelzebube obenánaca chë bayëjënga stsatëbuacana ca; <sup>19</sup> pero chca ndegombre tojtsemñese, ¿ndábeyeca tsëngaftangbe usetonënga obenana imojtsebmomna chë bacna bayëjënga jtëbuacnama? Chíyecna, cachënga montsinýinýná

ntšamo ndegombre yomnana, y tšëngaftanga ndoñe ndegombre soye šmotsichá-muama. <sup>20</sup> Y atšna, Bëngbe Bëtsabe obenánaca entsángbentsána chë bayëjenga sëndëtëbuacana; y chë soye entsinÿinÿná, Bëngbe Bëtsabe amëndayana tšëngaftang-bioye tojóshjanguama.

<sup>21</sup> “Canÿe corente añemo bomna entsá, bëtsá ármangaca chabe yebna tojtsinÿenëse, chë tsoca tomna soyënga ndoñe ntjotšana. <sup>22</sup> Pero inÿa chabiana más añemo bomná tojabo y tbojabetseyëjaná, chë cha yojanašbuaché armangá jtsabocana y chë tobomna sóynaca; y ntšamo chë inÿa tojtsebošcá chë soyéngaca jamana.

<sup>23</sup> “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana ca” —Jesús tojánayana.

*Ndayá inopása chë bacna entsángaftaca*  
(Mt 12.43-45)

<sup>24</sup> “Canÿe bacna bayëja canÿe entsábentsána tojësebcna ora, bojojo luarëngue-nache chë bayëja jtsanana, ndayentše jóchnama onguayiñe. Ndoñe tonjínÿena ora, jenójuaboyana: ‘Atšbe oyenoye, chë ndayentsána sënjëftsebcnoye chanjesshécona ca.’ <sup>25</sup> Y choye tojtashjango ora, jinÿenana lempe tšabá cha jtesamashënguama, mo tsjajniñe y prontániñe cuaftsemncá. <sup>26</sup> Chora chë bayëja jana y inÿe canÿsëfta bayëjenga, chabiana más opëjenga jobiatšana, nÿetscanga choye jamashjnama, chë boyabásabeñe joyéanama. Y chca, chë boyabása tempscama más bacna entsá jtoquédana, chora chë natsanama más bayëjenga abamna causa ca” —Jesús tojánayana.

*Chë ndegombre oyejuayana*

<sup>27</sup> Jesús chë soyënga yojtsichamëntscuana, entsánguentše canÿe shembása yo-juayebuáchena: —¡Puerte oyejuayá chë quem luaroye tcmojúshjango y tcmojëftseboché shembása ca!

<sup>28</sup> As Jesús tbojanayana: —Más oyejuayana bomnëngna, chë Bëngbe Bëtsabe palabra tmojouena y chca tmojtsamënga ca.

*Chë bacna entsánga Jesús tmojanimpadá canÿe bëts soye chaoma, chabe obenana jinÿama*  
(Mt 12.38-42; Mc 8.12)

<sup>29</sup> Entšanga más imojtsótoyo Jesús yojtsemnentše, y Jesús tojanontšé jáuyanana: “Morsca entsánga puerte bacna entsánga; chënga montsotjanañe atše canÿe bëts soye chaima atšbe obenana jinÿama, pero ndoñe chca quemochátinÿe, sinó nÿe chë ndayá yomna mo chë Jonásoftaca tojanopasá soycá. <sup>30</sup> Er chca, ntšamo Jonás Nínive pueblaca entsánga canÿe bëts soye tojaninÿanÿé Bëngbe Bëtsá obená yomnama chamotsetatšëmbuama, chë Bëngbe Bëtsá Entšá tbojanbemánaca entsinÿanÿná morsca entsángbioye, Bëngbe Bëtsabe amëndayana tojóshjanguama. <sup>31</sup> Bëngbe Bëtsá ntšamo morsca entsánga tmojanmama yochjayana te, chë Sur luaroca reiná echanjotsaye y morsca entsángbiama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrënga jouenama, y chë mora muentše entsemnana, Salomonbiama más uamaná endmëna. <sup>32</sup> Chë entsánga tšabá o ndoñe tšabá tmonjamama jayanama te, chë Nínive bëts pueblaca entsángnaca mochanjotsaye y mochanjayana morsca entsánga ndoñe tšabá tmonjama ca; er chënga, Jonás yojsabuayinÿaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiama más uamaná endmëna ca” —Jesús tojánayana.

*Chë cuerpama uajuinÿanëshá*  
(Mt 5.15; 6.22-23)

<sup>33</sup> “Ndocná canÿe uajuinÿanëshá juajuinÿenana, canÿe iytémena luaroye juajájuama, ni canÿe cajonëshe tajsoye, sinó canÿe tsbanana luaroca juajájuama, chca, chë luaroye amashjuanëngbiama chaotsebínÿnama. <sup>34</sup> Acbe bominÿe tšabá totsomñëse, acbe cuerpama mo canÿe uajuinÿanëshacá jtsemnana; chíyeca aca jtsobenana, ntšamo tcojtsamcá

chë bomínjeca jtsonjyayana. Chë bominjë ndoñe tšabá tontsemnësna, chë bominjë ton-daye ntsobenana jamana, ntšamo tcojtsamcá chacobená jinjyama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësna, lempe ntšamo chacojtsamcá ndoñe tšabá queochátsmëna. <sup>35</sup> Cuedado šmochtsebomna, tšëngaftangbe ainaniñe nje tšabe juabnënga chaotsemnana, chca, lempe ntšamo chašmojtsamcá tšabá chaotsemnana, y bacna juabnënga ndoñe chaondétsemnana. <sup>36</sup> Chcasna, lempe ntšamo šmojtsamcá tšabá tojtsemnëse y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canje uajuinjanésha puerte tšabá tojtsebinynacá ca” —Jesús tojánayana.

*Jesús chë fariseungbiana y ley abuatambayëngbiana tojánayana, chënga ndoñe tšabá montsama ca*

*(Mt 23.1-36; Mc 12.38-40; Lc 20.45-47)*

<sup>37</sup> Jesús chca jayanama tojanpochocá ora, chábioye canje fariseo tbojanofja chabe yebnoye jauasama. As Jesús tojánamashëngo y mesëshentše tojanótbema. <sup>38</sup> Chë fariseo tojanëuatjaná, Jesús ntsacuentšabiácá jasama yojontsé causa, ndoñe ntšamo chë judiënga imojanamancá, Bëngbe Bëtsabe delante tšábënga jtsatsmënama. <sup>39</sup> Pero Bëngbe Utabná tbojaniyana: “Tšëngaftanga fariseunga šmondmëna mo entšangcá ndëmuanjyënga chë tazëšënga y šcnenënga shjoicajana jtsóbojabiana, pero tsoyna nje cachcá jonjyayana. Tšëngaftanga becá jtsamana entšangbiana mo tšabëngcá jtsinynama; pero tšëngaftangbe ainanentše jútjena entsemna nje jtsatbëbanama y bacna soyënga jtsamama juabnéngaca. <sup>40</sup> ¡Juabna ndbomnënga! Tšëngaftanga ndoñe šmondétatšëmbo, chë tšëngaftangbentšana entšanga ndayá jinjyama imobencá tojamá, chë tšëngaftangbe tsoye yomna soyëngnaca tojamama; y chíyeca, chabiana cachcá enduámana ndayá tšëngaftangbe ainanoye yomna soyënga, y chë entšangbe delante šmojama soyënga. <sup>41</sup> Tšëngaftanga cmontsamna, chë soyënguiñe ndayá ainaniñe yomnentšana ínjenbioye jatšatayana, y chca, lempe ntšamo chašmojtsamcá Bëngbe Bëtsabe delante tšabá echántsemna ca.

<sup>42</sup> “¡Tša lastema tšëngaftangbiana fariseunga! Tšëngaftanga Bëngbe Bëtsabiana jtsequëcnayana chë jajañentša sananga bnëtsanentšana canje soye nyetšá, y chë binche matatëmënguentshana menta, ruda y nyetsca binche matatemënguentshánëna; pero nje batšá jtsamana chë nyetscanga cachca derechënga chamotsebomnana y cha jtsebobonshánama. Quem soyënga cocayé cmontsamna jtsamana, chë inje tšabe soyënga ntjajbanacá ca.

<sup>43</sup> “¡Tša lastema tšëngaftangbiana fariseunga! Tšëngaftanga tša jtsebošana chë judiëngbe enefjuana yebnënguenache chë más uámana luarënga jtsebomnana, y benachiñe nja puerte respétoca entšanga chacmotsacheuanayama ca.

<sup>44</sup> “¡Tša lastema tšëngaftangbiana! Šmondmëna mo obanënga uatbontsaniñcá, ndoñe ntsinynana, y entšanga ntsetatšëmbcá chiñe jtsebotájayana. Chca šmondmëna, er tšëngaftangbe ainana entsemna jútjena bacna juabnéngaca, pero entšangbiana ndoñe chca quešmátinyna ca.”

<sup>45</sup> Jesús chca tojánayana ora, canje ley abuatambayá tbojaniyana: —Buatëmbayá, chca palabrenga contsoyebuambná ora, bëngbiámnaca ndoñe tšabá quecátichamo ca.

<sup>46</sup> Pero Jesús tojánayana: —¡Tša lastema tšëngaftangbiámnaca, chë ley abuatambayënga! Mo canje entšá, couáybioye canje uauta uasmanésha tbojuasmá, y chësha ndoñe yapa chaondëtsautama tondaye tontsamcá, tšëngaftanga entšangbioye jtsamëndayana bëtscá mandënga chamotsocumplínama, pero cach tšëngaftanga ni mo batšatëmnaca jtsamana chë mandënga jtsocumplínama ca.

<sup>47</sup> “¡Tša lastema tšëngaftangbiana! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsetsa entšanga chamotsemnana, chëngbe

cuevëshenga jtsatspórmayese; pero chë mo chëngcá, canye buayenana sóyeca tmojabéngbioye ndoñe ntsayaunanana. Y chë tempsquënga chca oyebuambnayéngbioye tšëngaftangbe bëts taitanga tmojtsanébaye. <sup>48</sup> Chca jtsamëse, tšëngaftanga šmontsinÿanÿná, ntšamo chë bëts taitanga tmojanmcá tšabá yomna ca tšëngaftanga šmojtsejuabnama, er chënga chë oyebuambnayéngbioye tmojtsanébaye y tšëngaftangna chëngbe cuevëshenga jtsatspórmayana.

<sup>49</sup> “Chíyeca, Bëngbe Bëtsá chabe bëts osertanánaca tojánayana: ‘Atše chëngbioye chanjichamuá atšbe juabna oyebuambnayënga y atšbiana abuayinayënga, y báseftangbioye mochantsébaye y ínÿëngbioyna mochantsécamiye ca.’ <sup>50</sup> Y chca, nÿets castigo morsca entšángbeñe echántsemna, nÿetsca Bëngbe Bëtsabe juabna oyebuambnayënga tmojóbanama, Bëngbe Bëtsá quem luare tojanma orscana; <sup>51</sup> Abélbioye tbojanóba orscana, Zacarías tmojanóbantscoñe. Zacaríasna Bëngbe Bëtsabe bëts yebnentše tmojanóba, altar y chë entšanga Bëngbe Bëtsábioye imojánadorana luariñe. Chcasna, Bëngbe Bëtsá echanjama chë oyebuambnayënga tmojanóbanama, morsca entšángbeñe nÿets castigo chaotsemnama ca.

<sup>52</sup> “¡Tša lastema tšëngaftangbiana, chë ley abuátambayënga! Tšëngaftanga jtsamana, Bëngbe Bëtsabe soyëngama jtsetatšëmbuama entšangbiana yapa totcá chaotsemnama. Cach tšëngaftanga ndoñe quešmatobena chë soyëngama tšabá jtsetatšëmbuana, y chama jtsetatšëmbuama tmojtsebošëngbioyna ndoñe quešmatalesénciaye ca” —Jesús tojánayana.

<sup>53</sup> Jesús chë soyënga tojánayanama, chë ley abuátambayënga y fariseunga puerte tojánetëna, y cha chentšana yojtsaisebocana ora, tmojanontšé chábioye becá tjanayana, y imojtsama ba soyëngama chaóyebuambama, <sup>54</sup> chca, jisháchichiyama jtsebošëse, cachá ntšamo tojayana sóyeca chënga jtsebomnama ndáyeca chábioye mal jaquédana.

## 12

*Jesús, chë bacna entšanga ntšamo ndegombre tmojuabnacá ndinÿinÿayëngbiana tojanabuatambá*

<sup>1</sup> Chëntscuana, ba uaranga entšanga chentše tmojanójoto; tša entšanga causa, nÿetscanga imojtsenatséntšenaye. Chora Jesús tojanontšé jóyebuambayama, y nat-sana chabe uatsjédayëngbioye tojanéyana: “Chë fariseungbe buatëmbana soyëngama cuedado šmochtsebomna, chënga mondmëna bacna entšanga, ntšamo ndegombre tmojuabnacá ndinÿinÿayënga. Ntšamo chë levadura jamana nÿetsana chauábochema, cachcá chëngbe buatëmbana soyëngaca, chë fariseunga montsobena jamana bëtscá entšanga ntšamo ndoñe tšabá tontsemncá chamotsamama. <sup>2</sup> Er ndocna yoiytëmena soye, ntjinÿcá queochaisoquéda; y chë ndótatšëmbo soye, ntsotatšëmbcá queochaisoquéda. <sup>3</sup> Chíyeca, chë mora nÿe tšëngaftangbiana šmojtsichamo soyënga, chë entšangbiana mo ibetiñcá cuaftsemna soyënga, entšanga chama botamana mochanjátatšëmbona. Y chë iytëcana šmojtsichamo soyënga, nÿetsca entšángbioye mochántsabuyinaye, mo nda canye yebnentša tsbanánocana noticiënga tojtsayebuachcá ca” —cha tojanéyana.

*Nda ndegombre cuantsebiauatja  
(Mt 10.26-31)*

<sup>4</sup> “Tšëngaftanga, atšbe amiguënga, cbochjáuyana: Ndoñe matauatjëngana nÿe chë tšëngaftangbe cuerpo japochócama imobenëngbiana, pero chentšana más jamana ndoñe ntsoyenanana. <sup>5</sup> Cbochanjabuayená ndábioye cmojtsamna jtsebiauatjana: šmochtsebiauatja chë nda vida jtsabuajuánama y chentšana infiernoje jtsichámuama obenana endbomnábioye; chábioye cocayé šmochtsebiauatja ca.

<sup>6</sup> “¿Shachna jaja shloftšetémenga ndoñe nje uta denario crocenánama mondbétsena? Pero masque chca, Bëngbe Bëtsá chëngbiana sempre jesenójuabnayana. <sup>7</sup> Y tšëngaftangbiana Bëngbe Bëtsá lempe endétatsëmbo, y bueta stjënëjenga tšëngaftangbe bestšašiče yomnámna. As ndoñe matauatjëngana; tšëngaftanga ba jaja shloftšëngbiana corente más šmonduámna ca” —Jesús tojánayana.

*Ndabiana Jesucristo yochjayana chabe entšá yomna ca*  
(Mt 10.32-33; 12.32; 10.19-20)

<sup>8</sup> “Atše cbéyana, nda atšbe entšá yomna ca entšangbe delante tojanabiama, chë Bëngbe Bëtsá Entšá tbojanbemánaca, Bëngbe Bëtsabe angelëngbe delante echanjayana chë entšá chabia yomna ca; <sup>9</sup> pero nda entšangbe delante, atšbe entšá ndoñe yondmëna ca tojanabiama, chë Bëngbe Bëtsá Entšá tbojanbemá, Bëngbe Bëtsabe angelëngbe delante echanjayana, cha chabe entšá ndoñe yondmëna ca.

<sup>10</sup> “Bëngbe Bëtsá bochanjaperdóna, nda chë Bëngbe Bëtsá Entšá tbojanbemabiama ndoñe tšabá tontsichamuábioye, pero chë Uámana Espiritbiana ndoñe tšabá tontsichamuábioyna ndoñe.

<sup>11</sup> “Tšëngaftanga chë judiëngbe enefjuana yebnëngoye, ntšamo entšanga bétsamama ichámëngbioye y mandadëngbioye chacmojunatse ora, ndoñe šmattsenócochinëna ntšamo o ndáyeca šmochjenéuyanama, o ndayá šmochjayanama; <sup>12</sup> er chë Uámana Espiritu cmochanjabuayená ntšamo jayanama tojtsemncá, jóyebuambayama chacmojt-samna ora ca” —Jesús tojánayana.

*Entšabiama resjo yomna, nje yapa bomnana jesejuabayana*

<sup>13</sup> Chentšana, canya entšanguentšá Jesúsbioye tbojanayana: —Buatëmbayá, atšbe catšata momandá chë átšbioye otocana soyënga chašuatoyé ca.

<sup>14</sup> Y Jesús tbojanayana: —Bacó, ¿nda atše šojábema tsëndatbe ujanayá ca?

<sup>15</sup> Y entšángbioye tojanéyana: —Šmochjinë y cuedado šmochtsebomna chë nje yapa soyënga jtsebomnama bošama; er masque bëtsca soyënga chašmotsóbmne, chca ndoñe quešmochátstatšëmbo aïne tšabe vida taišmochjónyëna ca.

<sup>16</sup> Y chora mëntšá tojanacuntá: “Inamna canye bomna entšá, y chabe fshantsënguine tša jaja saná yojtsopodena. <sup>17</sup> Chë bomná chora mëntšá yojtsejuabnaye, ‘¿Y morna, ntšamo chjama? er ndoñe quetsátsbomna ndayentše atšbe jaja saná jtsobocjayama ca.’ <sup>18</sup> Y mëntšá yojenayana: ‘Chë grano uaquëcnaye yebnënga chantsendbiana, y inye más bëts yebnënga chanjëtsjebo, y chiñe nyetsca atšbe jaja saná chantsóbcjaye y nyetsca atšbe soyëngnaca. <sup>19</sup> Y chora atše chjenayana: Bacó, bëtsca soyënga contsebocjana, ba uatama cmochanjuáshjache. Morna, cochjóchna, cochjase, cochjatëmo, cochjóboyejuaye ca.’ <sup>20</sup> Pero Bëngbe Bëtsá chábioye ibojauyana: ‘Obëjema, cach quem ibeta cochanjóbana; y asna, chë contsebocjana soye, ¿ndabiana yochtsemna ca?’ ”

<sup>21</sup> Y Jesús chora tojánayana: “Chca endbopása chë nje chabiana bomnana tojtsejuabá y bëtsca Bëngbe Bëtsabe soyënga ndoñe tonjëftsashjáftaca ca.”

*Bëngbe Bëtsá chabe básenga jtsanëyana*  
(Mt 6.25-34)

<sup>22</sup> Chentšana, Jesús chabe uatsjëndayënga tojanéyana: “Quem soye cbéyana: Ndoñe šmattsenócochinëna ndayá šmochjase o šmochjofšiyë vida jtsebomnama, ni ndaye entšayá šmochjuíchëtjuama cach ndoñe. <sup>23</sup> Ndegombre, vida chë sanama más enduámna y cuerpo chë entšayama más. <sup>24</sup> Chë ftsenga shloftšënga šmochjanë: tondaye ntjájena, ni jaja saná ntjátbanana, ni grano uaquëcnaye yebnënga ntsebomnana; pero Bëngbe Bëtsá chënga saná jtsatšatnayana. ¡Y tšëngaftanga chë ftsenga shloftšëngbiana puerte más šmonduámna! <sup>25</sup> Masque chca endmëna, masque canya tša tojesenócochinëna, ¿ntšamo nanjobenaye jamana, chë ntsachetšá vida yochtsebomnentšana canye hora vida más jabotiyana? <sup>26</sup> Chcasna, nje chë base soye jamama ndoñe šmontsobenëse, ¿ndayama chë inye soyëngama šmochjatenócochinëna?



<sup>27</sup> “Šmochjuinje chë lirió uantšefjushangá jtsajuajnana: ndoñe ntsetrabájayana, ni ntseshabiamnayana. Pero atše cbéyana, ndegombre ni mo rey Salomón, nyetsca chabe bomnánaca, chë lirió uantšefjushangacá nyetsá botamana quenjatspormana. <sup>28</sup> Bëngbe Bëtsá tša botamana shácuana tojuama, y chë shácuana mënté jajoca jtsamnana y yëfsana iñoca. Cha chë shácuana chca tojamëse, ndegombre tšëngaftangbiámna Bëngbe Bëtsá echanjama entšayá chašmotsábomnana, jentšanga Bëngbe Bëtsábeñe nje batšá ošbuáchiyënga! <sup>29</sup> Chíyeca, ndoñe šmattsenócochinýena ndayá jasama o jofšiyama onguayiñe; <sup>30</sup> er chë soyëngama quem luarentša entsanga mondbétsenocochinýena, pero tšëngaftanga ndoñe. Tšëngaftangna canýe Taitá šmondobomna, y cha endétatsëmbo ndayá cmëjabótama. <sup>31</sup> Más tšabana, tšëngaftanga šmochtsebošë Bëngbe Bëtsá tšëngaftangbe ainaniñe chaotsemándama, y chë cmojtšëjaboto soyënga nje šmochanjóyëngacñe ca” —Jesús tojánayana.

*Chë celoca bomnana*  
(Mt 6.19-21)

<sup>32</sup> “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuínynana chabe amëndayana tšëngaftanga jatšatayama. <sup>33</sup> Lempe ntšamo šmobomncá šmochtsatobuiye y chë ujabotëngbiöye šmochtsatšataye. Mo ndotanguánaye shecnajiñe crocénana cuafjacjacá, celoca tšabe soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca; <sup>34</sup> er chë ndayentšë tšëngaftangbe bomnana tojtsemnentša soyëngama, ainánaca tšëngaftanga šmochántsejuabnaye ca” —Jesús tojánayana.

*Bëngbe Utabná yochjésabama jtseprontánana*

<sup>35</sup> “Mo chë oservénënga, chë entšayá uichétjonënga y uajuinýananéshangaca chëngbe nduiño yochtashjanguama cuafstobatmancá, tšëngaftanga šmochtseprontana Bëngbe Utabná yochjésabama. <sup>36</sup> Chca, tšëngaftanga šmochántsemna mo chë oservénënga, tšabe entšayaca bopormánënga y uajuinýananéshangaca chëngbe amëndayá casamentocana yochtashjanguama cuafstobatmancá; y chca, chë nduiño tojabochembo ora, cachora chë oservénënga jtebiatëfjuama. <sup>37</sup> Puerte oyejuayënga chë oservénënga, chë nduiño tojtashjango ora tmojtsefšnënga. Ndegombre cbéyana, chora chë mandayá sëndorëche echantánaye, mesëshentšë chë oservénënga echanjábtiama, y saná echanjuuatšiyë. <sup>38</sup> Puerte oyejuayënga chënga, chë tmojtsefšnënga cha tojtashjango ora, masque tséntseto ora o bínýanoyë. <sup>39</sup> Quem soye tšabá chacmësertá: chë yebnentša nduiño, ntseco ora atbëbaná yochjabama tojtsetatsëmbëse, cha ndoñe nanjalesencia ndocná jushañe chaondbemama, chë yebnoye jtsamashënguama y jtsatbëbama. <sup>40</sup> Tšëngaftángnaca šmochtseprontana, er chë Bëngbe Bëtsá Entšá tbojanbemá echanjésabo, entsanga chama tondaye tmontsejuabná ora ca” —Jesús tojánayana.

*Chë tšabe oservená y chë bacna oservená*  
(Mt 24.45-51)

<sup>41</sup> Pedro, Jesúsbiöye tbojanianayana: —Utabná, ¿chë tconjayana cuento nje bëngbiamana o nyetscangbiamana yochtsemna ca?

<sup>42</sup> Y Bëngbe Utabná tbojanjuá: —¿Nda yomna chë oservená, ntšamo chë nduiño tojtsebošcá amá y nyets juábnaca amá? Cha jtsemnana nda chë nduiño bochjëftsebošhona chë yebnentšënga chaotsanýenama, y jasama tojtsemna ora chaújuatšëma. <sup>43</sup> Puerte oyejuayá chë oservená, chë nduiño tojtashjango ora, cha tbojínýena jtsamëse ntšamo tbojtsemncá. <sup>44</sup> Ndegombre cbéyana, chë nduiño chábioye bochanjaimpáda nyetsca chabe soyënga chabotsinýëñama. <sup>45</sup> Pero chë oservená, chabe nduiño betscó ndoñe yochantabo ca tojtsejuabná, y tojontšë chë inye oservénënga, boyabásenga y shembásenga jtsajantšëtayana, becá jtsesana, jofšiyana y jtsótmenana, <sup>46</sup> cha ndoñe

tontsejuabná te y tontsetátšëmbo ora, chabe nduiño echántashjango y puerte jabuache bochantsecastíga, y echanjama cha jasúfriama chabotsemnama, mo chë Bëngbe Bët-sábeñe ndošbuáchiyënga mochanjasufriacá.

<sup>47</sup> “Chë oservená, nda tojtsetátšëmbo ndayá chë nduiño tojtsebošama, pero ndoñe tontseprontana y ndoñe tontsobedecena, cha ba soye mochántsetjanja. <sup>48</sup> Y chë oservená, ntsetatšëmbcá ntšámnaca tojabuachjuanguá, y chë causa chamotsetjanjama tbojtsemnësna, chana más batšá mochántsetjanja. Nda bëtscá soyënga tmojatštábioye jauyanana, bëtscá soyënga chaoma ca; y nda bëts trabajo tmojabonyébioyna jauyanana, más bëts trabajo chaoma ca.”

*Jesusbe causa, entsángbeñe más jtsentsjanayana*

(Mt 10.34-36)

<sup>49</sup> “Atše sënjabo quem luariñe jabojuinÿiyama, y jtša séntseboše malaye ya ctsangbototjuana! <sup>50</sup> Atše šontsemna puerte jasúfriana, y jpuerte ngménaca séntsobátmana chca chaotsemnama! <sup>51</sup> ¿Tšëngaftanga šmojtsejuabná atše tijabo quem luarentše entsánga natjémbana chamotsiyenama? Ndegombre ndoñe chca queochátsmëna; atše sënjabo causa, entsánga más mochántsejtsjanaye. <sup>52</sup> Er mëntescana, canÿe yebnentše, shachnënga ndoñe quemochátenëyeunana, únganga útatbe contra y útata úngangbe contra mochántsemna. <sup>53</sup> Taitá uaquiñabe contra echántsemna, y uaquiñá taitabe contra; bebamá, bebëbe contra, y bembe bebmabe contra; uambén mamá, bebincuabe contra, y bebincuá uambén mamabe contra ca” —cha tojánayana.

*Ndaye tempo yochtsemnama ntšamo inétsotatšëmbo*

(Mt 16.1-4; Mc 8.11-13)

<sup>54</sup> Mëntšánaca Jesús entsánga tojanéyana: “Tšëngaftanga, chë jantšetëshënga shinÿe uenatjémbambanoicana tojóboconama šmojinÿe ora šmondbétsichamo ‘echanjuafté ca’, y ndegombre chca jopásana. <sup>55</sup> Y tsmanoicana tojtsebínÿia orna, tšëngaftanga šmondbétsichamo ‘echanjojënÿana ca’, y ndegombre chca jopásana. <sup>56</sup> ¡Bacna entsánga, chë ntšamo ndegombre šmojuabnacá ndinÿinÿnayënga! Ntšamo quem luarentše yochtsemnama, ndayá celoca šmojinÿama tša tšabá šmojtsetatšëmbëse, ¿ndáyeca ndoñe šmontsobena jtsetatšëmbuana ndaye bëts soye quem tempo Bëngbe Bëtscá cmojtsinÿanÿinama ca?” —Jesús tojánayana.

*Chë uayayáftaca natjémbana jtenbemana*

(Mt 5.25-26)

<sup>57</sup> “¿Ndáyeca cach tšëngaftanga ndoñe šmondbéyana ndayá tšabá bëtsemnana? <sup>58</sup> Nderado nda tcmojtsedemandá y cabildoye jotsánama cmojtsemna, cabá choye ndáshjango ora, betscó cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandadna josticiëngbe cucuatšíñe cmochanjáboshjona, y chënga cárceloye cmochanjutame. <sup>59</sup> Ndegombre cbéyana, chentšana ndoñe quecochtétsbocna, nÿets ndebénana candesopagantscuana ca” —Jesús tojánayana.

## 13

*Bëngbe Bëtscabe benache jtishachana*

<sup>1</sup> Cach ora, báseftanga tmojána Jesús jinÿama, y tmojancuentá ndayá chë mandado Pilato tojanmama; chana básefta Galileoca boyabásenga tojtsanëbaye, y chëngbe buiñe yojenajuabó chë Bëngbe Bëtscábioye jëtschuayama tmojanóba bayëngbe buiñeca.

<sup>2</sup> Y Jesús chënga tojanéyana: “¿Tšëngaftanga šmojtsejuabná, chë Galileoca entsánga chca tmojapasá, chë luarentša inÿe boyabásengbiama chënga más bacna soye amënga imojamna causa ca? <sup>3</sup> Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtscabe benache ndoñe šmontishachëse, tšëngaftángnaca šmochanjóbana. <sup>4</sup> O, ¿tšëngaftanga šmnëtsejuabnaye, chë Jerusalenentša

bnétsana posufta entšanga tmojanóbanënga, chë Jerusalemoca binche uafjajónaye Siloé béconana tsbanana jebna soye tojtsanáshajaye ora, chënga imojamna chë ínÿyenga Jerusalemontše oyenëngbiama más bacna soyënga amënga ca? <sup>5</sup> Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana ca” —Jesús tojanéyana.

*Chë ndëshajona higo betiyama cuento*

<sup>6</sup> Jesús mëntšá tojanacuntá jabuátambama: “Canÿe entšá jajoca canÿe higo betiye inabomna, y yojá nderado nantseshájonama, pero tondaye yonjínÿena. <sup>7</sup> Chcasna, chë jajañe bojanÿábioye cha ibojauyana: ‘Mouena, ya unga uata tsabó quem higo betiyoje jaborrepárama, nderado nantseshájonama, pero ndocna te tondaye chiyátinÿena; chíyeca, motsetëtše. ¿Ndayama quem jajañe yochjátsjena ca?’ <sup>8</sup> Pero chë jajañe inÿená ibojauyana: ‘Bacó, inÿe uata cachcá monÿá, fshantse chanjáboplojua y uanguanëshe chanjabotboto. <sup>9</sup> nderado chca jamëse, nanjashájona; y ndóñesna, chora cocayé cuantsetëtše ca.’ ”

*Jesús canÿe ochnayté, canÿe tsëštjona shembásabioye tbojanshná*

<sup>10</sup> Canÿe, canÿe ochnayté Jesús yojontšé entšanga jabuátambana, chë judiëngbe enefjuana yebnentše, <sup>11</sup> y chentše yojtsemna canÿe shembása; cha ya bnétsana posufta uata yojtsešoca. Canÿe bacna bayëja chábeñe tojánamashëngo y chca tseštjoná tbojtsanbema, y tondayama yontsobena jtondiríchana. <sup>12</sup> Jesús chábioye tbojáninÿe ora, tbojanchembo y mëntšá tbojaniana: “Batá, mora ya ndoñe šocá quecátsmëna ca.”

<sup>13</sup> Chora Jesús chabe cucuatšënga chábeñe tojanjajó, y cachora chë shembása yojtondirícha, y tojanontšé Bëngbe Bëtsábioye jëtschuayama. <sup>14</sup> Pero chë enefjuana yebnentša mándayana tbojánëtna, Jesús chë shembása ochnayté tbojanshnama, y entšanga tojanéyana: —Chnénguana te comna jatrabájama; chora šmochjabo jenóshnama; ochnaytese ndoñe ca.

<sup>15</sup> Y Bëngbe Utabná tbojanjuá: —¡Bacna entšanga, ntšamo ndegombre šmojuabnacá ndinÿinÿayënga! ¿Tšëngaftanguentšá ndocná chë ochnayté chabe uacná o chabe burrotema buanjuajafjoná, juanatsama béjaye chaofšema? <sup>16</sup> Chcasna, quem shembása, canÿa Abrahámëntšana entšá, y Satanasbe causa bnétsana posufta uata šocá yojtsemna, ¿ndoñe tšabá yondmëna canÿe ochnayté chë bayëja jtsebojuánana ca?

<sup>17</sup> Jesús chca tojánayana ora, chabe uayayënga imojtsëuatja, y nÿetsca entšanga imojtsóyejuaye Jesús tša bëts soyënga yojtsamama.

*Chë mostaztiye jenayama cuento*

(Mt 13.31-32; Mc 4.30-32)

<sup>18</sup> Jesús mëntšánaca tojánayana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenana ca? <sup>19</sup> Endmëna mo canÿe mostaza jénaye, canÿe entšá jajañe tojajecá; chiyna jójuana y canÿe bëts betiye jóbemana; tša bëtsashe jóbemana, chíyeca chë jaja shloftšënga chë buacuashënguiñe uajajonëtemëngá jauábopormana ca.”

*Chë levadurama cuento*

(Mt 13.33)

<sup>20</sup> Mëntšánaca Jesús tojánayana: “¿Ndaye sóyeca chjobenaye Bëngbe Bëtsabe amëndayama jábuayenama ca? <sup>21</sup> Endmëna mo levadurcá; canÿe shembása chana jenájua bana unga medida arninÿañe, nÿetsana chauabochoama ca.”

*Chë base utëntšá bëšáša*

(Mt 7.13-14, 21-23)

<sup>22</sup> Jerusalemoye benache, Jesús entsanga yojtسابوأتامبايە بەتس پوئبلەنگوئيە y base pueblotémenguine. <sup>23</sup> Canya chábioye tbojantjá: —Béngbe Utabná, ¿nyé báséftanga imomna ché atsebácanénga mochtsemnénga ca?

Y Jesús tbojanjuá: <sup>24</sup> —Puerte šmochtsentséna ché base uténtšá béšásajana jamashjnama; er ndegombre cbéyana, banga mochántseboše chéjána jamashjnama, pero ndoñe quemochatobenaye. <sup>25</sup> Ché yebnentša nduño chaojotsbaná y ché béšása chaojtátamentšana, tséngaftanga ché shjoca chašmojtsemnénga, šmochántsechembuana, méntšá jtsichámése: “Utabná, šmebëtafjo ca.” Pero cha cmochanjáuyana, “Atše ndoñe quetsátstatšémbo ndémoguénga tséngaftanga šmomnana ca.” <sup>26</sup> Chora tséngaftanga šmochanjontsé ichámuana: “Aaftaca cánjiñe fsénjase y fsénjofsé, y aca béngbe tsáshenañe tconjabuatambá ca.” <sup>27</sup> Pero cha cmochanjójuaye: “Ya tcbonjáuyana, ndémoguénga šmomnana ndoñe tstátšémbo ca. ¡Atšbentsána mojuánanga, bacna soyénga aménga ca!

<sup>28</sup> “Chora chentše puerte šmochanjenóbošachna y tsetšanama juatsašénga šmochantsenoftésjojnaye, Abraham, Isaac, Jacob y nyetscanga Béngbe Bëtsabe juabna oyebuambnayénga Béngbe Bëtsabe améndayoca imojtsemnana chašmojinýe ora, y tséngaftanga chentšana cmochtëbuacanama. <sup>29</sup> Y shinýe bocanoicana y uenatjémbambanoicana, tsmanoicana y tsjuanoicana entsanga mochanjabo y juasama mochanjotbiana Béngbe Bëtsabe améndayentše. <sup>30</sup> Y banga mora nduámanénga imomnénga, chora uámanénga mochántsemna; y banga mora uámanénga imomnénga, chora nduámanénga mochántsemna ca” —Jesús tojánayana.

*Jesús tbojanongmé Jerusaleméntša entsangbiama  
(Mt 23.37-39)*

<sup>31</sup> Jesús ché soyénga tojanéyana ora, báséfta fariseunga tmojánashjajna y tmojanianyana: —Muentšana motsatoñe; Herodes entseboše aca jtsóbama ca.

<sup>32</sup> Y Jesús tojanéjua: —Motsajna y šmochjauyana ché corente studio bomná, mo tjañe mesetcá: “Minýe, ménté y yéfse entsángbentsána bacna bayéjénga sëndëtëbuacana y šoquénga sëndáshnaye, y baseftaytesna chanjapochóca ca.” <sup>33</sup> Pero atše šontsemna ménté y yéfse jtsayana, y baseftaytesna Jerusalemoye jana, er ndoñe tšabá ntsemnana canya Béngbe Bëtsabe juabna oyebuambnayá Jerusaleméntša chábuañe chaóbana ca.

<sup>34</sup> “¡Jerusaleméntša entsanga, Jerusaleméntša entsanga, tséngaftanga ché Béngbe Bëtsabe juabna oyebuambnayénga jtsébáyana, y ché Béngbe Bëtsabe ichmónéngbioye ndëtsbéngaca jtsatëchénganjana jtsébáyama! ¡Bueta soye atše sënjábošena tséngaftanga átšbioye júbuajama, mo canýe tuamba chabe bolletotéménga juaténgmiáša tajsoye cuaftajayecá, pero tséngaftanga ndoñe chešmátsbošena! <sup>35</sup> Y šmochjinýe, mora atše cachcá cbochanjesénýaye, y chca, atšna enánanga cbochanjésabashejuana, mo canýe yebna cachcá tcojesonýa y éañe tcojeseboshjoncá. Y ndegombre, tséngaftanga morscana ndoñe más atše quešmochátinýe; y atše šmochántinýe, ché: ‘¡Corente bendición bomná, Béngbe Utabnabe obenánaca tojabá ca!’ chašmojtsichamo ora ca” — Jesús tojánayana.

## 14

*Jesús, canýe uafshachanánaca šocábioye tbojanshná*

<sup>1</sup> Canýe ochnayté, Jesús tojána jasama fariseungbe canýe améndayabe yebnoye; y ché fariseunga yejuana imojtserreparana, er ndayá Jesús nanjama. <sup>2</sup> Chéntšnaca, chabe delante yojtsemna canýe entšá uafshachanánaca šocá. <sup>3</sup> As Jesús ché ley abuátambayénga y fariseunga tojanatjá: “¿Quenlesenciana canýe ochnayté canýe šocá jáshnama o ndoñe ca?”

<sup>4</sup> Chéngna ndocá tmonjanjuá. As Jesús ché šocábioye tbojánishache, tbojanshná y tbojanianyana chaotsatoñe ca. <sup>5</sup> Y ché fariseunga tojanéyana: “¿Nda tséngaftanguentšá,

nderado chabe uaqiñá o uacná canye tboye tojtsótsatše, cachora ndoñe nanjá jetseját-sécama, masque ochnayté totsomñése ca?”

<sup>6</sup> Y chënga ndocá tmonjanobená cha jojuana.

### *Chë casamentoye ófjanënga*

<sup>7</sup> Jesús tojáninye ntšamo chë ófjanënga quëfseroye imojtsachñëjuana jotbiamama; as mëntšá chënga tojanabuayená: <sup>8</sup> “Canye casamentama nda chacmojojfa ora, quëfseroca ndoñe catjót'bema, er nderado inye ofjaná acbiama más uamaná ústonoye nandaboye; <sup>9</sup> y nderado chë tsëndatbe ofjaná nanjabo y cmatjauyana: ‘Mua chentše chaótbema, maluaré ca’, y chora cmatjotóca ouatjentše chafjoca jana jatótbemana. <sup>10</sup> Chamna, nda chacmojojfa ora, chafjoca cochjót'bema, chca, chë ofjaná chaojabo ora chacmëyana: ‘Taita, quëfseroye motsëchnëngoñe ca’. Y chca, aca chë chentše tmojtsetbiámanëng-biama uamaná cochántsemna. <sup>11</sup> Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bëtsá mochanjábema ca.”

<sup>12</sup> Y chë tbojanofja entšábioynaca Jesús mëntšá tbojanianyana: “Fiesta chacojama o sananga chacojtsebomna ora, ndoñe cattsebuájajana acbe amiguënga, catsátanga, ni pamíllanga, ni acbe juachañe oyenënga bomnënga; er chëngnaca, fiesta chamojtsebomna ora, aca cmochantétofja, y chca ya acbe uacanana soye cochántsebomna. <sup>13</sup> Chamna, canye fiesta chacojama ora, cochjúbuaja ndbomnjëmënga, jama ndobenënga, coshetënga y jtanënga, <sup>14</sup> y aca corente oyejuayá cochántsemna; er chënga ndoñe quemochatobenaye cachá aca jtëtofjana, pero acna acbe uacanana soye cochántsebomna, chë Bëngbe Bëtsabe bominjïñe tšábenga imomnënga chamojtayena ora ca” —cha tbojanianyana.

### *Chë bëts sanama cuento (Mt 22.1-10)*

<sup>15</sup> Chca tojanuena ora, canya chë mesëshentše tbemaná tojánayana: —¡Puerte oyejuayá echántsemna Bëngbe Bëtsabe amëndayoca juasama chaojtsemná ca!

<sup>16</sup> Chora Jesús tbojanianyana: —Canye bacó canye bëts saná vojaprónta y ba entšanga yojúbuaja. <sup>17</sup> Juasama ya yojobuache ora, canye oservená ibojíchmua chë ófjanënga jáuyanama chamotsajna, ya lempe yojtseprontana ca. <sup>18</sup> Pero chorna nyetscanga imojontsé jtsoyátšëmbuana. Canya yojayana: “Cabá mora canye fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca.” <sup>19</sup> Inya yojayana: “Bnétsana toronga sënjobuámiñe, y šontsemna jana jányama, jaárama taimochjosérvia. Chcasna, aslëpaye šmotsepacenciá ca.” <sup>20</sup> Y inya yojayana: “Cabá mora sëntsobouamá, y chë causa, ndoñe quichatobenaye jama ca.” <sup>21</sup> Chora chë oservená yojesshécona y lempe chabe nduíñbioye ibojauenaye. Chë nduíño tša ibojtsetna, y chë oservenábioye ibojauyana: “Cam ora motsa tsashenangoye y benachëngoye, y moye cochjunatse ndbomnjëmënga, jama ndobenënga, jtanënga y coshetënga ca.” <sup>22</sup> Chentša bënëntscose, chë oservená chë nduíñbioye ibojauyana: “Bacó, ya sënjama ntšamo šconjamandacá, y cabá ínÿengbiama luare entsemna ca.” <sup>23</sup> As chë nduíño ibojauyana: “Motsa benachëngoye y betiyetemëngaca jetjaniñëngoye, y entšanga cochjautáriaye moye chamuábama, atšbe yebna chaojtjiama; <sup>24</sup> er ndegombre cbéyana, chë natsana sënjobuajënguentšá ndocná atšbe saná queochatsse ca.”

### *Ntšamo yomna Cristbe ustóná jtsemnana (Mt 10.37-38)*

<sup>25</sup> Mallajta entšanga Jesús imojtséstona; as cha tojanobuértana y tojanéyana: <sup>26</sup> “Nderado nda átšbioye tojabo, y ntšamo chabe taitá, chabe mamá, chabe shema, chabe básenga, chabe catsátanga y uabënganga tuababuányëshanama, y ntšamo cachá tuenobobonshánama, atše ndoñe más corente šontsebobonshánëse, cha ndoñe ntsobonana atšbe uatsjendayá jtsemnana. <sup>27</sup> Y nda, atšbiama ndoñe tontseprontana jasúfriama

y cruciñe jobanámnaca, y nyetsca chabe quem luare soyenga ndoñe tonjéshobshjona atše juastama, cha ndoñe ntsobenana atšbe uatsjendayá jtsemnana.

<sup>28</sup> “Nderado nda tšëngaftanguentšá tojtsejuabná canye tsbanana jebna soye japór-mama, ¿cha natsana ndoñe nanjót'bema jinýama ntsachetšá crocénana chentše yochjuába, y japochócama nyetšá crocénana tayojtsebofnama? <sup>29</sup> Chca ndóñese, nderado chë uajatsana ucuatjoniñe tojapormá y lempe jajebuama ndoñe tonjobenase, nyetscanga chca tmojinýenga, muantsáfchaye y mëntšá muantsichamo: <sup>30</sup> ‘Quemějema jajebuama tonjontšé, y japochócama ndoñe chenatobená ca.’

<sup>31</sup> “O ¿ndaye rey inye réyefatacá jéntsama tbojotocase, natsana ndoñe nanjót'bema jajabuoyama, nderado nanjobenaye bnétsana uaranga soldadéngaftaca chë inýabioye jayénjanana, chë inya uta bnétsana uaranga soldadéngaftaca tojtsabose? <sup>32</sup> Y ndóñesna, chë inye rey cabá bënoca tojtsemna ora, básefta entšanga echanjichamuá, cha jauyanama más tšabá yomna ndoñe jatentsjanayana ca.

<sup>33</sup> “Chcasna, ndánaca tšëngaftanguentšá, lempe ntšamo tobomncá ndoñe cachcá tonjesonyá, cha ndoñe ntsobenana atšbe uatsjendayá jtsemnana ca” —Jesús tojánayana.

#### *Chë tamó fténana tojtsebofnaca ora*

(Mt 5.13; Mc 9.50)

<sup>34</sup> “Tamó tšabe soye endmëna; pero chë tamó fténana tojtsóbemëse, tšëngaftanga ndoñe quešmátobena jamana tempcá sanana cachiñe chaotsatsmënama, ni saná jata-muama. Chë ftëna tamó tondayama ntsoservénana, cachcá, chë atšbe uatsjendayënga jtsemnana tmojtsebošënga, pero lempe jéshobshjonama ndoñe tmontseboše, cach ndoñe chama ntsoservénana. <sup>35</sup> Chë ftëna tamó ndoñe ntsoservénana ni fshantsama, ni uanguanëshama. Nye jtsëtšëna. Chë jouenama tmojtsobenënga, šmochjouena ca” —Jesús tojánayana.

## 15

#### *Chë ótsëna oveshabiamana cuento*

(Mt 18.10-14)

<sup>1</sup> Nyetsca chë Romocama impuesto entšángbioye atjanayënga y inye bacna soyenga amënga, Jesúsbioye imojánajna chabe palabra jouenama; <sup>2</sup> y chë fariseunga y ley abuátambayënga chama Jesusbiamana podësca imojtsoyebuambná, mëntšá: —Mua bacna soyënga amëngaftaca entsenuta y chëngaftaca entsesá ca.

<sup>3</sup> As Jesús mëntšá tojanacuntá, chënga jabuátambama: <sup>4</sup> —¿Nda tšëngaftanguentšá, canye patse oveshënga tojtsabamna, y canya tbojtsobuétšëse, chë inye esconëfta bnétsana y esconëfta oveshënga shëntsjañe ndoñe cachcá nanjesénýaye, y nanjá chë otšëná jetsenguanguama candëtsónýeñëntscuana? <sup>5</sup> Y tbojtsinýena ora, oyejuayá chë oveshá jesotantšájuana; <sup>6</sup> y yebnoye tojtashjango orna, chabe amiguënga y juachañe oyenënga jáchembuana y mëntšá jáuyanana: “Atšëftaca móyejuanga, er chë sentsanobuetše oveshá séntsinýena ca.” <sup>7</sup> Atše cbéyana, cachcá, celócnaca más oyejuayana jtsebínýnana, canye bacna soyënga amá tšabe benache tojtishachabiamana, y ndoñe nya yapa, esconëfta bnétsana y esconëfta tšabe soyënga amëngbiamana, chë ndoñe yondujaboto bacna soyënga amana jtsajbanana ca.

#### *Chë crocénana tojtsónýëna shembásabiamana cuento*

<sup>8</sup> “O mëntšá, ¿ndëmua shembása, bnétsana uámana crocénana tojtsebofnana y cánýana tojtsobuétšëse, chora ndoñe canye uajuinýanëshana nanjuajuinýená, y cuédádoca chë yebna nantsetsjajo y botamana chë crocénana nantsenguango candëtsónýeñëntscuana? <sup>9</sup> Y tojtsinýena ora, chabe amiguënga y juachañe oyena shembásënga jáchembuana, y mëntšá jáuyanana: ‘Atšëftaca móyejuanga, er chë sentsanobuetše crocénana

séntsinyena ca.’ <sup>10</sup> Atše cbéyana, cachcá, chë Bëngbe Bëtsabe angelotémëngbeñe oye-juayana jtsebínynana, nÿe canÿe bacna soyënga amá chë tšabe benache tojtishachabi-ama ca” —Jesús tojánayana.

*Chë uaquiñá bacna benachiñe ayá*

<sup>11</sup> Jesús mëntšánaca tojanacuntá: “Canÿe entsá uta uaquiñata yojánabamna; <sup>12</sup> y canÿe, chë ngomënche uaquiñá chabe taitábioye ibojauyana: ‘Taita, atšbe otocana soyënga šmatatšetá ca.’ As chë befta lempe chë uta uaquiñata yojtëjáyate.

<sup>13</sup> “Chentšana baseftaytesna, chë más bobontse uaquiñá lempe ntšamo ibojobuachcá yojtsatobuiye y chë crocenánaca bën luaroye yojtsoñe, y choca, cha nÿe ntšamo ibojocochëngcá, mocá yojenobuiye, y chca, lempe yojtsepochóca. <sup>14</sup> Lempe crocénana yojtsoshañe orna, bëts shëntsana chë luarentše yojóshjango, y chë causa cha ibojotóca shëntseca jtsejétanana. <sup>15</sup> As, cha yojá trabajo janguangoñama y yojínÿena chë luarentša canÿe entsábentše; chana, chabe jajoye ibojíchmua cotšënga jtsanÿenama. <sup>16</sup> Chë bobontsna yojtseboše chë cotšbe saná jtsesana, pero ndocná tondaye ibonjanájuatšnye.

<sup>17</sup> “Cabana, botamana yojinÿe ntšamo yojtsepasacá, y mëntšá yojenójuaboye: ‘¡Bueta trabájayënga atšbe taitabe yebnentše bëtscá saná mondëtsóbomñe, y atše muentše shëntsama chanjóbana ca! <sup>18</sup> Chantá atšbe taitabe yebnoye y mëntšá cha chanjauyana: Taita, šmotseperdoná. Atše tijama ndayá Bëngbe Bëtsá ndoñe yondbošcá, y ntšamo aca ndoñe condbošcá. <sup>19</sup> Mora ya merecido taitatobuajoñe acbe uaquiñá jtsabáinama; nÿe canÿe acbe trabajayacá Diosmanda šmatofja ca.’ <sup>20</sup> Chca jëftsenójuaboyëse, yojontšë cachabe yebnoye jtana.

“Cabá bënoca yojtsemna ora, chabe taitá chábioye ibojinÿe, y chabe uaquiñabiamama ibojóngmia, y jajébenguama betscó yojá; ibojajebengo, ibojtotsejcuá y tša yojtsóye-juayayama chë uaquiñábioye ibojtámochó. <sup>21</sup> Chora chë uaquiñá ibojauyana: ‘Taita, šmotseperdoná. Atše tijama ndayá Bëngbe Bëtsá ndoñe yondbošcá, y ntšamo aca ndoñe condbošcá; mora ya merecido taitatobuajoñe acbe uaquiñá jtsabáinama ca.’ <sup>22</sup> Pero chë Taitana chabe oservénënga yojámëndaye: ‘Betscó chë más tšabe entsáyá mauaca y matspormanga, montšabuechëtjo y matsshecochëtjo. <sup>23</sup> Mora chë más minÿica uacná šmochjuánatse y šmochjášhua. ¡Mochjase y mochjóboyejuaye ca! <sup>24</sup> Quem atšbe uaquiñá mo obanacá endánmëna y mora bënga montsetátšëmbo cha ainá yotsomñama. Quem atšbe uaquiñá mo otšenacá endánmëna y mora tmontsinÿena ca.’ Y chentšana imojontšë joboyeuayama.

<sup>25</sup> “Chë yebnoca fiesta yojtsemnëntscuana, chë mayor uaquiñana jajoca inétsomñe. Yebnoye yojtsataye y ya béconana yojtsemna orna, cha yojouena imojtsabuastoye y imojtselántsaye. <sup>26</sup> As chora cha canÿe oservenábioye ibojachembo y mëntšá ibojatjaye: ‘¿Ndayá bëngbe yebnentše yojtsopasana ca?’

<sup>27</sup> “As chë oservená ibojajuá: ‘Acbe uabentsá tontashjango y chama acbe taitá šonjutarié chë más minÿica uacná jáshbuama, cha tšabá tojtashjanguama ca.’ <sup>28</sup> Pero chë uabóchena catšatna corente ibojtsetna y ndoñe yontseboše tsoye jtamashënguana. As cach befta yojábocna chë catšátbioye jaimpádama chauatamashënguama. <sup>29</sup> Chora cha chë taitábioye ibojauyana: ‘Taita, aca condétatšëmbo bueta uata cbetsajabuáchanama, nÿets tempo cbetseyeunanama, pero ndocna te ni mo canÿe chivotema chešcaisatšá atšbe amiguëngaftaca joboyeuayama. <sup>30</sup> Y masna, acbe uaquiñá chë bacna vida bomna shembásengaftaca acbe crocénana pochocayá tojtashjango ora, chë más minÿica uacná chabiamama tcojášhua ca’ —chë uaquiñá ibojauyana.

<sup>31</sup> “Chora chë befta ibojajuá: ‘Atšbe uaquiñá, aca sempre átšeftaca condétsemna y lempe ntšamo atše tsbomncá acbiámncá endmëna. <sup>32</sup> Pero mora tšabá entsemna joboyeuayama y joyeuayëngama; er acbe uabentsá mo obanacá endánmëna, y mora bënga montsetátšëmbo cha ainá yotsomñama; mo otšenacá endánmëna, y mora tmontsinÿena ca.’ ”

## 16

*Chë nduiñbe ndoñe tšabe uajabuachanábiama cuento*

<sup>1</sup> Jesús mēntšánaca chabe uatsjéndayēnga tojanacuntá: “Inamna canye bomna entšá, y cha ibnabomna canye uajabuachaná chabe soyēnga chaotsinýenama; y chë nduiño imojuenaye chë uajabuachaná chabe soyēngaca ndoñe tšabá yontsamama. <sup>2</sup> Asna, chë nduiño ibojachembo y mēntšá ibojauyana: ‘¿Ntšamo acbiama šmontsatsētsnacá ndegombre yojtsemna ca? Mora cuenta šmatatštá ntšamo atšbe soyēngaca tcojamama, er morscana ya ndoñe atšbe soyēnga inýená quecochátsmēna ca.’ <sup>3</sup> Chë uajabuachaná yojontšé jenójuaboyana, y mēntšá yojeniyana: ‘¿Y mora ntšamo chtsemana, chë nduiño atšbe trabajuentšana šojtabocna ora? Ndoñe añemo quetsátsbomna fshantse jatrabájama, y lemošna jótjañamna sēntsēuatja. <sup>4</sup> Ya séntsetatsēmbo ndayá chjama, chca, atšbe trabajuentšana chašojtábocna ora, atšbe jtsabamnama ndēmuanýenga chēngbe yebnentše chašmofjama ca.’

<sup>5</sup> “Chentšana, canýánya chë chabe nduiñbioye ndebénēnga yojáchembo. Cánýabioye ibojatjaye: ‘¿Ntsachetšá atšbe nduiño icondebena ca?’ <sup>6</sup> Y cha ibojojuá: ‘Canye patse barrilēšangá aceitiye ca.’ As cha ibojauyana: ‘Muentše acbe recibécha entsamna; mora mótbema y inýacha nýe shachna bnētsana barrilēšangama matapormá ca.’ <sup>7</sup> Chentšana inýabioye ibojatjaye: ‘Y acna, ¿Ntsachetšá icondebena ca?’ Y cha ibojojuá: ‘Canye patse medida trigo ca.’ As cha ibojauyana: ‘Muentše acbe recibécha entsamna; chiñe nýe posufta bnētsanama mábema ca.’ <sup>8</sup> Chentšana, chë nduiño tšabá yojayana chë ndoñe tšabá ama mayordombiama, cha stúdioca yojamama. Chë nýe quem luarama enójuabnaye entšanga, cachēngbe soyēngaca puerte studio bomnēnga mondmēna; y chë entšangbe juabnēnga binýnayábenga ndoñe nýa yapa ca.

<sup>9</sup> “Atšbe cbabuayená, quem luarentše, chë bacna soyēnga amēngbe luarentša bomnánaca amiguēnga šmochjábíama, inýenga jtsējabuáchanēse. Chca, chë bomnana tojtsopochocá ora chašmotsabamna ndēmuanýenga chë nýetsca tescama oyenoye chacmúbuaajama ca.

<sup>10</sup> “Nda básefta soyēnguiñe lempe tšabá tojama, bētscá soyēnguiñnaca lempe tšabá echanjama; y nda básefta soyēnguiñe ndoñe tšabá tonjama, bētscá soyēnguiñnaca cach ndoñe tšabá queochatsma. <sup>11</sup> Chcasna, quem luarentše, chë bacna soyēnga amēngbe luarentša bomnánaca ndoñe tšabá šmonjamēse, ¿nda chë ndegombre bomnana, chë Bēngbe Bētsabe soyēnga cmochjábanýiye? <sup>12</sup> Y chë ndoñe tšēngaftangbe sóyeca ndoñe tšabá šmonjamēse, ¿nda cmochjantšabuáchiye ndayá tšēngaftangbiama yomncá ca?

<sup>13</sup> “Ndocná ntsobenana uta mandayata jtsaservénana; er cánýabioye bochantšáboyēnja y chë inýabioyna bochantšebobonshana, o cánýabiama tšabá echántsetrabajaye, y chë inýabiamna ndoñe tšabá. Ndoñe quecátobena Bēngbe Bētsá jtsebobonshánana, nýe quem luarentša soyēnga jtsebomnana tcojtsebošēse ca” —Jesús tojánayana.

<sup>14</sup> Chë fariseunga, becá crocénana jtsebomnana bošēnga imnamna, lempe chca chēnga tmojanuena, y Jesúsbioye imojtsáboyejuana. <sup>15</sup> As Jesús tojánéyana: “Tšēngaftanga entšangbe delante mo tšábenga cuaftsemncá jtse nobiamnayana, pero Bēngbe Bētsá endétatšēmbo ndayá tšēngaftangbe ainaniñe yomnama; er ndayá entšanga más tojtsebošcá, Bēngbe Bētsá jtsáboyēnjana ca.

*Moisesbe ley y Bēngbe Bētsabe amēndayana*

<sup>16</sup> “Moisesbe ley y chë Bēngbe Bētsabe juabna oye buambnayēnga tšēngaftanga cmonjanabuayiyná, Juan chë Ubayaná quem luaroye tonjánabēntscuana. Cha tonjánabo orscana montsabuaiyina chë tšabe noticiēnga Bēngbe Bētsabe amēndayocama, y nýetscanga tša montseboše choye jamashēnguama ca.



<sup>17</sup> “Más paselo endmëna, celoca y quem luare chaopochocá, y ndoñe chë ntšamo leyiñe iuayancá, chë ndayá jopásama yomnama, ni mo canye punto ndoñe chca chaondétsemnama ca” —Jesús tojánayana.

*Ndayá Jesús tojanabuatambá chë bouamnënga tmojtsenétšenama*  
(Mt 19.1-12; Mc 10.1-12)

<sup>18</sup> “Nda chabe shémbioye cachcá tbojesonýa y ínÿaftaca tojtóbouamase, cha chë nat-sana shémbioye ínÿaftaca jtseíngñayana; y nda chë útšena shembásaftaca tojobouamá chana, canye uabuatmá jtsebomnana, y chca, chana canye bacna soye jtsamana ca” —Jesús tojánayana.

*Chë bomná y chë ndbomnjëma Lázaro*

<sup>19</sup> “Canye bomna entšá inamna; cha yojanamana uámana y botamana shbuenda uafjatsenga y lino entšayangá jtichëtjuana, y cada te bëts fiestënga yojánama. <sup>20</sup> Canye ndbomnjëmnaca inamna, Lázaro ca uabainá, bacna nguayanánaca šocá; y cha yojanamana chë bomnabe bëšásentše fshantsiñe jótbemana. <sup>21</sup> Quem ndbomnjëma yojtseboše chë bomná yojtsesayentšana yojatquëcjana sanángaca jtoshachayana; y chë quešënga imnaboye chabe nguaye cuerpo jajáfjuama. <sup>22</sup> Canye te Lázaro yojtsóbana, y Bëngbe Bëtsabe angelënga Abrahámbioye cha imojtamba, chë nÿetscanga oyejuayënga mondmëna luaroye. Chë bomnánaca yojóbana y imojuátbontsa.

<sup>23</sup> “Chë bomná infiernoca puerte ngmëniñe yojtsesufrina ora, tsbanánoye yojontješiye y bënoca Abraham ibojinÿe, y Lázaro cháftaca yojtsemna. <sup>24</sup> As chë bomná yojuayebuáchena: ‘¡Taita Abraham, šmolastemá! Lázaro michmó chabe ntšabuafja chaofchecuacuá y atšbe bichtaja chauabofchecuacuaye, er quem íñeshoca tša séntsesufrina ca.’ <sup>25</sup> Pero Abraham ibojauyana: ‘Uaquiñá, menojuabó, aca fshantsoca vida conjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye quenjátsbomna; pero morna, cha tšabá y oyejuayá entsemna, y aca jabuache ngmënana contsebomna. <sup>26</sup> Y inÿe soye, canye bëts tbuañe entsemna tšëngaftangbiocana méntsoñe; chca, chë tšëngaftangbioye muentšana jenachnënguama tmojtsebošënga ndoñe chamondëtsobena, ni chocana béngbioye cach ndoñe ca.’

<sup>27</sup> “Y chë bomná ibojauyana: ‘Masque chca, Taita Abraham, Diosmanda Lázaro michmó atšbe taitabe yebnoye; <sup>28</sup> choca sëndábamna shachna catšátanga; as chaúyana ntšamo moca atše stsepasana y ntšamo jamëse chënga ndoñe chaondëtsamna quem ngmënënga luaroye jabama ca.’ <sup>29</sup> Chora Abraham ibojauyana: ‘Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojëftsanábema soyënga; ¡chéngbioye chamoyauná ca!’ <sup>30</sup> Chë bomná ibojojuá: ‘Ndoñe, Taita Abraham; nderado obanënguëntšana canÿa chëngbioye tojase, aíñe chë tšabe benache muantishache ca.’ <sup>31</sup> Pero Abraham ibojauyana: ‘Chënga ni mo Moisés, ni chë Bëngbe Bëtsabe juabna oyebuambnayëngbioye ndoñe tmonjóyaunase, Bëngbe Bëtsabeñe ndoñe quemochatošbuáchiye, masque canye obaná chauatayenëse, chëngbioye jábuayenama ca’ —Jesús tojancuentá.

## 17

*Resjo yomna, nderado bacna soyënga cuanjama*  
(Mt 18.6-7, 21-22; Mc 9.42)

<sup>1</sup> Jesús chabe uatsjëndayënga tojanéyana: “Sempre echanjëftsemna juabnënga bacna soyënga jamama; pero, ¡tša lastema chë entšabiama ndabe causa ínÿënga bacna soyënga tmojama! <sup>2</sup> Más tšabá chabiama nántsemna canye nantsnëbé chamotsetamošëntšbua y mar béjayoye chamotsashbuetše, y ndoñe chë canÿa Bëngbe Bëtsabeñe ošbuachiyá bacna soye chaomama juanatsana. <sup>3</sup> Cuedado šmochtsebomna.

“Acbe catsata bacna soye tojamëse, cochjuácacana; y yochtsajbaná ca cha tojayanëse, cochtseperdóna. <sup>4</sup> Masque nÿe canÿe te, canÿsëfta soye ntšámnaca tcmojaborlá, y canÿsëfta soye ‘chca ndoñe más quebochatsbórla ca’ tcmojauyanëse, aca cmontsemna cha jtseperdónana ca” —Jesús tojánayana.

*Bëngbe Bëtsábeñe jtsošbuáchiyëse, corente obenana jtsebomnana*

<sup>5</sup> Chë uatsjéndayënga Bëngbe Utabnábioye tmojaniana: —Ošbuáchiyana šmababuaté ca.

<sup>6</sup> Y chë Utabná tojanéjua: —Tšëngaftanga ošbuáchiyana, batšatema masque nÿe mo mostaza jenaycá šmojtsebomnëse, quem sicomoro betiyoye šmatjauyana: “quemuentšana mojashtse y mar béjayoca mojé ca”, y quem betiye chca nanjama ca.

*Chë oservená ndayá ibomna jamana*

<sup>7</sup> “Nderado canÿa tšëngaftanguentšá canÿe bochichnayá tbojtsebomna, cha jajocana tojtashjango jajañe arayocana o uacnënga anÿenocana, ¿chábioye bochjauyana: ‘Matabo y mabose ca’?” <sup>8</sup> Ndoñe, chamna mëntšá bochanjauyana: ‘Jetiñe juasama cochjuábua, y moprontá atše jaserviama atše candëse y candofšentscuana; y chentšana aca cochjase y cochjofšiyë ca.’ <sup>9</sup> Y chë bochichnayábioye ndoñe quebochtétschuaye ndayá tbojuatarieca cha tojamama. <sup>10</sup> Tšëngaftángnaca cachcá, lempe ntšamo Bëngbe Bëtsá tcmojutarieca chašmojama ora, cmontsamna jayanana: ‘Nduámana oservénënga fsëndmëna; er nÿe ntšamo jamama šuamncá tifjama ca’ ” —Jesús tojánayana.

*Jesús, bnëtsanënga bacna nguayanánaca šoquënga tojanashná*

<sup>11</sup> Jerusalenoye benache, Jesús tojánachnëngo Samaria y Galilea luarëjana. <sup>12</sup> Y canÿe pueblotëmoye tojánashjango ora, bnëtsana boyabásenga bacna nguayanánaca šoquënga chábioye tmojána; chábentšana bënoca chënga tmojanoquedá, <sup>13</sup> y mëntšá imojtsáyebuache: —¡Jesús, Buatëmbayá, šmotsalastemá ca!

<sup>14</sup> Jesús chënga tojánanyë ora, tojanéyana: —Jerusalenoca bachnángbioye motsajna, y chënga šmochjínÿanÿiyë tšëngaftanga mora ndëšoquënga šmojtsemnama ca.

Y tojanopasá, chë bnëtsanënga cabá imojétsayëntscuana, ya shnánënga imojtoquédaye. <sup>15</sup> Canÿa chënguentsá, shnaná yojtsemnama tojáninÿe ora, yojeshécona Bëngbe Bëtsábioye jabuache atschuanaye; <sup>16</sup> y Jesusbe delante yojoshëntsamentšiyë, jubiaca fshantsóntscoñe yojotsejbéna, y chábioye ibojtsatschuanaye; y chë boyabásana Samarioca entšá inamna.

<sup>17</sup> Chora Jesús tbojaniana: —Bnëtsanënga mondmëna chë shnánënga tmontoquedanga. ¿Ndayentšë chë inÿe esconéftanga imojtsemna? <sup>18</sup> ¿Nÿe quem boyabása, inÿe luarocana ashjanganá, tojeshécona Bëngbe Bëtsá jëtschuayama? ¿Ndáyeca chë ínÿenga ndoñe ca?

<sup>19</sup> Y chë entsábioye tbojaniana: —Matëtsbaná y motsatoñe; Bëngbe Bëtsábeñe aca icošbuachéyeca shnaná contsatsmëna ca.

*Ntšamo Bëngbe Bëtsabe amëndayana yochjóshjango*

(Mt 24.23-28, 36-41)

<sup>20</sup> Canÿe, chë fariseunga Jesús tmojantjá, mocna ora chë Bëngbe Bëtsabe amëndayana yochjanóshjanguama; y cha tojanéjua: “Bëngbe Bëtsabe amëndayana chaojóshjango ora, tšëngaftanga ndoñe quemochatobenaye chca jinÿana. <sup>21</sup> Chora ndoñe quemochátichamo ‘Muentšë entsemna’ o ‘Choca entsemna ca’; er Bëngbe Bëtsabe amëndayana ya tšëngaftangbeñe entsemna ca” —cha tojánayana.

<sup>22</sup> Jesús chabe uatsjéndayënga tojanéyana: “Canÿe tempo echanjóshjango, y chora tšëngaftanga šmochántseboše canÿe te jtsebomnana, ntšamo chë Bëngbe Bëtsá Entšá tbojanbemá tšëngaftangbeñe enjëftsemna orcá; pero chora ndoñe chca queochatóshjango. <sup>23</sup> Chora báseftanga mochántschamo: ‘Muentšë entsemna’ o ‘Choca entsemna ca’; pero choye ndoñe šmatjá, ni šmatjúseto. <sup>24</sup> Er chë tojatcuinÿe ora, ntšamo celoca

catoica juachoica tojabuashinjinjenacá, chca echántsemna chë Bëngbe Bëtsá Entśá tbojanbemá quem luaroye chaojésabo te. <sup>25</sup> Pero natsana cha bontsemna puerte jasúfriana, y morsca entśangbiana uabotená jtsemnana.

<sup>26</sup> “Ntśamo Noé yojaniyena ora tojanopasacá, cachcá echanjopása chë Bëngbe Bëtsá Entśá tbojanbemá quem luaroye chaojésabo ora. <sup>27</sup> Chë tempo, entśanga imnasaye, innofsësnaye, inmóbouamnaye; natjémbana imojtsiyeñe, y chca, natjémbana imojtsomñe, Noé chë barquëshoye tojánamashënguentscuana; pero chora uabouana uaftena tojánashjango y chë entśanga tojtsanapochocá. <sup>28</sup> Cachcá ntśamo Lot yojaniyena ora tojanopasacá: entśanga imnasaye, innofsësnaye, inmóbouamnaye, imojtsena, sananga innajena y innajebuana; <sup>29</sup> pero Lot Sodoma bëts pueblentśana tojéftsanbocna ora, Bëngbe Bëtsá tojanma celocana ñneshe y azufre chauaftema, y chentśa entśanga tojtsanapochocá. <sup>30</sup> Cachcá echántsemna chë Bëngbe Bëtsá Entśá tbojanbemá chaojtonyña ora.

<sup>31</sup> “Chë tena, nda cachabe yebnentśa tsbanánoca chaojtsemna, y chabe soyënga cach tsoca tojtsebomnëse, chocana ndoñe chaondétastjango chë soyënga jesabobocnama; y nda jajoca chaojtsemna, yebnoye ndoñe chaondéta. <sup>32</sup> Menójuabonga ntśamo Lotbe shémaftaca tojanopasama. <sup>33</sup> Nda tojtsentśena quem luarentśe bëtscá jtsebomnama y atśbiana jasúfriama ndoñe tontseprontana, chë nyetsca tescama yomna tśabe vida echanjobuetśe. Pero nda quem luarentśa soyënga cachcá tojonýa atśe juastama, masque chaóbana, chë nyetsca tescama yomna tśabe vida echántsebomna.

<sup>34</sup> “Atśe cbéyana, chë ibeta, chë Bëngbe Bëtsá Entśá tbojanbemá chaojtonyña ora, útata canye jutsnéshañe bochántsemna; canya mochanjesbetśe y chë ínýana ndoñe. <sup>35</sup> Uta shembásata cánýiñe bochántsejanýcoye; canya mochanjesbetśe y chë ínýana ndoñe. <sup>36</sup> Uta boyabásata jajoca bochántsetrabajaye; canya mochanjesbetśe y chë ínýana ndoñe ca” —cha tojanéyana.

<sup>37</sup> Chora chë uatsjéndayënga Jesús tmojantjá: —Utabná, ¿ndémoca chca yochjopása ca?

Y cha tojanjuá: —Chë obanabe cuerpo tojtsemnentśe chë gallinacënga jojotana ca.

## 18

### *Chë viudá y chë mandadbiama cuento*

<sup>1</sup> Jesús mëntśá tojanacuntá, entśanga jabuátambama, Bëngbe Bëtsáftaca nyets tempo jtsencuéntayana yomnama, ainaniñe añemo jtsebomnama ndocna te ntjajbanacá.

<sup>2</sup> Mëntśá tojánayana: “Canye pueblentśe canye mandado inamna; chana ni Bëngbe Bëtsábioye ndoñe bonjánebiauatja, ni entśanga yonjánayaunana. <sup>3</sup> Chë pueblentśe canye viudánaca inamna; chana canye demanda yojánbomna. As chë mandádbioye yojobeconá y mëntśá ibojauyana: ‘Diosmanda atśbe uayayá motsecastigá ndayá šojaborlama ca.’

<sup>4</sup> Bayté chë mandado ndoñe yonjábošena chë viudábioye joyeunayama; pero chentśana cha yojenójuaboye: ‘Masque Bëngbe Bëtsá ndoñe quetsátebiauatja, ni entśanga ndoñe quetsátayaunana, <sup>5</sup> pero quem viudá cada ora endabó causa, añe chanjóyeunaye, chabe uayayá chanjacastíga; ndóñesna cada te nandaboye y cabana ya šochanjanaméntśa ca.’

<sup>6</sup> Chentśana Bëngbe Utabná tojánayana: “Šmonjouena ntśamo chë ndoñe tśabá ama mandado yojayancá. <sup>7</sup> Y chca, ¿Bëngbe Bëtsá chabe bocacánënga ndoñe yochanjátsebacaye? Chënga mora ínýengbe causa montsesufrina y cada te Bëngbe Bëtsá mondbétseimpadana chaujabuachama. ¿Más chamuatobatmá ca yochjáuyana? <sup>8</sup> Atśe cbéyana, Bëngbe Bëtsá betscó tšëngaftanga cmochanjátsebacaye, tšëngaftanga chë ínýengbe causa mora šmojtsesufrínënga. Pero chë Bëngbe Bëtsá Entśá tbojanbemá chaojésabo ora, ¿cabá Bëngbe Bëtsábeñe ošbuáchiyënga quem luarentśe entśanga yochjánýena ca?” —Jesús tojánayana.

*Chë fariseo y chë Romocama impuesto atjanayabiama cuento*

<sup>9</sup> Báseftanga imojtsanjuabná chënga tšabe entsanga imnamna ca, pero chë ínÿengbioye imojtsëbuayënja; chíyeca Jesús mëntšá tojanacuntá jabuátambama: <sup>10</sup> “Uta boyabásata Bëngbe Bëtsabe bëts yebnoye tbojána Bëngbe Bëtsáftaca jencuéntama: canÿa yojamna fariseo, y chë ínÿana, canÿe Romocama entsángbioye impuesto atjanayá. <sup>11</sup> Chocna chë fariseo, tsanana Bëngbe Bëtsábioye mëntšá ibojtsecuéntaye: ‘Bëngbe Bëtsá, cbontsatschuaná atše chë ínÿengcá ndoñe quetsatsmënama: atbëbanënga, puerte bacna soye amënga y shëmbioye ínÿaftaca íngñayënga; y ni quem Romocama impuesto atjanayacá ndoñe quetsatsmënama. <sup>12</sup> Atše sënduamana, ácaftaca jencuéntamna, canÿe semaniñe uta soye tondaye ntjascá jtsemnana; y lempe stjonÿenentšana, bnët-sanentšana canÿe soye acbiama sëndëquëcñá ca.’ <sup>13</sup> Pero chë Romocama impuesto atjanayana, bënoca yojtsemna, ni celoye ntjontješiyá, yojtsenócochjantšetaye y mëntšá yojtsichamo: ‘¡Atšbe Bëtsá, šmotselastemá, atšajema bacna soye amá tsmëna causa ca!’”

<sup>14</sup> Chentšana Jesús tojánayana: “Atše cbéyana, quem Romocama impuesto atjanayá chabe yebnoye tojtaná chabe bacna soyëngama perdonaná, pero chë fariseo ndoñe. Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bëtsá mochanjábema.”

*Jesús, basetëmëngbiama Bëngbe Bëtsábioye tbojanimpadá*

*(Mt 19.13-15; Mc 10.13-16)*

<sup>15</sup> Entšanga imojanamana Jesúsbioye basetëmënga junatsana chauabájajuama, y Bëngbe Bëtsábioye chëngbiama chaboimpadama; pero chë uatsjëndayënga chca tmojáninÿe ora, tmojanontšé chë basetëmënga unachayënga jtsëcácanana. <sup>16</sup> Pero Jesusna chë basetëmënga tojánachembo, y mëntšá tojánayana: “Cachcá mónÿyaye chë basetëmënga átšbioye chamuabo, y ndoñe matéuyanana; er Bëngbe Bëtsabe amëndayana endmëna chë mo quem basetëmëngcá imomnëngbiama. <sup>17</sup> Ndegombre cbéyana, nda Bëngbe Bëtsabe soyënga ndoñe tonjóyëngacñe mo canÿe basetemcá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

*Canÿe bomna entsá Jesúsbioye tojána*

*(Mt 19.16-30; Mc 10.17-31)*

<sup>18</sup> Canÿe mandayá Jesúsbioye tbojantjá: —Tšabe Buatëmbayá, ¿ndayá šojtsemna jamana chë nÿetsca tescama yomna tšabe vida jtsebomnana ca?

<sup>19</sup> Y Jesús tbojanjuá: —¿Ndáyeca šcjayuana “tšabia ca”? Tšabia nÿe canÿa endmëna: Bëngbe Bëtsá. <sup>20</sup> Aca condétatšëmbo ntšamo Bëngbe Bëtsá tojanmandacá: “Acbe shema ínÿaftaca ndoñe cattseíngñaye, ínÿa ndoñe catjóba, ndoñe catjatbëba, ndoñe catjuaboínÿena y acbe bëtsétsata ndoñe stëtšoye catjáquedaye ca.”

<sup>21</sup> Chora chë boyabása tbojanjuá: —Atše lempe chca básetema orscana sëndocumplina ca.

<sup>22</sup> Jesús chca tojanuena ora, tbojanayana: —Cabá canÿe soye cmontsebuáshbena jamana: lempe ntšamo icobomncá cochjetsatobuiye, y chë crocénana, ndbomnëjëmënga cochtsatšataye; chca, celoca canÿe bëts bomnana cochántsebomna. Chentšana, cochjabo y šcochjuasto ca.

<sup>23</sup> Chë entsá chca tojanuena ora, puerte ngmënaca yojtsemna, er cha corente bomná inamna. <sup>24</sup> Chca ngmená tbojáninÿe ora, Jesús tojánayana: —¡Yapa totcá bomnëngbiama entsemna Bëngbe Bëtsabe amëndayoye jamashënguama! <sup>25</sup> Ndegombre, más paselo endmëna canÿe camello chë coshufjentša atëfjnëjana chauachnëngo, y ndoñe canÿe bomná Bëngbe Bëtsabe amëndayoye jamashënguana ca.

<sup>26</sup> Chora, chë chca imojouenënga tmojánayana: —¿As nda yochjobenaye atsbocaná jtsemnana ca?

<sup>27</sup> Y Jesús tojanéjua: —Ndayá entsānga ndoñe mondobena jamana, Bēngbe Bētsá aíñe endobena jamana ca.

<sup>28</sup> Chora Pedro, Jesúsbioye tbojaniyana: —Bēngbe Utabná, aca contsonyá, bēnga lempe chē fséndbomna soyēnga fsēnjéseboshjona, y ácaftaca fsēntsajna ca.

<sup>29</sup> Jesús chora tojanéyana: —Ndegombre cbéyana, ndánaca Bēngbe Bētsábioye jaserviama, chabe améndayama jtsabuayiynayēse, cachcá tojéftseboshjona chabe yebna, shema, catsátanga, bētsétsanga o básenga, <sup>30</sup> cha mora quem luarentse chē soyēngama más echanjóyēngacñe, y chē inye luarocna, chē nyetsca tescama yomna tšabe vida ca.

*Jesús cachiñe tojánayana cha jóbanama y jtayenama*

(Mt 20.17-19; Mc 10.32-34)

<sup>31</sup> Jesús chabe bnétsana uta uatsjéndayēnga barie tojánachembo, y mēntšá tojanéyana: “Šmontsetátšēmbo mora Jerusalenoye bēnga montsajnama, y choca lempe echanjochnēngo ntšamo chē Bēngbe Bētsabe juabna oyebuambnayēnga, chē Bēngbe Bētsá Entšá tbojanbemabiamá tmojanabemcá; <sup>32</sup> er choca cha chē ndoñe judiēngbe cucuatšiče mochanjáboshjona, y mochantšáboyejuana, mochanjóyenguango, mochantsebuashētotjo; <sup>33</sup> y chamojátjanjentšana, mochanjóba, pero unga tianoye cha echántayena ca.”

<sup>34</sup> Chē uatsjéndayēnga tondaye tonjanēsertá, ni montsetátšēmbo ndayá bétsemnana ntšamo Jesús yojsétsétsnacá, er chēngbiama yojamna josértama ndopodena soyēnga.

*Jesús, Jericó puebloca canye jtanábioye tbojanshná*

(Mt 20.29-34; Mc 10.46-52)

<sup>35</sup> Tojanopasá, Jesús Jericó puebloye yojtsebéconaye ora, canye jtaná benache juachañe inatbemana, lemošna otjanañe. <sup>36</sup> Entšanga chējana imojsachnějuanama tojanuena ora, yojanotícia ndayá yojsopasana ca, <sup>37</sup> y chē entsānga tmojaniyana, —Jesús Nazaretocá entsebeconá ca.

<sup>38</sup> As cha yojsontšé uayebuáchana: —¡Jesús, Davídbentšana Entšá, šmotselastemá ca!

<sup>39</sup> Chē natsana imojsajněnga chē jtaná imojsácacana, iytēca chaóbemama; pero cha más yojsáyebuache: —¡Davídbentšana Entšá, šmotselastemá ca!

<sup>40</sup> As Jesús tojantsá y tojanmandá cha chamobetšama. Cha ya bécoñe yojssemna ora, Jesús tbojantjá: <sup>41</sup> —¿Ndayá cojtseboše atše acbiama chjamama ca?

Y chē jtaná tbojanjuá: —Atšbe Utabná, atše séntseboše chašuatábínynama ca.

<sup>42</sup> Chora Jesús tbojaniyana: —Matinye, Bēngbe Bētsábeñe betsošbuachéyeca shnaná contsatsmēna ca.

<sup>43</sup> Y cachora cha tšabá ibojtabínyna, y Jesúsbioye ibojséstona, Bēngbe Bētsá atschuanaye. Y nyetsca entsānga, chca tmojáninye ora, Bēngbe Bētsá imojsatschuanaye.

## 19

*Jesús y Zaqueo*

<sup>1</sup> Jesús Jericó puebloca tojánashjango ora, chē pueblējana cha yojsachnějuana. <sup>2-3</sup> Chora, canye bomna entšá, chē Romocama entsānga impuesto atjanayēngbe améndayá, Zaqueo ca uabainá, yojtseboše Jesús jinýama. Pero ndoñe yontsobena jinýama, bētscá entsānga causa y cha becuca inamna causa. <sup>4</sup> Chcasna, cha betesco natsanoye tojaftsantótjajo y canye sicomoro betiyeshoye tojánashēngo, chca, Jesús chējana tojt-sachnějuana ora, jinýama jobenayama. <sup>5</sup> Jesús chē betiyeshoye tojánashjango ora, tsbanánoye tojanontješé y Zaqueóbioye tbojáninye. As Jesús tbojaniyana: “Betsco chocana matastjango, Zaqueo, er mēnté chanjá acbe yebnoye jatema ca.”

<sup>6</sup> Chora Zaqueo betesco tojtastjango y chentšana puerte oyejuayá Jesúsbioye tbojanofja. <sup>7</sup> Entšanga chca tmojáninye ora, tmojanontšé Jesusbe contra mēntšá ichámuana: “Jesús tonjá canye bacna soyēnga amabe yebnentše jatema ca.”

<sup>8</sup> Chora Zaqueo tojantsá, Bēngbe Utabná Jesúsbeñe, y mēntšá tbojaniyana: —Mouena, atšbe Utabná, atšbe bomna soyēnguentsāna tsēntsañe ndbomnějémēnga

chanjátšataye y nda más crocénana tijéftseyëngacá, chë ntsachetšá tijéftsefcama canta soye más chantoyiye ca.

<sup>9</sup> As Jesús tbojaniyana: —Mënté, aca acbe bacna soyënguentšana atsbocaná con-tsemna, er Zaqueo, ácnaca Abrahámbentšana entšá condmëna. <sup>10</sup> Er chë Bëngbe Bëtsá Entšá tbojanbemá tojabo chë pochocánënga jtsemnana imojtsajnënga jabétsanguanguama y jabátsebacama ca.

*Chë crocenánama cuento  
(Mt 25.14-30)*

<sup>11</sup> Entšanga chë soyënga imojtsuenana, y Jesús inye soye tojanacuntá jabuátambama, er cha ya Jerusalén béconana yojtsemna, y entšanga imojtsejuabnaye chë Bëngbe Bëtsabe amëndayana ya yochjanóshjango ca.

<sup>12</sup> Jesús tojanéyana: “Canye luarentša uámana entšá inye bën luaroye yojá, cachabe luarentša rey chamobemama y chentšana cachábioye jtama. <sup>13</sup> Cabá nda ora, chabe bnétsana oservénënga yojáchembo y bëtscá crocénana cada cányabioye yojéftsayentšbuachiye, y mëntšá yojéftseyana: ‘Quem crocenánaca trato šmochjábema atše candëtabëntscuana ca.’ <sup>14</sup> Pero cachabe luarentša entšanga cha imojuáya, as chëngna básefta entšanga imojichamuá chë inye bën luaroca mëntšá chamuayanama: ‘bënga ndoñe queftsátšboše cha bëngbe rey chaotsemnana ca.’

<sup>15</sup> “Pero pronto chë luarentša rey cha imojábema. Y chë luaroye yojtá orna yojamánda chë crocénana yojéftsayentšbuáchenga chamobéconama, jtsetatšëmbuama ntsachetšá cada ona chë crocenánaca yojongánama. <sup>16</sup> Chë natsaná yojáshjango y yojayana: ‘Taita, acbe crocénana bnétsana soye más tonjoboté ca.’ <sup>17</sup> Y chë rey ibojojuá: ‘Tša tšabá, tšabe oservená. Aca quem base soyiñe ntšamo tchojamandacá tšabá tcojámayeca, bnétsana pueblentša mandado chacotsemnana cbojayé ca.’ <sup>18</sup> Chentšana inya yojáshjango y yojayana: ‘Taita, acbe crocénana shachna soye más tonjoboté ca.’ <sup>19</sup> Y chë rey ibojauyana: ‘Acnaca shachna pueblentša mandado cochántsemna ca.’

<sup>20</sup> “Chorna inya yojobeconá y mëntšá yojayana: ‘Taita, muentše acbe crocénana entsatsmëna; canye pañueléjuañe bonguana sëntsejajo. <sup>21</sup> Atše acbiama uatjana šonjuábuache, er aca canye tšátjaye entšá condmëna; aca chë ndoñe condbuajonentšana jocñana y chë ndoñe tconjajé luarentšana jaja saná jobuátbanana ca.’ <sup>22</sup> As chë rey ibojauyana: ‘Bacna oservená, cach acbe palabrëngaca chanjínyanýiye aca ndoñe tšabá tconjamama. Atše chë ndoñe sëndbuajonentšana jocñana y chë ndoñe sënjajé luarentšana jobuátbanana tsuamanama icojátatšëmbëse, <sup>23</sup> ¿ndáyeca ndoñe tconjá chë crocénana bancoca jetsobuájuama, y atše camoye matijtabo ora, maštoyé chë crocénana y chë chentšana tojoboté crocénanënaca ca?’ <sup>24</sup> Y chë chentše imojtsemna entšanga yojáuyana: ‘Chë crocénana motseboca y chë bnétsana soye más tojabotébioye chana motsatšetá ca.’ <sup>25</sup> As chënga imojojuá: ‘¡Pero cha ya bnétsana soye más entsebomna ca!’ <sup>26</sup> Y chë rey yojójuá: ‘Atše cbéyana, nda tojtsebomnábioye, más mochanjátšetaye; pero nda tondaye tondbomnábioye, chë tojtsejuabná batšatema yobomna sóynaca mochántseboca ca. <sup>27</sup> Y chë atše uayayënga, chë chëngbe rey atše chaitsemnana ndoñe monjánbošëngna, moye mënátse y atšbe delante šmochtsëbaye ca’ ” —cha chora yojayana.

*Jesús Jerusalenoye tojánashjango  
(Mt 21.1-11; Mc 11.1-11; Jn 12.12-19)*

<sup>28-29</sup> Chca tojéftsanayana chentšana, Jerusalenoye yojétsaye ora, Jesús tojánashjango canye tjashoye, Olivos ca uabáiniñe, Betania y Betfagé pueblënga béconana. Chora, uta chabe uatsjëndayata tojanichamó, <sup>30</sup> mëntšá jáuyanëse: “Tsëndatbe natsana entsemna base pueblotémoye motsata. Chašojáshjango ora, canye burrotema utsbuaná šochanjínýena. Chábeñe cabá ndocná tonjenojayé. Šochjuajafjoná y šochjuánatse. <sup>31</sup> Y nderado

nda ndáyeca šojtsajafjná ca chacmojátjasna, šochjauyana: ‘Bëngbe Utabná bontsájaboto ca.’”

<sup>32</sup> Chë uatsjéndayata tbojána y lempe ntšamo Jesús tojanëyancá tbojáninýena. <sup>33</sup> Y chë burrotema imojtsajafjná orna, chë burrotema nduiñenga tmojanéyana: —¿Ndáyeca chë burrotema šojtsajafjná ca?

<sup>34</sup> Chora chata tbojánayana: —Bëngbe Utabná bontsajabótoyeca ca.

<sup>35</sup> Chentšana Jesúsbioye chë burrotema tmojanánatse, y chë burrotémbeñe chatbe entšayá tbojanátatse, y chábeñe Jesús tmojanenjayé. <sup>36</sup> Y cha yojtsachñejuana ora, entšanga chëngbe entšayá benachëjana imojtsëtétsatsana.

<sup>37</sup> Olivos tjashe tsmanoye yojtsebeconá ora, chë bëtscá entšanga, Jesúsbeñe os-“buáchiyënga, tmojanontšë uayebuáchana y Bëngbe Bëtsá oyejuayënga jëtschuayana, Bëngbe Bëtsabe obenánaca bëts soyënga Jesús tojanmama. <sup>38</sup> Chënga mëntšá imojtsichamo: “¡Corente bendición bomná chaotsemna, chë Bëngbe Utabnabe obenánaca tojabo Rey ca! ¡Celoca tšabá entsemna! ¡Bëngbe Bëtsá matschuanga ca!”

<sup>39</sup> Chë entšanguentšë básefta fariseunga imojtsemnënga, Jesús tmojanianya: —Buatëmbayá, acbe ústonënga mëcácana chca ndoñe chamondëtsáyebuachama ca.

<sup>40</sup> Pero Jesús mëntšá tojanéjua: —Ndegombre cbéyana, mënga iytëca tmojobiamëse, chë ndëtšbënga muanjuayebuáchena ca.

<sup>41</sup> Jesús Jerusalén bëconana tojánashjango, y chë bëts pueblo tojáninýe ora, chentša entšangbiana tojánenobošachna. <sup>42</sup> Y mëntšá tojánayana: “¡Malaye šmëntsetátšëmbo, nýe mo mënténaca, ndayá yojtseita tšëngaftangbeñe lempe tšabá chaotsomñama! Pero mora chë soye tšëngaftangbe bominyama entsëitëmena. <sup>43</sup> Er Jerusalemoca bacna tenga echanjóshjango; chora uayayënga chentša shëconánëjana canýe tapiëse mochantsepórma, mochantsejëtja y nýetsca juachoicana mochanjontšë tšëngaftanga jtsatsejana, <sup>44</sup> y lempe mochantsepochoáca. Muentša oyenënga mochantsëbaye, y ni mo canýe ndëtšbé inýebé juatsboca quemochaiseboshjona, chë Bëngbe Bëtsá tšëngaftanga jätsebacama tojabo ora, ndoñe chešmatoyeuná causa ca” —Jesús tojánayana.

*Jesús, Bëngbe Bëtsabe bëts yebnentšana enënga y obuámnayënga tojtanëbuacna*  
(Mt 21.12-17; Mc 11.15-19; Jn 2.13-22)

<sup>45</sup> Chentšana, Bëngbe Bëtsabe bëts yebnoye Jesús tojánamashëngo y tojanontšë chë chentšë imojtsenënga chentšana jtëbuacnana, <sup>46</sup> y tojanéyana: “Bëngbe Bëtsá chabe uabemana palabrënguñe tojayana: ‘Atšbe bëts yebna echántsemna átšëftaca encuén-taye yebna ca’, pero tšëngaftangna, atbëbanëngbe oyenñe chë yebna šmojtsebema ca.”

<sup>47</sup> Y cada te, Bëngbe Bëtsabe bëts yebnentšë Jesús entšanga yojtسابuátambaye; y bachnangbe amëndayënga, ley abuátambayënga y chë pueblentša mandayëngnaca imojtsenguaye ntšamo jamëse cha jóbana. <sup>48</sup> Pero ndoñe tmonjáninýena ntšamo, er nýetsca entšanga corente imojtseyeunana ntšamo cha yojtsoyebuambnacá.

## 20

*Jesúsbe obenana*  
(Mt 21.23-27; Mc 11.27-33)

<sup>1</sup> Canýe te, Bëngbe Bëtsabe bëts yebnentšë Jesús yojtسابuátambaye, y chë tšabe noti-ciëngama yojtسابuayiná ora, tmojánashjajna bachnangbe amëndayënga, ley abuátambayënga, judiëngbeñe bëtsëjemëngcá mandayëngaftaca cánýiñe; <sup>2</sup> y Jesús tmojanianya: —Šméyana; ¿ndaye deréchoca chë contsama soyënga aca cojtsama ca? o ¿chca jtsamama nda obenana tcmënjatšëta ca?

<sup>3</sup> Chora Jesús tojanéjua: —Atšnaca canýe soye séntsebomna tšëngaftanga jatjayama. Šmochjojuanga. <sup>4</sup> ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca?

<sup>5</sup> Chora chënga tmojanontsé enatsësnayana: “ ‘Bëngbe Bëtsá ca’ chamojuase, cha šochanjáuyana: ‘As ¿ndáyeca chábeñe ndoñe šmonjanošbuaché ca?’ <sup>6</sup> Y ndoñe quemuá-tobena jayanana ‘entsánga ca’; entsánga ndëtsbéngaca buattsébaye, er nyetscanga becá mondëjuabná Juan ndegombre Bëngbe Bëtsabe juabna oyebuambnayá yojamnama.” <sup>7</sup> Chcasna, chënga tmojanjuá ndoñe monjántatšëmbo nda Juan tbojanichmó entsánga jubáyama ca.

<sup>8</sup> Y Jesús tojanéyana: —Asna atše cach ndoñe quebochatéyana ndaye deréchoca chca tsama ca.

*Chë puerte bacna trabájayëngbiama cuento*

(Mt 21.33-44; Mc 12.1-11)

<sup>9</sup> Chentšana Jesús tojanontsé entsánga jáuyanana, y quem cuéntoca tojanabuatambá: “Canýe entsá uvas betiyënga yojáje y chë fshantse inýe trabájayënga yojúyentsáme, y baytescama bën luaroye yojtsoñe. <sup>10</sup> Chë uvasëšangá juashacama tempo yojobuache orna, chë jajañe nduiño canýe oservená ibojícmua chë trabájayënga jáuyanama ntsachetšá cha ibojtsotocánama. Pero chëngna cha imojtsejantšetaye, y tondaye ntoyicá imojtichmuá. <sup>11</sup> Chentšana inýa ibojícmua; pero chë trabájayënga cha imojtsejantšetaye, imojtsóyenguango, y tondaye ntoyicá imojtichmuá. <sup>12</sup> Chë nduiño inýa ibojatichmuá; pero chánaca chënga imojtsejantšetaye, imojtselisia, y chentšana imojtábocna.

<sup>13</sup> “Chora chë nduiño yojeniyana: ‘¿Y mora ntšamo chjama ca? Cach atšbe bonshana uaquiñá chanjíchmuá; nderádose cha aíñe mochanjóyeunaye ca.’ <sup>14</sup> Pero chë trabájayënga, chë uaquiñá imojinýe orna imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe; motsóbanga y nyetsca chabe otocana soyënga bëngbiama echanjoquéda ca.’ <sup>15</sup> Chcasna, chë uvas jajañentšana cha imojtsábocna y imojtsóba.”

Chora Jesús tojanatjá: —Y asna, ¿ntšamo šmojtsejuabná, ndayá chë jajañe nduiño chë trabájayëngaftaca yochjama ca? <sup>16</sup> Cha co echanjá y chë trabájayënga echanjatsébaye, y chë uvas betiyënga jajañe inýe trabájayënga echanjárrendaye ca.

Chë entsánga chca tmojanuena ora, tmojánayana: —¡Béngaftaca ndocna te chca chaondopasá ca!

<sup>17</sup> Pero Jesús tojanënyanyé y tojánayana: —As ¿ndayama Bëngbe Bëtsabe uabemana palabrenguiñe iuayana?:

Chë yebna jebuanënga tmojtsanaboté ndëtsbé, mora chë más bëts uashacuanësentše entsejájona ca.

<sup>18</sup> Ndánaca chë ndëtsbeñe chaojotsatšá, chëbé bochántsatcacaye; y chë ndëtsbé ndábeñnaca chaojótsatše, polvëshe bochántsebema ca —Jesús tojánayana.

<sup>19</sup> Chë bachnangbe amëndayënga y ley abuátambayënga tmojanenótatšëmbona Jesús chca tojanacuntá jinýanýiyama, chënga mo chë puerte bacna trabájayëngcá imojamnama; asna tmojánbošena cachora jishachana, pero entsángbiama imojtsauatja.

*Chë Romoca bëts mandadbiama impuesto jtsatsquécjnyama*

(Mt 22.15-22; Mc 12.13-17)

<sup>20</sup> Chentšana chënga báseftanga tmojanichamó, mo ndegombre tšabe entsánga cuaftsemncá chamobiamëse, Jesús jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanatsama. <sup>21</sup> As chënga tmojantjá: —Buatëmbayá, bënga fsëntsetatšëmbo ntšamo aca cojtsoyebuambná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y acbiama tondaye quenatámana nda más uamaná o nduamaná tomnana. Aca contsabuatambá ndegombre tšabe vida jtsebomnama, ntšamo Bëngbe Bëtsá yomandacá.

<sup>22</sup> Chcasna, šméyana, ¿tšabá tayojtsemna bënga, César, chë Romoca bëts mandadbiama, impuesto jtsatsquécjnyana o ndoñe ca?



<sup>23</sup> Jesús yojtsetátšëmbo, ntšamo cha tojayaniñe jisháchichiyama chënga imojtsebošama; as tojanéyana: <sup>24</sup>—Chë šmatsquëcñá crocénana šminyinyenga ca; ¿ndabe jubíá chë crocenániñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubíá; cha chca enduabaina ca.

<sup>25</sup> Y Jesús tojanéyana: —César šmoctoyiye cha ibotocana soye; y Bëngbe Bëtsana cha ibotocana soye ca.

<sup>26</sup> Y chca, chë ichmónënga ndoñe imonjobenaye jisháchichiyana, ndayá cha entsangbe delante tojayaniñe. Masna, ntšamo tojanéjuama, ojnanánënga iyteca imojobiama.

*Obanënga jtayenama Jesús tmojantjá*

*(Mt 22.23-33; Mc 12.18-27)*

<sup>27</sup> Chentšana, báseftanga saduceo ca uabaina entsanga tmojána Jesús jinýama. Chënga imojanjuabná obanënga ndocna te ntayenana ca. Jesús mëntšá tmojantjá: <sup>28</sup> — Buatëmbayá, Moisés bëngbe leyënguiñe tojëftsababema, nderado canye boyá tojt-sóbana y básenga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chë chabe uabochená obanabiama básenga jtsabamnama ca. <sup>29</sup> Chcase, canye bëngbentše canýsëfta catšátanga monjamna. Chë natsaná tonjanobouamá y tontsanóbana, básenga ntjëftsabashejuancá; <sup>30</sup> chentšana chë inýa chë shémaftaca tonjanobouamá, y cachcá tonjanopasá. <sup>31</sup> Chë inýe uabentsá chora cháftaca tonjanobouamá, pero tontsanóbana básenga ntjëftsabashejuancá; y cachcá, chë inýe uabentséngnaca cháftaca tmonjanobouamá, pero nyetscanga tmonjanóbana básenga ntjëftsabashejuancá. <sup>32</sup> Cabana, chë shembásanaca tontsanóbana. <sup>33</sup> Y chcasna, chë obanënga chamojtayena ora, ¿ndabe chë canýsëfta catšatanguentšabe shema chë shembása yochtsemna, nyetscanga cháftaca tmojanobouamase ca? —chënga tmojantjá.

<sup>34</sup> Chora Jesús tojanéjua: —Quem luarentše boyabásenga y shembásenga mondbét-soubouamnaye; <sup>35</sup> pero chë echanjóshjango luaroye jama y obanënguentsána jtayenama merecido jtsebuájonama chamojobenangna, masque boyabásenga o shembásenga, ya ndoñe quemochatóbouamnaye, <sup>36</sup> ni queochátotopodena chënga chamóbanama, y chca, chënga mochántsemna mo angelëngcá, y Bëngbe Bëtsabe básenga mochántsemna, obanënguentsána mochtayénayeca. <sup>37</sup> Y Moisésnaca, chë yojsángbototjuana betiyeté-mama tojanábementše, bënga šontsinýanýná chë obanënga imnátayenama; chentše Bëngbe Bëtsá tojánayana cha yomna Abraham, Isaac y Jacobëbe Bëtsá ca. <sup>38</sup> Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

<sup>39</sup> Chora básefta ley abuátambayënga Jesús tmojaniyana: —Buatëmbayá, tšabá tc-jayana ca.

<sup>40</sup> Y ya ndoñe más montsenñémua inýe soyëngama jatstjanayana.

*¿Cristo ndabe entsábentšana yomna?*

*(Mt 22.41-46; Mc 12.35-37)*

<sup>41</sup> Jesús tojanatjá: “¿Ndáyeca tšëngaftanga šmnétsichamo chë Uámana Uabuayaná, chë Cristo, Rey Davídbentšana iuabó ca? <sup>42</sup> Er cach David, chabe librëšañe Salmos ca uabainëšañe, tojánayana:

Bëngbe Bëtsá, atšbe Utabná Crístbioye tbojaniyana:

‘Atšbe catšbioica mótbema,

<sup>43</sup> atšbe obenánaca, acbe uayayënga acbe cucuatšinë chamoquedama chjamëntscuana ca.’

<sup>44</sup> ¿Ntšámose, Cristo, Davídbentšana nántsemna, cach David ‘Utabná ca’ chábioye tbojtsabobuátmëse ca?” —cha tojanatjá.

*Jesús chë ley abuátambayëngbiana tojánayana chënga ndoñe tšabá montsama ca*

*(Mt 23.1-36; Mc 12.38-40; Lc 11.37-54)*

<sup>45</sup> Njetsca entsānga imojtsuenana, y Jesús chabe uatsjéndayēnga tojanéyana: <sup>46</sup> “Cuedado šmochtsebomna, y ndoñe šmattsama chē ley abuatambayēngcá; chēnga jtsogusetánana bēnēna entsāyangaca jtsajnana, y jtsebošana tsáshenañe entsānga beca respétoca chamotsacheuanayama. Chēnga chē judiēngbe enefjuana yebnēnguenache chē más uámana luarēnguiñe jtsetbiámanana, y fiestēnguiñe n̄ya quēfseroca. <sup>47</sup> Pero chē viudángbioye chē tmobomna soyēnga jtsabacayana; y entsāngbe delante tšabá chacmotsēnyama y chēnga imojtsaíngñama ndoñe chaondētsótatšēmbuamna, Bēngbe Bētsáftaca tša jtsencuéntayana. Chē causa, Bēngbe Bētsá ín̄yēngbiama más chēnga echanjácastigaye ca” —Jesús tojánayana.

## 21

### *Jesús yojséñyaye chē crocénana quēcñayēnga*

(Mc 12.41-44)

<sup>1</sup> Bēngbe Bētsabe bēts yebnentše, Jesús yojséñyaye chē bomnēnga crocénana jtse- quēcñayana chē crocénana quēcñayētēmiñe; <sup>2</sup> y can̄ye viudá ndbomnējēmnaca tboján- in̄ye, uta crocénana chētēmiñe yojaftseseğóra. <sup>3</sup> Chora Jesús tojánayana: “Ndegombre cbéyana, quem viudá ndbomnējema, Bēngbe Bētsabiama n̄yetscangbiama más beca tonjēftseseğorá; <sup>4</sup> er n̄yetscanga tmonjēftseseğorá chē yojsóyentšjamentšana, pero chana, masque tša ndbomnējema, cha vida jtsebomnama lempe ntsachetšá yobomncá tonjēftseseğorá ca.”

### *Jesús tojánayana Bēngbe Bētsabe bēts yebna lempe mochjánpochocama*

(Mt 24.1-2; Mc 13.1-2)

<sup>5</sup> Báseftanga imojtsichamo chē Bēngbe Bētsabe bēts yebnama, tša yojtsebotamanana puerta uámana ndētšbēngaca y chē entsānga imojanamana juambana Bēngbe Bēt- sábioye uátšēmbona soyēngaca ca. As Jesús tojánayana: <sup>6</sup> —Can̄ye tempo echanjósh- jango, y lempe ntšamo mora muentše šmontsonyáca tondaye queochatoquéda, ni mo can̄ye ndētšbé in̄yebé juatsboye. Lempe mochantsepochoáca ca.

### *Ntšamo yochtsemna quem luare jopochócama te chaojtsobeco ora*

(Mt 24.3-28; Mc 13.3-23)

<sup>7</sup> Chora chēnga tmojantjá: —Buatēmbayá, ¿ntseco chca yochjopása? ¿Y ndayá Bēngbe Bētsá yochjama, chca jopásama yojsobecuama entsānga chamotsetatšēmbuama ca?

<sup>8</sup> Y Jesús tojánayana: —Cuedado šmochtsebomna ndocná chacmondáingñema. Er banga mochanjabo y mochantsabíchamo chēnga atše imomna ca. Mochántsi- chamo: “Atše chē Cristo sēndmēna”, y “Mora chē tempo entsemna ca”. Pero ndoñe šmatjójau- naye. <sup>9</sup> Y tšēngaftanga, entsānga imojtsentsjanama y entsānga mandadēngbe contra imojtsemnama chašmojsuenana ora, ndoñe šmattsauatja, er entseyta natsana chē soyēnga chaochnēngo; pero masque chca, chē quem luare jopochócama tempo cabá ndoñe queochátsmēna ca.

<sup>10</sup> Y mēntšánaca Jesús tojanéyana: “Can̄ye luarentša entsānga, in̄ye luaroca entsān- gaftaca mochántsejtsjanaye; y can̄ye amēndayábentša entsānga, in̄ye amēndayábioca entsāngaftácnaca. <sup>11</sup> Ba luarēnguiñe jabuache echanjuangmémēna, bēts shēntsana, y entsānga pochócaye šocanēnga echanjóshjango; y celoca echántsemna puerta uabouana soyēnga y bēts soyēnga, entsānga jin̄yan̄iyama quem luare ya yochtsopochócama.

<sup>12</sup> “Pero cabá ndoñe chca chaondochnēngo ora, tšēngaftanga cmochanjšhēche y chašmosufrima mochántsama; bēnga judiēngbe enefjuana yebnēngoye cmochanju- natse játsetšenama y cárceloyncaca cmochanjáutame, y reyēnga y mandadēngbióynaca cmochanjunatse, atšbe ústonēnga bētsemna causa. <sup>13</sup> Chca šmochanjapása, ntšamo atšbiama šmotatšēmbcá chēnga chašméyanama. <sup>14</sup> Natsana ndoñe šmatjátsjuabnaye jenéuyanama ntšamo chora jóyebuambayana, <sup>15</sup> er atše chanjama puerta tšabá y osertanánaca tšēngaftanga chašmóyebuambama; y chca, tšēngaftangbe uayayēnga

ndoñe quemochatobenaye jayanana ndoñe tšabá šmontsichamo ca, y ndocá jojuama quemochatobenaye. <sup>16</sup> Pero uayayëngbe cucuatšihne cmochanjábashejuana cach tšëngaftangbe bëtsétsanga, catsátanga, pamíllanga y amiguënga; y tšëngaftanguentsana báseftanga cmochantsëbaye. <sup>17</sup> Y nyetsca entsanga cmochantsëbuayënja, atšbe ústonënga bétsemna causa. <sup>18</sup> Pero tšëngaftangbe bestšaentsana ni mo canye stjënëja quecmochátabajajo. <sup>19</sup> Tšëngaftanga nyets tempo átšbeñe ošbuáchiyënga chašmojtsemnëse, chë nyetsca tescama yomna tšabe vida šmochántsebmna ca.

<sup>20</sup> “Jerusalén nyets shéconana soldadënga chašmojanye ora, šmochtsetátšëmbo Jerusalén jopochócama tojobuáchama. <sup>21</sup> Chorna, chë Judeoca oyenënga batsjabengoye chamotsacheta; Jerusalemntse chamojtsemnënga, chentsana chamuaisebocana; y chë jajenache chamojtsemnëngna, Jerusalemoye ndoñe chamondésamashjna. <sup>22</sup> Er chora echántsemna chë entsangbe jabuache castigo; lempe ntšamo Bëngbe Bëtsabe uabemana palabrenguinë endayancá chora echanjochnëngo. <sup>23</sup> ¡Tša lastema chë tempo shembásenga ngomámanëngbiama o ochóchaye básenga chamojtsabamnëngbiama! Er chora corente ngménana quem luarentse echántsemna, y quem luarentša entsangbiama chë uabouana castigo. <sup>24</sup> Inyënga espadéjaca mochanjóbana, y ínëngbioye nyetsca luarënguëjana utámenënga mochanjunatse; y chë ndoñe judiëngna, Jerusalemoye entsangbioye mochántsatsejaye y mochantsëbaye, chca chaotsemnana Bëngbe Bëtsá tojalesenciantscuana ca” —Jesús tojánayana.

*Bëngbe Bëtsá Entšá tbojanbemá quem luaroye echanjésabo*

*(Mt 24.29-35, 42-44; Mc 13.24-37)*

<sup>25</sup> Mëntšánaca Jesús tojánayana: “Chora bëts soyënga echantsinyna shinýihne, juashconiñe y estrellënguinë; y quem luarentša entsanga tša mochántsauatja, ndayá jamama ntsetatšëmbcá, chë mar bėjaye y olëshënga corente echantsefshauenana causa. <sup>26</sup> Entšanga echantsabuatëcja tša auatja causa y ndayá quem luariñe yochjopásama enócochinýena causa; er chë quem luarentša tsbanánoca espíritënga obenana bomnënga echanjángmëmana. <sup>27</sup> Y chora entsanga mochanjinye, chë Bëngbe Bëtsá Entšá tbojanbemá jantšetëshiñe echántsaboye, puerta obenánaca y corente buashinýinýaniñe. <sup>28</sup> Chë soyënga jochnënguama chaojobojatšé ora, añemo šmochjentsetaye y bestšaë játšbanase šmochjarrepára, er chora echántsemna chë tšëngaftangbe atsebacayana ca” —Jesús tojánayana.

<sup>29</sup> Mëntšánaca Jesús tojanéyana jabuátambama: “Šmochjinye canye higo betiye o ndaye inye betýnaca. <sup>30</sup> Tojtsaiséjotsanama šmojinye ora, jtsetatšëmbuana chë tšabe tempo ya yojtsaisobecuama. <sup>31</sup> Cachcá, chë soyënga yojtsëchnëjuanama chašmojinye ora, šmochtsetátšëmbo chë Bëngbe Bëtsabe amëndayana ya yojtsobecuama.

<sup>32</sup> “Ndegombre cbéyana, lempe chca echanjochnëngo, morsca entsanga cabá ndóbana ora. <sup>33</sup> Celoca y quem luare echanjopochóca, pero atšbe palabra ndocna te queochaisopochóca.

<sup>34-35</sup> “Cuedado šmochtsebmna y ndoñe šmatjaleséncia tšëngaftangbe ainana bacna juabnéngaca chaotsemnana, jenomándama ntobencá mocá enobuena causa, tmoye causa y nye quem luarentša soyëngama enócochinýena causa; y tšëngaftanga pron-tánënga šmochtsemna, nye ndeolpe chë te chaojobuache ora; y tšëngaftanga ndëpron-tánënga ndoñe chašmondëtsemna, mo tšëngaftangbiama canye uachmaniñe cuaftsemncá. Er nyetsca quem luarentša entsangbiama chca echántsemna. <sup>36</sup> Cuedado šmochtsebmna y yejuana šmochtsantješna; nye ntseco órnaca Bëngbe Bëtsáftaca šmochtsencuëntaye, chca, chë echanjopása soyëngama jótsbocama chašmobenama, y chë Bëngbe Bëtsá Entšá tbojanbemabe delante jashjanguama ca” —Jesús tojanéyana.

<sup>37</sup> Jesús, bnëté Bëngbe Bëtsabe bëts yebnentšë yojánabuatambaye, y ibetna, Olivos uabaina tjashoye yojánaye joquédama. <sup>38</sup> Y nyetsca entsanga cabá cachëse Bëngbe Bëtsabe bëts yebnoye imojánajna Jesús joyeunayama.

## 22

*Entšanga tmojanjuabó ntšamo jamëse Jesúsbioye jishachama**(Mt 26.1-5, 14-16; Mc 14.1-2, 10-11; Jn 11.45-53)*

<sup>1</sup> Ya yojétsobeco Bashco fiesta, chë levadúraca ndëpormana tandëse saye fiesta, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama.

<sup>2</sup> Chë bachnangbe amëndayënga y ley abuátambayënga imojtsenguaye ntšamo jamëse Jesús jóbana, pero entšangbiama imojtsauatja.

<sup>3</sup> Chora Satanás, Judas chë Iscariote ca uabobuatmabe ainaniñe bacna juabnënga tojanjajó. Chánaca yojamna chë bnétsana uta uatsjendayënguentšá; <sup>4</sup> y tojána, chë bachnangbe amëndayënga y Bëngbe Bëtsabe bëts yebnoca soldadëngbe amëndayëngaftaca jencuéntama, ntšamo Jesús chëngbe cucuatšinë jayentšbáshejuanama. <sup>5</sup> As chënga imojóyejuaye, y Judas tmojanšbuachená crocénana chama jtatšetayana. <sup>6</sup> Y Júdasna aíñe ca tojánayana; y cach orscana cha yojtsenguaye ntšamo jamana y ndëmua ora Jesús chëngbioye jayentšbáshejuanama, ndocna entšanga ora.

*Jesús chabe uatsjëndayëngaftaca Bashco saná tojanse**(Mt 26.17-29; Mc 14.12-25; Jn 13.21-30; 1 Co 11.23-26)*

<sup>7</sup> Chë Bashco fiesta ora tojanóshjango, chë levadúraca ndëpormana tandëse sayté; chë te yojamna, Bëngbe Bëtsá jëtschuayamna canye oveshá jóbana chora jasama. <sup>8</sup> As Jesús, Pedro y Juánbioye tojanéyana: —Motsata y saná šochjapróna Bashco fiestama bënga mochjasama ca.

<sup>9</sup> Chora chata tbojantjá: —¿Ndémoca cojtseboše chë saná fchjapróntama ca?

<sup>10</sup> Y Jesús tojanéjua: —Jerusalenentše chašojámashëngo ora, canye bacó cmochanjóbiatše, matbajiñe búyeshe echantsabuyambaye. Cha šochjuasto, y šochtsonýaye ndëmuanýe yebnentše cha yochjámashënguama; <sup>11</sup> y chentša nduiño šochjauyana: “Chë Buatëmbayá šonjichamó aca jauyanama: ‘¿Ndayentše chë tsañe yojtsemna, Bashco saná atše atšbe uatsjëndayëngaftaca jasama ca?’ ” <sup>12</sup> As cha cmochanjínyanýiye canye bëts tsañe, tsbanana pisoca; ya lempe echántseprontana, y chentše, Bashco fiestama saná šochjapróna ca.

<sup>13</sup> As chë útata tbojána, y tbojáninyena lempe ntšamo Jesús tojanéyancá, y chentše chë Bashco saná tbojanprontata.

<sup>14</sup> Jasama tojanobuache ora, Jesús mesëshentše tojanótbema chabe uatsjëndayëngaftaca, chë cachënga más chcoye chabe ichmónënga ca uabáinënga. <sup>15</sup> Chora Jesús tojanéyana: “Tša sëndánboše quem Bashco saná tšëngaftangaftaca jasama, atše cabá ndoñe chandësufri ora. <sup>16</sup> Muentšana ndoñe más quemëntša saná quicháisesese, Bëngbe Bëtsabe amëndayana candóshjanguëntscuana. Chora echantsótatšëmbo ntšamo quem fiesta ndegombre iuayancá ca.”

<sup>17</sup> Chorna canye coptema vínoyeca tojanaca, Bëngbe Bëtsábioye tbojtanchuá y mëntšá tojánayana: “Quem coptema vínoye menáfšenga; y cbéyana, <sup>18</sup> chë uvas betiyentša shajuanentšana obocniye ndoñe más quichaisofsiye, Bëngbe Bëtsabe amëndayana candóshjanguëntscuana ca.”

<sup>19</sup> Chentšana, tandëse tojanca y Bëngbe Bëtsábioye tbojtanchuá; tojanjatá, tojanatšatá y mëntšá tojánayana: “Quem soye, atšbe cuerpo entsemna, y chanjóbana tšëngaftangbe tšabiama. Ntšamo mora bënga montsamcá šmochtsama, atšbiama jtenójuaboyama ca.”

<sup>20</sup> Tmojansentšana, chë coptémaca tojanma cachcá ntšamo chë tandëseca tojanmcá y mëntšá tojánayana: “Quem coptema vínoye entsemna chë Bëngbe Bëtsabe tsëm trato entšangaftaca. Atšbe buiñe echanjuábuashana, tšëngaftanga chašmotsetatšëmbuama ntšamo Bëngbe Bëtsá entšanga tojanašebuachenacá ndegombre yochjochnënguama. Chë buiñe tšëngaftangbe tšabiama echanjuábuashana. <sup>21</sup> Pero chë uayayëngbe cucuatšinë šochjaboshjoná, mesëshentše átšeftaca entsemna. <sup>22</sup> Ndegombre, chë Bëngbe Bëtsá

Entsá tbojanbemáftaca echanjopása, ntšamo Bëngbe Bëtsá chabiamá tojanjuabocá. ¡Pero tša lastema chë bochjáboshjonabiamá ca!” —Jesús tojánayana.

<sup>23</sup> Chorna chë uatsjédayënga tmojanontsé entjanayana, chënguentšá nda chë boshjuaná bétsemnana.

*Nda chë más uamaná yomna*

<sup>24</sup> Chë uatsjédayënga imojtsenatsësnaye chënguentšá nda chë más uamaná bétsemnana. <sup>25</sup> As Jesús tojanéyana: “Chë ndoñe judiëngbeñe, chë reyënga chëngbe entsáng-bioye nÿe ntšámnaca jtsamédayana, y chentša amédayënga jtsamana, entsánga chëngbioye tšabe soye amënga ca chamotsëbobuátmama. <sup>26</sup> Pero tšëngaftangbeñe ndoñe chca chaondëtsemna; chamna, tšëngaftangbeñe chë más uamaná mo chë más basacá chaóbema, y chë mandayá mo chë oservenacá. <sup>27</sup> Er, ¿ndase chë más uamaná yomna, chë mesëshentše jasama tojotbemá o chë uajuatšnýá? Ndegombre co chë mesëshentše tojotbemá; pero atšna tšëngaftangbeñe séntsemna mo chë oservenacá.

<sup>28</sup> “Atšbe padecéniñe tšëngaftanga sempre átšëftaca šmondëtsemna. <sup>29</sup> Chíyeca, atšbe bariëna, canÿe amédayana cbochanjátšataye, ntšamo atšbe taitá canÿe amédayana šojatštacá; <sup>30</sup> chca, atšbe amédayoca mesëshentše átšëftaca šmochanjase y šmochanjofšiyë, y uámana tbemaniñe mo reyëngcá šmochanjotbiamá, chë Israeloca bnétsana uta pamíllanga entsángbiamá chašmuayanama tšabá o ndoñe tšabá chënga tmonjamama ca” —Jesús tojánayana.

*Jesús tojánayana, chábioye ndoñe bonjanabuátma ca Pedro yochjánayanama (Mt 26.31-35; Mc 14.27-31; Jn 13.36-38)*

<sup>31</sup> Jesús mëntšánaca tojánayana: —Simón, Simón; cochtsetátšëmbo, Satanás obenana tonjotjañe tšëngaftangaftaca nÿe ntšámnaca jamama, mo chë trigo matënga tcojtsashatiyeynacá; <sup>32</sup> pero atšna Bëngbe Bëtsá sënjaimpadá, átšbeñe ošbuáchiyana ndoñe chacmondëtsebuáshbenama. Y aca, nÿets ošbuáchiyana átšbeñe chacojtsatsbomna ora, chë inÿe ošbuáchiyënga cochjújabuache átšbeñe sempre chamotsošbuáchema ca.

<sup>33</sup> Chora Simón tbojanayana: —Bëngbe Utabná, atšbe séntseprontana ácaftaca cárceloye jámnaca y jobanámnaca ca.

<sup>34</sup> Y Jesús tbojanayana: —Pedro, atšbe cbëyana, cam ibeta bínÿanoye, ngallo cabá ndécánta ora, aca unga soye cochanjayana ndoñe šconduabuatma ca.

*Chë más jabuache ora yojtsobeco*

<sup>35</sup> Chentšana Jesús tojanatjá: —¿Chë ni shecnájaca, ni crocenánaca, ni shecochëtjonésheca tcbonjanichamó ora, nderado ndayá tcmojanabuáshebena ca?

Y chënga tmojanjuá: —Tondaye ca.

<sup>36</sup> Chora tojanéyana: —Mora ndoñe chca; shecnaja tobomná, chëja chauesocñe y crocenánama shecnëbénaca; y nda ndoñe espadëja tondbomna, chabe quëfsaíya chaotsatábuiye y canÿe espadëja chauatobuámiñe. <sup>37</sup> Er cbëyana, entseyta átšëftaca chaopasá, ntšamo Bëngbe Bëtsabe uabemana palabrënguiñe atšbiamá iuayancá, mëntšá: “Y chábioye tmonjáninÿe mo chë puerte bacna soye amënguentšá canÿa cuaftsemncá ca.” Y lempe ntšamo atšbiamá iuabemancá, mora ya echanjochnëngo ca —Jesús tojanéyana.

<sup>38</sup> As chënga tmojanayana: —Bëngbe Utabná, muentše uta espadëja entsemna ca.

Y japochócamna cha tojánayana: —Nÿe nÿetšá ponto ca.

*Getsemaní luarentše, Jesús Bëngbe Bëtsáftaca tbojanencuentá (Mt 26.36-46; Mc 14.32-42)*

<sup>39</sup> Chentšana, Jesús tojánbocna y ntšamo yojanamancá Olivos tjashoye tojána, y chabe uatsjédayënga tmojanasto. <sup>40</sup> Choca tmojánashjajna ora, Jesús tojanéyana: “Bëngbe Bëtsá moimpadanga, bacna soye jamama ndoñe chacmondócochënguama ca.”

<sup>41</sup> Y chë uatsjéndayëngbentshana yojoluára, mo canye ndëtsbé jutshénéntscoca nyëtšá, y yojoshéntsamentšiyë Bëngbe Bëtsáftaca jencuéntama. <sup>42</sup> Jesús mëntšá tojánayana: “Taita, aca tcojtsebošëse, moma atšë ndoñë chašondëtsemna chca jasúfria. Pero ntšamo atšë stsebošcá ndoñë chaondëtsemna, sinó ntšamo aca cojtsebošcá ca.”

<sup>43</sup> Chca orna celocana canye ángel tbojánëbëocna, añemo chaotsebomnama juajabuáchama. <sup>44</sup> Jesús tša ngmëniñë yojtsemna, y Bëngbe Bëtsáftaca más ibojtsencuéntaye. Y chabe bosese yojtsemna mo fshantsiñë buiñë cuaftsebuastëtjuancá.

<sup>45</sup> Bëngbe Bëtsáftaca jencuéntama tojanpochocá ora, tojtantsbaná y chabe uatsjéndayënga imojtsemnoye tojána; y chënga inmëtsomañë, tša ngmënaca imojtsemna causa. <sup>46</sup> Chora tojanéyana: “¿Ndáyeca šmotsomañë? Motsbananga y Bëngbe Bëtsá šmochtseimpadana, bacna soye jamama ndoñë chacmondócochënguama ca.”

*Uayayënga Jesús tmojánishache*

*(Mt 26.47-56; Mc 14.43-50; Jn 18.2-11)*

<sup>47</sup> Jesús cabá yojtsóyëbuambnantscuana, ba entšanga chentšë tmojánashjajna. Chë Judas ca uabainá, canya chë bnëtsana uta uatsjéndayënguentšá, chë entšangbe natsana yojtsaye. Cha yojobëconá Jesús juamóchama; <sup>48</sup> pero Jesús tbojanayana: “Judas, ¿canye juamochëse chë Bëngbe Bëtsá Entšá tbojanbemá uayayëngbe cucuatšïñë cochjaboshjona ca?”

<sup>49</sup> Chë Jesúseftaca imojtsemnënga tmojáninye ntšamo chora yochjanopásama; as tmojanayana: —Bëngbe Utabná, ¿espadéjaca fšcotsatsejaye ca?

<sup>50</sup> Y canya chënguentšá, chë bachnangbe más uámana amëndayabe bochichnayábioye catsbioica matscuašë tbojtsantëtšë, y tbojtsanëstjango. <sup>51</sup> Chora Jesús tojanéyana: —Cachcá monyá; nye nyëtšá ponto ca.

Y chë bochichnayábioye chë matscuašë tbojánbojajo y tbojanshná. <sup>52</sup> Chentšana, chë bachnangbe amëndayënga, chë Bëngbe Bëtsabe bëts yebnentša soldadëngbe amëndayënga y chë judiëngbeñë bëtsëjemëngcá amëndayënga, chë cha juanatsama tmojánabënga, Jesús tojanéyana: “¿Ndáyeca espadéjangaca y ngarotbéngaca šmojabo atšë jishachama, mo atšë canye bacá uamana entšá cuaftsemncá ca? <sup>53</sup> Atšë cada te tšëngaftangaftaca sënjamna Bëngbe Bëtsabe bëts yebnentšë, y ni chešmánanbojajo. Pero ora tojobuache tšëngaftanga chca chašmomama, y Satanás ntšamo yojtsebošcá tšëngaftangbeñë echantsemándaye ca” —Jesús tojanéyana.

*Pedro tojánayana Jesúsbioye ndoñë bonjanabuátma ca*

*(Mt 26.57-58, 69-75; Mc 14.53-54, 66-72; Jn 18.12-18, 25-27)*

<sup>54</sup> Chentšana Jesús tmojánishache, y chë bachnangbe más uámana amëndayabe yebnoye tmojanánatse. Y Pedro bënëcana ibojtsëstona. <sup>55</sup> Choca, chashja tsëntsaca, canye íñeshe tmojanangbotjó y entšanga chë shëconana imojtsetbiámama; y Pédrëncaca chentšë chëngaftaca yojótbema. <sup>56</sup> Chora, canye shembása chentša oservená, Pédrëbioye tbojáninye chë ñë juachaca yojtsetbemana; tbojanonýinýë y tojánayana: —Muánaca cháftaca endánmëna ca.

<sup>57</sup> Pero Pedro ndoñë ca tojánayana, y chë shembásabioye mëntšá tbojanayana: —Sobrená, atšë cha ndoñë quetsatabuatma ca.

<sup>58</sup> Ndoñë yapa bën y inya chábioye tbojátaninye y tbojanayana: —Acnaca chë uatsjéndayënguentšá condmëna ca.

Pero Pedro tbojanjuá: —Bacó, atšë ndoñë quetsátsmëna ca.

<sup>59</sup> Chentša benéntscosna, inya más yojátayana: —Ndegombre, muánaca cháftaca enjánana; muánaca Galileocá entsemna ca.

<sup>60</sup> Y Pedro tojánayana: —Bacó, ndayama cojtsichámuama ndoñë quetsátstatšëmbo ca.

Cachora, y Pedro cabá yojtsóyëbuambnantscuana, canye ngallo yojacánta. <sup>61</sup> Chora Bëngbe Utabná yojobuértana y Pédrëbioye tbojanonýinýë; y Pedro chora yojenójuabo

ntšamo Bëngbe Utabná tbojaniyanama: “Cam ibeta bínjanoye, ngallo cabá ndécánta ora, aca unga soye cochanjayana ndoñe šconduabuatma ca.” <sup>62</sup> As Pedro shjoye tojánbocna, y corente ngménaca yojtsenóbošachna.

*Jesús imojtsáboyejuana*

(Mt 26.67-68; Mc 14.65)

<sup>63</sup> Chë Jesús imojtsebojanýá entšanga cha imojtsáboyejuana y imojtsejantšetaye; <sup>64</sup> y jtsabuchëntsacjuase, imojtsetjanaye: “¡Momalisiá, nda tcmënjajantšetá ca!” <sup>65</sup> Y imojtsóyenguaye, nýe mocá soyënga jtsatsëtsnayëse.

*Jesús, chë judiëngbe uámana mándayëngbe delante*

(Mt 26.59-66; Mc 14.55-64; Jn 18.19-24)

<sup>66</sup> Tojanbinýna ora, chë bëtsëjemëngcá amëndayënga, bachnangbe amëndayënga y ley abuátambayënga tmojánenefjna, y chëngbioye Jesús tmojanánatse. Choca tmojantjá: <sup>67</sup> —Šmýyana, ¿aca Bëngbe Bëtsabe Uámana Uabuayaná, chë Cristo comna ca?

Y Jesús tojanéjua: —Aíñe ca tbojáuyanëse, tšëngaftanga chama átšbeñe ndoñe quešmochatošbuáchiye. <sup>68</sup> Y nderado tbojátjasna, tšëngaftanga ndoñe quešmochatojúá ca. <sup>69</sup> Pero cam orscana, chë Bëngbe Bëtsá Entšá tbojanbemá, chë Bëngbe Bëtsá nýets obenana bomnabe catšbioica echántatsbemana ca.

<sup>70</sup> Chora nýetscanga tmojantjá: —¿As, aca chë Bëngbe Bëtsabe Uaquiñá comna ca?

Y Jesús tojanéjua: —Cach tšëngaftanga chca šmontsichamo; atše cha sëndmëna ca.

<sup>71</sup> As chora chënga tmojánayana: —¿Ndayama más entšanga šochjátëjaboto Jesusbe contra chamuayanama? Er cach bënga chabe uayášentšana chca tmonjouena ca.

## 23

*Jesús, Pilatbe delante*

(Mt 27.1-2, 11-14; Mc 15.1-5; Jn 18.28-38)

<sup>1</sup> Nýetsca mándayënga tmojëftsantsbaná, y Pilátbioye, chë Judeoca mandádbioye Jesús tmojanánatse. <sup>2</sup> Y chentše tmojanontšé cha mal jaquédana, mëntšá: —Bënga fsënjínýena mua entsabuatambá bacna soyënga, quem luarentša entšangbe amëndayëngbioye ndëtsayaunanama. Cha entsichamo bënga ndoñe šontsamna Césarbiama impuesto jtsatsquécjnayana ca; y entsichamo cha yomna chë Cristo, chë Bëngbe Bëtsabe Uámana Uabuayaná, mo canýe reycá ca.

<sup>3</sup> Chora Pilato Jesúsbioye mëntšá tbojantjá: —¿Aca chë judiëngbe Rey cojtsemna ca?

Y Jesús tbojanjúá: —Aíñe, aca ndegombre yomncá tcjayana ca.

<sup>4</sup> As Pilato, chë bachnangbe amëndayënga y entšanga tojanéyana: —Atše ni mo canýe soye chiyátinýena, quem boyabása castiganá chaotsemnama jayanama ca.

<sup>5</sup> Pero chënga más tmojanáyebuachena: —Nýets Israel luarëjana entsabuatambá, Galilea entšangbe amëndayëngbe contra jtsemnama. Galilea luaroca chca tonjabojatšé y mora moca Judeócnaca cachcá entsama ca.

*Jesús Rey Heródesbe delante*

<sup>6</sup> As Pilato, Galilea luarama yojouena ora, tojanatjá Jesús Galileocá tajojamnama. <sup>7</sup> Y Jesús aíñe Galileoca yojamnama cha tojántatšëmbona ora, Rey Heródesbioye cha tbojanichmó. Herodes inamna Galileoca mandado y chora Jerusalenentše cha yojtsemna. <sup>8</sup> Herodes Jesúsbioye tbojáninýe ora, corente tojanoyejúa. Chana tempscana inaboše Jesús jinýama. Cha ba soyënga Jesusbiamna tojanuena, y yojtseboše jinýama Jesús jamana canýe bëts soye, Bëngbe Bëtsabe obenánaca. <sup>9</sup> Heródesna ba soyënga tbojantjá, pero cha ndocá tbonjanjúá. <sup>10</sup> Y chéntšnaca, chë bachnangbe amëndayënga y judiëngbe ley abuátambayënga imojtsemna, y Jesús corente mal imojtsequédaye.

<sup>11</sup> Chora, Herodes y chabe soldadënga Jesúsbioye corente imojtsáboyënja, y jtsaboyejuanamna, botamana entšayangá tmojanichëtjo, mo canýe reycá; chentšana cachiñe

Pilátbioye tmojesanichmó. <sup>12</sup> Cach te Herodes y Pilato tbojtanenatsétsaye; tempna chata ibojenáyata.

*Jesusbiana chaóbana ca tmojánayana*  
(Mt 27.15-26; Mc 15.6-15; Jn 18.39-19.16)

<sup>13</sup> Chentsána Pilato, chë bachnangbe améndayënga, chë pueblentsa améndayënga y nyetsca entsanga tojánachembo, <sup>14</sup> y mëntśá tojanéyana: —Tšëngaftanga quem entsá átšbioye šmojuánatse, mo bacna soye entsángbeñe abuatambayacá, mandadënga ndëtsayaunanama ca; tšëngaftangbe delante lempe sënjatjá, tšëngaftanga ba soyënga muabiama šmonjayana, pero atśna ni mo canye soye chiyátinjëna, quem boyabása castiganá jtsemnama ibojtsemna ca jayanama. <sup>15</sup> Herodes cach ndoñe, chíyeca cachiñe béngbioye cha tbojesichmó. Quem boyabása ni mo canye ndoñe tonjobuachjanguá jóbanama chabotsemnama. <sup>16</sup> Chcasna, jabuache chamotsecastigá y chentsana chanjétsboshjona ca —cha tojánayana.

<sup>17</sup> Yojamna canye utamená jétsboshjonana, ntšamo Bashco fiesta ora jamana imo-janamancá. <sup>18</sup> Pero chora entsanga cányiñe tmojanáyebuachena: —¡Jesús chaóbana! ¡Barrabás matsboshjona ca!

<sup>19</sup> Barrabás inautámena, mandadéngbioye ndëtsayaunanama chë bëts pueblentse entsanga tojánenautanama y entsá óbanaye causa. <sup>20</sup> Pilato cachiñe tojánayana Jesús-bioye jétsboshjonama yojtsanboše ca; <sup>21</sup> pero entsangna más tmojtétanayebuachena: —¡Motsecrucificá! ¡Motsecrucificá ca!

<sup>22</sup> Pilato ya unga soyama tojtétanayana: —¿Ntšamo bacna soye mua tojobuachjanguá ca? Ni mo canye bacna soye chiyátinjëna, mua jóbanama chabotsemnama. Chcasna, chanjacastigá y chora chanjétsboshjona ca.

<sup>23</sup> Pero chëngna más imojtsechembumbuana Jesús chamotsecrucificama. Cabana, chë bachnangbe améndayënga y chë entsangbe jabuache chembumbuanánaca, Pilato tmojanëyënjana Jesús chamóbama. <sup>24</sup> As Pilato tojanmandá ntšamo chë entsanga imojtsot-janañcá chaotsemnama; <sup>25</sup> as chora Pilato, Barrabásbioye cachcá tbojtanboshjona, chë nda inautámena mandadéngbioye ndëtsayaunanama entsángbioye tojánenautanama y entsá óbanaye causa. Y Jesusna entsangbe cucuatšiñe tbojánboshjona, ntšamo chënga tmojtsebošcá chamomama.

*Jesús tmojan crucificá*  
(Mt 27.32-44; Mc 15.21-32; Jn 19.17-27)

<sup>26</sup> As jacrucificama Jesús tmojanánatse. Chora jajocana inátaboje canye boyabása, Simón ca uabainá, Cirene luarocá; y cha Jesusbe cruz tmojancutsá, Jesusbe ústonoye chaotsambama.

<sup>27</sup> Y banga chë pueblentsa entsanga imojtséstona; y chë shembásenga imojtsëstonëngna imojtsayošachiye y ngménaca imojtsanioye, Jesús chca yojtsepásama. <sup>28</sup> As Jesús chëngbioye tojanobuértana y tojanéyana: “Jerusalenentsa shembásenga, atšbiana ndoñe matošachena; cach tšëngaftangbiama y tšëngaftangbe básengbiama šmochjenó-bošachna. <sup>29</sup> Canye te echanjóshjango y chë te šmochántsi chamo: ‘Tša tšabá chë shembásenga šešona ndbomnëngbiama, chë quem luaroye šešonga ndoñe tmonjéftsëshe-jajnëngbiama, y chë šešonga ndoñe tmonjéftsabachengbiama ca.’ <sup>30</sup> Chora entsanga jetsóitanama mochántseboše y mochanjontsé ichámuana: ‘¡Tjashënga šmotsëtebuantsá y batsjabenga šmotsaitame ca!’ <sup>31</sup> Atše, chë ndocna bacna soye amá, chíyeca puerte obená, chca šmojaborlase, ¿ntšamo mochjama chë ndegombre bacna soye améngaftaca, chíyeca ndobenënga? O mëntśá, ¿chë nguëfshna betíyeca chca tmojtsamëse, ntšamo chë tojtsebuashá betíyeca mochjama ca?” —cha tojanéyana.

<sup>32</sup> Jesúseftaca cruciñe jóbanama, útata bëts bacna soyënga ochjjajnayátnaca imojtsënachaye. <sup>33</sup> Chë “Obanabe Bestśashe ca” uabaina luaroye tmojánashjajna ora, Jesús



tmojanrucificá y chë bëts bacna soyënga ochjajnayátnaca, canya chabe catšbioica y chë ínñana chabe uañicuayoica. <sup>34</sup> Chora Jesús mëntšá tojánayana: “Taita, mëngbe bacna soye motsaperdónaye, er ntšamo montsamama chënga ndoñe quemátstatšëmbo ca.”

Chë soldadënga Jesusbe entsayamna, tsbanánoye tmojanétšena, chënga jtená-jatayama. <sup>35</sup> Entšanga chentše imojtsemnënga chca imojtsonjaye, y chë pueblentša mandayéngnaca Jesús imojtsáboyejuana y mëntšá imojtsenatsëtsnaye: “Inyëngna aíñe tojëftsatsebacá; mora cachá chauentsbocá, cha ndegombre Cristo, chë Bëngbe Bëtsabe Uámana Uabuayaná tomnëse ca.”

<sup>36</sup> Soldadëngnaca Jesús imojtsáboyejuana; tmojanobeconá y untja vínoye imojtsefsësnaye, <sup>37</sup> y mëntšá imojtsatsaye: “¡Chë judiëngbe Rey tcomnësna, cach aca mentsbocá ca!”

<sup>38</sup> Jesusbe bestšaše juatsboicna canye uabemana soye tmojananjo; chiñe mëntšá yojtsanábemana: MUA CHË JUDIËNGBE REY ENDMËNA ca.

<sup>39</sup> Canye bëts bacna soyënga ochjajnayá yojtsecrucificaná, Jesúsbioye mëntšá tbojanóyenguango: —Chë Bëngbe Bëtsabe Uámana Uabuayaná tcomnësna, mentsbocá y bëndátnaca šmatsebocá ca.

<sup>40</sup> Pero chë inye bëts bacna soyënga ochjajnayana mëntšá tbojanácacana: —¿Ni mo Bëngbe Bëtsá ndoñe condërrespectana? Bëndátnaca bontsamna chacá jóbanama. <sup>41</sup> Ndegombre bëndata muentše bontsemna bëts bacna soyënga ochjajnaye causa, y chíyeca chca jasúfriama bontsamna. Pero quem boyabása ni mo canye bacna soye ndoñe tonjobuachjanguá ca.

<sup>42</sup> Y chorna, quem bëts bacna soyënga ochjajnayá Jesúsbioye tbojanianya: —Jesús, atšbiamna cochtenójuaboje aca reycá jabomándama chacojtabo ora ca.

<sup>43</sup> Y Jesús tbojanjuá: —Ndegombre cbëyana, mënté átšeftaca celoca, chë nyetscanga oyejuayënga mondbetsemnoca, aca cochantsatsmëna ca.

#### *Jesús tojanóbana*

*(Mt 27.45-56; Mc 15.33-41; Jn 19.28-30)*

<sup>44</sup> Nyetsto orscana las tresëntscoñe nyets quem luare yojtseibétata. <sup>45</sup> Y shinye yojtsajbaná binynayana, y Bëngbe Bëtsabe bëts yebnentše yojújonýana entséjua tsëntsaca yojtsenájataye. Chëjua bënëjua inauamna y chë tsatsëntsaca inaujonýana. <sup>46</sup> As Jesús tojanáyebuachena: “Taita, atšbe espíritu acbe cucuatšihne šcoboshjona ca.”

Y chca jayanama tojanpochocá ora, tojanóbana.

<sup>47</sup> Chë romano soldadëngbe amëndayá chca tojáninye ora, Bëngbe Bëtsábioye tbojtanadorá, mëntšá jyanëse: “Ndegombre, quem boyabása ainaniñe tšabe juabnënga bomná inamna ca.”

<sup>48</sup> Nyetsca entsanga chë soye jinýama tmojánabënga, chca tojanopasama tmojáninye ora, tmojanontšé jtangana enocochjantšetaye, ngménama. <sup>49</sup> Pero Jesusbe nyetsca ubuátmënga y chë shembásenga Galileocana tmojanastëngna, chaboca tmojanouedá chë soyënga onýayihne.

#### *Jesús tmojanatbontsá*

*(Mt 27.57-61; Mc 15.42-47; Jn 19.38-42)*

<sup>50</sup> Yojanmëna canye boyabása, José ca uabainá, canye Judeoca pueblócá, Arimatea ca uabaina; cha inamna canya chë pueblentša uámana amëndayënguentšá y canye tšabe entsá y nyetsca soyënguiñe tšabá amá. <sup>51</sup> Chánaca yojanobátmana chë Bëngbe Bëtsabe amëndayana chaóshjanguama, y tondaye tbonjanogustá ntšamo chë inye amëndayënga tmojanjuabó y Jesúsëftaca tmojanmcá. <sup>52</sup> Cha Pilátbioye tojána y Jesusbe cuerpo tbojanotjañe. <sup>53</sup> José chë cruzocana Jesusbe cuerpo tbojtanéstjango, canye lino entséjuaca tbojanandmaná y canye cuevēshiñe, peñëshiñe pormániñe, tbojanjajó. Chentše cabá ndocná mondëjajo. <sup>54</sup> Yëfsana ochnayté bëtsemnayecna, cach te yojanotocana saná japróntana chë yëfsana jasama; y chë ochnayté ya yojtsebínýana.

<sup>55</sup> Chë shembásenga, Galileocana Jesús tmojantjembambanga, tmojána y chë cuevëshe tmojáninye, y tmojanrrepará ntšamo Jesusbe cuerpo tmojanjajoma. <sup>56</sup> Yebnoye tmojtaná orna, tmojanprontá botamana uanguëtše bėjayënga y soyënga chë cuerpiñe janëtjuama.

Chë ochnaytena chënga tmojanochná, ntšamo Moisesbe leyiñe yojanmandancá.

## 24

### *Jesús tojtanayena*

(Mt 28.1-10; Mc 16.1-8; Jn 20.1-10)

<sup>1</sup> Y tmengo, chë inye semana bojatséntena, cabá cachëse, Jesús tmojanatbontsá cuevëshoye chë shembásenga tmojána, y tmojanamba chë tmojanprontá botamana uanguëtše soyënga. <sup>2</sup> Pero choye tmojánashjajna orna, tmojáninyena chë cuevëshoye amashjuanentša ndëtšbé chentšana juanániñe, <sup>3</sup> y choye tmojánamashjna ora, Bëngbe Utabná Jesusbe cuerpo ndoñe tmonjáninyena. <sup>4</sup> Chë shembásengna ndoñe imontsetátšëmbo ntšamo jajuaboyana chë soyama; chora, uta boyabásata, uabuashinýinýana entšayá uichétjonata chentše tbojabántsaye. <sup>5</sup> Y chë shembásenga tmojanëuatjanama y fshantsoye imojtsatsejbénama, chata tbojanéyana: “¿Ndáyeca obanéngbentše chë vida totsobomñá šmojtsenguá ca? <sup>6</sup> Muentše cha ndocná quenátsmëna, er cha ya tontayena. Menójuabonga ndayá cha tcmojanéyanama, cha cabá Galileoca enjamna ora. Cha tonjánayana: <sup>7</sup> ‘Chë Bëngbe Bëtsá Entšá tbojanbemá bontsemna bacna soye amëngbe cucuatšinë chamoboshjonama, chamocrucificama y unga tianoye cháuatayenama ca’ ” —chata tbojánayana.

<sup>8</sup> Chora chë shembásenga Jesusbe palabrëngama imojtenójuaboye, <sup>9</sup> y chë cuevëshentšana tmojtaná ora, chë tšabe noticiënga chë bnétsana canye uatsjéndayënga y inye entšángbioye tmojanacuntá. <sup>10</sup> Chë uatsjéndayëngbioye chca cuentayëngna imojamna María Magdalena, Juana, y María, chë Santiagbe mamá, y chë inye shembásenga chëngaftaca imojamnënga. <sup>11</sup> Pero chë uatsjéndayëngna mëntšá chë shembásengbiamama imojétsejuabnaye: “Chënga montsoyebuambná mo corente juabna ndbomnëngcá ca.” Y chca, chënga chë soyiñe ndoñe montsanošbuaché.

<sup>12</sup> Pero chentšana, Pedro tojëftsantsbaná y ochamanana chë Jesús tmojanjajó cuevëshoye tojána. Y choca yojtsemna ora, yojotsejbéna tsoye jontješiyama, pero nýe ena entšëjuangá yojuinýe, chë Jesús tmojanbochmëjuangá. As Pedro ojnananá yebnoye yojtá, chca tojanopasama.

### *Chë Emaús puebloye benachiñe*

(Mc 16.12-13)

<sup>13</sup> Cach te, uta uatsjéndayata Emaús puebloye ibojtsaye. Emaús yojamna Jerusalenocana bnétsana canye kilómetroca. <sup>14</sup> Chata ibojtsayencuëntaye lempe ntšamo tojanopasama. <sup>15</sup> Y tojanopasá, ibojtsencuëntaye y ibojtsenatsëtsnayëntscuana, cach Jesús tojanobeconá y chátaftaca cánýiñe yojtsaye; <sup>16</sup> masque imojtsonýaye, ndoñe ibontsobena cha jótëmbana. <sup>17</sup> Jesús tojanéyana: —¿Ndayama benachiñe šuabanencuëntaye ca?

As chata ngménaca ibojotsaye, <sup>18</sup> y canya, Cleofás ca uabainá, tbojanianyana: —¿Nýe aca cojtsemna, inye luarocana ashjagoná Jerusalenentše oyená, ndayá chentše quem diënga yopasánama ndëtatšëmbuá ca?

<sup>19</sup> Chora cha tojanéyana: —¿Ndaye soyënga ca?

Y chata tbojanianyana: —Chë Jesús Nazaretocáftaca tonjopasá soyëngama. Cha enjamna canye Bëngbe Bëtsabe juabna oyebuambnayá, puerte obenana bomná ndayá jamama y jayanama, Bëngbe Bëtsabe delante y nýetsca entšangbe delante. <sup>20</sup> Y ntšamo, chë bachnangbe amëndayënga y chentša mandadënga inýengbe cucuatšinë

tmonjáboshjona, jóbanama ibojtsemna ca entsānga chamuayanama y chamocrucificama. <sup>21</sup> Bēnga chabiamana fsēnjanobátmana, Césarbe cucuatšentsāna Israeloca entsāngbe atsebacayá chaotsemnana; pero morna ya unga te entsemna chca tonjopasá. <sup>22</sup> Y mora ndayá, bāsefta shembásenga bēngbe enutēnga ójnanana soyēnga šonjáuyana. Chēnga cabá cachēse chē Jesusbe cuerpo tmonjanjajó cuevēshoye tmonjá, <sup>23</sup> y chabe cuerpo ndoñe tmonjínjena; as chora chēnga bēngbiolye tmontabo y montsabíchamo angelēnga tmojéftsanyē y chēnga catmēnjayana cha ainá yojsatsmēna ca. <sup>24</sup> Bēngbentsāna baseftāngnaca chentšana chē cuevēshoye tmonjá, y tmojínjena ntšamo chē shembásenga tmonjayancá, pero Jesús ndoñe tmonjéftsinyē ca —chata ibojtsichamo.

<sup>25</sup> As Jesús chata tojanéyana: —¡Tša juabna ndbomnēnga y tša uenana jošbuáchiyama, chē Bēngbe Bētsabe juabna oyebuambnayēnga tmojánayana soyēngama! <sup>26</sup> ¿Mo ndoñe yonjamna chē Uámana Uabuayaná chē soyēnga chaosufrima, y chentšana nyetsca entsānga corente cha chamuatschuama ca?

<sup>27</sup> Chentšana Jesús tojanontsé chata jábuayenana, lempe ntšamo chabiamana yojanoyebuambnacá chē Bēngbe Bētsabe uabemana palabrenguiñe; yojontsé Moisesbe librēšangañe y chē Bēngbe Bētsabe juabna oyebuambnayēngbe librēšangáñnaca.

<sup>28</sup> Chē ibojétsaye pueblolye imojtsebeconá ora, Jesús tojanma mo más chcoye cuaftasacá. <sup>29</sup> Pero chatna tmojanatarié chentše chaotsoquedáñama, mēntšá jauyanēse: — Bēndátaftaca motsoquedañe; ya jetiñe entsemna y ya echanjaibétata ca.

As Jesús chátaftaca tojtsanoquedañe. <sup>30</sup> Chentšana tojanopasá, juasama mesēshentše imojtsetbiámana ora, Jesús chē tandēse tojanca, Bēngbe Bētsábolye tbojtanchuá, chē tandēse tojanjatá, y chata tojanatšatá. <sup>31</sup> As, chora chē uatsjéndayata ibojobenaye Jesús jótēmbana; pero chana nye ndeolpe yojuenatjēmba. <sup>32</sup> Chora chata ibojtsenatsēsnaye: “Chē benachiñe Bēngbe Bētsabe uabemana palabrengama šondabuayiyná ora, ndegombre bēngbe ainaniñe más bontseboše cha más chašotsabuayiynama, ¿ndoñe chca ca?”

<sup>33</sup> As, cachora tbojéftsantsbanata y Jerusalenolye tbojtanata; choca tmojáninyēna chē bnētsana canye uatsjéndayēnga cánjentše imojtsemna y chēngbe enutēngnaca; <sup>34</sup> y mēntšá imojtsichamo: —¡Ndegombre Bēngbe Utabná tojtayena; Simónbolye tbojébēbocna ca!

<sup>35</sup> As chata tbojanontsé jacúntana, ntšamo benachiñe tbojanpasacá, y ntšamo Jesús-bolye imojótēmba, chē tandēse tojanjatá ora.

*Jesús chabe uatsjéndayēnga tojánēbēbuacna*

*(Mt 28.16-20; Mc 16.14-18; Jn 20.19-23)*

<sup>36</sup> Chē uatsjéndayēnga chē soyēngama cabá imojtsencuéntantscuana, Jesús chēngbe tsēntsaca tojabántsaye y mēntšá tojanéyana: “Chē atšbe ainaniñe tšabe ebionana tšēngaftangaftaca chaotsemna ca.”

<sup>37</sup> Pero chēnga tša auatjanánēnga imojtsemna, y canye añemēse imojétsonyaye ca imojtsejuabnaye. <sup>38</sup> Pero Jesús tojanéyana: “¿Ndáyeca auatjanánēnga šmojtsemna? y ¿ndáyeca tšēngaftangbe ainaniñe chca šmojtsejuabná ca? <sup>39</sup> Atšbe cucuatšēnga y atšbe shecuatšēnga minyēnga; šmobjajo y šmochanjinyē. Cach atše séntsemna. Canye añemēsna, ni mēntšena ni betašēnga ntsebomnana; pero tšēngaftanga šmontsonyá, atšna aíñe ca” —tojanéyana.

<sup>40</sup> Chca yojsichámēse, chabe cucuatšēnga y chabe shecuatšēnga tojaninyānyé. <sup>41</sup> Y chēnga cabá ndoñe montsanošbuaché, chca noticiama corente imojtsóyejuama y tša ojnanánēnga imojtsemna causa; as Jesús tojanatjá: “¿Muentše ndayá jasama quešmēbomna ca?”

<sup>42</sup> As canye tabena buana beonbiana tmojanoyé; <sup>43</sup> Jesús tojanocñe y chēngbentše tojanse. <sup>44</sup> Chentšana Jesús tojanéyana: “Quem palabrenga entsemna ntšamo cabá tšēngaftangaftaca sēnjamna ora tcbonjanēyancá: Entsemna, lempe chaopasá ntšamo

atšbiamana iuabemancá, Moisesbe leyënguine, chë Bëngbe Bëtsabe juabna oyebuamb-nayëngbe uabemana librësangañe y Salmos librësañnaca ca.”

<sup>45</sup> Y chora chë uatsjëndayënga, Jesúsbeyeca tmojanobená chë Bëngbe Bëtsabe uabemana palabrëngama josértana. <sup>46</sup> Chentšana Jesús tojanéyana: “Ntšamo atšbiamana iuabemancana yomna, chë Bëngbe Bëtsá Entšá tbojanbemá chaosufrí y unga tianoye chauatayena ca. <sup>47</sup> Y morna atšbe uabaina jayanëse, átšbeñe betsošbuáchema, nyets quem luarentše šmochjontša entsanga atšbiamana jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuperdonama; chë soyënga Jerusalenentše chaobojatšé. <sup>48</sup> Tšëngaftanga atšbiamana soyënga šmonjinje y šmondétatšëmbo. <sup>49</sup> Atšbe Taitabe šbuachenaná, tšëngaftangbiamana chanjíchmuá. Pero morna camuentše Jerusalenentše moquedanga, Bëngbe Bëtsabe obenana chašmóyëngacñëntscuana ca” —cha tojanéyana.

*Jesús celoye tojtantsjuá*

*(Mc 16.19-20)*

<sup>50</sup> Chentšana, Jesús chabe uatsjëndayënga ínjoye tojanënatse, Betania pueblo béconana. Y chabe buacuatšënga játsbanase, Bëngbe Bëtsá tbojanimpadá chë uatsjëndayënga tšabe bendicionënga chamóyëngacñama. <sup>51</sup> Chca yojtšamëntscuana, cha chëngbentšana tojanoluaré y tojanontšé celoye játsjuana. <sup>52</sup> Chë uatsjëndayëngna, Jesús tmojtanadorá chentšana, Jerusalenoye oyejuayënga tmojtaná; <sup>53</sup> y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

## San Juan

### *Cristo, chë Bëngbe Bëtsabe Uámana Oyebuambnayana ca Uabainá*

<sup>1</sup> Quem luare ndobojátša ora, Cristo, chë Bëngbe Bëtsabe Uámana Oyebuambnayana ya yojtsemna; chora cha, chë chca uabainá, Bëngbe Bëtsáftaca yojtsanmëna, y cachá Bëngbe Bëtsá inamna. <sup>2</sup> Ndegombre cha, chë tempscana Bëngbe Bëtsáftaca yojtsanmëna. <sup>3</sup> Cháftaca, Bëngbe Bëtsá lempe tojanma; cháftaca ndóñesna, lempe ntšamo mora yomncá, Bëngbe Bëtsá tondaye matëñjanma. <sup>4</sup> Cachábeñe nÿets vida inamna, y quem vídaca tojánabo quem luarentša entšangbe juabnënga jabuábinÿnayama. <sup>5</sup> Cha tonjánabo moye, chë entšangbe juabnënga ndoñe binÿniñe yonjamnoye, chiñe jabobínÿnayama. Cha sempre chca yobínÿna, y Satanás chë entšangbe juabnënga ndoñe binÿniñe chaondëtsemnama amá, ndoñe yondobena chë binÿnayabe obenana jtsejuánana.

<sup>6</sup> Inamna canÿe boyabása, Juan ca uabainá; y Bëngbe Bëtsá tbojanichmó, <sup>7</sup> binÿnayabiama chaóyeuambama; entšangbeñe binÿnayabiama cháuyanama, chca, ntšamo Juan chë binÿnayabiama tojayana soyéngaca, nÿetscanga Jesúsbeñe chamotsošbuáchema. <sup>8</sup> Juan ndoñe yonjamna chë binÿnayá. Cha inamna canÿe ichmoná, chë nda binÿnayá yomnabiama entšangbeñe chauabáyanama. <sup>9</sup> Chë ndegombrá quem luaroye tonjánabo chë entšangbe juabnënga jabuábinÿnayama.

<sup>10</sup> Chë Bëngbe Bëtsabe Uámana Oyebuambnayana quem luariñe yojtsanmëna; masque cháftaca Bëngbe Bëtsá quem luare tojanma, nda cha yojamnama muentša oyenënga ndoñe monjántatšëmbo. <sup>11</sup> Cachabe luare entšangbioye tonjánabo, y entšanga ndoñe tmonjánbošena cha jofjana. <sup>12</sup> Nÿetscanga, ndëmuanÿenga cha tmojanébuaja y chábeñe tmojtsošbuáchenga, cha derecho tonjanatsátá jtsobenama Bëngbe Bëtsabe básenga ca jtsabáinama. <sup>13</sup> Quem ošbuáchiyëngna, chca jtsemnama ndoñe tmonjanobená entšangbe buiñentšana tmojanonÿnáyeca, o ndaye entšabe juabnentšana. Nÿe Bëngbe Bëtsábeyeca chca chabe básenga imojtsabaina.

<sup>14</sup> Cha, chë Bëngbe Bëtsabe Uámana Oyebuambnayana, entšá tojanóbema, y quem luare béngaftaca yojéftsiyena. Cha yomna chë Bëngbe Bëtsabe nÿe canÿe Uaquiñá; chíyeca bënga tifjáninÿe chabe bëts obenana y chabe tšabe juabna, chë Bëngbe Bëtsábentšana tojanóyëngacñana. Cha corente jtsababuánÿeshanëse šojánanÿena y yojéftsiyena ntšamo ndegombre inamncá. <sup>15</sup> Juan mëntšá chabiama yojanáyebuache: “Chabiama sënjanoyebuambná, chë ndabiama chora atše sënjánayana, chë átšbentšana jabamana atšbiama más uamaná endmëna, er atše cabá ndonÿna orna, cha ya yojtsemna ca.”

<sup>16</sup> Cha tša tšabe ainana bómnayeca, bënga nÿetscanga mallajta tšabe bendicionënga tmojóyëngacñe. <sup>17</sup> Moisesbiajana tifjanóyëngacñe chë Bëngbe Bëtsá tojanmandá soyënga. Pero Jesucristbeyeca, Bëngbe Bëtsá tšabe bendicionënga bëngbiama tojama y chë ndegombre soyënga bënga tmojëftsashjache. <sup>18</sup> Ndocná, ndocna te Bëngbe Bëtsábioye tbonjinÿe. Chë nÿe canÿe Uaquiñá ibobomná, cach Bëngbe Bëtsá yomna; y cha, Bëngbe Bëtsá chë Taitáftaca cánÿiñe mo canÿacá yomna. Mua, chë Uaquiñá, bëngbiama tojama, Bëngbe Bëtsá juabuátmanama chaotsopodénama.

### *Juan chë Ubayaná Jesucristbiama tojanabuayená*

*(Mt 3.11-12; Mc 1.7-8; Lc 3.15-17)*

<sup>19</sup> Canÿe te, Jerusalenoca judiënga tmojanichamó básefta chëngbe bachnanga y levitënga, chë Bëngbe Bëtsabe bëts yebnoca trabájayënga, Juan yojtsemnoye, cha nda bëtsemnama chamuatjayama. <sup>20</sup> Chocna, Juan chëngbeñe ndegombre tojanobuambá: — Atše, chë Bëngbe Bëtsabe Uámana Uabuayaná ndoñe quetsátsmëna ca.

<sup>21</sup> As chora, cachiñe tmojantjá: —As, ¿ndase cojtsemna? ¿Chë Bëngbe Bëtsabe juabna oyeuambnayá Elías ca?

Y Juan tojanéjua: —Atše cha ndoñe quetsátsmëna ca.

Chora chënga tmojantjá: —As, ¿chë Bëngbe Bëtsabe juabna jabóyebuambayama jabamá ca?

Y Juan tojanéjua: —Ndoñe ca.

<sup>22</sup> Chora chënga tmojaniyana: —Asna, ¿aca ndase cojtsemna? Bënga šontsamna nda aca cojtsemnama jtsetatsëmbuana, as chë šonjadespachenga jacúntama. ¿Ndayá cojtsobena cach acbiama jayanama ca?

<sup>23</sup> Y Juan mëntšá tojanéjua: —Atše séntsemna chë ndabiama Bëngbe Bëtsabe juabna oyebuambnayá Isaías mëntšá tojanábema: “Entšanga ndoyenoca canye abuyaynayá echántsemna, y entšanga mëntšá echántsabuyaynayé: Bëngbe Utabná echanjabo ca. Mo nda canye benache tojtseprontacá, tšëngaftángnaca cachcá, cha jabama tšabe juabnéngaca šmochtseprontana ca.”

<sup>24</sup> Chorna, báseftanga chë fariseungbe ichmónënguentsana, <sup>25</sup> Juan tmojantjá: —Chë Bëngbe Bëtsabe Uámana Uabuayaná, Cristo ca uabainá, ndoñe tcontsemnësna, ni Elías, ni chë Bëngbe Bëtsabe juabna jabóyebuambayama jabamá ndóñesna, ¿ndáyeca entšanga cojtsëbayana ca?

<sup>26</sup> Chora Juan tojanéjua: —Atšna, béjayeca entšanga sëndëubáyana. Pero tšëngaftangbeñe canya entsemna; cha ndoñe quešmatábuatma; <sup>27</sup> y cha atšbe ústonoye echanjášhango. Atše mercedo taitatobuajoñe, ni mo jotsejbiyama, chabe shecochëtjonëshentša corriëja jajafjonama ca.

<sup>28</sup> Chca tojanopasá, canye pueblo Betania ca uabáinentše, Jordán béjaye chenguana. Cach béjayiñe, Juan entšanga yojanëbáyana.

#### *Jesús chë Bëngbe Bëtsabe Oveshatema ca uabainá*

<sup>29</sup> Yëfsana, Juan yojtsemnoye Jesús yojtsebëconaye, y chë cháftaca imojtsemna entšanga tojanéyana: “Šmochjinýe. Chë nda Bëngbe Bëtsá tbojichmó y iytanana Oveshatemcá entsobiamná cha, entsashjajuana ca. Cha jóbanëse, quem luarentša entšanga bacna soyëngama perdonánënga mochántsemna. <sup>30</sup> Atše chabiama cbonjutsëtsná, mëntšá sënjanayana ora: ‘Atšbe ústonoye canya echanjášhango. Cha atšbiama más uamaná endmëna, er atše cabá ndonýna ora, cha ya yojtsemna ca.’ <sup>31</sup> Tempna, cach atše ndoñe quetsjátantatšëmbo nda cha bëtsemnana. Pero atšna ínýenga béjayeca ubáyana sëndabó, Israeloca entšanga quem boyabása chamuábuatmanama ca” —Juan tojanéyana.

<sup>32</sup> Chentšana Juan mëntšánaca tojanobuambá: “Chabiama mëntšá bominye sënjanajó: chë Uámana Espíritu, mo canye palomatemcá, celocana tonjánastjango y quem boyabásabe juatsbuañe tonjanototoná. <sup>33</sup> Atše cabá ndoñe quetsjátantatšëmbo nda cha bëtsemnana, pero chë béjayeca jubáyama šonjanichmó cha, mëntšá šonjaniyana: ‘Nda chacojinýe, chë Uámana Espíritu jastjanguana y chabe juatsbuañe jototonana, chábeyeca atše chanjíchmuca chë Uámana Espíritu entšangbe ainaniñe cháuamashënguama ca.’

<sup>34</sup> Y morna, atše aíñe chca tijinýe, y ndegombre tšëngaftanga cbéyana, cha chë Bëngbe Bëtsabe Uaquiñá entsemna ca” —cha tojanéyana.

#### *Chë Jesusbe natsana ústonënga*

<sup>35</sup> Yëfsana, Juan chabe uatsjëndayënguentsana útataftaca cachoca yojtésemna.

<sup>36</sup> Jesús yojtsachñëjuanama, Juan tbojáninýe ora, tojanéyana: “Šochjinýe. Mua entsemna nda Bëngbe Bëtsá tbojichmó y iytanana Oveshatemcá entsobiamná cha ca.”

<sup>37</sup> Chora chë Juanbe uta uatsjëndayata, chca tbojanuena ora, Jesús tmojanasto. <sup>38</sup> Jesús tojesanontješé y tojánanýe chata imojétsëstonama. As, tojanatjá: —¿Ndayá šojtsenguca ca?

Y chata tbojaniyana: —¿Rabí, ndayentše icoyena ca? (Rabí endayana “Buatëmbayá ca”.)

<sup>39</sup> Chora Jesús tojanéjua: —Mabo y šochjinýe ca.

As chata tbojána y tbojáninýe ndayentše cha yojaniyenana. Y chentše cháftaca tojéftsana jetana, ya jetiñe mo las cuatro ora yojtsemna causa.

<sup>40</sup> Chë Jesusbiam a oyebuambnayana Juánbioye tbojanóyeunata y Jesús tbojanasto útatentšana cánýana Andrés ca yojanabaina; cha yojamna Simón Pédrëbe catšata.

<sup>41</sup> Andrés, cabá ndocna inýe soye ndëma ora, tojána chabe catšata Simón janguanguama. Y tbojáninýena ora, Simónbioye tbojaniana: “Chë Bëngbe Bëtsabe Uámana Uabuayaná, Cristo, fsënjínýena ca.”

<sup>42</sup> Chentšana Andrés, Simónbioye tbojanánatse Jesús yojtsemnoye. Jesús, Simónbioye tbojáninýe ora, tbojaniana: “Aca condmëna Simón, Jonasbe uaquiñá, pero Cefas ca cochantsabaina ca.” (Chcana endayana “Pedro o ndëtšbé ca”.)

### *Jesús, Felipe y Natanael tojánachembo chamuastama*

<sup>43</sup> Yëfsana, Jesús tojanjuabó Galilea luaroye jama. Benachiñe Felípbioye tbojáninýena y tbojaniana: “Šmasto ca.”

<sup>44</sup> Chë boyabása Felipe, Betsaida pueblóca inamna. Andrés y Pédrëna cach pueblóca ibnamna. <sup>45</sup> Chentšana Felipe tojána Natanael janguanguama; y tbojaniana: —Chë ndabiam a leyënga librëšangañe Moisés tojanábema cha fsënjínýena ca. Cachabiam a, Bëngbe Bëtsabe juabna oyebuambnayëngnaca tmojanábema. Cha Jesús entsemna, Josebe uaquiñá, chë Nazaretocá ca.

<sup>46</sup> Chora Natanael tbojaniana: —¿Ndaye tšabe soye Nazaretocana nanjopódia jóbocnama ca?

Y Felipe tbojanjuá: —Mabo y cochjinýe ca.

<sup>47</sup> Natanael yojtsebëconama, Jesús tbojáninýe ora tojánayana: —Moye canýe entšá entsabó; cha ndegombre endomerecena Israelbentšana entšá jtsemnama. Cha tšabe entšá endmëna; ndocnábioye quebnatsingña ca.

<sup>48</sup> Chora Natanael Jesúsbioye tbojantjá: —¿Ntšamo atše šcuabatma ca?

Y Jesús tbojanjuá: —Felipe cabá aca ndëchembo ora, atše tcbonjinýe, chë higo betiye tēchetšoye condëtsomñe ora ca.

<sup>49</sup> As, Natanael tbojaniana: —Buatëmbayá, ¡aca chë Bëngbe Bëtsabe Uaquiñá comna! ¡Aca, chë Israeloca entšangbe Rey ca!

<sup>50</sup> Chora Jesús tbojanjuá: —¿Aca átšbeñe cojtsošbuaché, nýe chë higo betiye tēchetšoye tcbonjinýe ca tcbouyanama? Ndegombre, chë soyama más bëts soyënga cochonjinýe ca.

<sup>51</sup> Chentšana Jesús tojanéyana: —Ndegombre šcuayana: Tšëngaftanga šmochanjinýe celoca atëfjniñe, y Bëngbe Bëtsabe angelotëmënga jtsetsjuajnana y jtsastjajuanana Bëngbe Bëtsá Entšá tbojanbemabe tatsëtsoca.

## 2

### *Canýe casamento Galilea luaroca, Caná pueblentše*

<sup>1</sup> Chentšana unga tianoye, canýe casamento inamna, canýe pueblentše Caná ca uabáinentše, Galileoca. Chë oboyejuayoca Jesusbe mamá yojtsemna. <sup>2</sup> Jesús y chabe uatsjëndayëngnaca chë casamentoca ófjanënga imojtsemna. <sup>3</sup> Chë oboyejuayentše, vínoye yojtsopochóca y Jesusbe mamá tbojaniana: —Ya tondaye vínoye quemátsbomna ca.

<sup>4</sup> As, Jesús tbojanjuá: —Mama, ¿ndáyeca chca atše šcojtsatsá? Atšbe ora cabá ndoñe ntjoshjanguana ca.

<sup>5</sup> Chentšana, chabe mamá, chentša oservënënga tojanéyana: —Lempe šmochjama, ntšamo cha chacmojayuancá ca.

<sup>6</sup> Chocna, chnénguana ndëtšbé matbaja inamna. Chca matbajënguëntša béjayeca, judiënga imojanamana jtsacuëntšabiana cabá ndëse ora, ntšamo tempo entšanga imojanamancá, Bëngbe Bëtsabe delante tšábënga jtsatsmënama. Cada matbajiñe, mo shachna o canýsëfta bnëtsanáua béjaye yojanába.

<sup>7</sup> Chora Jesús chë oservénënga tojanamëndá: “Quem matbajënga béjayeca mobuajutetjé ca.” Y chënga, chora lempe tmojanbuajutetjé.

<sup>8</sup> Y Jesús tojanéyana: “Morna, báseye mobuatsjo y chë fiesta otocanábioye mabuyamba ca.” Y chënga chca tmojanma.

<sup>9</sup> Chora, chë fiesta otocaná, chë béjaye Jesús vínoye tojanbemiye tojanftantiá, ndémocana yojóbcnana ntsetatšëmbcá. Pero chë oservénëngna aíñe imojtsetátšëmbo ndémocana, er cachënga chë béjaye tmojanbuatsjo. As, chë fiesta otocanana, chë bobontse bouamnábioye tbojanchembo, <sup>10</sup> y tbojaniyana: “Njetscanga monduamana natsana chë más uámana vínoye jushebëcana, y chë ófjanënga becá tmojatëmo ora, chë más batšá uámaniye. Pero acna, chë más uámana vínoye morscama tcojtsabofjajó ca.”

<sup>11</sup> Ntšamo Jesús tojanmcá Caná pueblentše, Galileoca, yojamna chabe natsana bëts soye Bëngbe Bëtsabe obenánaca. Y chca, chabe bëts obenana y uámanana cha tojaninýanyé; y as, chabe uatsjéndayënga chábeñe imojtsošbuaché.

<sup>12</sup> Chca tojanopasá chentšana, Jesús canye pueblo, Capernaum ca uabáinoye tojt-sanoñe. Chorna, chabe mamá, chabe catšátanga y chabe uatsjéndayënga cha tmojan-tjëmbambá, y choca baseftatescama tmojanoquedá.

*Jesús Bëngbe Bëtsabe bëts yebnentšana bacna entsänga tojtanëbuacna*

*(Mt 21.12-13; Mc 11.15-18; Lc 19.45-46)*

<sup>13</sup> Ya canye judiëngbe bëts fiesta, chë Bashco fiesta yojétsobeco, chë ntšamo Bëngbe Bëtsá chëngbe bëts taitanga Egiptocana tojánatsebacama jtenójuaboyama. Chë fiestama Jesús Jerusalenoye tojána. <sup>14</sup> Jerusalenoca, Bëngbe Bëtsabe bëts yebnentše, Jesús tojánanyëna uacnënga, oveshënga y paloma enënga, y entsángbioye crocénana atrócayënga, chëngbe luarënguenache imojtsetbiámana. <sup>15</sup> Jesús chca tojánanyë ora, biajënga tojanaca, tjanjanëja tojanobopormá, y Bëngbe Bëtsabe bëts yebnentšana njetscanga tojtanëbuacna, chëngbe oveshënga y uacnéngaca. Chentšana Jesús, Bëngbe Bëtsabe bëts yebnentšama yojanoserverna crocénana atrocayëngbe crocénana tojtsanëjquësheshe, y chë mesëshangá tojtsanenásatajchquëca. <sup>16</sup> Chë paloma enëngna Jesús tojanéyana: — ¡Quem soyënga lempe muentšana matábocana! ¡Ndoñe matsbuamnana ni mátenana atšbe Bëtsabe yebnentše, mo cánýentše jiyama luarentše cuaftsemncá ca!

<sup>17</sup> Y as, chabe uatsjéndayënga tmojanenojuabó ntšamo Bëngbe Bëtsabe uabemana palabrënguiñe iuayanama: “Bëngbe Bëtsabe yebna jtseboguianama juabna, njets átšbeñe entsemna ca.”

<sup>18</sup> Chora, judiënga Jesús tmojantjá: —¿Ndaye bëts soye cochjama bënga chašcuinýanyëma, aca ndaye deréchoca béngaftaca chca cojtsobenama ca?

<sup>19</sup> As Jesús tojanéjua: —Quem Bëngbe Bëtsabe yebna menásatajchca, y atše unga tese chtëtsbaná ca.

<sup>20</sup> Chora chë judiënga tmojaniyana: —Canta bnétsana chnénguana uatiñe, quem Bëngbe Bëtsabe yebna tmojanjebo. ¿Y aca, nýe unga tese lempe cochtëtsjebo ca?

<sup>21</sup> Pero Bëngbe Bëtsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye. <sup>22</sup> Chama, Jesús obanënguentšana tojtanayena ora, chabe uatsjéndayënga tmojanenojuabó ntšamo muentše cha tojanéyanama. Chca ora, Bëngbe Bëtsabe uabemana palabrënguiñe y Jesús chora tojánayana palabrënguiñe más chënga imojtsošbuaché.

*Jesús njetsca entsängbe juabna iuábuatma*

<sup>23</sup> Jesús Jerusalenoca chë Bashco fiestama yojtsemnëntscuana, entsänga tmojáninýe Jesús jamana bëts soyënga Bëngbe Bëtsabe obenánaca. Chíyeca, ba entsänga chábeñe imojtsošbuaché. <sup>24</sup> Pero Jesús chëngbeñe ndoñe yontsošbuaché, cha njetscanga yojanëbuatma causa. <sup>25</sup> Y Jesús ndoñe bonjanájaboto chë entsängbe soyëngama chabotsebuaiynama, er cachá entsängbe ainaniñe njetsca juabnënga yojanábuatma.



## 3

*Jesús y Nicodemo*

<sup>1</sup> Inamna canye boyabása Nicodemo ca uabainá. Cha yojamna fariseunguentśá y judiëngbe canye amëndayá. <sup>2</sup> Chana ibeta Jesúsbioye tojána y tbojaniana: — Buatëmbayá, bënga fséntsetatśëmbo aca canye buatëmbayá comnama, Bëngbe Bëtsabe ichmoná. Ndocná quenátobena jamana quem bëts soyënga, aca contsama soyënga, Bëngbe Bëtsá cháftaca ndoñe tontsemnëse. Chíyeca bënga chca fséntsetatśëmbo ca — cha tbojaniana.

<sup>3</sup> Chora Jesús tbojanjuá: —Ndegombre cbëyana, nda ndoñe cachiñe tontonýná, cha ndoñe quenátobena Bëngbe Bëtsabe amëndayana jinýama ca.

<sup>4</sup> Y Nicodemo tbojantjá: —¿Ntśamo, canye entśá ya bëtsá tojtsemna ora, nantsobena cachiñe jtónýnama ca? Ndegombre, cha ndoñe ntsobenana cachabe mamabe cuerpiñe jtamashënguana cachiñe jtónýnama ca.

<sup>5</sup> Chora Jesús tbojanjuá: —Ndegombre cbëyana, béjayeca y chë Uámana Espíritbeyeca ntjonýnacá, ndocná quenátobena Bëngbe Bëtsabe amëndayoye jamashënguama. <sup>6</sup> Nda bëtsétsabentśana tojonýná cha, quem luarentśa entśangcá jtsemnana; pero chë Uámana Espíritbeyeca tojonýná chana, jtsemnana canya chë Uámana Espíritu ainaniñe bomná. <sup>7</sup> Ndoñe materjanana ntśamo tbonjauyanama: “Nyetscanga entsamna cachiñe jtónýnama”. <sup>8</sup> Chë binýia ndëmuajana tojtseboşe jtsemnana, chëjana jtsanana. Masque entśanga, chë binýiyama jtsuenanana, ndoñe ntsetatśëmbuana ndémocana yobama y ndémoye yojtsoma. Cachcá, tšëngaftanga ndoñe queśmátstatśëmbo ntśamo entśanga chë Uámana Espíritbeyeca tmojtśónýnama; pero tšëngaftanga śmontsetátśëmbo aíñe chca yomnama ca —Jesús tbojaniana.

<sup>9</sup> Chora Nicodemo tbojantjá: —¿Ntśamo chca nántsemna ca?

<sup>10</sup> Y Jesús tbojanjuá: —Aca, canye Israeloca abuatambayá, ¿chë soyëngama ndoñe condétatśëmbo ca? <sup>11</sup> Ndegombre cbëyana, bëngna chë fsttatśëmbo soyëngama fsëntsoyebuambná, y chë tifjinýe soyëngama ndegombre bétsemnana fséntsichamo. Pero tšëngaftangna, chë cbontsëtsëtná soyënguñe ndoñe queśmatoşbuaché. <sup>12</sup> Atşe, quem luarentśa soyëngama sënjoyebuambá y tšëngaftanga átşbeñe ndoñe cheśmatoşbuaché. Y as, ¿ntśamo átşbeñe śmochtsoşbuáchiye, celoca soyëngama cbojtsët-sëtsnase?

<sup>13</sup> “Ndocná, nýe cachábeyeca Bëngbe Bëtsábioye tonjátsjua. Nýe chë celocana tojabá aíñe, chë Bëngbe Bëtsá Entśá tbojanbemá. <sup>14</sup> Y chcase, ntśamo Moisés entśanga ndoyenoca bronca mëtşcuaye tsbanánoca tbojananguësëtjca, şoquënga tşabá chamot-satsmënama; cachcá entsemna, Bëngbe Bëtsá Entśá tbojanbemá entśanga chamuats-banama; <sup>15</sup> chca, nyetscanga chábeñe tmojtsoşbuáchenga, chë nyetsca tescama yomna tşabe vida chamotsebomnama ca” —Jesús Nicodëmbioye tbojaniana.

*Ntsachetśá Bëngbe Bëtsá entśanga iuababuányeshana*

<sup>16</sup> Mëntśánaca Jesús tojánayana: —Bëngbe Bëtsá quem luare entśangbioye tşa yoján-ababuanýeshanayeca, chë nýe canye Uaquiñá ibobomná, bëngbioye tbojichmó, nyetsca chábeñe oşbuáchiyënga ndoñe chamondóbanama, y aíñe chë nyetsca tescama yomna tşabe vida chamotsebomnama. <sup>17</sup> Er Bëngbe Bëtsá chabe Uaquiñá quem luaroye ndoñe tbonjichmó quem luare entśangbiamna jabáyanama ntśamo tmojamama castigánënga chaotsamnama ca, sinó, entśanga chábeyeca atsebácanënga chamotsemnana.

<sup>18</sup> “Nda Bëngbe Bëtsabe Uaquiñábeñe tojtsoşbuáchebiamna, Bëngbe Bëtsá ndoñe queochátayana ntśamo cha tojamama, castiganá chaotsemna ca. Pero chë Uaquiñábeñe ndoñe tontsoşbuáchebiamna, mora Bëngbe Bëtsá ya tojayana, ntśamo tojamama cha castiganá chaotsemna ca, chë Bëngbe Bëtsá nýe canye Uaquiñá ibobomnábeñe ndoñe yontsoşbuaché causa. <sup>19</sup> Chca, chë ndoñe tmontsoşbuáchengbiamna cha ya tojayana,

ntšamo tmojamama castigánënga chamotsemna ca; er chë entsängbe juabnënga binýnáyá quem luaroye tojabo, pero ba entsänga tmojábošena jtsomñana, chë entsängbiamama bacna juabnéngaca chamotsebomnama amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñama. <sup>20</sup> Chë bacna soyënga tojtsamá ndoñe ntsebošana, chë binýnáyá chabe bacna soyënga chabuínýinýema, ni chabe bacna soyëngama chabuácacanamama. Chíyeca, chë bacna soyënga jtsamëse oyená, chë binýnáyábioye jtsáboyënjana, y chë binýnáyábioye ndoñe ntjabana. <sup>21</sup> Pero nda sempre tojtsiyena ntšamo ndegombre yomncá jtsamëse, chana aíne chë binýnáyábioye jabana, chë binýnáyá chabiamama chabuínýinýema, chë tojama soyëngna, ntšamo Bëngbe Bëtsá tojtsebošcá tojamama ca” —Jesús tojánayana.

*Juan chë Ubayaná cachiñe Jesucristbiamama tojanabuayená*

<sup>22</sup> Chca tojanopasá chentšana, Jesús chabe uatsjédayëngaftaca básefta Judeoca publëngoye tojtsanoñe. Chiñe, baseftatescama chë uatsjédayëngaftaca tojanoquedá, entsänga ubáyana. <sup>23</sup> Cach tempo, Juanënaca entsänga yojanëbáyana Enonoca, Salim béconana, er choca bëtscá béjaye inabinýna. Ba entsänga choye imojtsaye, y Juan chënga yojanëbáyana. <sup>24</sup> Chca tojanopasá, chë Heródesbe soldadënga Juan cabá ndutame ora.

<sup>25</sup> Chë tempo, básefta Juanbe ústonënga tmojanontsé inýe judíoftaca enatsëtsnayana ntšamo tempo judiënga chë jtsacuéntšabiamama imojanámanama. <sup>26</sup> Chora, chënga Juánbioye tmojánabo y tmojanayana: —Buatëmbayá, chë Jordán chenguánoica ácaftaca enjamná, ndabiamama tša tšabá conjanoyebuambná, mora entsänga entsëbayana y nýetscanga cha montsëstona ca.

<sup>27</sup> As Juan tojanéyana: —Ndocná quenátobena tondaye ntsebomnana, Bëngbe Bëtsá ndoñe tbonjatsetase. <sup>28</sup> Cach tšëngaftanga tšabá šmonjanuena y šmontsobena ndegombre yomnana jayanana, atše ndoñe chë Bëngbe Bëtsabe Uámana Uabuayaná tsjanmëna ca sënjánayanama; sinó, Bëngbe Bëtsá atše šojanichmó chë Uabuayanabe natsana, chabiamama entsänga jabábuayenama. <sup>29</sup> Chë tobiáše tojtsobouamá ora, chë bobontse chábioye jtsebomnana; y chabe amigna, chabiamama jtsobátmanana y chë bobontse bouamnabe oyebuambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chë Uabuayaná yojtsamama y yojtsóyebuambnama sëntsuenana ora, átšnaca corente oyejuayá séntsemna. <sup>30</sup> Cha bontsemna más uamaná jtsemnana, pero atše šontsemna más nduamaná jtsemnana ca —Juan tojanéyana.

*Ntšamo yomna chë celocana tojabá*

<sup>31</sup> Mëntšánaca Juan tojánayana: “Chë tsbanánocana tojabá, nýetsca entsängbiamama más uamaná endmëna. Chë quem luare oyená quem luare entsängcá jtsemnana y quem luarentša soyëngama jtsóyebuambnayana, pero chë celocana tojabana, nýetsca entsängbiamama más uamaná endmëna. <sup>32</sup> Cachá ntšamo tojinýe y tojouencá entsoyebuambná, pero chë entsichamo soyënguiñe ndocná quenatošbuaché. <sup>33</sup> Nda ntšamo cha tojtsóyebuambnañe tojtsošbuaché y chca tojtsama, jtsinýanýnayana Bëngbe Bëtsá ndegombre soyënga inetsichámuama. <sup>34</sup> Chcasna, Bëngbe Bëtsabe ichmonana, jtsóyebuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábioye tbojichmó chë Uámana Espíritu, nýets tempo corente chabotsájabuachanamama, ntšamo cach Bëngbe Bëtsá tojtsichamo y cachcá chaotsichámuama. <sup>35</sup> Chë Taitá Uaquiñábioye bondbobonshana, y chë Uaquiñábioye obenana tbojatsetá nýetsca soyënguiñe jtsemándayama. <sup>36</sup> Nda chë Uaquiñábeñe tojtsošbuaché, chë nýetsca tescama yomna tšabe vida echántsebomna; y nda chë Uaquiñábioye ndoñe tbontsašbuaché, chana chë vida ndoñe queochátsbomna, y chë Bëngbe Bëtsabe uabouana castigo nýetsca tescama chábeñe echántsemna ca” —cha tojánayana.

<sup>1</sup> Chë fariseunga tmojanuena Jesús, Juanbiamá más ústonënga yojtsabamnana, y más entsãnga yojtsëbáyana. <sup>2</sup> Pero ndegombre, cach Jesús ndocnábioye bonýanábayana, sinó chabe uatsjëndayënga. <sup>3</sup> Bëngbe Utabná Jesús, ntšamo chë fariseunga tmojanuena tojántatšëmbona ora, Judea luarocana tojéftsanbocna y Galileoye tojtana.

<sup>4</sup> Choye jtamna ibojamna Samaria luarëjana jachnënguana. <sup>5</sup> Samariocna, canýe pueblo Sicar ca uabáinoye Jesús tojánashjango. Chë pueblo yojamna, chë Jacob chabe uaqiñá Josëbioye tbojéftsanlargá fshantse béconana. <sup>6</sup> Choca yojamna cánýentse atëfjóniñe, búyeshe jobuatsjuama, Jacobëbe atëfjóniñe ca uabáiniñe. Mo nýetsto ora, chentse Jesús yojtsemna, aniñe uamëntsnayá, chë atëfjóniñe batsjaca yojótbema. <sup>7-8</sup> Chabe uatsjëndayëngna chë puebloye tmojána saná jobuámiñama. Chora, canýe shembása Samariocá, chë atëfjónoye tojánashjango, búyeshe jauafcama; as Jesús tbojaniana: —Búyeshtema šmabuatšetá ca.

<sup>9</sup> Y chë shembása tbojanjá: —Aca canýe judío condmëna y atšna canýe samaritaná. ¿Ntšamo cojtsobena atšë búyeshe juabuátjañama ca? (Cha chca tojánayana, er canjanopasana, judiëngna samaritanëngaftaca ndoñe monjanenatsëtsná.)

<sup>10</sup> Chora Jesús tbojanjá: —Aca mo cojtsetátšëmbo nýe ntšamo Bëngbe Bëtsá aca jatšetayama yojtsebošcá, y nda chë búyeshe cmojtsábuatjanañama, acna más cha catjuábuatjañe, y chana bójaye vida bomniye cmatjuabuátšetaye ca.

<sup>11</sup> Y chë shembása tbojaniana: —Señor, tondaye quecátsbomna nýe mo ndayecnaca búyeshe jabuatsjuama, y chë atëfjóniñe corente tboca endmëna; y as, ¿ndayentsana cochjobenaye bójaye vida bomniye atšë juabuátšetayama? <sup>12</sup> Bëngbe tempsca bëts taitá Jacob, quem atëfjóniñe bëngbiamá tojéftsanboshjona. Cachá, chabe básenga y chabe bayënga muentšana búyeshe tmojéftsanofšé; y ¿aca chabiamá más bëtsá comna ca? — chë shembása yojtsichamo.

<sup>13</sup> As Jesús tbojanjá: —Nýetscanga chë quem búyeshentsana tmojofšenga, chënga cachiñe echantëtëjuendaye. <sup>14</sup> Pero chë chanjuabuátšetaye búyeshentsana tojofšé chana ndocna te cachiñe quebochétajuendaye. Cha chanjuabuátšetaye búyeshna, chábeñe echántsemna mo cánýentse bójaytema obocaniñcá, chë nýetsca tescama yomna tšabe vida jtsebomnama ca —cha tbojaniana.

<sup>15</sup> Chora chë shembása tbojaniana: —Señor, chca búyeshe šmabuatšetá, as atšë ndoñe cachiñe chašondetsajuendama, ni búyeshe jauafcama moye jtsaboyama ndoñe chašondëtsemnama ca.

<sup>16</sup> As Jesús tbojaniana: —Motsa acbe boyá jachembuama y cochjésabo ca.

<sup>17</sup> Chora chë shembása tbojanjá: —Boyá ndoñe quetsátsbomna ca.

As Jesús tbojaniana: —Tšabá tcjayana boyá ndoñe condbomna ca. <sup>18</sup> Er, aca shachna boyanga conjánabamna, y chë mora contsebomnana, acbe boyá ndoñe quenátsmëna. Ntšamo tconjayancá ndegombre entsemna ca.

<sup>19</sup> Chë shembása chca tojanuena ora, Jesúsbioye tbojaniana: —Señor, mora atšë séntsetatšëmbo, aca canýa Bëngbe Bëtsabe juabna oyebuambnayá comnama. <sup>20</sup> Bëngbe tempsca bëts taitanga quem tjoca Bëngbe Bëtsá monjánadorana; pero tšëngaftanga, judiënga šmondbétsichamo, bënga Bëngbe Bëtsá jadóramna, Jerusalenoca chë luare canmëna ca.

<sup>21</sup> Chora Jesús tbojanjá: —Shembása, šmoyeuná; canýe tempo echanjóshjango y chora tšëngaftanga ndoñe quecmochátamna Bëngbe Bëtsá jadóramna, ni quem tjoye jabaná, ni Jerusalenoye jana. <sup>22</sup> Tšëngaftanga samaritanënga ndoñe quešmatábuatma nda šmetsadoránama; pero bënga aiñe fsënduábuatma, er chë atsebacayá judiënguentšana endabó. <sup>23</sup> Pero ora entsoshjajuana, ya chë tempo tojjobuache, ndaye ora chë Bëngbe Bëtsá chë Taitá ndegombre atschuanayënga, chë Espíritbeyeca y ndegombre juabnéngaca chábioye mochántadorana. Er chë Taitá entsebošë chë chábioye adórayënga chca chamotsamama. <sup>24</sup> Bëngbe Bëtsá, Espíritu endmëna; y chë chábioye adórayënga

entsamna, chë Uámana Espíritbeyeca y ndegombre juabnéngaca cha jtsadoránana ca — Jesús tbojanianana.

<sup>25</sup> Chora chë shembása tbojanianana: —Atše sëndétatšëmbo, canmëna chë Bëngbe Bëtsabe Uámana Uabuayaná, chë Cristo jabana ca; y cha chaojáshjango orna, cha nyetsca soyëngama cašochjabuayená ca.

<sup>26</sup> As Jesús tbojanianana: —Atše, chë ácaftaca entsoyebuambná cha, cha entsemna ca.

<sup>27</sup> Chëntscuana, Jesusbe uatsjédayënga tmojtánashjajna, y tmojtsanéuatjaná, Jesús canye shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndáyeca cháftaca cojtsoyebuambná ca?

<sup>28</sup> Chorna, chë shembása chabe uafcanëja tojésanboshjona, y chë puebloye betesco tojtaná. Chocna, entsänga tojanéyana: <sup>29</sup> “Mabënga canye boyabása jinýama ca. Cha atše šonjauyana lempe ntšamo tijamcá. ¿Chë boyabása, chë Cristo tanántsemna ca?” —cha yojtsichamo.

<sup>30</sup> As chë entsänga chë pueblócana tmojánbocana y Jesús yojtsemnoye tmojánashjajna.

<sup>31</sup> Chca yojtsopasánëntscuana, chë uatsjédayënga Jesúsbioye imojtseimpadana: —Buatëmbayá, batšatema mose ca.

<sup>32</sup> Pero cha tojanéyana: —Atše canye soye jasama séntsebomna. Tšëngaftanga chë soyama ndoñe quešmátstatšëmbo ca.

<sup>33</sup> Chora chë uatsjédayënga tmojanontšë entjanayana: —¿Nderado nda jasama chabiamá tojiyëbo ca?

<sup>34</sup> Y Jesús tojanéyana: —Chë šonjichmó cha ntšamo yojtsebošcá jamana, y chabe trabajo japochócana, chë soyënga mo sanacá atšbiama entsemna. <sup>35</sup> Tšëngaftanga šmondbétsichamo: “Cabá canta ishinýe entsashbena jaja saná chaotsebinýnama ca”; pero atše cbéyana: Minýënga tša entsänga moye montsabëbana; chënga montsemna mo jajañe saná játbanama tojtseprontancá. <sup>36</sup> Tšëngaftanga šmontsemna mo chë saná atbanayëngcá. Chëngna jajañe jtsetrabájayana, y chëngbe uacanána jtsësháchinana. Cachcá, tšëngaftanga cmontsamna atšbiama entsänga júbuajana, chë nyetsca tescama yomna tšabe vida chamotsebomnama. Chë jaja saná átbanaye ora, jenënga y chë atbanayënga cánýiñe oyejuayënga jtsemnana. Cachcá, chë entsänga átšbeñe chamojtsosbuaché ora, nyetscanga, chë atšbiama obuájajanënga y chë atšbiama trabájayëngnaca cánýiñe oyejuayënga mochántsemna. <sup>37</sup> Quem entsängbe ichámuana, canye ndegombre soye endmëna: “Chë jená canýa jtsemnana, y atbanayana inýa ca.” <sup>38</sup> Atše tšëngaftanga cbonjichamó canye soye játbanama, y tšëngaftanga tondaye chešmatsma chca chaotsebinýnama. Inýenga chiñe bëtscá tmonjëftsetrabája, y tšëngaftangna, chëngbe trabajënguentšana šmojolograñe ca —Jesús tojánayana.

<sup>39</sup> Bëtscá entsänga, Samarioca pueblentšënga Jesúsbeñe imojtsanošbuaché, ntšamo chë shembása tojanéyanama. Chë shembása tojanéyana: “Lempe ntšamo atše tijamcá cha šonjauyana ca.” <sup>40</sup> As chë samaritanënga, Jesús yojtsemnentše tmojánashjajna ora, tmojanimpadá chëngaftaca chaotsoquedáñama. Y as Jesús, uta te chentše tbojëftsanjé-tana. <sup>41</sup> Y más entsänga, cach ntšamo Jesús yojtsanëtsëtsnacá tmonjanuena ora, chábeñe imojtsanošbuaché.

<sup>42</sup> Y chë shembása chë entsänga tmojanianana: “Mora cocayé fsëntsošbuaché, ndoñe nýe ntšamo aca šcojáuyanama, sinó cach bënga chábioye oído fsëñjabuajóyeca; y mora fsëntsetatšëmbo ndegombre cha yojtsemna chë quem luare entsängbiamá Atsebacayá ca.”

*Jesús, canye mandado uajabuachanabe básabioye tbojanshná*

<sup>43</sup> Uta te chentšana, Jesús Samariocana tojáisanbocna y Galileoye tojataná. <sup>44</sup> Cach Jesús mëntšá tojánayana: “Canýa Bëngbe Bëtsabe juabna oyebuambnayá, cachabe luarentše oyenënga ndoñe bëtsá ntjabemëngana ca.” <sup>45</sup> Galileoca oyenënga Jerusalenoye

tmojána, y tmojáninýe nyetsca bêts soyënga ntšamo Jesús Bashco fiesta ora choca tojanmcá. Chíyeca, Jesús Galileoye tojtashjango ora, chënga tšabá tmojtanfja.

<sup>46</sup> Galileocna, Jesús cachiñe Caná pueblöye tojésanashjango, chë béjayeca vínoye cha tojánbementše. Choca yojtsemna canýe mandadbe uajabuachaná, y chabe uaquiñana Capernaum pueblöca šocá yojtsejájona. <sup>47</sup> Jesús Judeocana Galileoye tojánashjanguama, chë uajabuachaná tojanuena ora, Jesúsbiöye tojána y ibojtseimpadana chabe yebnoye cháuama, chabe uaquiñá chabuetseshnáñama, er ya jtsóbanama yojtsemna ca. <sup>48</sup> As Jesús tbojaniyana: —Tšëngaftanga, Bëngbe Bëtsabe obenana jinýanýiyama bêts soyënga atše jamama ndoñe šmonjinýëse, átšbeñe ndocna te ntsošbuáchiyana ca.

<sup>49</sup> Chora, chë mandadbe uajabuachaná Jesúsbiöye tbojaniyana: —Taita, betesco mabo, atšbe uaquiñá cabá ndóbana ora ca.

<sup>50</sup> As Jesús tbojaniyana: —Acbe yebnoye motsatá. Acbe uaquiñá ainá endëtsomñe ca.

Chë boyabásana tojanošbuaché ntšamo Jesús tbojaniyancá y tojtaná. <sup>51</sup> Cha yojtsataye orna, chabe oservénënga tmojánbocana jajëbenguama y tmojaniyana: —Acbe uaquiñá tšabá entsatsmëna ca.

<sup>52</sup> As cha tojanatjá: —¿Ntseco orscana tbënjatëcja ca?

Y chënga tmojanjuá: —Tonjopasá yëfse, mošenana orscana chë calentora tbonjábosana ca.

<sup>53</sup> Chora chë taitá tojanenojuabó, cachca ora Jesús tbojaniyana: “Acbe uaquiñá ainá endëtsomñe ca”. Y cha y nyetscanga chabe yebnentše oyenënga Jesúsbeñe imojtsanošbuaché.

<sup>54</sup> Ntšamo Jesús chora, chë uajabuachanabe uaquiñabiama tojanmcá, Judeocana Galileoye yojtsataye orna, yojamna chabe utama chca bêts soye jamama, Bëngbe Bëtsabe obenana jinýanýiyama, Galilea luaroca.

## 5

### *Jesús canýe jama ndobenábioye tbojanshná*

<sup>1</sup> Baseftayté chentšana, chë judiënga canýe oboyejuaye te imojtsebomna ora, Jesús Jerusalenoye tojána. <sup>2</sup> Choca, chë Oveshëngbe amashjuana ca uabáinentše yojamna canýe binche uafjájónaye, entšangbe pormániñe. Chë béjayna judiëngbe biyañe Betzata ca inauabaina. Chë béjaye juachañe shachna amashjuana otsbojebniñe inamna. <sup>3</sup> Chiñna ba šoquënga jtanënga, coshetënga y jama ndobenënga imojtsecjana; chë béjaye chamobonjoma imojtsobátmana. <sup>4</sup> (Nderado nderado, Bëngbe Bëtsábioca canýe ángel yojanamana jastjanguana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënana.) <sup>5</sup> Chë šoquënguiñe canýe boyabása inamna, unga bnëtsana y posufta uatama jama ndobená. <sup>6</sup> Jesús chë jajonábioye tbojáninýe ora y ba uatama chca yojamnana tojántatšëmbona ora, tbojantjá: —¿Quecojtseboše tšabá jtsatsmënama ca?

<sup>7</sup> Y chë šocá tbojanjuá: —Taita, ndocná quetsátsbomna nda chašúajabuache béjayoye jamashënguama, chë béjaye tojtsobonjná ora. Y atše béjayoye jamashënguama stseboše ora, inýa atšbe natsana jtsamashënguana ca.

<sup>8</sup> Y Jesús tbojaniyana: —Matëtsbaná, acbe tjuashe mesocñe y matontsé jóyenana ca.

<sup>9</sup> Cach ora chë boyabása tšabá yojtsatsmëna, chabe tjuashe tojésanocñe y tojanontsé jtsanana. Chca tojanopasá ora, chë ochnayté inamna. <sup>10</sup> Chíyeca, chë tbojanshnábioye chë judiënga tmojaniyana: —Mëntena ochnayté. Mënté ndoñe quenátópodena aca tjuashe jtsecutsnana ca.

<sup>11</sup> Y chë boyabása tojanéyana: —Chë šonjashná cha mëntšá šonjauyana: “Acbe tjuashe mesocñe y montsé jóyenana ca”.

<sup>12</sup> As chënga tmojantjá: —¿Nda yojtsemna chë “acbe tjuashe mesocñe y montsé jóyenana ca” tmojauyaná ca?

<sup>13</sup> Pero chë shnaná ndoñe yontsetátšëmbo nda tbojanshnama. Chocna bëtscá entšanga imojtsemna; chcasna, Jesús chëngbe tsëntsajana tojanenatjëmba.

<sup>14</sup> Chentšana, Jesús Bëngbe Bëtsabe bëts yebnentše chë boyabásabioye tbojáninýena y tbojaníyana: —Mouena; mora aca ya ndoñe šocá quecátsmëna; bacna soyënga ndoñe cachiñe cattsama. Aíñese, acbiamu puerte mal echanjopása ca.

<sup>15</sup> Chë boyabása tojtsanoñe y chë judiënga tojanéyana: —Chë šonjashná cha Jesús entsemna cá.

<sup>16</sup> Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama. <sup>17</sup> Pero Jesús tojanéyana: “Atšbe Taitá nyets tempo tšabe soyënga endbëtsama; cachcá, átsnaca tšabe soyënga séntsama ca.”

<sup>18</sup> Jesús tojanma ntšamo ochnayté ndoñe yonjanapodencá, y Bëngbe Bëtsabiamu tojánayana “Atšbe Taitá ca”. Mëntšá Jesús yojtsanobiamná cach Bëngbe Bëtsacá. Chama, chë judiënga más imojtseboše Jesús jóbama.

### *Bëngbe Bëtsabe Uaquiñabe obenana*

<sup>19</sup> Chentšana Jesús tojanéyana: “Ndegombre šcuayana: Bëngbe Bëtsabe Uaquiñá, nye cachabe cuenta tondaye quenátobena jamana. Cha jtsónýayana ntšamo chabe Taitá tojtsamcá. Ntšamo chë Taitá tojtsamcá, chë Uaquiñánaca jtsamana. <sup>20</sup> Er Bëngbe Taitá chabe Uaquiñábioye bondbobonshana, y lempe ntšamo cha tojtsamcá chábioye bondinýinýná; y más bëts soyënga bochanjinýinýiye, chë soyëngama tšëngaftanga chašmenjnanama. <sup>21</sup> Chë Taitá endama obanënga chámuatayenama y tšabe vida chamotsebomnama; cachcá, chë Uaquiñá entsama tšabe vida chamotsebomnama, ndëmuanýënga cha tojtsebošcá. <sup>22</sup> Chë Taitá ndocnabiamu jatichámuana tšabá o ndoñe tšabá yontsama ca. Chabe Uaquiñábioye nyets obenana tbonjatšetá nyetscangbiamu jayanama tšabá o ndoñe tšabá tmontsamama. <sup>23</sup> Chca, chënga chamuinýinýé Bëngbe Bëtsabe Uaquiñá puerte uamaná yomnama, ntšamo Bëngbe Bëtsá puerte uamaná yomnama nyetscanga mondbetsinýinýnacyá. Nda chë Uaquiñábioye ndoñe más uamaná tbontsebiamná, cach ndoñe más uamana ntsebiamnayana chë Taitábioye, nda chë Uaquiñá tbojichmóbioye.

<sup>24</sup> “Ndegombre šcuayana: Nda ntšamo atše séntsichamcá šojoyeuná, y chë muentše šonjichmó chábeñe tojtsošbuaché, chë nyetsca tescama yomna tšabe vida jtsebomnana. Chabiamu chë Uaquiñá ndoñe queochátayana castiganá chaotsemna ca. Chca, Bëngbe Bëtsabiamu cha ya ndoñe más mo obanacá queochátsmëna, chábeñe ndošbuáchiye causa; y ya ndoñe nyetsca tescama castiganá queochátsmëna. Y aíñe, chë nyetsca tescama yomna tšabe vida echántsebomna.

<sup>25</sup> “Ndegombre šcuayana: Chë jobuáchama te ya tocjobuache. Chë te, chë Bëngbe Bëtsabiamu mo obanëngcá imomnënga mochanjouena Bëngbe Bëtsabe Uaquiñá jtšoyebuambnayana. Nda chca tšabá chašojoyeuná cha, tšabe vida echántsebomna. <sup>26</sup> Er ntšamo Bëngbe Taitá obenana endbomncá, cachá jamama entšanga vida chamotsebomnama, chabe Uaquiñábioynaca obenana tbojatšetá entšanga vida chamotsebomnama jamama. <sup>27</sup> Chë Uaquiñá endmëna nda Bëngbe Bëtsá Entšá tbojábema; chíyeca chë Taitá chábioye obenana tbojatšetá nyetscangbiamu jayanama tšabá o ndoñe tšabá tmontsamama. <sup>28</sup> Chama ndoñe matenjnanana. Er canýe tempo echanjobuache, y chora chë Uaquiñá obanënga echántsachembuana; chënga mochanjouena y cach ora, chëngbe oyenocana mochanjésebocana. <sup>29</sup> Tšabe soyënga tmojëftsemënga, obanënguentšana mochántayena, chë nyetsca tescama yomna tšabe vida jtsebomnama. Pero bacna soyënga tmojëftsemëngna obanënguentšana mochántayena nyetsca tescama castigánënga jtsemnama ca” —Jesús tojanéyana.

### *Jesús, ndegombre Bëngbe Bëtsabe ichmoná inamna*

<sup>30</sup> Mëntšánaca Jesús cachatbiamu tojánayana: “Nýe átšbeyeca tondaye quetsátobena jamama. Chë Taitá šontsemánda ntšamo nyetscangbiamu jayanama tšabá o ndoñe tšabá tmontsamama. Nýe chca atše séntsobena chë soye jamama. Ndoñe quetsátsboše jamana nýe ntšamo cach atše stsebošcá; pero sempre sëndbëtseboše jamama, ntšamo Taitá, chë

šonjichmó cha tojtsebošcá. Chíyeca atše nyetscangbiama séntsichamo tšabá o ndoñe tšabá tmontsamama; y ntšamo nyetscangbiama séntsichamcá, ndegombre endmëna.

<sup>31</sup> “Ntšamo cach atšbiama tijayanama, ndegombre entsemna ca stsihámëse, ntšamo stsihámca, nyetscangbiama tondaye ntsámanana. <sup>32</sup> Pero inya entsemna. Cha endétatšëmbo y entsichamo ntšamo ndegombre atšbiama yomncá; y séntsetatšëmbo ntšamo cha atšbiama yojtsichámca, nyetscangbiama aíñe yojtsámanama. <sup>33</sup> Tšëngaftanga ínÿenga šmojanichamó atšbiama Juan jatjayama; y ntšamo cha tcmojauyancá ndegombre endmëna. <sup>34</sup> Masque chë soyënga cha tcmojáuyana, ndoñe quešnatájaboto ndocna entšá atšbiama chaotsichamo ‘cha aíñe chca endmëna ca’. Atše quem soyënga séntsichamo ndayá nÿe tšëngaftanga atsebácanënga chašmotsemnama. <sup>35</sup> Juan enjamna mo canÿe uajuinÿanésha tojtsajuinÿana y tojtsabuashinÿinÿancá. Tšëngaftanga chabe buashinÿinÿanana šmonjinÿe, y šmonjábóšena rato cháftaca oyejuayënga jtsemnama. <sup>36</sup> Pero chë atše sënjama soyëngacna más entsinÿinÿena ntšamo atšbiama ndegombre yomncá, chë ntšamo Juan atšbiama tojánayanama. Ndayá atšbe Taitá šojabonÿé jamama, ntšamo atše séntsamcá, entsinÿinÿiná ndegombre chë Taitá šojichmoma. <sup>37</sup> Atšbe Taitá, chë šojichmó chánaca entsichamo ntšamo atšbiama ndegombre yomncá, masque ndocna te chabe oyebuambnayana chešmatuena, ni ntšamo cha yomncá chešmatinÿe. <sup>38</sup> Pero tšëngaftangbe ainanoye chabe palabra ndoñe tonjómarshëngo, cha tbojichmóbeñe tšëngaftanga ndoñe quešmatošbuaché causa. <sup>39</sup> Tšëngaftanga, Bëngbe Bëtsabe palabra tša jtsatsjéundayana, er šmondobátmana, chca jtsamëse chë nyetsca tescama yomna tšabe vida jónÿenama. Y Bëngbe Bëtsabe uabemana palabrënguñe atšbiama endayana ntšamo ndegombre yomncá; <sup>40</sup> pero masque chca, tšëngaftanga ndoñe quešmátsboše atše jtséstonana, y chca, tšabe vida jtsebonnama.

<sup>41</sup> “Atše ndoñe quetsátsboše entšanga yapa tšabá atšbiama chamotsichámuama. <sup>42</sup> Y inÿe soye, atše puerte cbondëbuatma, y sëndétatšëmbo tšëngaftanga Bëngbe Bëtsá ndoñe šmondbobonshánama. <sup>43</sup> Atšna atšbe Taitabe cuenta sënjabo, y tšëngaftanga ndoñe quešmátsboše atše jofjana. Pero inya, cachabe cuenta tojabábioye cocayé aíñe šmatjofja. <sup>44</sup> Tšëngaftanga corente jésebošana, ínÿenga tšëngaftangbiama tšabá chamotsichámuama, y ínÿengbiama tšabá jtsichámuama; pero ndoñe ntsebošana chë nÿe canÿe Bëngbe Bëtsá tšëngaftangbiama cachcá chaotsichámuama. Chca šmojtsamëse, ¿ntšamo šmochtobena Bëngbe Bëtsábeñe jtsošbuáchiyana? <sup>45</sup> Ndoñe šmattsejuabnaye, atšbe Taitabe delante tšëngaftangbe contra atše chjayana ca ntšamo tšëngaftanga šmojtsamama. Tšëngaftanga tša jtsobátmanana atsebácanënga jtsemnama, chë ntšamo Moisesbe leyñe endayancá šmojtsamama; pero ndegombre, ntšamo cha tojayancá, cach tšëngaftangbe contra entsemna. <sup>46</sup> Tšëngaftanga, chë Moisés tojéftsanabema soyiñe šmojtsosbuachese, átšbeñnaca šmattsošbuáchiye, er cha atšbiama tojanábema. <sup>47</sup> Pero chë tojanábema soyiñe tšëngaftanga ndoñe šmontsošbuachesna, ¿ntšamo šmochjobenaye chë atše séntsichamo soyënguñe jtsošbuáchiyana ca?” —Jesús tojanéyana.

## 6

*Jesús shachna uaranga boyabásenga saná tojanacaredadó*

*(Mt 14.13-21; Mc 6.30-44; Lc 9.10-17)*

<sup>1</sup> Chë soyënga tojanopasá chentšana, Jesús chabe uatsjéundayëngaftaca tojána Galilea uafjónayе chenguana. Chë uafjónayna Tiberias cánaca inauabaina. <sup>2</sup> Ba entšanga imojtséstona, er chënga tmojáninÿe cha bëts soyënga jtsamana, šoquënga jtsashnayëse. <sup>3</sup> As Jesús tjoye tojánatsjua, y choca chabe uatsjéundayëngaftaca tojanótbema. <sup>4</sup> Ya judiëngbe canÿe fiesta, chë Bashco fiesta, yojétsobeco.

<sup>5</sup> Jesús tojanótbema ora, tojanontješé y tojánanÿe ba entšanga chábioye imojtsebëconaye. As Felípbioye tbojanianyana: —¿Ndayentše saná cuanjabuámiye nyetsca quem entšanga chamosama ca?

<sup>6</sup> Jesús chca tbojaniyana, ana Felípbioye jinýama ntšamo cha tabuanjojuama; er cach Jesús tšabá inatátšëmbo ndayá jamama. <sup>7</sup> Y Felipe tbojanjuá: —Ni mo uta patse denario crocenánaca nanjopódia tanděše jabuámiyama, nyetsca entsanga nye mo batsatémnaca chamuétsesama ca.

<sup>8</sup> Chorna, Jesusbe canýe uatsjendayá, Andrés ca uabainá, Simón Pédrēbe catšata, Jesús-bioye tbojaniyana: <sup>9</sup> —Muentše entsemna canýe básetema y cha shachna cebada tanděše y uta beónata entsebmna. Pero, ¿ndayase nye nyetšatema chēfta entsangbiamca ca?

<sup>10</sup> As Jesús tojánayana: —Entšanga méyana chamotbiamca ca.

Becá shácuana chē luariñe inamna, y nyetsca entsanga chiñe tmojanoshéntsjatbiamca. Chē entsanguentše shachna uaranga boyabásenga imojtsemna. <sup>11</sup> Chora Jesús, chē tanděše chabe cucuatšīne tojanca, y Bēngbe Bētsábioye chē tanděšama tbojtanchuá; y chabe uatsjéndayēnga tojanējatá, y chē uatsjéndayēngna nyetsca entsanga imojtsetbiámanēnga tmojanatšatá. Cachcá Jesús chē beónaca tojanma, y ntšamo entsanga imoianbošcá tmojanatšatá. <sup>12</sup> Nyetscanga tmojanse y tmojtanoshachá ora, Jesús chabe uatsjéndayēnga tojanéyana: —Chē ojamnētémēnga šmochtsatbananga, tondaye nye cachcá ntjēftsonýayama ca.

<sup>13</sup> As chēnga tmojanatbaná, y chē tmojanse shachna cebada tanděsentšana tojanójamēmēngaca, bnétsana uta sbarécua tmojanajutjé. <sup>14</sup> Chē entsanga quem bēts soye Jesús jamama tmojáninýe ora tmojánayana: “Ndegombre quem boyabása, chē quem luaroye jabama Bēngbe Bētsabe juabna jabóyebuambayama cha entsemna ca.”

<sup>15</sup> Jesús yojtsetátšëmbo entsanga chēngbe rey jabemama imojetsebošama. Chíyeca cach tjoye tojtsaisanoñe canýa jtsomñama.

*Jesús bėjaye juatsbuacá yojtsaye*

*(Mt 14.22-27; Mc 6.45-52)*

<sup>16</sup> Tojanibétata ora, Jesusbe uatsjéndayēnga chē uafjónayoye tmojantsmá; <sup>17</sup> barquēshañe tmojtanenojayé, y tmojanontšé jenashbuachénguana, chca, Capernaumoca jenbocnama. Ya íbeta yojtsemna, y Jesús cabá ndoñe chēngbioye ntashjanguana. <sup>18</sup> Chca imojtsenashbuachñējuana orna, chē bėjayiñe jabuache binýia tojanóshjango y bēts olēshēnga chē barquēshoye yojtsójantšetaye. <sup>19</sup> Shachna o chnénguana kilómetro chēnga tmojána ora, tmojáninýe Jesús chēngbioye yojtsebéconaye, bėjaye juatsbuacá yojtsaye. Chēnga chca tmojáninýe ora tša tmojanocochauatjaná, <sup>20</sup> pero Jesús tojanéyana: “Atše sēndmēna; ndoñe matauatjēngana ca.”

<sup>21</sup> Chora chē uatsjéndayēnga oyejuayēnga imojtseboše Jesús chē barquēshoye jofjana, y ndoñe bēnēntscose ya chē imojtsaye luaroye tmojánashjajna.

*Entšanga Jesús tmojánguango*

<sup>22</sup> Yēfsana, nyetsca entsanga, chē uafjónayoye chenguánoica tmojanoquedanga tmojáninýe, chē inýe yēfsana chē nye canýe barquēsha yojuamnēshañe Jesusbe uatsjéndayēnga tmojtsanoñama, y Jesús chēngaftaca ndoñe tonjánama. <sup>23</sup> Pero chēntscuana, Tiberias pueblentšana inýe barquēshangá tojanáshjajna canýe luarentše, chē Bēngbe Utabná Jesús chabe Taitábioye tbojtanchuá chentšana, entsanga saná tmojanse luare béconana. <sup>24</sup> Asna, ni Jesús ni chabe uatsjéndayēnga chentše ndoñe montsemnama chē entsanga tmojáninýe ora, chē barquēshangañe tmojtanenojayé y Capernaumoye tmojána Jesús jetsenguanguama.

*Jesús, chē nyetsca tescama yomna tšabe vida jtsebmnama tanděše*

<sup>25</sup> Chē uafjónayoye chenguánoye tmojánashjajna ora, Jesús tmojáninýena y mēntšá tmojantjá: —¿Buatēmbayá, ntseco ora muentše tcojáshjango ca?

<sup>26</sup> Y Jesús tojanéyana: —Ndegombre cbéyana, tšēngaftanga ndoñe atše quešmatsnguá, chē bēts soyēnga tijamama, sinó nye chē jtoshachaye nyetšá tanděše šmojasama.



<sup>27</sup> Ndoñe matenángmenana chë nye ndoñe bën y jopochócana sanama; chë ndmopochócaye saná, chë nyetsca tescama yomna tšabe vida jtsebomnama saná šmochjánguango. Chë saná, Bëngbe Bëtsá Entšá tbojanbemá cmochanjátšataye, er Bëngbe Bëtsá chë Taitá tonjinñanýé, tšabe soyéngaca, cha chábioye tbojuábuayanama ca —tojánayana.

<sup>28</sup> Chora chë entsanga tmojantjá: —¿Ndayá fchjama ntšamo Bëngbe Bëtsá yojtsebošcá chaotsemnama ca?

<sup>29</sup> Chca tmojantjá ora, Jesús tojanéyana: —Chë Taitá entseboše tšëngaftanga chabe ichmonábeñe chašmotsošbuáchema ca.

<sup>30</sup> Chora chënga tmojaniana: —¿Ndaye tšabe soye cochjama acbe obenana bënga jinñanýiyama ca? Chë soye chaftsjinýeše, ácebeñe fchantsošbuáchiye. ¿Bëngbiana taicochjama ca? <sup>31</sup> Bëngbe tempsca bëts taitanga entsanga ndoyenoca maná ca uabaina saná tmojanse. Bëngbe Bëtsabe uabemana palabrenguiñe mëntšá endayana: “Cha celoca tandëše tonjanatšatá chamosama ca” —chënga tmojánayana.

<sup>32</sup> Chora Jesús tojanéyana: —Ndegombre cbéyana, Moisés chënga ndoñe chë celoca tandëše tonjanatšatá; Bëngbe Bëtsá Bëngbe Taitá chëngbiye tojanatšatá chë maná ca uabaina tandëše; y cha endmëna nda celocana chë ndocna te ndmopochócaye tandëše ndegombre cmondatšatná. <sup>33</sup> Er Bëngbe Bëtsábíocana tandëše entsemna chë celocana tojastjanguá; y cha quem luare entsangbiana entsama chë nyetsca tescama yomna tšabe vida chamotsebomnama ca —cha tojanéyana.

<sup>34</sup> Chora chënga tmojanimpadá: —Taita, chë tandëše sempre šcochtsatšatnaye ca.

<sup>35</sup> Y Jesús tojanéjua: —Atše sëndmëna entsanga chë nyetsca tescama yomna tšabe vida jtsebomnama tandëše. Nda atše chašojtséstona, sempre oyejuayá echanjéftsemna y Bëngbe Bëtsabe soyënga nyets tempo echanjesóbomñe, mo nda nyets tempo saná totsobomñcá, y ndocna te tbontsishëntsancá. <sup>36</sup> Pero ntšamo ya tcbonjauyancá, tšëngaftanga atše šmonjinýe y cabá ndoñe átšbeñe quešmatošbuaché. <sup>37</sup> Nda atšbe Taitá atšbiana tbojabocacá, cha atše šochantséstona; y nda átšbioye šojtséstona, átšbentšana quichtëtábocna. <sup>38</sup> Er atšna celocana sënjabo chë šojichmó cha ntšamo yojtsebošcá jamama, y ndoñe nye ntšamo atše stsebošcá. <sup>39</sup> Y chë šojichmó cha entseboše, ni mo canýa chë atšbiana tojabacacá chentšana, atše chailesenciá pochocaná chaotsemnama; y quem luare jopochócama tena, nyetscanga atšbiana tojabacacangbiana chámuatayenama atše chaimama. <sup>40</sup> Er atšbe Taitá entseboše, nda chabe Uaquiñábioye tbojinýe y chábeñe tojtsošbuaché, chë nyetsca tescama yomna tšabe vida chaotsebomna, y quem luare jopochócama tena, cha cháuatayenama atše chaimama ca —Jesús tojanéyana.

<sup>41</sup> “Atše séntsemna chë celocana tojóshjango tandëše ca” Jesús tojanéyana causa, chë judiënga tmojanontšé chabiana podesca ichámuana. <sup>42</sup> Chënga mëntšá imojtsichamo: —¿Mua ndoñe Jesús yondmëna, chë Josebe uaquiñá? Chabe bëtsétsata bënga tmotsábutmñe. ¿Ntšamo cha mora yochjátichamo celocana tojástjango ca?

<sup>43</sup> As Jesús tojanéyana: —Atšbiana ndoñe podesca matichámuana. <sup>44</sup> Ndocná quenátobena atše juastana, chë Taitá, chë šojichmó cha, ainaniñe chca chaotsebošama ndoñe tbonjuajabuáchëse; y atše chanjama cha cháuatayenama quem luare jopochócama te. <sup>45</sup> Chë tempsquënga Bëngbe Bëtsabe juabna oyebuambnayënga mëntšá tmojanábema: “Cach Bëngbe Bëtsá nyetscanga echanjabuatambá ca.” Chcasna, nda atšbe Taitábioye tbojoyeuná, y ntšamo chë Taitá tbojabuatëmbacá tojuatsjinýe, cha atše šochanjuasto.

<sup>46</sup> “Ndocná atšbe Taitá tbojinýe. Nýe chë Bëngbe Bëtsábíocana tojabá añe. <sup>47</sup> Ndegombre šcuayana: Nda átšbeñe tojtsošbuaché, chë nyetsca tescama yomna tšabe vida echántsebomna. <sup>48</sup> Atše sëndmëna entsanga chë nyetsca tescama yomna tšabe vida chamotsebomnama tandëše. <sup>49</sup> Masque tšëngaftangbe bëts taitanga, entsanga ndoyenoca chë maná ca uabaina saná tmojanse, pronto tmojanóbana. <sup>50</sup> Pero atše séntsoyeuambná ndayá chë celocana tojóshjango tandëšama. Nda chë tandëše tojase, ndoñe queochatóbana. <sup>51</sup> Atše séntsemna entsanga chë nyetsca tescama yomna tšabe

vida jtsebomnama tandëse, chë celocana tojóshjanguëse. Nda quem tandëse tojase, nyetsca tescama nye ainá echanjesomñe. Chë chanjátšataye tandëšna, cach atšbe cuerpo entsemna. Chca chanjama quem luare entsanga chë nyetsca tescama yomna tšabe vida chamotsebomnama ca” —Jesús tojánayana.

<sup>52</sup> Chora chë judiënga tmojanontšé enatsëtsnayana: —¿Ntšamo cha yochjobenaye cachabe cuerpo jatšatayana bënga jasama ca?

<sup>53</sup> As Jesús tojanéyana: —Ndegombre šcuayana: Tšëngaftanga Bëngbe Bëtsá Entšá tbojanbemabe cuerpo ndoñe šmonjase y chabe buiñe ndoñe šmonjofšese, ndegombre tšabe vida ndoñe quešmochátsbomna. <sup>54</sup> Nda atšbe cuerpo tojase y atšbe buiñe tojofšé, chë nyetsca tescama yomna tšabe vida echántsebomna, y quem luare jopochócama te atše chanjama cha cháuatayenama. <sup>55</sup> Atšbe cuerpo ndegombre saná endmëna, y atšbe buiñe ndegombre ofšëšnayiye. <sup>56</sup> Nda atšbe cuerpo tojase y atšbe buiñe tojofšé, átšeftaca cányiñe mo canýacá echántsemna, y átšnaca cháftaca. <sup>57</sup> Atšbe Taitá, chë šojichmó cha, vida endbomna, y atše chábeyeca vida séndbomna; cachcá, nda atšbe cuerpo tojase, chana átšbeyeca vida jtsebomnana. <sup>58</sup> Chë ndaye soyama atše sëntsoyebuambná, atšbe cuerpo y atšbe buiñe, entsemna chë celocana tojóshjango tandëse. Masque tšëngaftangbe bëts taitanga chë maná ca uabaina tandëse tmojanse, pronto tmojanóbana; pero quem tandëse ndoñe cachcá quenátsmëna. Nda quem tandëse tojase, nye nyets tempo vida echanjesóbomñe ca —Jesús tojánayana.

<sup>59</sup> Chë soyëngna Jesús tonjanabuatambá Capernaum pueblentšë, chë judiëngbe ene-fjuana yebnentšë.

*Chë nyetsca tescama yomna tšabe vida jtsebomnana palabrénga*

<sup>60</sup> Chca tmojanuena ora, banga Jesusbe ústonënga imojtsichamo: —Ntšamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

<sup>61</sup> Jesús yojtsetátšëmbo chënga ndoñe tšabá imontsichámuama; as, chënga tojanatjá: —¿Ntšamo cbontsëtsësnacá ndoñe tšabá cmontsëuenana ca? <sup>62</sup> Y chcasna, Bëngbe Bëtsá Entšá tbojanbemá, chë cha tempo inamna luaroye tojétsstjuama šmojinýese, ¿ntšamo šmattsejuabnaye? <sup>63</sup> Bëngbe Bëtsabe Espíritu entsama entsanga chë tšabe vida chamotsebomnama. Chë cuerpo ndoñe uámana soye quenátsmëna; chë tcbonjúyana soyënguiñe entsemna chë Uámana Espíritbe uajabuáchenana y chë tšabe vida. <sup>64</sup> Pero masque chca entsemna, tšëngaftangbentšana banga átšbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entsanga jábuayenama Jesús tojanbojatšé orscana, cha inatátšëmbo ndëmuanýenga chábeñe ndoñe mochanjanošbuáchiye, y nda chë uayayëngbe cucuatšíñe yochjéftsayentšbashejuana. <sup>65</sup> Y Jesús yojtëtóntša oyebuambnayana: —Chíyeca, atše tšëngaftanga tcbonjúyana: “nda atše juastama ainaniñe chaotsebošama atšbe Taitá ndoñe tbonjuájabuache, cha ndoñe quešochatasto ca”.

<sup>66</sup> Chë causa, chentšana, ba chabe ústonënga cachcá tmojesanonýá, y cháftaca ya ndoñe imontsajna. <sup>67</sup> Chora Jesús, chë bnétsana uta uatsjëndayënga tojanéyana: —¿Y tšëngaftángnaca, jtsoñama y atše jéseboshjonama šmojtseboše ca?

<sup>68</sup> Chora Simón Pedro tbojanjuá: —Bëngbe Utabná Jesús, ¿chcasna ndábioye fchjanga ca? Nye aca šcontsëtsësná chë nyetsca tescama yomna tšabe vida jtsebomnama palabrénga. <sup>69</sup> Aceñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná comnama ca.

<sup>70</sup> Chora Jesús tojanéyana: —Atše tcbonjabacacá, chë bnétsana útata; pero canýa tšëngaftanguentšana, mo Satanasbe canýe trabajayacá entsemna ca.

<sup>71</sup> Judas Iscariote, chë Simonbe uaquiñabiama chca Jesús tojánayana. Er chana masque canýa chabe bnétsana uta uatsjëndayënguentšá inamna, Jesús uayayëngbe cucuatšíñe yochjáftsayentšbashejuana.

## 7

*Jesusbe catšátanga chábeñe ndoñe montsanošbuaché*

<sup>1</sup> Chë soyënguentshana, Jesús Galilea luarëjana yojánana. Chë tempo, judiënga imojt-sanjuabnaye ntšamo jamëse cha jóbama. Chíyeca, Jesús ndoñe yontseboše Judeoye jama. <sup>2</sup> Chora, judiëngbe canye bëts fiesta semana yojtsobeco. Quem fiestënguentscuana, chë judiënga imojanamana tambënguiñe jtsiyenana. <sup>3</sup> As chora Jesusbe catšátanga tmojaniana: —Muentše ndoñe catjoquéda; Judeoye motsa, choca condbomna ústonënga, ntšamo contsamcá chócnaca chaminýama. <sup>4</sup> Er nda tojtseboše chamotsábuatmama, chabe soyënga ndoñe iytëcana ntsamana. Aca bëts soyënga Bëngbe Bëtsabe obenánaca contsamësna, motsa y nyetscangbe delante chca cochjama ca —chënga tmojaniana.

<sup>5</sup> Er ni mo cach Jesusbe catšátanga chábeñe ndoñe montsanošbuaché. Chíyeca chënga chca tmojaniana.

<sup>6</sup> Chora Jesús tojanéjua: —Atšbe ora cabá ndoñe quentóshjango, pero tšëngaftangbiana mocna órnaca tšabá endëtsomñe. <sup>7</sup> Chë nye quem luarama enójuabnaye entšanga ndoñe quemátobena tšëngaftanga jtsébuayënjana, pero átšbioyna aïñe, er atše puerte tšabá sentsinýanýná ntšamo chënga imojtsamcá ndoñe tšabá yontsemnama. <sup>8</sup> Tšëngaftanga chë fiestama šmochjá. Atšbe ora cabá ndoñe quentóshjango. Chíyeca atše choye ndoñe quicháta ca —cha tojánayana.

<sup>9</sup> Jesús chë soyënga tojanéyana y cach Galileoca tojtsanoquedañe.

*Chë tambënguiñe jtsiyenama fiesta*

<sup>10</sup> Chabe catšátanga chë fiestoye tmojána chentšana, Jesúsnaca tojána, masque ndoñe entšángbeñe, sinó mo iytëcana cuenta. <sup>11</sup> Chë fiestocna, judiënga Jesús imojtsenguaye y imojtsichamo: —¿Ndayentše chë boyabása yojtsemna ca?

<sup>12</sup> Entšángbeñe ba soyënga chabiana iytëcana imojtsichamo. Inyënga chabiana imojtsichamo: “Cha tšabia endmëna ca”; pero ínýengna: “Cha entšanga entsaíngña ca”.

<sup>13</sup> Pero ndocná Jesusbiana beca añémoca yontsoyebuambná, chë judiëngbe amëndayëngbiana imojtsauatja causa.

<sup>14</sup> Chë fiesta semana tséntsañe yojtsó ora, Jesús Bëngbe Bëtsabe bëts yebnentše tojánamashëngo, y tojanontsé jabuátambana. <sup>15</sup> Chentše chë judiënga, ntšamo Jesús tojanabuatambacá tmojanuena ora, ojnánánënga imojtsichamo: —Bëtscá ntjuatsjinýcá, ¿ntšamo nyetšá nantsetátšëmbo ca?

<sup>16</sup> As Jesús tojanéjua: —Atšbe buatëmbayana ndoñe nye átšbentšana quenatóbocana, ndayá chë šonjichmó chábentšana. <sup>17</sup> Nda tojtseboše jamama ntšamo chë šojichmó cha yojtsebošcá, cha echántsetatšëmbo atšbe buatëmbayana Bëngbe Bëtsábiocana yóbo-canama o nye átšbentšana. <sup>18</sup> Nda nye cachabe juábnaca tojtsoyebuambná, jtsebošana entšanga más bëtsá chamobemama; pero nda bëtscá tojtsama, chë tbojichmóbioye entšanga más bëtsá chamobemama, cha cocayé ntšamo ndegombre yomncá jtsóyebuambnayana, y ndocnábioye ntseíngñayana.

<sup>19</sup> “Ndegombre, Moisés tšëngaftangbiana ley tojëftsanaboshjona. Pero masque chca, tšëngaftanguentsá ndocná quenátama ntšamo cha tojëftsanmandacá. Y ¿ndáyeca šmojtseboše atše jóbama ca?” —Jesús tojanatjá.

<sup>20</sup> Chora entšanga tmojanjúá: —¿Ndegombre aca bacna bayëjbe juabna contsambá! ¿Nda yojtseboše aca jóbama ca?

<sup>21</sup> Chora Jesús tojanéyana: —Nyetsca tšëngaftanga ojnánánënga atše šmontsonýá, atše canye ochnayté canye entšá tijashnama. <sup>22</sup> Pero, Moisés tcmónjanamëndá básetema base bobachtema chë más delicadentše jatëtšana, chaotsinýnama (ndoñe nye Moisésbeyeca chca, sinó Moisesbiana más tempsca bëts taitanga chca jamama imojanamánayeca); y tšëngaftanga canye básetema base bobachtema chë más delicadentše jatëtšana, masque chë te canye ochnayté totsomñëse. <sup>23</sup> Y mora, ntšamo Moisés tcmojëftsanamëndacá ndoñe cachcá ntjonýayama, canye básetema chca jatëtšana masque

ochnayté; as, ¿ndáyeca atše šmojtsayaná, atše ochnayté canye entšabe nyets cuerpo tijashnama? <sup>24</sup> Nye batšá jinýese, ínýengbiana ndoñe matichámèngana tšabá o ndoñe tšabá tmonjama ca. Ntšamo chë soyènga ndegombre bétsemnama natsana lempe tšabá jshétsetatšëmbe, šmochjayana tšabá o ndoñe tšabá tmonjama ca —Jesús tojánayana.

#### *Jesús tojánayana ndémocana cha tojánabama*

<sup>25</sup> Chora báseftanga Jerusalenoca oyenènga tmojanontsé ichámuana: —¿Mua ndoñe yontsemna chë jóbama montsenguá cha ca? <sup>26</sup> Masque ba entšangbe delante entsoyebuambná, ndocná chábioye ndocá ntjauyanana. ¿Nderado mo chë bèngbe améndayènga imojtsejuabná cha chë Cristo, chë Uámana Uabuayaná yojtsemna ca? <sup>27</sup> Pero bènga mondétatšëmbo ndémocá quem boyabása yomnana; y chë cuenta, chë Cristo chaojabo ora, ndocná queochátstatšëmbo ndémocana cha yochjabama ca —chènga imojtsichamo.

<sup>28</sup> Chca tojanuena ora, Bèngbe Bètsabe bèts yebnentše Jesús yojtsabuátambayèntscuana, cha jabuache tojánayana: —¿Tšèngaftanga šmojtsejuabná atše ndegombre šmabuatma, y ndémocana tijabama šmojtsetátšëmbo ca! Pero nye atšbe cuenta, ndoñe chiyátabo, ndayá canya šojichmóyeca, nda ntšamo ndegombre yomncá nyetsca soyèngama endbétsoyebuambnaye; y tšèngaftanga cha ndoñe quešmatábuatma. <sup>29</sup> Atšna aíñe cha sènduábuatma, er atše chábentšana sènjabo y cha quem luaroye šonjichmó ca —Jesús tojánayana.

<sup>30</sup> Jesús chca tojánayana ora, chènga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjanóshjango. <sup>31</sup> Banga chentše Jesúsbeñe imojtsanošbuaché y tmojánayana: “Chë Uámana Uabuayaná chaojabo ora, ¿quem boyabásabiama más tšabe soyènga yochjama ca?”

#### *Chë fariseunga tmojánbošena Jesús jishachama*

<sup>32</sup> Chë fariseunga tmojántatšëmbona ntšamo entšanga Jesusbiana iytécana imojtsencuéntaye. As, chènga y chë bachnangbe améndayènga tmojanichamó báseftanga Bèngbe Bètsabe bèts yebnoca josticiènga, Jesús chamuishachama. <sup>33</sup> Chora Jesús tojánayana: “Muentšana nye baseftayté tšèngaftangafaca chanjéftsemna; chentšana, chë šojichmó chábioye chanjètpadésa. <sup>34</sup> Chora tšèngaftanga atše šmochántseenguaye, pero ndoñe quešmochátinýena; y ndayentše chántsemnoca ndoñe quešmochatobenaye jashjanguama ca.”

<sup>35</sup> Chora chë judiènga tmojanontsé entjanayana: “¿Ndémoye quem boyabása yochjá, y bènga ndoñe mochanjobenaye jinýenama ca? ¿Inýe fshantsèngoye, judiènga tmojuashanèngbioye yochjá, y choca chë ndoñe judiènga yochjabuatambá? <sup>36</sup> ¿Ntšamo yojtsentšáyana cha šonjauyancá, chë ‘tšèngaftanga atše šmochántseenguaye, pero ndoñe quešmochátinýena; y ndayentše chántsemnoca ndoñe quešmochatobenaye jashjanguama ca?’” —chènga imojtsichamo.

#### *Béjayènga vida bomniye*

<sup>37</sup> Chë fiesta jopochócama te yojamna chë más uámana te. Chë te, Jesús entšángbentše tojantsá y jabuache tojánayana: “¿Nda tbojtsajuendá, átšbioye chauabo y chaofsé! <sup>38</sup> Ntšamo Bèngbe Bètsabe uabemana palabrènguiñe endayancá: ‘Nda átšbeñe tojtsobuaché, cha echántsemna mo ndabe ainanentšana vida bomna béjayènga tojtsobocancá.’ Chca echántsemna átšbeñe ošbuáchiyèngbiana ca” —cha tojánayana.

<sup>39</sup> Chë sóyeca, Jesús yojtseboše jayanana, chábeñe ošbuáchiyènga chë Uámana Espiritu mochjanóyèngacñe ca; er chë Uámana Espiritu cabá ndoñe tonjánabo, Jesús corente bétšá yojamnana cabá ndoñe tmonjaninýinýe causa.

#### *Nyetsca entšanga ndoñe cachcá Jesusbiana imontsejuabnaye*

<sup>40</sup> Chca tojanuena ora, ínýenga imojtsichamo: —Quem boyabása ndegombre chë Bèngbe Bètsabe juabna oyebuambnayá entsemna, chë Cristbe natsana jabamá ca.

<sup>41</sup> Inyenga imojtsichamo: —Ndegombre cha chë Cristo, chë Uámana Uabuayaná entsemna ca.

Pero ínÿengna: —Ndoñe, er chë Cristo Galileocana ndoñe queochátabo. <sup>42</sup> Ndegombre, Bëngbe Bëtsabe uabemana palabrënguine endayana, chë Cristna rey Davídbentšana entśá canmëna, y Belenocana caochjabo ca, cach pueblocana ndayentśá David inamna ca —chënga imojtsichamo.

<sup>43</sup> Y chca, ínÿengna Jesusbe pavor imojtsemna, y ínÿengna chabe contra. <sup>44</sup> Inyenga imojtseboşe Jesús jishachama, pero ndocná tbonjánishache.

### *Chë amëndayënga Jesúsbeñe ndoñe montsanoşbuaché*

<sup>45</sup> Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnocá josticiënga tmojtanashjajna ora, tmojanatjá: —¿Ndáyeca ndoñe Jesús şmonjuánatse ca?

<sup>46</sup> Chora chë josticiënga tmojanéjua: —Ndocná quenatoyebuambná ntşamo chë boyabása tonjoyebuambacá ca.

<sup>47</sup> Chora chë fariseunga tmojanéyana: —¿Tşëngaftángnaca şmojalesenciá cha chacmaingñema ca? <sup>48</sup> ¿Nderado bëngbe amëndayënguentsá o bënga fariseunguentśá nÿe mo canÿa chábeñe tajojtsoşbuaché? <sup>49</sup> Pero quem entşanga, ntşamo leyiñe iuayancá nduabuátmënga, bacna soyëngaca sempre mochanjëftsemna ca —chënga imojtsichamo.

<sup>50</sup> Chora Nicodemo, canÿa fariseunguentśá, chë Jesúseftaca jencuéntama ibeta tojána cha, tojánayana: <sup>51</sup> —Ntşamo bëngbe leyiñe endayancá, bënga ndoñe quemuátobena jayanana canÿe entśá castiganá jtsemnama ibojtsemna ca, cha cabá ntjoyeunaycá, ndayá cha tojamama jtsetatşëmbuama ca.

<sup>52</sup> Chora chënga Nicodemo tmojanjúá: —¿Acnaca chábeñe cojtsoşbuaché y mo canÿe Galileoca entśacá cojtsejuabná ca? Bëngbe Bëtsabe uabemana palabrënguine cochjuatsjinÿe, y cochanjinÿe ni canÿa Bëngbe Bëtsabe juabna oyebuambnayá Galileocana yochjabo ca.

### *Chë shema boyábioye ínÿaftaca ingñayá*

<sup>53</sup> Fariseunga y bachnangbe amëndayënga chë josticiëngbioye tmojanëcácanentšana, cada ona cachabe yebnoye imojtsatónënga.

## 8

<sup>1</sup> Pero Jesusna canÿe tjoye, Olivos ca uabáinoye tojtsanoñe. <sup>2</sup> Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Nÿetsca entşanga tmojanobeconá joudenama, y Jesús tojanótbema y tojanontşé jabuátambama.

<sup>3</sup> Chorna, bášeftanga ley abuátambayënga y fariseunga tmonjánashjajna, y canÿe shembása tmojanëshjango. Chana tmojáninÿena chabe boyábioye ínÿaftaca ibnetsoíngñañëntscuana; nÿetscangbe tsëntsaca tmojanatsá, <sup>4</sup> y Jesús tmojanianyana: —Buatëmbayá, quemuá fsënjínÿena chabe boyábioye ínÿaftaca bondëtsoíngñañëntscuana. <sup>5</sup> Leyiñe Moisés şonjanamëndá mëntśá uamana shembásengna ndëtşbëngaca jtsëbáyama. ¿Aca ntşamo catjayana ca?

<sup>6</sup> Jesús chca tmojanianyana ana jisháchichiyama, chca chënga jtsebomnama ndáyeca chabe contra jayanana. Pero Jesús nÿe fshantsoye yojotsejbéna y yojóntşa ntşabuáfjaca fshantsiñe juabemama. <sup>7</sup> Chënga nÿe imojtsetjanaye causa, Jesús tojantsbaná y tojanéyana: —Nda tşëngaftanguentsá tondaye bacna soyënga tondbomná, chaobojatşé ndëtşbeca jatëchënjama ca.

<sup>8</sup> Chentšana Jesús cachiñe fshantsoye yojtotsejbéna, y yojtëtóntşa fshantsiñe jtëtabemama. <sup>9</sup> Chca tmojanuena ora, entşanga tmojanontşé canÿánÿa chentšana jésebocanana; natsana chë más bëtsanánënga y chë ínÿengna ústonoye. Canÿa Jesús tonjanoquedá y chë shembásanaca. <sup>10</sup> As, Jesús tojtantsá y tbojantjá: —¿Shembása,

ndayentše chë acbe contra ichámënga imojtsemna? ¿Ndocná acbiama tonjayana castiganá chacotsemna ca?

<sup>11</sup> Ndoñe, Taita, ndocná ca —chë shembása tbojanjuá.

Chora Jesús tbojaniana: —Atše cach ndoñe acbiama quichátayana castiganá chacotsemna ca. Morna, motsatoñe, pero ndoñe más bacna soye cattsama ca.

*Jesús yomna quem luarentša entsangbe juabna binynayá*

<sup>12</sup> Jesús cachiñe Bëngbe Bëtsabe bëts yebnentše yojtسابuatambaye, y entsanga mëntšá tojanéyana: —Atše sëndbínýna quem luare entsangbe juabnënga. Nda atše chašojtsés-tona, cha echantsiyena atše chë binynayáftaca; y ndoñe mo ibetiñcá queochátaye, y chca, tšabe vida echántsebomna ca.

<sup>13</sup> Chora chë fariseunga Jesús tmojaniana: —Aca nýe cach acbiama chca contsoye-buambná; chcana, chë ntšamo contsichamcá tondaye quenatámana ca.

<sup>14</sup> As chora Jesús tojanéjua: —Ntšamo cach atšbiama sentsichamcá aíñe entsámana, masque nýe atše stsichamo ntšamo atšbiama ndegombre yomncá. Er atše sëndétatšëmbo ndémocana tijabo y ndémoye tstsá. Pero tšëngaftanga ndoñe chca quešmatstatšëmbo. <sup>15</sup> Tšëngaftanga šmondbëtsichamo ínýengbiama tšabá o ndoñe tšabá tmontsamama, chca, nýe ntšamo entsanga mondbetsejuabnáyá. Pero atšna ndocnabiama chca quetsátichamo. <sup>16</sup> Atše ndoñe nýe canýa quetsátsmëna ínýabiama jayanama tšabá o ndoñe tšabá tontsamama; ndayá atšbe Taitá, chë šonjichmó cha, átšeftaca chca jayanana. Chíyeca, atše ínýabiama tšabá o ndoñe tšabá tonjama ca stsichamo ora, ntšamo stsichamcá ndegombre jtsemnana. <sup>17</sup> Tšëngaftangbe leyiñe enduábemana, uta entsáta ndayámnaca cachcá tbojayanëse, ntšamo chata tbojayancá puerte jtsámanana ca. <sup>18</sup> Y morna, atše séntsichamo chë ntšamo cach atšbiama ndegombre yomncá, y atšbe Taitá, chë šonjichmó chánaca entsichamo ntšamo atšbiama ndegombre yomncá ca —Jesús tojánayana.

<sup>19</sup> Chora chënga tmojantjá: —¿Ndayentše acbe Taitá yojtsemna ca?

Y Jesús tojanéjua: —Tšëngaftanga ndoñe quešmatábuatma ni atše ni atšbe Taitá. Atše šmojtšábuatmësna, atšbe Taitánaca šmattsábuatma ca.

<sup>20</sup> Bëngbe Bëtsabe bëts yebnoa, chë crocénana jacjayama luarentše yojtسابuatambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoñe ora tonjanóshjango.

*“Chë chanjá luaroye, tšëngaftanga ndoñe quešmatobena jama”*

<sup>21</sup> Chora Jesús yojtëtóntša oyebuambnayana: —Atše chantá, y chora tšëngaftanga atše šmochántseguaye. Masque chca, šmochanjóbana tšëngaftangbe bacna soyëngama ndëperdonánënga. Chë chanjá luaroye, tšëngaftanga ndoñe quešmatobena jama ca — Jesús tojánayana.

<sup>22</sup> Chora chë judiënga tmojanontsé enatsëtsnayana: —¿Mo nderado yojtsejuabná jtsenóitanama, y chíyeca yojttsichamo chë cha yochjá luaroye bënga ndoñe montsobena jama ca?

<sup>23</sup> Chora Jesús tojanéyana: —Tšëngaftanga quem luaroquënga šmondmëna; atšna tsbananocá, celocá sëndmëna. Tšëngaftanga nýe quem luarama enójuabnáyënga šmondmëna, pero atše ndoñe. <sup>24</sup> Chíyeca atše chca tcbonjáuyana, chë “tšëngaftangbe bacna soyëngama ndëperdonánënga šmochanjóbana ca”. Er, nda atše ndegombre bëtsemnama ndoñe chašmontsošbuachese, tšëngaftangbe bacna soyëngama ndëperdonánënga šmochanjóbana ca.

<sup>25</sup> Chora chënga tmojantjá: —¿As aca ndase cmëna ca?

Y Jesús tojanéyana: —Entšanga jabuatambama sënjanbojatšé orscana chama tcbonjáuyana. <sup>26</sup> Atše ba soyënga séntsebomna tšëngaftangbiama jayanama, tšëngaftangbe

contra jayanama; pero chë šonjichmó cha nyetsca soyëngama ndegombre endbét-sichamo, y atšna ntšamo chábensana tijouencá, cachcá quem luare oyenënga sentsët-sëtsná ca —cha tojanéyana.

<sup>27</sup> Pero chënga ndoñe tonjanësertá Jesús cachabe Taitabiama chca tojanéyanama. <sup>28</sup> As Jesús tojanéyana: —Bëngbe Bëtsá Entšá tbojanbemá chašmojatsbaná ora, šmochántsetatšëmbo nda sëndmëná atše bétsemnana. Cachcá, tšëngaftanga šmochántsetatšëmbo, nje cach atšbe juábnaca atše tondaye jamama sëndobenama. Nje ndayá atšbe Taitá šojabuatëmbacá atše sëndoyebuambná. <sup>29</sup> Y chë šonjichmó cha ndoñe nje canya quešnátsboshjuana. Chca endmëna, er atše sempre sëndbëtsama ntšamo cha oyejuayá jabemama tojtsemncá ca —Jesús tojánayana.

<sup>30</sup> Jesús chca tojánayana ora, banga chábeñe imojtsanošbuaché.

*Bëngbe Bëtsabe básenga y chë nje bacna soye jtsamama vida bomnënga*

<sup>31</sup> Chora Jesús, chë chábeñe imojtsošbuaché judiënga tojanéyana: —Ntšamo cbontsët-sëtsnacá tšëngaftanga sempre šmojtsamëse, ndegombre atšbe uatsjëndayënga šmochántsemna. <sup>32</sup> Ntšamo ndegombre yomncá šmochántsetatšëmbo; y ntšamo ndegombre yomncá jtsetatšëmbëse, atsebácanënga šmochántsemna ca.

<sup>33</sup> Chora chënga tmojanjuá: —Bëngna Abrahámbentšana entšanga fsëndmëna, y ndocná ndocna te chešnáisishëche nje chabiamana nyets tempo jtsoservënama. As, ¿ndáyeca šcojtsëtsëtsná bënga atsebácanënga fchtsemna ca?

<sup>34</sup> Chora Jesús tojanéyana: —Ndegombre šcuayana: Nda bacna soyënga tojtsama, cha nje bacna soyënga jamama juabnéngaca mandaná jëftsemnana. <sup>35</sup> Canye oservená ndoñe nyets tempo chë pamillentšá ntjëftsemnana, ntšamo canye uaquiñá siempre chë pamillentšá jesomñancá. <sup>36</sup> Y chca, Bëngbe Bëtsabe Uaquiñá chacmo-játsebacase, tšëngaftanga ndegombre atsebácanënga šmochántsemna bacna soyënga juabnénguentšana. <sup>37</sup> Atše sëndétatšëmbo tšëngaftangna Abrahámbentšana entšanga šmomnana; pero tšëngaftanga šmontseboše atše jóbama, ntšamo atše cbontsët-sëtsnacá ainaniñe jýyëngacñama ndoñe quešmátsboše causa. <sup>38</sup> Ntšamo atšbe Taitábioca tijinýcá, cach soyëngama atše sëntsoyebuambná. Tšëngaftangnaca, cachcá ntšamo tšëngaftangbe taitábentšana šmojouencá šmontsama ca —tojanéyana.

<sup>39</sup> Chora chënga tmojanjuá: —Bëngbe uámana bëts taitá, Abraham endmëna ca.

As Jesús tojanéyana: —Tšëngaftanga Abrahambe básenga ca jtsabáinama merecido šmojtsebuajónëse, chë ntšamo Abraham tojëftsema y cachcá tšëngaftanga šmattsama. <sup>40</sup> Atšna ntšamo ndegombre yomncá sëndoyebuambná, ntšamo Bëngbe Bëtsábentšana tsouenancá. Pero mora tšëngaftanga šmontseboše atše jóbama; Abraham ndocna te chca chenaisobuachjanguá. <sup>41</sup> Tšëngaftangna, ntšamo tšëngaftangbe taitá tojëftsemcá y cachcá jtsamana ca —Jesús tojánayana.

Chora chënga tmojanijana: —Bënga nje enaquécana básenga ndoñe queftsátsmëna. Chë nje canye taitá fsëndbomná, Bëngbe Bëtsá endmëna ca.

<sup>42</sup> Chora Jesús tojanéyana: —Bëngbe Bëtsá ndegombre tšëngaftangbe taitá tojtsemnëse, tšëngaftangna atše šmattsebobonshana. Er atšna, Bëngbe Bëtsábiocana sënjabo y muentše sëntsemna. Nje atšbe ponto ndoñe chiyátabo; Bëngbe Bëtsá šonjichmó. <sup>43</sup> ¿Ndayeca tšëngaftanga ndoñe šmontsobena atšbe palabrenga josértana? Co, ntšamo cbontsët-sëtsnacá joyeunayama ndoñe quešmátsboše causa chca. <sup>44</sup> Tšëngaftangbe taitá Satanás endmëna. Tšëngaftangna chabe entšanga šmondmëna; chíyeca, tšëngaftanga šmontseboše jamama cachcá ntšamo cha tojtsebošcá. Quem luare jobojátšama orscana, Satanás entšá obanayá endmëna. Satanasbe juabnoca, ndocna tšabe soyënga ni ndegombre soyënga ntsebínynana. Chíyeca, ndocna te cha ntšamo ndegombre yomncá ntsamana. Cha canye bostero endmëna, y chábensana nyetsca bostero soyënga jtsóbocanana. Chíyeca, cha tojtsebostero ora, nje ntšamo cachá yomnana

jtsichámuana. <sup>45</sup> Atsna sempre ntšamo ndegombre yomncá cbondutsétsná; chíyeca, chë séntsichamo soyiñe tsëngaftanga ndoñe quešmatošbuaché. <sup>46</sup> ¿Nda tsëngaftanguentšá nanjobenaye jinýanýiyana atše ndaye bacna soye tijamama? Y atše, nye ntšamo ndegombre yomncá stsichámese, ¿ndáyeca chë tijayaniñe ndoñe šmontsošbuaché? <sup>47</sup> Nda Bëngbe Bëtsabe entšá tomna, ntšamo Bëngbe Bëtsá tojtsichamcá jtsuenanana. Pero tsëngaftangna ndoñe Bëngbe Bëtsabe entšanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsboše jouenama ca —Jesús tojanéyana.

*Cristo Abrahambiana más natsana ya yojtsemna*

<sup>48</sup> Chora chë judiënga tmojanianya: —Ajá, bënga co ndegombre fstsichamo, aca nye samaritano y bacna bayëjbe juabna uambayá comna ca fstsichamo ora ca.

<sup>49</sup> Y Jesús tojanéjua: —Atše ni mo canye bayëjbe juabna quetsatambá. Ntšamo atše séntsamcá, endmëna jinýanýiyama atšbe Taitá Bëngbe Bëtsá uamaná yomnama; pero tsëngaftangna, atše chca tsmënama ndoñe quešmatinýinýná. <sup>50</sup> Atše ndoñe quetsátsboše ínýenga atše más uamaná chašmobemama. Pero inya endmëna; cha aíñe endboše atše bëtsá bëtsemnama chaminýanyëma. Y chánaca endmëna chë ínýengbiana tšabá o ndoñe tšabá tmontsamama endbetsichamuá. <sup>51</sup> Ndegombre šcuayana, nda ntšamo atše séntsichamcá tojouena y chca tojama, ndocna te queochatóbana ca —Jesús tojánayana.

<sup>52</sup> Chora chë judiënga tmojanianya: —Mora cocayé fséntsetatšëmbo aca ndegombre bacna bayëjbe juabna uambayá comnama. Abraham tojanóbana, y cachcá, nyetscanga Bëngbe Bëtsabe juabna oyeuambnáyëngnaca. ¿Y mora aca cochjátichamo, “Nda ntšamo atše séntsichamcá tojouena y chca tojama, cha ndocna te queochatóbana ca”? <sup>53</sup> ¿O aca, bëngbe bëts taitá Abrahambiana más bëtsá comna? Cha tojanóbana, y Bëngbe Bëtsabe juabna oyeuambnáyëngnaca. ¿Ndase cojátsmëna ca aca cojatsjuabná ca? —chënga imojtsichamo.

<sup>54</sup> Chora Jesús tojanéjua: —Atše nye cach atše más bëtsá stsenobiamnasna, chë soye tondaye nantsámana. Pero chë más bëtsá šojtsebiamná cha, atšbe Taitá endmëna, cach ndabiama tsëngaftanga šmondbëtsichamo tsëngaftangbe Bëtsá canmëna ca. <sup>55</sup> Pero tsëngaftanga cha ndoñe quešmatábuatma; atše aíñe. Y atše, “cha ndoñe quetsatabuatma ca” stsichámese, átsnaca cach tsëngaftangcá canye bostero stsemna. Pero ndegombre atše cha sënduábuatma, y ntšamo cha tojtsichamcá, atše sëndouenana y cachcá sëndbëtsama. <sup>56</sup> Tsëngaftangbe uámana bëts taitá Abraham, chë atše jabama te jinýama yojtsejuabnaye ora, puerte oyejuayá yojtsemna. Y pronto tojéftsaninýe, y puerte tojanoyejuá ca —Jesús tojánayana.

<sup>57</sup> Chora chë judiënga tmojanianya: —Aca cabá ndoñe shachna bnëtsana uata quecátsbomna; y as, ¿ntšamo cochjátichamo, Abraham tcojéftsinye ca?

<sup>58</sup> Chora Jesús tojanéjua: —Ndegombre cbéyana, Abraham cabá ndoñe ainá quenjatmëna ora, atše ya sënjëtsemna ca.

<sup>59</sup> Jesús chca tojanéjua ora, chënga ndëtšbenga tmojanájaca cha jtsatëchénganjama. Pero Jesusna oitanánana, Bëngbe Bëtsabe bëts yebnentšana tojésanbocna.

## 9

*Jesús tojanma, canye boyabása jtaná onýnaná chabuabínýnama*

<sup>1</sup> Canye luarëjana yojtsachnéjuana ora, Jesús canye boyabásabioye tbojáninýe. Chë boyabásana jtaná inónýna. <sup>2</sup> Chë uatsjëndayënga Jesús tmojantjá: —Buatëmbayá, ¿ndáyeca quem boyabása jtaná inónýna? ¿Camuá bacna soyënga tojamama, o chabe bëtsétsangbe bacna soyënga causa ca?

<sup>3</sup> Chora Jesús tojanéjua: —Ni cachabe bacna soyëngama, y ni chabe bëtsétsangbe bacna soyënga causa. Chca endmëna ndayá entšanga jinýanýiyama ntšamo Bëngbe



Bëtsá yobencá. <sup>4</sup> Cabá yojtsësháchena ora, šontsamna jamana ntšamo chë šonjichmó cha yojtsebošcá. Ndoñe usháchena tempo echanjóshjango; chora ndocná tondaye jamama queochatobenaye. <sup>5</sup> Quem luariñe chjëftsemnëntscuana, atše quem luare entsangbe juabnënga binýnaya chanjëftsemna ca —tojanéyana.

<sup>6</sup> Chca tojánayanentšana, Jesús fshantsiñe tojanbuashëtjo, y chë yebuáyeca batsá ngüiche tojábema, y chë jtaná chë ngüicheca tbojanbuchanëtjo. <sup>7</sup> Chora chë jtaná tbojaniana: —Motsa y metsobúchjabebiyé, chë binche uafjónaye entsangbe pormániñe, Siloé ca uabáiniyoca ca. (Siloé, judiëngbe biyañe endayana “Ichmoná ca”).

Y chë jtaná tojana; choca yojetsobúchjabebiyé, y yebnoye tojtaná ora, ya ibojtsabinýna. <sup>8</sup> Chë juachañe oyenënga y chë jtaná tempo lemošna otjanañana tmojaninýnga, imojtsentjanaye: —¿Mua ndoñe yondmëna chë enjanamana jótbemana lemošna jótjañama ca?

<sup>9</sup> Inýnga imojtsichamo: —Cha entsemna ca.

Y ínýngna: —Cha ndoñe quenátsmëna, pero chacá entsábona ca.

Y cach shnaná yojtsichamo: —Atše cha sëndmëna ca.

<sup>10</sup> As chë entsanga tmojantjá: —¿Ntšamo chca mora cmojtsabinýna ca?

<sup>11</sup> Y cha tojanéjua: —Chë boyabása, Jesús ca uabainá, ngüiche yebuáyeca tonjábema, šonjabuchanëtjo y šonjauyana: “Motsa y Siloé uafjónayiñe metsobúchjabebiyé ca”. Chcasna, atše sënjá, sënjetsobúchjabebiyé y cachora šontsabinýna ca.

<sup>12</sup> Chora chënga tmojantjá: —¿Ndayentše cha yojtsemna ca?

Y chana: —Atše ndoñe quetsátstatšëmbo ca —tojanéjua.

### *Chë jtana shnanábioye fariseunga imojtsetjanaye*

<sup>13</sup> Chora chë entsanga, chë jtaná inamná fariseúngbioye tmojanánatse. <sup>14</sup> Chë Jesús batsá yebuáyeca ngüiche tojábema, y chë jtaná tojanma te, canýe ochnayté inamna. <sup>15</sup> As chë fariseunga chë boyabása tmojantjá: —¿Ntšámoyeca mora cmojtsabinýna ca?

Chora cha tojanéjua: —Cha ngüiche yebuáyeca tonjábema y šonjabuchanëtjo. Sënjetsobúchjabebiyé, y cachora šonjuabinýna ca.

<sup>16</sup> As chora básefta fariseunga imojtsichamo: —Chë jtaná chabotsabinýnama tojamá ndoñe tonjochná, y ochnayté tojatrabajá. Chíyeca cha Bëngbe Bëtsabe entsá ndoñe quenátsmëna ca.

Inýnga imojtsichamo: —Cha canýe bacna soyënga amá tojtsemnëse, ¿ntšamo nantsobena canýe bëts soye Bëngbe Bëtsabe obenánaca jamama ca?

Y chca, ínýnga Jesusbe pavor imojtsemna, y ínýngna chabe contra. <sup>17</sup> Chama chënga cachiñe chë jtaná inamná tmojtétantjá: —Er aca mora chacmotsabinýnama cha tojamëse, ¿chabiana ntšamo catjayana ca?

Chora cha tojanéjua: —Chana canýa Bëngbe Bëtsabe juabna oyebuambnayá entsemna ca.

<sup>18</sup> Pero chë judiënga ndoñe montsanošbuaché, cha chë jtaná inamnana y chora ibojtsabinýnama. As chënga, ínýnga tmojanichamó chë boyabásabe bëtsétsata jobiatšama. <sup>19</sup> Chë bëtsétsata tbojánashjango ora, chë judiënga tmojanatjá: —¿Quem boyabása tsëndatbe uaquiñá yomna ca? ¿Ndegombre tašojtsichamo cha jtaná inonýnama? Chcase, ¿ntšamo mora cha ibojtsabinýna ca?

<sup>20</sup> Chora chë bëtsétsata tmojanéjua: —Aíñe fsëndétatšëmbo cha bëndatbe uaquiñá endmënama y jtaná tonjanonýnama. <sup>21</sup> Pero ndoñe queftsátstatšëmbo ntšámoyeca mora chca ibojtsabinýnama, ni bëndatbe uaquiñá chabotsabinýnama nda tojamama cach ndoñe. Cachá motjanga. Ya bëtsá entsemna, y cachá entsobena tšëngaftanga razón jatšatayama ca —chata tbojánayana.

<sup>22</sup> Tempo, chë judiënga imojenóyeunaye, chëngbe enefjuana yebnënguentshana jtëbua-canana chë Jesús ndegombre chë Uámana Uabuayaná, chë Cristo yojamna ca tmo-jayanënga. Chë bëtsétsatna chama ibojtsauatja; <sup>23</sup> chíyeca tmojanéyana: “Cha ya bëtsá entsemna. Cachá motjanga ca”.

<sup>24</sup> As cachiñe chë judiënga chë jtaná inamná tmojanchembo y tmojaniyana: —Bëngbe Bëtsabe delante cach acbiama ndegombre mobuambá. Bënga fsëndétatšëmbo chë boyabása canye bacna soyënga amá yomnana ca.

<sup>25</sup> Chora cha tojanéjua: —Cha canye bacna soyënga amá o ndoñe tondmënana, atše ndoñe quetsátstatšëmbo. Atše nye mëntšá séntsetatšëmbo: Atše jtaná sënjanmëna, pero mora šontsabinýna ca.

<sup>26</sup> Chora chënga cachiñe tmojatantjá: —¿Ntšamo tcmënjama? ¿Ntšamo cha tënjama chacmotsabinýnana ca?

<sup>27</sup> Y cha tojanéjua: —Ya tcbonjáuyana y ndoñe chešmatoyeuná. ¿Ndáyeca cachiñe šmojtseboše jatuenama? ¿Tšëngaftángnaca šmojtseboše chabe ústonënga jtsemnana ca?

<sup>28</sup> Chora chënga cha tmojtsanóyenguango y tmojaniyana: —Acna canye chabe ustoná cojtsemna, pero bënga ndoñe; bëngna Moisesbe ústonënga fsëndmëna. <sup>29</sup> Bënga fsëndétatšëmbo, Bëngbe Bëtsá Moisésbioye tbojanatsëtsama, pero chë boyabásabiama ndoñe queftsátstatšëmbo ni mo ndémocana cha tojabama ca —chënga imojtsichamo.

<sup>30</sup> Chora chë boyabása tojanéjua: —¿Ntšamo chca nántsemna! Tšëngaftanga ndoñe š-montsetatšëmbo ndémocana cha tojabama; pero chašuabinýnana cha tonjama. <sup>31</sup> Bënga tšabá mondétatšëmbo, bacna soyënga amënga Bëngbe Bëtsá ndoñe queondbátayau-nanama. Chana, nye chábioye adorayá y ntšamo cha tojtsebošcá amábioye joyeunayana. <sup>32</sup> Quem luare jobojátšama orscana ndocna te quenaisótatšëmbo canye jtaná onýnanabi-ama ndánaca cha chabotsabinýnana tojéftsemama. <sup>33</sup> Quem boyabása, Bëngbe Bëtsabe ichmoná chabe soyënga jamama ndoñe tontsemnëse, tondaye nantsobena jamama ca —chë entšá tojánayana.

<sup>34</sup> As chë fariseunga tmojaniyana: —¿Ndayá! Aca tcojanonýná orscana, corente bacna soyënga amá tcomnëse, ¿ntšamo mora bënga šcochjátatuatambaye ca?

Y chora chë judiëngbe enefjuana yebnentshana cha tmojtanábocna.

#### *Chë Bëngbe Bëtsabe soyëngama mo jtanëngcá imomnënga*

<sup>35</sup> Chë jtaná tmojtanábocnana Jesús tojanuena ora, tojána cha janguanguama. Tboján-inýena ora tbojaniyana: —¿Aca Bëngbe Bëtsá Entšá tbojanbemábeñe quecojtsošbuaché ca?

<sup>36</sup> Y cha tbojanjúá: —¿Taita, nda cha yojtsemna, as atše chábeñe jtsošbuáchiyama ca?

<sup>37</sup> As Jesús tbojaniyana: —Aca ya tconjinýe; chë ácaftaca entsoyebuambná cha entsemna ca.

<sup>38</sup> Chora, chë boyabása Jesús bentše tojanoshamentšé jëtschuayama y tbojaniyana: —Atšbe Utabná, aíñe sëntsošbuaché ca.

<sup>39</sup> Chora Jesús chë entšanga tojanéyana: —Atše quem luaroye tijabo ndayá entšanga jinýanýiyama ntšamo cachënga Bëngbe Bëtsabe soyëngama imojuabnana. Chë Bëngbe Bëtsabe soyëngama ndosertánënga, chë soyënga atše chanjínýanýiye ora, mo jtanëna shnanëngcá mochántsemna; y chë Bëngbe Bëtsabe soyëngama corente imotátšëmbo ca juabnayëngna chanjínýanýiye, nye batšá Bëngbe Bëtsabe soyëngama imotátšëmbuama. Y chca, chënga, masna mo jtanëngcá mochántsemna y ndoñe mo chë jinýama obenëngcá.

<sup>40</sup> Básefta fariseunga Jesúseftaca imojtsemnënga chca tmojanuena ora, cha tmojaniyana: —Ndegombre bënga ndoñe mo jtanëngcá queftsátsmëna ca.

<sup>41</sup> Chora Jesús tojanéjua: —Tšëngaftanga Bëngbe Bëtsabe soyëngama ndëtatšëmbënga šmojtsemna ca, y ndegombre chë soyëngama ndoñe cmontsésertana ca šmojobuambase,

ndayá šmojtsamcá Bëngbe Bëtsá mo bacna soyënga cuenta ndoñe queochátonjaye. Pero tšëngaftanga corente Bëngbe Bëtsabe soyëngama cmojtsésertana ca šmojtsichámësna, Bëngbe Bëtsá ndoñe queochatobenaye tšëngaftangbe bacna soyëngama jáperdonana ca —Jesús tojanéyana.

## 10

### *Chë oveshënga abujénjya y chabe oveshënga*

<sup>1</sup> As Jesús tojanéyana: “Ndegombre šcuayana: Nda chë oveshëngbe luaroye bësháshajana ndoñe tonjámashëngo, pero aínë inyájana tojtsamáshëngo, chana canye atbëbaná y abacayá jtsemnana. <sup>2</sup> Pero chë bësháshajana tojamashënguana, chë oveshënga anyená jtsemnana. <sup>3</sup> Chë bëshásha ebtafjuaná, chë bëshásha jebëtafjuana, y chë oveshënga abujénjya ntšamo cada ona tmabaincá chë oveshënga jáchembuana. Y chë oveshënga jtsetatšëmbuana chëngbe abujénjya yojtsachembuanama; y chë luarentšana cha jubuacnana. <sup>4</sup> Nyetsca oveshënga tmojábocana ora, chë abujénjya chënga jtsebënatsanana, y chë oveshënga jtséstonana, er chabe oyebuambnayana chënga joyátëmbana. <sup>5</sup> Pero chë tmonduabuatmábioyna chë oveshënga ndoñe ntjuastana; nýe chábentšana jtsachetëngana, chë oveshënga chabe oyebuambnayana ndoñe ntjoyátëmbana causa ca” —Jesús tojánayana.

<sup>6</sup> Jesús entšanga chca tonjanacuntá, pero chënga ndoñe ntjosértana ntšamo yojt-sentšayancá.

### *Jesús, chë oveshënga tšabe abujénjya*

<sup>7</sup> As Jesús cachiñe tojanéyana: “Ndegombre cbéyana: Atše sëndmëna chë bëshásha oveshënga mondbétsamashjuanëjana. <sup>8</sup> Nyetscanga chë atšbe natsana tmojánabënga, atbëbanënga y abacayënga imnamna, pero chë oveshënga ndoñe chëngbioye ntjóyau-nayana. <sup>9</sup> Atše chë bëshásha sëndmëna. Nda quem bësháshajana tojamashënguá, atsbočaná echántsemna. Canye oveshá jamashënguana y jabocnana, y shácuana jónyënanana. Cachcá, chë quemëjana tojamashënguá, lempe echanjónyëna.

<sup>10</sup> “Chë atbëbaná jabana nýe jatbëbama, jóbama y lempe jtseepochócama; pero atšna, entšanga vida chamotsebomnama y átšeftaca bëtscá tšabe vida chamotsebomnama tijabo.

<sup>11</sup> “Atše sëndmëna chë oveshënga tšabe abujénjya. Chë oveshënga tšabe abujénjya sempre jtseprontánana chëngbiamá jóbana, chabe oveshënga ababuányeshanayeca. <sup>12</sup> Pero nda nýe crocenánama totrabája y chë oveshënga ndoñe chábënga tmontsemna, cha nderado tojinýe canye tjañe queše chë oveshëngbioye tojtsobécocnama, cachora nýe cachcá jesénýayana y jtsachana. Chë tjañe queše oveshënga jtsacamiyana, y chë oveshëngna nýe cátoye jtsachetana. <sup>13</sup> Cha jtsemnana nýe crocenánama trabajayá; chabiamá nýe chë uacanánana más uámana soye jtsemnana, y chë oveshëngbiamá tondayana ntsentšamnana; chíyeca cha jtsachana.

<sup>14</sup> “Atše sëndmëna chë oveshënga tšabe abujénjya. Atše chënga sëndëubuatma, y chëngnaca atše šmonduábuatma. <sup>15</sup> Cachcá, chë Taitá Bëngbe Bëtsá atše šonduábu-atma y atše chábioye. Atše sempre sëndétseprontana jóbana, atšbe oveshënga sëndababuanýeshánayeca. <sup>16</sup> Atše inýe oveshënga sëndábamna, pero chënga ndoñe quem luariñe oveshënga quemátsmëna. Atše šontsemna chëngnaca moye junatsana. Chëngnaca atšbe oyebuambnayana mochanjouena, y muentša oveshëngaftaca cánýiñe mochántsemna, y atšna nyetsca chë oveshëngbiamá chë abujénjya chántsemna.

<sup>17</sup> “Atše sempre sëndétseprontana jóbana, chora jtayenama. Chíyeca chë Taitá šondbobonshana. <sup>18</sup> Ndocná atšbe vida quešochatsbojuána, pero chënga sënd-ababuanýeshánayeca sempre sëndétseprontana jóbana, cach atše chca sëndbošeyeca.

Derecho sëndëtsóbmñe chëngbiamá jóbanama, y chora jtayenama. Chca endmëna ntšamo atšbe Taitá šonjamandacá ca” —Jesús tojánayana.

<sup>19</sup> Chë soyënga chë judiënga tmojanuena ora, cachiñe banga Jesusbe contra y ínÿengna Jesusbe pavor imojtsemna. <sup>20</sup> Banga imojtsichamo: —Chana bacna bayëjbe juabna uambayá y corente juicio ndbomná entsemna. Y as ¿ndáyeca cha mochjátsyeunana ca?

<sup>21</sup> Pero ínÿengna imojtsanichamo: —Ndocna bacna bayëjbe juabna uambayá ntsobenana chca jóyebuambayama. ¿Canÿe bayëja nantsobena jamama canÿe jtaná chabotsabinÿnama ca?

*Chë judiënga ndoñe imontsošbuáchiye Jesús Bëngbe Bëtsabe Uaquiñá bëtsemnama*

<sup>22</sup> Canÿe uaftena tempo inamna, y Jerusalemntše canÿe fiesta imojtsebomna. Chë fiesta inamna cada uata, Bëngbe Bëtsabe bëts yebna tempo cachiñe tmojtanjebuama entšanga jtenójuaboyama. <sup>23</sup> Jesús Bëngbe Bëtsabe bëts yebnoca yojétsana, canÿe amashjuana otsbojebniñe, Salomonbe Amashjuana ca uabáinentše. <sup>24</sup> Chora, chë judiënga tmojanóbobuashcona, y tmojantjá: —¿Buetaytentscuana bënga fchjëftsemna acbiamá ndegombre soye ntsetatšëmbcá? Aca chë Cristo cojtsemnëse, chama lempe tšabá šmanÿanjé ca.

<sup>25</sup> As Jesús tojanéjua: —Ya tcbonjáuyana y tšëngaftanga átšbeñe ndoñe ntsošbuáchiyana. Chë atše sëndama soyënga, atšbe Taitá Bëngbe Bëtsabe obenánaca, cmontsinÿanÿná nda atše bëtsemnana. <sup>26</sup> Pero tšëngaftanga átšbeñe ndoñe quešmatošbuaché, er tšëngaftanga atše ndoñe quešmatéstoná, ntšamo chë oveshënga chë tšabe abujénÿa mondbetsëstoncá. <sup>27</sup> Chë atše šmondústonënga, atše šmondbóyeunaye y šmondbëuasto. Atše chënga sëndëubuatma. <sup>28</sup> Atše chanjama, quem entšanga chë nÿetsca tescama yomna tšabe vida chamotsebomnama; chënga ndocna te pochacánënga quemochátsmëna, y ndocná quenátobena átšbentšana chënga jefcana. <sup>29</sup> Atšbe Taitá Bëngbe Bëtsá, chë entšanga atše chašmuastama tojamá, nÿetscangbiamá más bëtsá endmëna, chíyeca ndocná quenátobena chábentšana chënga jefcana. <sup>30</sup> Chë Taitá y atše canÿa fsëndmëna ca —Jesús tojánayana.

<sup>31</sup> Chora, chë judiënga cachiñe ndëtšbënga tmojanájaca Jesús jtsatëchénganjama. <sup>32</sup> Pero Jesús tojanéyana: —Atše tšëngaftangbeñe, ba bëts soyënga sënjama atšbe Taitá Bëngbe Bëtsabe obenánaca. ¿Ndëmua chentša soyama atše šmochtsatëchénganja ca?

<sup>33</sup> Chora chë judiënga tmojanjuá: —Ni canÿe quem bëts soyëngama bënga queft-sátsboše aca jtsatëchénganjama. Aca Bëngbe Bëtsabiamá ndoñe tšabá quecátichamo; mo chábioye cuafjoyenguangcá entsemna. Aca nÿe canÿe entšá condmëna, pero acna contsichamo cach aca Bëngbe Bëtsá comna ca; chíyeca bënga fséntseboše ndëtšbéngaca aca jtsatëchénganjama ca —chënga tmojaniana.

<sup>34</sup> Chora Jesús tojanéyana: —Bëngbe Bëtsabe uabemana palabrënguiñe mëntšá endayana: “Atše sënjayana tšëngaftanga diosënga šmomna ca.” <sup>35</sup> Bëngbe Bëtsá chca tojánayana chë chabe palábraca y cha chamotseservénama tojánamandangiama; ndocná quenátobena jinÿanÿiyana ni mo canÿe soye Bëngbe Bëtsabe uabemana palabrënguiñe, ndoñe ndegombre soye yomnama. <sup>36</sup> Y atšbiamá, Bëngbe Bëtsabiacá uabuayaná y quem luare ichmoná, ¿ntšamo tšëngaftanga šmojtobena jayanama, “aca Bëngbe Bëtsabiamá ndoñe tšabá quecátichamo ca”, chë Bëngbe Bëtsabe Uaquiñá sëndmëna ca atše tijayanama? <sup>37</sup> Ntšamo atšbe Taitá endamcá atše ndoñe séntsamëse, tšëngaftanga átšbeñe ndoñe šmattsošbuáchiye. <sup>38</sup> Pero, ntšamo atšbe Taitá endamcá atše aíñe stsamëse, masque ndoñe átšbeñe šmontsošbuaché, nÿe chë Taitabe obenánaca soyënga tijamama šmochtsošbuáchiye. As, canÿe ora chašmotsetátšëmbo y chacmësertá, chë Taitá átšbeñe yomnama y atše chábeñe tsmënama ca —Jesús tojanéyana.

<sup>39</sup> Chora chënga cachiñe tmojánbošëna Jesús jishachama, pero cha chëngbentšana tojanotsbocá.

<sup>40</sup> Chentšana, Jesús Jordán béjaye chenguana tojesaná y choca tojtsanoquedañe. Chentše Juan tempo entsanga yojanébáyana. <sup>41</sup> Ba entsanga tmojána Jesús jinýama, y méntšá imojtsichamo: “Ndegombre, masque Juan ni mo canýe béts soye Bëngbe Bëtsabe obenánaca tonjéftsema, lempe ntšamo quem boyabásabiama tonjanoyebuambacá, ndegombre yojamna ca.” <sup>42</sup> Y chentše, ba entsanga Jesúsbeñe imojtsanošbuaché.

## 11

### *Lázaro tojanóbana*

<sup>1</sup> Inamna canýe boyabása šocá, Lázaro ca uabainá. Cha inoyena canýe pueblo Betania ca uabáinentše, Marta y Maríaftaca, chabe uabénata. <sup>2</sup> Quem María inamna nda Bëngbe Utabná Jesusbe shecuatšiñe botamana uanguëtšiye tbojanáshecbuešcja, y chabe stjénashaca tbojtanshebojó cha. <sup>3</sup> Chë uta uabénatna ínýenga tmojanichamó Jesús jauenayama: —Bëngbe Utabná, chë aca condbobonshaná šocá entsemna ca.

<sup>4</sup> Jesús chca tojanuena ora, tojánayana: —Quem šocana ndoñe quenátsmëna Lázaro chaóbanama. Pero aínne entsemna Bëngbe Bëtsabe obenana entsanga jinýanýiyama, y Bëngbe Bëtsabe Uaquiñá chamuatschuama ca.

<sup>5</sup> Jesús corente yojánababuanýeshana Marta, María y chatbe uaftše Lázaro. <sup>6</sup> Masque chcasna, Lázaro šocá yojtsemna ca Jesús tmojanियana ora, cabá uta te más cha yojétsemna luarentše tojtsanoquedañe. <sup>7</sup> Chentšana, chabe uatsjéndayënga tojanéyana: —Judeoye cachiñe cuajna ca.

<sup>8</sup> As chë uatsjéndayënga tmojanियana: —Buatëmbayá, baseftayté entsemna chë luaroa judiënga cmonjanbuachetá ndëtsbéngaca jtsóbama; y mora, ¿cabá choye jtésama cojtseboše ca?

<sup>9-10</sup> Chora Jesús tojanéyana: —Bnétsana uta hora bnëté endmëna. Nda bnëté tojtsana, ndoñe ntjojéstjiana, binýniñe bëtsemnayeca. Cachcá átšeftaca endmëna, tondaye quenátopodena átšeftaca jopásana, atše jóbanama cabá ndoñe tonjobuache ora. Pero íbeta tojtsanëse, cha jtsojéstjiana, ndoñe binýniñe causa. Cachcá, bënga šontsamna yojtsësháchenëntscuana jatrabájana. Atšbe jóbanama tempo chaojóshjango ora, ya ndoñe queochátëshachena jatrabájama ca —tojánayana.

<sup>11</sup> Chentšana tojanéyana: —Bëngbe amigo Lázaro tojtsomaná, pero atše choye chanjá jetsefšenama ca.

<sup>12</sup> Chora chë uatsjéndayënga tmojanjuá: —Bëngbe Utabná, tojtsomanase yojtsayana chana tšabá yochtsatsmëna ca.

<sup>13</sup> Pero Jesús yojtsanëtsëtsná ndayá Lázaro tojtsanóbana ca, y chabe uatsjéndayëngna imojtsejuabnaye Lázaro ndegombre yojtsomáñama. <sup>14</sup> As Jesús tšabá tojanéyana: —Lázaro tontsóbana. <sup>15</sup> Atše sëntsoyejuá choca atše ndoñe tsmënama, tšëngaftangbe tšabiama chaotsemnama; chca, tšëngaftanga más átšbeñe chašmotsošbuáchema. Pero cuajna cha jinýama ca.

<sup>16</sup> Chora Tomás, chë Gemelo ca uabobainá, chë inýe uatsjéndayënga tojanéyana: “Béngnaca cuajna, cháftaca mochjóbona ca.”

### *Jesús iuama entsanga chámuatayenama y chë nýetsca tescama yomna tšabe vida chamotse-bomnana*

<sup>17</sup> Jesús chë béconana tojánashjango ora, tojántatšëmbona Lázaro ya canta te uatbontsána yojtsemnama. <sup>18</sup> Betania pueblo yojamna Jerusalén béconana, mo unga kilómetroca. <sup>19</sup> Ba judiënga tmojána Marta y María jautsëtsayama y jatjëmbambayama ndoñe tša ngménaca chabondëtsemnama, chatbe uaftše tojanóbana causa. <sup>20</sup> Jesús yojtsashjajuanama Marta tojántatšëmbona ora, tojánbocna cha jajëbenguama, pero María cach yebnentše tojanoquedá.

<sup>21</sup> Chora Marta Jesúsbioye tbojaniyana: —Bëngbe Utabná, aca muentše macmënëse, atšbe uaftše ndoñe matënjóbana. <sup>22</sup> Pero atše sëntsetatšëmbo, masque ndayánaca mora Bëngbe Bëtsá chacojotjañe, y cha lempe chca cmochjátšetaye ca.

<sup>23</sup> Y Jesús tbojanjuá: —Acbe uaftše echántayena ca.

<sup>24</sup> Chora Marta tbojaniyana: —Aíñe, atše sëndétatšëmbo cha yochtayenama, pero quem luare jopochócama te, nyetsca obanënga mochtayena ora ca.

<sup>25</sup> As Jesús tbojaniyana: —Atše sëndmëna chë entsanga chámuatayenama y chë nyetsca tescama yomna tšabe vida chamotsebomnama endamá. Nda átšbeñe tojtsošbuaché, masque chaóbana, echántayena. <sup>26</sup> Y nda cabá ainá totsomñe y átšbeñe tojtsošbuaché, ndocna te queochatóbana. ¿Chë cbontsatsá soyiñe quecojtsošbuaché ca? —Jesús tbojantjá.

<sup>27</sup> Chora Marta tbojaniyana: —Aíñe, Bëngbe Utabná, atše áceñe sëntsošbuaché, aca chë Cristo, chë Bëngbe Bëtsabe Uaquiñá y chë quem luaroye jabamá comnama ca.

### *Jesús, Lázaro yojtsátbontsana cuevëshentše yojenóbošachna*

<sup>28</sup> Chca tojánayanentšana, Marta tojtaná chabe quenata María jachembuama, y iytëcana tbojaniyana: “Buatëmbayá tonjášhjangó y entseboše aca jinýama ca.”

<sup>29</sup> María chca tojanuena y cachora tojëftsánbocna y tojána Jesús jinýama. <sup>30</sup> Jesús cabá ndoñe chë pueblóye tonjánamashëngo; yojëtsemna Marta tbojanjébengo luarentše.

<sup>31</sup> Chë yebnentše imojtsemna judiënga, María tša ngmënaca ndoñe chaondëtsemnama tjëmbambnayënga, tmojánbocana María juastama; er chë tojëftsantsbaná y tojëftsánbocna ora, chë judiënga imojtsejuabnaye, Lázaro yojtsátbontsana luaroye María yojtsaye, choca jošachnama ca.

<sup>32</sup> Jesús yojtsemnentše María tojánashjangó ora, chábentše tojanoshamentšé y tbojaniyana: —Bëngbe Utabná, aca muentše macmënëse, atšbe uaftše ndoñe matënjóbana ca.

<sup>33</sup> María y cháftaca tmojánashjajna judiënga, nyetscanga imojetsenóbošachiye; y Jesús chca tojáninýe ora, corente tbojancochtsetšena y puerte ngmënaca yojtsemna. <sup>34</sup> Chora Jesús tojanatjá: —¿Ndayentše cha šmojuatbontsá ca?

Y chënga tmojanjuá: —Bëngbe Utabná, mabo y cochjinýe ca.

<sup>35</sup> Chora Jesús tojánenobošachna. <sup>36</sup> As chë judiënga tmojánayana: —¡Minýënga, tša ibnabobonshana ca!

<sup>37</sup> Pero inýe judiënga imojtsichamo: —Chë jtaná chabuabínýnama tojamá, ¿tondaye tonjobená jamama, Lázaro ndoñe chaondóbanama ca?

### *Lázaro tojtanyena*

<sup>38</sup> Jesús, cachiñe puerte cochtsetšenaná, chë uatbontsánoye tojanobeconá. Chë luarna cuevëshe inamna, y amashjuanentše canýe bëts ndëtšbeca yojtsatámëna. <sup>39</sup> Chora Jesús tojanéyana: —Chë ndëtšbé mojuánanga ca.

Chora Marta, chë obanabe uabena tbojaniyana: —Bëngbe Utabná, mora ya bacá yojtsonguëtšé, er ya canta te entsemna cha tontsóbana ca.

<sup>40</sup> Y Jesús tbojanjuá: —Ndegombre, ya tbonjauyana, aíñe átšbeñe tcojtsošbuáchese, cochjinýe Bëngbe Bëtsá puerte obená y bëtsá bëtsemnama ca.

<sup>41</sup> Chora chë ndëtšbé tmojanjuaná; Jesús celoye yojontješiye y Bëngbe Bëtsábioye tbojaniyana: “Taita, cbatschuá atšbe opresido tcojouenama. <sup>42</sup> Atše sëndétatšëmbo aca sempre šcondbëtseyeunanama; atše chca tbonjauyana, muentše montsemna entsangbe tšabiama, chca, aca atše šcojichmoma, chënga chamotsošbuáchema ca.”

<sup>43</sup> Chca tojánayanentšana, jabuache tojánayana: “¡Lázaro, chentšana matsbocna ca!”

<sup>44</sup> Y cachora chë obaná tojtánbocna, cucuatšënga y shecuatšënga entšëjuaca batsëcná, y chabe jubiá base entšëjuaca uamochëcjuaná. As Jesús tojanéyana: “Motsejafjoná y jama chaotsobena ca.”

*Chë judiëngbe amëndayënga tmojanenoyeuná Jesúsbioye jóbama  
(Mt 26.1-5; Mc 14.1-2; Lc 22.1-2)*

<sup>45</sup> Chë soyëngama, banga chë judiënguentshana, María jatjëmbambayama tmojánanga, y ntšamo Jesús tojanmcá tmojáninyënga, Jesúsbeñe imojtsošbuaché. <sup>46</sup> Pero inye judiënga fariseúngbioye tmojána, ntšamo Jesús tojanmama chënga jacúntama. <sup>47</sup> As, chë fariseunga y chë bachnangbe amëndayënga tmojánenefjna inye judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama. <sup>48</sup> Nye cachcá chamojonýase, nyetsca entsanga chábeñe mochantsošbuáchiye; chë romanëngbe amëndayënga mochanjabo y lempe mochantse-pochóca, Bëngbe Bëtsabe bëts yebna y bëngbe luare Israel ca —chënga imojtsichamo.

<sup>49</sup> Pero canya chënguentshá, Caifás ca uabainá, chë uata chë bachnangbe más uámana amëndayá inamná, tojanéyana: —Tšëngaftanga tondaye quešmátstatsëmbo. <sup>50</sup> Y ndoñe quešmatsjuabná, tšëngaftangbiana más tšabá yojtsemna nye canye boyabása Israeloca entsangbiana chaóbana, y ndoñe nyets bëngbe luare chamotsepochohá ca —cha tojanéyana.

<sup>51</sup> Pero Caifás chë soye nye cachabe juábnaca ndoñe chca tonjánayana. Cha, chë uata chë bachnangbe más uámana amëndayá inamnayeca, Bëngbe Bëtsabe Espiritbe obenánaca tojánayana Jesús ibojamna Israeloca entsangbiana jóbana ca. <sup>52</sup> Y ndoñe nye Israeloca entsangbiana, sinó chë inye luarënguiñe Bëngbe Bëtsabe básenga tmojanáshanënga chamuatábama, as chca, nyetscanga nye canye luarentša entsanga chamotsemnama. <sup>53</sup> Chcasna, cach tescana judiëngbe amëndayënga tmojanenoyeuná Jesús jóbama.

<sup>54</sup> Chíyeca Jesús entsángbeñe, Judea luariñe ya ndoñe yontsana. Chë luarentšana tojéftsanbocna y canye luaroye tojtsanoñe, entsanga ndoyeniñe béconana, canye pueblo Efraín ca uabáinoe. Y chentše chabe uatsjëndayëngaftaca tojtsanoquedañe.

<sup>55</sup> Judiëngbe Bashco fiestama batšá yojtsájamna, y ba entsanga pueblënguentshana Jerusalemoye imojtsajna, soyënga choca jamama ntšamo tempo inamncá, chca, Bëngbe Bëtsabe bominyama tšábenga jtsemnama, chë Bashco fiesta cabá ndobuache ora. <sup>56</sup> Chocna, judiënga Jesús imojtsenguaye, y Bëngbe Bëtsabe bëts yebnentše imojtsentjanaye: “¿Ntšamo šmojtsejuabná, cha tayochjabo o ndoñe quem fiestama ca?”

<sup>57</sup> Chë fariseunga y chë bachnangbe amëndayënga tmojanmandá, nderado nda Jesús ndayentše tojtsemnama tojtsetatsëmbësna, chaobuambá ca, as Jesús jishachama.

## 12

*María, botamana uanguëtsiye Jesúsbeñe tbojanáshecbuešcja  
(Mt 26.6-13; Mc 14.3-9)*

<sup>1</sup> Chnénguana te chë Bashco fiestama yojtsájamna ora, Jesús Betania puebloye tojtaná. Lázaro, chë Jesús tbojtanayená cha, choca inoyena. <sup>2</sup> Chentšna bëts saná Jesusbiana tmojanábua. Marta tojanëjuatšé, y Lázaro yojtsemna chë Jesúséftaca juasama meséshañe imojtsetbiámanënguentsë. <sup>3</sup> As María canye jarrëtema tojanaca; chiñe yojanaftsuamna canye botamana uanguëtsiye, bëts cá uámániye, ena nárdoca pormániye. Chë uanguëtsiye, María, Jesusbe shecuatšënguiñe tbojanáshecbuešcja, y cachabe stjënashaca tbojtanshecbójó. Chora, chë yebnentše ena nardiyana yojtsonguëtsiye.

<sup>4</sup> Chora, canya Jesusbe uatsjëndayënguentshá, Judas Iscariote, chë Jesús uayayëngbe cuuatšiniñe yochjanayentšbashejuaná, tojánayana: <sup>5</sup> —Quem botamana uanguëtsiye unga patse denario crocénana enduámana. ¿Ndayeca ndoñe šmonjuiye y ndbomnjëmënga chë crocénana mašmëntsatsatá ca?

<sup>6</sup> Pero Judas chca tojánayana, chë ndbomnjëmëngbeñe ntsejuabnacyá, sinó cha atbëbaná inamna causa. Judas chëngbe crocénana shecnëšiñe yojánatbëna, y ba soye, chë shecnësoye imojanatsuáma crocénantšana cha yojánatbëbana.

<sup>7</sup> As Jesús tbojanjuá: —Cachcá monyá. María méntscoñe chë botamana uanguëtšiye iuabofjájona, cha jobenayama átsbeñe jabuéscjama, er ndoñe bën y atše šmochanjaitëme. <sup>8</sup> Chë ndbomnjémëngna tšëngaftangbeñe sempre mochanjesomñe, pero atše ndoñe ca —tojánayana.

#### *Judiënga tmojanenoyeuná Lázaro jóbama*

<sup>9</sup> Ba judiënga tmojántatšëmbona Jesús Betanioca yojtsemnana, y choye tmojána, ndoñe nye Jesús jinýama, sinó Lázarnaca, chë Jesús tbojtanayená cha. <sup>10</sup> As chë bachnangbe amëndayënga tmojanenoyeuná Lázarnaca jóbama. <sup>11</sup> Chabe causa, ba judiënga chëngbiyoye cachcá tmojesanénýa y Jesúsbeñe imojtsošbuaché.

#### *Jesús Jerusalenoye tojánashjango*

(Mt 21.1-11; Mc 11.1-11; Lc 19.28-40)

<sup>12</sup> Chë yëfsana, mallajta entšanga, Jerusalenoca fiestama tmojánashjajnënga, tmojántatšëmbona Jesús choye yochjánashjanguama. <sup>13</sup> As chëngna palma betiye buacuafjënga tmojanatëtsetše, y Jesús jajëbenguama tmojánbocana, y méntšá imojtsáyebuache: “¡Bëngbe Bëtsá matschuanga! ¡Corente bendición bomná chë Bëngbe Utabnabe obenánaca tojabál! ¡Corente bendición bomná chë Israeloquëngbe Rey ca!”

<sup>14</sup> Jesús canýe burrotema tbojáninýena y chábeñe tojanenoyayé. Ntšamo Bëngbe Bëtsabe uabemana palabrënguine iuayancá, cachcá tojanopasá. Chiñe méntšá endayana Jerusalenoca entšangbiama:

<sup>15</sup> Sión bëts puebloca oyenënga, ndoñe matauatjëngana.

Minýënga, tšëngaftangbe Rey burrotëmiñe enjaquená entsabó ca.

<sup>16</sup> Chca orna, Jesusbe uatsjëndayënga chë soyëngama ndoñe tonjanësertá; pero chentšana, Jesús corente bëtsá yomnana Bëngbe Bëtsá tojaninýanjé ora, chë uatsjëndayënga chama tmojanenojuabó, lempe ntšamo Bëngbe Bëtsabe uabemana palabrënguine iuayancá y cachcá Jesúseftaca tojanopasama.

<sup>17</sup> Chë Jesúseftaca imojtsemna entšanga, Lázarbioye uatbontsánoye tbojanchembo ora y chentšana tbojtanayená ora, ntšamo tmojáninýama chora imojtsecuëntaye. <sup>18</sup> Chíyeca, ba entšanga tmojánbocana Jesús jajëbenguama, chë bëts soye Bëngbe Bëtsabe obenánaca cha tojanmama tmojanuénayeca. <sup>19</sup> Pero chë fariseunga imojtsenatsëtsnaye: “Tšëngaftanga šmontsonýá bënga tondaye jamama quemuátobenama y más, ¡nyetscanga cha montséstona ca!”

#### *Básefta Grecia luaroca entšanga Jesús tmojáanguango*

<sup>20</sup> Bashco fiestama, chë Bëngbe Bëtsá jadórana Jerusalenoye tmojánangbeñe, básefta griego entšángnaca imojtsemna. <sup>21</sup> Chëngna, Felipe chë Galilea luarocá, chë Betsaida pueblócábioye, tmojanobeconá y tmojanimpadá: “Señor, bënga fsëntseboše Jesús jinýama ca.”

<sup>22</sup> Chora Felipe tojána Andrés jauyanama, y chë útatna Jesúsbioye tbojána, chë grieguëngbiama jauenayama. <sup>23</sup> Jesús chata tojanéyana: “Chë Bëngbe Bëtsá Entšá tbojanbemá corente bëtsá yomnana jinýanjíyama te ya tocjobuache. <sup>24</sup> Ndegombre šcuayana: Canýe trigo jénaye ndoñe fshantsiñe tmonjuatbontsá y ndoñe tonjóbanëse, nýe cach canýe trigo jénaye jesomñana. Pero tmojuatbontsá y tojóbanase, bëtscá jashájonana. <sup>25</sup> Cachcá, nda nýe cachá tojtsenóbobonshana, cha chabe vida echanjëft-sobuetše. Pero nda nýe cachá ndoñe tontsenóbobonshana y ntšamo atše stsemandacá, quem luariñe vida tojtsebomnëntscuana cha tojtsamëse, chë nyetsca tescama yomna tšabe vida echántsebomna. <sup>26</sup> Nda ntšamo stsemandacá jamama tojtseboše, atše chašotséstona. Chca, ndayentše atše chaitsemna, chánaca, chë atše oservená, chentše chaotsemna. Atše šojtseservénabiama, atšbe Taitá Bëngbe Bëtsá echanjínýanjíyaye bëtsá yomnana ca” —Jesús tojánayana.

#### *Jesús tojánayana cha yochjanóbanama*



<sup>27</sup> Y más Jesús tojánayana: “¡Mora tša cochtsetšenaná séntsemna! ¿Atše chjayana: ‘Taita, chë átšeftaca echanjopása soyënga šmotsebojuaná ca?’ Ndoñe; er más chama atše quem luaroye tijabo. <sup>28</sup> Taita, šminñanyé aca puerte bëtsá y obená comnama ca.”

Y cachora, celocana canye oyebuambnayana tojanóbocna mëntšá: “Ya tcbonjinñanyé atše puerte bëtsá y obená tsmënama, y mora cachiñe cachcá chanjama ca.”

<sup>29</sup> Entšanga chca tmojanuena ora, ínñenga imojtsichamo nje tojanjuésase ca; pero ínñengna imojtsichamo: —Canye ángel chábioye tbonjuatsëtsá ca.

<sup>30</sup> Chora Jesús tojanéyana: —Ntšamo šmonjouencá, atšbiana ndoñe quenátsmëna, sinó tšëngaftangbiana. <sup>31</sup> Mora chë tempo entsemna, chë quem luare entšanga tmojëftsema bacna soyënga jinñanyiyama y chëngbe castiguama jayanama. Y mora, chë nyetsca bacna soyënga mandayá, quem luarentšana mochántábocna. <sup>32</sup> Pero atše fshantsocana atsbananá chaitsemna ora, nyetsca entšanga átšbioye chanjúbuaja ca — Jesús tojánayana.

<sup>33</sup> Chca cha yojtsichamo, ana jinñanyiyama ntšamo jóbanama ibojamnama. <sup>34</sup> Chora chë entšanga tmojanjuá: —Bëngbe Bëtsabe uabemana palabrenguiñe endayana, y chíyeca bënga fsëndétatsëmbo chë Cristo nyetsca tescama vida yochtsebmna ca. As, ¿ndáyeca cojtsichamo, Bëngbe Bëtsá Entšá tbojanbemá chamuatsbanama yojtsemna ca? ¿Nda yojtsemna Bëngbe Bëtsá Entšá tbojanbemá ca? —chënga imojtsichamo.

<sup>35</sup> Y Jesús tojanéyana: —Nye baseftatescama chë entšangbe juabnënga binñayá tšëngaftangbeñe entsemna. Chë binñayá cabá tšëngaftangbeñe yojtsemnëntscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe binñiñe tojtsana, cha ndoñe ntsetatsëmbuana ndëmuajana yojtsana. <sup>36</sup> Chë binñayá cabá tšëngaftangftaca endëtsemnëntscuana, chábeñe šmochtsošbuáchiye; as, tšëngaftangbe juabnënga binñiñe echántsemna ca — Jesús tojánayana.

Chë soyënga tojánayanentšana, Jesús tojtsanoñe y entšangbiana yojetsóitana.

*Ndáyeca chë judiënga Jesúsbeñe ndoñe montsanošbuaché*

<sup>37</sup> Masque Jesús, judiëngbe delante ba bëts soyënga Bëngbe Bëtsabe obenánaca tojëftsema, chënga ndoñe chábeñe ntsošbuáchiyana, <sup>38</sup> ntšamo Bëngbe Bëtsabe juabna oyebuambnayá Isaías tojanabemcá, cachcá chaotsemnama. Isaías mëntšá tojánayana: Bëngbe Utabná, ¿nda bëngbe buayenana soyiñe yojtsošbuaché? Y ¿nda tbojosertá, acbe obenana tcojinñinyé ora ca?

<sup>39</sup> Chíyeca chënga ndoñe montsobena Jesúsbeñe jtsošbuáchiyama, er Isaías mëntšánaca tojëftsanabema:

<sup>40</sup> Bëngbe Bëtsá tojama chënga chabe soyëngama ndoñe botamana chamondëtsejuabnama y chabe soyënga ainaniñe ndoñe chamondóyëngacñama, as ndoñe chaondëtsësertánama ca.

Y Bëngbe Bëtsá entsichamo: “Chca entsemna, chënga atšbe benache ndoñe chamondishachama, y atše ndoñe ntjätsebacama; y chca, chënga mochántsemna mo ndëshnana entšangcá ca.”

<sup>41</sup> Isaías chca tojánayana, er tojáninye Jesús puerte bëtsá y obená yojamnama, y chca chë uabemaniñe Jesusbiana yojanoyebuambná.

<sup>42</sup> Pero masque chca iuábemanëse, ba judiënga imojtsanošbuaché, y banga judiëngbe amëndayëgnaca Jesúsbeñe imojtsanošbuaché. Pero chëngna, Jesúsbeñe imojtsošbuáchema entšangbeñe ndoñe montsichamo. Chca imojánama chë fariseungbiana auatja causa, chë judiëngbe enefjuana yebnënguentshana ndoñe chamondëtëbuacnama.

<sup>43</sup> Chëngbiana más yojanámana, entšanga chëngbiana chamotsichamo tša uámanënga imojamna ca, y ndoñe, Bëngbe Bëtsá chca chaotsamama.

*Jesusbe palabrengaca yochtsótatsëmbo entšanga tšabá o ndoñe tšabá tmonjamama*

<sup>44</sup> Chora Jesús mēntšá jabuache tojánayana: “Nda átšbeñe tojtsošbuaché, ndoñe n̄ye átšbeñe ntsošbuáchiyana; chē nda šojichmó chábeñnaca cha jtsošbuáchiyana. <sup>45</sup> Cachca, nda atše šojtsonyá, chē šojichmó chábioynaca cha jtsonyayana. <sup>46</sup> Atše quem luaroye tijabo entšangbe juabnēnga jabobínynama, chca, nda átšbeñe tojtsošbuaché, mo ibetiñcá ndoñe chaondétsemnama. <sup>47</sup> Pero nda atšbe soyēngama tojouena, pero ntšamo sēntsichamcá ndoñe tontsama, atše chabiamana ndocá quichátayana tšabá o ndoñe tšabá tonjama ca. Atše ndoñe chiyátabo, ntšamo quem luarentša entšanga tmojamama tšabá o ndoñe tšabá yontsemna ca jatichámuama; quem luaroye sēnjabo ndayá chēnga jabátsebacama. <sup>48</sup> Nda atše šojtsaboté y atšbe palabrēngama ndoñe šonjoyeuná, ya entsebomna nda chabiamana yochjayana bēts castigo jtsebomnama ibojtsemna ca. Atše tjanoyebuambá palabrēngaca, quem luare jopochócama te chabiamana chca echántsayana. <sup>49</sup> Er atše ndoñe n̄ye atšbe juábnaca quetsatoyebuambná. Chē Taitá, chē šonjichmó cha, šonjamandá ntšamo jayanana y ndayá jabuátambana. <sup>50</sup> Atše sēndétatšēmbo, atšbe Taitá tojamandá orna, cha jamándana entšanga chē n̄yetsca tescama yomna tšabe vida chamotsebomnama. Chíyeca, ndayá sēntsichamcá, endmēna ntšamo atšbe Taitá Bēngbe Bētsá šojamandacá ca” —Jesús tojánayana.

### 13

#### *Jesús chabe uatsjēndayēnga tojanashecjabebé*

<sup>1</sup> Bashco fiesta cabá ndobuache ora, Jesús yojtsetátšēmbo chabe tempo tojanóshjanguama, quem luarentšana jēftsebocnama y chabe Taitábioye jtama. Ntšamo Jesús chábenga yojanababuan̄yeshancá, chē quem luare imojamnēnga, chórna yojtseboše chē bēts bonshánana puerte más jin̄yan̄iyana.

<sup>2</sup> Pero Satanás, Júdasbe ainaniñe bacna juabnēnga tojanjajó, uayayēngbe cucuatšīñe Jesús jayentšbáshejuanama. Judas Iscariote, Simonbe uaquiñá. <sup>3</sup> Jesús yojtsetátšēmbo chabe Taitá Bēngbe Bētsá n̄yets obenana tbojánatšetama. Cachcá, Jesús yojtsetátšēmbo, Bēngbe Bētsábíocana cha tojánabama y cachábioye jtama ibojtsemnama. <sup>4</sup> Chcasna, chē ibeta jasama tmojanpochocá ora, meséshentšana tojantsbaná, chabe juatsboye uichētjoníya tojanenátsejca y can̄ye tualléjua tojanenasná. <sup>5</sup> Chentšana, can̄ye bachešīñe búyeshe tojanbuešcya y tojanontsé chabe uatsjēndayēnga jushecjabebiyana y jtēshecbojuana cha yojtsasnana tualléjuaca.

<sup>6</sup> Pero, Simón Pedro tbojanobuache ora, Jesúsbioye tbojaniyana: —Atšbe Utabná, ¿aca šochjuashecjabiá ca?

<sup>7</sup> Chora Jesús tbojanjuá: —Atše séntsama soye mora ndoñe quecmátēsertana; pero más chcoye aīñe cmochanjósérta ca.

<sup>8</sup> As Pedro tbojaniyana: —¡Ndocna te šcatjuashecjabiá ca!

Pero Jesús tbojaniyana: —Ndoñe chacbonjuáshecjabese, atšbia ndoñe quecochátsmēna ca.

<sup>9</sup> Y Simón Pedro tbojaniyana: —¡Atšbe Utabná, as n̄ye atšbe shecuatšēnga ndoñe, ndayá atšbe cucuatšēnga y bestšášnaca ca!

<sup>10</sup> Pero Jesús tbojanjuá: —Nda bebená tojtsemna, n̄ye shecuatše jtsashecjabiamana jtsajabótana, ndoñe n̄yetšá cachiñe. Nda tojtsobebé, ndoñe tsengá ntsemnana. Cachcá, mo bebēnēnga cuenta tšēngaftanga šmontsemna; pero can̄ya muentše entsemna, y cha mo bebenacá ndoñe quenátsmēna.

<sup>11</sup> Jesús yojtsetátšēmbo nda chē uayayēngbe cucuatšīñe boshjuaná yochtsanmēnama, chíyeca tojánayana: “Tšēngaftanguentšá can̄ya entsemna, cha mo bebenacá ndoñe quenátsmēna ca”.

<sup>12</sup> Jushecjabebiyama tojanpochocá ora, chabe juatsboye uichētjoníya tojtaníchētjo, y meséshentše tojtanótbema. Chora tojanéyana: —¿Chē tcbonjábiamana soyama quecmojtsēsertana ca? <sup>13</sup> Tšēngaftanga atše šmondbauyana Buatēmbayá y Bēngbe Utabná ca;

tšabá chca šmontsichamo, er atše ndegombre chca sēndmēna. <sup>14</sup> Atše, tšēngaftangbe Buatēmbayá y Utabná, tcbonjushecjabebé; chcasna, tšēngaftángnaca cmontsamna jenáshecjabebiyana. <sup>15</sup> Ntšamo quem sóyeca tcbonjanýanýecá, tšēngaftanga cachcá šmochtsama. <sup>16</sup> Ndegombre šcuayana, chē oservená chabe nduiñbiama ndoñe más uamaná ntsemnana. Cachcá, chē ichmoná chē tbojichmobiana ndoñe más uamaná quenátsmēna. <sup>17</sup> Quem soyēnga chašmojuatsjinýe y chca chašmojamēse, tšēngaftanga puerte oyejuayēnga vida šmochanjéftsebmna.

<sup>18</sup> “Atše sēndétatšēmbo chē tijábacangbiama, chíyeca atše nyetscangbiama ndoñe chca quetsatoyebuambná. Y ntšamo Bēngbe Bētsabe uabemana palabrenguiñe endayancá cachcá chaotsemnana, chē ‘canýa átseftaca tandēse tonjasá, atšbe contra echántsemna ca’, cachcá echanjopása. <sup>19</sup> Mora, cabá ndoñe chca tonjopasá ora, lempe chē soyēnga séntsihamo. As, chca chaojopasá ora, átšbeñe šmochantsošbuáchiye, y as šmochántsetatšēmbo atše tsmēna chē nda sēndmēná. <sup>20</sup> Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chē nda šojichmóbioye bochanjofja ca” —Jesús tojánayana.

*Jesús tojánayana uayayēngbe cucuatšīñe Judas bochjáboshjonama*

(Mt 26.20-25; Mc 14.17-21; Lc 22.21-23)

<sup>21</sup> Chē soyēnga tojánayanentšana, Jesús corente cochtsetšenaná yojtsemna, y tojánayana: —Ndegombre šcuayana, canýa tšēngaftanguentšá uayayēngbe cucuatšīñe šochanjáboshjona ca.

<sup>22</sup> Chora, chabe uatsjēndayēnga tmojanontšé enonýinýayana, y ndoñe montsetatšēmbo ndabiana Jesús chca tojánayanama. <sup>23</sup> Canýe uatsjēndayá, chē Jesús puerte ibnabobonshaná, Jesusbe juachaca inatbemana. <sup>24</sup> As, Simón Pedro chábioye tbojánēfjatsēmbo, ndabiana Jesús chca tojánayanama Jesúsbioye chabotjama. <sup>25</sup> Chē puerte bonshana uatsjēndayá, Jesúsbioye batsatema más tojanosjoná y tbojantjá: —Bēngbe Utabná, ¿nda cha yojtsemna ca?

<sup>26</sup> Chora Jesús tbojanjuá: —Atše canýe base tandētema chanjafchécuacuaye y ndábioye chajoyé, cha entsemna ca.

As Jesús canýe base tandētema tojanfchecuacuá, y Judas, Simón Iscariotbe uaquiñábioye, tbojanoyé. <sup>27</sup> Tandēse tojanóyēngacñe y cach ora, Satanás Júdasbe ainaniñe bacna juabnēnga tbojáncochēngo. As Jesús tbojaniana: “Chē cochanjama soye, cam ora moma ca.”

<sup>28</sup> Pero ni canýa chē jasama imojtsetbiamanēnguentšá tbojanēsertá, ndayama Júdasbioye chca tbojanianama. <sup>29</sup> Judas inamna chēngbe crocénana shecnēšīñe uambayá; chíyeca ínýenga tmojanjuabó Jesús chca ibojtsatsaye, ana ndayá yojtseita soye chē fiestama chauabuámiyama, o ndbomnjémēnga ndayánaca chauatšatama ca.

<sup>30</sup> Júdasna chē base tandētema tojanóyēngacñe, y cachora chentšana tojéftsanbocna. Chora ya ibeta yojtsemna.

*Chē tsēm mando*

<sup>31</sup> Judas tojéftsanbocnentšana, Jesús tojánayana: —Ora tocjobuache, Bēngbe Bētsá Entšá tbojanbemá corente bētsá y obená yomnama jinýanýiyama; y mua echanjínýanýiye Bēngbe Bētsá corente bētsá y obená yomnama. <sup>32</sup> Cha echanjínýanýiye Bēngbe Bētsá chca yomnama, chíyeca Bēngbe Bētsánaca echanjínýanýiye corente bētsá y obená yomnama, y mora entsemna chē ndaye ora Bēngbe Bētsá chca chabiana yochjínýanýiye. <sup>33</sup> Atšbe básēnga, baseftatescama tšēngaftangaftaca séntsemna. Chora šmochántseguaye, pero ntšamo judiēnga sēnjauyancá, mora cachcá tšēngaftanga cbéyana: Chē chanjá luaroye, tšēngaftanga ndoñe quešmátobena jama ca. <sup>34</sup> Canýe tsēm soye cbetsamēndá: Nyetscanga šmochtsenbobonshana. Ntšamo atše tšēngaftanga cbondábabuanýeshana, cachcá tšēngaftanga šmochtsenbobonshana. <sup>35</sup> Tšēngaftanga

šmojtsebbonshánëse, nyetsca entsanga mochántsetatsëmbo, tšëngaftanga atšbe uat-sjëndayënga šmomnana ca —Jesús tojanéyana.

*Jesús tojánayana, chábioye ndoñe bonjanabuátma ca Pedro yochjánayanama*  
(Mt 26.31-35; Mc 14.27-31; Lc 22.31-34)

<sup>36</sup> Chora Simón Pedro tbonjantjá: —Bëngbe Utabná, ¿ndémoye cochjá ca?

As Jesús tbojanjuá: —Atše sentsá luaroye, mora aca ndoñe quecátobena atše juastana, pero más chcoye aíñe šcochanjuasto ca.

<sup>37</sup> As Pedro tbojaniyana: —Atšbe Utabná, ¿ndáyeca ndoñe sentsobena mora aca juastama? ¿Atše séntseprontana acbiana jóbanama ca!

<sup>38</sup> Chora Jesús tbojaniyana: —¿Ndegombre cojtseprontana atšbiana jóbanama? Ndegombre cbëyana, cabá ngallo ndécánta ora, aca unga soye atšbiana cochanjayana: “Cha ndoñe quetsatabuatma ca”.

## 14

*Jesús beyeca entsanga jobenayana Bëngbe Bëtsábioye jama*

<sup>1</sup> Mëntsánaca Jesús tojánayana: —Ndoñe ainana tsetšanënga matsmënana. Tšëngaftanga Bëngbe Bëtsábeñe šmondošbuaché; átšbeñnaca šmochtsošbuáchiye. <sup>2</sup> Atšbe Taitá Bëngbe Bëtsá endmënoca, ba luarënga joyéanama endmëna. Ndoñe chca tontsemnëse, atše chca matcbënjáuyana. Morna, cha endmënoye atše chanjá tšëngaftangbiana canye luare joyéanama jabuáprontama. <sup>3</sup> Atše chajjá y chë luare chacbojabuaprontá ora, cachiñe moye chanjésabo, tšëngaftanga átšeftaca junatsama. As, atše chaitsemnoye, tšëngaftangnaca chašmotsá joyéanama. <sup>4</sup> Atše chanjá choye ntšamo jama y jashjanguama ya šmontsetátšëmbo ca —Jesús tojánayana.

<sup>5</sup> Chora Tomás Jesúsbiyoye tbojaniyana: —Bëngbe Utabná, ndémoye cochjama ndoñe queftsátstatšëmbo. As, ¿ntšamo bënga fchtsetátšëmbo ntšamo choye jama ca?

<sup>6</sup> Chca tbojaniyana ora, Jesús tbojanjuá: —Atše sëndmëna benachcá; chëjana tcojtsase, pronto jashjanguana. Atše sëndmëna ntšamo ndegombre yomncá sempre oyebuambnayá, y entsanga chë nyetsca tescama yomna tšabe vida chamotsebomnana endamá. Nye átšbeyeca endopodena ndayëjana jama, y atšbe Taitá Bëngbe Bëtsábioca jashjanguama. <sup>7</sup> Tšëngaftanga atše šmojtšábuatmëse, atšbe Taitánaca šmattsábuatma. Morscana ya cha šmontsábuatma y cha šmontsonjá ca —tbojaniyana.

<sup>8</sup> Pero Felipe tbojaniyana: —Atšbe Utabná, nye chë Taitá šmanjanyé, ndayama más ca.

<sup>9</sup> Chora Jesús tbojaniyana: —Chëfta te tšëngaftangaftaca séntsemna, y ¿cabá ndoñe atše šcontsábuatma, Felipe? Nda atše šojinye, chë Taitá Bëngbe Bëtsábioynaca jinýana. As, ¿ntšamo atše šcojtsatsá, chë Taitá šmanjanyé ca? <sup>10</sup> ¿Ndoñe condošbuaché, atšbe Taitá átšbeñe y átšnaca chábeñe nye canýacá ftsmënana? Chë cbontsëtsësná soyënga, ndoñe nye atšbe juábnaca chca quetsatoyebuambná. Atšbe Taitá, chë átšbeñe vida endbomná jtsamana lempe ntšamo stsamcá. <sup>11</sup> Muiñe šmochtsošbuáchiye: Atšbe Taitá átšbeñe endmëna, y átšnaca chábeñe mo nye canýacá sëndmëna. Chama ndoñe šmontsošbuachese, as nye chë tijama soyëngámnaca átšbeñe šmochtsošbuáchiye. <sup>12</sup> Ndegombre šcuayana, nda átšbeñe tojtsošbuaché, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chë átšbeñe ošbuachiyá, chama más bëts soyënga echanjama. <sup>13</sup> Tšëngaftanga ndaye sóynaca Bëngbe Bëtsábioye šmojtjañe, y chca šmojama atše jótšëmbonëse, átšbeñe šmošbuachéyeca, lempe šmochanjóyëngacñe; chca, chë Uaquiñá echanjínányiye chë Taitá corente bëtsá y obená yomnana. <sup>14</sup> Tšëngaftanga ndaye sóynaca atše šmojtjañe, y chca šmojama atše jótšëmbonëse, átšbeñe šmošbuachéyeca, atše chë soye chanjama ca —Jesús tojánayana.

*Jesús tojanašebuachená chë Uámana Espíritu jíchmuama*

<sup>15</sup> Mëntsánaca Jesús tojánayana: “Tšëngaftanga atše šmojtsebbonshánëse, ntšamo cbontsamëndacá cachcá šmochanjama. <sup>16</sup> Chca chašmojamëse, atšbe Taitá Bëngbe

Bëtsá tšëngaftangbiama chanjaimpáda, tšëngaftanga jabújabuachama y jabáñemuayama inya cha chabuichmoma, chë Uajabuachaná nyetsca tescama tšëngaftangaftaca chauétssemnama. <sup>17</sup> Cha, chë Uámana Espíritu endmëna chë nyetsca soyënguine ntšamo ndegombre yomncá oyebuambnayá. Chë nye quem luarama enójuabnaye entšanga, chë átšbeñe ndošbuáchiyënga ndoñe quematonýá, ni quematábuatma. Chíyeca chënga ndoñe quemátobena cha jóyëngacñana. Pero tšëngaftanga aíñe cha šmontsábuatma. Cha tšëngaftangaftaca entsemna, y tšëngaftangbe ainaniñe sempre echanjëftsiyena.

<sup>18</sup> “Atše ndoñe quebocháisabashejuana, mo uajchonga cuenta chašmotsemnama. Tšëngaftangbioye chanjésabo. <sup>19</sup> Muentšana baseftaytese, chë nye quem luarama enójuabnaye entšanga ndoñe más quešmochátonýaye; pero tšëngaftangna aíñe, atše cachiñe šmochántinýe. Atše ainá chántsemna, chíyeca tšëngaftanga átšeftaca tšabe vida šmochántsebonna. <sup>20</sup> Chë Uámana Espíritu tšëngaftangbe ainaniñe chašmojóyëngacñe ora, tšëngaftanga šmochántsetatšëmbo, atše atšbe Taitábeñe nye canýacá tsmënama; cachcá, tšëngaftanga šmochántsetatšëmbo, tšëngaftanga átšeftaca cachcá nye canýacá šmomnama y átšnaca tšëngaftangaftaca. <sup>21</sup> Nda totátšëmbo ntšamo atše tijamandacá y siempre chca tojtsama, cha ndegombre šojtsebobonshana. Nda átšbioye šojtsebobonshana, chábioye atšbe Taitánaca bochántsebobonshana. Atšnaca cha chántsebobonshana, y nda atše tsmënama cha chanjinýinýiye ca” —Jesús tojánayana.

<sup>22</sup> Chora, inye Judas, ndoñe Judas chë Iscariote, Jesúsbioye tbojaniana: —Bëngbe Utabná, ¿ntšamo chca yojtsemna, nye bënga šochjínýanýiye ntšamo cach aca comnama, y nyetsca quem luarentšëngbioye ndoñe ca?

<sup>23</sup> Chora Jesús tbojanjuá: —Nda atše šojtsebobonshana, ntšamo atše sëntsoyebuambnacá echanjama. Atšbe Taitánaca chábioye bochántsebobonshana, y bëndata chábioye fchanjabo y chábeñe vida fchantsebonna. <sup>24</sup> Nda ndoñe šontsebobonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nye atšbe juábnaca quenátsmëna, sinó chë Taitá, chë šonjichmó chabe juábnaca.

<sup>25</sup> “Atše cabá tšëngaftangaftaca sëntsemnëntscuana, lempe quem soyëngama sëntsoyebuambná. <sup>26</sup> Chë Uajabuachaná, chë Uámana Espíritu, atšbe impadanánaca atšbe Taitá bochanjíchmuá. Cha lempe cmochántsabuatambaye, y echanjama nyetsca chë tcbonjúuyana soyëngama chašmuatenójuaboma.

<sup>27</sup> “Chë atšbe ainaniñe puerte tšabe ebionana tšëngaftangbiama šcuétseshjona, cbetsatšatá. Chë nye quem luarama enójuabnaye entšanga cmondbétsatšatnaye soyëngcá ndoñe quenátsmëna, chë atše cbontsatšatná ainaniñe puerte tšabe ebionana. Ainana tsetšanënga ndoñe matsmënana, ni matauatjëngana. <sup>28</sup> Ya šmonjouena ntšamo tcbonjúuyancá: ‘chanjá y tšëngaftangbioye chanjésabo’. Tšëngaftanga atše šmojtsebobonshánëse, šmattsóyejuaye atše chë Taitábioye jama šojtsemnama, er chë Taitá atšbiama más bëtsá endmëna. <sup>29</sup> Quem soyënga tcbonjúuyana, cabá ndoñe chca tonjopasá ora; as, chca chaojopasá ora, chiñe jenójuaboyëse átšbeñe chašmotsošbuáchema.

<sup>30</sup> “Chë quem luarentša bacna soyënga mandayá endabó; chíyeca atše ya ndoñe bëtscá tšëngaftangaftaca quichaisóyebuambaye. Pero cha tondaye quenátobena atše jabórlana. <sup>31</sup> Masque cha chca endmëna, chca entsemna, atše chë Taitábioye tsbobonshánama quem luarentša entšanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanéyana.

## 15

### *Jesús yomna mo chë tšabe uvas betiycá*

<sup>1</sup> Mëntšanaca Jesús tojánayana: “Atše sëndmëna mo chë tšabe uvas betiycá, y atšbe Taitá Bëngbe Bëtsá chë tšabe uvas betiye inýenacá. <sup>2</sup> Chë inýená, chë uvas betiyentša buacuafjënga ndëshajuanëfjënga jtsebuácuëtsetšana; pero chë uvas betiyentša buacuafjënga shajuanëfjënga jtsobolímpiana, bëtscá chaotseshájuanama.

Nda ndoñe tontsama ntšamo Bëngbe Bëtsá tojtsebošcá, jtsemnana mo chë ndëshajuana buacuafjèngcá; y chë causa, chë Taitá chábioye corente bochantsecastíga. <sup>3</sup> Tšëngaftanga šmonjouena ntšamo tijayancá; bëtscá chca šmontsama. Chíyeca mora tšëngaftanga šmontsemna mo chë limpiana y shajuana buacuafjèngcá. <sup>4</sup> Atšeftaca cánýiñe mo canýacá šmochtsemna y atše tšëngaftangafácna. Chë buacuafja uvas betiyentšana juanánëfja ndoñe ntsobenana nýe cachabe ponto jashájonana. Cachcá, tšëngaftanga átšeftaca ndoñe cánýiñe mo canýacá šmontsemnëse, ndoñe šmattsobena Bëngbe Bëtsabiana bëtscá soyënga jamama.

<sup>5</sup> “Atše chë tšabe uvas betiycá sëndmëna y tšëngaftanga chë buacuafjèngcá. Nda átšeftaca cánýiñe mo canýacá tojtsemna y atše cháftacnaca, cha Bëngbe Bëtsabiana bëtscá soyënga echanjama, mo canýe buacuafja becá tojtseshajuancá. Er, tšëngaftanga atšbe uajabuáchenana ndoñe šmontsebomnëse, átšeftaca cánýiñe mo canýacá ndoñe šmontsemna causa, tondaye šmattsobena jamama. <sup>6</sup> Canýa átšeftaca cánýiñe mo canýacá ndoñe tontsemnëse, cha jtsemnana mo canýe buacuetétšena buacuafja, utšënëfja y buashánëfjácá. Chca buacuafjènga, entšanga jtsatbanana, íñeshoye jtsëtšenana y chentše jtsejuinýiyana. Cachcá, nda ndoñe átšeftaca cánýiñe mo canýacá tontsemna, ndoservená jtsemnana y luaroca cha mochantsesegóra.

<sup>7</sup> “Tšëngaftanga átšeftaca cánýiñe mo canýacá šmojtsemna y ntšamo atše tijayancá šmojtsamëse, lempe ntšamo šmojtsebošcá šmochjotjañe, y lempe šmochanjóyëngacñe. <sup>8</sup> Chë shajuana buacuafjèngcá tšëngaftanga chašmojtsemna ora, šmochanjínýanýiye atšbe Taitá corente bëtscá y obená yomnama. Y chca, tšëngaftanga atšbe ndegombre uatsjéndayënga šmochántsemna. <sup>9</sup> Ntšamo chë Taitá šondbobonshancá, átšnacá cachcá tšëngaftanga cbondábabuanýeshana. Chíyeca, šmochtsiyena atšbe bonshánama jtsejuabnayëse. <sup>10</sup> Atše sëndama ntšamo atšbe Taitá šondëmandacá. Chíyeca atše sëndoyena chabe bonshánama jtsejuabnayëse. Cachcá tšëngaftángnaca, ntšamo atše cbontsamëndacá šmojtsamëse, atšbe bonshánama jtsejuabnayëse šmochantsiyena.

<sup>11</sup> “Atše chca cbontsëtsësná, chë atše séntsebomna oyejuayana tšëngaftángnaca chašmotsebomnama, y tšëngaftanga puerte chašmotsóyejuama. <sup>12</sup> Mëntšá cbetsamëndá: Ntšamo atše cbondababuanýeshancá, cachcá šmochtsenbobonshana. <sup>13</sup> Chë chabe amiguëngbiana tojóbanabiana, ndocna quenátobena chabiana más bonshánana jtsebomnana. <sup>14</sup> Ntšamo atše tijamandacá tšëngaftanga šmojtsamëse, atšbe amiguënga šmochántsemna. <sup>15</sup> Chë oservená ndoñe ntsetatšëmbuana ndayá chabe nduiño tojt-samama. Chíyeca atše tšëngaftanga oservénënga ca ndoñe quecbatëtsësná. Morscana mëntšá cbontsëtsësná: ‘Tšëngaftangna atšbe amiguënga šmontsemna ca’, er lempe ntšamo atšbe Taitábentšana tijuatsjinýcá, tšëngaftanga tcbonjinýanýe. <sup>16</sup> Tšëngaftanga ndoñe atše chešmatábuayana, pero atše añe tšëngaftanga tcbonjabacacá y tcbonjebuáyana, Bëngbe Bëtsabe trabajo jamama; y chca, mo canýe betiye sempre tojtse-shajuana y chë shajuana ndocna te tontsopochocacá, tšëngaftanga chašmotsemnama. Chca, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye. <sup>17</sup> Mëntšá atše cbetsamëndá: Šmochtsenbobonshana ca” —Jesús tojanéyana.

*Jesús y chabe entšanga, chë nýe quem luarama enójuabnayëngbiana uaboyëñjanënga*

<sup>18</sup> Mëntšánaca Jesús tojánayana: “Pero chë nýe quem luarama enójuabnaye entšanga tcmojtsëbuayënjëse, šmochjenójuaboje, natsana chënga atše šmonjanáboyënjama. <sup>19</sup> Tšëngaftanga, chë nýe quem luarama enójuabnaye entšanguentšana šmojtsemnëse, chënga cmattsababuanýeshana cachëngbengbioycá. Pero tšëngaftanga ndoñe chë nýe quem luarama enójuabnaye entšanguentšana quešmátsmëna, y atšna, chë quem luare oyenënguentšana tšëngaftanga tcbonjabacacá. Chíyeca chë nýe quem luarama enójuabnaye entšanga tšëngaftanga cmontsëbuayënja. <sup>20</sup> Šmochjenójuaboje ntšamo tcbonjáuyanama: ‘Chë oservená chabe nduiñbiana ndoñe más uamaná quenátsmëna ca’. Chënga monjánama atše chaisufrima; tšëngaftángnaca chašmotsesufrinama

mochántsama. Entšanga ntšamo atše tijayanentšana ntsachetšá tmojtsamcá, cachcá chënga mochántsama ntšamo tšëngaftanga chašmojtsëtsëtsná chentšana. <sup>21</sup> Chë chacmojtsëbuayënjënga, chë šojichmó cha ndoñe quematábuatma. Chíyeca chënga lempe chca cmochanjáborlaye, atšbe causa.

<sup>22</sup> “Atše ndoñe matijabo y chënga ndoñe matijáuyanëse, ndegombre ndoñe bacna soye mattsebmoma. Pero mora, chëngbe bacna soyëngama chënga ndoñe quemátobena jayanana, ‘¡Chca fsënjama ntsetatšëmbcá ca!’ <sup>23</sup> Nda atše šojtsáboyënja, atšbe Taitábioynaca jtsáboyënjana. <sup>24</sup> Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebmoma. Pero mora, masque ntšamo sënjamcá tmonjinjëse, chënga atše šmontsáboyënja y atšbe Taitábioynaca. <sup>25</sup> Chca chënga montsama, ntšamo chëngbe leyënguiñe enduabemancá cachcá chaopasama. Chiñe mëntšá endayana: ‘Nye tondayama chënga šmonjanáboyënja ca.’

<sup>26</sup> “Atše, atšbe Taitábentšana chë Uajabuachaná y añemuayá tšëngaftangbioye chanjíchmu. Cha chë Uámana Espíritu endmëna, chë nyetsca soyënguiñe ntšamo ndegombre yomncá oyebuambnayá. Cha endmëna chë Taitábentšana ichmoná; y cha lempe atšbe tšabe soyënga cmochantsëtsësnaye. <sup>27</sup> Chorscana, tšëngaftángnaca atšbiam entšanga šmochantsëtsësnaye, er tšëngaftanga átšeftaca šmondëtsemna, entšanga jábuayenama atše sënjanbojatsé orscana ca” —Jesús tojánayana.

## 16

<sup>1</sup> Mëntšánaca Jesús tojánayana: “Atše quem soyënga cbontsëtsëtsná, tšëngaftanga átšbeñe ošbuáchiyana ndoñe chašmondájbanama, atšbe causa chašmojtsesufrina ora. <sup>2</sup> Chëngna, chë judiëngbe enefjuana yebnënguentshana cmochantëbuacana. Chca tempo chaojobuache ora, chë tšëngaftanga chacmojtsëbáyënga mëntšá mochántsejuabnaye: ‘Bënga tšabá tmonjama ca. Ntšamo Bëngbe Bëtsá yojtsebošcá, cachcá bënga tmonjama ca.’ <sup>3</sup> Chënga, chë Taitá Bëngbe Bëtsá ndoñe quematábuatma, y átšbioye cach ndoñe. Chíyeca, chca cmochanjáborlaye. <sup>4</sup> Atše chca tšëngaftanga cbontsëtsëtsná, ntšamo tcbonjáuyanama chašmuenójuaboma, chca tempo chaojobuache ora ca” —Jesús tojánayana.

### *Ndayá chë Uámana Espíritu inétsama*

Mëntšánaca tojánayana: “Entšanga jábuayenama sënjanbojatsé orscana, chë echanjopása soyëngama ndoñe quecbënjatanëtsëtsná, er atše tšëngaftangaftaca sënjëtsemna. <sup>5</sup> Pero morna, chë šojichmó cha yomnoye chantá; y tšëngaftanguentsá ndocná šochanjatjaye, ‘¿ndëmoye cojtsá ca?’ <sup>6</sup> Mora, tšëngaftangbe ainana ngmënac entsemna, atše chca tcbonjáuyana causa. <sup>7</sup> Pero ndegombre šcuayana: Atše chanjá y chca tšëngaftangbe tšabiam echantsemna. Atše ndoñe quetsjase, chë Uajabuachaná y añemuayá ndoñe tšëngaftangbioye queochátabo. Pero aíñe chanjá, y chora cha tšëngaftangbioye chanjíchmu. <sup>8</sup> Cha chaojášhango ora, echanjama quem luarentša entšanga corente chamotsetátšëmbo ndayá ndegombre yomna bacna soyënga jtsamana, ndayá ndegombre yomna chë Bëngbe Bëtsabe bominiñe tšabia jtsemnana, y ndayá yomna chë Bëngbe Bëtsá entšangbiam jayanana tšabá o ndoñe tšabá tmonjamama. <sup>9</sup> Entšanga átšbeñe ndoñe quematošbuaché. Chíyeca chë Uajabuachaná echanjama chënga corente chamotsetátšëmbo ndayá ndegombre yomna chë bacna soyënga jtsamana. <sup>10</sup> Chë Taitábioye chanjá y atše ndoñe más quešmochátinje. Chíyeca chë Uajabuachaná echanjama chënga corente chamotsetátšëmbo ndayá ndegombre yomna Bëngbe Bëtsabe bominiñe tšabia jtsemnana. <sup>11</sup> Quem luarentša bacna soyënga mándayabiam Bëngbe Bëtsá ya tonjayana, ntšamo cha tojamama ndoñe tšabá yontsemna ca y nyetsca tescama castiganá chaotsemna ca. Chíyeca chë Uajabuachaná echanjama entšanga corente chamotsetátšëmbo, ndayá ndegombre yomna chë Bëngbe Bëtsá entšangbiam jayanana tšabá o ndoñe tšabá tmonjamama.

<sup>12</sup> “Atše cabá ba soyënga séntsebmoma tšëngaftanga jáuyanama. Masque chcasna, mora tšëngaftanga ndoñe quešmátobena chë soyëngama josértana. <sup>13</sup> Pero chë Uámana Espíritu, chë nyetsca soyënguine ntšamo ndegombre yomncá oyebuambnayá, chaojáhjango ora, lempe ntšamo ndegombre yomncá cmochanjabuatambá. Cha ndoñe nýe cachabe juábnaca queochátoyebuambnaye. Ntšamo chë Taitá chábioye tbojauyancá, tšëngaftanga cachcá cmochanjáuyana, y cha cmochanjábuayenaye ntšamo yochjopásama. <sup>14</sup> Atšbe soyënguentšana cha echanjójyëngacñe, y cach soyëngama cmochanjabuatambá. Chcase cha cmochanjínyanýiye atše bëtšá y obená bëtsemnama. <sup>15</sup> Lempe ntšamo chë Taitá endbomncá, atšbe soyëngnaca endmëna. Chýyeca atše tcbonjáuyana, chë Uámana Espíritu atšbe soyënguentšana yochjójyëngacñe y cach soyëngama cmochjabuatambá ca.”

<sup>16</sup> “Baseftayté y atše ndoñe más quešmochátinýe. Inýe baseftayté y cachiñe šmochantétinýe ca” —Jesús tojanéyana.

*“Tšëngaftangbe ngménana, oyejuayana echanjóbema”*

<sup>17</sup> Chora Jesusbe básefta uatsjëndayënga imojtsentjanaye: —¿Ntšamo yojsentšáyana, chë “baseftayté y atše ndoñe más quešmochátinýe, y inýe baseftayté y cachiñe atše šmochantétinýe, er atše chë Taitábioye chanjá ca”? <sup>18</sup> ¿Ntšamo yojsentšáyana, chë “baseftayté ca”? Ndoñe quemuátstatšëmbo ntšamo yojsentšáyanama ca —chënga imojtsichamo.

<sup>19</sup> Jesús yojsentšátšëmbo chënga chca jatjayama imojtsebošama, y tojanéyana: —Atše tcbonjáuyana: “Baseftayté y atše ya ndoñe más quešmochátinýe, y inýe baseftayté y cachiñe atše šmochantétinýe ca.” ¿Chë soyëngama šmojsentjaná ntšamo stsentšáyanama? <sup>20</sup> Ndegombre šcuayana: Tšëngaftanga šmochanjenóbošachna y puerte ngménënga šmochántsemna, pero chë nýe quem luarama enójuabnaye entšanga corente oyejuayënga mochántsemna. Masque tša ngménënga šmochántsemna, chentšana tšëngaftangbe ngménana, oyejuayana echanjóbema. <sup>21</sup> Canýe shembása tbojontšabuache šešona jónýnama ora, tša ngménaca cha jésemnana, puerte tbojtssetsetše causa. Chë šešona ya tojonýná ora, cha ndoñe ntsenójuabnayana chë tša ibuántsetšama. Canýe šešona quem luaroye cháúashjanguama chë shembása tojámayeca, chora cha tšabá y oyejuayájtsemnana. <sup>22</sup> Ndegombre, tšëngaftangnaca cachcá, chora tša ngménaca šmochántsemna. Pero atše tšëngaftangbioye chajésabo ora, atše šmochantétinýe y corente oyejuayënga šmochántsatšmëna. Y ndocná queochatobenaye chë oyejuayana jabuajuánana.

<sup>23</sup> “Chë te chaojáhjango ora, tšëngaftanga ndocá atše quešmochatstjaye. Ndegombre šcuayana, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye. <sup>24</sup> Méntšcoñama, atšbe Taitá tondaye chešmatotjañe atše jótšëmbonëse. Cha motjañënga y šmochanjójyëngacñe, y chca, bëtšcá oyejuayana šmochántsebmoma ca” —Jesús tojanéyana.

*Jesucristo, quem luarentše mandayábioye yëñjanayá*

<sup>25</sup> Méntšánaca Jesús tojánayana: “Chë soyëngama lempe cuentëngaca tšëngaftanga tcbonjáuyana; pero tempo echanjobuache, chora atše ya ndoñe más cuentëngaca queochátëtsësnaye; chë cuentna, puerte botamana lempe atšbe Taitabiamana cbochanjáuyana. <sup>26</sup> Chë tena, atše jótšëmbonëse, átšbeñe šmošbuachéyeca, atšbe Taitábioye šmochanjotjañe. Y atše cbéyana; chca, chë te ndoñe quešochatájaboto tšëngaftangbiamana atšbe Taitá jatsimpadánana. <sup>27</sup> Atše ndoñe quichatsimpadana, er cach Taitá tšëngaftanga cmondábabuanýeshana. Tšëngaftanga atše šmondobonshánama, y Bëngbe Bëtšábio-cana atše tijabama šmojtsošbuáchema, chë Taitá cmondábabuanýeshana. <sup>28</sup> Atše chë Taitábio-cana sënjabocna y quem luaroye sënjabo. Pero mora quem luare chanjéftse-boshjona atšbe Taitábioye jtama ca” —Jesús tojánayana.



<sup>29</sup> Chora chabe uatsjéndayënga tmojanianyana: —Mora ya ndoñe cuenténgaca queca-toyebuambná, chíyeca lempe paselo josértama bëngbiana entsemna. <sup>30</sup> Mora fséntsetatšëmbo aca nyetsca soyëngama cotatšëmbuama, y ndoñe quenátsiyta ndocná aca chacmátstjanama, er aca chëngbe juabnënga jtsabuatmana, chënga cabá aca ndëtjaye ora. Chíyeca bënga fséntsošbuaché aca Bëngbe Bëtsábiocana tcojabama ca —chënga tmojanianyana.

<sup>31</sup> As Jesús tojanéyana: —¿Mora chiñe šmojtsošbuaché ca? <sup>32</sup> Ya tempo tojobuache y cam ora entsemna, tšëngaftanga nyetsquénache šmochanjuáshana y atše nýe canya šmochanjéseboshjona. Pero atše ndoñe nýe canya quichátsmëna, chë Taitá átšeftaca entsémnayeca. <sup>33</sup> Atše lempe quem soyënga cbontsëtsëtsná, tšëngaftangbe ainaniñe tšabe ebionana chašmotseboimnana, átšeftaca cánýiñe mo canýacá jtsemnëse. Quem luarentše šmochanjasufrina; pero añemo šmochtseboimna, atše ya chë quem luarentša mandayá sënjayëñjaná ca —Jesús tojánayana.

## 17

### *Jesús chabe uatsjéndayëngbiana Bëngbe Bëtsábioye tbojanimpadá*

<sup>1</sup> Jesús chë soyënga tojánayanentsana, celoye tojanontješé y Bëngbe Bëtsábioye tbojanianyana: “Taita, atšbe te ya tojobuache. Minyanýé, atše acbe Uaquiñá, corente bëtsá y obená bëtsemnana. As, atše acbe Uaquiñá, aca corente bëtsá y obená comnana chainyanýema. <sup>2</sup> Mora aca nyets obenana šconjatšetá nyetsca entsángbeñe, nyetscanga chë atšbiana tcojábacacanga chë nyetsca tescama yomna tšabe vida chamotseboimnana atše chaimama. <sup>3</sup> Chë nyetsca tescama yomna tšabe vida jtseboimnana endmëna aca, chë nýe canye y ndegombre Bëngbe Bëtsá jtsabuatmana, y atše Jesucristo, acbe ichmoná.

<sup>4</sup> “Lempe ntšamo šconjamandacá atše sënjapochocá, y chca quem luariñe sënjama aca corente bëtsá y obená comnana jinýanýiyama. <sup>5</sup> Taita, quem luare cabá ndoñe quenjatsmëna ora, aca tconjaninýanýé atše corente bëtsá y obená ácaftaca bëtsemnana. Mora moma atše cachcá ácaftaca chaitsemnana.

<sup>6</sup> “Aca quem luarentša entsanguentsana quem boyabásenga tconjabacacá y atšbiana šconjinýinýé. Atše chënga sënjanýanýé ntšamo ndegombre aca comnana. Chënga acbe entsanga mondmëna; y acna, chë atšbiana chënga šconjinýinýiyá. Chënga acbe palabra tmonjouena y tšabá tmonjoyeuná. <sup>7</sup> Chíyeca chënga mondetatšëmbo, lempe ntšamo atše tsboimncá ácbentsana tijóyëngacñama. <sup>8</sup> Atše chënga sënjáuyana ntšamo aca šcojauyancá, y chënga montsošbuaché chë atše sënjauyaniñe. Chíyeca, chënga ndegombre mondetatšëmbo atše acbiocana tijabama, y montsošbuaché aca chë atše šcojichmó cha comnana.

<sup>9</sup> “Atše chëngbiana cbontseimpadana. Chë nýe quem luarama enójuabnaye entsangbiana ndoñe quebátsimpadana, pero aíñe chë atšbiana šcojinýinýiyëngbiana, er chënga acbe entsanga mondmëna. <sup>10</sup> Lempe ntšamo atše tsboimncá, acbiámnaca endmëna; y cachcá, lempe ntšamo cobomncá, atšbiámnaca endmëna. Acbengbe vidéngaca aca tcojinýanýé atše corente bëtsá y obená bëtsemnana.

<sup>11</sup> “Atše ndoñe quem luarentše quešocháisetotona, pero chënga aíñe cabá camuentše mochanjéftsemna. Atše chantá ácaftaca jtsatsmënama. Uámana Taitá, chë atšbiana šconjinýinýiyënga acbe obenánaca cochtsanýena. Chca ntšamo bëndata mo canýacá bondmëna, chëngnaca cachcá chamotseboimnana. <sup>12</sup> Atše chëngaftaca séntsemnëntscuana, chënga séntsanýena, aca šconjatšetá obenánaca. Atše chënga sëndánýena, y ni canya queochátsmëna infiernoca pochocaná, nýe chë infiernoca pochocaná jtsemnana ibomná chana aíñe, ntšamo acbe uabemana palabrënguiñe endayancá, cachcá chaotsemnana.

<sup>13</sup> “Morna chë aca condmënoye chantá; pero atše cabá quem luariñe séntsemnëntscuana chca chënga séntseboimna, chca, chë atše séntseboimna puerte bëtscá oyejuayana chëngnaca chamotseboimnana. <sup>14</sup> Atše chënga sënjáuyana ntšamo aca

šconjauyancá. Ntšamo atše ndoñe quetsátsmëna chë nÿe quem luarama enójuabnaye entšanguentšá, cachcá, chënga cach ndoñe quemátsmëna. Chíyeca, chë nÿe quem luarama enójuabnaye entšanga chënga montsëbuayënja. <sup>15</sup> Atše ndoñe quecbát-simpadana, chënga quem luarentšana chacúbuacanama; pero aíñe, nÿetsca bacna soyënguentšana chacuatsebacama. <sup>16</sup> Ntšamo atše ndoñe quetsátsmëna chë nÿe quem luarama enójuabnaye entšanguentšá, cachcá, chënga cach ndoñe quemátsmëna. <sup>17</sup> Cochjama chënga acbe entšanga chamuétsemnana, y chca, nÿe acbiama vida chamotsebomna. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre endmëna. <sup>18</sup> Ntšamo aca quem luaroye šconjanichmocá, cachcá átšnaca chënga sentsachamná, quem luare entšanga jábuayenama. <sup>19</sup> Chëngbiama atše cachiñe mëntšá cbëyana: Atše nÿe acbiama sëndmëna. Y chca, chëngnaca, ntšamo acbiama ndegombre yomncá jtsóyebuambnayëse acbe entšanga chamotsemna, y chca, nÿe acbiama vida chamuétsebomna, ntšamo ndegombre yomncá chënga imoyenama.

<sup>20</sup> “Pero nÿe chëngbiama ndoñe quecbát-simpadana, sinó chë átšbeñe mochtsošbuáchiyëngbiamnaca, chë atšbiama šconjínÿinÿiyënga, chëngbioye atšbiama ínÿenga chamojtsabuayiná ora; <sup>21</sup> as chënga nÿetscanga cánÿiñe mo canÿacá chamotsemnana. Ntšamo aca, Taita, átšeftaca cánÿiñe mo canÿacá bondmëna y átšnaca ácaftaca, cachcá chëngnaca cánÿiñe mo canÿacá bëndátaftaca chamotsemnana cbontseimpadana. Y chca, quem luarentša nÿetsca entšanga, atše šcojichmoma chamotsošbuáchema. <sup>22</sup> Ntšamo chë obenana y uámanana šconjatšetacá, cachcá átšnaca chënga sënjatšatá. As, ntšamo bëndata cánÿiñe mo canÿacá bondmëna, chëngnaca cachcá cánÿiñe mo canÿacá chamotsemnana. <sup>23</sup> Atše chëngbe ainaniñe séntsemna, y aca átšeftaca cánÿiñe mo canÿacá bondmëna; as, chëngnaca nÿetsca soyënguiñe cánÿiñe mo canÿacá chamotsemnana. Y chca, quem luarentša entšanga chamotsetátšëmbo aca šcojichmoma, y chamotsetátšëmbo ntšamo atše šcondbobonshancá, chëngnaca cachcá condábabuanÿeshanama.

<sup>24</sup> “Taita, atšbiama chënga šconjínÿinÿiye. Atše mëntšá séntseboše: chë atše chántsemnoca, chëngnaca chamotsemna, y chentše, chë šconjatšetá obenana y uámanana chënga chámuinÿe. Quem luare cabá ndoñe quenjatsmëna orscana, šconjánbobonshana; chíyeca, cachora tconjaninÿanyé atše corente bëtsá y obená bëtsemnana. <sup>25</sup> Taita, nÿetsca soyënguiñe tšabá amá, masque chë nÿe quem luarama enójuabnaye entšanga ndoñe quecmatábuatma, atše aíñe cbonduábuatma, y quem boyabásenga montsetátšëmbo, aca comna chë šcojichmó cha. <sup>26</sup> Atše chënga sënjinÿanyé ntšamo ndegombre aca comnana, y más chanjínÿanÿiye; chca, ntšamo šcondbobonshancá, chëngnaca cachcá chamotsenbobonshánama y atše chëngbe ainaniñe chaitsemnana ca” —Jesús tojánayana.

## 18

### *Uayayënga Jesús tmojánishache*

(Mt 26.47-56; Mc 14.43-50; Lc 22.47-53)

<sup>1</sup> Chë soyënga Jesús tojëftsanayanentšana, chabe uatsjëndayëngaftaca tojëftsanbocna, chë binche béjaye Cedrón ca uabániye chenguana jama. Chentše inamna canÿe tjashetema; y Jesús chabe uatsjëndayëngaftaca choye tojánamengo. <sup>2</sup> Y Judas, chë Jesús uayayëngbe cucuatšíñe boshjuaná, tšabá chë luare yojanábuatma, er Jesús y chabe uatsjëndayënga ba soye chentše imojánenefjuana. <sup>3</sup> Chora Judas tojánashjango, y cháftaca ba soldadënga y básefta Bëngbe Bëtsabe bëts yebnoca josticiënga; chënga imojamna chë bachnangbe amëndayënga y fariseungbe ichmónënga; nÿetscanga uajuinÿanëshangaca, lamparëshangaca y espadéjangaca uajátënga.

<sup>4</sup> Jesusna yojtsetátšëmbo lempe ntšamo cha yochjanpásama; chíyeca, natsanoye tojánbocna y chë entšanga tojanéyana: —¿Nda šmojtsenguá ca?

<sup>5</sup> Y chënga tmojanjuá: —Jesús, chë Nazaretocá fsëntsenguá ca.

As Jesús tojanéjua: —Atše cha sëndmëna ca.

Y Judas, chë boshjuaná, chánaca chë entšangafataca yojtsemna. <sup>6</sup> Jesús tojanéyana: “Atše cha sëndmëna ca”, y cachora chë entšanga tmojtantostëtšánanga y fshantsoye tmojánshajaye.

<sup>7</sup> Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

<sup>8</sup> As Jesús tojanéyana: —Ya tcbonjúyana: “Atše cha sëndmëna ca.” Atše šmojtsenguasna, mënga cachcá šmochjónyaye chamotsóñengama ca.

<sup>9</sup> Chca tojanopasá, ana ntšamo Jesús tojanayancá cachcá chaotsemnama, chë “Atšebe Taitá Bëngbe Bëtsá, chë šconjínýinyiye entšanguentšana ni canya pochocaná queochátsmëna ca”.

<sup>10</sup> Simón Pedro canye espadëja inasëngbuájonýana; asna, tojanenosëngbotëntšena y chë bachnangbe más uámana amëndayabe canye oservenábioye catsbioica matscuasë tbojtsanéjtjango. Chë oservená Malco ca inauabaina. <sup>11</sup> As Jesús, Pédrëbioye tbojanianyana: “Acbe espadëja matosëngbuájonýá. Ntšamo atšbe Taitá Bëngbe Bëtsá tojanmandacá, chë atše puerte ngmënanana jtsebomnama, ¿ndoñe chca chaondëtsemna ca?”

*Jesús, Anasbe yebnoca*

*(Mt 26.57-58; Mc 14.53-54; Lc 22.54)*

<sup>12</sup> Chentšana chë soldadënga, chëngbe amëndayá y Bëngbe Bëtsabe bëts yebnoca josticiënga Jesús tmojánishache y tmojanëcuébatsëca. <sup>13</sup> Natsanëna, Anás, Caifasbe uambén taitábioye Jesús tmojanánatse. Caifás chë uata inamna chë bachnangbe más uámana amëndayá. <sup>14</sup> Caifás yojamna nda judiënga tojanéyana: “Tšëngafangbiama más tšabá entsemna canye boyabása Israeloca entšangbiama chaóbana ca.”

*Pedro tojanayana Jesúsbioye ndoñe bonjanabuátma ca*

*(Mt 26.69-70; Mc 14.66-68; Lc 22.55-57)*

<sup>15</sup> Simón Pedro y inye uatsjendayá Anasbe yebnoye Jesús imojtséstona. Chë inye uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúseftaca chabe chashjóntscoñe jashjanguana. <sup>16</sup> Pero Pédrëna nye shjoca, amashjuanentše tojanoquedá. Chcasna, chë inye uatsjendayá tojánbocna y chë bëšáša ebtafjuana shembásafataca tojanoyebuambá. Chora Pedro tbojanémashëngo. <sup>17</sup> As chë shembása Pédrëbioye tbojanianyana: —¿Acnaca ndoñe chë boyabásabe uatsjendayá condmëna ca?

Y Pedro tbojanjuá: —Ndoñe; atše cha ndoñe quetsatabuatma ca.

<sup>18</sup> Tša yojtsesësna causna, chë oservenënga y chë josticiënga shjoca tmojanniñe y chentše imojtóšboniye. Y Pédrënaca chëngafataca yojtsešbonena.

*Ntšamo chë bachnangbe más uámana pasado amëndayá, Jesúsbioye tbojantjá*

*(Mt 26.59-66; Mc 14.55-64; Lc 22.66-71)*

<sup>19</sup> Chora, chë bachnangbe más uámana pasado amëndayá tojanontšë Jesús jatjayama chabe uatsjendayëngbiama y ndayá cha entšanga yojánabuatambamnaca. <sup>20</sup> Y Jesús tbojanjuá: —Atše nyetsca entšangbe delante sënjoyebuambá. Sempre chë entšangbe enefjuana yebnënguenache sëndabuatambá, y Bëngbe Bëtsabe bëts yebnóc-naca, nyetsca judiënga mondbétsenefjuanentše; y chca, iytëmencá tondaye chiyatoyebuambá. <sup>21</sup> ¿Ndáyeca chca šcojtsetjaná? Atšbe palabra tmojouenënga májtjaye, as chënga chacmëyana ntšamo atše tijáuyanama. Chënga mondétatšëmbo ntšamo atše tijayancá ca —Jesús tbojanjuá.

<sup>22</sup> Jesús chë soyënga tojánayana ora, canÿe josticio chentše yojtsemná, Jesúsbioye tbojanjuebjantšetá y tbojanianyana: —¿Chca chë bachnangbe más uámana amëndayá cuanjojuá ca?

<sup>23</sup> Y Jesús tbojanjuá: —Ndoñe tšabá tijayanësna, šmëyana ndayentše chë podesca palabra yojtsemna; y tšabá tijóyebuambasna, ¿ndáyeca šcojajuebjantšetá ca?

<sup>24</sup> Chentšana, Anás tojanmandá, chë bachnangbe más uámana amëndayá Caifasbe yebnoye, Jesús batsëcná chamuánatsama.

*Pedro cachiñe tojánayana Jesúsbioye ndoñe bonjanabuátma ca*

*(Mt 26.71-75; Mc 14.69-72; Lc 22.58-62)*

<sup>25</sup> Chëntscuana, Pedro yojtsešbonena, tsanana chë iñe juachaca. Chora chë entsänga tmojantjá: —¿Aca ndoñe chabe uatsjendayënguentsá condmëna ca?

Y Pedro ndoñe ca tojánayana: —Atše ndoñe quetsátsmëna ca —cha tojánayana.

<sup>26</sup> Chora, chë bachnangbe más uámana amëndayabe canÿe oservená Pédrëbioye tbojanianyana: —¿Atše ndoñe cháftaca chë tjashetémoda tcbonjinÿe ca?

Chë oservená inamna chë Pedro tbojtsanmatstëtšabe pamillo.

<sup>27</sup> Y Pédrëna cachiñe ndoñe ca tojánayana, y cachora canÿe ngallo yojacánta.

*Jesús Pilatbe delante*

*(Mt 27.1-2, 11-14; Mc 15.1-5; Lc 23.1-5)*

<sup>28</sup> Chentšana, Caifasbe yebnentšana Jesús tmojanánatse chë romano mandadbe yebnoye. Ya yojtsebínÿana, y chë bëts yebnoye chë judiënga ndoñe tmonjánamashjna, er chënga imojtseboše chë Bashco saná jasama. Judiënga ndoñe imonjobena Bashco saná jasana, chca tempo canÿe ndoñe judiëbe yebnoye nda tojámashënguse. <sup>29</sup> Chíyeca Pilato tojánbocna y chënga tojanéyana: —¿Ndayá quem boyabásabe contra šmochjayana ca?

<sup>30</sup> Chora chë entsänga tmojanjuá: —Bacá uamaná ndoñe tontsemnëse, ndoñe matifjuánatse ca.

<sup>31</sup> As Pilato tojanéyana: —Tšëngaftanga matánatse, y ntšamo cach tšëngaftangbe leyinë iuayancá muabiana šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queftsátsbomna ndocná jóbama ca.

<sup>32</sup> Chca tojanopasá, ana ntšamo Jesús cachá jóbana tojanayancá cachcá chaotsemnama. <sup>33</sup> As Pilato cach yebnoye tojtanamáshëngo, Jesús tbojanchembo y tbojantjá: —¿Aca chë judiëngbe Rey cojtsemna ca?

<sup>34</sup> Y Jesús tbojanjuá: —¿Ntšamo šconjatjacá, cach aca chca cojtsejuabnáyeca chca yojtsemna o ínÿenga atšbiama tcmojacuentáyeca ca?

<sup>35</sup> Chora Pilato tbojanianyana: —¿Mo atše judío quetsmëna? Cach ácbioca entsänga y chë bachnangbe amëndayënga muentše tcmonjúshjango. ¿Ndayá tcojama ca?

<sup>36</sup> Chora Jesús tbojanjuá: —Atšbe jamándama luare ndoñe quem luarentše quenátsmëna. Aíñe tojtsemnësna, atšbe ústonënga muantsatsejaye atše chë judiëngbe cucuatšinë ndoñe chašmondoboshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

<sup>37</sup> As Pilato tbojanianyana: —¿As aca rey cojtsemna ca?

Y Jesús tbojanjuá: —Tšabá tcjayana; atše rey sëndmëna. Chama atše tijonÿná y quem luaroye tijabo; y atše sënjabo ndegombre soyëngama jabóyebuambayama. Y chca soyënga jtsamëse tmoyenënga, atše jtseyeunanana ca.

<sup>38</sup> Chora Pilato tbojanianyana: —¿Y ndayase chë ndegombre soye yomna ca?

*Jesusbiana tmojánayana chaóbana ca*

*(Mt 27.15-31; Mc 15.6-20; Lc 23.13-25)*

Chca tbojantjá chentšana, Pilato cachiñe tojánbocna judiëngaftaca jóyebuambayama, y tojanéyana: —Atše ni mo canÿe soye chiyátinÿena, quem boyabása castiganá chaotsemna ca jayanama. <sup>39</sup> Pero tšëngaftanga šmondétatšëmbo, Bashco fiestama atše canÿe utamená cachcá jëtsboshjonama. ¿Šmojtseboše chë judiëngbe Rey chjëtsboshjona ca?

<sup>40</sup> Chorna n̄jetsca entšanga cachiñe tmojanáyebuachena: —¡Ndoñe, cha ndoñe! ¡Barrabás matsboshjona ca!

Barrabasna can̄ye bacá uamana entšá inamna.

## 19

<sup>1</sup> Chora Pilato, Jesús tbojanánatse y tojanmandá chamotsetjanjama. <sup>2</sup> Y can̄ye coronésha uchmašéfjangaca chē soldadēnga tmojanapormá y Jesús tmojanabestšajó; y can̄ye shbuenda uafjatsenga entšayá mo reycá tmojanichētjo. <sup>3</sup> Chorna chēnga imo-jtsóbobecocnaye y jtsafchayama imojsatsētsnaye: “¡Bayté judiēngbe Rey cochtsemna ca!” Y imojtsejuebantšetaye.

<sup>4</sup> Pilato cachiñe tojánbocna y entšanga tojanéyana: —Šmochjouena; cha chan-juábocna, chē boyabása castiganá chaotsemna ca jayanama atše ni mo can̄ye soye ndoñe sēnjñyēnama chašmotsetatšēmbuama ca.

<sup>5</sup> As Jesús tojánbocna chē uchmašéfjangaca coronésha uabestšajoná y chē shbuenda uafjatsenga entšayá mo reycá uichētjoná. Y Pilato tojanéyana: —¡Muentše chē boyabása entsemna ca!

<sup>6</sup> Chē bachnangbe améndayēnga y chēngbe josticiēnga cha tmojánin̄ye ora, tmojanontsé uayebuáchana: —¡Motsecrucificá! ¡Motsecrucificá ca!

Chora Pilato tojanéyana: —Cach tšēngaftanga mánatse y šmochjacrucificá; atše ni mo can̄ye soye chiyátin̄yena quem boyabása castiganá chaotsemna ca jayanama ca.

<sup>7</sup> Chora chē judiēnga tmojanjuá: —Bēngna can̄ye ley fséndbomna, ntšamo chiñe endayancana, quem boyabása jóbanama bontsemna, Bēngbe Bētsabe Uaquiñá entsenobiamná causa ca.

<sup>8</sup> Pilato chca tojanuena ora, más yojsauatja. <sup>9</sup> Cachiñe chabe yebnoye tojanamáshēngo y Jesús tbojantjá: —¿Ndēmocá aca cmēna ca?

Pero Jesús ndocá tbojanjuá. <sup>10</sup> Chora Pilato tbojaninyana: —¿Ndoñe šcochanjojuá ca? ¿Ndoñe condétatšēmo, aca jacrucificama o jētsboshjonama atše tsobenama ca?

<sup>11</sup> As Jesús tbojanjuá: —Acbe obenana Bēngbe Bētsá ndoñe macmēnjánatšetase, tondaye cattsobena átšeftaca jamama; chíyeca, acbe cucuatšīñe šonjaboshjoná, acbiama más bēts bacna soye tonjama ca.

<sup>12</sup> Cach orscana Pilato yojsenguaye ntšamo jamana, jobenayama Jesús jētsboshjonama; pero chē judiēnga imotsáyebuache: —¡Chacojētsboshjonēsna, Césarbe amigo ndoñe condmēna! ¡Nda rey tojtsenobiamná chana, Césarbe uayayá jtsemnana ca!

<sup>13</sup> Pilato chē soyēnga tojanuena ora, chashjoye Jesús tbojanábocna. Pilato tojanótbema chabe puestentše tribunaloca. Chē tribunaloca chashjañna hebreo biyañe Gabata ca inauabaina, y endayana “ndētšbēngaca pormániñe ca”. <sup>14</sup> Bashco fiestama can̄ye te yojsájamna, y mo n̄yetsto ora yojtsemna. Chora Pilato chē judiēnga tojanéyana: —¡Muentše tšēngaftangbe rey entsemna ca!

<sup>15</sup> Pero chēnga tmojanáyebuachena: —¡Chaóbana! ¡Chaóbana! ¡Motsecrucificá ca!

As Pilato tojanatjá: —¿Tšēngaftangbe rey atše chjacrucificá ca?

Y chē bachnangbe améndayēnga tmojanjuá: —Bēngbe rey n̄ye César endmēna, ndocná más ca.

<sup>16</sup> Chentšana Pilato, chēngbe cucuatšīñe Jesús tbojánboshjona chamocrucificama y chē judiēnga cha tmojanánatse.

*Jesús tmojanacrucificá*

(Mt 27.32-44; Mc 15.21-32; Lc 23.26-43)

<sup>17</sup> Jesús tojánbocna chabe cruz tantšajónana y tmojanánatse can̄ye luaroye, “Obanabe Bestšashe ca” uabáinoye (hebreo biyañe Gólgota ca inauabaina). <sup>18</sup> Chentše cha tmojanacrucificá y in̄ye úatnaca cátoicoa tmojanacrucificá; Jesusna tsēntsaca. <sup>19</sup> Pilato tojanmandá can̄ye uabemana soye chē cruciñe chamuanjuama. Chiñe yojetsábemana:

JESÚS NAZARETOCÁ, JUDIËNGBE REY ca. <sup>20</sup> Y ba judiënga chë uabemana soye tmojanalía, er chë Jesús tmojancrucificá luare Jerusalenó béconana inamna, hebreo, latín y griego biyañe yojetsábemana. <sup>21</sup> Chca juabemama tojanmandáyeca, chë bachnangbe améndayënga Pilato tmojanianana: —Ndoñe matabiamnana “Judiëngbe Rey” sinó ntšamo cachá tojayancá, “Judiëngbe Rey atše sëndmëna ca”.

<sup>22</sup> Pero Pilato tojanéjua: —Ntšamo tijuábema cachá chaotsábemana ca.

<sup>23</sup> Chë soldadënga Jesús tmojancrucificá chentšana, chabe entšayangá tmojanájaca y cántañe tmojanajatá, nyetsca canta soldadëngbiama. Chabe cmešéjua tmojanaca; chéjuana yojanamna nduajonanéjua, nyetséjua uabianánéjua. <sup>24</sup> As chë soldadënga tmojánenianana: “Ndoñe matjuátanëca; más tšabana tsbanánoye mochjútšena, ndabiamna yochjuáquedama chaotsotatšëmbuama ca.”

Chca tojanopasá ana ntšamo Bëngbe Bëtsabe uabemana palabrengüiñe endayancá cachá chaotsemnama, chë “Atšbe entšayangá tmojatenájataye; atšbe cmešéjuamna tsbanánoye tmonjanétsena, ndabiamna juaquédama jtsotatšëmbuama ca.” Y lempe chca chë soldadënga tmojanma.

<sup>25</sup> Jesusbe cruz juachaca imojtsemna chabe mamá; chë mamabe quenata María, Cleofasbe shema; y María Magdalena. <sup>26</sup> Jesús chabe mamábioye tbojáninye, y chabe juachacna chë Jesusbe bonshana uatsjendayá yojtsemna. Chora chabe mamá tbojanianana: “Mama, chentše acbe uaqiñá entsemna ca.”

<sup>27</sup> Y chë bonshana uatsjendayá tbojanianana: “Chentše acbe mamá entsemna ca.”

Cach orscana, chë uatsjendayá chabe yebnentše Jesusbe mamábioye tbojanofja.

#### *Jesús tojanóbana*

(Mt 27.45-56; Mc 15.33-41; Lc 23.44-49)

<sup>28</sup> Jesús yojtsetátšëmbo ya lempe tojanchnënguama, chíyeca chentšana y ntšamo Bëngbe Bëtsabe uabemana palabrengüiñe endayancá cachá chaotsemnama, tojánayana: “Šontsajuendá ca.”

<sup>29</sup> Chentše inamna canye matbaja buajútjena untja vínoyeca. As, chë soldadënga canye esponjëshe chë vínoyeca tmojanfchecuacuá, canye hisopo niñëfjiñe tmojananguësëtjo y játsbanase, Jesusbe uayásoye tmojanbeconá. <sup>30</sup> Chë untja vínoye Jesús tojanofsé ora, tojánayana: “Ya lempe tocjochnëngo ca.”

Tojanotsejbé y tojanóbana.

#### *Canye soldado chabe lanzésaca costillaca Jesúsbioye tbojanashacuá*

<sup>31</sup> Bashco fiestama canye te yojsájamna, y chë judiënga ndoñe imontseboše chë crucificánënga cachentše chë ochnayté chamotsemnama, chë te puerte uámana te bétsemnayeca. As Pilato tmojanimpadá chë crucificánënga shecuatšënga jetsatcayama y chë cuerpënga chentšana jtsejuánama chaomandama. <sup>32</sup> As chë soldadënga tmojána y shecuatšënga imojtsatcacaye, natsana canya y chentšana chë inya, Jesúsfeftaca yojtsecrucificaná. <sup>33</sup> Pero Jesúsbioye tmojanobeconá ora, ya obaná tmojáninye; chíyeca chabe shecuatšënga ndoñe tmonjanatcacá. <sup>34</sup> Masque chca, canye soldado Jesúsbioye costillaca canye lanzésaca tbojanashacuá. Y cachora buiñe y búyeshe chentšana tonjanóbocna. <sup>35</sup> Chë mëntšá cuentayá chentše enjamna y tonjáninye, y ndegombre entsichamo; cha endétatšëmbo ndegombre yojsichámuama, chca, tšëngaftángnaca chiñe chašmotsošbuáchema. <sup>36</sup> Chë soyënga chca tojanopasá, ntšamo Bëngbe Bëtsabe uabemana palabrengüiñe endayancá cachá chaotsemnama. Chiñe endayana: “Ni mo canye betaše cha quemochatsëntšátca ca.” <sup>37</sup> Y ínyooca, Bëngbe Bëtsabe uabemana palabrengüiñe endayana: “Chë tmojenachentšá bominye mochanjabuájua ca.”

#### *Jesús tmojanatbontsá*

(Mt 27.57-61; Mc 15.42-47; Lc 23.50-56)

<sup>38</sup> Chë soyënga tojanopasá chentšana, José Arimateocá, Pilátbioye tbojanimpadá Jesusbe cuerpo jesocñama chabolesenciama. José inamna Jesusbe canye ustoná, masque nye iytëcana, chë judiëngbiama auatja causa. Pilato aíne tbojanlesenciá; as José tojána y Jesusbe cuerpo yojtsámibañe. <sup>39</sup> Nicodemo, chë ibeta Jesúsbioye tbojanbuachá, chánaca tojánashjango y tojanëyamba unga bnétsana kilo mirra y áloe enájuabnana. <sup>40</sup> As José y Nicodemo Jesusbe cuerpo tbojanca y tmojanandmaná chë botamana uanguëtse soyëngaca unétjona entšëjuangaca. Judiënga chca imnauamana, obaná juatbontsama ora. <sup>41</sup> Jesús tmojanrucificá luarentse canye base jajañe inamna, y chiñe canye tsëm cuevëshe, entšangbe pormánëshe, obanëngbiama; chëshiñe cabá ndocna obaná mondëjajo. <sup>42</sup> Asna, nye chentše Jesusbe cuerpo tmojansegorá, chë Bashco fiestama canye te yojtsájamna causa, y chë cuevëshe chë béconana inámnayeca.

## 20

### *Jesús tojtanayena*

(Mt 28.1-10; Mc 16.1-8; Lc 24.1-12)

<sup>1</sup> Chë inye semana bojatšenté, cabá cachëse, cabá ndëbinýna ora, María Magdalena chë cuevëshoye tojána y tojáninýe ínýoca yojtsemna chë cuevëshoye amashjuanentša ndëtšbé. <sup>2</sup> Asna, tojëftsánótjajo y tojána chë Simón Pedro y chë inye uatsjendayá, ndábioye Jesús tša ibnabobonshana ibojtsemnoye. Chora tojanéyana: “Bëngbe Utabnabe cuerpo chë cuevëshentšana tmojtsámibañe y ndayentše tmojtsejájoma ndoñe queftsátstatšëmbo ca.”

<sup>3</sup> Chora Pedro y chë inye uatsjendayá chentšana tbojëftsanbocna y chë cuevëshoye tbojánata. <sup>4</sup> Nyets útata ibojtsëchamana, pero chë inye uatsjendayá Pédrëbiamá más betscó tojanótjajo y natsana chë cuevëshoye tojánashjango. <sup>5</sup> Tojanotsejbé y chë chentše tmojanacjá entšëjuangá tojáninýe, pero choye ndoñe tonjánamashëngo. <sup>6</sup> Chentšana, Simón Pedro chabe ústonoye tojánashjango y chë cuevëshoye tojánamashëngo, y tojáninýe chë chentše tmojanacjá entšëjuangá. <sup>7</sup> Y chë Jesús juabestšëntsacjuama tojanaservé entšëjuana ndoñe chë inýájuangaca yontsamna, sinó ínýoca botamana uandmanánëjua. <sup>8</sup> Chora chë inye uatsjendayá, chë cuevëshoye natsana tojanashjanguá, choye tojánamashëngo. Tojáninýe y Jesús tojtanayenama yojtsanošbuaché. <sup>9</sup> Chéntscóñe chë útata cabá ndoñe yontsósertana ntšamo Bëngbe Bëtsabe uabemana palabrenguiñe endayancá, chë Jesús obanënguentšana jtayenama ibojamnama. <sup>10</sup> Chentšana chë uatsjéndayata chatbe oyenoye tbojtaná.

### *Jesús, María Magdalénbioye tbojánëbëbocna*

(Mc 16.9-11)

<sup>11</sup> Pero María chentše tojanoquedá, chë cuevëshe juachaca šachénaca; yojtsošachentscuana tojanotsejbé cuevëshoye jarrepárama. <sup>12</sup> Y tojáninýe uta angelotémata uafjantséjua uichëtjonata, Jesusbe cuerpo yojëftsejajóntše ibojtsetbemana. Canya tsëntšénëshoica y chë ínýana matsëskoica. <sup>13</sup> Chora chata tmojanianyana: —Shembása, ¿ndayama cošaché ca?

As cha tojanjuá: —Atšbe Utabná tmojtsámibañe, y ndayentše tmojtsejájoma ndoñe queftsátstatšëmbo ca.

<sup>14</sup> Chca tojánayana ora, tojanostëtšantješé y tojáninýe chentše Jesús yojtsemna, pero María ndoñe yontsetátšëmbo cha Jesús bëtsemnama. <sup>15</sup> Chora Jesús tbojanianyana: —Shembása ¿ndayama cošaché? ¿Nda conguá ca?

María yojtsejuabnaye chë boyabásana yojtsemna chentša base jajañe uaishanýa ca; chíyeca tbojantjá: —Bacó, aca tcojuambësna, šmëyana ndayentše cojtsejajó, as atše cha jesocñama ca.

<sup>16</sup> As Jesús tbojanianyana: —¡María ca!

Chora María chábioye tojanontješé y tbojanianyana: —¡Rabuni ca! (hebreo biyañe chca endayana “Buatëmbayá ca”).)

<sup>17</sup> Chora Jesús tbojaniyana: —Ndoñe šcatábojajo, er atše cabá ndoñe atšbe Taitábioye quetstétstsjua. Pero motsa atšbe catšátangbioye y cochjáuyana, atše stsetsjuá atše y tšëngaftangbe Bëtsábioye, atše y tšëngaftangbe Taitábioye ca.

<sup>18</sup> As María Magdalena tojána y Jesusbe uatsjédayënga tojanéyana cha chë Utabnábioye tbojáninye ca y cha chë palabrenga tojánayana ca.

*Jesús chabe uatsjédayënga tojánëbëbuacna*

(Mt 28.16-20; Mc 16.14-18; Lc 24.36-49)

<sup>19</sup> Tojanibétata ora, cach semana bojatšenté, chë uatsjédayënga tmojánenefjna canye luarentše, pero lempe tmojtanatame, chë judiëngbiama auatja causa. Chora Jesús tojánamashëngo, chëngbe tsëntsaca tojantsá y mëntšá tojanacheuá: “Chë atšbe ainaniñe tšabe ebionana tšëngaftangaftaca chaotsema ca.”

<sup>20</sup> Y chca tojanéyana ora, chabe cucuatšënga y costillaca tojaninýané. Chora chë uatsjédayënga oyejuayënga imojtsemna, chëngbe Utabná tmojáninýama. <sup>21</sup> As Jesús cachiñe tojanéyana: “Chë atšbe ainaniñe tšabe ebionana tšëngaftangaftaca chaotsemna. Ntšamo atšbe Taitá Bëngbe Bëtsá šojichmocá, átsnaca cachcá tšëngaftanga cbontšachamná ca.”

<sup>22</sup> Chca tojánayana ora, chëngbioye tojangouo y tojanéyana: “Chë Uámana Espíritu šmochjójyëngacñe. <sup>23</sup> Ndëmuanýënga chëngbe bacna soyëngama chašmojáperdonanga, perdonánënga mochántatsmëna; y ndoñe chašmonjáperdonasna, ndëperdonánënga mochántsemna ca.”

*Tomás, Bëngbe Utabnábioye ainá tbojáninýe*

<sup>24</sup> Pero Tomás, chë Gemelo ca uabobainá, canya chë bnétsana uta uatsjédayënguentsá, chë uatsjédayëngaftaca ndoñe yontsemna, Jesús tojánashjango ora.

<sup>25</sup> Chiyeca, “bënga chë Utabná fsënjinye ca”, chë inye uatsjédayënga tmojaniyana ora, Tomás tojanéjua: “Atše chabe cucuatšinë chë uajabonjana uinýniñe ndoñe sënjinýe, y chiñe atšbe ntšabuafja ndoñe sënjajué y atšbe cucuatše chabe costillaca ndoñe, ndoñe quichátošbuachiye ca.”

<sup>26</sup> Canye semana tojanochnëngo ora, chë uatsjédayënga cachiñe canye luarentše tmojánenefjna. Y Tomásna chëngaftaca yojtsemna. Masque chentše atámeniñe yojtsemna, Jesús tojánamashëngo, chëngbe tsëntsaca tojantsá y tojanéyana: —Atšbe ainaniñe tšabe ebionana tšëngaftangaftaca chaotsemna ca.

<sup>27</sup> Chora Tomásbioye tbojaniyana: —Acbe ntšabuafja muentše mojué y atšbe cucuatše minýe; acbe cucuatše miyëbo y atšbe costillaca mojué. Y ndošbuachiyá ndoñe matsmënana, sinó atše tijtayanama cochtsošbuáchiye ca.

<sup>28</sup> As Tomás tbojaniyana: —¡Atšbe Utabná y atšbe Bëtsá ca!

<sup>29</sup> Chora Jesús tbojaniyana: —Tomás, nýe šconjínýeyeca cojtsošbuaché. ¡Bëngbe Bëtsá chaoma puerte oyejuayënga chamotsemna chë nýe ntjinýcá tmojošbuachenga ca!

*Ndayama quem librëša tmojanábema*

<sup>30</sup> Jesús, chabe uatsjédayëngbe delante inye bëts soyënga Bëngbe Bëtsabe obenánaca tonjéftsema, pero quem librëšañe ndoñe quenatábemana. <sup>31</sup> Y quem librëšañe soyëngna, entsábemana tšëngaftanga chašmotsošbuáchema, Jesús, chë Cristo y Bëngbe Bëtsabe Uaquiñá bëtsemnana; y chcase, chábeñe chašmojtsošbuachese, chábeyeca chë nýetsca tescama yomna tšabe vida chašmotsebomnana.

## 21

*Jesús, canýsëfta chabe uatsjédayënga tojánëbëbuacna*

<sup>1</sup> Chca tojanopasá chentšana, Jesús inye soye chabe uatsjédayënga tojánëbëbuacna, Tiberias mar bójaye tsachañe. Chora mëntšá tojanopasá: <sup>2</sup> Cánýentše imojtsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná



pueblocá; Zebedeobe uaquiñata y Jesusbe inye uta uatsjéndayata. <sup>3</sup> Simón Pedro chënga tojanéyana: —Sëntsá beonga jashebuáyama ca.

As chënga tmojanjuá: —Béngnaca ácaftaca fchanjá ca.

As tmojána y canye barquëshoye tmojánamashjna; pero chë ibeta tondaye tmonján-inyena. <sup>4</sup> Ya yojtsebínýana orna, Jesús chë tsachoca yojtsemna, pero chë uatsjéndayënga ndoñe imontsetátšëmbo cha Jesús yojamnama. <sup>5</sup> Chora Jesús tojanatjá: —Básenga, ¿tondaye šmonjashbuá ca?

Y chënga tmojanjuá: —Tondaye ca.

<sup>6</sup> As Jesús tojanéyana: —Barquëshaca catšbioica chë atarraiésha métšena y beonga šmochanjáshebuaye ca.

As chënga chca tmojanma, y chora chësha jtabocnama ndoñe imontsobena, nyetšá beonga tmojánishëche causa. <sup>7</sup> As chë Jesusbe bonshana uatsjendayá, Pédrëbioye tbojaniana: “¿Bëngbe Utabná entsemna ca!”

Simón Pedro chca soye tojanuena y cachora entšayá tojtánichëtjo, er nduichëtjoná yojtsemna, y chë béjayoye tojanoshbuetše. <sup>8</sup> Chë inye uatsjéndayëngna chë barquëshañe tmojána, y chë atarraiésha jútjena beóngaca imojtsásjaye, er chë tsachocama bécoñe imojtsemna, nye canye patse metroca. <sup>9</sup> Fshantsoye tmojánastjajna ora, chënga tmojáninýena canye chebániñe pormániñe, y chentšna canye beona y tandëšnaca yojtsesegorana. <sup>10</sup> Chora Jesús tojanéyana: “Chë šmonjáshebuaye beonguentšana báseftanga miyëbo ca.”

<sup>11</sup> Simón Pedro chë barquëshoye tojánamashëngo, y chë atarraiésha jútjena bëts beóngaca, uasjoónana tsachóntscoñe tojanéyamba. Mo canye patse y shachna bnëtsana y unga beóngaca; pero masque nyetšá beonga, chë atarraiésha ndoñe ntjuatanécanana.

<sup>12</sup> Chora Jesús tojanéyana: “Mabënga, šmochjase ca.”

Chë uatsjéndayënguentšana ni canya yontsenñémua cha jatjayama nda cha yojamnama, er nyetšcanga imojtsetátšëmbo cha chë Utabná bëtsemnama. <sup>13</sup> Chora Jesús tojanobeconá, chë tandëše tojanca y chënga tojanatšatá, y chë beónacnaca cachcá tojanma.

<sup>14</sup> Chóracna, Jesús ya unga soyama chabe uatsjéndayënga yojtsanebëbuacana, obanënguentšana tojtanayentšana.

### *Jesús, Simón Pédroftaca tojanoyebuambá*

<sup>15</sup> Jasama tmojanpochocá ora, Jesús, Simón Pédrëbioye tbojantjá: —Simón, Juanbe uaquiñá, ¿quemëngbiama más quešcbobonshana ca?

Y Pedro tbojanjuá: —Atšbe Utabná, aíñe. Aca condétatšëmbo atše aíñe cbondbobonshánama ca.

As Jesús tbojaniana: —Atšbe entšanga, mo oveshatemëngcá imomnënga, cochtšanýena ca.

<sup>16</sup> Chora cachiñe tbojantjá: —Simón, Juanbe uaquiñá, ¿quešcbobonshana ca?

Y Pedro tbojanjuá: —Atšbe Utabná, aíñe. Aca condétatšëmbo atše aíñe cbondbobonshánama ca.

As Jesús tbojaniana: —Atšbe entšanga, mo oveshëngcá imomnënga, cochtšanýena ca.

<sup>17</sup> Y unga soyama tbojtëtantjá: —Simón, Juanbe uaquiñá, ¿quešcbobonshana ca?

Pedro puerte tbojanongmé, ya unga soyama “quešcbobonshana ca” tbojantjá causa; y tbojanjuá: —Atšbe Utabná, aca lempe condétatšëmbo. Aca condétatšëmbo atše aíñe cbondbobonshánama ca.

As Jesús tbojaniana: —Atšbe entšanga, mo oveshëngcá imomnënga, cochtšanýena.

<sup>18</sup> Ndegombre cbëyana: Más bobontse conjamna ora, conjanamana cach aca jtichëtjuana

y ndémoye jama cojtseboše choye jtsoñana; pero tanguá chacojtsemna orna, buacuatšënga cochanjatsbaná, y inya cmochantichëtjo y ndémoye jama ndoñe chacontseboše choye cmochanjuánatse ca —Jesús tbojaniana.

<sup>19</sup> Chca tojánayana, ana jtsotatšëmbuama ntšamo Pedro jóbanama ibojamnama, y chë chca jóbanëse, Bëngbe Bëtsá corente bëtsá y obená bëtsemnama Pedro yochjáninjániyama. Y chca tojánayanentšana, Pédrëbioye tbojaniana: —Šmasto ca.

*Jesusbe bonshana uatsjendayá*

<sup>20</sup> Pedro tojesanenostëtšantješé y tojáninye, Jesusbe bonshana uatsjendayá ústonoye yojtseye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbonjantjá: “Bëngbe Utabná, ¿nda chë boshjuaná yochtsemna ca?”

<sup>21</sup> Pedro chábioye tbojáninye ora, Jesúsbioye tbojantjá: —Atšbe Utabná, y cháftaca, ¿ntšamo yochjopása ca?

<sup>22</sup> Chora Jesús tbojanjuá: —Atše quem luaroye jesabámëntscuana cha ainá chauesomñama atše stsebošëse, ¿aca ndayá chama cmatjátsëntšamna? Acna nýe šmasto ca.

<sup>23</sup> Chíyeca, chentšana, Jesucristbeñe ošbuáchiyëngbenache nýetscanga imojánichamo, chë uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabámëntscuana cha ainá chauesomñama atše stsebošëse, ¿aca ndayá chama cmatjátsëntšamna? ca”.

<sup>24</sup> Mua endmëna chë uatsjendayá; cha entsichamo quem soyënga ndegombre yojamnama, y camuá quem librëšañe lempe tonjuábema. Y bënga mondétatšëmbo cha ndegombre soye endóyebuambnama.

<sup>25</sup> Jesús inye ba soyënga tonjéftsema; tša bëtsca soyënga endmëna, nderado lempe cada canye soye tcojuábema y librëšangá tcojuapormá, atše sëntsejuabná, nýetsca chëšangá quem luarentše ndoñe nanjuába.

## Hechos

### *Jesús tojanašebuachená chë Uámana Espíritu jíchmuama*

<sup>1</sup> Teófilo, atšbe natsana librěšaňe tčbonjuábobema lempe ntšamo Jesús tojanmama y tojánabuatambama, chca tojanbojatsě orscana, <sup>2</sup> y Běngbe Bětsá celoye tbojtanatsbanantscuana. Cabá celoye nděta orna, chë chabe ichmoněngcá tojanabacacá boyabásengna Jesús tojěftsanaměndá, chë Uámana Espíritbiajana, ndayá jamama yojánamnama. <sup>3</sup> Jesús cruciňe tojanóbana y tojtanayenentšana, ba soye chë ichmóněnga yojáneběbuacana, chca, chěnga jinýanjíyama cha ndegombre tojtanayenama. Canta bnětsana tentscuana cha yojáneběbuacana y Běngbe Bětsabe aměndayama chěnga yojanabuatambá.

<sup>4</sup> Canýe, Jesús chabe ichmóněngaftaca yojětsemna ora, měntšá tojanaměndá: — Jerusalenentšana ndoňe šmatjábocana. Camuentše šmochjobátma, ntšamo atšbe Taitá tcmonjanašebuachenacá chašhjangüentscuana, ndayama atše tčbonjúyana. <sup>5</sup> Ndegombre, Juan entšanga bėjayeca tonjaněbaye; pero ndoňe baytesna, Běngbe Bětsá chë Uámana Espíritu bochanjíchmuama, tšěngaftangbe ainaniňe jtsemándayama cháuamashěnguama ca.

### *Jesús celoye tojtantsjuá*

<sup>6</sup> Canýe, chë ichmóněnga Jesúseftaca cánýiňe imojtsemna ora, chěnga tmojantjá: — ¿César y chë Romoquěngbe aměndayentšana tašcochjatsebacá, y mora běnga, Israeloca entšanga, canýe Rey quemochtsatsbomna ca?

<sup>7</sup> As Jesús tojaněyana: —Tšěngaftanga ndoňe quecmátamna chë soyěngama jtsetatšěmbuana. Nýe atšbe Taitá aíně; y cha, chabe obenánaca echanjamánda mocna ora y ndayté chca chaopasama. <sup>8</sup> Chë Uámana Espíritu tšěngaftangbe ainaniňe jtsemándayama chaojabo ora, tšěngaftanga obenana šmochanjóyěngacňe. Chentšana, ntšamo atšbiama šmotatšěmbcá, chë tčbonjabuatambá soyěnga, entšanga šmochjúyana Jerusalenentše, nýets Judea luariňe, Samarioca y quem luarentša nýets luarěnguenáchnaca ca.

<sup>9</sup> Chë soyěnga tojánayanentšana y chabe uatsjěndayěnga imojtsonýaye ora, Běngbe Bětsá, Jesúsbioye tbojtanatsbaná y canýe jantšetěshe chábioye ibojútsbotse y ndoňe más tmonjanobená cha jinýama. <sup>10</sup> Jesús celoye yojtsetsjuama chěnga bën imojtserreparáněntscuana, nýe ndeolpe, uta boyabásata uafjantse entšayaca bopormánata chěngbe juachaca tbojabántsaye, <sup>11</sup> y chěngbioye tmojaněyana: “Galileoca entšanga, ¿ndáyeca celoye šmojtsantješana? Jesús, chë tšěngaftangaftaca enjamná celoye tontá y ntšamo mora šmonjinýcá cha celoye jtama, cachcá quem luaroye cha echanjěsabo ca.”

### *Júdasbe cuenta Matías tmojanábuayana*

<sup>12</sup> Jesusbe ichmóněnga chë Olivos tjashocana Jerusalenoye tmojtaná. Chë tjocana Jerusalenóntscóňna bécoňe inamna, ndayěntscoca canýe ochnayté jama yojanlesenciana nýetšá. <sup>13</sup> Jerusalenoye tmojtanashjajna orna, chë yebnentša tsbanánoca tsoye tmojtanášěngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiňá, Simón chë Celote ca uabobainá, y Judas, chë Santiagbe uaquiňá. <sup>14</sup> Chěnga sempre imojanamana jtnefnana Běngbe Bětsáftaca jencuěntama básefta shembásengaftaca, María Jesusbe mamá y Jesusbe catsátangaftaca.

<sup>15</sup> Chë tempo tmojánenefjna canýe patse y uta bnětsana Jesucristbeňe ošbuáchiyěnga, y canýe, Pedro tojantsá y tojaněyana: <sup>16</sup> “Jesucristbeyeca atšbe catsátanga, endáněyta ntšamo Běngbe Bětsabe uabemana palabrengüiňe iuabemancá chaochněnguama, y

tempo, David chë Uámana Espíritbeyeca chiñe tojanábema ntšamo Júdaseftaca yochjanopásama; chcasna, Judas uayayënga tojanënatse Jesús chamuishachama. <sup>17</sup> Júdasnaca bëngbe enutá enjamna y Jesús chábioynaca tbonjanábuayana bëngcá chabe trabajuíne jtsoservénama. <sup>18</sup> Tšëngaftanga šmondétatšëmbo, chë Judas bacna soye tojanmama tmojtanabuená crocenánacna fshantse tmojánbuamema. Chentšana cha tojtsanótsatše y chabe bestšaše tsëntsaca tbojtsanashtétšëna y chabe uafsbentšana nyetsca chabe chunchullëjuangá tojtsanáshana. <sup>19</sup> Jerusalemntše oyenënga chë soyama tmojántatšëmbona ora, chë fshantse chëngbe biyañe Acéldama ca tmojanabaye. Acéldama endayana ‘Buiñe Luare ca’. <sup>20</sup> Salmos librëšañe, Jesucristo uayayëngbe cucuatšinë boshjuanabiama mëntšá enduábemana:

Chabe yebna éñañe chaotsemna

y ndocná chentše chaondëtsiyena ca.

Y mëntšánaca endayana:

Chabe cuenta inya chabe trabajo chaoma ca.

<sup>21</sup> “Chcasna, mora muentše montsemna taitanga bëngaftaca mondenutënga, Bëngbe Utabná Jesús bëngaftaca enjamnëntscuana, <sup>22</sup> Juan Jesúsbioye tbonjanabaye orscana y Bëngbe Bëtsá Jesúsbioye bëngbentšana celoye tbontanatsbanantscuana. Y mora šontsamna canya mënguentšá juabuáyanama, Jesús tojtanayenama entšángbioye bëngaftaca jábuayenama ca.”

<sup>23</sup> As chora útata tmojanabocacá: José, nda Barsabás ca imojanábobuatma y ínÿengna Justo ca; y chentšana Matías. <sup>24</sup> Chora Bëngbe Bëtsáftaca mëntšá tmojanencuentá: “Bëngbe Utabná, aca nyetscangbe ainana icuabuatma; chcasna, šminÿanjé nda quem útatentšana cochjuábuayanana, <sup>25</sup> canÿe ichmonacá Júdasbe cuenta chaotrabajama. Judas ya ndoñe canÿe ichmoná quenátsmëna, bacna soye tojama causa, y cha mora yojtsemna chë ndayentše jtsemnama ibomna luaroca ca” —chënga tmojánayana.

<sup>26</sup> Y nda chë ichmoná yochtsemnama jtsotatšëmbuamna tsbanánoye tmojanétšëna y Matías tbojanobuache; as cach orscana, Jesucristbeñe ošbuáchiyënga chabiama imojanjuabná mo canÿe Jesusbe ustonacá, cachcá ntšamo chë bnëtsana canÿe uatsjëndayëngbiana chënga imojanjuabnacá.

## 2

### *Chë Uámana Espiritu ošbuachiyëngbeñe tojánamashëngo*

<sup>1</sup> Pentecostés ca uabaina fiesta tojanobuache ora, chë jaja sananga tmojanobuátbanama fiesta te, Jesucristbeñe ošbuáchiyënga nyetscanga cánÿiñe canÿe luarentše imojtsemna. <sup>2</sup> Ndeolpe, celocana mo canÿe jabuache binÿiécá yojtsaishauenana y chca, tša jabuache shauenanana tojanóshjango nyets yebnentše, chënga imojtsetbiámanentše. <sup>3</sup> Y chora bichtajënga mo inëshcá yojónÿna y canÿánÿabeñe yojojátaye. <sup>4</sup> Chca chë Uámana Espiritu tojánamashëngo chëngbe ainaniñe jtsemándayama; chora nyetscanga tmojanontšë inÿetšá biyangana, chënga tempo ndmabiyañe, ntšamo chë Uámana Espiritu yojtsamcá chënga inÿetšá chamotsebiyama.

<sup>5</sup> Chë tempo Jerusalemntše imojtsemna ba judiënga, Bëngbe Bëtsá puerte adórayënga, nyets luarëngocana áshjajnënga; chënga tmojánabo Bëngbe Bëtsá jëtschuayama. <sup>6</sup> Entšanga chë shauenanana tmojanuena ora, tmojanójoto y ndoñe imontsetátšëmbo ntšamo jtsejuabnayana ndayá yojtsopasánama, er chë inÿe luarocana áshjajnënga imojtsuenana chë Jesucristbeñe ošbuáchiyënga inÿetšá biyangana jtsóyebuambnayana, ntšamo cada ona chënga imojanbiyacá. <sup>7</sup> Chë soyëngama entšanga puerte imojenjnaná y mëntšá imojtsenatsëtsnaye: “Chë chca montsóyebuambnanga Galileoquënga mondmëna. <sup>8</sup> Chcase, ¿ntšámoyeca bënga imojtsobena chënga joyaunayana cach bënga mondëbiyacá ca? <sup>9</sup> Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëngnaca, <sup>10</sup> Frigioquënga,

Panfilia, Egiptó y Libia, chë Cirene béconana luaroquënga. Báseftangna Romoquënga montsemna; <sup>11</sup> chëngbeñe nderado judiënga camuentse onýnánënga, pero ínýengna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inýengna Cretocana y Arabiocánënaca tmojabo. ¡Y bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entsänga imojtsichamo.

<sup>12</sup> Chë causa nyetscanga imojtsenjnanaye y ntšamo jtsejuabnayama ntsetatšëmbcá imojtsemna y imojtsentjanaye: “¿Ndayá chë soye yojsayana ca?”

<sup>13</sup> Pero ínýengna, chë soyëngama chëngbioye imojtsëbayajuana y imojtsichamo: “Chënga tëmiënga montsemna ca.”

#### *Ntšamo Pedro chora tojanoyebuambá*

<sup>14</sup> Chentšana, Pedro tojantsá chë inýe bnëtsana canýe ichmónëngaftaca y jabuache tojanontsé chë entsänga jáuyanana, mëntšá: “Atšbe entsänga judiënga y nyetscanga Jerusalemntse oyenënga, tšabá šmochjouena. Ntšamo tojopasama cbochanjábuayenaye, as chacmésertama. <sup>15</sup> Tšëngaftanga šmontsejuabná atše y atšbe enutënga tëmiënga fstsemna ca, pero ndegombre, tëmiënga ndoñe queftsátsmëna; cabá cachëse, base mošenana ora ctsomñe. <sup>16</sup> Pero ntšamo entsopasánamna, Bëngbe Bëtsabe juabna oyebuambayá Joel mëntšá tojanábema:

<sup>17</sup> Bëngbe Bëtsá mëntšá tojánayana: ‘Quem luare jopochócama te chaojtsobeco ora, chë soyënga echanjochnëgo.

Atše chanjama, atšbe Espíritu nyetscangbe ainaniñe cháumashënguama.

Chentšana, tšëngaftangbe uaquiñënga y bemianga atšbe soyëngama entsänga mochantsétsësnaye;

tšëngaftangbe bobontsëngna, atše chanjama soyënga mochantsonýaye mo otjenay-oquécá;

y tšëngaftangbe bëtsëjëmëngna atšbe soyënga mochantsotjénaye.

<sup>18</sup> Chca ora, atše chanjama nyetsca atšbe oservëngbiama, boyabásenga y shembásenga,

chëngbe ainaniñe atšbe Espíritu cháumashënguama,

as chënga atšbe soyëngama entsänga mochantsétsësnaye.

<sup>19</sup> Atše chanjama bëts soyënga celoca;

y quem luariñe echántsemna buiñe, iñeshe y ngonana mo jantšetëshcá, atšbe obenana jinýanýiyama.

<sup>20</sup> Cabá chë puerta uámana te, chë Bëngbe Utabná bëts soyënga jamama ndobuache ora, shinýe ndoñe queochátsbuashinýinýana

y juashcona buárganëtema mo buiñcá echántsemna.

<sup>21</sup> Y as, ndánaca Bëngbe Utabná tbojtsotšëmbuaná, cha bochanjatsbocá.’

Chca Joel tempo tojanábema ca” —Pedro tojánayana.

<sup>22</sup> Chora Pedro tojatanéyana: “Israeloquënga, šmochjouena ntšamo cbochanjauyancá: Bëngbe Bëtsá ndegombre tcmonjaninýanýé, Jesúsbioye chabe trabajo biamnayá cha tbojánbemama. Chë soye Bëngbe Bëtsá tcmonjaninýanýé, Jesús chë Nazaretocáftaca cha tojanma bëts soyëngaca y ójnanana soyëngaca, Bëngbe Bëtsabe obenana jinýanýiyama. Cach tšëngaftanga chë soyëngama šmondétatšëmbo, Bëngbe Bëtsabe obenánaca chë soyënga tšëngaftangbeñe Jesús tonjánmayeca. <sup>23</sup> Ndegombre tšëngaftangbe cucuatšinë Jesús tmonjánboshjona, pero cabá ndëboshjona ora, Bëngbe Bëtsá tojanjuabó ntšamo jopásana yojamnama; y ntšamo tšëngaftanga cháftaca šmochjanmámna cha inatátšëmbo. Tšëngaftangna Jesús šmonjanishache y šmonjanma cha chamóbama y chamocrucificama, bacna entsangbe cucuatšinë. <sup>24</sup> Pero Bëngbe Bëtsá tojama cha cháuatayenama; y chë obanëngbe luarentšana tbojatsbocá, er ndoñe yonjopodena cha obaná chaoquedama ca” —cha tojánayana.

<sup>25</sup> Chora Pedro tojatanéyana: “Rey David tempo Jesusbiamá mēntšá tojéftsanabema, ntšamo cha Bēngbe Bētsábioye tbojaniyanama:

Atšbe Utabná, aca sempre átšeftaca condbétsemna, y siempre átšeftaca condboquedá atše juajabuáchama, chíyeca ndocná queochatobenaye atše jauátjanama.

<sup>26</sup> Chíyeca atše corente oyejuayá séntsemna, y atšbe uayášaca cbontsatschuaná.

Atše masque chanjóbana, tšabá sēndétatšēmbo aca atšbe Bētsá, atše chaitayenama cochjamama.

<sup>27</sup> Aca, Bēngbe Bētsá, obanēngbe luarentše ndoñe quešochátsboshjona, y ndoñe queochatsleséncia acbe uámana oservenabe cuerpo chaotsopochocama.

<sup>28</sup> Aca chē tšabe benache šconjaninýinýé, ntšamo tšabe vida jtsebomnama.

Aca átšeftaca condbétsemnama, atše puerte oyejuayá séntsemna ca —David tojéftsanabema ca.”

<sup>29</sup> Chentšana Pedro tojatanéyana: “Baconga y batanga, šontsemna ndegombre tšēngaftanga jábuayenana tšabá chacmésertama. Bēngbe tempsca bēts taitá David tojanóbana y tmojanatbontsá, y bēnga montsemna cha tmojanatbontsá luare béconana. <sup>30</sup> Cach David canýe Bēngbe Bētsabe juabna oyebuambnayá inamna. Cha tšabá inatátšēmbo Bēngbe Bētsá bētsá tbojanšbuáchenama, Davidbe entšanguentšana canýa, Cristo, cach Davidcá rey jabemama. <sup>31</sup> David inatátšēmbo chē Uámana Uabuayaná, chē Cristo, cháuatayenama Bēngbe Bētsá yochjanmama. Chama cha tojánayana y tojéftsanabema, obanēngbe luarentše Cristo ndoñe ntjēftseboshjonana y Bēngbe Bētsá ndoñe ntjalesénciana chabe cuerpo chaotsopochocama ca. <sup>32</sup> Bēngbe Bētsá tojama Jesús cháuatayenama y bēnga cha fsēnjinye. Chíyeca bēnga fsēntsetatšēmbo chca ndegombre bétsemnama. <sup>33</sup> Bēngbe Bētsá, Jesús celoye tbontanatsbaná chabe catšbioica jtsatsmēnama jtsemándayama, y Bēngbe Bētsá chē Uámana Espíritu Jesúsbioye tbojanēntšabuaché ntšamo chē Taitá tbojanšbuachenacá. Ntšamo tšēngaftanga šmontsonýá y šmontsuenancá entsemna, Jesucristoftaca chē Uámana Espíritu bēngbe ainaniñe cháumashēnguama Bēngbe Bētsá tojámayeca. <sup>34</sup> David ndoñe Jesuscá celoye tonjána, pero mēntšá tojéftsanábema:

Bēngbe Bētsá atšbe Utabná Crístbioye tbojanianama:

‘Atšbe catšbioica cochtsetbemana,

<sup>35</sup> acbe uayayēnga acbe cucuatšínē chamoquedama atšbe obenánaca chjamēntscuana ca.’”

<sup>36</sup> Chora Pedro tojatanéyana: “Tšēngaftanga nyets Israeloquēnga šmochtsetátšēmbo, atše ndegombre cach Jesusbiamá sēntsoyebuambnama. Cha tšēngaftanga šmonjan-crucificá, pero Bēngbe Bētsá chábioye tbojnábema Bēngbe Utabná y chabe Uámana Uabuayaná, chē Cristo ca.”

<sup>37</sup> Chē soyēnga tmojanuena ora, entšanga cochtsetšenánēnga imojtsemna, y Pedro y chē inýe ichmónēngbioye tmojanéyana: —Baconga, ¿ndayá mora jamama šojtsamna ca?

<sup>38</sup> As Pedro tojanéjua: —Ngménaca šmochtenójuaboye bacna soyēnga šmojtsamama, chca amana šmochtsajbaná y Bēngbe Bētsabe benache šmochtishache. Chca chašmojama ora, cbochanjubaye mo chábeñe ošbuachiyēngcá, Jesucristo atše jótšēmbonēse. Chcase, Bēngbe Bētsá tšēngaftangbe bacna soyēngama cmochanjáperdonaye y echanjama chē Uámana Espíritu tšēngaftangbe ainaniñe jtsemándayama cháumashēnguama.

<sup>39</sup> Bēngbe Bētsá chē soyēnga tcmonjanašebuachená tšēngaftangbiamá, tšēngaftangbe básēngbiamá y nyets chē bēn luarēnguenache imomna entšangbiamá, nyetscanga chē Bēngbe Utabná Bēngbe Bētsá chábioye jabama chaojubuáyanēnga ca.

<sup>40</sup> Inýe palabrēngnaca Pedro tojatanéyana y bētsá tojanabuayená mēntšá: “¡Bēngbe Bētsá chē Israeloca bacna entšanga echanjácastigaye. Chašmótsbocamna, chēngbentšana šmochtsojuánañe ca!”

<sup>41</sup> Ba entsānga imojtsanošbuaché ntšamo Pedro tojanéyanama y tmojánenabaye. Cach te mo unga uaranga entsānga nyetsá tmojanoboté, Jesucristbeñe ošbuáchiyēnga jtsemnama. <sup>42</sup> Chēnga corente imojtseboše jtsamama chē Jesusbe ichmónēnga imojtsabuatambá soyēnga. Tšabá yojsacochebiona nyetscanga cánýiñe jtsemnama y imojanamana mo chē Jesucristbeñe ošbuachiyēngcá cánýiñe jtsesayana y cánýiñe Bēngbe Bētsáftaca jtsencuéntayana.

*Ntšamo chē natsana Crístbeñe ošbuáchiyēnga vida imnabomna*

<sup>43</sup> Nyetscanga imojtsenjnanaye, chē ichmónēnga bēts soyēnga y inye soyēnga chabe obenana jinýanýiyama chamomama Bēngbe Bētsá tojánmayeca. <sup>44</sup> Nyetsca chē Jesucristbeñe ošbuáchiyēnga sempre cánýiñe mo canýacá imojtsemna y nyetsca chēngbe bomna soyēnga nyetscangbiamama yojtsemna. <sup>45</sup> Chēnga imojanamana fshantsēnga jtsatobuíyana y chē imojánbomna soyéngnaca, y chē crocénana jujátayana ntšamo chē ínýenga tojtsējabotcá. <sup>46</sup> Cada te imojanamana Bēngbe Bētsabe bēts yebnentše jénefnana cha jētschuayama, y yebnēnguenache cánýiñe imojtsesaye oyejuayēnga y ndoñe ojédayēnga. <sup>47</sup> Chēnga imojanamana Bēngbe Bētsá jtsatschuanayana, y nyetsca entsānga imojtsejuabnaye chē Jesucristbeñe ošbuáchiyēngbiamama tšabe entsānga imojamna ca. Y cada te Bēngbe Bētsá yojtsama más ošbuáchiyēnga chamóbotema, chē ndēmuanýēnga cha yojtsatsebacayēnga.

### 3

*Pedro canýe coshétbioye tbojanshná*

<sup>1</sup> Canýe te, Pedro y Juan Bēngbe Bētsabe bēts yebnoye tbojánata bēts mošenana ora. Chca ora entsānga imojanamana Bēngbe Bētsáftaca jtsencuéntayana. <sup>2</sup> Bēngbe Bētsabe bēts yebnentše canýe cosheto yojtsemna; tojanonýná orscana chca šocá inamna. Entšanga imojanamana cada te cha juanatsana canýe luaroye, Bēngbe Bētsabe bēts yebnoca, Botamana Amashjuana ca uabáinoye, chē tmojtsachnějuanēnga lemošna chaótejañama. <sup>3</sup> Pedro y Juan Bēngbe Bētsabe bēts yebnoye jamashēnguama chē cosheto tojánanye ora, canýe lemošna chátbioye vojótejañe. <sup>4</sup> Chatna chē šocá imojtsonýaye, y Pedro tbojaniyana: “Šcochtsénýaye ca.”

<sup>5</sup> As cha yojtsénýaye y yojtsejuabnaye ndayá chjójyēngacñe ca. <sup>6</sup> Chora Pedro tbojaniyana: “Quetsátsbomna ni crocénana, ni castellano aca jatšetayama, pero atše chanjama Jesucristbe obenánaca ndayá acbiamama jamama atše stsobencá: Jesús chē Nazaretocá obenana endbomna; chíyeca atše cbēyana chabe mándoca, matētsbaná y cochtsana ca.”

<sup>7</sup> Pedro chca tbojaniyana ora, tbojanábuacueshache catšbióicatše y tbojtanatsbaná, y cachora chē cosheto shecuatšiñe y shēmiabeñe añemo yojtsatsbomna. <sup>8</sup> As chē cosheto, canýe jontsēnjēse tšabá tojtantsá y tojanontšé tšabá jtsanana, y Bēngbe Bētsabe bēts yebnoye Juan y Pédroftaca tojánamashēngo; yojtsayontsēnjnaye y Bēngbe Bētsá ibojtsatschuanaye, tbojanshnama. <sup>9</sup> Chē Bēngbe Bētsabe bēts yebnentše imojtseemnēnga nyetscanga cha tmojáninýe tšabá jtsanana y Bēngbe Bētsá jtsatschuanayana. <sup>10</sup> Chēnga imnatátšēmbo cha chē cosheto yojamnama, chē nda yojanamana Bēngbe Bētsabe bēts yebnoca, chē Botamana Amashjuanentše jótbemana, entsānga lemošna jotejañama. Cha tšabá yojtsatsmēnamna entsānga ojnanánēnga imojtsemna.

*Ntšamo Pedro tojanoyebuambá Salomonbe Amashjuana ca uabáinentše*

<sup>11</sup> Chē cosheto ya shnaná ora, ndoñe yontseboše Juan y Pédrēbentšana joluárana. As, nyetsca entsānga ojnanánēnga tmojanótjajo chē amashjuana otsbojebniñe, Salomonbe Amashjuana ca uabáinoye, chē Juan, Pedro y chē cosheto shnaná imojétsemnoye.

<sup>12</sup> Pedro chē entsānga tojánanye ora, tojanéyana: “Taitanga y mamanga, Israeloquēnga, ¿ndáyeca chē soyēngama ojnanánēnga šmojtsemna? ¿Ndáyeca nýe šcojtsēbuáutja? ¿Šmojtsejuabná nýe bēndatbe obenánaca quem boyabása tifjashná ca? ¿O šmojtsejuabná

quem boyabása tifjashná bëndata Bëngbe Bëtsá puerte tšabá ftsadoránayeca? <sup>13</sup> Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëts taitanga imojanošbuaché, cha tonjinýané chabe oservená Jesús chë más uamaná yomnama. Cha tšëngaftanga chë mándayëngbe cucuatšinë šmonjánboshjona chamóbama. Pilato enjéteboše Jesús jëtsboshjonama, pero tšëngaftanga Pilatbe delante šmonjánayana chca ndoñe šmontsanboše ca, y chíyeca Pilato ndoñe tbontanboshjona. <sup>14</sup> Jesús uamaná y nyetsca soyënguiñe tšabá amá enjamna, pero tšëngaftangna cha šmontsanaboté y Pilato šmonjanimpadá chabe cuenta canye boyabása, entšá obanayá, chabuatsboshjonama. <sup>15</sup> Y chca, chë ndegombre tšabe vida chašmotsebomnama amábioye tšëngaftanga šmonjanóba. Pero Bëngbe Bëtsá tojanma cha cháuatayenama y bënga chë soye fsënjáninýe y chama fsëndétatšëmbo. <sup>16</sup> Jesús puerte obená endménayeca, quem cosheto añémoca entsatsmëna. Ntšamo šmonjinýe y šmonjatatšëmboncá ndegombre tonjopasá Jesúsbeñe betsošbuáchema. Chë Jesúsbeñe jtsošbuáchiyana tonjama cha tšabá tšëngaftangbeñe chaotsatsmënama.

<sup>17</sup> “Taitanga y mamanga, atše sëndétatšëmbo tšëngaftangbe causa y tšëngaftangbe améndayëngbe causa Jesús tojanóbanama. Pero tšëngaftanga chca šmojanma, ndayá šmojétsamama ntsetatšëmbcá. <sup>18</sup> Tempo, Bëngbe Bëtsá chë chabe juabna oyebuambnayënga tojanamëndá entšanga jábuayenama, chë Bëngbe Bëtsabe Uámana Uabuayaná puerte ngménana yochtsanbomnama. Morna, ntšamo Bëngbe Bëtsá tojanayancá ya tonjochnëngo. <sup>19</sup> Chcasna, ngménaca menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe oyejuayana chašmotsóbomñama, <sup>20</sup> y tšëngaftangbioye bochanjíchmuá Jesús, chë tempo chabe Uámana Uabuayaná Bëngbe Bëtsá tbojanbemá. <sup>21</sup> Canye te echanjóshjango, Bëngbe Bëtsá lempe tsmëmacá jëtsbemama. Chë tentscuana Jesús bontsemna celoca joquédana. Chca echanjochnëngo ntšamo Bëngbe Bëtsá chabe juabna oyebuambnayëngbiajana entšanga tojanabuayenacá. <sup>22</sup> Moisés bëngbe bëts taitanga tojanabuayená: ‘Chë Utabná Bëngbe Bëtsá canye chabe juabna oyebuambnayá ntšamo atše sëndmëncá, cmochanjayentšíchmuá. Cha tšëngaftangbentšana echanjábocna y tšëngaftanga cmontsamna ntšamo chacmojtsëtsëtsnacá cha jtseyeunanana. <sup>23</sup> Ndánaca chábioye ndoñe chabonjoyeuná, cha bontsemna chë Bëngbe Bëtsabe entšángbentšana luaroca jtsemnama y chamotsepochochocama ca’ —cha tojánayana.

<sup>24</sup> “Y nyetsca chë Bëngbe Bëtsabe juabna oyebuambnayëngnaca Samuel orscana, entšanga tmojanabuayená ndayá quem tempo yochjanchnënguama, ntšamo mora montsonyáca. <sup>25</sup> Chabe juabna oyebuambnayëngaftaca Bëngbe Bëtsá tojanašebuachená bëts soyënga tšëngaftangbiamá, y tšëngaftangbe bëts taitángaftaca canye trato tojánbema; chë soyënga cabá tšëngaftangbiamá entsemna. Bëngbe Bëtsá Abrahambioye mëntšá tbojaniyana: ‘Chë ácbentšana entšángbeyeca tšabe bendicionënga chanjama nyetsca quem luarentša entšangbiamá ca.’ <sup>26</sup> Bëngbe Bëtsá tojama chabe oservená cháuatayenama y natsana tšëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnama ca” —Pedro tojánayana.

#### 4

##### *Pedro y Juan Jerusalenentša mandadëngbe delante*

<sup>1</sup> Pedro y Juan cabá entšanga imojtsëtsësnaye; chorna chë chata ibojtsemnoye tmojánashjajna judiëngbe bachnanga, Bëngbe Bëtsabe bëts yebnentša soldadëngbe amëndayá y saduceo ca uabaina judiëngbe amëndayënga. <sup>2</sup> Chatna entšángbioye imojtsabuátambaye Jesús tojtanayenama y chë soye yojánayana obanënga ndegombre mochtayena ca. Chë causa, chë tmojánashjajna amëndayënga tojánëtna. <sup>3</sup> As, Pedro y Juan tmojánishëche y ya jetiñe yojtsemna causa, cárceloye tojanëtame yëfsanëntscuana.



<sup>4</sup> Masque chca, banga entsanguentsana, ntšamo Pedro y Juan tbojanayancá tmojanuenënga, aíñe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nÿe boyabásenga jacuéntase.

<sup>5</sup> Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuátambayënga Jerusalenentše tmojánenefjna. <sup>6</sup> Chéntšnaca imojtsemna, chë bachnangbe más uámana amëndayá Anás ca uabainá, Caifás, Juan, Alejandro y chë bachnangbe más uámana amëndayëngbe nÿetsca pamíllangnaca. <sup>7</sup> Chora chënga tmojanmandá Pedro y Juan junatsama, y chëngbe tsëntsaca tojanatsá y mëntšá tmojanatjá: —¿Ndabe obenánaca chë soyënga šojtsama, o, nda derecho tcmënjatšatá chë soyënga chašotsamama ca?

<sup>8</sup> As Pedro, chë Uámana Espiritu chabe ainaniñe corente jtsemándayëse, mëntšá tojanéjua: —Israeloca mándayënga y bëtsëjemënga, <sup>9</sup> mënté šconjatjá chë jama ndobenáf-taca tšabe soye tifjamama y ntšamo cha mora jama yojtsatobenama. <sup>10</sup> Chcasna, ntšamo tojopasama cbochanjabuayená, chca, tšëngaftanga y nÿetsca Israeloca entsanga chë soyënga chašmotsetatšëmbuama. Quem boyabása, chë tšëngaftangbe tsëntsaca entsemná, Jesucristo chë Nazaretocabe bëts obenánaca chca tšabá entsatsmëna. Y Jesús endmëna nda tšëngaftanga šmonjancrucificá y ndabiama Bëngbe Bëtsá tojanma cháuatayenama. <sup>11</sup> Jesusbiamá Bëngbe Bëtsabe uabemana palabrënguiñe mëntšá endayana: “Chë yebna jebuanënga tmontsanaboté ndëtšbé, mora chë más bëts uashacuanëšentše entsejájona ca”. Tšëngaftanga šmondmëna mo chë yebna jebuanëngcá, er Jesúsbioye šmontsanaboté y mora cha chë más uamaná entsemna. <sup>12</sup> Nÿe cha yobena tšëngaftanga játsebacama. Bëngbe Bëtsá ndocna inÿe entšábioye tbonjatšetá chabe obenana chca jamama; chíyeca quem luarentše ndocná más quenátobena bënga játsebacama. Nÿe Jesucristbe obenánaca aíñe ca —Pedro tojánayana.

<sup>13</sup> Chënga imojenjnaná Pedro y Juan tša añémoca ibojtsóyebuambnama tmojáninÿe ora, y chata tempo nduatsjínÿenata y librëša nduabuatmata bëtsemnama tmoján-tatšëmbona ora. Chca chë mándayënga tmojánatšëmbona chata Jesúseftaca bayté ibojamnama. <sup>14</sup> Y entsanga imojtsonÿaye chë tmojanshná cha chentše chátaftaca yojtsemnama; chë causa, chënga ndocá más tmonjanobená chatbe contra jatichámuana. <sup>15</sup> As chora tmojanamëndá chentšana chábuaisebocnama y chentše tmojanoquedangna chë soyama imojtsenatsëtsnaye. <sup>16</sup> Chënga imojtsentjanaye: “¿Ndayá chátaftaca mochjama ca? Jerusalenentše oyenënga montsetátšëmbo chata chë bëts soye Bëngbe Bëtsabe obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca. <sup>17</sup> Pero entsanga chama ndoñe más chamondëtsencuëntamna, chata mochjáuyana: ‘Ndoñe más entšángbeñe Jesús šmattsebáyana; y ndoñe chašmonjounëse, jabuache castigo šochántse bomna ca.’ ”

<sup>18</sup> As chë mándayënga cachiñe chata tmojánachembo y tmojanamëndá ndoñe más Jesús jtsebáyana, ni chabiama entšángbeñe jtsabuátambayana. <sup>19</sup> Pero Pedro y Juan tbojánayana: “¿Ntšamo tšëngaftanga šmatjayana ntšamo fchanjayanama ca? Ndegombre, Bëngbe Bëtsabe bominiñe ndoñe tšabá quenátsmëna tšëngaftangbioye aíñe joyaunayana y chábioye ndoñe. <sup>20</sup> Er bënga queftsátobena jtsajbanana oyebuambnayana chë tifjinÿe y tifjouena soyëngama ca.”

<sup>21</sup> Chë mandayëngna chátbioye tojtsanautatjá, pero chentšana tmojtanabáshejuana. Nÿetsca entsanga Bëngbe Bëtsá imojtsatschuanaye ntšamo tojanopasama; chíyeca, chë mándayënga ndoñe tmonjanobená tondaye ntjinÿenana ntšamo chata jácastigama. <sup>22</sup> Chë boyabása, ndáftaca chata chë bëts soye Bëngbe Bëtsabe obenánaca tbojanma, inabomna canta bnëtsana uatama más.

*Jesucristbeñe ošbuáchiyënga Bëngbe Bëtsá tmojanimpadá más añemo chauatšatama*

<sup>23</sup> Pedro y Juan ya tmojtanabáshejuana ora, tbojánata chë inye ošbuáchiyëngaftaca jateninyënama y lempe ntšamo chë bachnangbe amëndayënga y bëtsëjemëngcá mán-dayënga chátbioye tmojanëyancá, chëngbioye tmojanacuntá. <sup>24</sup> Chënga chca tmojanu-enentšana, nyetscanga cánjiñe tmojanontsé Bëngbe Bëtsáftaca mëntšá jencuëntama: “Bëngbe Utabná, aca chë nda tojama celoca, fshantse, nyetsca béjayënga y lempe ntšamo chenache yomncá, <sup>25</sup> chë Uámana Espíritbiajana tcojánayana y acbe oservená David, ntšamo tcojanayancá tojanábema, mëntšá:

¿Ndáyeca entšanga yapa imojtsetšátjaye ca?

¿Ndáyeca imojtsejuabná nye bonamentiama soyënga jamana?

<sup>26</sup> Quem luarentša reyënga y amëndayënga imoprontánënga, nyetscanga tmojenoyeuná Bëngbe Bëtsá y chabe Uámana Uabuayaná chë Cristbe contra jtsemnama ca —cha tojanábema.

<sup>27</sup> “Ndegombre chca tonjopasá. Rey Herodes y Poncio Pilato, quem bëts pueblentše, ndoñe judiëngaftaca y israelitëngaftaca tmonjánenefjna, jenóyeunayama ntšamo jamana, Jesús chë acbe uámana oservená y chë Uámana Uabuayaná tcojabemábioye jóbama. <sup>28</sup> Tempo, Bëngbe Bëtsá, acbe obenánaca y ntšamo icnabošcá tcojanmandá ntšamo mora chaotsemnama, y chënga chca Jesúseftaca tmonjama. <sup>29</sup> Morna Bëngbe Bëtsá, mouena ntšamo chënga montsichamo, bënga jasúfriama cašojsamna ca; chcasna, cochjama bënga fchayobená Jesusbe tšabe noticiënga bëts añémoca entšángbeñe jt-sóyebuambnayama, <sup>30</sup> y cochjama acbe obenánaca šoquënga tšabá chamotsatsmënama y cochjama bënga fchayobená bëts soyënga jamama, Jesús chë uámana oservenabe obenánaca y cha jótšëmbonëse ca” —chënga tmojánayana.

<sup>31</sup> Bëngbe Bëtsáftaca jencuëntama tmojanpochocá orna, chë tmojánenefjntše tojanangmémana; y nyetscangbe ainaniñe chë Uámana Espíritu tojanontsé más jtsemándayana, y chënga tmojanontsé más añémoca Bëngbe Bëtsabe soyëngama entšanga jábuayenama.

#### *Nyetsca bomna soyënga nyetscangbiama yojtsemna*

<sup>32</sup> Jesucristbeñe ošbuáchiyënga, nyetscanga canye juabna imojtsebomna y ainaniñe cach canye ebionana. Ndocná ntjatichamuana chabe soyënga nye chabiama yojtsemna ca, pero aiñe imojtsichamo, “atše séndbomna soyënga nyetscangbiama entsemna ca”. <sup>33</sup> Chë Jesusbe ichmónëngna puerte obenánaca mëntšá imojtsichamo: “Fsënjinye y fsëntsetatšëmbo Bëngbe Utabná Jesús obanënguentshana tojtayenama ca.” Y Bëngbe Bëtsá yojtsama chë ichmónënga bëtscá tšabe bendicionënga chamotsebomnama. <sup>34</sup> Jesucristbeñe ošbuachiyëngbeñe ndocná yonjamna ndayánaca uajabotá, er nyetscanga fshantse o yebna bomnënga imojanamana jtsatobuíyana, y chë crocénana <sup>35</sup> chë ichmónëngbioye jayentšbuáchiyana, ntšamo tojtsëjabotcá nyetscanga jujátayama. <sup>36</sup> Chca tojanma canya Bëngbe Bëtsabe bëts yebnoca trabajayá, José ca uabainá; cha chë ichmónënga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá. <sup>37</sup> Chana, fshantse yojtsatobuiye, y chë crocénana Jesusbe ichmónëngbioye yojáyentšbuachiye, chë uajabótëngbiama chaoservema.

## 5

#### *Ntšamo Ananías y Safíraftaca tojanopasá*

<sup>1</sup> Inamna canye bacó, Ananías ca uabainá, y chabe shemna, Safira ca. Chatna canye fshantse tbojáníye. <sup>2</sup> Ananías y Safirna tbojanenóyeunata; chcasna, batšá crocénana cachatbiama tbojanobuajó y chë tojanójama crocénana ichmónëngbioye Ananías tojanamba, pero tojanéyana chana canjamna nyets crocénana ntsachetšá chë fshantsama tbojanosháchiñe ca. <sup>3</sup> As Pedro tbojaníyana: “Ananías, ¿ndáyeca tcojalesencia Satanás acbe ainaniñe bacna juabnënga chacmócochënguama, Uámana Espíritu chë crocénanama jabuambayama ca? Acna chë fshantsama tcmojtabuená crocénantšana

cach acbiana batšá tcontábojama. <sup>4</sup> Cabá ntsatobuiye ora, chë fshantse ácbeshe endánmëna y tcojtsatobuíyentshana chë crocénana acbiana y chánaca condánobena ntšamo tcojtsebošcá jamama. ¿Ndáyeca acbe ainaniñe tcojajuabó chë crocenánama chca jobostérama? Chca jamëse, ndoñe nÿe entsángbioye quecatabuambná, sinó Bëngbe Bëtsánaca ca” —Pedro tbojaniana.

<sup>5</sup> Ananías chë palabrenga tojanuena ora, obaná tojánshajaye. Y nÿetscanga chama tmojántatšëmbonënga corente imojtsauatja. <sup>6</sup> Chentšana, básefta bobontsënga tmojánashjajna y Ananíasbe cuerpo entsëjuaca tmojanandmaná y jauátbontsama tmojanamba.

<sup>7</sup> Mo unga horëntscose, Ananíasbe shema Safira tojánashjango, pero ndoñe yontsetátšëmbo ntšamo chabe boyáftaca tojanopasama. <sup>8</sup> Chora Pedro tbojantjá: —Ndegombre šmëyana, ¿chë šmonjayana nÿetšnama chë fshantse šmojiye ca?

As chë shema tbojanjuá: —Aíñe, nÿetšnama fsënjiye ca.

<sup>9</sup> Pedro tbojaniana: —¿Ndáyeca tsëndata šojenoyeuná Bëngbe Utabnabe Espíritu jabyambayama, y cabá castigo jtsebomnama ndoñe šontsobatmana ca? Acbe boyá jauátbontsama tmonjuambënga muentše bëšoca montsemna y mora ácnaca cmochanjuamba ca.

<sup>10</sup> Cachora Safira Pédrëbe shecuatšentše obaná tojánshajaye. Chë bobontsënga tmojtanamáshjna ora, obaná Safira tmojáninÿena; asna, chentšana tmojanamba y cachabe boyabe juachaca tmojanatbontsá. <sup>11</sup> Y nÿetsca Jesucristbeñe ošbuáchiyënga chentše imojtsemnënga y nÿetscanga chë soye tmojántatšëmbonënga, corente imojtsauatja.

*Ba bëts soyënga chë ichmónënga tmojanma, Bëngbe Bëtsabe obenana jinÿanÿiyama*

<sup>12</sup> Chë Jesucristbe ichmónëngaftaca ba bëts soyënga entsángbeñe yojtsebinÿna Bëngbe Bëtsabe obenana jinÿanÿiyama; y nÿetsca Jesucristbeñe ošbuáchiyënga imojanamana Bëngbe Bëtsabe bëts yebnoca jénefnana, Salomonbe Amashjuana otsbojebnentše. <sup>13</sup> Chë ínÿenga, chë Jesucristbeñe ndošbuáchiyëngna, imojtsauatja Jesucristbeñe ošbuáchiyëngaftaca jtsenutana; pero entsángna chë ošbuáchiyëngbiana tšabá imojtsencuëntaye. <sup>14</sup> Bëngbe Utabnábeñe ošbuáchiyënga más imojtsóbotena, bëtscá boyabásenga y shembásengnaca. <sup>15</sup> Tša bëts soyënga chë ichmónëngaftaca yojtsebinÿna; chíyeca entsánga imojanamana jutsnëshangañe y tjuashënguiñe tsáshenoye šoquënga jubuacnana, chca, Pedro chëjana tojtsachnéjuana ora, nÿe mo chabe sómbrenaca chëngbe cuerpëjana chaohnënguama, shnánënga jtsatsmënana. <sup>16</sup> Jerusalén chábuañe pueblënguentshana ba entsánga imojanamana jabana, y šoquënga y bacna bayëjbe juabna uambayënga imojtsëyabó; y nÿetscanga shnánënga imojtsatsmëna.

*Bëngbe Bëtsá tojanma Pedro y chë inÿe ichmónënga cárcelocana natjëmbana chámuaisebocnama*

<sup>17</sup> Chë ichmónënga tša tšabá imojtsamama, chë judío bachnangbe más uámana amëndayá y chabe ústonënga, chë saduceunga, puerte envidia imojtsebomna. <sup>18</sup> As chë ichmónëngbioye tmojánishëche y chë bëts pueblentša cárceloye tojtsanëtame. <sup>19</sup> Pero ibetna, Bëngbe Utabná canÿe ángel tbojanichmó y chë utámenentša bëšašangá cha tojánatëfjo, chënga tojtanébuacna y mëntšá tojanéyana: <sup>20</sup> “Motsajna, Bëngbe Bëtsabe bëts yebnentše šmochjámashjna, y entsánga šmochjabuayená ntšamo cuanjama chë nÿetsca tescama yomna tšabe vida jtsebomnama, Jesucristoftaca cánÿiñe mo canÿacá jtsemnëse ca.” <sup>21</sup> Ntšamo tmojanuencá, yëfsana cabá cachëse Bëngbe Bëtsabe bëts yebnoye tmojána y tmojanontšë entsánga jabyuátambana.

Chëntscuana, chë bachnangbe más uámana amëndayá y chabe ústonënga, chë Israeloca bëtsëjemëngcá mándayënga y inÿe chentša amëndayënga tmojánachembo jénefnama y jenóyeunayama; as chora chënga tmojanmandá chë utámenocana chë ichmónënga jobiatšama. <sup>22</sup> Pero chë soldadënga chë utámenoye tmojánashjajna ora, chënga chentše ndoñe tmonjánanÿena. Chcasna, chënga tmojtaná chë mándayënga

chca jaúnayama. <sup>23</sup> Y tmojánayana: “Chë utámenoca fsënjínÿena lempe tšabá endët-sëtámeñe y soldadëngna nÿetsca bëšašangá monduabojanÿanga; pero fsënjatëfjo y tsoye fsënjámashjna orna ndocná chibiátinÿena ca.”

<sup>24</sup> Chë bachnangbe amëndayënga y chë Bëngbe Bëtsabe bëts yebnentša soldadëngbe amëndayá chca tmojanuena ora, yojtsëtëmnana y imojtsentjanaye ndayá chentšana yochjanopásama. <sup>25</sup> Chorna, chënga imojtsemnentše canÿe boyabása tojánashjango y mëntšá tojanéyana: “Chë šmojutámiënga mora Bëngbe Bëtsabe bëts yebnocá montsemna, entšanga montsabuatambá ca.”

<sup>26</sup> Chë soldadëngbe amëndayá tojána soldadëngaca, chë Jesusbe ichmónënga junatsama; pero nÿe tšabá tmojanënatse, er chënga entšangbiama imojtsauatja, nderado cachëngbioye ndëtsbéngaca muantsëbaye. <sup>27</sup> Chëngbioca tmojanéshejajna ora, mandayëngbioye tmojanënatse; chora chë bachnangbe más uámana amëndayá mëntšá tojanéyana: <sup>28</sup> —Bënga jabuachana tcbontsëuyaná y tcbonjúuyana ndoñe šmontselesenciana jtsóyebuambnayama chë boyabása Jesús tojánayana yojtsemna jabuátambama soyëngama ca. Masque chcasna, mora tšëngaftanga nÿetsca chë Jerusalemntša oyenënga chabe soyëngama šmojtسابuatambá y šmojtseboše, cha tojanóbanama castigo béngbeñe chaotsemnana ca.

<sup>29</sup> Chorna, Pedro y chë inÿe ichmónënga tmojánayana: —Bënga šontsamna natsana Bëngbe Bëtsá joyeunayana y chentšana entšangbioye. <sup>30</sup> Chë Taitá, nda bëngbe bëts taitanga monjánadorana, cha tojama Jesús cháuatayenama, chë nda tšëngaftanga šmonjanóba canÿe cruciñe juajabonjëse. <sup>31</sup> Bëngbe Bëtsá tbontatsbaná y chabe catšbioica tbojëtstbema, jtsamëndayama, y tbojábema entšangbe Unachayá y Atsebacyá, chca, Israeloca entšanga ngménaca chamuenójuaboma bacna soyënga imojtsamama y chca amana chamotsajbanama, y chëngbe bacna soyëngama perdonánënga chamotsemnana. <sup>32</sup> Bënga fséntsichamo ndayá bënga ndegombre tifjinÿe Bëngbe Bëtsá chca jtsamana ca; chë Uámana Espíritnaca chë soyëngama endbëtsoyebuambnaye. Bëngbe Bëtsá endbëtsama chë Uámana Espíritu cháumashëngo chë tmojtseyeunanëngbe ainaniñe jtsemándayama ca —chënga tmojánayana.

<sup>33</sup> Chë mándayënga chca tmojanuena ora, puerte tmojanotjayaná y tmojánbošena chë ichmónënga jtsëbáyama. <sup>34</sup> Pero chë mándayënguentše yojtsemna canÿe fariseo, Gamaliel ca uabainá. Chana canÿe ley abuatambayá inamna y entšanga puerte imnarrespetana. As cha tojantsá y tojanmandá chë ichmónënga ratotema chentšana jubuacnama. <sup>35</sup> Chentšana chë inÿe mándayënga tojanéyana: “Israeloca taitanga, puerte cuedado šmochtsebmna ntšamo quem boyabásengaftaca šmochjamama. <sup>36</sup> Quem soyama šmochjenójuaboye: Ndoñe bayté quenátsmëna, Teudas tonjánbocna y cha enjánichamo canÿe uámana entšá canjamna ca, y mo canta patse entšanga cha tmojanasto. Pero chora ínÿenga cha tmontsanóba y chabe ústonënga tmontsanáshana, y chca lempe tontsanopochocá. <sup>37</sup> Chentšana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca ínÿenga tmontsanóba y nÿetsca chabe ústonënga tmontsanáshana. <sup>38</sup> Chíyeca atše cbéyana, quem boyabásenga matabáshejuana y ndocá mataborlánana. Ntšamo chënga montsamancá, nÿe entšangbe juabna y nÿe chëngbe trabajo tojtsemnëse, betscó echanjopochocá. <sup>39</sup> Pero chca Bëngbe Bëtsabe soye tomnëse, tšëngaftanga ndoñe quešmochatobenaye jáyëñjanama. Cuedado šmochtsebmna, nderado mo Bëngbe Bëtsabe uayayënga šmuatjanenobiama ca” —cha tojanéyana.

Y as chënga Gamaliel tmojanoyeuná. <sup>40</sup> Chcasna, chë ichmónëngbioye tmojánachembo, tmojtсанachebuárganja y tmojanéyana Jesusbe uabáinaca entšangbeñe ndoñe chamondëtsoyebuambná ca; y chentšana tmojtанabáshejuana. <sup>41</sup> Chora chë ichmónënga chë amëndayëngbentšana puerte oyejuayënga tmojésanbocna, er Bëngbe Bëtsá tojanalesenciá jasúfriama, chënga Jesusbiamá oservënënga bëtsemnayeca.

<sup>42</sup> Chentšana, chënga cada te imojanabuatambá y Jesús, chë Uámana Uabuayaná, chë Cristo bétsemnama entšángbioye imojanabuayiyná, Bëngbe Bëtsabe bëts yebnentše y yebnënguenáchnaca.

## 6

### *Chë ichmónëngbiana ujabuáchanënga tmojanëbuáyana*

<sup>1</sup> Chë tempo, Jesucristbeñe ošbuáchiyënga betesco imojtsóbotena. Chora chë Jesucristbeñe ošbuachiyëngbentše, chë judiënga griego biyanga batšá imojtsetšátjaye y chë judiënga hebreo biyangbiana mëntšá tmojánayana: “Chë griego biyangbe viudángbioye ndoñe cachcá quemnatëjabuáchana ntšamo chë hebreo biyangbe viudángbioye cada te montsëjabuachancá ca.”

<sup>2</sup> Asna, chë bnëtsana uta ichmónënga nyetsca chë Jesucristbeñe ošbuáchiyënga tmojanëbuaja y tmojanëyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyebuambnayana nÿe chë viudanga jtsanÿenama chë tojtsëjamoto soyënguiñe. <sup>3</sup> Chcasna, baconga y batanga, tšëngaftanguentšana canÿsëftanga mëbuáyana, tšabá mandbomnëngcá šmëbuátmënga, chamotsemna osertánënga y chë Uámana Espiritu chëngbe ainaniñe chaotsemánda, as chënga chë ujabótënga jtsëjabuáchanama trabajo fchanjábanÿiye. <sup>4</sup> Y bëngna šontsamna nyets tempo Bëngbe Bëtsáftaca jtsencuëntayana y Bëngbe Bëtsabe palabra entšanga jtsabuayiynayana ca” — chënga tmojánayana.

<sup>5</sup> Nyetscanga tojanogusetá ntšamo chë ichmónënga tmojanayancá; as, Esteban tmojanábuayana; canÿe boyabása puerte ošbuachiyá cha inamna y chë Uámana Espiritu chabe ainaniñe yojanmánda. Chentšana tmojanëbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entšá, Antioquía bëts pueblócá, y cha yojanamana Bëngbe Bëtsá jtsadoránana mo cach judiëngcá). <sup>6</sup> Chentšana chënga tmojanënatse Jesucristbe ichmónënga imojtsemnoye; chocna, chë Jesusbe ichmónënga Bëngbe Bëtsá tmojanimpadá chë ichmónëngbe trabajënguiñe chë ubuáyanënga chaujabuachama, chëngbe cucuatšënga chëngbe bestšašentše jajájuase.

<sup>7</sup> Más banga Bëngbe Bëtsabe palabra imojtsuenana, y chca, Jesucristbeñe ošbuáchiyënga más imojtsóbotena, y Jerusalenentše más ošbuáchiyënga betesco imojtsóbotena. Y ba judiëngbe bachnángnaca tmojanontšë Jesucristbeñe jtsošbuáchiyana, ntšamo chë ínÿenga imojtsanošbuachecá.

### *Esteban tmojánishache*

<sup>8</sup> Esteban, Bëngbe Bëtsabe obenana y chábertšana tšabe bendicionënga yojtsebomnëse, entšángbeñe bëts soyënga yojtsama. <sup>9</sup> Báseftanga “Ya Cachcá Atabashejuana Oservénënga ca” uabainëngna tmojanontšë Estébanoftaca enatsëtsnayana. Chënga imojamna judiënga Cirenoquënga, Alejandriokuënga, Cilicia y Asioquëngnaca, y chëngbe enefjuana luare yojanabaina “Ya Cachcá Atabashejuana Oservénëngbe Yebna ca”. <sup>10</sup> Pero chë Uámana Espiritu tojanma Esteban chaóyebuambama bëtscá osertanacá, y chíyeca chënga ndoñe imontsobena ntšamo cha jojuana. <sup>11</sup> As chënga báseftanga tmojanëbuënyaye Estébanbe contra podescasoye chamuayanama, mëntšá: “Cha fsënjoyeuná Moisesbiana y Bëngbe Bëtsabiana ndoñe tšabá jtsóyebuambnayana, mo cuafjoyanguangcá ca.” <sup>12</sup> Chcase chënga tmojanma entšanga, bëtsëjemëngcá mándayënga y ley abuatambayënga Estébanbe contra chamóntša enbouenanana; y as, Esteban tmojanotbá y chë mándayënga imojtsemnoye imojuichëmo. <sup>13</sup> Y tmojanënatse básefta entšanga, uayátsenaye soyënga y podescasoyënga Estébanbe contra chamuayanama; as chënga mëntšá tmojánayana: “Mua bacna soyënga entsichamo chë Bëngbe Bëtsá jtsadoránama bëts yebnama y Moisesbe leyëngama. <sup>14</sup> Y fsënjoyeuná cha jayanana, Jesús Nazaretocá Bëngbe Bëtsabe bëts yebna caochtsepochoá y caochjama bënga nÿe chabe mandëngaca

mandánënga chamotsiyenama y ndoñe ntšamo Moisés bëngbe bëts taitanga tojëft-sanabuatambacá ca.”

<sup>15</sup> Chë mándayënga y nyetscanga chentše imojétsetbiamanënga Esteban tmojanonýinýe ora, tmojáninýe chabe jubíá yojtsebuashinýinýana mo canýe ángelbe jubiacá.

## 7

*Ntšamo Esteban tojanenëuyaná*

<sup>1</sup> Chora chë bachnangbe más uámana amëndayá, Estébanbioye tbojantjá: —¿Ntšamo acbiana montsichamcá ndegombre yojtsemna ca?

<sup>2</sup> As Esteban tojanéjua: —Taitanga y baconga, mouenënga. Bëngbe Bëtsá, chë corente uamaná endméná, Abrahámbioye tbojánëbëbocna, cha Mesopotamioca yojaniyena ora; tbojánëbëbocna, Harán bëts pueblocá joyénanama cabá nda ora, <sup>3</sup> y Bëngbe Bëtsá tbojaniyana: “Metsebošhona acbe fshantse y acbe pamíllanga y cbochanjinýinýiye luaroye cochjá ca.” <sup>4</sup> As Abraham chabe luare Caldea tojëftsanbošhona y tojána Haránoca joyénanama. Chabe taitá tojanóbanentšana, Bëngbe Bëtsá Abrahámbioye chë luaroye tbojanánatse, chë mora tšëngaftanga šmontsiyenentše. <sup>5</sup> Pero quem luariñe ni mo base fshantse ndoñe tbojëftsanatšetá, ni mo ndayentše jtsiyenama. Pero aíñe Abrahámbioye tbojanšbuachená chë fshantse jatšëtayama, chabiana y chabe básengbiama, Abraham tojóbanentšana. Chca tbojanšbuachená ora, Abraham ni canýe šëšona bonjánbomna. <sup>6</sup> Y Bëngbe Bëtsá mëntšá tbojaniyana: “Chë ácbentšana entšanga, ínýengbe luaroca áshjajnënga mochántsemna, y choca oyenënga chëngbe oservënënga chëngbioye mochanjábiama y canta patse uatëntscuana jabuache mochanjasufrina ca.”

<sup>7</sup> Y mëntšánaca tbojaniyana: “Pero atše chanjácastigaye chca oservënënga chacmojábiama luarentša entšanga; y as, chentšana chë ácbentšana entšanga mochanjësëbocana y mora bontsemna luaroye mochanjësabo y muentše atše šmochántšadorana ca.” <sup>8</sup> Bëngbe Bëtsá Abrahámbioye tbojanšbuachená nýe cha y chabe básengbe Taitá cha jtsemnama y jamama tšabe bendicionënga chëngbeñe chaotsemnama, y chama, chaotsinýnamna tbojanmandá chabe šëšona, boyabásetema tojonýná ora, base bobachtema chë más delicadentše jatëtšana. Chíyeca, chabe uaquiñá Isaac tojanonýná ora, posufta tianoye Abraham base bobachtema chë más delicadentše tbojantëtše. Isaac cachcá tojanma chabe uaquiñá Jacóboftaca y Jacob cachcá tojanma chë chabe bnëtsana uta uaquiñëngaftaca. Chënga monjamna chë Israeloca bnëtsana uta bëts pamíllangbe taitanga.

<sup>9</sup> “Quem uaquiñënga bëngbe bëts taitanga monjamna. Chëngna, chëngbe uabentsá Josébioye envidia inmabomna y tmojtsatanobuiye, Egiptoye canýe oservenacá chamot-sánatseñama. Pero Bëngbe Bëtsá Josébioye nyets tempo ibnauájabuachana, <sup>10</sup> chíyeca nyetsca chabe ngmenënguëntšana tbojanatsbocá y Bëngbe Bëtsá tojanma cha chaotsetatšëmbuama tšabá jóyebuambayama chë Egiptoca réybentše, Faraón ca uabainá. Bëngbe Bëtsá tojanma chë Faraón chaoyejúa ntšamo José yojamnama; chíyeca Faraón Josébioye tbojánbema Egiptoca mandado y chabe yebnënguëntše oyenëngbiámna.

<sup>11</sup> “Chë tempo, Egiptó y Canaán luariñe bëts shëntsana tojanóshjango y puerta ngménana yojtsemna y bëngbe bëts taitanga ndoñe imontsobena saná jónýenama. <sup>12</sup> Pero Jacob tojántatšëmbona Egiptoca saná yojtsemnama; asna, chabe uaquiñënga, chë bëngbe bëts taitanga choye tojanichamó. Chora yojamna chë natsanama chënga Egiptoye jama. <sup>13</sup> Uta soyama chënga tmojtesaná ora, José chabe catšátanga tojanéyana: ‘Atše José sëndmëna, tšëngaftangbe uabentsá ca.’ Chca chë Faraón Josebe pamíllangbiama tojántatšëmbona. <sup>14</sup> Chentšana, José tojanmandá chabe taitá Jacob y nyetsca pamíllanga Egiptoye chamotsama. Canýsëfta bnëtsana shachnënga imojamna chë Egiptoye tmojánanga. <sup>15</sup> Chcasna, Jacob Egiptoye tojána choca joyénanama. Choca cha

tojanóbana y chë inye bëngbe bëts taitángnaca. <sup>16</sup> Jacob y chabe básenga, ntšamo imojt-sobancá, chëngbe cuerpo Siquem bëts puebloye imojtsatambaye y tmojanëtebuantsá, Abraham tojëftsanbuamé cuevëshënguine. Abraham canye crocenánama Hamorbe uaquiñéngbioye, chëshënga yojtëyentšbuamiñe Siquem puebloca.

<sup>17</sup> “Ntšamo Bëngbe Bëtsá Abrahambioye tbojanšbuachenacá jamama yojtsobeco ora, Egiptoca corente tmojanoboté Israeloca entšanga y banga chënga imojtsemna. <sup>18</sup> Cabana, Egiptoca inye rey tojanoyayé y cha Josébioye ndoñe tbonjanabuátmana. <sup>19</sup> Chë reyna, bëngbe entšanga, chë bëngbe bëts taitángbioye tojanaingñe y tojanma chënga puerte chamosufrima; tojanamëndá, chë tmojtsónyna šešonatémënga cachcá jtséñyayana chamotsóbanama. <sup>20</sup> Chë tempo canye básetema tojanonýná y cha Moisés ca tmojanabaye. Bëngbe Bëtsá Moisesbiana oyejuayá yojtsemna y chabe bëtsétsata cach yebnentše tmojanboché unga ishinýentescuana. <sup>21</sup> Cachcá jonýayama yojtsamna orna, Faraonbe bembe tbojanocñe y mo cachabe uaquiñá cuenta tbojanboché. <sup>22</sup> Chca, chë Egiptoquënga imnatátšëmbo soyënga Moisés tmojanbuatëmbá y canye uámana entšá tojánbocna jóyebuambayama y ndayánaca jamama.

<sup>23</sup> “Canta bnétsana uata tojánashjache ora, tojanenojuabó jama jtsetatšëmbuama ntšamo chë Israeloquënga, chabe entšanga imojtsemnana. <sup>24</sup> Canye, Moisés tojáninýe canye Egiptocá canye Israelocábioye ibojtsejantšetaye ora; as Moisés tbojanoboguiyaná y chë Egiptocábioye tbojtsanóba. <sup>25</sup> Moisés yojtsanjuabnaye chë Israeloquënga yojtsósertana, Bëngbe Bëtsá yochjanma cach Moisesbe obenánaca chë Egiptoca mandentšana chëngbioye játsebacama ca. Pero chë Israeloquënga ndoñe yontšésertana. <sup>26</sup> Yëfsana, Moisés tojánanýena útata, cach Israelocata, ibojtsentsjanaye; chora cha betscó tojána jetséuyanama y tojanéyana: ‘Tsëndata catšata šondmëna, ¿ndáyeca šojtsentsjanata ca?’ <sup>27</sup> As, chë ínýabioye ibojtsetsjanayá Moisésbioye tbojtsanajuatsëntše y tbojaniyana: ‘¿Nda bëngbeñe tcmënjajayé mandado y chë tšabá o ndoñe tšabá ftsamama chacuayanama ca?’ <sup>28</sup> ¿Cojtseboše átšnaca jóbama, ntšamo tonjopasá yëfse chë Egiptocábioye tconjobacá ca?’ <sup>29</sup> Moisés chca tojanuena ora, Madián luaroye tojtsanachá y choca yojoyena inye luarocana ashjangonacá. Chentše uta uaquiñata yojéftsabamna.

<sup>30</sup> “Chentšana canta bnétsana uatëse, entšanga ndoyena luariñe, Sinaí tjañe béconana, canye ángel tbojánëbëbocna zarzësha yojtsángbototjuanentše. <sup>31</sup> Moisés yojenjnaná ndayá yojtsonýama y tšabá jinýama tojanobeconá ora, tojanuena Bëngbe Bëtsá mëntšá ibojtsatsëtsnaye: <sup>32</sup> ‘Atše acbe bëts taitangbe Bëtsá sëndmëna, Abraham, Isaac y Jacobëbe Bëtsá ca.’ Moisés chama tojanëuatjaná, ibojtsengmëmnaye y añemo ndoñe yontse-bomna choye jontješiyama. <sup>33</sup> As Bëngbe Utabná tbojaniyana: ‘Motsenóshecbotsca, er aca contsemnentše nýe atšbiana luare endmëna, er átšnaca chentše sëntsemna. <sup>34</sup> Ndegombre sënjinýe ntšamo atšbe entšanga Egiptoca montsesufrina y sënjouena chëngbe oyaboyuayana, y atše sënjabo chënga jabátsebacama. Chcasna, mabouena, Egiptoeye cbochanjíchmuca ca’ —Bëngbe Bëtsá tbojaniyana.”

<sup>35</sup> Chentšana Esteban tojanéyana: “Quem Moisés entšanga tmojtsanaboté y tmojaniyana: ‘¿Nda bëngbeñe tcmënjajayé mandado y chë tšabá o ndoñe tšabá ftsamama chacuayanama ca?’ Masque chca, Bëngbe Bëtsá mo mandayacá y atsebacayacá tbojesanichmó, chë zarzëshentše tojanobinýná ángeloftaca. <sup>36</sup> As Moisés, bëngbe bëts taitanga Egiptocana tojésanëbuacna y bëts soyënga tojanma, y inye soyënga Bëngbe Bëtsabe obenana jinýanýiyama Egiptentše, chë Buángana ca uabaina mar béjayentše y entšanga ndoyena luarentše, canta bnétsana uatëntscuana. <sup>37</sup> Cach Moisés Israeloca entšanga mëntšá tojanéyana: ‘Bëngbe Bëtsá tšëngaftanguentšana canya bochanjábema atšcá Bëngbe Bëtsabe juabna oyebuambnayá ca.’ <sup>38</sup> Moisés Israeloca entšangaftaca yojéftsemna chë entšanga ndoyena luaroca. Choca chë entšanga tmojánenefjna Sinaí

tjañe béconana. Chentšna canje ángel Moisésoftaca tojanoyebuambá, bəngbe bəts taitəngbioye chə buayenana soye Moisés chaóyebuambama, chə entšanga tšabe vida jónyēnana palabrénga; y Moisés chca tojanma, bəngnaca chə palabrénga jouenama jobenayama.

<sup>39</sup> “Pero bəngbe bəts taitanga ndoñe tmonjánbošena joyeunayama, masna nje tmojt-sanaboté y Egiptoje jeshhéconama imojtsaiseboše. <sup>40</sup> Moisés cabá chə tja tsjuanoca chə ángeloftaca yojtsemna ora, chəngbe bachnangbe más uámana aməndayá Aarónbioye mēntšá tmojanianyana: ‘Bəngbe Bətsabe cuenta šmayentšpormá canje buashinýinýana soye jadórana, bənga chašúnatsama. Er bənga quemátstatšəmbo ndayá yojtsopasana Moisés, chə Egiptocana šonjéftsəbuacnáftaca ca.’ <sup>41</sup> As tmojanma canje buashinýinýana soye mo canje uacnabecá y cha jadórana ba bayənga tmojanəbaye, y tmojanóboyejuanga cachənga chə soye tmojanpormáyeca. <sup>42</sup> Chə causa, Bəngbe Bətsá chəngbentšana tojtsanojuánañe y cachcá tojesanénýaye chəngbe bacna soyənga causa, estrellatəmənga chamotsadoránama. Chca jochnənguama, Bəngbe Bətsabe juabna oyeubambayəngbe libréšañe mēntšá endayana, ntšamo Bəngbe Bətsá tojanayancá:

Israeloca entšanga,

¿Atše jətschuayama bayənga chešmənjanəbaye y chə soyənga chešmənjanátšəmbona, chə canta bnətsana uata entšanga ndoyena luarentše tšəngaftanga šmonjéftsemna ora?

<sup>43</sup> Atše jadóra cuentna, chə Molocbiana jebna soye šmonjanacutsá y cha šmonjánadorana,

y chə Refánbe estréllacnaca cachcá šmonjánama.

Chə soyənga mo Bəngbe Bətsá cuenta šmonjánbomna y cach tšəngaftanga šmonjanobopormá jadórana.

Mora chə causa atše chanjama, Babilonientšana más chcoye tšəngaftanga chacmotsénatsama ca” —chiñe endayana.

<sup>44</sup> “Bəngbe tempsca bəts taitanga entšanga ndoyena luaroca, chə jatsjacama opodena yebna imnabomna; chə yebnentše Bəngbe Bətsá chəngaftaca tojanoyebuambá. Inajebna ntšamo Bəngbe Bətsá Moisésbioye tbojanmandacá, y cha tojanma ntšamo chaojebuama Bəngbe Bətsá tbojaninýinýecá. <sup>45</sup> Bəngbe bəts taitangna chəngbe taitəngbentšana chə jatsjacama opodena yebna chəngbiana tmojanóyəngacñe, y chənga chə Canaán luaroye Josuéftaca, chə inye luaroquəngaftaca jəntsjava tmojána ora, chə jebna soye tmojanamba y chocna, Bəngbe Bətsábeyeca chentša entšəngbioye Israeloquəngbentšana tmojtanəbuacna; y chə jebna soyna chə tmojanayənjaná luarentše tojanoquedá, rey David yojéftsiyenəntscuana. <sup>46</sup> David tšabá mandbomná inamna, chíyeca Bəngbe Bətsá cháftaca puerte yotsóyejuaye. David chábioye lesencia tbojanotjañe jajebuama, Bəngbe Bətsá chə Jacob tbojanadorá cha, chentše chaotsiyenama. <sup>47</sup> Pero Salomón inamna nda chə Bəngbe Bətsabe bəts yebna tojanjebuá. <sup>48</sup> Masque chə celoca Bəngbe Bətsá, entšangbe jebna yebniñe ndoñe quenatiyena. Ntšamo Bəngbe Bətsabe juabna oyeubambnayá tojanabemcá, ndayá Bəngbe Bətsá tojanayancá:

<sup>49</sup> ‘Celoca endmēna chə luare ndayentšana atše tsmánda,

y quem luare endmēna nje mo canje tšenətemcá ndayentše atšbe shecuatšənga chjacjaye.

As, ¿ntšamo atšbiana jebna yebna šmochjajebo ca?’ —chə Utabná jayanana—;

‘o ¿ndaye yebnentše atše jóchnama chjobenaye,

<sup>50</sup> ndegombre cach atše nyetsca chə soyənga tijaməse ca?’ ”

<sup>51</sup> Esteban mēntšánaca tojanéyana: “Tšəngaftanga nyets tempo josértama ndəbošənga šmondmēna; šmondbomna ainana mo chə Bəngbe Bətsábeñe ndošbuáchiyəngbe ainancá, y Bəngbe Bətsabe soyəngama nduauenanənga šmondmēna. Tšəngaftanga ndocna te quešmátsoše chə Uámana Espíritu joyeunayana. Ntšamo tšəngaftangbe bəts taitanga monjanianyencá, tšəngaftəngnaca cachcá. <sup>52</sup> ¿Bəngbe Bətsabe



juabna oyebuambnayënguentshana, ndábioye tšëngaftangbe bëts taitanga ndoñe monjanacmena? Chë Bëngbe Bëtsá tojanichamó entsanga chënga tmojtsanëbaye, y mëngna entsángbioye imojanabuayiyiná Cristo, chë ntšamo Bëngbe Bëtsá yobošcá amá yochjánabama. Pero morna, uayayëngbe cucuatšinë cha šmojábošhona y šmojóba. <sup>53</sup> Bëngbe Bëtsabe mandënga angelëngaftaca tšëngaftanga šmonjanóyëngacñe, pero chë soyënga ndoñe quešmátsyeunana ca” —cha tojanéyana.

#### *Esteban ndëtsbëngaca tmojanóba*

<sup>54</sup> Chentša mándayënga chca tmojanuena ora, Estébanoftaca tmojanotjayaná y tmojanenaftëšbonzentsé, rábiaca imojtsemnama. <sup>55</sup> Pero chë Uámana Espíritu Estébanbe ainaniñe corente yojtsemádaye. Celoye yojontješiyë y Bëngbe Bëtsabe buashinýinýanana yojinýe, y Jesús, Bëngbe Bëtsabe catšbioica yojtsatsana. <sup>56</sup> As, Esteban tojánayana: “¡Mouenënga, sëntsonýá celoca entsatëfjna y Bëngbe Bëtsá Entšá tbojanbemá Bëngbe Bëtsabe catšbioica entsemna jtsamëndayama ca!”

<sup>57</sup> Chora chënga jabuache imojtseyoye, imojtsenamatsachto ndoñe más ntsuenanama y Estébanbioye tmojanontsënja. <sup>58</sup> Chentšana, chënga chë pueblentshana tmojtsanábozna y ndëtsbëngaca tmojtsanatëchénganja. Chë Estébanbioye mal tmojanquedangna entsayangá tmojtsanenátsejca y canýe bobontse, Saulo ca uabainá, tmojesanábonýiñe chaotsinýenama.

<sup>59</sup> Ndëtsbëngaca imojtsénanantscuana, Esteban Bëngbe Bëtsáftaca ibojtsencuëntaye y mëntšá tojánayana: “Bëngbe Utabná Jesús, atšbe espíritu šmóyëngaca ca.”

<sup>60</sup> Chentšana Esteban tojanoshamentšé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

## 8

<sup>1</sup> Saulo chentše yojtsemna y tšabá imojtsama ca yojtsejuabnaye, Esteban tmojanóbama.

#### *Saulo yojánama chë Crístbeñe ošbuáchiyënga chamotsesufrínama*

Cach te, inýënga tmojanontšé Jesucristbeñe ošbuáchiyënga Jerusalenentše ucame-nana y jtsamana puerte chamotsesufrínama; chcasna, chënga tmojtsanacheta y Samarioye y Judeoye tmojanáshana. Nýe chë Jesucristbe ichmónënga ndócnoye tmonjánacheta. <sup>2</sup> Básefta boyabásënga, Bëngbe Bëtsá adórayëngna, Esteban tmojanamba jauátbontsama y chabiamana puerte tmojánenobošachna. <sup>3</sup> Chëntscuana, Saulo yojtsentšëna Jesucristbeñe ošbuáchiyënga jtsapochócama y yebnënguenache yojánamashjuana boyabásënga y shembásënga sjojónana ubuacana jutámiamana.

#### *Felipe Samaria luaroca tšabe noticiëngama yojanabuayiyiná*

<sup>4</sup> Y Jesucristbeñe ošbuáchiyënga tmojanáshanëngna nýetsquénache imojánabuayiy-naye Jesusbe tšabe noticiënga. <sup>5</sup> Chca, Felipe Samarioye tojána y tojanontšé chë Bëngbe Bëtsabe Uámana Uabuayaná, Cristbiamana, chentša entsanga jábuayenama. <sup>6</sup> Entšanga imojánenefjuana Felipe joyeunayama y tmojáninýe bëts soyënga cha jtsamana, Bëngbe Bëtsabe obenana jinýanýiyama. Chënga nýetscanga ntšamo Felipe yojtsichamcá tšabá imojtseyeunana. <sup>7</sup> Banga bayëjbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentshana imojtsaisebocana; y banga jama ndobenënga y coshetënga tšabá imojtsatsmëna. <sup>8</sup> Chë soyama chë pueblentshana oyenënga corente imojtsóyejuaye.

<sup>9</sup> Pero canýe pueblentshe Samarioca inamna canýe boyabása, Simón ca uabainá; cha tempo inamna canýe bocjuaná y chë Samarioca entsanga chabe soyëngama imojánenjnanaye. Cha yojánichamo cha canýe uámana entšá canjamna ca. <sup>10</sup> Y chábioye corente innayeunana nýetscanga, uámanënga y nduámanëngnaca. Entšanga imojánichamo: “Mua entsemna chë Bëngbe Bëtsabe bëts obenana inýanýinayá ca.”

<sup>11</sup> Y ndegombre chënga corente inmayerunana, er cha chë bocjuanana soyéngaca bayté chë entsànga ingñénënga y ojanánënga yojsabamna. <sup>12</sup> Pero chë luarentša entsàngna, Felipe tmojanoyeuná chë cha yojsétsétsná tšabe noticiënga Bëngbe Bëtsabe améndayama y chë Jesucristbiana tšabe soyënga. Chorna chënga Jesucristbeñe imojtsošbuáchiye, y boyabásenga y shembásenga tmojánenabaye. <sup>13</sup> Y cach Simónëna Jesucristbeñe yojssošbuáchiye y tojanenábaye, y chentšana cada te Felípeftaca cha yojsanmëna. Cha tojáninÿe Felipe chë bëts soyënga Bëngbe Bëtsabe obenánaca jamana, y chama ojananá yojsamna.

<sup>14</sup> Chë Jerusalemoca imojtsemna ichmónënga tmojántatšëmbona Samarioca entsànga Bëngbe Bëtsabe palabra tmojanóyeunama; as, chora Pedro y Juan choye tmojanichamó. <sup>15</sup> Pedro y Juan Samarioye tbojánashjango ora, chentše Jesucristbeñe ošbuáchiyëngbiana Bëngbe Bëtsá tmojanimpadá, as chë Uámana Espíritu chëngbeñe cháumashënguama jtsemándayama. <sup>16</sup> Er cabá ni mo cánÿabeñe chë Uámana Espíritu tonjánamashëngo; chënga tmojánenabaye Bëngbe Utabná Jesús jótšëmbonëse, chábeñe ošbuáchiyënga jtsemnama imojtsebóšeyeca. <sup>17</sup> As Pedro y Juan chëngbe bestšašinë cucuatšënga tbojancjá, y chca, chë Uámana Espíritu tojánamashëngo chëngbe ainaniñe jtsemándayama.

<sup>18</sup> Simón tojáninÿe, chë ichmónënga entsàngbeñe cucuatšënga tmojacjá ora, chë Uámana Espíritu chëngbeñe jamashënguana. As chora Simón chë ichmónënga tojanéyana: —Quem crocénana mosháchiñe, <sup>19</sup> y átšnaca chë obenana šmatšetá, y ndábeñnaca cucuatšënga chajajajó ora, chábeñnaca chë Uámana Espíritu cháumashëngo ca.

<sup>20</sup> As Pedro tbojaniana: —¡Acbe crocénana infiernoye chaotsá y ácnaca, chë Bëngbe Bëtsabe tšetana soye crocénanaca jobuámiñama yopodena ca tcojajuabó causa! <sup>21</sup> Ndegombre, aca béngaftaca ndoñe quecátsmëna, ni bëngbe trabajo acbiana quenátsmëna, Bëngbe Bëtsabe delante acbe ainaniñe tšabe juabnënga ndoñe quecátbomna causa. <sup>22</sup> Ngmëna cochjenójuaboye quem bacna soye tcojamama y chca amana cochtsajbaná y Bëngbe Bëtsá cochjaimpáda, aca chca tcojajuaboma nderádose cmattjaperdóna. <sup>23</sup> Atše séntsetatšëmbo, acbe ainaniñe tša bacna juabnënga ínÿengbiana yojsamnama; y bacna soyënga amana jtsajbanama ndoñe quecátobena causa, aca mo canÿe ntsacjuanacá contsemna ca —Pedro tbojaniana.

<sup>24</sup> As chora Simón tojanéyana: —Bëngbe Utabná atšbiana šochjaimpáda, ntšamo šmonjauyancá ndoñe chandépasama ca.

<sup>25</sup> Pedro y Juan, ntšamo Bëngbe Utabná Jesucristbiana tbojaninÿcá y ibnatatšëmbcá entsànga imojtsétsétsnaye. Chentšana, Jerusalemoye tbojésanata y tbojánachnëngo ba Samarioca pueblënguëjana, tšabe noticiënga entsànga abuayinaye.

#### *Felipe y chë Etiopía luaroca reinabe uajabuachaná*

<sup>26</sup> Chentšana, Bëngbe Utabnabe canÿe ángel Felípbioye tbojaniana: “Moprontá y tsmána luarëngoye motsa, Jerusalemëntšana Gaza ca uabaina bëts puebloye benachëjana ca.” Chë benachna entsànga ndoyena luarëjana yojanachnéngona. <sup>27</sup> As Felipe yojsétsétsbaná y tojána. Benachiñe tbojáneninÿena canÿa Etiopía luarocáftaca. Etiopía luaroca canÿe reiná inamna y chë boyabásana chabe uajabuachaná y chabe crocénana bojanÿá inamna. Chana Jerusalemoye tojánabo Bëngbe Bëtsá jadórama. <sup>28</sup> Chora Etiopía luaroye yojsataye, chabe cochéshañe inayésenotbemañe, y chë Bëngbe Bëtsabe juabna oyebuambnayá Isaíasbe uabemana librëša yojsaiualíaye.

<sup>29</sup> Chora chë Uámana Espíritu Felípbioye tbojaniana: “Mobeconá y chë cochésha juachaca cochtsaye ca.” <sup>30</sup> As Felipe betscó yojobeconá. Chora yojouena chë Etiopía luarocá, Isaíasbe uabemana librëša yojsaiualíaye; as tbojantjá: —¿Chë contsalía soye quecmojtsosertana ca?

<sup>31</sup> Y chë Etiopía luarocá tbojanjúá: —¿Ntšamo šochjosérta, ndocná šonjabuayenase ca?

Y Felípbioye tbojaniyana: —Diosmanda, atšbe cochéshoye másšengo y atšbe juachaca mabótbema ca.

<sup>32</sup> Isaíasbe uabemana librésaŋe mēntšá yojtsaláye: Cha tmojanánatse mo canye oveshá jóbama cuafjuanatscá; y chē mo canye oveshá tmojtsētsbotjñá ora, cha iytēca jtsemnana, chánaca cachcá, chacá tondaye chenátanayana.

<sup>33</sup> Entšanga tmonjanma cha puerte chaosufrima, mo cha canye nduamaná cuaftsemncá y ntšamo ndoñe betsomerecencá cháftaca tmonjanma.

Ndocná nanjobenaye chabe básengbiama jacuéntana, quem luarentša chabe vida tmonsanbojuaná causa ca.

<sup>34</sup> Chora chē Etiopía luaroca uajabuachaná Felípbioye tbojaniyana: —Diosmanda, šmobuayená, ¿ndabiama Bēngbe Bētsabe juabna oyebuambnayá chca yojtsichamo, cachabiama o ínñabiama ca?

<sup>35</sup> As Felipe tojanontsé, chē Isaíasbe librésaŋe yojtsayana sóyeca, Jesusbe tšabe noticiēnga jábuayenama.

<sup>36</sup> Chentša bēnēse, canye bėjaye obējniñe juachañe ibojtsachñējuana. Chora chē uajabuachaná tojánayana: —Muentše bėjaye entsemna. ¿Ndáyeca ndoñe nanjopódia atše muentše uabainá jtsemnama ca? Diosmanda, šmabaye ca.

<sup>37</sup> As Felipe tbojaniyana: —Jesucristbeñe nyets acbe ainánaca tcojtsošbuáchese, aññe echanjopódia juabáyama ca.

Y chē boyabása tbojanjuá: —Aññe, sēntsošbuaché Jesucristo Bēngbe Bētsabe Uaquiñá yomnama ca.

<sup>38</sup> As chē Etiopiocá tojanmandá chē cochésha chauátotonama. Chentšana, nyets útata chē bėjayoye tbojanashēbēbuástjango y Felipe, chē Etiopioca uajabuachanábioye tbojanabaye.

<sup>39</sup> Chē bėjayentšana tbojtanbocna ora, chē Uámana Espíritu Felipe ibojtsánatseñe y chē uajabuachaná ya ndoñe más Felípbioye ibontsonyaye, pero corente oyejuayá yojtsatoñe. <sup>40</sup> Felipe tojántatšēmbona Azoto bēts puebloca yojtsemnama, y chentšana tojána nyetsca pueblēnguenache chē tšabe noticiēnga abuayiyenaye, Cesarea puebloye jashjanguēntscuana.

## 9

### *Ntšamo Saulo Crístbeñe ošbuachiyá tojanóbema*

*(Hch 22.6-16; 26.12-18)*

<sup>1</sup> Saulo chēntscuana cabá Bēngbe Utabnábeñe ošbuachiyēnga yojanautatjñá jt-sēbáyama. Chama cha tojána chē bachnangbe más uámana amēndayábioye, <sup>2</sup> uabemana tsbuanachangá jauátjañama, as chéchangaca jobenayama chē Damascoca judiēngbe enefjuana yebnēngoye jama, y chocna, chē Jesucristo tojaninñanyé Benache ustoniñe, boyabásenga o shembásenga tojánñenēse, jótabayama y Jerusalemoye junatsama. Y chca jamama tojánbocna. <sup>3</sup> Pero ya Damasco béconana yojtsaye orna, nye ndeolpe chabe juachañe celocana canye bēts tcuinñe tojanbuashinñyēna. <sup>4</sup> Chora Saulo fshantsoye tojánshajaye y canye oyebuambnayana tojanuena, mēntšá: —Saulo, Saulo, ¿ndáyeca chca šcojtsacmena ca?

<sup>5</sup> As Saulo tbojantjá: —¿Nda comna, Bēngbe Utabná ca?

Y chē oyebuambnayana tbojanjuá: —Atše sēndmēna Jesús y aca condama atšbe entšanga chamotsesufrínama. <sup>6</sup> Pero matētsbaná y Damascoye mamáshēngo; chentše canya cmochanjabuayená ndayá jamama cmojtsemnama ca.

<sup>7</sup> Chē Sáuloftaca imojánajna boyabásenga tša auatjanánēnga imojtsemna y chíyeca ndoñe imontsobena jóyebuambayana; er nye chē oyebuambnayana tmojanuena, pero ndocná tmonjáninñe. <sup>8</sup> As Saulo fshantsentšana tojtantsbaná y tojtanobuchatéfjona ora, tondaye yontsobena jinñana. Chcasna, chē ínñyēnga tmojēftsano buacuetēntšé y chca,

Damascoye tmojanánatse. <sup>9</sup> Chentše yojéftsemna unga te, jinýama ntsobencá, ni ntjascá y tondaye ntjofšiyá.

<sup>10</sup> Damascoca Jesucristbeñe canýe ošbuachiyá inoyena, Ananías ca uabainá. Cha Bëngbe Utabnábioye mo otjenayoquécá tbojáninýe y Bëngbe Bëtsá tbojaniana: — Ananías ca.

As cha tbojanjuá: —Bëngbe Utabná, ¿ndayá chjama ca?

<sup>11</sup> Y Bëngbe Utabná tbojaniana: —Moprontá y motsa chë “Ndericho tsáshenañe ca” uabáinoye, y Júdasbe yebnentše cochjanotícia canýe boyabásabiama, Saulo ca uabainábiamá, Tarso pueblócá; cha mora Bëngbe Bëtsáftaca bentsencuénta. <sup>12</sup> Saulo ya tonjinýe mo otjenayoquécá, canýe entšá Ananías ca uabainá entsamashjuana y chabe cucuatšënga chabe bestšášiñe entsejájua, chca, cha chabuatabínýnama ca.

<sup>13</sup> Ananías chca tojanuena ora, tojánayana: —Bëngbe Utabná, banga ba soyënga chabiamá šmonjacuénta; Jerusalenoca tša bacá acbe entšanga imomnënga tojáborye.

<sup>14</sup> Y mora entsebmoma mando chë bachnangbe amëndayëngbentšana, muentše aca otšëmbuanënga jótabayama ca.

<sup>15</sup> As Bëngbe Utabná tbojaniana: —Motsa, er atše cha sënjuábuayana atšbiamá chaotrabajama; chaóyebuambama ndoñe judiëngbeñe, reyëngbeñe y Israeloca entšángbeñnaca, y chca, chënga atšbiamá chamotatsšëmbonama. <sup>16</sup> Atše cha chanjinýinýiye ntsachetšá ibojtsemna átšbeyeca jasúfriama ca.

<sup>17</sup> As Ananías tojána Saulo yojtsanmëna yebnoye. Tojánamashëngo ora, Saulëbe bestšášiñe chabe cucuatšënga tojanjajó y tbojaniana: “Jesucristbeyeca atšbe catšata, Saulo, Bëngbe Utabná Jesús, chë benachëjana conjanabó ora cmonjanebëbocná, šonjichmó aca chacmatabínýnama y chë Uámana Espiritu acbe ainaniñe jtsemándayama cháuamashënguama ca.”

<sup>18</sup> Cachora, Sálulëbe bominyëntšana mo beonbe bobachëshëngcá tojantquécjána, y chca, ibojtsatabinýna; chora tojantsbaná y tojanenábaye. <sup>19</sup> Chentšana, Saulo tojanse y añemo yojtsatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

#### *Damascopuebloca Saulo entšanga yojanabuayinýa*

<sup>20</sup> Saulo cachorscana tojanontšé jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bëtsemnama. <sup>21</sup> Chë imojtsuenanënga nyetscanga imojtsenjanaye y mëntšá imojtsichamo: “Mua entsemna chë Jerusalenoca Jesúsbioye otšëmbuanënga endanëbanayá, y mora camuá Damascoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšëñe jabáshejuanama.”

<sup>22</sup> Pero Saulo cada ora más añémoca yojtsóyebuambnaye y puerte tšabá yojaninýanýná Jesús Bëngbe Bëtsabe Uámana Uabuayaná bëtsemnama. Chíyeca chë Damascoca judiënga ndoñe imontsobena ntšamo cha jojuana.

#### *Ntšamo Saulo judiëngbentšana tojtsanachá*

<sup>23</sup> Bayté tojanochnëngo ora, judiënga tmojanenoyeuná ntšamo jamëse Saulo jóbama, <sup>24</sup> pero Saulo chë soye tojántatšëmbona. Bnëté y ibeta, chë bëts pueblentša bëšašanguenache chënga chabiamá imojananýá, jtsóbama; <sup>25</sup> pero chë Jesucristbeñe ošbuáchiyënga, ibeta, cha canýe bëts sbarëcuiñe tmojtsanatsuamá, y chë pueblentša shéconana tapiëšëjana tmojtsanëštjango. Chca cha tojanotsbocá.

#### *Saulo Jerusalenoca*

<sup>26</sup> Saulo Jerusalenoye tojánashjango ora, yojtsebošë chë Jesucristbe ichmónëngaftaca jenútanama, pero nyetscanga imojtsebiauatja y ndoñe imontsošbuaché Saulo Jesucristbe ustoná yojtsemnama. <sup>27</sup> Chcasna, Bernabé Sálulëbioye tbojéftsanbetšë y chë Jesucristbe ichmónëngbioye tbojanánatse, y tojanacuntá Saulo benachiñe Bëngbe Utabnábioye tbojáninýama, ntšamo Bëngbe Utabná tbojanianama y ntšamo cha Damascoca

tša añémoca Jesusbiana entšanga tojánabuayenama. <sup>28</sup> As Saulo Jerusalenentše tojanototoná y chë Jesucristbe ichmónëngaftaca yojánana. Bëngbe Utabnabiana bëts añémoca entšanga yojanabuayiyná y <sup>29</sup> yojanoyebuambná y imojanenatsëtsná chë griego biyá judiëngaftaca; pero chëngna imojtsenëyeunana Saulo jtsóbama. <sup>30</sup> Jesucristbeñe ošbuáchiyënga chca tmojántatšëmbona ora, Saulo Cesarea luaroye tmojanánatse, y chentšana Tarso pueblöye tmojanichmó.

<sup>31</sup> Y chca, Jesucristbeñe ošbuáchiyënga Judeoca, Galilea y Samaria luarentše chora ya ndoñe más montsansufrina y natjëmbana imojtsemna, y nyetscanga más ošbuáchiyana imojtsebomna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espíritbe uajabuáchenanaca, Jesucristbeñe ošbuáchiyënga más tmojanoboté.

#### *Pedro Enéasbioye tbojanshná*

<sup>32</sup> Pedro yojánabuache nyetsca chë Jesucristbeñe ošbuáchiyëngbenache. Y chca, Lida pueblöca Bëngbe Bëtsabe entšanga jabuachámna tojána. <sup>33</sup> Lida pueblentše canya tbojáninýena, Eneas ca uabainá. Cha jama ndobená inamna y posufta uata jutsnéshañe chca inajájona. <sup>34</sup> Pedro tbojaniyana: “Eneas, Jesucristo tcomnjashná. Matëtsbaná y acbe tjuashe motsejacaná ca.” Y cachora chë jama ndobená tojtantsbaná.

<sup>35</sup> Nyetscanga chë Lida pueblentše y Saronoca oyenënga chë entšá shnaná tmojáninýe. Y as, chënga bacna soyënga amana tmojtsanajbaná y cach orscana tmojanontšë Bëngbe Utabnábeñe ošbuáchiyana.

#### *Pedro tojanma Dorcas cháuatayenama*

<sup>36</sup> Chë tempo, Jope pueblöca yojaniyena canye shembása Jesucristbeñe ošbuachiyá, Tabita ca uabainá, o griego biyaña Dorcas ca. Cha nyets tempo tšabe soyënga yojánama y yojanamana chë tojtsëjabetënga jujabuáchana. <sup>37</sup> Pero chora, šocana tbojanshache y tojtsanóbana. Tmojtsanbebé chentšana, canye tsoye tsbanana tsañoca chabe cuerpo tmojtanajajó. <sup>38</sup> Jope inamna Lida béconana, y Lidentše Pedro yojtsemna; y chë Jope pueblentše Jesucristbeñe ošbuáchiyënga tmojántatšëmbona Pedro choca yojtsemnama. Asna, uta boyabásata tmojanichamó Pedro jauyanama: “Diosmanda, betso Jope pueblöye mabo ca.”

<sup>39</sup> As Pedro tojëftsantsbaná y chë uta boyabásaftaca tojána. Choye tmojánashhajna ora, tmojanánatse chë Dórcasbe cuerpo yojtsemnoye, tsbanánoca; chorna, nyetsca viudanga šachénaca Pédrëbioye tmojanóbobuashcona y imojtsinýinýnaye chë Dorcas yojuajonaná entšayangá y cmešëjuangá, cabá chëngaftaca yojëftsemna ora. <sup>40</sup> Pedro tojanmandá nyetscanga chentšana chamotsebocanama; chora Pedro yojoshëntsamentšiyë y Bëngbe Bëtsáftaca ibojencuentá. Chentšana, Pedro chë obanábioye tbojanonýinýé y tbojaniyana: “Tabita, matëtsbaná ca.”

As Dorcas tojtanobuchatéfjona y Pédrëbioye tbojáninýe ora, tojanótbema. <sup>41</sup> Chora Pedro tbojanábuacueshache y tbojtanatsbaná. As Pedro tojánachembo nyetsca chë Jesucristbeñe ošbuáchiyënga, chë viudanga y chë ínýenga, y Dorcas ainá tojtaninýanjé.

<sup>42</sup> Chë soye nyets Jope pueblentše tojanótatšëmbona y banga Bëngbe Utabnábeñe imojtsošbuáchiye. <sup>43</sup> Y Pedro bayté Jope pueblentše tojanoquedá, Simón chë bobáchëshiñe trabajayabe yebnentše.

## 10

#### *Pedro y Cornelio*

<sup>1</sup> Cesarea pueblentše inamna canye boyabása Cornelio ca uabainá; cha inamna chë Italiano ca uabaina soldadëngbe amëndayá. <sup>2</sup> Cornelio Bëngbe Bëtsábioye ibnarrespetana y nyetsca chabe yebnentša oyenëngaftaca Bëngbe Bëtsá puerte imojánadorana. Becá crocénana inaquëcjnaye chë judiënga ndbomnjëmënga jujabuáchama y sempre Bëngbe Bëtsáftaca ibnëncuentaye.

<sup>3</sup> Canye te, mo bëts mošenana ora, cha botamana tojáninÿe mo otjenayoquécá, mëntšá: Bëngbe Bëtsabe canye ángel Cornelio yojtsemnoye yojtsamashjuana y tbojaniyana: — ¡Cornelio ca!

<sup>4</sup> Cornelio chë ángelbioye ibojtsonÿaye y auatjananá tbojaniyana: —Taita, ¿ndayá yojtsemna ca?

Y chë ángel tbojaniyana: —Bëngbe Bëtsá condbétseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyejuá y lempe cmochanjóyeunaye. <sup>5</sup> Chcasna, mora básefta boyabásenga Jope bëts puebloye michamó y Simón, chë Pedro ca monduabobuatmá, moye chamuánatse. <sup>6</sup> Cha posada entsebomna inÿe Simónbentše, chë bobáchëshiñe trabajayabe yebnentše. Chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.

<sup>7</sup> Chë Cornéliëbioye ibojuatsëtsaye ángel tojtsatanoñe ora, Cornelio chabe oservenënguentshana útata tojánachembo y canye soldádnaca, chabe uajabuachaná, Bëngbe Bëtsá adorayá; <sup>8</sup> lempe ntšamo yojopasacá chënga tojanacuntá y chentšana Jope puebloye tojanichamó.

<sup>9</sup> Yëfsana mo nÿetsto ora, chënga benachiñe Jope béconana imojtsajñentscuana, Pedro yebnentša tsbanánoye tojánášëngo, Bëngbe Bëtsáftaca jencuéntama. <sup>10</sup> Becá tojánishëntsena y jasama yojtseboše; pero imojtsebopróntantscuana, Pedro mo otjenayoquécá mëntšá tojáninÿe: <sup>11</sup> Celoca yojtsatëfjna y mo canye bëts entšayëjuacá yojtsabá y nÿets canta sibientsana yojtsëjonÿana. <sup>12</sup> Chë entšayëjuañe imojtsemna nÿetscna bayënga, ósjojnaye bayënga y nÿetscna shloftšëgnaca. <sup>13</sup> Y tojanuena canye oyebuambnayana mëntšá: —Motsbaná, Pedro; mobaye y quem bayënga mose ca.

<sup>14</sup> Chora Pedro tojánayana: —Ndoñe, atšbe Utabná. Atše ndocna te chiyáisese Moisesbe leyinë ndoñe yondëlesenciana jasama bayënga y chë jasama ndoñe tšabá imomna bayënga ca.

<sup>15</sup> Y cachiñe tojtétanuena chë oyebuambnayana mëntšá: —Bëngbe Bëtsá tojalesenciá y canye bayá tšabá jasama yomna ca tojayanëse, aca ndoñe matsjuabnana chë bayá jasama ndoñe tšabá yontsemna ca.

<sup>16</sup> Chë soye unga soyama chca tojanopasá chentšana, chë entšayëjua celoye tojtanátsjua. <sup>17</sup> Pero Pedro ndoñe yontsetátšëmbo ntšamo tojaninÿcá ndayá chabiamá yojtsayanama. Chëntsçuana, chë Cornéliëbe ichmónënga noticiánana Simónbe yebnocá tmojánashjajna y shjoca bëšoca imojtsobátmana. <sup>18</sup> Tmojanchembo ora, tmojanënoticiá Simón, chë Pedro ca uabobainá, chentše taibojatanama.

<sup>19</sup> Pedro, ndayá tojáninÿama chabosertama yojtsenójuabnantscuana, chë Uámana Espíritu tbojaniyana: “Mouena, muentše mora unga boyabásenga cmontsenguá. <sup>20</sup> Motsbaná, mocana matastjango y yapa ntjatenójuabnancá chëngaftaca cochjá, er atše chënga sënjichamó ca”.

<sup>21</sup> As Pedro tojtastjango y chë tmojánashjajnënga tojanéyana: —Atše sëndmëna chë šmontsenguá cha. ¿Ndáyeca moye šmojabo ca?

<sup>22</sup> Chora chënga tmojanjuá: —Cornelio šonjichamó. Cha endmëna chë soldadëngbe amëndayá, canye tšabá mándbomna entšá y Bëngbe Bëtsábioye adorayá, y nÿetsca judiënga chabiamá tšabá mondbëtsoyebuambnaye. Bëngbe Bëtsabe canye ángel chábioye tbojabuayená ntšamo jamana aca chábioye chacotsama, as chë ndayá cha jauyanama cojtsebomncá cha jouenama ca.

<sup>23</sup> As chënga tojanémashëngo y posada tojanéyentsame. Yëfsana Pedro chë unga boyabásëngaftaca tojána. Básefta Jesucristbeñe ošbuáchiyënga Jope pueblentsënga Pedro tmojantjëmbambá.

<sup>24</sup> Chë inÿe yëfsana Cesarea puebloye tmojánashjajna. Chentše Cornelio Pédrëbiamá yojtsobatmana, y Cornelio tojanébuaja pamíllanga y tšabe amiguëngnaca chentše imojtsemna. <sup>25</sup> Pedro tojánashjango ora, Cornelio tojánbocna jajëbenguama y chabe

shecuatšentše yoJoshentsamentšiyē cha jadórāma. <sup>26</sup> Pero Pédrēna tbojtānatsbaná y mēntšá tbojanīyana: —Matētsbaná, atše cach aquēcá n̄yē can̄yē entšá sēndmēna ca.

<sup>27</sup> Pedro Cornélioftaca encuéntayē chē yebnentšē tojánamashēngo y ba entšānga tojánānyēna, chentšē tmojanójotēnga. <sup>28</sup> Chora Pedro tojanéyana: —Cach tšēngāftānga šmondétatšēmbo chē judiēngbe leyēnguiñē endayana ndoñē yondopodena can̄yē judío ndoñē judío entšāngāftaca jenútanama y ni mo chēngbe yebnēnguenache jábuachama ca. Pero Bēngbe Bētsá šonjin̄in̄yē atše ndocna te šondmēna ín̄yabiama jatsjuabnāyana cháftaca jenútanama ndoñē tšabá yondmēna ca. <sup>29</sup> Chíyeca, šmonjobetše ora, ndocá ntjatichamcá n̄yē sēnjabo ca.

Chora tojanatjá: —¿Ndáyeca šmojobetše ca?

<sup>30</sup> As Cornelio tojánayana: —Canta te entsemna, camēntša ora, muentšē sēndánmēna Bēngbe Bētsáftaca encuéntayē y ndeolpe sēnjīnyē atšbe delante can̄yē boyabása uabuashin̄in̄yana entšayaca bopormaná. <sup>31</sup> Cha šonjauyana: “Cornelio, Bēngbe Bētsá condbétseimpadanama y chē ujabótēnga condbétsējabuachanama, Bēngbe Bētsá ácafataca entsoyejuá y lempe cmochanjóyeunayē ca. <sup>32</sup> Básefta boyabásēnga Jope bēts puebloye michamó y Simón chē Pedro ca monduabobuatmá moye chamuánatse ca. Cha posada entsebmōna in̄yē Simónbentšē, chē bobáchēshiñē trabajayabe yebnentšē, y chabe yebna mar bējaye tsachañē endmēna. Cha cmochanjauyana ndayá jamama cmojtsemna ca.” <sup>33</sup> Chcasna, cachora sēnjichamó aca jobetšama, y aslēpaye jabama tcojóyaunama. Y as morna, n̄yetscānga Bēngbe Utabnabe delante fsēntseprontana jouenama lempe ntšamo Bēngbe Bētsá tcmojamandacá ca —cha tojánayana.

#### *Ntšamo Pedro tojanoyebuambá Cornéliēbe yebnentšē*

<sup>34</sup> Pedro chora tojanontšé mēntšá jóyebuambayama: —Mora atše šontsosertana, ndegombre Bēngbe Bētsabiama n̄yetscānga cachcá uámanēnga imomnama. <sup>35</sup> N̄yets luarēnguenache Bēngbe Bētsá júbuajana cha tmojtšatschuaná y tšabe soyēnga tmojtšamēnga. <sup>36</sup> Tšēngāftānga šmondétatšēmbo, Bēngbe Bētsá Israeloca entšānga tojánabuayenama, tšabe noticiēnga jtsóyebuambnāyēse, chēnga n̄yetscānga ainaniñē tšabe ebionana chamotsebmōnama, Jesucrístbeyeca; y cha endmēna n̄yetsca entšāngbe Utabná. <sup>37</sup> Tšēngāftānga šmondétatšēmbo ntšamo n̄yets Judeoca tonjanopasama. Chē soye Galilea luaroca tojanobojatšé, Juan entšānga yojanabuayiyná orscana, chēnga bacna soyēnga amana chamotsajbanama y chamuenábayama. <sup>38</sup> Šmondétatšēmbo ntšamo Bēngbe Bētsá, Jesús Nazaretocábioye tbojanábuayanama y tojanma chē Uámana Espírītu chabe ainaniñē cháuamashēnguama, y tojanma Jesús corente obená chaotsemnama; y šmondétatšēmbo ntšamo Jesús enjánana entšāngbiama tšabe soyēnga amiñē y n̄yetscānga chē Satanás yojánama chamosufrimēnga áshnaye, er Bēngbe Bētsá cháftaca yojtsemna.

<sup>39</sup> “Bēnga fsēnjānin̄yē y fsēndétatšēmbo lempe ntšamo Jesús tojanmcá Jerusalenoca y n̄yets Judea luariñē; y cha tmonjanóba, can̄yē cruciñē jacrucífcase. <sup>40</sup> Pero Bēngbe Bētsá tonjanma unga tianoye cha cháuatayenama y bēngbeñē chaon̄yana. <sup>41</sup> Cha n̄yetsca entšāngbe delante ndoñē chenátanbocna, pero aĩñē bēngbeñē, chē tempo Bēngbe Bētsá šojanēbuáyanēnga, Jesús tojtānāyēna chamuin̄yama. Y tojtānāyēnentšāna bēnga cháftaca fsēnjānse y fsēnjānofsé. <sup>42</sup> Cha šonjichamó entšānga jábuayenama y jayanama ndegombre cha yomna chē Bēngbe Bētsabe uabuayaná, chē nda obanēngbiama y ainēngbiama yochjayana tšabá o ndoñē tšabá tmonjamama. <sup>43</sup> Bēngbe Bētsabe juabna oye-buambnāyēnga n̄yetscānga cach Jesusbiama tmojánayana, nda Jesúsbeñē tojtsošbuaché, chábioye Bēngbe Bētsá chabe bacna soyēngama bochanjaperdóna, Jesusbe obenánaca ca.”

#### *Ndoñē judiēnga chē Uámana Espírītu tmojanóyēngacñē*

<sup>44</sup> Pedro chë palabrënga cabá yojtsoyebuambnantscuana, chë Uámana Espíritu tojána-mashëngo nyetsca chë imojtsuenanëngbe ainaniñe jtsemándayama. <sup>45</sup> Chë judiënga Jesucristbeñe ošbuáchiyënga Pédroftaca tmojánabënga imojenjnaná, chë Uámana Espíritu ndoñe judiëngbeñnaca cháuamashënguama Bëngbe Bëtsá tojanmama. <sup>46</sup> Chënga imojtsuenana chënga inyetsá jtsebiayangana, chënga tempo ndmabiyañe y jtsichámuana Bëngbe Bëtsá bëts soyënga tojanmama.

<sup>47</sup> Chora Pedro tojánayana: “Pero mëngna chë Uámana Espíritu tmonjójyëngacñe ntšamo bënga tmonjójyëngacñecá. Chcasna, ndocná queochatobenaye jamana chënga uabáinënga ndoñe chamondëtsemnama ca.” <sup>48</sup> As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftayté chëngaftaca chaoquedama.

## 11

### *Ntšamo Pedro chë Jerusalenoca imojánenëfjuana ošbuachiyëngbioye tojanéyana*

<sup>1</sup> Jesucristbe ichmónënga y chë Judeoca Jesucristbeñe ošbuáchiyënga tmojántatšëmbona, chë ndoñe judiëngnaca Bëngbe Bëtsabe palabriñe imojtsošbuáchema. <sup>2</sup> Pero Pedro Jerusalenoye tojesaná ora, báseftanga chabiama ndoñe tšabá tmonjánayana. Chënga imojamna chë juabnayënga, chë ndoñe judiënga ošbuáchiyënga boyabásenga canjánamna chë más delicadentše base bobachtema tétšëngna jtsemnama ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca. <sup>3</sup> As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

<sup>4</sup> Chora Pedro lempe chënga tojanacuntá ntšamo chë ndoñe judiëngbioye cha tojána orscana tojanopasama. Cha tojanéyana: <sup>5</sup> —Atše Jope puebloca sënjamna y Bëngbe Bëtsáftaca sënjencuénta ora, mo otjenayoquécá sënjáninye celocana mo canye bëts entšëjuacá átšbioye enjétsabeconaye y nyets canta sibiocana enjétsëjonýana. <sup>6</sup> Y botamana sënjanrepará ndayá chë tsoye bëtsemnama y sënjáninye choye monjëtsemna uamna y tjoca bayënga, ósjojnaye bayënga y nyetscna shloftšëngnaca. <sup>7</sup> Y sënjanuena canye oyebuambnayana mëntšá: “Motsbaná, Pedro; mobaye y quem bayënga mose ca.” <sup>8</sup> Chora atše sënjánayana: “Bëngbe Utabná, ndoñe; atše ndocna te chiyáise chë Moisesbe leyíñe ndoñe yondëlesenciana jasama bayënga y jasama ndoñe tšabá imomnënga ca.” <sup>9</sup> Chentšana cachiñe sëntëtanuena chë celocana oyebuambnayana mëntšá: “Bëngbe Bëtsá tojalesenciá y canye bayá tšabá jasama yomna ca tojayanëse, ndoñe matsjuabnana chë bayá jasama ndoñe tšabá yontsemna ca.” <sup>10</sup> Chë soye unga soyama chca tonjanopasá y chentšana chë entšëjua celoye tontanátsjua. <sup>11</sup> Y cachora unga boyabásenga Cesarea puebloca ichmónënga, chë posada sëndbomnentše tmonjánashajna, atše janguanguama. <sup>12</sup> Y chë Uámana Espíritu šonjanmandá atše yapa ntjatenojuabnycá chëngaftaca jama; y quem chnënguana Jesucristbeñe ošbuachiyëngnaca átšeftaca tmonjána. Nyetscanga canye entšá Cornelio ca uabainabe yebnoye fsënjánamashjna; <sup>13</sup> y chana bënga šonjanacuntá ntšamo tojáninye, cachabe yebnentše canye ángel ibojtsebiatsana y mëntšá tbojaníyana: “Básefta boyabásenga Jope bëts puebloye michamó y moye chamuánatse Simón, chë Pedro ca monduabobuatmá, <sup>14</sup> y cha cmochanjabuayená ntšamo aca y acbe yebnentša oyenënga šmochjotsbocá ca.” <sup>15</sup> As, atše jóyebuambayama sënjanbojatsé orna, chë Uámana Espíritu tonjánamashëngo chëngbe ainaniñe jtsemándayama, ntšamo bëngbeñe natsana tonjanamashëngcá.

<sup>16</sup> “Chora sënjanenojuabó ntšamo Bëngbe Utabná tonjánayanama: ‘Ndegombre, Juan entšanga béjayeca tonjanëbaye; pero Bëngbe Bëtsá chë Uámana Espíritu bochanjíchmuá, tšëngaftangbe ainaniñe jtsemándayama cháuamashënguama ca.’ <sup>17</sup> Chcasna, chëngnaca Bëngbe Bëtsá chë Uámana Espíritu tonjatšatá, ntšamo bënga, chë Utabná Jesucristbeñe



ošbuáchiyënga, šonjanatšatacá. Y chca, atše ndoñe quetsátsmëna canye tša uamaná, Bëngbe Bëtsá jauyanama ntšamo cha yobošcá ndoñe chaondétsemna ca.”

<sup>18</sup> Jerusalenoca Jesucristbeñe ošbuáchiyënga chë soyënga tmojanuena ora, ndocá más tmonjantjá y Bëngbe Bëtsá tmojtanchuá, mëntšá: —¡Asna, Bëngbe Bëtsá chë ndoñe judiëngnaca tojalesenciá chëngbe bacna soyëngama ngmënaca chamuatenójuaboma y chca amana chamotsajbanama, chë nyetsca tescama yomna tšabe vida chamotsebomnama ca!

*Ntšamo Antioquía pueblota tojanobojatšé, entšanga Jesucristbeñe ošbuáchiyana*

<sup>19</sup> Esteban tmojanóba chentšana, tmojanontšé chë Jesucristbeñe inye ošbuachiyëngnaca jatëcamiyama. As chentšana báseftanga yojtsamna bën luarëngoye jtsachetëngana Fenicioye, Chipre y Antioquía luarëngoye, y chenache chënga Jesucristbe soyëngama imojanoyebuambná, pero nye judiëngbiama. <sup>20</sup> Pero báseftanga imojamna Chipre y Cirene luaroquënga, y chënga Antioquía bëts pueblote tmojánashjajna orna, chë ndoñe judiëngbeñnaca tmojanoyebuambá, Jesús, chë Utabnabe soyëngama jabuayenase. <sup>21</sup> Bëngbe Utabnabe obenana chëngaftaca yojtsemna, y chca, ba entšanga tmojanajbaná bacna soyënga amana y tmojanontšé Bëngbe Utabnábeñe jtsošbuáchiyana.

<sup>22</sup> Jerusalenoca Jesucristbeñe ošbuáchiyënga chë soye tmojántatšëmbona ora, Antioquía luaroye Bernabé tmojanichmó. <sup>23</sup> Bernabé choye tojánashjango orna, tojáninye ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Nyetscanga tojanabuayená chamotsiyena nyets ainánaca Bëngbe Utabnábeñe jtsošbuáchiyëse. <sup>24</sup> Bernabé inamna canye entšá tšabe soyënga amá, chë Uámana Espiritu chabe ainaniñe yojtsemándaye y bëtscá ošbuachiyá inamna. Y banga tmojanontšé Bëngbe Utabnábeñe jtsošbuáchiyana.

<sup>25</sup> Chentšana, Bernabé Tarso pueblote tojána Saulo janguanguama, <sup>26</sup> y tbojáninýena ora, Antioquía luaroye tbojéftsanbetše. Antioquía luarentšna canye uata nyetšá Jesucristbeñe ošbuáchiyëngaftaca cánýiñe ibojéftsemna y ba entšanga tmojanabuatambá. Antioquioca inamna chë ndayentše natsanama Jesucristbeñe ošbuáchiyënga Cristbe ústonënga ca imojtsëbuatma.

<sup>27</sup> Chë tempo, básefta Bëngbe Bëtsabe juabna oyebuambnayënga Jerusalenocana Antioquía luaroye tmojána. <sup>28</sup> Chënguentšana canya Agabo ca uabainá tojantsá y chë Uámana Espiritbeyeca tojánayana, mëntšá: “Nyets luariñe entšanga oyeniñe bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora. <sup>29</sup> Chcasna, chë Antioquía bëts pueblentša Jesucristbeñe ošbuáchiyënga imojenóyeunaye ntsachetšá crocënanëñaca juíchmuana, ntšamo cada ona tojobenacá, Judeoca Jesucristbeñe ošbuáchiyënga jujabuáchama. <sup>30</sup> Chca tmojanma, y Bernabé y Sáuloftaca chë crocënanana tmojanichmó chë Judeoca Jesucristbeñe ošbuáchiyënguentše bëtsëjemëngcá amëndayëngbioye.

## 12

*Santiago tmojanóba; Pedro tmojanëtame*

<sup>1</sup> Chë tempo, rey Herodes básefta Jesucristbeñe ošbuáchiyënga tojánishëche jutámia y jatsetšenama. <sup>2</sup> Tojanmandá espadéjaca chamóbama Santiago, Juanbe catšata; <sup>3</sup> y Herodes tojántatšëmbona judiënga chë soye tojanogúsetama; as, cha tojanmandá Pédrëñaca chamutámia. Chca tojanopasá chë lewadúraca ndëpormana tandëse sayté, Bashco fiesta ora. <sup>4</sup> Pedro tmojánishache orna, Herodes tojanmandá chamutámia, y chë cárceloca soldadënga cantátanga tmojanenojatá cántentše cha chamotsebojanýama. Herodes yojétsejuabnaye, Bashco fiesta tojochnëngo ora Pedro juabocnama, entšangbe delante jayanama cha chaóbanama. <sup>5</sup> Chcasna, Pedro yojtsëtámena y chë soldadëngna corente imojtsebojanýá. Pero Jesucristbeñe ošbuáchiyëngna bëtscá Bëngbe Bëtsá imojtseimpadana Pédrëbiama.

*Bëngbe Bëtsá tojanma Pedro natjémbana cárcelocana cháuissebocnama*

<sup>6</sup> Canye te yojtsámajna Herodes entsangbe delante Pedro juabocnama. Chë te ibetna, Pedro yojtsomañe y cátatoica canye soldado yojtsemna; uta cadenējuaca yojtsabatsëcna y inye soldadëngna bëšócana chë utámëniñe imojtsebojanjá. <sup>7</sup> Ndeolpe, Bëngbe Utabnabe canye ángel tojánbocna, y lempe chë utámëniñe yojtsebuashinjinjana. Chora chë ángel tëchañe Pédrëbioye tbojánbojajo, tbojanfšená y tbojanianyana: “Betsco motsbaná ca.” Y cachora chë cadenëjuangá Pédrëbe buacuatšënguentshana tojanatquécjana, <sup>8</sup> y chë ángel tbojanianyana: “Matichëtjo y matóshecochëtjo ca.” Pedro tojanma ntšamo chë ángel tbojaniancá, y chora chë ángel tbojátaniyana: “Mataquëfsayé y šmasto ca.”

<sup>9</sup> Pedro utámenocana chë ángel ibojtséstona, pero ndoñe yontsetátšëmbo aíñe ndegombre o ndoñe bentsemna chë ángel yojtsama cha chocana cháuissebocnama; masna, ibojtsinjana mo canye otjénayoca cuaftsemncá ca. <sup>10</sup> Y útentše chë soldadënga imojtsebojanjajana chata tbojánachnëngo y yeréša bëšášoye tbojánashjango, chë ndayéša yojanamna tsáshenoye jabocnama; y chë bëšášana nye cachabe ponto yojotëfjo. Chentšana tbojëftsanbocna ora, canye tsáshenëjana ibojtsaye, y nye ndeolpe chë ángel Pédrëbentšana yojtsojuánañe.

<sup>11</sup> Nya chora Pedro tbojanosertá y tojánayana: “Mora tšabá šjosertá, ndegombre Bëngbe Utabná chabe ángel tbojichmó atše jatsbocama Heródesbe cucuatšëntšana y lempe ntšamo judiënga átšeftaca jamama imojuabnámncá ca.”

<sup>12</sup> Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentše banga cányiñe imojtsemna, Bëngbe Bëtsáf-taca encuéntaye. <sup>13</sup> Pedro chë tsashenoica bëšásoca tojanchembo ora, canye oservená, Rode ca uabainá, tojánbocna jarrepárama. <sup>14</sup> Chë oservená Pédrëbioye tbojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tšabe noticia jaúnayama, Pedro bëšoca yojtsemna ca. <sup>15</sup> Chë tsoca imojtsemnëngna chora tmojanianyana: “¿Opá chectsebocna ca?”

Pero chë oservená yojtsichamo ndegombre ca. Y chënga tmojanianyana: “¡Chabe ángel ctsemna ca!”

<sup>16</sup> Chëntscuana Pedro cabá yojtsechembuana; tmojánëbiatëfjo y tmojáninye ora, chënga puerte imojenjnaná. <sup>17</sup> Pero Pedro tojánëfjatšëmbo iytëca chamobiamama y tojanacuntá ntšamo Bëngbe Utabná utámenocana tbojánatsbocama. Chentšana tojanéyana: “Ntšamo tonjopasama Santiago y chë Jesucristbeñe inye ošbuáchiyënga šmochojáunaye ca.”

Chora Pedro chë yebnentšana tojtáisebocna y ínñoye yojáta.

<sup>18</sup> Tojanbinjña ora, chë soldadënga puerte imojóntša enbouenanana, ntšamo Pédroftaca tojanopasama ndoñe imontsetátšëmbo causa. <sup>19</sup> As Herodes tojanmandá Pedro chamotsenguanguama; pero jtsinjenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentšana tojanmandá chë cha imojanbojanjá soldadënga jtsëbáyama. Chë soyënga tojanochnëngo chentšana, Herodes Judea luarentšana tojëftsanbocna y Cesarea luaroye tojtsanoñe, y choca tojt-sanoquedañe.

*Herodes tojanóbana*

<sup>20</sup> Herodes corente yojtsetšátjaye Tiro y Sidonoquëngaftaca; as chënga tmojanenoye-uná Heródesbioye jama. Canye uamana uajabuachaná, Blasto ca uabainábioye tmojanayeuamaná, y chana tojanašebuachená Herodes jauyanama ndoñe más entjayá-nanënga chamondëtsemnama, er Tiro y Sidonoca entsanga vida imnabomna Heródesbe luaroca sanángaca. <sup>21</sup> Chcasna, rey Herodes inye tescama tojánachembo. Chë tena, jóyebuambayama Herodes uamana entsayaca yojtóporma y yojótbema chabe mán-daye tbemanentše; chentšana tojanonguamé. <sup>22</sup> Chora entsanga tmojanontsé mëntšá uayebuáchana: “¡Chë entsoyebuambná cha entsá ndoñe quenátsmëna! ¡Chana canye

dios entsemna ca!” <sup>23</sup> Cachora, Bëngbe Bëtsabe canye ángel tojanma Herodes šocana chaboshachama, chabe cuenta Bëngbe Bëtsá chamuatschuama entšanga ndoñe yonjáuyana causa. Herodes tojanóbana mamángaca sasná.

<sup>24</sup> Pero chë tempo más bëtscá entšanga Bëngbe Bëtsabe palabra imojtsuenana y Jesucristbeñe imojtsošbuáchiye.

<sup>25</sup> Bernabé y Saulo chatbe trabajo tbojéftsanna ora, Jerusalemocana Antioquía luaroye tbojésanata y Juan, chë Marcos ca uabobuatmá, chátaftaca tmojéftsanbetše.

## 13

### *Bernabé y Saulo tbojanbojatsé Bëngbe Bëtsabe trabajo jamama*

<sup>1</sup> Antioquía luaroca Jesucristbeñe ošbuáchiyënguentše imojtsemna Bëngbe Bëtsabe juabna oyebuambnayënga y ošbuachiyëngbiye abuatambayënga. Chënga imojanabaina Bernabé, Simón (chë Šibetá ca uabobuatmá), Lucio Cirenocá, Manaén (nda tojanoboché cányiñe Herodes, chë Galileoca réyefata) y Saulo. <sup>2</sup> Canye te, Bëngbe Utabná imojtsatschuanaye y chama tondaye ntjascá imojtsemna ora, chë Uámana Espiritu tojánayana: “Mora šmochjaleséncia Bernabé y Saulo tšëngaftangbentsana chabuétsebocnama; chatna canye trabajuama sënjabacacá ca.”

<sup>3</sup> Bëngbe Bëtsá jëtschuayama tondaye ntjascá imojtsemnëntscuana y cháftaca imojtsencuëntantscuana, chëngbe cucuatšënga chatbe bestšaše juatsboica tmojancjá, chatbe trabajuiñe chaújabuachama Bëngbe Bëtsá jtseimpadánëse. Y chentšana chátbioye tmojtanadiošoftá.

### *Bernabé y Saulo Chipre luaroca*

<sup>4</sup> As Bernabé y Saulo, chë Uámana Espiritbeyeca ichmónata, Seleucia ca uabáinoye tbojánata y chentšana bejaycá, Chipre luaroye. <sup>5</sup> Salamina bëts puebloye tbojánashjango ora, tbojanontsé Bëngbe Bëtsabe palabrama entšanga jábuayenama, chentša judiëngbe enefjuana yebnënguenache. Juan Marcos mo chatbe uajabuachanacá ibojtsebomna.

<sup>6</sup> Njets chë luarëjana tmojánachnëngo orna, Pafos puebloye tmojánashjajna; y chentše tmojáninýena canye judío tatšëmbuá, Barjesús ca uabainá. Cha yojánichamo cha canjamna canye Bëngbe Bëtsabe juabna oyebuambnayá ca, pero ndoñe chca yonjamna. <sup>7</sup> Chë tatšëmbuá inatrabájaye chë Chipre luaroca mandadbiama, Sergio Paulo ca uabainá; y chë mandadna corente osertaná inamna. Cha yojtseboše Bëngbe Bëtsabe palabra jouenama; as tojanmandá Bernabé y Saulo jobiatšana. <sup>8</sup> Pero chë tatšëmbuá, grieguiñe Elimas ca uabainá, Saulo y Bernabebe contra yojtsemna y yojtsama chë mandado ndoñe chaondëtsošbuáchema, ntšamo chë Jesucristbeñe ošbuáchiyënga imojanošbuachecá. <sup>9</sup> Chora, Saulo chë Pablo ca imojanábobuatmabe ainaniñe chë Uámana Espiritu corente yojtsemándaye; as chë tatšëmbuábioye yejuana ibojonýinýiye, <sup>10</sup> y tbojaniiyana: “¡Abuambnayá, puerta bacna entšá, Satanasbe uaqiñá y tšabe soyënga ndoñe chaondëtsebínýnama trabajayá! Bëngbe Utabnabe njetsca ndegombre soyëngama aca contsichamo uayátsenaye soyënga yojtsemna ca. <sup>11</sup> Mora, Bëngbe Bëtsá cmochanjacastíga, jtaná cochanjoquéda y baseftayté jinýama quecochatobenaye ca.”

Cachora Elimas mo ibetiñcá yojoquéda y ibojtsonguaye canya buacuetëntšnana chabuánatsama, jtaná yojtsemna causa. <sup>12</sup> Chë mandado chca tojáninýe ora, Jesucristbeñe yojtsošbuaché y yojenjaná Bëngbe Utabnabe soyënga tojanatsjínýama.

### *Pablo y Bernabé Antioquía pueblentše, Pisidia luaroca*

<sup>13</sup> Pablo y chabe enutënga, Páfosocana, bejaycá Perge puebloye tmojátananga, Panfilia luaroca. Pero Juan tojésanabashejuana y Jerusalemoye tojésanshëcona. <sup>14</sup> Pergentsana Antioquía puebloye tbojátanata; chë pueblo inamna Pisidia luare béconana. Chentšna, ochnayté, chë judiëngbe enefjuana yebnoye tbojánamashëngo y tbojanótbema. <sup>15</sup> Moisesbe leyinýe y Bëngbe Bëtsabe juabna oyebuambnayëngbe uabemana librëšangañe tmojanalía orna, chë enefjuana yebnentša mándayënga canya tmojanichmó chënga

jáuyanama: —Israeloquënga, bënga fséntseboşe entsänga chašmabuayená, nderado ndayá jayanama šmojtsebošnëse, muentša entsänga añemo chamotsebošnëse ca.

<sup>16</sup> As Pablo tojantsá y entsängbioye cucuátšëca tojánëfjatsëmbo iytëca chamobia-mama, y tojánayana: —Šmochjouena Israeloquënga y ndoñe judiënga Bëngbe Bëtsá adórayënga. <sup>17</sup> Israeloca entsänga mondadorana Bëtsá, Bëngbe Bëtsá, bëngbe bëts taitanga tojanëbuáyana, y tojanma chënga corente bëtsëcanga chamotsemnëca, chënga Egiptoca inye luarocana ashjajnëngcá imojoyena ora. Y chentšana, cachabe obená-naca chë luarocana chënga tojésanëbuacana. <sup>18</sup> Canta bnëtsana uata nyetšá, Bëngbe Bëtsá entsänga ndoyena luaroca chënga yojanëuantana, <sup>19</sup> y cha tojanma chë Canaán luaroca canyëftentšë entsänga chamopochocama y bëngbe bëts taitanga chëngbe fshantsënga nduiñënga tojánabiama. <sup>20</sup> Chë tempo, chë Bëngbe Bëtsá Abrahámbioye quem fshantse jatšëtayama tbojanšbuachená orscana, y chë tempo, chë bëngbe bëts taitanga chë fshantse tmojanóyëngacñëntscuana, canta patse y shachna bnëtsana uata tojanochnëngo.

“Chentšana, Bëngbe Bëtsá chëngbiama mandadënga tojánabiama, Bëngbe Bëtsabe juabna oyebuambnayá Samuel chëngbe mandayá yojëftsemna tempëntscuana. <sup>21</sup> Chentšana, Israeloquënga Samuel tmojanimpadá canye rey chabojayé chaotsamëndama; as Bëngbe Bëtsá Saúlbioye chëngbe rey tbojánbema, canta bnëtsana uatëscama. Saúl inamna Cisbe uaquiñá y Benjaminbe bëts pamillanguentšá. <sup>22</sup> Más chcoyna, Bëngbe Bëtsá Saúlbioye chë mándayentšana tbojtsanjuaná, y chentšana Davídbioye mo chëngbe reycá tbojánbema. Chabiama Bëngbe Bëtsá tojánayana: ‘Atšë sëndëtatšëmbo, David, Isaíbe uaquiñá, canye tšabe entsá yomnama y chama atšë sëndoyejúá, y cha sempre endëprontana ntšamo atšë stsebošcá jtsamama ca.’ <sup>23</sup> Davídbentšana canye entsá Jesús enjamna, nda Bëngbe Bëtsá tbojanichmó Israeloca entsänga jabátsebacama, ntšamo cach Bëngbe Bëtsá chëngbe bëts taitanga tojanašëbuachenacá. <sup>24</sup> Cabá Jesús ndëbocna ora, Juan nyetsca Israeloquënga tojanabuayená bacna soyënga amana chamotsajbanama y chamuenábayama. <sup>25</sup> Juanbe trabajo jopochócama yojtsobeco ora, cha tojánayana: ‘¿Nda atšë tsmënama tšëngaftanga šmojuabná ca? Chë tšëngaftanga šmontsejuabná atšë tsmëna ca cha, atšë ndoñe quetsásmëna. Pero átšbentšana echanjabo canya, y atšë merecido taitatobuajoñe ni mo jotsejbiyama chabe shecochëtjonëshentšë corriëja jajafjonama ca.’

<sup>26</sup> “Chcase morna, Abrahámbentšana entsänga y ndoñe judiënga Bëngbe Bëtsá adórayënga; bëngbiama entsemna quem buayenana soye, chë Bëngbe Bëtsá entsänga jatsebacana. <sup>27</sup> Masque cada ochnayté, Bëngbe Bëtsabe juabna oyebuambnayëngbe uabemana palabra monjanalía chëngbe enefjuana yebnentšë, Jerusalenentšë oyenënga y chentšë mándayënga ndoñe quenjátanësertana nda Jesús bëtsemnëca, y chë tmojtsalía soyëngama cach ndoñe. Y chca, chënga Jesús chamóbama tmojánboshjona ora, chë chca amënga tmojanma ntšamo Bëngbe Bëtsabe juabna oyebuambnayëngbe librëšangañe iuabemancá. <sup>28</sup> Y masque ndocna bacna soye tmonjáninýëna Jesús jóbanama chabotsemnëca, Pilato tmojanimpadá chaomandá chábioye jóbama. <sup>29</sup> Chentšana, lempe ntšamo Bëngbe Bëtsabe uabemana palabrënguñe iuayancá Jesúseftaca tojanochnëngo ora, chabe ústonënga chë cruzocana tmojtánëstjango y tmojanatbontsá. <sup>30</sup> Pero Bëngbe Bëtsá tojanma Jesús cháuatayenama. <sup>31</sup> Chë Galileocana Jerusalenoye cháftaca tmojánanga, baytentscuana Jesús yojánëbëbuacana; y morna, lempe ntšamo Jesusbiama tmojaninýcá, chënga entsängbeñe montsoyebuambná.

<sup>32</sup> “Y chca, mora bënga chë tšabe noticiënga cbontsëtsëtsná. Ntšamo Bëngbe Bëtsá bëngbe bëts taitanga tojanašëbuachenacá, <sup>33</sup> cha tonjama, bënga chë chëngbe entsänguentšëngbiama, chca chaotsemnëca. Y Bëngbe Bëtsá chca tojama, Jesús cháuatayenama cha jamëse. Rey David, Bëngbe Bëtsabe uabemana palabrënguñe, segundo salmentšë mëntšá tojanábema, ntšamo Bëngbe Bëtsá Jesúsbioye tbojaniyanama:

Aca atšbe uaquiñá condmëna.

Mënté entsanga sënjinÿanyé aca atšbe Uaquiñá comnama ca.

<sup>34</sup> Y tempo Bëngbe Bëtsá chabe uabemana palabrënguiñe tojaninÿanyé cachá jamama Jesús cháuatayenama y ndoñe cachiñe chaondóbanama, mëntšá tojánayana ora:

Chë ndegombre soyënga y chë tšabe bendicionënga ntšamo David sënjanšbuachenacá, tšëngaftanga cbochanjátšataye ca.

<sup>35</sup> Inÿoca Bëngbe Bëtsabe uabemana palabrënguiñe, Salmos librëša uabiamnayá, mëntšá tojanábema ntšamo Jesús Bëngbe Bëtsábioye tbojanianama:

Aca ndoñe quecochatsleséncia atšbe cuerpo,

chë acbe Uámana oservenabe cuerpo chaotsopochocama ca.

<sup>36</sup> David, chabe tempo imojoyenëngbiama tojanma, ndayá cha chaomama Bëngbe Bëtsá tojanjuabocá. Cha tojanóbana y tmojanatbontsá chë chabe bëts taitángbioye tmojanëtabuantsá luarentše, y chabe cuerpo tojanopochocá. <sup>37</sup> Pero chë Bëngbe Bëtsá tojanma chauatayenamabe cuerpna, ndoñe tonjanopochocá.

<sup>38-39</sup> “Asna, baconga y batanga, atše séntseboše tšëngaftanga quem soye chašmotsetátšëmbo: Ndayá Jesús tojanmama, entsanga chëngbe bacna soyëngama perdonánënga montsemna. Jesúsbeyeca, nÿetsca chábeñe tmojtsošbuáchenga, bacna soyëngama perdonánënga mochántsemna. Ntšamo Moisesbe leyiñe iuayancá tmojanmama, chënga ndoñe tmonjanobená chca perdonánënga jtsemnama; nÿe Jesúsbeñe jtsošbuáchiyëse chënga perdonánënga jtsemnana. <sup>40</sup> Cuedado šmochtsebmna, ntšamo Bëngbe Bëtsabe juabna oyebuambnayënga tmojanayancá, tšëngaftangaftaca ndoñe chaondochnënguama. <sup>41</sup> Bëngbe Bëtsá mëntšá tojánayana:

Šmochjouena. Tšëngaftanga chë ntšamo atše tijayancá šmojtšabotenga, ojnánënga šmochántsemna y šmochanjóbana.

Tšëngaftanga cabá vida šmobomnëntscuana, atše bëts soyënga chanjëftsema, y masque ndánaca chë soyëngama chacmojtsacúnta,

tšëngaftanga chiñe ndoñe quešmochatošbuáchiye ca” —Pablo tojanoyebuambá.

<sup>42</sup> Pablo y chabe enutënga chë judiëngbe enefjuana yebnentšana tmojëftsanbocna ora, chë ndoñe judiënga chëngbioye tmojanaimpadá, chë inÿe ochnaytescama chë soyëngama más jábuayenama. <sup>43</sup> Chentše chë te jénefnama tempo tojanopochocá ora, ba judiënga y ndoñe judiënga, chë Bëngbe Bëtsábioye imojánadorana mo chë judiëngcá, Pablo y Bernabé tmojanéseto. Y chatna chënga tmojanabuayená nÿets tempo chamotsejuabnama, Bëngbe Bëtsá chëngbiama tšabe soyënga yojtsamama.

<sup>44</sup> Chë inÿe semana, chë ochnaytena, nÿa mo nÿetsca chë pueblentše oyenënga tmojanobeconá Bëngbe Bëtsabe palabra jouenama. <sup>45</sup> Pero ba entsanga choye jouenama tmojánama chë judiënga tmojáninÿe ora, tmojanotjayaná, ba entsanga Pablo imojtseyeunanama; as chënga tmojanontšé mocá ichámuana ndayá cha yojtsóyebuambnama, y chábioye oyenguayana. <sup>46</sup> As Pablo y Bernabé más añémoca mëntšá tbojánayana: “Endánëyta, natsana tšëngaftanga, chë judiënga šmomnënga, Bëngbe Bëtsabe palabra jshabuayenana. Pero tšëngaftangna chë palabra šmontsaboté, y šmontsejuabná tšëngaftangbiama ndoñe tšabá yontsemna chë nÿetsca tescama yomna tšabe vida jtsebomnana ca; chë causa, bënga fchantsoñe chë ndoñe judiëngbeñe Bëngbe Bëtsabe palabra jóyebuambayama. <sup>47</sup> Er Bëngbe Bëtsá chama šjanichamó, mëntšá jauyanëse:

Aca tconjuábuayana chë ndoñe judiëngbioye tšabe noticiënga jábuayenama, chaóser-tama.

Y chca, aca chëngbiama cochántsemna mo canÿe binÿnayacá.

Chca, ácbeyeca nÿets luarënguenache entsanga atše chanjatsebacá ca.”

<sup>48</sup> Chë ndoñe judiënga chca tmojanuena ora, puerte imojtsóyējuaye y tmojanontšé mëntšá ichámuana: “Bëngbe Utabnabe palabra tšabá bëngbiama entsemna ca.” Y chora, chë nÿetsca tescama yomna tšabe vida jtsebomnana Bëngbe Bëtsá tempo tojánabacacanga, tmojanontšé Jesúsbeñe jtsošbuáchiyana. <sup>49</sup> Y chca, nÿets chë luariñe

más entšanga Bëngbe Bëtsabe palabra imojtsuenana. <sup>50</sup> Pero chë judiënga tmojanoyebuambá, shembásengaftaca Bëngbe Bëtsá adórayënga y uámanënga, y chë pueblentša uámana taitángaftaca, jamama Pablo y Bernabé chabosufriya y chë luarentšana jtëbuacnama. <sup>51</sup> As, Pablo y Bernabé tbojésanshectstëtonata, judiënga jinñanyiyama chënga ndoñe tšabá tmojanmama; y chentšana, Iconio puebloye tbojtsanoñe. <sup>52</sup> Pero Jesucristbeñe ošbuáchiyënga corente oyejuayënga imojtsemna, y chë Uámana Espiritu chëngbe ainaniñe corente yojtsemándaye.

## 14

### *Pablo y Bernabé Iconio puebloca*

<sup>1</sup> Iconioca, Pablo y Bernabé cánñiñe tbojánamashëngo chë judiëngbe enefjuana yebnentše y corente obenánaca Bëngbe Bëtsabe palabra tbojanoyebuambá. Chíyeca, ba judiënga y ndoñe judiënga Jesucristbeñe imojtsošbuaché. <sup>2</sup> Pero chë judiënga Jesucristbeñe ndošbuáchiyënga, chë ndoñe judiëngbiyoye tmojanayëñjana, Pablo y Bernabebiyama podessa chamotsejuabnama. <sup>3</sup> Chíyeca, Pablo y Bernabé bayté chentše tbojanototoná y ndauatjca Bëngbe Utabná Jesucristbiyama tbojanoyebuambá. Bëngbe Utabná obenana chata tojanatšatá bëts soyënga jtsamama, y chë soyëngaca Bëngbe Utabná entšanga tojaninñanyé, ndayá chë ichmónata ibojtsoyebuambnacá ndegombre bëtsemnama, chë Bëngbe Bëtsá nyetscanga iuababuánñeshanana. <sup>4</sup> Pero nyetsca chë pueblentša entšanga ndoñe cachcá imontsejuabnaye; ínñyënga chë judiëngaftaca imojtsemna, y ínñyënga chë Jesucristbe ichmonátaftaca. <sup>5</sup> As, chë judiënga y ndoñe judiënga chentša mandayëngaftaca tmojanenoyeuná chata jtsatsetšenama y ndëtšbéngaca jtsébáyama. <sup>6</sup> Pero Pablo y Bernabé chama tbojántatšëmbona orna, tbojtsanëchañe Listra y Derbe puebloye, Licaonia luaroca, y choca chábuañe luarëngoye; <sup>7</sup> y chë luarënguenáchnaca, chata Jesucristbe tšabe noticiënga entšanga tmojanabuayená.

### *Listra puebloca, ndëtšbéngaca Pablo tmojtsanatëchënganja jtsóbama*

<sup>8</sup> Listra puebloca inamna canñe boyabása jama ndobená. Ndocna te yondobena jana, chca cosheto inónñna causa. Chë boyabásana yojtsetbemana <sup>9</sup> ouenana ntšamo Pablo yojtsichamcá. Y Pablo chábioyoye tbojanonñinñyé ora, tojántatšëmbona chë šocá tša yojtsošbuáchemama, shnaná jtsatsmënama; <sup>10</sup> as Pablo, juayebuáchenëse tbojanianana: “¡Motsbaná y acbe shecuatšëngaca tšabá motsa ca!”

Chora chë boyabása, canñe jontsenñyëse tojantsá y yojóntša anana. <sup>11</sup> As chë entšanga, ndayá Pablo tojanmca tmojáninñyë ora, tmojanontšë uayebuáchna chë Licaonia luar-entša biyañe, mëntšá: “¡Bëngbe diosënga bëngbiyoye tbojátšma mo entšatcá ca!”

<sup>12</sup> Bernabé imojtsábobuatma Zeus ca, mo chë chëngbe diosënga amëndayacá; y Páblëna Hermes ca, mo chë inñyë diosëngbiyama oyebuambnayacá. Páblëbiyoye chca imojtsábobuatma, er cha más yotsoyebuambná. <sup>13</sup> Zeusbiyama chentša bachna inabomna canñe yebna chë pueblo chaboca, chábioyoye jadórama. Chë bachna, uacnënga tojanënatse y uantšëfjushangá tojanëyamba chë Zeus jadórama yebnentša amashjuanoye; y cha y chë entšanga imojtseboše chë uacnënga jashebuáyana y jajuinñiyana, chca, chë ichmonátbiyoye jadórama.

<sup>14</sup> Bernabé y Pablo chama tbojántatšëmbona ora, entšayá tbojtsanenántšajatanëca, entšanga jinñanyiyama, ntšamo chënga imojtsamcá chata tondaye yonjógusetama, y tbojéftsanotjajo entšangbe tsëntsajana y mëntšá ibojtsaychembumbuana: <sup>15</sup> “Baconga y batanga, ¿ndáyeca chca šmojtsama ca? Bëndata cach tšëngaftangcá entšata fsëndmëna. Muentše bëndata fsëntsemna nñyë jábuayenama Bëngbe Utabná Jesucristbe tšabe noticiënga, tšëngaftanga chë quem ndoservena soyënga, vida ndbomna soyënga adórayana chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nyetsca béjayënga y lempe ntšamo chenache yobinñncá. <sup>16</sup> Masque tempo, Bëngbe Bëtsá entšanga tojanalesenciá cada ona chaoma

ntšamo tojtsejuabnacá, tšabá cachëngbiamá yojtsemnayeca, <sup>17</sup> Bëngbe Bëtsá ndocna te ntjájbanana tšëngaftanga jtsinÿanÿnayana, cachá tojama tšabe soyëngaca, mocna Bëtsá cha yomnana. Cha endama tšëngaftangbiamá chauftema y chë matënga botamana chaoshájonama, y becá saná cmondatsatná; y cha endama tšëngaftangbe ainaniñe corente oyejuayana chašmotsebomnama ca” —chata tbojánayana.

<sup>18</sup> Masque chë soyënga tbojánayana, nÿe batšatema más bën y ya ndoñe matbëñjanobenata chë entšanga jtsëuyanana uacnënga jashebuáyama, chca, chátbioye jadórana.

<sup>19</sup> Chca ora, básefta judiënga tmojánashjajna Pisidioca, Antioquíocana y Iconiocana, y chentša entšángbioye tmojanayënjaná, Jesucristbe ichmonatbe contra chamotsemnama. Chcasna, Pablo ndëtšbéngaca imojtsënanaye y chabe cuerpo chë pueblo chaboye tmojtsansjojó, er chënga imojtsejuabnaye Pablo ya obaná yojtsemna ca. <sup>20</sup> Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë pueblöye tojtesaná; y chë yëfsana, Bernabéftaca Derbe pueblöye tojána.

<sup>21</sup> Derbe pueblöca Jesucristbe tšabe noticiënga entšanga tmojanabuayená, y chca, entšanga Jesucristbeñe imojtsošbuáchiye. Chentšana chata tbojésanshëcona Listra, Iconio y Pisidioca Antioquiöye. <sup>22</sup> Chë luarënguenache chata ibojánana chë Jesucristbe ustonëngbioye atañëmuaye, cada te chábeñe más chamotsošbuáchema. Y entšángbioye tmojanéyana: “Bëngbe Bëtsabe amëndayoye jamashënguamna, bënga šontsamna quem luarentše bëtsá jëftsepadecénana ca.” <sup>23</sup> Nÿetsca ošbuachiyëngcá enefjuanenache, bëtsëjemëngcá mándayënga tmojanabacacá, chentša Jesucristbeñe ošbuáchiyënguëntšana, cachënga chentša ošbuachiyëngbioye jtsamëndayama. Bëngbe Bëtsá jëtschuayama tondaye ntjascá imojtsemna y cháftaca imojtsencuénta ora, cha tmojanimpadá, chë ošbuáchiyënga Bëngbe Utabnabe cucuatšinë chamotsemnama, ndábeñe chënga imojtsošbuaché.

#### *Pablo y Bernabé, Sirioca Antioquía pueblöye tbojtanata*

<sup>24</sup> Pisidia luarëjana tbojánachnëngo ora, Panfilia luaröye tbojánashjango. <sup>25</sup> Perge pueblentše Jesucristbe tšabe noticiënga entšángbioye tmojanabuayená, y chentšana Atalia pueblöye tbojánata. <sup>26</sup> Chentšana, Bernabé y Pablo, bejaycá tbojtanata Sirioca Antioquía pueblöye. Chentša entšanga Bëngbe Bëtsá tmojanimpadá chata chabe cucuatšinë chabotsemnama, chë trabajuiñe chaotsanÿenama; y chorna, chë trabajo ya tbojanpochocá. <sup>27</sup> Choye tbojtanashjango ora, nÿetsca Jesucristbeñe ošbuachiyëngbioye tmojánachembo, y tmojanacuntá ntšamo Bëngbe Bëtsá tšabe soyënga chátaftaca tojanmama, y ntšamo Bëngbe Bëtsá tojaninÿanÿé, chë ndoñe judiëgnaca chamotsobenama Jesucristbeñe jtsošbuáchiyama. <sup>28</sup> Y Pablo y Bernabé bayté chentše tbojanototoná Jesucristbeñe ošbuáchiyëngaftaca.

## 15

#### *Ichmónënga y bëtsëjemëngcá mándayënga Jerusalenoca tmojánenefjna jencuéntama*

<sup>1</sup> Chë tempo, báseftanga Judeocana áshjajnënga tmojanontsé, Antioquía pueblentše, chentša Jesucristbeñe ošbuáchiyënga mëntšá jabuátambana: “Base bobachtéma chë más delicadentše ndoñe šmonjenotëtšëse, ntšamo Moisesbe leyinë endayancá, ndoñe quenátöpodena tšëngaftanga atsebácanënga jtsemnama ca.” <sup>2</sup> Chíyeca, Pablo y Bernabé jabuachana chca buatëmbayëngaftaca imojánenatsësnaye. Cabana, tmojanëbuáyana Pablo, Bernabé y ínÿënga Jerusalenöye chamotsama, choca chë Jesucristbe ichmónëngaftaca y chë chentše Jesucristbeñe ošbuachiyëngbeñe bëtsëjemëngcá mandayëngaftaca chama chamencuentama.

<sup>3</sup> Chcasna, chë Antioquioca imojánenefjuana Jesucristbeñe ošbuáchiyënga Jerusalenöye chënga tmojanichamó. Fenicia y Samaria luarëjana imojtsachnëjuana ora, chënga tmojanacuntá ntšamo chë ndoñe judiënga chëngbe tempsca soyënguñe

ošbuáchiyana tmojtsanajbanama y chora Bëngbe Bëtsábeñe imojtsošbuáchema. Jesucristbeñe chentša ošbuáchiyënga chca tmojanuena ora, puerte oyejuayënga imojtsemna.

<sup>4</sup> Pablo y chë ínÿenga Jerusalenoye tmojánashhajna ora, chentša Jesucristbeñe os-  
buáchiyënga, Jesucristbe ichmónënga y bëtsëjemëngcá mándayënga chéngbioye tmo-  
janébuaja. Chentšana, Pablo y Bernabé tbojanacuntá lempe ntšamo Bëngbe Bëtsá  
chátaftaca yojamcá. <sup>5</sup> Pero básefta fariseunga, chora ya Jesucristbeñe ošbuáchiyënga,  
tmojantsá y mëntšá tmojánayana: “Chë ndoñe judiënga entsamna chë más delicadentše  
base bobachtema tétšenënga jtsemnana, bënga judiëngcá; y tšëngaftanga cmontsamna  
chënga jáuyanana, ntšamo Moisesbe leyënguiñe iuayancá chamotsamama ca.”

<sup>6</sup> As, chë Jesucristbe ichmónënga y bëtsëjemëngcá mándayënga tmojánenefjna jen-  
cuéntama, chë ndoñe judiënga aiñe o ndoñe yonjánamnama chë más delicadentše  
base bobachtema tétšenënga jtsemnana, ntšamo chë judiënga imojanamancá. <sup>7</sup> Bën  
y bëtscá chënga tmojanencuentá chentšana, Pedro tojantsbaná y mëntšá tojanéyana:  
“Jesucristbeyeca catsátanga, tšëngaftanga šmondétatšëmbo, ya bayté entsemna Bëngbe  
Bëtsá tšëngaftangbentšana atše šonjanábuayana, Jesucristbe tšabe noticiënga chë  
ndoñe judiënga jábuayenama, chca, chënga Bëngbe Utabnábeñe chamotsošbuáchema.  
<sup>8</sup> Bëngbe Bëtsá jtsetatšëmbuana lempe ntšamo entšanga tmojtsejuabnacá. Y cha  
šonjaninÿanjé, chë ndoñe judiëngnaca imnobena chabe entšanga jtsemnana, chábeñe  
tmojtsošbuáchese, chë Uámana Espiritu chëngbe ainaniñe cháuamashënguama cha  
tojanma ora, ntšamo cha bëngbe ainaniñe tojanmcá. <sup>9</sup> Y chca, Bëngbe Bëtsabiana  
nyetscanga cachcá monduámana, judiënga y ndoñe judiëngnaca; y cha tojama chë ndoñe  
judiëngnaca chëngbe bacna soyëngama perdonánënga chamotsemnana y ainaniñe  
tšabe juabna chamotsebomnana, Bëngbe Bëtsabe palabriñe jtsošbuáchiyëse. <sup>10</sup> Y  
mora, ¿ndáyeca tšëngaftanga ndoñe šmontseboše ntšamo Bëngbe Bëtsá tojamcá? Pero  
tšëngaftanga šmontseboše, chë ndoñe judiënga Jesucristbeñe ošbuáchiyënga lempe  
chë leyentša mandënga chamotsocumplínama, mo nda ínÿabioye uauta uasmanésha  
cuaftsasmëmnacá; pero lempe chë mandënga, ni bëngbe bëts taitanga ni bënga ntsober-  
nana jocúmpliana. <sup>11</sup> Y chca ndoñe chaondétsemna. Bënga mondošbuaché bënga  
atsebácanënga imomnana Bëngbe Utabná Jesús chabe tšabe juabna šojaninÿanjéyeca,  
y Bëngbe Bëtsá cachcá chë ndoñe judiëngnaca tojatsebacá ca” —cha tojanéyana.

<sup>12</sup> Chorna, chentše imojtsemna entšanga nyetscanga iyteca tmojanobiama, y tmo-  
januena Bernabé y Pablo jtsóyebuambnayana, chë bëts soyëngama, Bëngbe Bëtsabe  
obenana entšanga jinÿanjiyama, y inÿe soyëngama chabe obenánaca, ntšamo chë ndoñe  
judiëngbeñe Bëngbe Bëtsá chátaftaca tojanmcá.

<sup>13</sup> Chë útata jóyebuambayama tbojanpochocá ora, Santiago mëntšá tojánayana:  
“Jesucristbeyeca catsátanga, šmochjouena: <sup>14</sup> Simón šonjabuayená ntšamo Bëngbe  
Bëtsá natsana tojaninÿanjé, chë ndoñe judiëngnaca cha iuanÿenama, y chíyeca cha  
chënguentsana banga tojubuáyana chabe entšanga chamotsemnana. <sup>15</sup> Ntšamo Simón  
šonjabuayenacá entsemna cachcá ntšamo chë Bëngbe Bëtsabe juabna oyebuamb-  
nayënga tmojanayancá, ntšamo yochjanopásama y ntšamo Bëngbe Bëtsabe uabemana  
palabrënguiñe endayancá, mëntšá:

<sup>16</sup> Chentšana atše chanjésabo

y chë Rey Davidbe pamíllanga cachiñe uámanënga chantabiana;

mo nda canÿe uáshajayena yebna tojëtšjebcá, atše, Davidbe pamíllanga cachiñe uá-  
manënga chantabiana;

<sup>17</sup> chca, chë inÿe entšanga chamonguango ndayá jamana atše, tšëngaftangbe Utabná,  
más chašmotsábuatmama,

nyetsca ndoñe judiënga, chë atšbe entšanga chamotsemnana atše tijábacacanga.

<sup>18</sup> Chca atše, tšëngaftangbe Utabná séntsichamo,



nda ya bayté entsemna tonjanma entšanga chë soyënga chamotsetatsëmbuama ca — chiñe endayana.”

<sup>19</sup> Chentšana Santiago mëntšá tojanéyana: “Chíyeca atše sëntsejuabná, bënga ndoñe šontsamna chë ndoñe judiëngbiama jamana más totcá chaotsemnama Jesucristo jtsés-tonama. <sup>20</sup> Chamna, šontsamna chënga juabuábiamana y jáuyanana ndoñe chamondëtsesá, sananga chë ndaye soyënga entšanga tmojuabná diosënga yomna ca jadórama tmojuiyëbana; bacna soyënga shembásenga o boyabásengaftaca ndoñe chamondëtsama y ndoñe chamondëtsesá tšešana bayëngbe mëntšena, y buiñe cach ndoñe ca. <sup>21</sup> Er chë natsana tempënga orscana, nÿetsca pueblënguenache mondmëna chë Moisés tojëftsanayana soyënga entšángbioye abuayinayënga; y chabe leyënga, nÿetsca ochnayté mondbetsalíaye chë bënga judiëngbe enefjuana yebnënguenache ca” —cha tojanéyana

*Chë Jerusalenoca ichmónënga y bëtsëjemëngcá mándayënga canÿe tsbuanácha tmojanichmó chë ndoñe judiëngbiama*

<sup>22</sup> Chentšana, chë Jesucristbe ichmónënga y bëtsëjemëngcá mándayënga, nÿetsca chë Jesucristbeñe ošbuáchiyëngaftaca tmojanenoyeuná chënguentšana báseftanga jabacacayama, Pablo y Bernabéftaca Antioquía puebloye jíchamuama. Chcasna, tmojanëbuáyana Judas, chë Barsabás ca uabobuatmá, y Silas; chata ibnamna uámanata chë Jesucristbeñe ošbuáchiyënguentše. <sup>23</sup> Y chëngaftaca canÿe tsbuanácha tmojanichmó, y chiñe mëntšá yojétsayana:

Bënga chë Jesucristbe ichmónënga y chë bëtsëjemëngcá mándayënga, cach tšëngaftangcá Jesucristbeñe ošbuáchiyënga, fsëntseboše Bëngbe Bëtsá salúdoca chacmotsábouamna, tšëngaftanga chë ndoñe judiënga, Jesucristbeñe ošbuáchiyënga, Antioquía puebloca y Siria y Cilicia luarëngoca oyenënga.

<sup>24</sup> Bënga fsëntsetatsëmbo bëngbentšana báseftanga choye tmojángama, bënga ntjamëndacá, y fsëntsetatsëmbo mocna soyënga cmojtsabuátambama y chë causa, tšëngaftanga ndoñe šmontsetátšëmbo ntšamo jtsejuabnayana ndayá jamama yomnana, Jesucristbe canÿe ndegombre ustoná jtsemnama. <sup>25</sup> Chcasna, bënga fsënjenoyeuná y šonjúnÿnana tšabá yojtsemna báseftanga bënguentšana jabacacayana tšëngaftangbioye jontješiyama chamotsama, y Pablo y Bernabé, chë Jesucristbeyeca bëngbe bonshana catšátataftaca, choye chamotsama. <sup>26</sup> Chë útatna ba soye tbojotsbocá vida jáshbiama, Bëngbe Utabná Jesucristbiama oservëniñe. <sup>27</sup> Chátaftaca Judas y Silas fsënjichamó; y chatna cach tšëngaftangaftaca bochanjóyebuambaye ntšamo quem tsbuanáchañe yojtsábemanama. <sup>28</sup> Chë Uámana Espíritu y bënga cachcá fsëntsejuabná, bënga ndoñe šontsamna tšëngaftanga jamëndana bëtscá jabuache mandënga Moisesbe leyënguiñe chašmotsocumplínama. Nÿe quem uámana soyënga chiñe añe cmontsamna jtsobedecénana: <sup>29</sup> Ndoñe šmattsesaye mëntšena, chë ndaye soyënga entšanga tmojuabná diosënga yomna ca jadórama tmojóba bayëngbiana; ndoñe šmatjofšiye buiñe, ni šmatjase tšešana bayëngbe mëntšena; y shembásenga y boyabásengaftaca bacna soyënga ndoñe šmattsama. Chë soyënga ntšamcá, tšabá šmochanjama.

Bëngbe Bëtsá salúdoca chacmotsábouamna ca —chiñe yojétsayana.

<sup>30</sup> Chcasna, chë quem Jerusalenocana ichmónënga tmojésanodiošoftanentšana, Antioquía puebloye tmojána; y chocna, nÿetsca chë Jesucristbeñe ošbuachiyëngbioye tmojanëbuaja y chë tsbuanácha tmojanayentsbuaché <sup>31</sup> Chë Antioquía pueblentša Jesucristbeñe ošbuáchiyënga ntšamo chë tsbuanáchañe yojtsabemancá tmojanalía ora, bëts añemo tmojtanca y corente imojtsóyejuaye. <sup>32</sup> Judas y Silas Bëngbe Bëtsabe juabna oyebuambnayata ibnamna; as, chátnaca chë chentša Jesucristbeñe ošbuachiyëngbioye ba soyënga tmojanéyana, chënga añemo chamotsatsbomnana y Jesucristbeñe corente chamotsošbuáchema. <sup>33</sup> Chentšana baseftaytese, chentša Jesucristbeñe ošbuáchiyënga

chéngbioye tmojtanadiošoftá, chë ndëmuanyënga tmojanichamóngbioye jtama. <sup>34</sup> Pero Sílasna tšabá ibojtsinýana cachentše más jëftsajétanama. <sup>35</sup> Pablo y Bernabé baseftayshinýe Antioquía pueblentše tbojanototoná y ba ínýengaftaca Bëngbe Utabná Jesucristbe tšabe noticiënga entšanga tmojanabuatambá y tmojanabuayená.

*Pablo cachiñe inýe luarëngoye tojána, Bëngbe Bëtsabe trabaje jamama*

<sup>36</sup> Chentšana baseftaytese, Pablo Bernabébioye tbojanianá: “Bëngbe Utabnabe palabra tbonjanabuayená luarëngoye bochjésa, choca Jesucristbeñe ošbuáchiyënga jábuachama y jányama ntšamo imojtsemnana ca.”

<sup>37</sup> Bernabé yojtseboše, Juan chë Marcos ca uabobuatmábioye chátaftaca jëftsbetšama. <sup>38</sup> Pero Páblëna ndoñe tšabá ibontsinýana cha jëftsbetšana, er Juan chátbentšana tojtsanojuánañe Panfilia luarocana, y ndoñe tonjanatjëmbambá, Bëngbe Bëtsabe trabaje japochócantscuana. <sup>39</sup> Y chë palabrama tondaye tbonjanenóyeunata causna, Pablo y Bernabé cachcá tbojesanenonýaye. Y chca, Bernabé, Marcos tbojéftsanbetše, y bejaycá Chipre luaroye tbojánata; <sup>40</sup> y Páblëna, Silas tbojanábuayana jëftsbetšama. Chë Antioquía pueblentša Jesucristbeñe ošbuáchiyënga Bëngbe Bëtsá tmojanimpadá Pablo y Silas Bëngbe Utabnabe cucuatšinë chabotsemnana, chatbe trabajuiñe chaotsanýenama. Chentšana, Pablo Sílasftaca tbojánbocna y <sup>41</sup> Siria, Cilicia luarënguëjana tojánachnëngo entšanga añemo atšatnaye, chë luarenache enefjuana ošbuáchiyënga Jesucristbeñe más chamotsošbuáchema.

## 16

*Pablo Timotéobioye tbojáninýena*

<sup>1</sup> Chentšana Pablo tojánashjango Derbe y Listra luaroye, y chentše tbojáninýena canýe Jesucristbeñe ošbuachiyá, Timoteo ca uabainá; cha inamna canýe judiá Jesucristbeñe ošbuachiyabe uaqiñá y chabe taitana griego entšá inamna. <sup>2</sup> Chë Listra y Iconioca Jesucristbeñe ošbuáchiyënga Timoteobiana tšabá imojanoyebuambná. <sup>3</sup> Pablo tojánbošena Timoteo jëftsbetšama; pero cabá ndetsbetše orna, Pablo base bobachtema chë más delicadentše tbojantëtše, ntšamo judiënga imojanamancá. Cha chca tojanma, jobenayama chë judiënga imojoyena luarëngoye cháftaca jama, er nyetsca judiënga imnatátšëmbo Timoteobe taitá griego inamnana. <sup>4</sup> Chë ibojtsachnéjuana pueblënguenache chata ibojtsana Jesucristbeñe ošbuachiyëngbioye abuayiynaye, ntšamo Jerusalenoca Jesusbe ichmónënga y bëtsëjemëngcá mándayënga tmojanamëndacá, ndayá chë Jesucristbeñe ošbuáchiyënga ndoñe judiënga jamama yojtsamncá. <sup>5</sup> Nyets luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsóbotena.

*Pablo mo otjenayoquécá canýe Macedonioca entšábioye tbojáninýe*

<sup>6</sup> Chë Uámana Espíritu, Pablo y Sílasbioye tojaninýanjé, chata ndoñe yontsanamna Asia luaroca Bëngbe Bëtsabe palabra entšanga jábuayenana; asna, tbojánachnëngo Frigia y Galacia luarëjana. <sup>7</sup> Y Misia luaroca enajëbanoye tbojánashjango ora, tmojanjuabó tsjuana jana, Bitinia luaroye; pero chë Uámana Espíritu tojanabuayená choye ndoñe chabondétsama. <sup>8</sup> Misia luarëjana tmojánachnëngo ora, Troas luaroye chënga tmojána. <sup>9</sup> Chë te ibeta, Pablo mo otjenayoquécá tojáninýe canýe Macedonioca boyabása ibojtsebiatsana y mëntšá ibojtseimpadana: “Diosmanda Macedonioye mabo y šmabëjabuache ca.” <sup>10</sup> Pablo chca tojáninýe y cachora lempe tmonjanprontá Macedonioye jama. Atšnaca, chë quem soyënga uabiamnayá, chënga sënjétsatjëmbambnaye. Bënga fsënjëtsejuabnaye ndegombre Bëngbe Bëtsá šojtsanachembuana choye jama ca, Jesucristbe tšabe noticiënga choca entšanga jábuayenama.

*Pablo y Silas Filipos puebloca*

<sup>11</sup> As, Troasentšana bejaycá fsënjána Samotracia luaroye, y yëfsana Neápolis puebloye, <sup>12</sup> y chentšana Filíposoye. Filipos enamna canýe uámana bëts pueblo Macedonioca

y bëtscá romanënga oyeniñe. Chë luarentše baseftayté fsënjanoquedanga. <sup>13</sup> Canje ochnaytena, chë pueblentšana fsënjéftsanbocna y chë fshájaye tsachoye fsënjána. Fsënjanuena chentše canjamna canje luare Bëngbe Bëtsáftaca jencuéntama ca, y fsënjána janguanguama. Fsënjáninýena ora, chentše fsënjantbiama y Bëngbe Bëtsabe palabra fsënjanoeyebuambá chentše tmojanójoto shembásengbiama. <sup>14</sup> Enjamna canje shembása, Lidia ca uabainá, Tiatira pueblócá, y cha enjamna uámana uabuángana uafjatsenga entšayá uená. Cha inamna Bëngbe Bëtsábioye adorayá y chentše Páblëbioye ibotseyeunana. Bëngbe Bëtsá tojanma cha chabosertá lempe ntšamo Pablo yojtsoyebuambnacá, Jesucristbeñe chaotsošbuáchema. <sup>15</sup> Cha y chabe yebnentše oyenënga tmonjánenabayora, Lidia mëntšá šonjanaimpadá: “Tšëngaftanga šmonjayana atše Jesucristbeñe ndegombre stsošbuaché ca; chcasna, mabënga yebnoye, átšbentše chašmoquedama ca.”

Y šonjanëtarié bënga chentše joquédama.

<sup>16</sup> Canje te, chë Bëngbe Bëtsáftaca encuéntaye luaroye fsënjétsajna orna, šonjanébiatše canje tobiaše, oservená, bacna bayëjbe juabna uambayá; chë causa cha malisiayá inamna. Chabe nduiñënga becá crocénana imojanójacañe, chë tobiaše yojanmalisiaye soyëngama. <sup>17</sup> Chë tobiaše tonjanontsé Pablo y bënga usetonana y mëntšá enjëtsaychembumbuana: “¡Quem boyabásenga montsemna chë celoca Bëngbe Bëtsabe oservénënga y tšëngaftanga cmontsabuyayiná ntšamo Bëngbe Bëtsá yobena tšëngaftanga játsebacama ca!”

<sup>18</sup> Y bayté chca enjanchembumbuana; chë causa, Pablo bonjëtsetana y cabana, tonjanobuértana y chë bacna bayëjbioye mëntšá tbonjanianya: “¡Jesucristbe obenánaca y cha jótšëmbonëse, cbontsemánda chë tobiášbentšana chacuaisebocnama ca!”

Y cachora chë bacna bayëja chë tobiášbentšana tojésanbocna.

<sup>19</sup> Pero, chë bayëjbe juabna chábtentšana tojésanbocnama y chëngbiama más crocénana jabemama chora chë tobiaše ndoñe yontsobenama, chë tobiaše nduiñënga tmojaninýe ora, Pablo y Sílasbioye tmojánishëche y tmojtsanasjojoye plazoye, mandayëngbioye.

<sup>20</sup> Chë mandayëngbioye tmojanënatse ora, chënga mëntšá imojtsichamo: “Quem boyabásata judío entšata bondmëna, y muatbe causa bëngbe pueblentša entšanga montsenbouenana, <sup>21</sup> y bontsabuatambá soyënga jamama ntšamo chë judiënga imuamancá y bëngbe leyënguñe chë soyënga jamama ndoñe quenátslesenciana. Bënga ndoñe quešnátamna ni jouenana, ni jamana chë soyënga, romanënga bëtsemnayeca ca” —chënga imojtsichamo.

<sup>22</sup> Chora chë entšanga tmojanontsé uayebuáchana; as, chë mándayënga tmojanamëndá chata entšayá jtsëtsejquëcana y niñëfjéngaca jtsachebuánganjana. <sup>23</sup> Jabuache tmojanachebuánganjentšana, cárceloye tmojanautame y chë utámenënga shanyá tmojanmandá yejuana chaotsabuajënyama. <sup>24</sup> Chca tmojanmandá ora, chë utámianá chata tojanënatse chë más tsoye utámenoye y shecuatšentšana tsbuanëšinë tojanatsebuá.

<sup>25</sup> Pero tséntseto orna, Pablo y Silas ibnétsocantañe Bëngbe Bëtsá jëtschuayama, y cháftaca ibnéncuentaye; y chë inye utámenëngna chca imojtsuenana. <sup>26</sup> Ndeolpe, corente jabuache yojtsëbánjua y chë utámena yebna fshantsocana yojtsábonjnaye. Cachora, nyetsca chë utámenentša bëšašangá tojantëfjo y nyetsca utámenënga chë cadenëjuangá yojtsayentšjafjona. <sup>27</sup> Pero chë utámenënga shanyá tojanofšená y chë utámenentša bëšašangá yojtsatëfjnama tojáninýe ora, cha tojanjuabó nyetsca utámenënga tmojtsanacheta ca; chë causa, chabe espadëja yojenosëngbotëntšëna jtsenóitanama. <sup>28</sup> Pero Pablo tbojánbochembo: —¡Acbe cuerpo ndocá matenábomana; nyetscanga camuentše fsëndëtsomñe ca!

<sup>29</sup> Asna, chë utámenentša shanjá canye uajuinýanéssha tojanéyá y chë utámenoye ochamanana tojánamashëngo y auatja causa ngmëmnyayá Pablo y Sílasbe shecuatšentše yojshëntsamentšiye. <sup>30</sup> Chentšana tojtanébuacna y tojanéyana: —Señórata, ¿ndayá šojtsemna jamama atše atsbocaná jtsemnama ca?

<sup>31</sup> Y chata tbojanjuá: —Bëngbe Utabná Jesúsbeñe cochtsošbuáchiye, y chca, Bëngbe Bëtsá aca cmochanjatsbocá y acbe yebnentše oyenéngnaca ca.

<sup>32</sup> Y cha y nyetscanga chë yebnentše imojtsemnënga, Bëngbe Utabnabe palabra tmojanabuayená. <sup>33</sup> Cach ora chë ibeta, chë utamianá chata tojanënatse chë lisianënguiñe jetsajabiama. Chentšana, cha y chabe pamíllanga tmojánenabaye. <sup>34</sup> Chentšana, chë utamianá chata tojanënatse chabe yebnoye y saná tojanacaredadó. Cha y nyetscanga chë yebnentše oyenënga oyejuayënga imojtsemna, Bëngbe Bëtsábeñe imojtsošbuáchema.

<sup>35</sup> Yëfsana cachëse, chë mandayëngna soldadënga tmojanichamó, chë utamianá jamándama Pablo y Sílas chauatabáshejuanama. <sup>36</sup> Chë utamianá Páblëbioye tbojaniana: —Chë mándayënga šmonjamandá tsëndata jtabáshejuanama. Chcasna, šontsobena natjëmbana jtsatoñana ca.

<sup>37</sup> Pero Pablo chë soldadënga tojanéyana: —Bëndátnaca fsëndmëna mo Romoca onýnanatcá derecho bomnata y šonjáchebuanganja entsangbe delante, bacna soyënga aíñe o ndoñe tatifjamama cabá ndinýanýiye ora, y cárceloye šmonjautame. ¿Y mora imojtseboše iytëcana jtabáshejuanama? Chca ndocna te chaondëtsemna; cach mándayënga chamuabo jabátëbuacnama ca —cha tojánayana.

<sup>38</sup> Chentšana, chë soldadëngna chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatšëmbona chatna mo Romoca onýnanatcá derecho bomnata ibnamnama; chë causa, chë mándayënga puerte imojtsauatja.

<sup>39</sup> Chcasna, cach mándayënga tmojána chata perdón jatétejañama; chentšana tmojtanébuacna y tmojanéyana: “Diosmanda, muentšana inye luaroye motsoñata ca.” <sup>40</sup> As chata chë utámenentšana tbojéftsanbocna y Lídiëbe yebnoye tbojéftsanata. Chentšna, Jesucristbeñe ošbuáchiyëngaftaca tmojánenefjna y chata tbojánayana soyëngaca chëngbioye tmojanañemó. Y chentšana, chata ínjoye tbojtsanoñe.

## 17

### *Tesalónica puebloca, Pablo y Sílasbioye ndoñe tšabá tmonjanébuaja*

<sup>1</sup> Pablo y Silas inye luaroye ibojtsaye ora, Anfípolis y Apolonia bëts pueblënguëjana tbojánachnëngo y canye bëts pueblo, Tesalónica ca uabáinoye tbojánashjango. Chentše, chë judiënga canye yebna imnabomna chënga jénefnama. <sup>2</sup> Páblëna, ntšamo enjanamancá, cada ochnayté chë jénefnama yebnoye yojánaye, unga semanëntscuana, y chentše chë judiëngaftaca yojanoyebuambná y imojánëtsëtsnaye. Bëngbe Bëtsabe uabemana palabrënguëñe iuayana soyëngaca, <sup>3</sup> chënga yojanabuayiyiná y ndegombre yojaninýanýná, Bëngbe Bëtsabe Uámana Uabuayaná jóbanama y chentšana jtayenama ibojamnama. Y mëntšá yojanëtsëtsná: “Chë Cristo, Jesús endmëna, ndabiama atše cbontsabuayiyiná ca.”

<sup>4</sup> Judiënguëntšana báseftanga chiñe imojtsošbuáchiye y Pablo y Silas tmojanéseto más jouenama. Ba grieguënga, Bëngbe Bëtsá adórayënga, Jesucristbeñe imojtsošbuáchiye y ba uámana shembásëngnaca. <sup>5</sup> Pero chë judiënga ndošbuáchiyënga chca tmojáninýe ora, puerte envidia imojtsebomna. Asna, chënga tmojánachembo banga, tondaye amënga y bacna entsanga, y chënga tmojanenutaná jamama nyetsca chë pueblëntša entsanga chamotsenbouéñanama; y canye entšá, Jasón ca uabainabe yebna chënga tmojtsanabuache, Pablo y Silas jtsanguanguama, chentšana jesëbuacnama y entsangbe cucuatšinë jabáshejuanama. <sup>6</sup> Pero chentše ndocná tmonjáninýena; as chë entsanga Jasón imojtsejojyoye y chentša mándayënga imojëtsemnoye tmojanánatse y Jesucristbeñe inye ošbuachiyëngnaca choye tmojanënatse, y mëntšá imojtsáyebuache: “¿Chë

boyabásata, chë ndëmuanyata ibojtsama nyetsca luarentša entsanga chamuenboué-nanama, quem luaróynaca tbojabo, <sup>7</sup> y Jasón chabe yebnentše chata tojúbuaja ca! ¡Chënga montsama ntšamo chë Romoca bëts mandadbe mandënguine ndoñe quenat-slesenciancá, er chënga montsichamo inye rey canmëna, Jesús ca, y cha, César chë Romoca mandadbe cuenta nyetscángbeñe yojtsemánda ca!” —chënga imojtsáyebuache.

<sup>8</sup> Chë entsanga y chë pueblentša mándayënga chca tmojanuena ora, corente imojenbouénana. <sup>9</sup> Pero Jasón y chë ínÿenga, cháftaca imojtsemnënga, crocénana tmojtanjajó, y as tmojtanabáshejuana.

#### *Pablo y Silas Berea Puebloca*

<sup>10</sup> Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bëts puebloye chabuétsebocnama. Y chata choye tbojánashjango ora, chë judiëngbe enefjuana luaroye tbojánata. <sup>11</sup> Chentša judiënga imojamna más tšabe ainana bomnënga chë Tesalonicoca judiëngbiama; chcasna, oyejuayënga chë buayenana soye Jesucristbiama tmojanóyëngacñe, y cada te Bëngbe Bëtsabe uabemana palabra imojanalía, jtsetatšëmbuama, ntšamo Pablo y Silas ibojtsëtsëtsnacá aïne o ndoñe ndegombre yojtsemnama. <sup>12</sup> Y chca, ba chentša judiënga chatbe palábraca Jesucristbeñe imojtsošbuáchiye, y Grecia luaroca ba uámana shembásenga y boyabásengnaca. <sup>13</sup> Pero, Pablo Bereoca chë Bëngbe Bëtsabe buayenana soyama entsanga yojtsabuayiyname chë Tesalonicoca judiënga tmojántatšëmbona ora, chënga choye tmojána y tmojanma chentša entsanga chamuenbouénanama. <sup>14</sup> Chcasna, banga Jesucristbeñe ošbuáchiyënga tmojanma cachora Pablo chentšana chauétsebocnama y bėjaye tsachoye chaotsoñama; chëntscuana, Silas y Timoteo Bereoca tbojanoquedá. <sup>15</sup> Pablo tmojantjëmbambá entsangna, Atenas ca uabaina bëts pueblóntscoñe cháftaca tmojána. Chentšana, Pablo chënga tojanabuayená chamuauishéconama Silas y Timoteo jaúnayama betscó jtsayana, Pábloftaca jateninÿenama.

#### *Pablo Atenas puebloca*

<sup>16</sup> Pablo Atenas bëts puebloca Silas y Timoteo yojtsëbatmanëntscuana, puerta tbojanongmé, er cha tojáninÿe chentša entsanga imojtsadorana bëtsca cachëngbe pormana soyënga, ndayama chënga imojanjuabná diosënga yojamna ca. <sup>17</sup> Chíyeca, chë judiëngbe enefjuana yebnentše, judiënga y ndoñe judiënga Bëngbe Bëtsá adorayëngaftaca imojánenatsëtsnaye, y cada te chentša plazoca chë ndëmuanyënga chentše imojanashjajuanëngaftácnaca. <sup>18</sup> Y báseftanga, ntšamo jtsejuabnayama entsanga abuátambayënga, epicureunga y estoiquënga ca uabainëngnaca Pábloftaca imojánenatsëtsnaye. Inÿenga imojtsichamo: “¿Ndayama quem bostero yojtsoyebuambná ca?” Y ínÿengna: “Chana inye luarëngoca entsangbe diosëngbiama muentše entsabóyebuambnaye ca.”

Chënga chca imojtsichamo, er Páblëna Jesusbiama y chë obanënga jtayenama yojanoyebuambná. <sup>19</sup> Asna, chentša entsanga cha tmojanánatse canÿe luaroye, entsanga jénefnama y oyeambuambnayënga joyaunayama luare, Areópago ca uabáinoye. Chentše imojanamana uámanënga jénefnana, nderado ndabiama jayanama tšabá o ndoñe tšabá tonjamama. Chora Pablo tmojantjá: —¿Chë aca contsabuatambá soyënga ndayá bët-sayanana bënga quefstsobena jtsetatšëmbuama ca? <sup>20</sup> Aca tsëm soyënga šcontsëtsëtsná y bënga fsëntseboše jtsetatšëmbuana ndayá chë soyënga bëtsayanana.

<sup>21</sup> Er nyetscanga Atenasentša oyenënga y inye luarëngocana áshjajnëngna, corente yojanogúsetana chë tojtsopasana tsëm soyëngama jtsuenanana y jtsencuëntayana.

<sup>22</sup> As Pablo tojantsá chëngbe tsëntsaca chë Areópago ca uabáinentše y tojánayana: —Atenasentša entsanga: ntšamo bominÿe sënjjajjá, atše sëntsetatšëmbo tšëngaftanga ba diosënga puerta šmayaunana y šmadoránama. <sup>23</sup> Atše sëndánrreparana tšëngaftangbe diosënga šmétsadorana luarënguenache y sënjinÿena canÿe altar y chentše mëntšá iuábemana: “Chë Bëtsá nduabuatmabiama ca”. Y morna, chë Bëtsá chë nda ntsabuatmcá šmadoránabiama, atše cbontsabuyayiná.

<sup>24</sup> “Chë Bëtsá quem luare y lempe ntšamo chentše yomncá tojanma; cha endmëna quem luarentše y celoca Utabná, y cha ndoñe quenatiyena cha jadórana entsangbe jebna yebnënguiñe, <sup>25</sup> ni quebnatájaboto ndocná chabiana tondaye chaondétsama, er cha endmëna nda inétsama bënga vida chamotsebomnama y jtseshachnayama chamotsobenama, y cha nyetsca soyënga šnetsatšatnaye.

<sup>26</sup> “Cha nye canye boyabásabentšana nyets luarënguentša entsanga tojánabiana, nyets quem luarentše chamotsiyenama; y cha quem soyënga cabá ndëma ora, tojanjuabó mocna ora y ndayentše entsanga chamuetsiyenama; <sup>27</sup> chca, Bëngbe Bëtsá chamonguan-guama, masque chabiana ndoñe corente tmontsetátšëmbo, y chamuinýena y chábeñe chamotsošbuáchema; pero ndegombre, Bëngbe Bëtsá béngbentše cada cánýabentšana ndoñe bënoca quenátsmëna. <sup>28</sup> Ntšamo canya tojanayancá: ‘Bënga Bëngbe Bëtsáftaca cánýiñe mo canýacá mondmëna; chábeyeca bënga vida mondbomna, jobónjuama mondobena y ainënga mondmëna ca’. Ntšamo tšëngaftanguentša báseftanga bëts soyëngama uabiamnayëngnaca tmojanayancá: ‘Bënga nyetscanga Bëngbe Bëtsabe básënga mondmëna ca’. <sup>29</sup> Y chcasna, Bëngbe Bëtsabe pamíllanga bënga tmomñëse, ndoñe quešnátamna jtsejuabnayana Bëngbe Bëtsá yomna mo cach entsangbe castellano, midio o chë ndëtšbeca pormana soyëngcá ca, er chë soyëngna nye ntšamo entsanga tmojajuabocá y tmojtsobencá japórmana. <sup>30</sup> Pero Bëngbe Bëtsá tojanjuabó ndoñe ntjatonýayana chë entsangbe tempsca ndosertánana, y morna, nyetsca luarënguentša entsanga entsaménda, ndaye bacna soyënga tmojtsamama ngménaca chamuenojuabó, chca amama chamotsajbaná y Bëngbe Bëtsabe benache chamuatishache ca. <sup>31</sup> Bëngbe Bëtsá canye te tojuinýnaná, y chë tena, ndocnábioye ínýabiana más tšabá ntjatonýaycá, cha echanjayana entsanga tšabá o ndoñe tšabá tmonjamama; lempe chca cha echanjama canya cachá tbojabocacá entsáftaca, Jesús; y chca yochtsemnamna, Bëngbe Bëtsá entsanga tojinýanyé, chë bocacaná Jesús cháuatayenama cachá tojánmayeca ca” —Pablo tojánayana.

<sup>32</sup> Chë obanënga mochtayenama ichámuana chë entsanga tmojanuena ora, báseftanga Pablo imojtsáboyejuana, y ínýengna mëntšá imojtsichamo: —Bënga fséntseboše chë contsichamo soyënga más chcoye cachiñe jatuenama ca.

<sup>33</sup> As Pablo chëngbentšana tojésanbocna. <sup>34</sup> Pero báseftanga aíñe Jesucristbeñe imojtsošbuáchiye y Pablo tmojanasto más jatuenama; chënguentše imojamna Dionisio, canya chë Areopagoca tbiamanënguentšá; canye shembásanaca, Dámaris ca uabaina, y ínýenga.

## 18

### *Pablo Corinto puebloca*

<sup>1</sup> Chë soyënga tojanochnëngüentšana, Pablo Aténasentšana Corinto bëts puebloye tojána. <sup>2</sup> Chocna, canye judío Ponto luaroca onýnanáftaca tbojáneninýena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nyetsca judiënga Romocana chamuáisebocanama choca bëts mandado Claudio tojan-mandá causa. Pablo tojána chata jautsëtsayama, <sup>3</sup> y ntšamo chata jamama Páblëna jamama inatátšëmboyecna, chátaftaca yojtsoquedañe y cánýiñe chënga imnatrabájaye; chënga imnatátšëmbo mo tambotemëngcá entséjuaca japórmana. <sup>4</sup> Y nyetsca ochnayté, Pablo yojanamana chentša judío entsangbe enefjuana yebnoye jana, Bëngbe Bëtsabe soyëngama jóyebuambayama, y puerte yojtsentšena judiënga y ndoñe judiënga chamot-sošbuáchema, ntšamo cha yojtsanëtsëtsnacá ndegombre bëtsemnama.

<sup>5</sup> Silas y Timoteo Macedoniocana choye tbojánashjango ora, Pablo nyets tempo Bëngbe Bëtsabe soyëngama entsanga yojtsabuayiyayey y puerte tšabá chë judiënga yojaninýanyná, Jesús ndegombre Bëngbe Bëtsabe Uámana Uabuayaná bëtsemnama. <sup>6</sup> Pero chë judiënga Páblëbe contra imojtsemna y tmojanontšé podësca chabiana ichámuana. Asna, Pablo chabe uichëtjonyangá yojtsenántšasajayey, chënga jinýanyiyama chënga

ndoñe tšabá tmonjáncjanguama, y tojanéyana: “Tšëngaftanga ndatsebácanënga chašmojóbanëse, cach tšëngaftanga šmochtsótatsëmbñe; atšna ndoñe. Mëntescana chë ndoñe judiënga jábuayenama chantsoñe ca.”

<sup>7</sup> Chorna, chë judiëngbe enefjuana yebnentšana tojéftsanbocna y canye boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chë enefjuana yebnentša juachaca inoyena. <sup>8</sup> Y Crispo, canye chë enefjuana yebnentša mandayá, Bëngbe Utabná Jesucristbeñe yojtsošbuáchiye y nyetsca chabe pamíllangnaca; y banga chë Corintentšëngnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye. <sup>9</sup> Canye ibeta, Bëngbe Bëtsá Páblëbioye mo canye otjenayoquëcá tbojaniyana: “Ndoñe matauatjana; nye cochtsana atšbe soyëngama oyebuambnaye y ndoñe iytëca cattsemana. <sup>10</sup> Er atše ácaftaca séntsemna y ndocná quecmochátsbojajo ntšámnaca jáborlama; atše bëtská entšanga quem pueblentše sëndábamna ca.”

<sup>11</sup> Chcasna, Pablo Corintentše canye uata y chnénguana shinye tojanototóná, Bëngbe Bëtsabe palabra entšanga abuátambaye.

<sup>12</sup> Pero, Galión chë Acaya luarentša mandado inamna orna, chë judiënga imojenóyeyunaye Páblëbe contra; cha tmojánishache y chë tribunaloye tmojanánatse. <sup>13</sup> Chocna, chë mandado tmojaniyana: —Mua entšanga entsëtsëtsná y entsama chënga Bëngbe Bëtsá chamotsadorana, pero ndoñe ntšamo bëngbe leyënguiñe endayancá ca.

<sup>14</sup> Pablo jóyebuambayama uatajanóntša orna, Galión chë judiënga tojanéyana: —Quem entšá nderado ínñabioye matbënjóba o ndayánaca chca matënjobuachjanguá, as cocayé atše matijótbema tšëngaftanga judiënga yejuana joyaunayama; <sup>15</sup> pero ntšamo šmontsichamcá entsemna nye बातëmbana soyëngama, nye tšëngaftanga šmëbuatma entšangbiana y cach tšëngaftangbe leyëngama; chcasna, cach tšëngaftanga cmontsamna jenóyeyunayana y jamana ntšamo chašmojenoyeunacá. Atše quem base soyëngama ndoñe quetsátsboše ngoberna jtsemnana ca.

<sup>16</sup> As Galión tojanamëndá chë tribunal luarentšana chë judiënga jtëbuacnama. <sup>17</sup> Chorna, chë entšanga tmojánishache chë judiëngbe enefjuana yebnentša mandayá, Sóstenes ca uabainá, y Galionbe delante imojtsejantšetaye. Pero Galión chë soye tondayana ibontsentšamna.

*Pablo Antioquioye tojtaná y chentšana cachiñe inye luarëngoye tojána, Bëngbe Bëtsabe trabajo jamama*

<sup>18</sup> Pablo cabá bayté Corintentše tbojántotona. Chentšana, Jesucristbeñe osbuachiyëngbentšana tojesanodiošoftá y bejaycá Siria luaroye tojána, Priscila y Aquílafata. Cabá Sirioye nda ora, Cencrea pueblaca nyets stjénashe yojtsenátstbotje, Bëngbe Bëtsábioye jinñinñiyama canye soye tbojanšbuáchenama. <sup>19</sup> Efeso pueblote tmojánashjajna ora, Páblëna Priscila y Aquila tojésanabashejuana. Chentšana, cha tojána chë chentša judiëngbe enefjuana yebnoye y chentše chë judiëngaftaca yojanoyebuambná y imojánenatsëtsnaye. <sup>20</sup> Báseftanga Pablo tmojanimpadá inye baseftayté chentše chauesomñama, pero chana ndoñe tonjanoyauná; <sup>21</sup> chentšana, chëngbentšana tojesanodiošoftá, mëntšá jëftšëyanëse: “Nderádose cachiñe chantésabo tšëngaftanga jabábuachama, Bëngbe Bëtsá šojalesenciase ca.”

Chora, Pablo bejaycá Efesocana tojéftsanbocna. <sup>22</sup> Cesarea pueblote tojánashjango ora, tojána jacheuayama Jesucristbeñe ošbuáchiyënga Jerusalenoca; y chentšana Antioquioye tojána. <sup>23</sup> Chentše baseftayté yojéftsemna; y chentšana, Pablo tojesaná Galacia y Frigia luarënguenache, Jesucristbeñe ošbuáchiyënga añemo atšatnaye.

*Apolos, Efeso pueblote Bëngbe Bëtsabe soyëngama yojanabuayiyiná*

<sup>24</sup> Cach tempo, Efesoye tojánashjango canye judío, Apolos ca uabainá, Alejandro bëts pueblotá; cha puerte obená inamna jonguamiyama y corente inatátšëmbo Bëngbe Bëtsabe uabemana palabrengama. <sup>25</sup> Bëtská tojánatsjinñe chë Bëngbe Utabná

tojaninñanyé benachama; añémoca yojanoyebuambná y Jesusbe soyëngama botamana yojanabuatambá, masque cha nÿe ntšamo Juan entsãnga tojánabuatambama y tojanëbáyama inatátšëmbo. <sup>26</sup> Ndauatjá Apolos tojanontsé jóyebuambayama chë judiëngbe enefjuana yebnentše. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo Bëngbe Bëtsabe inÿinÿena benache bëtsemnama. <sup>27</sup> Apolos Acaya luaroye jama yojtseboše orna, Jesucristbeñe ošbuáchiyënga bëtscá tmojanañemó y choca Jesucristbeñe ošbuáchiyëngbiamama canÿe tsbuanácha tmojanichmó, chca, Apolos choca tšabá chamofjama. Acaya luaroye tojánashjango ora, Jesucristbeñe ošbuáchiyënga bëtscá tojanëjabuache. Bëngbe Bëtsá chëngbe tšabiamama yojanjuabnáyeca, chënga Jesucristbeñe corente imojtsošbuáchiye. <sup>28</sup> Entšangbe delante chë judiëngaftaca jabuachana imojánenatsëtsnaye y nÿetscanga tojaninñanyé, ntšamo ndoñe tšabá inamncá chë judiënga imnatatšëmbuama; y Bëngbe Bëtsabe uabemana palabréngaca chënga tojaninñanyé, Jesús Bëngbe Bëtsabe Uámana Uabuayaná bëtsemnama.

## 19

### *Pablo Efeso puebloca*

<sup>1</sup> Apolos Corintoca yojtsemnëntscuana, Páblëna chë tjañe luarënguëjana tojánach-nëngo y Efesoye tojánashjango; chentše básefta ošbuáchiyënga tojánanÿena, pero chëngna nÿe ntšamo Juan chë Ubayaná tojanabuatambacá imnatatšëmbó. <sup>2</sup> Pablo chënga tojanatjá: —¿Uámana Espíritu chenjánabo tšëngaftangbe ainaniñe jtsemándayama, Jesucristbeñe ošbuáchiyënga šmojanóbiamama ora ca?

Chora chënga tmojanjuá: —Ni mo queftsátstatšëmbó chë Uámana Espíritu yomnama ca.

<sup>3</sup> Y Pablo tojanéyana: —As, ¿ntšamo šmojánenabaye ca?

Y chënga tmojanjuá: —Fsënjánenabaye ntšamo Juan entsãnga yojanëbayancá ca.

<sup>4</sup> As Pablo tojanéyana: —Juan tojanëbaye chë bacna soyënga amama ngmënaca tmojanenojuabó, chca amana tmojanajbaná y chë Bëngbe Bëtsabe benache tmojánishachënga, y entsãnga yojanëtsëtsná chë chábentšana yochjanashjanguábeñe chamotsošbuaché ca; y cha Jesús endmëna ca —Pablo tojánayana.

<sup>5</sup> Chca tmojanuena ora, chënga tmojánenabaye Bëngbe Utabná Jesús jótšëmbonëse, chábeñe imojtsošbuáchema. <sup>6</sup> Pablo chëngbe bestšašinë chabe cucuatšënga tojanajó ora, Uámana Espíritu chëngbe ainaniñe tojánamashëngo jtsemándayama; tmojanontsé inÿetšá biyangana, chënga tempo ndmabiyañe, y Bëngbe Bëtsabe juabna imojtsoyebuambná. <sup>7</sup> Chentše imojtsemna bnëtsana uta entsãnga.

<sup>8</sup> Unga shinÿëntscuana Pablo yojánaye chë judiëngbe enefjuana yebnoye y ndauatjá Jesucristbe soyëngama yojanoyebuambná; entsãngaftaca imojánenatsëtsnaye y entsãnga yojanëtsëtsná Bëngbe Bëtsabe amëndayama, chënga chábeñe chamotsošbuáchema. <sup>9</sup> Pero ba nduauenanënga ndoñe imontsošbuaché y Bëngbe Utabná tojaninñanyé Benachama entsãngbeñe bacna soyënga imojtsichamo. Chcasna, Pablo chëngbentšana tojtsanojuánañe y nÿe chë Jesucristbeñe ošbuáchiyënga tojanëbuaja canÿe scueloye, canÿe entšá Tirano ca uabainabe yebnoye. Chentše cada te chë ouenanëngaftaca yojanoyebuambná, <sup>10</sup> y chca yojánama uta uatëntscuana; y chca, nÿetscanga Asia luaroca oyenënga Bëngbe Utabnabe palabra tmojanuena, judiënga y ndoñe judiëngnaca. <sup>11</sup> Y Bëngbe Bëtsá puerte bëtš soyënga Pábloftaca yojtsama. <sup>12</sup> Tša bëtš soyënga tojanma; chíyeca, nÿetsca chë Pablo tojuabojajo entsáyá y pañuelëjuangá, entsãnga imojanamana šoquëngbioye juyambana, y chca tmojama orna, chë šocanënga juenatjëmbana y chë bacna bayëjënga entsãngbentšana jésebocanana.

<sup>13</sup> Pero básefta judiënga tsáshenañe bacna bayëjënga entsãngbentšana imojtanëbuacana. Chë judiënga imojtseboše chë bayëjënga jtëbuacnana, Bëngbe Utabná Jesús



jótsšembonëse. As, chë bacna bayëjéngbioye mëntšá imojtsétsétsnaye: “Bëngbe Utabná Jesús, Pablo bondbetsebayaná jótsšembonëse y chabe obenánaca cbontsaménda muabentšana chašmuaisebocnama ca.”

<sup>14</sup> Chca imojánama chë judío Esceva ca uabainabe canýsëfta uaquiñënga. Esceva inamna bachnangbe amëndayá. <sup>15</sup> Pero canýe, Escévëbe uaquiñënga chca tmojánayana orna, chë bacna bayëja mëntšá tojanéjua: “Atšë Jesús sënduábuatma y sëndétatšëmbo nda Pablo yomnana; pero tšëngaftanga, ¿ndëmuanyënga šmomna ca?”

<sup>16</sup> As, cachora chë bacna bayëjbe juabna uambayá chéngbioye tojanontsënja y tša añemo bomná bétsemnayeca chënga tojtsanayënjana, jabuache jtsajantšetayëse; chë causa, chënga chë yebnentšana tmojtsanacheta enašënga y lisiánënga. <sup>17</sup> Nýetscanga Efesoca oyenënga, judiënga y ndoñe judiënga, chca tmojántatšëmbona y corente imojtsanauatja. Y chca, Bëngbe Utabná Jesús entsanga más imojtsatschuanaye.

<sup>18</sup> Jesucristbeñe imojtsošbuachiyënguentšana, banga imojánashjajuana y entsangbe delante imojtsecompšaye, tempo bacna soyënga tmojanmama; <sup>19</sup> banga, chë bocjuanana soyënga jamama imojanëntšénënga, chëngbe bocjuanana librëšangá tmojanijëbo y entsanga imojtsantješna ora, chëšangá imojtsajuinýiye. Tmojanjuabó ntsachetšá chë librëšangá betsámanama y tojanóbocna shachna bnétsana uaranga crocénana nýetšá. <sup>20</sup> Y chca, Bëngbe Utabnabe palabra más ba entsanga imojtsuenana y chiñe imojtsošbuáchiye y Bëngbe Bëtsá chabe obenana entsángbeñe yojtsinýinýnaye.

<sup>21</sup> Chca tojanochngüentšana, Pablo tojanjuabó Macedonia y Acaya luarënguëjana jachngëguse, Jerusalemoye jésama. Y yojtsejuabnaye cha ibojtsemna Jerusalemëntšana Romoye jama ca. <sup>22</sup> Asna, chabe uajabuachanënguentšana útata, Timoteo y Erasto, Macedonioye cha tojanichamó. Chëntscuana Pablo baseftayté más Asia luarentše tbojanjëtana.

#### *Efesoca entsanga tmojánenbouenana*

<sup>23</sup> Chë tempo, Efesoca entsanga corente tmojánenbouenana, chë Bëngbe Utabná yo-jtsinýanýná Benache imojtsisháchichanëngbe causa. <sup>24</sup> Chë entsanga chca tmojanma, er canýe entšá mídioca soyënga pormayá, Demetrio ca uabainá, chënga tojanayënjana chca jamama. Cha yojanamana binche soyetëmënga japórmana y chëtëmënga yojáninýna mo chë Efeso puebloquëngbe diosá Artemisa jadórama bëts yebncá. Demétrioftaca imojantrabájangna bëts cá crocénana imojanójacañe chë soyetëmënga eniñe. <sup>25</sup> Demetrio tojanébuaja cháftaca imojantrabájanga y ínýenga cach mídioca soyënga pórmayënga, y mëntšá tojanéyana: “Baconga, tšëngaftanga šmondétatšëmbo, bënga bëts cá crocénana jtsebomnamna quem trabajuëntšana chca jopódiana. <sup>26</sup> Pero tšëngaftanga šmontsonýá y šmontsuenana ntšamo chë Pablo ca uabainá yojsichamcá. Cha entsichamo, chë entsangbe pormana soyënga ndoñe yontsemna jtsadoránana ca; y chca ba entsanga tojabuayená y chënga aíñe montseyeunana. Chë soyna ndoñe nýe muentše Efesentše chca quenátopasana; nýets Asia luaríñnaca chca entsopasana. <sup>27</sup> Resjo entsemna; chca causa, entsanga bëngbe trabajuama ndoñe tšabá quemochátichamo y chë uámana Artemisa jadórama bëts yebnama mochántsihamo uámana yebna ndoñe yondmëna ca. Y chca, Artemisbe obenana entsanga mochantsábotena y Artemisa ndoñe bañe quemochátabuatma, nda Asientše y nýets luaríñnaca mondadorana ca.”

<sup>28</sup> Chca tmojanuena ora, chca pórmayënga puerte tojánëtëna y tmojanáyebuachena: “¡Efesoquëngbe Artemisa corente bëtsá endmëna ca!”

<sup>29</sup> Y chca, nýetsca chë pueblentša entsanga tmojánenbouenana. Tmojanotabá Gayo y Aristarquëbiyë, Macedonioca boyabásata, Páblëbe tjëmbambnayata; y sjójónana tmojanënatse chëngbe enefjuana yebnóntscoñe. <sup>30</sup> Pablo tojánbošena choye jamashënguama chë entsángaftaca jóyebuambayama, pero Jesucristbeñe ošbuáchiyënga ndoñe tmonjanlesenciá. <sup>31</sup> Chë Asioca mándayëngbentše báseftanga imnamna Páblëbe amiguënga, y chënga Páblëbiyë palabra tmojanafja chë jénefnama yebnoye ndoñe chaondámashënguama.

<sup>32</sup> Chëntscuana, entšanga imojtsejotonocna, ínŷenga imojtsechembumbuana canŷe soye y ínŷengna inŷe soye, chēnga corente imojtsenbouenana causa, y banga chentšē imojtsemnēnga ndoñe imontsetátšēmbo ndayama choye tmojanobéconama. <sup>33</sup> Pero básefta judiēnga, canŷe entšá, Alejandro ca uabainá, chē entšangbe natsanoye tmojanajuatsēntše, y báseftanga cha tmojanbuayená ntšamo yojtšopasánama. Asna, Alejandro tojánēfjatsēmbo cucuátšēca iytēca chamobiamama, er cha yojtseboše entšangbe delante chē judiēnga jobuauyanama. <sup>34</sup> Pero, Alejandro judío bemnama chē entšanga tmojántatšēmbona ora, nŷetscanga tmojanáyebuachena uta horēntscuana, mēntšá: “¡Efesoquēngbe Artemisa corente bētsá endmēna ca!”

<sup>35</sup> Chē pueblentša mándayēngbe uajabuachaná, entšanga iytēca jábiamama tojanobená ora, tojanéyana: “Efesoquēnga, nŷets luariñe endótatšēmbo, quem pueblentše oyenēnga iuamna jtsinŷenana chē Artemisa jadórama bēts yebna y chē cha jadórama celocana otsatšena ndētšbé. <sup>36</sup> Ndocná quenátobena chama jayanama ndoñe ndegombre yondmēna ca. Chcasna, natjēmbana motsomñēnga y tondaye matamēngana corente tšabá ntjshajuaboycá. <sup>37</sup> Tšēngaftanga quem boyabásenga moye šmojunatse, masque Artemisbe yebnentše tondaye tmonjatbēba y bēngbe Artemisbiamama ndoñe podesca tmonjoyebuambá. <sup>38</sup> Demetrio y cháftaca šmotrabájanga, nderado ndabiamama ndaye demanda šmojtsebomnēsna, cabildoca endatēfjna y chentše mándayēnga montsemna chē demandēnga jouenama, y chēngbentše cada ona šmochjēftsendemánda. <sup>39</sup> Y tšēngaftanga inŷe soye šmojtsenguasna, cmontsamna ntšamo bēngbe leyēnguiñe yomandancá, nŷetsca quem pueblentše oyenēngaftaca jenóyeunayana. <sup>40</sup> Ndayá mēnté tojopasá causa, resjo entsemna bēngbiamama chamuayana, ntšamo leyēnguiñe yomncá bēnga ndoñe montsama ca; y bēnga ndoñe quemuátobena ndayá jojuana, ndáyeca quem enbouenanana tojopasá ca šojátjayēse ca” —cha tojanéyana. <sup>41</sup> Y chca jayanēse, chē entšanga tojtanichamó.

## 20

### *Pablo, Macedonia y Grecia luaroye tojána*

<sup>1</sup> Chē enbouenanana tojanochnēngo ora, Pablo chē Jesucristbeñe ošbuachiyéngbioye tojanébuaja jábuayenama, añemo chamotsatsbomnana; tojesanodiošoftá y Macedonioye tojéftsanbocna. <sup>2</sup> Chē luarēnguējana cha tojánachnēngo Jesucristbeñe osbuáchiyēnga beca añemo atatsatnaye, ba chabe palabrēngaca; chentšana, Grecia luaroye tojánashjango, <sup>3</sup> y chentše unga ishinŷe tojanoquedá. Barquēshañe Sirioye játama Pablo yojtseprontana orna, tojántatšēmbona chē judiēnga cha jtsóbama tmojanenóyeunama. Asna, tojanenojuabó jesshéconama, cach Macedonia luarējana jésachnēnguse. <sup>4</sup> Pablo quem boyabásenga tmojantjēmbambá: Sópater, chē Bereocá, Pirrbe uaquiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófimnaca, Asia luarocata. <sup>5</sup> Chēnga tmonjanonatsé y šonjanēbatma Troasoca. <sup>6</sup> Chē levadúraca ndēpormana tandēse saye fiestentšana, Filíposentšana barquēshañe fsēnjéftsanbocna y shachna tianoye, Troasoca chē tmonjanonatsenga fsēntanishēche, y chentše canŷe semana fsēnjanoquedanga.

### *Ntšamo tojanopasá Troas puebloca*

<sup>7</sup> Chē inŷe semana jobojátšama te, fsēnjánenefjna Jesucristbeñe ošbuachiyēngcá tandēse jajátayama, cánŷiñe jasama; y Pablo entšanga enjétsétsēsnaye. Cha bonjamna yēfsana chentšana jéftsebocnana; chē causa, más bēn chēngaftaca tonjanoyebuambá, tsēntsetēntscuana. <sup>8</sup> Fsēnjamna canŷe tsoye tsbanana tsañoca y chentše ba uajuinŷanēshangá enjanamna; <sup>9</sup> y canŷe bobontse, Eutico ca uabainá, ventanentše enjántbemana. Pablo bēn enjanoyebuambná causa, chē bobontse ocnayana tbojanábuache. Cabana, corente tojtsanomaná ora, chē unga tsañocana tontsanótsatše y obaná chora tmontanatsbaná. <sup>10</sup> As, Pablo tonjánastjango, chē bobóntsbioye tbonjanotsbuajó y

tbonjanotsejcuá. Y chë entsãnga tonjanéyana: “Ndoñe nyetšá matauatjẽngana; ainá cha entsatsmẽna ca.”

<sup>11</sup> Chentšana Pablo cach tsbanánoye tonjesaná y tandëse tonjanjatá, jtenójuaboyama ndayá Jesús jóbanëse tojanmama. Chora Pablo chë entsãngaftaca tonjanse y ton-tëtanontšé oyebuambnayana, jabinÿnëntscuana. Chora Pablo chentšana tontsanoñe. <sup>12</sup> Y chë otsatšena bobontsna ainá imojtsatánatseñe, y chama chë entsãnga corente oyejuayẽnga imojtsemna.

#### *Pablo Troasentšana Mileto puebloye tojána*

<sup>13</sup> Bẽngna fsẽnjanonatsé y barquëshañe fsẽnjána Aso pueblóntscõñe, chentšana Pablo jtesbetšama, ntšamo fsẽnjanenoyeunacá, er Pablo tonjánbošena fshantscá choye jana. <sup>14</sup> Asoca Pábloftaca fsẽntaneninÿena ora, bẽngaftaca barquëshañe cha tonjána Mitilene puebloye. <sup>15</sup> Chentšana fsẽnjẽftsãnbocna y yẽfsana Quío luarẽjana fsẽnjánachnẽngo, y chë inÿe yẽfsana Samos luaroye fsẽnjánashjajna. Chentšana fsẽnjána y yẽfsana Mileto puebloye fsẽnjánashjajna. <sup>16</sup> Chca tonjanochnẽngo er Pablo ndoñe chenátanbošena Efesoye jama, Asia luariñe ndoñe yapa ndëtsemnama. Chca tojánbošena er cha enjëtseboše betscõ Jerusalemoca jtsatsmẽnana, tojopodesna chë judiẽngbe fiesta, Pentecostés ca uabaina fiestama.

#### *Ntšamo Pablo chë Efesoca ošbuachiyẽngbeñe bëtsẽjemẽngcá mándayẽnga tojanéyana*

<sup>17</sup> Miletocana Pablo tonjanmandá chë Efesoca ošbuachiyẽngbeñe bëtsẽjemẽngcá mándayẽnga jobiatšana. <sup>18</sup> Chẽnga tmonjánashjajna ora, Pablo tonjanéyana: “Tšẽngaftanga šmondétatšẽmbo ntšamo atše quem Asia luaroye sẽnjabánashjango orscana tšẽngaftangbeñe snetsamana. <sup>19</sup> Nyets tempo Bẽngbe Utabná sëndëservena y cach atše uamaná ndoñe quetsatenobiamná. Corente shẽchbuiye tijẽftsoperdé y ba soyẽnguiñe tija-sufri, chë judiẽnga atše jóbama mondboše causa. <sup>20</sup> Y lempe ntšamo tšẽngaftangbe tšabiama yomncá tçbonjabuayená; tondaye ntjatsbuetamencá. Nyetscangbe delante sẽnjabuatambá y tšẽngaftangbe yebnẽnguenáchnaca. <sup>21</sup> Judiẽnga y ndoñe judiẽnga Bẽngbe Bëtsabe soyẽngama sẽnjabuayená, bacna soyẽnga amama ngmẽnaca chamuenójuaboma y chca amana chamotsajbanama, Bẽngbe Bëtsabe benache chamuishachama y Bẽngbe Utabná Jesúsbeñe chamotsošbuáchema. <sup>22</sup> Y mora Jerusalemoye chanjá; Uámana Espiritu chca šontsemánda y ndayá choca chjapásamna ndoñe quetsátstatšẽmbo. <sup>23</sup> Nyẽ mëntšá aĩne sëndétatšẽmbo: Nyetsca bëts pueblẽnguenache ndayẽjana atše chandbëtsana, Uámana Espiritu šondbëtsebuayiynaye entsãnga cašmochjutame y puerte chaisufrima camochjama ca. <sup>24</sup> Atšbe vida cach atšbiama ndoñe yapa quenatámana, chaitšaina o chayóbana. Pero atšbiama iuámanana endmẽna ndayá atše jobenayana atšbe trabajo jẽftsepochócana, ndayá Bẽngbe Utabná Jesús šojanmandá jamama, chë tšabe noticiẽnga Bẽngbe Bëtsá entsãngaftaca tšabia yomnama jábuayenama.

<sup>25</sup> “Y mora atše ndegombre sëntsetatšẽmbo, tšẽngaftangbentšana, chë ndẽmuanÿengbentše Bẽngbe Bëtsabe amẽndayama sẽnjabuayená, ndocná atše más quešmochátinÿe. <sup>26</sup> Chiyeca, atše ndegombre mënté cbetséyana: Atše tondaye quetsátstatšẽmbo nderado nda ndatsbocaná chaojóbanabiama, <sup>27</sup> er atše ntšamo Bẽngbe Bëtsá jamama yojuabnacá lempe tçbonjabuayená, tondaye ntsebuetamencá. <sup>28</sup> Chcasna, cach tšẽngaftangbiama šmochtsantješna y nyetscanga muentše Jesucristbeñe ošbuachiyẽngbiám-naca. Chẽngbeñe mo chẽngbe abujãnyãngcá Uámana Espiritu tçmonjajayé, Bẽngbe Bëtsabe entsãnga chašmotsanÿenama, chẽnga Bẽngbe Bëtsá chábenga tojábiama, chabe Uaquiñabe buiñe juabuáshanëse y jóbanëse, mo bëtscá cuafjopagacá. <sup>29</sup> Atše sëntsetatšẽmbo, atše chaitsoñe orna, banga mochanjabo y chẽnga mochántsemna mo corente tšátjaye tjañe quešẽngcá, Jesucristbeñe ošbuáchiyẽnga chábeñe ošbuáchiyana chamotsajbanama chẽnga jamama. <sup>30</sup> Y tšẽngaftangbentšánẽnaca báseftanga mochanjábocana y entsãngbioye uayátsenaye soyẽnga mochanjabuatambá, chca, báseftanga

Jesucristbeñe ošbuáchiyënga chë ínÿengbentshana chamotsoluarema y nÿe chë abua-tambayëngbioye chamotsésetonama. <sup>31</sup> Chcasna, sempre šmochtsantješna; ndoñe chacmondébnëtjomba, atše unga uatëntscuana, bnëté y ibeta, tšëngaftanga cada ona cbondétsabuayiynama y chama atše puerte tijasufrí.

<sup>32</sup> “Y morna, Jesucristbeyeca catsátanga, Bëngbe Bëtsabe cucuatšiñe cbétsabashejuana y ntšamo tšëngaftangbiana chabe tšabe juabna yomnama palabrëngaca, tšabá chašmuesomñe. Cha endobena jamama tšëngaftangbe ainaniñe más chašmotsošbuáchema, y endobena tšabe soyënga tšëngaftanga jatšatayama, ndayá jatšatayama tojanašebuachenacá mo tšëngaftangcá entšángbioye, ndëmuanÿenga cha tojáchembo chabe entšanga chamotsemnana. <sup>33</sup> Atše ndocnabe crocénana, o castellano o entšayá atšbiana quetsatántšaboše; <sup>34</sup> más inÿetšá, y tšëngaftanga lempe šmondétatšëmbo, atše cach atšbe cucuatšeca tijéftsetrabajama, atšbiana y átšeftaca imojamnëngbiana opresido enjamna soyënga janguanguama. <sup>35</sup> Atše nÿets tempo sëndinÿanÿná entšá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesusbe palabrëngama sempre jtsejuabnayëse: ‘Canÿe entšá más oyejuayá jtsemnana ndayánaca ínÿabioye tbojtsatšetná ora, y ínÿabioye tbojtseyëngacá ora ndoñe nÿa nÿetšá ca’ ” —Pablo tonjanoyebuambá.

<sup>36</sup> Pablo chë soyënga tonjánayanentshana, tonjanoshamentšé y nÿetscanga chentše monjëtsemnëngaftaca Bëngbe Bëtsá tmonjanótšëmbona. <sup>37</sup> Nÿetscanga tmonjánenobošachna y Pablo tmontanotsejcuá y tmontanámochó. <sup>38</sup> Y entšanga corente ngménaca monjëtsemna, chënga ndocna te más cha mochántinÿe ca Pablo tojanéyana causa. Chentšana, chënga chë barquëshá enjetsamnëntscoñe cha tmonjantjëmbambá.

## 21

### *Pablo Jerusalenoye tojána*

<sup>1</sup> Chë Jesucristbeñe ošbuáchiyënga fsënjéftsanabashejuana ora, barquëshañe fsënjanenoyayé y ndericho Cos luaroye fsënjána; chë yëfsana Rodasoye y chentšana Pátara puebloye. <sup>2</sup> Pátara pueblentše canÿe barquëshá fsënjáninÿena, Fenicioye enjétsaye; asna, chëshañe fsënjanenoyayé y chentšana fsënjéftsanbocna. <sup>3</sup> Fsëntsanachnëjuana ora, fsënjáninÿe Chipre luare; Chipre bëngbe uañicuayoica tonjanoquedá y bëngna Sirioye fsënjétsaye. Tiro pueblentše chë barquëshentša uasmanëshangá jéftšáboshjonama yojámnayeca, chë puebloye bënga fsënjéftsanamashjna. <sup>4</sup> Chentšana, Jesucristbeñe ošbuáchiyënga fsënjánanÿena y canÿsëfta te chëngaftaca fsënjanoquedá. Chënga Pablo tmonjanianyana cha ndoñe ibonjamna Jerusalenoye jtsayana ca, er chë Uámana Espíritu tojanabuayená ndayá choca cháftaca jopásama. <sup>5</sup> Chë canÿsëfta te tonjanochnëngo ora, chentšana fsënjéftsanbocna y nÿetscanga parejo chëngbe shémangaftaca y básengaftaca šonjanatjëmbambá chë pueblo chabóntscoñe; y chentše, chë chënÿañe fsënjanošamentšé y Bëngbe Bëtsá fsënjanimpadá. <sup>6</sup> Chentšana, fsënjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

<sup>7</sup> Tirentšana fsënjéftsanbocna y Tolemaida puebloye fsënjánashjajna; y chentše tonjanopochocá bëngbiana bejaycá chë te ayana. Tolemaidentše Jesucristbeñe ošbuáchiyënga fsënjanacheuá y chëngaftaca canÿe te fsënjanoquedanga. <sup>8</sup> Yëfsana, bënga chentšana fsënjéftsanbocna y Cesarea luaroye fsënjánashjajna. Chocna, bënga fsënjána Felipe chë Jesucristbiana tšabe noticiënga abuayiynayabe yebnoye y cháftaca fsënjanoquedanga. Felipe enjamna canÿa chë Jesucristbe ichmónëngbioye ujabuachanënguentsá, Jerusalenoca ubuáyanënga. <sup>9</sup> Felipe enjánabamna canta ndébouamna bembangana y chënga monjamna Bëngbe Bëtsabe juabna oyeubunayënga. <sup>10</sup> Ya bayté chentše fsënjëtsemna orna, Judeocana tonjánashjango canÿa

Bëngbe Bëtsabe juabna oyebuambnayá, Agabo ca uabainá. <sup>11</sup> Agabo bëngbioye tonjánashjango ora, Páblëbe uasnanëja tonjanca y cucuatšënga y shecuaatšënga cachá tonjanenabatsëca y mëntšá tonjánayana: “Uámana Espíritu entsichamo, Jerusalemoca quem uasnanëja nduíñbioye chë judiënga mëntšá camochjama y ndoñe judiëngbe cucuatšëne camochjáboshjona ca.”

<sup>12</sup> Chca fsënjanuena ora, bënga y chentša entšanga Pablo fsënjanimpadá Jerusalemoye ndoñe chaondëtsama. <sup>13</sup> Chora Pablo tonjánayana: —¿Ndáyeca šmojtsošaché y šmojtsama atšbe ainaniñe puerte ngménana chaotsemnama ca? Atše séntseprontana y ndoñe nýe chašmobatsëcama; Jerusalemoca jobanámna séntseprontana, Bëngbe Utabná Jesusbiamca ca —cha tonjánayana.

<sup>14</sup> Jáyëñjanama ndoñe chibiatanobená ora, ndoñe más chibiatanimpadá; nýe mëntšá fsënjaniana: —Ntšamo Bëngbe Utabná yojtsebošcá chaotsemna ca.

<sup>15</sup> Chë soyënga tonjanochnëngüentšana, fsënjanoprontá y Jerusalemoye fsënjána. <sup>16</sup> Cesareoca, básefta Jesucristbeñe ošbuáchiyënga choye šonjanatjëmbambá y chocna, chënga šonjanënatse canýe Chipre luaroca entšabe yebnoye, Mnasón ca uabainá, ndábentše bënga joquédama. Mnasón tempscana inamna Jesucristbeñe ošbuachiyá.

#### *Pablo tojána Santiago jauatsëtsayama*

<sup>17</sup> Jerusalemoye fsënjánashjajna orna, chentša Jesucristbeñe ošbuáchiyënga oyejuayënga šonjanëbuaja. <sup>18</sup> Yëfsana, Pablo bëngaftaca tonjána Santiago jábuachama, y chentše, nýetsca chë ošbuachiyëngbeñe bëtsëjemëngcá mandayëngnaca monjëtsemna. <sup>19</sup> Pablo tonjanacheuá y chentšana tonjanacuntá lempe ntšamo Bëngbe Bëtsá Páblëbe trabájoca chë ndoñe judiëngbeñe tojanmama.

<sup>20</sup> Chca tmonjanuena ora, Bëngbe Bëtsá tmontanchuá y Pablo mëntšá tmonjaniana: “Morna, Jesucristbeyeca bëngbe catsata, contsonyá ntšamo ba uaranga judiënga Jesucristbeñe imojtsošbuáchemca, y chënga nýetscanga montsantješna nýetsca Jesucristbeñe ošbuáchiyënga chë Moisesbe leyentša nýetsca mandënga chamotsocumplínama. <sup>21</sup> Y entšanga chëngbioye noticia tmojatšatá, aca chë inýe luarënguenache imoyena judiënga cojtsabuatambá, Moisés tojanmandá soyënga ndoñe ntseyeunanama y basetëmënga base bobachtema chë más delicadentše ndoñe ntjatëtšama, ntšamo bënga judiënga fsënduamancá, y ntšamo bënga fsëndëtatšëmbcá ndoñe chamondëtsamana ca. <sup>22</sup> Y morna, ¿ntšamo chë soyëngama cochtsemana? Ndegombre, chënga mochanjátatšëmbona aca moye tcojabama. <sup>23</sup> Chcasna, ntšamo cbochanjabuayenacá cochjama: Bëngbentše canta boyabásënga montsemna y chënga entsamna Bëngbe Bëtsabiamca canýe šbuachenana soye jamama. <sup>24</sup> Acaftaca cochjunatse, chëngaftaca cochtsemna y chëngcá cochtsama Bëngbe Bëtsabe delante tšábënga jtsatsmënama ntšamo chamojtsama ora, y ntsachetšá jëtsjájua chaojtsamncá, aca cochjëtšájua, as chënga chamobená nýets stjënashë jtsenátšbotjiamca, jinýanýiyama, ntšamo Bëngbe Bëtsábioye tmojašbuachenacá ya tmojamama. Y chca, nýetsca judiënga mochanjinýe ndoñe ndegombre yontsemna chë ntšamo chëngbioye acbiamca tmojacuntacá; masna, chënga mochanjátatšëmbona aca ndegombre ntšamo Moisesbe leyíñe yomandancá icuamama. <sup>25</sup> Y chë ndoñe judiënga Jesucristbeñe imojtsošbuachëngbiamna, bënga ya fsënjubuábiamca y fsënjáuyana ndayá jtsocumplínama chënga yojtsamnama, mëntšá: ‘Ndoñe chamondëtsesá mëntšëna, chë entšanga tmojtsejuabná diosënga imomna soyënga jadórana tmojiyëbana; ni buiñe, ni tšëšana bayëngbe mëntšëna; y ndoñe chamondëtsama bacna soyënga shembásënga y boyabásëngaftaca ca’ ” —chënga tmojánayana.

#### *Bëngbe Bëtsabe bëts yebnentše judiënga Pablo tmojánishache*

<sup>26</sup> As Pablo, yëfsana chë cántanga tonjanënatse y chëngaftaca tonjanma soyënga Bëngbe Bëtsabe delante tšábënga jtsatsmënama. Chentšana, Pablo Bëngbe Bëtsabe bëts yebnoye tonjánamashëngo chë bachnanga júnayama, ndaytëntscoñe yojamna chë

cantangbiamama soyënga jtsamama, Bëngbe Bëtsabe delante tšábënga jtsatsmënama, y jayanama ndayté chëngbiamama yojtsemna ndaye ora cada ona ibojtsemna ndayánaca Bëngbe Bëtsabe bëts yebnoye juambana, Bëngbe Bëtsabiamama juatšëmbonama.

<sup>27</sup> Chënga tmojanenoyeuná y tmojánayana canýsëfta tentscuana chca jamana ca. Chë canýsëfta te ya jochnënguama yojtsemna orna, básefta judiënga Asioquënga Pablo tmojáninýe Bëngbe Bëtsabe bëts yebnoca y tmojanma entšanga chamuenbouéanamama. Y cha tmojánishache, <sup>28</sup> mëntšá jtsayebuáchëse: “¡Israeloca entšanga, šmabétsëjabuache ca! Quem boyabása entsemna chë nyëts luarënguenache iuana abuátambaye soyënga bëngbe entšangbe contra, y ntšamo bëngbe leyënguiñe endayanama contra, y quem Bëngbe Bëtsabe bëts yebnama ndoñe tšabá yontsoyebuambná. Y cabana quem Bëngbe Bëtsabe bëts yebnoye grieguënga tojúmashengo, y chca cha tonjama chë Bëngbe Bëtsabe bëts yebna Bëngbe Bëtsabe bominyiñe ndoñe tšabá chaondëtsemnama ca” —chënga imojtsichamo.

<sup>29</sup> Chca imojtsichamo, er entšanga Pablo tmojáninýe chë bëts pueblentše Tróximo Efesocáftaca; y imojétsejuabnaye chábioye Bëngbe Bëtsabe bëts yebnoye Pablo tbojanánatse ca.

<sup>30</sup> Nyëtsca chë pueblentša entšanga tmojánenbouenana, y ochamanana chë Pablo yojtsemnoye tmojánashajna. Pablo tmojánishache y Bëngbe Bëtsabe bëts yebnentšana shjoye tmojtsansjojó, y cachora chentša bëšašangá tmojtanatame. <sup>31</sup> Jtsóbama ya imojtsebuachéta ora, chë Romoca soldadëngbe mandayá tojántatšëmbona nyëtsca chë bëts pueblentša entšanga imojtsenbouenanamama. <sup>32</sup> Asna, chë mandayá chabe soldadënga y inýe chentša amëndayënga tojánachembo y cánýiñe chë entšanga imojtsemnoye tmojëftsanótjajo. Entšanga, chë mandayá y chë soldadëngbioye tmojánanýe ora, tmojtsanajbaná Pablo jantšëtayana.

<sup>33</sup> Chorna, chë soldadëngbe amëndayá tojanobeconá, Páblëbioye tbojánishache y tojanmandá uta cadenéjuaca cha chamotsebátsëcama y tojanatjá: “¿Nda mua yomna y ndayá tojama ca?” <sup>34</sup> Pero chë entšángbeñe, ínýënga canýe soye imojtsáyebuache y ínýëngna inýe soye; y chca, ntšamo ndegombre tojanopasama jtsetatšëmbuama chë mandayá ndoñe tonjanobená; chcasna, cha tojanmandá Pablo chë soldadëngbe oyenoye chamuánatsama. <sup>35</sup> Chë soldadëngbe oyenoca grádasbengoye tmojánashajna ora, chë soldadënga tojanotocá Pablo cutsnana juambama, chë entšanga tša rábiaca imojtsemna causa, <sup>36</sup> er chënga ústonoye imojétsaye y “¡Chaóbana ca!” imojtsaiuáyebuache.

#### *Ntšamo Pablo entšangbe delante tojanenëuyaná*

<sup>37</sup> Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojantjá: —¿Tašcatjalesencia ratotema ácaftaca jóyebuambayama ca?

Y chë mandayá tbojanjuá: —¡Aca icobena griego biyañe jóyebuambayama! <sup>38</sup> As, ¿aca ndoñe condmëna chë Egiptocá, chë ndoñe bayté quenátsmëna entšanga yojanëtsëtsná chë mándayëngbe contra chamotsemnama y chë canta uaranga podësca uamana entšanga puñálaca uajatëngaftaca, entšanga ndoyena luaroye tojanboconá ca?

<sup>39</sup> Chora Pablo tbojanjuá: —Atše judío sëndmëna, Tarso puebloca onýnaná, canýe uamana pueblentše Cilicia luaroca; Diosmanda šmolesenciá entšanga jáuyanama ca.

<sup>40</sup> As, chë soldadëngbe amëndayá chca tbojanlesenciá. Páblëna chë gradabenguiñe tojantsá y cucuatše tojanatsbaná entšanga iytëca chamobiamama. Nyëtscanga iytëca imojtsemna orna, Pablo hebreo biyañe mëntšá entšanga tojanéyana:

## 22

<sup>1</sup> “Baconga y taitanga, mora šmochjouena atše jenëuyanama ntšamo chjayancá ca.”

<sup>2</sup> Pablo cachëngbe biyañe, hebreo biyañe yojtsóyebuambnama entšanga tmojanuena ora, más iytëca tmojanobiamama. As Pablo tojanéyana: <sup>3</sup> “Atše judío sëndmëna. Tarso pueblentše, Cilicia luaroca sënjanonýná, pero muentše Jerusalenentše sënjanoboché y

sëndétatšëmbo soyëngna Gamaliélbeyeca chca botamana sënjanatsjinÿe. Cha corente tšabá šonjanbuatëmbá bëngbe bëts taitangbe leyënga; nyets atšbe ainánaca Bëngbe Bëtsá sëndëserveda, ntšamo nyetsca tšëngaftanga mora šmontsamancá. <sup>4</sup> Atše sënjánama chë Jesucristo tojaninÿanyë Benache ústonënga chamosufrima y chamóbanama; boyabásenga y shembásenga sënjanëtabaye y cárceloye sënjanautame. <sup>5</sup> Chë judío bachnangbe más uámana amëndayá, nyetsca chë judiëngbeñe bëtsëjemëngcá mán-dayënga y inÿe muentša mán-dayënga mondobena jayanana ntšamo sentsichamcá ndegombre yomnama. Chënga uabemana tsbuanachangá šmonjaninÿe, bëngbe catšátanga judiënga chamotsetatšëmbuama atše mando stsanbomnama, Jesucristbeñe ošbuáchiyënga jótabayama; y Damascoye sënjáná choca Jesucristbeñe ošbuáchiyënga jótabayama, moye Jerusalemoye junatsama jacastígayama.”

*Pablo tojanacuntá ntšamo Jesucristbeñe ošbuachiyá tojanóbema*  
(Hch 9.1-19; 26.12-18)

<sup>6</sup> “Pero canÿe te benachiñe Damasco béconana sënjétsaye orna, mo nyetsto ora, nÿe ndeolpe atšbe juachañe canÿe bëts tcuinÿe celocana tonjanbuashinÿinÿena. <sup>7</sup> Y fshantsoye sënjétseshajaye y canÿe oyebuambnayana sënjanuena mëntšá: ‘Saulo, Saulo, ¿ndáyeca šcojtsacmena ca?’ <sup>8</sup> Atše sënjantjá: ‘¿Nda comna, Bëngbe Utabná ca?’ Y chë oyebuambnayana šonjanjuá: ‘Atše sëndmëna Jesús Nazaretocá, y aca condama atšbe entšanga chamotsesufrínama ca.’ <sup>9</sup> Chë átšeftaca monjánajnënga chë bëts tcuinÿe tmojáninÿe y tmojanouatjananga, pero chë oyebuambnayana ndoñe tmonjanuena. <sup>10</sup> Chora atše sënjantjá: ‘¿Bëngbe Utabná, ndayá jamama šojtsemna ca?’ Y cha šonjaninÿe: ‘Matëtsbaná y mëtëtontšé Damascoye jama. Chentše canÿa cmochanjabuayená ndayá jamama cmojtsemnama ca.’ <sup>11</sup> Chë tcuinÿe yapa tonjanbuashinÿinÿena causa, atše jtaná sënjanoquedá. Chcasna, chë inÿyënga šmontanobuacuetëntšé y chca, Damascoye sënjánashjango.

<sup>12</sup> “Chentše enjamna canÿe bacó Ananías ca uabainá; cha inoyena ntšamo Bëngbe Bëtsá yobošcá y yójanama ntšamo bëngbe leyënguiñe iuayancá, y nyetsca chentša judiënga monjanamana chabiamana tšabá jtsóyebuambnayana. <sup>13</sup> Cha tonjánabo atše jinÿama y tonjánashjango ora, šonjaninÿe: ‘Jesucristbeyeca atšbe catšata, Saulo, chacmotsatabinÿna ca.’ Cachora y cha sënjáninÿe.

<sup>14</sup> “Chentšana cha tonjánayana: ‘Bëngbe bëts taitangbe Bëtsá aca tcmojuábuayana, ntšamo cha acbiamana yobošcá chacotsetatšëmbuama, chë nyetsca soyënguiñe Tšabá Amá chacuinÿama y cachabe uayášentšana chacóyeunama. <sup>15</sup> Bëngbe Bëtsá chca tojama, aca chë chabe buayenana soyëngama entšángbeñe chacóyeuambama, y chamna nyets luarentša entšángbeñe cochjacuénta, ntšamo tcojinÿe y tcojouencá. <sup>16</sup> Y mora, ¿ndoñe más matobátmanana! Motsbaná y cochjenábaye Jesucristo jótšëmbonëse, chca, acbe bacna soyëngama perdonaná chacotsemnama ca’ ” —cha šonjaninÿe.

*Pablo tojanacuntá ntšamo chë ndoñe judiëngbioye tmojánichmoma*

<sup>17</sup> “Jerusalemoye sëntaná ora, Bëngbe Bëtsabe bëts yebnoye sënjáná cháftaca jencuéntama, y ndeolpe atše mo otjenayoquécá sënjanoquedá. <sup>18</sup> Chca orna, Bëngbe Utabná sënjáninÿe y cha mëntšá šonjaninÿe: ‘Betsco motsa y cam ora Jerusalemëntšana mëtsebocna; quemuentša entšanga ndoñe quecmochatóyeunaye ntšamo atšbiamana condétatšëmbo y contsëtsëtnacá ca.’ <sup>19</sup> Atše sënjanjuá: ‘Bëngbe Utabná, chënga mondétatšëmbo atše sënjánana nyetsca chëngbe enefjuana yebnënguenache y chë ácebeñe ošbuáchiyënga sënjanëtamiana y sënjánatsetšenaye; <sup>20</sup> y acbiamana ndegombre oyebuambnayá Esteban tmonjánoba ora, átšnaca chentše sënjamna y tšabá imojtsama ca chama sënjëtsejuabnaye, y cabá chë monjánobanangbe entšayëjuangá atše chora sënjanabojanÿá ca’ —atše sënjanjuá. <sup>21</sup> Pero chca sënjánayana ora, Bëngbe Utabná šonjaninÿe: ‘Motsa; atše bën luarëngoye, ndoñe judiëngbioye cbochanjíchmuca ca.’ ”

*Pablo y chë soldadëngbe amëndayá*

<sup>22</sup> Chë entsänga chéntscoñe tmojanuena; pero chë ndoñe judiëngbiama tojanoyebuambá orna, chënga tmojanontsé uayebuáchana: “¡Ndoñe tšabá quenátsmëna cha vídaca chaotsemnama! ¡Motsóba ca!” <sup>23</sup> Y chënga más imojtsáyebuache; puerte rábiaca chëngbe uichëtjonëjuangá tsbanánoye imojtsébéntaye y tsbanánoye polvëshe imojtsëtšana; <sup>24</sup> chë causa, chë mandayá tojánayana chë soldadëngbe oyenoye Pablo chamotsémashëngo ca, y tojanmandá chamotsetjanja chaobuambama ndáyeca entsänga chca chabe contra imojtsáyebuache. <sup>25</sup> Pero jtsetjanjama ya tmojanbatsëca orna, chentše imojtsemna soldadëngbe amëndayábioye Pablo tbojantjá: —¿Tšëngaftanga šmobena canÿe entsá derecho bomná mo canÿa Romoca onÿnanacá jatjanjana, ndegombre tšabá o ndoñe tšabá tonjamama cabá ndayana ora ca?

<sup>26</sup> Chë básefta soldadëngbe mandayá chë soye tojanuena ora, tojána y nyetsca soldadëngbe amëndayábioye chama ibojuenaye, mëntšá: —¿Ndayá cochjama? Chë entsá derecho bomna mo canÿa Romoca onÿnanacá canmëna ca.

<sup>27</sup> As chë amëndayá tojána Pablo yojtsemnoye y tbojaniana: —Šmëyana, ¿aca derecho bomná mo canÿa Romoca onÿnanacá comna ca?

Y cha tbojanjuá: —Arseñor ca.

<sup>28</sup> Chora chë amëndayá tojánayana: —Atše becá crocénana sënjëtšajó mo canÿa Romoca onÿnanacá derecho jtsebomnama ca.

As Pablo tbojanjuá: —Y atšna derecho bomná mo canÿa Romoca onÿnanacá sëndmëna atše tijanonÿná orscana, er atšbe taitá chca derecho bomná inamna ca.

<sup>29</sup> Chcasna, chë jatjanjama imojtseprontanënga, Páblëbentšana tmojanojuaná; y chë mandayánaca tojanojuaná y yojsauatja, Pablo derecho bomná mo canÿa Romoca onÿnanacá yojamnama tojántatšëmbona ora, er cha tojanmandá Pablo chamotsebátsëcama.

#### *Pablo, Jerusalenentša uámana mándayëngbe delante*

<sup>30</sup> Chë soldadëngbe amëndayá yojtseboše ndegombre jtsetatšëmbuama ndaye soyama judiënga Páblëbe contra imojtsichámuama; asna, yëfsana tojanmandá cadenëjuangá jtsajafjonana y chë bachnangbe amëndayënga y nyetsca chë judiëngbe amëndayënga chamobéconama. Chentšana, Pablo tbojanábocna y chëngbe delante tbojanatsá.

## 23

<sup>1</sup> Chora Pablo, nyetsca chë mandayëngbioye tojanëñyanÿé y tojanéyana: —Taitanga, atše mënténtscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

<sup>2</sup> As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamotsáyejantšetama. <sup>3</sup> Pero chora Pablo Ananíasbioye tbojanjuá: —¡Bëngbe Bëtsá ácnaca cmochanjëtšjantšetá, bacna entsá, ntšamo ndegombre tcojuabnacá ndinÿinÿayá! Aca chentše contsetbemana tšabá o ndoñe tšabá tijamama jayanama, ntšamo Moisesbe leyiñe yomandancá; as, ¿ndáyeca cojtsemánda chašmojantšetama? Chca chë leyiñe ndoñe quenátslesenciana ca.

<sup>4</sup> As, chabe béconana imojtsemna entsänga tojánayana: —¿Chca chë Bëngbe Bëtsabe bachnangbe más uámana amëndayábioye cochjóyenguango ca?

<sup>5</sup> Chora Pablo tojánayana: —Taitanga, atše ndoñe quetsátstatšëmbo cha chë bachnangbe más uámana amëndayá yomnama. Er Bëngbe Bëtsabe uabemana palabrenguiñe mëntšá endayana: “Entšangbe mandayabe contra ndoñe catjayana ca.”

<sup>6</sup> Pablo tojáninÿe chë mándayënguentše báseftanga saduceunga y ínÿengna fariseunga imojtsemnama; as, mëntšá tojanáyebuachena: —Taitanga, atše fariseo sëndmëna; atšbe bëtsëtšanga fariseunga mondmëna. Atše, jtsošbuáchiyëse chë obanënga mochtayenama tsobátmana causa, atše ndoñe tšabá séntsama ca tšëngaftanga šmochjayana ca.



<sup>7</sup> Pablo chca tojánayana ora, chë fariseunga y saduceunga tmojanontsé enatsët-nayana, y chë causa nyetsca entsänga ndoñe cachcá imontsejuabnaye. <sup>8</sup> Er chë saduceunga jtsichámuana chë obanënga ndoñe ntayenana ca, y ni angelënga, ni espíritënga ndoñe mondmëna ca; pero chë fariseunga aíñe chë soyënguñe jtsošbuáchiyana. <sup>9</sup> Y nyetscanga tša imojtsáyebuache; asna, básefta fariseunga ley abuátambayënga tmojantsbaná y jabuachana mëntšá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canye ángel o espíritu muábioye ndegombre tbojauyana ca.”

<sup>10</sup> Entsänga más imojtsáyebuache y chë soldadëngbe amëndayá yojtsauatja nderado entsänga Pablo muantsatcacaye; as, cha tojanmandá soldadënga chamua Pablo chë entsängbentšana jaisábocnama y chë soldadëngbe oyenoye cachiñe jesánatsama.

<sup>11</sup> Yëfsana ibeta, Bëngbe Utabná Páblëbioye tbojánëbëbocna y tbojaniyana: “Pablo, ainaniñe añemo cochtsebomna. Ntšamo aca atšbiamna condétatšëmbo y muentše Jerusalemntše condoyebuambnacá, cachcá cmontsemna Romoca jamama ca.”

#### *Judiënga tmojanenoyeuná Pablo jtsóbama*

<sup>12</sup> Chë inye yëfsana, judiënguentšana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofšiyana, cha jóbantscuana. <sup>13</sup> Chca jamama tmojanjuabó entsänga imojamna canta bnëtsanëngama más. <sup>14</sup> Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mëntšá tmojánayana: “Bënga Bëngbe Bëtsá mëntšá fsënjašbuachená y bacna soyënga bëngbeñe chaotsemna chca ndoñe fsënjocumplise: Tondaye ntjasana, ni ntjofšiyana, Pablo jóbantscuana. <sup>15</sup> Morna, tšëngaftanga y chë inye muentša mandayëngaftaca chë soldadëngbe amëndayá šmochjaimpáda Pablo moye chabuánatsama; y šmochjauyana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

<sup>16</sup> Pero, Páblëbe uabenbe uaquiñá chë soye tojántatšëmbona; asna, tojána chë soldadëngbe oyenoye, chama Pablo jauenayama. <sup>17</sup> Chorna, Pablo canye básefta soldadëngbe mandayábioye tbojanchembo y tbojaniyana: “Diosmanda quem basa mánatse chë nyetsca soldadëngbe amëndayábioye; canye soye entsebomna chábioye juenayama ca.”

<sup>18</sup> As, cha chë bobontse tbojëftsanbetše, chë nyetsca soldadëngbe amëndayábioye tbojanánatse y tbojaniyana: “Chë utamená Pablo šonjachembo y šonjaimpadá quem bobontse ábioye juanatsana; mua caojtsebomna canye soye aca jauyanama ca.”

<sup>19</sup> Chë soldadëngbe amëndayá chë bobóntsbioye tbojëftsanobuácuëtëntsiye, luaroye tbojanánatse y tbojantjá: —¿Ndayá cojtsebomna atše jauyanama ca?

<sup>20</sup> As chë bobontse tbojaniyana: —Judiënga tmojenoyeuná taitá jaimpádama, yëfse chëngbe amëndayëngbioye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca. <sup>21</sup> Pero ndoñe catjóyaunaye; chënguentšana canta bnëtsanëngama más entsänga iytëmenënga Pablëbiamna montsanýá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofšiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca —chë bobontse tbojaniyana.

<sup>22</sup> Chentšana, chë soldadëngbe amëndayá chë bobóntsbioye tbojanmandá, ndayá ibojuenayama ndocnábeñe ntsecuëntayana, y chentšana tbojtanicmó.

#### *Pablo tmojanánatse Félix, chë Cesareoca mandádbioye*

<sup>23</sup> Chentšana, chë soldadëngbe amëndayá tojánachembo útata chë inye soldadëngbioye mándayënguentšana, y tojanamëndá chamoprontama uta patse soldadënga, inye canysëfta bnëtsanënga couayënguñe y inye uta patse lanzëšangaca, Cesarea puebloye ibeta, las nueve ora jabocanama; <sup>24</sup> y tojanamëndá couayënga chamoprontá Pablo

chauenójayema. Y tojanmandá tšabá y ndocá ntjapasacá Pablo chamuánatsama, Félix chë Cesareoca mandádbioye. <sup>25</sup> Y canýe tsbuanácha chéngaftaca tojanichmó y chéchañe mëntšá yojsábemana:

<sup>26</sup> Claudio Lisias, chë bëts uámana mandado Felixbiana: Salud bomná chacotsomñe.

<sup>27</sup> Judiënga quem boyabása tmojishache y montseboše jtsóbama; pero cha mo canýa Romoca onýnanacá derecho bomná yomnama sënjátatšëmbona ora, atšbe soldadëngaftaca sënjá y chëngbe cucuatšentšana cha sënjatsbocá. <sup>28</sup> Atše séntseboše jtsetatšëmbuana ndaye soyama chënga chabe contra imojtsichámuama; as, cha sënjuánatse nyetsca chë judiëngbe amëndayënga montsemnoye; <sup>29</sup> y chentšana, atše sënjátatšëmbona chënga chabe contra imojtsichamo ana cachëngbe leyentša soyëngama, pero cha tondaye tonjobuachjanguá, cha jóbama bënga chašotsamnana, ni mo cárceloye jutámia. <sup>30</sup> Pero atše sënjátatšëmbona chë judiënga tmojenoyeuná cha jtsóbama; chíyeca, cam ora cha ácbioye séntsichamná, y chabe contra ichámëngna sënjáuyana, ndayá muabe contra jayanama imojtsebomncá acbe delante chamuayana ca.

<sup>31</sup> Chentšana, chë soldadënga tmojanma ntšamo tmojanamëndacá, ibeta Pablo tmojétsanbetše y Antípatris puebløye tmojanánatse. <sup>32</sup> Yëfsana, chë shecuátšeca tmojána soldadëngna cach soldadëngbe oyenoye tmojésanshëcuana, y chë couayiñe enjaquenënga Pábløftaca tmojána. <sup>33</sup> Cesareoye chënga tmojánashjajna ora, chë tsbuanácha chë mandádbioye tmojanantšabuaché, y Páblëncaca chabe cucuatšinë tmojánboshjona. <sup>34</sup> As chë mandado chë tsbuanácha tojanalía; chentšana, cha tojanënoticiá ndaye luarocá Pablo inamnana, y Cilicia luarocá cha inamnana cha tojántatšëmbona ora, <sup>35</sup> tbojaniyana: “Acbe contra ichámënga chamobeconá ora, ácbioye oído cbochjabuájua ca.”

Chentšana, cha tojanmandá Rey Heródesbe bëts yebnoca Pablo chamotsebojanýama.

## 24

### *Ntšamo Pablo chë mandado Félixbe delante tojanenëuyaná*

<sup>1</sup> Shachna tianoye, Ananías, chë bachnangbe más uámana amëndayá, Cesareoye tojána báseftangaftaca chë judiëngbeñe bëtsëjemëngcá mándayënguentšana y canýa entšanga obuauyayáftaca, Tértulo ca uabainá; y chë mandádbioye chënga tmojána Páblëbe contra jayanama.

<sup>2</sup> Pablo tmojanábocna ora, Tértulo tojanontsé chabe contra jayanama y Félixbioye tbojaniyana: “Aslëpaye, taita mandado, ácbeyeca bënga natjémbana fsëndoyena y aca puerte obiashjachá cómnayeca ba tšabe soyënga quem luarentša entšangbiana yojsëbinýna. <sup>3</sup> Nyets tempo y nyetsquénache chë soyënga fsëndóyëngacañe, bëts uámana mandado, y bënga chama corente cbondetsechuaná. <sup>4</sup> Pero ndoñe yapa bën jatenbiamnayamna, Diosmanda ratotema šmotsoyauná. <sup>5</sup> Bënga fséntsetatšëmbo quem boyabása entšanguentše entsemna mo bacna shacuancá, nyets luarënguenache yojsana y yojsama chë judiënga nyetscanga cachca soye ndoñe chamondétsejuabnama, y cha yojsëmna chë Nazaretocabe ustonëngbe uanatsaná. <sup>6</sup> Y tonjábošena jamama Bëngbe Bëtsabe bëts yebna, Bëngbe Bëtsabe bominjíñe ndoñe tšabá chaondëtsemnama; chíyeca bënga cha fsënjotbá. Bënga fsënjábošena chabiana jayanana tšabá o ndoñe tšabá tonjamama, ntšamo bëngbe leyënguñe endayancá; <sup>7</sup> pero chë soldadëngbe amëndayá Lisias tonjontremeté y jabuachana bëngbe cucuatšentšana tbojtsánatseñe, <sup>8</sup> y tonjayana chë chabe contra ichámëngna caojtsamna ácbioye chama jabana ca. Cach taitá chacojatjá ora, ndegombre soyënga cochántsetatšëmbo ndáyeca bënga muabe contra fstsichámuama ca” —cha tojánayana.

<sup>9</sup> Y chë judiënga chentše imojëtsemnëngna imojtsanichamo añe chca tojanopasá y lempe ndegombre yojsëmna ca.

<sup>10</sup> Chentšana, chë mandado Páblëbioye tbojánefjatšëmbo chaóyebuambama; as Pablo tojánayana: “Atše sëndétatšëmbo aca ba uatama comna muentša entsangbiana tšabá o ndoñe tšabá tmonjamama ichamuá; chcasna, tondayama ntsauatjca y puerte oyejuayá acbe delante šcuenëuyaná. <sup>11</sup> Ntšamo cach aca jtsetatšëmbuama contsobencá, cabá bnétsana uta te entsemna atše Jerusalemoye sënjá, Bëngbe Bëtsá jadórama. <sup>12</sup> Y quemënga ndoñe chešmátinýena nderado ndáftaca jabuachana enatsëtsnayıñe, ni entšanga chamuenbouénanama amiñe, Bëngbe Bëtsabe bëts yebnoca, ni chëngbe enefjuana yebnënguenache, ni inýe luarënguenache chë bëts pueblentše. <sup>13</sup> Quem entšanga tondaye quemátsbomna ntšamo jayanama, atšbe contra montsichamo soyënga ndegombre yojtsemna ca. <sup>14</sup> Pero ndegombre endmëna y chanjayana, atše bëngbe taitangbe Bëtsá sëndëservena, jtsiyenëse ntšamo Bëngbe Bëtsá šonjaninýanýe benache yomncá; y quem entšanga montsichamo, básefta soyënga ntšamo bënga quem Tsëm Benache ústonënga fstsošbuachecá, ndoñe ndegombre yondmëna ca. Pero atšna nýetsca chë Moisesbe leyinë y Bëngbe Bëtsabe juabna oyebuambnayëngbe uabemana libřëšanguentša soyënguiñe sëndošbuaché; <sup>15</sup> y atše cach chëngcá, puerte jtsošbuáchiyëse Bëngbe Bëtsábeñe sëndobátmana cha yochjama chë mochjóbanënga chámuatayenama, nýetsca entšanga, lempe tšabá amënga y chë ndoñe tšabá amëngnaca. <sup>16</sup> Chíyeca, atše nýets tempo puerte tšabá sëndama, tondayama ntjatenócochinýenama y atšbe ainana natjëmbana chaotsomñama, Bëngbe Bëtsabe delante y entsangbe delántnaca.

<sup>17</sup> “Básefta uatama inýe luarënguenache atše sëndánana; ndoñe bayté quenátsmëna cach atšbe luaroye sëntashjango, chentša ndbomnjëmënga jujabuáchama ndayánaca jatšatayama y bayënga jobáyama, Bëngbe Bëtsá jëtschuayama. <sup>18</sup> Atše sënjama soyënga Bëngbe Bëtsabe delante tšabá jtsatsmënama; chentšana, básefta Asioca judiënga Bëngbe Bëtsabe bëts yebnentše šmonjínýena, pero ndoñe chešmátinýena ni ba entšangaftaca, ni enbouenaniñe. <sup>19</sup> Chë šmonjinýenënga entsamna ácbioye jabana y acbe delante atšbe contra chamuayana, nderado ndayá tmojtsebomñe. <sup>20</sup> O ndóñesna, cach quemënga, muentše montsemnënga chamuayana, chë judiëngbe amëndayëngbioye atše šmonjuánatse ora, atše ndayá tjobuáchjanguama chešmënjínýena, atše castiganá jtsemnama šojtsemna ca chënga chamuayanama; <sup>21</sup> o nderado nántsemna chë atše chëngbentše sëntsemna ora, mëntšá tijuáyebuachenama: ‘Atše chë obanënga mochtayenama puerte jtsošbuáchiyëse sëndobátmana causa, tšëngaftanga atšbe contra šmochjayana ca.’ ”

<sup>22</sup> Félix bëtscá inatátšëmbo Bëngbe Utabná tojaninýinýe Benache ústonënga imo-janošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayana, y chë entšanga tojanéyana: “Chë soldadëngbe amëndayá Lisias chaojáhshjango ora, chanjayana ntšamo quem tšëngaftangbe sóyeca jamama ca.”

<sup>23</sup> Y chentša soldadëngbe amëndayábioye tbojanmandá Pablo jtsebojanýama, pero nýe utamená ndoñe chaondëtsemna ca; y tojanmandá, Páblëbe amiguënga jalesénciayana ntšamo tmojtsebošcá cha chamuauájabuachama.

<sup>24</sup> Chentšana baseftaytese, chë mandado Félix Cesareoye tojtanashjango, chabe shema Drusílaftaca, canýe judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canýa nanjobenaye Jesucristbeñe ošbuachiyá jtsemnama. <sup>25</sup> Pero, nýetsca soyënguiñe tšabá jtsamama, cachá jenomándama jtsobenama y ntšamo tmojamama nýetsca entsangbiana Bëngbe Bëtsá yochjayanama Pablo tojanoyebuambá ora, Félix tojanëuatjaná y Páblëbioye tbojanianana: “Mora, mata; luare quétstsebomna ora, cbochjachembo ca.”

<sup>26</sup> Jëtsboshjonama Pablo crocénana chabuatabuenámnaca Félix inobátmana; y chca, ba soye ibojanófjajana cháftaca jencuëntama. <sup>27</sup> Y chca uta uata tojanochnëngo; chentšana, Félix ya ndoñe más chë mandado yontsemna y chabe cuentna Porcio Festo

mandadca tmojánrbema. Félix yojtseboše chë judiëngbe delante tšabá joquédama, chíyeca utamená Pablo tbojéftsanboshjona.

## 25

### *Pablo Festbe delante*

<sup>1</sup> Festo chë luaroye tojánashjango y unga tianoye, Cesarea pueblentšana Jerusalenoye cha tojána. <sup>2</sup> Chocna, chë bachnangbe améndayënga y chë más uámana judiënga Féstbioye tmojána Páblëbe contra jayanama. <sup>3</sup> Y tmojanimpadá, mo chëngbiama canye bëts pavor cuenta, cha chaomandá Pablo Jerusalenoye chamuánatsama. Chëngna imojétsejuabnaye Pablo benachiñe chamotsóbama. <sup>4</sup> Pero Festo tojanéyana, Páblëna Cesareoca utamená yojtsemna y baseftaytese cha choye jtama ca. <sup>5</sup> Y tojanéyana: “Chamna, tšëngaftangbe améndayënga átšëftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjayana ca.”

<sup>6</sup> Festo Jerusalenentše posufta o bnétsana te más chëngaftaca tbojéftsanjétana y chentšana Cesareoye tojtana. Yëfsana, cha tojanórbema chabe puestentše tribunaloca y tojanmandá Pablo choye chamuánatsama. <sup>7</sup> Pablo choye tojánashjango ora, Jerusalenocana tmojánashjajna judiënga tmojanobobconá y ba uabouana soyënga chabe contra imojtsichamo, pero ni canye chë soyëngama tmonjanobená jinyanýiyana chca ndegombre bëtsemnama.

<sup>8</sup> Y Pablo, cachá jenéuyanama mëntšá yojtsichamo: —Atše tondaye chiyatobuachjanguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

<sup>9</sup> Festo yojtseboše chë judiëngaftaca tšabá joquédama; as Páblëbioye tbojantjá: —¿Tacatjábosena Jerusalenoye jama, choca atše quem acbe soyama jayanama ca?

<sup>10</sup> As Pablo tojánayana: —Atše sëntsemna chë Romoca bëts mandado tojichamó améndayëngbe delante y chënga entsamna jayanama atše tšabá o ndoñe tšabá sënjamama. Ntšamo ndegombre contsetatsëmbcá, judiëngbe contra atše ndocna bacna soye chiyatsma. <sup>11</sup> Nderado atše ndaye bëts soye tjobuachjanguá y chama atše jóbanama šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucuatšinë atše jaboshjonana. Chíyeca, Diosmanda chë Romoca bëts mandado cháuyana tšabá o ndoñe tšabá sënjama ca —Pablo tojánayana.

<sup>12</sup> As Festo, chë soyama chabe buayiynayënga tojanatjá y chentšana tojánayana: —Chë Romoca bëts mandado quem soyama cháuyanama tcojábosënësna, chábioye cochjá ca.

### *Festo, Rey Agrípaftaca tbojanencuentá ntšamo Pábloftaca jamama*

<sup>13</sup> Chentšana baseftayté tojanochnëngo ora, Rey Agripa y Berenice Cesareoye tbojána, Festo jauatsëtsayama. <sup>14</sup> Bayté chata chentše tojanajétana; y chca, Festo chë réybioye tbojancuentá Páblëbe soyama. Cha mëntšá tbojanianana: —Muentše endmëna canye entšá, Pablo ca uabainá; Félix utamená tbonjéftseboshjona, atše mandadca sënjontsé ora. <sup>15</sup> Jerusalenoca sëndánmëna ora, chë bachnangbe améndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y šmonjaimpadá cha jóbanama ibojtsemna ca atše jayanama. <sup>16</sup> Y atše sënjáuyana: “Chë romanënga ndoñe quematamana ndocnabiama jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenéuyanama cha chaobename ca.” <sup>17</sup> Chíyeca, chënga moye tmonjabo ora, ndoñe yapa bën ntjatenobiamnaycá cach yëfsana atšbe puestentše tribunaloca sëntórbema y sënjamandá chë boyabása jobetšana. <sup>18</sup> Pero chabe contra ichámënga, ntšamo atše sëndanjuabnacá chënga mochjayanamna ni mo canye bëts soye chabe contra chemátayana, chënga jóyebuambayama tonjóyentšbuache ora. <sup>19</sup> Chënga chabe contra montsichamo, nye cachëngbe Dios

ntšamo jadórana yomnana y canya Jesús ca uabainábiana; cha tojanóbana, pero Pablo entsichamo cha ainá yotsomñe ca.

<sup>20</sup> “Chora atše ndoñe quetstétsetatšëmbo ntšamo chë soyiñe jamana; asna, Pablo sënjamantjá Jerusaleño y jama tayojétseboše ca, choca atše jayanama tšabá o ndoñe tšabá cha tonjanmama. <sup>21</sup> Pero cha šonjaimpadá camuentše jaboshjonana, cach Romoca bëtš uámana mandado chë soyama tojayanëntscuana ca. Chcasna, atše sënjamandá cha chamotsebojanýama, chë mandádbioye jíchmuama atše jobenayëntscuana ca” —Festo tbojancuentá.

<sup>22</sup> Chca tbojanencuentá ora, Agripa Féstbioye tbojaniana: —Atšnaca séntseboše chë boyabása joyeunayama ca.

Y Festo tbojanjá: —Cach yéfse oído chábioye cochanjabuájua ca.

<sup>23</sup> Chë yéfsana, Agripa y Berenice corente uachuanentše chë tribunaloye tbojánamashjna y chátaftaca tmojánamashjna chë soldadëngbe amëndayënga y chë pueblentša uámana taitanga. Chentšana Festo tojanmandá Pablo jobetšana; <sup>24</sup> y chora cha tojánayana: “Rey Agripa y nyetsca taitanga béngaftaca šmojtsemnënga: Chentše entsemna chë boyabása. Nyetsca judiënga chabe contra átšbentše montsabíchamo, Jerusaleño y quem Cesarea pueblëntšnaca, y nya jtsayebuáchëse tša šmontseimpadana cha chaóbanama; <sup>25</sup> pero atše séntsejuabná quem boyabása tondaye tonjama, jóbanama chabotsemnana ca. Y más, cachá šonjaimpadá chë Romoca bëtš uámana mandado César chabe soyama cháuyanama; chcasna, chca chanjama, chábioye cha chanjíchmu. <sup>26</sup> Pero atše, atšbe bëtš uámana mandádbioye quem boyabásabiama juábobemama ndocna serto soye quetsátsbomna causa, tšëngaftangbe delante cha tijatsá, y masna, acbe delante, bëtš rey Agripa; chca, lempe chacojatjá chentšana, ndayá juabemama atše chaitsebomnana. <sup>27</sup> Er atše séntsejuabná ndoñe corente juabnayabe soye yomna, canye utamená jíchmuana y ndayama chabe contra tmojtsichámuama ndoñe lempe ntjuabemana ca” —cha tojánayana.

## 26

### *Pablo tojanontsé rey Agripbe delante jóyebuambayama*

<sup>1</sup> Chentšana, Agripa Páblëbioye tbojaniana: —Jóyebuambayama contselesenciana, cach aca chacuenéuyanama ca.

As Pablo, chë réybioye jachuyama cucuatše tojanatsbaná y jenéuyanama tojanontsé mëntšá jayanama: <sup>2</sup> —Atše ndegombre séntsoyejúá mora chjobenaye acbe delante jóyebuambayama, uámana rey Agripa, chca, atše jenéuyanama nyetsca soyëngama ntšamo judiënga atšbe contra montsichámuama; <sup>3</sup> y más séntsoyejúá, taitá conduábuatmama lempe ntšamo judiënga monduamancá y condétatšëmbo chë judiënga ndayama imuenoboyebuambnana. Chcasna, Diosmanda uantádoca šmotsoyeuná.

### *Pablo tojanacuntá ntšamo cha tempo inamnana*

<sup>4</sup> “Nyetsca judiënga mondétatšëmbo ntšamo atše tempšana chëngbeñe tsiyenama, bobontse sënjamna orscana, atše sënjanonýná luarentše y Jerusaleñentše. <sup>5</sup> Chëngnaca mondétatšëmbo y montsobena jayanana, chënga tmojtsebošëse, chca ndegombre yomnana; atše nyets tempo fariseucá vida séndbomna, y chë fariseunga mondoyena más soyënga jtsamëse chë judiëngbe leyëngaca chë inyë judiëngbiana. <sup>6</sup> Y mora, ntšamo Bëngbe Bëtšá bëngbe bëtš taitanga tojanašebuachenacá, chë obanënga jtayenama cha yochjamama puerte jtsošbuáchiyëse atše obatmana causa, šmojuánatse atšbe contra jayanama. <sup>7</sup> Bëngbe bnëtsana uta Israeloca bëtš pamíllanga mondobátmana chë šbuachenana soye chëngbiana chaóshjanguama y chíyeca, cada te bnëté y ibeta chënga Bëngbe Bëtšá mondadorana y mondëserveda. Y atše cach soyama obatmana causa, bëtš rey Agripa, judiënga mora atšbe contra montsabíchamo. <sup>8</sup> ¿Ndáyeca tšëngaftanga

judiënga šmojtsichamo, chë obanënga chámuatayenama Bëngbe Bëtsá yochjamama jtsošbuáchiyama ndoñe šmontsobena ca?

*Pablo tojanacuntá, ntšamo tempo cha Jesucristbeñe ošbuáchiyënga yojanaborlánama*

<sup>9</sup> “Y cach átšnaca sënjanjuabná atše šojamna lempe ntšamo stjobenacá jamana, Jesús chë Nazaretocábeñe ošbuáchiyënga corente chamosufrima, <sup>10</sup> y chca Jerusalenentše atše sënjanma. Chë bachnangbe amëndayënga mando šmonjanatšetá, y chca, banga Jesucristbeñe ošbuáchiyënga cárceloye sënjanëtame; y jtsëbáyama ca chëngbiana montsanichamo ora, átšnaca añie chca chamoma ca sënjánichamo. <sup>11</sup> Y ba soye, chë judiëngbe enefjuana yebnënguenache jabuache chënga sënjanatsetšená, chënga Jesucristo ústonana chamotsajbanama, y chëngaftaca tša etonaná sënjëtsemna causa, chë inye luarëngoca bëts pueblënguenáchnaca chënga sënjanécamena.”

*Pablo tojanacuntá ntšamo cha Jesucristbeñe ošbuachiyá tojanóbema*

*(Hch 9.1-19; 22.6-16)*

<sup>12</sup> “Y cachcá jamama canye te Damascoye sënjétsaye; chë bachnangbe amëndayënga uabemanëchangá šmonjanëntšabuaché chca jamama y, cachënga choye šmonjanichmó. <sup>13</sup> Pero, uámana rey, chë benachëjana mo nyetsto ora, sënjáninye canye bëts tcuinye celocana, shinýama corente más enjëtsebinýnaye, y atše y chë átšeftaca ajnëngbe shé-conana corente enjëtsebuashinýnyana. <sup>14</sup> Nyetscanga fsënjánshajaye y atše sënjanuena canye oyebuambnayana, hebreo biyañe, mëntšá šonjétsatsaye: ‘Saulo, Saulo, ¿ndáyeca chca šcojtsacmena ca? Cach aca bacá contsenabomá, atšbe entšanga chamosufrima tcojtsama ora, mo uacná ngmëche niñëfjiñe cha tojtsoscunjá orcá, cachá jenótsetšenana ca.’ <sup>15</sup> As atše sënjánayana: ‘¿Nda comna, Bëngbe Utabná ca?’ Y chë Utabná šonjanjuá: ‘Atše sëndmëna Jesús, y aca condama atšbe entšanga chamosufrima ca. <sup>16</sup> Pero matëtsbaná y matëtsá. Atše cbonjébëbocna jinýnyiyama aca tcojuábuayanama atše šcochjaserviama, y chacotsetatšëmbuama y entšanga chacuacuntama, mora tconjinýe soyama y más chcoye atšbiana cbochanjinýnyiyeye soyëngámnaca. <sup>17</sup> Atše chanjama judiënga y ndoñe judiënga tondaye chacmondëborlama; y morna, ndoñe judiëngbioye cbontsichamná, <sup>18</sup> chënga atšbe soyëngama josértama aca chacomama. Chca, chënga bacna juabnënga ndoñe chamondëtsebmoma, mo ibetiñe cuaftsemnëngcá, sinó mo binýniñcá chamotsemna átšeftaca, atše chë entšangbe juabnënga binýnyayá. Satanasbe cucuatšinë ndoñe chamondëtsemnama, sinó Bëngbe Bëtsabe obenánaca chamotsiyenama; chënga átšbeñe chamotsošbuáchema, y chca, chëngbe bacna soyëngama perdonánënga chamotsemnama y chënga chamotsebmoma canye luare entšangaftaca, chë ndémuanýngbioye Bëngbe Bëtsá tšabe entšanga y chabe entšanga tojábiana, chënga átšbeñe betsošbuáchiyama ca’ ” —cha šonjanayana.

*Pablo tojanma ntšamo chë mo otjenayoquëcá tojaninýcá*

<sup>19</sup> “Chcasna, bëts rey Agripa, atše sënjanma chë mo otjenayoquëcá sënjáninye ora ntšamo Cristo šonjaniancá; <sup>20</sup> y natsana, Damascoca entšanga chë tšabe noticiëngama sënjanabuayená; chentšana, Jerusalenoquënga y nyetsca chë Judea luaroquënga y ndoñe judiëngnaca; chënga sënjánaimpadana bacna soyënga amama ngménaca chamuatenójuaboma, chca amana chamuajbaná y Bëngbe Bëtsabe benache chámuatishachama, y soyënga chamotsama jinýnyiyama chca ndegombre tmojanmama. <sup>21</sup> Chca sënjánama causa, judiënga Bëngbe Bëtsabe bëts yebnoca šmonjanishache y tmonjánbošena atše jtsóbana. <sup>22</sup> Pero Bëngbe Bëtsá sempre šonduájabuachana, y chca, cada te mëntscóñama, nyetscanga Bëngbe Bëtsabiana sëndabuayiyiná, uámanëngbioye y nduámanëngbioynaca; nýe ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inýetšá ndoñe. <sup>23</sup> Chënga tmonjánayana: ‘Bëngbe Bëtsabe Uámana Uabuayaná, Cristo jóbanama bontsemna; pero chaojóbanentšana, cha chë natsaná echántsemna obanënguentšana

jtayenama, y cha judiëngbioye y ndoñe judiëngbioye echanjabuayená, y chca, chënga mochántsetatšëmbo nyetscanga chábeñe tmojtsošbuáchenga atsebácanënga mochtsemnama ca.’ ”

*Pablo tojanma rey Agrípbioye jáyëñjanama, Jesucristbeñe ošbuachiyá chaóbemama*

<sup>24</sup> Pablo, cachá jenéuyanama chë soyënga tojánayana ora, Festo mëntšá tojanáye-buachena: —¡Pablo, opá cojtsóbema! Yapa ualíaye causa, opá tcojtsóbema ca.

<sup>25</sup> Pero Pablo tbojanjuá: —Opá ndoñe quetsásmëna, bëts uámana Festo; inyëtšá entsemna; atše sëntsoyebuambná nyets juábnaca, y ndegombre soyënga. <sup>26</sup> Chentše rey Agripa entsuenana, y cha puerte tšabá chë soyëngama endétatšëmbo, chíyeca, tondayama ntjatauatjca, atše chabe delante sëntsoyebuambná; atše corente sëndétatšëmbo chánaca chë soyëngama yotatšëmbuama, er ndayá Jesús tojanmcá, ndoñe tonjopasá ndaye iytémena chaboye. <sup>27</sup> Bëts rey Agripa, ¿Bëngbe Bëtsabe juabna oyeambuambnayënga tmojánayana soyënguine aca quecošbuaché? Atše sëntsetatšëmbo aíñe chiñe cošbuáchema ca —Pablo tbojaniana.

<sup>28</sup> Chora Agripa tbojanjuá: —Batšatema más y mašcjayëñjaná Jesucristbe ustoná atše jóbemama ca.

<sup>29</sup> As Pablo tojánayana: —Nye batšatema más o bëts cama más, atše Bëngbe Bëtsá sëntseimpadana, ndoñe nye bëndatbe barie, sinó nyetscanga chë mora šmojtsuenanënga, atšcá Cristbe ústonënga chašmobiamama, pero utámenënga ndoñe chamondétsemna, ntšamo mora atše sëntsemncá ca.

<sup>30</sup> Chorna, chë rey, chë mandado, Berenice y chë chëngaftaca imojantbiámanënga tmojantsbaná, <sup>31</sup> y luaroye tmojána chë soyama jencuëntama. Mëntšá imojtsichamo: —Quem boyabása ndocna bacna soye tonjama jóbanama chabotsemnama, ni mo utamená jtsemnama ndoñe quebnátsmëna ca.

<sup>32</sup> Y Agripa Féstbioye tbojaniana: —Chë Romoca bëts mandado, quem chabe soyama cháuyanama cachá ndoñe matënjábošenëse, bënga matmënjobená quem boyabása jëtsboshjonama ca.

## 27

*Roma bëts puebloye Pablo tmojanichmó*

<sup>1</sup> Italia ca uabaina luaroye Pablo jíchmuama tmojanenoyeuná ora, atše, quem librëša uabiamnayá, cháftaca sënjána. Chora Pablo y chë inye utámenënga Julio ca uabainabe cucuatšinë tmonjábanashejuana. Julio enjamna canya chë Romoca bëts mandadbe soldadënguentša mandayá. <sup>2</sup> Asna, fsënjánašëngo canye Adramitio puebloca barcuine; ya chë Asioca bëts pueblëngoye juama enjétsamna. Cesarea pueblentšana fsënjánbocna y Aristárcnaca béngaftaca enjétsamna; cha enjamna Tesalónica bëts pueblócá, Macedonia luaroca.

<sup>3</sup> Chë inye yëfsana, Sidón puebloye fsënjánashajna. Chentše Julio, tšabá mandbomná Pábloftaca enjétsamna; tbonjanlesenciá chabe amiguëngbioye chauabuáchama, chënga chamofjama y chamóbocuedama. <sup>4</sup> Sidonocana fsënjéftsambocnentšana, bëngbe contra corente enjétsëbinyiaye. Chíyeca, Chipre fshantsënga catsbioicajana, ndoñe yapa quentétsëbinyiayëjana bënga fsënjána. <sup>5</sup> Cilicia y Panfilia luarënga béconana mar bejaycá fsënjánachnëngo, y Mira bëts puebloye fsënjánashajna, Licia luaroca.

<sup>6</sup> Chë soldadëngbe amëndayá, canye Alejandría puebloca barco chentše tonjáninyena, Italia luaroye yojétsaye; asna, šonjanamëndá chë barcuine jenójaiyana. <sup>7</sup> Baseftaytentscuana uenana fsënjánana y pordonto fsëñjanobená Gnido pueblentšana ndirichiñe jashjanguana. Cabá bëngbe contra enjétsëbinyiaye causa, Salmón luarëjana fsënjánachnëjna, Creta fshantsënga béconana, ndoñe yapa quentétsëbinyiayëjana. <sup>8</sup> Y chca, pordonto bejaycá fsënjánana, fshantsënga béconana; chentšana, canye pueblo, Tšabe Puertënga ca uabáinentše fsënjánashajna, Lasea ca uabaina pueblo béconana.

<sup>9</sup> Chca, bayté tonjanochnëngo y chora chë bejaycá jama puerte resjo enjëtsemna, er ya chë judiënga bayënga jobáyama te tonjanochnëngo, Bëngbe Bëtsá chëngbe bacna soyëngama cháuperdonama, y chora chë uaftena tempo joshjanguama ya enjëtsobeco.

<sup>10</sup> Chíyeca Pablo chë entšanga mëntšá tonjanabuayená: “Baconga, atše šontsinýana mora puerte resjo entsemna bejaycá játama, y ndoñe tšabá queochátsmëna, ni chë uasmanëshangama, ni chë barcuama y bëngbiamana cach ndoñe, mo nderado muanjanóbana ca.”

<sup>11</sup> Pero chë soldadëngbe amëndayá Páblëbioye ndoñe ntjoyeunayana; más, chë barcuentsá mandayá y chë barco nduíñbioye añe. <sup>12</sup> Ndoñe tšabá yonjamna, chë barco chora enjëtsemnentše chë uaftena tempëntscuana jëftsemnana; chë causa, nýa mo nýetscanga tmonjanenoyeuná cachiñe bejaycá chentšana játama, nderado cuanjobenaye Fenice puebloye jashjanguama y chentše jëftsemnana chë uaftena tempo tojopochocantscuana. Chë pueblo Creta luaroca enjamna; y choye jamashënguamna enjamna shinýe endbetsenatjëmbambana juachoica tsjuanoicajana y tsmanoicajana.

### *Mar béjayiñe puerte uaftena y binýia tojanóshjango*

<sup>13</sup> Chentšana tonjanontšé tsmanoicana batsá binýiayana, chíyeca chë entšanga tmonjanjuabó ya yojtsanopodena jtëtóntšana jama ca. As, chentšana fsënjëftsanbocna y bejaycá fsënjána, Creta fshantsënga beconanëjana. <sup>14</sup> Pero baseftayté chentšana, chë fshantsëngocana tonjanontšé corente jabuache binýiayana y chë barquëshoye enjëtsoshjajuana. Chë binýia yojanabaina Nordeste binýia ca. <sup>15</sup> Chë barcna nýe chë bínýiëbe ponto tonjanontšé uayana; chë binýia enjëtsobayëjana jama ndoñe quentétsopodena causa, šonjanotocá nýe ntšamo tojtsebinýiacá chašúyambama. <sup>16</sup> Chentšana fsënjánachnëjna Cauda ca uabaina stëtšoicajana, base fshantsënga mar béjayoca; chiñe ya ndoñe tša jabuache quentétsëbinýiaye y pordonto fsënjánobená buyeshoicana jtabocnana chë barco enjanasjá canouše, ndoñe chaondëtsóndbemama. <sup>17</sup> Ya chë barquëshoye fsëntanëšëngo orna, chë entšanga lazéjangaca chë barquëshana tmonsanabatsécaca, más uamorochëshana chaotsamnama. Pero chënga monjétsauatja nderado chë barco chë Sirte ca uabaina cascajúentše nanjetsánjua; asna, chë barcuentsá ancla tmonjanashëbëútšena, chë barco ndoñe betsco chaondëtsábonjnama, y ntšamo enjetsanbinýiaycá fsënjána. <sup>18</sup> Chë inýe yëfsana y chë binýiayana cabá jabuache enjëtsemna causa, chënga tmonjanontšé chë barcuentsá uasmanëshangá jtsëshbuëtsetšana; <sup>19</sup> y unga tianoye béngnaca šonjanotocá, cach bëngbe cucuátšeca, chë barcuentsá soyënga buyeshoye jtsëtšanana. <sup>20</sup> Baytentscuana bënga ndoñe chibiatanobená jinýana ni shinýe, ni estrellatëmënga, tša tonjëtseibetata causa; y tša jabuache enjëtsebinýiaye causa, bënga ya ndoñe quefštëtsanobatmana chentšana jótsbocana.

<sup>21</sup> Ya bayté enjëtsemna y chëntscuana tondaye saná ntjascá fsënjëtsemna. Chentšana, Pablo bëngbe tsëntsaca tonjantsá y tonjánayana: “Baconga, tšabá manjamna atše mašmënjanoeyeuná y Creta luarocana ndoñe matmënjëftsanbocna; chca mora ndoñe mal mamojtsepasá y ndoñe nýa nýetsá matmënjobuëtše. <sup>22</sup> Pero mora ngmënaca ndoñe matsmëngëngana; masque chë barco echantsenatjëmbe, tšëngaftanguentsá ndocná queochatóbana. <sup>23</sup> Ibeta canýe ángel šonjébëbocna; Bëngbe Bëtsá, ndabia atše sëndmëna y nda sëndëserveda, cha tbojichmó; <sup>24</sup> y chë ángel mëntšá šonjauyana: ‘Pablo, ndoñe matauatjana; entseyta aca chë Romoca bëts mandádbioye chacotsama, y aca Bëngbe Bëtsábia cómnayeca, nýetsca quem barcuñe ajnënga jobanámentšana cha echanjatsebacá ca.’ <sup>25</sup> Chcasna, baconga, ndoñe matauatjëngana, er atše Bëngbe Bëtsábeñe corente sëntsošbuaché y lempe ntšamo chë ángel šonjauyancá echanjóbocna. <sup>26</sup> Pero mora entseyta canýe fshantse mar béjayiñe chašúshejanguama ca” —cha tonjanéyana.

<sup>27</sup> Canýe ibeta, uta semana fsënjánana chentšana chë Adriático ca uabaina mar béjayiñe fsënjëtsemna, y nýe ínýoye y ínýoye chë binýia šonjëtšëyambaye. Y mo



tséntseto yojétsemna orna, chë barcuentša trabájayënga tmojanjuabó ya fshantse béconana imojétsemna ca. <sup>28</sup> As chënga tmonjanmedidá ntsachetša chë býyeshe buatjoye inamnama y tonjanóbocna unga bnétsana y chnénguana metro; más chcoye cachiñe tmonjanmedidá y uta bnétsana canýsëfta metro tonjanóbocna. <sup>29</sup> Chënga monjétsauatja nderado bëts ndëtšbéngaca nanjetsántšëtjiama; asna, chë barco stëtšoicajana canta ancla buyeshoye tmonjanashëbëútsena, chë barco ndoñe más chaondëtsábonjnama, y tša monjétseboše betesco chaobínýnama. <sup>30</sup> Chëntscuana, chë barcuentša trabájayënga tmojánbošena chentšana jtsachetana; chamna, chënga tmojanontšé chë canouše buyeshoye justjanguana, pero chca imojétsama, mo chë anclënga chë barco natsanoica cuaftsëstjajuancá. <sup>31</sup> Pero Pablo chë soye tojáninýe, y chë soldadëngbe amëndayábioye y chë soldadëngbioye tonjanená y mëntšá tonjanéyana: “Chë barcuentša trabájayënga cach quem barcuentše ndoñe chamonjoquedase, tsëngaftanga ndoñe quešmochatobenaye muentšana jótsbocama ca.”

<sup>32</sup> As, chë soldadënga tmonjána y chë canoušentša lazëjënga tmontsantëtsetše y buyeshoye chëše tmontsantsatše.

<sup>33</sup> Enjétebinýana ora, Pablo nyetscanga tonjanaimpadá ndayánaca chamosëngama, mëntšá jáuyanëse: “Ya uta semana entsemna y tsëngaftanga ni mo batsatema chešmatamaná, y tondaye chešmatsbmananga. <sup>34</sup> Diosmanda, masque nýe mo batsatémnaca šmochjase. Chca cmontsamna jamana ndoñe chašmondóbanama, er ndocná ndocá queochatspása ca.”

<sup>35</sup> Pablo, chca tonjánayanentšana, canýe tandëše tonjanca y nyetscangbe delante Bëngbe Bëtsábioye tbontanchuá. Chorna, tonjanjatá y tonjanontšé jasama. <sup>36</sup> Chentšana nyetscanga tmonjanenñemó y chëngnaca tmonjanse. <sup>37</sup> (Chë barcuentše nyetscanga fsënjamna uta patse y canýsëfta bnétsana y chnénguanënga.) <sup>38</sup> Ntšamo inmabošcá tmonjansentšana, buyeshoye trigo tmontsanashaná, chca, chë barco ndoñe yapa chaondëtsautama.

#### *Chë barco tojtsanenatjëmbe*

<sup>39</sup> Ya tonjanbinýna ora, chë barcuentša trabájayënga ndoñe quemëntëtsetatšëmbo ndaye fshantse chentše bétsemnama, pero tmonjáninýe chë fshantsentše canýe luare jachañe, chë béjaye chë luaroye omashjuanentše, y chiñe canýe chënyañe enjamna; as chënga tmonjanjuabó jarrepáрана nderado cuanjobenaye chëjana chë barco chë fshantsoye juyambana. <sup>40</sup> Asna, chë anclentša lazëjënga tmontsantëtsetše y chë anclënga buyeshoye tmontsanboshjuana, y chë timón, chë barco juyambama oservena soyentša uabatsëcnëjëngnaca tmontsanjafjoná. Chorna, chë barcuentša natsanoica niñëšiñe entšëjua tsbanánoye tmontanëšëngo, y chë binýia tonjanma chë barco chaontšé chë chënyoye juabéconama. <sup>41</sup> Pero chë barco canýe luaroye tonjánashjango, y chentše chë béjaye catatoicajana enjetsobuá y chë barco cánýentše, bëtscá cascajo buyeshiñe binýnentše tontsanajo. Chë barcuentša natsanoica lado chë cascajuiñe entsanajuena, ndócnoye juabónjuama ntsopodencá, y chë stëtšoica lado puerte entsanashatiyiná y lempe entsanandbiamná, yapa binýia causa y býyeshe chentše enjëtsojantšetaye causa.

<sup>42</sup> Chora, chë soldadënga tmonjanjuabó chë utámenënga jtsëbáyana, jachbabëse chënga ndoñe chamondëtsachetama. <sup>43</sup> Pero chë soldadëngbe amëndayá inaboše Pablo jatsbocama, y chíyeca chë soldadëngbioye ndoñe chenatanalesenciá chca jamana; y tojanmandá nyetscanga chë jachbabama obenëngna natsana chë buyeshoye joshbuetšana tsachoye chamuashjanguama, <sup>44</sup> y chë ínýengna tablëshënguñe o chë barcuentša pedazënguñe chamoshbuetšana. Y chca, nyetscanga fsënjanošená tsábá y ndocá ntjapasacá fshantsoye jashjanguama.

<sup>1</sup> Ya njetscanga fshantsoca tšabá fsenjéftsemna ora; fsenjántatšëmbona chë luare Malta ca yojanabaina. <sup>2</sup> Chë luarentša entsanga béngaftaca corente tšabá mándbomnënga monjéftsemna; canye íñeshe tmonjanangbotjó y šonjanébuaja choca bënga jatóšboniyama, er tša enjétsaftena y yapa enjétsesësna. <sup>3</sup> Pablo tojanatbaná básefta buashana chamesëfjënga y chë íñeshoye enjétseshacjnaye ora, canye mëtšcuaye tojánbocna y enjetsachaye, chentše yapa obonyaye causa, y Páblëbe cucuatšinë tontsanonjýá. <sup>4</sup> Chë luarentša entsanga, chë mëtšcuaye Páblëbe cucuatšinë yojtsajonýanama tmonjáninýe ora, monjétsenatsëtsnaye: “Quem boyabása ndegombre inýa obanayá cuanmëna; mar béjayoca jobanámentšana tojotsbocá, pero chca uamana causa, diosá Justicia ndoñe quebnatsleséncia cha vida chaotsebomnana ca.”

<sup>5</sup> Pero Pablo tontsanenacuestëtoná y íñeshoye chë mëtšcuaye tbontsantsatše y Pablo ndocá chenatanpasá. <sup>6</sup> Chë entsanga imojétsejuabnaye chábioye bochtsacuefshachá y nýe ndeolpe obaná yochjashajaye ca. Pero bën tonjanochnëngo y ndocá chenátanopasama chënga tmonjáninýe ora, ya ndoñe cachcá quemëntëtsanjuabnaye y tmonjanontšë ichámuana Pablo canye dios inamna ca.

<sup>7</sup> Chentša béconana inamna chë luarentša mandayabe fshantsënga. Cha šonjanébuaja y corente tšabá šonjanacuedá, unga tentscuana. Chë taitana Publio ca inauabaina. <sup>8</sup> Chë tempo, Públiëbe taitá šocá jutsnéshañe inajájona, calentóracca y buíñeca buamachnëjuanánaca. Pablo tonjána cha jinýama y tonjánamashëngo; Bëngbe Bëtsábioye tbonjanimpadá y chë šocábeñe chabe cucuatšënga tonjanajó, y chca, cha shnaná enjétsatsmëna. <sup>9</sup> Chca tonjanopasá chentšana, chë luarentša inýe šoquënga Páblëbioye monjánajna y cha enjánashnaye. <sup>10</sup> Bëtscá tšabe soyënga chentše bëngbiama tmonjanma, y cachiñe játama ya chë barcuíñe fsëntanenojayenga orna, lempe ntšamo bejaycá jama šonjanëjbotcá chënga šonjanatšatá.

#### *Pablo Romoye tojánashjango*

<sup>11</sup> Chë fshantsentše mar béjayoca unga ishinýe fsenjéftsemna, y chentšana canye Alejandriocana yojanabá barcuíñe fsëñjanenojayé; chë barco njets uaftena tempo chë luarentše yojéftsamna y enjanabaina Cástor y Pólux ca, mo chë romanëngbe uta diosata catšatcá. <sup>12</sup> Chentšana, Siracusa bëts puebloye fsëñjánashjajna y chentše unga te fsenjéftsemna; <sup>13</sup> y chentšana fshantse béconana bejaycá fsënjána, Regio puebloye jashjanguëntscuana. Yëfsana, tsmanoicana tsjuanoye enjétsëbinýiaye, y chca, chë inýe yëfsana Puteoli puebloye fsëñjánashjajna. <sup>14</sup> Chentše básefta Jesucristbeñe ošbuáchiyënga fsëñjánanyëna, y šonjanébuaja chëngaftaca canye semana chentše jëftsjétnama; y chentšana Romoye fsenjéftsanbocna. <sup>15</sup> Romoca Jesucristbeñe ošbuáchiyënga ya imojétsetatšëmbo bënga choye fchjanashjajnama; chcasna, chënga tmonjánbocna bënga jajëbenguama canye luare Foro del Apio y Unga Tabernënga ca uabainóntscoñe. Pablo chënga tonjánanyë ora, Bëngbe Bëtsá tbontanchuá y puerte añémoca enjéftsemna. <sup>16</sup> Romoye fsëñjánashjajna ora, soldadëngbe amëndayá Páblëbioye tbonjalesenciá cánýabe yebnentše chaotsiyenama, y tonjanmandá canye soldado chabotsebojanýama.

#### *Ndayá Pablo Romoca tojanma*

<sup>17</sup> Choye fsëñjánashjajnentšana unga tianoye, Pablo tonjanmandá chentše imnoyena judiënga más uámanënga chamobéconama; y njetscanga ya tmojánenefjna ora, cha tojanéyana: —Catšátanga judiënga, masque atše tondaye chiyatsma bënga judiënga mondbëtsama soyëngama contra, ni bëngbe bëts taitanga imojanamana soyëngama contra, judiënga Jerusalemoca šmonjanishache y romanëngbe cucuatšinë šmonjánboshjona. <sup>18</sup> Chë romanënga lempe šmonjantjá chentšana, monjétsëboše atše jëtsboshjonana, er ndocna bacna soye chemátaninýena atše jóbana chašotsemnana. <sup>19</sup> Pero chë judiënga ndoñe quemtëtsëboše atše chašmuatsboshjonama; chíyeca, šonjanotocá jáimpadana cach Romoca bëts uámana mandado cháuyana atše tšabá o ndoñe tijanmama,

masque atše tondaye quetsátsbomna, cach atšbe luarentša entsānga, judiēngbe contra jayanama. <sup>20</sup> Chíyeca, atše tcbonjúbuaja jányāma y jáuyanama, er ndayama chē Israeloca entsānga puerte jtsošbuáchiyēse mondobátmanama, chē obanēnga mochtayenama, atše mora utamená séntsemna ca –tojanéyana.

<sup>21</sup> Chora chēnga tmojaníyana: —Bēnga ni mo canye tsbuanácha Judeocana fchiyatáyēngaca acbiama noticiēngaca, y ni canye catšata judío, chocana moye ashjajnēnguentšá, ndocna bacna soye acbiama chešnatacuntá. <sup>22</sup> Bēnga fséntseboše jouenana ntšamo aca cojuabnama, er ntšamo Jesucristbe ustonēngbiama fstsētatsēmbcá, entsemna ana nyets luarenache chēngbe contra entsānga imojtsichamo ca.

<sup>23</sup> Asna, canye tescama Pablo tmojaníyana chca chaotsemnama; y chē tena, ba entsānga chē Pablo posada inabomnoye tmojanobeconá. Y cachēscana tojanjētānēntscuana, Pablo entsānga yojanētsētná Bēngbe Bētsabe amēndayama, ndayama cha ininye y inatátšēmbō; y yojtsentšena chēnga jáyēnjanama Jesúsbeñe chamotsošbuáchema, Moisesbe leyēnguentša soyéngaca y Bēngbe Bētsabe juabna oyebuambnayēngbe uabemana librēššangañe soyéngaca. <sup>24</sup> Báseftanga aíñe imojtsošbuáchiye ntšamo Pablo yojtsanētsētnacá ndegombre bētsemnama, pero ínýengna ndoñe. <sup>25</sup> Nyetscanga ndoñe cachcá montsanjuabnaye causa, tmojanontšé chentšana jésebo-canana. As Pablo tojanéyana: “Nyets razónaca chē Uámana Espíritu tšēngaftangbe taitanga tojanéyana, Bēngbe Bētsabe juabna oyebuambnayá Isaíasbiajana, mēntšá:

<sup>26</sup> Motsa chē entsānga jauanama:

‘Bētscá šmochantsuenana, pero tondaye quecmochátēsertana;

tša šmochantsafšna, pero tondaye quešmochátinýe.

<sup>27</sup> Muentša entsānga ainánaca josértama ndoñe quemátsboše causa,

chēnga nduauenanēnga montsemna y nduabinýnéngnaca;

chēnga bomínýeca ndoñe chamondobená jinýama,

ni chēngbe matscuašeca jouenama,

ni chēngbe ainánaca josértama ndoñe chamondobená,

chca, atšbe benache ndoñe chamondishachama,

atše ndoñe ntjátsebacama ca.’ ”

<sup>28</sup> Pablo chora mēntšá tojanéyana: “Ndegombre šmochtsetátšēmbō, cach quem Bēngbe Bētsabe buayenana soyēnga entsānga bacna soyēnguentšana játsebacama, chē ndoñe judiēngbioye mochanjábuayenaye, y ndegombre chēnga cocayé aíñe mochanjóyeunaye ca.” <sup>29</sup> (Pablo chca tojánayana ora, chē judiēnga chentšana imojésebocana y tša imojtsenatsētnaye.)

<sup>30</sup> Pablo uta uata chentše tonjanoquedá canye uántšamena yebnentše; y nyetscanga cha jauatsētsayama monjánajnēnga cha enjanēbuájajana. <sup>31</sup> Nyetscangbe delante puerte añémoca entsānga enjanabuayiná Bēngbe Bētsabe amēndayama, y enjanabatambá soyēnga Bēngbe Utabná Jesucristbiama, y ndocna Romoca mandayá quebēnjatanauyá chca jtsamama.

## Romanos

### *Pablo Romoca ošbuáchiyënga jacheuayama*

<sup>1</sup> Atše Pablo, Jesucristbe oservená, quem tsbuanácha sentsabiamná. Bëngbe Bëtsá šonjanchembo Jesucristbe ichmoná jtsemnama, y šonjanbocacá chabe tšabe noticiëngama entšanga chayábuayenama.

<sup>2</sup> Ya bayté entsemna, Bëngbe Bëtsá chabe juabna oyebuambnayéngaftaca chë tšabe noticiënga entšanga tojanašebuachená, y chënga chca tmojëftsaná bema Bëngbe Bëtsabe uabemana palabrënguiñe. <sup>3-4</sup> Chë tšabe noticiëngna, chabe Uaquiñá Bëngbe Utabná Jesucristbiamna jtsóyebuambnayana. Entšá quetsomñecana, tojanonýná canye rey Davídbentša entšábentšana; pero chabe espíritu sempre uamanáyecna, Bëngbe Bëtsá chabe obenánaca entšanga tojaninýanyé Jesucristo chabe Uaquiñá bëtsemnama. Cha chca tojaninýanyé chë Uaquiñá cháuatayenama cha tojanma ora.

<sup>5</sup> Chábeyeca, Bëngbe Bëtsá atše canye bëts soyama šojanábuayana, Jesucristbe ichmoná jtsemnama, chabe soyëngama entšanga jábuayenama, y nyets luarënguenache Jesucristbeñe ošbuáchiyënga chamotsemnama, y chca, ntšamo cha yomandacá chënga chamotseyeunanama. <sup>6-7</sup> Tšëngaftángnaca chëngbeñe šmontsemna, tšëngaftanga chë Romoca šmoyenënga, ndëmuanýënga Bëngbe Bëtsá tcmojáchembo Jesucristbenga chašmotsemnama. Atše tšëngaftangbiama sentsabiamná, tšëngaftanga Bëngbe Bëtsabe bonshánënga y chabe entšanga chašmotsemnama chëmbonënga. Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y chaboma tšëngaftanga ainaniñe tšabe ebionana chašmotsebonnama.

### *Pablo tša inaboše Roma bëts puebloye jama*

<sup>8</sup> Jabojátšamna, Bëngbe Bëtsá, Jesucristbiajana šcuatschuá, cada ona tšëngaftanguentsabiamna, er nyets quem luariñe entšanga tša monjesoyebuambná tšëngaftanga Jesucristbeñe bëtscá šmojtsošbuáchema. <sup>9</sup> Bëngbe Bëtsá, nda nyets ainánaca sëndeserverna, tšabe noticiënga chabe Uaquiñabiama abuayiynayiñe, endétatšëmbo atše nyets tempo Bëngbe Bëtsáftaca stsencuénta ora, tšëngaftangbiama sëndétseimpadanama; <sup>10</sup> y mora Bëngbe Bëtsá séntseimpadana, nya mora y cha tojtsebošëse, chašolesenciá jama tšëngaftanga jautsëtsayama. <sup>11</sup> Er atše tša sënjëseboše tšëngaftanga jányama, chca, atše chayobená jamama chë Uámana Espiritbentšana yóbocana tšabe soyënga tšëngaftanga chašmotsebonnama; y chca, tšëngaftanga ainaniñe bëts añemo chašmotsebonnama, y Jesucristbeñe corente chašmotsošbuáchema; <sup>12</sup> o más tšabá jayanamna, tšëngaftanga y átšeftaca mochjenájabuache ainaniñe bëts añemo jtsebonnama, tšëngaftanga y átšnaca Jesucristbeñe tša imošbuachéyeca.

<sup>13</sup> Y morna, Jesucristbeyeca catšátanga, séntseboše tšëngaftanga chašmotsetátšëmbo atše ba soye jama tijájuaboma, tšëngaftanga jautsëtsayama, pero méntsoñama ndoñe tsjobenaye. Atše séntseboše ndayá chayobená jamana ínýënga tšëngaftangbioca Jesucristbeñe chamotsošbuáchema, ntšamo ínýëngbeñe ndoñe judiëngbeñe tonjopasacá. <sup>14</sup> Atše Jesucristbiamna canye oservená sëndmëna, y chíyeca nyetscángaftaca obligaciönaca séntsemna, chë pueblënguiñe oyenëngaftaca y bën tjoye oyenëngaftaca, chë uat-sjinýenëngaftaca y ndoñe chcangaftácnaca. <sup>15</sup> Chíyeca atše tša séntseboše tšëngaftanga chë Romoca šmoyenëngnaca chë tšabe noticiënga jábuayenama.

### *Chë tšabe noticiënga Bëngbe Bëtsabe obenana jtsinýanýanayana*

<sup>16</sup> Atše ndoñe quetsátëuatja chë tšabe noticiënga jtsabuayiynayama, er chë noticiënga jtsinÿanÿnayana Bëngbe Bëtsabe obenana; y chë obenánaca, nÿetscanga Jesucristbeñe ošbuáchiyënga jtsobenana atsebácanënga jtsemnama, natsana chë judiënga chca ošbuáchiyënga, pero chë ndoñe judiëngnaca. <sup>17</sup> Er chë tšabe noticiënga jtsinÿanÿnayana ntšamo Bëngbe Bëtsá inétsama entšanga chabe bominjíñe tšábenga chamotsemnama. Y entšanga chabe bominjíñe tšábenga jábiamana, chënga Jesucristbeñe tmojtsošbuáchema. Ntšamo Bëngbe Bëtsabe uabemana palabrenguiñe endayancá: “Nÿe ndabiamana Bëngbe Bëtsá tojama chabe bominjíñe tšabia chaotsemnama, cha Bëngbe Bëtsábeñe betsošbuáchema, cha ndegombre chë nÿetsca tescama yomna tšabe vida echántsebomna ca.”

*Bëngbe Bëtsabe delante nÿetscanga culpa bomnënga mondmëna*

<sup>18</sup> Bëngbe Bëtsá celocana tojinÿanÿé, chë uabouana castigo, tša tbojetnama entšangbiamana chaotsemnama, ainaniñe bacna juabnënga bomnëngbiamana y chë bacna soyënga amëngbiamana y ndëmuanyëngbiamana, masque Bëngbe Bëtsabe ndegombre soyënga jtsoatšëmbñana, tša bacna soyënga tmojtsama causa, ndoñe ntjaleséciana cachënga jtsiyenama ntšamo ndegombre yomncá. <sup>19</sup> Bëngbe Bëtsá echanjácastigaye, er ntšamo entšanga imobencá Bëngbe Bëtsabiamana jtsetatšëmbuama soye, chëngaftaca sempre endëtsemna. Y chca endmëna, Bëngbe Bëtsá chë soye tojinÿanÿéyeca. <sup>20</sup> Bëngbe Bëtsá quem luare tojanma orscana, entšanga mondetsoyënga botamana josértana, Bëngbe Bëtsabe obenana ndocna te yochjëftsopochócama y cha ndegombre Bëngbe Bëtsá yomnama. Chë soyënga Bëngbe Bëtsabiamana entšanga quemuátobena jinÿana; nÿe jtsetatšëmbuamna aíñe. Entšanga mondobena chë soyënga Bëngbe Bëtsabiamana jtsetatšëmbuana, cachá tojanma soyëngaca. Chcasna, chënga ndoñe quemátobena jayanana bacna soye tmojama, cha nduabuatma causa ca. <sup>21</sup> Chënga Bëngbe Bëtsabiamana mondetatšëmbó, pero ndoñe ntsebošana chábioye jadórana, “aca ndegombre Bëngbe Bëtsá condmëna ca” jtsichámëse, ni cha ntsatschuanayana. Pero, ntšamo chënga tmojtsejuabnacá tondaye ntsámanana; ndoservena juabnéngaca y bacna juabnéngaca montsiyena, y chca, chënga montsiyena, jtsamëse ntšamo cachëngbe juabnënga yomncá, mo ibetiñe cuaftsajncá. <sup>22</sup> Chënga jtsichámuana corente osertánënga imomna ca, pero ndegombrna juabna ndbomnënga mondmëna. <sup>23</sup> Chënga ndoñe ntsadoránana Bëngbe Bëtsá, chë ndocna te yochjëftsobaná; chë cuenta, soyënga tmojobopormá mo entšangcá, y chëngna aíñe jóbanana; o soyënga shloftšëngcá o bayëngcá, o osjojnayëngcá, y chënga diosënga imomna ca jtsejuabnayëse jtsadoránana.

<sup>24</sup> Chíyeca, Bëngbe Bëtsá cachá tojónÿa, cachëngbe ainaniñe puerte bacna juabnéngaca mandánënga chamotsiyenama, y chca, bacna soyëngnaca ínÿengaftaca imojtsama; chë soyëngamna jtsëuatjana chënga entsamna. <sup>25</sup> Chënga chca jtsemnana, er ndoñe tmonjábošana Bëngbe Bëtsabe ndegombre soyënguiñe jtsošbuáchiyana, pero chë ndoñe ndegombre soyënguiñe cocayé jtsošbuáchiyana; chënga jtsadoránana y jtseservénana, Bëngbe Bëtsá quem luarentše tojama soyënga; pero ndoñe ntsadoránana, ni ntseservénana cach Bëngbe Bëtsá, chë nÿetsca chë soyënga tojanmá. Entšanga nÿets tempo cha chamotsatschuaná. Chca chaotsemna.

<sup>26</sup> Entšanga chca ndoñe tšabá tmonjámayeca, Bëngbe Bëtsá cachá tojónÿa, chënga ínÿengaftaca bacna soyënga jtsamama chamotsebošama; chë soyëngamna jtsëuatjana chënga entsamna. Y chca, chë shembásengnaca tmojtsajbaná boyabásengaftaca jtsamana ntšamo tšabá yomncá, inÿe shembásengaftaca bacna soyënga jtsamama. <sup>27</sup> Cachá, boyabásenga tmojtsajbaná shembásengaftaca jtsamana ntšamo tšabá yomncá; y tša imojtseboše inÿe boyabásengaftaca bacna soyënga jtsamama. Chënga chë inÿe boyabásengaftaca bacna soyënga imojtsama causa, entsamna jtsëuatjana, y chë soyëngama castigánënga mochántsemna, cachëngbe cuerpënguiñe jasúfriase, ntšamo chëngbe bacna soyëngama yojtsemerecencá.

<sup>28</sup> Chënga ndoñe tmonjábošena jtsiyenana jtsejuabnayëse, ntšamo entšanga Bëngbe Bëtsabiana imotatsëmbcá ndegombre bëtsemnana. Chíyeca Bëngbe Bëtsá cachcá tojónya, cachëngbe ndbémana juábnaca chamotsiyenama; y chca, chënga ba soyënga jtsamana, jamama ndoñe yontsamncá. <sup>29</sup> Chënga nyetscna bacna soye jtsamana: ainaniñe nyetscna bacna juabna jtsebmomnana, nye cachëngbiana bëtscá soyënga jtsebmomnana tša jésebošana, y ínÿengbioye ntšámnaca jáborlama jtsebošana; chënga nye játsbošana inÿa tojtsebmomna soyënga jtsebmomnana, ínÿenga jtsébánayana. Mondmëna penzentserënga, ínÿenga áingñayënga, puerte bacna soyënga ínÿengbiana bošënga, y uayátsenayënga. <sup>30</sup> Chënga ínÿengbiana podescá jtsóyebuambnayana, Bëngbe Bëtsá jtsáyayana, ínÿenga jtsóyanguayana, nye cachëngbe soyënga más iuámana ca jésejuabnayana, tša jtšenábotamnayana, jésejuabnayana ntšamo muanjobenaye más bacna soyënga jamana; chëngbe bëtsetsangbioye ndoñe ntsayaunanana. <sup>31</sup> Chënga ndoñe ntsebošana chë tšabe soyëngama chaósertama, tondayama palabra ndbomnënga, ndocnábioye ntsebobonshánana y ndocnabiana ntjóngmiana. <sup>32</sup> Y chënga corente mondétatšëmbo chca soyënga amëngbiana, Bëngbe Bëtsá chabe leyíñe tojayana jóbanama yojtsemerecena ca; pero masque chca, chënga nyets tempo chca jtsamana, y oyejuayënga jtsénÿayana ínÿenga cachcá tmojtsama ora.

## 2

### *Bëngbe Bëtsá echanjama chë ndoñe tšabe soye amënga bëtscá castigo chamotsebmomnana*

<sup>1</sup> Chcasna tšëngaftanga, chë ínÿenga ndoñe tšabá montsama ca šmojtsichámënga, ndoñe quešmátobena jayanana ndáyeca chca cach tšëngaftanga šmojama soyëngama. Tšëngaftanga chca ínÿengbiana šmojtsichamo ora, jtsinÿanÿnayana cach tšëngaftángnaca ndoñe tšabá šmonjamama, y castigánënga jtsemnana cmontsamna, er tšëngaftanga cachëngcá šmojtsiyena. <sup>2</sup> Bënga mondétatšëmbo, Bëngbe Bëtsá ntšamo ndegombre yomncá inétsamama, chë chca amëngbiana ndoñe tšabá tmonjama ca y castigánënga jtsemnana yojtsumna ca cha tojayana ora. <sup>3</sup> Y tšëngaftanga, chë ínÿenga ndoñe tšabá montsama ca šmojtsichámënga, y cachca soyënga šmojtsama, ¿šmojtsjuabná Bëngbe Bëtsabe castigüentšana šmochjotsbocá ca? <sup>4</sup> Bëngbe Bëtsá tšëngaftangbiana corente tšabe juabna endbomna; mora ndoñe quecmátacastigaye, y tšëngaftangacna puerte uantado nye chca endétsemna. ¿Chama tšëngaftanga cha šmojtsábotena? ¿Ndoñe šmondétatšëmbo Bëngbe Bëtsá chca corente jtsababuánÿeshanëse cmojtsénÿa, tšëngaftanga juabna chašmotrocama y chabe benache chašmuishachama cha yobóšeyeca? <sup>5</sup> Er tšëngaftanga ndoñe quešmátsoše chacmotsësertánama, y bacna soyënga amama jtsajbanama ndoñe quešmátsoše causa, šmontsama más bëtscá castigo chašmotsebmomnana, chë ndayté Bëngbe Bëtsá ntšamo entšanga tmojamcá tšabá o ndoñe tšabá bëtsemnana yochjayana ora; chë te, Bëngbe Bëtsá echanjamánda chë ndoñe tšabe soye amënga bëtscá castigo chamotsebmomnana, y chë tšabe soye amëngna, uacanana soye; y chca echanjama ntšamo ndegombre yomncá, y echanjínÿanÿiye cha tša tbojetna, entšanga ndoñe tšabá tmonjamama. <sup>6</sup> Chca, chë te, ntšamo cada ona tojéftsemama, Bëngbe Bëtsábentšana echanjóyëngacñe. <sup>7</sup> Ndëmuanÿenga nyets tempo tšabá jtsamëse imoyena, y chca imonguá Bëngbe Bëtsá más uámanënga chauabiama, cha chëngbiana tšabá chaotsoyebuambná y tšabe vida jtsebmomnana chaoma; chë te chëngbiana Bëngbe Bëtsá echanjama, chë nyetsca tescama yomna tšabe vida chamotsebmomnana. <sup>8</sup> Inÿenga imoyena, nye cachëngbe juabnéngaca cachënga tšabá jtsomñama; y ntšamo ndegombre tšabá yomncá tmojtsaboté, ntšamo ndoñe tšabá yomncá jtsamama. Y Bëngbe Bëtsá chë te, ndoñe tšabá tmonjéftsobuachjanguamna puerte etonaná echanjayana nyetsca tescama castigánënga jtsemnana chënga yojtsumna ca. <sup>9</sup> Bëngbe Bëtsá echanjama, chca amëngna puerte chamosufrima y lastemcá chëngbiana chaotsemnana, er yapa tsetšénana chëngbiana echanjéftsemna; chca echántsemna chë chcángbeñe judiënga

imomnëngbiama natsana, y ndoñe judiëngbiámnaca. <sup>10</sup> Pero chë te, Bëngbe Bëtsá echanjama, ntšamo tšabá yomncá amëngna puerte uámanënga chamotsemnana, chëngbiama corente tšabá echanjóyebuambaye, y echanjama chënga cháftaca tšabá tempcá chamot-satsmënama; y chca echántsemna chë chcángbeñe judiënga imomnëngbiama natsana, pero ndoñe judiëngbiámnaca.

<sup>11</sup> Er Bëngbe Bëtsabiama nyetscanga cachcá monduámama. <sup>12</sup> Chë Moisesbe ley ndoñe monduábomnënga, bacna soye tmojamamna castigo mochántsebmna, masque leyënga ndoñe tmonduábomnëse, ndayá yojtsamna jamama chaúyanama; y chë Moisesbe leyënga imuabomnëngbiamna, bacna soye tmojamama, Bëngbe Bëtsá echanjayana chënga ndoñe tšabá tmonjama ca y castigo chamotsebmna ca, chë leyënguiñe iuayana soyëngaca. <sup>13</sup> Chca endmëna, er Bëngbe Bëtsá ndoñe queonybatsma entšanga chabe bominyiñe tšábenga chamotsemnana, nye ntšamo chë leyiñe iuayancá tmojtsue-nanama, sinó ntšamo leyënguiñe iuayancá, ndayá jamama yojtsamncá tmojtsamëse. <sup>14</sup> Chë ndoñe judiënga chca leyënga ndoñe quematábomna, pero chëngbe ainantšá juabnënga tojtsëtsësná ndayánaca jamana, y ndayá chamotsamama ntšamo chë leyënguiñe tomandancá chënga tmojamëse, chënga jtsinýanýnaya tšabá imotátšëmbo ndayá aíñe o ndoñe inétsamna jamama, masque leyënga ndoñe tmonduábomnëse, ndayá yojtsamna jamama chaúyanama. <sup>15</sup> Ntšamo tmojtsiyencá chënga jtsinýanýnaya, ndayá leyiñe yomandánama chënga ainaniñe cachcá imojuabnama. Ntšamo chënga ainaniñe imotátšëmbo y imojuabnacá ndayá cachënga tmojamama, jtsinýanýnaya chënga ntšamo chë leyiñe yomandánama cachcá imojuabnama. Inye ora, chëngbe juabnënga echantsëtsësnaye aíñe o ndoñe tšabá tmonjama ca; y ndayté, Bëngbe Bëtsá nyetscangbiama ntšamo tmojamama yochjayana ora, cachëngbe ainaniñe tmojajuabó soyëngaca, cha echanjínýanýye ndayá tšabá o ndoñe tšabá tmonjamama. <sup>16</sup> Chë te, Bëngbe Bëtsá nyetscangbiama echanjayana chëngbe juabnëngama y ntšamo tmojamama, ndayá entšanga tempo ndoñe tmonjáninyama; cha chca echanjama Jesucrístoftaca; y chë atše sëndabuayiyiná tšabe noticiënga entsichamo ndegombre chca yochtsemnana.

### *Judiënga y Moisesbe ley*

<sup>17</sup> Y mora tšëngaftangbiama, chë judiënga šmomna ca ichámënga, y tša šmojtsejuabná Moisesbe léyeca tšëngaftanga tšabe vida jtsebmnama, y jtsenábotamnayana Bëngbe Bëtsabe ubuáyana entšanga šmomna ca; <sup>18</sup> tšëngaftanga chë ntšamo Bëngbe Bëtsá yobošcá tšëngaftanga chašmotsamama tatsëmbënga, y chë leyentšana šmojuatsjinýe jobocacayana ndayá más tšabá jamama tojtsemncá. <sup>19</sup> Tšëngaftanga tša jésejuabnaya, šmobena ínýenga chë ntšamo tšëngaftanga cmësertancá ndosertánënga jujabuáchama ca, mo jtanënga unachayënga cuaftsemnëngcá, o mo chë ndoñe binýniñcá oyenëngbe juabnënga binýnáyëngcá; <sup>20</sup> tšëngaftanga jtsejuabnaya chë ntšamo tšabá yomncá ndosertánëngbiama abuayiyayënga šmomna ca, y mo chë basengcá ton-daye nduatsjínýenëngbiama abuátambayënga ca. Tšëngaftanga tša jésejuabnaya chë ley šmobomnana, lempe šmotátšëmbo ca y ntšamo šmojtsichamcá ndegombre yojtsemna ca. <sup>21</sup> Y chcasna, tšëngaftanga chë ínýenga abuátambayënga, ¿ndáyeca ndoñe cach tšëngaftanga šmondëtsánatsana? Tšëngaftanga ínýengbioye jtsabuayiyayana ndoñe chamondëtsatbëbanama; as, ¿ndáyeca cach tšëngaftanga šmnëtsatbëbana? <sup>22</sup> Tšëngaftanga jtsichámuana, acbe shema o boyábioye ndoñe ínýaftaca cattseíngñaye ca; as, ¿ndáyeca tšëngaftanga cachcá šmnëtsama? Tšëngaftanga jtsáboyënjana soyënga chë ndayama ínýenga tmojtsichamo diosënga yomna ca y jtsadórayana; as, ¿ndáyeca chë soyënga chënga jadórama yebnënguentsana uámana soyënga šmnëtsatbëbana? <sup>23</sup> Tšëngaftanga tša jtsenábotamnaya chë ley šmobomnana; as, ¿ndáyeca šmonýbët-sama ínýenga Bëngbe Bëtsabiama podësca chamotsóyebuambnama, tšëngaftanga chë leyentšá mandënga jobedésama ndocna te ntsebošana causa? <sup>24</sup> Chama, Bëngbe Bëtsabe

uabemana palabrënguiñe mëntšá endayana: “Tšëngaftanga judiëngbe causa, ndoñe judiëngbeñe Bëngbe Bëtsabiama ndoñe tšabá quematoyebuambná ca.”

<sup>25</sup> Tšëngaftanga ntšamo leyiñe yomandancá šmojtsamëse, Bëngbe Bëtsábenga šmomnana jinñanñiyama, chë más delicadentse base bobachtema tétšenënga jtsemnana tšabá nántsemna; pero ntšamo chiñe tomandancá ndoñe šmotsamëse, chca tétšenënga jtsemnana, tondayama ntsosevénana, y chca, tšëngaftanga jtsemnana mo chë más delicadentse base bobachtema ndëtëtšenëngcá. <sup>26</sup> Y chë ndoñe judiënga chë más delicadentse base bobachtema tétšenënga, judiëngcá ndoñe quemátsmëna; pero chënga ntšamo leyiñe yomandancá tmojtsamëse, ndegombre Bëngbe Bëtsá chënga echanjúbuaja mo cachabe entšangcá. <sup>27</sup> Y chca, tšëngaftanga judiëngbiama Bëngbe Bëtsá echanjayana ndoñe tšabá šmonjama ca, ntšamo leyiñe yomandancá ndoñe šmotsama causa. Cha chca echanjama, er bëtscá ndoñe judiënga mondmëna y chënga ntšamo leyiñe yomandancá mondocumplina, pero chënga ndoñe quemátsmëna tšëngaftangcá tétšenënga, jtsinñnama Bëngbe Bëtsábenga šmomnana. Tšëngaftanga, masque Bëngbe Bëtsabe uabemana ley šmonduábomna y chë más delicadentse base bobachtema tétšenënga šmondmëna, cabá ndoñe šmotsama ntšamo leyiñe iuayancá, ndayá jamama cmojtsamnama.

<sup>28</sup> Chcasna, nda chë más delicadentse base bobachtema tmojatëtse ora, chábioye chë soye ndoñe ntjábemana canye ndegombre judío. Y canye entšá ndoñe Bëngbe Bëtsábia ntsemnana nye inyënga chë más delicadentse base bobachtema tmojatëtšama. <sup>29</sup> Y canye entšá ndegombre judío jtsemnana, ntšamo chabe ainaniñe tomncá, cha Bëngbe Bëtsabe entšá yomnama tojtsinñanñase. Y chca, canye ndegombre judío, Bëngbe Bëtsabe entšá yomnama chaotsinñamna ndoñe quenátsmëna chë más delicadentse base bobachtema jtsetëtšenana, sinó ntšamo Bëngbe Bëtsá tojamcá chabe ainaniñe chaotsebññnama. Bëngbe Bëtsabe Espiritu jamana entšá chca ainana chaotsebomnama, ndayá inétsinñanñayaye cha canye ndegombre judío yomnama; y chë uabemana ley ndoñe quenátobena chca jamana. Bëngbe Bëtsá endmëna chë tšabe soye entšabiama ichamuá; entšanga ndoñe.

### 3

<sup>1</sup> Chcase, ndánaca šuatjatjaye, as ¿Bëngbe Bëtsabe entšá jtsemnana jëftsashjáchama, más tšabá yojtsemna canye judío jtsemnana ca? ¿Base bobachtema chë más delicadentse tétšená jtsemnana becá yojsámama ca? <sup>2</sup> Aíñe, chca jtsemnana corente enduámama y nyetsca soyënguiñe; natsana chjayana, Bëngbe Bëtsá, judiënga chabe palabra tojanabanyé, nyetscangbiama chamotsinñenama. <sup>3</sup> Y morna, ¿ndayá yochjopása nderado judiënguentse báseftanga ya ndoñe chca tmontsentšénëse? Y chë causa, ¿Bëngbe Bëtsánaca yochtsajbaná ntšamo tojašebuachenacá amana? <sup>4</sup> ¿Ndoñe, ndegombre ndoñe! Chca ndoñe cha queochatsma; tšëngaftanga šmondétatšëmbo Bëngbe Bëtsá sempre endbétsama ndayá jamama tojašebuachenacá, masque nyetsca entšanga bosterënga chamotsomñe. Er Bëngbe Bëtsabe uabemana palabrënguiñe Bëngbe Bëtsabiama mëntšá endayana:

Aca ntšamo chacojayana ora, nyetscanga mochanjinñe aca ntšamo ndegombre yomncá cnétsamama;  
y chacojtsenëuyaná ora, sempre cochanjínñanñiye acbe contra tmojtsoyebuambnángbioye, chënga ndoñe tšabá montsamama ca.

<sup>5</sup> Pero bënga ndoñe tšabe soye montsama ca báseftanga tmojayana ora, Bëngbe Bëtsá siempre tšabá inétsamama entšanga más tšabá jinñama tmojtsobenëse, ¿ntšamo bënga mochjayana? ¿Bënga imojtsobena jayanana Bëngbe Bëtsá ndoñe tšabá tonjama ca, bëngbiama castigo chaotsemna ca cha tojayana ora? (Morna atše sëntsoyebuambná ntšamo entšanga jóyebuambayama monduamancá.) <sup>6</sup> ¿Ndoñe, ndegombre ndoñe! Ndoñe quemuátobena chca jayanama. Bëngbe Bëtsá nyets tempo ntšamo ndegombre



yomncá ndoñe tontsamése, ndegombre cha ndoñe nanjobenaye jayanama nyetsca quem luarentša entsangbiama, ntšamo tmojamcá tšabá o ndoñe tšabá bétsemnama.

<sup>7</sup> Nderado nda tojajana: “Atše ndaye bacna soye stjama y ndoñe ntšamo ndegombre yomncá tojtsemna, y chë soye tojoservé Bëngbe Bëtsá puerte uamaná y bëtsá yomnama jinÿanÿiyama, y Bëngbe Bëtsá sempre ntšamo ndegombre yomncá tojtsamama jinÿama entsanga tmojtsobenëse, ¿ndáyeca Bëngbe Bëtsá cabá iuichamo ntšamo atše tijamcá ndoñe tšabá yontsemna ca y atše canÿe bacna soye amá stsemna ca?” <sup>8</sup> Y chcase, ndánaca mëntšá nanjátayana: “Ntšamo ndoñe tšabá yondmëncá mochjama, chca, entsanga chámuinÿe Bëngbe Bëtsá puerte tšabia yomnama ca.” Ndegombre, atše mal jaquédama báseftanga tmojayana atše chca stsabuatambá ca; Bëngbe Bëtsá chca abuátambayënga echanjácastigaye, ntšamo castigánënga jtsemnama imomerecencá.

*Ntšamo entsá tojtsamama, Bëngbe Bëtsabe bominiÿiñe ndocná tšabia ntsemnana*

<sup>9</sup> Y asna, ¿Bëngbe Bëtsá bënga judiënga ínÿengbiama más tšabá šonÿa? ¡Ndoñe, ndegombre ndoñe! Atše ya sënjinÿinÿé judiënga y ndoñe judiëngnaca, chë bacna soyënga jamama juabnéngaca mandánënga imomnama. <sup>10</sup> Er Bëngbe Bëtsabe uabemana palabrënguiñe mëntšá endayana:

Ntšamo entsá tojtsamama, ndocná Bëngbe Bëtsabe bominiÿiñe tšabia quenátsmëna.

¡Ndoñe, ndegombre ndoñe, ni mo canÿa chca quenátsmëna!

<sup>11</sup> Ndocná quenátsmëna ntšamo ndegombre yomncá chabotsosertánama;

¡Ndocná quenátsmëna nda chaotseboše Bëngbe Bëtsáftaca jtsemnama!

<sup>12</sup> Nyetscanga ndoñe tšabe benache tmojishache y chiñe montsajna.

Chënga nyetscanga Bëngbe Bëtsabe bominiÿiñe tondayama quemátoservena.

Ndocná quenátsmëna ntšamo tšabá yomncá chaotsamama, ¡ni canÿa ndoñe!

<sup>13</sup> Ntšamo tmojtsichamcá puerte bëts bacna soye jtsemnana, mo canÿe obanabe cuevëshe atëfjnëshe puerte bacá tojtsonguëtšecá.

Chënga tmojtsoyebuambná soyéngaca ínÿengbioye jtsaíngñayana.

Chë tmojtsichamo soyéngaca puerte bacna soye ínÿengbiama jtsamana, mo canÿe mëtšcuaye tbojtseftëtše orcá, chë veneno canÿe entšábioye jóbana.

<sup>14</sup> Chënga, nyets tempo ínÿengbiama podësca jtsichámuana, y sempre jtsóyebuambnayana chë ínÿenga ntšámnaca jáborlama.

<sup>15</sup> Sempre jtseprontánana ínÿengbioye ntšámnaca jáborlama y jobáyama.

<sup>16</sup> Chënga siempre jtsiyenana ínÿenga chamotsesufrínama jtsamése, y nye ntšámnaca jtsaborlánana.

<sup>17</sup> Chënga ndocna te tondaye ntjamana nyetscanga natjémbana chamotsiyenama;

<sup>18</sup> Chënga ndoñe ntsiyenana Bëngbe Bëtsabiama jtsejuabnyëse, cha chë más bëtsá nyetscangbiama yomnama ca —chiñe endayana.

<sup>19</sup> Er bënga mondétatšëmbo, lempe ntšamo leyinë iuabemancá, chë leyéngaca mandánënga imoyenëngbiama yomnama. Chcasna, chë ley endmëna, Bëngbe Bëtsabe delante ndocná chaondobená jayanama, cha ndoñe tšabá tonjama, chama ndoñe yonjátatšëmbo causa ca; y endmëna jinÿanÿiyama, ntšamo tmojamcá tšabá o ndoñe tšabá bétsemnama Bëngbe Bëtsá nyetscangbiama yochjayana ora, nyetscanga yojtsamna chabe delante jayanama, ndáyeca ntšamo tšabá yomncá ndoñe tmonjama ca. <sup>20</sup> Er, Bëngbe Bëtsá ndoñe queochatsma ndocná chabe bominiÿiñe tšabia chaotsemna, ntšamo leyinë yomandancá cha tojamama; chë ley bëngbiama jamana, nye bënga bacna soye tmojamama chamotsetatšëmbuama.

*Ntšamo Bëngbe Bëtsá inama entsanga chabe bominiÿiñe tšábenga chamotsemnana*

<sup>21</sup> Pero mora, Bëngbe Bëtsá tonjinÿanÿé ntšamo cha inama entsanga tšábenga chabe bominiÿiñe chamotsemnana; y Bëngbe Bëtsá ndoñe ntjamana canÿa chabe bominiÿiñe tšabia chaotsemnana, ntšamo ibomncá cha tojtsamama, ntšamo chë leyënguiñe y

mandënguiñe yomncá. Pero masque mora chca, Bëngbe Bëtsá tonjinjanjé, Moisesbe leyiñe y Bëngbe Bëtsabe juabna oyebuambnayëngbe librësangañe yopodena jinñenana chca yochtsemnama. <sup>22</sup> Bëngbe Bëtsá jamana entšanga chabe bominyiñe tšábenga chamotsemnama, chënga Jesucristbeñe tmojtsošbuáchema. Bëngbe Bëtsá njetscanga Crístbeñe ošbuáchiyëngbiamana chca jamana, y chabiamana njetscanga cachcá monduámama; <sup>23</sup> er njetscanga bacna soye tmojama, y chë causa, ndocna entšá tonjobená jashjáchana ndocna bacna soye ndbomná jtsemnama y puerte bëtsá jtsemnama, ntšamo Bëngbe Bëtsá tojanjuabocá entšanga chamotsemnama. <sup>24</sup> Pero Bëngbe Bëtsá chëngbiamana corente tšabe juabna bómnyeyeca, mo ndayá cuafjatšatacá, cha jamana chënga chabe bominyiñe tšábenga chamotsemnama. Bëngbe Bëtsá chca tojanma, Cristo Jesúsbeñe, entšanga atsebácanënga chamotsemnama y ya ndoñe más bacna soyënga jamama juabnéngaca mandánënga chamondëtsemnama cha tojanma ora. <sup>25</sup> Bëngbe Bëtsá cha tbojanábuayana, chabe buiñe juabuáshanëse y jóbanëse, cha chaotsemna ndábeyeca Bëngbe Bëtsá entšanga bacna soyëngama jáperdonama; Jesucristbeñe jtsošbuáchiyëse entšanga jobenayana perdonánënga jtsemnama. Bëngbe Bëtsá chca tojanma, jinñanjiyama cha inétsama entšanga tšábenga chabe bominyiñe chamotsemnama, chë entšanga bacna soyënga tmojanmama chë tempo ntjatonyaycá, er cha chë tempo corente uantado chëngaftaca yojtsemna y chëngbe bacna soyëngama ndoñe yonjánacastigaye. <sup>26</sup> Cha lempe chca tojanma, jinñanjiyama cha sempre ntšamo ndegombre yomncá inétsamama, y njetscanga Jesucristbeñe ošbuáchiyënga chabe bominyiñe tšábenga chamotsemnama inétsamama.

<sup>27</sup> Chcáyeca, entšá ndoñe ntsobenana tondayama ntsenábotamnayana. Chca endmëna, er Bëngbe Bëtsá tšabia chabe bominyiñe jabemana, ndoñe ntšamo leyiñe tomandancá cha tojtsamama, sinó nye Jesucristbeñe tojtsošbuáchema. <sup>28</sup> Y chca jayanëse, mora bënga tšabá montsetátšëmbo, Bëngbe Bëtsá inétsama canye entšá tšabia chabe bominyiñe chaotsemnama, nye Jesucristbeñe tojtsošbuáchema, y ndoñe ntšamo leyiñe yomandancá cha tojtsamama.

<sup>29</sup> ¿O Bëngbe Bëtsá nye judiëngbe Bëtsá yomna? ¿Ndoñe judiëngbe Bëtsánaca cha ndoñe yondmëna? Aíñe, chëngbe Bëtsánaca cha endmëna; <sup>30</sup> er nye canye Bëtsá njetscangbiamana endmëna, y cha echanjama chë más delicadentse base bobachtema tëtšëñënga imomnëngbiamana y ndoñe chchangbiámnaca, chabe bominyiñe tšábenga chamotsemnama, Jesucristbeñe tmojtsošbuáchema. <sup>31</sup> Chcasna, Bëngbe Bëtsá jamana entšanga chabe bominyiñe tšábenga chamotsemnama, Jesucristbeñe tmojtsošbuáchema; ¿chca yojtsayana chë ley nye tondayama yondoservena ca? ¡Ndoñe, ndegombre ndoñe! Inyetšá, chca jamana chë ley más chaotsámanama.

#### 4

##### *Ntšamo Abrahánoftaca tojanopasá*

<sup>1</sup> Morna Abrahambiamana mochiyebuambaye, bëngbe tempsca bëts taitá, y mochiñnye ndayá tojánatsjinnye Bëngbe Bëtsábeñe ošbuáchiyana bomnentšana. <sup>2</sup> Abraham chabe bominyiñe tšabia chaotsemnama, ndayá cha tojanmama Bëngbe Bëtsá matëñjanmëse, cha matëñjanobená entšángbeñe ndayama jtsenábotamnayana, pero Bëngbe Bëtsabe delante ndoñe; <sup>3</sup> er Bëngbe Bëtsabe uabemana palabrenguiñe mëntšá endayana: “Abraham, Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominyiñe tšabia yojamna ca.”

<sup>4</sup> Canye entšá trabajayá, crocénana josháchiñana ndayá tojamama, pero chë crocénana ndoñe nye tšetánana ntsemnana, sinó chana jtsemnana ntšamo cha tojtsomerecencá. <sup>5</sup> Er menójuabonga, nda tondaye tontsama Bëngbe Bëtsá cháuyanama cha chabe bominyiñe tšabia yomna ca, pero aíñe tojtsošbuaché Bëngbe Bëtsábeñe, nda endbáyana chë bacna soye tmojamënga mora mo ndoñe chca cuafjamcá chamotsemna ca, chabiamana Bëngbe Bëtsá echanjama chabe bominyiñe tšabia chaotsemnama, chabe ošbuáchiyama.

<sup>6</sup> Rey David cachcá chabe librésañe tojánayana, chë ndabiama Bëngbe Bëtsá jayanana chabe bominiñe tšabia chaotsemna ca, masque chabiama chca cháuayanama tondaye tonjamëse. David chca entsabiama tojánayana, cha puerte echantsoyejuaye ca. <sup>7</sup> Chabe librésañe mëntšá tojanábema:

¡Tša oyejuayënga jtsemnana chë Bëngbe Bëtsá chëngbe bacna soyënga tojáperdonanga, chë Bëngbe Bëtsá chëngbe bacna soyënga tojabuajuánanga!

<sup>8</sup> ¡Puerte oyejuayá jtsemnana chë Bëngbe Bëtsá mo ndoñe bacna soye cuafjama cuenta tbojtsonyá cha ca!

<sup>9</sup> ¿David tojánayana nÿe chë más delicadentše base bobachtema tëtšenënga imomnëngbiama oyejuayana yomna ca? Ndoñe; ndoñe chca mondmëñëngbiámnaca. Y muentše tmonjayana, Abraham Bëngbe Bëtsábeñe yojtsošbuachéyeca, Bëngbe Bëtsá tojánayana cha chabe bominiñe tšabia yojamna ca. <sup>10</sup> Y ¿ntseco chca tojanopasá? ¿Abraham ya chë más delicadentše base bobachtema tëtšená yojtsemna ora, o cabá ndoñe chca yontsemna ora? Ndegombre, Abraham cabá ndoñe chca tëtšená yontsemna ora. <sup>11</sup> Y cabá chentšana, Abraham base bobachtema chë más delicadentše tëtšená yojtsemna; y chca yojamna jinÿanÿiyama, Bëngbe Bëtsá tempo ya chabiama tojánayana cha chabe bominiñe tšabia yojamna ca, cha Bëngbe Bëtsábeñe yojtsošbuáchema. Lempe chca tojanopasá, jinÿanÿiyama Abraham mo taitacá yomnama Bëngbe Bëtsábeñe imošbuachéngbiama, masque ndoñe base bobachtema chë más delicadentše tëtšenënga mondmëna. Y cachcá Bëngbe Bëtsá chë ošbuáchiyëngbiama tojánayana, chënga chabe bominiñe tšábënga imomna ca. <sup>12</sup> Y Abrahámnaca endmëna mo chë taitacá, chë más delicadentše base bobachtema tëtšenënga imomnëngbiama, pero aïne Bëngbe Bëtsábeñe corente jtsošbuáchiyëse imoyenëngbiama, cachcá ntšamo bëngbe bëtš taitá Abraham Bëngbe Bëtsábeñe yojtsošbuachecá. Y cha cabá chë más delicadentše base bobachtema ntsetëtšëna ora, ya chca yojtsošbuáchiye.

*Jtsošbuáchiyëse, ntšamo Bëngbe Bëtsá tojanašebuachenacá jóshjanguana*

<sup>13</sup> Bëngbe Bëtsá tojanašebuachená Abrahambiana y chábentšana entsangbiama, quem luare chëngbiama yochjëftsemna ca. Y chca tojanašebuachená, ndoñe Abraham ntšamo leyinë yomandancá betsobedecënana, sinó cha Bëngbe Bëtsábeñe yojtsanošbuáchema, y chíyeca Bëngbe Bëtsá tojánayana cha chabe bominiñe tšabia yojamna ca. <sup>14</sup> Pero, ntšamo Bëngbe Bëtsá tojanašebuachenacá, bënga ntšamo chë leyinë yomandancá tmojtsamëngbiama yojtsemna ca tmojayanëse, Bëngbe Bëtsábeñe jtsošbuáchiyana tondayama nantsoserverna, y ntšamo Bëngbe Bëtsá tojanašebuachenacá tondaye ntsámanana. <sup>15</sup> Chë ley juabocnana, Bëngbe Bëtsá puerte etonaná entsanga cháucastigama, chënga ntšamo chiñe iuayancá ndoñe tmontsamama; pero ndocna mandënga tontsemnëse, ndocná ntsoebenana chë ndoñe tontsayancá ndoñe ntjamana.

<sup>16</sup> Y chca, Bëngbe Bëtsá Abrahámioye tbojanšbuachená, cha yojtsanošbuachéyeca, ntšamo Bëngbe Bëtsá tojanašebuachenacá, ndegombre chaotsemnama chë Bëngbe Bëtsábeñe imošbuáchema mo Abrahám-bentšana entsangcá imomnëngbiama; y Bëngbe Bëtsá chca tojanašebuachená, cha chëngbe tšabiama iuantjéšnayeca. Chë mo Abrahám-bentšana entsangcá imomnëngbeñe, ndoñe quemnatsmëna nÿe chë ntšamo ley yomandacá imnëtsamënga, sinó nÿetscanga chë ntšamo Abraham tojanošbuachecá Bëngbe Bëtsábeñe imošbuachéngnaca. Y Abraham nÿetscanga bëngbiama, Bëngbe Bëtsábeñe ošbuáchiyënga, mo taitacá endmëna. <sup>17</sup> Ntšamo Bëngbe Bëtsábeñe uabemana palabrënguine endayancá, Bëngbe Bëtsá Abrahámioye ibojtsatsësnaye ora: “Atše sënjama aca ba luariñe entsangbiama atšbe bominiñe taitá chacotsemnama ca.” Chë ntšamo tojanašebuachenacá ndegombre tšabe soye endmëna, er Bëngbe Bëtsá chca Abrahambiana yojanjuabná; y Bëngbe Bëtsá endmëna ndábeñe Abraham yojtsanošbuaché, y nda inétsama entsanga chámuatayenama, y nda inamánda y entsanga jobenayana jinÿama ndayá ndocna te tmonjaninÿcá.

<sup>18</sup> Abraham Bëngbe Bëtsábeñe yojtsošbuáchiye y yojtsobatmana ntšamo tbojanšbuachenacá chaotsemnana, masque entšabe juabniñe ndoñe chca ntjátsjuabnayana; y chca, cabana cha tojánashjache jtsemnana “ba luariñe entsangbe taitá”, ntšamo Bëngbe Bëtsá tbojaniancá: “Acbentšana entšanga tša mallajta mochántsemna, ndocná queochatobenaye jacúntana ca”. <sup>19</sup> Abraham yojanobatmanëntscuana, cha puerte chábeñe yojtsanošbuaché, ntšamo tbojanšbuachenacá jóyëngacñama, masque Abraham yojtsonyaye ya bëtsanánëjema yojtsemnana, er ya mo patse uata yojtsebomna, y chabe shema, Sara, ndoñe yonjobena šešonga jtsabamnana. <sup>20</sup> Abraham ndocna te tonjanajbaná Bëngbe Bëtsábeñe ošbuáchiyana, y ni mo canye ndoñe yonjanjuaboye chë ntšamo Bëngbe Bëtsá tbojanšbuachenacá ndoñe joparéjana ca; sinó más corente chábeñe yojtsanošbuaché, y chca Bëngbe Bëtsábioye ibojtsatschuanaye, <sup>21</sup> er cha tšabá inatátšëmbo, ntšamo tbojanšbuachenacá jamama, ndegombre Bëngbe Bëtsá obená inamnana. <sup>22</sup> Chíyeca, Bëngbe Bëtsá tojánayana cha chabe bominiñe tšabia yojamna ca.

<sup>23</sup> Pero, chabe bominiñe tšabia yojamna ca Bëngbe Bëtsá tojánayana ora, ndoñe nye Abrahamiama chca ntsóyebuambnayana; <sup>24</sup> ndayá bëngbiámnaca, ndëmuanjëngbiama Bëngbe Bëtsá yochjayana chabe bominiñe tšábenga imomna ca, bënga Bëngbe Bëtsábeñe imošbuachéyeca; Bëngbe Bëtsá, nda tojanma Bëngbe Utabná Jesús cháuatayenama. <sup>25</sup> Bëngbe Bëtsá tojanalesenciá entšanga Jesús chamóbama, bënga bacna soyënga tmojanma causa, y Bëngbe Bëtsá tojanma cha cháuatayenama. Bëngbe Bëtsá chca tojanma jobenayama, bënga chabe bominiñe tšábenga jábiamama.

## 5

### *Mora bënga Bëngbe Bëtsabe bominiñe tšábenga montsemna*

<sup>1</sup> Er Bëngbe Bëtsá tojama bënga chabe bominiñe tšábenga chamotsemnana, bënga chábeñe imošbuachéyeca; mora tempcá tšabá Bëngbe Bëtsáftaca bënga montsatsmëna, Bëngbe Utabná Jesucristbeyeca. <sup>2</sup> Bënga Crístbeñe mondošbuáchema, cha tojama bënga chamotsetatšëmbuama Bëngbe Bëtsá tša tšabia yomnana, y Bëngbe Bëtsábíocana tšabe soyënga jtsebomñese mora chamotsiyenama. Bënga tša oyejuayënga jésemnana, er Bëngbe Bëtsábeñe jtsošbuáchiyëse mondobátmana cha puerte uámanënga y bëtsétsanga šochjábiamama, batšá ntšamo cachá yomncá. <sup>3</sup> Y ndoñe nye chama bënga oyejuayënga jésemnana, ndayá bënga tmojtseufrina y padecena soyënguiñe tmojtšajna órnaca. Chca mondbama, er bënga mondetatšëmbo bënga tmojtseufrina orna, bënga juatšjínjyana ntšamo uantadënga jtsemnana padecena soyënguiñe tmojtsemna ora, Bëngbe Bëtsábeñe jtsošbuáchiyëse. <sup>4</sup> Bënga padecena soyënguiñe tmojtsemna ora, más tšabá uantadënga jtsemnana mondobénayeca, Bëngbe Bëtsá oyejuayá bëngaftaca jtsemnana, padecena soyënguentšana ndegombre tšabá tmojachnëngo ora. Bëngbe Bëtsá oyejuayá bëngaftaca chaotsemnana bënga tmojanma ora, bënga jtsobenana más jtsobátmanana, ntšamo šojašebuachenacá cha yochjamama. <sup>5</sup> Bënga chca tmojtsobatmanëse, ndocna te nye bonamente quemochatobátmana, er Bëngbe Bëtsá šojinyanýé tša bëtscá cha šuababuánjeshanama. Bëngbe Bëtsá chca tojama chë Uámana Espíritbeyeca, y cha endmëna nda Bëngbe Bëtsá tbojanichmó bëngbe ainaniñe chaotsemnana jtsemándayama.

<sup>6</sup> Tempo bënga tondaye chemuatanobená jamana Bëngbe Bëtsabe bominiñe tšábenga jtsemnana, y chora Cristo tojanóbana bënga chë bacna soyënga tmojamëngbe tšabiama, nya chama tempo yojamna ora. <sup>7</sup> Ndoñe paselo quenátsmëna jajuaboyana, ndáyeca canya nantseprontana jóbanama canya ntšamo chë leyiñe yomandancá jamama tojtsamanabiama; pero, canya bëtscá jtsababuánjeshanëse tšabe soyënga ínjëngbiama tojtsamabiama, nderádose chabiama jóbanama cuantseprontana. <sup>8</sup> Pero Bëngbe Bëtsá bënga šojanyanýé tša šuababuánjeshanama, er bënga cabá bacna soyënga ntsamcá imojoyena ora, Cristo bëngbiama tojanóbana.

<sup>9</sup> Cristo, chabe buiñe juabuáshanëse bēngbiama tojanóbanayeca, Bēngbe Bētsá tojanma bēnga chabe bominiñe tšábenga jtsemnama. Y chca endménayeca, ndegombre Cristo šochanjátsebacaye, entšanga ndoñe tšabá tmonjama ca y castigo chēngbiama chaotsemna ca Bēngbe Bētsá chaojayana ora. <sup>10</sup> Bēnga tempo Bēngbe Bētsá imojanáya; pero cha tojanma bēnga cháftaca tempcá tšabá chamotsatsmēnama, chabe Uaquiñá tojanóbanayeca. Y mora, bēnga natjēmbana cháftaca chamotsemnama ya tojama ora, ndegombre atsebácanēnga mochántsemna, chabe Uaquiñá ainá yómnayeca. <sup>11</sup> Y ndoñe nñe chca, ndayá bēnga cháftaca puerte oyejuayēnga chamotsemnámna Bēngbe Bētsá jamana, ndayá Bēngbe Utabná Jesucristo bēngbiama tojánmayeca. Y mora, chábeyeca Bēngbe Bētsá tojama bēnga cháftaca tempcá tšabá chamotsatsmēnama.

### *Adán y Cristo*

<sup>12</sup> Canñe entšá bacna soye tojanma causa, nñetsca entšanga bacna soyēnga amēnga tmojábcana; y cha tojanóbana, bacna soyēnga tojanma causa. Y chca, nñetsca entšanga entsamna jóbanama, er nñetscanga bacna soyēnga tmojama. <sup>13</sup> Bēngbe Bētsá Moisésbioye chē leyēnga cabá nduántšaboshjona ora, entšanga quem luarentše bacna soyēnga tmojanma. Pero ndocna ley tontsemna ora, Bēngbe Bētsá ndoñe ntjatonyayana entšanga bacna soyēnga tmojamama. <sup>14</sup> Nñetsca entšanga, Adánbentsana Moisésbentscoñe, nñetscanga yojánamna jóbanama, ntšamo cach Adán tojanmcá ndoñe tmonjanméngnaca, ntšamo cha ndoñe chaondēmama Bēngbe Bētsá tbojanmandacá cha tojanma ora. Y Adánbeñe entšanga mondobena jinñama, ntšamo chē jabama ibojamná canñe soyēnguiñe yochtsanmēna.

<sup>15</sup> Pero ntšamo chē útata tbojanmcá ndoñe cachca soye quenátsmēna; er Bēngbe Bētsá entšangbe tšabiama jtsejuabnayeše tšabe soyēnga chēngbiama tojanma ora, ndoñe yonjamna mo ntšamo Bēngbe Bētsá tbojanmandacá ndoñe chaondēmama Adán tojanma orcá. Tšēngaftanga šmondétatšēmo, nñe canñe entšá canñe bacna soye tojanma causa, cha tojanma nñetsca entšanga jóbanama chaotsamnama, pero Bēngbe Bētsá entšangbe tšabiama yojuabnáyeca, más bēts soyēnga jamana, chē Adánbe bacna soye entšangbiama bacna soyēnga tojanmama. Chca, Bēngbe Bētsá tojanma ba entšanga bētscá tšabe soyēnga chamotsebonnama; y chca tojama, nñe canñe entšá, Jesucristo, tšabe soyēnga tojánmayeca. <sup>16</sup> Chē ba entšanga bētscá tšabe soyēnga chamotsebonnama Bēngbe Bētsá tojamentšana endóbocana soye, puerte inñetsá comna, chē entšá Adán, canñe bacna soye tojanmentšana tojanóbocna soyama. Adán bacna soye tojanmentšana, Bēngbe Bētsá tojánayana chana bacna soye tojanma y castigo jtsebonnama ibojtsemna ca, y nñetsca entšángnaca chē causa; pero masque nñetscanga bacna soyēnga tmojama, Bēngbe Bētsá entšangbe tšabiama ndoñe bēndētsebnatjēmbayeyeca, tojanma entšanga chabe bominiñe tšábenga chamotsemnama y chē bacna soyēngama castigánēnga ndoñe chamondétsemnama. <sup>17</sup> Ndegombre endmēna, canñe entšá bacna soye tojanma causa, nñetsca entšanga jóbanama yojtsamna. Pero puerte más, canñe entšá Jesucristo tojanma. Ndēmuanñēngbiama Bēngbe Bētsá tojama bētscá tšabe soyēnga chamotsebonnama, ndēmuanñēngbiama Bēngbe Bētsá tojama chabe bominiñe tšábenga chamotsemnama, y Bēngbe Bētsábiocana chca tmojóyēngacñēnga, chēnga nñetscanga mochantsiyena bacna soyēnga jtseyēñjanayēse y nñetsca tescama mo bētsētsangcá; y chca echántsemna ndayá Cristo tojánmayeca.

<sup>18</sup> Y chca, ntšamo canñe entšá, Adán, canñe bacna soye tojanmama, Bēngbe Bētsá tojánayana nñetscanga bacna soye tmojanma y castigánēnga chamotsemna ca; cachcá ntšamo canñe entšá, Cristo, puerte tšabe soye tojánmayeca, Bēngbe Bētsá jayanana nñetscanga imojtsobena chabe bominiñe tšábenga jtsemnama y chē nñetsca tescama yomna tšabe vida jtsebonnama ca. <sup>19</sup> Y ntšamo Bēngbe Bētsá tbojanmandacá ndoñe

chaondēmama canye entśá tojanma causa, nyetsca entśanga bacna soye amēnga tmojanobiama; cachcá, ntśamo Bēngbe Bētsá tbojanmandacá canye entśá, Jesucristo, tojánmayeca, Bēngbe Bētsá tojanma bētsacá entśanga chabe bominyiñe tśábenga chamotsemnama.

<sup>20</sup> Chē ley entśangbe cucuatśiñe tmojanáboshjona, jinyanjyiyama ntśamo ndegombre yomna bacna soyēnga jtsamana; pero entśanga más bacna soyēnga imojtsama ora, Bēngbe Bētsá cabá más chēngbe tśabiama yojtsanjuabnaye y más tśabe soyēnga chēngbiama yojtsama. <sup>21</sup> Chcasna, mora mochjayana, entśanga bacna soyēngaca puerte mandánēnga imojamna, y chca, nyetscanga jóbanama yojamna ca. Pero mora, ya ndoñe chca quenátsmēna, er Bēngbe Bētsá tojama entśanga chabe bominyiñe tśábenga chamotsemnama, Bēngbe Utabná Jesucristbeyeca chē nyetsca tescama yomna tśabe vida chamotsebomnama; chíyeca mora bēnga montsobena jtsiyenama, Bēngbe Bētsá šojatśatá tśabe soyēnga lempe bēngaftaca jtsemnēse.

## 6

### *Crístbeyeca bēnga tśabe vida jtsebomnana*

<sup>1</sup> Y asna, ¿ntśamo mochjayana? ¿Šojtsamna jtsiyenana sempre bacna soyēnga jtsamēse, chca, Bēngbe Bētsá šuababuánjeshanama más chašotsinjanjyina, cha más bacna soyēnga bēnga jtsaperdónayēse? <sup>2</sup> ¡Ndoñe, ndegombre ndoñe! Tempo bēnga monjaniyena bacna soyēnga jamama juabnéngaca mandánēnga, pero mora bēnga montsobena jtsiyenana chē juabnénga tondaye bēngbioye ntsamcá, y chca, bēnga montsobena mo obanēngcá chē soyēngama jtsemnana; y as, ¿ndáyeca bēnga muatjásjuabnaye ntśamo ndoñe tśabá tontsemncá jatiyenana? <sup>3</sup> Er ndegombre tśēngaftanga šmondétatśēmbo, bēnga uabáinēnga tmojanoquedá ora, tmonjaninjanjyé bēnga Cristo Jesúseftaca cánjyine mo canyácá bētsemnana; y bēnga uabáinēnga tmonjanoquedá ora, enjamna mo bēnga cuafjobancá, ntśamo Cristo tojanobancá. <sup>4</sup> Bēnga uabáinēnga tmonjanoquedá ora, enjamna mo bēngnaca cháftaca cuafjobancá, y cháftaca uatabuantsanēngcá. Chca yojamna, bēnga chamotsobenama mo tsēm entśangcá jtsiyenama, ntśamo Crísoftaca tojanopasacá, cha cháuatayenama Bēngbe Bētsá tojanma ora, chabe puerte bēts obenánaca.

<sup>5</sup> Bēnga Crísoftaca cánjyine mo canyácá jtsemnēse, cha tojanóbana ora mo bēngnaca cháftaca cuafjobancá enjámnyeca, ndegombre bēnga cánjyine mo canyácá cháftaca mochántsemna, bēnga cachiñe vida nyetsca tescama chamotsatsbomnama Bēngbe Bētsá jtsamēse, ntśamo Cristo cháuatayenama cha tojanmcá. <sup>6</sup> Y bēnga mondétatśēmbo, chē ntśamo bēngbe vida enjamncá, bacna juabnéngaca mandánēnga, Jesucristbeñe cabá ntsošbuáchiye ora, mora ya ndoñe chca yontsemnana; y chca entsemna mo chē tempsca vida chaóbanama cuafjamcá, Cristo tmojancrucificá ora. Chca yojamna, Bēngbe Bētsá jobenayama chē bacna soyēnga jamama bēngbe juabnénga jtsepochócama; y chca, ya ndoñe más chē bacna soyēngaca mandánēnga chamondétsemnana, mo nyets tempo nye ínjabiyama oservenēngcá. <sup>7</sup> Er canye entśá tojóbanana ora, chē bacna soyēnga chábioye ya ndoñe más ntsemándayana. <sup>8</sup> Er Cristo tojanóbana ora, mo bēngnaca cháftaca cuafjobancá endmēnayeca, cháftaca jtsiyenámncaca bēnga montsošbuaché. <sup>9</sup> Bēnga mondétatśēmbo Cristo cháuatayenama y ndocna te cha cachiñe jatóbanama Bēngbe Bētsá tojanmama; y ndocna obenana queochatsma cha cachiñe chauatóbanama. <sup>10</sup> Cha tojanóbana, y chē bacna soye jamama juabnénga ndocna te ntjobenayana chábioye jamándana, y ínjenja ndoñe imontsobena ntśamo cha jabórlana; y ntśamo mora cha yoyencá, Bēngbe Bētsá jtseservénama yomna. <sup>11</sup> Cachcá, tśēngaftanga cmontsamna jtsejuabnayana, chē ya ndoñe más bacna soyēngaca mandánēnga šmojtsemnana, pero vida šmobomna lempe jtsamēse Bēngbe Bētsá tśēngaftangaftaca oyejuayá chaotsemnana, Cristo Jesúseftaca cánjyine mo canyácá jtsemnēse.

<sup>12</sup> Tšëngaftanga cmontsamna, chë bacna soyënga jamama ainantëse šmobomna juabnéngaca ndoñe más mandánënga ntsemnana, chca, tšëngaftanga ndoñe chašmondétsamama juabnéngaca nÿe cach tšëngaftanga, tšëngaftangbe cuerpiñe tšabá jt-somñama. <sup>13</sup> Tšëngaftanga ndoñe quecmátamna jalesénciana ndaye tšëngaftangbe cuer-pentša soye, bacna soyënga jamama chaoservema. Chamna, tšëngaftanga cmontsamna Bëngbe Bëtsá jauyanana, lempe ntšamo tšëngaftanga šmomncá, cha jasérviamna chaotsemna ca, tšëngaftanga chë šmomna mo ya ndoñe más obanëngcá Bëngbe Bëtsabiama, y tojanma tšabe vida chašmotsebmomna; y jauyanana nÿetsca tšëngaftangbe cuerpentša soyëngna Bëngbe Bëtsá jasérviamna yojtsemna ca. <sup>14</sup> Ndoñe quecmátamna bacna soyëngaca mandánënga jtsemnana, er tšëngaftanga ndoñe quešmátiyena leyinë iuayana soyëngaca mandánënga, y šmondoyena Bëngbe Bëtsá tšëngaftangbiama tšabá jtsejuabnayëse.

*Ošbuachiyá obligacionaca jtsemnana ntšamo tšabá yomncá jamama*

<sup>15</sup> Y asna, ¿bënga imojtsobena bacna soyënga jamana, chë leyinë iuayana soyëngaca ndëmandánënga imomnana, y Bëngbe Bëtsá bëngbiama tšabá jtsejuabnayëse bënga imoyenama? ¡Ndoñe, ndegombre ndoñe! <sup>16</sup> Tšëngaftanga tšabá šmondétatšëmbo, ínÿabe cucuatšinë mo nÿets tempo nÿe ínÿabiama oservenëngcá šmojoquedá ora, cha jtsobedecënana, ndegombre tšëngaftanga chë nduiñbiama nÿets tempo oservénënga jtsemnana. Chcasna, cachcá jtsemnana, chë tšëngaftanga šmojabocacá bacna soyëngaca mandánënga jtsemnana, y chca jtsemnana mo Bëngbe Bëtsabe bominiñe tšëngaftanga nÿetsca tescama obanënga cuaftsemncá, o Bëngbe Bëtsá jtsobedecënana, y chca, chabe bominiñe tšábënga jabocanana. <sup>17</sup> Pero šontsamna Bëngbe Bëtsá jtsatschuanayana, er tempo tšëngaftanga mo nÿe ínÿabiama oservenëngcá šmojamna, bacna soyënga jamama juabnéngaca mandánënga; pero mora nÿets ainánaca šmojoyeuná, ntšamo chë tcmojanabuatambá soyënguiñe šmojoyëngacñëcá. <sup>18</sup> Bëngbe Bëtsá tšëngaftanga cmojatsebacá, bacna soyëngaca ndëmandánënga chašmotsemnana, y morna mo Bëngbe Bëtsabiama oservenëngcá šmojabocna, ntšamo tšabá yomncá jtsamama. <sup>19</sup> Muentšë sënjoyebuambá ntšamo entšanga mondbetsichamcá, er tšëngaftanga ndoñe corente juabna quešmátsbomna toto palabrenga chacmósertama. Tempo, tšëngaftanga šmonjanamana jalesénciana, lempe ntšamo šmojamncá mandánënga jtsemnana, bacna soyënga shembásaftaca o boyabásaftaca jamama juabnéngaca, y nÿe ndaye bacna soyënga jamama juabnéngaca. Cachcá, mora tšëngaftanga cmontsamna jalesénciana tšëngaftanga chašmotsemnana juabnéngaca mandánënga tšabe soyënga jtsamama, chca, ndegombre Bëngbe Bëtsabe entšanga chašmotsemnana.

<sup>20</sup> Tšëngaftanga, cabá bacna soyënga jamama juabnéngaca mandánënga šmonjamna ora, tšëngaftanga ndoñe obligacionaca quešmënjatsmëna ntšamo Bëngbe Bëtsabiama tšabá yomncá játamama. <sup>21</sup> ¿Ndaye tšabe soye tšëngaftanga šmojosháchiñe chë tempo šmojánama soyënga amiñe? Tondaye; y mora chë soyëngama šmojtséuatja. Chca soyënga tcojamentšana jóbocnana, entšá nÿetsca tescama castiganá chaotsemnana, mo Bëngbe Bëtsabe bominiñe nÿetsca tescama obaná cuaftsemncá. <sup>22</sup> Pero mora, ndoñe quešmátsmëna bacna soyënga jamama juabnéngaca mandánënga, y mora bëtscá šmojtsentšena Bëngbe Bëtsá jtseyeunanana y jtseservénana. Chca jtsamana, tšëngaftangbiama puerte tšabá entsemna, er chca, Bëngbe Bëtsabe entšanga šmochántsemna, y cabana, chë nÿetsca tescama yomna tšabe vida šmochántsebmomna. <sup>23</sup> Bacna soyënga tcojtsamentšana jóbocnana entšá nÿetsca tescama castiganá chaotsemnana, mo Bëngbe Bëtsabe bominiñe nÿetsca tescama obanënga cuaftsemncá; pero, Bëngbe Bëtsá šojtsatšatná soyënguentšana, jóbocnana chë nÿetsca tescama yomna tšabe vida jtsebmomna, Cristo Jesús Bëngbe Utabnáftaca cánÿiñe mo canÿacá jtsemnëse.

## 7

*Chë bouamnátbentsana ndayá bëngbiana mochjuatsjinjë*

<sup>1</sup>Jesucrístbeyeca catsátanga, tsëngaftanga šmotátšëmbo ntšamo chë leyënga entšangbiana inétsemnana; tsëngaftanga šmotátšëmbo, ntšamo chë leyiñe tojtsayancá canje entšá chaotsamamna, nje chë entšá tojtsainëntscuana chábioye jtsemándayana. <sup>2</sup>Chcasna, canje bouamna shembása, ntšamo chë leyiñe endayancá bontsemna chabe boyáftaca jëftsemnana, chë boyá tuainëntscuana; pero chë boyá tojtsóbanësna, chë leyiñe endayana, chë shemna canya jtoquédana, chë boyabiana ndëmandaná ca. <sup>3</sup>Y chca, chë shema inje boyabásaftaca chabe boyábioye tbojaingñé, chë boyá cabá vida totsóbomñe ora, chë shemna jtsabáinana chabe boyábioye ínÿaftaca ingñayá ca. Pero chabe boyá tojtsóbanëse, chë leyiñe endayana chë shemna canya jtoquédana, chë boyabiana ndëmandaná ca, y cha jtsobenana ínÿaftaca jtobouamayana; y chca tojama ora, boyábioye ínÿaftaca ingñayana ndoñe ntsemnana.

<sup>4</sup>Tsëngaftanga chë ošbuachiyëngaftácnaca cachcá endmëna; ya ndoñe más chë léyeca mandánënga quešmátsmëna, er Cristo tojanóbana ora šmojánbocna, mo chë soyëngama obanënga cuafoquedangcá, ínÿabe entšanga jtsemnana, Crístbenga, ndabiama Bëngbe Bëtsá tojanma cháuatayenama; y chca jtsemnëse, bënga bëtscá soyënga ntšamo tšabá yomncá chamotsamama, Bëngbe Bëtsá jaserviama. <sup>5</sup>Bënga chë nje ntšamo cabënga inmabošcá monjaniyena ora, chë ley enjanoservena bëngbe ainaniñe chamotsebomnama bacna soyënga jamama puerte bëts juabnënga, nje bënga tšabá jtsomñama. Ba bacna soyënga tmonjanma, y chë causa bënga šonjánamna nyetsca tescama castigánënga jtsemnana, mo Bëngbe Bëtsabe bominÿiñe nyetsca tescama obanënga cuaftsemncá. <sup>6</sup>Pero mora Bëngbe Bëtsá šojatsebacá chë léyeca ndëmandánënga chamotsemnana; chë ley tempo enjamna bëngbiana mo canje amëndayacá. Pero mora bënga chë leyama mo obanëngcá montsemna; chca, bënga ndoñe chamondëtsiyenama ntšamo tempo enjamncá, chë uabemana leyëngaca mandánënga, y aiñe tsmëcá chamotsiyenama, ntšamo chë Uámana Espíritu iuamcá bënga vida chamotsebomnama.

*Bacna soye jamama juabna tcojtsebomnëse, chë ley jamana entšá bacna soye chaomama*

<sup>7</sup>Báseftanga muanjayana cach ley bacna soye yomna ca; ndegombre, chë ley ndoñe chca quenátsmëna. Chë léyeca atše tšabá sëndétatšëmbo ndayá yomna bacna soye jamana. Atše ndocna te matijántatšëmbona ndayá yomna chë “ínÿabioye jtsántšabošana”, “ínÿabioye ndoñe cattsantšaboše ca” chë leyiñe ndoñe matmënjanábemëse. <sup>8</sup>Pero bacna soyënga jamama juabnënga atše bomna causa tonjanma, atše puerte chaitsebošama chë ndoñe šonjamna jtsebošana soyënga; y chca chë juabnéngaca tonjanopasá, atše chë leyënguiñe ndayá iuayanama jtsejuabnayëse. Er ndocna ley tondmëna ora, entšá ndoñe ntsetatšëmbuana ndayá yomna bacna soye jtsamana. <sup>9</sup>Canje tempo enjamna, chora atše sënjananiyena leyëngama ntsetatšëmbcá, pero ntšamo leyiñe iuayancá sënjanabuátmana ora, ndayá jamama ndoñe yonjamnama, atše sënjanontsé chë bacna soyënga jamama juabnéngaca mandaná jtsemnana; <sup>10</sup>y chora atše sënjántatšëmbona, chë causa šojtsanmëna nyetsca tescama castigáná jtsemnana, mo Bëngbe Bëtsabe bominÿiñe nyetsca tescama obaná cuaftsemncá. Bëngbe Bëtsá chë mando tojanma, atše chë nyetsca tescama yomna tšabe vida jtsebomnama chayobenama, chë ley jtseyeunanëse; pero ndoñe chiyatanobedecé causa, chë mando tonjanma atše chašotsemna nyetsca tescama castigáná jtsemnana. <sup>11</sup>Chë leyentša mandiñe inje soyënga ndoñe šonjëtsemna jamama ca yojtsayánayeca, chë bacna soyënga jamama juabnënga átšbeñe, šmonjaningñé bacna soyënga jamama; y chë mando bëtsemnana, chë bacna soyënga jamama juabnënga tmonjanma atše chašotsemna nyetsca tescama castigáná jtsemnana, mo Bëngbe Bëtsabe bominÿiñe nyetsca tescama obaná cuaftsemncá.



<sup>12</sup> Pero bēnga mēntšá mochjayana: chē leyna tšabe soye endmēna, er Bēngbe Bētsábíocana tojanóbocna, y chē mandēngnaca Bēngbe Bētsábíocana tojanóbocna ca; chiñe endayana ndayá tšabá yomna jamana y chca tšabá jtsemnana. <sup>13</sup> Y asna, ¿quem tšabe soye tojanma atše chašotsemna nyetsca tescama castiganá jtsemnana, mo Bēngbe Bētsabe bominiñe nyetsca tescama obaná cuaftsemncá? ¡Ndoñe, ndegombre ndoñe! Chē bacna soyēnga jamama juabnēnga atše bomna causa, chca átšeftaca tonjanopasá. Chē tšabá yomna sóyeca, chē bacna soyēnga jamama juabnēnga tmonjanma atše chašotsemna nyetsca tescama castiganá jtsemnana. Chca chē juabnēngaca tonjanopasá, entšanga jobenayama jtsetatšēmbuama ndayá yomna bacna soye jamana; y chē mando, bacna soye jamama ndoñe yondmēna ca jtsichámuana causa, nyetsca entšanga mondobena jinýana canye bacna soye, mo canye puerte bēts bacna soycá.

<sup>14</sup> Bēnga mondētatsēmbo chē ley Bēngbe Bētsabe ley yomnana, pero atšna nye canye entšá sēndmēna, canya nyets tempo nye bacna soyēnga jamama juabnēngaca mandaná. <sup>15</sup> Ndegombre ndoñe quešnátēsertana ntšamo sēntsamcá, er ndoñe ntsamana ndayá jamama stsebošcá, pero añe jtsamana ndayá jamama ndoñe šontsogustancá. <sup>16</sup> Pero chē atšbe ainaniñe stsejuabná ndoñe tšabá tontsemna soye stsamēse, ndayama leyiñe iuayana ndoñe candmēna ntsamana ca, chca atše jtsinýanýnayana chē ley ndegombre tšabe soye yomnana. <sup>17</sup> Chcasna, atše ya ndoñe ntsemnana chē chca tojtsamá, ndayá chē bacna soye jamama atšbe ainaniñe yomna juabnēnga jtsamana atše chca jamama. <sup>18</sup> Atše sēndētatsēmbo, atšbe ainaniñe tondaye yontsemna ntšamo tšabá yomncá atše jamama. Masque sēntseboše ntšamo tšabá yomncá jamama, ndoñe quetsátobena chca jamama. <sup>19</sup> Atše ndoñe quetsátama chē tšabe soye ndayá jamama sēndbošcá, pero añe sēntsama chē bacna soye ndayá jamama ndoñe sēndbošcá. <sup>20</sup> Chē ndayá ndoñe jamama sēntsebošcá stsamēse, chca jtsayanana, atše ya ndoñe stsemna chē chca vojtsamá, sinó chē bacna soye jamama atšbe ainaniñe yomna juabnēnga chca vojtsama.

<sup>21</sup> Chca, atše tijátatsēmbona ndayá átšeftaca vojtsopasánana; masque, ntšamo tšabá yomncá jamama stseboše, bacna juabnēnga sempre jtsemándayana atše bacna soye chaimama. <sup>22</sup> Atšbe ainanoca puerte sēntsoyejuá, Bēngbe Bētsábíocana yóbocana mandēngama. <sup>23</sup> Pero atše sēnjínýena inye soye átšeftaca vojtsopasánana; chē bacna soye jamama atšbe ainaniñe yomna juabnēnga vojtsama atše ndoñe ntjamama ntšamo atšbe juabnoca yomna mo ndegombre soycá, mo chē bacna soyēngaca mandaná cuaftsemncá.

<sup>24</sup> ¡Tša lastema atšbiama! Chē bacna soye jamama juabnēnga átšbeñe entsemánda, y entsama atše chašotsemna nyetsca tescama castiganá jtsemnana, mo Bēngbe Bētsabe bominiñe nyetsca tescama obaná cuaftsemncá. ¿Nda nanjobenaye chentšana atše jatsbocama? <sup>25</sup> Nye Bēngbe Bētsá endmēna nda yobena atše jatsbocama, Bēngbe Utabná Jesucrístbeyeca. Chábíoye chama mochtsatschuanaye. Atšbe ainanoca atše añe sēntsejuabná chē ley puerte tšabe soye yomna ca, y jobedésama sēntseboše; pero chē bacna soye jamama átšbeñe yomna juabnēngaca, atše bacna soyēnga sēntsama, ntšamo chē juabnēnga šontsemadacá.

## 8

### *Ntšamo Bēngbe Bētsabe Espíritu yomandacá jtsiyenana*

<sup>1</sup> Y chca, Bēngbe Bētsá ndoñe ntjayanana, Cristo Jesúseftaca cánýiñe mo canýacá imomnēnga, chēngbe bacna soyēngama nyetsca tescama castigánēnga jtsemnana yojtsamna ca. <sup>2</sup> Er, chē Uámana Espíritoftaca mandánēnga mondmēnayeca, Bēngbe Bētsá šojatsebacá, bēnga chē bacna soye jamama juabnēngaca mandánēnga ndētsemnana, y nyetsca tescama castigánēnga ndētsemnana, mo Bēngbe Bētsabe bominiñe nyetsca tescama obanēnga cuaftsemncá. Chē Uámana Espíritu jamana bēnga ndegombre tšabe vida chamotsebonnana, cánýiñe mo canýacá Cristo Jesúseftaca jtsemnēse. <sup>3</sup> Bēngbe

Bëtsá tojanma ndayá Moisesbe ley ndoñe tonjanobenacá, er entšanga mondoyena nÿe ntšamo cachënga imobošcá, y nÿe cánÿenga ndoñe ntsoberenana jamana ntšamo tojtsamncá. Bëngbe Bëtsá tojánayana entšángbeñe bacna juabnëngbe mando jtseepochó-cama ca, y chama chabe Uaquiñá tbojanichmó. Cha quem luaroye mo canÿe entšacá tojánabo, canÿe ainánaca, mo chë entšanga bacna soye amëngbe ainancá, pero ndocna te ni mo canÿe bacna soye ndoñe tonjëftsema; y tojánabo, chábeyeca entšanga bacna soyëngama perdonánënga chamotsemnana. <sup>4</sup> Bëngbe Bëtsá chca tojanma, bënga chë mora oyenënga jtsamëse ntšamo chë Uámana Espíritu ainaniñe yomandacá y ndoñe nÿe ntšamo bënga entšanga tmojtsebošcá, chamobenama tšabá jamana ntšamo chë leyinÿe yomandancá, ntšamo šojtsamncá.

<sup>5</sup> Chë nÿe cachënga tšabá jtsomñama cachëngbe juabnëngaca imoyenënga, nÿe sempre jésejuabnayana bacna soyënga jtsamama, chca bacna juabnëngaca mandánënga; pero ntšamo chë Uámana Espíritu ainaniñe iuamëndacá oyenëngna, sempre jésejuabnayana tšabe soyënga jamama, ntšamo chë Uámana Espíritu yobošcá. <sup>6</sup> Ntšamo chë nÿe cachá tšabá jtsomñama juabnëngaca mandaná oyenentšana jóbocnana entšá nÿetsca tescama castiganá chaotsemnana, mo Bëngbe Bëtsabe bominiñe nÿetsca tescama obaná cuaftsemncá; y ntšamo chë Uámana Espíritu tojtsemandacá oyenentšana jóbocnana chë nÿetsca tescama yomna tšabe vida jtsebomnana y ainaniñe tšabe ebionana. <sup>7</sup> Chë nÿets tempo oyenënga nÿe ntšamo tmojtsebošcá nÿe cachënga tšabá jtsomñama jtsejuabnayëse, Bëngbe Bëtsabe uayayënga jtsemnana, er chënga ndoñe ntsamana ntšamo cha tojtsamëndacá, y chca jamama ndoñe ntsoberenana; <sup>8</sup> y chca, chë nÿe chca bacna juabnëngaca oyenënga, ndoñe ntsoberenana jamana ntšamo Bëngbe Bëtsá tšabá tbojtsinÿancá.

<sup>9</sup> Pero tšëngaftanga ndoñe quešmátiyena nÿe cach tšëngaftanga tšabá jtsomñama cach tšëngaftangbe juabnëngaca, sinó šmojtsiyena ntšamo chë Uámana Espíritu tšëngaftangbe ainaniñe cmamëndacá, er chë Uámana Espíritu sempre tšëngaftangbe ainaniñe iuétsemna. Nda ndoñe quem Cristbe Espíritu tondbomná, ndoñe Cristbia ntsemnana. <sup>10</sup> Pero Cristo sempre tšëngaftangbe ainanentše vida totsóbomñëse, masque tšëngaftangbe cuerpënga yochjopochóca, quem luarentše entšanga bacna soyënga jtsamana causa, tšëngaftangbe espíritu nÿets tempo vida echanjesóbomñe, er Bëngbe Bëtsá tojama tšëngaftanga chabe bominiñe tšábënga chašmotsemnana. <sup>11</sup> Y Bëngbe Bëtsabe Espíritu, Jesús cháuatayenama tojamabe Espíritu, sempre tšëngaftangbe ainaniñe tojtsemnëse, Bëngbe Bëtsá, chë Cristo cháuatayenama tojamá, echanjama chë tšëngaftangbe yochjóbona cuerpo, cachiñe vida chaotsatsbomnana. Cha chca echanjama chabe Espíritoftaca, y mua sempre tšëngaftangbe ainaniñe iuétsemna.

<sup>12</sup> Chcasna, Jesucristbeyeca catšátanga, šontsamna jtsiyenana ntšamo chë Uámana Espíritu ainaniñe šuamëndacá; ndoñe quešnátamna jtsiyenana nÿe bënga tšabá jtsomñama cabëngbe bacna juabnëngaca; <sup>13</sup> er nÿe bënga tšabá jtsomñama cabëngbe bacna juabnëngaca šmojtsiyenëse, castigánënga šmochántsemna, mo Bëngbe Bëtsabe bominiñe obanënga cuaftsemncá; pero Uámana Espíritbeyeca, chca juabnëngaca nÿetsca bacna soyënga jtsamana jtsajbanama šmojobenase, chë nÿetsca tescama yomna tšabe vida šmochántsebonna.

<sup>14</sup> Ntšamo chë Uámana Espíritu yomandacá tmojtsamëngna, Bëngbe Bëtsabe básënga jtsemnana. <sup>15</sup> Er Bëngbe Bëtsá ndoñe tonjama bënga ainaniñe canÿe espíritu chamotsebonnana, mo nÿe ínÿabiama nÿets tempo oservenëngcá chašotsamëndama, y chca cha chaoma bënga cachiñe chamotsëuatjama; sinó chë Bëngbe Bëtsá tojama bënga chamotsebonnana Espíritu jamana bënga Bëngbe Bëtsabe básënga chamotsemnana, y chë Espíritu endama “Atšbe Taitá ca” bënga Bëngbe Bëtsá chamotsechembuanama. <sup>16</sup> Y chë Uámana Espíritu y bëngbe espíritu canÿe ora jayanana bënga Bëngbe Bëtsabe básënga imomna ca. <sup>17</sup> Y Bëngbe Bëtsabe básënga mondménayeca, béngnaca mochan-

jóyëngacñe ndayá cha chabe básenga jatsatayama tojašebuachenacá; bënga y Cristo cányiñe chë soyënga mochanjóyëngacñe, er bënga inye soyënguiñe tmojasufrí cachcá ntšamo Cristo tojansufricá, Bëngbe Bëtsá uámanënga y bëtsétsanga chásuabiamama, ntšamo cach Cristo yomncá.

*Bëngbe Bëtsá bëtsétsanga y uámanënga šochjábiamama*

<sup>18</sup> Atše ndegombre sëndétatšëmbo, ntšamo quem tempo bënga imosufrincá, puerte batšatema yomna chë bëngbe tšabiamama uámanana y buashinjinyanana Bëngbe Bëtsá šochjínjanjyiyama. <sup>19</sup> Lempe ntšamo Bëngbe Bëtsá tojamcá endmëna mo tša cuaftsobatmancá, chaobuache chë Bëngbe Bëtsá ntšamo chabe básenga imomnana jinjanjyiyama ora. <sup>20</sup> Er lempe ntšamo Bëngbe Bëtsá tojamcá, mora ndoñe yontsoservena ntšamo chaotsemnana cha tojanjuabocá. Chca tojanopasá, ndoñe chë lempe ntšamo cha tojanmcá chca chaotsemnana tojánbošenayeca, ndayá cabá chë soyënga tojanmentšana, Adán bacna soye tojanmentšana, Bëngbe Bëtsá tojanjuabó ntšamo cha tojanmcá joserviama ndoñe ndayama ntšamo cha tempo tojanjuabocá. Pero lempe ntšamo Bëngbe Bëtsá tojanmcá entsemna mo cuaftsobatmancá canye te, ndëmua ora chë soyënga chaoservema cha yochjamama jtsetatšëmbëse, ntšamo quem luare jobojátšama ora chama cha yojanjuabnacá; <sup>21</sup> Bëngbe Bëtsá canye te yochjama lempe ya ndoñe más chaondetsopochocama. Y chora, ntšamo Bëngbe Bëtsá yochjamcá chabe básenga chamotsemnana, lempe ntšamo cha yojanjuabnacá, chabe uámanana y buashinjinyanana jtsebomnana, cachcá yochjama lempe chë cha tojanma soyëngaca.

<sup>22</sup> Er bënga mondétatšëmbo lempe ntšamo Bëngbe Bëtsá tojanmcá méntscoñama yomna mo canye shembása šešona jtsebomnana ora tbojtsetsetsama tojtsobësnacá; er lempe ntšamo cha tojanmcá entsemna mo tša cuaftsebošcá Bëngbe Bëtsá chaomama, chë soyënga chaoservema ndayama cha tempo tojanjuabocá. <sup>23</sup> Pero ndoñe nye chë lempe ntšamo Bëngbe Bëtsá tojanmcá yojtsemna mo chë shembasacá, sinó béngnaca; y bënga ainaniñe mondbomna chë Uámana Espíritu, y chë soye endmëna ndayá natsana bënga tmojanóyëngacñe, chë Bëngbe Bëtsá bëtscá soyënga šochjátšatayentšana; bënga bëngbe ainanoca tša jesobësnayana, bënga chabe básenga chamotsemnana Bëngbe Bëtsá chaomama mondobátmanëntscuana, y chca, Bëngbe Bëtsá chaoma bënga ndocna te ndopochócama cuerpënga chamotsebomnana. <sup>24</sup> Bënga, Bëngbe Bëtsábeñe jtsošbuáchiyëse monjobátmana ntšamo cha tojanayancá chaomama, y chíyeca cha bënga šojatsebacá; pero ndayama tmobatmancá, ya tojtsëchnëjuanama bënga tmojtsonjase, chora chama ya ndoñe ntjatóbatmanëngana. Er ndocná jatobátmanana chë ndayá jinjama ya tojobenacá. <sup>25</sup> Pero ndayama bënga tmobatmancá, cabá ndoñe jinjama tmontsobena soye tojtsemnëse, bënga jtsamnana Bëngbe Bëtsábeñe jtsobátmanana, uantadënga jtsemnëse, ntšamo tojayancá Bëngbe Bëtsá chaomëntscuana.

<sup>26</sup> Uámana Espíritnaca bënga šochandbëtsëjabuachana, er bënga ainaniñe ndoñe corente ntsošbuáchiyana. Bënga ndoñe quemuatstatšëmbo Bëngbe Bëtsáftaca jencuëntana ntšamo ndegombre tšabá yomncá; pero cach Espíritu Bëngbe Bëtsábioye bëngbiamama jtsotjanañana, mo chca ora chabe ainanoca tša cuaftsobësnacá; y ndayá chca ora tbojtsotjanañamna, bënga ndoñe ntjobenayana bëngbe palábraca chama jóyëbuambayama. <sup>27</sup> Y Bëngbe Bëtsana, ntšamo entšanga ainanoca tmojtsebošcá yonýá, y ntšamo chë Espíritu jayanama tojtsebošcá yotátšëmbo, er chë Espíritu chabe entšangbiamama ibotjanañe, ntšamo Bëngbe Bëtsá yobošcá.

*Bënga ayénjanayëngama más tmojábocana*

<sup>28</sup> Y bënga mondétatšëmbo, Bëngbe Bëtsá nyetsca soyënguiñe inétsama cha imobobonshánëngbe tšabiamama, ndëmuanjyënga cha tojáchembo chabe entšanga chamotsemnana, ntšamo cha jamama yojanjuabnacá. <sup>29</sup> Jesucrístbeñe imošbuachëngbiamna, Bëngbe Bëtsá quem luare tojanma orscana yojanjuabná y chënga tojanabacacá chca chamotsemnana, y chë tempscana tojaninjaná chënga

chabe Uaquiñacá chamotsemnana; chca, chabe Uaquiñá chë bëtsá catsátangbeñe chë natsaná chaotsemnana. <sup>30</sup> Y chë Bëngbe Bëtsá chca tojánabacacangnaca, tojánachembo chabe entsanga chamotsemnana; chëngbiamá tojanma chabe bominyiñe tsábenga chamotsemnana, y chëngbiámnaca yochjama chabe uámanana y obenanentsana chamotsebonnana.

<sup>31</sup> Y asna, ¿chë soyëngama ntšamo mochjayana? Co Bëngbe Bëtsá béngaftaca tojtsemnëse, bënga jáyënjana ndocná queochatobenaye ca. <sup>32</sup> Cha tondaye tonjanma chabe Uaquiñá jasúfriama ndoñe chabondëtsemnana, sinó tojanalesenciá entsanga chamóba, nyetsca bëngbe tsábiamá. Bëngbe Bëtsá chabe Uaquiñáftaca chca tojanmëse, ndegombre Bëngbe Bëtsá lempe šochanjátšataye. <sup>33</sup> ¿Nda nanjobenaye jayana chë Bëngbe Bëtsá tojábacacanga bacna soyënga tmojama y castigánënga chamotsemna ca? Ndocná; er cach Bëngbe Bëtsá endmëna nda tojayana bënga chabe bominyiñe tsábenga imomna ca. <sup>34</sup> Y asna, ¿nda nanjobenaye jayana bënga castigánënga jtsemnana šojtsamna ca? ¿Cristo Jesús cha yojtsemna? Ndoñe. Cristo, nda bëngbiamá tojanóbana, pero cabá más, ndabiamá Bëngbe Bëtsá tojanma cháuatayenama, y mora Bëngbe Bëtsabe catsbioica yojtsetbemana, jamándama y puerte bëtsá chentše jtsemnana; y choca, chánaca bëngbiamá Bëngbe Bëtsábioye ibotjanañe. <sup>35</sup> ¿Ndayá nanjobenaye Crístbentsana, chë tša šondababuanyëshanábentsana bënga jtsajuánayana? ¿Padecena soyënguiñe jtsemnana, tša jtsetsetšana, bënga chamosufrima ínÿenga tmojtsama ora, tondaye saná shëntsana ora, tondaye entsáyá tmontsábomna ora, o resjo bëngbiamá tojtsemna ora, o bënga jtsëbáyama ínÿenga tmojtseboše ora? <sup>36</sup> Ntšamo Bëngbe Bëtsabe uabemana palabrënguiñe endayancá, canÿe entsá Bëngbe Bëtsábioye ibojauyana ora: Acbe causa entsanga cada te šontsëtsëtsná bënga jtsëbáyama ca;

entsanga bëngbioye nÿe ntšámnaca jtsaborlánana;

bëngaftaca jamana mo chë jobáyama oveshëngaftaca mondbetsamcá ca.

<sup>37</sup> Pero ndoñe; nyetsca chë soyënguentšana bëngna ayénjanayëngama más tmonjábocana, cha bënga šuababuánÿeshanayeca. <sup>38</sup> Er atše tsábá sëndétatšëmbo tondaye yondobena, bënga Bëngbe Bëtsábentsana, chë tša šondababuanyëshanábentsana jt-sajuánayana: masque ainënga o obanënga tmojtsemna; ni angelënga, ni amëndayënga chca jamama quemátobena; ni chë mora yojtsëchnëjuana soyënga, ni chë más chcoye yochjopása soyënga; ni ndocna obenana cach ndoñe; <sup>39</sup> ndocna quem luarentša tsabanánoca soye, ni quem luarentša tajsoica soye; ni ndocna inÿe soye ntšamo Bëngbe Bëtsá tojamcá, quenátobena chca bënga jtsajuánayama. ¡Ndocna soye quenátobena bënga Bëngbe Bëtsábentsana, chë bënga šondababuanyëshanábentsana jtsajuánayana, chë Cristo Jesús Bëngbe Utabnáftaca Bëngbe Bëtsá šojanÿanÿé bonshánentsana!

## 9

### *Bëngbe Bëtsá Israeloca entsanga tojabacacá, uámanënga chamotsemnana*

<sup>1</sup> Atše, Crístoftaca cánÿiñe mo canÿacá quetsomñecana, ntšamo sentsichamcá ndegombre endmëna; atše ndoñe quetsátsbostero. Atšbe ainanoca juabnënga, Uámana Espíritbeyeca jtsemandánëse, chë šmonybëuyana tsábá o ndoñe tsábá tijamama, š-montsatsëtsná atše ndoñe stsebosterama. <sup>2</sup> Ndegombre, atše puerte ngmënaca atšbe entsangbiamá, chë Israeloquëngbiamá séntsemna y atšbe ainana tša šontsetsetše, chënga Jesucristbeñe jtsošbuáchiyama ndoñe quemátsboše causa. <sup>3</sup> Tsábá tojtsemnëse, atše stjobenaye jtsebošana cach atše Bëngbe Bëtsábeyeca nyetsca tescama castiganá y Crístbentsana luaroca jtsemnana, atšbe entsanga, chë cach atšcá buiñe bomna entsanga jujabuáchama. <sup>4</sup> Chënga mondmëna chë Israeloca entsanga, chë Bëngbe Bëtsabe bocacana entsanga. Bëngbe Bëtsá chënga chabe basengcá tojánabiamá y chë tša bëtsá y uamaná cha yomnana chënga tojaninÿanÿé. Bëngbe Bëtsá ba soye chënga tojanabuayená ndayá cha chëngbiamá yojánboše y ndayá chëngbiamá jamama, y chë ley chëngbe cucuatšïñe tojanáboshjona. Chënga monjántatšëmbo ntšamo Bëngbe

Bëtsábioye ndegombre jadórana, y chënga mondbomna chë Bëngbe Bëtsabe šbuachenánana: chënga cha játsebacana. <sup>5</sup> Chënga mondmëna chë bëngbe tempsca uámana bëts taitangbentsánënga, y Crístnaca mo canye entsacá, mo canye Israeloca entsangbentsacá tojánabo; y cha endmëna Bëngbe Bëtsá, nyetsca soyënguiñe mandayá. Nyetsca entsanga nyets tempo cha chamotsatschuaná. Chca chaotsemna.

<sup>6</sup> Atše ndoñe quetsátichamo, ndayá jamama tojanašebuachenacá ndoñe Bëngbe Bëtsá tonjama ca; er, nyetsca Israeloca entsangbentsënga ndoñe Bëngbe Bëtsabe ndegombre entsanga quemátsmëna. <sup>7</sup> Ni nyetsca Abrahámbentšana entsanga, ndoñe chabe ndegombre básenga quemátsmëna; er Bëngbe Bëtsá Abrahámbioye tbojaniana: “Chë ácbentšana entsanga nye Isaácbentšana mochanjabo ca.” <sup>8</sup> Chca entsayana, bëngna ndoñe šontsamna jtsejuabnayana Abrahámbentšana nyetsca entsangbiama mo Bëngbe Bëtsabe basengcá; inyetsá, nye chë Bëngbe Bëtsá tbojanšbuachenáyeca Abraham yojánabamna básengbiama cocayé entsemna jtsejuabnayana, Abrahámbentšana ndegombre entsanga bëtsemnama. <sup>9</sup> Er mëntsá endmëna ntšamo Bëngbe Bëtsá tojánayana, Abrahámbioye tbojanšbuachená ora: “Camëntša tempo entsba uata chanjésabo, y Sara canye šešona bochántsebmoma ca.”

<sup>10</sup> Pero nye nyetsá ndoñe quenátsmëna. Chë Rebecbe uta básatna canye taitá ibnabomna, bëngbe tempsca bëts taitá Isaac. <sup>11-12</sup> Bëngbe Bëtsá, Rebécbioye tbojaniana: “Acbe mayor uaqiñá, acbe ngomënche uaqiñábioye bochanjasérvia ca.” Cha chca tojánayana jinýinyiyama chë básatbentšana canya cha tbojánbocacama, Jacob, y ndoñe chë inye basa, Esaú, chca jamama tempo cha tojanjuabóyeca. Rebécbioye chca tbojaniana chë básata cabá ndonýna ora, y ni canye basa cabá ndocna soye ndama ora. Y chca, ntšamo tojanopasacana, tojanopasá chë básatbentšana canya y ndoñe chë inya chca chaotsemnama Bëngbe Bëtsá tbojanábuayanayeca, y ndoñe ndayá chata tbojanmama. <sup>13</sup> Ntšamo Bëngbe Bëtsá chabe uabemana palabrënguiñe tojanayancá: “Jacob sënjanbobonshana, y Esaú sënjanáboyënja ca.”

<sup>14</sup> Y asna, ¿ntšamo mochjyana? ¿Bëngbe Bëtsá ndoñe cachcá nyetscángaftaca endëtsemna ca? ¿Ndoñe, ndegombre ndoñe! <sup>15</sup> Er Bëngbe Bëtsá Moisésbioye tbojaniana:

Atše šochanjóngmia nda chaitsebošabiama, y nda chaitsebošá chanjalastéma ca.

<sup>16</sup> Y chca, Bëngbe Bëtsá canye entsá jabocacayana, ndoñe ndayá chë entsá tojtsebošama o tojamama, ndayá Bëngbe Bëtsá tbojalastemama. <sup>17</sup> Er Bëngbe Bëtsabe uabemana palabrënguiñe, Faraón chë Egiptoca réybioye cha tbojaniana: “Atše rey tcbonjábema, tša bëtscá atšbe obenana yomnama nyetscanga ábeñe chayinýanýema, y nyets luarentša entsanga atšbiama chamotatsëmbonama ca.” <sup>18</sup> Y chca, Bëngbe Bëtsá jalastémama nda tojtsebošábioye, y nda tojtsebošábioye jaleséciana chabiama nduauenaná chaotsomñama.

<sup>19</sup> Pero ndánaca tšëngaftanguentsá šuatjatjaye: “Bëngbe Bëtsá chca tojtsamëse, ¿ntšamo cha nantsobena jayanana canye entsá bacna soye tojama ca? ¿Nda nanjobenaye chë ndayá Bëngbe Bëtsá tojtsebošama corente contra jtsemnana?” <sup>20</sup> Pero, nye entsá quecotsemñecá, ¿ntšamo catjobenaye tša uamaná comna ca jtsejuabnayana, Bëngbe Bëtsá jatstjanayama ndáyeca canye soye chca yojtsama ca? ¿Chë pormana soye chë chca tojamábioye buanjauyana: “¿ndáyeca chca šcojama ca?”? <sup>21</sup> Chë fshantse soyënga pormayá jtsobenana canye fshantsentsana jamana, canye matbaja uámana tescama, y inyajna cada te chaotsoservénama. Cachcá, Bëngbe Bëtsá jtsobenana jamana ntšamo cha tojtsebošcá, ndayá cha tojama sóyeca.

<sup>22</sup> Bëngbe Bëtsá yojáboše jinýanýiyama entsángaftaca tbojánatnama, chëngbe bacna soyëngama; y yojáboše cha puerte obená yomnama jinýanýiyama. Chíyeca, chënga tša yojanëuantana, chënga chë ndëmuanýengbiama Bëngbe Bëtsá yochjánayana chëngbe bacna soyëngama castigánënga jtsemnama yojánamna ca, chë ndëmuanýenga jtsapoc-hócama Bëngbe Bëtsá yojtsanprontana. <sup>23</sup> Y chánaca yojáboše jinýanýiyama cha

puerte uamaná y bĕtsá yomnama. Cha tojama, bĕnga chĕ ndĕmuanĕnga cha šo-janalastemá, chabe obenanentsana y uámananentsana chamotsebomnama; y cha tempo chca tojanjuabó bĕnga uámanĕnga y bĕtsĕtsanga jábiamama. <sup>24</sup> Bĕnga mondmĕna chĕ ndĕmuanĕnga Bĕngbe Bĕtsá chama šojánachembo, ínĕngna judío entsanguentsana, y ínĕngna ndoĕne judiĕngbentsana. <sup>25</sup> Ntšamo chabe uabemana palabrenguĕne, Oséasbe librĕšaĕne Bĕngbe Bĕtsá tojanayancá:

Entšanga ndoĕne átšbenga mondmĕnĕnga, chĕnga “atšbe entsanga ca” chantsĕbobuatma;

y canĕ luarentša entsanga ndoĕne sĕnjánababuanĕshanĕnga, chĕngna “atšbe bonshánĕnga ca” chantsĕbobuatma.

<sup>26</sup> Y cach luare ndayentše Bĕngbe Bĕtsá tojánayana: “Tšĕngaftanga atšbe entsanga ndoĕne quešmátsmĕna ca”,

cachentše Bĕngbe Bĕtsá ainá chĕnga echanjáuyana “atšbe básenga ca”.

<sup>27</sup> Israeloca entsangbiama, Isaías jabuachana tojánayana:

Masque Israeloca entsanga puerte banga chamotsemna, nĕna mo chĕ mar béjayoca chĕnyāne casajcá,

Bĕngbe Bĕtsá nĕe báseftanga chentšana echanjátsebacaye;

<sup>28</sup> er, ndoĕne bĕn y Bĕngbe Utabná canĕ y nĕetsca tescama echanjayana,

nĕets quem luarentša entsangbiama ndayá chĕnga tmojamama tšabá o ndoĕne tšabá bĕtsemnama,

y chĕngaftaca echanjama ntšamo chaojayancá ca —cha tojánayana.

<sup>29</sup> Ntšamo Isaías tojanayancá, Bĕngbe Bĕtsá Israeloca entsangaftaca ntšamo jamama tojanoyebuambá ora:

Bĕngbe Utabná, nĕets obenana bomná,

ínĕngna bĕnga jtsapochócama cha tojanalesenciá ora,

báseftanga bĕngbe entsanguentsĕnga ainĕnga chamotsomĕnama ndoĕne matĕnjanmĕse,

bĕnga mora pochocánĕnga mamojtsemna, mo chĕ Sodoma y Gomorra pueblĕngoca entsangcá ca,

cha nĕetscanga y nĕetsca tescama tojtsanapochócaye ca.

### *Israeloca entsanga y chĕ tšabe noticiĕnga*

<sup>30</sup> Chcasna, mora mĕntšá mochjayana: ndoĕne judiĕnga tondaye monjánama Bĕngbe Bĕtsabe bominiĕne tšábenga jtsemnama, pero cha tojanma chĕnga chabe bominiĕne tšábenga chamotsemnama, chĕnga chábeĕne imojtsošbuáchiyama. <sup>31</sup> Pero, Israeloca entsanga imojánboše Bĕngbe Bĕtsabe bominiĕne tšábenga jtsemnama, ntšamo chĕ leyiĕne iuayancá jtsamĕse; pero ndoĕne chca tmonjanobená. <sup>32</sup> ¿Y ndáyeca chca? Co chĕ Bĕngbe Bĕtsabe bominiĕne tšábenga jtsemnama, chábeĕne jtsošbuáchiyĕse, chĕnga tondaye monjánama causa chca, sinó chca jtsemnama imojánboše nĕe ntšamo leyiĕne iuayancá jtsamĕse. Y chca, chĕngna Jesús tmojtsanaboté, ntšamo chĕ Bĕngbe Bĕtsabe uabemana palabrenguĕne chĕ tmojtsanábotengbiama endayancá, chĕngbiama cha yomna mo chĕ ndĕtšbé ndayiĕne chĕnga jtsojestjamcá ca. <sup>33</sup> Bĕngbe Bĕtsabe uabemana palabrenguĕne cha chca tojánayana:

Šmochjinĕ, atše sĕnjama Jerusalenentše canĕna chaotsemna, y cha endmĕna mo ndĕtšbecá ndayentše chĕnga mochjojestje,

y canĕ peñĕscá ndayĕše yochjama chĕnga chamotsótsatšama;

pero ndá chábeĕne tojtssošbuaché, ndocna te nĕe bonamente queochátobatmana ca.

## 10

<sup>1</sup> Jesucristbeyeca catsátanga, atše nĕets ainánaca séntseboše y Bĕngbe Bĕtsá séntseimpadana, cha Israeloca entsanga cháuatsebacama. <sup>2</sup> Atše sĕndĕtatšĕmbo y séntsobena chĕngbiama jayanama, chĕnga puerte mondboše Bĕngbe Bĕtsá jaserviama, pero ntšamo chĕnga yojtsĕsertancá, ntšamo Bĕngbe Bĕtsá jaserviama yojtsamnamna, ndoĕne

quenátsmëna ntšamo ndegombre yomncá. <sup>3</sup> Chënga ndoñe tonjanësertá ntšamo Bëngbe Bëtsá inétsama entsanga chabe bominyiñe tsábenga chamotsemnana, y cachënga tmojáanguango ntšamo jamëse jobenayama Bëngbe Bëtsabe bominyiñe tsábenga jtsemnana; pero ndoñe chca tmonjanobená, chë entsanga chabe bominyiñe tsábenga chamotsemnana ntšamo Bëngbe Bëtsá inetsamcá ainánaca ntjoyëngacñëcá. <sup>4</sup> Er Cristo tojama entsanga ndoñe chamondétsama ntšamo leyiñe iuayancá, Bëngbe Bëtsabe bominyiñe tsábenga jtsemnana, chca, chënga chamobenama chabe bominyiñe tsábenga jtsemnana, Crístbeñe jtsošbuáchiyëse.

<sup>5</sup> Chë Bëngbe Bëtsabe bominyiñe tsábenga jtsemnana bošëngbiama, ntšamo leyiñe iuayancá jtsamëse, Moisés mëntšá tojánayana, chëngbiama tojanábema ora: “Nda tojtsama nyetsca mandënga ntšamo leyënguiñe endayancá, tsabe vida echántsebomna, nyets tempo chë leyëngaca mandaná ca.” <sup>6</sup> Mëntšá endmëna ntšamo Bëngbe Bëtsabe uabemana palabrënguiñe iuayana, entsanga chabe bominyiñe tsábenga chamotsemnana ntšamo cha inétsamama, Jesucristbeñe jtsošbuáchiyëse: “Ndoñe cattsetjanaye: ‘¿Nda celoye yochjátsjua ca?’ (chca endmëna ndayá Cristo quem luaroye chaotsmama); <sup>7</sup> o, ‘¿Chë obanënga imomna luaroye yochjátsma ca?’ (chca endmëna ndayá Cristo chë obanënga imomna luarentšana chaotsjuama).” <sup>8</sup> Ntšamo Bëngbe Bëtsabe uabemana palabrënguiñe iuayancá mëntšá endmëna: “Tšëngaftanga paselo šmontsobena ntšamo Bëngbe Bëtsá tojabuayenacá jouenama, tšëngaftanga ya chama palabrëngaca šmojoyebuambá y tšëngaftangbe ainaniñe chama šmojtsejuabná.” Chë buayenánana endmëna ndayá bënga ftsabuayiynacá, y chiñe endayana Jesucristbeñe jtsošbuáchiyama šojtsamna ca. <sup>9</sup> Chë buayenana soyënguiñe endayana, Jesús ndegombre Bëngbe Utabná yomna ca aca tcojayanëse, y Jesucristo cháuatayenama Bëngbe Bëtsá tojanmama, nyets ainánaca tcojtsošbuáchese, Bëngbe Bëtsá cmochjatsbocá ca. <sup>10</sup> Er ainanoca bënga Jesucristbeñe jtsošbuáchiyana y Bëngbe Bëtsá jamana cachabe bominyiñe tsábenga chamotsemnana; palabrëngaca bënga jinýanjyiyana ndegombre Jesucristbeñe imojtsošbuáchema, y Bëngbe Bëtsá bënga játsebacana.

<sup>11</sup> Er Bëngbe Bëtsabe uabemana palabrënguiñe mëntšá endayana: “Nda Bëngbe Bëtsábeñe tojtsošbuaché, ndocna te nýe bonamente queochátobatmana ca.” <sup>12</sup> Judiënga y ndoñe judiënga atsebácanënga mondmëna cach sóyeca, er canýe Utabná nyetscangbe Utabná endmëna, y cha tmojtsotsëmbuanëngbiama, cha bëtscá jtsamana. <sup>13</sup> Er Bëngbe Bëtsabe uabemana palabrënguiñe mëntšá endayana: “Ndánaca Bëngbe Utabná tbojtsotsëmbuanábioye, cha bochanjatsbocá ca.” <sup>14</sup> Pero, ¿ntšamo cha mochjótšëmbona, chábeñe ndoñe tmontsošbuáchese? ¿Y ntšamo chábeñe mochtsošbuáchiye, chabiama jóyebuambayama ndoñe tmonjouenëse? ¿Y ntšamo chabiama mochjouena, chabe buayenana soyënga chënga jáuyanama ndocná tontsemnëse? <sup>15</sup> ¿Y ntšamo chabe buayenánana mochtsabuátambaye, chëngbioye jíchamuama ndocná tontsemnëse? Ntšamo Bëngbe Bëtsabe uabemana palabrënguiñe endayancá: “¡Tša tsábá chë buayenánana abuátambayënga tmojáshajjna ora ca!”

<sup>16</sup> Pero nyetscanga chë tsabe noticiënga ndoñe ntjoyeunayana. Cach Isaías mëntšá tojánayana: “Utabná, ¿nda chë mondabuayiyná soyënguiñe yojtsošbuaché ca?” <sup>17</sup> Chcasna, chë tsabe noticiënga jouenëse, entsanga jobenayana Jesucristbeñe jtsošbuáchiyana; y nda Cristbiana tojtsabuayiynase, entsanga chabe buayenánana jouenana.

<sup>18</sup> Pero atše šcotjá: ¿ndegombre nandmëna judiënga chë buayenánana ndoñe tmonjanuena ca? ¡Aíñe, chënga aíñe tmonjanuena! Ntšamo Bëngbe Bëtsabe uabemana palabrënguiñe endayancá, chë Bëngbe Bëtsabe buayenana soyëngama oyebuambnayëngbiama:

Chëngbe oyebuambnayana nyets quem luariñe tojóshjango,

y chëngbe palabrënga nyets luarënguentša entsangbenache tojuáshana ca.

<sup>19</sup> Pero cachiñe šcotjá: ¿Israeloca entšanga chë buayenánana ndoñe tonjanësertá ca? Natsana, Moisés mëntšá tojánayana, chë ndoñe judiënga Jesucristbeñe tmojtsošbuaché ora, ntšamo chë judiënga mochtsanjuabnayama tojanoyebuambá ora:

Atše, Bëngbe Bëtsá, chanjama, ndayá chë ndoñe judiënga chamojashjache soyëngama tšëngaftanga chašmotsiyentšbuašama, chënga chë ndoñe monjamna mo tšëngaftangcá atšbe entšanga.

Atše chca chanjama chëngaftaca, chënga chë tempo Bëngbe Bëtsabe soyëngama ndoñe tonjanësertá ca.

<sup>20</sup> Isaíasnaca, Bëngbe Bëtsabiana tojanoyebuambá ora, puerte añémoca tojánayana: Chë atše ndoñe šmondënguanga, šmonjínýena;

y chë atšbiana ndoñe mondënotíangbioye sënjenonýinýé ca.

<sup>21</sup> Pero Israeloca entšangbiana mëntšá tojánayana:

Nýets tempo atše tša sënjánama, chënga átšeftaca tšabá tempcá chamotsatsmënama, pero chënga ndoñe chemátanbošena jouenama, y atšbe contra monjëtsemna ca.

## 11

### *Bëngbe Bëtsá, Israeloca entšangbiana tšabe juabna yobomnama tojinýanjé*

<sup>1</sup> Y as mora šcotjá: ¿Bëngbe Bëtsá chabe entšanga tojtsanëbaté? ¡Ndoñe, ndegombre ndoñe! Cach atše canýe Israelocá sëndmëna, Abrahámbeñe entšá y Benjaminbe bëts pamillentsana entšá. <sup>2</sup> Bëngbe Bëtsá chabe entšanga ndoñe tonjubaté, chë tempscana tojánabacacanga. Tšëngaftanga šmondëtatšëmbo ntšamo Bëngbe Bëtsabe uabemana palabrënguñe endayancá, Bëngbe Bëtsabe juabna oyebuambnayá Elías, Israeloca entšangbe contra Bëngbe Bëtsábioye cha ibojanatsëtsná ora: <sup>3</sup> “Bëngbe Utabná, acbe juabna oyebuambnayënga tmojtsëbaye y acbiana pormana altarënga tmojtsepochozá; nýe atše vídaca tijoquedá, y chënga montseboše átšnaca jóbama ca.” <sup>4</sup> Y mëntšá Bëngbe Bëtsá tbojanjuá: “Atše canýsëfta uaranga boyabásenga atšbiana sënjacuedá, Baal ndoñe tmonjadoranga, ndayá entšanga tmojobopormá y imojtsejuabná canýe dios yomna ca.” <sup>5</sup> Mórncaca cachcá entsemna, judiënguentšë báseftanga monduájamna Jesucristbeñe ošbuáchiyënga, ndëmuanyënga Bëngbe Bëtsá tojabacacá, cha chëngbiana tšabe juabna bómnyeca. <sup>6</sup> Bëngbe Bëtsá entšanga jabacacayana chëngbiana tšabe juabna bómnyeca; y ndoñe chca ntjamana ndayá entšanga tmojamama. Er ndayá tmojamama Bëngbe Bëtsá entšanga tojabacacase, cha nanjínýanjíye cha chca inétsama, ndoñe nýe chëngbiana tšabe juabna bómnyeca.

<sup>7</sup> ¿Y asna? Israeloca entšanga ndoñe chemátaninýena ntšamo Bëngbe Bëtsabe bominyñe tšábenga jtsemnana, pero chënguentšënga básefta bocacánëngna aínë tmojanobená. Bëngbe Bëtsá tojanalesenciá chë ínýenga Israeloquënguentšana chabe buayenana soyënga ainaniñe ndoñe chamondóyëngacñama; <sup>8</sup> ntšamo Bëngbe Bëtsabe uabemana palabrënguñe endayancá: “Bëngbe Bëtsá tojama chënga chabe soyëngama jósertama ndoñe chamondëtsobenama, y mëntscoñama chënga ndoñe quemátobena chabe soyëngama ni jinýana ni josértana, mo nduabínýnënga o nduauenanënga cuaftsemnëngcá ca.” <sup>9</sup> Davídnaca chëngbiana mëntšá tojánayana:

Mo chë entšanga canýe fiestentšë oboyejuayënga, chëngbe uayayéngbeyeca nýe ndeolpe ishëchenëngcá,

y mo chë bayëngbiana uachmaniñe ishëchenëngcá, chënga mal chamopasama chaomama Bëngbe Bëtsá sëntseimpadana, mo nda ndëtšbeñe cuaftsojestjá.

Chca Bëngbe Bëtsá chaoma, chëngbe bacna soyëngama;

y cha cháuyana chënga puerte castigánënga jtsemnana yojsamna ca, bacna soyënga tmojama causa;

<sup>10</sup> Bëngbe Bëtsá chaoma ntšamo mochjapásama chënga ndoñe chamondobená jtsetatšëmbuana,



y chaoma puerte chamosufrima, nyets tempo padecena soyënguiñe jtsiyenëse ca —cha tojánayana.

*Bëngbe Bëtsá ndoñe judiënga tojatsebacá*

<sup>11</sup> As mora šcotjá: ¿Israeloca entšanga Bëngbe Bëtsá ndoñe tmonjanoyeuná ora, cha tojánayana chënga nyetsca tescama castigánënga jtsemnana yojtsemna ca, ndocna inye soye chëngbiama ntsemncá? ¿Chëngbiama yojamna mo chë ndëtsbeñe jójëstjiana y jtëtsbanama ndoñe más ntjobenayancá? ¡Ndoñe, ndegombre ndoñe! Chca ndoñe quenátsmëna. Chënga Bëngbe Bëtsá ndoñe chematanoyeuná causa, ndoñe judiënga tmonjántatšëmbona ndayá bëtsemnana Bëngbe Bëtsábeyeca atsbocaná jtsemnana; y chë causa, mora, judiënga, ndayá chë ndoñe judiënga Bëngbe Bëtsábentšana tmojoshachiñcá montsíyentšbuaše. <sup>12</sup> Judiënga bacna soyënga tmojanma causa, inye entšanga quem luarentše tmojobená ba tšabe soyënga jtsebomnama. Chë judiënga tmonjanorre-bajá causa, chë ndoñe judiënga ba tšabe bendicionënga Bëngbe Bëtsábentšana tmojoshachiñe. Y chca, chë bëtscá judiënga Bëngbe Bëtsá jätsebacama, chënga atsebá-canënga chamojtsemna ora, más bëtscá tšabe bendicionënga Bëngbe Bëtsábentšana nyetsca entšangbiama echántsemna.

<sup>13</sup> Ntšamo mora chanjayancá, tšëngaftanga ndoñe judiëngbiama entsemna. Bëngbe Bëtsá šojichmó chabe soyëngama chë ndoñe judiënga jábuayenama; atše sëntsejuabná puerte uámana trabajo stsebomna ca. <sup>14</sup> Atše sëntsobátmana, quem trabájoca atše jobenayana jamama chë cach atšcá buiñe bomna entšanguentšënga, ndayá chë ndoñe judiënga Bëngbe Bëtsábentšana tmojoshachiñcá chamotsíyentšbuaše, y chca, ndayá tijamama, Bëngbe Bëtsá chënguentsana bášeftanga cháuatsebacama. <sup>15</sup> Er chë judiënga Bëngbe Bëtsá tojtšanëbaté ora, cha tojanma inye entšanga quem luarentše cháftaca tempcá tšabá chamotsatsmënama; y chënga cha chamojoyeuná ora, corente tšabá echántsemna, nya chënga mo obanënga cuabmëncá y cuaftsatayanëngcá. <sup>16</sup> Nda canye arninýentšana chë natsana tandëše Bëngbe Bëtsabiama josérviana yojtsemna ca tojayanëse, jtsemnana mo nyetsana chabiama cuaftsemncá. Canye betiyentša tbëtëjënga Bëngbe Bëtsabiama yojtsemna ca canya tojayanëse, nyetsca chë betiyentša buacuafjëngnaca Bëngbe Bëtsabiama jtsemnana.

<sup>17</sup> Chë judiënguentsë bášeftanga Jesucristbeñe ndoñe montsanošbuaché ora, tšëngaftanga chë ndoñe judiënga šmonjanobená chábeñe jtsošbuáchiyana. Y chca, judiënga monjamna mo canye jena olivo betiyentšana entšanga tmojatëtše buacuafjëngcá, y tšëngaftangna mo tjoca olivo betiyentša buacuafjënga, chë jena olivo betiyeshiñe jenëfjëngcá. Mora tšëngaftanga Bëngbe Bëtsábentšana cachca tšabe soyënga chë judiëngaftaca šmontsebomna, mo chë jena buacuafjënga y cachentša buacuafjënga cach tbëtëjentšana lempe cuaftsoyëngacañcá. <sup>18</sup> Ndoñe šmattsenábotamnaye, tšëngaftanga Bëngbe Bëtsabe tšabe soyënga šmojtsebomnama, chë Jesucristbeñe ndoñe montsanošbuaché judiëngbiama yojamna soyënga. Šmochtsejuabnaye, buacuafjëngna chë tbëtëjëngayeca vida jtsebomnana, y ndoñe tbëtëjënga chë buacuafjëngayeca; cachcá, tšëngaftanga nye Bëngbe Bëtsábeyeca chë tšabe soyënga šmojtsebomna.

<sup>19</sup> Pero tšëngaftanga šmuatjayana: “Aíñe, pero Bëngbe Bëtsá bášefta judiënga tojanëbaté, Jesucristbeñe ndoñe montsanošbuaché causa; chíyeca bënga fsënjanobená mo buacuafjënga betiyiñe jenëfjëngcá chca tšabe bendicionënga Bëngbe Bëtsábentšana jójëngacñana ca.” <sup>20</sup> Ndegombre, chënga Jesucristbeñe ndoñe montsanošbuaché causa, mo buacuetëtšëñfjëngcá tmonjanoquedá, pero Jesucristbeñe šmojtsošbuáchema, tšëngaftanga šmojoquedá Bëngbe Bëtsábentšana tšabe bendicionënga jtsoyëngacañcá. Chcasna, chama ndoñe šmattsenábotamnaye; más tšabana cuedado jtsebomnana. <sup>21</sup> Er Bëngbe Bëtsá, chë Jesucristbeñe ndoñe montsanošbuaché judiënga, ndoñe tonjanaperdoná, y chënga chabe entšanga bëtsemnamna, monjamna mo cach betiyentša buacuafjëngcá; tšëngaftanga, chë mo betiyiñe jena buacuafjëngcá šmomnënga, cha cach ndoñe quemochátaperdonaye, chábeñe ošbuáchiyana šmojtšajbanase.

<sup>22</sup> Bětsá šmochtsejuabnaye Běngbe Bětsá puerte tšabia yomnama, pero cha tšatjayá yomnámnaca šmochtsejuabnaye; tšatjayá endmēna chě bacna soyēnga tmojt-samēngaftaca, pero tšēngaftangaftacna puerte tšabia. Cha tšēngaftangaftaca chca echántsemna, tšēngaftanga chca chašmojtsomerecénēntscuana; pero ndóñesna, Běngbe Bětsá echanjama tšēngaftángnaca mo buacuetētšeněfjēngcá chašmoquedama, chě tšabe bendicionēnga Běngbe Bětsábentšana ntsoyēngacañcá. <sup>23</sup> Y ntšamo mora imojtsejuabnacá chě judiēnga tmojatrocá y tmojontšé Jesucristbeñe jtsošbuáchiyana, chēngnaca cachiñe chě tšabe bendicionēnga Běngbe Bětsábentšana mochanjójyēngacñe, y mochántsemna mo betiyiñe jena buacuafjēngcá, er Běngbe Bětsá becá obenana endbomna jamama ntšamo chě judiēnga tempo imojanbomncá cachiñe chamotsatsbomnama. <sup>24</sup> Chcasna, más paselo jtsemnana canye jena olivo betiyentša buacuatētšeněfja cach betiyiñe jétsjena, y ndoñe, chě tjoca olivos betiyentša buacuafja canye jena olivos betiyiñe chaójuama jájena. Cachcá, más paselo jtsemnana chě Jesucristbeñe ndoñe montsošbuaché judiēngbiama, jóntšana jtošbuáchiyana y tšabe bendicionēnga Běngbe Bětsábentšana jójyēngacñana, tšēngaftanga ndoñe judiēnga chě tempo Běngbe Bětsá ndoñe šmonjanábuatmēngbiama.

*Běngbe Bětsá nyetscángaftaca puerte tšabia endmēna*

<sup>25</sup> Jesucristbeyeca catšátanga, atše séntseboše tšēngaftanga chašmotsetátšēmbo chě tempo Běngbe Bětsá entšanga ndoñe tonjaninyanýé soyēngama. Atše séntseboše tšēngaftanga quem soyēngama chašmotsetátšēmbo, chca, tšēngaftanga ndoñe judiēnga chě judiēngbiama más uámanēnga šmomna ca ndoñe chašmondětsejuabnama. Ndayá Běngbe Bětsá tempo entšanga ndoñe tonjaninyanýecá, quem soye endmēna: Běngbe Bětsá tojalesenciá, nye baseftatescama banga Israeloquēnga Běngbe Bětsabe soyēnga ainaniñe ndoñe chamondóyēngacñama; pero chca echántsemna, chě ndoñe judiēnguentše atsebácanēnga jtsamnama imomnēnga, atsebácanēnga chamojtsemnēntscuana. <sup>26</sup> Chca chaojopasá ora, nyetsca Israelentša entšanga atsebácanēnga mochántsemna; ntšamo Běngbe Bětsabe uabemana palabrenguiñe endayancá:

Entšangbe atsebacayá Israelocana echanjabo,  
y echanjama nyetsca Jacóbēbentšana entšanga ndoñe más vida chamondětsebomna,  
bacna soyēnga jtsamēse ca.

<sup>27</sup> Y mēntšá endmēna ntšamo chēngbiama chjašebuachená:  
chēnga játsebacana, chēngbe bacna soyēngama chaijaperdónaye ora ca —chiñe endayana.

<sup>28</sup> Chě tšabe noticiēnga tmojtsanaboté causa, judiēnga Běngbe Bětsabe uayayēnga mondmēna, chca, tšēngaftangbe tšabiama chaotsemnama. Pero Běngbe Bětsá tojánabacacayeca, chēngnaca Běngbe Bětsabe bonshánēnga mondmēna, er Běngbe Bětsá chēngbe tempsca uamana bēts taitanga chca tojanašebuachená. <sup>29</sup> Chca endmēna, er Běngbe Bětsá ndocna te juabna ntjatrócana; nyetscanga chabe entšanga chamotsemnama tojáchembēnga, nyets tempo cha echántsababuanýeshana, y echanjama chēngbeñe tšabe bendicionēnga chaotsemnama. <sup>30</sup> Tšēngaftanga ndoñe judiēnga tempo ndoñe šmonjánama ntšamo Běngbe Bětsá inabošcá; y mora, Běngbe Bětsá tcmojalastemá, judiēnga Běngbe Bětsá ndoñe tmonjoyeuná causa. <sup>31</sup> Cachcá, Běngbe Bětsá tšēngaftanga tcmojalastemama, judiēnga montsemna chě Běngbe Bětsá ndoñe montsobedecēnēnga, chca, Běngbe Bětsá chēngnaca cháualastemama. <sup>32</sup> Er Běngbe Bětsá tojinyanýé, cha ndoñe ntjoyeunayama juabnéngaca nyetscanga mandánēnga imomnama, chca, nyetscanga jálastemama cha jobenayama.

<sup>33</sup> ¡Ndegombre, Běngbe Bětsá nyetscangbiama puerte tšabia endmēna, puerte oser-taná y puerte obiashjachá! Ndocná quenátobena ínýēnga jábuayenama ndayá Běngbe Bětsá jamama inetsejuabnaycá, y ndocná quenátobena corente josértana ntšamo cha inetsamcá. <sup>34</sup> Ntšamo Běngbe Bětsabe uabemana palabrenguiñe endayancá:

Ndocná quenátstatsšëmbo ntšamo Bëngbe Bëtsá inetsejuabnaycá; ndocná quenátobena cha jábuayenama ndayá jamana ibomnama.

<sup>35</sup> Ndocná quenátobena ndayánaca cha natsana jshatšetayana, chë tbojatšetabiamana ndebená cha jatsmënama, y chë ndebénama ndayánaca jtoyiyama chabotsemnana ca.

<sup>36</sup> Er lempe cha tojama, lempe cha iútabna, y lempe chabiamana yomna. ¡Nÿetscanga nÿetsca tescama cha chamotsatschuaná! Chca chaotsemna.

## 12

### *Ntšamo jtsiyenëse Bëngbe Bëtsá jtseservénama*

<sup>1</sup> Chcasna, Jesucristbeyeca catšátanga, Bëngbe Bëtsá bënga ba soye šojalastemáyeca, puerte cbontsaimpadana, tšëngaftanga Bëngbe Bëtsá chašmëyana tša šmojtseboše lempe jamana chábioye jadórama ca, Bëngbe Bëtsá jadórama mo ndayá cuafjjobacá y cuafjuatšëmboncá, mo cabá ainá cuaftsomñcá. Šmochjauyana tšëngaftanga sempre šmochtsentšëna cha servénana y jtsamëse cha tšabá bëngaftaca chaotsemnana. As, chca chašmojtsama ora, ndegombre oyejuayá Bëngbe Bëtsá šmochántsebiamnaye.

<sup>2</sup> Ndoñe šmattsiyena jtsamëse ntšamo chë nÿe quem luarama enójuabnaye entšanga monduamancá, y šmochjaleséncia Bëngbe Bëtsá mo tsëm entšangcá chácmabiamama, tšëngaftangbe ainana y juabna mo tsëmcá chaomëse. Chca, tšëngaftanga šmochanjobeyenaye jtsejuabnayana y šmochántsetatšëmbo ntšamo Bëngbe Bëtsá yobošcá: ndayá tšabá yomna, chë ndayá cha oyejuayá ibnabema, y ndayá ya ndoñe yondopodena más tšabá jtsemnana.

<sup>3</sup> Ndayá Bëngbe Bëtsá atšbiamana tšabá jtsejuabnayëse šojatšetama, nÿetsca tšëngaftanga cbochjáuyana, ndocná cachabiamana chaondëtsejuabná más uamaná yomna ca, nÿe ntsachetšá jtsenójuabnayana ibomna nÿetšá. Más tšabá, cada ona cachabiamana tšabá chaotsenojuabná, y chca chaotsenojuabná ntšamo chabe ošbuáchiyana yomncá, chca, chë Bëngbe Bëtsá tbojatšetá ošbuáchiyana chabiamana chaotsetrabájama. <sup>4</sup> Er, ntšamo bënga cada ona mondbomna canÿe cuerpo y chë cuerpiñe ba soyënga jtseboynnana, y nÿetsca soyënga ndoñe cach soyama cuerpiñe ntsoservénana, <sup>5</sup> cachcá bënga ošbuáchiyënga, masque bëtscanga imomna, Crísoftaca cánÿiñe mo canÿacá mondménayeca, bënga mondmëna mo chabe cuerpo cuaftsemncá, y cada ona cánÿiñe mo canÿacá nÿetscángaftaca.

<sup>6</sup> Bëngbe Bëtsá tojama bënga cada ona chamotsebomnana ndoñe cachca chabe tšetana obenana, ntšamo Bëngbe Bëtsá cada ona bëngbe tšabiamana inajuabnaycá. Y chabe juábna bënga jtsóyebuambnayama jtsoyobena Bëngbe Bëtsá tojamëse, chca mochtsama ntsachetšá chábeñe bëngbe ošbuáchiyana yomncá. <sup>7</sup> Ošbuáchiyënga bëtscá jaserviama bënga chamotsobenama Bëngbe Bëtsá tojamëse, chca mochtsama. Tšabá jtsabuátambayama bënga chamotsobenama Bëngbe Bëtsá tojamëse, chca mochtsama. <sup>8</sup> Inÿenga jañëmuama bënga chamotsobenama Bëngbe Bëtsá tojamëse, chca šontsamna. Lempe ntšamo bënga tmobomncá inÿengbiámnaca chaotsemnana bënga jamana chamotsobenama Bëngbe Bëtsá tojamëse, nÿets ainánaca chca šontsamna. Améndayënga jtsemnana bënga chamotsobenama Bëngbe Bëtsá tojamëse, šontsamna bëtscá jamana tšabá jtsaméndayama. Inÿenga jálastemama bënga chamotsobenama Bëngbe Bëtsá tojamëse, šontsamna oyejuayënga chca jamana.

### *Ntšamo bënga Jesucristbeñe ošbuáchiyënga jtsamana šojtsamna*

<sup>9</sup> Inÿa chašmojtsebobonshana ora, nÿets ainánaca chca šmochtsama. Ndayá yomna ndoñe tšabe soye šmochtsaboté y chentšana šmochtsojuánañe; šmochtsentšëna ntšamo tšabá yomncá jtsamama. <sup>10</sup> Cmontsamna nÿetscanga puerte jtsenbobonshánana, Jesucristbeyeca catšátanga quetsomñecá, chë inÿenga bëngbiamana más uamanënga imomna ca jtsejuabnayëse.

<sup>11</sup> Ndoñe oyenjáyënga šmattsemna, ndayá bëtsá Bëngbe Utabnabiana šmochtsetra-bájaye; ainaniñe corente añemo jtsebomñese, Bëngbe Utabná sempre šmochtseservena.

<sup>12</sup> Tšëngaftanga Bëngbe Bëtsábeñe jtsošbuáchiyëse, chábeñe šmobatmánayeca, puerte oyejuayënga šmochtsemna; padecena soyënguiñe chašmojtsachñëjuana ora, puerte uantadënga šmochtsemna, y sempre Bëngbe Bëtsáftaca šmochtsencuëntaye.

<sup>13</sup> Bëngbe Bëtsabe entšanga opresido bomñënga šmochjújabuache, y šmochtseprontana tšëngaftangbe yebnentše posada ínÿënga júyentšamiama.

<sup>14</sup> Bëngbe Bëtsá šmochtseimpadana, chë tšëngaftanga chašmosufrima amëngbiana tšabe bendicionënga cha chaotsamama; aíñe, cha šmochjaimpáda tšabe bendicionënga chëngbiana chaotsamama, bacna soyënga ndoñe.

<sup>15</sup> Oyejuayënga ínÿëngaftaca šmochtsemna, chënga oyejuayënga chamojtsemna ora; ngmënaca šmochtsemna, ínÿënga ngmëniñe chamojtsemna ora.

<sup>16</sup> Šmochtsiyena nyetscanga jtsenëyeunanëse. Nÿe cach tšëngaftanga uámanënga ndoñe šmattsenobiamnaye, sinó chë nduámanënga imomnéngaftaca tšabá mándbomñënga šmochtsemna. Ndoñe šmattsejuabnaye yapa osertánënga šmomna ca.

<sup>17</sup> Inÿënga bacá chacmojtsaborlana ora, ndoñe šmattsatëchënanuaye; corente šmochtsentšëna ntšamo nyetsca entšangbiana tšabá yomncá jtsamama. <sup>18</sup> Ntsachetšá šmojobenacá, lempe šmochtsama natjëmbana nyetsca entšangftaca jtsiyenama. <sup>19</sup> Atšbe bonshánënga, ínÿënga bacá chacmojtsaborlana ora, ndoñe šmatjama chënga chë causa chamotsesufrínama, ndayá Bëngbe Bëtsá šmochjaleséncia chënga cháuacastigama; er Bëngbe Bëtsabe uabemana palabrënguiñe cha tojánayana: “Atše chanjama chënga chamosufrima, ínÿënga chamosufrima tmojama causa; y chënga chanjácastigaye, ínÿëngbioye bacá tmojaborlá causa ca.” <sup>20</sup> Chca játamamna, mëntšá šmochjama, ntšamo cachánaca tojanayancá:

Acbe uayayá tbojtseshëntsänëse, saná cochjacaredáda,  
y tbojtsajuendase, cochjuáfšiye.

Chca chacojamëse, cochanjama cha puerte chaotsëuatja ntšamo tcmojaborlama,  
y ainana corente chabotsetšëna, mo chebana iñbënga chabe bestšášiñe cuafjacacá ca.

<sup>21</sup> Ndoñe šmatjaleséncia, ntšamo ndoñe tšabá tontsemncá tšëngaftanga chacmayëñjanama. Chamna, ntšamo tšabá yomncá jtsamëse, chë ndoñe tšabe soye šmochjayëñjaná.

## 13

<sup>1</sup> Nyetsca entšanga entsamna jtsamana ntšamo chë amëndayënga tmojtsamëndacá, er ndocná obenana ntsebomnana, Bëngbe Bëtsá ndoñe chca tbonjalesenciase, y nÿe Bëngbe Bëtsá tojama amëndayënga obenana chamotsebomnana. <sup>2</sup> Chca, chë amëndayëngbe contra tmojtsemnënga, ntšamo chaotsemnana Bëngbe Bëtsá tojayancá contra chënga jtsemnana; y chca contra tmojtsemnënga, castigánënga mochántsemna; <sup>3</sup> er ntšamo tšabá yomncá amënga, ndoñe quenátamna ndayama chë amëndayënga jatebéuatjana, nÿe chë bacna soye amëngna aíñe. Tšëngaftanga šmojtseboše jtsiyenama chë amëndayëngbioye ntjatebéuatjácá; chcasna, ntšamo tšabá yomncá šmochtsama, y chë amëndayëngna tšabe bomínÿeca mochantsonÿaye ntšamo chašmojtsamcá; <sup>4</sup> er chë amëndayëngna Bëngbe Bëtsabe trabajo amënga mondmëna, tšëngaftangbe tšabiana. Pero bacna soyënga šmojtsamësna, cmontsamna jtsiyenana chë amëndayënga jtsebëuatjëse, er chënga jacastígama obenana mondbomna, y chca mondbëtsama. Chënga, Bëngbe Bëtsabe mándoca jayanana chë bacna soye amënga ndoñe tšabá tmonjama ca, y jamana chënga chamosufrima. <sup>5</sup> Chíyeca, jtseytana ntšamo chë amëndayënga tmojtsichamcá jtsamana, pero ndoñe nÿe chë castigo ndoñe chašmondëtsebomnana, ndoñe chca šmontsama causa, sinó chë ainanentšá tšabe juabñënga ntšamo tbojtsët-sëtšnacá joyeunayama yómnyayeca. <sup>6</sup> Cachca soyëngama, amëndayëngbiana impuesto

tšëngaftanga jtsatsquécjnayana; er chë améndayënga Bëngbe Bëtsabe oservénënga mondmëna, ntšamo chiñe jtsamama tojtsamncá corente tmojtsentšëna ora.

<sup>7</sup> Chcasna, tšëngaftanga šmochjáyentšbuachiye ntšamo chënga jtsebomnama tojtsamncá. Chë crocénana entšanga ayëngacayëngbioye, ndaye impuéstnaca šmochtëbuénaye; chëngna šmochtsarrespetana ntšamo yomncá, y chënga uámanënga chamotsemnama šmochtsejuabnaye.

<sup>8</sup> Crocénana inya jëtsëntšabuáchiyama chacmojtsamnëse, nje ntoyiycá ndoñe šmatjokuéda, nyets tempo ndebénënga; nje quem soye sempre šmochtsama: nyetscanga šmochtsenbobonshana; er nda ndëmua entšábioye tbojtsebobonshana, ya tojama ntšamo leyiñe yomandancá. <sup>9</sup> Quem mandënga, “acbe shema ín्याftaca ndoñe cattseíngñaye, inya ndoñe catjóba, ndoñe catjatbëba, inya tojtsebomna soye ndoñe nje acbiama cattseboše”, y chë inye mandënga leyiñe lempe quem mandiñe entsemna: “Ndëmua entšánaca cochtsebobonshana ntšamo cach aca cuenobobonshancá”. <sup>10</sup> Nda ndëmua entšábioye tbojtsebobonshana, chábioye ndoñe bacá ntjabórlana; chca, ndánaca jtsebobonshánëse, entšá jamana lempe ntšamo leyiñe yomandancá.

<sup>11</sup> Chë soyënga cmontsamna jtsamana, er bënga mondétatšëmbo ya chë uámana tempiñe imojtsiyenama, chë mocna ora šojtsamna prontánënga jtsemnana, mo ocnayentšana cuafjofšenangcá, Jesucristo jaserviama jtsentšënëse. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntšamo chë Jesucristbeñe jtsošbuáchiyama tmonjanontšé ora enjamnama. <sup>12</sup> Mora bënga mondoyena canye luarentšë bëtscá bacna soyëngaca y ngmenánaca, y chca jtsemnana mo bënga nyets tempo ibetiñe cuaftsajncá. Pero ya entsobeco chë Bëngbe Bëtsá bënga játsebacama te, mo chë ibetiñe ya jtsopochócama y binyniñe ya jontšamcá. Chíyeca mochtsajbaná bacna soyënga amana, y mochtsiyena tšabe soyënga jtsamëse, Satanás játsjama y jáyëñjanama bënga jtseprontánëse, mo canye soldado jenéuyanama y inya jayëñjanama ba soyënga tojenocjacá. <sup>13</sup> Ntšamo šojtsamncá mochtsiyena, ntšamo entšanga ndaye tšabe sóynaca jamama monduamancá, ín'yëngbiana lempe chaotsinynëse. Chcasna, ndoñe quešnátamna yapa tmoyënga ntsemnana, ndoñe fiestënguenache ndoñe tšabe soyënga ntsamana, ndoñe bacna soye boyabása o shembásaftaca ntsamana y jenomándama ntsobencá chca soyënga ndoñe ntsamana, nyetscanga ndoñe cachcá ntsejuabnayama ndoñe ntsamana y ndoñe ín'yënga yapa ntsíyentšbuašana. <sup>14</sup> Chca játamamna, šmochtsiyena jtsamëse ntšamo Bëngbe Utabná Jesucristo endbetsamcá, y ndoñe nje šmatjésejuabnaye jtsamana nje cach tšëngaftanga tšabá jtsomñama juabnéngaca, ndayá tšëngaftanga chašmotsamama chë juabnënguiñe tojtsemncá.

## 14

### *Ndoñe šmattsóyebuambnaye inye ošbuáchiyëngbe contra*

<sup>1</sup> Chë Jesucristbeñe nje batšatema ošbuáchiyënga tšabá šmochjúbuaja, y chëngaftaca ndoñe šmattsenatsësnaye ndayá aíñe o ndoñe jamana yontsamnama. <sup>2</sup> Er básipta ošbuáchiyënga corente imotátšëmbo chënga nje ndayánaca jasama imobenama, pero chë Jesucristbeñe nje batšatema ošbuáchiyëngna, ndocna mëntšëna ntsesayana, er chënga jtsejuabnayana aíñe jasana canye bacna soye nántsemna ca. <sup>3</sup> Chë nyetsca saná sayënga ndoñe chamondëtsejuabná chë inye soyënga ndoñe mondëtseyëngbiana, chë causa chënga más batšá uámanënga imomna ca; y chë ndaye soyënga ndoñe mondëtseyëngna, chë nyetsca saná sayëngbe contra ndoñe chamondëtsoyebuambná, er Bëngbe Bëtsá chënga tojúbuaja mo chabe entšangcá. <sup>4</sup> Tšëngaftanga ndoñe quecmátamna chë ín'yabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chë oservená jamana ntšamo tbojtsemncá, er Bëngbe Utabná obenana endbomna cha chca chaotsamama.

<sup>5</sup> Báseftanga mondmëna, chënga jtsejuabnayana canye te inye tescama más uámana te yomna ca; pero ínÿengna jtsejuabnayana cada te cachcá iuámana ca. Y entsemna ndayá cada ona corente tšabá chaotsetátšëmbo, ntšamo yajuabnacá ndáyeca chca ca. <sup>6</sup> Nda tojtsejuabná canye te inye tescama más uámana te yomna ca, chca jamana Bëngbe Utabnábiama jtenójuaboyama. Y nda nyetsca saná tojtsesá, chca jamana Bëngbe Utabnábiama jtenójuaboyama, er cha Bëngbe Bëtsábioye chë sanama jëtschuayana; y nda tojtsejuabná sananga yomna y ošbuáchiyënga chcana chamotsesama Bëngbe Bëtsá ndoñe yondboše ca, cha chë soyënga ndoñe ntjasana, Bëngbe Utabnabiama jtenójuaboyama, y chánaca Bëngbe Bëtsábioye chë sanama jëtschuayana.

<sup>7</sup> Bënga ošbuáchiyënguentsana ndocná ainá ntsemnana nÿe cachabiama, ni jóbanana nÿe cachabiama. <sup>8</sup> Bënga tmojtsiyenëse, Bëngbe Utabnabiama jtsiyenana; y tmojóbanësna, Bëngbe Utabnabiama jóbanana. Chca, masque ainënga o obanënga, bënga Bëngbe Utabnábenga jtsemnana. <sup>9</sup> Chama Cristo tojanóbana y Bëngbe Bëtsá tojanma cha cháuatayenama, cha Bëngbe Utabná chaotsemnana, ainëngbeñe y chë ya tmojóbanëngbeñe chaotsemándama.

<sup>10</sup> As, ¿ndáyeca tšëngaftanguentše báseftanga, catšátangbe contra jtsóyebuambnayana, ndayá chënga tmojtsamama? ¿Y ndáyeca ínÿenga tšëngaftanguentše jtsichámuana, catšátanga ndoñe uámanënga montsemna ca, ndayá chënga tmojtsamama? Er nyetscanga šontsamna Bëngbe Bëtsabe delante jashjanguana, ntšamo cada ona tojëftsemcá tšabá o ndoñe tšabá bëtsemnana cha cháuyanama. <sup>11</sup> Er Bëngbe Bëtsabe uabemana palabrënguñe Bëngbe Utabná mëntšá tojánayana:

Ndegombre atše ainá sëndëtsomñe, y chíyeca atše šcojurá,

nÿetscanga atšbe delante mochanjoshëntsaméntša atše jadórama,

y nÿetscanga šmochanjauyana, “ndegombre aca Bëngbe Bëtsá condmëna ca”.

<sup>12</sup> Chcasna, cada ona bënga šontsamna Bëngbe Bëtsá jauyanana ntšamo tmojamama ndáyeca chca ca.

*Ndoñe šmatjama inÿe ošbuáchiyënga bacna benachiñe chamótsatsama*

<sup>13</sup> Chíyeca, ya ndoñe quešnátamna ínÿengbe contra jtsóyebuambnayana. Chca játamamna, šmochtsejuabnaye y yejuana šmochtsantješna ndocna te tondaye ntjamana, ndayá chaoma Jesucristbeyeca acbe catšata, chaojuabó y bacna soyënga chaoma. <sup>14</sup> Atše sëndëtatšëmbo, mo canya Bëngbe Utabnáftaca cánÿiñe mo canyacá quetsomñecá, ndocna soye yondmëna, nÿe cachabe ponto chaotsemna ndoñe tšabe soye. Pero canye entšá tojtsejuabná ndayánaca ndoñe tšabe soye yondmëna ca, ni jasama, ni jabojuama, chabiama cocayé chë soye nÿets tempo jëftsemnana ndoñe tšabe soye.

<sup>15</sup> Tšëngaftanga inÿa becá šmojtsatsétsná, inÿe soyënga tšabá endmëna jasama ca, y cha tojtsejuabná, chca soyënga jasama ndoñe tšabá yondmëna ca, pero tšëngaftanga tša šmojtsatsá causa, cha chca soyënga tojase, y chentšana tbojtsebiona puerte bacna soye tojamama, chca, tšëngaftanga jtsinÿanÿnayana ndoñe šmondoyena jtsamëse chë ínÿenga jtsababuánÿeshanëse. Nÿe tšëngaftanga inÿe soyënga šmétsesayama ndoñe šmatjaleséncia chë soye chaoma inÿa, ndabiama Cristo tojanóbana, chë ndoñe ndegombre benachiñe chaoquedama. <sup>16</sup> Ndoñe šmatjaleséncia ndayá tšëngaftanga tšabá šmétsamama, ínÿenga ndoñe tšabá tšëngaftangbiama chamotsóyebuambnama. Chca šmochanjobenaye, ntšamo šmojtsamcá jtsajbanase, ínÿenga ndoñe tšabá tmontsoyebuambná ora. <sup>17</sup> Bëngbe Bëtsabe amëndayana bëngbeñe ndoñe quenátsmëna inÿe soyënga aíñe jasana o inÿe soyënga ndoñe, canye soye aíñe jofšiyana o inÿe soye ndoñe. Pero chabe amëndayana bëngbeñe aíñe endmëna jtsamana soyënga ndayama Bëngbe Bëtsá tojayana aíñe tšabá jamama yomna ca, cháftaca tempcá tšabá jtsatsmënana y ainaniñe oyejuayana jtsebomnana; y Uámana Espíritbeyeca bënga jobenayana chca jamana. <sup>18</sup> Y nda Crístbioye chca tbojtseservena, jamana Bëngbe Bëtsá cháftaca oyejuayá chaotsemnana, y entšangbe bominiñe tšabia jtsemnana.

<sup>19</sup> Sempre šontsamna tšabe soyënga jtsamana y chë soyëngaca chaopodé jamana nyetscanga natjémbana chamotsiyenama, y ndaye sóynaca šmochtsama, ndayá ínÿenga chaújabuache Jesucristbeñe corente jtsošbuáchiyama y ainaniñe bëtscá añemo jtsebomnama. <sup>20</sup> Tšëngaftanga ndaye sanánaca jasama šmobénayeca, ndoñe šmatjama chaotsopochocama ndayá Bëngbe Bëtsá ainaniñe tojamcá. Ndegombre, nyetsca sananga tšabá jasama endmëna; pero ndayá tšëngaftanga šmojasama, inÿa bacna benachiñe chaótsatšama šmojamëse, chë soye cocayé ndoñe tšabá ntsemnana. <sup>21</sup> Tšabá endmëna mëntšena ndoñe ntjasana, vínoye ndoñe ntjofsiyana o ndayánaca ndoñe ntjamana, pero chë soye aíñe tcojama ora, Jesucristbeyeca canÿe catšata chaojuaboma y bacna soye chaomama tojoservese.

<sup>22</sup> Asna, ntšamo tšëngaftanga chë soyëngama ndegombre šmošbuachecá, nÿe Bëngbe Bëtsá y tšëngaftangata chaotsemna. Canÿe entšá ndegombre oyejuayá jtsemnana, canÿe soye jamama tšabá yomna ca tojtsejuabnase, y chë soye tojamentšana, ndoñe tšabá chca yonjamna ca juabnënga ainaniñe ndoñe tontsebomnëse. <sup>23</sup> Pero canÿe entšá ndayá tojamentšana tojayana, bacna soye tojama ca chë ndayá tojasama o tojamama, as Bëngbe Bëtsánaca echanjayana cha ndoñe tšabá tonjama ca, er ntšamo tojamcá ndoñe tonjama chë soye aíñe tšabá yomnama jtsošbuáchiyëse; y ndayánaca chca ora tojtsamëse, chca jamana bacna soye jtsemnana.

## 15

### *Ntšamo ínÿengbiama tšabá tojtsemncá mochtsama, ndoñe nÿe bëngbiama*

<sup>1</sup> Bënga, chë Jesucristbeñe corente ošbuáchiyënga, šontsamna chë nÿe batšatema ošbuáchiyënga jujabuáchana, chënga bacna soyënga tmojtsama ora, nÿe batšá osbuáchiyana bomna causa; y ndoñe nÿe jatsënguayana nÿe ndaye soyëngaca yopodena bënga tšabá jtsemnama. <sup>2</sup> Cada ona bënga šontsamna jamana ntšamo cach bëngcá Jesucristbeñe ošbuachiyabiama tšabá tojtsemncá, y ndayá cha oyejuayá chaotsemnama tojama soye. Chca šontsamna, cha más bëtscá Jesucristbeñe chaotsošbuáchema, y ainaniñe más añemo chaotsebomnama. <sup>3</sup> Er Cristo, ntšamo tojanmcá cach ndoñe tonjanma nÿe cha oyejuayá jtsemnama. Inÿetšá, cháftaca tojanopasá ntšamo Bëngbe Bëtsabe uabemana palabrenguiñe endayancá, mo Cristo Bëngbe Bëtsáftaca cuaftsoyebuambnacá: “Ntšamo entšanga montsichamcá aca joyenguanguama, atše šmontsatsëtsná ca.” <sup>4</sup> Er lempe ntšamo tempo Bëngbe Bëtsabe uabemana palabrenguiñe tmojanabemcá, bënga jabaúatambama endmëna. Ndayá bënga chiñe tmojuatsjínÿama, bënga jtsobenana padecena soyënguiñe tmojtsachnëjuana ora uantadënga jtsemnama, y ainaniñe más añemo jtsebomnama; y chíyeca bënga montsobena, chábeñe jtsošbuáchiyëse, chábeñe jobátmana, ntšamo tojanayancá chaomama. <sup>5</sup> Atše, Bëngbe Bëtsá séntseimpadana, nda inétsama bënga padecena soyënguiñe uantadënga chamotsemnama, y nda inétsama bënga ainaniñe más añemo chamotsebomnama, cha chaoma nyetscanga canÿe juabna chašmotsebomnama, ntšamo Cristo Jesús yojanjuabnacá tšëngaftanga jtsejuabnayëse; <sup>6</sup> cha chca chaoma, nyetsca tšëngaftanga mo cánÿiñe cuaftsemncá, y mo nyetscanga canÿe ora cuafjayancá, Bëngbe Bëtsá, Bëngbe Utabná Jesucristbe Taitá, puerte bëtscá y uamaná yomnama chašmuinÿanÿema.

### *Chë ndoñe judiëngbiámnaca chë tšabe noticiënga jtsemnana*

<sup>7</sup> Nyetscanga oyejuayënga šmochjenofja, ntšamo Crísnaca tšëngaftanga tcmo-janëbuajcá, chca, entšanga chamuinÿanÿé Bëngbe Bëtsá puerte bëtscá y obená yomnama. <sup>8</sup> Atše séntseboše ndayá jayanana, Cristo tojánabo judiënga jabáserviama ca, chca, jinÿanÿiyama Bëngbe Bëtsá sempre inétsamama ntšamo tojašebuachenacá; tojánabo ntšamo Bëngbe Bëtsá bëngbe tempsca uámana bëtscá taitanga tojanašebuachenacá chaocumplima; <sup>9</sup> y Bëngbe Bëtsá puerte bëtscá yomna ca chë ndoñe judiëngnaca chamuayanámnaca, cha chënga inétsalastemanama, ntšamo Bëngbe Bëtsabe uabemana palabrenguiñe endayancá, y chca tojanocumplí:

Chíyeca, atše chë ndoñe judiêngbeñe chaitsemna ora, aca cbochantsatschuanaye,  
Bëngbe Bëtsá;

y jacántase chanjayana aca puerte bëtsá y uamaná comna ca.

<sup>10</sup> Inyoca mëntšá endayana:

Puerte oyejuayënga chë ndoñe judiënga šmochtsemna, Bëngbe Bëtsabe bocacana  
entšàngaftaca cánjiñe ca.

<sup>11</sup> Y ínÿoca mëntšá endayana:

Bëngbe Utabná šmochtsatschuanaye tšëngaftanga ndoñe judiënga,  
y cha šmochtsatschuanaye nyetsca tšëngaftanga nyets luarënguenache entšanga ca.

<sup>12</sup> Y Isaíasnaca Bëngbe Bëtsabe uabemana palabrënguiñe mëntšá tojanábema:

Canÿa Isaíbe entšanguentšana echanjabo,  
y Bëngbe Bëtsá chábioye uamaná bochanjábema, nyets luarënguenache entšanga chaot-  
samëndama,  
y chënga chábeñe jtsošbuáchiyëse, chábeñe mochantsobátmana tšabe soyënga chëng-  
biana chaotsamama ca.

<sup>13</sup> Atše, Bëngbe Bëtsá séntseimpadana, nda inétsama bënga chábeñe chamotsobát-  
manama tšabe soyënga bëngbiana chaomama, cha chaoma tšëngaftanga ainaniñe  
puerte oyejuayënga chašmotsemnama y ainaniñe tšabe ebionana chašmotsebomnama,  
chábeñe jtsošbuáchiyëse; y Bëngbe Bëtsá chca tšëngaftangbiana chaoma, tšëngaftanga  
cada te más chábeñe chašmotsobátmanama, chë Uámana Espíritbe obenánaca.

<sup>14</sup> Jesucristbeyeca atšbe catšátanga, atše corente sëndétatšëmbo tšëngaftanga puerte  
tšábenga šmomnama, ndayá cmamnama corente šmotatšëmbuama, y jtsebuayiy-  
nayama šmobenámna. <sup>15-16</sup> Quem tsbuanáchañe básefta soyëngama sënjuábema,  
ntšamo šmatjátsjuabnayama atše ntjatauatjca; chca sënjama, básefta soyëngama  
chašmuatenójuaboma; y chca séntsobena juabemana, er Bëngbe Bëtsá tojama atše  
chaitsebomna chë uámana trabajo, Cristo jtseeservénana, chë ndoñe judiënga jtsë-  
jabuáchanëse. Atše bachnëcá séntsoservena, Cristo stseservena ora, entšanga tšabe  
noticiëngama jtسابuayiyayëse; atše chca sëndama chë ndoñe judiënga Jesucristbeñe  
chamotsošbuáchema, y ndayánaca chamotsamama Bëngbe Bëtsá oyejuayá chëngaftaca  
chaotsemnama, mo chabiana canÿe uatšëmbonancá. Chcánaca atše sëndama, ndoñe  
judiënga ndegombre Bëngbe Bëtsábenga chamotsemnama, chë Uámana Espíritbeyeca.

<sup>17</sup> Chca, atše Cristo Jesúsëftaca cánjiñe mo canÿacá quetsomñecá, ndegombre  
séntsobena jtsejuabnayana ntšamo Cristo jaserviama atše sëndamcá, puerte uámana  
soye yomnama. <sup>18</sup> Atše añemo séntsebomna nÿe chë ndayá Cristo átšëftaca tojamama  
jóyebuambayama, ndoñe judiënga Bëngbe Bëtsá chamóyeunama. Chca tonjopasá, ndayá  
tijayanama y tijamama, <sup>19</sup> chë Bëngbe Bëtsabe obenana jinÿanÿiyama bëts soyëngama,  
chë chabe obenánaca tojopasá tšabe soyëngama, y chë Uámana Espiritu bëts obenánaca  
tojama soyëngama. Y chca, Jerusalenocana jabojátšase, nyetsca luarënguëjana Iliria  
luaróntsoñe, Cristbe tšabe nociëngama nyets luarënguenache entšanga tijabuayená.  
<sup>20</sup> Atše sempre canÿe soye inÿe soyëngama más sënjánboše, y enjamna chë tšabe noti-  
ciëngama jábuayenana, entšanga ndocna te Cristbiana oyebuambnayana tmonjanuena  
luarënguenache; y chca sënjanma, atše ndoñe játamama inÿa tojanbojátšé trabajo, mo  
ínÿabe bojátšena yebnentšë jaje buama cuafjatontšecá. <sup>21</sup> Ntšamo Bëngbe Bëtsabe uabe-  
mana palabrënguiñe endayancá, chë tempo Cristbiana ndoñe tmonjanuenëngbiana:  
Chë ndëmuanÿenga tempo ndocná chabiana tonjanabuayená, chënga tšabá mochan-  
jinÿe ntšamo cha yomnana;

y chë ndocna te chabiana tmonjouenënga, chabe soyëngama echanjósertaye ca.

*Pablo yojanjuabná Roma bëts puebloye jama*

<sup>22</sup> Y nÿa chë causa, atše ndoñe chiyjobená tšëngaftangbioye jana tšëngaftanga  
jánÿama, masque ba soye tsjenojuabná choye jama. <sup>23</sup> Pero mora atšbe trabajo quem  
luarënguiñe sënjapochocá y tempscana tšëngaftanga jányama tša sëndánbošeyeca,



<sup>24</sup> sěntsejuabná mora ańne chjobenaye choye jama, tšěngaftanga jautsětsayama, chějana chajjachněngo ora, España luaroye chaitsá ora. Y baseftayté tšěngaftangaftaca chjěftsemna, cbochjánýama tšěngaftangaftaca oyejuayá; chentšana Diosmanda šmochjuájabuache, y lempe ntšamo chašojtsajabotcá šmochjátšetaye jobenayama Españaoye ayana jtětóntšama. <sup>25</sup> Morna Jerusalenoye chanjá, choca entšanga Běngbe Bětsábenga imomněnga jaujabuáchama; <sup>26</sup> er Jesucristbeñe ošbuáchiyěnga Macedonia y Acaya luarentšěnga, tmonjajuabó tšabá yojtsemna crocénana jájuabana chě Jerusaleno ca entšanga, Běngbe Bětsábenga imomněnga y ndbomnějéměnga imomněnga jujabuáchama; y oyejuayěnga chca tmonjama. <sup>27</sup> Cachěnga chca tmonjajuabó, y chca jamana tšabá endměna, er judiěnga tmonjanma, chě Běngbe Bětsábicana tmojanóyěngacñe soyěnga ndoñe judiěngnaca chamotsebomnama; chíyeca ndoñe judiěnga entsamna chě Jerusaleno ca judiěnga ošbuáchiyěnga jujabuáchana, ndaye soyěnga jatšatayěse, chěnga vida jtsebomnama chamotsobenama. <sup>28</sup> Y chca, quem trabajo chajjapochocá ora, y chě ndoñe judiěnga ošbuáchiyěnga lempe tmojátbanana chajjáftsayentšbuachiye ora, chanjontsé Españaoye jama, y tšěngaftangbiajana chanjachněngo tšěngaftanga jáftsanýama, tšěngaftangaftaca baseftayté jěftsemnama. <sup>29</sup> Atše corente sěntsetatšěmbo tšěngaftangbioye chajjá ora, chjášhango y chjama tšěngaftanga bětscá tšabe bendicioněnga Crístbentšana chašmotsebomnama, tondaye chacmondětsabuáshebeněntscuana.

<sup>30</sup> Jesucristbeyeca catšátanga, Běngbe Utabná Jesucristbeñe ošbuáchiyěnga quetsomñecá, y běnga bonshánana chamotsebomnama chě Uámana Espíritu inétsamayeca, tšěngaftanga cbontsaimpadana, bětscá chašmotsentšena Běngbe Bětsá nýets ainánaca jtseimpadánama, ntšamo atše sěndbetseimpadancá, cha atše chašotsinýenama. <sup>31</sup> Cha šmochtseimpadana chě Judea luaroca ndošbuáchiyěnga ndocá chašmonděborlama, y chě Jerusalenoquěnga Běngbe Bětsábenga, tšabá chamóyěngacñama ndayá chěnga jujabuáchama chajjáftsayentšbuachiye ora. <sup>32</sup> Y chentšana, y Běngbe Bětsá chca chaojábošeněse, atše chayobená bětscá oyejuayá tšěngaftangbioca jashjanguana tšěngaftanga jányama, y tšěngaftangaftaca chaitsemna ora, batšá jóchnama chayobená. <sup>33</sup> Atše, Běngbe Bětsá sěntseimpadana, nda inétsama běnga ainaniñe tšabe ebionana chamotsebomnama, nýetsca tšěngaftangaftaca chaotsemnama. Chca chaotsemna.

## 16

### *Ubuátměnga jacheuayama*

<sup>1</sup> Atše sěntseboše tšěngaftanga jáuyanana Febe, Jesucristbeyeca běngbe uabena, canýe tšabe entšá endměnama; cha chě Cencrea pueblaca enefjuana ošbuáchiyěnga endújabuachana. <sup>2</sup> Tšabá cha šmochjofja, mo canýa Běngbe Utabnábia quetsomñecá, ntšamo Běngbe Bětsabe entšanga entsamncá ínýengaftaca jenofjana. Šmochjuájabuache ntšamo tbojtsajabotcá, er cha banga tonjújabuache; átšbioynaca.

<sup>3</sup> Atšbe cuenta Prisca y Aquila šmochjáchueyaye, chě átšeftaca tbonjatrabajata, Cristo Jesusbiana oservéniñe. <sup>4</sup> Jobanámnaca bonjanprontana, atše jatsbocama, ndoñe chašmondóbama. Atše chama chata sěntsatacheuaná; y ndoñe nýe atše, sinó nýets luarenache enefjuana ndoñe judiěnga ošbuachiyěngnaca chca. <sup>5</sup> Chě ošbuáchiyěnga, chě Běngbe Bětsá jětschuayama chatbe yebnentše jénefnama imuamaněngnaca, šmochjáchueyaye. Atšbe bonshana Epeneto šmochjachuaye; cha endměna chě natsaná Asia luaroca Jesucristbeñe jtsošbuáchiyama. <sup>6</sup> María šmochjachuaye; cha tšěngaftangbeñe bětscá tojatrabajá. <sup>7</sup> Chě cach atšcá judeocata Andrónico y Junias šmochjáchueyaye. Chata canýe ora átšeftaca cárceloye bonjanětáměna, y Jesucristbe ichmóněngbiana chata puerte uámanata bonjamna, y atšbiana más natsana tbojanontsé Jesucristbeñe jtsošbuáchiyama.

<sup>8</sup> Ampliato šmochjachuaye, atšbe bonshaná, er atšcá cha Běngbe Utabnáftaca cánýiñe mo canýacá bondměna. <sup>9</sup> Urbano šmochjachuaye, chě běngaftaca Crístbiana oservéniñe trabajayá; y atšbe bonshana Estáquisnaca šmochjachuaye. <sup>10</sup> Apeles šmochjachuaye; cha

ba soye tonjinjanýé Jesucristbeñe puerte yošbuáchema; y Aristóbulbe yebnentšéngnaca šmochjácheuaye. <sup>11</sup> Chë cach atšcá judeocá Herodión šmochjachuaye, y chë Narcisbe pamillentšana Bëngbe Utabnábeñe ošbuachiyéngnaca. <sup>12</sup> Trifena y Trifosa šmochjácheuaye; chata Bëngbe Utabnabiama puerte bondëtrabája; y bëngbe bonshaná Pérsidnaca šmochjachuaye; cha bëtscá endëtrabája, Bëngbe Utabnabiama oservéniñe. <sup>13</sup> Rufo, chë Bëngbe Utabnabiama uámana trabajayá, šmochjachuaye, y chabe mamánaca; cha mo atšbe mamacá endmëna. <sup>14</sup> Asíncrito, Flegonte, Hermes, Patrobas y Hermas šmochjácheuaye, y chë ínýenga Jesucristbeñe ošbuáchiyënga chéngaftaca inménutanangnaca. <sup>15</sup> Filólogo y Julia, Nereo y chabe uabena, Olimpás y nyetsca Bëngbe Bëtsabe entšanga chéngaftaca inménutanangnaca šmochjácheuaye.

<sup>16</sup> Nyetscanga mo Jesucristbeyeca catšatangcá šmochjenchuaye, jtenámochëse, ntšamo cach tšéngaftangbe pamíllanga puerte bonshanánaca šmondetsacheuanaycá. Nyets luarenache enefjuana Cristbeñe ošbuáchiyënga cmontsacheuaná.

<sup>17</sup> Jesucristbeyeca catšátanga, atše cbontsaimpadana tšabá šmochjuáfšna y cuedado šmochtsebomna chë cánýenga ínýengaftaca contra chamotsemnama y ínýenga Jesucristbeñe ošbuáchiyana chamotsajbanama inmétsamëngbiana; chëngna, chë tšéngaftanga ndaye šmojóyëngacñe buatëmbana soyëngama contra jtsóyebuambnayana.

<sup>18</sup> Er chca amënga, ndoñe ntsentšénana Cristo Bëngbe Utabná jtseservénana, sinó jtsamana ndayá cachënga tmojtsebošcá, nye cachëngbe cuerpama tšabá tojtsemncá; y tšabe y botamana palabrëngaca chë paselo jáingñama yomna entšanga jáingñana, chëngbe ainaniñe chëngcá chamotsejuabnama. <sup>19</sup> Nyetsca entšanga tmojouena, chë Bëngbe Bëtsabe soyëngama ntšamo ínýenga tcmojabuatambacá, tšéngaftanga corente šmnétsayaunanama, y chíyeca atše puerte oyejuayá tšéngaftangaftaca séntsemna. Atše séntseboše, tšéngaftanga tšabá chašmotsetátšëmbo jtsamana ntšamo tšabá yomncá, y ntšamo bacna soyënga jamamna chašmotsemna mo ndoñe cuaftsetatšëmbcá. <sup>20</sup> Y Bëngbe Bëtsá, nda inétsama bënga ainaniñe tšabe ebionana chamotsebomnama, ndoñe bën y echanjama tšéngaftanga Satanás chašmoyénjanama, mo cha tšéngaftangbe cucuatšiniñe cuafjaboshjoncá. Atše séntseimpadana Bëngbe Utabná Jesús, chaoma tšabe bendicionënga tšéngaftangbeñe chaotsemnama.

<sup>21</sup> Timoteo, chë átšeftaca trabajayá, tšéngaftanga cmontsacheuaná; y Lucio, Jasón y Sosípater, cach atšcá Judeoquënga, chéngnaca tšéngaftanga cmontsacheuaná.

<sup>22</sup> Atšnaca Tercio, chë Páblëbe cuenta quem tsbuanácha uabiamnayá, tšéngaftanga cbontsacheuaná, tšéngaftanga y átšnaca Bëngbe Utabnáftaca cánýiñe mo canýacá quetsomñecá.

<sup>23</sup> Gayo cmontsacheuaná; atše Pablo chabe yebnentše posada séntsebomna, y cha enduamana nyetsca chë muentša ošbuáchiyënga tšabá júbuajana. Erasto, chë quem pueblentša crocénana bojanýá, tšéngaftanga cmontsacheuaná, y Jesucristbeyeca bëngbe catšata Cuártënaca.

<sup>24</sup> Atše, Bëngbe Utabná Jesucristo séntseimpadana, cha chaoma tšéngaftangbeñe tšabe bendicionënga chaotsemnama. Chca chaotsemna.

*Quem tsbuanácha juapochócama, Pablo Bëngbe Bëtsábioye tbojtanchuá*

<sup>25</sup> Bënga sempre mochtsinjanýnaye Bëngbe Bëtsá puerte uamaná yomnama. Cha endobena jamama tšéngaftanga puerte chašmotsošbuáchema; y chca, cha echanjama ntšamo chë bënga fsëndabuayiyiná tšabe noticiënguñe yomncá, ntšamo chë Jesucristbe buayenana soyënga yomncá, y ntšamo chë Bëngbe Bëtsá šojinjanýé ndegombre soyënga yomncá. Nyets tempo méntscóñama, Bëngbe Bëtsá chë soyënga entšanga ndoñe tonjinjanýé, y chë causa chënga chë soye ndoñe ntsetatšëmbuana. <sup>26</sup> Pero morna, ntšamo Bëngbe Bëtsabe juabna oyeambuambnayënga tmojanabemcá, tojama bëtscá entšanga chë ndegombre soyëngama chamotsetatšëmbuama; Bëngbe Bëtsá, chë nyets tempo vida bomná, tojanmandá entšanga nyets luarënguenache chë ndegombre soyëngama

chamotsetatšëmbuama, chënga chábeñe chamotsošbuáchema y ntšamo cha yobošcá chamotsamama.

<sup>27</sup>Nýe canýe Bëngbe Bëtsá endmëna, y cha nyets osertánana endbomna. ¡Nyetscanga chamotsinýanýná cha puerte bëtsá y uamaná yomnama, ndayá Jesucristo tojanmama! Chca chaotsemna.

## 1 Corintios

### *Pablo chënga jacheuayama*

<sup>1</sup> Atše Pablo, ndábioye Bëngbe Bëtsá tbojanchembo Jesucristbe ichmoná jtsemnama, Bëngbe Bëtsá chca yojánbošeyeca, cányiñe chë Jesucristbeyeca catšata Sósteneseftaca, <sup>2</sup> quem tsbuanácha sentsabiamná tšëngaftanga chë Corinto bëts puebloca Jesucristbeñe ošbuáchiyëngbiama; ndëmuanyënga Cristo Jesúseftaca Bëngbe Bëtsá tojábiama chabe entšanga nýe chábioye oservénënga, ndëmuanyënga Bëngbe Bëtsá tojáchembo chabe entšanga chašmotsemnama, chë nýe quem luarama enójuabnaye entšanguentšana luarénënga, Bëngbe Utabná Jesucristbioye tmojotšëmbonéngaftaca, Jesucristo nda yomna Bëngbe Utabná y chëngbe Utabná. <sup>3</sup> Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y tšëngaftangbe ainaniñe tšabe ebionana chašmotsebomnama.

### *Bëngbe Bëtsá Jesucristbeyeca tojama tšëngaftanga ba tšabe bendicionënga chašmotsebomnama*

<sup>4</sup> Bëngbe Bëtsá tšëngaftangbiama sempre sëndbëtsatschuanaye, er tšëngaftanga cányiñe mo canýacá Cristo Jesúseftaca šmómnyayeca, Bëngbe Bëtsá tšëngaftangbeñe tojauabó, tšëngaftangbe tšabiama. <sup>5</sup> Chca Crísoftaca šmómnyayeca, Bëngbe Bëtsá tojama tšëngaftanga chašmotsebomnama chábentšana nýetsca tšabe soyënga, tšëngaftanga obenana chašmotsebomnama cha jamëse, Bëngbe Bëtsabe soyëngama jóyebuambayama y chë soyëngama chacmésertama. <sup>6</sup> Chca, ntšamo cbonjanabuayiynacá mo Jesucristbe ndegombre soyëngcá, tšëngaftángnaca ínýengbioye tšabá šmojinýanyé ndegombre soyënga bëtsemnama, chë ntšamo jtsiyenama. <sup>7</sup> Y chca, Bëngbe Bëtsá chabe entšanga inétsatšatnaye tšabe soyënguentshana tondaye quecmochatabuáshebena, Bëngbe Utabná Jesucristo quem luarentše yochtonýna tescama Bëngbe Bëtsábeñe jtsošbuáchiyëse chašmojtsobátmanëntscuana. <sup>8</sup> Cha echanjama tšëngaftanga chábeñe corente chašmotsošbuáchema y ainaniñe bëts añemo chašmotsebomnama, ndayá tšëngaftangaftaca jamama cha yojuabnacá chaojapochocantscuana; chca, chë Bëngbe Utabná Jesucristo nýetsca entšangbiama tšabá o ndoñe tšabá tmonjamama yochjayana te, ndocná chaondobená jayanana tšëngaftanga ndoñe tšabá šmonjama ca. <sup>9</sup> Bëngbe Bëtsá nýets tempo jtsamana ntšamo tojašebuachenacá, y cha endmëna nda tcmojánachembo cányiñe mo canýacá chašmotsemnama chabe Uaquiñá Jesucristoftaca, Bëngbe Utabná.

### *Choca ošbuachiyëngbeñe nýetscanga ndoñe cachcá montsanjuabná*

<sup>10</sup> Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nýetsca bëngbiama yomnama, tšëngaftanga nýetscanga cachcá chašmotsejuabnama, y tšëngaftangbeñe ndoñe más báseftanga canýe soye y ínýenga inýe soye chamuatsjuabná. Y aíñe šmochtsiyena mo canýacá, nýetscanga cachcá jtsejuabnaye y cachcá jamama jtsebošëse. <sup>11</sup> Jesucristbeyeca atšbe catšátanga, atše chca sënjayana, er Cloebe yebnentšënga šmonjabëuenaye, tšëngaftangbeñe šmojtsenpenzentserama. <sup>12</sup> Ntšamo sentsichamcá entsemna ndayá tšëngaftangbentše báseftanga šmojtsichamo: “Atše Páblëbe ustoná sëndmëna ca”; ínýengna imojtsichamo: “Atšna Apólosbe ustoná sëndmëna ca”; ínýenga: “Atšna Pédrëbe ustoná sëndmëna ca”, y ínýengna: “Atšna Cristbe ustoná sëndmëna ca” imojtsichamo. <sup>13</sup> Chca šmojtsamama, jtsóbocanana mo cada básefta ošbuáchiyënga canýe Cristo tmojtsebomncá. ¿Pablo yojamna nda tmojancrucificá tšëngaftangbe tšabiama? ¿O tšëngaftanga uabáinënga šmomna, atše jótšëmbonëse, tšëngaftanga atšbe ústonënga bëtsemnama? <sup>14</sup> ¿Bëngbe Bëtsá sëndbëtsatschuanaye atše ndocná tšëngaftanguentšá tjanábayama; nýe Crispo y Gáybioye aíñe! <sup>15</sup> Chca, ndocná quenátobena jayanana, atše jótšëmbonëse uabainá

cha tojanoquedá ca, mo átšbeñe ošbuáchiyënga cuaftsemncá. <sup>16</sup> Estéfanabe pamilentšëngnaca sënjanëbaye, pero ndoñe quetsatabouínyna inya tijanabayama. <sup>17</sup> Er Cristo ndoñe chešnatanichmó ínÿenga jubáyama, ndayá chë chabe tšabe noticiëngama entšanga jábuayenama. Ndoñe chešnatanichmó chë soyënga jayanama, corente osertana entšangbe soyënga jtsichámëse; chca, entšanga Crístbeñe chamotsošbuáchema, ndoñe chë atšbe osertánanentšana palabrengama, sinó nÿe chë buayenánama, Cristo cruzoca bëngbiamana tojanóbanama.

*Crístbeñe yomna Bëngbe Bëtsabe obenana y osertánana*

<sup>18</sup> Quem buayenánana, Cristo entšangbiamana cruzoca tojanóbanama, chë pochocánënga jtsemnana tmojtsajnëngbioye jtsinyanana mo ndoñe corente juabna bomnëngbe soycá; pero bëngbiamana, chë Bëngbe Bëtsá nÿetsca tescama šochjátsebacangbiamna, quem buayenánana jtsinyanayana Bëngbe Bëtsabe obenana. <sup>19</sup> Ntšamo Bëngbe Bëtsá chabe uabemana palabrenguiñe tojanayancá: Atše chanjama chë tša osertánëngbe osertánana tondayama chaondëtsosevénama; y chanjama chë ba soyëngama osertánëngbe osertánana tondayama chaondëtšamanama.

<sup>20</sup> ¿Ntsachetšá yojtsámama chë tša osertaná y chë puerte uatsjinÿená tbojayana soyënga? ¿Ntsachetšá yojtsámama chë tša tšabá chë soyëngama juabnayá, morscá, y ínÿengaftaca enatsëtsnaye ora chëngbe ayënjanayá tojayana soyënga? Ndegombre Bëngbe Bëtsá tojinÿanÿé, chë quem luarentša bëts osertánanaca tmojayana soyënga tondaye yonduámanama. <sup>21</sup> Bëngbe Bëtsá, nÿets osertánana bomná quetsomñecá y puerte tšabá jtsejuabnayëse, ndoñe tonjanalesenciá quem luarentša entšanga cha chamotsábuatmama, chë quem luarentšënga tša osertánënga tmojánayana soyëngama. Chamna, cha tšabá tbojanínynana chábeñe ošbuáchiyënga játsebacana chë bënga fsëndabuayiyiná soyëngama, masque ínÿengbioyna mo ndoñe corente juabna bomnabe soycá jtsinyanana.

<sup>22</sup> Judiënga tša jtsebošana y Bëngbe Bëtsábioye jtsotjanañana bëts soyënga chaomama, chabe obenana jinÿanÿiyama; y ndoñe judiëngna tša jtsenguayana chë puerte osertánëngbe soyënga jtsetatšëmbuama. <sup>23</sup> Pero bëngna Crístbiamana entšanga fsëndabuayiyiná, chë ínÿenga tmojancrucificabiamana. Quem buayenánana chë judiënga ndoñe tšabá ntjëuénanana. Y ndoñe judiënga mondbëtsejuabnaye chca yomna mo canÿe ndoñe corente juabna bomnabe soycá ca; <sup>24</sup> pero bëngbiamana, nÿetscanga Bëngbe Bëtsá chabe entšanga chamotsemnana šojáchembëngbiamna, masque judiënga o ndoñe judiënga, Crístbeñe endmëna nÿets Bëngbe Bëtsabe obenana y osertánana; <sup>25</sup> er ndayá Bëngbe Bëtsá tojanmncá, Cristo cruzoca chaóbanama jalesénciase, banga jtsinyanana mo canÿe ndoñe corente juabna bomnabe soycá, pero ndegombre endmëna canÿe puerte más osertaná tojama soye, lempe ntšamo entšanga imotatšëmbuama. Y ndayá cha tojamcá masque bángbioye jtsinyanana mo canÿe tondaye obenabe soycá, ndegombre chë soye jtsinÿanÿayana Bëngbe Bëtsá puerte más obenana yobomnana, nÿets obenana ntšamo entšanga imobomnana. <sup>26</sup> Jesucrístbeyeca atšbe catšátanga, šmochtsejuabnaye ntšamo yojamnama, Bëngbe Bëtsá chabe entšanga chašmotsemnana tcmojánachembo ora. Tšëngaftangbentše nÿe báseftanga tša osertánënga šmojamna, ntšamo chë osertánana bomnënga imomnana entšanga mondbëtsejuabnaycá; y báseftanga šmojamna becá mando atšetanënga o uámama pamilentšënga. <sup>27</sup> Pero Bëngbe Bëtsá, quem luarentše ndoñe tša osertánënga tojanabacacá, chca, cha jamama chë quem luarentša soyëngama tša osertánënga chamotsëuatjama; y cha, quem luarentše ndobenënga tojanabacacá, chca, chë obenana bomnënga chamotsëuatjama. <sup>28</sup> Bëngbe Bëtsá quem luarentšana tojanbocacá ndayá tondaye yonduamancá y ndayá ínÿenga imuabotencá; tojanbocacá ndayá tondaye yonduamancá, chca, ndayá quem luarentše tša iuamancá tondaye chaondëtšamanama. <sup>29</sup> Y chca, Bëngbe Bëtsabe delante ndocná quenátobena jayanana tša bëtsá cha yomna ca. <sup>30</sup> Bëngbe Bëtsá tojama bënga Crístoftaca cánÿiñe mo canÿacá jtsemnëse chamotsiyenama, y chábeyeca tojama bënga chamóyëngacñama

chabe osertánana bomna soyënga; chábeyeca tojama bënga tšábënga chabe bominiñië chamotsemnana, chabe entsänga jtsemnana chamobenama, puerte tšábënga cach Bëngbe Bëtsacá, y atsebácanënga chamotsemnana. <sup>31</sup> Y chca, ntšamo Bëngbe Bëtsabe uabemana palabrënguiñe endayancá: “Nda tojtseboše jayanama cha canye uamaná yomna ca, chamna más tšabá cha bontsemna jayanama Bëngbe Utabná puerte uamaná yomna ca.”

## 2

### *Ntšamo Pablo Cristo crucificanábiamá chënga tojanabuayená*

<sup>1</sup> Pero, Jesucristbeyeca atšbe catsátanga, Bëngbe Bëtsabe ndegombre soyëngama tšëngaftanga jábuayenama sënjána ora, chca sënjanma ndoñe chë uámanëngbe palabrëngaca, ni chë tša osertánëngbe palabrëngaca. <sup>2</sup> Y tšëngaftangaftaca sënjamna ora, ndoñe quetstétseboše nye ndayíñnaca jatsjuabnayana, ndayá nye Jesucristbeñe, nda bëngbe tšabiamá tmojanrucificá. <sup>3</sup> Atše tšëngaftangbeñe sënjamna, mo canya ba soyënga jamama ndobenacá, y mo canya puerte auatjacá y tbojtsengmëmñacá, chabe trabajo jamama ndoñe jobenayama juabnaye causa. <sup>4</sup> Ntšamo cbonjanëtsëtsná y cbonjanabuayinacá atše sënjanoyebuambá ndoñe chë tša osertánëngbe palabrëngaca, tšëngaftanga jáyëñjanama chiñe chašmotsošbuáchema; pero aíñe tcbonjanayëñjaná, Bëngbe Bëtsabe Espíritu y chabe obenana tšëngaftanga jinyanñiyëse, <sup>5</sup> chca, tšëngaftanga Bëngbe Bëtsábeñe chašmotsošbuáchema, ndoñe nye entsangbe osertánanaca, sinó Bëngbe Bëtsabe obenanama.

### *Uámana Espíritbeyeca, Bëngbe Bëtsá jamana entsänga cha chamotsábuatmama*

<sup>6</sup> Pero, chë ya tmojashjáchënga Bëngbe Bëtsábeñe puerte jtsošbuáchiyama y chabe soyëngama corente jtsoertánana, chëngbeñe bënga fchandóyebuambaye becá osertánana bomna soyënga. Pero ndoñe quenátsmëna quem luarentša entsänga quem tempo mondbétsichamo soyënga, ni mora quem luarentše amëndayëngbe soyënga, ndëmuanyënga ndoñe bën y ndocna obenana bomnënga mochanjëftsoquëda. <sup>7</sup> Y aíñe, chë bënga fsëndoyebuambná osertánana bomna soyënga endmëna chë Bëngbe Bëtsá quem luarentša entsángbioye baytentscuana ndoñe tonjaninñanýé soyënga, y chca, entsänga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmënana, quem luare cabá cha ndëma ora, y yojanjuabná, chë soyëngaca bënga mochtsanobena puerte bëtsétsanga y uámanënga jtsemnana, cháftaca chë nyetsca tescama yomna tšabe vida jtsebomnana. <sup>8</sup> Quem Bëngbe Bëtsabe puerte osertánana bomna soyënga endmëna canye soye ndayá quem luarentša amëndayënga ndoñe ntsësertánana, er chënga aíñe matëñjanësértase, Bëngbe Utabnábioye chënga ndoñe matmëñjanrucificá, Bëngbe Utabná nda puerte bëtsá y uamaná yomna. <sup>9</sup> Bëngbe Bëtsabe uabemana palabrënguiñe quem Bëngbe Bëtsabe puerte osertánana bomna soyëngama mëntsá endayana:

Cha imobobonshánëngbiama Bëngbe Bëtsá tojaprontá soyënga, ndocná tonjinye, ni tonjouena y ni mo tonjajuabó ca.

<sup>10</sup> Pero Bëngbe Bëtsá quem soyënga chabe Espíritoftaca bënga šojanñanýé, er chë Espíritu lempe jtsetatšëmbuana, chë Bëngbe Bëtsabe soyëngama puerte totcá josértama yomna soyëngámñaca.

<sup>11</sup> Entsángbeñe ndocná quenátobena jtsetatšëmbuana ndayá entsábe ainaniñe tomnana, sinó nye chë entsábe espíritu, chë chábeñe yomná. Cachcá, nye Bëngbe Bëtsabe Espíritu jtsetatšëmbuana ndayá Bëngbe Bëtsá tojuabnacá. <sup>12</sup> Y bëngna, Bëngbe Bëtsábicana Espíritu tmojóyëngacñe, ndoñe canye quem luarentša espíritu, chca, bënga chašosertama chë Bëngbe Bëtsá tojama bënga chamotsebomna soyëngama, bëngbe tšabiamá cha jtsejuabnaye. <sup>13</sup> Bënga chë soyëngama fsëndoyebuambná, ndoñe chë quem luarentša entsángbentsána tifuatsjinye osertánana bomna palabrëngaca, sinó

chë Bëngbe Bëtsabe Espíritu šojabuatambá palabrëngaca. Chca, Bëngbe Bëtsábiocana soyëngama bënga fsëndabuayiyiná, Bëngbe Bëtsabe Espíritbentšana yóbocana palabrëngaca, chë Uámana Espíritu ainaniñe imobomnéngbioye.

<sup>14</sup> Bëngbe Bëtsabe Espíritu ndoñe tondbomná, chabe ainaniñe ndoñe ntjýöngacñana chë Bëngbe Bëtsabe Espíritbiocana yóbocana soyënga, er chë entsabiama chë soyënga jtsemnana mo canye ndoñe corente juabna bomnabe soyëngcá, y chabosertama cach ndoñe ntsobenana. Chca endmëna, er entsá jobenayana quem soyëngama jtsetatšëmbuama y josértama, nye chabe ainaniñe chë Uámana Espíritu tbojtsájabuachañe.

<sup>15</sup> Pero nda aíñe chë Espíritu tbojtsebomna jtsobenana nyetsca soyënga tšabá jinjama chabosertama, y ndocná chë Espíritu ndoñe tbondbomná ntsobenana josértana ntšamo chë Espíritu bomná yomnama. <sup>16</sup> Er Bëngbe Bëtsabe uabemana palabrënguiñe mëntšá endayana: “Ndocná quenátabuata Bëngbe Utabnabe juabna, chábioye jabuátëmbama chaotsobenama ca.” Pero bënga, chë ošbuáchiyënga, mondobena jajuaboyana ntšamo Cristo yojuabnacá.

### 3

#### *Jatrabájama enutanánënga Bëngbe Bëtsá jasérviamama*

<sup>1</sup> Pero, Jesucristbeyeca atšbe catšátanga, atše ndoñe chiyatanobená jóyebuambayama, mo tšëngaftanga chë Uámana Espíritoftaca mandánënga šmojatsmëncá, sinó nye cachënga tšabá jtsomñama juabnënga bomna entsangbioycá, mo basetemëngbioycá, Cristbe soyëngama josértama ndobenënga. <sup>2</sup> Mo canye bebmácá, chabe basetëmbioye nye létšiyë jafšiyana y paselo jabmuánama sananga, chë básetema chcana jasama cabá ndoñe ntsobenana causa, cachcá, atše cbonjanabuatambá Bëngbe Bëtsabiamama nye chë más paselo josértama soyëngama, y ndoñe inye soyënga más totcá josértama soyënga, er tšëngaftanga ndoñe quešmënjatobena chca soyëngama josértana. Y ni mora, tšëngaftanga quešmátobena Bëngbe Bëtsabe soyëngama josértana, chë josértama más totcá yomna soyëngama; <sup>3</sup> er tšëngaftanga cabá šmojtsama, nye ntšamo cach tšëngaftanga tšabá jtsomñama tšëngaftangbe juabnënga yomncá. Y tšëngaftanga ínÿengaftaca cabá yapa šmojtsenántšaboše y nye ínÿengbioye jayénjanama soyënga šmojtsamëntscuana, tšëngaftanga šmojtsama nye ntšamo cach tšëngaftanga tšabá jtsomñama tšëngaftangbe juabnënga yomncá, y chca, tšëngaftanga šmojtsiyena mo chë nye quem luarama enójuabnaye entsangcá. <sup>4</sup> Er canya: “Atše Páblëbe ustoná sëndmëna ca”, y ínÿana: “Atše Apólosbe ustoná sëndmëna ca” tojayana ora, chca jtsamana mo chë nye quem luarama enójuabnaye entsangcá.

<sup>5</sup> Tšëngaftanga chca šmojamama, atše šontsemna tšëngaftanga játjayana: ¿Ndayá Apolos yomna? ¿Ndayá Pablo? Chatna co nye Bëngbe Bëtsábioye oservénata bondmëna, ndátbeyeca tšëngaftanga Jesucristbeñe šmojtsošbuaché, y bëndata cada ona fsënjama chë Bëngbe Bëtsá šojanÿanÿé trabajo. <sup>6</sup> Atšna, mo nda jajañe jénaye cuafjuatbontsacá, tšëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguiñe béjaye cuaftsebuešcñacá, enjantrabája cach atše sënjanbojatsé chiñe; pero Bëngbe Bëtsá, ntšamo matatëmënga chauájuaama endbetsamcá, tojama banga tšëngaftanguentše Jesucristbeñe chamotsošbuáchema. <sup>7</sup> Ntšamo, chë jená y chë matënguiñe béjaye buešcñayá ndoñe yapa ntsámanana chiñe shajuanënga chaóbocnama, nye Bëngbe Bëtsá aíñe, cachcá, nda Bëngbe Bëtsabiamama entsanga jábuayenama trabajo tojabojatsé y nda chentšana tojáhjango cach trabajuiñe jóntšama, ndoñe ntjamana entsanga Jesucristbeñe chamotsošbuáchema; nye Bëngbe Bëtsá chca jamana. <sup>8</sup> Chë jená y chë matiñe béjaye buešcñayá cach trabajuiñe jtsentsénana, y chatna mo trabajayatcá jtsámanana; y cada ona juácanana ntšamo chabe trabajo tomncá.

<sup>9</sup> Bëndata fsëndmëna trabájayata Bëngbe Bëtsabiamama oservëniñe, y tšëngaftanga šmondmëna mo Bëngbe Bëtsabe jajañcá, ndayentše cha yojtseboše tšabe jaja saná

chaóboचना, y šmondměna mo chě cha yojtsejebuana bėts yebncá. <sup>10</sup> Er Bėngbe Bėtsá atšbe tšabiamana jtsejuabnayėse, chě trabajo šojabonyé, y atše mo canye puerte tšabe jebuanacá, canye yebna ndayiñe chaotséuatjonama tojapormacá, sėnjanbojatsé chě trabajo, Bėngbe Bėtsabe soyėngama tšėngaftangbeñe jábuayenama. Chentšana inya, mo chě inye yebna jebuaná tojabojatsé jajebuama chiñe más jatsjebuama nda tojatontšecá, cach atše sėnjanbojatsé trabajuiñe tojanontšé. Pero cada ona botamana chaotsantješna ntšamo chě trabajo yojtsamama. <sup>11</sup> Mo chě cányabentšana inye trabajayacá, ndoñe ntsobenana chě yebna jajebuama tojanbojatsé cha chě yebna chaotséuatjonama tojanpormañe inye soye cachcá chaoservema jatspórmana, cachcá, ndocná chaondėtsabuatambá inye soyėnga, nye ntšamo Jesucristbe soyėnga yomncá aiñe, chě ntšamo atše natsana sėnjanabuatambacá. <sup>12</sup> Chě Jesucristbiamana más uámana soyėnga buatėmbayá jtsemnana mo chě castellano, midio y inye uámana soyėngaca yebna jebuanacá; y chě Jesucristbiamana nye nduámana soyėnga buatėmbayana mo chě niñebenga, butsjájšha y tšshenjñesheca yebna jebuanacá. <sup>13</sup> Y Cristo chaojésabo te, Bėngbe Bėtsá echanjinyaniye ntšamo cada cányabe trabajo yomnama. Cha chě te íñesheca chca echanjinyaniye, y chě íñesheca, Bėngbe Bėtsá echanjinye y echanjinyaniye ndaye trabajo cada ona tojamama. <sup>14</sup> Ntšamo cada cányabe trabajo yojtsámanama jtsetatšėmbuama Bėngbe Bėtsá chaojinye ora, cha chabe trabajo aiñe yojtsámana ca queojayanėse, chě tšabe trabajayá Bėngbe Bėtsábicana canye uacanana soye echanjójyėngacñe, er cha jtsemnana mo canye entšacá, nda canye yebna tojtsejebuana jtsejuinyama ndoñe paselo tondměna soyėngaca. <sup>15</sup> Pero chě te cányabe trabajo nye batšá yojtsámanama Bėngbe Bėtsá íñesheca chaojinyanese, chora chabe trabajo echántsemna mo chě jtsejuinyama paselo tomna soyėngaca jebuanabe soyėngcá, chentšana nyets yebna jtsejuinyana. Chě jebuaná jtsachana, pero chabe trabajo lempe jobuėtšana. Cachcá, chě Bėngbe Bėtsabiamana trabajo tojtsamá, nye batšá oservena trabajo, cha echanjobenaye atsbocaná jtsemnana, masque lempe ntšamo tojamcá tondaye queochaisoquėda.

<sup>16</sup> ¿O tšėngaftanga ndoñe šmondėtatšėmbo nyetscanga cányiñe Jesucristbeñe osbuachiyėngcá, mo chě Bėngbe Bėtsabe bėts yebncá šmomnama, y tšėngaftanguentšė Bėngbe Bėtsabe Espíritu yomnama? <sup>17</sup> Nderado nda tojama, tšėngaftanga nyetscanga cányiñe Jesucristbeñe osbuachiyėngcá jtsemnana chaotsopochocama, Bėngbe Bėtsá chábioye bochantsepochóca, er chě Jesucristbeñe osbuachiyėngcá cányiñe imomnėnga, jtsemnana mo chě Bėngbe Bėtsabe bėts yebncá, chabe entšanga nye chábioye jaserviama; y tšėngaftanga chca šmondměna.

<sup>18</sup> Ndocná cachá chaondėtsenoíngña. Nderado nda tšėngaftanguentšá tojtsejuabná cha tša osertaná yomna ca, ntšamo quem luarentša entšanga mondbėtsejuabnaye ntšamo canye puerte osertaná inėtsemnana, cha bontsemna jóbemama mo canya ndabiamana quem luarentša entšanga chamuayana cha corente juabna ndbomná yomna ca, chca, ndegombre corente osertaná jtsemnana chaobenama. <sup>19</sup> Er chě quem luarentša entšanga tša osertánėnga imotátšėmbo soyėnga, Bėngbe Bėtsabe bominyiñe yomna mo chě corente juabna ndbomnabe soycá. Bėngbe Bėtsabe uabemana palabrėnguiñe mėtšá endayana: “Bėngbe Bėtsá chě tša osertánėnga jáyėnjanana, ndayá cachėnga inyėnga jáingñama tša osertánánaca tmojtsama soyėngaca ca.” <sup>20</sup> Y mėtšánaca endayana: “Bėngbe Utabná endėtatšėmbo chě tša osertánėngbe juabnėnga tondayama yondoservėnama ca.” <sup>21</sup> Chíyeca, ndocná chaondėtsichamo corente uamaná yomna ca, ndaye entšabe ustóna tomnama, er lempe ntšamo šmobomncá, Crístbeñe osbuáchiyėnga bėtsemnana, tšėngaftangbe tšabiamana endměna, y nyetscanga chě tcmojujabuachėngnaca cachcá. <sup>22</sup> Lempe tšėngaftangbe soye endėtsomñe: ndayá Páblėbeyeca yomncá, Apólosbeyeca, Pédrėbeyeca, ndayá quem luarentše yomncá, ndayá yomncá ainá tcojtsemna ora, tcojóbana ora, ndayá mora yomncá y chě más chcoye yochtsemncánaca. <sup>23</sup> Y tšėngaftanga Crístbenga šmondměna, y Crístna Bėngbe Bėtsábia.



## 4

*Jesucristbe ichmónëngbe trabajo*

<sup>1</sup> Entšanga entsamna bëngbiana jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama trabajo bomnënga, chë Bëngbe Bëtsá baytentscuana entsángbioye ndoñe tonjaninñanyé, pero mora aíñe tojinñanyé soyënga jtsabuátambayama trabajo bomnënga. <sup>2</sup> Chca, nda canye trabajo tojtsebojanñabiamna, chabe mandayá jtsobátmanana cha aíñe tšabe palabra bomná chaotsemnama. <sup>3</sup> Atšbe bariëna, tondaye quenatámana, ntšamo tijamcá šmojinye y ndoñe tšabá tijama ca šmojayanëse, o inye entsanga cachcá tmojayanëse mo canye tribunaliñcá. Ni cach atše ndoñe chca quetsátama, jtsetatšëmbuana ntšamo atšbe trabajuama tijayancá ndegombre tayojtsemnama. <sup>4</sup> Atšbe ainaniñe ndocna juabna quetsátsbomna atše chašuyanama bacna soye tijama ca, pero chca ndoñe quenátayana, ndegombre Bëngbe Bëtsabe delante ndocna bacna soye ndbomná atše stsemna ca. Er Bëngbe Utabná endmëna nda atšbe trabajo yonjá y nda ndegombre yobena jayanama atše tšabá o ndoñe tšabá tijamama. <sup>5</sup> Chíyeca, tšëngaftanga ndoñe quecmátamna jinñana y jayanana ínñyenga ndoñe tšabá tmonjama ca, chë nña chama tempo cabá ndóshjanguëntscuana, Bëngbe Utabná chama chaojésabo ora. Cha chaojésabo ora, puerte tšabá echanjínñanyie chë iytëmencá yomna soyëngama, mo ibetiñe cuaftsemncá, y botamana echanjínñanyie, mo binñiñcá, ndayá jamama nye chëngbe ainanoca entsanga tmojajuabocá. Y chora Bëngbe Bëtsá cada entsábiana echanjayana tšabe soyënga, ntšamo tbojtsomerecencá.

<sup>6</sup> Jesucristbeyeca atšbe catšátanga, chë soyëngama tšabá jábuayenamna, atše sënjama ntšamo Apolos y atše tifjatrabájama botamana chašminñyama, y chca sënjama tšëngaftangbe tšabiana, ntšamo bëndata tifjamentšana chašmuatsjinñyama jtsiyenana nye ntšamo Bëngbe Bëtsabe uabemana palabrënguiñe iuayancá, y ndocná tšëngaftanguentšá canye entsábiana chaotsenábotamnaye, y ínñabiana ndoñe tšabá chauátoyebuambnama. <sup>7</sup> Er, ¿nda chë ínñyengbiana más uámanënga tšëngaftanga cmojtsabiamná? ¿Y ndayá šmobomna, Bëngbe Bëtsá ndoñe tcmojtšatá soye? Y tšëngaftanga chca chašmotsebomnama cha tojanmëse, ¿ndáyeca šmojtsenabotamná mo Bëngbe Bëtsabe tšetana soyënga ndoñe tontsemncá, y nye cach tšëngaftangbeyeca šmojonñencá?

<sup>8</sup> Tšëngaftanga šmojtsejuabná ya lempe ntšamo cmëjbotcá Bëngbe Bëtsábicana šmojtsebomna ca, y lempe ntšamo jtsebošama šmojtsobencánaca ca. Mo reyënga cuaftsemnëngcá cmojtsabiona, bëngbentšana tondaye ntsëjbotcá. Malaye tšëngaftanga mo reyëngcá šmojtsemna, Crísoftaca cánñiñe jtsemándayëse; chca, bëngnaca tšëngaftangaftaca jtsemnama, cánñiñe jtsemándayëse. <sup>9</sup> Atše šontsinñana, bënga chë Cristbe ichmónënga Bëngbe Bëtsá šojábiana mo chë nyetscangbiana más nduamanëngcá, mo chë jóbana yojtsamna entsangcá. Nyetscanga chë Bëngbe Bëtsá tojábiamënga bëngbioye jtsëññayana mo ndoñe cachca entsanga fstsemncá; angelënga y entsángnaca cachcá bëngaftaca montsama. <sup>10</sup> Bënga, Cristbiana oservena causa, quem luarentša entsangbiana fsëntsinñna mo corente juabna ndbomnëngcá; chë cuenta, tšëngaftanga šmojtsejuabná Cristbe soyëngama corente osertánënga šmomna ca. Bënga fsëndmëna chë entsangbe bominiñe ndocna obenana ndbomnënga; y tšëngaftangna šmojtsejuabná puerte obenana bomnënga šmomna ca. Tšëngaftangbioye ínñyenga puerte uámanënga y bëtsétsanga jtsabiamnayana, pero chënga bëngbioye jtsëbuayënjana. <sup>11</sup> Y méntsoñama, bënga šontsabuashebebiana saná, ndayá jofšiyama y entsayá. Entšanga bëngbioye bacá jtsaborlánana, y tondaye yebna queftsátsbomna. <sup>12</sup> Y bënga puerte jabuache fsëndëtrabája cach bëngbe cucuatšëngaca. Entšanga šojóyanguango ora, Bëngbe Bëtsá fchandbétseimpadana cha chaoma chënga tšabe bendicionënga chamotsebomnama. Bënga chamosufrima ínñyenga tmojtsama ora, bënga chë soye fchandbétsoboyaye. <sup>13</sup> Inñyenga bëngbiana bacá tmojtsoyebuambná ora, jtsababuánñeshanëse

fsënduamana jtëjuana. Quem luarentša entsangbe bominjïiñe bënga jtsemnana chë puerte nduámanënga, mo chë quem luarentša basurëshëngcá, chë quem luarentša entsanga tondayama ndoservénënga, mo chë quem luarentša tsengacá; y chca endmëna méntscoñama.

<sup>14</sup> Quem soyënga ndoñe quecbatëbuabiamná tšëngaftanga chašmotsëuatjama, sinó ndayá jábuayenama mo cach atšbe basengbioycá, atšbe bonshánënga. <sup>15</sup> Er masque tšëngaftanga mallajta abuátambayënga chašmotsóbomñe, jacúntama ntjobenaycá, Cristbiana chacmotsabuátambama, ndoñe banga quešmátabamna tšëngaftangbiana mo taitangcá, Cristo Jesúsbeñe jtsošbuáchiyama tcmojanéjabuachama. Nye atšbe sëndmëna mo taitacá tšëngaftangbiana, mo ošbuachiyëngcá, er atšbe natsana tcbonjanabuayená chë tšabe noticiënga Jesucristbiana, y tšëngaftanga chiñe šmontsanosbuaché. <sup>16</sup> Chíyecna, cbontsaimpadana ntšamo atšbe tijamcá chašmotsamama.

<sup>17</sup> Chama Timoteo tšëngaftangbioye sentsichamná, atšbe bonshaná, canye aíñe tšabe palabra bomná; Bëngbe Utabnábeñe tojanošbuachéyeca, atšbe Cristbiana sënjanbuayiyná ora, mo atšbe uaqiñacánaca cha endmëna, ntšamo chabe osbuáchiyana yomnama. Cha echanjama tšëngaftanga chašmuatenójuaboma ntšamo atšbe tšëngaftangbeñe tsjoyenama, Crístbeñe ošbuachiyacá, ndayama atšbe nyets tempo ošbuáchiyënga sëndbetsabuatambaycá nyets luare ošbuáchiyënga enefjuanenache. <sup>18</sup> Tšëngaftanguentšë báseftanga ya šmojatsjuabná puerte uámanënga šmojtsemna ca, er šmojtsejuabná atšbe stsauatja tšëngaftangbioye jama jányama ca. <sup>19</sup> Pero Bëngbe Bëtsá chašojalesenciase, sentsobátmana betscó tšëngaftangbioye jama jányama. As chjinye ntsache obenana imobomna chë Bëngbe Bëtsabe entsangcá jtšiyenama tša uámanënga imomna ca juabnayënga, y ndoñe nye ntšamo jayanama imobencá. <sup>20</sup> Er Bëngbe Bëtsá canye ošbuachiyabe ainaniñe tojtsemánda ora, chca jtšinyñana ndoñe nye ntšamo tojtsichámuama, ndayá Bëngbe Bëtsabe obenana chábeñe tojtsemnama. <sup>21</sup> ¿Tšëngaftanga ndayá más šmattseboše: atšbe chayá tšëngaftangbioye jaucácanama, o chayá tšëngaftangbioye jányama puerte bonshanánaca y ntsetšatjaycá tšëngaftanga jauyanama?

## 5

### *Ndayá cuanjama canye boyabása shembásaftaca bacna soye amáftaca*

<sup>1</sup> Ndegombre nyets luariñe entsótatšëmbo tšëngaftanguentšë yojtsemna canya, shembásaftaca bacna soye amá, y ntšamo cha yojtsamcá puerte bacna soye yojtsemna; ni chë Bëngbe Bëtsábioye nduabuátmënga chca ntsamana: canye entsá cachabe mamamnáftaca bacna soye yojtsama. <sup>2</sup> Y tšëngaftanga cabá šmojatsjuabná corente tšábenga šmomna ca, masque chca tšëngaftangbeñe yojtsopasánëse. Tšëngaftanga cmontsamna puerte ngmëñaca jtsemnana, tša uabouana soye cha yojtsama causa. Canye entsá chca tojamáftacna, tšëngaftanga cmontsamna jamana cha ndoñe más tšëngaftangaftaca chaondenútanama mo ošbuachiyacá. <sup>3</sup> Y atšna, masque tšëngaftangaftaca choca ndoñe quetsásmëna, atšbe juabna choca tšëngaftangaftaca entsemna; y chca atšbe espíritoca séntsemnayeca, Bëngbe Utabná šojëftsanatšetá mándoca, sënjajuabó y séntsetatšëmbo ntšamo tšëngaftanga cmojtsamnama, chë entsá chca tojamáftaca. <sup>4</sup> Tšëngaftanga chašmojënefjna ora, chentšë atšbe espíritoca tšëngaftangaftaca atšbe chántsemna, y atšbe espíritu chentšë echántsemna Bëngbe Utabná Jesusbe obenánaca. <sup>5</sup> Y chora tšëngaftanga cmontsamna jamándana chë entsá ya ndoñe más tšëngaftangaftaca mo ošbuachiyacá chaondenútanama, mo Satanasbe cucuatšïñe cha cuafjaboshjoncá, chca, chë quem entsá nye cachá tšabá jtšomñama juabnënga chaotsopochocama, y chca, Bëngbe Utabná cachiñe chaojésabo ora, chabe espíritu atsboaná chaotsemnama.

<sup>6</sup> Tšëngaftanga šmojtsejuabná puerte tšábenga y uámanënga šmomna ca, pero šmojtseleséncia canya tšëngaftanguentšë chca chaotsamama. Chca ndoñe tšabá quenátsmëna. Tšëngaftanga ya šmondétatšëmbo, ntšamo chë nye batšá levadura

endbama, nyets arninjá chauábochema; cachcá, tsëngaftanguentše canya tša bacna soye chca tojama ora, nyetscangbiana ndoñe tsabe soyënga jóbocnana. <sup>7</sup> Chíyeca, tsëngaftanga cmontsamna, chca uabouana bacna soye tojamá jtabocnana, cha ya ndoñe más tsëngaftangaftaca mo ošbuachiyacá chaondenútanama; y chora tsëngaftanga šmochántsemna mo tsëm arninjacá, ndocna levadúraca, chë bacna juabnéngaca ya ndëmandánënga šmojtsémnayeca. Ndegombre tsëngaftanga chca šmondmëna, er Bëngbe Bëtsá tojama tsëngaftanga tsëm vida chašmotsebomnama. Bashco fiesta ora, oveshá tmojanóba, Israeloca entsanga perdonánënga chamotsemnama. Cachcá Cristo, mo chë oveshacá, tojanóbana bacna soyënguentsána bënga játsebacama. <sup>8</sup> Ntšamo chë judiënga chë fiesta ora mondbamcá, nyets levadura ojamnana cachcá jonýayana, cachcá, bënga šontsamna jtsajbanana oyenana bacna soyënga ínýëngbiana jamama jtsebošëse, y ndaye bacna soye jtsamëse, ntšamo tempo imojanamcá. Ntšamo chë judiënga chë fiestiñe nye levadúraca ndëpormana tandëse mondbetsesaycá, cachcá, bënga šontsamna jtsiyenana nyetsca soyënga ainaniñe ndocna bacna juábnaca jtsamëse, y ndegombre yomncá jtsóyebuambnayëse y jtsamëse.

<sup>9</sup> Chë inye atšbe tsbuanáchañe tcbonjáuyana, chë boyabása o shembásaftaca bacna soye amëngaftaca tondayama chašmondëtsencuënta ca. <sup>10</sup> Y chca ndoñe quetstétseboše jáuyanana nya tondayama chašmondëtsoyebuambná nyetsca chë quem luarentšënga boyabása o shembásaftaca bacna soye amëngaftaca, chë nye cachëngbiana bëtscá soyënga jtsebomnama tša bošëngaftaca y atbëbanëngaftaca, y chë cachëngbe pormana soyënga diosënga yomnama jtsejuabnayëse adorayëngaftaca ca; er nya chca jamamna, tsëngaftanga cmattsamna quem luarentšana jéftsebocanana. <sup>11</sup> Ntšamo chora sënjanayancá endmëna ndayá tondayama ntsencuëntayana, chë Crístbeñe ošbuachiyá yomna ca tojayanáftaca, y boyabása o shembásaftaca bacna soye tojtsama, o nda nye cachabiana bëtscá soyënga jtsebomnama tša tojtseboše, o chë cachabe pormana soyënga diosënga yomnama jtsejuabnayëse tojtsadorana, o yapa tojtsayatsená, o yapa tojtsetmó, o tojtsatbëbana. Chca entsángaftacna, ni mo šmuatjót bema chëngaftaca cánýiñe jasama. <sup>12-13</sup> Atše ndoñe quešnátsmëna jayanana chë ndošbuáchiyënga, chë bëngaftaca ndoñe mondbénutananga, aíñe o ndoñe tsábá tmonjamama. Bëngbe Bëtsá echántsemna nda chëngbiana yochjayana ntšamo tmojamcá tsábá o ndoñe tsábá bëtsemnama, tsëngaftanga ndoñe. Ndegombre nye chë ošbuáchiyënga tsëngaftangaftaca inmënutanangbiana cmontsamna chca jayanana. Chcasna, šmochjama ntšamo Bëngbe Bëtsabe uabemana palabrenguiñe endayancá: “Tsëngaftanga cmontsamna, chca bacna soye amá tsëngaftangbentsána jtabocnana ca.”

## 6

### *Ošbuáchiyënga jendemándama tojtsemna ora*

<sup>1</sup> Canye tsëngaftanguentša ošbuachiyá inye ošbuachiyabiana canye demanda tojtsebomna ora, ¿cha nanjá chë ndošbuáchiyënga mandadëngbioye chë soye chamojandmanama? ¿Ndáyeca chca nanjama, y ndoñe chë Bëngbe Bëtsabe entsángbioye nanjá chabe demanda chamouenama? <sup>2</sup> Tsëngaftanga ndegombre šmondétatšëmbo, Bëngbe Bëtsabe entsanga mochjayanama quem luarentša entsangbiana tsábá o ndoñe tsábá tmonjamama. Y chënga quem luarentša entsangbiana chca jayanama tmojtsobenëse, ¿ndoñe montsobena más base soyëngama chca jayanama? <sup>3</sup> Tsëngaftanga ndegombre šmondétatšëmbo chë angelëngbiámnaca tsábá o ndoñe tsábá tmonjamama bënga mochjayanama. Chcasna, bënga más jtsoybenana chë quem luarentše jëftsiyenama soyëngama chca játayanana. <sup>4</sup> Y chcase, tsëngaftangbeñe chca demandënga chë quem luarentše jëftsiyenama soyëngama tojtsemna ora, ¿ndáyeca šmatjátëbuayana chë ošbuáchiyëngbiana tondaye tmontsámama entsanga, chë soyënga chamojandmanama? <sup>5</sup> Chca sënjayana tsëngaftanga chašmotsëuatjama: ¿O tsëngaftanguentše ni mo canya

yondmëna corente osertaná, ošbuachiyéngbeñe demandënga chaojandmanama? <sup>6</sup> Pero ndoñe chca: ošbuachiyéngbeñe demandënga tojtsemna ora, mandadéngbioye jana chë soyënga chamojandmanama. Y chca jamana ndošbuáchiyënga mandadéngaftaca.

<sup>7</sup> Y tšëngaftangbeñe nÿe demandënga jájandmanama tojtsemna ora, tšëngaftangbiana ya canÿe puerte bacna soye jtsemnana. ¿Ndáyeca ndoñe šmattsóboyaye ínÿenga bacá cmojtsaborlana ora? ¿Ndáyeca ndoñe cachcá šmatjonÿaye ínÿenga cmojtsabi-atbëbana ora? <sup>8</sup> Pero cach tšëngaftangaftacna inÿetšá copasana, ínÿengbioye bacá jtsaborlánana y jtsabiabëbanana, y tšëngaftangcá Crístbeñe ošbuachiyéngbioynaca.

<sup>9</sup> ¿Tšëngaftanga ndoñe šmondétatšëmbo, chë bacna soye amënga Bëngbe Bëtsabe amëndayoye ndoñe mochanjámashënguama? Ndoñe matenoíngñana. Ni chë boyabása o shembásaftaca bacna soye amënga, ni chë cachëngbe pormana soyënga diosënga yomna ca jtsejuabnayëse adórayënga, ni cachëngbe boyá o shema ínÿaftaca íngñayënga, ni chë boyabásënga mo shembasengcá jtsinÿnama bošënga, ni chë boyabásënga inÿe boyabásëngaftaca bacna soye amënga, <sup>10</sup> ni chë atbëbanënga, ni chë nÿe cachëngbiana bëtscá soyënga jtsebmomnama tša bošënga, ni chë tša tmoyënga, ni chë uayátseñayënga, ni chë ínÿengbiana bacna soye jtsamëse imnëtsatbëbanënga, chënga nÿetscanga ndoñe quemochatobenaye Bëngbe Bëtsabe amëndayoye jamashjnama. <sup>11</sup> Y tempo báseftanga tšëngaftanguentšënga chca šmojamna, pero Bëngbe Bëtsá tšëngaftangbe bacna soyëngama tcmojaperdoná, y chca entsemna mo bebënënga cuaftsemncá; cha tojama tšëngaftanga chabe entšanga chašmotsemnana, nÿe cha chašmotseservénama, y tojama tšëngaftanga mo tšabengcá chabe bominÿiñe chašmotsemnana. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espíritu tojamama.

#### *Bëngbe cuerpo chaotsemna Bëngbe Utabná jtseservénama*

<sup>12</sup> Mondbëtsichamo: “Atšbiana entselesenciana ndayánaca jamama, ndayama Bëngbe Bëtsá ndocá tonjayana ca.” Pero básefta soyënga jtsamana ndoñe atšbe tšabiana ntsemnana. “Atšbiana entselesenciana ndayánaca jamama ca”, pero ndoñe quichatslesencia ndaye sóyecnaca nÿets tempo mandaná jatsmënana. <sup>13</sup> Mëntšánaca mondëtsichamo: “Saná uafsbiana y uafsbíá saná chaóyëngacñama ca.” Pero Bëngbe Bëtsá canÿe te echanjama chë uta soye chaotsopochocama. Bëngbe Bëtsá entšabiana cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiana tšabe bendicionënga chaotsamama. <sup>14</sup> Y Bëngbe Bëtsá, nda tojama Bëngbe Utabná cháuatayenama, bëngbiámnaca chabe obenánaca echanjama chámuatayenama.

<sup>15</sup> ¿Tšëngaftanga ndoñe šmondétatšëmbo, Crístoftaca cánÿiñe mo canÿacá šmomnama yomna mo tšëngaftangbe cuerpo chabe cuerpentša soye cuaftsemncá? Tšëngaftangbe cuerpo Crístbioye jaserviama endmëñayeca, tšëngaftangbe cuerpo jtsemnana mo Crístbe cuerpentša soycá. ¿Ntšamo atše chjátobena atšbe cuérpoca, chë ndayá yomna mo Crístbe cuerpentša soycá, canÿe bacna vida bomna shembásaftaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¿Ndoñe, ndegombre ndoñe! <sup>16</sup> ¿O tšëngaftanga ndoñe šmondétatšëmbo, canÿe entšá canÿe bacna vida bomna shembásaftaca tbojéninÿena ora, chë útata jóbëmana mo canÿacá? Er Bëngbe Bëtsabe uabemana palabrenguiñe boyabása y shembása tbojéninÿenama mëntšá endayana: “Chë útata mo canÿacá bochántsema ca.” <sup>17</sup> Pero canÿe entšá Bëngbe Utabnáftaca cánÿiñe mo canÿacá tojtsemna ora, jtsemnana mo chë útata cach canÿe espíritu tbojtsebmncá.

<sup>18</sup> Nÿa ndocna te canÿe boyabása o shembásaftaca bacna soyënga šmattsama. Nderado ndaye inÿe bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamamna, lempe jamana nÿe cachabe cuérpoca, y chë causa, chca jamëse, cachabe cuerpama más bacna soyënga

jtsamana. <sup>19</sup> ¿Tšëngaftanga ndoñe šmondétatšëmbo tšëngaftangbe cuerpo yomna mo canye yebncá Uámána Espiritbiana, cha tšëngaftangbe ainaniñe chaotsiyenama Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna, sinó Bëngbe Bëtsabe soye. <sup>20</sup> Chca endmëna, er Cristo bënga játsebacama tojanóbana ora, yojamna mo cha bëtská cuafjopagacá tšëngaftanga Bëngbe Bëtsábenga chašmotsemnana. Chíyeca, chë tšëngaftangbe cuerpëngaca chašmojtsama soyëngaca šmochtsinjanynaye Bëngbe Bëtsá puerte uamaná y bëtsá bëtsemnana.

## 7

*Jobouamayama jábuayenama*

<sup>1</sup> Mora chanjóyebuambaye ndayá tšëngaftanga átšbioye šmojuábobemama. Ndegombre, canye boyabásabiama más tšabá endmëna ndoñe chaondobouamá. <sup>2</sup> Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá. <sup>3</sup> Boyábioye bontsemna jamana chabe shembiana lempe ntšamo jamama ibomncá, boyá bëtsemnana; y chabe shémnaca cachcá chabe boyabiama chaoma. <sup>4</sup> Chë shembe cuerpo ndoñe nye cha cányabiama ntsemnana, sinó chabe boyabiámnaca. Cachcá, chë boyabe cuerpo ndoñe nye cha cányabiama ntsemnana, sinó chabe shemiámnaca. <sup>5</sup> Ni boyá, ni shema ndoñe chabondëtsejuabná jtsenbiátšbuana. Aíñe chca copodena, pero nye chë útata chca básefta tescama tbojenóyeunase, Bëngbe Bëtsáftaca jencuëntama jtsentšënana. Pero chentšana chë útata entsamna cachiñe cányiñe jtëtsmënana, chca, Satanás ndoñe chaondobená jamama bacna soye chaócochënguama, cachënga jenomándama ndoñe tmontsobena causa.

<sup>6</sup> Atše chca séntsichamo, tšëngaftanga jábuayenama, ndayá jamama šmojtselesenciana, y chca ndoñe chašmondétsamama jaméndama. <sup>7</sup> Y atšbe bariëna, atšbe juabna entsemna malaye nyetscanga chë soyënguñe mo atšcá šmattsemna. Pero Bëngbe Bëtsá cada ona obenana tbojatšetá tšabe soyënga jamama, Crístbeñe ošbuáchiyënga jujabuáchama, ínÿenga canye soyama, ínÿengna inÿe soyama.

<sup>8</sup> Chë cabá ndbouamnënga y viudanga séntsétsétsná, chëngbiana tšabá yojtsemna ntjobouamaycá joquédana, atšcá. <sup>9</sup> Pero chca jtsemnana cachënga jenomándama ndoñe tmontsobenëse, chënga entsamna jtsóbouamayana, er más tšabá endmëna jtsóbouamayana, y ndoñe nye boyabásabiama o shembásabiama tša nyets tempo jésejuabnayana.

<sup>10</sup> Pero chë bouamnënga séntsaménda shema chabe boyábioye ndoñe cachcá chabondetsonyá. Chca ndoñe nye atše quetsataménda, ndayá cach Bëngbe Utabná. <sup>11</sup> Pero, shema cachcá chabe boyábioye tbojesonÿase, cha bontsemna ntjobouamaycá jtsomñana o chabe boyáftaca cachiñe jtenútanana. Y cachcá, chë boyá ndoñe quebnátsmëna chabe shema cachcá jesonÿayana.

<sup>12</sup> Chë ínÿenga chjáuyana, atšbe juabncá y ndoñe Bëngbe Utabnabe soycá, nderado canye ošbuachiyá tbojtsebomna canye shema Crístbeñe ndošbuachiyá, pero chë shema tojtseboše cháftaca joquédana jtsiyenama, cha chë shëmbioye ndoñe cachcá chabondetsonyá. <sup>13</sup> Nderado canye ošbuachiyá tbojtsebomna canye boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondëtsejuabná cha cachcá jesonÿayana. <sup>14</sup> Er Bëngbe Bëtsá tojama, canye shembása ošbuachiyá chabe entšá chaotsemnana, nye chábioye chabotseservënana, y chca, chánaca jtsejuabnayana chë shembásabe boyá Crístbeñe ndošbuáchiyabiama mo chabiama oservena entšacá, cha chëngbeñe mo canye pamillécá jatrabájama tojtseboše ora; y cachcá, chë boyá ošbuachiyábeyeca Bëngbe Bëtsá jtsejuabnayana chabe shema Crístbeñe ndošbuáchiyabiama mo chabiama oservena entšacá, cha chëngbeñe mo canye pamillécá jatrabájama tojtseboše ora. Er chca ndoñe tontsemnëse, chë básenga muántsemna ndošbuachiyatbe básenga, Bëngbe Bëtsáftaca tondaye ndbomnënga. Ndoñe chca yondménayeca, canya o nyets uta bëtsétsatbe ošbuáchiyama,

Bëngbe Bëtsá jtsejuabnayana chë básengbiama mo chabe entsängcá. <sup>15</sup> Pero chë boyá o shema Crístbeñe ndošbuachiyá cachcá jtsenónyayama tša tojtsebošëse, chca chaboma. Chora, chë ošbuachiyá ndoñe ntsotocánana chë ín्याftaca cachiñe jtëtenútanama, er Bëngbe Bëtsá tcmojáchembo natjémbana chašmotsiyenama. <sup>16</sup> Chca šmochjama, er aca shema ¿ntšamo cattsetátšëmbo, tacuatjobenaye acbe boyá jayénjanana Crístbeñe chaotsošbuáchema, y chca, atsbocaná chaotsemnana? o aca boyá ¿ntšamo cattsetátšëmbo, tacuatjobenaye acbe shema jayénjanana Crístbeñe chaotsošbuáchema, y chca, atsbocaná chaotsemnana?

<sup>17</sup> Masque ntšámna, cada ona chaotsiyena jtsamëse ntšamo chë Bëngbe Utabná tbojatšeta obenana yomncá, cada ona ndayá jamama Bëngbe Bëtsá tbojachembcá. Chca atše nyets luare ošbuachiyënga enefjuanenache sëndbëtsamëndaye. <sup>18</sup> Nderado Bëngbe Bëtsá cánÿabioye tbojachembo, y cha ínÿengbeyeca chë más delicadentse base bobachtema tëtšená tojtsemna, ntšamo chë judiënga monduamancá, cha ndoñe chaondëtsenobiamná mo ndoñe judío cuafjatsmëncá; y nderado Bëngbe Bëtsá cánÿabioye tbojachembo, y cha ndoñe chca tëtšená tontsemnëse, cha ndoñe chaondëtsejuabná tëtšená jatsmënana, ntšamo chë judiënga monduamancá. <sup>19</sup> Er ndayá iuámna, ndoñe quenátsmëna chca tëtšená jtsemnana o ndoñe, ndayá ntšamo Bëngbe Bëtsá yomandacá jtsamana. <sup>20</sup> Cada ona bontsemna jtsiyëñana, ntšamo yojoyencá, chabe entsá chaotsemnana Bëngbe Bëtsá tbojanchembo ora. <sup>21</sup> Bëngbe Bëtsá tcmojanchembo ora, nyets tempo ínÿabiama oservená cojamnëse, chama ndoñe cattsenócochinÿena. Pero nderado tojtsemna ntšámose jashjáchama ndoñe más chca ntsemnana, cach acbiama jatrabájama, as chca cochjama. <sup>22</sup> Er chë nye ínÿabiama nyets tempo oservená yojamná, Bëngbe Bëtsá chabe entsá chaotsemnana tbojanchembo ora, cha mora ošbuachiyacá, jtsemnana canÿa ya ndoñe más bacna soyënga jamama juabnéngaca mandaná, sinó Bëngbe Utabnabiama oservená. Cachcá, chë nye cachabiama trabajayá yojamná, Bëngbe Bëtsá tbojanchembo ora, mora cha nyets tempo Cristbe oservená jtsemnana. <sup>23</sup> Cristo bëngbiama tojanóbana ora, yojamna mo cha bëtscá cuafjopagacá, bënga Bëngbe Bëtsabe entsänga chamotsemnana. Ndoñe šmatjaleséncia nye entsängbe juabnéngaca nyets tempo mandánënga chašmotsemnana, y Bëngbe Bëtsabiama chacmotsebnëtjomba. <sup>24</sup> Chcasna, Jesucrístbeyeca atšbe catšátanga, cada ona bontsemna Bëngbe Bëtsáftaca jtsiyëñana, ntšamo yojoyencá Bëngbe Bëtsá tbojanchembo ora.

<sup>25</sup> Y chë ndébouamna shembásengbiama, chënga aíñe o ndoñe yontsamna jobouamayamna, atše chama ndoñe Bëngbe Utabnabe canÿe mando quetsátsbomna, pero chanjayana ntšamo atše tsjuabnacá. Bëngbe Bëtsá atšbe tšabiama tojanjuabóyeca, entsänga montsobena jtsejuabnayana aíñe tšabe palabra bomná chiñe atše tsmënana. <sup>26</sup> Atše šontsinÿana, entsá ibojtsemna jtsomñana nye ntšamo mora yotsomñcá, er bënga mora montsiyena puerte padecena soyënguiñe. <sup>27</sup> Shema tcobomnëse, ndoñe cachcá catjëftsonÿaye; y ndoñe tcondbomnëсна, ndoñe catjátsënguaye. <sup>28</sup> Tcojobouamase, bacna soye ndoñe quecátama; y nderado canÿe tobiaše tojobouamase, cach bacna soye ndoñe quenátama. Pero chë tmojtsobouamangna padecena soyënguiñe mochanjoyena quem luarentse chamojëftsemnëntscuana, y atše séntseboše chënga jujabuáchama chca jatiyenama ndoñe chaondëtsamnana.

<sup>29</sup> Jesucrístbeyeca atšbe catšátanga, ntšamo séntseboše jayanamna mëntšá entsemna: Cristo quem luaroye yochjésabo orscama ya nye batšá entsájamna. Chíyeca, morscana y nyets tempo más chcoye, chë bouamnënga entsamna jtsiyenana mo ndoñe bouamnënga tmontsemncá, o mëntšá, entsamna jtsentšénana Bëngbe Bëtsabe soyënguiñe, y ndoñe nye chë bouamná bëtsemnana tbojtsemna soyënguiñe. <sup>30</sup> Cachcá, chë puerte ngménaca tša ošachiyiñe imomnënga, entsamna jtsiyenana mo ndoñe chca tmontsemncá; y chë puerte oyejuayënga, chamotsiyena mo ndoñe chca tmontsemncá; chë soyënga buamnayënga chamotsiyena mo tondaye chëngbe soye tontsemncá. <sup>31</sup> Chë quem

luarentša soyéngaca jtsiyenama imojtsentšénënga entsamna jtsiyenana mo ndoñe chca tmonsamcá, er quem luare ntšamo bënga mora monduabuatmcá, pronto echanjochnëngo.

<sup>32</sup> Atše séntseboše tšëngaftanga ndoñe chašmondétsenocochinýenama. Canýe entsá ndoñe bouamná tontsemna ora, jtsobenana jtsentšénana Bëngbe Utabnabe soyëngama jtsejuabnayama, y ntšamo oyejuayá cha jabemama; <sup>33</sup> pero chë bouamná nyets tempo jt-senócochinýenana quem luarentša soyëngama, jtsiyenama, y ntšamo chabe shema oyejuayá jtsebonnama; <sup>34</sup> y chca, cha uta soyiñe canýe ora jtsentšénana. Chë ndébouamna shembása y chë tobiáše bontsobena jtsentšénana Bëngbe Utabnabe soyënguñe sempre jtsejuabnayama. Chënga mondobena jtsentšénana Bëngbe Bëtsá jaserviama, ndayá chëngbe cuérpoca y chëngbe espíritoca tmojamama. Pero inýetsá, chë bouamna shembásana, nyets tempo jesenócochinýenana quem luarentše vida jtsebonnama soyëngama, y ntšamo chabe boyá oyejuayá jtsebonnama.

<sup>35</sup> Atše chca cbontsëtsétsná tšëngaftangbe tšabiama, y ndoñe jamëndama ba soyënga jamama ndoñe chašmondétsobenama, ndayá ntšamo tšabá yomncá chašmotsiyenama, y nye Bëngbe Utabná jtseservénama chašmotsentšénama.

<sup>36</sup> Nderado nda tojtsejuabná chabe uatsëtsnaye tobiášeftaca jtsobouamayama ibojtsemna ca, chca jamama chë tobiáše ya bëtsá tojtsemnayeca, y chca jamama tša tšabá yojtsemna ca tojtsejuabnase, cha bontsemna jamana ntšamo tojtsebošcá. Chaot-sobouamá. Chca tojama ora bacna soye ndoñe ntsamana. <sup>37</sup> Pero nderado inýa, tondaye obligaciónaca tontsemna y lempe ntšamo tojtsebošcá cha tojtsobena jamama, cha tšabá tojajuabó y chabe ainaniñe corente tojtsetátšëmbo, ndoñe ntobouamayana tšabá yomna ca, cha tšabá chca jtsamana. <sup>38</sup> Chcasna, chë tobiášeftaca tojtsobouamá chana, canýe tšabe soye jamana; pero chë ndoñe cháftaca tonjobouamá chana, canýe más tšabe soye jamana.

<sup>39</sup> Chë shembása bouamná jtsotocánana chabe boyáftaca sempre jëftsiyenana, chë boyá vida tojtsebonnëntscuana; pero chë boyá tojóbanëse, cha jtsobenana cachiñe jto-bouamayana, nda cha tojtsebošáftaca, pero chca chaoma mo canýa Bëngbe Utabnáftaca cánýiñe mo canýacá quetsomñecá. <sup>40</sup> Pero atše jayanamna, cha más oyejuayá nántsemna ndoñe tontóbouamase; y séntsejuabná, átsnaca tsbomna chë Bëngbe Bëtsabe Espiritu chašotsebuaiynama.

## 8

### *Uátšëmbona saná entsangbe pormana soyëngama*

<sup>1</sup> Mora chanjóyebuambaye ndayá tšëngaftanga atše šmojatjama, ndayá jtsesayama, chë tempo inýenga cachëngbe pormana soyënga, diosënga yomna ca jtsejuabnayëse jadórana tmojanátšëmbona soyëngama. Bënga mondétatšëmbo bënga nyetscanga osertánënga imomnama. Canýa tbojtsosertana ora, cha nderado nanjajuaboye, chca bëtsemnama puerte uamaná cha yojtsemna ca, pero canýa, inýenga tojtsababuánýeshana ora, cha jtsobenana chënga becá jujabuáchana. <sup>2</sup> Nderado nda tojtsejuabná ndegombre canýe soye yotátšëmbo ca, cabá ndoñe yontsetátšëmbo ndayá jtsetatšëmbuama ibojtsemncá. <sup>3</sup> Pero nderado nda Bëngbe Bëtsábioye tbojtsebobonshana, Bëngbe Bëtsá chábioye jtsabuatmana mo chabe entsacá.

<sup>4</sup> Y chë tempo inýenga cachëngbe pormana soyënga, diosënga yomna ca jtsejuabnayëse jadórana uátšëmbona soyëngamna, atše šcuayana: bënga corente mondétatšëmbo chë chënga innétsadorana soyënga, diosënga yomna ca jtsejuabnayëse, ndegombre ndoñe dios quemátsmëna y nye canýa Bëngbe Bëtsá endmëna. <sup>5</sup> Pero masque celoca y quem luarentše chamomna entsangbiana “diosënga ca” uabáinënga (ntšamo ndegombre endmëncá, banga quem luarentša tsbanánoca obenánaca mondëna, entsangbiana diosënga ca ubuátmënga, y banga bëts mándoca entsangbiana “utabnënga ca” uabáinënga), <sup>6</sup> bënga chë ošbuáchiyëngbiamna nye canýa Bëngbe Bëtsá

endmëna, Bëngbe Taitá, ndábentšana nyetsca soyënga yóbocana, y nÿe nda jtseservënama bënga imoyena. Y nÿe canÿe Utabnánaca endmëna, Jesucristo, ndábeyeca nyetsca soyënga yomna, y cach bëngnaca imomna.

<sup>7</sup> Pero nyetsca ošbuáchiyënga ndoñe chca quemátstatsëmbo. Básefta entšanga, Crístbeñe cabá ntsošbuáchiye ora, imojanamana ndaye sanánaca juatšëmbonana, chë chënga imojanjuabná diosënga yojamna ca soyënga jadórana; chënga, chca uatšëmbonana tmojttesá ora, jtsejuabnayana chca uatšëmbonana bëtsemnama, y ainaniñe juabnënga jtsebomnana ndoñe tšabá tmonjamama, chana tmojase causa. Chënga, ndayá tempo imojánamama, ndoñe quemátobena tšëngaftangcá jtsejuabnayana, chcana jasana bacna soye ndoñe yondmëna ca. <sup>8</sup> Ndegombre, ndayá bënga tmojttesacá ndoñe ntjamana bënga Bëngbe Bëtsábioye más chamuatobéconama. Bënga Bëngbe Bëtsabe bominiñe ndoñe quemochátsmëna más tšábënga aíñe tmojttesama; ni ndoñe chcanga, ndoñe tmontsesá causa.

<sup>9</sup> Pero cuedado šmochtsebomna, ndayá jamana yolesenciánama tšëngaftanga corente tšabá šmotatšëmbuama, ndayánaca jatsmana, y chca causa ínÿënga, chë soyënguiñe más batšá ošbuáchiyënga y osertánënga, ntšamo tšëngaftanga šmojtsemná chamuatasmama, y chentšana, chëngbe ainaniñe juabnënga chamotsebomna y chëngbiöye chaotsëtsëtsná ndoñe tšabá tmonjama ca. <sup>10</sup> Er, aca chë soyëngama tatšëmbuá, nderado tcojót'bema jasama canÿe luarentše, canÿe soye ndayama entšanga dios yomna ca jtsejuabnayëse adórayentše, y canÿe Crístbeñe ošbuachiyá tojtsebomna ainaniñe juabnënga ndoñe tšabá tonjamama, chca tojáseyeca, aquécá chë soyëngama ndoñe yondétatšëmbo causa, y cha nderado chentše cojttesama tcmojinÿëse, chë soye nanjobenaye chábioynaca jañëmuana chë saná jasana, chë tempo chë soyëngama tmojanátšëmbona saná. <sup>11</sup> Y chca aca, chë soyëngama ntšamo betatšëmbuama tcojamama, catjama chë Jesucristbeyeca acbe catšata, chë ndoñe corente ošbuachiyá, y ndoñe aquécá chë soyëngama corente tatšëmbuá, cha pochocaná chaotsemnama, er chabe ainanentše echántsemna juabnënga canÿe bacna soye tojamama, chë saná tojasama. Chca nderado cánÿabioye catjama, ndabiama Cristo tojanóbana, cha jatsbocama. <sup>12</sup> Jesucristbeyeca acbe catšatbiama chca bacna soye tcojama ora, chca causa cha canÿe soye tojama, ndayama chabe juabnënga ainaniñe chabotsatsëtsná ndoñe chca chaondétsama ca; y chca, chentšana tša tojesejuabná cha canÿe bacna soye tojamama, acna canÿe bacna soye jamana, ndoñe nÿe chë catšatbiama, ndayá cach Cristbiámnaca. <sup>13</sup> Chíyeca, nderado ndayá atše stsesama, atše tsjama Jesucristbeyeca atšbe catšata chaoma canÿe soye y chca jamama chabiama canÿe bacna soye tojtsemnëse, más tšabá nántsemna ndocna te chë soye atše ntjasana, chca, atše ndoñe jatsmama cha canÿe bacna soyiñe chaótsatšama.

## 9

### *Jesucristbe ichmónëngbe derecho*

<sup>1</sup> Ndegombre endmëna, atše ndayánaca jamana stselesenciánama y Moisesbe leyëngaca ndoñe más mandaná séntsemnama. Cach ndegombre endmëna, atše canÿe Jesucristbe ichmoná tsmënama y Jesús Bëngbe Utabná tijinÿama; y cach tšëngaftanga mora ošbuáchiyënga jtsemnëse, šmondmëna ndayá tojóbcna Bëngbe Utabnabiama atšbe trabajuentšana. <sup>2</sup> Masque ínÿënga atšbiama ndoñe quematsjuabná atše canÿe Jesucristbe ichmoná tsmëna ca, tšëngaftangbiama aíñe chca endmëna; er tšëngaftanga Crístbeñe ošbuáchiyënga šmondmënama y Bëngbe Utabnáftaca cánÿiñe mo canÿacá šmondmënama, puerte tšabá šmontsinÿanÿná atše Jesucristbe canÿe ichmoná tsmënama.

<sup>3</sup> Mëntšá chanjayana chë atše ndoñe tšabá tijama ca imojtsichámëngbiama: <sup>4</sup> Ndegombre bënga nyets derecho fsëndëtsóbomñe jtsobátmanama tšëngaftangbentšana, chë tchojujabuáchëngbentšana, bëngbe trabajuama saná o ndayá jofšiyama chašcuacaredadama. <sup>5</sup> Y bëngnaca derecho fsëndëtsóbomñe canÿe shema ošbuachiyá



jtsebomnama y béngaftaca cha jéftsbeštama inye luaroye fstsajna ora, ntšamo chë Jesucristbe inye ichmónënga, Bëngbe Utabnabe catšátanga y Pédrënaca mondbetsamcá. <sup>6</sup> ¿O nye Bernabé y atše šojtsëtocana cabëndatbe cucuátšeca jatrabájana vida jtsebomnama, y ndoñe derecho fséntsebomna ošbuáchiyënga chašotsacuédanama, Bëngbe Bëtsabiama trabájayama? <sup>7</sup> ¿Ndëmua mo canye soldadcá tojtsoservená, ndayá tbojtsájabotama cachá nantsatopagana, vida jtsebomnama? Ndocná canye jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanýenana, chë tojabuatëba létšiyentšana ndoñe ntjofšiyama. <sup>8</sup> Ntšamo atše muentše sentsichamcá ndoñe nye entsangbe juabna quenátsmëna; y Moisesbe leyíñnaca cachcá endayana, <sup>9</sup> er chabe leyíñe mëntšá endayana: “Aca canye toróftaca shajuana tmojtsatbaná luariñe chacojtsetrabája ora, ndoñe catjuanguëtšenaye ca.” Y chca ndoñe quenátayana Bëngbe Bëtsá nye toronga inétsanýena ca, <sup>10</sup> sinó inye más bëts soye; chca endayana ndayá ndegombre bënga, chë Bëngbe Bëtsabiama soyëngama abuyiynayiñe trabájayënga cha šnetsanýena ca. Chca tmojanábema bëngbiamana, er chë fshantse arayá y chë meshënga atbanayá, entsamna chca jamana jtsobátmanëse, chë tmojátabe shajuantšana batšá jójyëngacñama. <sup>11</sup> Y chca, bënga chë tšabe noticiëngama tchojábuyenase, y chca, Bëngbe Bëtsábocana tšabe bendicionënga chašmotsebomnama bënga tifjama, ndoñe yapa tanandátsmëna tšëngaftanga jótjañana, chë šmobomna soyënguentšana bënga jéftsiyenama chašcuatšatama. <sup>12</sup> Inyënga derecho tmojtsebomna tšëngaftanga jótjañana chë šmobomnentšana chašmuacaredadama, tšëngaftangbeñe chëngbe trabajuama, as bënga más derecho ftssebomna chca jamama.

Pero bënga tondaye checbatamëndá, bënga chë derecho bétsebomnayeca. Chca játamamna, bënga lempe fséntsoboyá, chca, bënga tondaye ntjátamama, y chë causa entsanga ndoñe chašondétsayaunana, bënga chë tšabe noticiënga fstsabuayiyná ora. <sup>13</sup> Tšëngaftanga šmondétatšëmbo, Bëngbe Bëtsabe bëts yebnoca trabájayënga Bëngbe Bëtsabiama oservéniñe, mondbóyëngacñe chënga jasama, ndayá entsanga Bëngbe Bëtsá jadórana chabe bëts yebnoye tmojiyëbo sananguentšana. Y chë Bëngbe Bëtsá jadórana soyënga amënga, altaroca, chë juatšëmbonama luarentše, chënga jasana ndayá chentše tmojuátšëmbona soyënguentšana. <sup>14</sup> Cachcá, Bëngbe Bëtsá tojamandá, chë tšabe noticiënga abuyiynayëngna, vida jtsebomnamna lempe ntšamo tojtsëjabotcá chamóyëngacñe ca, chë tšabe noticiënga abuyiynayama. <sup>15</sup> Pero atše ndocna te chiyaisemandá inyënga chca chašmotsecuedánama, atše chë tšabe noticiënga abuyiynayá bétsemnama chca derecho tsbómnyayeca, y cach ndoñe mora quem soye quecbatëbuabianná, tšëngaftanga ndayánaca atše chašmuatšetama. Atšbiamana más tšabá nántsemna jóbana, y ndoñe ntjalesénciana inya chaoma atše cach atšbiamana oyejuayá ndoñe ntjátsmënama, inyëngbentšana soyënga stjójyëngacñe causa.

<sup>16</sup> Atše ndoñe quetsatsjuabná atše canye bëts soye stsama ca, chë tšabe noticiënga stsabuayiynama, er atše obligaciónca séntsemna chca jtsamama, Bëngbe Bëtsá chama šojanchémboyeca. ¡Tša lastemcá atšbiamana nántsemna, chë tšabe noticiënga ndoñe sentsabuayiynase! <sup>17</sup> Chíyeca, atše chë tšabe noticiënga stsabuayiyná nye atše chca jamama stsebóšeyeca, atšbe uacanana soye ya stsebomna; pero atše chca stjama, y ndoñe tontsemna nye atše chca jamama stsebóšeyeca, masque chca, atše stsama, ndayá jtsamama Bëngbe Bëtsá šojanbonýecá. <sup>18</sup> Y chca, atšbe uacanana soye endmëna atše oyejuayá jtsemnana chë tšabe noticiënga abuyiynayama, ošbuachiýëngbentšana atše vida jtsebomnama tondaye ntjatoyëngacñecá; chca, atše tondaye quetsátama chë tšabe noticiënga abuyiynayama tsbomna deréchoca, chë atšbe trabajuentšana vida jtsebomnama.

<sup>19</sup> Atše, masque ndocna entsábeyeca nyets tempo mandaná quetsátsmëna, puerta nduamaná sënjobema, mo canya nyets tempo inyábeyeca mandanacá, nyetscanga jaserviama, chca, atše chca jtsamëse, jobenayama becá entsanga, ntšamo tojopodecá, jayénjanama Crístbeñe chamotsošbuáchemana. <sup>20</sup> Chë judiëngbiamna atše sënjama

chaitsiyena mo chëngcá jtsamëse y jtsejuabnayëse, chca, atše jobenayama chënga jáyëñjanama Crístbeñe chamotsošbuáchema. Y chë Moisesbe léyeca mandánënga imoyenëngbiamna, atše chëngcá sënjobema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyëñjanama Crístbeñe chamotsošbuáchema. <sup>21</sup> Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyëñjanama Crístbeñe chamotsošbuáchema, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá. <sup>22</sup> Chë nýe batsatema ošbuáchiyëngbiamna y Bëngbe Bëtsabe soyëngama nýe batsatema osertánëngbiamna, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Crístbeñe chamotsošbuáchema. Y lempe chca, chë atše jamana ntšamo nýetscanga imomncá atše chaitsemnama, endmëna atše jobenayama báseftanga jáyëñjanama Crístbeñe chamotsošbuáchema.

<sup>23</sup> Atše lempe chca sëndama, bëtscá entšanga chë tšabe noticiënguiñe chamotsošbuáchema, y chca, atše atsboaná chaitsemnama y chëngcá atše chayóyëngacñama, chë atsebácanënga Bëngbe Bëtsá yochjatšataye tšabe soyënga.

<sup>24</sup> Tšëngaftanga šmondétatšëmbo, canýe luaroye jashjanguama entšanga tmojótjajo orna, banga jotjajuana, pero nýe canýa chë uacanana soye jóyëngacñana. Chcasna, mo chë uacanana soye jóyëngacñama tmojótjajëngcá, tšëngaftanga cmontsamna jtsiyenana, chë Bëngbe Bëtsábiocana uacanana soye josháchiñama. <sup>25</sup> Nýetscanga chë tmojótjajënga ínýenga jáyëñjanama, chënga jopróntana nýetsca soyënguiñe jtsenomándayëse, chca, canýe uacanana soye, tsbuanachéngaca uapormana coronésha juayëngacñama; y chësha betesco jtsanctana. Pero bënga ndoñe; bënga mondoyena Crístbiamna soyënga jtsamëse, Bëngbe Bëtsábiocana ba tšabe soyënga mo uacanancá jóyëngacñama, y chë soyënga nýetsca tescama bënga mochanjëftsebmoma. <sup>26</sup> Y atšna, atšbe bariëna sëndëntšena Bëngbe Bëtsá jtseservénama, ndoñe mo canýa ínýëngbiyoye jáyëñjanama tojotjajuacá, chë ndémoye jashjanguama yomnama ntsetatšëmbcá; y cach ndoñe mo nda tojtsepeliá orcá, chora, cha nýe ínýoye chabe buacuatsënga tojtsëtšana y chë ínýabe cuerpoye ndoñe. <sup>27</sup> Mo canýe tšabe peliayacá, chabe cuerpo játsëtšenana y chca chë cuerpo corente jtsemándayana, atše ndoñe quetsatsleséncia chë atše tšabá jtsomñama atšbe ainantšá juabnënga chašotsemándama; y chca, Crístbiyoye jtseservënëse chamotsiyenama ínýëngbiyoye stjabuayená chentšana, Bëngbe Bëtsá chašotsaboté chabe uacanana soye josháchiñama, cha ndoñe tšabá tijaservé causa.

## 10

### *Cach entšangbe pormana soyënga ndoñe chamondëtsadoránama jábuayenama*

<sup>1</sup> Jesucristbeyeca atšbe catsátanga, atše séntseboše tšëngaftanga chašmotsetátšëmbo bëngbe tempsca bëts taitanga judiënga, chënga nýetscanga Bëngbe Bëtsá canýe jantšëtéshëca benache yojaninýanýná, y chënga nýetscanga, chë Buángana ca uabaina mar bejayëjana tmojánachnëjna, chiñe mo bojojuiñe cuaftsomñcá. <sup>2</sup> Chë jantšëtéshëca Moisés imojanéstonama, y chë mar bejayëjana tmojánama, chënga tmojanóbema Moisesbe ústonënga. <sup>3</sup> Chënga nýetscanga tmojanse cachca saná, chë Bëngbe Bëtsá celocana tojanichmó saná; <sup>4</sup> y nýetscanga tmojanofšé chë Bëngbe Bëtsá tojanma chë peñësentšana chaóbozna béjaye. Cristo chëngaftaca yojtsemna jtsanýenama chënga imojtsajnëntscuana, y ntšamo chë peñësentšë chëngaftaca tojanopasacá, yojaninýanýná Cristo chënga yojtsanýenama. <sup>5</sup> Masque chca, banga chënguentsënga ntšamo tmojanmama Bëngbe Bëtsá ndoñe yontsoýejuaye; y chë causa, Bëngbe Bëtsá tojanma chënga chamóbanama chë entšanga ndoyenentšë.

<sup>6</sup> Lempe chca tojanopasá bēnga jinŷanŷiyama y jábuayenama ntšamo inopása entšanga bacna soyēnga jamama tmojtseboše ora, bēnga chca jamama ndoñe chamondétsebošama. <sup>7</sup> Chíyeca, tšēngaftanga ndoñe šmattsadorana entšangbe pormana soyēnga, ndayama ínŷenga jtsejuabnayana diosēnga yomna ca, ntšamo báseftanga israeloquēnga tmojanmcá. Ntšamo Bēngbe Bētsabe uabemana palabrēnguiñe chēngbiana endayanácá, chēnga canŷe ternerá castellánoca tmojanpormá ora, mo dios cuaftsemncá jadórana: “Entšanga tmojanotbiana jasama y jatmuama, y chentšana tmojantsbaná joboyeuama ca”. <sup>8</sup> Boyabása o shembásaftaca bacna soyēnga ndoñe šmattsama, ntšamo báseftanga chēnguentšēnga tmojanmcá, y chē causa, nŷe canŷe te, uta bnétsana y unga uaranga entšanga tmojanóbana <sup>9</sup> Bacna soyēnga ndoñe šmattsama, jinŷama buetatescama Bēngbe Utabná uantado yochjéftsemnama y ndoñe šochanjacastígayama. Báseftanga chēnguentšēnga chca tmojanma, y chē causa tmojanóbana mētšcuayéngaca ftétšenēnga. <sup>10</sup> Bēngbe Bētsabe contra ndoñe šmattsóyebuambnaye, ntšamo báseftanga chēnguentšēnga tmojanmcá, y chē causa, chē ángel obanayá tojanma chēnga chamóbanama.

<sup>11</sup> Lempe chca bēngbe tempsca bēts taitángaftaca tojanopasá, bēnga jinŷanŷiyama ntšamo jtšiyenana šojtsamnama, y Moisés, Bēngbe Bētsabe uabemana palabrēnguiñe chca tojéftsanboshjona bēnga jabuátambama, bēnga, chē Jesucristo yochjésabo orscama ya batšatema yojsájamna ora oyenēngbiana. <sup>12</sup> Chcasna, nda tojtsejuabná Bēngbe Utabnabiana tšabá yojsama ca y bacna soyēnga ndocna te yochanjama ca, cuedado chaotsebomna, bacna soyēnga amiñe ndoñe chaondótsatsama. <sup>13</sup> Ndocna entšá jatócochēnguana bacna soyēnga jamama, ntšamo tempo ínŷenga ndoñe tonjanocochēngcá cachca bacna soyēngama, pero tšēngaftanga corente šmondétatšēmbo Bēngbe Bētsá sempre cmochtséjabuachanama chē padecena soyēnguiñe, y cha ndoñe yochanjalesencia bacna soyēnga jamama chacmócochēnguama, tšēngaftanga chca soyēnga jamama jtsóboyayama obenana ntsebomncá; pero chē padecena soyēnguiñe chašmojtsemna ora, cha cmochanjínŷanŷiye ntšamo chē bacna soyēnga ora tšabá jabocanama, y chca, jtsóboyayama chašmotsobenama.

<sup>14</sup> Chíyeca, atšbe bonshánēnga, ndocna te šmattsadorana cach entšangbe pormana soyēnga, ndayama ínŷenga jtsejuabnayana diosēnga yomna ca. <sup>15</sup> Atše sēntsoyebuambná mo tšēngaftanga corente osertánēnga cuaftsemncá. Cach tšēngaftanga šmochjenójuaboje y šmochjayana, ntšamo cbojtsétsētnacá aíñe o ndoñe tšabá bētsēmna. <sup>16</sup> Ntšamo Jesús chē coptema vinoyama Bēngbe Bētsábioje tbojtanchuacá, bēngnaca cachcá Bēngbe Bētsá chama fsēndbētsatschuanaye. Bēnga chca tmojama ora, ndegombre, jtsinŷanŷnayana bēnga Crísoftaca cánŷiñe mo canŷacá imomnama, chabe buñe juabuáshanēse bēngbiana tojanóbanayeca. Y chē mondbajataye tandēse tmojase ora, jtsinŷanŷnayana bēnga Crísoftaca cánŷiñe mo canŷacá imomnama, cha bēngbiana tojanóbanayeca. <sup>17</sup> Bēnga ošbuáchiyēnga masque banga mondmēna, chca orna nŷetscanga cach tandēšentšana bēnga jasana, y chíyeca bēnga jtsemnana mo canŷacá, mo Cristbe cuerpcá.

<sup>18</sup> Tšēngaftanga šmochtsejuabnaye ndayá chē Israeloca bachnanga monduamanama: chēnga chē altaroca tmojóba y tmojuátšēmbona bayēnguentšana jasana, y chca chēnga chora jtsinŷanŷnayana chēnga cánŷiñe mo canŷacá imojtsemnama Bēngbe Bētsáftaca, chē chca tmojtsadoranáftaca. <sup>19</sup> Y chca, atše ndoñe quetsátsboše jayanama chē entšangbe pormana soyēnga mo diosēnga cuaftsemncá, uámana soyēnga yomna ca. Ni chē cach entšangbe pormana soyēnga diosēnga yomna ca jtsejuabnayēse jadórana uátšēmbona saná inŷe sanama más iuámana ca. <sup>20</sup> Pero aíñe, entšanga cach entšangbe pormana soyēngama mo diosēnga cuaftsemncá, chca tmojuátšēmbona ora, ndegombre chēnga Satanás y chabe uajabuachanēngbioje jtsadoránana, y ndoñe Bēngbe Bētsábioje. Y atše ndoñe quetsátsboše, tšēngaftanga chca uatšēmbonana šmojasama, cánŷiñe

mo canýacá chë bayëjéngaftaca chašmotsemnana. <sup>21</sup> Tšëngaftanga ndoñe quešmátobena chë vínoye coptémentšana jofšiyana, ntšamo chë ošbuáchiyënga bétsemnana mondbetsamcá, y chentšana chë cach entšangbe pormana soyënga, mo diosënga cuaftsemncá jadórama vínoye coptémentšánëna. Chca šmojama ora jtsemnana mo chë diabléngaftaca cuaftsesangcá. Y cach ndoñe quešmátobena vínoye jofšiyana y tandëse jasana, ntšamo ošbuáchiyënga bétsemnana mondbetsamcá, y chentšana cach entšangbe pormana soyënga mo diosënga cuaftsemncá jadórama fiestentša sanánaca jasana, y chca chë bayëjéngbioye jtsadoránana.

<sup>22</sup> Bënga chca tmojtsamama, bënga mochanjama Bëngbe Utabná puerte etonaná bëngaftaca chaotsemnana, er chë bayëjéngaftaca bënga chca jtsamana. ¿O imojtsejuabná bënga chabiamá más obenana bomnënga imomna ca?

*Lempe šmochjama Bëngbe Bëtsá puerte bëtsá y uamaná yomnama jinýanýiyama*

<sup>23</sup> Mondbétsichamo: “Entselesenciana ndayánaca jamana, ndayama Bëngbe Bëtsá ndocá tonjayana ca”, pero básefta soyënga atše stjama ora ndoñe nyetscangbe tšabiamá ntsemnana. “Entselesenciana ndayánaca jamama ca”, pero nyetsca soyënga ntšamo bënga tmojamcá, ošbuachiyéngbioye ndoñe ntjujabuáchana Jesucristbeñe más chamotsošbuáchema, y ainaniñe más añemo chamotsebomnama. <sup>24</sup> Ndocná chaondétsama lempe ntšamo tojobenacá nýe cachabe tšabiamá, ndayá más chaotsama chë ínýengbe tšabiamá.

<sup>25</sup> Lempe mercadoca tmojtsena soyënguentšana šmochjase, ntjatstjanaycá chë mëntšena aíñe o ndoñe tmonjuátšëmbona chë cach entšangbe pormana soyënga, mo diosënga cuaftsemncá jadórama ca. Ndoñe chca šmattsetjanaye, ntšamo tšëngaftangbe ainaniñe juabnënga šmojtsebomnama; <sup>26</sup> er ntšamo Bëngbe Bëtsabe uabemana palabreñguíñe endayancá: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

<sup>27</sup> Nderado canýe ndošbuachiyá tcmojúbuaja chábioca jasama, y tšëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayentšana chë saná tojóbocnama ndocá ntjatstjanaycá, ntšamo tšëngaftangbe ainaniñe juabnënga šmojtsebomnama. <sup>28</sup> Pero nderado nda tcmojáuyana: “Quem mëntšena cach entšangbe pormana soyënga mo diosëngcá jadórama tmonjanátšëmbona ca”, as ndoñe chana šmatjase, er canýa chca tcmojáuyana, y ainanentše šmojtsebomna juabnënga, chë chca jamama ndoñe tšabá bétsemnana. <sup>29</sup> Atše sëntsoyebuambná ndayá chë chca tcmojauyanabe ainaniñe juabnëngama, chë soye jasana ndoñe tšabá yondmënama, ndoñe chë tšëngaftangbe ainanentša juabnëngama.

Pero tšëngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bétsemnana, ntšamo chë ínýabe ainaniñe juabna yobomnama ca? <sup>30</sup> Y atše chë ndayá stesama Bëngbe Bëtsá tijëtschuase, ¿ndáyeca ínýa šochjauyana atše ndoñe tšabá tijama ca, chë soye tijasama, chë ndayama Bëngbe Bëtsá tijëtschuá ca?” <sup>31</sup> Masque ntšámnaca, cachcá, chašmojtšesá, o chašmojtsofšëšná, o ndaye ínýe soye chašmojtsama, ndayama Bëngbe Bëtsá ndocá tonjayana, lempe šmochtsama Bëngbe Bëtsá puerte bëtsá y uamaná yomnama jtsinýanýayama. <sup>32</sup> Tondaye šmatjama ndayá chaobená jamana, ínýenga Cristo chamotsábotema. Ndoñe chca šmatjama, ni judiëngbiama, ni ndoñe judiëngbiama, ni chë Bëngbe Bëtsábeñe ošbuachiyëngcá enefjuanëngbiama. <sup>33</sup> Šmochtsama ntšamo atše sëndëntšencá, nyetscanga nyetsca soyënguiñe oyejuayënga jtsabamnama, lempe ntšamo stjobenacá jtsamëse, ndoñe nýe atšbe tšabiamá, ndayá masna chë ínýengbe tšabiamá, chënga chamotsobenama chëngbe bacna soyënguentšana atsebácanënga jtsemnana.

## 11

<sup>1</sup> Tšëngaftanga šmochtsiyena ntšamo atše sëndamcá jtsamëse, cach ntšamo atše sëndoyencá, ntšamo Cristo inetsamcá jtsamëse.

*Ntšamo yomna shembásenga tšabá jtsemnama, ošbuachiyěngcá tmojénefjna ora*

<sup>2</sup> Atše séntseboše tšěngaftanga jáuyanana tšabá šmojama ca, tšěngaftanga nyetsca soyěnguiñe atšbiamá šmnétsenuabnama, y tšěngaftanga šmojtsabuátambama y šmojtsamama ntšamo tčbonjanabuatambacá, cachcá ntšamo atše sěnjěftsamboshjoncá.

<sup>3</sup> Pero atše séntseboše tšěngaftanga chacmésertá: nda nyetsca entšanga uaménda cha, Cristo endmēna; y nda shémbioye ibománda cha, boyá endmēna; y nda Crístbioye ibománda chana, Běngbe Bětsá endmēna. <sup>4</sup> Nderado canye boyabása chabe bestšaše tojtsenátstotse, inye ošbuachiyěngaftaca cányiñe Běngbe Bětsáftaca tbojtsencuénta ora o Běngbe Bětsabe juabna tojtsoyebuambná ora, cha jamana cachá chaotsěuatjama, chabe bestšásēca chca tojama causa. <sup>5</sup> Pero nderado canye shembása chabe bestšaše ndoñe tontsenátstotse, inye ošbuachiyěngaftaca cányiñe Běngbe Bětsáftaca tbojtsencuénta ora o Běngbe Bětsabe juabna tojtsoyebuambná ora, cha jamana chama cachá chaotsěuatjama; jtsěuatjana mo cha lempe jshetětšená cuaftsemncá. <sup>6</sup> Er, nderado canye shembása ndocna te tontseboše chabe bestšaše jtsenátstotsana, chabiamá más tšabá nántsemna lempe chaotsenójshetětše. Pero tojtsejuabná utsbotjená o chca lempe jshetětšená jtsemnama cha yochtsěuatja ca, as chabe bestšaše chaotsenátstotse. <sup>7</sup> Boyabása ndoñe quebnátsmēna chabe bestšaše jtsenátstotsana, er Běngbe Bětsá tojanma ntšamo cachá yomncá cha chaotsemnama, y chě boyabása chca jtsemnēse, jtsinyanāyana Běngbe Bětsá chabe mandayá yomnama. Pero ntšamo chě shembása yomncá, jtsinyanāyana chě boyabása chabe mandayá yomnama; <sup>8</sup> er Běngbe Bětsá, boyabása ndoñe tbonjanma shembásabentšana, ndayá shembása boyabásabentšana. <sup>9</sup> Y Běngbe Bětsá, boyabása ndoñe tbonjanma shembásabeyeca, ndayá shembása boyabásabeyeca. <sup>10</sup> Chíyeca, y chca jamama angelēga tšabá jtsinyanāyayeca, shembása jtsemnana chabe bestšaše chaotsenátstotsama, chca, chaotsinyanama inya chábeñe yomándama. <sup>11</sup> Pero, Běngbe Utabnábeñe ošbuachiyěngcá jtsiyenamna, boyabásenga y shembásenga cachcá jtseiýtētanana. <sup>12</sup> Er masque Běngbe Bětsá, shembása boyabásabentšana tbojanma, mora, shembásabentšana boyabása jóbocnana; y lempe Běngbe Bětsábiocana endóbocana.

<sup>13</sup> Cach tšěngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canye shembásabiamá Běngbe Bětsáftaca jencuéntana, bestšaše ntsenatsbotscá. <sup>14</sup> Ntšamo entšanga sempre mondbetsejuabnaycá, ndayá tšabá bétsemnama, běngbioye jtsabuátambayana, boyabása bēn stjěněsha chabuájuaama tojalesenciase, cha jamana cachá chama chaotsěuatjama. <sup>15</sup> Pero shembásabiamna, chě bēn stjěněsha jtsinyanāyana chabe botamanana y uámanana, er Běngbe Bětsá tojanma shembása bēn stjěněsha chaotsábomnama, chca, cha chaotsebomna ndáyeca chabe bestšaše jtsenátstotsama. <sup>16</sup> Masque ntšámncá, ndánaca tojtseboše quem soyama más jatóyebuambayama, cha bontsemna jtsetatšěmbuana, ni bēnga, ni Běngbe Bětsábeñe ošbuachiyěngcá enefjuanēga queftsatslesēncia chca ndoñe chaondétsemnama.

*Běngbe Utabnabiamá jtenójuaboyama jasama ora, chěnga ndoñe tšabá imonjánama*

<sup>17</sup> Mora cbochanjaménda soyěnguiñe atše ndoñe quetsátobena tšěngaftanga jáuyanana tšabá šmojama ca, er tšěngaftanga Crístbeñe ošbuachiyěngcá šmojénefjna ora, Běngbe Bětsá jadórana, atše šontsinyana chě soye yojtsoservena tšěngaftanga más bacá chašmotsemnama, y ndoñe tšěngaftangbe tšabiamá. <sup>18</sup> Natsana cbochjáuyana, atše sěnjouena tšěngaftanga ošbuachiyěngcá šmojénefjna ora, bāseftanga canye soye innétsejuabnaye y ín्यengna inyētšá ca, y atše séntsejuabná batšana ndegombre chca yojtsemna ca. <sup>19</sup> Ndegombre jtseytana tšěngaftangbeñe chamotsemna bāseftanga canye soye juabnayēga y ín्यengna inyētšá, chca, nyetscanga chamotsetatšěmbuama ndēmuanyēga imojtsemna chě Běngbe Bětsá tojayana chěnga tšabá tmojama ca. <sup>20</sup> Tšěngaftanga tanděse jasama y vínoye jofšiyama šmojénefjna ora, ntšamo bēnga fsěnduamancá, Běngbe Utabná bēngbiamá tojanóbanama jtenójuaboyama, ndayá chora tšěngaftanga šmnetsamcá, ndoñe quenátsmēna ntšamo ndegombre cmojtsamncá, chě Běngbe Utabnabiamá jtenójuaboyama jasama ora; <sup>21</sup> er chě jasama

tojobuache ora, cada ona inóntša jasama ndayá tojiyëbcá, y ndoñe ntjatobátmanana nyetscanga ndayánaca jasama chamotsebomnentscuana; báseftanga shéntseca joquédana, y ínÿengna tša jëftsesana y jofšiyana jëftsótmenantscuana. <sup>22</sup> ¿Tšëngaftanga ndoñe yebna šmondobomna ndayentše jasama y jofšiyama? ¿Ndáyeca tšëngaftanga šmojtsejuabná chë imnénefjna ošbuáchiyënga nduámanënga imomna ca, y šmojama chë chentše tmojtsemmënga, tondaye ndbomnënga, chamotsëuatjama? ¿Tšëngaftanga šmojtsejuabná atše cbochjáuyana tšabá šmojama ca, chë Bëngbe Utabnabiama jasama ora chca šmojamama? ¡Ndegombre ndoñe!

*Bëngbe Utabnabiama jtenójuaboyama saná*  
(Mt 26.26-29; Mc 14.22-25; Lc 22.14-20)

<sup>23</sup> Er atše cach Bëngbe Utabná bentšana ntšamo cbontsabuatëmbacá sënjanóyëngacñe: Bëngbe Utabná cach uayayëngbe cucuatšinë tmojánboshjona ibeta, tandëse tojanca, <sup>24</sup> Bëngbe Bëtsábioye tbojtanchuá chentšana, tojanjatá y tojánayana: “Quem tandëse atšbe cuerpo entsemna; tšëngaftangbe tšabiama chanjóbana. Ntšamo mora montsamcá šmochtsama, atšbiama jtenójuaboyama ca.” <sup>25</sup> Cachcá, chë saná tmojansentšana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tšëngaftanga chašmotsetatšëmbuama, ntšamo Bëngbe Bëtsá entšanga tojanašebuachenacá pronto yochtsemnama. Cada vínoye chašmojtsofšëšná ora, chca šmochjama atšbiama jtenójuaboyama ca.” <sup>26</sup> Er tšëngaftanga cada quemëntša tandëse chašmojtšesá ora y quem coptementšaycá chašmojtsofšëšná ora, Bëngbe Utabná chaojésabëntscuana tšëngaftanga šmochántsinyánayaye cha entsangbiama tojanóbanama.

*Ntšamo yomna jamana, Bëngbe Utabnabiama jtenójuaboyama jasama ora*

<sup>27</sup> Chcasna, Bëngbe Utabnabiama jtenójuaboyama jasama ora, ndánaca tandësentšana tojase y coptémentšana tojofšé, ndoñe chë ntšamo chaotsemnama Bëngbe Utabná yojanjuabnacá, chabiama Bëngbe Bëtsá jayanana cha puerte bacna soye tojama ca. Chë entšá chca tojama ora, cha jtsinýanýayana, Bëngbe Utabnabe cuerpo y buiñe chabiama tondaye yonduámanama. <sup>28</sup> Chíyeca, entsemna cada ona corente chauenujabó jtsetatšëmbuama aíñe o ndoñe yontseprontana chca jasama y jofšiyama, cabá ndëse y ndofšé ora. <sup>29</sup> Er nderado nda tojase y tojofšé, chë Bëngbe Utabnabiama jtenójuaboyama jasama ora, cach Bëngbe Utabnabe cuerpo yomnama ntjajuaboycá, cha chë sóyeca jamana Bëngbe Bëtsá chabotsecastigama. <sup>30</sup> Chíyeca, banga tšëngaftanguentšënga šoquënga šmojtsemna, ínÿenga añemo ndbomnënga, y ínÿengna ndoñe nÿe báseftanga tmojóbana. <sup>31</sup> Pero bënga corente tmojajuabó jtsetatšëmbuama aíñe o ndoñe montseprontana ntšamo šuamncá jasama y jofšiyama, cabá ndëse y ndofšé ora; chca, Bëngbe Bëtsá ndoñe buántsemna bënga játa castigana, ntšamo tšabá yomncá ndoñe tmonjase causa. <sup>32</sup> Pero, Bëngbe Utabná castígoca chca šojabuayená ora, jtsemnana bënga más tšabá jtsamama chamuatsjínÿama, y chca, bayté chentšana, Bëngbe Bëtsá ndoñe chabondétsemna játayanana bënga šojtsamna nyetsca tescama castigánënga jtsemnana ca, cánÿiñe chë nÿe quem luarama enójuabnaye entsángaftaca.

<sup>33</sup> Chca, Jesucristbeyeca atšbe catšátanga, tšëngaftanga chë Bëngbe Utabnabiama saná jasama chašmojénefjna ora, cánÿiñe nyetscanga šmochjabojátša. <sup>34</sup> Y nderado nda tbojtseshëntšana, cachabe yebnoca chauétsese, chca, Bëngbe Bëtsá ndoñe chabondétsemna tšëngaftanga játa castigana chora ndoñe tšabá šmonjama causa. Chë inÿe soyëngama ndayama tšëngaftanga šmonjatjá, chamna chanjamánda tšëngaftanga jányama chajjá ora.

<sup>1</sup> Jesucristbeyeca atšbe catsátanga, atše séntseboše tšengaftanga chašmotsetátšëmbo Bëngbe Bëtsabe tšetana obenanama tšabe soyënga jamama, Crístbeñe ošbuáchiyënga jujabuáchama.

<sup>2</sup> Tšengaftanga šmondétatšëmbo, tšengaftanga Crístbeñe ndošbuáchiyënga šmonjamna ora, ínÿenga cmonjanabuatambá soyënga, y chora tšengaftanga šmonjamna ínÿabeyeca uasjanëngcá, cach entšangbe pormana soyënga mo diosënga cuaftsemncá jadórama; y chë soyëngna ni mo jóyebuambayama ntsoobenana. <sup>3</sup> Chíyeca, atše mora séntseboše tšengaftanga chašmotsetátšëmbo, ndocná ntsoobenana jayanana: “Jesús ndoñe chë Cristo quenátsmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntsoobenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsóyebuambnase.

<sup>4</sup> Espíritu jamana bënga ndoñe chamondétsebomnama cachca tšetana obenana tšabe soyënga jamama, pero lempe jobayana cach canÿe Espíritbeyeca. <sup>5</sup> Bënga, Bëngbe Bëtsá mondëserveda, nÿetsca soyënguiñe jtsetrabájayëse, pero cach Utabná nÿets chë trabajënga šojabanÿé. <sup>6</sup> Nÿetsca soyënga Bëngbe Bëtsabe obenánaca fsëndbétsama, pero cach Bëngbe Bëtsá endmëna nda inétsama bënga chë soyënga jamama obenana chamotsebomnama. <sup>7</sup> Bëngbe Bëtsá inétsama cada ošbuachiyá chaotsebomnama canÿe tšetana obenana tšabe soyënga jamama, y chë soye jtsinÿanÿnayana Bëngbe Bëtsabe Espíritu chabe ainaniñe yomnama; y chë tšetana obenana jtsemnana nÿetscangbe tšabiamna. <sup>8</sup> Bëngbe Bëtsá, Espíritbeyeca, canÿa obenana jatštayana puerte osertanánaca chaóyebuambama, y ínÿana obenana cach Espíritbeyeca ndayámnaca corente jtsetatšëmbëse chaóyebuambama; <sup>9</sup> ínÿana cach Espíritbeyeca, obenana Crístbeñe puerte chaotsošbuáchema, y ínÿabiamna, cach nÿe canÿe Espíritbeyeca, obenana jatštayana šoquënga jáshnama; <sup>10</sup> ínÿana, obenana tšabe soyënga Bëngbe Bëtsabe obenánaca jamama, y ínÿana, obenana Bëngbe Bëtsabe juabna jóyebuambayama. Inÿana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espíritbeyeca o bacna espiriténgbeyeca tojtsemnana, y ínÿana, obenana chë tempo ndmabiyáñnaca chaóyebuambama, y ínÿana, obenana josértama ntšamo chë ndaye biyáñnaca jóyebuambayama obenana bomná tojtsichamcá, y ínÿengna chama jábuayenama. <sup>11</sup> Pero cach Espíritu, chë nÿe canÿe Espíritu lempe chca jamana, ntšamo tšabá bétsemnana cha tojtsejuabnacá cada entšábioye jatštayëse.

*Nÿetsca ošbuáchiyënga cánÿiñe, mo Crístbe cuerpcá jtsemnana*

<sup>12</sup> Cuerpo nÿe canÿe soye endmëna y chë cuerpo ba soyënga jtsebomnana; masque chë cuerpo ba soyënga jtsebomnana, nÿe canÿe cuerpo jtsemnana. Bëngaftácnaca cachcá. Bënga banga mondmëna nÿetscanga Crístbeñe ošbuáchiyënga, pero Crístbeyeca, bënga cánÿiñe mo canÿacá jtsemnana. <sup>13</sup> Er bënga nÿetscanga, judiënga o ndoñe judiënga, nÿe ínÿabiamna nÿets tempo oservénënga o cachëngbiama trabájayënga šojanëbaye, Crísoftaca cánÿiñe mo canÿacá, jtsemnana mo chabe cuerpcá, y chca yomna cach Espíritbeyeca; y Bëngbe Bëtsá tojama cach Espíritu nÿetscangbe ainanoye cháuamashënguama, bënga jtsamëndayama.

<sup>14</sup> Cachcá, canÿe cuerpo ndoñe nÿe canÿe soye ntsebomnana, ndayá ba soyënga. <sup>15</sup> Nderado shecuatše tojayana: “Cucuatše ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, shecuatše mo chë cuerpentša soye ndoñe cuaftsemncá ndoñe ntjátsmënanana. <sup>16</sup> Nderado matscuaše tojayana: “Bominÿe ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, matscuaše chë cuerpentša soye ndoñe cuaftsemncá ndoñe ntjátsmënanana. <sup>17</sup> Nÿets cuerpo bominÿe tojtsemnëse, bënga ndoñe muantsobena jouenama. Y nÿets cuerpo matscuaše tojtsemnëse, bënga ndoñe muanjobenaye jonguétsetšiyana. <sup>18</sup> Pero ndegombre endmëna, Bëngbe Bëtsá nÿetsca soye cuerpentše tojancá ndayentše cha tojánbošenentše. <sup>19</sup> Nÿetsca cuerpentša soyënga nÿe canÿe soye tojtsemnëse, ndoñe

canÿe cuerpo nántsemna. <sup>20</sup> Pero ndegombre endmëna, masque ba soyënga cuerpentse yomna, nÿe canÿe cuerpo jtsemnana.

<sup>21</sup> Bominÿe quenátobena cucuatse jauyanana: “Ndoñe quecátsiyta ca”; y cachcá, bestsaše quenátobena shecuatse jáuyanana: “Ndoñe quecátsiyta ca”. <sup>22</sup> Inÿetsá, chë cuerpentša soyënga, chë tojtsinÿana mo obenana ndbomna y nduámana soyëngcá, jtsemnana chë cuerpama más iyta soyënga. <sup>23</sup> Chë cuerpentša soyëngama, ndayama bënga tmojtsejuabná más nduámana soyënga yomna ca, bënga jamana más chaotsámanama, chiñe entšayaca jtichëtjese. Y chë cuerpentša soyënga, ndayama bënga jtsëuatjana ínÿenga chamotsonÿama, bënga jamana ínÿenga ndoñe chamondëtsonÿama, chiñe entšayaca jtichëtjese. <sup>24</sup> Pero chë cuerpentša soyëngaca, chë nÿetscanga jtsonÿayana y botamana jinÿama jtsemnana soyëngacna, ndoñe ntseytana chca játamana. Bëngbe Bëtsá cuerpo tojama, ntšamo bënga chamotsamama chentša más nduámana soyënga, más chaotsámanama, ntšamo chë soyënga bënga tmojtsinÿenama. <sup>25</sup> Cha chca tojanma, cuerpentša nÿetsca soyënga chë cuerpama trabajo cánÿiñe chamotsamama, y chca, cada soye chaotsama trabajo chë cuerpentša nÿetsca soyëngbe tšabiama. <sup>26</sup> Nderado canÿe cuerpentša soyama bacna soye tojopasá, chora nÿetsca chë cuerpentša soyëngámnaca chca ndoñe tšabe soye jtsebínÿnana; pero canÿe cuerpentša soyama tcojama más uámana soye chaotsemnana o ndaye tšabe soye tojopasase, chora nÿetsca chë cuerpentša soyëngámnaca chca tšabe soye jtsebínÿnana.

<sup>27</sup> Cachcá, tšëngaftanga Crístbeñe ošbuáchiyënga, cháftaca cánÿiñe mo canÿacá jtsemnëse, mo chabe cuerpcá jtsemnana, y cada ona tšëngaftanguentšá mo chë cuerpentša soyëngcá, jtsemnana mo chabe cuerpentša soyëngcá. <sup>28</sup> Ntšamo Bëngbe Bëtsá cuerpentse soyënga tojancjá ndayentse inabošcá, cachcá, ošbuachiyëngcá enefjuanéngbeñe Bëngbe Bëtsá tojubuáyana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiama abuátambayënga, chorna chë bëts soyënga Bëngbe Bëtsabe obenánaca jamama obenana bomnënga, chë šoquënga jáshnama obenana bomnënga, chë ínÿengbioye puerte ujabuáchanënga, chë inÿe ošbuachiyëngbioye amëndayënga, y chë nÿetsca biyañe jtsóyebuambnayama obenana bomnënga, tempo ndmabiyañe. <sup>29</sup> Ndegombre, ošbuachiyëngcá enefjuanéngbeñe nÿetscanga ndoñe Jesucristbe ichmónënga ntsemnana, nÿetscanga ndoñe Bëngbe Bëtsabe juabna oyebuambnayënga, nÿetscanga ndoñe abuátambayënga, nÿetscanga ndoñe Bëngbe Bëtsabe obenana bomnënga, bëts soyënga jamama. <sup>30</sup> Nÿetscanga ndoñe šoquënga jáshnama obenana bomnënga; nÿetscanga ndoñe nÿetsca biyañe jtsóyebuambnayama obenana bomnënga, tempo ndmabiyañe; ni nÿetscanga ndoñe obenana bomnënga quemátsmëna, chë tempo ndmabiyañe nÿetsca biyañe jtsóyebuambnayama obenana bomnënga ntšamo tmojtsichamcá josértama y ínÿengbioye chama jtsabuayiyayama. <sup>31</sup> Pero tšëngaftangna puerte šmochtseboše, lempe ntšamo chašmojobenacá šmochjama, chë Bëngbe Bëtsabe más uámana tšetana obenana jëftsashjáchama.

### *Bonshánana jtsebomnana*

Y inÿe soye más, atše cbochanjínÿanÿiye ntšamo šmojtsobena cabá más tšabá jtсийenana, Bëngbe Bëtsá jtseeservénëse.

## 13

<sup>1</sup> Nderado atše stjóyebuambaye entšangbe biyañe y angelëngbe biyañe, pero ínÿengbioye ndoñe sentsababuánÿeshanëse, atše stsemna canÿa tondayama uamaná, mo nÿe canÿe metalëshe tojtsenancá, o mo nÿe canÿe platillëshcá ndoñe tšabá tontsenanëshe. <sup>2</sup> Y atše obenana stsebomna Bëngbe Bëtsabe juabna jóyebuambayama y nÿetsca soyëngama, y chë Bëngbe Bëtsá tempo entšanga ndoñe tonjaninÿanÿé soyënga šojtsësertana, y Bëngbe Bëtsabe nÿetsca soyëngama stsetátšëmbo, y Crístbeñe puerte stjesošbuáchiye, chca betsošbuáchema nÿa mo chë tjashënga chamobonjoma jamama,



pero ínÿenga ndoñe sentsababuánÿeshanésna, atše tondaye séntsemna. <sup>3</sup> Y atše lempe ntšamo stseboñcá ndbomñejémenga stsējátaye, y ínÿengbioye stjenontréga atšbe cuerpo chamojuinÿema, pero ínÿengbioye ndoñe sentsababuánÿeshanése, atše ndocna uámana soye ntjashjáchana.

<sup>4</sup> Canÿe entšá ínÿenga ababuanÿeshaná, uantado jtsemnana masque padecena soyēnguiñe tmojtsemna órnaca, y ínÿengaftaca tšabe ainánaca mando jtseboñnana. Inÿenga ababuanÿeshaná ndoñe ntsántšabošana ntšamo inÿa tojatsboñcá, ni ntsenábotam-nayana, ni cachá chē ínÿengbiamá más uamaná ntjatenobiamnayana; <sup>5</sup> ndoñe bacá mandboñná ínÿengaftaca ntsemnana, ni nÿets tempo ntsebošana y lempe jtsamana nÿe chabiamá tšabe soye jónÿenama; cha nÿe ndayámnaca ndoñe ntjetnana, ntšamo ínÿenga tmojaborlá ora jtsaperdonayana. <sup>6</sup> Inÿenga ababuanÿeshaná ndoñe ntjóyejuayana chē ndoñe tšabá yondmēna soyēngama; chē ndegombre yomna soyēngamna aíñe. <sup>7</sup> Inÿenga ababuanÿeshaná, ainaniñe añemo jtseboñnana nÿetsca padecena soyēnguiñe, lempe ntšamo más tšabá yomna soyēnguiñe jtsošbuáchiyana, nÿetsca más tšabá yomna soyēngama jtsobátmanana, y jtsóboyayana nÿetsca toto soyēnga.

<sup>8</sup> Bonshánana nÿetsca tescama jéftsemnana. Canÿe te echántsemna, chora chē Uámana Espíritu ndoñe más queochátama entšanga Bēngbe Bētsabe juabna chamot-sóyeuambnama, ni chē ndocna te ndmabiyañe chamotsóyeuambnama, ni chē puerte jtsetatšēmbēse jóyeuambayama obenama chamotseboñnana; <sup>9</sup> er ntšamo mora bēnga imotatšēmbcá y Bēngbe Bētsabe juábnaca jóyeuambayēse tmojayana soyēnga, nÿe batšatema bēngbioye jtsinÿanÿnayana Bēngbe Bētsabe soyēngama, ndoñe lempe; <sup>10</sup> pero Jesucristo chaojésabo ora, y chaojama bēnga chamotsemna lempe ntšamo Bēngbe Bētsá bēngbiamá yojanjuabnacá, quem soyēnga, chē nÿe batšatema bēngbioye jtsinÿanÿ-nayana Bēngbe Bētsabe soyēngama, ya ndoñe más queochátbinÿna.

<sup>11</sup> Atše básatema ora, sēnjanoyebuambná, sēnjanjuabná, y soyēngama tšabá jtsetatšēmbuambna sēnjanjuabná mo canÿe basatemcá; pero bētsá sēnjanóbema orna, sēntsanajbaná lempe amana mo canÿe basatemcá. <sup>12</sup> Cachcá, mora bēnga quem luar-entše nÿe batšatema Bēngbe Bētsabe soyēngama jtsetatšēmbuana, mo canÿe espejuñe tmojtsonÿacá, pero ndoñe nÿa corente tšabá. Pero canÿe te bēnga mochántsetatšēmbó lempe nÿetsca soyēngama, bēnga Bēngbe Bētsabe delante chamojtsemna ora. Mora atše séntsetatšēmbó nÿe batšatema Bēngbe Bētsabe soyēngama, pero chora lempe chanjuábuatmana, ntšamo Bēngbe Bētsá corente šuabuatomcá.

<sup>13</sup> Pero morna, Bēngbe Bētsábeñe jtsošbuáchiyana, chábeñe jtsobátmanana, y chábioye y ínÿengbioye jtsababuánÿeshanana, chē soyēngna nÿetsca tescama jéftsemnana; pero chentšana chē más uámana soye endmēna ínÿenga jtsababuánÿeshanana.

## 14

### *Ndmabiyañe obenana Bēngbe Bētsabe tšetánana*

<sup>1</sup> Bētsá šmochtsama nÿetscanga jtsababuánÿeshanése chašmotsiyenama, y puerte š-mochtseboše jtseboñnana chē Bēngbe Bētsabe tšetana obenana tšabe soyēnga jamama; pero chentšana masna, chē Bēngbe Bētsabe juabna jóyeuambayama obenana. <sup>2</sup> Er chē tempo ndmabiyañe mora jóyeuambayama obenana boñná, Bēngbe Bētsábioye jtsatsētsnayana y ndoñe entšángbioye, er ndegombre entšanguentše ntšamo cha tojtsoyeuambnacá ndocná ntjosértana; chana chabe espíritoftaca jtsóyeuambnayana y ndoñe nÿe chabe juábnaca, chē tempo Bēngbe Bētsá ndocna entšábioye tbonjaninÿinÿé soyēngama. <sup>3</sup> Pero chē Bēngbe Bētsabe juabna oyebuambnayana entšanga jtsēt-sētsnayana, chēnga más chamotsošbuáchema y ainaniñe añemo chamotseboñnana, Bēngbe Bētsabe soyēngama jábuayenama, y jamama padecena soyēnguiñe tmojtsemna órnaca añemo chamotseboñnana. <sup>4</sup> Chē tempo ndmabiyañe mora jóyeuambayama

obenana bomná, jtsamana n̄ye cha más jtsošbuáchiyama y ainaniñe añemo jtsebomnama; pero ch̄e Bēngbe Bētsabe juabna oyebuambnayana jtsamana ch̄e ošbuachiyēngcá enefjuanēnga chca soyēnga chamotsebomnama.

<sup>5</sup> Atše s̄entseboše n̄yetsca t̄šēngaftanga ch̄e tempo ndoñe šmonjanbiyañe mora jóyebuambayama obenana chašmotsebomnama, pero chama atše más s̄entseboše t̄šēngaftanga ch̄e Bēngbe Bētsabe juábnaca soyēnga chašmotsóyebuambnama. Ch̄e Bēngbe Bētsabe juábnaca soyēnga oyebuambnayá más uamaná jtsemnana ch̄e in̄ye biyañe oyebuambnayabiama; chca ndoñe nántsemna, ntšamo can̄ye biyañe tojayancá ch̄e biyañe oyebuambnayá tbojtsēsertánese y ch̄e ošbuachiyēngcá enefjuanēnga tojábuayenase, y chca, ch̄e soyēnga tmojouenama, chēnga chamotsobena más jtsošbuáchiyama y añemo jtsebomnama. <sup>6</sup> Y mora, Jesucristbeyeca atšbe catsátanga, atše nderado tchojábuache y n̄ye in̄ye biyañe tchojáuyanese, ¿chca ntšamo cbatjújabuache? Atše jtsobenana jujabuáchana, n̄ye ntšamo ch̄e biyañe tijayancá átšnaca šojtsēsertánese, y ndayá Bēngbe Bētsá šojin̄ȳin̄yēcá entšanga jábuayenama stjobenase, ch̄e Bēngbe Bētsá tojama atše jtsetatšēmbuama soye, ch̄e Bēngbe Bētsabe juábnaca stsoyebuambná soye o ch̄e t̄šēngaftanga jabuátambama cha yoboše soye.

<sup>7</sup> Entšanga monduamana ndayánaca juénanana, mo flautēfja o arpa, vida ndbomna soyēnga; cada sóyeca in̄yetsá juénanama ndoñe tontsopodénese, ndocná nantsobena jtsetatšēmbuama ndayá can̄ya ch̄e soyēngaca yojtsénanama. <sup>8</sup> Y nderado nda trompetēfjua tojuájet̄eta ora, soldadēnga japéliama chamoprontama, ch̄e uajatētaná in̄yetsá, n̄ya chama ndoñe tonjuájet̄et̄ese, ndocná buanjós̄erta y jenpéliama ndoñe nanjoprón̄ta. <sup>9</sup> T̄šēngaftangaftácnaca cachcá jtsopasánana. In̄yenga paselo josértama jobenaycnana t̄šēngaftanga ndoñe šmonjóyebuambase, ndocná queochátstatšēmbo ntšamo šmojtsichamcá. Nántsemna mo n̄ye cán̄yenga cuaftsoyebuambnacá. <sup>10</sup> Atše s̄entsejuabná, ndegombre quem luarentše ba in̄ye biyañe entšanga inn̄etsoyebuambnayana, y ndaye biyáñ̄naca tmojoyebuambá ora, sempre jtsemnana in̄yenga ntšamo chēnga tmojtsichamcá osertánēnga. <sup>11</sup> Pero ntšamo in̄ya chabe biyañe šojauyancá atše ndoñe šontsēsertánese, atše stsemna can̄ye chabiama ndosertana biyañe oyebuambnayá, y chánaca cachcá atšbiama. <sup>12</sup> Chcasna, ch̄e Uámana Espiritu šondin̄yan̄ná obenana jtsebomnama t̄šēngaftanga puerte šmobóseyeca, lempe ntšamo šmojobenacá šmochtsama chca t̄šetana obenana jóyēngacñama, ch̄e ošbuáchiyēnga más jtsošbuáchiyama y añemo jtsebomnama in̄etsama obenana.

<sup>13</sup> Chíyeca, ch̄e tempo ndmabiyañe mora jóyebuambayama obenana tojtsebomná, Bēngbe Bētsá chabotseimpadana, cha chaoma ntšamo ch̄e in̄ye biyañe tojayancá chabosertama y ošbuáchiyēnga jábuayenama obenana chaotsebomnama. <sup>14</sup> Pero atše Bēngbe Bētsáftaca stjencuénta, ch̄e ndmabiyañe jóyebuambayama cha obenana šojanatšetacá jtsóyebuambnayese, atšbe esp̄iritu cháftaca nantsóyebuambnaye, pero atšbe juabna ndoñe ntsetatšēmbuana ntšamo ch̄e esp̄iritu tojtsoyebuambnacá. <sup>15</sup> Y asna, ¿ntšamo atše chtsemana? Bēngbe Bētsáftaca chanjencuénta atšbe esp̄iritoca, pero ntšamo stsichámuama jtsejuabnayés̄naca. Bēngbe Bētsá j̄etschuayama chanjavérsia atšbe esp̄iritoca, pero chca chanjama chíñ̄naca jtsejuabnayese. <sup>16</sup> Nderado aca Bēngbe Bētsá cojtsatschuaná n̄ye esp̄iritoca, y can̄ya quem Bēngbe Bētsabe t̄šetana obenanama ndosertaná tcmojóyeunase, cha ndoñe ntsoobenana jayanana “chca chaotsemna ca”, cach aquēcá cha yojtsejuabnama jin̄ȳin̄yiyama, er ntšamo cojtsichamcá cha ndoñe ntsēsertánana. <sup>17</sup> Aca jtsobenana chca puerte t̄sabá Bēngbe Bētsá j̄etschuayana, pero ntšamo tcojtsamcá ndoñe ntjamana in̄ya ndaye t̄sabe soye chaotsebomnama. <sup>18</sup> Atše, Bēngbe Bētsá s̄entsatschuaná in̄ye biyañe jóyebuambayama t̄šēngaftangbiama más tsobenama; <sup>19</sup> pero Crístbeñe ošbuachiyēngcá tmojénefjna ora, atše más s̄ēndbétseboše n̄ye mo shachna palabratém̄naca jóyebuambayana, chēnga aíñe catafjosertacá, chca, in̄yenga jabuátambama, y ndoñe bn̄etsana uaranga palabrēnga jatóyebuambnayana in̄ye biyañe, chēnga chaósertama ndoñe tontsopodénese.

<sup>20</sup> Jesucristbeyeca atšbe catsátanga, šmochtsajbaná baseteméngcá juabnayana. Mo šešonateméngcá šmochtsemna, bacna soyénga jamama ntsetatšémbcá; pero mo bétset-sangcá tšabá šmochtsejuabnaye. <sup>21</sup> Běngbe Bětsabe uabemana palabrěnguiñe, Běngbe Utabná měntšá tojánayana:

Atše quem entšángbioye chanjáuyana,

ínýenga inýe luaréngocana ashjajněngaftaca, chěngbiana canýe ndosertana biyañe oyebuambnayénga;

y chanjáuyana ndayá chěngbe biyañe chamojtsichamo soyéngaca;

pero ni chca, chěnga ndoñe quešmochatóyeunaye ca.

<sup>22</sup> Chcasna, inýe biyañe jóyebuambayama obenana jtsebomnana endmēna, Běngbe Bětsá ndayánaca chě chábeñe ndošbuachiyéngbioye jinýanýiyama, y chábeñe ošbuachiyéngbioyna ndoñe. Pero, Běngbe Bětsabe juabna jóyebuambayama obenana jtsebomnana endmēna, Běngbe Bětsá ndayánaca chábeñe ošbuachiyéngbioye jinýanýiyama, y chábeñe ndošbuachiyéngbioyna ndoñe. <sup>23</sup> Er tšěngaftanga nyetscanga ošbuachiyéngcá šmojénefjna ora, nyetscanga ba biyañe šmojtsoyebuambná, y choye tojámashěngo canýa chca Běngbe Bětsabe tšetana obenanama ndosertaná o chábeñe ndošbuachiyá, cha nanjájuaboje tšěngaftanga opěnga šmojtsóbema ca. <sup>24</sup> Pero nyetscanga tmojtsichamo, Běngbe Bětsabe juábnaca jtsóyebuambnayése, y choye tojámashěngo canýa Běngbe Bětsábeñe ndošbuachiyá o canýa chca Běngbe Bětsabe tšetana obenanama ndosertaná, ntšamo chašmojtsichamcá cha bochanjosérta; y chě soye cha bochanjayěnjaná cha bacna soyénga tojamama, y ndayá cha tojamiñe corente echántsejuabnaye, ntšamo nyetscanga tmojtsichámuama. <sup>25</sup> Y Běngbe Bětsá chábioye bochanjinýinýiye ntšamo cha ainaniñe tojajuabó y tojabošencá, ndayá ndocnábioye tbonjinýinýecá, y cha echanjoshěntsa-mentšiyे Běngbe Bětsá jadórana, y tšěngaftangbe delante echanjayana Běngbe Bětsá ndegombre tšěngaftangbeñe yojtsemna ca.

*Ošbuachiyéngcá šmojénefjna ora, ntšamo tšabá yomncá lempe šmochtsama*

<sup>26</sup> Chcasna, Jesucristbeyeca atšbe catsátanga, šmojénefjna ora, cada ona ndayánaca jtsebomnana nyetscangbiana: inýengna jtsobenana javérsiama, Běngbe Bětsá jětschuayama, inýengna jtsobenana jabuátambana o jábuayenama ndayá Běngbe Bětsá tojinýanýecá, o tempo ndmabiyañe chora jtsóyebuambnayana, o entšanga jábuayenana ntšamo inýa inýe biyañe tojayancá. Pero lempe šmochjama, ošbuáchiyénga más chamotsošbuáchema y más añemo chamotsebomnana Cristo jasérviana. <sup>27</sup> Nderado inýe biyañe jóyebuambayama tojtsemněse, útata o nýa másese únganga chca chamoyebuambá, y canýánýa; y jtseytana ndánaca ntšamo tmojtsichamcá chabosertá y nyetscanga chama chauabuayená. <sup>28</sup> Y chca chabosertama y nyetscanga jábuayenama ošbuachiyéngbeñe ndocná tontsemněse, as ošbuachiyéngcá chamojénefjna ora chě chca oyebuambnayá bontsemna ndoñe chca biyañe ntsóyebuambnayana, sinó nýe canýa tojtsemna ora cha jtsobenana chca Běngbe Bětsáftaca jencuéntana. <sup>29</sup> Utata o únganga entsamna jayanana soyénga, Běngbe Bětsabe juábnaca jtsóyebuambnayése; y chě inýenga jtsamnana botamana jajuaboyana y jayanana ntšamo chěnga tmojayancá aíñe o ndoñe Běngbe Bětsábiocana tajojtsóbocanama. <sup>30</sup> Pero canýa Běngbe Bětsabe juabna tojtsóyebuambnantscuana, inýa chentše ouenana tbemanábioye Běngbe Bětsá tbojinýinýe ndayánaca yojtsebomna jayanama, as chě natsana oyebuambnayá iytěca chaóbema, y chabolesenciá chě inýa chaóyebuambama. <sup>31</sup> Chca, nyetscanga, canýánýa jtsobenana jayanana soyénga, Běngbe Bětsabe juábnaca jtsóyebuambnayése, nyetscanga chamuatsjínýama y nyetscanga añemo jatšatayama. <sup>32</sup> Chě Běngbe Bětsabe juabna oyebuambnayá endobena jtsemándayana ntšamo tojtsichamcá, cha cachabe espíritoca tojtsoyebuambná ora; <sup>33</sup> er Běngbe Bětsá endmēna nda inétsama běnga natjěmbana chamotsiyenama, y ndoñe chě běnga nyetscanga cachcá ndoñe chamondětsejuabnama, y nýe ntšamo cada ona tojtsebošcá chaotsamama.

Ntšamo nyets luarënguenache, chë ošbuáchiyënga, chë Bëngbe Bëtsabe entsanga mondbénefjna luarënguenache endbetsemncá, <sup>34</sup> tšëngaftangbéntšnaca, shembásenga entsamna iytëca jobiamëngana, ošbuachiyëngcá šmojënefjna ora, er ndoñe quenát-slesenciana chënga chora chamuátoyebuambnama, y aíñe chënga entsamna chëngbe boyanga jtsayaunanana, ntšamo Moisesbe leyiñe endayancá. <sup>35</sup> Chënga ndayánaca jtsetatšëmbuama tmojtsebošëse, cachëngbe boyángbioye yebnoca chamotjanga; er ndoñe corente tšabá ntsemnana canye shembása jtsóyebuambnayana tšëngaftanga ošbuachiyëngcá šmojënefjna ora.

<sup>36</sup> ¿Tšëngaftanga šmojatsjuabná, Bëngbe Bëtsabe tšabe noticiënga tšëngaftangbeñe tojanobojatšé ca, o nye tšëngaftanga chë soyënga šmojanóyëngacñe ca? Ndegombre ndoñe chca; chíyeca tšëngaftanga nye cányënga ndoñe ntsobenana jayanama ndayá jamama cmojtsamnama. <sup>37</sup> Nda tojtsejuabná cha Bëngbe Bëtsabe juabna oyeambuambnyá yomna ca, o chabe ainaniñe chë Espiritu jtsemándayama yojtsebomna ca, cha bontsemna tšabá jtsetatšëmbuana, ntšamo Bëngbe Utabná šojamandacá atše stsabiamnama. <sup>38</sup> Pero cha ndoñe chca tontsetátšëmbo y chca ndoñe yondmëna ca tojayanëse, ndayá cha tojayancá ndoñe šmatjóyëngacñe.

<sup>39</sup> Chcasna, Jesucristbeyeca atšbe catšátanga, puerte šmochtseboše Bëngbe Bëtsabe juábnaca soyënga jtsóyebuambnayama obenana jtsebomnama, y ndoñe šmattsama chë tempo ndmabiyañe ínnyënga ndoñe chamondëtsóyebuambnama; <sup>40</sup> pero lempe šmochjama ntšamo jamama yomncá, y ndoñe nye ntšamo cada ona tojatsjuabnacá.

## 15

### *Cristo tojtanyenama*

<sup>1</sup> Morna, Jesucristbeyeca atšbe catšátanga, atše séntseboše tšëngaftanga chašmu-atenójuaboma atše tcbonjanabuayená tšabe noticiënguiñe, ndayá tšëngaftanga š-monjanóyëngacñe, chë ndáyeca tšëngaftanga Jesucristbeñe šmojtsošbuaché y cha jt-seservénëse šmojtseyena. <sup>2</sup> Chca šmobómnyayeca, tšëngaftanga atsebácanënga šmojtsemna, pero tšëngaftanga sempre chiñe šmojtsošbuachese, ntšamo cbonjanabuayiy-nacá; chca ndóñesna, nye ndoñe corente tšabá ntjajuaboycá chë buayenana soyënguiñe šmojtsanošbuaché.

<sup>3</sup> Er atše tšëngaftangbeñe sënjéftsanboshjona, Bëngbe Bëtsábiocana atše tijanóyëngacñe más uámana buatëmbana soyënga. Atše tcbonjabuatambá: Cristo tojanóbana bënga bacna soyënga tmojamama, ntšamo Bëngbe Bëtsabe uabemana palabrënguiñe chabe juabna oyeambuambnyënga chama tmojanayancá; <sup>4</sup> chë Cristo tmojanatbontsá y unga tianoye cha cháuatayenama Bëngbe Bëtsá tojanmama, ntšamo Bëngbe Bëtsabe uabemana palabrënguiñe chabe juabna oyeambuambnyënga chama tmojanayancá; <sup>5</sup> chë Pédrëbioye tbojánëbëbocnama, y chentšana chë bnëtsana útata ca uabobáinëngbioy-naca. <sup>6</sup> Chentšana mo shachna patsama más chábeñe ošbuáchiyënga tojánëbëbuacna, chënga cányëntše imojtsemna ora; chënguentšanga banga cabá vida imotsóbomñe, masque báseftanga ya tmojóbana. <sup>7</sup> Chentšana Santiágbioye tbojánëbëbocna, y chentšana nyetsca chabe ichmónëngbioye.

<sup>8</sup> Y chentšana átšnaca šonjánëbëbocna. Mo canye šešona cabá shbená tojonynacá, Cristo chabe ichmoná šonjábema, chë tempo chama jopróntama ntsebomncá, ndayëntscuana ínnyënga cha tojanabuambná. <sup>9</sup> Er atše sëndmëna chë más batšá uamaná Jesucristbe ichmónëngbeñe; y ni merecido taitatobuajoñe “chabe ichmoná ca” chaš-motsábobuatmama, er atše tša sënjánama Jesucristbeñe ošbuáchiyënga chamotsesufrí-nama. <sup>10</sup> Pero Bëngbe Bëtsá atšbe tšabiama yojanjuabná, y chíyeca atše mora tsmëna ntšamo sëndmëncá, y chabe tšabe juábnaca atšbiama jtsamana, ndoñe nye bonamente quenátsmëna. Er atše más sënjatrabajá, chë inye Jesucristbe ichmónëngbiama; pero ndegombre atše ndoñe nye canya chca chiyatsma, sinó masna Bëngbe Bëtsá chë trabajo tojama, tšabe juabna atšbiama jtsebomnëse. <sup>11</sup> Ndayá más yojtsámama ndoñe

quenátsmëna, atše o chënga, Jesucristbe soyëngama abuyayinayinë más tojatrabajá, sinó ndayá chë soyënga bëngbe buayenana soye yojtsemna, y tšëngaftanga chiñe šmojtsošbuaché.

*Chë obanënga cachiñe vida mochtsatsbomnama*

<sup>12</sup> Pero bëngbe buayenana soye endmëna, Bëngbe Bëtsá tojanma Cristo cháuatayenama; as ¿ndáyeca básefta tšëngaftanga šmnétsichamo Bëngbe Bëtsá ndoñe yochanjama chë mora obanënga chámuatayenama ca? <sup>13</sup> Pero chca tojtsemna, chë obanënga ndoñe mochántayenasna, Cristo cach ndoñe tontanayena; <sup>14</sup> y Cristo ndoñe matenjésayenëse, bënga nýe bonamente chabiamama fstsabuayiná, y tšëngaftanga nýe bonamente chábeñe šmojtsošbuaché. <sup>15</sup> Y canýe más bëts soye: chca tojtsemnëсна, bënga muanjábocna mo chë Bëngbe Bëtsabiamama soyënga tmojinýe ca ichamëngcá, pero ndoñe ndegombre chca tontsemna; er bënga fsëndbétsichamo, Cristo cháuatayenama Bëngbe Bëtsá tojanma ca. Pero chë obanënga ndoñe mochántayenasna, Bëngbe Bëtsá ndoñe tonjanma Cristo cháuatayenama. <sup>16</sup> Pero chë obanënga ndoñe mochántayenasna, Cristo cach ndoñe tontanayena. <sup>17</sup> Y Cristo cháuatayenama Bëngbe Bëtsá ndoñe matënjánmëse, tšëngaftanga nýe tondayama chábeñe šmojtsošbuaché; tšëngaftanga chë bacna soyëngama cabá ndoñe perdonánënga šmontsemna. <sup>18</sup> Y chca, chë tmojanóbanënga, Crístbeñe ošbuáchiyënga, chënga cach ndoñe chëngbe bacna soyënguentšana atsebácanënga quemochátsmëna, sinó nýetsca tescama castigánënga. <sup>19</sup> Bënga tmojtsobátmana Cristo bëngbiamama tšabe soyënga chaotsamama, pero chca nýe quem luarentše bënga vida tmojtsebomnëntsçuana, as bënga nýetscangbiamama más muantsomerecena, nýetscanga bëngbiamama chaotsangménama.

<sup>20</sup> Pero chca ndoñe ndegombre quenátsmëna, er ndegombre Bëngbe Bëtsá tojanma Cristo cháuatayenama. Mo chë uanatsena shajuancá, jtsinýanýnayanama más shajuánënga chentšana yochjóbcnana, cachcá, Cristo tojtánayena ora, cha tojaninýanýé Bëngbe Bëtsá yochjanma ínýënga chábeñe ošbuáchiyënga chámuatayenama vida chamotsatsbomnama. <sup>21</sup> Chca, ndayá canýe entšá, Adán, tojanmama, nýetscanga jóbanama yojtsamna, cachcá, ntšamo inýe entšá, Cristo, tojanmama, Bëngbe Bëtsá yochjama entšanga chámuatayenama. <sup>22</sup> Er ntšamo, Adánbentšana entšanga bétsemnayëca jóbanama jtsamnana, cachcá, Crístbeñe ošbuáchiyënga bétsemnayëca, Bëngbe Bëtsá jamana chë nýetsca tescama yomna tšabe vida chënga chamotsebomnama. <sup>23</sup> Pero Bëngbe Bëtsá jamana cada ona cháuatayenama nýa chama tempo tojtsemna ora. Natsana Cristo, y chentšana, Cristo cachiñe quem luaroye chaojésabo ora, nýetscanga chë Crístbe entšanga imomnënga. <sup>24</sup> Y chentšana, Bëngbe Bëtsá chë Taitábioye, Cristo chabe amëndayana chabojantšabuaché ora, nýetsca mandadënga, mando y obenana bomnënga corente jtsayënjanyëse. <sup>25</sup> Er Cristo bontsemna ínýënga mo reycá jtsamëndayana, chabe uayayënga chabe cucuatšinë chamoquedama Bëngbe Bëtsá tojamëntsçuana. <sup>26</sup> Canýe uayayá inétsama entšanga jóbanama; pero Cristo último echanjama chabe obenana pronto chaotsopochocama. <sup>27</sup> Er ntšamo Bëngbe Bëtsabe uabemana palabrënguiñe endayancá: “Bëngbe Bëtsá tojama Cristo nýetsca soyënguiñe chaotsemándama ca.” Pero “tojama Cristo nýetsca soyënguiñe chaotsemándama ca” tojayana ora, jtsopodénana puerte tšabá jinýama, chca ndoñe yontsayana, Bëngbe Bëtsá Crístbeyëca mandaná yojtsemna ca; Bëngbe Bëtsá nda tojanma Cristo nýetsca soyënguiñe chaotsemándama. <sup>28</sup> Y Cristo nýetsca soyënguiñe chaojtsemánda ora, cach Cristo, chë Uaquiñá, echántsemna Bëngbe Bëtsábeyëca mandaná, Bëngbe Bëtsá chë Cristo nýetsca soyënguiñe chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luarentše yobínýniñe.

<sup>29</sup> Inýetšánaca, báseftanga cachiñe uabáinënga imojtsemna, chë ošbuáchiyënga nduabáinënga obanëngbe cuenta. Chca chënga jamana mo chë obanënga uabáinënga chamotsemnama cuafjamcá. Chë obanënga chámuatayenama ndoñe tontsemnëse, ¿ndáyeca entšanga chëngbe cuenta muantenábaye? <sup>30</sup> Obanënga chámuatayenama

Bëngbe Bëtsá ndoñe tonjamëse, ¿ndáyeca bënga muántseprontana nyets tempo resjuiñe jtsajnama, Cristbiana oservena causa? <sup>31</sup> Atšbiana cada te resjo endmëna jóbanama. Jesucristbeyeca atšbe catšátanga, atše séntlichamo, chca ndegombre yómnayeca, atše oyejuayá stsemna ca, mo Cristo Jesús Bëngbe Utabnabe canye oservenacá, tšëngaftanga chábeñe šmojtsošbuáchema. <sup>32</sup> Mo canya tšátjaye bayéngaca tojtsentsjaná orcá, atšbiana puerte resjo enjamna jóbanama, Efeso puebloca; pero nye chë entsanga mondbëtsejuabnaye jëftsashjáchama soyënga jtsebošëse chca matsjamnëse, ¿ndaye tšabe soye matëñjanóbocna, chca atšbiana resjo jóbanama enjamna ora? Obanënga ndoñe mochántayenësna, mochtsama ntšamo entsanga jayanana monduamancá: “¡Mochjase y mochjofsiye, nderado yëfse muatjóbana ca!”

<sup>33</sup> Ndoñe matenoíngñana. Ntšamo canya tojanayancá: “Nderado nda bacna amiguéngaftaca tojtsenutaná, cha jtsajbanana chë tšabe soyënga, ntšamo jtsamëse yojoyena.” <sup>34</sup> Tšabá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tšëngaftanguentše Bëngbe Bëtsabe soyënga ndoñe quešmatábuatma. Atše chca séntlichamo tšëngaftanga chašmotsëuatjama.

#### *Ntšamo chë obanënga mochtayena*

<sup>35</sup> Pero nderado nda nanjatjaye: “¿Ntšamo chë obanënga mochtayena ca? ¿Mocna cuerpo mochtsebmoma ca?” <sup>36</sup> ¡Juabna ndbomna entsá! Ndayá tcojajé orna, jtseytana chë jénaye chaóbanama, chë matatema vida chaotsebmoma. <sup>37</sup> Ndayá tcojajecá ndoñe ntsemnana chë juábocnama matatema, ndayá nye chë meshe, trigo meshe o ndaye mata méshnaca jtsemnana. <sup>38</sup> Pero Bëngbe Bëtsá jamana chë jénayentsana mata chauábocnama, ntšamo jamama cha tojajuabocá; y cha jamana cada jénayentsana canye mata chauábocnama, ntšamo chë jénayentsana chauábocnama tojtsemncá. <sup>39</sup> Nyetsca cuerpënga ndoñe cachcá ntsemnana. Entšanga canye cuerpo mondbomna, bayënga inye cuerpo, shloftšënga inye cuerpo, y beongna inye cuerpo. <sup>40</sup> Chë celoca vida bomnënga inyetšá jtsinñana, y chë quem luarentše vida bomnënga inyetšá. Pero chë buashinñinñana y botamanana ntšamo celoca vida bomnënga jtsinñancá, ndoñe cachcá ntsemnana chë quem luarentše vida bomnëngbe botamanancá. <sup>41</sup> Cachcá, shinye ndoñe quenátsbmoma cachca buashinñinñana juashconcá, ni estrellëngcá; y estrellënguentše cach ndoñe cachcá ntsebuashinñinñana.

<sup>42</sup> Cachcá, chë obanënga chámuatayenama Bëngbe Bëtsá chaojama ora chamojtsebmoma cuerpo, ndoñe queochátsmëna cachcá ntšamo quem luarentše imojaniyena ora imojéftsebmoma cuerpca. Ntšamo chë jénaye tcojuatbontsá ora chiye jóbanana, cachcá, quem luarentše bënga mondbomna cuerpo jóbanana, ínñyënga juatbontsana y jtsoPOCHÓcana; pero bënga chámuatayenama Bëngbe Bëtsá chaojama ora, bënga tsëm cuerpo mochántatsbmoma y ndocna te queochatopochóca. <sup>43</sup> Chë óbana cuerpo tmojuatbontsá ora, chë cuerpo tondaye ntsámanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántsebuashinñinñana y echantsámana. Bënga quem luarentše imoyenëntscuana imobomna cuerpo, nye batšá obenana jtsebmoma; pero chë Bëngbe Bëtsá šochjatsataye tsëm cuerpo, puerte obenana bomna cuerpo echántsemna. <sup>44</sup> Quem luarentše imobomna cuerpo endmëna cam luarentše vida chaotsebmoma; pero bënga chámuatayenama chaojama ora, chë bënga mochtsebmoma tsëm cuerpo, puerte chë Espiritbeyeca echántsemandana. Canye cuerpo quem luarentše vida chaotsebmoma yómnayeca, canye cuerpëncá, jtsemnana celoca vida chaotsebmoma.

<sup>45</sup> Chca Bëngbe Bëtsabe uabemana palabrenguiñe endayana: “Bëngbe Bëtsá, chë natsana entsá tbojanma chaotsainama ca.” Adánbentšana nyetsca entsanga jabocanana, pero Crístbeyeca, Bëngbe Bëtsá tojama banga mo tsmëma entsangcá chamotsemnana; chca, Cristo jtsemnana mo chë ústonoye Adancá; pero Cristna canye espíritu endmëna,

y chë espíritu jamana entšanga chë nyetsca tescama yomna tšabe vida chamotsebomnana. <sup>46</sup> Pero chë celoca nyetsca tescama vida jtsebomnana cuerpna ndoñe natsana ntjóbcnana, ndayá chë quem luarentše vida jtsebomnana cuerpo; chentšana chë celoca vida jtsebomnana cuerpo. <sup>47</sup> Bëngbe Bëtsá, chë natsana entšá tbojanma fshántseca, y chca, cha fshantsentšana tojánbcna; Cristna, mo entšángbentšana chë natsaná tsmacá bemanacá, celocana tojánbcna. <sup>48</sup> Adánbentšana, chë natsana entšá, chë fshántseca tmojanmábentšana tmojábocanënga, ntšamo cha yojamncá jtsemnana. Cachcá, chë mo tsmëmangcá tojábiamënga, Cristcá jtsemnana; Cristo nda celocana tojánabo.

<sup>49</sup> Ntšamo bënga jtsinýnana chë Bëngbe Bëtsá fshántseca tbojábema entšacá, cachcá béngnaca mochtsinýna ntšamo chë celocá yomnacá.

<sup>50</sup> Jesucristbeyeca atšbe catšátanga, atše cbochjáuyana, nye quem luarentše vida jtsebomnana cuerpëngaca, bënga ndoñe ntsobenana Bëngbe Bëtsabe amëndayoye jamashënguana; ni ndayá yochjopochóca soye, ntsobenana ndayá ndoñe yochanjopochóca soye jtsebomnana. <sup>51</sup> Šmochjouena, atše canýe soye cbochanjáuyana, y chë soye Bëngbe Bëtsá entšanga tempo ndoñe tonjaninýanjé: Bënga ošbuáchiyënga nyetscanga ndoñe quemochatóbana, pero Bëngbe Bëtsá šochanjátrocaye mo tsmëmangcá. <sup>52</sup> Nýe betesco, mo tcojofshetá y cachora tcojtafšnacá, quem luare ya jopochócama ora, canýe ángel trompetéjua chaojuájatëta ora, er chora trompetéjua echanjuénana, Bëngbe Bëtsá echanjama obanënga chámuatayenama, nyetsca tescama vida jtsebomnana; y bënga, chë ainënga mochtsemnëngna, cha šochanjátrocaye mo tsmëmangcá jtsemnana; <sup>53</sup> er jtseytana Bëngbe Bëtsá chaotrocá chë béngbeñe jopochócama yomna soye, ndocna te yochanjopochóca soyiñe; y ndayá béngbeñe yochjóbana soye, ndocna te yochanjóbana soyiñe. <sup>54</sup> Bëngbe Bëtsá chca béngaftaca chaojama ora, chë cha jatrócana ndayá béngbeñe yochjopochocacá, ndocna te yochanjopochóca soyiñe, y ndayá béngbeñe yochjobancá, ndocna te yochanjóbana soyiñe, chora echanjochnëngo ntšamo Bëngbe Bëtsabe uabemana palabrënguiñe chama endayancá:

Bëngbe Bëtsá tojayënjaná chë entšanga chamóbanama endbétsama obenana; entšanga ndoñe más quemochatóbana ca.

<sup>55</sup> ¡Mora entšanga chamuatóbanama chaotsama obenana ya ndoñe quenátsmëna; Bëngbe Bëtsá chë obenana nyetsca tescama tojayënjaná ca!

<sup>56</sup> Entšanga bacna soyënga tmojama causa, obenana endmëna entšanga jóbanama chaotsamnama. Ndayá leyiñe iuayanama, entšá jtsetatšëmbuana ndayá yomna bacna soyënga jamana, y chca tátšëmbo causa, chca bacna soyënga jamama juabnéngaca mandaná jtsemnana, y cabana, jóbanama jtsemnana. <sup>57</sup> ¡Pero Bëngbe Bëtsá mochtsatschuanaye, bënga mo ayënjanayëngcá cha šojábiamama, er ya ndoñe šontsamna chca jtsemnana, chë Bëngbe Utabná Jesucristo bëngbiama tojanma sóyeca!

<sup>58</sup> Chíyeca, Jesucristbeyeca atšbe catšátanga, atšbe bonshánënga, Jesucristbeñe sempre puerte šmochtsošbuáchiye y ndocna te šmatjaleséncia ndocná ni tondaye chaotsama chábeñe ošbuáchiyana chašmotsajbanama. Sempre šmochtsentšena bëtscá jtsamana Bëngbe Utabnabiama trabájayiñe, er tšëngaftanga šmondétatšëmbo, Bëngbe Utabnabiama trabájayiñe ndayá šmojamcá, ndocna te nye bonamente ntsemnana.

## 16

### *Jerusalenoca ošbuáchiyëngbiama crocenánama*

<sup>1</sup> Mora chanjóyebuambaye chë Jerusalenoca Bëngbe Bëtsabe entšanga ndbomnëjmëngbiama tšëngaftanga šmochjuíchmua crocenánama. Atše séntseboše tšëngaftanga chca chašmoma ntšamo chë Galacia luaroca ošbuachiyëngcá enefjuanenache chama atše sënjanabuayenacá. <sup>2</sup> Cada tmengo, cmontsamna batšá crocénana jaluárana ntšamo chë semaniñe šmojonýencá, y šmochtsejuabaye; chca atše choye chajá ora, ndoñe chacmondétsamna quem uajabótama chora crocénana játatbanayana. <sup>3</sup> Y atše

choye chajíashjango ora, Jerusalenoye chjichamuá chë tšëngaftanga mo tšabengcá šmojubuáyana entsanga, chë Jerusalenoca ošbuachiyéngbioye tšëngaftangbe crocénana chámuyentšbuachema, y tsbuanachangá chanjúyentšbuachiye ndayá imojtsamama chënga jábuayenama. <sup>4</sup> Y nderado, átšnaca chëngaftaca jama tšabá tojtsemnëse, chënga átšëftaca chamua.

*Ntšamo Pablo yojanjuabná chë luarëngoye jama*

<sup>5</sup> Atše sëntsejuabná tšëngaftangbioye jama jautsëtsayama, Macedonia luarëjana chajachnëngüentšana, chentša ošbuáchiyënga jaftsanýëse, er atše sëntsejuabná natsana Macedonia luaroye jéftšana. <sup>6</sup> Nderado baseftayté tšëngaftangbeñe chašúetsejetana, o nderádose nyets uaftena tempo; as tšëngaftanga inýe luaroye játama chašmuájabuachama, ndémoye jama chašojtsemnoye. <sup>7</sup> Atše ndoñe quetsátsboše nye betso tšëngaftanga jáftsanýana, er atše sëntsobátmana más bayté tšëngaftangbeñe jaftsemnana, Bëngbe Utabná chca šojalesenciase. <sup>8</sup> Pero Efesoca šochanjajétana Pentecostés fiesta chaojobuáchëntscuana. <sup>9</sup> Er Bëngbe Bëtsá tojama atše jobenayama muentše chë tšabe noticiëngama banga jábuayenama, y chíyeca banga Crístbeñe montsošbuaché; pero bángnaca atšbe contra montsemna.

<sup>10</sup> Timoteo tšëngaftangbioye chaojase, yejuana šmochtsantješna cha tondayama chaondëtsauatjama, tšëngaftangbeñe tojtsemnëntscuana, er cha Bëngbe Utabnabiamia endëtrabája, ntšamo atše sëndamcá. <sup>11</sup> Chcasna, ndocná chábioye chabondëtsáboyënja. Bëtscá šmochjama cha natjémbana átšbioye chauatábama, er atše cha sëntsobátmana, chë ínýenga muentše Crístbeñe ošbuáchiyëngaftaca.

<sup>12</sup> Y Jesucristbeyeca bëngbe catšata Apólosna, atše bëtscá cha sënjaimpadá, chë Jesucristbeyeca catšátanga tšëngaftanga jányama mochjángaftaca chaotsama, pero cha ndoñe chenátsbošena choye mora jama. Cha choye caochjá, chaojobená ora ca.

*Pablo chënga jtadióšoftanama*

<sup>13</sup> Sempre šmochtsenocuedana chë Bëngbe Utabná ndoñe chašmondëtseservenama tojtsama soyëngama. Nyets tempo, Crístbeñe y chabe soyënguíninaca šmochtsosšbuáchiye. Ainaniñe puerte añemo šmochtsebomna, y bëtscá šmochtsama Bëngbe Bëtsabe obenánaca. <sup>14</sup> Y nyetsca soyënga ntšamo chašmojtsamcá, bonshanánaca šmochtsama.

<sup>15</sup> Jesucristbeyeca atšbe catšátanga, tšëngaftanga šmondëtatšëmbo, Estéfnas y chabe pamíllanga chë natsanënga monjamnama Jesucristbeñe jtsošbuáchiyama, Acaya luaroca, y bëtscá imojtsentšena Bëngbe Utabnabiamia jtsetrabájayana, chabe entsanga jtsëjabuáchanëse. <sup>16</sup> Atše cbaimpadá, tšëngaftanga lempe šmochtsama ntšamo cmojtsamëndacá, chca entsanga mo tšëngaftangbe uanatsanëngcá, y ntšamo nyetsca chë ínýenga mo bëngcá quemuiñe uajabuáchanëse trabájayënga cmojtsamëndacá.

<sup>17</sup> Atše tša oyejuayá séntsemna tšëngaftangbe pueblentšana Estéfnas, Fortunato y Acaico moye tmojáhshajnama, er atše sëntsobena oyejuayá chëngaftaca jtsemnana, tšëngaftangaftaca choca jtsemnana cabá ndoñe sëntsobenëntscuana. <sup>18</sup> Er chënga átšbioye tmonjabo y tšëngaftangbiamia šmonjauyana, y chca chënga tmonjama, atše y tšëngaftanga natjémbana ainánaca chamotsomñama. Chënga šmochtsétabna mo puerte uámana entsangcá.

<sup>19</sup> Asia luaroca ošbuachiyëngcá enefjuanënga cmontsacheuaná. Aquila y Prisca y chatbe yebnentše mondbëtsenefjuana ošbuáchiyënga cmontsacheuaná, Bëngbe Utabnábeñe ošbuachiyëngcá, tšëngaftangcá bëtsemnayeca. <sup>20</sup> Muentša ošbuáchiyënga nyetscanga cmontsacheuaná. Nyetscanga šmochjenchuaye mo Jesucristbeyeca catšátangcá, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

<sup>21</sup> Quem palabrënga tšëngaftanga jacheuayama cach atšbe cucuátšëca sëntsabianná.



<sup>22</sup> Nderado nda Běngbe Utabnábioye ndoñe tbontsebobonshana, Běngbe Bětsá njetsca tescama chabocastigá. ¡Běngbe Utabná cachiñe cochjésabo!

<sup>23</sup> Atše, Běngbe Bětsá séntseimpadana, Běngbe Utabná Jesús chaoma tšěngaftangbeñe tšabe bendicioněnga chaotsemnama. <sup>24</sup> Atše, njetsca tšěngaftanga cbondábabuanjeshana, canya mo tšěngaftangcá, Cristo Jesúseftaca cánjiñe mo canjacá jtsemněse.

## 2 Corintios

### *Jacheuayama*

<sup>1</sup> Atše Pablo, Jesucristbe canje ichmoná, Bëngbe Bëtsá atše chca jtsemnama yojánbošeyeca, Jesucristbeyeca bëngbe catsata Timotéoftaca quem tsbuanácha sentsabiamná, Corinto pueblaca Bëngbe Bëtsábeñe ošbuachiyëngcá enefjuanëngbiama, y nyets Acaya luarentše Bëngbe Bëtsabe nyetsca entsangbiámnaca. <sup>2</sup> Atše séntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnama y ainaniñe tsabe ebionana chašmotsebmnama.

### *Ntšamo Pablo tojansufri*

<sup>3</sup> Bënga mochtsatschuanaye Bëngbe Bëtsá, chë Bëngbe Utabná Jesucristbe Taitá, bëngbe Taitá, chë bëngbiama lastemado yomná, y ndaye padecena soyënguiñe tmojtsemna ora, bënga šondbetsañemuayá. <sup>4</sup> Cha bënga jtsañémuayana padecena soyënguiñe tmojtsemna ora, chca, bënga chamotsobenama chë tmojtseufrinënga jañémuayama, ntšamo Bëngbe Bëtsá šojjabuachcá chënga jujabuáchëse. <sup>5</sup> Er ntšamo Cristo tojansufricá, bënga tša fsëndësufrina chabiamna oservéniñe; cachcá, Cristbeyécnaca Bëngbe Bëtsá jamana bënga puerte añemo ainaniñe fchaitsebmnama. <sup>6</sup> Er bënga tmojtseufrinëse, jtsemnana bënga jobenayama tsëngaftanga jañémuayama chë šmojtseufrina ora, y atsebácanënga chašmotsebmnama, Bëngbe Bëtsabe soyëngama jouenëse. Chë padecena soyënguiñe tmojtsemna ora Bëngbe Bëtsá šojañemose, jtsemnana bënga fchayobenama tsëngaftanga jañémuayama, padecena soyënguiñe šmojtsemna ora. Chca, bënga jobenayana tsëngaftanga jujabuáchana, Bëngbe Bëtsábeñe chašmotsobátmanama, chábeñe jtsošbuáchiyëse, y lempe jtsóboyayama, ntšamo bënga fsënjasufricá šmojtseufrina ora. <sup>7</sup> Bënga sempre fsëndobátmana y tsábá fsëndétatšëmbo chë padecena soyënguentšana tsábá šmochjábocanama, er bënga fsëndétatšëmbo, chë ntšamo bënga fsënjasufricá tsëngaftanga šmojasufrima; y cachcá, Bëngbe Bëtsá yochjama tsëngaftanga ainaniñe puerte añemo chašmotsebmnama, ntšamo bënga fchaitsebmnama cha tojamcá.

<sup>8</sup> Jesucristbeyeca atšbe catsátanga, bënga fsëntseboše tsëngaftanga chašmotsetátšëmbo ntšamo bënga Asia luaroca tša fsënjansufrinama. Bënga puerte padecena soyënguiñe fsënjanियena, nya ndoñe más jauantacá, chentšana vídaca jabocanama ntjatobatmancá. <sup>9</sup> Bënga šontsanénana mo jóbanama cuaftsamncá. Pero chë soye tonjanoservé, bënga jtsošbuáchiyama Bëngbe Bëtsábeñe, nda inétsama obanënga chámuatayenama, y ndoñe cabëngbeñe ntsošbuáchiyana. <sup>10</sup> Cha šojatsebacá bënga jóbanama puerte resjo enjamnentšana, y cachcá šochjátsebacaye bëngbiama cachiñe cachcá tša resjuiñe chamojtsemna ora. Bënga puerte chábeñe fsëndobátmana, puerte padecena soyënguiñe bënga chamojtsemna ora, cha cachiñe šochjátsebacama. <sup>11</sup> Tsëngaftángnaca cmontsamna bënga jujabuáchana, bëngbiama Bëngbe Bëtsá jaimpádase; chca, ba entsanga Bëngbe Bëtsá mochanjëtschuaye, er cha tojama bënga chábentšana tsabe bendicionënga fchayóyëngacñama, cha jamëse ntšamo chënga bëngbiama tmojanimpadacá.

### *Ndáyeca Pablo Corinto puebløye ndoñe tonjána*

<sup>12</sup> Canje soye endmëna ndayá oyejuayënga šojtsabiamná: bënga bëngbe ainanentša juabnéngaca jtsetatšëmbuana puerte tsábá jtsamëse fstsiyena ca, ntšamo chë Bëngbe Bëtsabe entsanga endbetsamncá, nyetsca quem luarentša entsangbeñe, y más tsëngaftangbeñe, y bënga jtsetatšëmbuana ntšamo tsábá tifjamcá nyets ainánaca tifjamama. Bënga tondaye chibiatsma quem luarentša entsangbe osertanánaca, ndayá Bëngbe Bëtsá tša tsábia béngaftaca bëtsemnayeca, šojjúbuache chca chamotsiyenama. <sup>13</sup> Er ntšamo fsëntsabiamnamna ndoñe queftsátsboše, ntšamo tsëngaftanga šmojtsalía

y cmojtsesertánentšana inyetšá játayanana, y sentsobátmana puerte tšabá lempe chacmósertama. <sup>14</sup> Mora ndayá atše stsamama ndoñe lempe quecmátésertana. Pero atše séntseboše tšëngaftanga chama corente chacmósertama; chca, Bëngbe Utabná quem luaroye chaojésabo ora, tšëngaftanga bëngbiana oyejuayënga chašmotsemnana, ntšamo bëngnaca tšëngaftangbiana oyejuayënga fchantsemncá.

<sup>15</sup> Chca ndegombre yomnana atše sëndétatšëmboyeca, atše sënjanjuabná tšëngaftangbioye jshétsana jányama, y chca, chë tšabe soye tšëngaftangbiana uta soye jamana, tšëngaftangbioye uta soye jányëse. <sup>16</sup> Atše sënjanjuabná tšëngaftanga jshaftsanýana, Macedonioye ayiñe chëjana matijánachnëngo ora; y chentšana, ya camoye ataboye ora, tšëngaftanga cachiñe jáftsanyana. Chca, tšëngaftanga mašmënjánobená atše juajabuáchana Judea luaroye játama. <sup>17</sup> Atše chca jamama tsjanjuabná ora, ¿chca tijanma ndoñe corente tšabá ntjenjuaboycá? ¿Tšëngaftanga šmatjájuaboje, ntšamo nýe quem luarama enójuabnaye entšanga monduamancá, cachora canýe soyama “aíñe” y “ndoñe ca” jayanëse, atše ndayánaca jamama snétsejuabnaye ca?

<sup>18</sup> Canýe soye ndegombre endmëna: Bëngbe Bëtsá sempre endbama ntšamo tojayancá, y chca puerte ndegombre endmënayeca, atše ndayánaca chjama ca stjayana ora, chca ndoñe questsbatayana chentšana atšbe juabna jatstrócama, mo canýa cachora canýe soyama “aíñe” y “ndoñe ca” cuafjatichamcá. <sup>19</sup> Er Cristo Jesús, Bëngbe Bëtsabe Uaquiñá, ndabiana Silvano, Timoteo y atše tšëngaftangbeñe fsënjanabuayiyiná, ndoñe ntsejuabnayana canýe soye jamama y chentšana jatsjuabnayana inyetšá jatsmama, mo canýe entšá cachora canýe soyama “aíñe” y “ndoñe ca” cuafjatichamcá, ndayá chana nýets tempo ntšamo tojtsejuabnacá jayanana y jamana ntšamo ndegombre yomncá, chentšana ntjatstrocaycá. <sup>20</sup> Er ndayá cha tojamiñe, lempe ntšamo Bëngbe Bëtsá tojašebuachenacá jocúmpliana, mo chë lempe ntšamo Bëngbe Bëtsá tojašebuachenama cha “aíñe ca” cuafstichamcá. Chíyeca, Bëngbe Bëtsá bënga tmojtsatschuaná ora, Cristo Jesúsbeyeca bënga jayanana “chca chaotsemna ca”. <sup>21</sup> Pero Bëngbe Bëtsá endmëna nda inétsama bënga y tšëngaftanga puerte Crístbeñe chamotsošbuáchema, cháftaca cánýiñe mo canýacá jtsemnëse; y Bëngbe Bëtsánaca endmëna nda bënga šojabacacá chabe entšanga chamotsemnana. <sup>22</sup> Cha tojama chë Uámana Espiritu bëngbe ainaniñe cháumashënguama jtsemándayama, y chë soye jtsinýanýnayana bënga Bëngbe Bëtsabe entšanga imomnana. Y bëngbe ainaniñe chë Espiritu imobómnyayeca, bënga corente jtsetatšëmbuana bënga mochjójyëngacñama lempe ntšamo Bëngbe Bëtsá bënga jatšatayama šojašebuachenacá.

<sup>23</sup> Bëngbe Bëtsá entsonýá atše ndegombre stsichámuama. Atše Corinto puebloye cabá ndoñe chiyjá, er atše ndoñe quetsátsboše tšëngaftanga jašëchnana, chë bacna soyënga šmojamama, tcojoaucácanëse. <sup>24</sup> Bënga ndoñe queftsátsboše tšëngaftanga jaméndana ndayiñe cmojtsamna jtsošbuáchiyana; er tša šmojtsošbuachéyeca, ndoñe quešmochatajbaná Crístbeñe jtsošbuáchiyana. Bëngbe fséntseboše ndayá tšëngaftanga jujabuáchana, corente oyejuayënga chašmotsemnana.

## 2

<sup>1</sup> Chíyeca atše ndoñe chiyjá jautsëtsayama, er atše sënjanjuabó y sënjanéniyana choye ndoñe jama ca, bacna soyënga šmojtsanmama jábuayenama, y chca, ngmëñënga játabiamana, ntšamo chanýe sënjamcá. <sup>2</sup> Tšëngaftanga ngmëñënga chašmotsemnana atše stjamëse, ¿nda yochjama atše oyejuayá chaitsemnana, sinó nýe tšëngaftanga, chë atše ngmëñënga tijábiamënga? <sup>3</sup> Chíyeca tcbonjanëbuábiana chë ntšamo šmojualiácá, chca, atše choye stjáshjango ora, tšëngaftanga átšbioye ndoñe ngmená chašmondëbemama. Chca játamamna, tšëngaftangbiana más tšabá endmëna oyejuayá atše chašmobema. Atše tšabá sënjántatšëmbo ndayá átšbioye oyejuayá šojabemcá, tšëngaftángnaca chca mašmënjánbošena y oyejuayënga chë soye matcmënjánabiana. Chíyeca atše ndoñe chiyataná, nýetscanga oyejuayënga jtsemnana ndoñe quenjatopodena ora. <sup>4</sup> Pero chë

tsbuanácha tcbonjanëbuábiama ora, atše corente šonjanongmé y ainana šonjántsetšena chca jabuache soyënga tšëngaftanga jubuábiamama, y chca jamama shëchbuíynaca sënjanoperdé. Pero atše ndoñe checbátanëbuabiama atše jatsmama tšëngaftanga puerte ngménaca chašmotsemnana, ndayá chašmotsetatšëmbuama atše tša cbababuánÿeshanama.

*Perdón chë bacna soye amabiama*

<sup>5</sup> Y mora, chë tšëngaftangbeñe puerte ngménana chaotsemnana tojama boyabás-abiama, cha átšbioye ndoñe ngmená chešnátsebema, ntsachetsá tšëngaftanga tcmo-jabiamcá, ínÿengbioye ínÿengbiama más. Chca séntsichamo, er atše ndoñe quet-sátsboše jayanama ntsachetsá tojamama cha más bacna soye tojama ca. <sup>6</sup> Banga tšëngaftanguentšënga ntšamo šmojamcá, chë entšabiama ya bëts castigo entsemna. Nÿe nÿetsá ponto. <sup>7</sup> Chamna, ndayá mora cmojtsamna jamamna entsemna, cha jtseperdónana y jañëmuana, chca, ndocna tšabe soye jamama ndobená ndoñe chaondëtsemnana, chë castiguama puerte ngménaca bëtsemna causa. <sup>8</sup> Chíyeca, tšëngaftanga cbaimpadá cachiñe tšabá chašminÿinÿé chábioye corente šmobobonshánama. <sup>9</sup> Tempo ya chama tcbonjanëbuábiama, atše jinÿama tšëngaftanga aíñe o ndoñe šmontsanprontánama, lempe ntšamo tcbonjanamëndacá jamama. <sup>10</sup> Chcasna, ndánaca ndayánaca tšëngaftanga chašmojaperdoná ora, átšnaca cha chantseperdóna. Y atše cha chantseperdóna, ndayá japerdónama ndegombre tojtsemnëse. Y chca chanjama tšëngaftangbe tšabiama y Cristbe delante. <sup>11</sup> Atše tšëngaftangcá, quem entšábioye šcoperdoná chë bëngbiama tojama bacna soye; chca, Satanás ndoñe chaondobenama bënga jáingñama, er bënga mondétatšëmbo cha inëtseboše ndaye bacna soye entšá chaotsamama.

*Ndáyeca Pablo ndoñe natjëmbana Troas puebloca tontsanoquedañe*

<sup>12</sup> Atše Troas puebloca sënjánashjango ora, Cristbe tšabe noticiënga jábuayenama, atše sënjáninÿe Bëngbe Utabná tojanma chentše banga chë buayenana soye chamouenama y chëngbe ainaniñe chana chamóyëngacñama. <sup>13</sup> Masque chca enjamna, atše ndoñe quetstëtsovena natjëmbana ainana jtsebomnana, er atše sënjanjuabná Jesucristbeyeca bëngbe catšata Tito chentše jinÿenana, pero ndoñe chca. Chíyeca, Troas pueblentša entsanga sëntanadiošoftaná, y Macedonia luaroye sënjána.

*Crísoftaca cánÿiñe mo canÿacá jtsemnëse, bënga mo ayëñjanayëngcá jtsemnana*

<sup>14</sup> Atše Bëngbe Bëtsábioye sëndbëtsatschuanaye, bënga bacna soyënga jamama juab-nënga cha tojanëyëñjanama, tempo šojanaménda juabnënga; y chë mora bënga Crísoftaca cánÿiñe mo canÿacá jtsemnëse, nÿets tempo cha šnetsënachayama, mo canÿe ayëñjanayacá, y chë nÿets luarenache entšanga Cristbiama soyënga chamotsábuatmama bëngaftaca cha yojtsamama, mo nda canÿe botamana uanguëtše soye nÿets luarëngue-nache chauáshanama cuaftsamcá. <sup>15</sup> Er chë incienso tojtsejuínÿinÿana ora, entšábioye tšabá juanguëtšenana; cachcá Cristbe tšabe noticiënga fstsabuayinán ora, Bëngbe Bëtsabiama bënga jtsemnana chë ndëmuanÿyënga tmojtsama cha oyejuayá chaotsemnana. Incienso tcojtsejuinÿán ora, nÿetscángbioye juanguëtšenana. Cachcá, Bëngbe Bëtsabe palabra fstsoyebuambná ora nÿetscanga jouenana, Cristo yojtsatsebacanga y chë pochocánënga jtsemnana imojtsajnëngnaca. <sup>16</sup> Chë pochocánënga jtsemnana imojtsajnëngna, pochocánënga mochanjábocana, er ntšamo bënga fsëndabuayinacá y tmojouencá chënga tmojtsaboté; y chca, chëngbiama chë tšabe noticiënga jtsemnana mo canÿe obanabe uanguëtšancá. Pero chë Cristo yochjátsebacangna, tšabe noticiënga tmojóyëngacñeyeca, mochanjobenaye tšabe vida nÿets tempo jtsebomnana; y chca, chëngbiama chë tšabe noticiënga jtsemnana mo canÿe puerte botamana uanguëtšancá. Y asna, ¿nda obenana yojtsebomna chë tšabe noticiënga jábuayenama trabajo jtsamama? <sup>17</sup> Bënga chë tšabe noticiënga ndoñe queftsatabuayinán, ntšamo ba entšanga imojtsamcá, mo nÿe batšá uámana soyënga cuaftsemncá, y ndayánaca juácanama, mo nda

ndaye nduámana soyënga cuaftsencá. Banga chca mondama; bënga ndoñe. Bënga, Crístoftaca cánÿiñe mo canÿacá jtsemnëse, fsëndabuayiyná mo Bëngbe Bëtsabe delante cuaftsemnëngcá, ndegombre nÿe ntšamo tšabá yomncá nÿets ainánaca jtsebošëse, y mo Bëngbe Bëtsabe ichmonëngcá.

### 3

#### *Chë Bëngbe Bëtsabe tsëm tratama buayenana soye*

<sup>1</sup> Chca bëngbiama fstsjayana ora, tšëngaftanga cmojtsinÿana ¿bënga cachiñe tiftë-tontsé cabënga bëtsétsanga enobiamnayana? ¿O bënga šojtsamna, mo inÿengcá, tšëngaftanga juyentšbuáchiyana o juátjañana tsbuanachangá, bënga tšabá fstsamama chéchangaca jinÿanÿiyama? <sup>2</sup> Bënga bëngbe ainaniñe puerte tšabá fsëndétatšëmbo, nÿetsca entšanga, ntšamo tšëngaftanga jtsamëse šmoyencá tmojinÿe ora, tšëngaftanga jtsinÿanÿayana bënga ndegombre ntšamo tšabá yomncá fstsamama. Chca, tšëngaftanga jtsemnana mo canÿe tsbuanachacá, nÿetscanga jtsabuatmana y jtsobenana jualána, bënga tšabá fstsamama. <sup>3</sup> Nÿetscanga tšabá mondétatšëmbo Cristo tojanma tšëngaftanga chábeñe chašmotsošbuáchema, y béngaftaca cha chca tojanmám-naca. Chca, tšëngaftanga šmondmëna mo Cristbe canÿe tsbuanachacá, ndayécha quem luarentša entšángbioye tojuyentšbuaché béngaftaca. Tšëngaftanga ndoñe chešmatanobená Crístbeñe ošbuáchiyënga jtsemnana entšangbe trabájoca, er Crístbeñe šmonjanošbuaché chë Bëngbe Bëtsá Ainabe Espíritbeyeca; y chca, tšëngaftanga šmondmëna mo canÿe tsbuanácha cháftaca uabemanëchacá, y ndoñe mo entšángbeyeca uabemana tsbuanachacá. Bëngbe Bëtsá chë mandënga ndëtšbé tablëbenguíñe tojanábema, entšanga chamotsobedecénama, pero tšëngaftangna Cristbe buayenana soye tšëngaftangbe ainaniñe šmojóyëngacñe.

<sup>4</sup> Crístbeyeca Bëngbe Bëtsábeñe jtsošbuáchiyëse, bënga corente fsëndétatšëmbo chca ndegombre bëtsemnana. <sup>5</sup> Ndoñe quenátsmëna, nÿe bënga cánÿenga quem trabajo jamama ftsobena y játayanana bëngbe soye chë trabajo yojtsemna ca, er bënga jtsobenana chca jamama, nÿe Bëngbe Bëtsabe ujabuáchenanaca; <sup>6</sup> er cha tojama bënga fchayobenama quem trabajo jamama, chë entšanga jábuayenana Bëngbe Bëtsá chabe entšángbioye tojanašebuachená soyëngama, ndayá Cristo tojanma sóyeca, mo canÿe tsëm tratcá, Bëngbe Bëtsá y chabe entšángaftaca. Quem soye ndoñe quenátsmëna mo chë Bëngbe Bëtsá tempo Israeloca entšángbioye léyeca tojanašebuachená soyëngcá. Inÿetšá; entšanga mondama Bëngbe Bëtsabe tsëm trato, Uámana Espíritbeyeca. Chë natsana trato, chë uabemana ley, ntšamo chiñe iuabemancá ndoñe tconjama causa, entšá jóbanama jtsemnana; pero Cristbe tšabe noticiënga, chë tsëm trato, entšanga ainaniñe tmojóyëngacñe ora, chë Uámana Espíritu jamana, chë nÿetsca tescama yomna tšabe vida chënga chamotsebomnana.

<sup>7</sup> Quem Moisesbe ley, chë ndoñe tmonjobedecema entšanga jóbanama jtsamnana, ndëtšbé tablëbenguíñe letrëngaca tmojanábema, y Bëngbe Bëtsá Moisésbioye tbojanantšabuaché ora, cha tša buashinÿinÿaniñe tojánabo. Chë causa entšanga ndoñe imontsobena ni mo jinÿana Moisesbe jubiá, er tša ibojtsanjuebëbuashinÿinÿana, Bëngbe Bëtsáftaca tbojánencuententšana tojtanabo ora. Pero betscó tojanéjbana chë jubiá chca buashinÿinÿanana. Chë ley, chë natsana trato, Bëngbe Bëtsá tojanayentšbuaché ora, tša buashinÿinÿanánaca cha tojanmëse; <sup>8</sup> ndegombre, más bën y uámana tempo entsemna chë Bëngbe Bëtsá bënga šojanašebuachená tsëm soyënga yojtsama ora, chë Uámana Espíritu bëngbe ainaniñe cháumashënguama Bëngbe Bëtsá tojama ora. <sup>9</sup> Bëngbe Bëtsá chë ley tojanayentšbuaché ora, chë ndáyeca entšanga jóbanama yojánamna, ntšamo chiñe betsayancá ndoñe tmonjama causa, chora cha chca tojanma puerte chabe buashinÿinÿanana jinÿanÿiyëse; ndegombre más bën y uámana tempo entsemna chë mocna ora Bëngbe Bëtsá yojtsama entšanga chabe bominÿiñe tšábenga chamotsemnana.

<sup>10</sup> Er chë Bëngbe Bëtsá ley tojanayentšbuaché ora tojaninjänýé buashinýinýanana, mora jtsinýnana mo ya tondaye cuabndëtsemncá, chë Bëngbe Bëtsá entsangbiama tsëm soyënga tojtsamama tcojtsonýá ora, chë tša buashinýinýanana yojtsemna ora.

<sup>11</sup> Er chë leyama tempo, chë ya jochnënguama tempo entsemna ora, Bëngbe Bëtsá chabe buashinýinýanana y uámanana tojinýanýese; ndegombre chë Bëngbe Bëtsá tsëm soyënga entsangbiama jamama ora, chë ndocna te yochanjochnëngo tempo ora, Bëngbe Bëtsá más chabe buashinýinýanana y uámanana echántsinýanýnaye.

<sup>12</sup> Y chca, Bëngbe Bëtsá chca bëts soyënga yochjamama fsëndobatmánayeca, bënga fsëntsobena jóyebuambayama, nýetsca soyëngama jayanëse, tondayama ntjatauatjca.

<sup>13</sup> Y chca, bënga ndoñe Moisesca queftsátama, chë chabe jubiá chaobuashinýinýenama Bëngbe Bëtsá tojanma ora, canýe entšéjuaca yojtsenamochécjua; cha chca tojanma, chë Israeloca entsanga ndoñe chamondobená jinýama chë jubiá buashinýinýanana ya yojtsëchnëjuana ora.

<sup>14</sup> Pero Bëngbe Bëtsá tojanma chënga ndoñe chaondósertama ntšamo Moisesbiajana cha tojanayancá. Y cabá quem tempo, ntšamo Bëngbe Bëtsá Moisésbioye tbojanšbuachenacá chëngbiama jamama, Israeloca entsanga tmojtsalía ora, ndoñe ntsësertánana Bëngbe Bëtsabe ndegombre soyënga, mo chëngbiama iytémëna soyënga cuaftsemncá, mo chë Moisés yojtsenamochécjua entšéjuacá. Y chca endmëna, er nýe Crísoftaca cánýiñe mo canýacá jtsemnëse, chënga jtsobenana chë soyëngama jósertana, y iytémencá ya ndoñe ntsemnana.

<sup>15</sup> Y méntscóñama, Moisesbe librëšangá chënga tmojtsalía ora, ndoñe ntsësertánana Bëngbe Bëtsabe ndegombre soyëngama, ntšamo chiñe tojtsayancá jamama ndoñe montseboše causa.

<sup>16</sup> Pero canýe entšá chë Bëngbe Utabnabe benache tojishache ora, cha jtsobenana chë soyëngama josértana.

<sup>17</sup> Y Bëngbe Utabná y Espíritu canýa bondmëna, y Bëngbe Bëtsabe Espíritu tojtsemnëntše, chë bacna soyënga jamama juabnënga, ni chë ley ndoñe ntsemándayana.

<sup>18</sup> Moisés chabe jubiañe Bëngbe Bëtsabe buashinýinýanana y uámanana tojaninýanýé, y chíyeca, canýe entšéjuaca yojtsenamochécjua, chca, chënga ndoñe chamondinýama. Pero bënga ošbuáchiyënga nýetscanga jtsinýanýnayana Bëngbe Utabnabe buashinýinýanana y uámanana, mo canýe espejo canýe soye tojtsinýanýnacá, y ndoñe queftsátsoše ntšámncá jamëse chë soye jatsëytamianana. Cha béngaftaca yojtsama cada te más chë ntšamo cha yomncá bënga chamotsemnana, cada te más bëtsétsanga chë ntšamo cha yomncá jtsemnëse. Chca endmëna ntšamo Bëngbe Utabná yojtsama; y Bëngbe Utabná y Espíritu canýa bondmëna.

#### 4

<sup>1</sup> Y chca, Bëngbe Bëtsá bëngbiama lastemado yómnyayeca, quem trabajo šojabanýé, jtsabuayinýayama chë Crísoftaca tojašebuachená soyënga; y chíyeca bënga ndocna te ntjájbanana ainaniñe añemo bomnana.

<sup>2</sup> Bënga fsëntsaboté chë ínýenga iytémencá innétsama soyënga, chë ínýenga tmojinýe ora chama jtsëuatjana, y chë ínýenga entsanga jáingñama innétsama soyëngnaca, y Bëngbe Bëtsabe buayenana soye ndoñe queftsatstróca ndoñe ndegombre soyëngaca. Chamna, bënga sempre nýe chë ntšamo ndegombre yomncá fsëndbëtsoyebuambnaye, mo Bëngbe Bëtsabe delante cuaftsemnëngcá jtsamëse; y chca, bënga fsëndbëtsama cada entšabe ainanentša juabnënga chamuayanama, bënga ndegombre soyënga fstsoyebuambná ca.

<sup>3</sup> Y nderado bënga chë tšabe noticiënga fstsabuayinýa ora, báseftanga chë soyënga chaósertama ndoñe tontsopodénëse, nýe chë pochocánënga jtsemnana tmojtsajnëngbiama chca jtsemnana.

<sup>4</sup> Chëngbiama, chë Crístbeñe ndošbuáchiyëngbiama, chë quem luarentše mora mandayá, Satanás, tojama chë buayenana soye ndoñe chaondëtsësertánama; chca, chënga ndoñe chamondinýama chë tšabe noticiënguentšana puerte bëts y tšabe soyënga, chë Cristo puerte bëtsá y obená yomnana ínýanýnaye soyënga, nda nýetsca soyënguñe Bëngbe Bëtsacá yomna.

<sup>5</sup> Bënga ndoñe nýe cabëngbe soyama queftsatabuayinýa, ndayá Jesucristbiana mo Bëngbe Utabnacá. Bënga bëngbiama fsëndbáyana mo oservenëngcá

fstsmëna ca, tšëngaftanga jujabuáchama; y chca fsëndbétsama Jesús jasérviana. <sup>6</sup> Er Bëngbe Bëtsá, nda quem luare jobojátšama ora tojanmandá binýniñe ibetentšana chaóboconama, chánaca tojama bënga ainaniñe tšabá chabe soyëngama chašotsësertánama, chca bënga fchayobená juabuátmanana chë Bëngbe Bëtsabe uámanana y obenantšana inétsobocana osertánana, ndayá Crístbeñe bënga mondonýá.

*Bënga fsëndoyena Crístbeñe jtsošbuáchiyëse*

<sup>7</sup> Pero chë puerte tšabe y bëts soye, chë Crístbe buayenana soye, bënga mondbomna cuerpiñe, bëngbe ainaniñe; y chë cuerpënga jtsemnana nýe mo matbajëngcá, ndoñe yapa obenana ntsebmomnana, chca, jinýanýiyama tša bëts obenana Bëngbe Bëtsábiocana yóbocanama, y ndoñe bëngbentšana. <sup>8</sup> Y chca, bënga nyetsca padecena soyënguiñe vida fsëndbomna, pero ndoñe queftsátsmëna ndobenënga chë padecena soyënguentšana tšabá jabocanama; ndoñe queftsátstatšëmbo ndayá jamama šojtsamna, pero ndoñe queftsátsmëna ntsobencá jtsobátmanama quem padecena soyënguentšana tšabá jabocanama. <sup>9</sup> Inýenga montsama bënga puerte fchaisufrima, pero Bëngbe Bëtsá ndoñe nýe cachcá šontsabashejuana; mo nda ínýabioye cuafjutšencá tmojtsejtsjaná ora, ya jóbama jtseprontánana, uayayënga bënga jtsëbáyama imojtsejuabnangbe cucuatšiniñe fsëntsemna, pero cabá ndoñe ntjobáyana. <sup>10</sup> Inýenga sempre jtsamana bënga bëngbe cuerpiñe puerte fchaisufrima, y jobanámnaca resjo jtsemnana, ntšamo Jesúsëftaca tmojanmcá, cha chaosufrima y chaóbanama. Chca bëngaftaca endopasana, chca, ínýenga chamobená jinýama Jesús bëngbeñe vida yobomnama. <sup>11</sup> Er bënga vida fchabomnëntscuana, sempre puerte resjo bëngbiamá jëftsemnana jóbana, Jesúsbioye servena causa; y chca endmëna, ínýenga chamobená jinýama Jesús vida yobomnama bëngbe cuerpiñe, chë canýe te yochjopochóca cuerpo. <sup>12</sup> Y chca, bënga tša fsëndësufrina y jobanámnaca resjo endmëna; y tšëngaftanga tšabe noticiënga šmojóyëngacñayeca, Bëngbe Bëtsá tojama chë nyetsca tescama yomna tšabe vida chašmotsebmomnama.

<sup>13</sup> Bëngbe Bëtsabe uabemana palabrënguiñe endayana: “Atše sëntsanosbuaché y chíyeca sënjanoyebuambá ca.” Bënga cachca ošbuáchiyana fsëndbomna chë chca tojanayanacá, y chíyeca bëngnaca Bëngbe Bëtsábeñe fsëntsošbuaché y chabiamá fsëntsoyebuambná. <sup>14</sup> Er bënga fsëndëtatšëmbo, Bëngbe Bëtsá, nda tojanma Bëngbe Utabná Jesús cháuatayenama, chánaca yochjama bënga Crístoftaca cánýiñe mo canýacá jtsemnëse, bënga chámuatayenama, y tšëngaftangaftaca cánýiñe cha yochtsemnoye šochjúshejango. <sup>15</sup> Lempe ntšamo bënga fstsama y fstsësufrincá tšëngaftangbe tšabiamá endmëna; chca, más becá entšanga chábeñe chamojtsošbuaché ora, ba tšabe bendicionënga Bëngbe Bëtsá entšangbiamá jtsamëse, más becá entšangnaca chábioye chamotsatschuaná, ndayá chëngbiamá cha yochjamama; y lempe chca, Bëngbe Bëtsá puerte uamaná y obená yomnama nyetsca entšanga chamotsichámuama.

<sup>16</sup> Chíyeca bënga ndoñe ntjájbanana ainaniñe añemo bomnana. Masque quem luar-entša bëngbe cuerpo cada te jtsopochócyana, Bëngbe Bëtsá jamana chë bëngbentšana nyets tempo vida yochtsebmomna soye, cada te más obenana chaotsebmomnama; y chca, bënga jtsemnana mo tsmëma entšangcá. <sup>17</sup> Ntšamo bënga mora fsëndësufrincá endmëna nýe quem luarentše vida tmojtsebmomnëntscuana, y chca, chë soye jtsemnana mo canýe nduámana soycá; pero ntšamo bënga fsëndësufrincá josérviana bënga jtsebmomnama chë Bëngbe Bëtsá šochjatšataye puerte bëts uámanana y obenana, cháftaca nyets tempo vida jtsebmomnama, chë ndayá yomna nyetsca soyëngama más bëts y uámana soye. <sup>18</sup> Er bënga nýe chë tojtspodena jinýama soyënguiñe ndoñe nyets tempo queftsatsjuabná, ndayá chë ndoñe yondopodena jinýama soyënguiñe; er chë bënga imobena jinýama soyënga ndoñe nyetsca tescama ntsemnana; pero chë bënga ndoñe mondobena jinýama soyënga cocayé nyetsca tescama jtsemnana.

## 5

<sup>1</sup> Bënga mora mondbomna canye cuerpo quem luarentse vida jtsebomnama. Quem cuerpo yomna mo chë jtsatsjacama yopodena yebncá, cánÿentse ndoñe nyets tempo ntjëftsemnana. Bënga mondetatsëmbo, quem cuerpo canye te tojtsochocase, Bëngbe Bëtsá yochjama bënga tsmëma cuerpënga chamotsatsbomnama, celoca nyetsca tescama vida jtsebomnama, Bëngbe Bëtsabe pormana cuerpënga y ndoñe entsangbe pormana cuerpënga. <sup>2</sup> Chiyeca, bënga quem luarentse chca vida tmojtsebomnëntscuana, yapa tmojtseufrina causa, bënga tša jtsebošana betesco Bëngbe Bëtsá celoye chašúyambama, y bënga nyets tempo celoca jtsiyenama tsëm cuerpo jtsebomnama cha chaomama; <sup>3</sup> chca, Cristo yochjésabo ora, bënga chë tsëm cuerpoca chamotsemnana, y ndoñe nye espíritu ndocna cuerpoca. <sup>4</sup> Bënga quem cuerpiñe, chë quem luarentse vida jtsebomnama cuerpiñe chamojtsiyenëntscuana, yapa padecena soyënguiñe sufrina causa, bënga jabuache mochanjáshachna; chca echántsemna ndoñe nye chë espíritu ndocna cuerpoca jtsemnana bënga imojtsebóseyeca, ndayá masna, bënga chë tsëm cuerpo chamotsebomnama Bëngbe Bëtsá chaomama imojtsebóseyeca. Bënga fséntseboše chë bëngbeñe jopochócama yomna soye Bëngbe Bëtsá lempe chaotrocama, chca, bënga chamotsobenama celoca nyetsca tescama vida jtsebomnama. <sup>5</sup> Y Bëngbe Bëtsá endmëna nda tojama bënga chamotseprontánama chë tsëm cuerpo jtsebomnama, y nda tojama Espiritu bëngbe ainaniñe cháuamashënguama, chca bëngbioye jinÿanÿiyama, bënga ndegombre mochjóyëngacñe ndayá Bëngbe Bëtsá tojašebuachenacá.

<sup>6</sup> Y chca, bënga sempre ainaniñe bëts añemo fchandbétsebomna. Bënga fsëndëtatšëmbo, quem cuerpiñe cabá vida bënga mochjëftsebomnëntscuana, bënga ndoñe mochántsemna Bëngbe Utabná yojtsemnentse. <sup>7</sup> Er mora bënga fsëndoyena jtsamëse, ntšamo Crístbeñe bënga imošbuachecá, y ndoñe nye ndayá jinÿama tmojtsobenama. <sup>8</sup> Bëngbe fséntsemna ainaniñe bëts añémoca, y más fséntseboše jájbanana quem cuerpiñe vida jtsebomnana, jama Bëngbe Utabnáftaca nyetsca tescama vida jtsebomnama. <sup>9</sup> Chiyeca bënga bëtscá fsëndëntšena Bëngbe Utabná sempre oyejuayá jabemama, masque bënga quem luarentse quem cuerpoca tmojtsiyena, o ya ndoñe. <sup>10</sup> Er nyetscanga šontsamna jashjanguana Crístbe puestoca tribunalentse, cada ona ntšamo yomerecencá chaóyëngacñama, ntšamo tšabá o ndoñe tšabá quem luarentse chabe cuerpiñe vida yojëftsebomnëntscuana tojëftsemcá.

*Jábuayenama ntšamo Bëngbe Bëtsá inama entsanga tempcá tšabá cháftaca chamotsatsmënama*

<sup>11</sup> Chcasna, Bëngbe Utabná nyetscangbiama chë más bëtsá yomnama jtsejuabnayëse, bënga bëtscá fsëndama entsanga jáyëñjanama, bënga tšabá ftsamama chamotsejuabnama. Pero Bëngbe Bëtsá ya endëtatšëmbo ntšamo bënga ftsmënama, y atše sentsobátmana tšëngaftángnaca chca tšabá chašmotsetátšëmbo, tšëngaftangbe ainanentša juabnëngaca, chë bëngbiama aíñe ca cmojtsëtsëtsná juabnënga. <sup>12</sup> Bënga ndoñe cachiñe cabëngbiama queftsatoyebuambná; chca fséntsichamo ndayá tšëngaftanga oyejuayënga bëngbiama chašmotsemnana, chca, tšëngaftanga jojuama chašmobenama, chë uámana soyënga tmojtsebiamnángbioye ndayá entsanga canye entsábeñe tmojtsonÿacá y ndoñe chca chë entsabe ainaniñe tomna soyëngaca. <sup>13</sup> Er bënga mo chë ndoñe corente juabna ndbomnëngcá ftsamëse, ntšamo báseftanga mondbetsichamcá, jtsemnana Bëngbe Bëtsá jaserviama; y bënga corente juabna bomnëngcá ftsamëse, jtsemnana tšëngaftangbe tšabiama. <sup>14</sup> Bënga chca fsëndmëna, Cristo šondábabuanÿeshanayeca, y chë soye endama bënga nye cha fchaitseservénama, er bënga fsëndenojuabná y puerte tšabá fsëndëtatšëmbo, canÿa, Cristo, nyetscangbiama tojanóbanama; y cha nyetscangbiama tojanóbanayeca, endmëna mo cha tojanóbana ora, nyetscanga cháftaca cuafjobancá. <sup>15</sup> Y Cristo nyetscangbiama tojanóbana, chë quem luarentse vida bomnënga ndoñe más nye cachëngbiama chamondëtsiyenama, sinó chabiama, nda chëngbiama tojanóbana y



tojtanayena. <sup>16</sup> Chíyeca, bēnga ya ndoñe ndocnabiama queftsatsjuabná ntšamo entšanga quem luarentše jtsejuabnayama monduamancá; masque ndegombre bēnga chca Cristbiana fsēnjanjuabná, mora ya ndoñe chca chabiama queftsatsjuabná. <sup>17</sup> Chcasna, nderado nda Crísoftaca cánýiñe mo canýacá tojtsemna, Bēngbe Bētsá tojama cha mo canýe tsēm entšacá chaotsemnama. Ntšamo chē Crístbioye cabá nduabuátmana ora cha yojamncá, mora ya ndoñe quenátsmēna. Morna cha jtsejuabnayana y jtsamana inýe soyēnga y tsēm soyēnga.

<sup>18</sup> Bēngbe Bētsá endmēna nda chca inétsama, entšanga mo tsēm entšangcá jábiamama; y cha Crísoftaca tojama bēnga tempcá tšabá cháftaca chamotsatsmēnama. Y cha bēnga canýe trabajo šonjanabanyé, bēnga entšanga jábuayenama, Bēngbe Bētsá inétsama entšanga tempcá tšabá cháftaca chamotsatsmēnama, y entšanga jujabuáchama chca chamotsemnama. <sup>19</sup> O mēntšá, Cristo tojanma sóyeca Bēngbe Bētsá yojtsama entšanga chamotsobenama tempcá tšabá cháftaca jtsatsmēnama, y chca, chēnga chamotsobena chēngbe bacna soyēngama perdonánēnga jtsemnama, y chē soyēngama nyetsca tescama castigánēnga jtsemnama ndoñe chaondétsamnama. Y bēnga šonjanabanyé chē trabajo, entšanga jtsabuayinayama ntšamo Bēngbe Bētsá inama entšanga tempcá tšabá cháftaca chamotsatsmēnama. <sup>20</sup> Y chca, bēnga jtsemnana Cristbe cuenta oyebuambnayēnga y amēnga, mo cach Bēngbe Bētsá bēngaftaca cmojtsaimpadancá. Cristbe cuenta cbaimpadá, bētscá šmochtsentšena Bēngbe Bētsáftaca tempcá tšabá jtsatsmēnama. <sup>21</sup> Cristo ndocna bacna soye tonjanma, pero bēngbe bacna soyēnga jabuajuánamna, Bēngbe Bētsá cháftaca tojanma mo cha canýe bacna soyēnga amá cuaftsemncá, chca, bēnga Crísoftaca cánýiñe mo canýacá jtsemnēse, Bēngbe Bētsabe bominyiñe tšábēnga jtsemnama chamotsobenama.

## 6

<sup>1</sup> Chcáyeca, bēnga Bēngbe Bētsáftaca cánýiñe trabájayēnga quetsomñecana, cbontsaimpadana ndoñe nýe bonamente chašmondóyēngacñe chē Bēngbe Bētsá yojtsama soyēnga, tšēngaftangbiama tšabe juabna jtsebomnēse. <sup>2</sup> Er Bēngbe Bētsá chabe uabemana palabrenguiñe mēntšá tojánayana:

Chē tšabe soye jamama tšabá šonjaninyana ora, atše tcbonjanoyeuná;

chē ácbioye jatsbocama te, tcbonjanájabuache ca.

Šmochjinýe. Mora entsemna chē mocna ora Bēngbe Bētsá tšabá ibojtsinyana tšabe soye jamama; mora entsemna chē mocna ora Bēngbe Bētsá yojtseboše aca jatsbocama.

<sup>3</sup> Bēnga ndocna bacna soye queftsátama, ndayá chaoma entšanga chē tšabe noticiēnga chamotsábotema, chca, ndocná podescá chaondétsóyebuambnama bēngbe trabajuama, Cristbiana. <sup>4</sup> Inýetšá, bēngna nyetsca soyēnguiñe fsēnjaniyena mo Bēngbe Bētsabe oservenēngcá; Bēngbe Bētsábeñe obamancá puerte uantadēnga jtsemnēse, fstsufrina ora; puerte padecena soyēnguiñe bétsemna causa, ndayá jamama ndoñe fséntsetatšēmo ora; y ainaniñe puerte ngménaca fstsemna ora; <sup>5</sup> ínýēnga šojtsatsetšená ora; cárceloye šojautame ora; entšanga bēngbe contra tmojtsenbouénana ora; jabuache trabájayiñe puerte uamēntšnayēnga fstsemna ora; bayté ntsamanacá fstsemna ora; y jasama tondaye fséntsebmoma ora. <sup>6</sup> Bēngnaca fséntsinyáná Bēngbe Bētsabe oservenēnga fstsmēnama, puerte tšabe vídaca, ndocna bacna soye ntjamcá jtsiyenēse; Bēngbe Bētsabe soyēngama corente jtsetatšēmbēse; ínýēnga ntšamo šojáborlaye ora puerte uantadēnga jtsemnēse; ínýēngbioye puerte bonshanánaca jtsénýayēse; Uámana Espíritu bēngbe ainaniñe jtsebomnēse; y ndegombre nyets ainánaca nyetscanga jtsababuánýeshanēse; <sup>7</sup> ntšamo Bēngbe Bētsabiama ndegombre yomncá jtsabuayinayēse; Bēngbe Bētsabe obenánaca ba soyēnga jtsamēse; y mo chē soldadēngcá, uayayēnga jáyēnjanama y chēngbiama jenéuyanama soyēnga jtsebomnana, chē Satanásbioye jayénjanama y chabiama jenéuyanama ndayá Bēngbe Bētsá šojatšatacá jtsebomnēse; y Bēngbe Bētsá chca tojama, er cha tojama bēnga chabe bominyiñe tšábēnga chamotsemnama. <sup>8</sup> Bēnga

fsentsinjanýná Bëngbe Bëtsabe oservénënga fstsmënana, ínýenga bëngbiamana tsábe soyënga tmojtsejuabná ora y bënga nduámanënga jtsemnana chënga tmojtsama ora; ínýenga tsábe soyënga bëngbiamana tmojtsoyebuambná ora y chënga bëngbiamana podësca tmojtsichamo ora; bënga áingñayënga fstsmëna ca báseftanga tmojtsejuabná ora, pero bënga ntšamo ndegombre yomncá jtsóyebuambnayëse. <sup>9</sup> Mo nduamanëngcá bënga entsángbeñe jtsénýayana, pero banga corente tsábá bënga šondéubuatma; bëngbiamana sempre resjo endmëna jóbanama, pero šmochjinýe, bënga sempre vídaca chentšana jatóbocañana; bënga juatsjínýama jobenayama, Bëngbe Bëtsábeyeca castigánënga fchandbétsemna, pero nýa jóbanana ndoñe. <sup>10</sup> Masque ngménënga fstsemna, ainaniñe sempre oyejuayënga fchandbétsomñe; masque ndbomñëjemëngcá, pero fchandbét-sama banga Bëngbe Bëtsábiocana bëtscá chamotsebomnana; quem luarentša soyënga tondaye queftsátsbomna, pero Bëngbe Bëtsabe entsánga quetsomñecana, ndegombre lempe fsëndëtsóbmñe.

<sup>11</sup> Tsëngaftangbiamana, Corintoca entsánga, lempe fsénjayana, tondaye ntjaitëmcá; nyets ainánaca, corente cbondábabuanýeshana. <sup>12</sup> Bënga puerte cbondábabuanýeshana, pero tsëngaftangna ndoñe yapa quešcátatabuanýeshana. <sup>13</sup> Atše cbontsaimpadana, mo canýe taitá chabe básënga cuaftsaimpadancá, atše puerte chašmotsebobonshánama, er atše corente cbondábabuanýeshana.

*Bënga mondmëna mo Bëngbe Bëtsabe bëtš yebncá*

<sup>14</sup> Crístbeñe ndošbuáchiyëngaftaca ndoñe šmatjenutaná ndayánaca jamama, er chca, chëngaftaca šmatjábocana mo chë jaárama uacnata ndoñe cachénchechata tbontsemncá. Ndegombre, chë tsábe soyënga amá y Bëngbe Bëtsabe bominiñe tsábia mëná, nýa tondayama cachcá ntsejuabnayana, chë Bëngbe Bëtsá tojamandacá ndoñe tontsamacá y bacna soyënga amacá. Ndegombre, chë entsángbe juabna binýnayáftaca vida bomná, nýa tondaye ntsebomnana chë nýe mo ibetiñcá juabnayáftaca. <sup>15</sup> Cristo y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Crístbeñe ošbuachiyá y chábeñe ndošbuachiyáftaca. <sup>16</sup> Ndocna soyiñe cachcá ntsemnana, Bëngbe Bëtsabe bëtš yebna, chë nýe canýe Bëngbe Bëtsábioye jadórama yebna, y chë entsángbe pormana soyënga, mo diosënga cuaftsemncá jtsadoránana soyënga; chca endmëna, er bënga, nyetscanga cánýiñe Jesucrístbeñe ošbuachiyëngcá, mondmëna mo Bëngbe Bëtsá Ainabe bëtš yebncá, ntšamo Bëngbe Bëtsá chabe uabemana palabrënguñe chabe entsángbiamana tojanayancá:

Chéngbeñe vida chántsebomna y chéngbenache chántšana;  
atše chéngbe Bëtsá chántsemna  
y chéngna atšbe entsánga ca.

<sup>17</sup> Chíyeca mëntšánaca Bëngbe Utabná chabe entsánga tojanéyana:

“Chë bacna soye améngbentšana šmochjésebocana, y chéngbentšana šmochtsojuánañe; tondaye šmattsebana, ni šmattsama ndayá Bëngbe Bëtsabe entsángbiamana ndoñe tsábá tontsemncá.  
As cbochanjúbuaja,

<sup>18</sup> y chántsemna mo canýe taitacá tsëngaftangbiamana,  
y tsëngaftangna mo atšbe uaquiñënga y bembangcá.

Chca séntsihamo atše, tsëngaftangbe Utabná, nyets obenana bomná ca” —chiñe enduábemana.

7

<sup>1</sup> Chcasna, atšbe bonshánënga, chca endmëna ntšamo Bëngbe Bëtsá šojašebuachenacá. Chíyeca šontsamna, Bëngbe Bëtsabe delante nyetsca soyënguñe tsábënga jtsemnana, bëngbe cuerpama o espíritbiamana bacna soye ndoñe más ntsamcá; y Bëngbe Bëtsá nyetscangbiamana más uamaná yomna ca mondëjuabnáyeca, lempe ntšamo tmojobenacá mochtsiyena mo chabe entsángcá, nyetsca soyënguñe puerte tsábënga jtsemñëse.

*Ntšamo chë Corintoca entsanga juabna tmojanthroca*

<sup>2</sup> Bëngbiana šmochtsenójuabnaye tšëngaftangbe ainaniñe puerte bonshanánaca. Bënga ndocnabiama bacna soye chibiatsma, ndocnabiama chibiatsma más bacna entšá chaotsemnana, y ndocnábioye chibiatsingñé. <sup>3</sup> Atše chca ndoñe quetsátichamo, ndoñe tšabá šmonjama ca tšëngaftangbiana jayanama, er ntšamo ya tcbonjauyancá, atše tšëngaftangbiana sempre ainaniñe puerte bonshanánaca sëndbétsenojuabnaye; y chca, mo átšeftaca canýiñcá šmochántsemna, masque chayóbana o cabá vida chaitsóbomñëse. <sup>4</sup> Atše puerte tšabá sëndétatšëmbo, ntšamo tšabá yomncá šmochtsamama; y tšëngaftangbiana puerte oyejuayá séntsemna. Lempe ntšamo tsësufriñcá tsiyenama, atšbe ainaniñe bëts añemo sëndétsóbomñe y corente sëntsoyejuá.

<sup>5</sup> Macedonia luaroye fsënjánashjajna orscana, ndoñe luare queftsátsbomna jóchnama, sinó nyetsca soyënguiñe fsëndëpadecena: chë bëngbe buayenana soyama contra tmojtsemnéngaftaca jabuachana enatsëtsnayëse, y bëngbe ainaniñe jtsauatjëse. <sup>6</sup> Pero Bëngbe Bëtsá, chë yapa añemo ndbomnéngbioye endbetsañemuayá, tojanma bënga ainaniñe más añemo fchaitsebomnana, Tito moye tonjánashjango ora. <sup>7</sup> Y cha tonjánabo ora, bënga ndoñe más añemo quefstétsebomna nye cha tojánashjanguama, sinó tšëngaftanga šmojanájabuachama y ainaniñe añemo chaotsebomnana šmojanmama. Cha šonjanéyana tšëngaftanga tša šmojánboše bënga jányama ca, y šonjanacuntá ntšamo tšëngaftanga ngménaca šmojamna, atšbiana ndoñe tšabá šmonjanma causa, y ntšamo tšëngaftangbiana atšbe tšabiana puerte iuámanana; y quem chabe noticiéngaca, cabá más sëntsoyejuá.

<sup>8</sup> Er masque tšëngaftanga tša ngménaca šmojamna chë tcbonjanëbuábiana tsbuanáchama, mora ndoñe quetsatsjuabná más tšabá yojamna chca ndoñe jatëbuabiana ca; masque tempo atše chca sënjanjuabná, er atše séntsetatšëmbo chë tsbuanácha básefta tescama ngménënga tcmojánabiama, <sup>9</sup> mora atše puerte oyejuayá séntsemna, ndoñe tšëngaftanga ngménënga šmojamnama, ndayá chë šmojánbomna ngménana tojanmama tšëngaftanga chašmuenójuaboma ndoñe tšabá šmontsamama, y chca amana chašmotsajbanama, tšëngaftangbe juabnënga jatrócase. Chca enjamna, er tšëngaftanga ngménana šmojánbomna ntšamo Bëngbe Bëtsá inabošcá; chíyeca, bënga ndocna bacna soye tšëngaftangbiana chibiatsma. <sup>10</sup> Ntšamo Bëngbe Bëtsá tojtsebošcá ngménana bomnentsána, jóbocnana chë bacna soyënga tcojamama jenójuaboyana y juabnënga jatrócana; y juabna jatrócana entsábioye juanatsana atsbocaná chaotsemnana, y cha ndocna te ntjatsjuabnayana más tšabá yojamna ndoñe chca ntjatstrócana ca. Pero ntšamo chë nye quem luarama enójuabnaye entsanga mondbetsebomncá ngménana bomnentsána, ndoñe ntjóbocnana juabna jatrócana; chentšana jóbocnana nye nyetsca tescama castiganá jtsemnana, mo nyetsca tescama cuafjobancá. <sup>11</sup> Šmochjinýe ndayá tojóbocna, ntšamo Bëngbe Bëtsá inabošcá ngménana bomnentsána: tojanma chë šmojanma soyiñe puerte chašmuenójuaboma; y ntšamo jájandmanana bëtscá chašmonguanguama; tojanma tšëngaftanga chacmetonama chë bacna soye tojanmáftaca; y castigánënga jtsemnana jtsauatjámnaca. Chentšana, tšëngaftanga tša šmojtsanboše atše jinýama; y šmojtsanprontana lempe jamama chca bacna soye ndoñe más chaondétsemnana y chca tojanmábioye jacastígama. Nyetsca chë soyënguiñe tšëngaftanga šmonjinýanyé chca bacna soye ndoñe šmonjanmama; y chca, mora tondaye quenátsmëna tšëngaftanga castigo jtsebomnana chacmotsamnama. <sup>12</sup> Y chca, atše chë tsbuanácha tcbonjanëbuábiana ora, ndoñe checbátanëbuabiama chë puerte bacna soye tojanmábeyeca, ni chë bacna soye tojanoyëngacñábeyeca; ndayá tšëngaftanga, mo Bëngbe Bëtsabe delante cuaftsemnëngcá, chë šmojanma soyiñe bëtscá chašmuenójuaboma, y chca, cha chašminýanyé tšëngaftanga bëngbe tšabiana puerte šmenójuabnama. <sup>13</sup> Chíyeca bënga más añemo ainaniñe fsëntsebomna.

Pero ntsachetšá añemo fstsbonnana, masna puerte oyejuayënga fsëntsemna, er

bënga fsënjinye Tito tša oyejuayá, er chabe ainaniñe lempe natjémbana yojtsemna nyetsca tšëngaftangbiama. <sup>14</sup> Tito tšëngaftanga jányama cabá nda ora, atše cha sënjaniana tšëngaftanga šmochjanóyeunaye chë atše tčbonjanébuaja palabra ca; y tšëngaftanga ndoñe chešmatsma atše chaitsëuatjama chca tijánayanama. Inyetsá, lempe ntšamo tčbojauyancá ndegombre endmëna; cachcá, ntšamo bënga Títbioye fsënjaniyancá ndegombre entsemna, chë tšëngaftangbiama fstsóyejuama. <sup>15</sup> Y mora Tito más cmontsababuányeshana, ntšamo cha tcmojanamëndacá ndayá tšëngaftanga šmojanmama, y ntšamo puerte respétoca y mo uamaná cuaftsemncá chabiama jtsejuabnayëse šmojanofjama tojtenojuabó ora. <sup>16</sup> Atše puerte oyejuayá séntsemna, er atše sëndétatšëmbo tšëngaftanga ntšamo tšabá yomncá nyetsca soyënguiñe šmochtsamama.

## 8

### *Chënga jañémuayama, inye ošbuachiyëngbioye nyets ainánaca jujabuáchama*

<sup>1</sup> Y mora, Jesucristbeyeca catsátanga, bënga fséntseboše tšëngaftanga chašmotsetátšëmbo ntšamo Bëngbe Bëtsá bëtscá tšabe bendicionënga tojama Macedonia larentše ošbuachiyëngcá enefjuanëngbiama. <sup>2</sup> Chënga puerte tmojasufrí, y chora chca, chënga tmojinýanyé becá imošbuáchema y tša imoyejuama; y masque puerte ndbomnjémënga, chënga nyets ainánaca bëtscá tmojanacaredadó Jerusalenentša osbuáchiyënga ndbomnjémëngbiama. <sup>3</sup> Atše sëndétatšëmbo y séntsobena jayanama chënga ndegombre tmojatšatá ntšamo tmojobenacá, y ntsachetšá imobenentšana cabá más, chënga chca imobóšeyeca. <sup>4</sup> Tša šonjánaimpadana chëngbioye jálesenciamana ndayánaca jamama, Jerusalenoca ošbuachiyëngbioye jujabuáchama. <sup>5</sup> Bënga ftsjanobatmanama cabá más chënga tmonjanma; natsana, chënga Bëngbe Utabná tmojaniana lempe ntšamo cha tojtsebošcá chënga jamama imojtseboše ca, y chentšana bëngaftácnaca cachcá tmonjanma; y lempe enjamna ntšamo Bëngbe Bëtsá inabošcá. <sup>6</sup> Ndayá Macedonioca ošbuáchiyënga tmojanmama bënga añemo fsënjanóyëngacñeyeca, bënga Tito fsënjaimpadá chë tšabe trabajo chaopochocama, chë tšëngaftangbeñe crocénana játbanana, Jerusalenoca ošbuáchiyënga jujabuáchama, ndayá cha jamama tojanbojatšecá. <sup>7</sup> Y morna, ntšamo tšëngaftanga nyetsca soyënguiñe tša šmomncá — puerte ošbuáchiyënga, becá obenënga Bëngbe Bëtsabe soyëngama jóyebuambayama, puerte osertánënga Bëngbe Bëtsabe soyëngama, corente juabnayënga bëtscá jamama Cristo jaserviama y béngbioye corente ababuányeshanënga —cachcá, mórncaca bëtscá šmochjama quem trabajuiñe chë ošbuáchiyënga ndbomnjémëngbiama, tšëngaftangbe bonshánana jtsinýanyayëse.

<sup>8</sup> Chca ndoñe quecbatëtsëtná mo canye mandcá; atše séntseboše ndayá nye tšëngaftanga jáuyanana ntšamo ínýenga bëtscá tmojatrabajá chë ndbomnjémëngbiama, tšëngaftángnaca cachcá chašmotsamama; y chca, chašminýanyëma chë tšëngaftanga šmobomna bonshánana ndegombre bëtsemnama. <sup>9</sup> Er tšëngaftanga šmondétatšëmbo ntšamo Bëngbe Utabná Jesucristo puerte tšabe soyënga bëngbiama tojamama, béngbioye puerte jtsababuányeshanëse. Celoca, cha cabá quem luaroye ndabo ora, cha bëtscá inabomna; pero tšëngaftanga ababuányeshanayeca, mo canye puerte nduamanacá tojanóbema. Y mora, Cristo mo canye nduamanacá tojóbemayeca, Bëngbe Bëtsá puerte tšabe soyënga šojatšatá.

<sup>10</sup> Tšëngaftangbe tšabiama mëntšá cbabuayená, ntšamo quem soyiñe šmochjamama. Chë inye uata tšëngaftanga šmonjanbojatsé, ndoñe nye chë ndbomnjémëngbiama jacjayama, ndayá chca jamama jtsebošámnaca. <sup>11</sup> Morna, chë ndbomnjémëngbiama trabajo šmochjapochóca; chca, ntšamo tšëngaftanga becá šmonjanprontana y jujabuáchama tša šmonjanbošcá, mórncaca cachcá chašmomama chë trabajo japochócama, ntšamo šmojobenacá jacjayëse. <sup>12</sup> Er canye entšá, jatštayama ndegombre tojtsebošëse,

ndayá cha tojatsácá Bëngbe Bëtsábioye oyejuayá jabemana, ntšamo cha tojtsobencá, y ndoñe ntšamo cha ndoñe tontsobencá.

<sup>13</sup> Ndoñe quenátsmëna, tšëngaftanga puerte ujabótënga chašmoquedá, ínÿengbioye atšatnaye causa, chënga ndoñe yapa ujabótënga chamondétsemnama. <sup>14</sup> Atše séntsichamo ndayá nÿetscanga chamotsenajabuachana, chca tojtséjaboto ora ca. Mora, chë bëtscá šmobomnentšana šmontsobena chënga jujabuáchana, ndayá tojtsabuáshebencá jatšatayëse; y inÿe orna, chënga entsamna tšëngaftanga jujabuáchana chë cmojtsabuáshebena soyéngaca. Chca, nÿetscanga jóyëngacñana ndayá tojtséjaboto ora. <sup>15</sup> Ntšamo Bëngbe Bëtsabe uabemana palabrenguiñe endayancá:

Chë tša bomnábioye ndoñe chebatanójama;  
y chë nÿe batšá bomnábioye, ndoñe quebënjatanbuáshbena ca.

### *Tito y chabe enutënga*

<sup>16</sup> Bëngbe Bëtsá šcuatschuá, tšëngaftanga jtsanÿenama Tito ainaniñe juabnënga chaotsebomnama cha tojanmama, cachcá ntšamo bënga fsëndbomncá. <sup>17</sup> Er tšëngaftangbioye chaotsama bënga fsënjanimpadá ora, cha oyejuayá aíñe ca tonjánayana choye jama; y chabiamana puerte enduámama tšëngaftangbe tšabiana; chíyeca mora echanjá tšëngaftanga jányama, chca jamama cachá yobóseyeca.

<sup>18</sup> Títoftaca, canÿa Jesucristbeyeca bëngbe catšata fsëntsichamná; chabiamana puerte tšabá ošbuachiyëngcá enefjuanëngbenache mondoyebuambná, chabe trabajuama chë tšabe noticiënga abuayinyayama. <sup>19</sup> Y ndoñe nÿe chë soye, sinó quem luarentše ošbuachiyëngcá enefjuanënga cha tmonjuábuayana bëngaftaca Jerusalenoye jama, y jujabuáchama chë ndbomnjémëngbiama trabajuíñe; chë trabajo endmëna bonshánana jinÿanÿiyama; chca fséntsama, Bëngbe Utabná jtsatschuanayama y jinÿanÿiyama bënga chca jujabuáchama tša fstsbošama. <sup>20</sup> Títoftaca cha fsëntsichamná, chca, ndocná chaondétsichamo bënga ndoñe tšabá tifjama ca, ntšamo játbanama cmojtsamniñe, chë becá juabónana játbanama, ndbomnjémënga jujabuáchama; <sup>21</sup> er bënga fsëndama lempe ntšamo fstsobencá, ndoñe nÿe ntšamo Bëngbe Bëtsabe bominyiñe tšabá yomncá jamama, ndayá ntšamo entšangbe bominyiñe tšabá yomncánaca.

<sup>22</sup> Chátaftaca inÿa Jesucristbeyeca bëngbe catšátnaca fsëntsichamná; cha bënga ba soyiñe šonjinÿanÿé cha yojtseboše bëtscá jamama, Cristo jaserviama, y mora más, er cha puerte bëtscá entsejuabná tšëngaftanga puerte tšabá šmochjamama. <sup>23</sup> Y Titbiamna, cha quem trabajuíñe atšbe enutá endmëna, y atšcá tšëngaftangbiama endëtrabája; y chë ínÿata Jesucristbeyeca bëngbe catšatatbiamna, chata bontsemna quemuentša ošbuachiyëngcá enefjuanëngbe ichmónata, chëngbiama chabóyebuambama; y chë bontsama sóyecna, chata Crístbioye corente jtsatschuanayana. <sup>24</sup> Chíyeca, chëngbioca ošbuachiyëngcá enefjuanënga chca chamotsetatšëmbuama, chë ichmona boyabásengbioye šmochjinÿanÿiye tšëngaftanga ndegombre chënga šmojtsababuánÿeshanama, y bënga razón fstsebomnama tšëngaftangbiama oyejuayënga jtsemnama.

## 9

### *Chë inÿe ošbuachiyëngbiama crocénana játbanama*

<sup>1</sup> Chë Jerusalenoca Bëngbe Bëtsabe entšangbiama crocénana játbanamna ndoñe quenátsiyta tšëngaftangbioye jatëbuabiamnayama, <sup>2</sup> er atše ndegombre séntsetatšëmbo tšëngaftanga tša šmojtseboše chca jujabuáchama. Macedonioca entšanga puerte oyejuayá sempre sëndbëtsëtsësnaye, Acaya luaroquënga chë inÿe uatscana quem trabajuíñe jujabuáchama šmoprontánama; y chë jujabuáchama tšëngaftangbe bëtscá juabnënga tmojama banga quem luarentšënga bëtscá añemo chamotsebomnama, chëngnaca chë trabajo jamama. <sup>3</sup> Pero Jesucristbeyeca quem catšátanga séntsichamná, ntšamo bënga oyejuayënga tifjayancá tšëngaftanga chašmotsamama, chë tšëngaftanga

quem trabajuiñe bëtscá šmochjama ca; chca, ntšamo tijanayancá ndoñe nye bonamente chaondétsemnama, y ntšamo sënjanayancá tšëngaftanga chašmotseprontánama; <sup>4</sup> er nderado báseftanga Macedonioquënga átseftaca tmojá y choca ndëprontánënga tcmojánÿena chë ndbomnjémëngbiama ujabuáchenanaca, chë soye nanjama bënga fchaitšëuatjama, er ba soye fsënjayana bënga ndegombre fstsëtátšëmbo tšëngaftanga prontánënga šmochtsemna ca; y ndegombre, tšëngaftangbiama cabá más ouatjca nántsemna. <sup>5</sup> Chíyeca, tšabá šonjuínÿnana Jesucrístbeyeca quem catšátanga jáimpadana chënga atšbe natsana chamotsama tšëngaftanga jányama, y chacméjabuachama chë juabónana játbana, ndayá tšëngaftanga tempo šmonjanašebuachenacá. Chca, atše choca chajjáshjango ora, tšëngaftangbe juabónana chaotseprontana. Chca, tšëngaftanga šmochanjínÿanyiye ndbomnjémëngbiama šmojacjá, chca jamama tša šmobóšeyeca, y ndoñe nye batsatema jatšatayama y tšëngaftangbiama bëtscá jobuájuaama šmojtseboše.

<sup>6</sup> Quemuiñe šmochtsenójuabnaye: Nda nye batsá tojajé, cach batsá chentšana josháchiñana; y nda bëtscá tojajé, cach bëtscá chentšana josháchiñana. <sup>7</sup> Cada ona bontsemna jajájuana ntšamo chabe ainaniñe tojajuabocá; ndoñe ngménaca o nye ínÿenga chca jamama tmojtsemándayeca. Chca chaotsemna, er nda oyejuayá tojajajóbioye, Bëngbe Bëtsá jtsebobonshánana. <sup>8</sup> Bëngbe Bëtsá endobena jamana chábentšana nyetsca tšabe bendicionënga y bëtscá soyënga tšëngaftanga chašmotsebomnama; chca, ntšamo nyetsca soyënguiñe cmojtsëjabotcá sempre chašmotsóbomñama, y cabá más bëtscá chašmotsebomnama, nyetsca tšabe obrënguiñe ínÿenga chašméjabuachama. <sup>9</sup> Bëngbe Bëtsabe uabemana palabrënguiñe, mëntšá endayana chë bëtscá tojacjabiama: Cha nyets ainánaca ndbomnjémënga bëtscá jatšatayana;

y chë tšabe soyënga ntšamo cha tojtsamcá nyets tempo jëftsemnana.

<sup>10</sup> Bëngbe Bëtsá, nda endbama chaotsemna jénaye jájema y sananga jasama, cmochanjátšataye lempe ntšamo cmojtsëjabotcá, y echanjama, tšëngaftanga cabá más tšabe soyënga chašmotsamama. <sup>11</sup> Bëngbe Bëtsá echanjama tšëngaftanga nyetsca tšabe soyënga chašmotsebomnama, chca, tšëngaftanga nyets ainánaca puerte ínÿengbioye chašmatšatama, y bëngbeyeca, chë mochjójyëngacñënga Bëngbe Bëtsá chamotsatschuanama; <sup>12</sup> er chë ujabuáchenana Bëngbe Bëtsabe entšanga tcojatšatá ora, ndoñe nye ndayá tojtsëjabotcá jatšatayana, ndayá chënga Bëngbe Bëtsá chamotsatschuanámna jamana. <sup>13</sup> Chënga Bëngbe Bëtsá mochántatschuanaye, er chë ujabuáchenanaca chëngbioye jinÿanÿiyana, ntšamo Cristbe tšabe noticiënguiñe iuayancá tšëngaftanga šmobedecénama, y ntšamo tšëngaftanga tšabá jamëse, nyets ainánaca bëtscá soyënga chënga y nyetscanga šmojátšatama. <sup>14</sup> Y chënga tša mochántseboše tšëngaftanga jányama y tšëngaftangbiama Bëngbe Bëtsá mochántseimpadana, er cha bëtscá tšabe soyënga tšëngaftangbiama tojama. <sup>15</sup> Bëngbe Bëtsá šcuatschuá ndayá cha šojátšatama, canÿe puerte uámana soye, ndocná jobenayana tšabá jayanama ntšamo chë soye bëtsemnana!

## 10

### *Ntšamo Pablo tojánayana ínÿenga chabe contra imojtsichamo ora*

<sup>1</sup> Y mora, atše Pablo, cbochanjáimpada, tšëngaftangbioye puerte bonshanánaca jtsénÿayëse, y tšëngaftangbiama tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerte nduamaná tsnenóbema atše tšëngaftangaftaca stsemna ora, pero corente añemo bomná tsnenóbema jabuache soyënga jayanama tšëngaftangbentšana bënoca stsemna ora ca. <sup>2</sup> Tšëngaftanga cbontsaimpadana, tšëngaftanga jányama chajjá ora, atše ndoñe chašondétsemna puerte añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerte tšabá sëntsetatšëmbcá ndayá báseftangaftaca jamama šojtsotocana, chë ndëmuanÿenga imojtsejuabná, nye bënga tšabá jtsomñama juabnëngaca bënga ftsiyena ca. <sup>3</sup> Ndegombre bënga quem luarentše fsëndoyena, pero ndoñe queftsátspelia Cristbiama, ntšamo quem luarentša entšanga monduamancá; <sup>4</sup> er

chë ndaye sóyeca bënga Cristbe soyëngama fsëndépéla, ndoñe quenátsmëna mo chë ndaye sóyeca chë nÿe quem luarama enójuabnaye entsanga japéliama monduamancá, ntšamo nÿe chënga tšabá jtsomñama juabnënga yomncá. Inÿetšá, chë ndaye soyëngaca bënga fsëndépéla, Bëngbe Bëtsá jtsinÿanana puerte obenana bomna soyënga yomna ca; y endmëna chë Satanás tojtsemánda soyënga jayénjanama, puerte jabuache soyënga jayénjanama. Mo nda canÿe uayayábioye jtsepochochancá, chë Bëngbe Bëtsabe osertánana ndoñe yonduámana ca jinÿanÿiyama soyënga ichámëngbiama,<sup>5</sup> y Bëngbe Bëtsabe osertánana jtsabotema juabnënga bomnëngbiama, bënga fsëndama ntšamo chënga tmojtsichamcá tondaye chaondëtsámanama. Y chë japéliama fsëndbomna soyëngaca, bënga fsëndbëtsama chca juabnayana chamotsajbanama, y chamotsobena ntšamo Cristo yomandacá jtsamana.<sup>6</sup> Bënga fséntseprontana chë Cristbiama nduauenanënga jácastigama, lempe ntšamo Cristo cmojtsamëndacá tšëngaftanga chašmojtsama ora.

<sup>7</sup> Tšëngaftanga ndayánaca jtsonÿayana nÿe ntšamo tbojtsabinÿnécá. Nderado nda becá tojtsejuabná Cristbia yomna ca, cha bontsemna jtsejuabnayana béngnaca Crístbenga ftsmënama, ntšamo cha yomncá.<sup>8</sup> Er atše masque tša sëndbëtsoyebuambnaye chë Bëngbe Utabná šojatšatá mandama, chë ndáyeca bënga jamama tšëngaftanga puerte chašmotsošbuáchema y ainaniñe bëts añemo chašmotsebomnama, y ndoñe tšëngaftanga ntjapochócama, chama atše ndoñe quetsátëuatja.<sup>9</sup> Atše ndoñe quetsátsošboše tšëngaftanga chacmotsinÿana, tšëngaftanga jaútatjayama atše stseboše ca, ndayá atšbe tsbuanáchangañe tijuábemama.<sup>10</sup> Er báseftanga mëntšá atšbiama imojtsichamo: “Chabe tsbuanáchangañe cha šontsaménda bëtscá soyënga jamama, y tša obenacá cha jtsóyebuambnayana; pero cha béngaftaca tojtsemna ora, cha jtsóyebuambnayana mo canÿe ndocna obenana ndbomnacá, y ntšamo tojtsichamcá tondaye ntsámanana ca.”<sup>11</sup> Chca entsanga entsamna jtsetatšëmbuana, ntšamo bënga ftsichamcá, tsbuanachangá juíchmuase, tšëngaftangaftaca cabá ndoñe fséntsemna ora, tšëngaftangaftaca fchaitsemna órnaca, bënga chca fchjamama.

<sup>12</sup> Ndegombre bënga ndoñe tša añemo queftsátsbomna jayanama nÿetšá uámanënga ftsmëna ca, mo chë cachënga jtsenábotamnayana uamanëngcá. Chënga jtsejuabnayana y jtsichámuana tšábenga imomna ca, nÿe ntšamo cachëngbeñe ínÿenga imomnama jtsonÿayëse; y chca tmojtsama ora, chënga juabna ndbomnënga jtsemnana.<sup>13</sup> Bënga ndoñe yapa quifchatóyebuambaye cabëngbiama, chca, tša tšábenga bënga imomna ca jtsenábotamnayama; fchanjóyebuambaye ndayá chë bënga tifjama tšabe trabajuama, ndayá Bëngbe Bëtsá šojabanÿecá, y chíñnaca entsemna ntšamo tšëngaftangbeñe Corintoca tifjamcá.<sup>14</sup> Chíyeca, bënga ndoñe queftsatoyebuambná chë bënga ndoñe derecho fséntsebomnama, ntšamo ndegombre nántsemna bënga tempo tšëngaftangaftaca ndoñe mafsënjamnëse; er bënga chë natsanënga fsënjamna tšëngaftangbioye jama, Cristbiama tšabe noticiënga jábuayenama.<sup>15</sup> Y ndoñe quifchatóyebuambaye tša tšabá bëngbe trabajo yomna ca, chë ndayama ndoñe šontsamna chca jatichámuana, chë trabajo ndoñe bëngbe soye, sinó ínÿengbe soye yómnyayeca. Chamna, bënga fsëntsobátmana tšëngaftanga Crístbeñe más chašmotsošbuáchema, y chca chaojtsemna ora, bënga fchayobená ba luariñe entsanga jábuayenana, ntšamo tšëngaftangbeñe fsëntsamcá.<sup>16</sup> Chca, fsëntsobátmana bënga jobenayama tšabe noticiëngama jábuayenama, chë tšëngaftangbentšana más chcoye imoyena entsángbioye; chca, bënga ndoñe yapa quifchatóyebuambaye ínÿengbe trabajuama, Cristbe soyënga jábuayenama, mo chë soye bëngbe trabajo cuafjatsmëncá.

<sup>17</sup> Ntšamo Bëngbe Bëtsabe uabemana palabrënguiñe endayancá: “Nda tojtseboše jayanama cha canÿe uámana entsá yomna ca, más tšabá cha cháuyana Bëngbe Utabná puerte uamaná endmëna ca.”<sup>18</sup> Er Bëngbe Bëtsá jayanana canÿe entsá ndegombre tšabá tojama ca, ndoñe nÿe cachá tojtsenábotamnabiama, ndayá Bëngbe Bëtsá chca ndegombre tojama ca Bëngbe Bëtsá tojtsejuabnabiama.

## 11

*Pablo y chë ndoñe ndegombre ichmónënga*

<sup>1</sup> Malaye atše šmëntjëuánta, atše básefta soyënga mo canye opá tojtsoyebuambnacá stsichámëntscuana, cach atše stsenabotamná ora. Masque ntšámnaca šmochtsëuánta. <sup>2</sup> Bëngbe Bëtsábeyeca atše tša cbondábabuanyëshana y cbondányena, tšëngaftanga nye cha chašmotséstonama y ndoñe ínÿengbioye. Er atše Cristo sënjašbuachená tšëngaftanga sempre cha šmochtséstonama, y séntseboše, cha quem luaroye yochjésabo ora, chábioye tšëngaftanga júshejanguana, mo nye chábioye sempre ustonëngcá, ntšamo canye taitá chabe bembe ndocna boyabása nduabuatmá nye canye boyabásaftaca chaóbuamama jushjanguancá. <sup>3</sup> Mëtšcuaye Evábioye tbojaningñé, y cha tbojanínÿnana puerte osertanabe soyënga cuaftsatsëtsnacá, pero ndegombre ndoñe chca yonjamna. Atše sentsauatja nderado cachcá ínÿenga tšëngaftangaftaca muanjama y tšëngaftangbe juabna chašmotrocá, y chca, tšëngaftanga chašmotsajbaná sempre jtsejuabnayana nye Cristo nyetsca soyënguiñe jtseservénama. <sup>4</sup> Atše chama sentsauatja, er ndánaca jashjanguana y Jesusbiana tojtsabuayiyná, mo cha inÿe entšá cuaftsemncá, ndoñe ntšamo bënga Jesusbiana fsëndabuayiynacá, y tojtsama tšëngaftanga chašmobená canye espíritu jtsebomnana, pero ndoñe ntšamo chë Bëngbe Bëtsá tojama tšëngaftangbe ainaniñe cháumashënguama espiritcá, chë Uámana Espiritu, tšëngaftanga tšabá cha jtsëuántana. Y atše sentsauatja, tšëngaftangbe ainaniñe inÿe buayenana chašmóyëngacñama ndánaca tojtsamama, ndoñe cachcá chë tšabe noticiënga ntšamo ya béngbentšana šmonjouencá, y chora tšëngaftanga chábioye beca tšabá jtsëuántana. <sup>5</sup> Pero atše séntsejuabná tondayiñe más batšá uamaná tsmëna ca, chë Jesucristbe puerte uámana ichmónënga imomna ca juabnayëngbiana. <sup>6</sup> Atše ndoñe sënjuatsjinÿe ntšamo corente tšabá entšangaftaca jóyebuambayama; pero atše puerte tšabá sëndétatšëmbo ntšamo stsichámuama. Bënga puerte tšabá nyetsca soyënguiñe tšëngaftanga tcbonjanÿanjé, ndegombre chca osertánana ftsbomnana.

<sup>7</sup> ¿O atše ndoñe tšabá sënjama, tšabe noticiënga cbonjanabuayiyná ora, tšëngaftangbentšana atšbiana tondaye ntjotjañcá, nduamanacá jenóbemëse; chca, tšëngaftanga puerte uámanënga chašmotsemnana Bëngbe Bëtsá chaomama? <sup>8</sup> Mo ínÿenache osbuachiyëngcá enefjuanënga crocénana cuafjbaquécá, crocénana sënjanóyëngacñe chë ošbuachiyëngbentšana, tšëngaftanga jujabuáchama jobenayama. <sup>9</sup> Y tšëngaftangaftaca sënjamna ora y ndayánaca šojanájoboto ora, atše ndoñe checbátantjañe atšbe opresidama, chca, tšëngaftangbiana totcá ndoñe chaondëtsemnana; er chë Jesucristbeyeca catsátanga Macedoniocana tmonjánashjajnënga, šmonjanatšetá ntšamo šojanbuashbencá. Chca, atše sënjanma, atšbe causa tšëngaftangbiana totcá ndoñe chaondëtsemnana; y sempre chca chántsama. <sup>10</sup> Serto, Cristbe ndegombre soyënga atšbe ainaniñe séntsebomna; chíyeca, atše corente séntsetatšëmbo ndocná Acaya luarentše yochjama atše chayajbaná puerte oyejuayá jtsóyebuambnayama, chë tšabe noticiënga tsabuayiyná ora; y chca chanjama atšbe opresidama chašmoyema ínÿenga ntsamncá. <sup>11</sup> ¿Y ndáyeca chca stsama? ¿Yojtsemna ndoñe cbondábabuanyëshana causa? Ndoñe. Bëngbe Bëtsá endétatšëmbo tša cbondábabuanyëshanama.

<sup>12</sup> Pero atše sempre chántsama ntšamo sëndamcá, chca, chë ínÿenga, chë Jesucristbe puerte uámana ichmónënga imomna ca juabnayënga ndoñe chamondëtsebomna ndáyeca jatenábotamnayama, ntšamo bënga ftsamcá chënga imojtsetrabája ca. <sup>13</sup> Er chënga ndoñe quemátsmëna Jesucristbe ndegombre ichmónënga, mondmëna chë ínÿenga jáingñama imotrabájanga, y mondama entšanga chaotsinÿanama chënga mo Jesucristbe ndegombre ichmónënga cuaftsemncá. <sup>14</sup> Y chama ndoñe šmatjenjnaná, er cach Satanásnaca endbétsama mo canye buashinÿinÿana angelcá jtsinÿnana; <sup>15</sup> chíyeca, ndoñe muatjenjnaná, chabe oservenëngnaca tmojtsamama mo tšabe entšangcá jtsinÿnana. Pero chënga mochanjopochóca, ntšamo tmojtsomerecencá, ndayá tmojamama.



*Ntšamo Pablo tojansufrí, Cristbe ichmoná bétsemna causa*

<sup>16</sup> Cachiñe cbochtētēyana: ndocná chaondētsejuabná atše opá stsemna ca, cach atše stsenabotamná ora; pero chca šmojtsejuabnase, mo canye opabioycá šmochtsēuánta, chca, átšnaca jtsenábotamnayama jobenayama. <sup>17</sup> Chca jayanēse, ndoñe quenátsmēna ntšamo Bēngbe Utabná endbetsamcá, ndayá canye opá inetsamcá; atše tšabá jtsetatšēmbēse ndegombre stsebomna ndáyeca jobenayama jtsenábotamnayana. <sup>18</sup> Banga mondmená, cachēnga jtsenábotamnayana ndayá quem luarentše chēnga tmojamama, as átšnaca chantsenábotamnaye. <sup>19</sup> Tšēngaftanga chē tša osertánēnga, oyejuayēnga opéngbioye jtsēuantánana. <sup>20</sup> Atše sēndétatšēmbo tšēngaftanga chē opéngbioye šmetsēuantánama, er tšēngaftanga šmondbētsēuantana chē nyets tempo tšēngaftanga mo chēngbe oservenēngcá tcmojtsaméndayēnga, o chē tšēngaftanga bētscá tcmojtsabacanga, o tcmojtsaíngñanga, o chē uámanēnga tmojtisenobiamnanga tšēngaftanga mo nduamanēngcá jtsaméndayama, o chē tcmojtsajuebjantšetayēnga.

<sup>21</sup> Atše chca séntsichamo masque séntsēuatja chca jayanama. Bēnga fsēnjamna corente obenana ndbomnēnga, ntšamo tšēngaftanga bēngbiana šmojayancá, tšēngaftangaftaca chca jamama.

Inyēnga, chē tšēngaftangbeñe imotrabájanga, ndayama jtsenábotamnayama tmojtsebomnēse, puerte uámana ichmónēnga imomna ca jtsichámēse, átšnaca añemo séntsebomna chama jtsenábotamnayama; chca stjayana ora, mo canye opá tojtsoyebuambnacá sēntsoyebuambná. <sup>22</sup> Chēnga jtsenábotamnayana hebreunga imomnama. Atšnaca hebreo sēndmēna. Chēnga jtsenábotamnayana Israeloquēnga imomnama. Atšnaca Israelocá sēndmēna. Chēnga jtsenábotamnayana Abrahámbentšana entšanga imomnama. Atšnaca Abrahámbentšana entšá sēndmēna. <sup>23</sup> Chēnga jtsichámuana Cristo imoservena ca. Atše chēngbiana cabá más tšabe oservená sēndmēna. Chca stjayana ora, mo canye opá tojtsoyebuambnacá sēntsoyebuambná. Atše chēngbiana más tijatrabajá, más šmojutame, más šmojatsetšená y ba soye atšbiana resjo endmēna jóbana. <sup>24</sup> Shachna soye judiēnga šmonjantsetšená chē unga bnētsana y esconēfta soye jasachēnjēse, ntšamo chēnga jacastígana monduamancá. <sup>25</sup> Unga soye niñebēngaca šmonjanétsjanganja, y ndētšbēngaca canye šmonjanatēchénganja. Unga soye chē atše sēnjánenjaquena barco tontsanenatjēmba, y chca ora, canye šonjanotocá, chē mar bējayoca tsachocana bēnoca canye ibeta jēftsebobínynana y canye te jēftsejētanana. <sup>26</sup> Atše becá sēnjánana, y chca atšbiana resjo enjamna bēts fshajayēnguiñe y uacucuatšēnga chašmuebiatbēbama; resjo cach atšbe entšángbentše, judiēnga y ndoñe judiēngbentše; resjo bēts pueblēnguentše, entšanga ndoyentše y mar bējayoca. Atšbíamnaca resjo enjamna chē Jesucristbeyeca atšbiana catšátanga imomna ca jtsichámuana, pero ndegombre chca ndoñe mondmenēngbeñe. <sup>27</sup> Atše bētscá tijatrabajá empás uamēntšnayá joquédantscuana; ba soye tijachnēngo ibeta ntsamanacá y ba soye tijachnēngo shēntseca y uajuendayá; ba soye ndayá jasama ntsebomncá; tijasufrí sēsnama y tondaye entšayama.

<sup>28</sup> Quem soyēngama y inye ndoñe chiyátayana soyēngama más, atše cada te natjēmbana ainánaca ndoñe quesbatsmēna, er ndoñe quetsátstatšēmbo ntšamo nyetsca ošbuachiyēngcá enefjuanēnga imojtsiyenana. <sup>29</sup> Ndánaca tšabe soye jamama tondaye añemo tontsebomna ora, atše chabiana šochandbóngmia, mo átšnaca cach tondaye añémoca cuabndētsemncá. Nderado ínjenaga tmojama ndánaca bacna soyiñe chaótsatšama, atše ndegombre puerte ngménaca chandbētsesufrina. <sup>30</sup> Nderado nya tojátsiyta atše ndayama jatenábotamnayama, as chē atše tondaye obenana ndbomná tsmēnama ínjanynaye soyēngama chtsenábotamnaye. <sup>31</sup> Bēngbe Bētsá y Bēngbe Utabná Jesucristbe Taitá, ndábioye nyetscanga nyetsca tescama jtsatschuanayama entsamna, cha endétatšēmbo atše ndegombre stsihámua chē sēntsoyebuambná soyēnguiñe. <sup>32</sup> Atše Damasco bēts puebloca sēnjamna ora, chē rey Aretasbe uabuáyana mandado tojanmandá chē puebloye amashjuaniñe soldadēnga chamotsebojanýama, atše chašmishachama

chējana stsebocana ora; <sup>33</sup> pero básefta enutēnga, canye sbarēcuiñe šmontsanéstjango chē pueblentša shéconana tapiēšiñe canye atēfjnējana, y chca atše sēnjanobená chēngbe cucuatšentšana jótsbocana.

## 12

*Ndayá Pablo mo otjenayoquécá tojáninýe y ndayá Satanás tojanma, Pablo chaosufrima*

<sup>1</sup> Atše šontsemna más jtsenábotamnayana, masque chca tcojamentšana ndocna tšabe soye ntjóbcnana. Mora chanjóyebuambaye, chē mo otjenayoquécá sēnjinye Bēngbe Bētsabe soyēngama y Bēngbe Utabná šojinýinýe soyēngama. <sup>2</sup> Atše canye entšá sēnduábuatma, cha Crísoftaca cánýiñe mo canýacá endmēna y nda bnétsana canta uata entsemna, Bēngbe Bētsá tbojanánatse, chē celoca más tsbanánoye, Bēngbe Bētsá yomnoye. Atše ndoñe quetsátstatšēmbó Bēngbe Bētsá cha tbojanánatse chabe cuérpoca o nýe chabe espiritiñe. ¡Nýe Bēngbe Bētsá chama yotátšēmbó! <sup>3-4</sup> Atše sēndétatšēmbó Bēngbe Bētsá chē entšábioye celoye tbojanánatsama, nýetscanga oyejuayēnga imomnoye (atše ndoñe quetsátstatšēmbó Bēngbe Bētsá tbojanánatse chabe cuérpoca o nýe chabe espiritiñe; nýe Bēngbe Bētsá chama yotátšēmbó), y chentše cha tojanuena palabrēnga, ndocná bontsemna jayanama palabrēnga, chē ndayama entšangbiama ndoñe yontselesenciana jatichámuana. <sup>5</sup> Atše chē entšá sēndmēna. Canye entšá ndáftaca chca tojopasabiama, tšabá nántsemna chama jtsenábotamnayana; pero cach atšbiama jtsenábotamnayana ndoñe tšabá ntsemnana, ndayá nýe chē atše mo obenana ndbomnacá tsmēnama inýinýnaye soyēngama chantsenábotamnaye. <sup>6</sup> Y nderado jtsenábotamnayama atše stseboše, chca ora atše ndoñe stsama mo canye opá tojtsoyebuambnacá, er ntšamo ndegombre yomncá atše stsihamo. Pero chca ndoñe quetsátama, chca, ndocná chaondětsejuabná ntšamo atšbiama tbojtsinýanama o ntšamo atšbiama cha tojouenama atše más tsmēna ca. <sup>7</sup> Chíyeca, tša uamaná tsjamna ca atše ntjátsjuabnayama, atše chē Bēngbe Bētsá tša bēts soyēnga tbojaninýinýe entšá bétsemnayeca, Bēngbe Bētsá tojanma atše chaitsebomna ndáyeca puerte chaisufrima, mo canye bēts uchmašēfja atšbe cuerpiñe tojtsashacuancá, mo Satanasbe ichmona soycá, atše chaisufrima chaomama. <sup>8</sup> Unga soye Bēngbe Utabná sēnjaimpadá chca sufrínana chašotsebojuánama; <sup>9</sup> pero Bēngbe Utabná šonjauyana: “Nýe atšbe bonshánana endmēna lempe ntšamo cmojtsajabotcá; nýetscanga atšbe obenana más tšabá jinýana, chē obenana ndbomna entšángbeñe atšbe obenana stjínýanýiye ora ca.” Chcasna, atše puerte oyejuayá chanjóyebuambaye chē atše mo obenana ndbomnacá tsmēnama inýinýnaye soyēngama, Cristbe obenana átšbeñe sempre chaotsomñama. <sup>10</sup> Chíyeca, Cristo jaserviama, oyejuayá chandbétsemna atše mo obenana ndbomnacá stsemna ora, ínýenga šmojtsoyenguá ora, puerte padecena soyēnga causa ndayá jamama ndoñe séntsetatšēmbó ora, atše puerte chaisufrima ínýenga tmojtsama ora y puerte tšetšena ainánaca stsemna ora; er chca soyēnguiñe stsemna ora, mo canya obenana ndbomnacá, chora Bēngbe Bētsá jamana atše ainaniñe bēts añemo chaitsebomnama.

*Nderado ndayá Corintoca ošbuáchiyēnga muanjamama Pablo yojánauatja*

<sup>11</sup> Atše chca chē soyēngama séntsenabotamná ora sēnjoyebuambá mo canye opá tojtsoyebuambnacá, pero ndegombre tšēngaftanga šmonjama atše chca chaimama. Er tšēngaftanga šmondmēna ndēmuanýenga yojtsamna atšbiama puerte tšabá jtsichámuana, atše chca jtsenábotamnayama ndoñe chašondětsemnama. Ndegombre, atše tondayiñe más batšá uamaná quetsátsmēna, chē Jesucristbe puerte uámana ichmónēnga imomna ca juabnayēngbiama, masque atše šontsebiona mo atše tondaye cuaftsamancá. <sup>12</sup> Canya Jesucristbe ndegombre ichmoná bétsemnama inýinýnaye soyēnga, tšēngaftangbeñe tonjanopasá atše choca sēnjamna ora. Chca, chē Bēngbe Bētsabe obenana inýinýnaye soyēnga y chē tšabe soyēnga ntšamo chora tonjanopasacá, puerte tšabá jtsinýanýnayana

atše canye ndegombre ichmoná tsmënama; y atše chca sënjanma, padecena soyënguini puerte uantado jtsemnëse. <sup>13</sup> ¿Ndayá tšëngaftanga ndoñe cachcá šmonjanóyëngacñe chë inye luarenache ošbuachiyëngcá enefjuanëngbiama? Canye soye aínë, er tšëngaftangbioye tondaye ntjotjañcá, atše ndoñe chiyatslesenciá tšëngaftanga atšbe opresidama chašmuájabuachama, ntšamo inye ošbuáchiyënga aínë sënjalesenciácá. Šmochtseperdóna chca bacna soye tšëngaftangbiama tijamama.

<sup>14</sup> Atše ya sëntseprontana, móracna unga soyama jama tšëngaftanga jányama, y mora atše cach ndoñe quebochataimpáda atšbe opresidama chašmuatájabuachama. Atše ndoñe quetsátsboše chë tšëngaftanga šmobomna soye jatsbomnana, ndayá puerte sëntseboše tšëngaftanga Cristo sempre chašmotseservénama. Atše chca jamama sëntseboše, er atše tšëngaftangbiama mo canye taitacá, Crístbeñe šmonsanošbuachéyeca, atše chabiama tcbonjanabuayená ora; sëntsejuabná chë taitanga inétsamna crocénana jájuabana básenga jtsanýenama, y ndoñe básenga chë taitangbiama. <sup>15</sup> Y atše corente oyejuayá lempe ntšamo tsbomncá chanjátšataye, y atše jopochócantscuanënaca, tšëngaftangbe tšabiama. Atše cada te más cbojtsababuánýeshanëse, ¿tšëngaftanga más batšá atše šmochtsebobonshana?

<sup>16</sup> Ndoñe; tšëngaftanga tšabá šmondétatšëmbo, atše uajabotá sënjamna ora, atše tondaye tcbonjanótjañama. Masque chca, báseftanga imojtsichamo ntšamo ínýenga ndayíñnaca jáingñama atše tstátšëmbo ca, chéngbentšana crocénana josháchiñama; y atše catijama, ínýenga jáingñase, nýe ntšamo atše tsbošcá chamotsamama ca. <sup>17</sup> ¿Onderado atše tcbójaingñé, canya chë tšëngaftangbioye sënjichamó chentšáftaca? <sup>18</sup> Tito sënjanimpadá tšëngaftanga jányama chaotsama, y cháftaca sënjanichmó chë inya bëngcá Crístbeyeca bëngbe catšata. ¿Nderado Tito tcmojaingñé? ¿Ndoñe ndegombre yondmëna, Tito y atše cachcá fstsjuabná y fstsboše y cachca soyënga jtsamëse ftsiyena? Ndegombre chca endmëna.

<sup>19</sup> Nderado tšëngaftanga šmojatsjuabná bënga jenéuyanama chca cbojtsëtsëtsná ca; pero ndoñe chca quenátsmëna. Inýetšá, bënga Crístoftaca cánýiñe mo canýacá entšangcá, Bëngbe Bëtsabe delante fsëntsoyebuambná, y lempe ntšamo tijayancá, Jesucrístbeyeca atšbe bonshana catsátanga, tšëngaftangbe tšabiama tijayana, Crístbeñe corente chašmotsošbuáchema y ainaniñe bëts añemo chašmotsebomnana. <sup>20</sup> Er atše sëntsauatja, atše jányama chajjá ora, ndoñe chacbondányena ntšamo tsbošcá, y tšëngaftanga atše ndoñe chašmondínýena ntšamo šmojtsebošcá. Sëntsauatja nderado bacna soyënga šmattsama: jtsenpenzentserana, ínýengaftaca yapa jtsenántšabošana, ndayánaca rábiaca jtsamana, nýe tšëngaftangbiama tšabe soyënga jtsebomnana jtsebošana, ínýengbiama podesca ichámuana, uayátsenayënga jtsemnana, ínýengbiama cachënga más uámanënga jtsenobiamnayana, y nýetscanga ndoñe cachcá ntsejuabnayana. Chca chacbojánýenëse, tšëngaftanga ndoñe quešmochátsbošena jóyëngacñana ntšamo tšëngaftanga jucácanama atše šochtsemncá. <sup>21</sup> Atše sëntsauatja, cachiñe jányama chajjá ora, atšbe Bëtsá chaoma atše chaitsëuatja chca šmojtsamama, y chašotsemna puerte ngménaca jošachnama ba tšëngaftangbiama, ndëmuanýënga ya bayté bacna soyënga imojtsama y chca juabnayana ndoñe tmonjatrocá, y ndoñe tmonjajbaná chë bacna soyënga boyabása o shembásaftaca jtsamama juabnayana, y chca soyënga jtsamana y nýetsca bacna soyënga jtsamana, jenomándama ntsobencá.

## 13

### *Inye soyëngama jábuayenama y jádiošoftama*

<sup>1</sup> Móraca ya unga soyama tšëngaftanga jányama chanjá. Atše chajjáshjango ora, tojtseytëse chanjayana ntšamo báseftanga tmojamcá tšabá o ndoñe tšabá bëtsemnana. Nda bacna soye ntšamo Moisesbe leyíñe endëmandancá tojama ora, atše chanjayana cha ndoñe tšabá tonjama ca; pero útata o únganga tmojtsemnëse, chënga chamuayanama cha ndegombre chca tojamama. <sup>2</sup> Atše tempo sënjanabuayená, chë

tšëngaftanguentsënga bacna soye tmojánamënga y chë ínÿenga, atšë šojtsanmëna jácastigana, chca soyënga amana ndoñe tmonjáibananga. Mora, tšëngaftangbentsana bënoca séntsemna ora, cachiñe cachcá cbëtëtabuayená, ntšamo sënjanamcá chë tšëngaftangaftaca uta soyama sënjamna ora: atšë cachiñe jányama chajjase, ndoñe quichatsleséncia bacna soyënga chašmotsamama y chama ntjacastigacá jatabáshejuanana. <sup>3</sup> Atšë chca chanjama, er tšëngaftanga šmontsenguá ndayánaca tšabá chacminÿanyëma Cristo atšbiajana yoyebuambnama. Cristo ndoñe quenátsmëna mo canÿa obenana ndbomnacá, ntšamo tšëngaftangaftaca cha tojamama; ndayá chabe bëts obenana tšëngaftangbeñe bëtscá jtsinÿanyayana. <sup>4</sup> Er cha tmojancrucificá mo canÿa obenana ndbomnacá; pero mora, Bëngbe Bëtsá puerte obená betsómñeyeca, cha tojtayena. Cachcá béngnaca, cháftaca cánÿiñe mo canÿacá jtsemnëse, mo obenana ndbomnëngcá jtsemnana; pero cháftaca mochantsiyena, Bëngbe Bëtsá puerte obená betsómñeyeca, tšëngaftanga jtsaservénama.

<sup>5</sup> Tšëngaftanga cada ona šmochjshénojuaboye, tšabá jtsetatšëmbuama mocna entsanga bëtsemnana, jtsetatšëmbuama aiñe o ndoñe sempre Crístbeñe puerte tašmuetsošbuáchema. Šmochjshénojuaboye chca šmošbuáchema ntšamo šmojtsemnama y tšabá ínÿenga šmochjínÿanyiyë. ¿Ndoñe šmondétatšëmbo Jesucristo tšëngaftangbe ainaniñe yoyenama? Ndoñesna, tšëngaftanga ndegombre ndoñe Crístbeñe ošbuáchiyënga šmontsemna. <sup>6</sup> Pero atšë séntsobátmana tšëngaftanga ndegombre chašmotsejuabnama bënga Jesucristbe ndegombre ichmónënga ftsmënama. <sup>7</sup> Y Bëngbe Bëtsá fséntseimpadana bacna soye ndoñe chašmondétsamama, ndoñe chë Jesucristbe ndegombre ichmónënga ftsmënama tšëngaftanga jinÿanyiyama, ndayá ntšamo tšabá yomncá chašmotsamama. Nÿetscanga chca tmojtsamëse, nántsinÿna mo Cristbe ndegombre ichmónënga bënga ndoñe cuabndmëncá, er chca ndoñe tašuatátëjapoto jinÿanyiyana ntšamo bënga bëngbe mándoca ftsmënama mo ichmonëngcá, tšëngaftanga jábuayenama. Pero chë soye tondayana šattsentšamna, <sup>8</sup> er bënga queftsátobena tondaye jamana Bëngbe Bëtsabe ndegombre soyëngama contra; nÿe ntšamo chabe ndegombre soyënga yomncá aiñe. <sup>9</sup> Bënga fséntseboše ntšamo tšabá yomncá tšëngaftanga chašmotsamama, er bënga oyejuayënga fchandbëtsemna, bënga mo chë obenana ndbomnëngcá ftssemna ora, bëngbe mando jácastigama ntjatinÿanyaycá, y tšëngaftanga ainaniñe bëts añémoca šmojtsemna ora y puerte tšabá šmojtsemnománda ora. Bënga Bëngbe Bëtsá fchandbëtseimpadana, chca bacna soyënga amana jtsajbanase, chašmobená jtsemnana nÿetsca soyënguiñe tšábënga, y lempe ntšamo tšëngaftanga chašmotsemnama Bëngbe Bëtsá yobošcá. <sup>10</sup> Quem tsbuanácha cbontsëbuabiamná tšëngaftangaftaca cabá ndoñe séntsemna ora; chca, atšë choye chajjá ora ndoñe chašondétsemna jabuache jucácanana, mo canÿa puerte mandayacá, ntšamo Bëngbe Utabná šojanbemcá, tšëngaftanga jujabuáchama chábeñe corente chašmotsošbuáchema y ainaniñe bëts añemo chašmotsebomnama, y ndoñe tšëngaftanga jatapochócama.

<sup>11</sup> Morna, Jesucristbeyeca atšbe catšátanga, tšabá chašmotsomñe, šmochtsajbaná chca bacna soyënga amana y šmochtsemna lempe ntšamo Bëngbe Bëtsá yobošcá. Šmochjouena ntšamo tcbonjabuayenacá, nÿetscanga cachcá šmochtsejuabnaye, nÿetscángaftaca natjémbana šmochtsiyena, y Bëngbe Bëtsá, chë cmondababuanÿeshaná y tšëngaftangbe ainaniñe tšabe ebionana chašmotsebomnama endamá, tšëngaftangaftaca echántsemna. <sup>12</sup> Nÿetscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamillanga puerte bonshánanaca šmondbet-sacheuanaycá. <sup>13</sup> Nÿetsca quem luaroca ošbuáchiyënga cmontsacheuaná.

<sup>14</sup> Atšë, Bëngbe Bëtsá séntseimpadana, Bëngbe Utabná Jesucristo chaoma, nÿetsca tšëngaftangbeñe tšabe bendicionënga chaotsemnama. Bëngbe Bëtsabe bonshánana sempre chašmotsóbomñe, y Uámama Espíritu sempre chašmotsóbomñe, y chë Uámama Espíritoftaca cánÿiñe mo canÿacá chašmotsomñe.

## Gálatas

### *Pablo Galacia luaroca ošbuáchiyënga jacheuayama*

<sup>1-2</sup> Atše Pablo, quem tsbuanácha sentsabiamná Jesucristbeñe ošbuáchiyëngbiamá, chë Galacia luaroca ošbuáchiyëngcá enefjuanëngbiamá. Jesucristo y Bëngbe Bëtsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Bëngbe Bëtsá ndocna entšá tbonjanichmó atše chatbe ichmonacá jabuábuayanama. Atše y chë ínÿenga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná. <sup>3</sup> Atše séntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebmnama. <sup>4</sup> Cristo chabe derecho vida jtsobomñama cachcá tojanonÿá y tojanóbana, bëngbe bacna soyënguentšana játsebacama, y bënga chamotsobena jtsiyenama ndoñe ntšamo quem tempo entšanga imoyencá, puerte bacna soyënga imojtsama ora. Cristo tojanóbana ora, tojanma ntšamo Bëngbe Bëtsá, Bëngbe Taitá endmëná yojanbošcá. <sup>5</sup> Nÿetscanga nÿetsca tescama Bëngbe Bëtsá chamotsatschuaná. Chca chaotsemna.

### *Nÿe canÿe ndegombre buayenana soyënga Cristbiamá endmëna*

<sup>6</sup> Atšbe ainanoca inÿetšá šontsebiona, er nda nanjouena, tšëngaftanga nÿe baseftayshinÿe y ya juabna šmojatstrocá y Bëngbe Bëtsá stëtšoye šmojtsequedá, nda tšëngaftanga tcmojáchembo chabe entšanga chašmotsemnama. Cha chca tojanma Crístbeyeca, er mua puerte tšabia tšëngaftangaftaca enjamna. Tšëngaftanga Bëngbe Bëtsá stëtšoye šmojtsequedá, ínÿengbe buayenana soye jouenama, y chë ínÿenga jtsichámuana chë buayenana soyënga chë tšabe noticiënga canmëna ca. <sup>7</sup> Ndegombre, ndoñe quenátsmëna inÿe ndegombre buayenánana. Ntšamo entsopasancá mëntšá entsemna: báseftanga montsama tšëngaftanga ndoñe natjémbana ainánaca chašmotsiyenama, y becá montsama chë Cristbiamá tšabe noticiënguentše, ba ndegombre soyënga jtsejuánama, inÿe soyënga jacjayama. <sup>8</sup> Nderado bënga o canÿe celoca ángel soyënga cmojtsabuayiyná, y ndoñe tontsemna mo chë tšabe noticiënga bënga tempo tcbonjanabuayenacá, as chë chca tojtsamabiamá ¡Bëngbe Bëtsá chaoma infiernoca becá chaosufrima! <sup>9</sup> Tempo ya chca sënjánayana; mora cachiñe šcutétayana: Nderado nda soyënga cmojtsabuayiyná, y ndoñe tontsemna mo chë tšabe noticiënga, ntšamo tempo šmonjanoyëngacñëcá, ¡Bëngbe Bëtsá chabiamá chaoma infiernoca puerte chaosufrima!

<sup>10</sup> Atše chca stjayana ora, ¿tšëngaftanga cmojtsinÿana atše soyënga stsama entšanga oyejuayënga átšeftaca chamotsemnama? Ndoñe chca quenátsmëna. Atše séndboše ndayá Bëngbe Bëtsá átšeftaca oyejuayá chaotsemnama. Entšanga oyejuayënga chamotsemnama, atše cabá soyënga stsamëse, atše ya ndoñe Cristbe canÿe oservená stsemna.

### *Ntšamo Bëngbe Bëtsá Páblëbioye tbojanchembo, Jesucristbe ichmoná jtsemnama*

<sup>11</sup> Atše séntseboše tšëngaftanga, Jesucristbeyeca atšbe catšátanga, chašmotsetátšëmbo chë tšabe noticiënga ntšamo sëndabuayiynacá quem luarentša entšangbe juabnentšana ndoñe yondóbocanama. <sup>12</sup> Ndocna entšá chë tšabe noticiënga chešnátanabuayená, ni chešnátanbuatëmbá, ndayá cach Jesucristo šonjaninÿinÿé.

<sup>13</sup> Tšëngaftanga šmojátatšëmbona ntšamo atše tempo tsjanamana jtsiyenana, ntšamo judiënga Bëngbe Bëtsá mondadorancá atše cha sënjanadorana ora, ntšamo atše becá tsjánamama chë ošbuáchiyëngcá enefjuanënga puerte chamosufrima, y ntšamo atše becá tsjánamama ndocná Jesucristbeñe chaondëtsošbuáchema. <sup>14</sup> Atše inÿe judiënga cach atšcá uata bomnëngbiamá más sënjánama Bëngbe Bëtsá adórayiñe, ntšamo judiënga cha jadórama monduamancá, y atše nÿets añémoca tša sënjantšena jtsamama ntšamo

bëngbe bëts taitanga básenga jabuátambama monjanamancá. <sup>15</sup> Pero Bëngbe Bëtsá atšbe tšabíama yojanjuabná, y chíyeca, atše cabá ndonýna ora, canýe bëts soyama cha šojanbocacá. <sup>16</sup> Y cha tojánbošena ora, šonjaninýinýé ntšamo ndegombre chabe Uaquiñá yomnana, y šonjanchembo. Cha chca tojanma, atše chë tšabe noticiënga ndoñe judiëngbeñe chayábuayenama. Y atše ndocnábíoye chiyataná ndayá jamama šojtsanmënema chašobuayenama; <sup>17</sup> y Jerusalenoye cach ndoñe chiyataná chë atšbíama más natsana Jesucristbe ichmónënga imojamnëngaftaca jencuëntama. Chamna, cachora Arabia uabaina luaroye séntsanoñe, y chentšana Damasco bëts puebloye séntaná.

<sup>18</sup> Jesucristbeñe jtsošbuáchiyama sënjanóntša orscana, unga uatëse Jerusalenoye sënjána Pédroftaca jencuëntama, y cháftaca nýe uta semana sënjëftsemna. <sup>19</sup> Y ndocna chë Jesucristbe inýe ichmónënga chiyáisananye; nýe Santiago aíñe, Bëngbe Utabnabe catšata. <sup>20</sup> Bëngbe Bëtsá šontsonýá, ntšamo tšëngaftanga cbontsëtsëtsnacá ndegombre bëtsemnama.

<sup>21</sup> Jerusalenocana sënjëftsanbocnentšana, Siria y Cilicia luarëngoye sënjána. <sup>22</sup> Pero chë tempo, chë Jesucristbeñe ošbuáchiyënga Judea luariñe bomínýeca ndoñe quešmën-jatanábuatma. <sup>23</sup> Nýe ínýengbíoye imojtsayaunana: “Nda tempo bënga puerte chamot-sesufrínama enjanamá, mora entšanga entsabuayinýá, Jesucristbeñe jtsošbuáchiyama caojtsamna ca. Y tempo cha tša enjánboše jamama entšanga Jesucristbeñe ndoñe chamondëtsošbuáchema ca” —chënga imojtsichamo. <sup>24</sup> Y entšanga Bëngbe Bëtsá imojtsatschuanaye, ndayá cha atšbíajana tojanmama.

## 2

### *Chë inýe ichmónënga tmojánayana Pablo aíñe tšabá yojtsama ca*

<sup>1</sup> Jerusalenoye sënjána orscana bnétsana canta uatëse, cachiñe choye sënjesaná. Bernabé šonjantjëmbambá, y Tito bëndátaftaca fsënjëftsanbetše. <sup>2</sup> Choye sënjána, choye jama šojamnama Bëngbe Bëtsá šonjaninýanýeyeca. Atše nýe chë Jesucristbeñe ošbuáchiyëngbíama uámanënga imojamnëngaftaca sënjanencuentá, ínýengaftaca ndoñe; y chë tšabe noticiëngama chë ndoñe judiëngbeñe sëndabuayinýama chënga sënjanacuntá. Chca sënjanma atše jtsetatšëmbuama, ntšamo tijanma y sënjëftsamcá ndoñe nýe bonamente yonjamnama. <sup>3</sup> Pero chënga tmonjánayana atše aíñe tšabá tijanma ca, y Tito, chë átšeftaca enjamná, masque Grecia luarocá enjamna, chënga ndoñe chematanmandá base bobachtema chë más delicadentše tëtšená chaotsemnama, ntšamo judiënga monduamancá, Bëngbe Bëtsábënga imomnama chaotsinýnama. <sup>4</sup> Chca tonjanopasá, masque ínýënga monjánboše Tito base bobachtema chë más delicadentše tëtšená chaotsemnama. Chënga tmonjánayana bëngcá Jesucristbeñe ošbuáchiyënga imojamna ca, pero ndoñe chca quemënjatsmëna. Chënga chë Jesucristbeñe ošbuáchiyëngaftaca tmojanenutaná, ndayá yojtsanopasánama chë ošbuáchiyënga ntsetatšëmbcá, mo chë ošbuáchiyëngbíama bacna soyënga jamama cuafseitëmena cuenta. Chënga tmojánabo jtsetatšëmbuama ntšamo Jesucristo bënga atsebácanënga šojánabiamama, chë judiëngbe leyëngaca ndëmandánënga, cháftaca cánýiñe mo canýacá jtsemnëse. Chënga chca tmojanma, er chënga imojtsanboše jamana, bënga chë judiëngbe leyëngaca nýets tempo mandánënga chamotsiyenama. <sup>5</sup> Pero bënga ndocna ora fchiyátanayana aíñe ca chë ntšamo chënga monjánichamo bënga šojánamna jamama soyëngama, er bënga becá fsënjánboše tšëngaftanga nýets tempo Jesucristbe ndegombre tšabe noticiënga chašmotsóbomñama.

<sup>6</sup> Pero chë ndëmuanýengbíama entšanga monjánichamo chë uánatsanënga imojamna ca (ndayá chënga tempo imojamna atšbíama ndoñe quenatámana; Bëngbe Bëtsabíama nýetscanga cachcá monduámana), chëngna tondaye chešmatanbuayená, ntšamo tempo tijanmama inýetsá chaimama. <sup>7</sup> Masha, chënga tmonjántatšëmbona, Bëngbe Bëtsá chë tšabe noticiënga ndoñe judiënga jábuayenama trabajo atše jamama šojanëntšabuáchema, ntšamo judiënga jábuayenama cachcá Pédrëbíoye

tbojanéntšabuachecá. <sup>8</sup> Er Bëngbe Bëtsá atše chabe ichmoná šonjánbema, ndoñe judiënga chabiamá jábuayenama, ntšamo cachá Pédrëbioye chabe ichmoná tbojanbemcá, judiënga chabiamá jábuayenama.

<sup>9</sup> Santiago, Pedro y Juan, chë ošbuachiyënguentša uánatsanënga, atše canye bëts trabajo chaitsebomnama Bëngbe Bëtsá tojanmama tmonjántatšëmbona ora, cucuatše šontanatšataye atše y Bernabëbioye, jinjinyiyama chënga šojanébuajama mo cachëngbe trabajo amatcá. Y fsënjanenoyeuná bëndata jama, masna ndoñe judiënga jtsabuayiyayama trabajo jamama, y chëngna judiëngbeñe. <sup>10</sup> Chënga nye šonjanaimpádaye chë ošbuáchiyënga ndbomnjëmënga Jerusalenoquëngbiamá jtsenójuabnayama; y atše bëtscá séntsama chënga jujabuáchama.

*Pablo Antioquioca Pédrëbiamá tojánayana cha ndoñe tšabá tojanma ca*

<sup>11</sup> Pero Pedro Antioquía bëts pueblöye tonjánabo ora, chabe delante sënjánayana cha ndoñe tšabá tonjanma ca, er ntšamo enjanamcá ndoñe tšabá quenjatsmëna. <sup>12</sup> Mëntšá tonjanopasá: Santiago básefta entšanga Antioquiöye tojanichmó, pero chënga cabá choca ndáshjajna ora, Pedro yojanamana chë ndoñe judiënga ošbuáchiyëngaftaca jtsesayana. Pero chë entšanga tmojánashjajnentšana, Pedro tojtsanajbaná chëngaftaca sayana y encuéntayana. Cha chca tojanma, ntšamo chë ndoñe judiënga ošbuáchiyënga, chë base bobachtema chë más delicadentše tétšenënga jtsemnama yojánamna ca tmojánayanënga, chabiamá muanjájabuoyama yojtsauatja causa. <sup>13</sup> Chë inye judiënga ošbuachiyëngnaca tmojanontšé amana cachcá ntšamo Pedro yojtsamcá, jtsamëse ntšamo chënga imojántatšëmbo chca jamama ndoñe yonjanamncá. Y Bernabëñaca, ntšamo chënga imojtsamcá jtsönjyayëse, chëngcá yojtsama, jtsamëse ntšamo cha yojántatšëmbo chca jamama ndoñe ibonjamncá. <sup>14</sup> Chënga ndoñe quemënjátaniyena jtsamëse ntšamo yojanamncá, ntšamo chë Jesucristbe tšabe noticiënguentša ndegombre soyënga endmëncá. Chca sënjáninye ora, Pédrëbioye nyetsca ošbuáchiyëngbe delante sënjanianyana: “Aca canye judío, mo ndoñe judío bendmëncá cojtsiyena, y ndoñe ntšamo chë judiënga jamama monduamancá; chcasna, ¿ntšamo catjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

*Bëngbe Bëtsá judiënga y ndoñe judiënga játsebacana, Jesucristbeñe tmojtsošbuáchema*

<sup>15</sup> Bënga judiënga fsëndmëna, bëngbe bëtsétsanga judiënga monjámnyayeca, y ntšamo judiënga chë ndoñe judiëngbioye mondubobuatmcá, chë “bacna soye amënga ca”, ndoñe queftsátsmëna. <sup>16</sup> Y bënga mondétatšëmbo, canye entšá Jesucristbeñe tojtsošbuáchema, Bëngbe Bëtsá jamana cha chabe bominyiñe tšabia chaotsemnama, y Bëngbe Bëtsá ndoñe chca ntjamana, ntšamo chë judiëngbe leyënguiñe jamama yomna ca iuayancá chë entšá tojamama. Y béngnaca Jesucristbeñe imojtsošbuaché, Bëngbe Bëtsá chaomama bënga chabe bominyiñe tšábënga chamotsemnama, pero ndoñe ntšamo chë judiëngbe leyënguiñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canye entšá chabe bominyiñe tšabia chaotsemnama, ntšamo chë judiëngbe leyënguiñe iuayancá jamama ibomna ca cha tojamama.

<sup>17</sup> Pero, bënga bëtscá mondënguá, Bëngbe Bëtsá chaomama bënga chabe bominyiñe tšábënga chamotsemnama, bënga Crístoftaca cányiñe mo canyacá jtsemnëse, chábeñe imošbuáchema. Chca mondošbuaché, bënga chë bacna soyëngama perdonánënga chamotsemnama. Pero inye entšanga jtsichámuana bënga bacna soyënga amënga imomna ca, ntšamo chë Moisesbe leyiñe iuayancá ndoñe montsama causa. ¿Y chca, Cristo bacna soye amënga šuabiamná ca nántsayana? ¡Ndoñe, ndegombre ndoñe! <sup>18</sup> Atše, ntšamo Bëngbe Bëtsá šojaninyiñecá, chë šojtsemna jájbanama soyënga, cachiñe jajuaboyama y jamama stëtontšese, mo chë Moisesbe ley jtsocumplínana perdonánënga jtsemnama, atše stsemna mo nda ndayá cachá tojtsendbema y cachiñe tojtëtsjebuanacá; y ndegombre, atše stsemna canya ntšamo ndoñe tšabá yondmëncá amá. <sup>19</sup> Chë judiëngbe

leyéngaca atše sëndétatšëmbo, ntšamo chë leyénguiñe iuayancá stsamëse, Bëngbe Bëtsá ndoñe yochanjama atše chabe bominiñe tšabia chaitsemnana; y chca, atše jtsemnana mo obanacá chë castígoca, er chë leyentša mandënga stsamëse, ndoñe quetsátobena atsbocaná jtsemnana. Chë léyeca ndoñe más mandaná ntsemnana jtsebošëse, atše cachcá chë ley sënjanonýá, Jesucristbeñe jtsošbuáchiyama; y chca, atše chaitsobena jtseyenana Bëngbe Bëtsá jtseservénëse. Atše Crísoftaca cánýiñe mo canýacá sëndmënayeca, Cristo cruciñe tojanóbana ora enjamna mo átšnaca cuafjobancá; <sup>20</sup> y mora entsemna mo nýe atše ya ndoñe cuaftsiyencá, Cristo becá vida atšbe ainaniñe entsebómnyayeca. Y ntšamo mora atše vida sëntsebomncá, entsemna atše chë Bëngbe Bëtsabe Uaquiñábeñe betsošbuáchiyama, nda šojánbobonshana, y chabe derecho vida jtsobomñama cachcá tojanonýá y atšbe tšabiama tojanóbana. <sup>21</sup> Atše ndoñe quetsatábotena ntšamo Bëngbe Bëtsá entsangbe tšabiama juabna yobomncá. Nderado Bëngbe Bëtsá tojama canýe entsá chabe bominiñe tšabia chaotsemnana, ntšamo chë leyiñe jamama yomna ca iuayancá cha tojtsamama, as Cristo nýe tondayama matënjanóbana.

### 3

#### *Ley jtsobedecénëse o Jesucristbeñe jtsošbuáchiyëse*

<sup>1</sup> ¡Tšëngaftanga Galacientša entsanga, yapa ndenójuabnayënga! Entsemna mo nda tcmojtsabocjuanacá, tšëngaftangbe juabna tojtsetrocá. Ndoñe quešnátësertana ntšamo chca nanjopása, er cach atše botamana cbonjanabuayiyná, Jesucristo cruciñe tojanóbana. <sup>2</sup> Atše sëntseboše nýe canýe soye atše chašmëyana: ¿Uámana Espíritu tšëngaftangbe ainaniñe tojánamashëngo jtsemándayama, tšëngaftanga ntšamo chë leyiñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchema? <sup>3</sup> ¿Ndáyeca tša ndenójuabnayënga šmomna? Bëngbe Bëtsabe Espíritbeyeca tšëngaftanga šmonjanontsé mo tsmëma entsangcá jtsemnana. ¿Y mora šmojtseboše tšëngaftangbe vidënga jachnënguama nýe entsangbe juabnéngaca jtseyenëse? <sup>4</sup> ¿Nyetsca soyënga ndayëjana tšëngaftanga šmojachnëjna, tondayama tonjoservé? Ndegombre chca ndoñe taiuatsmëna. <sup>5</sup> Bëngbe Bëtsá, chë Uámana Espíritu tšëngaftangbe ainaniñe cháuamashënguama tojanma ora, y tšëngaftangbeñe bëts soyënga chaopasama tojama ora, ¿ndáyeca chca nanjama? ¿Tšëngaftanga ntšamo chë leyiñe jamama yomna ca iuayancá šmojtsamama, o tšëngaftanga Jesucristbe tšabe noticiënga šmojanuena y chiñe šmojtsošbuáchema?

<sup>6</sup> Menójuabonga ntšamo Abraham tojanpasama. Bëngbe Bëtsabe uabemana palabrënguiñe mëntšá endayana: “Cha Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominiñe tšabia yojamna ca.” <sup>7</sup> Chíyeca tšëngaftanga cmontsamna jtsetatšëmbuana, Bëngbe Bëtsábeñe ošbuáchiyënga mond-mëna mo Abrahám bentsána entsangcá, cachcá ošbuáchiyana bëtsebomnana, chë chábentsána ndegombre entsangbiana más. <sup>8</sup> Bëngbe Bëtsabe uabemana palabrënguiñe endopodena jualíama, Bëngbe Bëtsá yochjanma chë ndoñe judiënga chabe bominiñe tšábenga chamotsemnana, chábeñe tmojtsošbuáchema ca. Y Bëngbe Bëtsabe uabemana palabrënguiñe, cabá chca ndëma ora, Bëngbe Bëtsá Abrahám bioye quem tšabe noticiënga tbojanbuayená: “Acbeyeca, atše chanjama nyetsca quem luarentša entsanga tšabe bendicionënga chamotsebomnana ca.” <sup>9</sup> Bëngbe Bëtsá tojanma Abraham ba tšabe bendicionënga chaotsebomnana, cha chábeñe yojtsošbuáchema. Chca, Bëngbe Bëtsá, chábeñe ošbuachiyëngbiámnaca ba tšabe soyënga jamana, cachcá ntšamo Abraham biana tšabe soyënga tojanmcá.

<sup>10</sup> Chë Bëngbe Bëtsá chabe bominiñe tšábenga yochjábiana ca juabnayënga, ntšamo leyiñe jamama yomna ca iuayancá lempe tmojtsobedecénama, chënga nyets tempo jtseyenana jtsetatšëmbëse Bëngbe Bëtsá nyetsca tescama chënga yochjácastigayama. Er Bëngbe Bëtsabe uabemana palabrënguiñe mëntšá endayana: “Bëngbe Bëtsá jayanana nyetsca tescama castigo chaotsebomna ca, nda nyets tempo ndoñe tontsama nyetsca



mandënga ntšamo chë leyënguine iuabemancá ca.” <sup>11</sup> Ndegombre, puerte tšabá entsinjinjena, Bëngbe Bëtsá ndoñe yochanjama ndocná chabe bominiñe tšabia chaotsemnama, ntšamo chë leyine jamama ibomna ca iuayancá tojtsobedecënese. Chca ndegombre endmëna, er Bëngbe Bëtsabe uabemana palabrënguine mëntšá endayana: “Nye ndabiama Bëngbe Bëtsá tojama chabe bominiñe tšabia chaotsemnama, cha Bëngbe Bëtsabeñe betsošbuáchema, cha ndegombre chë nyetsca tescama yomna tšabe vida echántsebmoma ca.” <sup>12</sup> Jtsamana ntšamo chë leyënguine jamama yomna ca iuayancá, ndoñe quenátsmëna mo Bëngbe Bëtsabeñe cuaftsošbuachecá. Ntšamo Bëngbe Bëtsabe uabemana palabrënguine endayancá: “Nda tojtsama nyetsca mandënga ntšamo chë leyënguine endayancá, tšabe vida echántsebmoma, nyets tempo chë leyëngaca mandaná ca.”

<sup>13</sup> Pero, Cristo jóbanama ibojamna ca tmojánayanama, y cha bëngbe causa chca chamomama chënga tojanalesénciayeyeca, Cristo tojama bënga nyetsca tescama castigánënga ndoñe chamondëtsemnama, ntšamo chë leyine iuayancá ndoñe tmontsama causa. Ntšamo Bëngbe Bëtsabe uabemana palabrënguine endayancá: “Nyetsca tescama castigo chaotsebmoma, nda canye niñëšine tmojajonýá chaóbanama cha ca.” <sup>14</sup> Chca tojopasá, Bëngbe Bëtsá chaomama, chë tšabe bendicionënga ntšamo cha Abrahám-bioye tbojanšbuachenacá, ndoñe judiëngnaca chamotsebmoma, Cristo Jesúsbeyeca; y Jesucristbeñe ošbuachiyánaca, Bëngbe Bëtsá chaomama chë Uámana Espiritu bëngbe ainaniñe cháumashëngo jtsemándayama, ntšamo Bëngbe Bëtsá tojanašebuachenacá.

#### *Ndocna ley quenátobena Bëngbe Bëtsabe šbuachenana soye jatrócama*

<sup>15</sup> Jesucristbeyeca catšátanga, chë ndayá sentsichamcá endmëna ntšamo nyets tempo entsángbeñe endbetsopasancá. Uta entsáta tbojenoyeuná canye trato jënbemama, y ntšamo tbojenšbuachenacá chaotsinynama chatbe uabaina tsbuanáchañe tbojuábemëse, ndocná inya más ntsoberenana jayanana ntšamo tbojentratacá ndoñe yontsoservena ca; y inye soyënga chiñe jacjayama cach ndoñe. <sup>16</sup> Chcasna, Bëngbe Bëtsá ba soye Abrahám-bioye tbojanšbuachená puerte tšabe bendicionënga chabiama jamama, y chabe entsanguentsana canyabiámnaca. Y Bëngbe Bëtsabe uabemana palabrënguine ndoñe quenátayana: “chabe entsanguentsëngbiámnaca ca”, mo Bëngbe Bëtsá ba entsangbiama cuafstichamcá; sinó mëntšá endayana: “acbe entsanguentsana canyabiama ca”. Y chca entsayana, nye canye entsá ca; y cha endmëna Cristo. <sup>17</sup> Atše ndayá mëntšá cbontsët-sëtšná: Natsana, Bëngbe Bëtsá Abrahánoftaca canye trato tojábema, y tbojaniyana “aíñe ca”, ntšamo tbojanšbuachenacá jamama. Chentšana canta patse y unga bnëtsana uatëse, Bëngbe Bëtsá Moisesbe cucuatšine chë leyënga tbojanántšaboshjona; chíyeca, chë leyënga ndoñe ntsoberenana jamana chë Bëngbe Bëtsá Abrahánoftaca tojábema trato ndoñe chaondëtsošservénama, ni jamana ndayá Bëngbe Bëtsá tojanšbuachenacá ndoñe chaondëtsošservénama. <sup>18</sup> Er ndayá Bëngbe Bëtsá chabe entsanga tojatsatacá, tojtsemna chënga ntšamo chë leyine jamama yomna ca iuayancá tmojtsamama, chca, chë tšetana soyënga ya ndoñe nantsóbocana ndayá Bëngbe Bëtsá jamama tojanašebuáchenantsana. Pero ba tšabe bendicionënga Abrahambiana jamama, Bëngbe Bëtsá tbojanšbuachenáyeca, Bëngbe Bëtsá chë soyënga Abrahambiana tojanma.

<sup>19</sup> Asna, ¿ndayama chë Moisesbe ley nantsoservena? Bëngbe Bëtsá chë leyënga tojanáboshjona, ba tšabe soyënga jamama Abrahám-bioye tbojanšbuáchenantsana baytese. Bëngbe Bëtsá yojanjuabná chë ley chaoservé entsanga jinyanjyiyama ndayá tšabá o ndoñe tšabá jamama bëtsemnama, chë Abrahámbentšana Uámana Entšá jashjanguëntscuana, ndabiama Bëngbe Bëtsá Abrahám-bioye tbojanšbuachená ba tšabe bendicionënga jamama. Bëngbe Bëtsá angeléngaftaca chë ley Moisesbe cucuatšine tbojanántšaboshjona, y chë entsá Moisés enjamna chë oyebuambnayá Bëngbe Bëtsáftaca y entsángaftaca. <sup>20</sup> Uta entsáta canye trato jënbemama, jtseytana inye entsá chë uta entsátaftaca chaóyebuambama; pero Bëngbe Bëtsá Abrahám-bioye ba tšabe soyënga

jamama tbojanšbuachená ora, nÿe canÿa chca tojanma, y ndoñe bonjanájaboto inÿa chabiama Abrahánoftaca chaóyebuambama.

*Ndayama chë ley yomna*

<sup>21</sup> ¿Chca nántsayana, ntšamo Moisesbe leyiñe iuayancá, chë Bëngbe Bëtsá tojanšbuachená soyëngama contra yomna ca? ¡Ndoñe, ndegombre ndoñe! Bëngbe Bëtsá entsangbe cucuatšíñe canÿe ley tojanáboshjona, y chë ley tojtsobena jamana entsanga ndegombre tšabe vida chamotsebomnama, as Bëngbe Bëtsá nanjama entsanga chabe bominiñe tšábenga chamotsemnama, ntšamo chë leyiñe jamama yomna ca iuayancá tmojtsamama. <sup>22</sup> Pero Bëngbe Bëtsabe uabemana palabrënguiñe endayana, nÿetsca quem luarentša entsanga cachëngbe bacna soyënga jamama juabnéngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jóyëngacñama. Y chënga, Jesucristbeñe imojtsošbuáchema imojtsebomna ndayá Bëngbe Bëtsá tojanašebuachenacá.

<sup>23</sup> Jesucristbeñe jtsošbuáchiyama entsanga chamobenama tempo joshjanguëntscuana, bënga monjamna corente mandánënga chë léyeca, y chca enjamna mo presënga cuaftsemncá, cárceloca utámenënga. Chë ley chca enjamna, ntšamo entsanga Jesucristbeñe muanjobenaye jtsošbuáchiyama Bëngbe Bëtsá jinÿanÿiyama tempo joshjanguëntscuana. <sup>24</sup> Cristo jabama tempo tonjanoshjanguëntscuana, chë ley bëngbiamna enjamna mo canÿe pamillentša oservenacá, cha jtsamana chentša básenga chamotsamama ntšamo tšabá tojtsemncá. Chë ley chca yojamna, bënga Crístbeñe jtsošbuáchiyama chamobenama, y chca, Bëngbe Bëtsá chaoma bënga chabe bominiñe tšábenga chamotsemnama. <sup>25</sup> Pero Jesucristbeñe jtsošbuáchiyama bënga chamotsobenama mora ya tonjóshjangoyeca, chë ley ya ndoñe más quenátsmëna mo canÿe entsacá, ndayá tšabá yomncá bënga chamotsamama cuaftsamcá. <sup>26</sup> Cristo Jesúsbeñe šmojtsošbuáchema, nÿetsca tšëngaftanga šmojobená Bëngbe Bëtsabe básenga jtsemnama, Cristo Jesúséftaca cánÿiñe mo canÿacá jtsemnëse. <sup>27</sup> Tšëngaftanga tcmonjanëbaye, y chca, Crístoftaca cánÿiñe mo canÿacá šmontsemna. Y mora šmojobená mo cach Cristcá jtsemnama. <sup>28</sup> Chíyeca, ndayá Bëngbe Bëtsá tojamama, judiënga y ndoñe judiënga cachcanga mondmëna; nÿets tempo nÿe ínÿabiamna oservénënga y chë nÿe cachëngbiamna trabájayënga cachcanga, y boyabásenga y shembásëngnaca. Nÿetsca tšëngaftanga mo canÿacá šmondmëna, Cristo Jesúséftaca cánÿiñe mo canÿacá jtsemnëse. <sup>29</sup> Tšëngaftanga Cristbe entsanga šmondmënayeca, šmontsemna mo Abrahámbentšana entsanga cuaftsemncá; y chca, ntšamo Bëngbe Bëtsá Abrahámbioye tbojašbuachenacá, tšëngaftanga šmochanjóyëngacñe.

4

<sup>1</sup> Atšnaca séntseboše jayanama, chë uaquiñá nda yochjóyëngacñe ntšamo tbojtsotocancá, ntšamo chabe taitá jatšetayama tbojašbuachenacá, cha cabá mo canÿe basacá tojtsemnëntscuana, ndocna derecho chë soyënguiñe ntsebomnana; y chca, cha jtsemnana mo canÿa nÿets tempo nÿe ínÿabiamna oservenacá, masque lempe ntšamo chabe taitá tbojašbuachenacá chë uaquiñabiamna tojtsemna. <sup>2</sup> Chë uaquiñá tojtsobóchantscuana, entsanga jtsemnana ndëmuanÿënga ntšamo cha tbojtsajabotcá jtsoinayana, y ínÿënga jtsejuabnayana ndayá chë taitabe soyëngaca jamama, chë uaquiñá otocana soyëngaca. Y chca jtsemnana, chë taitá tojayana tempëntscuana. <sup>3</sup> Mo cachcá cuaftsemncá, bënga chë ndegombre soyëngama cabá ndosértaye ora, béngnaca mandánënga monjamna mo nÿets tempo nÿe ínÿabiamna oservénëngcá, quem luarentše imománda espiritëngaca. <sup>4</sup> Pero Bëngbe Bëtsá chabe Uaquiñá quem luaroye tbojanichmó, nÿa chama tempo tojanóshjango ora; cha mo nÿetsca entsangcá, canÿe shembásabentšana tojanonÿná, y yojoyena jtsamëse ntšamo judiëngbe leyiñe jamama ibojamna ca yojanayancá jtsamëse. <sup>5</sup> Quem luaroye chca tojánabo bënga jabátsebacama, y chamotsobenama Bëngbe Bëtsabe basengcá jtsemnama, bënga chë tempo šonjánamna chë ley jtsobedecénana. <sup>6</sup> Y

chca, tšëngaftanga ya chabe básenga šmojtsemnama jinjanjijama, Bëngbe Bëtsá chabe Uaquiñabe Espíritu tbojanichmó, nyetscangbe ainaniñe cháumashënguama, y chë Espíritu endama bënga Bëngbe Bëtsá chamochembo, “Atšbe Taita ca”. <sup>7</sup> Mëntsá, cada ona tšëngaftanguentsá ya ndoñe quenátsmëna mo chë nyets tempo nye ínjabiamana oservenëngcá, quem luarentše imománda espiriténgaca mandánënga, y aíñe Bëngbe Bëtsabe basa tojoquedá. Y chabe basa tojoquedáyeca, lempe ntšamo Bëngbe Bëtsá chabe básenga jatšatayama tojašebuachenacá cha echanjójyëngacñe.

*Pablo, Galacia luaroquëngbiamana ngménaca yojtsanjuabnaye*

<sup>8</sup> Tempo, Bëngbe Bëtsá ndoñe šmonjanábuatma ora, tšëngaftanga šmojamna mo nyets tempo nye ínjabiamana oservenëngcá, ndoñe ndegombre diosënga mondmëna espiriténgaca mandánënga. <sup>9</sup> Pero mora, Bëngbe Bëtsábioye šmontsábuatma ora, o tšabá jayanama, Bëngbe Bëtsá cmojtsëbuatma ora, ¿ntšámoyeca tšëngaftanga cachiñe chë quem luarentše imománda espíritënga šmojtsayaunana? Chënga ndocna obenana quemátsbomna, y nduámanënga mondmëna. ¿Ndáyeca tšëngaftanga šmojtseboše cachiñe jtsemnana mo chë nyets tempo nye ínjabiamana oservenëngcá, chë espiriténgaca mandánënga? <sup>10</sup> Tšëngaftanga tša jtsejuabnayana diënguiñe, shinjyënguiñe, canye uatëntša tempënguiñe y uatënguiñe, mo uámana tempëngcá Bëngbe Bëtsá tšabá jadórama, y chama bëts fiestënga jtsebomnana. <sup>11</sup> Atše corente šontsengmena, nderado atšbe trabajo tšëngaftangbeñe tondayama tonjoservé.

<sup>12</sup> Jesucristbeyeca atšbe catšátanga, bëtsacá cbontsaimpadana, šmochtsiyena jtsamëse ntšamo atše sëndamcá, er átšnaca sënjobema ntšamo tšëngaftanga ndoñe judiënga šmondmëncá. Tšëngaftanga ndocna bacna soye atše chešatsborlá. <sup>13</sup> Tšëngaftanga šmondétatšëmbo, atše sënjanobená chë natsana soyama tšëngaftanga chë tšabe noti-ciënga jábuayenama, canye šocana šonjanontšáshjango causa. <sup>14</sup> Atše canye šocana sën-jánbomna causa, tšëngaftangbiamana ndoñe paselo quenjatsmëna tšëngaftangbeñe atše jofjana; pero masque chca, tšëngaftanga ndoñe chešmatanaboté, ni quešmatanáboyënja; masna, tšëngaftangbeñe tšabá šmonjanofja; šmonjanofja mo canye ángel Bëngbe Bëtsabe ichmoná šmojofjá, o cach Jesucristbioycá. <sup>15</sup> Ndayá chora tšëngaftangaftaca enjanopasancá, puerte oyejuayënga tcmonjánabiamana. ¿Y mora ndayá tojopasá? Ndegombre, atše sëndétatšëmbo y sëntsobena jayanama, tšëngaftanga ndaye sóynaca atšbiamana mašmënjannama. Chë más uámana šmojánbomna soyënga atšbe cucuatšiiñe mašmënjánboshjona, y nya mo chë bominyëngnaca masmënjánenobuchjatsëca atše jatšetayama. <sup>16</sup> Y morna, ¿ntšamo ndegombre yomncá cbojtsëtsëtsnama, atšbiamana šmojtsejuabná mo tšëngaftangbe uayayá cuaftsemncá ca?

<sup>17</sup> Chë ndoñe ndegombre soyënga buátëmbayënga montsinjinyá mo tšëngaftangbiamana ndegombre tšabá chašmotsiyenama cuaftsebošcá, pero chca ndoñe quenátsmëna; ndayá jamama imojtsebošcá, tšëngaftangbiamana ndoñe tšabá quenátsmëna. Chënga montseboše atšbe contra y atšbe buátëmbana soyëngama contra chašmotsemnama, chentšana tšëngaftanga chëngaftaca jtsemnama chašmotsebošama y chënga chašmotsababuánjeshanama. <sup>18</sup> Puerte tšabá endmëna atše y ínjenja chafstseboše tšëngaftangaftaca amiguënga jtsemnama, canye tšabe soye jamama tojtsemnëse; y sempre chca chauétsemna, tšabiamana tojtsemnëse, y ndoñe nye atše chentše tšëngaftangaftaca stsemna ora. <sup>19</sup> Tšëngaftanga, chë atšbiamana mo atšbe basengcá šmondmëñënga, Jesucristbeñe chašmošbuáchemana tcbonjanëjabuácheyeca; atše cachiñe séntsesufrina tšëngaftangbe causa, ntšamo canye šešona jtsebomnana ora canye shembása jtsesufrinancá; y atše chca chanjéftsesentina, ntšamo Cristo endmëncá tšëngaftangbe vidiñe ndegombre chaojtsebínjyëntscuana. <sup>20</sup> Malaye atše, mora tšëngaftangaftaca stsemna, atše jobenayama jinjanjijama, cach tšëngaftanga jáuyanëse, ntšamo ndegombre atše tšëngaftangbiamana tsësëntínana. Atše tša šontsecochëngmena tšëngaftangbiamana.

*Ntšamo Agar y Sáraftaca tojanopasá*

<sup>21</sup> Canye soye šmochjauyana, tšəngaftanga chə Moisesbe léyeca mandánənga jtsemnama šmojtsebošənga. ¿Ntšamo chə leyiñe endayancá tacmojtšəsertana? <sup>22</sup> Chiñe endayana, Abraham uta uaquiñata yojánabamna ca; cánýana Agárbeñe, canýa chabe shembiana nýets tempo oservená; y chə ínýana, cachabe shémbeñe, Sara, y mua ndocnabiama nýets tempo oservená yonjamna. <sup>23</sup> Chə chabe shembiana nýets tempo oservenabe šešona, tojanonýná nýe Abraham y Agar chca chaotsemnama tbojánbošenayeca; y cachabe shembe šešona tojanonýná, Bəngbe Bətsá chə soye jamama Abrahámbioye tbojánšbuachenáyeca.

<sup>24</sup> Ntšamo Agar y Sara, y chatbe šešónataftaca tojanopasacá, bənga canye uámana soye šontsabuatambá. Ndayá chə uta shembásataftaca tojanopasacá, uta trato entsinýinýná: chə shembása Agar, chə nýets tempo nýe ínýabiama oservená yojamná, entsinýinýná chə trato Bəngbe Bətsá y Israeloca entsángaftaca, chə Moisésoftaca Bəngbe Bətsá leyənga entsangbe cucuatšiče tojanáboshjona ora. Agar básenga yojtsabamna ora, chəngnaca tmojanonýná nýe ínýabiama nýets tempo oservénənga jtsemnama, y chə tratentša leyiñe soyəngaca mandánənga jtsemnama tmojtsebošəngnaca jtsemnana mo nýe ínýabiama nýets tempo oservénəngcá. <sup>25</sup> Ndayá Agáraftaca tojanopasacá entsinýinýná chə Sinaí batsjoca tmojánbema trato, Arabia luaroca; y chə morsca bəts pueblo Jerusalénəncaca entsinýinýná, er chentša entsanga montsemna chə leyəngaca mandánənga. Ntšamo Agar y chabe básenga nýe ínýabiama nýets tempo oservénənga monjamncá, Jerusalenentša entsángnaca cachcá chəngcá mondməna, chə leyəngaca nýets tempo mandánənga bətsemnayeca. <sup>26</sup> Ndayá Sáraftaca tojanopasacá, chə nýe cachabiama trabájaye shembása, entsinýinýná chə trato, chə tšabe bendicionənga Abrahambiana jamama chábioye tbojánšbuachená ora. Chánaca entsinýinýná chə Bəngbe Bətsabe bəts pueblo celoca, Jerusalén ca uabaina pueblo, er chə chentše mochjoyənananga, mora ndoñe quemuátiyena chə leyəngaca mandánənga. Chə Crístbeñe ošbuáchiyənga mondməna chə celoca bəts pueblo Jerusalenentše joyənanama, y chca, ndegombre chənga mondməna celocama entsanga. <sup>27</sup> Chə celoca Jerusalén endməna chə ndegombre bəts pueblo chə Jesucrístbeñe ošbuáchiyəngbiama, y chca endməna mo canye shembása šešonga ndabamná y aíñe chaotsabamnana Bəngbe Bətsá cuafjamcá. Quem luarentša Jerusalén endməna chə uámana luare chə léyeca mandánənga imomnəngbiama, y chca endməna mo canye shembása aíñe boyaftaquécá, er Bəngbe Bətsabe uabemana palabrenguiñe chə shembásatbiama mēntšá endayana: Shembása šešonga ndabamná, y ndocna te tsetšanənga ndbomná šešona jtsebomnama, moyejuá y moyó oyejuayá cojtsemnama.

Chca moma, er aca, chə shembása chabe boyabiama utšená, chə shembása boyá bomnabiama más básenga cochántsabamna ca.

<sup>28</sup> Chcasna, Jesucrístbeyeca atšbe catšátanga, ntšamo Isaac Abrahambe uaquiñá tojanobemcá, Bəngbe Bətsá chca Abrahámbioye tbojánšbuachenáyeca; cachcá, tšəngaftágnaca šmojobená Bəngbe Bətsabe básenga jtsemnama, Bəngbe Bətsá chca tojanšbuachenáyeca. <sup>29</sup> Ntšamo chə tempo tojanopasacá, chə Isaac chaosufrima Ismael tojanmá (Ismael, Abrahambe uaquiñá Agárbeñe, chə nýe chata chca tbojánbošenayeca onýnaná; Isaac, chə Bəngbe Bətsabe Espíritbeyeca onýnaná), mórnaca cachcá entsopasana: chə ndoñe ndegombre soyənga buátəmbayənga judiənga montsama bənga chamosufrima, ntšamo Isaac chaosufrima Ismael yojanamcá. <sup>30</sup> Pero, ¿ndayá Bəngbe Bətsabe uabemana palabrenguiñe Abrahambe básatbiama iuayana? Mēntšá endayana: “Moma, chə nýets tempo nýe ínýabiama oservená y chabe basa acbe yebnentšana chábuaisebocnama, er chə nýets tempo nýe ínýabiama oservenabe šešona ndoñe quenátobena chabe taitabe soyənga jtsebomnama. Nýe chə propio shembe šešona aíñe, er chə shemna ndoñe nýe ínýabiama nýets tempo oservená quenátsməna.” <sup>31</sup> Chcasna, Jesucrístbeyeca atšbe catšátanga, bənga ndoñe quemuátsməna mo canýa nýe ínýabiama nýets tempo oservenabe básenga cuaftsemncá, er mora ya ndoñe más quemuátsməna

chë léyeca nyets tempo mandánënga. Y aíñe montsemna mo canye shema ndoñe nye ínnyabiama nyets tempo oservenabe básenga cuaftsemncá, er Bëngbe Bëtsabe básenga bënga mondmëna.

## 5

*Cristo bënga šojatsebacá*

<sup>1</sup> Cristo bënga šojatsebacá, ndoñe más mo chë nyets tempo nye ínnyabiama oservenëngcá chamondëtsiyenama, chë léyeca mandánënga. Nya šmochtsentšena nyets tempo chca atsebácanënga chašmoquedama, y ndoñe šmatjaleséncia tšëngaftanga cachiñe chë léyeca mandánënga ínnyenga chácmbiamama.

<sup>2</sup> Tšabá šmochjouena. Atše Pablo cbéyana: Nderado tšëngaftanga ndoñe judiënga, šmojalesenciá ínnyenga chë tšëngaftangbe más delicadentše base bobachtema chamotëtšama, ntšamo judiënga monduamancá, asna, ndayá Cristo tšëngaftangbiama tojanmcá tondayama nantsoserverna. <sup>3</sup> Ndëmuanye entšánaca, nda tojalesenciá ínnyenga chabe más delicadentše base bobachtema chamotëtšama, cachiñe cha šcobuayená: Mora aca cmontsemna nyetsca chë judiëngbe leyentša mandënga jt-sobedecénana. <sup>4</sup> Ndëmuanyënga tšëngaftangbentšana šmojtsenguá, Bëngbe Bëtsabe bominyiñe tšábënga jtsemnama, ntšamo leyiñe jamama yomna ca iuayancá jtsamëse, tšëngaftanga chca šmojtsamama, šmojama Crísoftaca cányiñe mo canyácá ndoñe chašmondëtsemnama; Bëngbe Bëtsábentšanënaca šmojtsoluaré, y chca, šmontsinýanýná tšëngaftanga ndoñe šmontseboše, Bëngbe Bëtsá tšëngaftangbe tšabiama jtsejuabnayëse, chácmatsebacana. <sup>5</sup> Pero bënga, Bëngbe Bëtsábeñe jtsošbuáchiyëse, mondobátmana cha yochjama bënga chabe bominyiñe tšábënga nyets tempo chamotsemnama. Y bënga chca mondobátmana, Jesucrístbeñe ošbuáchiyana bómnyayeca, y chë ošbuáchiyana chë Uámana Espíritbiajana béngbioye endobá. <sup>6</sup> Er Crísoftaca cányiñe mo canyácá tmojtsemna ora, aíñe base bobachtema tétšenënga tmojtsemna o ndoñe, tondaye ntsámanana; ndayá puerte enduámana endmëna chë Jesucrístbeñe bënga mondbomna ošbuáchiyana, y chca bétsebonnamna bënga montsinýanýná ínnyenga jtsababuánýeshanëse.

<sup>7</sup> Tšëngaftanga tšabá šmonjánama, chë jtsiyenana ntšamo Bëngbe Bëtsabe ndegombre soyënga yomncá jtsamëse. Y mora, ¿nda tojama tšëngaftanga chašmotsajbanama chë Bëngbe Bëtsabe ndegombre soyënga jtsuenanama? <sup>8</sup> Ndegombre, Bëngbe Bëtsá ndoñe quenátsmëna, er cha tšëngaftanga tcmojáchembo chabe entšanga chašmotsemnama. <sup>9</sup> Ntšamo entšanga mondëntšayancá: “Nye base levadura jamana nyetsana chauabochama ca”; cachcá, tšëngaftanga chë judiëngbe básefta leyéngaca mandánënga jtsemnama šmojabojátšese, šmuatjábocna nyetsca leyéngaca mandánënga. <sup>10</sup> Bënga Bëngbe Utabnáftaca cányiñe mo canyácá bétsemnayeca, atše corente séntsetatšëmbo, ntšamo atšbe juabna yomncá tšëngaftángnaca cachcá šmochtsejuabnayama; y átšnaca corente séntsetatšëmbo Bëngbe Bëtsá puerte bochjacastíga, nda tšëngaftanga natjémbana ainánaca ndoñe chašmondëtsiyenama tojtsamábioye, masque ndánaca cha chaotsomñe.

<sup>11</sup> Y atšbiama chanjayana, Jesucrístbeyeca atšbe catsátanga, Jesucrístbeñe ošbuáchiyënga base bobachtema chëngbe más delicadentše tétšenënga chamotsemnama entšanga cabá stsabuayiynase, entšanga ya ndoñe muantsama atše chaitsesufrínama. Atše chca stsamëse, Cristo cruciñe tojanóbanama ntšamo iuayancá entšanga stsabuayiyná ora, chënga ya ndoñe átšeftaca nanjósentiaye. <sup>12</sup> Pero chë natjémbana ainánaca ndoñe chašmondëtsiyenama imojtsamëngna, ¡malaye cachënga muanjenocbóna!

<sup>13</sup> Pero tšëngaftanga, Jesucrístbeyeca atšbe catsátanga, Bëngbe Bëtsá tcmojáchembo chë judiëngbe léyeca ndëmandánënga chašmotsemnama. Pero chca bétsemnama, mora ndoñe šmatjátsjuabnaye šmojtsobena jalesénciana, nye tšëngaftangbe cuerpënga

tšabá chamotsemnama juabnéngaca mandánënga jatiyenama. Chamna, tšëngaftanga šmuenbobonshánayeca, nyetscanga šmochtsenájabuachana. <sup>14</sup> Er ntšamo Moisesbe leyentša nyetsca mandënguiñe endayancá, nye canye mandiñe lempe chca entsayana. Y chë mando endmëna: “Ndëmua entšánaca cochtsebobonshana ntšamo cach aca cuenobobonshancá.” <sup>15</sup> Pero ínÿenga chamotsesufrínama jtsamëse tšëngaftanga šmojtsiyenëse, mo tšátjaye bayënga tmojtsenashantsná y tmojtsenobanacá, cuedado šmochtsëbomna. Ndóñese, nyetscanga šmatjánenpochocaye.

*Ntšamo chë Bëngbe Bëtsabe Espíritbeyeca vida jtsebomnama*

<sup>16</sup> Chíyeca cbochjáuyana: Nyets tempo šmochtsiyena ntšamo chë Uámana Espíritu cmojtsamëndacá, y chca, tšëngaftanga ndoñe quešmochátama soyënga, nye cach tšëngaftanga tšabá jtsomñama juabnéngaca. <sup>17</sup> Er ndayá bënga, nye entšangbe juábnaca jamama mondbošcá, jtsemnana ndayá chë Uámana Espíritu bënga chamomama yobošcá contra; y ndayá chë Uámana Espíritu bënga chamomama yobošcá, jtsemnana ndayá bënga, nye entšangbe juábnaca jamama imobošcá contra. Chca endmënayeca, ntšamo chë Uámana Espíritu chašmomama yobošcá šmojtsamëse, ndoñe quešmátobena jamana, ndayá cach tšëngaftanga, nye entšangbe juábnaca jamama šmojatsbošcá. <sup>18</sup> Tšëngaftanga, ntšamo chë Uámana Espíritu cmojtsamëndacá šmojtsamëse, ndoñe quecmátamna ntšamo chë leyiñe iuayancá játamama.

<sup>19</sup> Ntšamo entšanga, nye entšangbe juábnaca tmojtsamcá, nyetscanga paselo jtsonÿayana: chënga bacna soye boyabása o shembásaftaca jtsamana, nye chca soyëngama jësejuabnayana, y ndoñe ntsobenana cachënga jenomándama, chca soyënga jtsamëse. <sup>20</sup> Ba uabouana soyënga jtsamana, diosënga yomna ca tmojtsejuabná soyënga jadórama, jtsencjuanayana, ínÿengaftaca jtsenáyayana, nyetscanga ndoñe cachcá chamondëtsejuabnama jtsamana, ínÿengaftaca yapa jtsenántšabošana, soyënga nye rábiaca jtsamana, ínÿengaftaca tša jesenaleganana, y cánÿenga ínÿengaftaca contra chamotsemnama jtsamana. <sup>21</sup> Nye jtsebošana ntšamo inÿa tojatashjachcá jtsebomnama, yapa tmoyënga jtsemnana, fiestënguiñe ndoñe tšabe soyënga jtsamana, y inÿe soyëngnaca mo chë soyëngcá jtsamana. Y mora atše cbaruayená, cach ntšamo tempo sënjanmcá: chca soyënga jtsamëse oyenënga, Bëngbe Bëtsabe amëndayoca ndoñe luare quemochátsbomna.

<sup>22</sup> Pero, Uámana Espíritu ainaniñe tojtsemánda ora, quem soyënga chentšana jóbocnana: nyetscanga jtsababuánÿeshanana, jtsóyejuayana, natjémbana ínÿengaftaca jtsiyenana, puerte uantado nyetsca padecéniñe jtsemnana, nyetscanga corente bonshanánaca jtsénÿayana, tšabe ainana jtsebomnana, y nyétscañe tšabe palabra bomnënga jtsemnana, <sup>23</sup> jtsejuabnayana chë ínÿenga mo chabiamá más uámanënga cuaftsemncá, y cachá nyetsca soyënguiñe jenomándama jtsobenana. Y ndocna ley quenátsmëna, chca soyënga tmojtsama entšangbiama contra cháuyanama. <sup>24</sup> Jesucristbënga imomnënga tmojama, chënga chë nye entšangbe juabnéngaca mandánënga ndoñe ntsemnana; ya ndoñe más, chë nye cachënga tšabá jtsomñama bacna juabnéngaca mandánënga quemátsmëna, y chë nye cachëngbiama soyënga jamama bëtscá juabnéngaca cach ndoñe. <sup>25</sup> Bënga ndegombre tšabe vida chamotsebomnama Uámana Espíritu yojtsámayeca, bënga mochtsiyena jtsamëse lempe ntšamo Uámana Espíritu šojtsamëndacá. <sup>26</sup> Ndoñe šmattsenábotamnaye, uámanënga jatenobiamnayëse, ndoñe soyënga mattsama ínÿenga béngaftaca chaoséntiayama, y ndoñe nye mochjátsboše ntšamo inÿa tojatashjachcá jatsbomnama.

6

*Nyetscanga šmochtsenájabuachana*

<sup>1</sup> Jesucristbeyeca atšbe catšátanga, nderado ndánaca bacna soye tojamama šmojinÿe, tšëngaftangbentše ntšamo chë Bëngbe Bëtsabe Espíritu tojtsemmandacá tmojtsamënga

cmontsamna cha juajabuáchana, chë ndoñe tšabe soye amana chaotsajbanama; pero chca šmochjama beca bonshanánaca jtsonjyayese. Cuedado šmochtsebomna, er ndoñese, tšengaftángnaca cmatjócochëngo cachcá soye jamama. <sup>2</sup> Chë soyënguine chašmojtsepadecena ora, šmochtsenájabuachana, mo chë uauta uasmanëshangá šmojtsëyambá ora, juyambama šmojtsenajabuachancá. Y chca chašmojtsama ora, ntšamo Cristo tojanmandacá šmochantsocumplina.

<sup>3</sup> Nderado nda tojtsejuabná, cha canye uámana entšá yomna ca, pero ndoñe chca cha tondmënese, cachá jtsenoíngñayana. <sup>4</sup> Cada ona chauenojuabó, ntšamo tojamcá tšabá o ndoñe tšabá bétsemnama. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínÿenga tmojamama más tšabá yojtsemna ca jatichámëse. <sup>5</sup> Er cada ona bontsemna jtsenójuabnayana, jtsetatšëmbuama ntšamo tojamcá tšabá o ndoñe tšabá bétsemnama.

<sup>6</sup> Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nyetsca tšabe soyënga jenájatayana.

<sup>7</sup> Ndoñe matenoíngñana; ndoñe šmattsejuabnaye tšengaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñëcá, er ndocná quenátobena Bëngbe Bëtsá jaíngñana. Ntšamo entšanga mondëntšayancá: “Ndayá tcojajé y cachcá josháchiñana ca.” <sup>8</sup> Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena nÿe cachá tšabá jtsomñama bacna juabnéngaca, cha echanjábocna jabuache castiganá nyetsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo chë Uámana Espíritu tojtsemandacá jtsamëse, chë nyetsca tescama yomna tšabe vida echántsebomna. <sup>9</sup> Chcasna, ndoñe chašondëmantšë tšabe soye jtsamama; er masque šojtsëmantšnasna, pero chë tšabe soyënga jtsamama ndoñe tmonjajbanase, canye bëtse te echanjóshjango, bënga bëtscá tšabe soyënga josháchiñama, mo tša tšabe shajuanënga tmojashaquécá. <sup>10</sup> Chiyeca, tmojtsobena ora, nyetscangbiama tšabe soyënga mochjama, pero masna chë Jesucristbeñe ošbuáchiyana bómnyeca, bëngcá Bëngbe Bëtsabe básenga imomnëngbiama.

### *Quem tsbuanácha juapochócama cach Pablo tojanábema*

<sup>11</sup> ¡Šmochjinÿe, tša bëtse letrëngaca cach atšbe cucuátšeca mora cbontsëbuabiamná!

<sup>12</sup> Ndëmuanÿenga imojtseboše, tšengaftanga chë ndoñe judiënga jaméndama tšengaftangbe más delicadentše base bobachtema tétšenënga chašmotsemnama, ntšamo judiënga monduamancá, chënga chca jtsamana nÿe chë judiëngaftaca tšabá joquédama. Y chca jtsaméndayana, chënga chamosufrima ínÿenga chamotsamama ndoñe mondbóšeyeca; er judiënga muanjama chënga chamosufrima, Cristo cruzoca jóbanana entšangbiama puerte iuámana ca chënga tmojtsabuayiynase. <sup>13</sup> Pero ni mo chë más delicadentše base bobachtema tétšenënga imomnënga, ndoñe quemátama lempe ntšamo chë leyiñe iuayancá. Pero chënga jtsebošana tšengaftanga chca tétšenënga chašmotsemna, chënga jtsenábotamnyama jobenayama, ínÿenga base bobachtema chacmatëtšama tšengaftanga šmojalesenciama. <sup>14</sup> Atšeftacna ndocna te chca chaondopasá. Atše nyets tempo y beca chanjëftsóyebuambnaye ndayá atšbiama Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiama tondaye quenatámana ntšamo entšanga quem luarentše imojuabnacá y chëngbiama puerte iuámana; y ndayá atšbiama puerte iuámana, entšangbiama tondaye quenatámana; y chë causa, atše chëngbiama mo obanacá sëndmëna. <sup>15</sup> Chë más delicadentše base bobachtema aíñe tétšená o ndoñe, tondaye quenatámana. Ndayá puerte iuámana endmëna, Bëngbe Bëtsá mo tsmëma entšangcá bënga šojábiana, Uámana Espíritu bëngbe ainaniñe jtsemándayese. <sup>16</sup> Chë quem buatëmbana sóyeca

jtsamëse šmoyenëngbiama, atše, Bëngbe Bëtsá séntseimpadana, cha chaoma tšëngangbe ainana natjëmbana chašmotsebonnama y becá chacmotsalastemánama; y ndoñe nje chëngbiama chca quetsatsimpadana, ndayá nyetscanga Bëngbe Bëtsabe entšanga imomnëngbiámnaca.

<sup>17</sup> Y mora, nje canje soye cbochjáuyana: morscana ndocná chaondétsama atše jasúfriama chaotsemnama; er atšbe cuerpiñe endëtinýna ntšamo atše tijasufri, Jesusbe oservená bëtsemnama.

<sup>18</sup> Jesucristbeyeca atšbe catšátanga, atše séntseimpadana Bëngbe Utabná Jesucristo chaoma tšabe bendicionënga tšëngangbeñe chaotsemnama. Chca chaotsemna.



## Efesios

### *Jacheuayama*

<sup>1</sup> Atše Pablo, Jesucristbe ichmoná Bëngbe Bëtsá chca yobóseyeca, quem ts-buanácha sentsabiamná Efeso puebloca Bëngbe Bëtsabe entšanga y Cristo Jesúsbeñe ošbuáchiyënga imomnëngbiama. <sup>2</sup> Atše séntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsem-nama, y chata chaboma tšëngaftangbe ainaniñe tšabe ebionana chašmotsebmoma.

*Crísoftaca cánjiñe mo canyáca jtsemnëse, bënga mochántsebmoma nyetsca tšabe soyënga, ntšamo celoca yobinýncá*

<sup>3</sup> Bëngbe Bëtsá y Bëngbe Utabná Jesucristbe Taitábioye mochjëtshuaye, er bënga Crísoftaca cánjiñe mo canyáca mondménayeca, Bëngbe Bëtsá tojama bënga nyetsca tšabe soyënga chamotsebmoma, ntšamo celoca yobinýncá. <sup>4</sup> Bëngbe Bëtsá bënga šojanabacacá Crísoftaca cánjiñe mo canyáca chamotsemnoma, cabá quem luare cha ndama orscana, bënga chabe delante chamotsemnoma chabe entšanga, bacna soyëngama perdonánënga y chabe oservénënga, y bënga ainaniñe bacna soye ndbom-nënga imomna ca cha cháuyanama. <sup>5</sup> Bëngbe Bëtsá šuababuánjeshanayeca, tempo cha tojanjuabó y tojánbošena bënga mo cachabe basengcá jábiamama, chë Jesucristo yochjanma sóyeca. <sup>6</sup> Chíyeca bënga Bëngbe Bëtsábioye sempre jtsatschuanayana, cha bëngbe tšabiamama juabna yobómnayeca, ndayá chabe Bonshana Uaquiñáftaca bëngbe tšabiamama cha tojamama. <sup>7</sup> Bëngbe Bëtsá puerte bonshanánaca bëngbe tšabiamama bëtscá yojuabnáyeca, cha bëngbe bacna soyëngama šojtsaperdoná y šojatsebacá, er Jesús bëngbiama tojanóbana, chabe buiñe juabuáshanëse. <sup>8</sup> Bëngbe Bëtsá tojama bënga nyets osertánana y becá juabna chamotsebmoma, cha becá bonshanánaca bëngbe tšabiamama juabna yobómnayeca, <sup>9</sup> y tojama bënga chamotsetatšëmbuama ndayá jamama cha yobošcá, ndayá cachá tempscana yojanjuabná jamama, pero entšanga chca ndoñe tonjaninýañé. Ndayá jamama Bëngbe Bëtsá tempo yojanjuabnacá, ndayá cha tojama bënga chamotsetatšëmbuama, cachá yojanjuabná chca jamama. <sup>10</sup> Ndayá jamama Bëngbe Bëtsá yojuabnacá, lempe echanjochnëngo nya chama tempo chaojóshjango ora, y quem Bëngbe Bëtsabe juabna endmëna jamana, lempe ntšamo cha tojamcá celoca y quem luarentše, Cristo chamotsebmoma nyetsca chë soyënguiñe mo chë mandayacá.

<sup>11</sup> Bëngbe Bëtsá siempre jamana nyetsca soyënga ntšamo tojtsejuabnacá y tojtsebošcá. Y Bëngbe Bëtsá bënga šojabacacá, ntšamo cabá chca ndama ora yojanjuabnacá; chca, bënga Crísoftaca cánjiñe mo canyáca jtsemnëse, bënga chamóyëngacñama ndayá Bëngbe Bëtsá chabe entšanga jatšatayama tojašebuachená, mo chëngbe otocana soycá. <sup>12</sup> Y Bëngbe Bëtsá chca tojama, bënga chë Crístbeñe natsana imojtsanošbuachenga, cha bënga šochjánatsebacama, tšabe soyënga jtsamëse chamotsiyenama, chca, chë inye entšanga Bëngbe Bëtsabe obenanama cha chamotsatschuanama. <sup>13</sup> Y tšëngaftágnaca, chë ndegombre buayenánana šmojanuena ora, chë Bëngbe Bëtsá bënga játsebacama buayenánana, y Crístbeñe šmojtsanošbuaché ora, Bëngbe Bëtsá tojanma tšëngaftanga Crísoftaca cánjiñe mo canyáca chašmotsemnoma y tcmojanainýnaná tšëngaftanga chabe entšanga bëtsemnoma. Bëngbe Bëtsá chca tojanma, Uámana Espíritu tšëngaftangbe ainaniñe cháuamashënguama tojanma ora, ntšamo tempo cha tojanašebuachenacá. <sup>14</sup> Bënga chë Uámana Espíritu bëngbe ainaniñe mondbómnayeca, corente mondetatšëmbo ndayá Bëngbe Bëtsá chabe entšanga tojašebuachenacá bënga mochjóyëngacñama. Uámana Espíritbeyeca bënga montsobena chca puerte tšabá jtsetatšëmbuama, chë Bëngbe Bëtsá chabe entšanga nyetsca tescama játsebacama y ntšamo tojašebuachenacá jatšatayama tempo chaošhjanguëntscuana; y lempe ntšamo

cha bēngbiama inétsamama, njetscanga cha mochántsatschuanaye, cha bētsá y obená bétsemnama.

*Pablo Bēngbe Bētsábioye tbojanimpadá, ošbuáchiyēnga osertánana chamotsebmoma.*

<sup>15-16</sup> Chcáyeca, atšna, Bēngbe Bētsá tšēngaftangbiama stseimpadana ora, sempre cha sēndbētsatschuanaye, er atše sēnjátatšēmbona ntšamo tšēngaftanga Bēngbe Utabná Jesúsbeñe tša šmojtsošbuáchemá, y ntšamo tšēngaftanga njetzca chē Bēngbe Bētsábēnga imomnēnga šmababuánjēshanama. <sup>17</sup> Bēngbe Bētsá, Bēngbe Utabná Jesucristbe Taitá, nda corente iuámana, séntseimpadana cha chaoma Uámana Espiritu chacmējabuachama, corente osertánēnga chašmotsemnama, y chacminyānyé nda Bēngbe Bētsá yomnana, chca, más tšabá cha chašmotsábuatmama. <sup>18</sup> Atše, Bēngbe Bētsá séntseimpadana, cha chaoma tšēngaftanga Bēngbe Bētsabe soyēnguiñe corente osertánana chašmotsebmoma, tšēngaftanga chašmotsetatšēmbuama, ndayá Bēngbe Bētsábēne jtsošbuáchiyēse tšēngaftanga šmojtsošbuatmancá cha cmochjátšatayama. Bēngbe Bētsá tcmojáchembo chábeñe chca chašmotsobátmanama. Atše cha séntseimpadana, chaoma tšēngaftangnaca chašmotsetatšēmbu tša bētsá y bēts soyēnga yomna ndayá chabe entšanga cha tojašebuachenacá; <sup>19</sup> y chašmotsetatšēmbu tša bēts soye y ndocna te ntjēftopochócama chabe obenana yomnana, chē ndayá bēngbe ainaniñe tšabe soyēnga yojtsama, bēnga chē Crístbeñe ošbuachiyēngbeñe. Cach quem puerte bēts obenana endmēna, <sup>20</sup> ndáyeca Bēngbe Bētsá tojanma Cristo cháuatayenama, y chabe catšbioica celoca tbojtantbema chaotsemándama. <sup>21</sup> Choca Cristo njetzca soyēnguiñe yojtsemándama, y más bētsá obenana y mando yojtsebmoma njetzca mándayēngbiama, chē mando y obenana bomnēngbiama, y cha yomna más uamaná y bētsá njetzca chē entšangbiama mo bētsētsangcá utabnēngbiama, chēngbe uabaina respétoca jt-sichámēse. Cristo puerte bētsá endmēna lempe ntšamo quem luarentše yobínynama y Cristo yochjésabentšana yochtsebinynámna. <sup>22</sup> Bēngbe Bētsá tojama Cristo njetzca soyēnguiñe chaotsemándama, y tbojanábuayana njetzca soyēnguiñe chaotsemándama, chábeñe ošbuáchiyēngbe tšabiama. <sup>23</sup> Cha endmēna njetzca chábeñe ošbuáchiyēngbe mandayá, y chēnga mondmēna mo cachabe cuerpo cuaftsemncá. Chēngbe ainaniñe cha endoyena y njetzca luarēnguíñnaca, y lempe cha endēmándama.

## 2

*Atsebácanēnga mondmēna, Bēngbe Bētsá šuababuánjēshanayeca*

<sup>1</sup> Tempo tšēngaftanga Bēngbe Bētsabiama mo obanēngcá šmonjamna, er tšēngaftanga šmonjaniyena, ntšamo Bēngbe Bētsá yomandacá ntsamcá, y bētsá bacna soyēnga šmójánama. <sup>2</sup> Chca, tšēngaftanga šmójánama mo chē nje quem luarama enójuabnayēnga monduamancá, y šmonjanēyeunana Satanás, chē bacna espíritēnga obenana bomnēnga y quem luarentša tsbanánoca imomnēngbe amēndayá, chē Bēngbe Bētsábioye ndēyeunanēngbe ainaniñe yomándama espíritu. <sup>3</sup> Tempo bēnga njetscanga fsēnjaniyena ntšamo tšēngaftanga šmonjaniyencá. Bēnga soyēnga fsēnjánama, nje ntšamo ftsjanbošcá nje bēngbe cuerpēngbe tšabiama, y nje ntšamo bēngbe juabna enjamncá bacna soyēnga jamama. Bēnga fsēnjaniyena soyēnga jtsamēse mo chē Bēngbe Bētsábioye nduabuatma entšanga mondbetsamcá; chē causa bēnga fsēnjanomerecena jtsebmomnana chē Bēngbe Bētsabe uabouana castigo, cachcá chē Bēngbe Bētsábioye nduabuatmēngcá. <sup>4</sup> Pero Bēngbe Bētsá sempre tša lastemado entšangbiama endmēna y sempre corente bēnga šondábabuanjēshana; <sup>5</sup> y chíyeca, bēnga cabá mo obanēngcá chabiama fsēnjamna ora, bacna soyēnga fsēnjánama causa, chora cha tojanma bēnga tšabe vida chamotsebmoma y Crístoftaca cánjiñe mo canyácá chamotsemnama. Bēngbe Bētsá tšēngaftangbe tšabiama juabna bómnyayeca, bacna soyēnguentšana tcmojatsebacá. <sup>6</sup> Bēnga Jesucrístoftaca cánjiñe mo canyácá bétsemnayeca, Cristo Jesús cháuatayenama Bēngbe Bētsá tojanma ora y celoca tbojtantbema ora, enjamna mo bēngnaca chámuatayenama Bēngbe Bētsá cuaftjamcá y Cristo Jesúseftaca celoca cuaftatbiamcá. <sup>7</sup> Chca enjamna,

Bëngbe Bëtsá entsanga cháuinÿanyema nyetsca joshjanguama tempënguiñe, ntšamo cha bëngbe tšabiana bëtsá juabna bëtsebomnama, cha Cristo Jesúseftaca bëngbioye tšabe juábnaca šojánanye ora. <sup>8</sup> Er Bëngbe Bëtsá tšëngaftangbiana tšabe juabna yojánbomnayeca, tcmojatsebacá, Jesucristbeñe šmojtsanošbuáchema; pero atsebácanënga šmondmëna, ndoñe cach tšëngaftanga ndayá šmojánmayeca, ndayá atsbočaná jtsemnana endmëna Bëngbe Bëtsabe canye tšetana soye. <sup>9</sup> Atsebácanënga šmondmëna, ndoñe cach tšëngaftanga ndayá šmojánmayeca; chíyeca ndocná quenátobena jtšenábotamnayana atsbočaná yojtsemnana. <sup>10</sup> Bëngbe Bëtsá šojtabiana ntšamo bënga mondmëncá, y Cristo Jesúseftaca cányiñe mo canyáca bëtsemnayeca, Bëngbe Bëtsá mo tsmëma entsangcá cuaftsatsmëncá šojtabiana, tšabe soyënga jtsamëse jtsiyenama. Y ndayá bënga tšabá mondamcá, Bëngbe Bëtsá tempo tojanprontá bënga chamotsamama.

*Crístbeyeca tempcá tšabá Bëngbe Bëtsáftaca jtsatsmënana*

<sup>11</sup> Tšëngaftanga ndoñe judiënga, ndëmuanyënga judiënga cmondubuatma “chë más delicadentse base bobachtema ndëtëtšenënga ca”, chëngcá uinÿnanánënga ndoñe šmondmënama; chënga cachënga jtšenábobuatmana “chë más delicadentse base bobachtema tëtšenënga ca”, y cachëngbe cuerpënguiñe chca jtsamana. Mëntšá, tšëngaftanga chë ndoñe judiënga, <sup>12</sup> šmochjenójuaboye ntšamo tempo šmojamnama, Crístbeñe cabá ndošbuáchiye ora. Chora, tšëngaftanga Cristo ndoñe šmonjábomna, Israeloca entsangbiana stëtsoye šmonjanquedana, y ndoñe šmonjantátšëmbo lempe ntšamo Bëngbe Bëtsá chabe entsanga tojanašebuachenacá. Tšëngaftanga quem luarëntse šmonjaniyena ndocnábeñe ntsobatmancá y Bëngbe Bëtsá ntsabuatmcá. <sup>13</sup> Pero mora tšëngaftanga Cristo Jesúseftaca cányiñe mo canyáca šmontsemna, chë tempo Bëngbe Bëtsá ndoñe šmonjanábuatmënga, y cha tojama chábioye chašmotsábuatmama; y chca yomna, er Jesús, chabe buiñe juabuáshanëse, tšëngaftangbiana tojanóbana. <sup>14</sup> Cach Cristo yojtsama bënga tempcá tšabá Bëngbe Bëtsáftaca chamotsemnana. Cha tojama judiënga y ndoñe judiënga nyetscanga mo cachca entsangcá chamotsemnana, mo nda canye tapiëse tojtsendbemcá, chë ndayëšeca canye luarentša entsanga tmojtsenjáta, chënga enáyaye causa. <sup>15</sup> Cristo chënga mo cachca entsangcá tojábiana, judiëngbe leyënga y mandënga ndocna obenana chamondëtsebomnama jamëse. Chca tojama, cha jóbanëse, chë útoica entsanga mo nye canye tsmëma entsangcá jábiamama, cháftaca cányiñe mo canyáca jtsemnëse. Cha chca tojanma chënga nyetscanga tšabá chamotsiyenama; <sup>16</sup> y Cristo cruciñe tojanóbanayeca, cha tojanma chë útoica entsanga enáyayana chamotsajbanama, y tojanma chë útoica entsanga mo canye entsangcá chamotsemnana, chënga tempcá tšabá Bëngbe Bëtsáftaca chamotsatsmënama.

<sup>17</sup> Cristo quem luaroye tojánabo tšabe noticiënga jabábuayenama, tempcá tšabá Bëngbe Bëtsáftaca jtsatsmënama. Cha quem tšabe noticiënga tojanabuayená tšëngaftanga chë ndoñe judiëngbioye, chë Bëngbe Bëtsá ndoñe šmonjanábuatmënga, y chë judiëngbioynaca, chë Bëngbe Bëtsá imojanábuatmënga. <sup>18</sup> Er chábeyeca, canyánÿënga y ínÿënga montsobena chë Taitábioye jobéconana, er bënga nyetscanga cachca espíritu bëngbe ainaniñe mondbomna, chë Uámana Espíritu. <sup>19</sup> Chíyeca tšëngaftanga, Bëngbe Bëtsabe entsanguentse ndoñe quešmátsmëna mo inÿe luarocana ashjajnëngcá, y ni mo cachëngbe yebnentse ndoyenëngcá, tondayama derecho ndbomnënga. Inÿetšá endmëna; tšëngaftanga derecho šmondbomna cachcá ntšamo Bëngbe Bëtsabe entsanga mondbomncá, y Bëngbe Bëtsabe básënga šmondmëna. <sup>20</sup> Jesucristo y chabe entsanga mondmëna mo canye jebna yebncá. Jesucristbe ichmónënga y chë Bëngbe Bëtsabe juabna oyebuambnayënga mondmëna mo chë ndëtšbënga ndayiñe chë yebna tojtšëcuatjoncá; tšëngaftanga ošbuáchiyënga šmondmëna chë jebna yebnentša soyëngcá, y cach Jesucristo mo chë más uámana luarentse uashacuana ndëtšbecá. <sup>21</sup> Quem más uámana luarentse uashacuana ndëtšbeñe, nyetsca chë bëts yebnentša soyënga jtsëcuatjonana, y tsbanánye más tmojatsjebëse, chë bëts yebnentse tsëm jebna sóynaca chiñe jtsëcuatjonana. Cachcá Cristo, mo chë más uámana luarentse uashacuana

ndëtsbecá, jtsamana nyetsca chábeñe ošbuáchiyënga cháftaca cánjiñe mo canyáca chamotsemnana, y ínÿengnaca cachcá chamotsemnana. Y nyetsca ošbuáchiyënga Crísoftaca cánjiñe mo canyáca tmojtsemna ora, chënga jtsemnana mo Bëngbe Utabnabiama canye bëts yebna jebncá, chábioye jtsatschuanayama. <sup>22</sup> Y tšëngaftanga Efesoca ošbuachiyëngbiámnaca Cristo entsama, chë inÿe chábeñe ošbuáchiyëngaftaca mo canye entsangcá chašmotsemnana. Y chë Uámana Espíritu bëngbe ainaniñe yojtсийénayeca, bënga nyetscanga cánjiñe mondmëna, mo canye bëts yebncá ndayentšë Bëngbe Bëtsá yoyena.

### 3

#### *Pablo Jesucristbe trabajo yojanbonÿena, chë ndoñe judiëngbeñe jamama*

<sup>1</sup> Chca, atšë Pablo utamená séntsemna, Cristo Jesusbiana soyënga entsanga abuaiynaye causa, tšëngaftanga chë ndoñe judiëngbe tšabiama. <sup>2</sup> Er tšëngaftanga ya cmontsamna jtsetatšëmbuama, Bëngbe Bëtsá tšëngaftangbe tšabiama juabna yobomnana; y chca, chë trabajo atšë šojabonÿé, tšëngaftangbe tšabiama jamama. <sup>3</sup> Tšëngaftangnaca cmontsamna jtsetatšëmbuama ndayá Bëngbe Bëtsá šojinÿinÿé, ntšamo cha jamama tempo tojanjuabocá, pero entsanga chca ndoñe tonjaninÿanÿé, y chë soyama ya batšatema tcbonjubuábiana. <sup>4</sup> Chašmojualiá ora, šmochanjátatšëmbona Cristbe soyënga šosertánana, chë tempo ndocná yonjanábuatma soyënga, <sup>5</sup> chë tempo Bëngbe Bëtsá ndocnábioye tbonjaninÿinÿé soyënga; pero mora cha tojinÿanÿé, Jesucristbe ichmónënga nÿe Bëngbe Bëtsabiama oservénëngbioye y Bëngbe Bëtsabe juabna oyebuambnayëngbioye; y cha chca tojama chabe Uámana Espíritoftaca. <sup>6</sup> Ndayá tempo Bëngbe Bëtsá ndoñe tonjaninÿanÿecá mëntšá endmëna: chë ndoñe judiënga Jesucristbe tšabe noticiënguiñe chamojtsošbuaché ora, cachcá ntšamo chë judiënga ošbuáchiyënga Bëngbe Bëtsábiocana mochjoshachiñcá, chëngnaca chábiocana mo otocancá chë soye mochanjóyëngacñe. Chënga mo cach judiënga ošbuachiyëngcá, Cristo mondbomna mo chëngbe mandayacá. Y chca Cristo endmëna mo bestšašcá y chënga nyetscanga mondmëna mo cachabe cuerpentša soyëngcá. Chë ndoñe judiënga ošbuáchiyënga mochanjóyëngacñe lempe ntšamo Bëngbe Bëtsá chë judiënga ošbuáchiyënga tojašebuachenacá. Chca echántsemna chë ndoñe judiëngaftaca, chënga Cristo Jesúsëftaca cánjiñe mo canyáca bëtsemnayeca.

<sup>7</sup> Masque ndoñe šonjanomerecena, mo ndayá cuafjatšetacá, Bëngbe Bëtsá šonjanábuayana cha jtseservénana, tšabe noticiënga entsanga jtsabuaiynayëse; y cha átšëftaca chca tojanma chabe obenánaca. <sup>8</sup> Atšë nyetsca chë Bëngbe Bëtsabe entsanguentšë sëndmëna chë más nduamaná; pero Bëngbe Bëtsá bëts pavor šontsebema, šonjalesenciá chë Cristbe bëtscá tšabe soyënga chë ndoñe judiënga jábuayenama. Chë Cristbe soyënga tša bëtscá endmëna, y chca, quenátopodena chë soyënguentšana lempe jtsabuatmana. <sup>9</sup> Y chë trabajo šonjabonÿé jamama, nyetscanga botamana jinÿama chamotsobenama ndayá Bëngbe Bëtsá yochjama, ndayá cachá, chë nyetsca soyënga tojamá, tempscana yojanjuabnacá. Mëntscóñama Bëngbe Bëtsá chë soye ndocnábioye tbonjinÿinÿé, pero mora aiñe. <sup>10</sup> Chca, Crístbeñe ošbuachiyëngbeyeca, mora chë celoca mándayënga y obenana bomnënga, chamobená juabuátmanana nyets osertánana ntšamo Bëngbe Bëtsá yobomncá. <sup>11</sup> Bëngbe Bëtsá chca tojama, ntšamo cachá yojanjuabnacá nyetsca tescama jamama, y chca cha tojama Jesucrísoftaca, Bëngbe Utabná. <sup>12</sup> Bënga Crísoftaca cánjiñe mo canyáca mondmëna, y chábeñe mondošbuachéyeca, bënga montsobena Bëngbe Bëtsábioye jobéconama tondayama ntjatauatjácá, y corente jtsetatšëmbëse cha ndoñe chašondubatema. <sup>13</sup> Chíyeca atšë cbontsaimpadana ndoñe chašmondëtsajbaná ainaniñe añemo bomnana, atšë séntsesufrina causa, er chë tšëngaftangbe tšabiama tsësufrinentšana, tšëngaftangbiana tšabe soyënga endóbocana.

*Cristbe bonshánana*

<sup>14-15</sup> Y chca, Bëngbe Bëtsá, chë Taitá, ndábentšana nyetsca pamíllanga celoca y quem luarentše uabaina imóyëngacañe, chabe delante joshaméntšase, <sup>16</sup> séntseimpadana, chabe bëtská uámana bomnánaca chaoma, tšëngaftanga ainaniñe obenana y bëts añemo chašmotsebonnama, chabe Espíritbeyeca, <sup>17</sup> y tšëngaftanga Crístbeñe jtsošbuáchiyëse, mua tšëngaftangbe ainaniñe chaotsiyenama. Bëngbe Bëtsánaca séntseimpadana, cha y ínýenga nyets ainánaca jtsababuánýeshanëse, <sup>18</sup> tšëngaftanga y nyetsca Bëngbe Bëtsabe entšágnaca tšëngaftangaftaca, chašmotsobena josértama Crístbe bonshánana bëngbiana tša bëtská yomnama. Nderado nda tojontsé chabe bonshánana jatsëmbonana mo canýe soye cuaftsemncá, cha ndocna te nanjobenaye jtsetatšëmbuana tëntšoye ndayéntscoca yomna y nyanëjoye ndayéntscoca, jashenoye ndayéntscõe y tsbanánoye ndayéntscõe yomna. <sup>19</sup> Atše séntseimpadana tšëngaftanga chašmobená chë bonshánana juabuátmanana (chë bonshánana puerte bëtská endmëna causa, bënga ndocna te quemochatobenaye josértama ntšamo chë soye lempe yomnana). Pero séntseboše, tšëngaftangbe ainaniñe nýe Bëngbe Bëtsabe soyënga chaotsemna y tšëngaftanga chašmotsiyena jtsamëse, ntšamo tšëngaftanga chašmotsamama Bëngbe Bëtsá yojuabnacá.

<sup>20</sup> Y mora, nyetscanga Bëngbe Bëtsá chamotsatschuaná. Cha obenana yobomna ntšamo bënga tmojtsojtjanañe o tmojtsejuabnama más soyënga jamama, chabe puerte bëts obenánaca; y chë obenana bëngbe ainaniñe yojtsemánda y yojtsama bënga ainaniñe sempre ošbuáchiyana chamotsebonnama. <sup>21</sup> ¡Entšanga Bëngbe Bëtsá chamotsatschuaná nyets tempo y nyetsca tescama, ndayá Crístbeñe ošbuáchiyënga tmojtsamama y cach Cristo tojamámnaca! Chca chaotsemna.

## 4

*Uámana Espíritbeyeca bënga cánýiñe mo canýacá jtsemnana*

<sup>1</sup> As, atše chë cárceloye utamená, Bëngbe Utabnabiama trabájaye causa, tšëngaftanga cbontsaimpadana, ndëmuanýenga Bëngbe Bëtsá tcmojáchembo chabe entšanga chašmotsemnana, sempre chašmotsiyena mo chë entšangcá ndëmuanýenga Bëngbe Bëtsá cach soyama tojánachembo y chca imomerecena. <sup>2</sup> Cada ona chamotsenjuabná mo chë ínýenga chabiana más uámanënga tmojtsemncá, y nyetscángbioye puerte bonshanánaca šmochtsobátmana, y bëtská bonshánana jtsebonnëse šmochtsenëuantana; <sup>3</sup> sempre šmochtsejuabnaye y šmochtsentsëna tšëngaftanga nyets tempo cánýiñe mo canýacá chašmotsemnana, nyetsca tšëngaftanga natjémbana jtsemnëse. Y tšëngaftanga šmotsobena cánýiñe mo canýacá jtsemnana chë Uámana Espíritbeyeca. <sup>4</sup> Bënga Jesucrístbeñe ošbuáchiyënga bëtsemnayeca mondmëna mo cach cuerpentšëngcá, chë Crístbe cuerpo, y cachca Espiritu bënga nyetscanga ainaniñe mondbomna. Bëngbe Bëtsá šojáchembo, bënga chábeñe jtsošbuáchiyëse, nyetscanga cachcá šochjátšatayama chamotsobátmanama. <sup>5</sup> Bënga nyetscanga cach Utabná mondbomna, cachca ošbuáchiyana Jesucrístbeñe mondbomna, y bënga nyetscanga uabáinënga mondmëna chca betsošbuáchiyama. <sup>6</sup> Bënga ošbuáchiyënga nyetscangbiana cach Bëngbe Bëtsá y Taitá endmëna. Cha bëngbe amëndayá endmëna, chabe obenana nyetscángbeñe jtsinýnana, y nyetsca bëngbe ainaniñe chabe Espiritu endmëna.

<sup>7</sup> Pero bënga, cada ona tšetana obenana tojóyëngacñe, tšabe soyënga jamama, ntšamo Cristo jatsatayama tojanbošencá, chábeñe ošbuáchiyënga jujabuáchama. <sup>8</sup> Chíyeca, Bëngbe Bëtsabe uabemana palabrengüiñe Jesucristbiama mëntšá endayana:

Cha celoye tontantsjuá, y cháftaca tonjanéyamba nyetsca chabe uayayënga, chë tojánayënjananga,

y chabe entšángbioye obenana tonjanatšatá, tšabe soyënga jamama ca.

<sup>9</sup> ¿Y ndayá yojtsayana chë “cha tontantsjuá ca”? Chca entsayana co Cristo natsana, quem luaroye tojánastjango ca. <sup>10</sup> Y Cristo, chë tojanastjanguá, cachá endmëna nda celoca chë más tsbanánoye tojtantsjuá; chca, canýe ora nyétscañe cha chaotsemnana.

<sup>11</sup> Y cachá, chë tšabe soyënga jamama obenana tojanatšatá ora, tojanma chábeñe ošbuáchiyënguentše chamotsemna ínÿengna chabe ichmónënga, ínÿengna Bëngbe Bëtsabe juabna oyebuambnayënga, ínÿengna tšabe noticiënga Cristbiana abuayiyayënga, y ínÿengna ošbuáchiyënga anÿenënga y Bëngbe Bëtsabe soyëngama abuá-tambayënga. <sup>12</sup> Cristo tojanabacacangna chabe entšángbioye mochjanëjabuache, cha tojanabanÿé trabajo chënga chamotsamama, y nÿetsca ošbuáchiyënga, chë nÿetscanga cánÿiñe mondmëna mo Cristbe cuerpcá, cada te más ošbuáchiyana y bonshánana chamotsebomnama, <sup>13</sup> bënga nÿetscanga chamobenantscuana cachca ošbuáchiyana Jesucristbeñe jtsebomnama, y Bëngbe Bëtsabe Uaquiñabiama nÿetscanga lempe cachcá jtsetatšëmbuama. Chca, bënga mochanjashjache jtsemnama lempe ntšamo Cristo yomncá, mo bëtsétsanga bëtscá juabna bomnëngcá, <sup>14</sup> y ndoñe nÿe mo basengcá, Bëngbe Bëtsabe soyëngama jtsetatšëmbuama. Chë soyënguiñe ya ndoñe más nÿe mo basengcá quemochátsmëna, ndëmuanÿënga paselo jáingñama yomna. Mo canÿe barquëshá nÿe ndaye bínÿiacnaca tojtsëyambancá, básefta entšanga nÿe ndaye buatëmbana soye tmojatuenca jatsyeunanana; bënga ndoñe chca quemochátsmëna, ya ndoñe más bëngbe juabna quemochatstróca, nÿe ndaye tmojatuenta tsëm sóyeca, ínÿengbioye áingñayënga. Chënga becá montsetatšëmbo ntšamo entšanga jáingñana, y montseboše chë montsabatambá bostero soyënga bënga jtseyeunanama. <sup>15</sup> Chamna, chë Bëngbe Bëtsabe ndegombre soyëngama bonshanánaca jtsóyebuambnayëse, šontsamna jashjáchana jtsemnama lempe ntšamo Cristo yomncá. Cha bëngbe amëndayá endmëna, cachcá ntšamo bestšaše chë cuerpentša soyënga jtsemandayancá. <sup>16</sup> Mo canÿe bestšašcá, chëse jamana nÿetsca chë cuerpentša soyënga ndayentše chamueneñnama y chiñe jobónjuama chamotsobenama, chë cuerpo saná chaotsebomnama jtsamëse, chca, nÿets cuerpo tšabá chaóbochema, cachcá Cristo, chë nÿetsca ošbuáchiyëngbe amëndayá, chabe obenánaca jamana chënga cada te más ošbuáchiyana y bonshánana chamotsebomnama. Cada cuerpentša soye tojtsama ntšamo chë soye chaotsamama tomncá, as nÿets cuerpo tšabá jobóchana; cachcá, ošbuáchiyënguentše cada ona tojtsama ntšamo jamama tbojtsemncá, as nÿetsca ošbuáchiyënga cada te más ošbuáchiyana mochántsebomna, puerte jtsebobonshánëse.

*Cristoftaca cánÿiñe mo canÿacá jtsemnëse tsëm vida šmochtsebomna*

<sup>17</sup> Mëntšá entsemna ntšamo cbontsëtsëtsnacá, y Bëngbe Utabná endmëna nda tojama atše mando chaitsebomnama tšëngaftanga chca jáuyanama: Ndoñe más šmattsiyena bacna soyënga jtsamëse, mo chë Bëngbe Bëtsábioye nduabuátmënga mondbetsamcá; chënga jtsiyenana jtsamëse ntšamo cachëngbe ndoservena juabnënga tojtsamëndacá. <sup>18</sup> Chëngbe juabnoca obenana mondbomna nÿe ndoñe ndegombre soyëngama josértama. Chënga ndoñe quemátsbomna chë Bëngbe Bëtsábicana yóbocana tšabe vida, er chënga ndoñe quematsleséncia chë Bëngbe Bëtsabe soyënga chëngbe ainaniñe chaómashënguama; y chca endmëna, er chënga tmojajuabó y tmojama chë Bëngbe Bëtsabe buayenana soye chëngbe ainaniñe tondaye chaondómashënguama. <sup>19</sup> Chënga bacna soyënga tmojtsama ora, tondayama ntsenócochinÿenana; chënga nÿets tempo jesentšénana nÿetsca bacna soyënga amana, y chca jtsamana tondayama ntjatenojuanaycá.

<sup>20</sup> Pero chca ndoñe quenjatsmëna ntšamo tšëngaftanga Cristbe soyëngama šmojanatšjinÿe y ntšamo chábioye šmojanabuatmancá. <sup>21</sup> Ndegombre tšëngaftanga chabiama šmojanuena y ínÿënga tcmojanabuatambá mo chábeñe ošbuachiyëngcá y ntšamo chë ndegombre soyënga Jesucristbeñe endbinÿncá. <sup>22</sup> Chcasna, ntšamo tšëngaftanga šmojanjuabná, šmojansentina y šmojanamcá Jesucristbeñe cabá ndošbuachená ora, mora lempe stëtšoye šmochjaquéda; ntšamo tempo tšëngaftanga šmojanjuabná, šmojansentina y šmojanamcá, canÿe ondbiamnaye juabnentšana yojóbocana, tšëngaftanga bacna soyëngama juabnéngaca mandánënga jtsemnëse, y chë juabnënga tšëngaftangbioye cmojánaingñaye. <sup>23</sup> Tšëngaftanga cmontsamna tšëngaftangbe juabniñe tsëm y

tšabe juabnënga jtsebmomnana. <sup>24</sup> Tšëngaftanga cmontsamna jashjáchana mo tsmëma entšangcá jtsemnama, y chë ntšamo tempo šmojanamcá mora ndoñe cachcá chašmondétsamama. Chca, tšëngaftanga šmochanjashjache jtsemnama ntšamo Bëngbe Bëtsá yomncá. Bëngbe Bëtsá chca tsmëma entšangcá tcmojábiana, tšëngaftanga chašmotsiyenama jtsamëse Bëngbe Bëtsabe bominyiñe tšabá yomna soyënga y chábioye jadórana soyënga, chë ndegombre soyënguentšana óbocana soyënga.

<sup>25</sup> Chcasna, ya ndoñe más šmattsebostero, ndayá cada ona cháuyana ndegombre soyënga cachacá Jesucristbeñe ošbuachiyáftaca, er nyetscanga cányiñe mondmëna mo nye canye entšangcá. <sup>26</sup> Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjaleséncia bënana chacmetëna y ndoñe nyets te chacmondetëna. <sup>27</sup> Ndoñe šmatjaleséncia Satanás ndayánaca tšëngaftangaftaca chaomama.

<sup>28</sup> Chë yojanatbëbaná chaujbaná atbëbanama y jatrabájama chaontsé; cachabe cucuátseca tšabe trabajo chaotsóboma, chca, ndayánaca cha chaotsebmomnana chë ujabótënga jatšatayama.

<sup>29</sup> Bacna palabrënga ndoñe šmattsichamo, pero añe tšabe palabrënga y nya chorsca ujabótama palabrënga, chë inye entšángbioye jujabuáchama más Cristcá chamotsemnama, chënga Bëngbe Bëtsábicana tšabe bendicionënga chamóyëngacñama, chë ndayá chašmojtsëtsësná sóyeca. <sup>30</sup> Ndoñe šmattsama soyënga, Bëngbe Bëtsabe Uámana Espíritu chabongmema. Bëngbe Bëtsá tojama Uámana Espíritu tšëngaftangbe ainaniñe cháumashënguama, y chca, tcmojanainýnaná chabe entšanga bëtsemnayeca, chë yochjóshjango tescama, Bëngbe Bëtsá chabe entšanga nyetsca tescama yochjatsebacaye orscama.

<sup>31</sup> Inyëngbiana bacna juabnënga ainaniñe ndoñe chašmondétsebmomna, etonánënga ndoñe chašmondétsemna, ni ínýengaftaca ndoñe chacmondetëna. Inyëngbioye ndoñe chašmondétsabuachembuana, ínýengbioye ndoñe šmatjoyánguango y ndaye bacna sóynaca ndoñe šmattsama. <sup>32</sup> Nyetscángaftaca tšábënga šmochtsemna, nyetscanga šmochtsenlastemana y šmochjenperdoná, ntšamo Bëngbe Bëtsá, Crístbeyeca tcmojaperdonacá.

## 5

### *Ntšamo yomna Bëngbe Bëtsabe básënga chamotsiyenama*

<sup>1</sup> Tšëngaftanga, Bëngbe Bëtsabe bonshana básënga quetsomñecá, nya šmochtsentšëna cachacá jtsemnama. <sup>2</sup> Šmochtsiyena nyetsca soyënga bonshanánaca jtsamëse, ntšamo Cristo šojanababuanýeshancá; chca, cha chabe derecho vida jtsobomñama cachcá tojanonýa y bëngbiana tojanóbana. Y ntšamo Cristo tojanmca, yojamna Bëngbe Bëtsábioye jëtschuayama, y chabe bominyiñe tša tšabá yojtsemna, mo ndaye ora Bëngbe Bëtsá oyejuayá jóyëngacñana ndayá tcojóba y altaroca tcojajuinýese, y chë soye botamana jtsonguëtšiyana.

<sup>3</sup> Tšëngaftanga, Bëngbe Bëtsábënga šmomnënga, ndoñe quecmátamna shembása o boyabásaftaca bacna soyënga jtsamana, ni chca játamama jtsejuabnayana y jtsebošana, y chë nye yapa jésebošana más soyënga ínýëngbiana jtsebmomnana cach ndoñe. Ni chë soyëngama ndoñe šmattsóyebuambnaye. <sup>4</sup> Bacna soye ndoñe šmattsóyebuambnaye, ni corente ntjenojuaboycá, ni nye ntšámncana bacna soye jenbotatšëmbonana cach ndoñe, er chë soyënga tšëngaftangbiana ndoñe tšabá ntsemnana. Chca játamamna, más tšabá, Bëngbe Bëtsá šmochtsatschuanaye. <sup>5</sup> Er tšëngaftanga ya šmondétatšëmbo, ndocna chë shembása o boyabásaftaca bacna soye amá, ndocna chë nye chabe bacna juabnëngaca soyënga jtsamama oyená, o chë nye más soyënga ínýëngbiana jtsebmomnana bošá y amá (chca jtsayanana chabiana más iuámana soyënga jtsebmomnana, Bëngbe Bëtsábioye jatsbobonshánama), chca amënguentšana ndocná tondaye quechatóyëngacñe ndayá Bëngbe Bëtsá chabe entšángbioye jatšatayama tojašebuachenantšana, Cristo y Bëngbe

Bëtsabe amëndayoca. <sup>6</sup> Ndocná chacmondaingñé ndoñe ndegombre tondmëna palabrëngaca, bacna soyënga chašmotsamama, er chë causa chë uabouana castigo echanjobaye, ndáyeca Bëngbe Bëtsá chábioye ndëyeunanënga yochjácastigaye. <sup>7</sup> Chíyeca, chca amëngbe soyënga tondaye šmattsama.

<sup>8</sup> Tempo tšëngaftanga šmojanijena bacna juabnënga jtsebomnëse y bacna soyënga jtsamëse, mo ibetiñe cuaftsiyencá, pero mora Bëngbe Utabnáftaca cánýiñe mo canýacá bëtsemnayeca, chabe soyënga šmontsetátšëmbo y sempre šmondétsemna cháftaca, chë entšangbe juabnënga binýnayáftaca. Šmochtsiyena jtsamëse mo chë binýnayabe entšangcá. <sup>9</sup> Chë binýnayábeyeca entšanga tšabe soyënga jtsamana, chë Bëngbe Bëtsabe bominyiñe tšabá yomna soyënga, y ndegombre soyëngnaca. <sup>10</sup> Nya šmochtsentšena soyënga jamama, Bëngbe Bëtsá oyejuayá chaotsemnana. <sup>11</sup> Chë mo ibetiñe cuaftsiyencá oyenëngbe bacna soyënga tondayama ntsošervënana, y tšëngaftanga chca ndoñe šmattsama. Chamna, chëngbioye šmochjínyanýiye chënga ndoñe tšabá tmonjamama. <sup>12</sup> Ndegombre, nyë chë ndayá chënga mo iytemencá tmojamama jóyebuambayama ya cuantséuatja; <sup>13</sup> pero nyetsca soyënga binýniñe tmojacjá ora jtsopodénana tšabá jinýyama ntšamo ndegombre tomncá. Cachcá, ntšamo entšanga tmojamcá chë binýnayá chaojinýanyé ora, echantsopodena jtsotatšëmbuama ntšamo chë soyënga yomnana; <sup>14</sup> er ndayánaca binýniñe tojtsinýinýena, jtsopodénana jinýyama ntšamo ndegombre chë soye tomncá. Cachcá, ntšamo entšanga iytemencá tmojtsamcá chë binýnayá chaojinýanyé ora, chënga mochántsetatšëmbo bacna soyënga imojtsamama. Chíyeca mëntšá jtsichámuana:

Botamana cochjájuaboye, aca ndoñe quecátobena jenomándana, mo canya cuaftso-  
mañcá;

chë bacna soyënga ama causa, Bëngbe Bëtsabe bominyiñe mo obanëngcá imom-  
nënguentšana šmochtsojuánañe,

y Cristo acbe juabnënga echantsebínýnaye ca.

<sup>15</sup> Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero añe chë chca soyëngama osertanëngcá. <sup>16</sup> Lempe ntšamo chašmojobenacá nyets tempo tšabe soyënga šmochtsama, er quem tempo entšanga yapa bacna soyënga montsama. <sup>17</sup> Ntjenojuaboycá ndoñe šmattsama, mo chë ndosertanëngcá. Pero añe bëtscá šmochtsentšena ndayá Bëngbe Utabná jamama yobošcá chacmósertama. <sup>18</sup> Ndoñe šmattsótmenaye, er chë soye entšábioye juanatsana jenomándama ndoñe chaondëtso-  
bena; chamna, šmochjama Uámana Espíritu sempre y bëtscá tšëngaftangbe ainaniñe chaotsemándama. <sup>19</sup> Šmochjenatsëtsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espíritu inétsama tšëngaftanga chašmotsobena jacántama soyëngaca; chca, nyets ainánaca Bëngbe Utabnabiama šmochjacántaye y cha šmochtsatschuanaye. <sup>20</sup> Nyets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

*Ntšamo yomna canye yebnentšënga chamotsemnana*

<sup>21</sup> Nyetscanga šmochtsenëyeunana, tšëngaftanga Crístbioye puerte šmorrespetá-  
nayeca.

<sup>22</sup> Shémanga, šmochtsetátšëmbo tšëngaftangbe boyanga chë yebnentša mándayënga imomnana; y nyets tempo chca šmochtsama, Bëngbe Utabná chašmotsobedecënana. <sup>23</sup> Er boyá endmëna shembe mandayá y inýená, ntšamo Cristo chë ošbuáchiyëngbe mandayá y inýená endmëncá. Cha chënga tojatsebacá y mora cha chënga entsamënda, mo chë bestšaše nyets cuerpo jtsemandayancá; <sup>24</sup> y chca, ntšamo chë ošbuáchiyënga, Cristo chëngbe amëndayá yomnana imotatšëmbcá y chca jtsamana, cachcá, chë shemángnaca entsamna jtsemnana nyetsca soyënguiñe chëngbe boyángaftaca.



<sup>25</sup> Boyanga, tšëngaftangbe shémanga šmochtsababuánjeshana, ntšamo Cristo chábeñe ošbuáchiyënga yojanababuanjeshancá, y chca, chabe derecho vida jt-sobomñama cachcá tojanonjá y chëngbiamama tojanóbana. <sup>26</sup> Chca tojanma, chënga chabe entšanga y puerte tšábenga jábiamama; y chënga tmojánenabaye ora, tmojaninýanyé Bëngbe Bëtsá chëngbe bacna soyënga tojánabuajuanama, y chabe delante tšábenga chamotsemnana cha tojanmama. Cha chca tojanma, er chënga chábeñe imojtsanošbuaché, chabiamama buayenana soyënga tmojanuena ora. <sup>27</sup> Cha chca lempe tojanma, chë ošbuáchiyënga japróntayama corente tšábenga y uámanënga cachabiamama chamotsemnana, ndocna bacna soye ndobomnënga, ni ndocna entšá chaondobená jayanama chënga imomna chë ndoñe tšabá tmonjamënga ca, ni ndocna inye cachca sóyeca. <sup>28</sup> Ntšamo canye boyá cachabe cuerpo endbetsebobonshancá, cachcá cha bontsemna chabe shémbioye jtsebobonshánana. Nda chabe shémbioye tbojtsebobonshana, cachábioye jtsenobobonshánana, er chata cánýiñe jtsemnana mo nye canye entšá cuenta. <sup>29</sup> Er ndocná cachabe cuerpo jtsáboyënjana, ndayá saná janguangoñana y jtsinýenana, ntšamo Cristo bënga chë ošbuáchiyëngaftaca endbetsamcá; <sup>30</sup> er bënga nyetscanga cánýiñe mondmëna mo chabe cuerpo cuaftsemncá, y bënga mo chabe cuerpentša soyënga cuaftsemncá. <sup>31</sup> Ntšamo Bëngbe Bëtsabe uabemana palabrënguñe endayancá: “Chíyeca, boyabása chabe taitá y chabe mamá echanjésabashejuana chabe shémaftaca jenútanama, y chë útata mo canýacá bochántsemna ca.” <sup>32</sup> Chë soyënga josértama puerte totcá comna, pero atše šcuayana, chë soye entsoyebuambná ntšamo Cristo chábeñe ošbuáchiyëngaftaca yomnana. <sup>33</sup> Pero morna, tšëngaftanga cada ona cachabe shémbioye chabotsebobonshana, ntšamo cachá iuenobobonshancá, y shema boyábioye ndoñe stëtsoye chabondëquedá.

## 6

<sup>1</sup> Básenga, Bëngbe Utabnáftaca cánýiñe mo canýacá bétsemnayeca, tšëngaftangbe bëtsétsangbioye šmochtsayaunana, er chca jamana tšabá endmëna. <sup>2</sup> Moisesbe leyiñe canye mando endmëna, y chentše endmëna chë Bëngbe Bëtsabe natsana mando, ndayentše cha tojašbuachená tšabe bendicionënga jamama: “Acbe taitá y acbe mamá ndoñe stëtsoye catjëttsaquédaye, <sup>3</sup> tšabe vida chacuetsobomñama y quem luarentše bayté chacuetsiyenama.”

<sup>4</sup> Taitanga, ndoñe šmattsama tšëngaftangbe básenga chauetënana; más tšabana, chënga šmochtsabéchaye jtsabuátambayëse y jucacánëse, ntšamo Bëngbe Utabná endbetsabuatambaycá.

<sup>5</sup> Tšëngaftanga, chë nyets tempo nye ínýabiamama oservénënga, tšëngaftangbe nduiñënga šmochtsayaunana; chca šmochtsama puerte respétoca, bëtscá cuedádoca y nyets ainaniñe tšabe juabnéngaca, mo cach Crístbioye cuaftseservencá. <sup>6</sup> Y chca chë nduiñëngbioye šmochtsaservena, ndoñe nye chënga chacmojtsénýa ora, mo nda nye entšangbe delante tšabá joquédama cuaftsebošcá, ndayá Cristbe oservenëngcá, chënga nyets ainánaca jtsamana ntšamo Bëngbe Bëtsá tojtsebošcá. <sup>7</sup> Nyetsca trabajotémënga šmochtsama nyets tšëngaftangbe añémoca, mo Bëngbe Utabnabiamama cuaftsetrabajacá, y ndoñe nye entšangbiamama. <sup>8</sup> Er tšëngaftanga ya šmondétatšëmbo, cada ona, nyets tempo nye ínýabiamama trabajayá o nye cachabiamama trabajayá tomna, ntšamo tšabe soyënga tojamcá Bëngbe Utabnábiocana yochjójyëngacñe.

<sup>9</sup> Y tšëngaftanga, ndëmuanýëngbiamama ínýënga nyets tempo imoservena, cachcá tšabá chëngaftaca šmochjamna, tondayama ntsaútatjñayëse. Šmochtsenójuabnaye, Bëngbe Utabná chë celoca endmëná, tšëngaftanga y chëngbe mandayá yomnana, y chabiamama nyetscanga cachcá monduámama.

*Ndayá Bëngbe Bëtsá entšanga tojatšatá Satanasbiamama jenéuyanama*

<sup>10</sup> Y morna, Bëngbe Utabnáftaca cánýiñe mo canýacá jtsemnëse, ainaniñe bëts añemo šmochtsebmoma, chë Bëngbe Utabnabe bëts obenanentšana óbocana añemo. <sup>11</sup> Mo

canÿe soldadká, ba soyenga jtochëtjuana chë tmojtsentsjananga ora uayayëngbiana jenéuyanama, tšëngaftángnaca cachcá, nyetsca chë Bëngbe Bëtsá cmojatšatá soyéngaca šmochtseprontana jenéuyanama, tšëngaftanga jáingñama Satanás ntšámnaca tojtsama ora, ndoñe chacmondáyëñjanama. <sup>12</sup> Er bënga ndoñe quemuatenojuerzana cach quem luarentša entsángaftaca jenëyénjanama, ndayá bacna espíritënga mando bomnéngaftaca; bacna espíritënga obenana bomnéngaftaca; y quem luarentša entsanga, chë bacna juabna bomna causa y Bëngbe Bëtsabe soyenga nduabuatma causa, mo ibetiñe cuaftsoyencá oyena entsángbioye améndaye espíritëngaftaca; y chë tsbanánoca luarënguñe imomna y bacna soyenga chaotsebínýnama ama espíritëngaftácnaca. <sup>13</sup> Chíyeca, lempe ntšamo Bëngbe Bëtsá cmojatšatacá šmochjójyëngacñe y chë soyenga jtsamëse šmochtsiyena jtseprontánama, mo canÿe soldado jenéuyanama y jáyëñjanama bëtscá soyenga tojtochëtjácá. Chca šmochjama, chë uayayá Satanás tšëngaftangbioye jáingñama chaojtsama ora ndoñe chacmondáyëñjanama, y jenéuyanama lempe jtsamëse, chašmobená cha jayénjanama.

<sup>14</sup> Mo canÿe soldadká, jabuache jtasnayana y cochaca canÿe morocho soye jenácochjatsana jtsevalentiana y ndoñe chamondëyénjanama, tšëngaftángnaca cachcá, ntšamo ndegombre yomncá jtsamëse šmochtsiyena, mo chë jabuache cuaftasnacá, y chë Bëngbe Bëtsabe bominyñe tšabá yomna soyenga jtsamëse, mo chë morocho soye cochaca cuaftjenacochjatscá, chca, Satanás tšëngaftangaftaca tondaye chaondobená jamama. <sup>15</sup> Mo canÿe soldadká jtsohecochëtjuana betscó jobónjuama jtseprontánama, tšëngaftángnaca cachcá, Bëngbe Bëtsabe obenánaca sempre šmochtseprontana jtsabuayiyayama ntšamo Bëngbe Bëtsá inétsama entsanga tempcá tšabá cháftaca chamotsatsmënana. <sup>16</sup> Canÿe soldado escudo jtsebomnana chë uayayabe uajuinýinyana flechëjuangá chabe cuerpiñe ndoñe chaonduámashënguama. Cachcá, tšëngaftanga cmontsamna Jesucristbeñe puerte jtsošbuáchiyana, mo escudo cuaftsebomncá, chca, chë bacna soyenga mandayá Satanás tšëngaftangaftaca tondaye chaondobená jamama, tšëngaftangbe osbuáchiyana jabuajuánama cha tojtsama ora. <sup>17</sup> Mo chë soldadká, canÿe morocho buchtsanëse tojtabuchëtsëse chabe bestšaše jenéuyanama, tšëngaftángnaca cachcá, sempre šmochjésejuabnaye Bëngbe Bëtsá cmojatšebacama, y chë juabna cmochanjújabuache, mo canÿe morocho buchtsanëse cuaftsabuchëtsancá. Mo canÿe soldadká, chë uayayábioye jayénjanana, chabe espadéjaca japéliase, cachcá tšëngaftanga, Bëngbe Bëtsabe palabra šmochtsóyebuambnaye Satanás jayénjanama. Uámana Espiritu jtsamana, tšëngaftanga Bëngbe Bëtsabe palabra chašmotsebomnana. <sup>18</sup> Nyets tempo chë Uámana Espiritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábioye jtseimpadánëse. Yejuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuënta ora, y chca šmochjama Bëngbe Bëtsábeñe sempre jtsobátmanëse, y Jesucristbeñe ošbuáchiyëngbiana nyetscangbiana cha šmochtseimpadana.

<sup>19</sup> Atšbiámnaca Bëngbe Bëtsá šmochtseimpadana, atše jóyebuambayama chajontsé ora, cha chë buayenana soye chašúyanama; y atše chayobená tondayama ntjatauatjácá jóyebuambayana, y chca, entsanga chayinýanyé Jesucristbiana tšabe noticiënga, ndayá chënga tempo ndoñe monjántatšëmbo. <sup>20</sup> Bëngbe Bëtsá šojichmó mo canÿa chabe cuenta oyebuambnayacá, chë buayenánama entsángbeñe jóyebuambayama, y chca bétsamama, mora atše utamená séntsemna. Atšbiana Bëngbe Bëtsá šmochtseimpadana, atše chayobenama Cristbe buayenánama tondayama ntjatauatjácá jóyebuambayana, ntšamo atše jamama šojtsemncá.

#### *Pablo chënga jtadióšoftanama*

<sup>21</sup> Tíquico, Jesucristbeyeca bëngbe bonshana catšata y canÿe entsá tšabe palabra bomná, Bëngbe Utabnabe trabajo jamama oservëniñe, ntšamo atše stsemnana y ndayá stsamama tšëngaftanga chašmotsetatšëmbuama, lempe cmochanjácuntaye. <sup>22</sup> Chama

cha tšëngaftangbioye sënjichmó, ntšamo muentše fstsemnama chacméyanama, y tšëngaftanga ainaniñe añemo chašmotsebomnama chaomama.

<sup>23</sup> Atše séntseimpadana Bëngbe Bëtsá chë Taitá y Bëngbe Utabná Jesucristo, chaboma chë Jesucristbeyeca catšátangbe ainaniñe tšabe ebionana chašmotsebomnama, y Bëngbe Bëtsábioye y ínÿengbioye puerte chašmotsababuánÿeshanama, Jesucristbeñe tšëngaftangbe ošbuachiyánaca; <sup>24</sup> y chaboma, chë Bëngbe Utabná Jesucristbioye bëts bonshanánaca imobobonshanéngbeñe tšabe bendicionënga chaotsemnama, canÿe ndocná yondobena jatrócama bonshanánaca.

## Filipenses

### *Jacheuayama*

<sup>1</sup> Pablo y Timoteo, Jesucristbiamá oservénata, quem tsbuanácha fséntsabiamná Filipos bēts puebloca Bēngbe Bētsabe entšanga imomnēnga, y Jesucristoftaca cányiñe mo canyáca imomnēngbiamá. Fséntsabiamná nyetsca chē Jesucristbeñe ošbuáchiyēngbiamá, nyetsca chentša uanatsanéngaftaca y chē inye ošbuáchiyēnga ujabuáchaniñe trabajayéngaftaca. <sup>2</sup> Atše séntseimpadana Bēngbe Bētsá Bēngbe Taitá y Bēngbe Utabná Jesucristo, chaboma tšēngaftangbeñe tšabe bendicionēnga chaotsemnama, y chaboma tšēngaftanga ainaniñe tšabe ebionana chašmotsebomnama.

### *Pablo Bēngbe Bētsábioye tbojtanchuá ošbuáchiyēngbiamá*

<sup>3</sup> Cada tšēngaftangbiamá stenojuabó ora, Bēngbe Bētsá tšēngaftangbiamá sēndbētsatschuanaye; <sup>4</sup> y Bēngbe Bētsá tšēngaftangbe tšabiamá stseimpadana ora, atše corente oyejuayá chca sēndbētsama, <sup>5</sup> ntšamo tšēngaftanga atše šmojuájabuachama, tšabe noticiēnga Jesucristbiamá entšanga abuyayñayañe, tšēngaftanga Jesucristbeñe jtsošbuáchiyama šmonjanbojatšé orscana y méntscóñama. <sup>6</sup> Atše corente séntsetatšēmbó, Bēngbe Bētsá tojanbojatšé tšēngaftangbe ainaniñe tšabe soyēnga jtsamama, y más tšabe soyēnga yochtsamama. Y chca yochtsama, lempe ntšamo tšēngaftangbiamá cha yojtsejuabnacá chaohnēnguēntscuana, y chca, Cristo Jesús yochjésabēntscuana. <sup>7</sup> Atše tšēngaftangbiamá sempre ainaniñe sēndbētsenojuabnaye, chíyeca atšbiamá puerte tšabá entsemna chca tšēngaftangbiamá jtsejuabnayana. Tšēngaftanga nyetscanga atše šmonjuájabuache jamama chē Bēngbe Bētsá tša tšabia bētsemnayeca šonjanēntšabuaché trabajo. Atše chē Bēngbe Bētsabe trabajo séndbomna jamama, mora séntsētámēna ora o natjēmbana shjoca stsana ora, nyetscángbioye tšabá inyinyñayañe chē tšabe noticiēnga ndegombre soyēnga bētsemnama, y bētsca amiñe entšanga chē soyēnguiñe corente chamotsošbuáchemá. <sup>8</sup> Bēngbe Bētsá yotátšēmbó ntšamo séntsichamcá ndegombre bētsemnama. Atše tša séntseboše tšēngaftanga jánñama y cbontsababuanñeshana cachcá ntšamo Cristo Jesús atše šondbobonshancá. <sup>9</sup> Atše, Bēngbe Bētsá séntseimpadana tšēngaftanga cada te más cha chašmotsebobonshánama y chē ínñyēngbioynaca, chca, osertánana chašmotsebomnama ndayá chē ndegombre soye bētsemnama jtsetatšēmbuama, y chašmotsetátšēmbó ndayá tšabá o ndayá ndoñe tšabá tondmēnama; <sup>10</sup> y chca, chašmotsobena siempre jabocacayama chē puerte tšabá yojtsemna jamama soye. Chca, Cristo yochjésabo ora, tšēngaftanga puerte tšabe vida šmochántsebomna, bacna soyéngaca ndēmandánēnga; y tondaye quešmochátama, chora chē entšanga chca ndoñe tšabá quenátsmēna ca chamuátichamuama. <sup>11</sup> Y lempe ntšamo chašmojtsamcá ndegombre tšabá echántsemna, y nñe Jesucristo endobena jamama entšanga chca chamotsamama. Nyetsca chē tšabe soyēnga echántsemna, Bēngbe Bētsá puerte bētsá y uamaná bētsemnama jinñanyiyama.

### *Atšbe vida endmēna Cristo jtseservénama*

<sup>12</sup> Jesucristbeyeca atšbe catsátanga, atše séntseboše tšēngaftanga chašmotsetátšēmbó, ntšamo atše tijapasama, más bētsca entšanga Jesucristbiamá tšabe noticiēnguiñe chamotsošbuáchemá tojoservema. <sup>13</sup> Chca, nyetsca chē romanēngbe mandadbe bēts yebna bojanýá soldadēnga y chē inye entšanga quem luarentše montsetátšēmbó atše utamená stsemna, atše Cristbiamá tstrabája causa. <sup>14</sup> Atše utamená séntsemnayeca, ošbuáchiyēnguentšana banga ainaniñe más añemo montsebomna, y chíyeca chēnga Bēngbe Bētsabe palabra más y más añémoca y tondayama ntjatauatjca entšángbioye montsabuyayñá.

<sup>15</sup> Ndegombre entsemna, báseftanga Cristbiamá entšángbioye imojtsabuayiyiná, pero chéngna nýe ntšamo tijashjachcá šmojtsántšabošama chca, y chéngna imojtseboše, bétscá jtsamése, atše chayotjáyanama; chíyeca chca imojtsama. Pero ínýengna, entšángbioye montsabuayiyiná tšabe soyénga ínýengbiamá jamama ndegombre imojtsebóseyeca.

<sup>16</sup> Měnga chca montsama, atše šmondobonshánayeca y Běngbe Bětsá chě trabajo šojaněntšabuáchema mondétatšěmboyeca, Jesucristbiamá tšabe noticiénga ndegombre bétsemnama entšanga jtsinýanýnáyana; <sup>17</sup> pero chě ínýengna chca imojtsama, ndoñe tšabe soyénga ínýengbiamá imojtsebóseyeca, ndoñe chéngna chě ínýengbiamá tšabe soyénga imojtsebóseyeca. Chéngna Jesucristbiamá imojtsoyebuambná nýe entšanga chéngna chamotsarrespetánama, y nýe cachéngbiamá tšabe soyénga jtsebomnama imojtsebóseyeca. Chéngna jtsejuabnáyana mochjobenaye jamama atše más chašotsengmėnama ca, muentše utamená chjěftsemnėntscuana, chéngna entšángbioye chca tmojtsabuatambá ora. <sup>18</sup> Pero ¿ndayase chě soye atšbiamá? Masque ntšámna, tšabe soyénga ínýengbiamá tmojtseboše o ndoñe, Cristbiamá montsoyebuambná, y Cristbiamá chéngna montsoyebuambnama atše oyejuayá séntsemna.

Y cabá más chanjóyejuaye, <sup>19</sup> er atše séntsetatšěmbo quem utámenentšana atše chjésebocnama. Atše séntsetatšěmbo muentšana chjésebocnama, tšěngaftanga Běngbe Bětsá šmoimpadánayeca y Jesucristbe Uámana Espíritu šuajabuachánayeca. <sup>20</sup> Atše corente jtsošbuáchiyése Běngbe Bětsábeñe sėndobátmana, atše ndocna te tondaye chanjěftsema y chama chjaisėuatjama, pero aíñe nýetscangbe delante becá añémoca chayoyebuambá, y nýets tempo pero más mora, lempe ntšamo stsamama y stsihámuaama, atše chaima entšanga chaminýanýema Cristo puerte bėtsá y uamaná bétsemnama, y chca chántsama masque ainá o obaná chaitsemnėse. <sup>21</sup> Chca entsemna, er atšbe vida Cristo jtsešervėnama endmėna, y nderado atše chajjóbanėse, nýetscanga puerte bėts soye mochanjěftsashjache. <sup>22</sup> Pero atše ainá stsemnėse, chanjobenaye más uámana trabajo Cristbiamá jěftsemama. Chíyeca, atše ndoñe corente quetsátstatšěmbo ntšamo mora jobuáyanana, ainá jtsemnama o ndoñe. <sup>23</sup> Ndegombre mora puerte šontsėtėmnana ntšamo jobuáyanana: atše tša sėndboše ndoñe más quem luarentše ntjěftsemnana, Crísoftaca jtsatsmėnama, y ndegombre chca atšbiamá puerte tšabá nántsemna; <sup>24</sup> pero, ínýoicana tšěngaftangbiamá šontsemna ainá jěftsemnana. <sup>25</sup> Atše corente séntsetatšěmbo chca ndegombre yochtsemnama, y chíyeca séntsetatšěmbo atše cabá ainá chjěftsemnama, tšěngaftanga jujabuáchama más Jesucristbeñe chašmotsošbuáchema, y chíñe bėtscá oyejuayana chašmotsebomnama. <sup>26</sup> Chca, atše tšěngaftanga jutsėtsayama choye chajjá ora, chašmobená ínýe soyama más Cristo Jesús jėtschuayama.

<sup>27</sup> Morna, chě más uámana soye entsemna, tšěngaftanga chašmotsama ntšamo jtšiyenama ntšamo chě Cristbiamá tšabe noticiėnguiñe endayancá. Y mėntšá, cachcá, jutsėtsayama chajjá o ndoñe, atše chántsetatšěmbo tšěngaftanga Jesucristbeñe ošbuáchiyama ndoñe šmontsajbanama, y aíñe becá ošbuáchiyana chábeñe šmotsobomñama; nýetscanga cachcá šmojtsejuabnáyeca y nýetscanga cach soye šmojtsebóseyeca, cánýiñe nýetscanga enutanánėnga jtsenojuerzánėse, ndocná chě tšabe noticiėnguiñe tšěngaftanga šmobomna ošbuáchiyana chacmondábuajuanama. <sup>28</sup> Tšěngaftangbe uayayėngbiamá tondayama šmattsauatja, sempre bėtscá añemo šmochtsebomna. Chca tšěngaftanga šmochanjínýanýiye chéngna pochocánėnga mochtsemnama, y tšěngaftangna atsebácanėnga šmochtsemnama. Y chě soye Běngbe Bětsá tšěngaftangbiamá echántsama, Crístbeñe šmošbuachėyeca. <sup>29</sup> Chca echanjopása, er Běngbe Bětsá tšěngaftangftaca puerte tšabia endmėna, Cristbiamá oservėnėnga Běngbe Bětsá tcmójábiamá, pero ndoñe nýe chábeñe chašmotsošbuáchema, ndayá chabiamá chašmosufrímnaca. <sup>30</sup> Tšěngaftanga y atše cachca soyama montsenojuerzana. Tšěngaftanga ya šmonjinýe ntšamo atše sėnjánenojuerzana, entšanga jinýanýiyama chě tšabe noticiėnga ndegombre soyénga bétsemnama. Y mora, tšěngaftanga noticiėnga šmochanjóyėngacñe ntšamo atše cach soya cachcá stsamama.

## 2

*Ndoñe uámanënga šmattsenobiamnaye, ntšamo Cristo ndoñe tonjanmcá*

<sup>1</sup> Tšëngaftanga, Crísoftaca cánjiñe mo canýacá jtsemnëse, ainaniñe bëtscá añemo šmontsebomna. Cristo cmondábabuanýeshana, y chë soye tšëngaftanga cmontsë-jabuachana nyetsca trabajënguentsana tšabá jabocanama. Y tšëngaftanga Cristbe Espíritoftaca cánjiñe mo canýacá šmontsemna; tšëngaftanga nyetscanga šmondén-bobonshana y nyetscangbiana jóngmiana šmonduamana. <sup>2</sup> Tšëngaftanga lempe chca šmobómnyeca, atše corente oyejuayá šmochjábema, er tšëngaftanga nyetscanga cachcá cánjiñe šmondëjuabná, cachcá nyetscanga šmondénbobonshana, nyetscanga mo canýe ainancá šmondbomna, y nyetscanga cachca soye šmondboše. <sup>3</sup> Tondaye šmattsama nye ínýenga chë sóyeca chamotjayanama, o nye tšëngaftanga tša bëts soyënga amënga šmomna ca entšanga chamotsejuabnama; pero ndoñe yapa uámanënga šmojtsemna ca šmochtsejuabnaye, y cada ona chaotsejuabná chë ínýenga bëngbiana más uámanënga imomnama. <sup>4</sup> Y ndocná tondaye chaondétsama, nye chabiana tšabe soyënga jónýenama, sinó ndayánaca chaotsama nyetscangbiámna tšabe soyënga jónýenama.

<sup>5</sup> Tšëngaftanga cmontsamna jtsemnana ntšamo cach Cristo Jesús yojanjuabná y yojanamcá:

<sup>6</sup> Cha nyets tempo yomna cach Bëngbe Bëtsacá y uamaná cach Bëngbe Bëtsacá, pero masque chca, ndocna te yonjanjuabná:

“Atše séntseboše nyetsca entšanga nyets tempo atše chašmotserrespetana, ntšamo atšbe Taitá Bëngbe Bëtsá mondërrespetancá ca.”

<sup>7</sup> Pero cha mo nduamanacá tonjanóbema, nyetsca chabe bomna soyënga jéftse-boshjonëse,

y ndegombre, mo canýe oservenacá tojanóbema.

Cha canýe entšacá tojanonýná,

y entšanga canýe ndegombre entšacá tmojáninýe.

<sup>8</sup> Cachá tojanlesenciá nduamaná jtsemnana,

y sempre Bëngbe Bëtsábioye ibnayeunana, y jobanámna, cruciñe jóbane.

<sup>9</sup> Ndayá cha tonjanmama, Bëngbe Bëtsá, chë celoca más uámana luare tbojaninýinýe

y chë más uámana uabaina, chë más bëtsétsangbe uabainënguentsa uabaina tbojabuajo;

<sup>10</sup> y chca, celoca imomnénga, y quem luarentše y fshantse jashenoye imomnéngnaca nyetscanga chamóshamentšema,

Jesúsbioye jëtschuayama, chabe uámana uabaina jayanëse;

<sup>11</sup> y chca, nyetscanga chamuayana Jesucristo chëngbe Utabná yomna ca,

chca, Bëngbe Bëtsá chë Taitá nyetscanga chamotsatschuanama.

*Crístbeñe ošbuáchiyënga entsamna mo buashinýinýana estrellëngcá jtsemnana*

<sup>12</sup> Chcasna, atšbe bonshana catšátanga, ntšamo atše tšëngaftangaftaca sënjamna ora, atše sempre šmonjanëyeunancá, mora más šmochtsatënëyeunana, mora atše tšëngaftangbiana bënoca stsemna ora. Bëtsétsanga ntjatenobiamnaycá y Bëngbe Bëtsá jtserrespetánëse šmochtsama soyënga, chca, tšëngaftangbe tšabe videntše, Jesucristbeñe ošbuáchiyënga quetsomñecá, tondaye chacmondétsabuáshebenama; <sup>13</sup> er Bëngbe Bëtsá nyets tempo tšëngaftangbe ainaniñe inétsama tšëngaftanga ndayánaca chašmotsebošama y chašmotsamama, ntšamo cha yojuaná y yobošcá chaotsemnana.

<sup>14</sup> Ndayánaca jamama chacmojtšéjaboto ora, chë soye šmochjama, chca jamama yapa totcá comna ca ntjatichamcá y ínýengaftaca jabuachana ntjatenatsësnaycá. <sup>15</sup> Chca cmontsamna, chca, tšëngaftanga šmojtšama soyënguiñe ndocná ndocna bacna soye chaondínýenama, y puerte tšabe vida chašmotsebomnama. Bëngbe Bëtsabe puerte tšabe basengcá šmochtsiyena, tšëngaftanga chë šmojtsemnénga canýe luarentše puerte bacna entšangbeñe y sempre bëtscá bacna soyënga jtsamana uamanëngbeñe. Chíyecna,

tšëngaftanga šmochtsiyena puerte tšabe soyënga jtsamëse, y chca tšëngaftanga šmochántsemna mo canye ibetiñe luarentše buashinÿinÿana estrellëngcá. <sup>16</sup> Chë tšabe soyëngaca entsángbioye chauinÿanÿé ntšamo muanjobenaye tšabe vida jtsebomnama. Chca chašmojamëse, Cristo cachiñe yochjésabo ora, atše chantsobena tšëngaftangbeyeca puerte oyejuayá jtsemnana, er ntšamo chašmojamcá echanjínÿanÿiye atše ndoñe nÿe bonamente jabuache tijatrabajá. Chca atše chántsemna mo nda bëtscá tojoprontá, y chentšana ínÿengaftaca tojótjajo ora, chëngbioye tojtsayënjanacá. <sup>17</sup> Mo chë altaroca canye bachna buiñe tojuabuashanacá, Bëngbe Bëtsá jëtschuayama tmojóba ovesháftaca, cachcá nderado echántsemna atšbe buiñe, atše šmojóbase, chca, Bëngbe Bëtsábioye oyejuayá jabemama. Tšëngaftanga bëtscá šmojalemošná, Crístbeñe tša šmošbuachéyeca, y tšëngaftangbe ošbuachiyánënaca endmëna Bëngbe Bëtsábioye oyejuayá jabemama. Chë uta soye echántsemna mo chë buiñe y chë oveshacá, Bëngbe Bëtsábioye oyejuayá jabemama. Atše chca stjobanëse, puerte oyejuayá stsemna, y stjama tšëngaftangnaca cachcá chašmotsóyejuama. <sup>18</sup> Chca, tšëngaftanga cmontsamna oyejuayënga jtsemnana, y šmochjama átšnaca oyejuayá tšëngaftangtaftaca chaitsemnana.

### *Timoteo y Epafrodito*

<sup>19</sup> Atše becá ošbuachiyánaca Bëngbe Utabná Jesúsbeñe jtsobátmanëse, sëntsejuabná pronto chjobenaye Timoteo tšëngaftangbioye jíchmuama, tšëngaftangbiana chašuabocuéntama, y chca, atše más añemo chaitsatsbomnama. <sup>20</sup> Er nÿe cha endmëna canya cach atšcá ainaniñe juabnayá, y cha ndegombre puerte entseboše tšëngaftanga tšabá chašmuetsiyenama; <sup>21</sup> chë ínÿengna nÿetscanga nÿe cachëngbe tšabiana ndayánaca jamama jtsejuabnayana, y tondaye ntsebošana Jesucristbiana jamama. <sup>22</sup> Pero cach tšëngaftanga ya šmondétatšëmbo, ntšamo Timoteo chë padecena soyënguentšana tšabá tonjétsobocñama, y ntšamo Timoteo y atše, mo canye uaquiñá chabe taitábioye cuaftsajabuachancá, cánÿiñe fsënjatrabajá, más bëtscá entsanga chë tšabe noticiënga chamóyëngacñama. <sup>23</sup> Chcasna, atše sëntsobátmana cha jíchmuana, ntšamo átšeftaca jopásama chaitsetatšëmbo y cachora; <sup>24</sup> pero bëtscá ošbuachiyánaca sëntsobatmánayeca, sëntsejuabná, Bëngbe Utabná chašojtábocnëse, pronto átšnaca chjobenaye choye jama.

<sup>25</sup> Atše sëntsejuabná yojtsemna, Jesucristbeyeca bëngbe catšata Epafrodítñaca choye jíchmuana, nda átšeftaca cánÿiñe endëtrabajá y chë tšabe noticiënga ndegombre soyënga bëtsemnama jinÿanÿiyama endenojuerzana, nda tšëngaftanga šmojanichmó atše chašuabëuájabuachama. <sup>26</sup> Cha chanjíchmu; cha puerte entseboše tšëngaftanga jánÿama, y yapa ngménaca entsemna, cha šocá enjamnama šmojátatšëmbonama. <sup>27</sup> Y ndegombre cha šocá enjamna, y enjétsinÿna mo jtsobanamcá; pero Bëngbe Bëtsá tbonjalastemá, y ndoñe nÿe chábioye sinó átšbioynaca, atše ndoñe más ngmenanënga chayátsbomnama, ntšamo mora sëntsebomnama. <sup>28</sup> Chíyeca atše más sëntseboše cha pronto jíchmuana, as tšëngaftanga cha chašmojtinÿe ora, puerte oyejuayënga chašmotsemnana, y atše ndoñe yapa chašondëtsengmenama. <sup>29</sup> Šmochjofja nÿets oyejuayánaca, Bëngbe Utabnábeyeca catšátanga quetsomñecá; y nÿets tempo chacá amëngbioye mo bëtsëtsangcá šmochtsëtabna, <sup>30</sup> er batšatema más y matënjétsobana, Cristbiana trabajayiñe uajabuachaniñe. Cha chë trabajo tonjanma atše juajabuáchama, ntšamo cach tšëngaftanga ndoñe chešmatanobenacá, atše juajabuáchama.

## 3

### *Ndayá Pablëbiana ndegombre corente yojanámana*

<sup>1</sup> Y morna, atšbe catšátanga, ndayá Bëngbe Utabná tojamama móyejuanga. Ndoñe bacá quešnatámana, ntšamo chë inÿe tsbuanáchañe tcbonjanëbuabiamcá cachcá cachiñe jtëtéyanama; y chë soye bëtscá cmochanjújabuache ndoñe resjuiñe chašmondëtsemnana. <sup>2</sup> Cuedado šmochtsebomna chë ndoñe tšabe entsangbiana, mo quešëngcá

imomnënga, chë puerte bacna soyënga mondbétsamënga, y entsangbe más delicadentse base bobachtema jatëtšana uamanënga; <sup>3</sup> er bënga mondmëna y ndoñe ínÿenga, chë ndegombre uinÿananana bomnënga, bënga Bëngbe Bëtsabe entsanguentsënga bëtsemnama, bënga chë Uámana Espíritbe uajabuáchenanaca Bëngbe Bëtsá mondadóránama, bënga chë Cristo Jesúseftaca cánÿiñe mo canÿacá bëtsemnama mondbétsoyejuama, y bënga chë ntšamo ínÿenga monduamancá bëngbe cuerpiñe jamama tondayama yondoservénama mondbétsejuabnayama.

<sup>4</sup> Masque atše razón sëndétsóbomñe, ndayá atšbe cuerpiñe tmojamcá ndegombre iuámanama jtsejuabnayama; nderado nda tojtsejuabná razón yojtsebomna chë soyënga yoservena ca jtsejuabnayama, ndegombre atše chabiama más razón chama stsóbomñe. <sup>5</sup> Sënjanonÿná y posufta tianoye base bobachtema chë más delicadentse šmojantëtše; atšbe nÿets uta bëtšétsata Israeloca entsanguentsáta bonjamna, y atšna Benjaminbe bëtš pamillentšá sëndmëna; atšbe tempsca bëtš taitanga nÿetscanga hebreunga imnamna. Atšna fariseo sënjamna. Atše sënjánama, lempe ntšamo judiëngbe leyënguñe endayancá, ndayá jamama šojanmëncá. <sup>6</sup> Atše tša sënjánboše Bëngbe Bëtsá jtseservénama, chíyeca Jesúsbeñe ošbuáchiyënga bëtscá sënjanécamena; y ndayá canÿe entšá ibnëtsemna jtsamama, Bëngbe Bëtsabe bominiñe tšabia jtsemnama, judiëngbe ley jtsocumplínese, chama ndocná tondaye quenjátsbomna jayanama, atše ndoñe tšabá sentsanama ca.

<sup>7</sup> Pero lempe chca ntšamo atše sënjamnama y ndayá sënjánamama, puerte sënjanjuabná atšbiamana puerte yojanámana ca; pero mora, Cristo atšbe ainaniñe tonjámashëngoyeca, chë soyënga atšbiamana ya ndoñe quenatámana. <sup>8</sup> Y cabá más, tondaye atšbiamana quenatámana, chë bëtš soye jtsonÿayëse, Cristo Jesús, Bëngbe Utabná jtsabuatmana. Chábeyeca, lempe chë nÿe quem luarentša soyënga sënjéseboshjona, y lempe chë soyënga atšbiamana tondayama quenátoservena; y chca entsemna, chë bëtš soye jëftsashjáchama, Cristo jtsabuatmama, <sup>9</sup> y cháftaca cánÿiñe mo canÿacá jtsemnama. Atše ya ndoñe quetsatsngué Bëngbe Bëtsabe bominiñe tšabia jtsemnama, nÿe ntšamo atše tijamama chë judiëngbe ley jtsocumplínese, pero Crístbeñe jtsošbuáchiyëse aíñe; Bëngbe Bëtsá entsama atše chabe bominiñe tšabia chaitsemnama, atšbe bacna soyëngama jtseperdónase, y lempe chca entsemna atše Crístbeñe sëndošbuachéyeca. <sup>10</sup> Atše sëntseboše ndayá cha jtsabuatmana, chë obanënguentšana tojtanayenama cha tojaninÿanÿé obenana atše chaitsebomnama, atše cháftaca cánÿiñe mo canÿacá chaitsemna ora; y ntšamo bënga játsebacama ora cach Cristo tojansufricá, átšnaca cachcá chaisufrima. Y cha tojanóbana orcá atše chaitsemnama; <sup>11</sup> y ntšámnaca, atše jëftsashjáchama Bëngbe Bëtsá chaoma atše chaitayenama.

*Yejuana jtsentšëñese, Bëngbe Bëtsábiocana uacanánana josháchiñama*

<sup>12</sup> Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tšabia Bëngbe Bëtsabe bominiñe stsemna ca, pero sempre natsanoye sentsá, mo nda canÿe luaroye jashjanguama cuaftséchamancá; y puerte jtsošbuáchiyëse sentsóbátmana atše chjobenaye jtsemnama, chë ndayama Cristo šojanchembo, er Cristo Jesús ya tonjama atše chabiama chaitsemnama. <sup>13</sup> Atšbe catsátanga, atše ndoñe quetsátichamo chca ya tijashjache ca. Pero chama canÿe soye sentsama: chë tempo atše sënjábomna y sënjánama soyënga, mora lempe stëtsoye sënjaquedá, y bëtscá sentsama jobenayama chë jashjanguama yojtsemnoye jashjanguama, <sup>14</sup> chë ndémoca yojtsemna jashjanguama luaroye jobenayama jashjanguama, mo nda canÿe luaroye jashjanguama ndayánaca juácanama bëtscá jenujuérsase cuaftséchamancá. Cachcá, átšnaca sentsá chë Bëngbe Bëtsá šojtsachembuana uacanánana josháchiñama, Cristo Jesúsbeyeca; y chë uacanánana entsemna chë nÿetsca tescama yomna tšabe vida jtsebomnana.

<sup>15</sup> Chca bënga šontsamna jtsejuabnayana, chë Jesucrístbeñe puerte ošbuáchiyana y nÿets tempo cha ústonënga; y nderado tšëngaftanga ndayíñnaca inÿetšá šmojatsjuabná



ora, Bëngbe Bëtsá chë sóynaca tšabá cmochanjínyanýiye. <sup>16</sup> Pero morna šontsamna jtsiyenana ntšamo méntscoñama Bëngbe Bëtsabe soyëngama šojosertacá.

<sup>17</sup> Jesucristbeyeca catšátanga, ntšamo atše sëndmëncá tšëngaftanga šmochtsemna, y chë ntšamo jtsiyenama tcbonjaninýanýecá imojtsiyenëngbiyoye šmochtsënyaye.

<sup>18</sup> Ntšamo cbochanjauyancá, ya ba soye tcbonjáuyana y mora cachiñe chca chanjayana, pero chca jayanamna atše puerte ngménaca sëndbëtsemna. Banga mondmëna, y chënga ntšamo vida imojtsebomnama montsinýinýná, lempe ntšamo Cristo chë cruciñe jóbanië bëngbiana iuayancá contra chënga imojtsemnama, <sup>19</sup> y chëngbiyoye nyetsca tescama infiernoca mochántsapochocaye. Chëngbiana chë más uámana soye yojtsemna jtsamana ntšamo cachënga tmojtsebošcá, nye cachëngbe cuerpiñe tšabá jtsomñama. Chënga nýa mo bëtš soye cuafjamcá jtsemnana chë soyënga tmojtsama ora, pero ndegombre chënga entsamna cach soyëngama jtsëuatjama; y chënga sempre jésejuabnayanana chë nye quem luarama enójuabnayëngbe soyëngama. <sup>20</sup> Chë cuenta bëngna, ndegombre celocama entšanga mondmëna, y mora montsobátmana, chë luarocana chauabo bëngbe atsebacayá, Bëngbe Utabná Jesucristo. <sup>21</sup> Cha bëngbe cuerpënga, chë pronto jopochócama cuerpënga echanjátrocaye, jtsemnama mo chabe cuerpçá, chë obanënguentsana tojtayenabe cuerpçá; y cha chca echanjama, cha puerte obenana lempe jtsemándayama bómnyeca.

#### 4

##### *Bëngbe Utabnáftaca cánýiñe mo canýacá jtsemnëse oyejuayana jtsebomnana*

<sup>1</sup> Chcasna, Jesucristbeyeca atšbe catšátanga, Bëngbe Utabnábeñe ošbuáchiyana ntjajbanacá, y puerte chábeñe jtsošbuáchiyëse, cháftaca cánýiñe mo canýacá šmochtsemna. Corente cbondábabuanýeshana y tša séntseboše tšëngaftanga jánýama. Tšëngaftangbeyeca atše puerte oyejuayá séntsemna, y atše corente sëndbëtsoyejuaye tšëngaftangbiana ínýengbiyoye jáuyanama.

<sup>2</sup> Evodia séntseimpadana y Síntiquenaca, chata chabuatenóyeunama, mo Bëngbe Utabnábeñe ošbuachiyata quetsomñecá. <sup>3</sup> Y ácnaca, nda puerte tšabá átšeftaca tconjatrabajá, cbontseimpadana chama chë shembásata chacújabuachama, er chata bëtscá átšeftaca tbonjatrabajá tšabe noticiënga entšanga abuayinayañe. Clemente y inýe entšanga átšeftaca tmonjatrabajá cach soye amiñe. Nyetsca chëngbe uabaina entsábemana chë librësañe, ndayentše yojtsábemana chë tšabe vida mochjónyenëngbe entšangbe uabaina.

<sup>4</sup> Sempre oyejuayënga šmochtsemna, Bëngbe Utabnáftaca cánýiñe mo canýacá jtsemnëse, y cachiñe šcutétayana: ¡Móyejuanga! <sup>5</sup> Nyetscanga chamotsetátšëmbo, tšëngaftanga tšabe juabna bomnënga šmomnana. Bëngbe Utabná jésabama tempo ya entsobeco.

<sup>6</sup> Tondayama šmattsenócochinýena, pero cada Bëngbe Bëtsáftaca chašmojtsencuënta ora, ndayá cmojtséjbotama cha šmochjaimpáda. Y chca chašmojtsama ora, chánaca šochtsatschuanaye. <sup>7</sup> Chca, Bëngbe Bëtsá echanjama chë chabe ainaniñe tšabe ebionana tšëngaftanga chašmotsebomnama; chë tšabe ebionana puerte bëtscá endmëna, y bënga entšanga quetsomñecá ndoñe ntsobenana chama jósertana; y chca tšabe ebionánaca, tšëngaftangbe juabnënguiñe y ainaniñe tondayama quešmochátenocochinýena, er tšëngaftanga cánýiñe mo canýacá Cristo Jesúseftaca šmondmëna.

##### *Lempe ntšamo tšabá yomncá soyëngama jtsejuabnayanana*

<sup>8</sup> Cabana, atšbe catšátanga, lempe ntšamo ndegombre yomncá soyënguiñe šmochtsejuabnaye, lempe chë respeto yomerecëniñe, nyetsca soyënguiñe entšangbe bominiñe tšabá yomniñe, nyets tempo corente tšabá yomniñe, nyetsca soyënga entšanga yogusetániñe, y lempe chë ndayama entšanga tmojtsejuabná tša iuámana ca soyënguiñe.

Lempe chë tšabá yomna soyënguiñe y jtsatschuanayama yomna soyënguiñe šmochtsejuabnaye.

<sup>9</sup> Sempre šmochtsama chë átšbentšana šmojuábouinje soyënga, chë atšbiajana šmójóyëngacñe soyënga, chë atše šmojoyeuná soyënga y ntšamo šmojinýcá atše jtsamana. Chca šmochtsama y Bëngbe Bëtsá, chë bënga ainaniñe tšabe ebionana chamotsebomnama amá, tšëngaftangaftaca echántsemna.

*Pablo tojtanacheuá tmojanájabuachama*

<sup>10</sup> Atše corente sëndoyejuá Bëngbe Utabnáftaca cánjiñe mo canýacá tsmënama, er tšëngaftanga ba ishinje chentšana, cachiñe šmojatobená atše jatinjinyiyana ntsachetšá atšbe tšabiana tšëngaftangbiana iuámanana. Chca, atše ndoñe quetsátichamo tšëngaftanga atšbiana cmojtsanebnétjomba ca, ndayá ntšamo tšëngaftanga tšabá šmojuabnacá atše jinjinyiyama ndoñe yonjanopodena ca. <sup>11</sup> Atše chca, ndoñe quetsátichamo uajabotá stsemna ca, er atše sënjuatsjinje sempre oyejuayá jëftsemnana, nje ndaye soyiñe masque batšatémnaca stsebomñese. <sup>12</sup> Atše sëndétatšëmbo ntšamo yomna jtsiyenana chë vida jtsebomnama uajaboto soyënga tojtsashbenese, y ntšamo yomna jtsiyenana chë tcuajabótama más bëtscá jtsebomñese. Atše tijuatsjinje oyejuayá jtsemnana masque nje ndaye soyënguiñnaca stsemna ora, jasama bëtscá stsebomna ora o masque nje shéntseca jtsemnana šojtsemna ora, atše jtsiyenama bëtscá soyënga stsebomñese o masque ndóñnaca. <sup>13</sup> Atše lempe chca sëndobena, atše obenana jtsebomnama Cristo endbétamayeca. <sup>14</sup> Masque chcasna, tšëngaftanga tšabá šmonjama, atše padecena soyënguiñe sënjamna ora atše juajabuáchana.

<sup>15</sup> Tšëngaftanga, chë Filipos pueblaca Jesucristbeñe ošbuáchiyënga, corente šmondétatšëmbo, Macedonia luarentšana sënjéftsanbocna ora, nje tšëngaftanga atše šmonjanájabuachama; inje ošbuáchiyënga ndoñe. Chora enjamna atšbe bojatsena tempo tšëngaftangbe luarentše chë tšabe noticiënga entšanga abuayiyayañe; y nje tšëngaftanga atše šmonjanájabuache. <sup>16</sup> Ba soye atše Tesalónica pueblaca sënjamna ora, y chašmuájabuachama šonjanájaboto ora, tšëngaftanga atšbe opresidëngama crocénana šmonjanafja. <sup>17</sup> Chca ndoñe quenátayana atše tsjuabná nje tšëngaftangbentšana ndayánaca jójyëngacñama ca; chë sóyeca atše séntseboše ndayá tšëngaftanga más tšabe soyënga chašmotsamama, Bëngbe Bëtsá tšëngaftangbiana más chaotsóyejuama. <sup>18</sup> Er atše ya lempe sënjójyëngacñe, y chë šuajabótama cabá más séntsebomna. Atše chë ntšamo šjuajabotcá lempe séntsebomna, chë tšëngaftanga Epafrodítóftaca šmonjanichmó soyëngaca. Ndayá atše šmojanichmocá, Bëngbe Bëtsabe bominyiñe puerte tšabá entsemna, mo juatšëmbonama ndayá tcojóba y altaroca tcojajuinýe y botamana tojtsonguëtšecá, chora cha oyejuayá chca jójyëngacñana. <sup>19</sup> Atšbe Bëtsá, chabe bëtscá uámana y bëtš bomnánaca, echanjama tšëngaftanga lempe ntšamo cmëjabotcá Cristo Jesusbiajana chašmójyëngacñama. <sup>20</sup> Entšanga nyets tempo chamotsinýanýná Bëngbe Bëtsá y Bëngbe Taitá puerte uamaná bëtsemnana. Chca chaotsemna.

*Chënga jtadióšoftanama*

<sup>21</sup> Atšbe cuenta, nyetscanga chë Jesucristbeyeca Bëngbe Bëtsábenga imomñënga šmochjácheuaye. Atšeftaca montsemna Jesucristbeyeca catšátangnaca cmontsacheuaná.

<sup>22</sup> Nyetscanga chë muentše Bëngbe Bëtsábenga imomñënga, y más chë romanëngbe mandadbe bëtš yebnoca oyenënga, cmontsacheuaná.

<sup>23</sup> Atše séntseimpadana Bëngbe Utabná Jesucristo, chaoma tšëngaftangbeñe tšabe bendicionënga chaotsemnana.

## Colosenses

### *Jacheuayama*

<sup>1</sup> Atše Pablo, Jesucristbe ichmoná Bëngbe Bëtsá chca yobóšeyeca, y Jesucristbeyeca bëngbe catšata Timotéoftaca, <sup>2</sup> quem tsbuanácha sentsabiamná chë Colosas puebloca Bëngbe Bëtsábenga imomnëngbiana. Tšëngaftanga bëngcá Jesucristbeñe ošbuáchiyënga šmondmëna, y chca, Jesucristbeyeca bëngbe catšátanga. Atše séntseimpadana Bëngbe Bëtsá Bëngbe Taitá, chaoma tšabe bendicionënga tšëngaftangbeñe chaotsemnana, y chaoma tšëngaftangbe ainaniñe tšabe ebionana chašmotsebomnana.

### *Pablo, Bëngbe Bëtsábioye tbojanimpadá Colosas puebloca ošbuáchiyëngbiana*

<sup>3</sup> Bëngbe Bëtsá, Bëngbe Utabná Jesucristbe Taitá tšëngaftangbiana fstseimpadana ora, cha sempre fchandbëtsatschuanaye, <sup>4</sup> er bënga fsënjátatšëmbona ntšamo tšëngaftanga Cristo Jesúsbeñe tša šmojtsošbuáchema, y ntšamo tšëngaftanga nyetscanga chë Bëngbe Bëtsábenga imomnënga šmababuánjeshanama. <sup>5</sup> Natsanama, chë ndegombre buayenánama, chë tšabe noticiënga, tšëngaftanga tcmojanabuatambá ora, tšëngaftanga botamana šmojanuena ntšamo chë buayenániñe bejtsayancá, chë tšëngaftanga šmojtsobena tšabe soyama jobátmana, Bëngbe Bëtsábeñe jtsošbuáchiyëse. Chë šmotsobatmana soye entsama tšëngaftanga Jesucristbeñe puerte chašmotsošbuáchema y nyetscanga chašmotsababuánjeshanama. Bëngbe Bëtsá celoca enduaquëcñá chë tšëngaftanga šmojtsobatmana tšabe soye. <sup>6</sup> Chë tšëngaftanga tcmojanabuayená tšabe noticiënga más bëtscá entšanga montsuenana; y chca, nyets quem luarentše entšanga montsiyena más tšabe soyënga jtsamëse. Chca entsemna ntšamo tšëngaftangbentše tojopasacá, chë natsana te chë tšëngaftanga Bëngbe Bëtsabe tšabiánama šmojanuena orscana, y ntšamo Bëngbe Bëtsá puerte bonshanánaca y tšabiánaca béngbioye šuanjënana ndegombre cmojanosérta orscana. <sup>7</sup> Y chca Epafras tšëngaftanga tcmojanabuatambá, Bëngbe Bëtsabe bonshánama y tšabiánama. Epafras endmëna canya béngaftaca Cristbiana oservená, y cha bënga fsëndbobonshana; cha Cristbiana endëtrabája bëngbe cuenta tšëngaftangbentše. <sup>8</sup> Cha šonjúuyana ntšamo chë Uámana Espiritu yojtsama, nyetscanga Jesucristbeñe ošbuachiyëngbioye chašmotsababuánjeshanama.

<sup>9</sup> Lempe ntšamo tšëngaftangftaca tojopasama, chë natsana te tšëngaftangbiana fsënjauena orscana y méntscóñama, Bëngbe Bëtsá sempre tšëngaftangbiana fchandbëtseimpadana, cháftaca fstsencuënta ora. Bëngbe Bëtsá fsëndëimpadana, chabe Espiritu chaoma tšëngaftanga chašmotsobena jtsetatšëmbuana y jtsosertánana, chca, ntšamo Bëngbe Bëtsá yobošcá chašmotsamama, tšëngaftanga tšabá chašmotsetatšëmbuama. <sup>10</sup> Y chca, tšëngaftanga šmochantsobena jtsiyenana jtsamëse ntšamo Bëngbe Utabná yobošcá, y sempre šmochantsama ntšamo chabiana tšabá yomncá. Ntšamo tšëngaftanga chašmojtsiyencá tšabe soyënga jtsamëse, chentšana nyetsca tšabe soyënga echanjóbcna, y tšëngaftanga más tšabá Bëngbe Bëtsá šmochantsábuatma. <sup>11</sup> Atše, Bëngbe Bëtsá séntseimpadana, chabe puerte bëtscá obenánaca cha chaoma tšëngaftangbe ainaniñe bëts añemo chašmotsebomnana; y chca, tšëngaftanga chë padecena soyënguñe chašmojtsemna ora, puerte uantadënga chašmotsemnana, y ainaniñe añémoca Bëngbe Bëtsábeñe becá chašmotsobátmanama. <sup>12</sup> Y puerte oyejuayënga Bëngbe Taitá šmochantsatschuanaye, nda iuama bënga chamotsobena ntšamo cha chabe entšanga jatšatayama tojašebuachenacá jtsebomnana. Tšëngaftanga šmochanjóyëngacñe ntšamo cmojtsëtocancá celoca, chë corente buashinjinjána luarentše. <sup>13</sup> Bëngbe Bëtsá bënga šojatsebacá, Satanás, chë ibetiñe luarentša mandayabe cucuatšëntšana, y tojama chë chabe bonshana Uaquiñabe amëndayana bëngbe ainaniñe chamotsebomnana;

<sup>14</sup> chábeyeca Bëngbe Bëtsá Satanasbe cucuatšentšana šojatsebacá; o mëntšá, chábeyeca Bëngbe Bëtsá bëngbe bacna soyënga šojtsaperdoná.

*Cristo tojanóbanayeca, entšanga Bëngbe Bëtsáftaca tšabá jtsatsmënana*

<sup>15</sup> Cristo tmonjáninýe ora, bënga tmojánatšëmbona ntšamo Bëngbe Bëtsá yomnana; entšanga imojobena cha jinýama, pero Bëngbe Bëtsábioye ndoñe. Cha, chë Bëngbe Bëtsabe Uaquiñá, ya natsana yojtsemna lempe chë Bëngbe Bëtsá tojanma soyëngama; y cha lempe chë soyëngama más uamaná endmëna. <sup>16</sup> Chábeyeca Bëngbe Bëtsá tojama lempe ntšamo celoca y quem luarentše yobinýncá, lempe ntšamo chë entšanga imobena o ndoñe mondobena jinýama soyënga, y chë espíritëngnaca chë imobena ínýengbioye jtsamëndayana y obenana imobomna. Bëngbe Bëtsá, chábeyeca y chabiana tojama, lempe ntšamo quem luarentše yobinýncá. <sup>17</sup> Bëngbe Bëtsá cabá nyetsca soyënga ndama ora, Cristo ya yojtsemna; y chábeyeca mora yomna, lempe ntšamo quem luarentše chaotsemnama yojamncá. <sup>18</sup> Cha endmëna nda nyetscanga Bëngbe Utabnábeñe osbuáchiyënga iuamënda, ntšamo chë bestšaše nyetsca chë cuerpentša soyënga jtsemandayancá. Cha endmëna nda iuama osbuáchiyënga tsëm tšabe vida chamotsebomnama, y cha endmëna chë Bëngbe Bëtsabe más bëts Uaquiñá. Bëngbe Bëtsá tojanma, chë cachiñe ainënga mochatsmënënguentšana, cha chë natsaná chaotsemnama; nýe cha canýa chë más uámana luare chaotsebomnama, nyetscañe chaotsemándayama. <sup>19</sup> Er Bëngbe Bëtsá yojanjuabná cachabiana tšabá yojamna, lempe ntšamo cha yomncá, chabe Uaquiñábeñnaca chaotsemnama, <sup>20</sup> y Bëngbe Bëtsá tojánbošena, Crístbeyeca nyetsca soyënga quem luarentše y celoca, cháftaca tempcá tšabá chaotsatsmënana. Bëngbe Bëtsá chë soye tojanma, chabe Uaquiñá cruciñe tojanóbana ora y chabe buiñe tojanábuashana ora; y chca, Bëngbe Bëtsá tojanma nyetsca soyënga quem luarentše y celoca, cháftaca tempcá tšabá chaotsatsmënana.

<sup>21</sup> Tempo, tšëngaftanga Bëngbe Bëtsá stëtšoye šmojanquedá y chábioye uayayënga šmojamna, bacna soyënga šmojanjuabná y šmojánama causa; <sup>22</sup> pero mora chabe Uaquiñáftaca, cha mo canýe entšacá jóbanëse, Bëngbe Bëtsá tojama tšëngaftanga tempcá tšabá cháftaca chašmotsatsmënana; y chca tojama, tšëngaftanga chabe delante nyets tempo chašmotsemnama; chora tšëngaftanga, chabe entšanga, ainaniñe ndocna bacna soye ndbomnënga chašmotsemnama, y ndocná chaondayana ntšamo šmojamcá ndoñe tšabá yontsemna ca. <sup>23</sup> Pero tšëngaftanga cmontsamna chë bëtscá osbuáchiyana šmondobomnana nyets tempo jtsebomnana, Bëngbe Utabnábeñe jtsošbuáchiyama ndocna te ntjajbanacá. Nyets tempo chë tšabe noticiënguiñe šmochtošbuáchiye, y ndoñe šmatjaleséncia ndocná tšëngaftangbe osbuáchiyana chaotrocama; y nýe chca puerte jtsošbuáchiyëse Bëngbe Bëtsábeñe šmochtsobátmana, ntšamo tšëngaftanga šmojanmcá, Jesucristbiana buayenánama šmojanuena ora. Chë buayenánana endmëna ntšamo ba entšanga nyetsca quem luarentša entšángbioye tmojabuayenacá, y atšbe trabajo endmëna cach tšabe noticiëngama entšanga jtsabuayiyayana.

*Pablo, osbuáchiyënga jasérviana trabajo tmojanbonýe*

<sup>24</sup> Atše corente sënjesoyejuá mora tšëngaftangbiana jasúfriama stsobenama. Ba entšanga entsamna jasúfriana Cristo jasérviana, y atše séntsesufrina ntšamo Cristo tojansufricá, mora atše jtsesufrinëse chabe cuenta, ntšamo jasúfriama yomncá. Y ntšamo séntsesufrincá entsemna Crístbeñe osbuáchiyëngbe tšabiana, chë chabe cuerpcá imomnënga, chënga Crístbenga bëtsemnama. <sup>25</sup> Bëngbe Bëtsá atše šojábema chë Jesucristbeñe osbuáchiyëngbe canýe ujabuachaná. Cachá chë trabajuama šojanábuaiana, chca jamëse, tšëngaftangbe tšabiana chaotsemnama. Chë trabajo endmëna, lempe ntšamo cha tojayancá entšanga jábuayenana. <sup>26</sup> Bëngbe Bëtsá nyetsca entšanga ndoñe tonjanalesenciá, quem luare jobojátšama orscana y nyets tempo chë buayenánama chamotsetatšëmbuama; pero mora, chábenga imomnënga chë soye cha tojinýanyé. <sup>27</sup> Bëngbe Bëtsá yoboše, chabe entšanga imomnënga chamotsábuatmama ndayá tempo chënga ndoñe tonjaninýanyécá; y yoboše chë ndoñe judiënga jinýanyiyama tša bëtš y tšabe soye yomna

chë ndegombre buayenánana, ndayá tempo ínjenja ndoñe tonjaninjanjyecá. Chë tempo ndoñe yonjanótatšëmbo buayenánana entsemna, Cristo tšëngaftangbe ainaniñe yojsiyena, y chábeñe puerte jtsošbuáchiyese šmojtsobena jtsobátmanana, Bëngbe Bëtsá puerte bëtsétsanga y uámanënga chácmbiamama, batšá ntšamo cachá yomncá. <sup>28</sup> Bënga nyetscángbioye Jesucristbiamama fchandbëtsabuayiynaye; fchandbëtsétsétsnaye ndayá chënga ndoñe yontsamna jtsamana, y fsëndbëtsabuatambaye nyets osertanánaca ndayá chënga aíñe yojsamna jtsamana, y chca, nyetscángbioye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguiñe, chënga Crísoftaca cányiñe mo canyácá jtsemnëse. <sup>29</sup> Chca chaotsemnana, atše bëtscá sëndëtrabája; y chca séntsama, chë Cristo yojsama atše chaitsebomnana bëts obenánaca.

## 2

<sup>1</sup> Atše séntseboše tšëngaftanga chašmotsetátšëmbo, Bëngbe Bëtsá beca tsimpadánama, tšëngaftangbioye jujabuáchama, chë Laodicea puebloquënga Jesucristbeñe ošbuáchiyënga y nyetscanga chë ndocna te atše šmonjinje ošbuachiyéngnaca. <sup>2</sup> Atše chca sëndama, tšëngaftanga y chënga ainaniñe bëts añemo chašmotsebomnana, y cányiñe mo canyácá chašmotsemanama, nyetscanga jtsenbobonshánëse. Chca, nyets osertánana tšëngaftanga chašmotsebomnana, y chë tempo Bëngbe Bëtsá entšanga ndoñe tonjaninjanjé buayenánama chašmotsetatšëmbuama, y chë buayenánana Cristbe soye entsemna. <sup>3</sup> Mo canye bëtscá bomnana iytémëna soycá pero mora ya uinýenana, cachcá Crístbeñe entsemna nyets osertánana y obenana Bëngbe Bëtsá jtsabuatmama. Chë soye tempo Bëngbe Bëtsá entšanga ndoñe tonjaninjanjé, pero mora Cristo yojsama bënga chë uámana soyënga chamotsebomnana. <sup>4</sup> Atše chca séntsichamo, botamana palabréngaca ndocná chacmondáingñema. <sup>5</sup> Er masque choca tšëngaftangaftaca atše ndoñe quetsásmëna, atšbe ainana aíñe choca tšëngaftangaftaca entsemna; y atše puerte séntsoyejuá tšëngaftanga šmatenëyeunanama y nyets tempo Bëngbe Bëtsábeñe šmojtsošbuáchema.

*Crísoftaca cányiñe mo canyácá jtsemnëse, entšanga ndegombre tšabe vida jtsebomnana*

<sup>6</sup> Tšëngaftanga Jesucristbeñe ošbuáchiyënga šmojanóbiamama ora, šmojanayana: “Cristo Jesús, Bëngbe Utabná entsemna ca”. Chcasna, tšëngaftanga cmontsamna jtsiyenana soyënga jtsamëse mo chë cháftaca cányiñe mo canyácá tojtsemnacá. <sup>7</sup> Chca šmotsobena jamana, cháftaca cányiñe mo canyácá nyets tempo jtsemnëse. Šmochtsiyena jtsamëse ntšamo cha tojabuatëmbacá y cada te más chca. Cabá más šmochtsošbuáchiye chë Cristbiamama buayenana soyëngama, ntšamo tcmojabuatambacá; y Bëngbe Bëtsá sempre šmochtsatschuanaye.

<sup>8</sup> Cuedado šmochtsebomna, ndoñe šmatjaleséncia ndocná chaondétsamama tšëngaftanga jtsajbanama Crístbeñe ošbuáchiyana jtsebomnana. Chca entšanga montseboše juabnéngaca tšëngaftanga jáingñama, nye básefta entšangbe juabnénga y tondayama ndoservena juabnénga. Chë juabnénga jtsóbocanana ntšamo bëts taitanga básengbioye mondbetsabuátambayentšana y chë espíritëngbentšana, ndëmuanýengbiamama entšanga jtsejuabnayana chënga nyetsca soyënguiñe imománda ca; pero Crístbentšana chë juabnénga ndoñe ntsóbocanana.

<sup>9</sup> Cristo endmëna cachcá ntšamo Bëngbe Bëtsá yomncá, masque mo canye entšaca quem luarentše yojëftsiyena; <sup>10</sup> y Bëngbe Bëtsá tojama tšëngaftanga ndegombre tšabe vida chašmotsebomnana, Crísoftaca cányiñe mo canyácá bëtsemnayeca; y Cristo, nyetsca chë mándayënga y obenana bomnëngbiamama más uamaná endmëna. <sup>11</sup> Tšëngaftanga Crísoftaca cányiñe mo canyácá bëtsemnayeca, mo uinýnananëngcá šmontsemna, tšëngaftanga Bëngbe Bëtsabe entšanga šmomnana. Quem uinýnanánana ndoñe quenátsmëna mo chë más delicadentše base bobachtema tmojatëtšcá, cach entšángbeyeca ntšamo judiënga monduamancá, pero aíñe entsemna cach Cristo nda tcmojauinýnaná; y chë uinýnanánana entsemna, tšëngaftangbe ainanentšana Cristo

bacna juabnënga jabuajuánayana. <sup>12</sup> Tšëngaftanga šmojánenabaye ora, enjamna mo ntšamo cach Cristo tmojanatbontsacá tšëngaftanga utebuantsánënga cuaftsemncá, er tšëngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bëngbe Bëtsá tojamcá, cachcá, tšëngaftanga šmojánenabaye ora, enjamna mo tšëngaftanga chašmatayenama Bëngbe Bëtsá cuafjamcá, er mora tšëngaftanga mo tsmëma entšangcá šmondoyena. Chca tojanopasá, Bëngbe Bëtsá obená bëtsemnama tšëngaftanga šmojtsošbuáchema, y chë obenana tojama Cristo cháuatayenama.

<sup>13</sup> Inye tempo tšëngaftanga Bëngbe Bëtsabiama mo obanëngcá šmojamna, yapa bacna soyënga jtsamama šmojanamana causa y uinýnanánënga mo Bëngbe Bëtsabe entšangcá ndoñe šmonjámnayeca, pero aíñe šmojanamana bacna soyënga jtsamana nye ntšamo šmojanbošcá. Morna Bëngbe Bëtsá tojama tšëngaftanga tšabe vida chašmotsebomnama, Crístoftaca cánýiñe mo canýacá jtsemnëse, y Bëngbe Bëtsá bëngbe nyetsca bacna soyënga šojtsaperdoná. <sup>14</sup> Mo nda ba ndebénënga tojtsabamna y chama tsbuanachangá tojtsamna y chiñe tojtsayana chënga obligaciönaca imojtsemna chë ndebénana pronto jtobocana ca, pero chë entšá chëchangá tojtsandbiama chë entšanga cha ndoñe más chamondëtsendebénama, Bëngbe Bëtsá cachcá tojama, bacna soyëngama bënga šojtsaperdoná ora. Jesús bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebénana tojtsanpochocá cuenta. <sup>15</sup> Jesucristo cruciñe tojanóbana yeca, Bëngbe Bëtsá tojanayëñaná Satanás y chabe bacna espíritënga obenana bomnënga y ínýengbioye amëndayënga; y nyetsca entšangbe delante tojaninýanyé cha chënga jtsamëndayama yobenama, mo canýe reycá chë ínýenga tojayëñaná ora, chabe entšangftaca natsana jtsayana y chë ayëñanánëngna ústonoye.

*Ainaniñe becá jtsebošana chë ošbuáchiyëngbiama celoca yomna soyënga*

<sup>16</sup> Ndoñe caso šmattsabiamnaye, ndoñe tšabá šmontsama ca ínýenga tšëngaftangbiama tmojtsichamo ora, ndayá tšëngaftanga šmétsesaye o šmétsosfšëšnayama, o ndayá aíñe o ndoñe šmondébetsamama Bëngbe Bëtsá jadórana fiestënga ora o shbojueta fiesta ora, o jóchnama tese. <sup>17</sup> Bayté entsemna, Bëngbe Bëtsá entšangbe cucuatšíñe chë mandënga tojánboshjona, chë soyëngama bënga jabuátambama. Chë mandëngaca Bëngbe Bëtsá yojaninýanýnaye ndayá más chcoye jopásama; entšangbioye yojaninýanýnaye ndayá Cristo yochjanmama. <sup>18</sup> Báseftanga mondmëna y chënga mo nduamanëngcá entšangbeñe jtsebínýnana, pero tsoye cachënga corente uámanënga jtsenobiamnayana y angelënga jtsadórayana, mo Bëngbe Bëtsá cuaftsemncá. Ndoñe caso šmattsabiamnaye, tšëngaftanga ndoñe tšabá šmontsama ca chënga tmojtsichamo ora, ntšamo chënga tmojtsichamcá tšëngaftanga ndoñe šmontsámayeca. Chënga jtsichámuana bëts soyënga mo otjenayoquëcá tmojinýe ca, y nye cachënga puerte jtsenábotamnayana, pero chca chamotsamama razón ndoñe quemátsbomna, er nye ntšamo inye entšanga innetsejuabnycá chëngnaca cachcá jtsejuabnayana. <sup>19</sup> Chënga Jesucrístoftaca cánýiñe ndoñe tmonjoquedanga, y Cristo endmëna chë nyetsca ošbuáchiyëngbe amëndayá, mo chë bestšaše nyets cuerpo jtsemandayancá. Canýe cuerpiñe chë bestšaše jtsamana nyets cuerpo chaóbochema, ntšamo Bëngbe Bëtsá tojtsebošcá, chë cuerpo ndayá jasama chaotsebomnama jtsamëse, y nyetsca chë cuerpentša soyënga chamenefjanama jtsamëse. Cachcá, Cristo jtsamana nyetsca ošbuáchiyënga cánýiñe mo canýacá cháftaca chamotsemnama, y cada te más tšabá cha chašmotsábuatmama.

<sup>20</sup> Cristo tojanóbana ora enjamna mo tšëngaftángnaca cuafjobancá, y Bëngbe Bëtsá tšëngaftanga cmojatsebacá chë quem luarentše imománda espíritëngbe cucuatšëntšana. As, ¿tšëngaftanga ndáyeca šmojtseyena jtsamëse mo chë nye quem luarama enojuabnayëngcá? ¿Ndáyeca tšëngaftanga cabá šmobedecena chca mandënga, mo: <sup>21</sup> “Chë soye ndoñe matsbanana, chca soye ndoñe catjase, o chë soye acbe cucuatšëca ndoñe catjaca ca”? <sup>22</sup> Lempe chë mandënga, chë ndayá canýa ndoñe bontsemna jamana, nye soyëngama jtsayanana, y tempo tojochnënga ora, chë soyënga jtsopochócana y chora

tondaye ntsámanana. Chë mandënga jtsemnana nÿe ntšamo entšanga mondbetsamcá y ínÿengbioye mondbetsabuatambaycá. <sup>23</sup> Ndegombre, ba entšanga jtsejuabnayana chë mandënga tmojamëngbiamana, puerte osertanáncana chca tmojama ca, pero ndegombre chca ndoñe quenátsmëna; er chënga jtsichámuana, ntšamo Bëngbe Bëtsá jadórama yomncá imojtsabuatambá ca, jtsabuátambayana entšá cabnmëna uamaná ndoñe ntsenobiamnayana ca, y jabuache cachabe cuérpoca jtsamana ca. Pero chë mandënga tondaye ntsámanana, er chë mandënga entsangbe ainanentšana ndoñe ntjajuánana chë bacna soyënga jtsamama juabnënga.

### 3

<sup>1</sup> Cristo cháuatayenama Bëngbe Bëtsá tojanma ora, enjamna mo tšëngaftángnaca Crístbeñe ošbuáchiyënga, chašmatayenama cha cuafjamcá. Chíyeca, tšëngaftangbe ainaniñe puerte šmochtseboše ndayá Bëngbe Bëtsá celoca tšëngaftangbiamana yobomncá; y choca, Cristo uámana puestentšë endëtbemana, Bëngbe Bëtsabe catšbioica. Y šmochtsinÿinÿnaye chca šmojtsebošama, ntšamo jtsamëse mora šmojtсийenama. <sup>2</sup> Tšëngaftanga nÿets tempo chë celoca soyëngama šmochtsejuabnaye, ndoñe chë nÿe quem luarentšë yomna soyëngama. <sup>3</sup> Tšëngaftanga Crísoftaca cánÿiñe mo canÿacá jtsemnëse, jtsemnana mo tšëngaftanga ya cuafjobancá, er mora ya ndoñe quešmátíyena tempcá jtsamëse. Cristo, Bëngbe Bëtsáftaca cánÿiñe mo canÿacá endmëna, y Cristo endmëna nda mora tšëngaftangbe vida yojtšinÿena. <sup>4</sup> Ndegombre, Cristo endmëna nda endama tšëngaftanga tšabe vida chašmotsebomnana; y quem luarentšë cha cachiñe chaojtonÿná ora, tšëngaftángnaca chentšë cháftaca šmochántsemna, y chora ntšamo Cristo corente uamaná y bëtsá yomnama Bëngbe Bëtsá yochjinÿanÿiyicá, tšëngaftangbiámncana echanjínÿanÿiye más bëtsétsanga y uamanënga šmojtsemnana.

#### *Tempsca vida y morsca vida*

<sup>5</sup> Tšëngaftanga, ntšamo chë nÿe quem luarama enójuabnayënga mondbetsebošcá bošana lempe šmochtsajbaná. Ndocná chaondëtseboše ndaye bacna soye boyabása o shembásaftaca jtsamana, ni chca soyënguiñe ndoñe chaondëtsejuabná; ndoñe chaondëtсийena nÿe ínÿengbiamana bacna juabnënga jtsebomnëse, y ndoñe chaondëtseboše nÿe bëtscá soyënga ínÿengbiamana más jtsebomnana, er chca jtsamana jtsayanana, chabiamana más yojtšámana soyënga jtsebomnana, Bëngbe Bëtsá jatsbobonshánama. <sup>6</sup> Er entšanga mondmëna y chënga chca soyënga jtsamama jtsebošana, y Bëngbe Bëtsá ndoñe ntseye-unanana. Chca entšángaftaca Bëngbe Bëtsá puerte bochanjetna, y echanjamánda chë uabouana castigo chëngbeñe chaotsemnana. <sup>7</sup> Y tempo, tšëngaftanga šmojaníyena jtsamëse, sempre nÿe chca bacna juabnëngaca, <sup>8</sup> pero mora tšëngaftanga cmontsamna lempe quem soyënga stëtšoye jaquédana: ínÿengaftaca jetnana, ínÿengaftaca rábiaca jtsemnana, ínÿabioye ntšamo jáborlama jtsebošana, ínÿengbioye joyánguanguana, y ndoñe tšabe palabrënga jtsóyebuambnayana. <sup>9</sup> Ndoñe šmattsenbuambnaye, er ntšamo tempo šmojamncá mora tšëngaftanga ya ndoñe cachcá quešmátsmëna, y mora ndoñe quešmátíyena jtsamëse ntšamo tempo šmojanamcá. <sup>10</sup> Y mora tšëngaftanga šmojashjache jtsemnana mo tsmëma entšangcá, y ntšamo tempo šmojanamcá ndoñe cachcá quešmátama. Bëngbe Bëtsá chca tsmëma entšangcá tcmojábiamana; y cha nÿets tempo yojtšama, tšëngaftanga cada te más ntšamo cha yomncá chašmotsemnana, chca, corente tšabá cha chašmuábuatmanama. <sup>11</sup> Chíyeca, ndayá Bëngbe Bëtsá tojamama, ndoñe judiënga y judiënga cachcanga mondmëna; chë más delicadentšë base bobachtema tétšenënga ndoñe más uamanënga quemátsmëna chë ndoñe chca mondmëngbiamana; chë inÿe luarëngocana áshjajnënga, bën tjoye oyenënga, chë nÿe ínÿabiamana nÿets tempo oservénënga y chë cachëngbiamana trabájayënga, nÿetscanga cachcanga mondmëna. Chë nÿe ndayá iuámana endmëna Crístbeñe jtsošbuáchiyana y nÿetsca ošbuáchiyëngbe ainaniñe cha yojtsemna jtsemándayama.

<sup>12</sup> Tšëngaftanga Bëngbe Bëtsábenga šmondmëna. Cha cmondábabuanjeshana y tcmo-jabacacá chabe entšanga chašmotsemnana; chíyeca, tšëngaftanga cmontsamna ínÿenga jtsinÿanÿayana nÿetscangbiama jóngmiamna šmuamanama, tšabe juabna ínÿengbiama sempre šmnétseboimnana, cada ona chë ínÿenga chabiamna más uámanënga cuaft-semncá imnétsejuabnayama, nÿetscanga puerte bonshanánaca šmnétsënÿayama, y nÿetsca padecena soyënguiñe corente uantadënga šmomnana. <sup>13</sup> Nÿetscanga š-mochtsenëuantana y šmochjenperdóna, nderado ntšamo nda ínÿabioye tbojaborlá y chama cha tbojtsatsëtsná ora. Ntšamo Bëngbe Bëtsá tšëngaftanga tcmojaperdonacá, tšëngaftángnaca cachcá ínÿenga šmochjáperdonaye. <sup>14</sup> Lempe chë soyëngama más enduámama nÿetscanga jtsenbobonshánana. Nÿetscanga šmojtsenbobonshánëse, tšëngaftanga šmochantsobena sempre lempe chë inÿe soyënga corente tšabá jtsamana, ntšamo ndegombre chë soyënga jamama yomncá. <sup>15</sup> Cristo endama tšëngaftangbe ainaniñe tšabe ebionana chašmotseboimnana. Chë tšëngaftangbe ainaniñe tšabe ebionánaca šmochtsiyena nÿetscanga natjémbana, Jesucristbeñe ošbuáchiyënga quetsomñecá. Bëngbe Bëtsá tcmojáchembo tšëngaftanga nÿetscanga cánÿiñe mo canÿe cuerpcá chašmotsemnana, y chca, natjémbana chašmotsiyenama. Bëngbe Bëtsá sempre šmochtsatschuanaye.

<sup>16</sup> Chë Cristbe puerte tšabe buayenana soyënga tšëngaftangbe ainaniñe nÿets tempo šmochtsambaye. Nÿets osertanánaca šmochtsenbuátëmbaye y šmochtsenbuaiynaye. Nÿets ainánaca šmochjacánta chë Salmos librëšaño uabemana cantënga, chë Jesucristbe soyëngama cantënga, y chë Bëngbe Bëtsabe Espíritu iuama tšëngaftanga chašmot-sobena jacántama soyënga; chca šmochjama Bëngbe Bëtsá jëtschuayama. <sup>17</sup> Y lempe ntšamo chašmojtsama o chašmotsichamcá, Bëngbe Utabná Jesúsbeñe ošbuáchiyënga quetsomñecá chca šmochjama, sempre Bëngbe Bëtsá Bëngbe Taitábioye, chábeyeca jtsatschuanayëse.

#### *Ntšamo ínÿengaftaca jtsiyenama*

<sup>18</sup> Shémanga, šmochtsatšëmbo tšëngaftangbe boyanga chë yebnentša mándayënga imomnana, y nÿets tempo chca jtsejuabnayëse šmochtsiyena, er tšëngaftanga Bëngbe Utabnábeñe ošbuáchiyënga quetsomñecá, chca cmontsamna. <sup>19</sup> Boyanga, tšëngaftangbe shémanga sempre šmochtsababuánÿeshana, y podesca palabréngaca ndoñe šmattsët-sëtsnaye.

<sup>20</sup> Básenga, tšëngaftangbe bëtsétsanga nÿetscañe šmochtsayaunana; chca šmojt-samëse, Bëngbe Bëtsá oyejuayá echántsemna. <sup>21</sup> Taitanga, ndoñe šmattsama tšëngaftangbe básenga chautënama, ainaniñe tondaye añémoca chënga ndoñe chamondët-satsmënama.

<sup>22</sup> Tšëngaftanga chë nÿets tempo nÿe ínÿabiamna oservénënga, tšëngaftangbe nduiñënga nÿetscañe šmochtsayaunana, y ndoñe nÿe chënga tcmojtsénÿa ora, mo nda nÿe entšangbe delante tšabá joquédama tojtsebošacá, ndayá chënga šmochtsayaunana nÿets ainaniñe ndegombre tšabe juabnéngaca, er tšëngaftanga Bëngbe Utabnabiamna corente respeto šmondbomna. <sup>23</sup> Lempe ntšamo chašmojtsamcá, nÿets tšëngaftangbe añémoca šmochtsama, mo Bëngbe Utabná ndegombre cuaftseservencá, y ndoñe nÿe entšangbioycá. <sup>24</sup> Tšëngaftanga ya šmondétatšëmbo, ntšamo cha chabe entšanga tojašë-buachenacá mo uacanancá, Bëngbe Utabná tšëngaftanga cmochjátšatayama. Er Cristo, chë Utabná, endmëna ndábenga tšëngaftanga šmomnana, y cha šmondëserveda. <sup>25</sup> Pero chë ndoñe tšabe soyënga tontsamábioye, Bëngbe Bëtsá bochanjacastíga, ntšamo chë entšá bacna soyënga tojamcá, er Bëngbe Bëtsabiamna nÿetscanga cachcá monduámama.

## 4

<sup>1</sup> Y tšëngaftanga, ndëmuanÿengbiama ínÿenga nÿets tempo imoservena, nÿetsca soyënguiñe tšabá šmochtsama, y nÿetscangbiama cachcá šmochtsemna, chë nÿets



tempo nje tšengaftangbiama oservenéngaftaca, er tšengaftanga šmondétatšëmbo ce-  
 loca canya endmëna, ndabiama tšengaftángnaca oservénënga šmondmëna.

### *Ošbuáchiyënga jábuayenama*

<sup>2</sup> Njets tempo Bëngbe Bëtsáftaca šmochtsencuéntaye, ntšamo šmojtsichámuama  
 botamana jtsejuabnayëse y Bëngbe Bëtsá jtsatschuanayëse. <sup>3</sup> Bëngbe Bëtsáftaca cha  
 šmojtsencuénta ora, bëngbiámnaca chašmochtseimpadana, cha chaoma bënga fchay-  
 obenama Bëngbe Bëtsabe palabra Cristbiama entšanga jábuayenama, chë buayenana  
 soye ndayama tempo entšanga ndoñe monjántatšëmbo. Atše chë buayenana soye  
 entšanga abuátambaye causa, mora cárceloye sentsétámëna. <sup>4</sup> Chcasna, Bëngbe Bëtsá  
 atšbiama šmochtseimpadana, atše chayobenama chë buayenana soyënga entšanga  
 jabuátambama, y chë soye atše chaima chënga corente tšabá catafjosertaycá, er atše  
 šontsemna chca jamana.

<sup>5</sup> Šmochtsiyena njetsca soyënga osertanánaca jtsamëse chë Jesucristbeñe  
 ndošbuáchiyëngaftaca, y chca, njets tempo ínÿënga šmochtsinÿanÿnaye tšengaftanga  
 Jesucristbeñe ošbuáchiyënga bëtsemnama. <sup>6</sup> Inÿëngaftaca chašmojtsencuénta ora,  
 šmochtsama ntšamo šmojtsoyebuambnacá chëngbiama tšabá chaotsemnama, y soyënga  
 šmochtsichamo njetscanga oyejuayana chamotsebomnama; y šmochtsetátšëmbo  
 ntšamo cmojtsamna cada cánÿabioye jोजना.

### *Jtadióšoftanama*

<sup>7</sup> Jesucristbeyeca bëngbe bonshana catšata Tíquico, canÿe trabajayá tšabe pal-  
 abra bomná y Bëngbe Utabnabiama béngaftaca oservená, tšengaftangbioye noti-  
 ciënga echanjuamba ndayá átšeftaca tojopasama. <sup>8</sup> Chíyëca cha tšengaftangbioye  
 sentsichamná, chca, tšengaftanga chašmotsetatšëmbuama ndayá béngaftaca yojt-  
 sopasana, y cha chacmañëmuayama. <sup>9</sup> Cháftaca Onésimo echanjá, Jesucristbeyeca  
 bëngbe bonshana catšata; cha canÿe tšabe palabra bomná endmëna, nda tšengaftang-  
 biocana tonjánabo. Chata tšengaftanga cmochanjácuntaye lempe ntšamo muiñe yojt-  
 sopasancá.

<sup>10</sup> Aristarco, muentše átšeftaca cárceloye utamená, cmontsacheuaná. Y Marcos, Bern-  
 abebe primo, chánaca cmontsacheuaná. Tšengaftanga ya buayenánënga šmontsemna  
 ndayá jamama cmojtsamnana, Marcos tšabá jofjama, cha tšengaftanga jautsëtsayama  
 tojase. <sup>11</sup> Jesús, chë Justo cánaca uabainá, chánaca cmontsacheuaná. Quem pueblentša  
 njetsca judiënga ošbuáchiyënguentšana, nje chë unga átšeftaca mondëtrabája, Bëngbe  
 Bëtsabe amëndayana entšángbioye chaóshjanguama, y chënga mondama atše ainaniñe  
 bëts añemo chaitsebomnama. <sup>12</sup> Epáfrasnaca cmontsacheuaná, inÿe tšengaftangbiocá  
 y cha Cristo Jesusbiama jatrabájama endoservena. Cha njets tempo tšengaftang-  
 biama Bëngbe Bëtsábioye tša bochandbëtseimpadana, tšengaftanga Bëngbe Utabnábeñe  
 ošbuáchiyana ndocna te chašmondájbanama, y njets tempo chašmotsiyena lempe  
 jtsamëse, ntšamo chë Jesucristbeñe corente ošbuáchiyënga jtsiyenana yojtsamncá;  
 y chca, tšengaftanga corente šmochántsetatšëmbo ntšamo šmojtsamncá ndegombre  
 yomna ntšamo Bëngbe Bëtsá yobošcá. <sup>13</sup> Cach atše sënjinÿe y sentsobena jayanama  
 ntšamo cha jabuache yotrabájama, tšengaftanga jujabuáchama, chë Laodicea pueblo-  
 quënga y Hierápolis puebloca oyenëngnaca. <sup>14</sup> Lucas, bëngbe bonshana ashnayá,  
 cmontsacheuaná; y Démasnaca.

<sup>15</sup> Chë Laodiceoca Jesucristbeyeca catšátanga bëngbe cuenta šmochjácheuaye. Nin-  
 fábioynaca šmochjachuaye, y njetsca ošbuáchiyënga chë Bëngbe Bëtsá jëtschuayama  
 chabe yebnentše jénefnama imuamanëngnaca. <sup>16</sup> Quem tsbuanácha chašmo-  
 jualiá chentšana, Laodiceoca ošbuachiyëngbioye šmochjuíchmua, chócnaca mëcha  
 chamualiamá; y tšengaftángnaca šmochjualiá chë Laodiceoca ošbuachiyëngbioye tmon-  
 janichmó tsbuanácha, chëcha tšengaftangbioye chaojuáshjango ora.

<sup>17</sup> Arquipo šmochjauyana yejuana chaotsantješna chë Bëngbe Bëtsá tbojabonyé trabajo sempre tšabá chaotsocumplínama.

<sup>18</sup> Atše Pablo, nýe quem palabrënga tšëngaftanga jacheuayama cach atšbe cucuátšeca sëntsabianná. Šmochtsenójuabnaye atše utamená stsemnama. Atše, Bëngbe Bëtsá séntseimpadana, cha chaoma tšabe bendicionënga tšëngaftangbeñe chaotsemnama.

## 1 Tesalonicenses

### *Jacheuayama*

<sup>1</sup> Atše Pablo, Silvano y Timotéoftaca, quem tsbuanácha sentsabiamná tšengaftangbiamá, chě Tesalónica běts puebloca Jesucristbeñe ošbuáchiyěngbiamá, tšengaftanga chě Běngbe Bětsá chě Taitá y Běngbe Utabná Jesucristoftaca cányiñe mo canyáca šmomnēnga. Atše sěntseimpadana Běngbe Bětsá, chaoma tšabe bendicionēnga tšengaftangbeñe chaotsemnana, y tšengaftanga ainaniñe tšabe ebionana chašmotsebmnama.

### *Pablo Běngbe Bětsábioye tbojtanchuá chě Tesalónica pueblentša entšangbe ošbuáchiyama*

<sup>2</sup> Běnga sempre Běngbe Bětsá fsěndětschuaná tšengaftangbiamá, y běnga cháftaca ftsencuénta ora, tšengaftangbiamá fchandbětseimpadana. <sup>3</sup> Běnga, Běngbe Bětsá chě Taitáftaca ftsencuénta ora, fsěndbětseñojuabnaye ntšamo tšengaftanga šmotrabájama, Jesucristbeñe ošbuáchiyana šmobómnyeyeca; ntšamo tšengaftanga tša ínŷenga šmējabuáchana, Jesucristo šmobobonshánayeca; y ntšamo tšengaftanga, ndocna te ntjajbanacá, jtsošbuáchiyěse Běngbe Utabná Jesucristbeñe šmobátmanama.

<sup>4</sup> Jesucristbeyeca catšátanga, běnga fsěndětatsěmbo Běngbe Bětsá cmababuánŷeshanama, y cha tcmojábacacama chábenga chašmotsemnana. <sup>5</sup> Běnga chě tšabe noticiēnga Jesucristbiamá tcbonjanabuayená ora, ndoñe nŷe běnga jóyebuambayěse chca quenjatsmēna, ndayá chě Uámana Espíritbe obenanácna, y běnga corente jtsejuabnayěse chě buayenánana ndegombre soye bětsemnana. Tšengaftanga corente šmondětatsěmbo ntšamo běnga ftsjamna tšengaftangaftaca fsěnjamna ora, tšabe soyēnga tšengaftangbiamá nguayíñe.

<sup>6</sup> Chora, ntšamo běnga fsěnjanamcá y ntšamo Běngbe Utabná enjanियencá, tšengaftanga šmonjanontsé amana; y chě buayenánana šmonjanóyēngacñe chě Uámana Espírítu tcmojanatšatá oyejuayánaca, masque ínŷenga tmojamna tšengaftanga puerta chašmosufrima. <sup>7</sup> Měntšá, tšengaftanga uánatsanēnga šmonjanobiamá ntšamo ndegombre jtšiyenama, nŷetsca Macedonia y Acaya luarentša Jesucristbeñe ošbuáchiyěngbiamá. <sup>8</sup> Tšengaftanga šmojoyebuambá Běngbe Utabná Jesucristbe palabrama. Mora, ndoñe nŷe Macedonia y Acaya luarentše entšanga chama quemátstatšěmbo —nŷets luarenache entšāngnaca montsetátšěmbo ntšamo tšengaftanga Běngbe Bětsábeñe šmojtsošbuáchema —y chca, běnga tondaye más quešnátějaboto tšengaftangbiamá jatichámuama. <sup>9</sup> Cach entšanga montsoyebuambná chě běnga tcbonjánabuache ora tša tšabá tšengaftanga šcojanébuajama. Chéngnaca montsichamo ntšamo tšengaftanga šmojtšabaná chě šmojanjuabná diosēnga yojamna soyēnga adórayana y šmojanontsé chě tšabe benache jtishachama, y chě Běngbe Bětsá ndegombrá y ainá jasérviamá, <sup>10</sup> y chca, chabe Uaquiñá Jesús jobátmama; mua celocana echanjésabo; chabiamá Běngbe Bětsá tojanma obanēnguentšana cháuatayenama, y cha šochanjátsebacaye chě uabouana castigüentšana, Běngbe Bětsá entšangbe bacna soyēngama chēngbiamá yobomnentšana.

## 2

### *Ntšamo Pablo yojantrabája Tesalónica puebloca*

<sup>1</sup> Cach tšengaftanga, Jesucristbeyeca catšátanga, šmondětatsěmbo běnga tcbonjánabuache ora ndoñe nŷe bonamente quenjatsmēnana. <sup>2</sup> Tšengaftanga šmondětatsěmbo, běnga cabá tšengaftangbioye nda ora, Filiposoca šonjanēyánguango y bacá šonjánaborlama; y masque tšengaftangbioca běngbe contra entšanga monjamna, Běngbe Bětsá tonjanma běnga fchayobená chě tšabe noticiēnga bětscá añémoca jabuátambama.

<sup>3</sup> Er bēnga entšāngbioye bostero soyēnga ndoñe queftsjatanabuayiyná, tšēngaftangbiamama bacna soyēnga ndoñe queftsjatanboše, y entšānga jáingñāma ndoñe queftsjatanoyebuambná. <sup>4</sup> Bēngna inyētšá; Bēngbe Bētsá yojanjuabná bēnga chabe trabajo jamama obenēnga ftsjamna ca, y chca, šonjanēbuáyana chabe tšabe noticiēnga entšānga jabuátambama, y chca bēnga fsēndoyebuambná; chíyeca bēnga ndoñe nye entšāngbe bominyiñe tšabá chaotsinyñama queftsátama, ndayá nye Bēngbe Bētsabiamama, nda chē ndayá bēngbe ainaniñe yomnama yotátšēmo. <sup>5</sup> Ntšamo tšēngaftanga corente šmondētātšēmbcá, bēnga ndocna te tšēngaftangbiamama tšabe soyēnga tifjānayana, tšēngaftanga bēngaftaca oyejuayēnga chašmotsemnama; y ntšamo tšēngaftanga cbonjanētsētsnacá ndoñe quenjatsmēna nye tšēngaftangbentšana ba soyēnga bēngbiamama josháchiñama. Bēngbe Bētsá chama yotátšēmo. <sup>6</sup> Ndocna te bēnga queftsatsnguá entšānga más uamanēngcá bēnga chašotsabiamnama, ni tšēngaftangbentšana, ni ínnyēngbentšana.

<sup>7</sup> Masque bēnga, Cristbe ichmónēnga bētsemnama, matifjanobená tšēngaftanga nye sempre jtsamēndayana, bēnga ndoñe chca chibiátanma; bēnga corente jtsababuánjēshanēse cbonjánanyēna, ntšamo canye mamá chabe básēnga jtsabéchéyana y corente bonshanánaca jtsanyēnana. <sup>8</sup> Tša cbonjánababuanjēshanayeca, bēnga ndoñe nye chē Bēngbe Bētsabe tšabe noticiēnga checbēnjatanabuayená, tšēngaftanga chiñe chašmotsošbuáchema ntšamo bēnga fsēndošbuachecá, ndayá bēngbe vidēnga jáshbiamnaca fsēnjanprontana tšēngaftangbe tšabiamama. ¡Tša cbondábabuanjēshana! <sup>9</sup> Jesucristbeyeca bēngbe catšátanga, tšēngaftanga šmenabuínynā ntšamo bēnga bētscá y jabuache fsēnjantrabajama, Bēngbe Bētsabe tšabe noticiēnga abuayiynayīñe y bēngbe vida onguayīñe, chca, tšēngaftanga ndoñe chacmondétsamnama bēngbe uajabótama bēnga jatātšatnayama.

<sup>10</sup> Cach tšēngaftanga šmondētātšēmo y Bēngbe Bētsánaca, ntšamo bēnga ftsjamna tšēngaftanga chē ošbuáchiyēngaftaca fsēnjamna ora; fsēnjaniyena ntšamo Bēngbe Bētsá tšabá tbojtsinyñancá, nyētscāngaftaca fsēnjánama ntšamo jamama šojanamncá, y ndocná quenátobena jatichámuana ntšamo fsēnjanamcá ndoñe tšabá yonjamna ca. <sup>11-12</sup> Tšēngaftanga šmondētātšēmo, bēnga bētscá jóyebuambayēse cada ona tšēngaftanguentšá cbonjanéjabuachanama y cbonjánāñemuama, ntšamo canye taitá chabe básēngaftaca endbetsamcá. Bēnga bētscá cbonjanētsētsná ntšamo Bēngbe Bētsá tšabá tbojtsinyñancá chašmotsiyenama; y Bēngbe Bētsá cmontsēbuájajana chabe amēndayoye jamashēnguama y chabe obenana y buashinyñanana jinjama.

<sup>13</sup> Bēnga, Bēngbe Bētsabe tšabe soyēnga cbonjanabuayiyná ora, ntšamo tcbonjanēyancá tšēngaftanga šmonjanuena y šmontsanošbuaché mo Bēngbe Bētsábiocana buayenanancá, y ndoñe nye entšāngbe oyebuambnayancá. Y ndegombre Bēngbe Bētsabe buayenánana endmēna, y chē palábraca, tšēngaftanga chē chábeñe osbuachiyēngbeñe Bēngbe Bētsá bētscá soyēnga yojtsama. Chama sempre Bēngbe Bētsá fsēndētschuaná. <sup>14</sup> Jesucristbeyeca catšátanga, cach tšēngaftangbe luarentša entšānga cmonjanēcama ora y šmonjansufrina, šmonjanpasá ntšamo chē Judeoca Bēngbe Bētsábeñe ošbuachiyēngcá enefjuanēnga tmonjanpasacá, y chēngna Cristo Jesusbe entšānga mondmeña. Chēnga tmonjansufrí cach luarentša entšānga, chē judiēnga, chēngbioye monjanēcama ora. <sup>15</sup> Chē judiēngbe bēts taitanga, Bēngbe Bētsabe juabna oyebuambnayēngbioye tmojtsanēbaye, y ntšamo chēngbe bēts taitanga tmojanmncá, chēngnaca Bēngbe Utabná Jesúsbioye tmojanóba, y chēnga mondama bēnga chaftsesufrinama. Chēnga ndoñe tšábēnga Bēngbe Bētsabe bominyiñe quemátsmēna, y nyētsca entšāngbe contra montsemna. <sup>16</sup> Chē ndoñe judiēngbioye, Bēngbe Bētsá cháuatsebacama jábuayenama fstseboše ora, chē judiēnga bētscá jtsamana bēnga ndoñe fchandobenama chca jamama. Judiēnga nyēts tempo bacna soyēnga monjánama; pero chē entšānga jábuayenama bēnga ndoñe fchandobenama jtsamana, entsemna chē

último bacna soye ntšamo chë judiënga jamama imojtsobencá, más ya ndoñe; y mora, cabana, Bëngbe Bëtsá ya puerte chëngaftaca tbojetna y echanjácastigaye.

*Pablo tša yojánboše, Tesalónica puebloa entsanga jányama*

<sup>17</sup> Jesucristbeyeca catšátanga, bënga tšëngaftangbentšana baseftayté jëftseboचना sonjanotocá ora, masque ndoñe choca tšëngaftangftaca queftsátanmëna, sempre tšëngaftangbiama fsënjanenujuabná, y tša fsënjánboše tšëngaftangbioye jtésana jautsëtsayama. <sup>18</sup> Bënga fsënjánboše tšëngaftangbioye jésana; chíyeca cach atše Pablo, ba soye sënjanóshenguënja jobenayama choye jésama, pero Satanás yojantrabája bënga ndoñe fchandobenama chca jamama. <sup>19</sup> Atše séntsanboše tšëngaftanga jautsëtsayama, er tšëngaftangbeyeca Bëngbe Utabná Jesusbe delante, cha yochjésabo ora, ntšamo tšëngaftanga šmoyenama, bënga puerte jtsošbuáchiyëse fchantsoátmana, corente oyejuayënga fchtsemnama y más bëtsësanga fchtsemnama. <sup>20</sup> Aíñe, ndegombre, ntšamo tšëngaftanga šmoyenama, bënga bëtská añémoca ntšamo tšëngaftangbeñe tifjamama fsëndbëtsoyebuambnaye, y tša oyejuayënga fsëntsemna.

### 3

<sup>1</sup> Chíyeca ya ndoñe chibiatanobená más jatobátmanana tšëngaftanga jautsëtsayama; as fsënjanjuabó nye bëndata Atenas bëts pueblentše joquédana, <sup>2</sup> y jíchmuana Jesucristbeyeca bëngbe catšata Timoteo, chë béngaftaca trabajayá, Bëngbe Bëtsábioye oservéniñe, tšabe noticiënga Cristbiama entsanga abuayiyayíñe. Fsënjanichmó chachmañémuayama y chaotsamama tšëngaftanga Jesucristbeñe más chašmotsošbuáchema; <sup>3</sup> y chca, ndocná Jesucristbeñe ošbuáchiyana chaondájbana, masque tšëngaftanga Jesúsbeñe ošbuáchiyënga bëtsemnama, ínÿenga imojtsama chašmotsesufrínama. Er cach tšëngaftanga šmondétatšëmbo bënga šojtsamna chca quem luarentše jëftsepadecénana. <sup>4</sup> Y cabá tšëngaftangftaca fsënjëftsemna ora, tcbonjanéyana bënga šojánamna jasúfriana; y ndegombre chca tonjopasá, ntšamo tšëngaftanga ya šmondétatšëmbcá. <sup>5</sup> As y chë tšëngaftangbiama jtsetatšëmbuama más jatobátmanana ndoñe quetstétsobena yeca, sënjanjuabó šojëtsemna Timoteo jíchmuana. Sënjanichmó atše jtsetatšëmbuama aíñe bëtská o ndoñe tšëngaftangbe ošbuáchiyana Jesucristbeñe tayojamnama, er atše yapa sënjanjuabná nderado Satanás tojanma tšëngaftanga bacna soyënga chašmot-samama, y chca, bëngbe trabajo tondayama chaondëtsooservénama.

<sup>6</sup> Pero mora, Timoteo tšëngaftangbiocana tontashjango y tonjúshjango noticiënga, y bënga chama oyejuayënga fsëntsemna, ntšamo tšëngaftanga bëtská Jesucristbeñe šmojtsošbuáchema y nyetscanga šmenbobonshánama. Cha šonjacuntá ntšamo tšëngaftanga corente oyejuayënga bëngbiama šmuatenajuabnama, y ntšamo tšëngaftanga tša šmojtseboše bënga jányama, cachcá ntšamo bënga tšëngaftanga jányama tša fsëntsebošcá. <sup>7</sup> Quem sóyeca, Jesucristbeyeca catšátanga, y mora chë bënga nyetsca chë padecena soyënga ftssebomna ora y ínÿenga bënga jasúfriama imojtsama ora, bëts añemo fsëntsebomna, ntšamo tšëngaftanga tša Jesucristbeñe šmojtsošbuáchema jtsetatšëmbëse. <sup>8</sup> Jtsetatšëmbuana tšëngaftanga sempre puerte tšabá Bëngbe Utabnáftaca šmoyenama, entsama bënga más añémoca chaftsiyenama. <sup>9</sup> Mora fchantsobena Bëngbe Bëtsá jtsatschuanayana tšëngaftangbiama, y chë tšëngaftangbeyeca chabe delante bënga oyejuayana ftsbomnámnaca. <sup>10</sup> Cada te, bnëté y ibeta, tša Bëngbe Bëtsá fsëndétseimpadana jobenayama tšëngaftanga jautsëtsayama chašualesenciama, Bëngbe Bëtsabe palabra tšabá chašmobedecema, chë buayenánana ntšamo yojtsashbencá jabuátambama.

<sup>11</sup> Bënga, Bëngbe Bëtsá fsëntseimpadana, cachá y Bëngbe Utabná Jesús, chašújabuache bënga fchayobenama tšëngaftangbioye jama jautsëtsayama. <sup>12</sup> Y Bëngbe Utabná chaoma más bëtská chašmotsenbobonshánama, y cachcá corente nyetscángftaca, ntšamo bënga cbondababuanÿeshancá. <sup>13</sup> Chca, tšëngaftangbe ainaniñe bëtská añemo šmochántsebomna; y Bëngbe Utabná Jesús cachábengftaca chaojésabo ora, Bëngbe

Bětsá Běngbe Taitabe delante ndocná chaodayana, ntšamo tšěngaftanga šmojamcá ndoñe tšábá yontsemna ca, er tšěngaftanga šmondměna Běngbe Bětsábenga, nje cha jtseservénama.

## 4

*Ntšamo jtsiyenama, Běngbe Bětsá oyejuayá chaotsemnana*

<sup>1</sup> Y mora inje palabra šmochjatspasencia. Jesucristbeyeca běngbe catšátanga, tšěngaftanga běngbentšana šmonjanatsjinje ntšamo jtsiyenana cmojanamna, ntšamo Běngbe Bětsábioye oyejuayá jabemama yomncá, y ndegombre chca tšěngaftanga šmondoyena. Y mora Běngbe Utabná Jesusbe cuenta, cbontsaimpadana y beca cbontsětsětná más chca chašmotsamama.

<sup>2</sup> Tšěngaftanga šmondětatsěmbo ndayá tifjánayana ntšamo tšěngaftanga chašmotsiyenama, y chca fsěnjanna Běngbe Utabná Jesús chca jamama šonjanaměndáyeca. <sup>3</sup> Běngbe Bětsá endboše tšěngaftanga chašmotsiyenama mo Běngbe Bětsabengcá, ndocná bacna soyěnga boyabása o shembásaftaca chaondětsamama, <sup>4</sup> y nyetscanga chamotsobena ntšamo canje shema jonguanguana, chě ntšamo canja Běngbe Bětsábia yomná jamama ibomncá, y ntšamo entsangbe bominiñe tšábá yomncá, <sup>5</sup> y ndoñe chabondónguango nje cháftaca bacna soyěnga chěngbe cuérpoca jamama, ntšamo chě Běngbe Bětsábioye nduabuátměnga mondbetsamcá. <sup>6</sup> Chě palabriñe ndocná chabe catšátbioye chabonděingñé, chě catšatbe shémaftaca bacna soye jaměse, er chca aměngbioye Běngbe Utabná corente echanjácastigaye. Chíyeca běnga ya bětscá chama tcbonjabuayená. <sup>7</sup> Er Běngbe Bětsá ndoñe šonjanachembo bacna soyěnga boyabása o shembásaftaca jtsamama, ndayá ntšamo tšábá yomncá jtsamama, ntšamo chabe entsanga mondbetsamcá. <sup>8</sup> Měntšá, nda quem buatěmbana soyěnga tojtsábotena, cha ndoñe nje entsanga jtsěbátanana, ndayá Běngbe Bětsábioye, nda tšěngaftangbe ainaniñe Uámana Espíritu cháuamashěnguama tojama.

<sup>9</sup> Atše ndoñe quešnátsměna juabuábiamana ntšamo cmojtsamna ínjenja Jesucristbeñe ošbuáchiyěnga jtsababuánjeshanama, er cach Běngbe Bětsá tcbonjabuatambá nyetscanga chašmotsenbobonshánama. <sup>10</sup> Y ndegombre, tšěngaftanga chca šmondama nyetsca Macedonia luarentše Jesucristbeñe ošbuáchiyěngaftaca. Pero cbontsaimpadana, Jesucristbeñe catšátanga, más chca chašmotsamama.

<sup>11</sup> Nja sempre quem soyěnguiñe šmochtsentšena: natjěmbana jtsiyenana, ínjenge soyěnguiñe ndoñe ntsonremeténana, y ndoñe ntjatobátmanana nje ínjenja tšěngaftangbiana chamotsetrabájama, ntšamo tcbonjaněyancá tšěngaftangaftaca fsěnjanna ora; <sup>12</sup> chca šmochtsama, chě ínjenja Jesucristbeñe ndošbuáchiyěnga chacmot-sarrespetánama, y ndocnábeñe ntjatobatmancá šmochantsobena jtsiyenana.

*Běngbe Utabná quem luaroye yochjésabo ora*

<sup>13</sup> Běngbe catšátanga, běnga fsěntseboše tšěngaftanga ndegombre chašmotsetátšěmbo ntšamo chě obaněngaftaca yochjopásama, y chca, tšěngaftanga ndoñe ngmenánaca chašmondětsemnana, mo chě ínjenccá, chě tcojóbantšana ndoñe yontsemna jtayenama ca juabnayěngcá. <sup>14</sup> Běnga fsěndošbuaché Jesús tojanóbana y tojtayanenama, y cachcá běnga fsěndošbuaché chě tmojóbăněnga y Jesúsbeñe tmojtsošbuáchese, Běngbe Bětsá chěngbiana yochjama chě nyetsca tescama yomna tšabe vida Jesucristoftaca chamotsebonnana, y quem luaroye cháftaca chamuatábama.

<sup>15</sup> Chě soyama běnga cbontsětsětná ntšamo cach Běngbe Utabná tojěftsanabatambacá: Běngbe Utabná chaojésabo ora, chě ošbuáchiyěnga chě te cabá ainěnga chamojtsemněnga, chábioye ndoñe quemochátinjenja tsbanánoca, más natsana chě ya obaněnga chě te mochtayeněngbiana. <sup>16</sup> Er entsanga mochanjouena canje mando juayebuáchenana, chě angelěngbe aměndayabe oyebuambnayana y chě Běngbe Bětsabe trompetěfjua juajatětámnaca, y chora cach Běngbe Utabná celocana echanjástjango. Y

chë tmojóbanënga, Crístbeñe imojanošbuachenga, natsana mochántayena; <sup>17</sup> chentšana, chë ainënga chamojtsemnënga chëngaftaca cánýiñe Bëngbe Bëtsá šochanjúyamba, Bëngbe Utabná yochtsemnoca jashjanguama, chë celoca jantšetëshënga endmënoca; as chentšana nyetsca tescama cháftaca bënga mochántsemna. <sup>18</sup> Quem palabrëngaca nyetscanga ndoñe más ngmënana ainaniñe chašmondëtsebmna.

## 5

<sup>1</sup> Jesucrístbeyeca catšátanga, ndoñe quenátsiyta atše jubuábiamana mocna ora chë soyënga yochjopásama. <sup>2</sup> Cach tšëngaftanga corente šmondétatšëmbo, Bëngbe Utabná yochjésabo chama ndocná chaondëtsejuabná ora, mo canýe atbëbanacá jashjanguana ibeta ndocná chama tonjatsjuabná ora. <sup>3</sup> Entšanga chamojayana: “Lempe tšabá endët-somñe y tondayama quešnátamna játauatjana ca”, chora nýe ndeolpe chë entšangbiana tša jasúfriama echanjóshjango, mo canýe shembása šešona jtsebmnama ora nýe ndeolpe jasúfriama jóntšancá; y ndegombre, entšanga chca jasúfriama quemochatotsbocá. <sup>4</sup> Pero tšëngaftanga catšátanga, ndoñe quešmátiyena mo ibetiñcá, bacna soyënga jtsejuabnayëse y jtsemëse; y chca, Bëngbe Utabná chaojésabo ora, tšëngaftanga ndoñe auatjanánënga quešmochátsmëna, mo ndábioye canýe atbëbaná tbojotbá ora, chábioye cuaftsauatjanacá. <sup>5</sup> Nyetsca tšëngaftanga šmondmëna entšangbe juabna binýnayabe básenga, y mo binýniñcá šmondoyena. Bënga ndoñe chë ibetiñe mandayabe básenga quemuátsmëna, y mo ibetiñcá ndoñe quemuátiyena; <sup>6</sup> chíyeca bënga ndoñe quešnátamna jtsemnana mo chë cachëngbe cuerpo jenomándama ndobenëngcá, chë mo cuaftsemangcá oyenënga. Pero aiñe šontsamna mo chë fšnëngcá jtsiyenana, bëngbe cuerpo jtsemándayëse y nyets tempo jtseprontánëse. <sup>7</sup> Ibeta ora entšanga jtsemangana, y cach ibeta tojtsemna ora entšanga jotmenangana; <sup>8</sup> pero bënga, chë binýnentšëngna, šontsamna sempre bëngbe cuerpo jtsemándayana. Šontsamna Bëngbe Bëtsábeñe jtsošbuáchiyana y cha jtsebobonshánana, chë uyaná Satanasbiana jenéuyanama y cha jayénjanama, mo canýe soldadcá, canýe morocho soye cochaca jenácochjatsana jtsevalentiana y ndoñe chamondëyénjanama. Y chë castigüentšana Bëngbe Bëtsá šochjátsebacamnaca puerte jtsošbuáchiyëse jtsobátmanana; y chca, bënga mochántsemna mo canýe soldadcá, cha canýe casquëse juabuchëtsana jenéuyanama. <sup>9</sup> Er Bëngbe Bëtsá ndoñe šonjáchembo bënga chašotsamnana chë nyetsca tescama castigo jtsebmnama. Ndayá Bëngbe Bëtsá šojabacacá, Bëngbe Utabná Jesucrístbeyeca bënga chamótsbocama. <sup>10</sup> Cha bëngbiana tojanóbana, bënga cháftaca cánýiñe jtsiyenama chamotsobenama, masque ainënga o obanënga chamojtsemnëse, cha chaojésabo ora. <sup>11</sup> Chíyeca, nyetscanga šmochtsenañémuaye y šmochtsenájabuachana más jtsošbuáchiyama, ntšamo tšëngaftanga mora ya šmontsamcá.

### *Pablo choca ošbuáchiyënga jábuayenama*

<sup>12</sup> Jesucrístbeyeca catšátanga, cbontsaimpadana chašmotsarrespetana chë Bëngbe Bëtsabiana tšëngaftangbeñe trabajayëngbioye, y chë Bëngbe Utabná tšëngaftanguentše tojábacacanga uánatsanënga chamotsemnana y ntšamo jtsiyenama cmojtsamnana chácmbuayenama. <sup>13</sup> Cmontsamna chënga jtsarrespetánana y jtsababuánýeshanana, ndaye trabajo chënga imojtsamama. Natjémbana nyetscángaftaca šmochtsiyena.

<sup>14</sup> Quem soyënga chašmotsamámncana cbontsaimpadana: jatrabájama ndoñe tmontsebošëngbioye šmochjucácana, añemo ndbomnéngbioye šmochjáñemuaye, bëtscá osbuáchiyana ndbomnéngbioye šmochjújabuache, y uantadënga nyetscángaftaca šmochtssemna.

<sup>15</sup> Cuedado šmochtsebmna, nderado nda bacna soye tbojaborlase, ndocná ndoñe cachcá chabondëtachnënguama. Masna, nýe šmochtsentšena nyets tempo tšabe soyënga jtsamama cach tšëngaftanguentšëngaftaca y nyetsca entšangaftácnaca.

<sup>16</sup> Njets tempo oyejuayënga chašmotsemna. <sup>17</sup> Sempre Bëngbe Bëtsáftaca šmochtsencuéntaye. <sup>18</sup> Njetsca soyënguiñe Bëngbe Bëtsá šmochtsatschuanaye; er chca entsemna ndayá cha yojtseboše, bënga Cristo Jesúsbeñe ošbuachiyëngcá chamotsamama.

<sup>19</sup> Ndoñe šmattsama ntšamo chë Uámana Espíritu tšëngaftangbeñe yojtsamcá chaotsopochocama. <sup>20</sup> Ndoñe šmattsábotena chë Bëngbe Bëtsabe juabna oyebuambnayëngbe buayenana soye. <sup>21</sup> Yejuana šmochjájuaboye y šmochjayana, chë Bëngbe Bëtsabe juabna oyebuambnayá yomna ca tojtsichamuabe buayenánama ndegombre Bëngbe Bëtsábiocana tayóbocanama, y chentša tšabe soyënga šmochjobuajo y sempre chca šmochtsama. <sup>22</sup> Njetsca bacna soyënguentšana šmochtsojuánañe.

<sup>23</sup> Cach Bëngbe Bëtsá, chë bëngbe ainaniñe tšabe ebionana chamotsebomnama endamá, njetsca soyiñe tšábenga chacá chacmabiama, y njets tšëngaftangbe espíritu, ainana y cuerpo chaotsinýena, Bëngbe Utabná Jesucristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaodayanama. <sup>24</sup> Nda tcmojúbuaja chábenga chašmotsemnama, cha sempre jtsamana ntšamo tojayancá, y lempe cha echanjama.

*Inye rueguënga chëngbiama y jtadióšoftanama*

<sup>25</sup> Jesucristbeyeca catšátanga, Diosmanda, bëngbiámnaca Bëngbe Bëtsá šmochtseimpadana.

<sup>26</sup> Njetscángbioye mo Jesucristbeyeca catšatangcá šmochjácheuaye, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

<sup>27</sup> Cbontsaménda quem tsbuanácha njetsca Jesucristbeñe ošbuáchiyënga chašmëbuáliama, y chca séntsama, Bëngbe Utabná chca jamama šojanmandáyeca.

<sup>28</sup> Atše séntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.



## 2 Tesalonicenses

### *Jacheuayama*

<sup>1</sup> Atše Pablo, Silvano y Timotéoftaca, quem tsbuanácha séntsabiamná tšëngaftangbiamá, chë Tesalónica bëts pueblocá Jesucristbeñe ošbuáchiyëngbiamá, tšëngaftanga Bëngbe Bëtsá chë Taitá y Bëngbe Utabná Jesucristoftaca cányiñe mo canýacá šmomnënga. <sup>2</sup> Atše séntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y tšëngaftangbe ainaniñe tšabe ebionana chašmotsebomnama.

### *Cristo chaojésabo ora, ntšamo entsanga tmojamama Bëngbe Bëtsá echanjayana*

<sup>3</sup> Jesucristbeyeca bëngbe catšátanga, šontsamna nyets tempo Bëngbe Bëtsá tšëngaftangbiamá jtsatschuanayana, ntšamo tšëngaftangbiamá jamama šojtsëtocancá, er tšëngaftanga cada te más ošbuáchiyana šmontsebomna, y ntšamo tšëngaftanga nyetscanga šmojtsenbobonshana, tempscama más yojtsemna. <sup>4</sup> Tšëngaftangbe osbuáchiyama y bonshánama, bënga nyets tempo oyejuayënga fchandbëtsemna, chë ínjenache Bëngbe Bëtsábeñe ošbuachiyëngcá enefjuanéngbeñe tšëngaftangbiamá jóyebuambayama. Bënga fchandbëtsoyebuambnaye ntšamo tšëngaftanga inýetšá ntjat-sjuabnycá Jesucristo šméstonama, y ntšamo tšëngaftanga chábeñe tša šmošbuachémnaca, masque ínýenga tša cmécamena y chašmosufrima bëtscá imojtsama, tšëngaftanga Jesucristbeñe ošbuáchiyënga bëtsemnama. <sup>5</sup> Tšëngaftanga chca Cristo šméstonayeca, corente entsinýinýena Bëngbe Bëtsá nyetsca soyënguiñe tšabá amá yomnama, y entsanga ntšamo tmojamama tšabá o ndoñe tšabá bëtsemnama jayanama ora, cha chca echanjayana ntšamo entsanga tmojtsomerecencá. Y chca entsayana tšëngaftanga aíñe merecido šmotsobuájoñe chabe améndayoye jamashënguama ca; y mora, tšëngaftanga choye jobenayama jashjanguama šmojtsamama, ínýenga imojtsama chašmotsesufrinama.

<sup>6</sup> Bëngbe Bëtsá echanjama ntšamo jamama ibomncá; echanjama chë tšëngaftanga chašmosufrima imojtsamënga bëtscá chamosufrima; <sup>7</sup> y echanjama tšëngaftanga y bënga chë mondësufrinëngbiamá, ndoñe más chamondëtseufrinama. Cha quem soyënga echanjama, Bëngbe Utabná celoca chaojábobocna ora. Cha chabe puerte obenana bomna angelëngaftaca echanjabo, y chora bëtscá inëtšënga echántsemna. <sup>8</sup> Cha echanjabo chë Bëngbe Bëtsábioye jtsabatmama ndoñe montsebošënga jabácastigayama, y chë tšabe noticiënga Bëngbe Utabná Jesusbiamá ndoñe montsuenanëngbioynaca. <sup>9</sup> Chënga Bëngbe Bëtsá echanjácastigaye, nyetsca tescama jtsapochócase; y Bëngbe Utabnábentsana bënoca mochantsemnënga, y ndocna te quemochatobenaye jinýama Bëngbe Utabná tša bëtsá y obená bëtsemnama. <sup>10</sup> Quem puerte uámana te, Bëngbe Utabná chaojésabo ora, nyetsca chabe entsanga, nyetsca chábeñe ošbuáchiyënga cha mochántatschuanaye y mochántsichamo: “¡Tša obená cha yomna ca!” Y tšëngaftanga chëngaftaca šmochántsemna, er tšëngaftanga šmontsanošbuaché bënga ndegombre fsënjántatšëmbo soyënguiñe, chë bënga tcbonjanabuayená soyënguiñe.

<sup>11</sup> Chíyeca, chca chaotsemnama, nyets tempo Bëngbe Bëtsábioye tšëngaftangbiamá fsëndëimpadana merecido bomnënga chácabiamama, chë vida chašmotsebomnama, ndayama cha tcmojúbuaja, y chabe obenánaca bëtscá chaoma tšëngaftanga chašmobená nyetsca tšabe soyënga ntšamo šmojtsejuabnacá jamama, y chašmobená jamama ndaye soyënga ntšamo šmojtsamcá, Jesucristbeñe šmojtsošbuáchema. <sup>12</sup> Chca jtsamëse, tšëngaftanga šmochanjínyanýiye Bëngbe Utabná puerte bëtsá y uamaná bëtsemnama, y cha echanjama tšëngaftanga más uamanënga chašmotsemnama. Chca echanjopása, er Bëngbe Bëtsá y Bëngbe Utabná Jesucristo tšëngaftangbiamá tšabe juabna ibobomna.

## 2

*Chë Bëngbe Bëtsabe contra yomná*

<sup>1-2</sup> Mora atše séntseboše Bëngbe Utabná Jesucristo jésabama orscama jáuyanama, chë bënga cháftaca tsbanánoca jteninýenama ora. Básefta entsānga imojtsichamo chë bëts uámana te, chë Bëngbe Utabná jésabama te, ya tojóshjango ca; pero cbontsaimpadana, Jesucristbeyeca catsátanga, bëtsca šmochtsentsēna chēnga ndoñe chamondobená jamana tsēngaftanga inýetsá juabna tsēngaftangbe ainaniñe chašmátsbomnama. Ndoñe šmatjóyeunaye nderado nda mëntšá chacmojsētsētná ora: “Canýe Bëngbe Bëtsabe juabna oyebuambnayá šonjáuyana chë Bëngbe Bëtsabe uámana te ya tojóshjango ca” o “canýa chca šonjabuayená ca” o “Páblēbiocana tsbuanácha fsēnjushache y chiñe entsayana chë te ya tojóshjango ca”. <sup>3</sup> Bëtsca šmochtsentsēna ndocná tondáyeca chacmondáingñema. Er chë Bëngbe Utabnabe uámana te cabá ndóshjango ora, mallajta entsānga Bëngbe Bëtsabe améndayama contra mochántsemna, y chë Bëngbe Bëtsabe contra yomná echanjábocna. Y cha entsemna nda ibojtsemna infiernoca pochocaná jtsemnama. <sup>4</sup> Cha Bëngbe Bëtsabe contra echanjóyeuambaye, chë ndēmuanýengbiama y ndaye soyēngama entsānga imojuabná diosēnga imomnama contra echanjóyeuambaye. Chentsāna cha echanjayana chēngbiama más obená yomna ca. Y Bëngbe Bëtsabe bëts yebnóynaca cha echanjámashēngo, choca echanjót bema y entsānga echantsētsētsnaye ndegombre cha Bëngbe Bëtsá yojtsemna ca.

<sup>5</sup> ¿Chë soyama tsēngaftanga ndoñe šmondenabouínýna? Atše cabá tsēngaftangftaca sēnjamna ora, chama sēnjanoyebuambná. <sup>6</sup> Y tsēngaftanga šmondétatšēmo, nda mora yojtsama chë Bëngbe Bëtsabe contra yomná ndoñe chaondonýnama, cabá chë tempo chca jopásama ndóshjango ora. <sup>7</sup> Mora ya mallajta entsānga puerte bacna soyēnga tmojontsé amana, ndoñe ntšamo Bëngbe Bëtsá tojayancá chēnga jamama yojtsamna ca, y bënga chë soyēnga josértama ndoñe quemuátobena, ndayá nýe Bëngbe Bëtsá chca šojinýanyese; pero ntšamo tcbonjauyancá chë Bëngbe Bëtsabe contra yomnabiama ndoñe queochatēchnēngo, nýa nda chë soyēnga ndoñe chaondétsemnama yojtsamábioye Bëngbe Bëtsá chabojtsejuaná ora aíñe. <sup>8</sup> Chora chë Bëngbe Bëtsabe contra yomná echanjábocna; pero Bëngbe Utabná yochjésabo ora, echanjángouo y echanjama cha chaóbanama; y tša buashinýinýanánaca y obenánaca echanjábocnama, chábioye bochantsepochóca. <sup>9</sup> Chë Bëngbe Bëtsabe contra yomná, Satanasbe obenánaca echanjabo, y entsānga bëts obenana echanjínýanyíye, y chë bëts soyēngaca entsānga ingñénēnga mochántsemna. <sup>10</sup> Cha ba bacna soyēnga echanjama ntšamo Bëngbe Bëtsá ndoñe yondbošcá, chca, ba entsāngbiōye nýetsca soyēnguiñe jáingñama. Y chēnga ndegombre pochocánēnga mochántsemna; Bëngbe Bëtsá chca echanjama, chēnga chë ndegombre soyēnga Jesucristbiama chēngbe ainaniñe ndoñe tmonjanóyēngacñe causa, y chë soyēngama mo uámana soyēngcá ndoñe tmonjanjuabó causa, chca, atsebácanēnga jtsemnama. <sup>11</sup> Chca causa, Bëngbe Bëtsá entseleséncia entsānga ingñénēnga chamotsemnama, y chë ndoñe ndegombre soyēnguiñe chamotsošbuáchema. <sup>12</sup> Bëngbe Bëtsá chca echanjama, nýetscanga chë ndegombre soyēnguiñe Jesucristbiama ndoñe tmontsošbuáchenga, chë bacna soyēnga amama oyejuayēnga tmojtsemnēnga, chë nýetsca tescama castigo chamotsebomnama jayanama.

*Bëngbe Bëtsá šojabacacá atsebácanēnga jtsemnama*

<sup>13</sup> Pero bënga šontsamna nýets tempo Bëngbe Bëtsá jtsatschuanayana tsēngaftangbiama, Jesucristbeyeca catsátanga, Bëngbe Utabnabe bonshánēnga. Bënga, Bëngbe Bëtsá fsēndētschuaná cha quem luare cabá ndobojátša ora, atsebácanēnga chašmotsemnama tcmojánabacacama. Bëngbe Bëtsá tcmojatsebacá er chë Uámana Espiritu Bëngbe Bëtsabe entsānga tcmojábiam, y tsēngaftanga chë ndegombre soyēnguiñe šmojtsošbuaché. <sup>14</sup> Chë tsabe noticiēnga bënga cbondábuayiyayeca, Bëngbe Bëtsá

tcmojúbuaja chábenga chašmotsemnana. Cha tcmojúbuaja Bëngbe Utabná Jesucristbe obenana y buashinýinýanánénaca chašmotsebomnana.

<sup>15</sup> Chcasna, ndocna te šmattsajbaná ošbuáchiyana chë ndegombre soyënguiñe ntšamo tcbonjabuatambacá, cach tšëngaftangbeñe jóyebuambayëse y tsbuanácha jubuábiamëse, y ndocna te inýetšá šmatjátsjuabnaye. <sup>16</sup> Bëngbe Bëtsá puerte tšabia endmë-nayeca, cha šuababuánýeshana y tojama bënga sempre añemo ainaniñe chamotsebomnana y chë mochjóyëngacñe tšabe soyëngama corente jtsošbuáchiyëse chamotsobátmanama. Chábioye y Bëngbe Utabná Jesucristbioye fséntseimpadana, <sup>17</sup> chata chaboma tšëngaftanga bëtsá añemo ainaniñe chašmotsebomnana, y tšëngaftanga nyets tempo chašmotsobena ntšamo tšabá yomncá jtsichámuama y jtsamama.

### 3

#### *Bëngbiana Bëngbe Bëtsá šmochtseimpadana*

<sup>1</sup> Y morna, Jesucristbeyeca bëngbe catsátanga, Diosmanda bëngbiana Bëngbe Bëtsá šmochtseimpadana, nyetsca luarenache más ba entsanga chamotsobenama Bëngbe Bëtsabe buayenánana jouenama, y chënga chë soye chamóyëngacñama, y puerte chamotserrespetánama, ntšamo tšëngaftanga šmonjanmcá. <sup>2</sup> Bëngbe Bëtsánaca šmochtseimpadana cha chašotsëbuáuyayama, y chë puerte bacna entsanga ndoñe chamondobenama jamama bënga fchaisufrima, er nyetscanga ndoñe quemochatošbuáchiye chë fsëndbuayiyná palabriñe. <sup>3</sup> Pero Bëngbe Utabná siempre jtsamana ntšamo tojayancá, y cha echanjama tšëngaftanga más chábeñe chašmotsošbuáchema, y ndoñe nye cachcá quecmaténýa chë bacna soyënga mandayá nye ntšámnaca ndoñe chacmondáborlama. <sup>4</sup> Y Bëngbe Utabná entsama bënga ndegombre ainaniñe fchaitsejuabnana, ntšamo bënga tchojanamëndacá mora šmojtsamama y cachcá siempre šmochtsamámncá. <sup>5</sup> Bënga, Bëngbe Bëtsá fséntseimpadana, Bëngbe Utabná benache chacmanýanýé bonshánana jtsebomnana ntšamo Bëngbe Bëtsá endbomncá, y chašmojtsesufrina ora, corente añemo chašmotsebomnana, ntšamo Cristo tojansufrí ora yojanbomncá.

#### *Nýetscanga entsamna jtsetrabájayama*

<sup>6</sup> Jesucristbeyeca catsátanga, Bëngbe Utabná Jesucristbe mándoca cbontsaménda, ndëmua Jesucristbeñe ošbuachiyá jatrabájama ndoñe tontseboše y ndoñe tontsiyena ntšamo bënga tcbonjabuatambacá, cháftaca ndoñe šmattsóyebuambnaye. <sup>7</sup> Cach tšëngaftanga tšabá šmondétatšëmbo ntšamo cmojtsamna jtsiyenana, ntšamo bënga fsënjoyencá: bënga tšëngaftangbeñe fsënjaninyena ora, nye ntjatrabajacá oyënjayënga ndoñe queftsjatsmëna, <sup>8</sup> ni ndocnabe saná chibiáisese, tondaye ntabuenaycá. Inýetšá enjamna; cada te bnëté y ibeta jabuache fsënjantrabája, chca, tšëngaftanga ndoñe chacmondétsamnana bëngbe ujabótama bënga jatatsatnayama. <sup>9</sup> Y ndegombre, bënga derecho fsënjánbomna tšëngaftanga jaméndama chašcújabuachama; pero masque chca, bënga jabuache fsënjantrabája tšëngaftanga chašmotsetatšëmbuama ntšamo yomna jtsiyenama, y chca chašmotsamama. <sup>10</sup> Bënga tšëngaftangaftaca fsënjamna ora, mëntšá tcbonjanamëndá: Nda ndoñe tontseboše jatrabájama, cha cach ndoñe chaondëtsesá. <sup>11</sup> Chca fséntsihamo, er bënga fsënjátatšëmbona, báseftanga tšëngaftanguentšënga imojtsiyena tondaye ntsamcá, pero tša chë ínýengbe soyënguiñe jtsontremeténëse. <sup>12</sup> Chca oyena entšángbioye fsëntsabuyaiyná y fsëntsaménda Bëngbe Utabná Jesucristbe mándoca, natjémbana cachëngbe vida onguayíñe chamotsotrabájañama.

<sup>13</sup> Jesucristbeyeca catsátanga, ndoñe chacmondëumantšé tšabe soyënga amana. <sup>14</sup> Nderado nda ntšamo quem tsbuanáchañe fsënjayancá ndoñe tontsuenana, šmochjarrepára nda cha yojtsemna y cháftaca ndoñe šmattsencuëntaye, chca, cha chaotsëuatjama. <sup>15</sup> Mo canýe uayayacá ndoñe šmattsonýaye; šmochjabuayená mo canýe catsátcá, chca ndoñe chaondétsamama.

*Jtadióšoftanama*

<sup>16</sup> Běngbe Utabná fséntseimpadana, cha, chě entsānga tšabe ebionana ainaniñe chamotsebmoma iuamá, chaoma tšěngaftanga nýets tempo y nýetsca tescama chca chašmotsebmoma. Běngbe Utabná tšěngaftangafaca chaotsemna.

<sup>17</sup> Nýe quem palabrěnga tšěngaftanga jacheuayama cach atšbe cucuátšeca sěntsabi-amná. Atše chca sěndbauapochóca atšbe tsbuanachangá juabemama; ntšamo muentše entsabemancá entsinýinýná quem tsbuanácha atšbiácha iuamnama.

<sup>18</sup> Atše, Běngbe Bětsá sěntseimpadana, Běngbe Utabná Jesucristo chaoma tšabe bendicioněnga tšěngaftangbeñe chaotsemnama.

## 1 Timoteo

### *Jachuayama*

<sup>1</sup> Atše Pablo, Jesucristbe ichmoná sēndmēna. Bēngbe Bētsá bēngbe atsebacayá endmēna y Bēngbe Utabná Jesucristo endmēna ndábeñe bēnga, puerte jtsošbuáchiyēse mondobátmana ba soyēnga bēngbiama cha yochjamama. Atše Jesucristbe ichmoná sēndmēna, er chata tbojanmandá atše chca jtsemnama. <sup>2</sup> Timoteo, atše quem tsbuanácha cbontsabobiamná. Atše Bēngbe Bētsabe soyēngama entšanga sēnjanabuayiyiná ora, aca Jesucristbeñe tconjanošbuaché, y chca, aca mo atšbe ndegombre uaquiñacá tconjanóbema. Atše séntseimpadana, Bēngbe Bētsá Bēngbe Taitá, y Cristo Jesús Bēngbe Utabná, chaboma aca tšabe bendicionēnga chacotsebomnama, chata chacmolastemama y ainaniñe tšabiana ebionana chacotsebomnama.

### *Pablo chē ndoñe ndegombre soyēnga abuátambayēngbiama chēnga tojanabuayená*

<sup>3</sup> Ntšamo chē Macedonia luaroye chocana sēnjéftsanbocna ora tconjanimpadacá, mora cachiñe cbochtētsimpáda. Efeso puebloca cochjoquéda, básefta entšanga chácumēndama chē ndoñe ndegombre soyēnga ndoñe chamondétsabuatambama, <sup>4</sup> ni nyets tempo ndoñe nye chamondetsejuabná anteungbe cuentēngama, ni chē ba uabemana uabáinēnga chē tempsca bēts taitangbiama. Er nye chca yapa jesejuabnayanentšana, jóbocnana nye ínýengaftaca jabuachana enatsētsnanyiñe, y chca chēngbioye tondayama ntjujabuáchana ntšamo Bēngbe Bētsá jamama yojuabnacá chaósertama. Chē soyna nye chábeñe jtsošbuáchiyēse jobenayana josértana.

<sup>5</sup> Chca mando entsemna nyetscanga chamotsenbobonshánama, y chē bonshánana endóbocana nda chabe ainantse ndocna bacna soyēnga tondbomnábentšana, ntšamo tojtsamcá tšabá yojtsemna ca ainaniñe tojtsejuabná y tojtsetatšēmbuábentšana, y Jesucristbeñe ndegombre ošbuachiyábentšana. <sup>6</sup> Báseftanga tmojtsajbaná chca jtsemnana y inye soyēngama tmojontšé juabnayana; chíyeca chēnga mora imojtsentšena nye ndayámna ndoservena soyēngama enatsētsnayana. <sup>7</sup> Chēnga jtsebošana Bēngbe Bētsabe ley abuátambayēnga jtsemnama, pero chēnga ndoñe yontsósertana ni ntšamo imojtsabuatambacá, ni mo ndayánaca ntšamo chēnga tmojtsichamcá, mo chē soyēnga ndegombre cuaftsemncá.

<sup>8</sup> Pero bēnga mondétatšēmbo chē leyēnga tšabá yomnama; tšabá endmēna, chē ndayama chē leyēnga tmojuamcá entšá chē leyēngaca tojtsamēse. <sup>9</sup> Bēngnaca mondétatšēmbo, chē leyēnga ndoñe tmonjuama chē nyetsca soyēnguiñe tšabá amēngbiama. Chē leyēnga tmonjuama quemētša entšanga jácastigama: ntšamo leyēnguiñe ndoñe tontselesenciancá amēnga y ntšamo Bēngbe Bētsá yobošcá ndámēnga, chē Bēngbe Bētsá ndoñe imondadoránēnga y bacna soye amēnga, Bēngbe Bētsá ndoñe mondērrespetánēnga y Jesucristbeñe jtsošbuáchiyana y Bēngbe Bētsá jtsadoránana tondaye yondoservena ca juabnayēnga, cachabe taitá o mamá obánayēnga y ndēmuanýēnga imomna entšanga obánayēnga, <sup>10</sup> boyabásaftaca o shembásaftaca bacna soye amēnga y boyabásēnga cach boyabásēngaftaca bacna soye amēnga, entšanga enēnga nye ínýabiama nyets tempo chamotseservénama, bosterēnga y chē nye bonamente Bēngbe Bētsabiama júrayēnga; chca entsayana, chē leyēnga yomna jácastigama nyetscanga ndēmuanýēnga ndoñe tmontsama ntšamo chē ndegombre buatēmbana soyēnguiñe iuayancá. <sup>11</sup> Ntšamo muentše chē leyēngama tijayancá, entsebuatēmbana chē Bēngbe Bētsábiocana puerte tšabe noticiēnguiñe, chē ndegombre buatēmbana soye; Bēngbe Bētsá, chē corente bendición bomná, šonjichmó chē buayenánana entšanga jabuátambama.

### *Pablo Bēngbe Bētsábioye tbojtanchuá, tbojanlastemama*

<sup>12</sup> Atše, Bëngbe Utabná Jesucristo sëndëtschuaná, er cha tojanjuabó, ntšamo cha šojanmandacá jobedésama atše tsjëtseprontanama, y chíyeca šojanabuayana atše chabiama chaitrabajama; y cha endmëna nda inétsama atše obenana chaitsebomnama chë trabajo jamama. <sup>13</sup> Cha chca átšeftaca tonjanma, masque tempo atše chabe contra ba soyënga sënjánichamo, chabe ústonënga sënjanécamena, y chabiama tondaye respeto ntsebomncá sënjánenobuena. Pero Bëngbe Bëtsá šonjanlastemá, er atše, Jesucristbeñe ošbuachiyá cabá ndoñe quetsjátanmëna, y chca, atše ndoñe quetsjátantatšëmbo ndayá tsjánamama. <sup>14</sup> Y chca, Bëngbe Utabná ba tšabe bendicionënga atšbiama tonjanma, y chábeñe ošbuachiyá šonjánbema, y tonjanma atše cha chaitsebobonshánama y ínÿengbioynaca. Cha chca bëngbiama tojama, bënga cánÿiñe mo canÿacá Cristo Jesúsëftaca bëtsemnayeca.

<sup>15</sup> Ntšamo chanjayancá ndoñe nÿe bostero soye quenátsmëna, y nÿetscanga entsamna chca ndegombre bëtsemnama jtsejuabnayama: Cristo Jesús quem luaroye tonjánabo, bacna soye amënga jabátsebacama, y chë bacna soye amënguentše atše chë más bëts bacna soye amá sëndmëna. <sup>16</sup> Chíyeca, Bëngbe Bëtsá šonjanlastemá, jinÿanÿiyama cha puerte uantado entšángaftaca yomnama. Y chë soye ínÿengbioyë tojaninÿanÿé, chë nÿetsca tescama yomna tšabe vida jtsebomnama, chë chábeñe mochtsanošbuachéngbioyë; chca tonjaninÿinÿé cachá átšeftaca uantado jtsemnëse, atše nÿetscangbiama chë más bëts bacna soye amá jtsemnëse. <sup>17</sup> ¡Entšanga nÿets tempo chamotsinÿanÿná, chë Utabná nÿets tempo mandayá y puerte bëtsá y obená yomnama! Cha endmëna chë ndocna te echanjëftsobaná, chë entšanga ndoñe ntsobenana jinÿamá y chë nÿe canÿe Bëngbe Bëtsá yomná. Chca chaotsemna.

<sup>18-19</sup> Timoteo, aca mo atšbe uaquiñacá condmëna. Atše tcbonjaimpadá, ntšamo tcbonjauyancá entšanga chacúyanama, ntšamo báseftanga Bëngbe Bëtsabe juabna oyebuambnayënga acbiama tmojanayancá, y chiñe jtsejuabnayëse chë Jesucristbe soyëngama chacopeliá y nÿets tempo chca chacotsama, Jesucristbeñe puerte jtsošbuáchiyëse, y lempe ntšamo tcojtsamama tšabá yojtsemnana ainaniñe jtsetatšëmbëse. Báseftanga, chënga ndoñe tšabá imonjëtsama ca chë ainanoca juabnënga tmojánayana ora, chë soye ndoñe tmonjanuena y chë causa, Jesucristbe soyënguiñe ošbuáchiyana tmojtsanajbananga y tmojanontšë inÿe buatëmbana soyënguiñe jtsošbuáchiyana. <sup>20</sup> Chca tonjopasá Himeneo y Alejándroftaca, y atše sënjalesenciá Satanás chaoma chata chabosufrima; y chca, chata chabuatsjinÿe Bëngbe Bëtsabiama ndoñe bacá ntsóyebuambnayana.

## 2

### *Pablo tojanabuayená ntšamo Bëngbe Bëtsá jtsadoránama*

<sup>1</sup> Nÿetsca soyama más cbontsaimpadana ndayá chë Jesucristbeñe ošbuáchiyënga Bëngbe Bëtsáftaca chamojtsencuénta ora, nÿetsca soyëngama ntšamo tojtsëjabotcá cha chamotseimpadana, nÿetsca entšangbiama, y cha sempre chamotsatschuaná. <sup>2</sup> Entsemna, nÿetscangbe tšabiama Bëngbe Bëtsá jtseimpadánama, pero masna quem luarentša reyëngbiama y inÿe mándayëngbiama, chca, nÿetscanga puerte natjémbana jtsiyenama chamuetsobenama, y nÿetsca soyënguiñe tšabá jtsamëse, Bëngbe Bëtsá jtsatschuanayama, y entšangbe juabniñe tšabá chamotsemnana. <sup>3</sup> Chca jtsamana tšabá endmëna, y Bëngbe Bëtsá, bëngbe Atsebacayá, chama jtsóyejuayana; <sup>4</sup> y chca jtsóyejuayana, er cha endboše nÿetsca entšanga atsebácanënga chamotsemnana y chë ndegombre buayenánana chamotsábuatmama. <sup>5</sup> Chca nÿetsca entšangbiama endmëna, er nÿe canÿe Bëngbe Bëtsá nÿetscangbiama endmëna, y nÿe canÿa endmëna nda yobena jamama entšanga tempcá tšabá Bëngbe Bëtsáftaca chamotsemnana; cha endmëna Jesucristo, cach entšá. <sup>6</sup> Er Jesucristo, mo canÿa ínÿenga jätsebacama cuaftopagacá, chabe derecho vida jtsobomñama cachcá tojanonÿá y tojanóbana, chca, nÿetsca entšanga chamotsobenama atsebácanënga jtsemnana. Chë soye cha tonjaninÿanÿé, nÿa chama

tempo yojtsemna ora, chë Bëngbe Bëtsá nyetsca entsänga atsebácanënga chamotsemnana yobošama. <sup>7</sup> Bëngbe Bëtsá chca nyetsca entsängbiamä yoböseyeca, Jesucristo šojanábuayana chabe ichmoná jtsemnana, chabe soyënga entsänga jtsabuayiyayama; ndegombre soye sëntsoyebuambná, ndoñe quetsátsbostero. Šonjanmandá chë ndegombre buayenánana chë ndoñe judiëngbioye jabuátambama, y chënga entsamna chiñe jtsošbuáchiyana.

<sup>8</sup> Ntšamo sënjayancá, atše sëntseboše nyetsca chë Jesucristbeñe ošbuachiyëngcá enefjuana luarënguenache, boyabásenga Bëngbe Bëtsáftaca chamotsencuënta, y chora celoye, Bëngbe Bëtsábioye cucuatše chamatsbaná; pero chamna, ainaniñe bacna soyënga ntsebomncá, ínÿengaftaca ntjatentjayanaycá, y ínÿengaftaca jabuachana ntjatenatsët-snaycá chënga chamotsemna.

<sup>9</sup> Y atše sëntseboše shembásenga entsayangá chamuatíchëtjo, mo chë tšabe shembásenga mondbetsichëtjoncá, ndoñe nye entsänga chamotsëbuáuatjama y ntšamo tmojtsichëtjonama chëngna uámanënga imomna ca entsänga chamotsejuabnama. Ndoñe quenátamna jtšenóbotamnayana, nÿa mo chca chquëcnënga jtsemnëse, ni castellano soyëngaca o uámana fjantse ndëtsbéngaca, o yapa uámana entsayangaca, chca, nye entsänga jinÿama tšabá jtsemnana. <sup>10</sup> Pero aíñe mo chë Bëngbe Bëtsá adóraye shembásenga mondbetsamcá jtsamëse, chë tšabe soyënga jtsamana.

<sup>11</sup> Nderado nda tojtsabuatambá ora, shembása bontsemna jtsatsjëndayana, chca ora tondaye ntjatichamcá, y chentša mándayënga chaotsayaunana. <sup>12</sup> Atše ndoñe quichatsleséncia, canÿe shembása boyabásenga chaotsabuatambá, ni chaotsamëndä. Canÿe boyabása tojtsabuatambá o tojtsamëndä ora, shembása ndocá chaondëtsichamo. <sup>13</sup> Chca chaotsemna, er Bëngbe Bëtsá natsana Adán tbojanpormá, y chentšana Eva; <sup>14</sup> y er Satanás Adánbioye ndoñe tbonjaningñé, ndayá chë shémbioye; y chca tbojaningñé ora, chë shema tojanma ntšamo Bëngbe Bëtsá ndoñe tbonjanlesenciácá. <sup>15</sup> Pero shembása atsboaná echántsemna, básenga quem luaroye endbaúshejangoyeca, pero chamna, aíñe nyets tempo Bëngbe Bëtsábeñe tojtsosbuáchese, nyetscanga tojtsababuánÿeshanëse, cachá nyetsca soyënguiñe jenomándama tojtsobenëse, y nyets tempo tšabe soyënga tojtsamëse, ntšamo Bëngbe Bëtsabe entsänga mondbetsamcá.

### 3

#### *Ntšamo ibojtsemna chë ošbuachiyëngcá enefjuanëngbeñe mandayá*

<sup>1</sup> Mëntšá ndegombre endmëna: nderado nda tojtseboše canÿe trabajo jtsebomnana, cánÿentše ošbuachiyëngcá enefjuanentše chë inÿe ošbuáchiyënga jtsamëndayama, cha ndegombre yojtseboše canÿe puerte tšabe trabajo. <sup>2</sup> Chíyeca, chë ošbuachiyëngcá enefjuanëngbe mandayá bontsemna jtsiyenana ba tšabe soyënga jtsamëse, chca, cha ndoñe tšabá yontsama ca ndocná chaondëtsichamuama. Y mëntšánaca cha bontsemna jtsemnana: nye canÿe shembásabe boyá; ntšamo jtsiyenama tšabá juabnayá chaotsemna, cachá nyetsca soyënguiñe jenomándama chaotsobena, y chaotsetátšëmbo ndayá ibomna tšabá jtsamana; chaotseprontana chabe yebnentše posada entsänga júyentšamiama, y chaotsobena botamana abuatambayá jtsemnana. <sup>3</sup> Ndoñe yapa tmoyá o penzentsero chaondëtsemna; pero chaotsemna tšabá mandbomná, entsänga natjëmbana chamotsiyenama bošá, y ndoñe chaondëtsejuabná nye crocénana jésebomnana. <sup>4</sup> Chaotsetátšëmbo ntšamo nyetsca chabe yebnentša entsänga botamana jtsamëndayama, y chaoma chabe básenga chë ntšamo cha tojayancá chamotsamama, ndocna te stëtsoye chamondëquedama; <sup>5</sup> er, nda cachabe yebnentša entsänga ndoñe tontsobena jtsamëndayama, chca, ¿ntšamo nantsobena chë ošbuachiyëngcá enefjuanënga jtsanÿenama? <sup>6</sup> Cha ndoñe chaondëtsemna cabá mora cuenta Jesucristbeñe ošbuachiyá; aíñe chca chë ošbuachiyëngcá enefjuanëngbe mandayá tojtsemnëse, nderado nye cachá

uámana entšá nantsenobiamnaye, y ntšamo Běngbe Bětsá Satanásbioye tbonjancastigacá, chca bétsemnama, cach soyama Běngbe Bětsá chě entšábioye buanjacastíga. <sup>7</sup> Chánaca bontsemna jtsiyenana jtsaměse, y chca chaojtsama ora, chě Jesucristbeñe ndošbuáchiyěnga tšabá chabiamna chamotsichamo. Chě entšá ndoñe chca tontsaměse, chěnga chabiamna mochanjayana ndoñe tšabá yontsama ca, y Satanás echanjama cha chabócochěngo bacna soyěnga jamama.

*Ntšamo ibojtsemna chě ošbuachiyěngcá enefjuaněnga ujabuachaná*

<sup>8</sup> Cachcá, chě mándayěngbe ujabuáchaněnga měntšá entsamna: uámana entšangcá nyetscanga chamotsétabna, uta palabra ndbomněnga; ndoñe yapa vínoye chamondětsetmó, y ndoñe chamondětseboše nye paselo becá crocénana jtsebomnama. <sup>9</sup> Chěnga entsamna ndegombre jtsošbuáchiyana chě Běngbe Bětsá tojinýanjé soyěnguiñe, chě ndayiñe běnga mondošbuaché, chěngbe ainaniñe inyetsá juabněnga ntjatsbomncá. <sup>10</sup> Natsana, chěngbiamna botamana šmochjshauarrepára jtsetatšěmbuama chěnga aíñe o ndoñe montsobena mo chě ošbuachiyěngbe mándayěngbe ujabuachaněngcá joserviama. Chěnga nyetsca soyěnguiñe tšabá tmojtsemněse, šmochjálesenciaye chiñe chamoservema. <sup>11</sup> Cachcá, chě shémanga měntšá entsamna: nyetscangbiamna mo uámana entšangcá utabněnga, ndoñe uayátsenayěnga, cachěnga nyetsca soyěnguiñe jenomándama obeněnga, y nyetscañe tšabe palabra bomněnga. <sup>12</sup> Canye ujabuachaná chaotsemna nye canye shembásabe boyá, y chaotsetátšěmbo ntšamo chabe básenga y nyetsca chabe yebnentša oyeněnga jtsaměndayana. <sup>13</sup> Chě ujabuáchaněnga tšabá chiñe tmoservéněse, canye uámana puesto mochanjashjache, y chěnga mochantsobena běts añémoca jtsóyebuambnayama ntšamo Cristo Jesúsbeñe tmošbuáchema.

*Ndayá Běngbe Bětsá běnga šojinýanjecá, canye běts buatěmbana soye endměna*

<sup>14</sup> Atše sěntsobátmana pronto chjobenaye jama aca jauatsětsayama; pero chca cbontsabobiamná, <sup>15</sup> nderado atše betesco jama ndoñe sěnjobenase, chacotsetatšěmbuama ntšamo canya ibojtsemna nyetsca chě Běngbe Bětsábenga imomněngaftaca. Chěnga mondměna chě Jesucristbeñe ošbuáchiyěnga, chě Běngbe Bětsá Ainabe básenga. Chěnga chě Běngbe Bětsabe ndegombre soyěnga mondbomna chě más uámana puestoca quem luarentše, y tša monděntšena chama ín्यěngbioye jáyějanama. <sup>16</sup> Nya ndegombre endměna, Běngbe Bětsá soyěnga šojinýanjé, y chě soyěngaca běnga montsobena jtsiyenana, chě Běngbe Bětsabe entšanga imomněngcá; chě soyěnga běngbiamna ndegombre běts buatěmbana soye endměna, y chě buatěmbana soye měntšá endměna:

Cristo quem luarentše cach entšacá entšángbioye tojáneběbuacna.

Chě Uámana Espíritu tonjinýanjé cha nyetsca soyěnguiñe tšabá amá yomnama.

Angelěnga cha tmojáninye, y chabiamna ba luarěnguentša entšángbioye tmojanabuayená.

Ba entšanga quem luarentše chábeñe montsanošbuaché, y Běngbe Bětsá celoye tbon-tanatsbaná, cha puerte bětsá y obená yomnama jinýanjíyěse.

4

*Báseftanga chě tšabe benachentšana mochtsojuánañe*

<sup>1</sup> Uámana Espíritu, nyetscanga catafjosertaycá tojayana, quem luare jopochócama tempo chaojtsobeco ora, básefta entšanga camochtsajbaná ošbuáchiyana chě ndayiñe běnga Jesucristbiamna mondošbuaché soyěnguiñe ca. Chěngna, espíritěnga entšanga áingñayěnga mochántsayanana, y chě ndoñe ndegombre soyěnga chě bacna bayějěnga entšángbioye mochtsabuátambaye soyěnguiñnaca. <sup>2</sup> Chca buatěmbana soye jtsóbo-canana chě bacna entšanga ntšamo ndegombre tmojuabnacá ndinýinýayěngbentšana y chě bosterěngbentšana. Chěnga chca bacna soye tmojtsama ora, ainanoca ndoñe ntsejuabnayana, ntšamo tmojamcá ndoñe tšabá yontsemna ca, er yapa bacna soyěnga tmojama causa, chěnga nye chca chěngbe ainaniñe jěsejuabnayana. <sup>3</sup> Quem entšanga



ndoñe ntjalesénciana ínÿenga chamotsobouamama, y jtsemándayana básefta sananga entsanga ndoñe chamondétsesama. Ntšamo chënga chiñe tmojtsebuatëmbacá ndoñe ndegombre soye ntsemnana, er Bëngbe Bëtsá chë sananga tojanma, Jesucristbeñe ošbuáchiyënga y chë ndegombre soyënga uabuátmënga chamóyëngacñama, Bëngbe Bëtsábioye chama jtsatschuanayëse. <sup>4</sup> Er lempe ntšamo Bëngbe Bëtsá entsanga chamosama tojamcá tšabá entsemna. Ndoñe quešnátamna ndaye saná jtsaboténana, bënga chë saná tmojuáyëngacñe ora, Bëngbe Bëtsá chama tmojëtschuase; <sup>5</sup> er chca saná Bëngbe Bëtsábioye tšabá jtsinÿnana, cachá chca tojayánayeca, y bënga chë sanama cha mondbatschuayama.

*Jesucristbiana trabájayiñe canÿe tšabe oservená*

<sup>6</sup> Aca, chë soyënga ošbuachiyëngbioye chacojtsabuátambase, aca Jesucristbiana trabájayiñe canÿe tšabe oservená cochántsemna. Y mo nda bëtscá añemo jtsebomnama botamana tojtsesacá, cachcá, ácnaca puerte ošbuáchiyana y ainaniñe bëts añemo cochántsebomna; chca echántsemna, chë bënga mondošbuaché buayenana soye aca icuatsjendá y icoyeunánayeca, y ntšamo chë tšabe buatëmbana soyënguiñe endayancá sempre icuámayeca.

<sup>7</sup> Pero ndoñe nÿe quem luarentša entsangbe cuentënga y ndoservena cuentënga cattsuenana. Ba soyënga cochjama aca bëts añemo ainaniñe chacotsebomnama, mo nda bëts añemo jtsebomnama cachabe cuérpoca ba soyënga cuaftsamcá, ntšamo Bëngbe Bëtsá jadórama yomncá jtsiyenama jtsamëse; <sup>8</sup> cachabe cuérpoca ba soyënga jamana más añemo jtsebomnama, aíñe batšatema endoservena; pero jtsiyenana Bëngbe Bëtsábioye jadórama yomncá jtsamëse, puerte enduámama y juajabuáchana nÿetsca soyënga tšabá chaotsemnama; chca jtsamana puerte tšabá endmëna cachabe vidama quem luarentše, y chë inÿe vidócnaca. <sup>9</sup> Ntšamo tijayancá ndegombre entsemna, y nÿetscanga entsamna jtsejuabnayana chca ndegombre bëtsemnama. <sup>10</sup> Y chë soyama bënga puerte mondëtrabája y mondësufrina, er chë Bëngbe Bëtsá Ainábeñe puerte mondošbuachéyeca, bënga mondobátmana cha yochjama soyënga bëngbe tšabiama. Cha endmëna chë nÿetsca entsangbe atsebacayá, pero ndegombre masna, chábeñe ošbuáchiyëngbe atsebacayá cha endmëna.

<sup>11</sup> Ntšamo quem soyëngama tcbonjauyancá entsanga cochtsamëndaye y cochtsabuátambaye. <sup>12</sup> Ndoñe catjaleséncia, aca bobontse comnama, ndánaca chacmotsáboyënjama. Pero aíñe bëtscá cochtsama, chënga puerte chacmotserrespetánama, chca jtsamëse icoyenama jtsonÿayëse, cachcá chamotsamama: botamana jtsóyebuambnayëse, nÿets tempo tšabe soyënga jtsamëse, nÿetscanga jtsababuánÿeshanëse, Bëngbe Bëtsábeñe corente jtsošbuáchiyëse, y puerte tšabia jtsemnëse, ainaniñe ndocna bacna soye ndbomná. <sup>13</sup> Atše choca chajashjanguëntscuana, cochtsentšena chë Bëngbe Bëtsabe uabemana palabrenga entsángbeñe jtsalíayama, y chënga jtsabuátambayama y jtsabuayiynayama. <sup>14</sup> Acbioye Bëngbe Bëtsá obenana tcmojanatšetá tšabe soyënga jamama chacotsobenama, ošbuáchiyënga jujabuáchama. Bëngbe Bëtsabe juabna oyebuambnayënga acbiama tmojanoyebuambá ora, y chë ošbuachiyënguentša bët-sëjémënga chëngbe cucuatšënga ácbeñe tmonjancjá y Bëngbe Bëtsá acbiama tmonjanimpadá ora, chca tšetana obenana tcojanóyëngacñe. Chë soye sempre cochtsinÿena.

<sup>15</sup> As, aca cmontsemna sempre jtsamana chë soyënga ntšamo tcbonjauyancá. Cochtsentšena chë soyënga tšabá jtsamama, chca, entsanga chamobená jinÿama, aca cada te más tšabá lempe cojtsamama. <sup>16</sup> Botamana cochtsantješna, aca chë tšabe soyënga jtsamëse cojtsiyenama, y chë tšabe buatëmbana soye ínÿenga cojtsabuátambama. Cada te chca cochtsama, y chca, cach aca cochanjenájabuache atsbočaná jtsemnama y chë ácbioye ouenanëngnaca játsebacama.

<sup>1</sup> Bëtsëjémënga ndoñe catjucácana; chca játamamna, cochjábuayenaye, chënga mo cach acbe taitá cuaftsemncá; y chë bobontséngaftaca cochjama, mo chënga acbe catšátanga cuaftsemncá. <sup>2</sup> Chë bëtsanana shembásengaftaca tšabá cochtsemna, chënga mo cach acbe mamá cuaftsemncá; y chë tobiaséngaftaca cochjama, chënga mo acbe uabénanga cuaftsemncá; chëngaftaca cmontsemna puerte tšabia jtsemnana, chëngbiana ndocna bacna juabnënga ainaniñe ntsebmncá.

*Ošbuáchiyëngbenache viudanga tmojtsemna ora*

<sup>3</sup> Chë ndegombre viudanga, chë ndocná mondbomna chaujúabuachama, chënga cocht-sarrespetana y cochtséjabuachana. <sup>4</sup> Pero canye viudá nderado básenga o nietënga tuabamna, chënga entsamna natsana jshauatsjínýana ndayá chënga chamotsamama Bëngbe Bëtsá yobošcá, cachëngbe pamíllanga chamotsarrespetánama, chëngbiöye jt-sanýenëse, y chëngbe bëtsétsangaftaca tšabá chamotsama, ntšamo chënga chëngaftaca tmojanmcá, er chca jtsamama, Bëngbe Bëtsá jtsóyejuayana. <sup>5</sup> Chë ndegombre viudá, chë juajabuáchama ndocná tbondbomná, Bëngbe Bëtsábeñe jtsošbuáchiyëse, cha bochuájabuachama jtsobátmanana, y nyets tempo jtseimpadánana, bnëté y ibeta, cha chabuájabuachama. <sup>6</sup> Pero canye viudá, nye quem luarentša entsángaftaca oyejuayá jtsemnana soyënga tojtsamëse, cha masque ainá tojtsemna, Bëngbe Bëtsabe bominiñe mo canye obanacá jtsemnana, er chábioye ndoñe ntseservénana. <sup>7</sup> Lempe chë soyënga chamotsamama ošbuáchiyënga cochtsaméndaye, chca, ndocná ndocna bacna soye chëngbiana jatichámuama chaondétsebmnama. <sup>8</sup> Er, nda cachabe entsanga y más, cachabe pamíllanga ndoñe tontsacuedana, cha chca jtsinýinýayana chë buatëmbana soyënga, ndayiñe bënga mondošbuaché, ndegombre soyënga ndoñe yondmëna ca yojtsejuabnama, y cha chë ndoñe ošbuáchiyëngbiana más bacna entsá jtsemnana.

<sup>9</sup> Chë jujabuáchama viudanga imuábemana lístañe, chaotsábemana chë viudá chnénguana bnétsana uatama más yobomná, y nye canye boyá ibnabomná. <sup>10</sup> Entšanga cha chamotsábuatma mo canye tšabe soyënga amacá: chabe básenga botamana tojabëché, áshjajnënga chabe yebnentše posada júyentsamiama prontaná, Bëngbe Bëtsabe entsanga imomnënga tojushecjabebé, chë imosufrínënga tojújabuache; jayanana, nda sempre nyetsca tšabe soyënga jamama yontšëná.

<sup>11</sup> Pero chë lístañe, chë viudanga chnénguana bnétsana uata cabá ndbomnënga ndoñe catjúbiana; er chë chëfta uata ndbomnënga, yapa nye cachënga tšabá jtsemnana juabnënga jtsebmnama y soyënga jtsamana. Chcase, chënga Jesucristbiöye ya ndoñe ntseservénana, y chora jtsebošana cachiñe jtëtóbouamayama; <sup>12</sup> y chca, ínýënga chëngbiana mochanjayana ndoñe tšabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama. <sup>13</sup> Y cabá más, tondaye ntsamcá tmojtsemna ora, chënga juabouinýana oyënjayënga jtsemnana, y yebnënguenache jtsanama; y ndoñe nye oyënjayënga, sinó oinýanéngnaca, ínýëngbe soyënguiñe jtseyentsbëtsjuanëse, y ndoñe yontsemna jayanama soyënga jtsichámëse. <sup>14</sup> Chíyeca, atše séntseboše, chë viudanga cabá tobiasëngna chamuatobouamá, básenga chamotsabamna, y chamotsobena cachëngbe yebnënguenache jtsemándayana; y tondaye chamondétsama, chca, béngbiöye uayayënga chamuayana, chënga chca ndoñe tšabá montsama ca. <sup>15</sup> Atše chca séntsichamo, er básefta viudanga cabá tobiasënga tmojtsajbaná Jesucristo obedecénana, y tmojontsé Satanás joyeunayana.

<sup>16</sup> Canye shembása, Jesucristbeñe ošbuachiyá, nderado chabe pamíllangbeñe viudanga tojtsabamna, cha bontsemna chënga jujabuáchana, chca, chë ošbuachiyëngcá enefjuanënga ndoñe chaondétsamna chëngbiana játantješnana; chca, chë ošbuáchiyënga mochanjobenaye chë ndegombre viudanga, chë chaujúabuachama ndocná mondbomnéngbiöye jujabuáchama.

*Ntšamo cuantsemna chë ošbuachiyëngbeñe amëndayëngaftaca*

<sup>17</sup> Chë bëtsëjemënga, tšabá chë ošbuachiyëngcá enëfjuanënga tmamëndangna, jt-somerecénana entšanga más chamotsarrespetánama, chca trabajo bëtsamama, y más, chë sempre entšanga jtsabuayiyayama y jtsabuátambayama imontšënéngbioye. <sup>18</sup> Er Bëngbe Bëtsabe uabemana palabrënguiñe endayana, mëntšá: “Aca canye toróftaca shajuana tmojtsatbaná luariñe chacojtsetrabája ora, ndoñe catjuanguëtsenaye ca”; ínÿoca: “Chë trabajayá merecido jtsebuájonana juácanama ca”. Chíyeca, chë bëtsëjemëngcá amëndayënga jtsomerecénana entšanga chamotsarrespetánama.

<sup>19</sup> Nderado nda tcmojáuyana canye bëtsëjema bacna soye tojama ca; pero útata o unga entšanga más ndoñe tmontsemna, chca tojamama tmojinÿe, y chë bëtsëjema mal quedayá ndegombre soye yojtsichamo ca ndoñe tmonjayana, ndoñe catjóyeunaye.

#### *Inÿe soyëngama jábuayenama*

<sup>20</sup> Chë bëtsëjemënga nÿe bacna soyënga tmojtsamënga, nÿetsca entšangbe delante cochjucácana, chca nÿetscanga uatjana chamuishache, bacna soye amama castigo mochtsebomnama.

<sup>21</sup> Atše cbontsemánda, Bëngbe Bëtsabe delante, Jesucristo y Bëngbe Bëtsabe bocacana angelëngbe delante, chë mandënga chacotsamama; pero ndoñe catjayana canye bëtsëjema tšabá o ndoñe tšabá tonjama ca, cabá ndoñe lempe botamana ndabonÿe ora, ni canye entšá ínÿengbiamama más tšabá ntjatabacacnaycá. <sup>22</sup> Ndocnabe bestšašiiñe cucuatšënga catjajájua, Bëngbe Bëtsábioye chabiamama jaimpádama, jinÿinÿiyama cha mo canye bëtsëjema amëndayacá joserviama yojtsobenama, nÿe betscó, juabuáyanama botamana ntjenójuaboycá. Pero nÿe ntjenójuaboycá chca tcojamëse, y cha canye bacna soye amá tomñësna, ácnaca cochántsemna mo chabe bacna soyënga cuafjamcá. Cochantsantjesna ndocna bacna soyënga ainaniñe chacondëtsebomnama.

<sup>23</sup> Aca ba soye uafsbiaca condbëtsešoca causa, ndoñe más nÿe ena búyeshe cattseftmana, sinó base vínoynaca.

<sup>24</sup> Entšanga mondobena tšabá jinÿana, básefta entšangbe bacna soyënga, cabá chë soyëngama chëngbioye botamana ntjåtjaye ora; pero ínÿengbe bacna soyëngama, nÿe tcojåtjayentšana entšanga chama jtsetatšëmbuana. <sup>25</sup> Cachcá, báseftanga entšangbe delante tšabe soyënga jtsamana, y cachora chë soyëngama jtsotatšëmbuana; y ínÿengna iytëmncá tšabe soyënga jamana, pero masque chca, ndayténaca chë tmojanma tšabe soyëngama ínÿenga mochanjåtatšëmbona.

## 6

<sup>1</sup> Chë nÿets tempo nÿe ínÿabiamama oservénënga entsamna, chëngbe nduiñëngbiamama jtsejuabnayana, chënga uámana entšanga imomnama y nÿets respeto jtsebomnama imomerecénama. Chca entsamna, Bëngbe Bëtsabe Uabainama y chabe soyëngama, ndayiñe bënga mondošbuaché y entšanga mondbëtsabuatambaye, ínÿenga podesca ndoñe chamondëtsóyebuambnama. <sup>2</sup> Y chë imobomna Jesucristbeñe ošbuáchiyënga nduiñënga, chëngbioye nÿe batšá ndoñe chamondëtsarrespetana, er chënga Jesucristbeyeca chëngbe catšátanga mondmëna, y entsamna más tšabá jtsaservénana, er chëngbe trabajuentša tšabe soyënga imóyëngacañe, Jesucristbeñe ošbuáchiyënga mondmëna, y Bëngbe Bëtsabe bonshánënga.

#### *Jtsiyenana Bëngbe Bëtsá jadórama soyënga jtsamëse, endmëna chë ndegombre bomnana*

Quem soyënga cmontsamna entšanga jtsabuátambayana, y becá jtsëtsëtsnayana chca chacmóyaunama: <sup>3</sup> Nderado nda inÿe soyënga tojtsabuatambá, y ntšamo bënga mondëjuabnacá, chë Bëngbe Uabná Jesucristbiamama ndegombre buatëmbana soyama, ni chë buatëmbánana ntšamo jtsiyenama Bëngbe Bëtsábioye jadórama yomna soyënga jtsamëse, ndoñe cachcá bëngcá tontsejuabnase, <sup>4</sup> cha nÿe cachá puerte uámana entšá yojtsenobiamná, y tondaye ndosertaná yojtsemna. Cha tša jtsogustánana ba soyëngama y palabrëngama jabuachana jtsenatsëtsnayana, y cha nÿe chama vida jésebomnana. Cha chca yomna causa, nÿe jtsebošana chë inÿa tojashjache soyënga jtsebomnama,

njetscanga ndoñe cachcá chamondétsejuabnama jtsamana, ín्यengbioye joyánguan-guama jtsebošana, bacna soyënga ndoñe ndegombre soyënga ín्यengbiamama jtsejuab-nayana, <sup>5</sup> y ín्यengaftaca nýe sempre jtsenpenzentsiyana, er chëngbe juabniñe nýe bacna soyënga jtsebomnana, chë ndegombre soyënga quematábuatma, y jtsejuabnayana chë soyënga Bëngbe Bëtsá jadórama jtsamana, nýe más soyënga jóyëngacñama yoserve-na ca. <sup>6</sup> Ndegombre canýe entśá bëtscá tšabiana jëftsashjáchana, cha tojtsiyena Bëngbe Bëtsábioye jadórama soyënga jtsamëse, y sempre oyejuayá nýe chë tojtsebomna soyëngaca tojtsemnëse. <sup>7</sup> Er bënga tmojanonýná ora, quem luaroye bëngaftaca tondaye tmonjáníyëbo, y quem luarentšana cach tondaye quemochatobenaye jëftsocñama. <sup>8</sup> As, bënga ndayá jasama y ndayá jtichëtjuama tmojtsebomnëse, chë soyëngaca oyejuayënga mochtsemna. <sup>9</sup> Pero chë bomnënga jtsemnama tmojtsebošënga, bacna soyënga jamama tojócochëngo ora, ndoñe ntsemorochana y pronto chiñe jotsatšana, mo bayá uachmaniñe cuafjotsatścá, chë entšanga Satanasbe cucuatšiñe ndeolpe jotsatšana; chora chënga jtsamana soyënga mo chë juabna ndbomnëngcá, y chë cachëngbiamama ndoñe tšabe soyënga tmojtsamëngbe juabnëngaca. Y mo chë uándbemana barco, bëts búyeshe asentoye tojtsenatjëmbcá, cachcá, chë bacna juabnënga bomnama, chëngbioye mochántsapochocaye y njetsca tescama mochántscastigaye. <sup>10</sup> Crocénana jtsebom-nama yapa jtsebošana, jamana entšabe ainanentšana njetsca bacna juabnënga y soyënga chaóboconama; y básefta entšanga, crocénana jtsebomnama yapa jtsebošana causa, tmojtsajbaná ošbuáchiyana chë Bëngbe Bëtsabe soyënguiñe, chë bënga mondošbuaché soyënguiñe, y chca cachëngbiamama tmojama puerte chamosufrima y bëts ngménana jtsebomnama.

*Chë tšabe soyama jtsenojuerzánama, ošbuáchiyana sempre chaotsemnama*

<sup>11</sup> Pero aca, Bëngbe Bëtsabiamama oservená, chca benachentšana cochtsojuánañe. Nýa cochtsentšana, chë Bëngbe Bëtsabe bominiñe tšabá yomncá jtsamama, chë ndayá Bëngbe Bëtsá jadórama yomncá jtsamama, Jesucristbeñe puerte jtsošbuáchiyama, njetscanga jtsebabuánýeshanama, Bëngbe Bëtsábeñe jtsobátmanëse puerte uantado padecena soyënguiñe jtsemnama, y corente jtsebabuánýeshanëse njetscanga chacot-sénýayama. <sup>12</sup> Chë tšabe soyama, ošbuáchiyana joboguiyanama cochtsenojuerzana. Chë njetsca tescama yomna tšabe vida cochjashjache; chama Bëngbe Bëtsá tcmo-janchembo y bëtscá entšangbe delante tconjánayana tšabe soyënga Jesucristbiamama, ndayiñe aca icošbuaché. <sup>13</sup> Y mora, Bëngbe Bëtsabe delante, nda endbama lempe ntšamo quem luarentše yobinýncá vida chaotsebomnama, y Jesucristbe delante, ntšamo cachabiamama ndegombre bemncá Poncio Pilatbe delante lempe tojanayaná, chatbe delante cbontsemánda, <sup>14</sup> lempe cochjama ntšamo tcbonjauyancá, ndocna soye chac-mondëntšashbe jamama, y cochtsiyena, ntšamo ndocná tondaye chaondétsebomna jayanama aca bacna soye tcojama ca. Y chca cochtsama Bëngbe Utabná Jesucristo quem luaroye yochjésabëntscuana. <sup>15</sup> Y nýa chë soyama chë tempo chaojóshjango ora, Bëngbe Bëtsá chca echanjínyanýiye, er cha endmëna chë corente bendición bomná y chë nýe canýe Mandado. Cha njetsca reyëngbiamama, chë más uámana Rey, y njetsca améndayëngbiamama, chë más uámana Utabná. <sup>16</sup> Nýe cha ndoñe bondmëna ndocna te ntjóbanana, y cha canýe bëts buashinýinýana luarentše endoyena y choye ndocná yondobena jobéconana. Cha ndocná tbonjinýe y ndocná yondobena jinýana. ¡Entšanga njets tempo chamotsinýanýná cha puerte bëtsá y obená bëtsemnama! Chca chaotsemna.

<sup>17</sup> Chë quem luarentša soyëngaca bomnënga imomnënga, cochjámëndaye enáb-otamnayënga ndoñe chamondétsemnama, ni lempe tšabá yochjóboconama, bëtscá soyënga bëtsebomnama ndoñe chamondëtsobatmana, er chë tcbomna soyëngama ndoñe ntsótatsëmbuana ndayëntscocñama chca mochtsebomnama; pero aíñe, Bëngbe Bëtsábeñe jtsošbuáchiyëse, chënga chábeñe chamotsobátmana. Cha endmëna chë

sempré bĕtská soyĕnga šnetsátsatnayá; y chca, cha jamana bĕnga chamotsobena nĕyetsca chĕ soyĕngaca oyejuayĕnga jtsemnama. <sup>18</sup> Ntšamo tšabá yomncá chĕnga chamotsama, ba tšabe soyĕnga chamotsama, y sempre tšabe ainánaca chamotseprontana entšanga ba soyĕnga jatšatayama, y ndaye tmobomna soye entšángaftaca jenájatayama. <sup>19</sup> Mo nda bĕtská shajuana tojtsábuajo y jtsetatšĕmbuana yochtsebomna más chcoye jasama, cachcá, quem bomnĕnga ba tšabe soyĕnga tmojtsamĕse, mochántsetatšĕmbo chĕnga bĕtská tšabe bendicionĕnga más chcoye mochtsebomnama. Y chĕnga chĕ soyĕnga tmojtsamĕse, chĕnga chĕ ndegombre vida, chĕ nĕyetsca tescama yomna tšabe vida mochanjĕftsashjache.

*Inĕ soye Timotéobioye tbojanbonjĕ*

<sup>20</sup> Timoteo, ndayá Bĕngbe Bĕtsá tcmojabonjĕcá, botamana cochtsinĕna. Entšanga nĕye quem luarentša soyĕngama encuéntayana, ndoñe cattsuenana, ni chĕ ndoservena soyĕngama jabuachana enatsĕtsnayana, chĕ ndayama entšanga jtsichámuana becá osertánanentšana chca yóbocana ca, pero ndegombre chca ndoñe ntsemnana. <sup>21</sup> Atše chca séntsichamo, er báseftanga chca osertánana imobomna ca ichámĕnga, Jesucristbeñe ošbuáchiyana y chĕ bĕnga mondošbuaché soyĕnguiñe ošbuáchiyana tmojtsajbaná.

Atše, Bĕngbe Bĕtsá séntseimpadana, ácebeñe tšabe bendicionĕnga chaotsemnama.

## 2 Timoteo

### *Jachuayama*

<sup>1</sup> Atše Pablo, Jesucristbe ichmoná sēndmēna, Bēngbe Bētsá chca yobóseyeca. Jesucristo šonjichmó entšanga jábuayenama Bēngbe Bētsabe šbuachenánama, ntšamo cha inétsamama entšanga chē nyetsca tescama yomna tšabe vida chamotsebomnama; y chca vida montsebomna Cristo Jesúseftaca cánýiñe mo canýacá bétsemnayeca. <sup>2</sup> Atše quem tsbuanácha cbontsabobiamná, acbiamá Timoteo, aca mo atšbe bonshana uaquiñacá, Crístbeñe condošbuachema. Atše séntseimpadana, Bēngbe Bētsá, Bēngbe Taitá, y Jesucristo, Bēngbe Utabná, chaboma ábeñe tšabe bendicionēnga chaotsemnama, chata ácbioye chacmolastemama, y acbe ainaniñe tšabe ebionana chacotsebomnama.

### *Ndoñe ntsēuatjana entšangbeñe Jesucristbiamá jóyebuambayama*

<sup>3</sup> Sempre Bēngbe Bētsáftaca stsencuēnta ora, acbiamá sēndbētsenojuabnaye, y acbiamá sēndbētsatschuanaye bnēté y ibeta; y Bēngbe Bētsá endmēna nda atše sēndēservena, ainánaca jtsejuabnayēse y jtsetatšēmbēse, ntšamo atše stsamcá tšabá bétsemnama, cachcá ntšamo atšbe bēts taitanga tmojanmcá. <sup>4</sup> Atše sēndbētétenojuaboye ntšamo aca, chocana atše séntanabo ora shēchbuiye tconjanoperdema, y chíyeca atše tša séntseboše aca jtétinyama, atše puerte oyejuayá chaitsemnama. <sup>5</sup> Bēngbe Bētsá acbiamá sēndbatschuaye, er atše sēndbátenuojuaboye aca Jesucristbeñe ndegombre ošbuáchiyana condbomnama. Natsana, acbe bēts mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sēndétatšēmbo.

<sup>6</sup> Chíyeca sempre cochtsantješna quem uámana soyama: Mo nda canýe shinýañe tojtsajuinýinýnacá, chentše sempre chaotsoiñama, cachcá aca, chē Bēngbe Bētsá tcmojatšetá obenana tšabe soyēnga jamama, sempre cochtsinýena. Chē obenana aca conjanóyēngacñe, atšbe cucuatšēnga acbe bestšašniñe sēnjanjajó y Bēngbe Bētsá acbiamá sēnjanimpadá ora. <sup>7</sup> Er Bēngbe Bētsá tonjama bēngbe ainaniñe Uámana Espiritu chaotsemándama, uatjana ndoñe ntsebomnama, ndayá obenana bēnga chamotsebomnama, bonshánana Bēngbe Bētsabiamá y nyetscangbiamá chamotsebomnama, y cabēnga jenomándama chamotsobenama. <sup>8</sup> Chíyeca, ndoñe cattseuatja entšanga jáuyanama, ntšamo tcojinýe y cojtsetatšēmbcá Bēngbe Utabnabiamá ndegombre bétsemnama; ni atšbiamá ndoñe cattseuatja, atše cárceloye sēndutámenama, chabiamá oservena causa. Chamna, chē Bēngbe Bētsá cmochanjátšetaye obenánaca, sempre cochtseprontana jasúfriama, átseftaca y ínýengaftaca, entšanga tšabe noticiēnga abuayinyaye causa. <sup>9</sup> Bēngbe Bētsá endmēna nda bēnga šojatsebacá, y šojáchembo jtsiyenama mo chábenga imomnēngcá jtsamēse. Y cha chca tojama, ndoñe nderado bēnga ndaye tšabe soye tmojamama, ndayá cachá chca chaotsemnama inabóseyeca y bēngbe tšabiamá juabna bómnayeca. Cha chca inajuabnaye, cabá quem luare ndmēna orscana; y chca jamama Bēngbe Bētsá inajuabnaye, chē ndayá Cristo Jesús bēngbiamá jamama sóyeca. <sup>10</sup> Y mora, Bēngbe Atsebacayá Jesucristo tojáboyeca, Bēngbe Bētsá šojinýanjé cha bēngbe tšabiamá juabna yobomnama. Jesucristo tonjama, entšanga nyetsca tescama obanēnga ndoñe chamondétsemnama, y tonjama bēnga chamotsetatšēmbuama, chē tšabe noticiēnga chabiamá jouenēse y joyeunayēse, bēnga chē nyetsca tescama yomna tšabe vida mochjábomnama, ndoñe nýe jopochócama cuerpēnguiñe.

<sup>11</sup> Bēngbe Bētsá šojanábuayana tšabe noticiēnga entšanga jábuayenama, Jesucristbe ichmoná jtsemnama y entšanga jabuátambama. <sup>12</sup> Chē causa, atše mora cárceloca quem soyēnga séntsesufrina; pero chama atše ndoñe quetsátēuatja, er atše sēndétatšēmbo ndábeñe atše stsošbuáchemá, y corente sēndétatšēmbo cha yobena jtsinýenana ndayá šojabonýecá, chē ndayté cha yochjésabēntscuana.

<sup>13</sup> Njets tempo, chë ndegombre buayenánana, ndayá átsbentšana tconjanuencá, entsanga cochtsabuayiyenaye, entsanga jtsinyánynayëse aca Jesucristbeñe icošbuáchema, y Bëngbe Bëtsá y njetscanga icuababuánñeshanama, y chca yomna aca Cristo Jesúseftaca cánýiñe mo canýacá bétsemnayeca. <sup>14</sup> Chë Uámana Espíritu, chë bëngbe ainaniñe endoyenabe uajabuáchenanaca, ntšamo Bëngbe Bëtsá tcmojabonýecá sempre cochtsinyena.

<sup>15</sup> Ntšamo ya condétatšëmbcá, njetsca ošbuáchiyënga Asia luaroquënga cachcá šmon-jesonýá, y chentšë bontsemna Figelo y Hermógenes. <sup>16</sup> Pero Bëngbe Utabná Onesíforbe pamíllanga chaotsalastemana, er cha ba soye šonjanañemó, y atšë cárceloye utámenama cha ndoñe quenjatëuatja. <sup>17</sup> Masha, Romoye tojabánashjango ora, cha botamana šojánguango y šonjáninyena. <sup>18</sup> Bëngbe Utabná lastemado cháftaca chaotsemna, ntšamo njetscanga tmojamcá tšabá o ndoñe tšabá yontsemnama cha yochjayana ora. Aca corente condétatšëmbo ntsachetšá Onesíforo Efeso puebloca šonjanéjabuachama.

## 2

### *Jesucristbiamá canýe tšabe soldado*

<sup>1</sup> Y aca, atšbe uaquiñá, chë Cristo Jesús acbiamá tšabe juabna yobomnentšana, bëtscá añemo ainaniñe cochtsebomna. <sup>2</sup> Ntšamo ba entsangbe delante šconjoyeunacá, cach buayenánana, boyabásenga njétscañe tšabe palabra bomnënga cochjábanýiye, y chamotsobena ínýenga cachcá jabuátambama.

<sup>3</sup> Aca, chë bënga fsëndbomna padecena soyëngama jasúfriama chacmojtsemna ora, Jesucristbe soyëngama entsanga abuayiyenaye causa, ainaniñe bëtš añemo cochtsebomna, mo canýe tšabe soldadcá, cha chabe mándayabiamá jasúfria. <sup>4</sup> Ndocna soldado ntjátanana shjoca soyënguñe vida jtsebomnama o crocénana juacánama. Soldado chca jtsamana, chabe mandayá, chca chaotsemnama tbojabocacá cha, oyejuayá chaotsemnama. <sup>5</sup> Y canýe travisiayá, ínýenga jáyënjanama, canýe soye juacánama; pero ntšamo chë uacanánana jociñama tomncá ndoñe tonjatraviase, cha chë soye ndoñe ntjosháchiñama. Cachcá, acbe trabajo cochjama ntšamo cmojtsemncá. <sup>6</sup> Chë jajañe trabajayá derecho jtsebomnana chë natsaná jtsemnama, chë tmojatbaná sananguentšana ndayánaca jtsebomnama. Acaftaca cachcá echanjopása, chë trabajo tšabá chacojamëse. <sup>7</sup> Chë cbontsatsëtsnañe cochtsenójuabnaye, y Bëngbe Utabná echanjama lempe chacmósertama.

<sup>8</sup> Sempre cochtsenójuabnaye Jesucristbiamá, ndabiamá Bëngbe Bëtsá tojanma cháuatayenama y enjamna canýa rey Davídbentšana entšá, ntšamo atšë chabiamá sëndabuayiyá tšabe noticiënguñe endmëncá. <sup>9</sup> Chca abuayiyenaye causa, atšë séntsesufrina, nýa cadenëjuangácna utsbuaná, mo canýe bëtš bacna soye ochjayayacá. Pero masque atšë chca séntsemna, chë Bëngbe Bëtsabe soyëngama buayenánana ínýenga entsángbioye montsabuatambá. <sup>10</sup> Chíyeca atšë njetsca padecena soyëngaca sëndëtsóboyana, Bëngbe Bëtsabe bocacánëngbe tšabiamá, chëngnaca atsebácanënga chamotsemnama, Crístbeñe jtsošbuáchiyëse; y Cristo Jesús bëtšétsanga cháuabiamama, y cháftaca njetsca tescama chamotsiyenama.

<sup>11</sup> Mëntšá ndegombre endmëna:

Cristo Jesús tojanóbana ora, enjamna mo béngnaca cuafjobancá, er bënga tmontsajbaná oyenana ntšamo tempo monjaniyencá y Jesucristbeñe montsošbuaché; y chca, béngnaca cháftaca mochantsiyena;

<sup>12</sup> bënga chë padecena soyëngaca tmojtseufrina ora, tmojtsemorochëse, béngnaca Jesucrísoftaca mochántsemandaye.

Bënga tmojayana, cha ndoñe monduabuatma ca, as cha bëngbiámnaca cachcá echanjayana;

<sup>13</sup> bënga chábeñe ndoñe tmontsošbuáchese,

masque chca, cha cabá echanjama ntšamo tbojašebuachenacá,  
er cha lempe jamana, ntšamo sempre iuetsemncá jtsinñanñayese.

*Canye trabajayá, ndáftaca Bëngbe Bëtsá jtsóyejuayana*

<sup>14</sup> Chë tcbonjauyana soyëngama, cochjama chë entšanga chamotsenójuabnama, y Bëngbe Bëtsabe delante cochjábuayenaye chënga ndoñe yontsamna nye palabrëngama jabuachana enatsëtsnayana; er chca, ndocna tšabe soye ntjamana, y chca tmojtsenatsëtsná ora, jamana chë soye ouenanënga más batšá chamotsošbuáchema, y jujabuáchana chëngbe tšabe juabnënga jtsondbiamama. <sup>15</sup> Lempe ntšamo icobencá cochtsama, aca chacotsemnana mo canye entšá ndabiama Bëngbe Bëtsá cháuyana nyetsca soyënguiñe tšabá amá yomna ca; aca chacotsemnana mo canye trabajayacá, nda tondaye tontsebmna ndayama jatëuatjama; y chacotsemnana chë ndegombre buayenánana corente tšabá buatëmbayá. <sup>16</sup> Entšanga nye quem luarentša soyëngama, ndoservena palabrënga tmojtsencuënta ora, chë soye ndoñe cattsuenana; er chë soye jamana entšanga puerte inyetšá chamobocanama, ntšamo Bëngbe Bëtsá ndoñe yondmëncá, inyetšá jtsejuabnayese y jtsamëse. <sup>17</sup> Chëngbe buatëmbana soyëngaca puerte bacá inyëngbiyoe jáborlana, nya mo canye uabouana šocana chamotsebmnama cuafjamcá. Chca buatëmbayënguentše Himeneo y Fileto bontsemna. <sup>18</sup> Chata chë ndegombre benachentšana tbojtsojuánañe, y ibojtsichamo chë obanënga chámuatayenama Bëngbe Bëtsá ya catënjama ca, y Jesús chaojésabo ora, nyetscanga chámuatayenama Bëngbe Bëtsá ndoñe yochanjama ca. Chë causa, chata bontsama básefta entšanga chë ntšamo Jesucristbeñe imojanošbuachecá, mora ya ndoñe chamondëtsošbuáchema. <sup>19</sup> Pero Bëngbe Bëtsabe ndegombre buayenánana nyets tempo cachcá endesomñe, y ndocná quenátobena chë soye jatrócama. Chca endmëna mo chë ndëtšbenga ndayiñe canye bëts yebna tojebncá, ndayiñe mëntšá yojtsábemana: “Bëngbe Utabná endëubuatma chë chábenga imomnënga”, y “Nyetscanga chë Bëngbe Utabná benga imomnënga ca tmojtsichámënga, chamuajbaná nyetsca bacna soyënga amana ca”.

<sup>20</sup> Canye uamana entšabe yebnentše, tsafjoca soyënga ndoñe nye castellano o midio soyënga ntsemnana, ndayá niñëse y fshantse soyëngnaca; chë natsana soyënga uamana tescama jtsebuájonana, pero chë inye soyëngna, nye nyets tempo chauetsoservënama. <sup>21</sup> Chca endmëna chë Jesucristbeñe imojtsošbuachëngbeñe, ndoñe nyetscanga tmontsajbaná bacna soyënga juabnayana y amana, ni chë chca tmojtsama entšángbentšana ndoñe tmontsojuaná. Pero, chca jtsojuánañama tojtsebošá, echántsemna canya Bëngbe Utabnabiama tšabe trabajayá; y chca, mo chë tsafjoca castellano y midio soyëngcá, canye uamana trabajuiñe echanjosérvia, y cha sempre echántseprontana ndaye tšabe soye jamama.

<sup>22</sup> Chíyeca, ntšamo básefta bobontsënga bacna soyënga jamama mondbošcá, ndoñe cattsama; pero añe cochtsiyena ntšamo Bëngbe Bëtsabe bominyiñe tšabá yomncá jtsamëse, Jesucristbeñe puerte cochtsošbuáchiye, Bëngbe Bëtsá y inyënga cochtsababuányëshana y nyetscángaftaca natjëmbana cochtsomñe, chë chaújabuachama Bëngbe Utabná mondbetsotsëmbuanëngaftaca cányiñe, ndocna bacna soye ainaniñe ntsebmncá. <sup>23</sup> Ndoservena soyëngama palabrënga y ndosertánentšana óbocana soyëngama ndoñe cattsuenana; aca corente condétatšëmbo chë soyënguentšana entšanga nye jabuachana enatsëtsnayıñe jabocanana. <sup>24</sup> Pero chë Bëngbe Utabnabiama oservená ndoñe quebnátsmëna inyëngaftaca jabuachana ntsenatsëtsnayana; chamna, cha bontsemna jtsababuányëshanëse nyetscanga jtsënyayana, jtsemnana tšabe buatëmbayá y inyëngaftaca uantadá. <sup>25</sup> Cha bontsemna, chë chabe contra y chabe buayenánama contra imomnënga, chë ndegombre soyënga jabuátambama, pero ndoñe ntjatenabotamnaycá. Chca bontsemna, nderado Bëngbe Bëtsá nanjama chca juabnayana chamotrocama, y chca, chënga chë ndegombre soyëngama chamotsetatšëmbuama; <sup>26</sup> chënga botamana chamuatsjuaboma, y Bëngbe



Bëtsá, Satanásbe cucuatšënguentshana cháuatsebacama. Satanás chënga tojanëtabá ntšamo cha tojtsebošcá jamama, mo bayënga canýe uachmaniñcá.

### 3

#### *Ntšamo entsanga mochtsemna, Cristo jésabama chaojtsobeco ora*

<sup>1</sup> Pero aca cmontsemna jtsetatšëmbuana, Cristo jésabama tempo chaojtsobeco ora, entsanga echántsamna puerte padecena soyënguiñe jtsiyenana. <sup>2</sup> Chca echántsemna, er entsanga, cada ona nýe cachabe tšabiama echanjésenuabnaye, crocénana jtsebomnama tša mochántseboše, mochántsemna enábotamnayënga y ínýengbioye mo nduamanëngcá mochantsénýaye. Bëngbe Bëtsabiama y ínýengbiama bacá mochantsóye-buambnaye, chëngbe bëtsétsangbioye ndoñe quemochátayaunana, ni chëngbiama tšabe soyënga tmojtsamëngbioye quemochtëtacheuanaye, y Bëngbe Bëtsabiama y chabe soyëngama ndoñe respeto quemochátsbomna, <sup>3</sup> ni cachëngbe pamíllangbioye quemochátatabuanýeshana, mochántseboše ndoñe natjémbana jtsiyenama, uayátse-nayënga mochántsemna, cachënga jenomándama ndoñe quemochátobena, mo ainana ndbomnëngcá mochántsemna, y nyetsca tšabe soyënga uaboténënga. <sup>4</sup> Chënga, uayayëngbe cucuatšiiñe entsanga ayentsbáshejuanënga mochántsemna, mochántsama soyënga tondayama ntjatsrreparánëse, y cachënga uámana entsangcá mochántseno-biamnaye; chënga Bëngbe Bëtsá jatsbobonshana cuenta, cachëngbe cuerpiñe tšabá jtsomñama soyënga mochántseboše. <sup>5</sup> Inýenga echantsinýana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochan-jínýanyíye, Bëngbe Bëtsá obená bétsemnama chënga ndoñe mondošbuáchemá.

Nýa tondayama chëngaftaca cattseñcuéntaye. <sup>6</sup> Chënguentsë báseftanga mondmëna, y chëngna botamana palabrëngaca yebnënguenache jamashjnana, y chenache, chë paselo yomna jáingñama shembásenga jtsaíngñayana, chëngbe buatëmbana soyënguiñe chamotsošbuáchemá. Chë shembásenga bëtscá bacna soyënga tmojama, y chë causa ndoñe corente natjémbana montsiyena, y ba ndoñe tšabe soyënga imojtsama nýe cachënga tšabá jtsemnama, ntšamo tmojtsebošcá. <sup>7</sup> Chënga nyets tempo nýe ndaye tsëm soye jatóntšana jatatsjínýana, pero ndocna te ntjobenayana Bëngbe Bëtsabe ndegombre soyënga josértama. <sup>8</sup> Ntšamo Janes y Jambres Moisesbe contra ibojamncá, cachcá, chë ínýenga jáingñama abuátambayënga nyetsca ndegombre soyëngama contra jtsemnana. Chë entsanga chëngbe juabniñe nýe bacna soyënga jtsebomnana, y Bëngbe Bëtsá chënga tojtsëbaté, chënga chë ndegombre soyënguiñe ndoñe ntsošbuáchiyana causa. <sup>9</sup> Pero chënga ndoñe quemochatobenaye bëtscá entsanga jáyënjanama, er nyetsca entsanga mochanjátatšëmbona chënga nýe bacna soyënga juabnayënga imomnana, mo chë Israeloca entsanga tmojantatšëmboncá Janes y Jambres nýe chca juabnayata bétsemnama.

#### *Inýe soye Timotéobioye tbojanbonýé*

<sup>10</sup> Pero acna, puerte tšabá condétatšëmbo ntšamo atše tijabuatambacá, ntšamo jtsamëse atše tsiyena, ndayá jamama tsjuabná, ntšamo atše Jesucristbeñe puerte tsošbuaché, ntšamo ínýengaftaca uantado tsmëna; ntšamo atše, Bëngbe Bëtsá y ínýengbioye tsababuánýeshana; ntšamo atše, Bëngbe Bëtsábeñe jtsobátmanëse, <sup>11</sup> ínýenga šmonjanacmena ora; y sënjansufrina ora, padecena soyënguiñe bëts añemo tsjánbomna. Acnaca condétatšëmbo ntšamo atše chama Antioquía, Iconio y Listra bëts pueblëngoca tsjansufrinana. Pero masque entsanga tša šmonjanacmena, atše lempe sënjánauan-tana, Bëngbe Bëtsábeñe jtsobátmanëse, y cada ora, Bëngbe Utabná chëngbentsana šonjanatsbocá. <sup>12</sup> Ndegombre endmëna, nyetscanga chë Bëngbe Bëtsá jadórama soyënga jtsamëse jtsiyenama bošënga, y Cristo Jesúsëftaca cánýiñe mo canýacá imomnënga, puerte mochanjasúfria, chca bétsemnama, chënga chamosufrima ínýenga chamojtsama ora; <sup>13</sup> pero chë bacna entsanga y chë ínýenga áingñayënga, cada te más bacna entsanga

mochántsemna, más bacna soyënga jtsamëse; chënga ínÿengbioye mochántsaingñaye, pero cachëngnaca ingñënënga mochántsemna.

<sup>14</sup> Pero aca, nÿets tempo cochtsejuabnaye y cochtsama lempe ntšamo tcojuatsjinÿcá, chë ndegombre soyëngcá cojtsošbuácheñe, er aca tšabá condëubuatma chë tcmojanbuátëmbanga; <sup>15</sup> y aca, cabá básetema conjamna orscana, chë Bëngbe Bëtsabe uabemana palabrëngama condétatšëmbo, chë ndaye sóyeca aca contsobena juatsjínÿana, Bëngbe Bëtsá chacmatsbocama, Cristo Jesúsbeñe jtsošbuáchiyëse. <sup>16</sup> Bëngbe Bëtsá, Uámana Espíritbeyeca tonjama, lempe ntšamo Bëngbe Bëtsabe uabemana palabrënguiñe yobinÿncá entšanga chamuábemama. Chë uabemana palabra endoservena, béngbioye chë ndegombre soyënga jabuátambama; nderado ndaye soye ndoñe tšabá tmonjamama bënga chamotsetatšëmbuama, jinÿanÿiyama ntšamo más tšabá chë soyënga muanjobenaye jamama; y béngbioye jabuátambama ntšamo jtsiyenama chë Bëngbe Bëtsabe bominiñe tšabá yomna soyënga jtsamëse; <sup>17</sup> chca, canÿe entšá Bëngbe Bëtsabiamana oservená y obená chaotsemnana, tšabá chaotsetatšëmbo y sempre chaotseprontana nÿetsca tšabe soyënga jtsamama.

#### 4

<sup>1</sup> Bëngbe Bëtsabe delante y Cristo Jesús, nda echanjabo mo reycá jabomándama y jabáyanama chë ainëngbiama y chë ya mochjóbanëngbiama, ntšamo chëngbe vidënguiñe tmojëftsemcá tšabá o ndoñe tšabá bëtsemnana, chatbe delante cbomandá, <sup>2</sup> Bëngbe Bëtsabe palabra entšanga chacotsabuayiynayama; siempre chca jamama cochtseprontana, masque entšanga aíñe o ndoñe jouenama tmojtsebošëse. Cochjama, ínÿenga bacna soyënga tmojtsamama chamotsetatšëmbo, chca tmojtsamama cochjucácana y cochjábuayenaye ndayá jamama yojtsamnana. Siempre chca cochtsabuátambaye, chca ora puerta uantado jtsemnëse. <sup>3</sup> Chca cochtsama, er canÿe tempo echanjóshjango y chora entšanga chë ndegombre buatëmbana soye ndoñe quemochátuenana; chamna, nÿe chë último tsëm soyënga jtsetatšëmbuama boše causa, ba abuátambayënga mochanjuánguango, y chënga mochántsihamo soyënga nÿe ntšamo cach entšanga jouenama tmojtsebošcá. <sup>4</sup> Chënga chë ndegombre soyënga ndoñe quemochátuenana, y nÿe ndaye cuentënga mochántseyeunana. <sup>5</sup> Pero aca, siempre botamana cochtsejuabnaye; chë padecena soyëngama chacojtsesufrina ora, añemo cochtsebomna; chë Jesucristbiamana tšabe noticiënga entšanga abuayiynayabe trabajo cochtsama; y nÿa cochtsentšena ndayá Bëngbe Bëtsá tcmojabonÿecá tšabá jtsamama.

<sup>6</sup> Er mo Bëngbe Bëtsábioye jëtschuayama, canÿe bayá obanáftaca tcojabuešcja vínoye jtsopochocancá, cachcá atšbe vídnaca ya jopochócama entsemna. Atše jóbanama bécoñe entsemna; chanjóbana ora echántsemna Bëngbe Bëtsá oyejuayá chaotsemnana. <sup>7</sup> Cristo Jesusbe soyëngama corente sënjenojuerzá. Mo canÿe travisiayacá, chë jashjanguama yomna luaroye ya tojashjangcá, átšnaca ya, ntšamo Bëngbe Bëtsá yobošcá atše jtsamëse, atšbe trabajo ya tijapochocá. Atše nÿets tempo Jesucristbeñe sëndošbuaché. <sup>8</sup> Chcasna, atšbiamana canÿe uacanana soye echántsemna, er Bëngbe Bëtsá tojama atše chabe bominiñe tšabia chaitsemnana. Bëngbe Utabná endmëna chë ndegombre tšabá ichamuá entšanga aíñe o ndoñe tšabá tmonjamama, y cha chë uacanana soye šochántatšetaye, entšanga ntšamo tmojamama cha chaojabáyana ora. Pero cha nÿe atše ndoñe chë uacanana soye quešochtétatšetaye, ndayá nÿetscángbioye chca, ndëmuanÿenga puerta imoboše cha cachiñe cháuesabama, cha imobobonshánayeca.

#### *Inÿe soyënga Timoteobiamana*

<sup>9</sup> Lempe ntšamo tcojobenacá cochjama betscó jabama atše jabínÿama; <sup>10</sup> er Demas, cha yapa nÿe quem luarentša entšangbe soyënga bošá enjamna, cha cachcá šonjesonÿá y Tesalónica pueblöye tojtsoñe. Crescente Galacia luaroye tonjá y Tito Dalmacia luaroye. <sup>11</sup> Nÿe Lucas, chë šmonjanájabuachanënguentšana, mora átšeftaca entsemna. Marcos cochjafstenguango y ácaftaca cochjëftsbetše, er cha atšbe trabajuama puerta oservená

endmäna. <sup>12</sup> Tíquico, Efesoye sënjichmó. <sup>13</sup> Chacojabo ora, uabonjanía šochjesacñe, atše Troas bëts puebloca, Carpbe yebnoca tijésaboshjona; chë librëšangánaca, pero chë uámana uabemana tsbuanachangá ndoñe chacmondétsebnatjëmbe.

<sup>14</sup> Alejandro, chë cobre soyënga pormayá, puerte bacá šonjaborlá. Bëngbe Utabná bochanjacastíga, ntšamo atše šojaborlama. <sup>15</sup> Chabiamá cuedado cochtsebmna; cha tojobenase ntšámnaca cmatjabórla, er cha chë bënga mondabuayiyiná soyëngama contra entsemna.

<sup>16</sup> Chë natsana soyama, mándayëngbe delante šonjanotocá jenéuyanama ora, atše ndocná chešnátanajabuache; nyetscanga cachcá šmonjésonyaye. Pero atše sentsobátmana, Bëngbe Bëtsá chama chënga chaotsaperdoná. <sup>17</sup> Pero Bëngbe Utabná aíñe šonjanájabuache y tonjanma atše bëts añemo jtsebmnama, y chcase, atše sënjanobená Jesucristbiamá nyetsca chabe tšabe noticiënga entsänga jábuayenama, y chë luarentša ndoñe judiënga tmonjanobená chë soye jouenama. Mëntšá, Bëngbe Utabná canye uabouana resjuentšana šonjanatsbocá, mo canye león jtsosañámentšana ndábioye cuafjatsbocacá, <sup>18</sup> y Bëngbe Utabná šochanjatsbocá, bacna soye ndocná chašondëborlama; y sempre jtsinýenëse, celoye, chë ndayentše cha yománda luaroye šochanjesbetše. ¡Nyetscanga nyetsca tescama cha chamotsatschuaná! Chca chaotsemna.

*Pablo Timotéobioye jadiósoftanama*

<sup>19</sup> Atše cuenta cochjácheuaye Prisca y Aquila, y Onesíforbe pamíllnaca. <sup>20</sup> Erasto, Corinto puebloca tontsoquedañe, y Trófimo Mileto puebloca šocá sënjéftsebmshjona.

<sup>21</sup> Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nyetscanga muentše Jesucristbeñe ošbuáchiyënga.

<sup>22</sup> Atše séntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.

## Tito

### *Jachuayama*

<sup>1</sup> Atše Pablo, Bëngbe Bëtsabe oservená sëndmëna y Jesucristbe ichmoná entšanga jábuayenama, chë Bëngbe Bëtsá chabe entšanga chamotsemnama tojábacacanga, Jesucristbeñe chamotsošbuáchema y chë ndegombre soyëngama chamotsetatšëmbuama; chë soyënga endmëna ntšamo bënga, Bëngbe Bëtsabe básenga bëtsemnama, mondoyena jtsamëse. <sup>2</sup> Lempe chca sëndama, er Bëngbe Bëtsábeñe jtsošbuáchiyëse, atše sentsobátmana chë nyetsca tescama yomna tšabe vida jtsebomnama. Bëngbe Bëtsá, chë ndocna te obosterayá, quem luare cabá ndmëna orscana tojanašebuachená entšanga chca vida jtsebomnama; <sup>3</sup> y nÿa chama tempo tojóshjango ora, chë entšanga jábuayenama, soyëngaca Bëngbe Bëtsá chabe palabra šojinÿanjé, ndayá Jesucristo entšangbiana yochjanmama; y chca jábuayenama atše palabra šmonjabonjé, Bëngbe Bëtsá, bëngbe Atsebacayabe mándoca. <sup>4</sup> Tito, quem tsbuanácha cbontsabobiamná. Atše Jesucristbe soyëngama entšanga sënjanabuayiyiná ora, aca chábeñe contsanošbuaché y nyets útata cachca ošbuáchiyana Jesucristbeñe bondbomna, y chca, aca mo atšbe ndegombre uaquiñacá condmëna. Atše séntseimpadana, Bëngbe Bëtsá Bëngbe Taitá y Jesucristo Bëngbe Atsebacayá, ábeñe tšabe bendicionënga chaotsemnama chata chaboma, y chaboma aca ainaniñe tšabe ebionana chacotsebomnama.

### *Titbe trabajo Creta luaroca*

<sup>5</sup> Atše Creta luaroca tcbonjéftsanboshjona, ntšamo chentše jamama enjetsashbencá chacomama, y nyetsca pueblënguenache chë ošbuachiyëngcá enefjuanëngbeñe bët-sëjemëngcá amëndayënga jtsemnama chacubuáyanama, ntšamo tcbonjafstemandacá. <sup>6</sup> Canÿa bëtsëjëmama uabuayaná mëntšá bontsemna: chaotsiyena ntšamo chabiana ndocná chaondétsichamo ndoñe tšabá yontsama ca; nÿe canÿe shembásabe boyá; chabe básengna, Jesucristbeñe ošbuáchiyënga chamotsemna, y chamotsiyena, ntšamo ndocná chaodayana chënga nÿe jenomándama ntsobercá y nÿe ntšamo tmojtsebošcá imojtsiyena ca, o chënga chëngbe bëtsétsanga o mándayënga ndoñe montsayaunana ca. <sup>7</sup> Er cánÿentše ošbuachiyëngcá enefjuanëngbe mandayá, Bëngbe Bëtsabe trabajo jamama tmojabonjéyeca, cha bontsemna jtsiyenana, ntšamo ndocná chaodayana cha ndoñe tšabá yontsama ca; ntjajuaboycá, nÿe ntšamo cha tojtsebošcá ndoñe chaondétsama; ndoñe chaondétsiyena nÿe rábiaca jtsemnama; ndoñe chaondétsetmó; penzentero ndoñe chaondétsemna; y ndoñe chaondétseboše nÿe paselo becá crocénana jtsebomnama. <sup>8</sup> Pero chabe yebnentše posada entšanga júyentšamiana sempre chaotseprontana, tšabe soyënga chaotsebínÿinama sempre chaotsentšena, botamana juabnayá chaotsemna, ntšamo Bëngbe Bëtsabe bominiñe tšabá yomncá chaotsiyena, nyets tempo Bëngbe Bëtsábioye chabotsadorana, y cachá nyetsca soyënguiñe jenomándama chaotsobena. <sup>9</sup> Cha bontsemna nyets tempo jtsošbuáchiyana y jtsobedecénana chë ndegombre buayenana soye, ntšamo tmojabuatëmbacá, chca, chë ndegombre buatëmbana soyëngaca ínÿenga añemo chaotsatšatnama, y chë soyama contra tmojtsemnënga jáyënjanama, ndoñe tšabá montsamama.

<sup>10</sup> Cha chca bontsemna, banga nÿe ndëmandánënga jtsiyenama bošënga mondmëna causa, y chënga mondmëna, nÿe ndaye ndoservena soyëngama yapa oyebuambnayënga y ínÿenga áingñayënga, y chcanga más mondmëna chë nyetsca ošbuáchiyënga base bobachtema chë más delicadentše tétšenënga jtsemnama yojtsumna ca mondbët-sichamënguentše. <sup>11</sup> Y entseyta chëngbioye jtayáchetana, er chënga jamana ba pamíllanguentše nyetscanga Jesucristbeñe ošbuáchiyana chamotsajbanama. Chënga chca

mondbétsama, chë ndoñe yontsamna jtsabuátambayama soyënga jtsabuátambayëse, nÿe paselo crocénana jongánama.

<sup>12</sup> Enjamna canÿa, ndabiama entsãnga jtsichámuana cach Creta luarentša diosëngbiama oyebuambnayá canjamna ca, y cha cachabe luarentša oyenëngbiama mëntšá tonjánayana: “Creta luarentše oyenënga, nÿets tempo bosterënga mondmëna, ainana ndbomnënga y oyënjayënga nÿe becá jasama bošënga ca.” <sup>13</sup> Y chca ndegombre cha tonjánayana; chíyeca chënga jabuache cochjucácana, chca, chënga Jesucristbeñe chamotsošbuáchema y chamotsobedecena chë buatëmbana soyënga, chë ndayiñe bënga mondošbuaché; <sup>14</sup> y cach judiëngbe cuentënga ndoñe chamondëtsuenana, ni chë ndegombre soyënga uabotenëngbe mandënga.

<sup>15</sup> Chë ainaniñe bacna juabnënga ndbomnënga y chca juabnéngaca ndëmandánënga, nÿetsca soyëngama jtsejuabnayana mo ndegombre tšabe soyënga cuaftsemncá; pero chë bacna soyëngaca mandánënga y Jesucristbeñe ndošbuáchiyënga, nÿe ndayámnaca jtsejuabnayana mo bacna soye cuaftsemncá. Chca entsemna, er chëngbe juabnoca nÿe ena bacna soyënga jésebomnana, y ndaye bacna soye tmojama ora, chëngbe ainaniñe juabnënga ndoñe ntsebomnana, bacna soye tmojamama chaúyanama. <sup>16</sup> Chënga jt-sichámuana Bëngbe Bëtsá imuábuatma ca, pero ntšamo tmojtsama soyëngaca jtsinÿinÿ-nayana chca ndoñe ndegombre yondmënana. Chënga Bëngbe Bëtsabe bominiñe puerte bacna entsãnga mondmëna, y ntšamo cha tomandacá ndoñe ntsamana; chë causa chënga ndoñe ntsobenana ndaye tšabe soye jamama.

## 2

### *Soyënga ntšamo chë ndegombre buatëmbánana endmëncá*

<sup>1</sup> Ntšamo chacojtsoyeuambnacá sempre chaotsemna ntšamo chë ndegombre bu-atëmbánana endmëncá. <sup>2</sup> Cochjayana chë bëtsëjëmëngna chamotsemna cachënga nÿetsca soyënguiñe jenomándama obenënga, nÿetscangbiama mo uámana entsãngcá utabnënga, ntšamo jtsiyenama tšabá juabnayënga, nÿets tempo chë ndegombre soyënguiñe chamotsošbuaché, Bëngbe Bëtsá y nÿetscanga chamotsababuánÿeshana, y pade-cena soyënguiñe puerte uantadënga chamotsemna.

<sup>3</sup> Cachcá, chë bëtsanana shembásenga chamotsiyena mo Bëngbe Bëtsábioye adora-yëngcá, uayátsenayënga ndoñe chamondëtsemna, ni tmoyënga. Entsamna chamotsiyena tšabe soyënga jtsamëse; <sup>4</sup> chë tobiasënga chamotsinÿanÿná y chamotsabuatambá ntšamo chëngbe boyanga y básenga jtsababuánÿeshanana, <sup>5</sup> ntšamo cachënga jenomándama jtsobenana, ainaniñe ndocna bacna soye ntsebomnana, yebnentša soyënga jtsamama jtsentšënanana, nÿetscángaftaca tšábënga jtsemnana, cachëngbe boyángbioye jtsayaunanana, chca, ndocná chaondëtsobena Bëngbe Bëtsabe palabrama bacá jatóye-buambnayana, ntšamo chë tobiasënga tmojamama.

<sup>6</sup> Cachcá, chë bobontsënga añemo cochtsatšatnaye cachënga jenomándama chamotsobenama, <sup>7</sup> y chënga cochjínÿanÿiye ntšamo yomna jtsiyenana, cach aca nÿetsca soyënguiñe tšabá jtsamëse. Chca chacojtsabuatambá ora, nÿe chë ndegombre buayenánana cochtsabuátambaye y corente respétoca chca cochtsama, <sup>8</sup> chë ndegombre soyënga jtsóyeuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotséuatja, er ndocna bacna soye quemochatobenaye bëngbiama jayanama.

<sup>9</sup> Chë nÿets tempo nÿe ínÿabiama oservénënga cochjábuayenaye, chëngbe nduiñëngbioye chamotsobedecénama, soyënga chamotsama chënga chamotsóyejuama, y ya-juatsanënga ndoñe chamondëtsemnana. <sup>10</sup> Ndoñe chamondëtsatbëbana, pero aíñe nÿetscañe tšabe palabra bomnënga chamotsemna. Chënga chca entsamna, chca, ínÿënga chámuinÿe y chamojuabó tša botamana chë buatëmbana soyënga, Bëngbe Bëtsá bëngbe Atsebacayabiama yomna ca.

<sup>11</sup> Er Bëngbe Bëtsá bënga šonjinjanyé cha bëngbe tšabiama juabnënga yobomnama, y chca, cha tojama nyetsca entsanga chamotsobena atsebácanënga jtsemnama. <sup>12</sup> Chë Bëngbe Bëtsabe juabna bëngbe tšabiama, šontsabuatambá jtsajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámna šontsabuatambá, cabënga jenomándama jtsobenëse, ntšamo Bëngbe Bëtsabe bominyiñe tšabá yomncá y cha jadórama soyënga jtsamëse. <sup>13</sup> Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtsebomnama te, Bëngbe Bëtsá obená y Atsebacayá Jesucristo, buashinyinianiñe y canye corente uamanacá yochjésabo ora. <sup>14</sup> Cha chabe derecho vida jtsobomñama cachcá tojanonyá y bëngbiama tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentšana bënga játsebacama, ainaniñe ndocna bacna soye ndbomnënga jábiamama, bënga chábënga chamotsemnama, sempre prontánënga ntšamo tšabá yomncá jtsamama.

<sup>15</sup> Chca cmontsemna jtsabuátambayana, chënga becá añemo jtsatsatnayëse, y jtsinyanynayëse chënga bacna soye tmojamama, chë nyets condbomna mándoca jucacanése. Ndoñe catjaleséncia ndocná chaondayana aca mando ndoñe condbomna ca.

### 3

#### *Ndayá Jesucristbeñe ošbuachiyënga yojsamna jamana*

<sup>1</sup> Cochtsama chënga chamuatenójuaboma chë mandadënga y inye mándayënga chamotsayaunanama, chamotsobedecénama, y tšabá yomncá jamama sempre chamotseprontánama. <sup>2</sup> Ndocnabiama ndocna bacna soye chamondëtsoyebuambná, penzentserënga ndoñe chamondëtsemna, ndayá nyetscángaftaca natjëmbana jtsiyenama bošënga, tšabá mándbomnënga, nyetscanga tšabe ainánaca imojtsénnyama entsanga jtsinyanynayëse.

<sup>3</sup> Er béngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjatanama, ingñénënga y mandánënga monjamna nyetsca bacna soyënga jamama juabnéngaca y nye quem luarentše tšabá jtsemnama juabnéngaca. Bënga monjaninyena nye bacna soyënguiñe juabnaye, ínnyënga uantšaboše. Inyënga bënga šonjanébuayënja y bënga nyetscanga monjanenáboyënja. <sup>4</sup> Pero Bëngbe Bëtsá, bëngbe Atsebacayá, bëngbe tšabiama juabna yobómnyayeca y tša šuababuányëshanama šonjaninyanyé ora, <sup>5</sup> cha šonjanatsebacá, pero ndoñe nderado bënga ndaye tšabe soye tmojanmama, ndayá cha bëngbiama tbojanongméyeca. Cha šonjanatsebacá, bëngbe bacna soyënga jabuajuánase, y chë Uámana Espíritu jujabuáchëse, bënga mo tsmëma entsangcá chamotsemnama, ntšamo tempo yojamncá ntjatsjuabnycá y ntjatamcá. <sup>6</sup> Bëngbe Atsebacayá Jesucristbeyeca, Bëngbe Bëtsá tojanma Uámana Espíritu bëngbe ainaniñe nyets tempo chaotsemándama y bënga chašotséjabuachanama, <sup>7</sup> chca bënga, Bëngbe Bëtsá bacna soyëngama šojaperdónanga y bëngbe tšabiama juabna bómnyayeca tojayana chabe bominyiñe tšábënga imomnënga, chamotsobena cha yobomna soyënguentshana bënga mo ndayá cuaftsétocancá jýyëngacñama, y chca, chábeñe jtsošbuachiyëse, chë nyetsca tescama yomna tšabe vida chamotsobátmanama.

<sup>8</sup> Chca, lempe ntšamo tijayancá nya ndegombre endmëna, y atše séntseboše chë soyëngama bëtscá chacotsabuatambá, chca, chë Bëngbe Bëtsábeñe tmošbuachënga chamotsentsëna chë tšabe soyënga jtsamama. Chë buatëmbánana puerte tšabá endmëna y nyetscangbiama bëtscá endoservenana. <sup>9</sup> Inyënga nye ndoservenana soyëngama jabuachana tmojtseñatsësná ora, y anteungbe cuentëngama chamojtsoyebuambná ora, ndoñe cattsonremetena; ndoñe cattsama cach tšëngaftanga ndoñe tšabá jtsenëyëunanamcá, y judiëngbe leyëngama ndoñe ínnyëngaftaca cattsenpéliaye. Chca jtsamana tondayama ntoservénana, y nye bonamente chca jtsamana.

<sup>10</sup> Nderado nda tojtsama entsānga ndoñe cachcá nyetscanga chamondétsejuabnama y chamotsenpéliama, canye o uta soye cochjabuayená ndoñe tšabá tonjamama; pero cha ndoñe tcmonjóyeunase, chentšana cháftaca ndoñe más cattsóyebuambnaye. <sup>11</sup> Chca cochjama, er aca cochanjátatšēmbona canya chca tojtsemná, chabe juabna tojatrocá bacna soyēnga jtsejuabnayama. Chē soye y chē inye bacna soyēnga ntšamo cha tojtsamcá, jtsinýanýnayana cha ibojtsemna castiganá chama jtsemnama.

*Inye soyēnga Titbiama*

<sup>12</sup> Atše, Artemas o Tíquico ácbioye chajjichmó y choca chaojáshjango ora, ndayánaca cochjama Nicópolis puebloye aca jama atše jinýama, er atše sēnjajuabó chentše chē uaftenēntscuana jēftsemnana. <sup>13</sup> Lempe ntšamo chacojobenacá, cochjuájabuache chē ínýenga obuauyayá Zenas, y Apólosnaca; lempe ntšamo chata ibojtsējabotcá cochjátšataye, ínýoye jama jatóntšama chamobenama y benachējana tondaye chaondēsabuáshebenama. <sup>14</sup> Atše séntseboše, bēngbe entsānga, chē bēngcá Jesucristbeñe ošbuáchiyēnga, chamotsentšena chē tšabe soyēnga jtsamama y chē puerte ujabótēnga jtsējabuáchanama, chca, chēnga tondayama ndoserverna vidēnga ndoñe chamondétsebomnama.

*Pablo Títbioye jadiósoftanama*

<sup>15</sup> Nyetscanga chē átšeftaca montsemnéngnaca cmontsechuaná. Atšbe cuenta cochjácheuaye nyetscanga chē bēnga imuababuanýeshanéngbioye, cach bēngcá Jesucristbeñe ošbuáchiyana bómnayeca. Atše, Bēngbe Bētsá séntseimpadana, cha chaoma ácebeñe tšabe bendicionēnga chaotsemnama.

## Filemón

### *Jachuayama*

<sup>1</sup> Atše Pablo, mora utamená Cristo Jesusbiamá oservena causa, quem tsbuanácha séntsabiamná, Jesucristbeyeca bēngbe catšata Timotéoftaca, acbiamá Filemón, bēngbe bonshaná y nda bēngaftaca condētrabája Jesucristo jaserviama. <sup>2</sup> Atše séntsacheuaná, Jesucristbeyeca bēngbe uabena Apia y Arquípnaca, nda bēngaftaca cánýiñe Jesucristbe soyēngama endenojuerzana; y nyetsca ošbuachiyēngnaca, ndēmuanýenga imuamana acbe yebnentše jénefnama Bēngbe Bētsá jētschuayama. <sup>3</sup> Atše séntseimpadana Bēngbe Bētsá Bēngbe Taitá y Bēngbe Utabná Jesucristo, chata chaboma tšabe bendicionēnga tšēngaftangbeñe chaotsemnama, y chaboma tšēngaftangbe ainaniñe tšabe ebionana chašmotsebomnama.

### *Filemonbe bonshánana y ošbuachiyana*

<sup>4</sup> Bēngbe Bētsáftaca stsencuēnta ora, acbiamá sēndbētsenojuabnaye, y sempre acbiamá Bēngbe Bētsá sēndbētsatschuanaye, <sup>5</sup> er atše sēnjátatšēmbona ntšamo aca nyetsca chē Bēngbe Bētsábenga imomnēnga icuababuánýeshanama, y ntšamo aca Bēngbe Utabná Jesúsbeñe tša icošbuáchema. <sup>6</sup> Bēnga, Jesucristbeñe ošbuachiyēnga quetsomñecá, ácaftaca mo canýacá fsēndmēna. Chca endmēnayeca atše Bēngbe Bētsá séntseimpadana, tšēngaftanga chašmobená más botamana josértana nyetsca chē Bēngbe Bētsábicana tmojóyēngacñe tšabe bendicionēnga, bēnga Cristo Jesúsēftaca cánýiñe mo canýacá bētsemnayeca. <sup>7</sup> Jesucristbeyeca atšbe bonshana catšata, aca chē Jesucristbeñe ošbuachiyēnga tša condábabuanýeshanama, atše corente oyejuayá séntsemna y bēts añemo séntsebomna. Y aca tcojama, nyetscanga chē Bēngbe Bētsábenga imomnēnga chēngbe ainaniñe ngmēnaca ndoñe chamondētsemnama, chēnga jujabuáchēse.

### *Pablo, Filemónbioye Onésimbiamá tbojanimpadá*

<sup>8</sup> Y chca, atše Cristbe ichmoná quetsomñecá séntsobena, aca nýe jamándana ntšamo yomncá chacotsamama, pero atše chca ndoñe quichatsma. <sup>9</sup> Y cbondbobonshánayeca, chca játamamna, aca cbochanjaimpáda. Atše Pablo, Jesucristbe cuenta ichmoná jóyebuambayama y mora utamená, chabiamá oservena causa, <sup>10</sup> canýe ruego cbochanjábema, Onésimo chacuájabuachama. Atše utamená tsmēnēntscuana, Jesucristbe soyēngama cha sēnjanbuayiyná. Cha Crístbeñe tonjanošbuachéyeca, cha mo atšbe uaquiñacá tonjanóbema.

<sup>11</sup> Tempo, cha ácbioye tondayama quecmēnjátanservena, pero mora cha becá entsámana, acbiamá y atšbiamá. <sup>12</sup> Mora ácbioye séntsatichamná, y atše sempre chabiamá sēndbētsenojuabnaye y sēndbobonshana. <sup>13</sup> Atšbiamá puerte tšabá manmēna cha átšēftaca matēnjoquedase, acbe cuenta atše chašoservema, cárceloye utamená séntsemnēntscuana, chē tšabe noticiēnga entsānga abuayiynaye causa. <sup>14</sup> Pero atše ndoñe chiyatsma cha chaoquedama atše chašuájabuachama, er atše ndoñe quetsátboše aca obligaciónaca chacotsemnama, atše juajabuáchama ndayánaca chacomama; y séntseboše aca ndayánaca chacoma, cach aca chca jamama puerte tcojtsebošēse. Chcasna, tondaye quichatsma, chē soye chca chaotsemnama aca cabá ndocá ntjayancá. <sup>15</sup> Atše séntsejuabná nderado Onésimo ácbentšana básefta tescama tojanoluaré, mora ácaftaca nyets tempo jtsatsmēnama ca, <sup>16</sup> y ndoñe nýe acbiamá mo nyets tempo canýe oservenacá, ndayá chama más uamanacá, mo Jesucristbeyeca canýe bonshana catšatcá. Atše puerte Onésimo sēndbobonshana, y acna cmontsemna más cha jtsebobonshánana, er cha mora ndoñe quenátsmēna canýa nýe acbiamá nyets tempo oservená, ndayá Bēngbe Utabnábeyeca canýe catšata, ntšamo cach aca condmēncá.



<sup>17</sup> Chca, aca atšbiamá condëjuabná mo ácaftaca cánýiñe Bëngbe Utabnabiamá trabajacá; chíyecna cmontsemna cha jtofjana, mo atše šcojofjá. <sup>18</sup> Nderado ntšamo cha tcmojanborlá o ndayánaca tcmondebena, atše chama cbochjětsěntsabuachiye. <sup>19</sup> Atše Pablo, cach atšbe cucuátšeca quem soye sěntsabiamná. Atše chama cbochanjětsěntsabuachiye. Ndegombre, ndoñe quenátsiyta atše chacbëyana becá šcondebena ca, ntšamo atsbocaná jtsemnama atše tcojábuanayenama. <sup>20</sup> Chcasna, Jesucristbeyeca atšbe catšata, Bëngbe Utabnáftaca cánýiñe mo canýacá quetsomñecá, Diosmanda chë pavor šcochtsebema. Diosmanda cochjama atšbe ainana ngménaca ndoñe chaondětsemnama.

<sup>21</sup> Atše chca cbontsabobiamná, er atše tšabá sěndětatsěmbo, ntšamo cbontseimpadancá cochjamama, y cabá más chama cochjatsmama. <sup>22</sup> Y mora inye soye, Diosmanda posada šcochjabopróna, atše jányama chajábocna orscama, er atše puerte jtsošbuáchiyěse Bëngbe Bětsábeñe sěndobátmana, cha tšěngaftangbiamá yochjama lempe ntšamo atšbiamá chašmojtjañcá, y chca, cha šochjaleséncia atše tšěngaftangbioye jésama.

*Pablo Filemónbioye jadióšoftanama*

<sup>23</sup> Epafra, muentše átšeftaca cárceloye utamená, Cristo Jesusbiamá entšanga abuayinaye causa, chánaca cmontsechuaná. <sup>24</sup> Y Marcos, Aristarco, Demas y Lucas, chë běngaftaca mondětrabájanga Cristo jaserviama, chéngnaca cmontsechuaná.

<sup>25</sup> Atše sěntseimpadana Bëngbe Utabná Jesucristo, chaoma tšabe bendicioněnga tšěngaftangbeñe chaotsemnama.

## Hebreos

### *Bëngbe Bëtsá béngaftaca tojoyebuambá, chabe Uaquiñáftaca*

<sup>1</sup> Tempo, Bëngbe Bëtsá ba soye y ba soyéngaca bëngbe bëts taitángbioye tojanéyana, chë chabe juabna oyebuambnayéngaftaca. <sup>2</sup> Pero quem tempo béngaftaca tojoyebuambá, chabe Uaquiñá jíchmuase, béngbioye cha chašúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiama chaotsemnama, y chábeyeca Bëngbe Bëtsá quem luare y nyetsca inye luarénga tojama. <sup>3</sup> Cha endinñanñá Bëngbe Bëtsabe corente buashinñinñanana y uámanana, y cha endmëna cach Bëngbe Bëtsacá, y chábeñe bënga mondobena jinñama ntšamo Bëngbe Bëtsá yomncá. Chabe bëts obenánaca endútabna lempe ntšamo quem luarentše yobinñcá; cha tojayana y chca jtsemnana. Cha tojanóbana bëngbe bacna soyénga jabuajuánama, y chentšana Bëngbe Bëtsá tojaninñanyé cha puerte bëtsá y uamaná bétsemnama, celoca játbemëse, Bëngbe Bëtsabe catšbioica, nyetscanga jtsaméndayama.

### *Bëngbe Bëtsabe Uaquiñá chë angelëngbiama más bëtsá yomna*

<sup>4</sup> Y chca, Bëngbe Bëtsá tbojánbema chë angelëngbiama más uamaná y obená, er Bëngbe Bëtsá tbojanbuajó canye más uámana uabaina y chë angelëngbiama canye más uámana trabajo tbojanbonyé. <sup>5</sup> Ndegombre chca endmëna, er Bëngbe Bëtsá ndocna te ndocna ángelbioye mëntšá tbonjaniyana, ntšamo chabe Uaquiñábioye tbojaniancá: Aca atšbe Uaquiñá condmëna.

Mënté entsánga sënjinñanyé aca atšbe Uaquiñá comnama ca.

Ni ndocna angelbiama mëntšá tojánayana, ntšamo chabe Uaquiñabiama tojanayancá:

Atše canye taitá chabiama chántsemna,

y cha canye Uaquiñá atšbiama ca.

<sup>6</sup> Quem Bëngbe Bëtsabe Uaquiñá endmëna nyetscangbiama más uamaná. Chca Bëngbe Bëtsá tojánayana, chabe natsana Uaquiñá quem luaroye cháuashjanguama cha tojanma ora:

Bëngbe Bëtsabe nyetsca angelénga cha chamotsatschuaná ca.

<sup>7</sup> Y chabe angelëngbiama, mëntšá tojánayana:

Atše sëndama atšbe angelénga, chë atšbe buayiynayénga, mo binjiéngcá chamotsemnama,

y chénga, atšbe oservénénga, mo inñéngcá ca.

<sup>8</sup> Pero chabe Uaquiñabiama Bëngbe Bëtsá tojánayana:

Utabná, acbe améndayana nyetsca tescama echántsemna,

y aca nyetsca soyénguiñe condbétsemandaye, ntšamo tšabá yomncá jtsamëse.

<sup>9</sup> Aca icontšena ntšamo tšabá yomncá nyetsca soyénguiñe jtsamama, y sempre chca jtsamama tša icoboše,

pero nña tondayama cmondogustana bacna soyénga jtsamana, chë ndayá Bëngbe Bëtsá ndoñe yondboše soye;

chíyeca Bëngbe Bëtsá tcmojabocacá,

y tojama aca puerte oyejuayá chacotsemnama,

chë inñengbiama más oyejuayá ca —Bëngbe Bëtsá tojánayana.

<sup>10</sup> Bëngbe Bëtsá mëntšánaca chabiama tojánayana:

Utabná, quem luare jobojátšama ora, aca quem luare tconjanma,

y lempe chë celoca yomna soyéngnaca.

<sup>11</sup> Lempe chë soyénga nyets tempo ndoñe queochátsmëna;

aca nyetsca tescama cochántsemna.

Lempe chë soyénga echanjopochóca, mo tojuatanguaná entsayacá.

<sup>12</sup> Aca chë luarénga cochanjätrocaye, mo tsmëcá cuafjabiamcá.

Chca, chë luaréngaca cochanjama, mo entšáyá tcojtenëjonëtse y tcojenotrocacá.  
 Pero aca nyëts tempo cach aca cochandesomñe,  
 y nyëts tempo vida cochandesóbomñe ca —cha tojánayana.

<sup>13</sup> Bëngbe Bëtsá ndocna te ndocna ángelbioye mëntšá tbojanianyana, ntšamo chabe Uaquiñábioye tbojaniancá:

Atšbe catsbioica cochtsetbemana,  
 acbe uayayënga acbe cucuatšihne chamoquedama atšbe obenánaca chjamëntscuana ca.

<sup>14</sup> Ndegombre, nyëtsca angelënga espíritënga mondmëna Bëngbe Bëtsá jaserviama, ndëmuanyënga cha tojanichamó bënga jabújabuachama, chë atsebácanënga mochtsem-nëngbe tšabiamana.

## 2

### *Canye bëts soye endmëna atsebácanënga jtsemnana*

<sup>1</sup> Chíyeca, bënga šontsamna sempre Bëngbe Bëtsabe soyënga jtsuenanana, chë bënga tmonjouena soyënga, chë tšabe benachentšana ndoñe chamondojuánama. <sup>2</sup> Ndayá Bëngbe Bëtsá tempo angeléngaca entšanga tojanamëndacá, canye ndegombre soye endmëna, y entšanga entsamna chca jtsobedecénana; y chë bacna soye tmojanmënga y ntšamo Bëngbe Bëtsá tojanmandacá ndoñe tmonjanmënga castigo tojanatšatá, chca tmojanma causa; y chca, <sup>3</sup> bënga chca bacna soyënga tmojtsamëse, ¿ntšamo mochtjobenaye jtsejuabnayana Bëngbe Bëtsá chama ndoñe šochanjacastígaye ca? Ndegombre cha chca echanjama, bënga chábeñe ndoñe tmontsošbuáchese, chë bëts soye jëft-sashjáchama, atsebácanënga jtsemnana. Bëngbe Utabná chë natsaná yojtsemna nda entšanga tojanabuayená Bëngbe Bëtsá entšanga yochjánatsebacama; y ín'yënga bënga šonjanabuayená cachcá ntšamo chábioye tmojanoyeunacá. <sup>4</sup> Y Bëngbe Bëtsánaca tonjanin'yanyé, ndayá chënga tmojanabuayenacá ndegombre bétsemnana, chabe obenana jin'yanyiyama soyéngaca, entšanga chamenjnaná soyéngaca, bëts soyéngaca, y entšanga chë Uámana Espiritu ainaniñe chamotsebomnana cha jtsamëse. Chca jamëse, cada ona chaotsobena jamama ntšamo Bëngbe Bëtsá yobošcá.

### *Bëngbe Bëtsá tojanma Jesucristo entšangcá chaotsemnana*

<sup>5</sup> Bëngbe Bëtsá angelënga ndoñe tonjubuáyana chamotsemándama ndayá quem luar-entšë yochtsemniñe, lempe mo tsmëcá chaotsemnana Bëngbe Bëtsá chaojama ora, chë ndayama mora bënga montsoyebuambná. <sup>6</sup> Chamna, ín'yoca Bëngbe Bëtsabe uabemana palabrenguiñe mëntšá endayana, ntšamo chábioye canya tbojaniancá tojánayana:

Entšanga ndoñe yapa uámanënga quemátsmëna, as ¿ndáyeca tša chëngbeñe cuanjése-juabnaye?

Chënga entšanga mondmëna. ¿Ndayeca tša chënga cuanjésanyëna?

<sup>7</sup> Aca tcojama entšá puerte uamaná chaotsemnana, y chë angelëngna nye batšatema chabiamana más uámanënga mondmëna.

Aca tcojama cha puerte uamaná y respeto merecido bomná chaotsemnana,

<sup>8</sup> y cha chaotsemándama nyëtsca chë inye soyënguiñe, chë quem luarentšë aca tcojamiñe —chiñe canya tojánayana.

Entšá lempe chaotsemándama Bëngbe Bëtsá tojanma ora, tondaye tonjánboshjona entšáftaca ndëmandana soye ca. Pero mëntscoñama ndoñe nya chca quemëntinye, chë entšá lempe ntšamo quem luarentšë yomncá jtsemándayana. <sup>9</sup> Pero bënga mondë-tatšëmbo y corente mondonyá Jesús aíñe chca tojanmama. Bëngbe Bëtsá tojanma cha nduamaná chaotsemnana, mo canye entšacá, baseftayté chë angelëngbiamana más batšá uamaná. Bëngbe Bëtsá, entšangbe tšabiamana jtsejuabnayëse, yojánboše Jesús chaóbanama, corente jasúfriase; Bëngbe Bëtsá yojánboše cha chca chaomama, nyëts luarentša entšangbe tšabiamana. Y Jesús ya chca tojánmayeca, Bëngbe Bëtsá ya tojin'yanyé cha puerte bëtsá y uamaná bétsemnana.

<sup>10</sup> Njetsca soyënga yobinÿna Bëngbe Bëtsabiama y chábeyeca. Tšabá enjamna, Bëngbe Bëtsá jamana Jesucristo chaotsemnana lempe ntšamo entšanga tmojtsajabotcá, nda chëngbe bacna soyënguentsana cháuatsebacama. Bëngbe Bëtsá chca tojanma, Jesús, chë entšanga atsebácanënga jtsemnana unachayá, chaosufrima jamëse, chca, ba entšanga celoca, mo chabe basengcá, cháftaca bëtsetsanga chamotsemnana. <sup>11</sup> Er Bëngbe Bëtsá cach Taitá njetscangbiama endmëna: Jesús, chë entšanga Bëngbe Bët-sábenga chamotsemnana iuamabiama, y chë entšanga chca chamojtsemnëngbiámnaca. Chíyeca Jesús, Bëngbe Bëtsabe Uaquiñá, ndoñe ntsëuatjana chëngbioye catsátanga ca jtsachembuanama. <sup>12</sup> Bëngbe Bëtsabe uabemana palabrenguiñe Bëngbe Bëtsábioye cha mëntšá tbojaniana:

Atšbe uabentsëngbeñe acbiama chanjóyebuambaye,  
y jacántase cbochanjëtschuaye, ácbioye adórayënguentsë ca.

<sup>13</sup> Y mëntšánaca cha Bëngbe Bëtsabiama tojánayana:

Atše atšbe Bëtsábeñe chantsošbuáchiye ca.

Y más chcoye mëntšá tojánayana:

Muentše Bëngbe Bëtsabe básengaftaca séntsemna, chë atšbe cucuatšíñe tojábashes-juanënga, atše jtsanÿenama ca.

<sup>14</sup> Quem Bëngbe Bëtsabe básenga njetsca entšangcá mondménayeca, Jesúsnaca canÿe entšá chëngcá tojanóbema. Cha chca tojanma, jóbanëse, chë entšanga jóbanama chaotsamnama obenana bomná Satanás, jayénjanama. <sup>15</sup> Y chca, cha tojama chë jóbanama y ndayá chentšana yochjopásama auatjënga ndoñe chamondétsautjama; chënga njets tempo corente ngménaca imnoyena, jóbanama auatja causa. <sup>16</sup> Er ndegombre, cha ndoñe tonjánabo chë angelënga jabújabuachama, ndayá chë Abrahám-bentšana entšángbioye. <sup>17</sup> Y chama cha ibojamna jtsemnana njetsca soyënguiñe cachcá mo chabe uabentsëngcá, chë entšanga, chca, jobenayama jtsemnana chëng-biama mo bachnangbe canÿe más uámana amëndayacá, Bëngbe Bëtsá jtseimpadánama chëngbioye chëngbe bacna soyëngama cháuaperdonama, puerte lastemado mëná y sempre ntšamo Bëngbe Bëtsá tbojauyancá amá. Chca, cha jóbanëse jamama entšanga chamobenama perdonánënga jtsemnana, y chca, jobenayama Bëngbe Bëtsáftaca tšabá tempcá jtsemnëngama. <sup>18</sup> Y mora cha entsobena, ndëmuanÿenga bacna soye jamama tojócochenguënga jujabuáchana; cha chca entsobena, er cachánaca tojansufrí, cha bacna soye chaomama Satanás tša yojtsentsëna ora.

### 3

#### *Cristo Moisesbiama más uamaná endmëna*

<sup>1</sup> Chíyeca, Jesucristbeyeca catsátanga, Bëngbe Bëtsábenga, ndëmuanÿenga Bëngbe Bëtsá tojáchembo chabe entšanga chamotsemnana, corente Jesucristbeñe šmochjése-juabnaye. Cha endmëna nda Bëngbe Bëtsá bëngbioye tbojanichmó, y nda bëngbiama yomna mo chë más uámana bachnangbe amëndayacá, Bëngbe Bëtsábioye jtseimpadánama bacna soyëngama chašotsaperdonama. Cha chca endmëna chë bënga mondošbuaché soyënguiñe y chë mondbáyana ndegombre yomna ca soyënguiñe. <sup>2</sup> Er Jesús njets tempo tojanma ndayá chaotsamama Bëngbe Bëtsá tbojaniancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entšángbioye cháuaservema. <sup>3</sup> Canÿe yebna jebuaná chë yebnama más uamaná jtsemnana; cachcá Jesús, nda inétsama entšanga Bëngbe Bët-sábenga chamotsemnana, más jtsomerecénana Bëngbe Bëtsá cha puerte bëtšá y uamaná bëtsemnana cháuinÿanÿema, nÿe ntšamo Moisés, canÿa Bëngbe Bëtsabe entšanguentsá yojanomerecénama. <sup>4</sup> Ndëmuanÿe yébnënaca canÿe jebuaná jtsebomnana, pero Bëngbe Bëtsá endmëna nda tojanma lempe ntšamo yobinÿncá. <sup>5</sup> Moisés yojtsama ndayá chaotsamama Bëngbe Bëtsá tbojanmandacá, tšabe oservenacá njetsca Bëngbe Bëtsabe entšángbeñe, y yojamna canÿa corente tatšëmbuá ndayá más chcoye yochjanopásama,

ndayá Bëngbe Bëtsá yochjánayanama. <sup>6</sup> Pero Cristo, ndayá Bëngbe Bëtsá tobošcá jamana, chë Bëngbe Bëtsabe entsángbeñe Uaquiñacá jtsemándayëse, ntšamo canye uaquiñá jtsemándayana ndayá nyetsca chabe pamíllanga tmojtsamiñe; cha, chë Uaquiñacá y chënga chë Bëngbe Bëtsabe pamillentsëngcá. Bënga chë pamillentsa entsanga jtsemnana, bënga chë ndayá tmošbuáchema bëts añémoca sempre tmojtsóyebuambnase, y sempre Bëngbe Bëtsá tšabe soyënga bëngbiamama yochjamama tmojtsobátmanëse, y bënga chca jtsebomnama puerta oyejuayënga tmojtsemnëse.

*Chë jóchnama uámana luare Bëngbe Bëtsabe entsangbiamama*

<sup>7</sup> Chcasna, ntšamo chë Uámana Espíritu Bëngbe Bëtsabe uabemana palabrenguiñe tojanayancá:

Mënté tšëngaftanga ndayá Bëngbe Bëtsá tojtsichamcá šmojouenëse,

<sup>8</sup> ndoñe šmattsama, Bëngbe Bëtsabe buayenana soyënga tšëngaftangbe ainaniñe ndoñe chaondómashënguama,

mo chë entsanga ndoyena luaroca Moiséssoftaca imojëftsemnëngcá, Bëngbe Bëtsabe contra nyetsca soyënguiñe imojtsemna.

Chënga bëtscá bacna soyënga tmojanma, mo ndayá cuafsamcá jinýama ntsachetšá más muanjobenaye jamana y Bëngbe Bëtsá cabá uantado chëngaftaca tayojtsemnama.

<sup>9</sup> Bëngbe Bëtsá tojánayana: “Chentše, tšëngaftangbe bëts taitanga bëtscá monjánama jinýama ndayéntscoñe atše uantado chëngaftaca tsjamnama;

chca chënga tmonjanma, masque canta bnétsana uatëntscuana chënga chentše tmonjáninýe chë atše sënjánama bëts soyënga.

<sup>10</sup> Chíyeca, atše chorsca entsángaftaca šonjánetna y sënjánayana:

‘Tšëngaftanga mora átšëftaca ndoñe quešmátajna, mo chë otšenënga tmojtsemnëngcá, y ndoñe šmonjábosëna jtsiyenana ntšamo atše tsbošcá jtsamëse.’

<sup>11</sup> Chíyeca, atše chëngaftaca etonaná sënjánayana, mo nda cuafjajuracá,

chënga ndocna te mochjéftsashjache chë átšëftaca jóchnama uámana luaroye jashjanguama ca” —cha tojánayana.

<sup>12</sup> Jesucristbeyeca catšátanga, yejuana šmochtsantješna ndocná tšëngaftanguentšá chaondëtsebmoma canye ainana bëtscá bacna juabnéngaca, y chë causa chaotsemna Bëngbe Bëtsábeñe ndošbuachiyá, y Bëngbe Bëtsábentsana, chë sempre iuetsemnábentsana chaotsojuánañe. <sup>13</sup> Chamna, nyetscanga añemo šmochtsatenatšetnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe uabemana palabrenguiñe “mënté ca” uabaina tempo. Chca cmontsamna, ndocná tšëngaftanguentšá chaondëtsamama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnéngaca ingñená. <sup>14</sup> Er, ndayá Jesús chabe amëndayoca yobomnentšana bënga chamóyëngacñamna, bënga šontsamna sempre ainaniñe corente jtsetatšëmbuana Jesusbe soyënga ndegombre soyënga bëtsemnama, ntšamo bënga chábeñe jtsošbuáchiyama tmonjanontšë ora monjanamcá.

<sup>15</sup> Ntšamo Bëngbe Bëtsabe uabemana palabrenguiñe endayancá:

Mënté tšëngaftanga ntšamo Bëngbe Bëtsá tojtsichamcá šmojouenëse,

ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama,

mo chë entsanga ndoyena luaroca Moiséssoftaca imojëftsemnëngcá, Bëngbe Bëtsabe contra nyetsca soyënguiñe imojtsemna ca.

<sup>16</sup> ¿Y ndëmuanýënga imojamna, chë Bëngbe Bëtsá tojanëyancá tmojanuenentšana, nyetsca soyënguiñe chabe contra imojtsanmëna? Co chë Moisésbeyeca Egiptocana tmojánbocanënga. <sup>17</sup> ¿Y ndëmuanýëngaftaca Bëngbe Bëtsá etonaná canta bnétsana uatëntscuana yojtsemna? Co chë bacna soyënga tmojanméngaftaca, ndëmuanýënga

entsānga ndoyena luaroca tmojanóbana y chēngbe cuerpo chentše tojanoquedá. <sup>18</sup> ¿Y ndēmuanýenga tojanéyana, mo nda cuafjajuracá, chēnga ndocna te mochjéftsanashjache chē cháftaca jóchnama uámana luaroye jashjanguama ca? Co chē ndēmuanýenga ntšamo cha tojanmandacá ndoñe tmonjanmēnga. <sup>19</sup> Y ndegombre, bēnga montsobena jinýama chēnga ndoñe tmonjéftsanashjache chē cháftaca jóchnama uámana luaroye jashjanguama, Bēngbe Bētsábeñe ndoñe imontsošbuaché causa.

## 4

<sup>1</sup> Chíyeca, bēnga chē Bēngbe Bētsáftaca jóchnama uámana luare jashjáchama cabá imobenēntscuana, ntšamo cha šojanašebuachenacá cachcá méntscóñama iuétsemna, puerte cuedado mochtsebomna, nderado ndánaca tšēngaftanguentšá ndoñe nanjobenaye chca jashjáchama. <sup>2</sup> Er bēngnaca chē tšabe noticiēnga tmonjouena, cachcá chē Bēngbe Bētsabe buayenana soyēnga chēngbe ainaniñe ndoñe chaondómashēnguama tmojanmēngcá; pero chēnga chē buayenana soyēnga tmojanuena ora, ndocna tšabe soye chēngbeñe tonjanopasá, er chca tmojanuena ora, chē palabrēnguiñe ndoñe montsanošbuaché. <sup>3</sup> Pero bēnga, chē Jesucristbeñe tmojošbuachengna, mochanjobenaye chē jóchnama uámana luaroye jashjanguama, chē ndayama Bēngbe Bētsá tojánayana, chē tempo chábioye chca tmojtsanábotengbiama cha méntšá tojánayana ora: Chíyeca, atše chēngaftaca etonaná, sēnjánayana mo nda cuafjajuracá, ndegombre chēnga ndoñe mochjéftsashjache chē jóchnama uámana luaroye jashjanguama ca.

Pero cha chabe trabajo tojanpochocá, quem luare tojanma ora; <sup>4</sup> er Bēngbe Bētsabe uabemana palabrēnguiñe cánýentše méntšá endayana, chē canýsēfta tianoye ndayá cha tojanmama:

Bēngbe Bētsá nyetsca trabajēngama tonjanochná chē canýsēfta tianoye ca.

<sup>5</sup> Y cachentše Bēngbe Bētsabe uabemana palabrēnguiñe endayana, chē tempo chábioye chca tmojtsanábotengbiama:

Chēnga ndocna te quemocháisashjache chē átšeftaca jóchnama uámana luaroye jashjanguama ca.

<sup>6</sup> Chē entsānga monjamna chē natsanēnga chē tšabe noticiēnga jouenama, pero chē Bēngbe Bētsáftaca jóchnama uámana luare ndoñe tmonjéftsashjache, ntšamo cha inabošcá chēnga ndoñe tmonjanma causa. Chcasna, cabá ndegombre endētsomñe báseftanga, chē Bēngbe Bētsá tojánayana soyēnguiñe tmojtsosošbuáchenga, mochjéftsashjache chē Bēngbe Bētsáftaca jóchnama uámana luaroye jashjanguama. <sup>7</sup> Chē entsānga ndoyena luaroca, Bēngbe Bētsá entsānga tojánachembo chē cháftaca jóchnama uámana luaroye chámamashjnama, y chentšana ba uatēse cha cachiñe canýe tempo tojuinýnaná, chora entsānga chamobenama chē cháftaca jóchnama uámana luaroye jashjajnama, chē cha “ménté ca” tojanabaye tempo. Cha chca tojanma Davidbiajana jóyebuambayēse, David Bēngbe Bētsabe uabemana palabrēnguiñe méntšá tojánayana ora:

Ménté tšēngaftanga, ndayá Bēngbe Bētsá tojtsichamcá šmojouenēse, ndoñe šmattsama, Bēngbe Bētsabe buayenana soyēnga ainaniñe ndoñe chaondómashēnguama ca.

<sup>8</sup> Josué, Israeloca entsānga Canaán fshantsēngoye vojtsēnachaye ora, chē Bēngbe Bētsáftaca jóchnama uámana luare jtsebomnana cha choca matēnjanmēse, Bēngbe Bētsá bayté chentšana, David vojéftsiyena ora, inýe tempuama ndoñe matēnjanoyebuambá, chē ndaye ora entsānga muanjobenaye chē cháftaca jóchnama uámana luare jashjáchama. <sup>9</sup> Y chca, cabá endmēna canýe uámana luare ndayentše Bēngbe Bētsabe entsānga mochjobenaye cháftaca jóchnama, ntšamo Bēngbe Bētsá tojanochnacá, chē quem luare jamama nyetsca trabajēnga tojanpochocá ora; <sup>10</sup> er nda tojashjache chē Bēngbe Bētsáftaca jóchnama uámana luaroye jashjanguama, cha jóchnana chē Bēngbe Bētsá tbojanmandá jamama trabajēngama, ntšamo Bēngbe Bētsá tojanochnacá, chē

quem luare jamama nyetsca trabajenga tojanpochocá ora. <sup>11</sup> Chíyeca, šontsamna lempe ntšamo tmojobenacá jamana chë jóchnama uámana luare jéftsashjáchama, ntšamo chë Bëngbe Bëtsábioye ndoñe tmonjanoyeunangcá ndocná chaondétsamama, y chë causa chënga chë soye ndoñe tmonjéftsashjache.

<sup>12</sup> Er Bëngbe Bëtsabe palabra endmëna mo canye aina soycá, nyets tempo entsángbioye ndayánaca jtsabuátambayana, y bëtscá jamana corente obenánaca, y ndocna te nye bonamente chë palabra jóyebuambayana. Mo chë nyets utoicajana más efšana espadëjaquécá, jobenayana puerte jashenoye jatëtšana canye cuerpo tcojatëtše ora, cachcá y cabá puerte más Bëngbe Bëtsabe palábraca, cha bënga jinýanýiyana ntšamo bënga nye bëngbe ainaniñe tmojtsejuabná y tmojtsebošcá, y chë ndocnábioye tmonjinýinyé sóynaca; y chë palábraca cha endobena jáuyanana ntšamo bënga tmojajuabó y tmojabošencá aíñe o ndoñe tšabá bëtsemnana. <sup>13</sup> Ntšamo Bëngbe Bëtsá tojamentšana tondaye quenátopodena chabiamana iytëmenana jtsemnana. Bëngbe Bëtsá lempe bominye iuetsequëcñá, y nyetsca soyëngama y nyetscangbiama lempe yotátšëmbo; Bëngbe Bëtsá, ndábioye šojtsamna sempre jojuana ndáyeca canye soye chca tmojamama.

*Jesús endmëna chë más uámana bachnangbe bëts amëndayá*

<sup>14</sup> Jesús, Bëngbe Bëtsabe Uaquiñá celoye tojámashëngo, y mora cha endmëna nda chabe delante sempre bëngbiama ibuétseimpadana, mo chë bachnangbe canye más uámana amëndayacá. Chíyeca, bënga šontsamna sempre chábeñe jtsošbuáchiyana, ntšamo bëngbe ndegombre ošbuáchiyana yomncá, chë ndayama bënga nyetsca entsángbeñe tmojayana. <sup>15</sup> Er chë bëngbiama impadaná, mo bachnangbe canye más uámana bëngbe amëndayacá, Jesús, yobena bëngbiama jóngmiana, bënga inye ora ndoñe yapa obenana tmontsebomna ora, tšabe soye o ndaye sóynaca jamama. Chca endmëna, er Satanás tša yojsentšena Jesúsbioye ba juabnënga chabotsontšáshjajuanama, jayénjanama bacna soye chaomama, nyetsca juabnënga ntšamo béngnaca mondbetsebomncá, pero Jesús ndocna te ndocna bacna soye tonjéftsema. <sup>16</sup> As, ndauatjcá Bëngbe Bëtsá mochjótšëmbona, mo chábioye cuaftsobecocnangcá; cha canye uámana tbemaniñe yojssetbemana canye bëts reycá; chca mochjama, bënga chášualastemama, y bëngbiama tšabe juabna jtsebomnëse, chašújabuachama bënga chca chašojtséjaboto ora.

## 5

<sup>1</sup> Ndëmuanye bachnangbe más uámana amëndayánaca jtsemnana entsánguentšana bocacaná, y uabuayaná chëngbe cuenta Bëngbe Bëtsá jaserviama, chábioye juatšëmbonama y bayënga jobáyama Bëngbe Bëtsá jëtshuayama, chca, Bëngbe Bëtsá chë bacna soyënga entsánga tmojamama cháuperdonama. <sup>2</sup> Chë bachna jtsoobenana jóngmiana, chë bacna soyënga amëngbiama chama ntsetatšëmbcá, y chë bacna soyënga jamama ingñëñënga imomnënga, mo otšëñëngcá imomnëngbiama, er cachánaca inye ora ndoñe yapa obenana ntsebomnana, chë bacna soyënga jamama juabnëngama jtocochbuáchama. <sup>3</sup> Y chíyeca cha jtsemnana bayënga jobáyama Bëngbe Bëtsá juatšëmbonama, ndoñe nye entsángbioye bacna soyëngama cháuperdonama, ndayá chábioye chaboperdonámnaca. <sup>4</sup> Ndocná quenátobena cachá quem uámana trabajo jentšetayana, bachnangbe más uámana amëndayá jtsemnana; cha jtsemnana, Bëngbe Bëtsábeyeca uabuayaná chca uámana trabajo jamama, ntšamo ndegombre Aarónoftaca tempo cha tojanmcá. <sup>5</sup> Cachcá, Cristo ndoñe cachá tonjanenábuayana jtsemnana chë Bëngbe Bëtsabe delante sempre bëngbiama impadaná, mo bachnangbe canye más uámana amëndayacá, ndayá Bëngbe Bëtsá tbojanábuayana chë uámana trabajo jtsebomnana. Cha endmëna nda Jesúsbioye mëntšá tbojanianana:

Aca atšbe Uaquiñá condmëna.

Mënté entsánga sënjinýanyé aca atšbe Uaquiñá comnana ca.

<sup>6</sup> Y ínycnaca, Bëngbe Bëtsabe uabemana palabrënguiñe mëntšá tbojanianana:

Aca nyetsca tescama canye bachna condmëna,

canÿe bëts bachna ntšamo Melquisedec yojamncá ca.

<sup>7</sup> Jesús quem luarentše yojëftsienëntscuana, cha juayebuáchëse y shëchbuíyeca Bëngbe Bëtsáftaca ibnécuentaye y ibnaimpadana, cha chë jobanámentšana jatsbocama yojanobená; y Jesús ntšamo Bëngbe Bëtsá yojanbošcá tojánmayeca y tša respeto chabiama bómnayeca, chábioye tbojanoyeuná. <sup>8</sup> Chca, Cristo masque Bëngbe Bëtsabe Uaquiñá inamna, jasúfriase tojaná bouinÿe ntšamo jamana ndayá Bëngbe Bëtsá tojtsebošcá. <sup>9</sup> Chca, Bëngbe Bëtsá chábioye tbojánbema lempe ntšamo entšanga tmojtsajabotcá, nda chëngbe bacna soyëngama cháuatsebacama; chentšana cha, Cristo, tojanma lempe ntšamo yojaniycá, nÿetscanga chë entšanga chábioye imojánëyeunanënga chamotsobename nÿetsca tescama atsebácanënga jtsemnama; <sup>10</sup> y Bëngbe Bëtsá tbojanábuayana, chë chabe delante sempre bëngbiama impadaná, mo bachnangbe canÿe más uámana amëndayacá chaotsemnama, canÿe bëts bachna ntšamo Melquisedec yojamncá.

### *Resjo endmëna, ošbuáchiyana jtsajbanana*

<sup>11</sup> Bëtscá entsemna quem palabrama jóyebuambayama, pero chë soyënga jayanama ntšamo tšëngaftanga catafjosertaycá, ndoñe paselo quenátsmëna, er tšëngaftangna nÿa uenana Bëngbe Bëtsabe soyëngama jósertana. <sup>12</sup> Tšëngaftanga ya bayté Jesucristbe soyëngama šmotátšëmboyeca, tšëngaftanga cmontsamna ya jtsobenana ínÿengbioye chë soyënga jtsabuátambayana; pero tšëngaftanga cmontsëjamoto ndánaca Bëngbe Bëtsabe soyëngama cachiñe chacmëtëtabuayená, chë jtsošbuáchiyama šmojontšé ora natsana jshauatsjínÿana soyëngama. Y chca, tšëngaftanga šmojobiama mo šëšonatëmëngcá, jtsëjabótana létšiyë jofšiyana y ndoñe jobenayana jasana chë jabmuánama ndoñe paselo tontsemna soyënga. <sup>13</sup> Chë nÿetsca soyënguiñe ntšamo tšabá yomncá jtsamama buatëmbana soyënga ndoñe tontsabuatmá cha, jtsemnana mo canÿe šëšonatëmcá, nda vida jtsebomnana nÿe létšiyë jtseftmanëse. <sup>14</sup> Pero chë tmojtsobena jajuaboyana y jtsetatšëmbuana ndayá tšabá yomna o ndayá ndoñe tšabá jamama, chca jtsamëse tmoyenamna, chënga jtsemnana mo bëtsëtsangcá, ndëmuanÿenga ndayánaca jasana, chë ndoñe paselo jabmuánama soyëngnaca.

## 6

<sup>1</sup> Chcasna, bënga šontsamna jtsajbanana nÿe jésebošana jtsatsjëndayana Cristbe buatëmbana soyënga, chë bënga chábeñe jtsošbuáchiyama tmojanontšé ora tmojanatšjinÿe soyënga, y šontsamna jtsatsjëndayana chabiama nÿetsca soyënga, más totcá josértama yomna soyënga. Chca, bënga mochántsemna mo chë bëtsëtsangcá, ndayánaca jtsesayana. Ndoñe más nÿe chë natsana buatëmbana soyëngama mattatsjëndaye, mo chë ndayá yomna bacna soyënga jtsamana y chë bënga ndoñe vida ntsebomnana junatsana soyënga amana jtsajbanana, y chë tšabe benache jtishachana; o ntšamo Bëngbe Bëtsábeñe jtsošbuáchiyana; <sup>2</sup> chë juabáyana ndayá yomna; chë ínÿabe bestšašiniñe cucuatšënga jacjayana Bëngbe Bëtsábioye chabiama jaimpádama; chë obanënga jtayenama Bëngbe Bëtsá yochjamama; y mocna ora ntšamo entšanga tmojamama Bëngbe Bëtsá yochjayanama, chënga chë nÿetsca tescama yomna tšabe vida chamotsebomnana o nÿetsca tescama castigánënga chamotsemnama. <sup>3</sup> Y bënga chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašojálesenciase.

<sup>4</sup> Ndëmuanÿenga, canÿe ya chë Bëngbe Bëtsabe ndegombre soyënga tmojanóyëngacñe, y chë Bëngbe Bëtsabe ba tšabe soyëngnaca, chábenga bëtsemnama, y chë Uámana Espíritu chëngbe ainaniñe chaotsemándama imobomna, <sup>5</sup> y chë Bëngbe Bëtsá ntšamo tojašebuachenacá sempre inétsamama tmojinÿe, y ndëmuanÿenga tmojáninÿe Cristo jtsamana bëts soyënga chabe bëts obenánaca, chë ndaye obenánaca cha puerta bëts soyënga yochjama cha quem luaroye yochjésabo ora, <sup>6</sup> chënga Jesucristbeñe ošbuáchiyana lempe tmojtsajbanase, tondaye quenátsmëna ndayá jamama cachiñe Bëngbe Bëtsábioye jtobéconama; er Bëngbe Bëtsabe Uaquiñá chca stëtšoye jaquédana, y jtsemnana mo Bëngbe Bëtsabe Uaquiñábioye cachiñe chënga tmojtsecrucificacá, y



entsānga cachiñe cha chamotsáboyejuanama chēnga cuafjamcá. <sup>7</sup> Šmochjinjye: fshantse jamana chē ba uaftēnēnga chiñe chaómashēnguama, y chē chiñe trabájayēngbiama bētscá jaja sananga tojóboecnēse, Bēngbe Bētsá jamana, chē fshantsentsāna bētscá tšabe soyēnga entsāngbiama chaotsebínynama. <sup>8</sup> Pero nje uchmašēshangá y matēnga uchmēfjangaca chiñe tojuábocnēse, chē fshantse tondaye ntsámanana; y nderado Bēngbe Bētsá nanjama chiñe ndocna tšabe mata chaonduábocnama, y cabana, entsānga chiñe mochantsashaniñá. Cachcá, chē ošbuáchiyana tmojtsajbananga castigānēnga mochántsemna.

*Bēngbe Bētsábeñe sempre chamotsobátmanama y ainaniñe bētscá añemo chamotsebomnama*

<sup>9</sup> Pero masque chca montsoyebuambná, atšbe bonshánēnga, bēnga tšabá fsēndétatšēmo tšēngaftangbeñe chē más tšabe soyēnga echántsemna, chē atsbočaná jtsemnama tojtsá cha yobomna soyēnga. <sup>10</sup> Er Bēngbe Bētsá sempre ntšamo tšabá yomncá nyetsca soyēnguiñe jtsamana, cha ndegombre echántsejuabnaye ndayá tšēngaftanga šmojamama, y chē chabiama šmojinjñyé bonshánama, chabe entsāngbioye jtsējabuáchanēse, ntšamo mórncá šmojtsama. <sup>11</sup> Pero bēnga fsēntseboše, cada ona tšēngaftanguentšá, nyets tempo y Jesús chaojésabēntscuana chaotsinjanyná corente yoboše chca jtsamama, Bēngbe Bētsábeñe chca jtsošbuáchiyēse, chábeñe sempre chašmotsobátmanama, tšēngaftangbe tšabiama cha chaomama. <sup>12</sup> Ndoñe queftsátsboše tšēngaftanga oyēnjayēnga chašmotsobiama chē Bēngbe Bētsá tcmojabanyé trabajo jtsamama, ndayá Jesucristbeñe ošbuáchiyana bomnēngcá y padecena soyēnguiñe uantado mēnēngcá šmochtsama. Chca, chēnga mochanjójyēngacñe ndayá Bēngbe Bētsá jatšatayama tojašebuachenacá, chabe entsānga bētsemnama.

<sup>13</sup> Bēngbe Bētsá Abrahámioye tbojanšbuachená ora, chca tbojaníyana cachabe uabaina jayanēse, er inya chabiama más uamaná ndoñe yontsemna ndabiama jajúrama, ntšamo tbojanšbuachenacá ndegombre chaotsemnama; <sup>14</sup> cha mēntšá tbojanšbuachená: “Aíñe, atše chanjama aca bētscá tšabe bendicionēnga chacotsebomnama, y chanjama acbentša pamillentšana mallajta entsānga chamotsemnama ca.” <sup>15</sup> Y chca, Abraham Bēngbe Bētsábeñe jtsošbuáchiyēse, puerte uantadiñe yojanobátmana ntšamo tbojanšbuachenacá Bēngbe Bētsá yochjanmama, y pronto chca tojanójyēngacñe.

<sup>16</sup> Entšānga tmojajurá ora, chca jamana chēngbiama canye puerte más uámanabe uabaina jayanēse, y chca chēngbiama más uamanabiama tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más ntjatenátsētsnayana. <sup>17</sup> Y chca, Bēngbe Bētsá tojánbošena botamana jinjanjñiyana, ntšamo cha tojanašebuachenacá mochjanoyēngacñēngbioye, ntšamo tojanašebuachenacá cha ndegombre yochjanmama, y ndocna te chē ntšamo jamama yojanjuabnacá yochjantrócama. Chíyeca, botamana tojaninjanjñyé cha chca yochjanmana, cachabiama jajúrase, chē ntšamo tojanašebuachenacá yochjanmama ndegombre bētsemnama. <sup>18</sup> Bēngbe Bētsábeñe šbuachenana soye y chama jinjanjñiyama ntšamo tojanayancá, ntšamo tojanašebuachenacá ndegombre yochjanmama, chē uta soye ndocná ntsobenana jatrócama; y chca tojayana ora, ndoñe ntso podénana Bēngbe Bētsá chaobená jobostérama. Y chca, chē uta soyama, bēnga bētscá añemo ainaniñe jójyēngacñana, bēnga chē Bēngbe Bētsábioye tmojobéconanga, cha chásuatsebacama y chašotsanjenama, mo canye bēts resjuentšana tmojtsachetēngcá, ntšamo chentšana atsebácanēnga jtsemnama cuaftsenaguacá. Bēngbe Bētsá šojáuyana bēnga imojtsobena chábeñe jtsobátmanama ca, y bēts añémoca chábeñe jtsošbuáchiyēse, cha yejuana šochtsanjenama mondobátmana. <sup>19</sup> Mo ntšamo chē bējaye asentoca cuedádoca tcojajajo anclama, chē barcuñe enjaquenēnga tšabá jtsetatšēmbuana chē barco ndoñe yochántsashatiyiyana, cachcá bēngnaca, Bēngbe Bētsábeñe imobátmanama, montsobena ainanoca jtsetatšēmbuana lempe tšabá yotsomñama. Bēnga Jesucristbeñe mondobátmana, y Bēngbe Bētsá yojtsemnoye celoca cha tojámashēngo y chabe delante entsemna mo chē bachnangbe más uámana amēndayacá. Chana jamashēnguana chē Bēngbe Bētsábeñe bēts yebnoca, “chē más

uámana ca” uabaina luaroye, entséjua ujonýana stëtsoica, Bëngbe Bëtsabe delante jtsemnama, <sup>20</sup> ndayentše Jesús celoca, Bëngbe Bëtsabe delante tojámashëngo bëngbe tšabiana soyënga jamama, béngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nyetsca tescama, canýe bëts bachna ntšamo Melquisedec yojamncá.

## 7

*Jesús, canýe bëts bachna ntšamo Melquisedec yojamncá*

<sup>1</sup> Quem Melquisedec yojamna Salem puebloca rey y bachna chë celoca Bëngbe Bëtsabiana; Bëngbe Bëtsá, chë nyetscangbiana más uamaná. Abraham chë reyënga y chëngbe soldadéngaftaca imojentsjaná y tojanayënjáná chentšana yojsatabó ora, Melquisedec tojánbocna cha jajëbenguama, y chora Bëngbe Bëtsábioye tbojanimpadá, Abraham bëtscá tšabe bendicionënga chaotsebomnama chaomama. <sup>2</sup> Chora Abraham chábioye tbojanatšetá, chë reyëngaftaca imojentsjaná ora, lempe tojanosháchiñentšana, bnétsanentšana canýe soye. Chë palabra Melquisedec endayana “nyetsca soyënguine tšabá ama rey ca”; y chánaca yojamna Salem puebloca rey, y chca endayana “nyetscanga natjëmbana chamotsiyenama ama rey ca”. <sup>3</sup> Chabe pamílangbiana tondaye quenátótatšëmbo; chca cha endmëna mo ni taitá ni mamá ndoñe endbomnacá, ni bëts taitanga. Tondaye quenátótatšëmbo ntseco tojanonýnama, ni ntseco tojanóbanama; chca, inýe soyënguine cha yojamna mo Bëngbe Bëtsabe Uaquiñacá, y endmëna mo nyetsca tescama bachna cuaftsemncá.

<sup>4</sup> Y mora, šmochjajúaboye tša uamaná Melquisedec inamnana, er bëngbe tempsca uámana bëts taitá Abraham chábioye tbojanatšetá, chë reyëngaftaca imojentsjaná ora lempe tojanosháchiñentšana bnétsanentšana canýe soye. <sup>5</sup> Ntšamo Moisesbe leyiñe endëmandacá, chë bachnangbe más uámana amëndayá Leví, Aarónëna ca uabainabe pamillentšana tmomna bachnanga, jtsamnana chë Israeloca entsángbioye nyetsca chë tmobomna soyënguentšana bnétsanentšana canýe soye jtsayëngacayana; y chca jtsamnana masque chë entsanga cachëngbe pamillentšënga tmomna y Abrahámbentšana pamillentšëngnaca. <sup>6</sup> Pero Melquisedec, masque Aaronbe pamillentšá ndoñe yonjamna, Abraham, chë ntšamo Bëngbe Bëtsá tbojanšbuachenacá tojanóyëngacñabentšana, cha tojanóyëngacñe nyetsca soyënguentšana bnétsanentšana canýe soye, y Bëngbe Bëtsábioye tbojanimpadá, Abraham bëtscá tšabe bendicionënga chaotsebomnama chaomama. <sup>7</sup> Y ndocná quenátobena jayanama ndoñe ndegombre yondmëna ca, chë Bëngbe Bëtsábioye impadaná inýabiana tšabe soyënga chaomama, más uamaná inëtsemna chë chca tojóyëngacñabiana, inýa chabiana Bëngbe Bëtsábioye tbojaimpadá ora. <sup>8</sup> Quem tempo, bachnanga mochjóbanënga, entsángbioye jtsayëngacayana nyetsca chë tmobomna soyënguentšana bnétsanentšana canýe soye, pero chë Bëngbe Bëtsabe uabemana palabra, Melquisedecbiana endoyebuambná cha mo canýa cabá ainá totsomñcá. <sup>9</sup> Y bënga montsobena jayanama, Abraham Melquisedécbioye chë nyetsca soyënguentšana bnétsanentšana canýe soye tbojanoyé ora, yojamna mo Leví, chë nyetscángbioye nyetsca soyënguentšana bnétsanentšana canýe soye ayëngacayá, Melquisedécbioye chca cuaftopagacá; <sup>10</sup> er cha Abrahambe pamillentšá inamna. Melquisedec yojsatabó ora y chábioye chë lempe tojanosháchiñentšana bnétsanentšana canýe soye Abraham tbojanatšetá ora, yojamna mo nyetscanga, chë Abrahámbentšana entsanga más chcoye mochtsaniyenënga, chëngnaca chë bnétsanentšana canýe soye cuafjajajocá, masque Abraham chca tojanma ora, Leví y chë Abrahámbentšana inýe entsanga cabá ndoñe tmonjanonýná.

<sup>11</sup> Israeloca entsanga Moisesbe ley tmojanáyëngaca, chë bëts taitá Levibe pamillentšënga bachnanga imojamnënga Bëngbe Bëtsá imojtseservena ora, y chënga monjamna Aarónbentšana entsanga. Ntšamo chë leyiñe yomandancá imojánamënga

perdonánënga jtsemnama y Bëngbe Bëtsabe bominjïine tšábënga jtsemnama quem bachnanga jamama matmënjanobenase, ndoñe manjanëyta Bëngbe Bëtsá inye bachna chabuatschembuama, nda ndoñe yonjamna mo chë bëts bachna Aaroncá, ndayá ntšamo chë bëts bachna Melquisedec yojamncá. <sup>12</sup> Er, canye bachnanga Bëngbe Bëtsábïoye jtseservénama tmojabaná y inye bachnanga chábioye jaserviama tmojatontsé ora, jtseytana chë natsana bachnanga imojanoservena ora mándaye leyéngnaca jtsetrócama. <sup>13</sup> Bëngbe Utabná, ndabiama quem soyënga jtsóyebuambnayana, ndoñe Aaronbe pamillentsá quenjatsmëna, ndayá inye pamillentsá, y quem pamillentsá entsanga ndocna te bachnangcá Bëngbe Bëtsá tmonjanservé, chë altar ndirichiñe Bëngbe Bëtsabe bëts yebnoca. <sup>14</sup> Er nyetscanga mondétatšëmbo Bëngbe Utabná Judabe pamillentsana bëtsemnama, y chë pamillama Moisés ndocá tonjánayana, Bëngbe Bëtsá mo bachnangcá chënga jtseservénama.

<sup>15</sup> Y ntšamo tmojayancá montsobena más tšabá josértana, er chë tsëm bachna Cristo yojamna canya mo Melquisedec yojamncá. <sup>16</sup> Cha bachna yojamna, ndoñe chë bachnanga chabe pamillentsana jabocanama yojánamnama canye ley tojánayanayeca, ndayá nyetsca tescama jëftsiyenama cha inobénayeca. <sup>17</sup> Er mëntšá endmëna, ndayá Bëngbe Bëtsá chabiama tojánayana:

Aca bachna nyetsca tescama condmëna,

canye bëts bachna ntšamo Melquisedec yojamncá ca.

<sup>18</sup> Cha tojánabo ora, Bëngbe Bëtsá tojanma chë nda bachna jtsemnama y ntšamo joserviama mandënga chaotsopochocama, er chë mandënga ndoñe ntjobenayana entsanga jujabuáchama atsebácanënga jtsemnama, y chca, chëngbïama ndoñe bëtscá yonjanoservena. <sup>19</sup> Er Moisesbe léyeca, entsanga ndoñe tmonjanobená Bëngbe Bëtsabe bominjïine tšábënga jtsemnama, pero mora chama canye corente más uámana soye montsebmoma: Jesucristbeñe jtsošbuáchiyëse, chábeñe montsobátmana Bëngbe Bëtsáf-taca tšábënga chásuabiamama, y chca, Bëngbe Bëtsábïoye bënga jtobéconama.

<sup>20</sup> Y Bëngbe Bëtsá lempe chca tojanma, cachabiama jajúrase, lempe ntšamo cha tojanayancá ndegombre chaotsemnama. Chë inye bachnanga, chë Aaronbe pamillentséngbïoye tmojanëbuáyana ora, Bëngbe Bëtsá ndoñe chca tonjánayana, <sup>21</sup> pero mo bachnëcá chaoservema Bëngbe Utabnábioye tbojanábuayana ora aíñe; cach Bëngbe Bëtsabiama jajúrase, Bëngbe Utabná canye bachna yochtsemna ca tojánayana. Ntšamo Bëngbe Bëtsabe uabemana palabrenguiñe endayancá:

Bëngbe Utabná Bëngbe Bëtsá, Jesucristbioye tbojanayana, cachabiama jajúrase, ntšamo tojanayancá ndegombre chaotsemnama,

y juabna ndoñe ntjatrócama:

“Aca bachna nyetsca tescama condmëna ca.”

<sup>22</sup> Bëngbe Bëtsá chca tojánayanama, Jesúsbeyeca bënga corente mondétatšëmbo, ndayá Bëngbe Bëtsá bëngbïama jamama tojanašebuachenacá, chë Jesúsbioye bëngbe bachna chaotsemnama juabuáyanana, más tšabá yojtsemna chë ndayá tempo cha chabe entsangbïama tojanašebuachená soyama. <sup>23</sup> Chë inye bachnanga banga imojamna, er ndocná yonjanobena Bëngbe Bëtsábïoye nyetsca tescama chca jtseservénana; cada ona básefta uatëngama tojëftsanoservé, tojanóbana y ínjabioye chë trabajo jatontšabuáchana. <sup>24</sup> Pero Jesús ndocna te ntjobanámayecna, cha mo bachnëcá Bëngbe Bëtsábïoye nyetsca tescama bochjëftsoservena, y ndocna te chabe trabajo ínjabioye bochanjëftsinyinïyie, chë inya cachcá jtsamama chauatontšema. <sup>25</sup> Chiyeca, cha yobena nyetsca tescama jätsebacana ndëmuanyënga chábeyeca Bëngbe Bëtsábïoye tmojobeconá, er nyetsca tescama cha echanjëftsiyena Bëngbe Bëtsábïoye chëngbïama jtseimpadánama.

<sup>26</sup> Chcasna, Jesús ndegombre endmëna lempe ntšamo bënga imuajabotcá nda Bëngbe Bëtsábïoye bëngbïama chabotseimpadánama, mo chë bëngbe bachnangbe más uámana amëndayacá. Cha sempre uamaná endmëna, ndocna te ni mo canye juabna ínjabo

contra yonjábomna, ainaniñe ndocna bacna juabna yonjábomna, chë bacna soyënga amënguentšana luaroca mëná, y Bëngbe Bëtsá tojanma celoca más bëtsá y obená nyetscangbiamá cha chaotsemnama. <sup>27</sup> Cha ndoñe bonjanájaboto canye te y inye te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entšanga tmojanmámna, mo chë inye bachnangbe más uámana amëndayënga mondbetsamcá, cachëngbiamá y chë judiëngbiámna. Cha tojanma lempe ntšamo yojaniycá canye soye y nyetsca tescama, entšanga bacna soyënga tmojanmama perdonánënga chamotsemnama. Cha chca tojanma, chabe derecho vida jtsobomñama cachcá tojanonýná ora; y tojanóbana entšanga chamotsobenama perdonánënga jtsemnama. <sup>28</sup> Ntšamo Moisesbe leyinë yojanmandacá, chëngbiamá mo chë bachnangbe más uámana amëndayëngcá tmojanëbuáyana entšanga inye ora bacna soye amënga; pero Bëngbe Bëtsá cabá chë ley entšangbe cucuatšinë tojanáboshjonentšana baytese, cha chabe Uaquiñábioye chë bachnangbe más uámana amëndayacá tbojanábuayana, cachabiamá jajúrase, ntšamo tojanayancá ndegombre chaotsemnama. Bëngbe Bëtsá tojanma chë Uaquiñá chaotsemnama lempe ntšamo entšanga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabnënga ndbomná.

## 8

*Cristo, nda jóbanëse tojanma entšanga Bëngbe Bëtsáftaca mo canyácá chamotsemnama*

<sup>1</sup> Chë más uámana soye ndayama bënga montsichamo, chë Cristo mo bachnëcá yomnama montsoyëbuambná ora, entsemna: Bënga chábeñe imojtsebomna canya nyetsca tescama Bëngbe Bëtsabe delante bëngbiamá impadaná, mo chë bëngbe bachnangbe más uámana amëndayacá, Bëngbe Bëtsabe catšbioica yojtsetbemana jtsemándayama, y Bëngbe Bëtsá chë más uámana tbemanentše. <sup>2</sup> Chë inye bachnanga Bëngbe Bëtsabe bëts yebnentše tmojánamashjna chë “más uámana ca” uabaina luaroye, Bëngbe Bëtsabe delante jtsemnama; pero chë luare celoca ndayentše nyets tempo Cristo mo chë bachnangbe más uámana amëndayacá yoservená, entšanga ndoñe chca tmonjanpormá, ndayá Bëngbe Bëtsá.

<sup>3</sup> Nyetscanga chë bachnangbe más uámana amëndayënga tmojanëbuáyana, entšangbiamá soyënga y tmojóba bayënga Bëngbe Bëtsábioye juatšëmbonama, chëngbe bacna soyëngama perdonánënga chamotsemnama; chíyeca, jtseytana Jesucristo ndayánaca chaotsebomnama, Bëngbe Bëtsábioye juatšëmbonama. <sup>4</sup> Cha quem luarentše tojtsetrabájase, cha ni mo bachna ndoñe nántsemna, er muentše ba bachnanga mondmëna, y chënga ba soyënga jamana Bëngbe Bëtsábioye jëtschuayama, ntšamo jamama Moisesbe leyinë yomandancá. Y chca, ndoñe nantseyta cha chca chauatoservënama. <sup>5</sup> Chë inye bachnanga imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoservená, ndoñe cachcá yontsemna chë ndayentše Jesucristo celoca yoservená luarcá, ni ntšamo cha yoservencá; nye batšatema bëngbioye šuinýanýná ntšamo chë celoca luare yomnama, ndayentše Cristo mo bachnëcá yoservená. Y bënga mondtatšëmbo quem luarentše chë soyënga chca yomnama, er chë Bëngbe Bëtsábioye jadórama yebna, chë jatsjacama opodena yebna Moisés japórmama ora, Bëngbe Bëtsá mëntšá tbojanianá: “Cuedado cochtsebomna chë atšbiamá yebniñe nyetsca soyënga jamama, ntšamo tcbonjaninýinýecá chacomama, chë tjoca bonjamna ora ca.” <sup>6</sup> Pero bëngbe bachnangbe más uámana amëndayá Cristo, tojashjache canye más bëts trabajo jtsebomnama, ntšamo chë inye bachnanga imobomna trabajuama; cachcá, ndayá Bëngbe Bëtsá tojayancá Crístoftaca bëngbiamá jamama, bënga tempcá tšabá Bëngbe Bëtsáftaca jtsemnama jtsamëse, puerte más tšabá endmëna, chë ndayá tempo chabe entšangbiamá jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyënga bëngbiamá jamama.

<sup>7</sup> Chë Bëngbe Bëtsá natsana tojanašebuachená soyëngaca matënjanopodé entšanga chamotsamama ntšamo yojanamncá, ntšamo tojanašebuachená jýyëngacñama, as

ndoñe manjanëyta Bëngbe Bëtsá cachiñe canye trato chauátsbemama entšangbiamama.  
<sup>8</sup> Pero Bëngbe Bëtsá tojáninye ntšamo yojanamncá entšanga ndoñe tmonjanmama, ntšamo cha tojanašebuachenacá jýyëngacñama, y Bëngbe Utabná Bëngbe Bëtsá chëngbiamama mëntšá tojánayana:

Canye tempo echanjóshjango, y chora Israel y Judabe pamillentša entšangbiamama básefta soyënga jamama chanjašebuachená, chënga átšeftaca tempcá tšabá jtsemnama chamotsobenama.

<sup>9</sup> Chë chanjašebuachená soye ndoñe queochátsmëna cachcá ntšamo chë chëngbe bëts taitanga sënjanašebuachená soye enjamncá, atše chënga sënjanënatse ora, Egiptó luarocana sënjesanëbuacna ora; pero chëngna, ntšamo jamama enjanamncá, chë sënjanašebuachená soye jýyëngacñama ndoñe chemátanma causa,

atše cachcá chënga sënjesanënyaye ca, Bëngbe Utabná tojánayana.

<sup>10</sup> Chë Israeloca entšangbiamama ndayá jamama canye tempo chentšana chanjašebuachená soye,

mëntšá entsemna ca, Bëngbe Utabná tojánayana:

Atše chanjama chë chëngbe juabniñe chaitsemánda soyama chënga chamotsejuabnama, y chamotseboše jtsamana ndayá chëngbe ainaniñe chaitsemánda soye.

Atše chëngbe Bëtsá chántsemna, y chënga atšbe entšanga.

<sup>11</sup> Chë tempo ndoñe queochátsiyta cányënga ínnyënga chamotsabuátambama, cachabe luariñe oyanábioye o cachabe pamillentša entšábioye, atše chë chëngbe Utabná chašmotsábuatmama.

Ndoñe queochátsëyta, er nyetscanga uámanënga y nduámanënga, corente tšabá atšbe šmochantsábuatma.

<sup>12</sup> Chënga chanjálastemaye y chëngbe bacna soyëngama chanjáperdonaye, y ndocna te más chë bacna soyënga chënga tmojamama quichátsjuabnaye ca —cha tojánayana.

<sup>13</sup> Bëngbe Bëtsá, chë entšangbiamama mora jamama tojášebuachenama tojtsichamo ora, chca jtsemnana, er cha tojama chë tempo entšangbiamama jamama tojanašebuachená soye, mora ya ndoñe chaondëtoservénama; ndayá mo tanguá soycá tojtsemna y ya ndoñe tontsoservena, chë soyna nyë batšatema más y ya jtsopochócana.

## 9

### *Bëngbe Bëtsá jadórama muentša luare y chë celoca luare*

<sup>1</sup> Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jtsadoránama, y nya chabiamama pormana yebnentše quem luarentše. <sup>2</sup> Chíyeca, Bëngbe Bëtsá tojanmandá chaotsemna canye jatsjacama opodena yebna chábioye jadórama, mëntšá: Chë natsana tsañe quem Bëngbe Bëtsabiamama yebnentše inauabaina “chë uámana luare ca”; chentše inamna chë canyësefta quinyenëfjuangá castellano candelerešiniñe, y canye mesésha ndayiñe yojacjana chë luarentše Bëngbe Bëtsá bëtsemnama inyinynaye tandëšënga.

<sup>3</sup> Inye ujonnyana entšëjua chentšana, inye luare inamna; inauabaina “chë más uámana luare ca”. <sup>4</sup> Chentše inamna chë castellano altar, incienso jajuinnyiyama, y chë cajontema nyetsiñe castellánoca pormánëtema. Quem cajontema yojaninnyanyná ntšamo Bëngbe Bëtsá tojanašebuachenacá, chë Israeloca entšanga chabe uámana entšanga yochjánabiamama, y inauabaina “Bëngbe Bëtsabe šbuachenana soye inyinynaye cajontema ca”; y chë tsoye quem soyënga inabomna: canye castellano jarrëtema, maná ca uabaina tandëseca, chë Bëngbe Bëtsá tojanma celocana chabe entšangbiamama chaótsatšama saná; Aaronbe varëfja, chë tojanantšëfjonëfja; y chë ndëtšbé tablëbenga ndayiñe Bëngbe Bëtsá tojanábema chë bnëtsana uámana mandënga. <sup>5</sup> Chë cajontema juatsboca innamna chë juatëngmiáša uabomnënga, mo angelëngcá, “querubinënga ca” uabáinënga, y chënga imojaninnyanyná chë Bëngbe Bëtsabe buashinnyanana

chéntšnaca bétsemnama. Chènga, chë juatèngmiáshangaca chë cajontémentša nyets ústonëtema imojanétsbotsana; chë ústonëtema inauabaina “entsanga bacna soyènga tmojamama Bèngbe Bètsá perdonaye luare ca”, er chentše, chë cajontema juatsboca chë bachnangbe más uámana amëndayá jtsamanana buiñe jabuéscjana, chë Bèngbe Bètsábioye cha ibnaimpadana te, entsanga cháuaperdonama. Pero mora ndoñe quenátsiyta chë soyèngama lempe jatóyebuambnayama.

<sup>6</sup> Lempe chca tmojanprontantšana, chë bachnanga sempre chë natsana luaroye imojá-namashjuana, jamama ntšamo Bèngbe Bètsá tojanamëndacá, chábioye jadórama. <sup>7</sup> Pero nyè chë bachnangbe más uámana amëndayá yojobena chë inyè luaroye jamashènguana, y nyè canye cada uata. Choye jamashènguama orna, cha ibojamna bayèngbe buiñe juabuyambana, Bèngbe Bètsábioye juatsèmbonama, chca, chë bachnangbe más uámana amëndayá tojanma bacna soyènga Bèngbe Bètsá chaboperdonama, y chë ntsetatšëmbcá entsanga tmojanma bacna soyéngnaca. <sup>8</sup> Chca, chë Uámana Espiritu jamana bènga chašósertama, chë natsana luare cabá tojtsemnëntscuana y chë bachnanga cabá chë soyènga chentše tmojtsamëntscuana, nyetscanga cabá ndoñe tmonjanobená chë inyè luaroye jamashjnama, chë “más uámana luaroye”. <sup>9</sup> Chë soyéngaca jtsopodénana bèngbioye jinýanýiyana, chë tempo, chë Bèngbe Bètsábioye jadórama yebnentše entsanga uta luare imojábomna ora, ndoñe yonjopodena Bèngbe Bètsabe delante nyetscanga jatsmè-nana, mo chë bachnangbe más uámana amëndayacá. Y chë soyéngnaca jtsayanana, chë Bèngbe Bètsabiamama uátšëmbona soyéngaca y bachnanga tmojanóba bayéngaca, ndoñe tonjanopodé jamana canya Bèngbe Bètsábioye adorayá, Bèngbe Bètsáftaca tempcá tšabá chaotsatsmènama y Bèngbe Bètsá chabe bacna soyèngama tbojaperdonama ainaniñe corente chaotsetatšëmbuama. <sup>10</sup> Chènga, chë uátšëmbona soyéngaca y tmojanóba bayéngaca tmojanma nyè ntšamo Moisesbe leyiñe yojanayancá, ndayá chiñe yojanles-enciancá, ndayá jasama o jofšiyama, y chë cuerpo jabebiana mo tšabe entsangcá Bèngbe Bètsabe delante jtsatsmènama; nyetsca mandènga nyè cuerpama, pero ainanama tondaye ntjamana. Pero chë entsanga chca yojánamna jtsamana, nyè Bèngbe Bètsá inyè soyènga, más tšabe soyènga jamama tojamandantscuana, chë tsëm trato tojábema ora.

<sup>11</sup> Pero Cristo ya tojánabo, y cha yomna chë Bèngbe Bètsabe delante bèngbiamama impadaná mo chë bèngbe bachnangbe más uámana amëndayacá, chca, bèngbiamama chaotsemnama chë tšabe soyènga ntšamo mochjoyéngacñëcá. Chë luare celoca ndayentše cha Bèngbe Bètsabe delante mo bachnëcá yotrabája, puerte tšabe luare yomna, y chentše cha, ndoñe chë quem luarentše bachnanga imomnèngcá, cha yobena jamana lempe ntšamo Bèngbe Bètsá entsangbiamama jamama injuabnaycá. Chë luare ndoñe entsangbe cucuatšëca yondèpormana, y chca jtsayanana, quem luarentša soye ndoñe yondmèna ca. <sup>12</sup> Cha, canye y nyetsca tescama chë luaroye Bèngbe Bètsabe delante tojánamashèngo ora, cha ndoñe chivo o ternerbe buiñe tonjanabuyamba, ntšamo chë inyè bachnanga imojuamancá; ndayá jóbanëse, chabe buiñe juabuáshanëse, cha tojanma entsanga atsebácanënga jtsemnama chamotsobenama; y chca tojanmëse, cha tojanobená chë luaroye Bèngbe Bètsabe delante jamashènguama. Y Cristo chca choye tojanamashènguëse, tojanma bènga chë nyetsca tescama yomna tšabe vida jtsebomnama chamotsobenama.

<sup>13</sup> Ndëmuanýenga ndayámnaca chë leyama tmojanoquedá mo chë Bèngbe Bètsabe delante ndoñe tšabengcá, chë bachnanga imojuamana chéngbioye toronga y chivèngbe buiñe jabuéscacjana, y chë altaroca tcojajuinýe ternerabe jatinyá chéngbioye jat-bótotana, chca, chènga jábiamama Bèngbe Bètsabe delante mo tšabengcá. Chca tmojamentšana, chë bachnanga tmojánayana chènga imojtsobena chë ínýengaftaca jabama, Bèngbe Bètsá jadórama, y cachiñe mo tšabengcá Bèngbe Bètsabe delante imojtsatsmèna ca. <sup>14</sup> Ndayá bachnanga tmojanmcá yojánamana entsanga cachiñe mo tšabengcá Bèngbe Bètsabe delante imojtsatsmèna ca jayanama; y chca, chë ínýengaftaca Bèngbe Bètsábioye jadórama tmojanobenase, jntsachetšá más yojtsámana Cristbe buiñe,

ndémuanjeyeye tojanábuashana bēngbiamā cha tojanóbana ora! Chē njets tempo vida bomná Espíritbe obenánaca, Cristo, chabe derecho vida jtsobomñama cachcá tojanonjā y bēngbiamā tojanóbana. Cha, chē ndocna bacna soye ndbomná, tojanóbana ora yojamna mo canjē bayá tondaye ndbemaná chē bachnanga cuafjobacá juatšēmbonama, entšangbe bacna soyēngama; cachcá Cristo, chē ndocna bacna soye ndbomná, bēngbe bacna soyēngama jáperdonama tojanóbana. Bēngbiamā tojanóbanayeca, Cristo yobena jamama bēnga ainaniñe corente tšabá chamotsetátšēmo, bacna soyēnga bēnga tmojamama, chē ndoñe vida jtsebomnama bēnga junatsana soyēnga, chama bēnga perdonánēnga imojtsemnama, y chca, bēnga montsobena jtsiyenana, Bēngbe Bētsá, chē ndegombre ainá yomná, jtseservénese.

<sup>15</sup> Chiyeca, Cristo jóbānēse tojama entšanga Bēngbe Bētsáftaca cānyīñe mo canjācá chamotsemnama, ntšamo Bēngbe Bētsabe tsēm trato yomncá; y chca cha tojama, Bēngbe Bētsá chabe entšanga chamotsemnama tojáchembēnga perdonánēnga chamotsemnama, chē Bēngbe Bētsabe tempsca tratentša ley jtsocumplínama inamna ora imojoyenēntscuana bacna soyēnga tmojanmama; y chēngnaca chamotsobenama chē njetsca tescama mochtsebomna soyēnga jýēngacñama, ntšamo Bēngbe Bētsá chabe entšanga tojanašebuachenacá.

<sup>16</sup> Ntšamo canjē testamentiñe tojtsayancá chaopasamna, jtseytana chaotsótatšēmo chē chca jamama tojašbuachená cha tojóbanama. <sup>17</sup> Canjē testamento tondaye ntsámanana, chē chca jamama tojašbuachená cha cabá ainá totsomñēntscuana; nja cha tojóbanā orna aīñe. <sup>18</sup> Chiyeca chē Bēngbe Bētsabe natsana trato, entšángbeñe tojanobojatšé, chora tmojanóba bayēngbe buiñe jabuéscjese. <sup>19</sup> Moisés chē leyentša njetsca mandēnga njetsca entšanga tojánabuayenantšana, tojanca buángana boboshēshe y hisopo betiyentša buacuafja, chē ternerēnga y chivēngbe buiñe búyesheca enajuabñeyiñe tojanfchecuacuá, y chora chē leyēnga librēsañe tojanbuéscacja, y njetsca entšángbeñnaca. <sup>20</sup> Y mēntšá tojánayana: “Quem buiñe entsinjinyná, ntšamo Bēngbe Bētsá tojamandacá ndegombre yochtsemnama, y tšēngaftangbiamā puerte yochtsámanama ca.” <sup>21</sup> Moisésnaca buiñe tojanbuéscacja chē jatsjacama opodena yebniñe, y lempe chentša soyēnguiñe, chē ndaye soyēnga Bēngbe Bētsábioye jadórāma yojanoservena. <sup>22</sup> Er ntšamo leyiñe iuayancá, yojtsemna nja mo njetsca soyēnguiñe buiñe jabuéscacjana, Bēngbe Bētsábioye jadórāma tšabá chaoservema; y buiñe ndoñe tonjuábuashanēsna, ndoñe ntsopodénana entšanga bacna soyēngama perdonánēnga chamotsemnama.

*Cristo jasúfriase y jóbānēse, tojanma entšanga bacna soyēngama perdonánēnga chamotsemnama*

<sup>23</sup> Chiyeca jtseytana chē Bēngbe Bētsábioye quem luarentše jadórāma soyēnga, chē bachnanga chamoma, Bēngbe Bētsábioye jadórāma tšabá chaoservema, chē Bēngbe Bētsábioye jētschuayama tmojóba bayēngbe buiñeca. Chē soyēnga batšatema jtsinjanynayana ntšamo chē celoca luare yomnana Bēngbe Bētsabe delante, ndayentše Jesús yoservena. Lempe ntšamo chē Bēngbe Bētsábioye jadórāma luarentše yomncá, chabe delante celoca, Jesucristo tojanma, chábioye jadórāma tšabá chaoservema; pero chca tojanma más uámana soyēnga jamēse, chē tmojóba bayēngaca bachnanga quem luarentše innétsama soyēngama. <sup>24</sup> Er Cristo ndoñe tonjánamashēngo canjē luarentše Bēngbe Bētsá jadórāma nje entšangbe pormánentše, ndaye luare nje batšatema jtsinjanynayana ntšamo chē celoca luare Bēngbe Bētsabe delante chábioye jadórāma yomnana; ndayá cach celoye tojánamashēngo, Bēngbe Bētsabe delante luaroye, bēngbiamā jtseimpadánama. <sup>25</sup> Chē bachnangbe más uámana améndayana chē “más uámana luaroye” jamashēnguana canjē cada uata, bayēngbe buiñeca, ndoñe cachabe buiñeca, chca, ndayánaca jamama entšanga bacna soyēnga tmojamama perdonánēnga chamotsemnama. Pero Cristo chē luaroye celoca ndoñe tonjánamashēngo, chentšana jtēsebocnama, y chabe buiñe juabuáshanēse cachiñe jatóbanama, y ba soye cachcá chauétsemnama. <sup>26</sup> Chca tojtsemnēse, Cristbiamā manjanmēna jasúfriana y jóbānana ba soye, chē Bēngbe

Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canye y nyetsca tescama tojenonýinyé quem luarentša entšanga bacna soyënga jabuajuánama, chëngbiana jóbane, mo entšangbe bacna soyëngama canye tmojóba bayá, Bëngbe Bëtsábioye uatšëmbonacá. <sup>27</sup> Cachcá, ntšamo nyetsca entšanga jtsamnana nye canye jóbana, y chentšana Bëngbe Bëtsá chëngbiana jayanana chë imojëftsiyenëntscuana ntšamo tmojanmcá tšabá o ndoñe tšabá bëtsemnama, y chëngaftaca jamana ntšamo chora tojajuabocá, <sup>28</sup> cachcá, Crístnaca, nye canye chabe derecho vida jtsobomñama cachcá tojanonýá, chabe buiñe juabuáshanëse jóbana, ba entšanga bacna soyëngama jáperdonama; y chentšana cachiñe yochjésabo, ndoñe bacna soyëngama entšanga jabáperdonama, ndayá chë cha cháuesabama tša tmobátmanënga jabátsebacama.

## 10

<sup>1</sup> Chë Moisesbe leyentša mandënga, ntšamo chë bachnanga yojánamnama Bëngbe Bëtsá jadórama tmojóba bayëngaca y inye soyëngaca, ndoñe ntsinýanýayana lempe chë Bëngbe Bëtsá chabe entšanga jatšatayana puerte tšabe soyënga, pero aíñe batšatema jtsinýanýayana ntšamo chë soyënga yochtsemnama. Chíyeca chë mandënga, chë uatšëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë Bëngbe Bëtsábioye jobéconama tmojtsebošënga, chca soyënga tmojtsamama cada uata nyets tempo, chënga ainaniñe corente chamotsetatšëmbuama chëngbe bacna soyëngama nyetsca tescama perdonánënga imojtsemnama. <sup>2</sup> Er ndayá tcojtsamama Bëngbe Bëtsabiana uatšëmbona soyëngaca y chábioye jëtschuayama tmojóba bayëngaca, entšanga Bëngbe Bëtsábioye adórayënga, chabe delante tšábenga jtsemnama matmënjnobenase, chënga chë bacna soyënga tmojanmama ainaniñe ngmënaca ya ndoñe mamënjëtsemna, y matmëntsana jbaná soyënga amana chë tmojóba bayëngaca. <sup>3</sup> Pero juatšëmbonama entšanga bayënga tmojóba ora, josérviana entšanga bacna soyënga tmojamama cada uata chamuatenójuaboma; <sup>4</sup> er chë toronga y chivënga tmojóbanëngbe buiñeca ndoñe ntsopodénana entšangbioye bacna soyënga jabuajuánama.

<sup>5</sup> Chíyeca, Cristo quem luaroye tojánabo ora, Bëngbe Bëtsábioye mëntšá tbojaniana: Ndoñe tconjábošena entšanga chacmátšëmbona soyënga, ni tmojobaye bayënga, pero aíñe tcojama atše canye entšacá chaitsemnama.

<sup>6</sup> Ndoñe tšabá quecmátinýana chë tmojóba y tmojajuinýé bayënga, entšanga bacna soyëngama chacotsaperdonama.

<sup>7</sup> As atše Bëngbe Bëtsá sënjaniana: “Bëngbe Bëtsá, muentše séntsemna, ntšamo aca icobošcá atše chaimama, ntšamo acbe uabemana palabrënguñe atšbiana endayancá, chë ndayá atše chjanmama ca.”

<sup>8</sup> Natsana, Cristo tojánayana, Bëngbe Bëtsá ndoñe tonjánbošena, ni tšabá tbonjanínýana entšanga chamuátšëmbona soyënga, ni Bëngbe Bëtsábioye jëtschuayama tmojóba bayënga, ni tmojóba ni tmojajuinýé bayënga, entšanga bacna soyëngama cha chaot-saperdonama ca, masque chënga chë Bëngbe Bëtsábioye jadórama soyëngaca jamana, ntšamo leyíñe iuayancá ndayá chënga jamama yojtsamna. <sup>9</sup> Y chentšana, Cristo Bëngbe Bëtsábioye tbojátaniana: “Muentše sënjabo, chë ntšamo aca icobošcá atše chaimama ca.” Chca, Cristo tojinýanýé chë jtsamana soyënga tmojóba bayëngaca, tondaye yonduámama entšanga bacna soyënga jabuajuánama, y entšangbe bacna soyëngama jóbane tojaninýanýé chë ntšamo Bëngbe Bëtsá yobošcá jtsamana, más iuámama chë inye soyënga játamama. <sup>10</sup> Bëngbe Bëtsá tojama, bënga chabe entšanga y chabe delante tšábenga chamotsemnama, ntšamo Bëngbe Bëtsá yobošcá Jesucristo tojánmayeca, chabe derecho vida jtsobomñama cachcá jonýayëse y entšangbe bacna soyëngama jóbane, canye y nyetsca tescama.



<sup>11</sup> Judiëngbe nyetsca bachnanga nyets tempo ba soye altarentša natsanoica Bëngbe Bëtsá jtseservénana, y ba soye cachcá jtsamana tmojóba bayéngaca, pero chë soyéngaca ndocna te ntjopódiana entšanga bacna soyënga jabuajuánama. <sup>12</sup> Pero Jesucristo entšangbe bacna soyëngama tojanóbana ora, yojamna mo canye tmojóba bayacá, Bëngbe Bëtsá entšanga bacna soyëngama cháuaperdonama; nye canye y nyetsca tescama chca tojanma, y chentšana Bëngbe Bëtsabe catšbioica tojtánótbema, canye uámana puestentše, jtsemándayama. <sup>13</sup> Chentše cha yobátmana, Bëngbe Bëtsá chabe obenánaca Cristbe uayayënga chabe cucuatšinë chamoquedama yochjamëntscuana. <sup>14</sup> Er nye canye, entšangbe bacna soyëngama cruzoca jóbanëse, Jesucristo lempe tojama, entšanga chë Bëngbe Bëtsábënga jtsemnama chëmbonënga, chabe delante nyetsca tescama tšabengcá chamotsemnama. <sup>15</sup> Y Uámana Espíritnaca, Bëngbe Bëtsabe uabenana palabrengüine šontsinyanýná chca ndegombre bëtsemnama, mëntšá tojánayana ora:

<sup>16</sup> Ndayá entšangbiana chjama, canye tempo chentšana chanjašebuachená soye mëntšá entsemna ca, Bëngbe Utabná tojánayana:

Atše chanjama chënga chamotseboše jtsamana ndayá chëngbe ainaniñe chaitsemánda soye,

y chamotsejuabnama chë chëngbe juabniñe chaitsemánda soyama ca.

<sup>17</sup> Y chentšana mëntšá tojánayana:

Ndocna te más quichátsjuabnaye chënga bacna soyënga tmojamama,

y ntšamo atše stsebošcá contra soyënga chënga tmojamama ca.

<sup>18</sup> Chcasna, Bëngbe Bëtsá nyetsca tescama entšanga bacna soyëngama tojaperdoná ora, ya ndoñe ntjátsiytana inye soyënga más játamama, mo bayënga cuafjobaycá, entšanga bacna soyëngama perdonánënga chamotsemnama.

#### *Šontsamna Bëngbe Bëtsábioye jtobéconana*

<sup>19</sup> Y chca, Jesucristbeyeca catšátanga, Jesusbe buiñe tojanábuashanama y bëngbiana tojanóbanama, chábeñe jtsošbuáchiyëse, bënga montsobena, tondayama ntjatauatjca Bëngbe Bëtsabe delante jamashënguama. <sup>20</sup> Bënga montsobena jamashënguama chë tsëm benachëjana, Cristo bëngbiana tojamëjana; cha nda inétsama chë nyetsca tescama yomna tšabe vida chamotsebonnama. Mo chë quem luarentše chë bachnangbe más uámana amëndayacá, chë ujonýana entšëjuajana jamashënguana chë “más uámana ca” uabaina luaroye, Bëngbe Bëtsabe delante jtsemnama, cachcá, Cristo bëngbe bacna soyëngama mo entšacá tojanóbanayeca, béngnaca montsobena Bëngbe Bëtsabe delante luaroye jamashënguama. <sup>21</sup> Bënga mondbomna canye bëts bachnangbe más uámana amëndayá, Bëngbe Bëtsabe entšángbeñe jtsemándayama, y cha endmëna Jesús. <sup>22</sup> Chíyeca, Bëngbe Bëtsá jaserviama ndegombre ainaniñe corente jtsebošëse, y chábeñe puerte jtsošbuáchiyëse, šontsamna Bëngbe Bëtsábioye jobéconana. Ntšamo chë bachnángbioye buiñeca tmojanabuešcaccjá, Bëngbe Bëtsabe delante tšabengcá chamotsemnama cha jaserviama, cachcá, Cristbe buiñe juabuáshanëse y bëngbiana jóbanëse, bënga ainaniñe corente montsetátšëmbo Bëngbe Bëtsá nyetsca tescama bëngbe bacna soyëngama šojtsaperdonama. Y bënga béjayeca uabainéngnaca mondmëna; chíyeca bënga jtsobenana Bëngbe Bëtsábioye chca jobéconana.

<sup>23</sup> Bënga šontsamna nyets tempo Bëngbe Bëtsábeñe puerte jtsošbuáchiyana, y ndocna te nye ndayámna játajbanana entšángbeñe ichámuana, chë Bëngbe Bëtsábeñe jtsošbuáchiyëse bënga imobatmana soyënga cha yochjamama, er chë soyënga šojašebuachená cha, sempre jamana ntšamo tojayancá. <sup>24</sup> Bënga šontsamna janguanguana ntšamo muatjobenaye añemo jenatšëtayana, nyetscanga jtsebbonshánana, y ntšamo tšabá yomncá jtsamana; <sup>25</sup> pero ndoñe quešnátamna játajbanana, Bëngbe Bëtsábioye jadórana enefjuanana mo Cristbeñe ošbuáchiyënga quetsomñecá, ntšamo báseftanga imojtsamcá. Chamna, nyetscanga añemo mochtsenatšëtnaye Cristo nyets tempo jtseservénama, y más mora, chë ndayá imojtsonýama, Bëngbe Utabná yochjésabama ya yojtsobecuama montsetátšëmbo ora.

<sup>26</sup> Er chë ndegombre soyëngama tšabá tmojátatšëmbonentšana y chë soyënga tmojoyeuná chentsšana, bacna soyënga jtsamëse tmojtseyena, nje chca jamama tmojtseboše causa, muattsaboté ndayá Cristo bëngbiana tojanmcá, bëngbe bacna soyëngama cha tojanóbana ora, y ya tondaye nántsemna ntšamo Bëngbe Bëtsá bënga jtsaperdónama. <sup>27</sup> Y chca, ndayá bënga muattsobena jobátmana soye nántsemna nje chë Bëngbe Bëtsábíocana castigo, chë ndayama šojtsamna uatjana jtsebomnana; y nje jobátmana chë tempo, ndaye ora Bëngbe Bëtsá puerte etonaná chabe uayayënga bëtscá íñesheca yochtsapochócaye. <sup>28</sup> Ndánaca chë Moisesbe leyama tojayana tondaye yondovalena ca, y útata o únganga chca tmojouena y aíñe cha chca tojayana ca chënga tmojayanëse, jtsemnana chë entšábíoye jtsóbana, tondaye ntjalastemacá. <sup>29</sup> Canya, nyets ainánaca Bëngbe Bëtsabe Uaquiñábíoye tbojtsaboté; y tojayana Cristbe buiñe, chë ndémuanýeye tojanábuashana bëngbiana tojanóbana ora, tondaye yonduámana ca, ndayá nje ndaye entšabe buiñcá ca, chë buiñe chë ndémuanýeye šojtsinýanýná ndayá Bëngbe Bëtsá tbojašebuachenacá bëngbiana jamama, y ndáyeca Bëngbe Bëtsá chabe entšanga šojábíama, cha jaserviama; chë entšá Uámana Espíritbíoye tbojóyenguango, nda inétsama bënga tšabe soyënga chamotsebomnana; y canya chca amá, ¿tšëngaftanga ndoñe šmontsejuabná cha ibojtsomerecena Bëngbe Bëtsábíocana canye puerte más uabouana castigo, chë Moisesbe leyama tondaye yondovalena ca tojayanabíama? <sup>30</sup> Bënga nyetscanga mondétatšëmbo Bëngbe Bëtsá mëntšá tojánayanama: “Atše chanjama chënga chamosufrima, ínýenga chamosufrima tmojama causa; y chënga chanjácastigaye, ínýengbíoye bacá tmojaborlá causa ca.” Y mëntšánaca tojánayana: “Bëngbe Utabná chabe entšangbíama echanjayana ntšamo tmojëftsemcá tšabá o ndoñe tšabá bëtsemnana, y chëngaftaca echanjama ntšamo chora chaojajuabocá ca.” <sup>31</sup> ;Tša uabouana, Bëngbe Bëtsá chë nyets tempo ainabe cucuatšíñe joquédana, castiganá jtsemnana!

<sup>32</sup> Pero ntšamo tempo yojamnama šmochtsenójuabnaye, chë ndegombre soyënga Jesucristbíama cabá chora šmonjanábuatmana ora, y chora tša jenujuérsana cmonjanotocá padecena soyënguiñe, y chë causa tša šmojansufrí. <sup>33</sup> Báseftanga tšëngaftanguentšëngbíoye entšangbe delante tcmojanoyánguango, y ínýenga tmojanma puerte chašmotsesufrínama; y ínýenga tšëngaftanguentšënga chca imojansufrinëngaftaca šmojanama, chënga jujabuáchama. <sup>34</sup> Tšëngaftanga šmojánalastemana chë chënguentsënga cárceloye imojanétámenënga; y oyejuayënga šmojanlesenciá ntšamo šmojanbomncá ínýenga chacmotsabacama, er tšëngaftanga šmojátatšëmbona Bëngbe Bëtsábíocana más tšabe soyënga šmojtsebomnana, chë nyetsca tescama šmochtsebomna soyënga. <sup>35</sup> Chcasna, ndoñe šmatjajbaná ainaniñe bëtscá añemo jtsebomnana, ni Bëngbe Bëtsábeñe sempre jtsobátmanana; er chca šmobatmánayeca, Bëngbe Bëtsá echanjama tšëngaftanga bëtscá uacanana soyënga chábíocana chašmotsebomnana. <sup>36</sup> Tšëngaftanga cmontsamna corente uantadënga jtsemnana, padecéniñe chašmojt-sachñëjuana ora, chca, ntšamo Bëngbe Bëtsá yobošcá tšëngaftanga chašmotsamama, y ndayá Bëngbe Bëtsá tojanašebuachenacá chašmóyëngacñama. <sup>37</sup> Er Bëngbe Bëtsabe uabemana palabrënguiñe cha mëntšá tojánayana: Betsco, ndoñe bën, y chë jabama ibomná echanjabo. Ndoñe bën quebochatóbema.

<sup>38</sup> Nje chë ndabíama atše chajama atšbe bominiñe tšabia chaotsemnana, átšbeñe cha betsošbuáchema, cha ndegombre chë nyetsca tescama yomna tšabe vida echántsebomna; pero uatjana causa, átšbeñe ošbuáchiyana tojtsajbanase, atše cháftaca ndoñe quichátoyejuaye ca —cha tojánayana.

<sup>39</sup> Pero bënga ndoñe quemátsmëna chë uatjana causa Bëngbe Bëtsábeñe ošbuáchiyana tmojtsajbananga, y chca, nyetsca tescama pochocánënga jtsemnana imojtsajnënga; pero aíñe mondmëna chë Bëngbe Bëtsábeñe ndegombre ošbuáchiyënga, y chca, chë atsebácanënga jtsemnana mochjashjáchënga.

## 11

*Bëngbe Bëtsábeñe ošbuáchiyana jtsebomnana*

<sup>1</sup> Ošbuáchiyana jtsebomnana endmëna corente jtsetatšëmbuana, ndayá tmojtsobamancá ndegombre chca yochjopásama; endmëna ainaniñe corente jtsetatšëmbuana, ndayá bënga mora ndoñe tmontsonyáca ndegombre chca yomnama. <sup>2</sup> Bëngbe Bëtsá tojánayana bëngbe bëts taitanga tšabá imojánama ca, chënga chábeñe imojtsošbuachéyeca.

<sup>3</sup> Bënga, Bëngbe Bëtsábeñe mondošbuachéyeca, mondétatšëmbo cha quem luare y nyetsca luarënga tojanmama, chca chaotsemnana cha tojanmandá ora; chcasna, chë ndayá mora bënga jinýama imobencá, cha tojanma bënga ndoñe mondobena jinýama soyënguentsana.

<sup>4</sup> Abel Bëngbe Bëtsábeñe yojanošbuachéyeca, oveshatëmënga chábioye tbojanátšëmbona, y chë soye Bëngbe Bëtsabiama más tšabá yojtsemna, chë ndayá Caín, chabe catšata, Bëngbe Bëtsá jëtschuayama tbojanátšëmbonama. Chíyeca, Bëngbe Bëtsá tojánayana Abel chabe bominyiñe tšabia yojtsemna ca, ndayá Abel chábioye jëtschuayama tojanmcá oyejuayá tojanóyëngacñeyeca. Ntšamo Abel Bëngbe Bëtsábeñe yojanošbuachecá, masque cha ya obaná yojtsemna, chë soye cabá bënga šontsabuatambá.

<sup>5</sup> Enoc Bëngbe Bëtsábeñe puerte yojanošbuachéyeca, Bëngbe Bëtsá celoye tbojesanbëtšëñe, ntjobancá. Chentšana ndocná tonjanobená cha jtsinýenana, Bëngbe Bëtsá tbojesanbëtšëñe causa. Y Bëngbe Bëtsabe uabemana palabrenguiñe endayana, Bëngbe Bëtsá Enócaftaca oyejuayá canjamna ca, ntšamo jtsamëse yojoyenama, y chentšana celoye tbojtsanámbañe. <sup>6</sup> Pero Bëngbe Bëtsábeñe ntsošbuachiyá, ndoñe quenátopodena cha oyejuayá béngaftaca jabemama, er chábioye jobéconamna, entšá jtsemnana jtsošbuáchiyana cha ndegombre bëtsemnana, y cha inétsamama chë cha jtsabuatomama tša tmobošëngbiama bëtská tšabe soyënga chamotsebomnana, mo chábiocana uacanana soyëngcá.

<sup>7</sup> Bëngbe Bëtsá Noébioye tbojanbuayená uabouana soyënga yochjanopásama, cachora ndopodena jinýama soyënga, y cha Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá y barquëshá tojanapormá chabe pamíllanga jätsebacama. Cha chca tojanma ora, ošbuáchiyana bómnyayeca, cha tojaninýanjé entšanga tša bacna soyënga tmojanmama y chë causa castigánënga jtsemnana yojtsamnama. Chabe ošbuachiyánamnaca Noé tojánashjache Bëngbe Bëtsabe bominyiñe tšabia jtsemnana, y chca entšá jashjáchana, nye Bëngbe Bëtsábeñe jtsošbuáchiyëse.

<sup>8</sup> Bëngbe Bëtsá Abrahámbioye tbojanchembo, inýe luaroye cháuama; Abraham Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá, y tojánbocna chë luaroye jama, chë Bëngbe Bëtsá tbojanšbuachená jatšëtayama luaroye, masque Abraham ndoñe yontsetátšëmbo ndëmoye yochjánama. <sup>9</sup> Bëngbe Bëtsábeñe yojanošbuachéyeca, yojobena mo inýe luarocana ashjangonacá jtsiyenana, cachabe luarentše ndoyená, chë Bëngbe Bëtsá tbojanšbuachená luarentše. Entšëjuaca pormana tambënguiñe yojoyena, cachcá ntšamo chë chábentšana básenga Isaac y Jacob ibojëftsiyencá; y chátnaca Abrahamcá ibojanobátmana jóyëngacñama ntšamo Bëngbe Bëtsá Abrahámbioye tbojanšbuachenacá. <sup>10</sup> Er Abraham corente uantadá yojanobátmana chë canýe luaroye celoca jamashënguama tempo; chë luare inamna canýe bëts pueblo, puerte tšabe ucuatjoniñe pormana pueblo, canýe luare chë ndayentšama Bëngbe Bëtsá tojanjuabó ntšamo chaotsemnana, y cachabe pormana luare inamna.

<sup>11</sup> Sara, Bëngbe Bëtsábeñe yojanošbuachéyeca, Bëngbe Bëtsá tojanma cha canýe šëšona chabotsebomnana, masque chora ya bëtsanáñjema yojtsemna, šëšona jtsebomnana. Bëngbe Bëtsá chca tojanma, er Sara corente yojanjuabná, cha chë canýe šëšona yochtsanbomnana tbojanšbuachená cha, nyets tempo ntšamo tojayancá amá yojamna ca. <sup>12</sup> Y chca, quem entšá Abraham, chë šëšonga jtsabamnama ya ndobenábentšana, ba básenga tmojanonýná, tša mallajta mo chë celoca estrellëngcá, y tša chëftanga mo chë mar bëjayoca chënyañentša casajcá, ndocná jacúntama ntjobenayana.

<sup>13</sup> Njetsca quem entsanga imojéftsiyena jtsamése ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóyëngacñe chë Bëngbe Bëtsá tojanašebuachená soyënga. Pero chëngbe ošbuachiyánama corente imojtsetátšëmbo, Bëngbe Bëtsá chentšana baytese ntšamo tojanašebuachenacá yochjánatšatayama y chë soyënga ndegombre yochtsemnama, y chama oyejuayënga chënga imojtsemna. Chënga tmojánayana quem luarentše chënga imojoyena mo cachëngbe luarentše ndoyenëngcá, y quem luarëjana mo nÿe achnëjuanëngcá ca. <sup>14</sup> Y chca tmojtsichámëngna, puerte jtsinÿanÿnayana chënga tša imojtseboše inÿe luaroca joyënanama, canÿe luare cachëngbiama. <sup>15</sup> Chënga nÿe chë ndayentšana tmojéftsanbocna luarama manjánjuabnase, matmënjnobená tšabá cachoye jesshéconama. <sup>16</sup> Pero chëngna canÿe más tšabe luare innaboše, canÿe luare celoca. Chíyeca Bëngbe Bëtsá ndoñe yonjanëuatja, chëngbe Bëtsá ca chënga chamotsechembuanama, er celoca canÿe bëts luare, mo canÿe bëts públëcá chëngbiama tojanprontá.

<sup>17</sup> Bëngbe Bëtsá Abrahámbioye jinÿama, ndegombre aíñe o ndoñe Bëngbe Bëtsábeñe tajojtsanošbuachema, tbojanmandá chabe uaquiñá Isaac chabuánatse jóbama, chábioye jëtschuayama, ntšamo Abraham chë tojóba bayëngaftaca jamama yojanamancá. Cha Bëngbe Bëtsábeñe yojanošbuachéyeca, yojtseprontana chë nÿe canÿe uaquiñá ibnabomná jóbama, Bëngbe Bëtsábioye jëtschuayama, masque Bëngbe Bëtsá mëntšá tbojanšbuachená: <sup>18</sup> “Chë ácbentšana entsanga nÿe Isaacbiajana mochanjabo ca.” <sup>19</sup> Abraham corente yojanjuabná y yojátatšëmbo, Bëngbe Bëtsá ndegombre obenana bomná bëtsemnama, chë obanënga chámuatayenama jamama. Chíyeca, Bëngbe Bëtsá Abrahámbioye tbojtsanauyaná Isaac jóbama ora, yojamna mo Abraham obanënguentšana chábioye cuaftoyëngacñëcá. Y chca, ntšamo Isaácaftaca tojanopasacá, batšá yojtsinÿanÿnaye ntšamo Jesucrísoftaca yochjanopasacá.

<sup>20</sup> Isaac Bëngbe Bëtsábeñe yojanošbuachéyeca, Bëngbe Bëtsábioye tbojanimpadá chabe uaquiñátbiamá, Jacob y Esaú, bëtscá tšabe bendicionënga chabotsebomnama, chë joshjanguama tempënga ora.

<sup>21</sup> Jacob Bëngbe Bëtsábeñe yojanošbuachéyeca, ya jóbana ora, tbojanimpadá cada ona chë Josebe básëngbiama, Bëngbe Bëtsá chaoma bëtscá tšabe bendicionënga chamotsebomnama. Cha chca tojanma, jotsejbénase Bëngbe Bëtsábioye jadórama, y chabe jatjonëfjiñe tsbanánoca jojuáchase.

<sup>22</sup> José Bëngbe Bëtsábeñe yojanošbuachéyeca, ya jóbana ora, tojánayana más chcoye chë Israeloca entsanga Egiptó luarentšana mochjéftsanbocna ca, y tojéftsanmandá ndayá jamana chabe óbana cuérpoca.

<sup>23</sup> Moisesbe bëtsétsata Bëngbe Bëtsábeñe ibojanošbuachéyeca, cha tojanonÿná ora, unga shinÿëntscuana cha tmojtsaniytëme, er chata tbojáninÿe cha canÿe botamana básetema bëtsemnama, y ndoñe tbonjanëuatjaná chë reybe mandama, chë njetsca judiëngbe basetëmënga boyabásetëmënga jtsëbáyana.

<sup>24</sup> Moisés Bëngbe Bëtsábeñe yojanošbuachéyeca, ya bëtsá yojtsemna ora, ndoñe tonjánbošena chë Egiptoca reybe bembëbe uaquiñacá chamotsábuatmama. <sup>25</sup> Chamna, tojánbošena cha jasúfriama ínÿenga chamotsamama, cánÿiñe chë Bëngbe Bëtsabe entsángaftaca, y ndoñe nÿe baseftayté tšabá jatsmënanana, bacna soyënga jtsamése, ntšamo cachá tojtsejuabnacá, nÿe cachá tšabá jtsomñama. <sup>26</sup> Chamna, cha yojanjuabná, chë padecena soyënguiñe jasúfriana ntšamo Cristo tojansufricá, más tšabá yojamna chë Egiptoca uámana soyëngama, er cha Bëngbe Bëtsábeñe jtsošbuáchiyëse chábeñe yojanobátmana, ba tšabe soyënga mo canÿe uacanana soycá cha ibochjanatšetayama.

<sup>27</sup> Bëngbe Bëtsábeñe yojanošbuachéyeca, Moisés Egiptocana tojéftsanbocna, chë luarentša rey cháftaca chábuëtnama ntjatauatjca. Cha ainaniñe njets tempo añemo yojtsebomna, y chca yojáninÿna mo chë ndocná jinÿama tondobenacá, Bëngbe Bëtsábioye cuaftsonÿacá. <sup>28</sup> Bëngbe Bëtsábeñe yojanošbuachéyeca, ntšamo Bëngbe Bëtsá tbojanmandacá, Moisés chë judiënga tojanabuayená Bashco fiesta jamama, y chë

Israeloca entsángaftaca yebnëngoye amashjuaniñe buíñeca tojanbuéscacja, chca, chë ángel obanayá, chë Israeloca pamíllangbeñe Egiptoca chë mayor uaquiñënga ndocá chaondámama.

<sup>29</sup> Moisés y Israeloca entsanga Bëngbe Bëtsábeñe imojanošbuachéyeca, chë “Buángana ca” uabaina mar bejayëjana tmojánenachnëngo, mo chiñe bojojo fshantse cuaftsomñcá; chentšana, chë Egiptoca entsanga cachcá jamama tmojánbošena ora, nyetscanga chiyiñe tojtsanatajo.

<sup>30</sup> Israeloca entsanga Bëngbe Bëtsábeñe imojanošbuachéyeca, chë Jericó bëts pueblentša tapiëšënga shéconana canýsëfta tentscuama chënga imojánajnentšana, chëšënga yojtsáshajaye.

<sup>31</sup> Rahab, chë pueblentša bacna vida bomna shembása, Bëngbe Bëtsábeñe yojanošbuachéyeca, ndoñe tonjanóbana chë ínýengaftaca, chë bëts pueblentše oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjanóbana, er chë Israeloca entsanguentšana ichmónënga tšabá tojanébuaja, chë jarrepárama tmojánanga ntšámose chë luarentše oyenënga jáyënjanama jobenayama.

<sup>32</sup> Atše sentsobena bangbiana más jóyebuambayama, Bëngbe Bëtsábeñe osbuáchiyëngbiana, pero luare šattsëshbe chchangbiana jóyebuambayama, mo Gedeoncá, Barac, Sansón, Jefté, David, Samuel y Bëngbe Bëtsabe juabna oyebuambayëngcá.

<sup>33</sup> Chënga Bëngbe Bëtsábeñe imojanošbuachéyeca ínýengbe mandadëngbe entsángbioye tmojanayëñaná, bëtscá imojánama nyetsca entsángaftaca ntšamo tšabá yomncá jt-samama y nyetscanga cachcá chamotsámanama, ndayá Bëngbe Bëtsá chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsemna ora, chënga chamuatenáyebengoma, chentšana báseftangbioye ndocá chamondámama.

<sup>34</sup> Ošbuáchiyana bómnyayeca, Bëngbe Bëtsá tojanma lempe chaotsefsanama, chëngbioye íñeshiñe tmojanacjá ora, chënga ndocá chamondëpasama; tmojanotsbocá espadéjaca jobanámentšana; ya tondaye añemo béntsebomna ora, Bëngbe Bëtsá tojanma bëts obenana y puerte añemo chamotsebomnama; tmojánashjache bëts obenana jtsebomnama ínýenga jáyënjanama, chëngaftaca imojtsentsjaná ora; y tmojanobená ínýe mandadënga y chëngbe soldadënga jáyënjanama, chamotsachetama jamëse. <sup>35</sup> Ošbuáchiyana bómnyayeca, básefta shembásënga chëngbe óbana pamíllangbioye cachiñe ainënga tmojtananýe, chënga ainënga chamotsatsmënama Bëngbe Bëtsá tojanma ora.

Ošbuáchiyana bómnyayeca, ínýenga tmojanma básefta ošbuáchiyënga, puerte chamosufrima, y jobanámnaca; er chënga más tmojánbošena jashjáchana chë nyetsca tescama yomna tšabe vida jtsebomnana, y ndoñe nýe chë jótsbocana batšatema más vida jtsebomnama. <sup>36</sup> Ošbuáchiyana bómnyayeca, ínýenga corente tmojansufrí,

ínýenga chëngbioye tmojanoyánguango ora y tmojanatsetšëná ora; y ínýenga tmojansufrí y cárceloye cadenëjuangaca utámenënga joquédamnaca. <sup>37</sup> Inýëngbioye ndëtšbéngaca tmojtsanatëchénganja, serruchëshaca tmojtsanëjácacaye, espadéjaca tmojtsanëbaye. Inýenga imojánajna cánýentšana ínýecnoye nýe oveshá y chivëbe bobáchecha uichétjonënga, ujabótënga, ainana tsetšanënga, y ínýëngbeyeca mocá borlánënga.

<sup>38</sup> Chë nýe quem luarama enójuabnyënga ndoñe monjanomerecena chënga méngaftaca jtsiyenama, chënga chë vida imojábomna cánýentšana ínýecnoye aniñe, entsanga ndoyena luarënguenache, tjañenache, fshantsiñe atëbëfjniñe y cuevëshënguiñe.

<sup>39</sup> Nyetsca quem entsanga, ndëmuanýëngbiana muentše tmonjoyebuambá, Bëngbe Bëtsá tšabá chëngbiana tojánayana, ošbuáchiyana imojánbomna ca; pero ni canýa chënguentšá tonjanóyëngacñe, ndayá Bëngbe Bëtsá chëngbe entsanga jatšatayama tojanašebuachenacá, nyetsca tescama jtsebomnama. <sup>40</sup> Bëngbe Bëtsá, béngbeñe jtsejuabnyëse, tojanjuabó canýe más tšabe soye bëngbiana jamama, chca, Bëngbe Bëtsá canýe ora jamama, bënga nyetscanga, chënga y bënga chamotsemnama lempe ntšamo Bëngbe Bëtsá yobošcá, ntšamo Bëngbe Bëtsá tojanašebuachenacá jóyëngacñëse.

## 12

*Bënga mochtsejuabnaye ndayá Jesús tojanmama*

<sup>1</sup> Chíyeca, bënga mochtsejuabnaye ba entšangbiama, chë bëngbiama más natsana imojaniyenënga, ndëmuanjenga puerte tšabá bënga jtsinjanayana ntšamo ndegombre yomnana Bëngbe Bëtsábeñe ošbuáchiyana jtsebomnana, mo chënga ndayá bënga tmojtsamama cuaftsonjangcá. Chcasna, mo chë tmochamanëngcá, ín'yengaftaca jenëyëñjanama, chë jashjanguama tojtsemna luaroye natsana jashjanguama, chënga jotjajuamna, chë chorscama nduaserverna entšayá jtsenátsejcana, y lempe ndayá tojt-sama más uenana chamotjajuama soyëngnaca jtsenójacana; béngnaca cachcá, ndoñe matjaleséncia bënga Crístbioye ndoñe tšabá ndëtsoservénama, ni chë bacna soyënga jamama juabnënga, chë béngbioye paselo jáyëñjanama juabnënga cachcá chamotsamama. Chamna, šontsamna sempre Bëngbe Bëtsá jtseeservénana, puerte uantadënga jtsemnëse masque padecena soyënguiñe tmoyena, bënga chamobená chë trabajo jamama, chë ndayama Bëngbe Bëtsá šojáchembo. <sup>2</sup> Jesusbiama mochtsejuabnaye, nda šuebëñatsana bënga ošbuáchiyana chamotsebomnana, y šuinjanáná ntšamo n'yets tempo n'yetsca soyënguiñe Bëngbe Bëtsábeñe jtsošbuáchiyama. Cha chë cruzoca jóbanama sufrínana lempe tojanoboyá, er cha yojanobátmana chë chentšana yochtsanbomna bëts oyejuayánama; y yojanjuabná, chë más bacá uamana entšangcá jóbanana, chabiama ndoñe canye uámana soye yonjamna ca; y chentšana chë uámana puestentše tojtantóbema, Bëngbe Bëtsábe catšbioica, jtsemándayama.

<sup>3</sup> Chíyeca, šmochtsejuabnaye ntšamo Jesús Bëngbe Bëtsábeñe jtsobatmanëse, puerte uantado yojamnama, chë bacna soye amënga corente chabe contra imojtsemna ora. Chca chábeñe šmochtsejuabnaye, tšëngaftanga Crístbiama oservëniñe ndoñe chacmondëumantšema, ni ainaniñe añemo jtsebomnana ndoñe chašmondájbanama. <sup>4</sup> Tšëngaftanga padecena soyënguiñe šmojachnëngo, entšanga bacna soyënga imojtsama causa, pero méntscoñama ndoñe cmontsamna jóbanama, Crístbe soyëngama enojuerzaniñe; <sup>5</sup> y tcmojtsébnëjtjomba ndayá Bëngbe Bëtsá tšëngaftangbioye, chabe básenga quetsomñecá tcmojábuayenama. Chë Bëngbe Bëtsábe uabemana palabrënguiñe mëntšá endayana:

Atšbe uaquiñá, Bëngbe Utabná aca jábuayenama tojtseboše ora, aca jasúfriase y padecena soyënga jauántase,  
chora ndoñe catjatsjuabnaye chiñe mo canye nduámana soye cuaftsemncá;  
y cha chacmojuácacana ora, ndoñe cattsajbaná ainaniñe añemo jtsebomnana.

<sup>6</sup> Er Bëngbe Utabná jábuayenana nda cha tbobobonshanábioye,  
y jacastígana chë mo chabe uaquiñacá tbojofjábioye ca —chiñe endayana.

<sup>7</sup> Padecena soyënguiñe chašmojtseufrina ora, šmochtsejuabnaye chë soye yojtsemna tšëngaftangbioye jábuayenama, y chca, Bëngbe Bëtsá tšëngaftangaftaca jtsamana mo chabe básenga quetsomñecá. ¿Nderado nántsemna canye uaquiñá, y chábioye chabe taitá ndocna te buanjuácacana, más tšabá chaotsamama? <sup>8</sup> Nderado Bëngbe Bëtsá tšëngaftanga ndoñe tcmonjabuayená, ntšamo n'yetsca chabe básengaftaca cha endbet-samcá, as tšëngaftanga ndoñe ntsemnana ndegombre chabe básenga. <sup>9</sup> Y bënga básenga monjamna ora, bëngbe bëtsétsanga quem luarentše monjanamana bënga jácastigana, y bënga chëngbioye ndoñe stëtšoye ntjaquédana. Y mora, bënga más šontsamna, jtsobedecénana y más bëts respeto jtsebomnana celoca Bëngbe Taitabiama, nda tojama entšanga espíritu chamotsebomnana, y chca, bënga tšabe vida chamotsebomnana.

<sup>10</sup> Bëngbe bëtsétsanga quem luarentše, n'ye básefta tescama, bënga jëftsabuayinayana, y chca jamana chënga tšabá tojtsinjana ora; pero Bëngbe Bëtsá bënga šojtsabuayiná ora, sempre chca jtsamana bëngbe tšabiama, bënga chabe entšanga jábiama, cachacá puerte tšábenga, ntšamo cha n'yets tempo yomncá. <sup>11</sup> Sempre bënga ndaye castigo tmojtsebomna ora, chora bënga chama ndoñe oyejuayënga ntsemnana, pero aíñe cochtsetšenánënga. Pero bënga chë castigüentšana tmojuatsjinnye ndayá Bëngbe Bëtsá

chë sóyeca tbojtsabuayiynacá, as chentšana jóbocnana natjémbana oyenana, nyetsca soyénguiñe ntšamo tšabá yomncá jtsamëse.

*Bëngbe Bëtsábioye jtsabotena, entšangbiana ndoñe tšabá ntsemnana.*

<sup>12</sup> Mo nda puerte uaméntšayacá, jatrabájama tondaye añemo ntjtsebmncá, tsátšena buacuatšéngaca y puerte uaméntšena ntsamiaséngaca, tšéngaftangbentše báseftanga ya uaméntšayënga šmojtsemna Bëngbe Utabnabiama trabájayiñe, y ainaniñe ndoñe añemo šmontsebmna. Cachiñe bëts añemo šmochtishache, y Bëngbe Bëtsabe obenana cachiñe šmochtsatsbmna. <sup>13</sup> Mo chë canye benache tšabá y ndericho chaotsemnana tmojtsamëngcá, chca, chë coshetënga chiñe jama chamotsobenama y más tšabá jtsatanama chamuatatsjínýama, y chë benachentšana ndoñe chamondétsebocanama; cachcá tšéngaftanga, chë bëtscá ošbuáchiyana y Cristo jaserviama corente añemo šmobomnénga, chë nýe batšatema ošbuáchiyana y chca jatrabájama nýe tondaye añemo ndbomnénga šmochjújabuache; chë soye šmochjama, ntšamo Cristo tšabá jaserviama yomncá jinýanýiyëse, y ntjalesenciaca ndocna soye chaotsama chë tšabe benachentšana tšéngaftanga chašmotsojuánañama.

<sup>14</sup> Lempe ntšamo chašmojobenacá šmochjama nyetscángaftaca natjémbana jtsiyenama, y ntšamo Bëngbe Bëtsabe entšanga mondbetsamcá jtsamëse chašmotsiyenama, cha jtseservénëse; er chca ntjamcá, canya ndoñe ntsoobenana Bëngbe Utabnábioye jinýama. <sup>15</sup> Yejuana šmochtsantješna, ndocná Crístbeñe ošbuáchiyana chaondëtsajbanama, y chca, chë Bëngbe Bëtsá chabe entšángbioye yochjatšataye tšabe soyënga chënga ndoñe chamondashjache. Šmochtsantješna, tšéngaftanguentše ndocná chaondétsemna, mo canye untja tbëtëjca, chë chcaja sayéngbioye jásocayana, nda chaotsama, ínýenga natjémbana ainana ndoñe chamondétsebmnama y bacna soyënga jtsamëse chamotsiyenama. <sup>16</sup> Yejuana šmochtsantješna ndocná tšéngaftanguentše shembása o boyabásaftaca bacna soye amá chaondétsemnana, ni canya ndabiama Bëngbe Bëtsabe soyënga tondaye chaondëtsámama. Esaú chca tojanma, chë lempe yochjanashjachcá, mayor uaquiñá bëtsemnana, chabe uabentsábioye canye šcna sanama tbojtaname ora. <sup>17</sup> Y tšéngaftanga šmondétatšëmbo, chca tojanopasá chentšana, Esaú tojánbošena chabe taitá Bëngbe Bëtsábioye chaboimpadama, chabiama tšabe bendicionënga chaomama, chë mayor uaquiñá bëtsemnana yojanobena jtsebmnama soyënga; pero chora chabe taitá ndoñe tbonjanoyeuná, er masque Esaú chora juabna tojantrocá, cha ndoñe tonjanobená ntšamo yojtsopasancá jëtsjandmanana. Masque cha tša tojánbošena, shëchbuíyeca chabe taitábioye jaimpádase, ya ndoñe yontsopodena ntšamo tojanopasacá jëtsjandmanana.

<sup>18</sup> Tšéngaftanga ndoñe chešmatobconá, mo chë entšanga Israeloca Sinaí ca uabaina tjoye tmojanobconacá, ndayá chënga imojobena jabojuama, y íñsheca yojtsángbototjuana, tondaye binýniñe luare, tša ibetiñe y puerte jabuache binýiëngaca; <sup>19</sup> ni chešmatuena chëngcá, canye trompetéjua uajatëtanana, ni Bëngbe Bëtsabe oyebuambnayana. Chë oyebuambnayana tmojanuënga, imojtseimpadana ndoñe más chëngbioye chaondëtsóyebuambnana. <sup>20</sup> Chca tmojanma, jauántama ndoñe tmonjanobená causa, ntšamo Bëngbe Bëtsá tojanamëndacá: “Nda quem tjoca chaojoyená, masque canye bayá chaotsomñe, entsemna chana ndëtšbéngaca chamotsatëchënjanga jtsóbama ca.” <sup>21</sup> Ndegombre, ntšamo tmojaninýcá tša uabouana yojtsemna, cach Moisésnaca mëntšá tojánayana: “Tša šontsengmëmna auatjananá séntsemna causa ca.”

<sup>22</sup> Pero tšéngaftanga Bëngbe Bëtsábioye šmojobconá, y chca endmëna mo tšéngaftanga canye Sión ca uabaina tjoye celoca cuafjobconacá, chë Bëngbe Bëtsá nyets tempo vida bomnabe bëts puebloye, mo celoca Jerusalén cuenta; y ba uaranga angelëngbioye šmojobconá, cánýiñe oyejuayënga enefjuanënga imojtsemnéngbioye, Bëngbe Bëtsá jtsatschuanayama. <sup>23</sup> Endmëna mo tšéngaftanga chë Bëngbe Bëtsabe entšángbioye cuafjobconangcá, chentše enefjuanënga mo Bëngbe Bëtsabe basengcá, chënga

ndayá chë Taitá tojašebuachenacá jýëngacñama, ndëmuanýenga Bëngbe Bëtsá chabe libréšañe tojúbiamá. Tšëngaftanga šmojobeconá Bëngbe Bëtsábíoye, ntšamo nyetsca entšanga tmojamcá tšabá o ndoñe tšabá bëtsemnama yochjayanábíoye. Endmëna mo tšëngaftanga cuafjobeconacá, chë entšanga mora ya obanënga y ntšamo tšabá yomncá jtsamëse imojëftsiyenëngbe espiriténgbíoye, chë entšanga ndëmuanýengbíamá Bëngbe Bëtsá tojanma chamotsemnama lempe ntšamo chabe entšangbíamá yojanjuabnacá, chca, cháftaca sempre vida jëftsebofnama. <sup>24</sup> Tšëngaftanga Jesúsbíoye šmojobeconá, chë jóbanëse, entšanga Bëngbe Bëtsáftaca mo canýacá chamotsemnama tojanmá, ntšamo Bëngbe Bëtsabe tsëm trato yojamncá; y endmëna mo chë bëngbíamá cha tojanóbana ora tojanábuashana buiñoye tšëngaftanga cuafjobeconacá; chca tojanábuashana, bëngbíoye Bëngbe Bëtsabe delante mo tšabengcá jábiamama, mo ntšamo entšángbeñe buiñe jabuéšcacjama chë bachnanga imojuamancá. Caín chabe catšata Abélbíoye tbojanóba ora, yojamna mo chë Abelbe uabuáshanana buiñe Bëngbe Bëtsábíoye cuaftseimpadancá, chë bacna soyama castigo chaotsemnama; pero Jesucristbe buiñe ndoñe chca ntsamana, ndayá chíyeca bënga más tšabe soyënga jashjáchana; Jesusbe buíñeca, bënga montsobena atsebácanënga jtsemnama.

<sup>25</sup> Cuedado šmochtsebofná, bëngbíoye tojtsoyebuambná ora cha joyeunayama. Chë Israeloca entšanga ndoñe tmonjánbošena Bëngbe Bëtsá joyeunayama, chë Sinaí tjoca quem luarentše tojanabuayená ora; chëngbíoye cha tojanacastigá. Y mora más, Bëngbe Bëtsá, chë celocana bënga abuayiynayá, ndoñe cachcá ndëcastigánënga quešochátabashejuana, ntšamo cha šojtsëtsëtsnacá ndoñe tmontseyeunanëse. <sup>26</sup> Bëngbe Bëtsá Sinaí tjoca chë entšángbíoye tojanoyebuambá ora, chabe oyeambuambayánaca tojanma quem luare chauangmëmanama, pero mora cha chabe uabemana palabrënguñe tojašebuachená: “Atše cachiñe chanjatsma chauangmëmanama, ndoñe nye quem luare, sinó celócnaca ca.” <sup>27</sup> Bëngbe Bëtsá “cachiñe ca” tojánayana ora, chë sóyeca yojsichamo, chë ndayté lempe chaongmëmanama cha cachiñe yochjama ora, chë quem luarentše tmojama soyënga y chë jatrócama yopodena soyënga yochtsejuána ca, chca, nye chë nyetsca tescama yomna soyënga y ndoñe jatrócama soyënga chaoquedama. <sup>28</sup> Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nyetsca tescama y ndocna te ntjotrócana. Bëngbe Bëtsá chama mochjëtschuaye, y ntšamo cha tšabá tbojtsinýancá mochtsadorana, chabiamá bëtš respeto jtsebofnëse, y nyetscangbíamá más bëtšá cha yomnama jtsejuabnayëse. <sup>29</sup> Er Bëngbe Bëtsá puerte etonaná chë chabiamá nduauenanënga jabuache echanjácastigaye, y chca, cha jtsemnana mo canýe íñeshe lempe jtsepochoamcá.

## 13

### *Ntšamo jtsiyenama, Bëngbe Bëtsá oyejuayá bëngaftaca chaotsemnama*

<sup>1</sup> Sempre nyetscanga šmochtsenbobonshana, Jesucristbeyeca catšátanga quetsomñecá. <sup>2</sup> Sempre tšabá chë tšëngaftangbe yebnoye inýe luarëngocana tmojáshjajnënga šmochjúbuaja, er chca jamëse, ntsetatšëmbcá báseftangna angelënga chëngbe yebnentše tmojanébuaja.

<sup>3</sup> Chë utámenëngbíamá sempre šmochtsenójuabnaye, mo tšëngaftángnaca chëngaftaca utámenënga cuaftsemncá. Chë ínýenga tmojtsama chamotsesufrinëngbíamá šmochtsenójuabnaye, er tšëngaftángnaca nderado cachcá šmatjatspása.

<sup>4</sup> Boyabása y shembása tbojanobouamá ora, ntšamo tbojanenšbuachenacá nyetscanga chamotserrespetana; y chë útata chabotsama nye ndayá y nye ntšamo Bëngbe Bëtsá bouamnátbíoye tojanamëndacá, er Bëngbe Bëtsá echanjácastigaye chë shembása o boyabásaftaca bacna soye amënga, y chë shema o boyábíoye ínýaftaca ingñayëngnaca.

<sup>5</sup> Ndoñe šmattsiyena jtsejuabnayëse nye mallajta crocénana jëftsebofnama. Nýe chë šmobomna soyëngaca oyejuayënga šmochtsomñe, er Bëngbe Bëtsá tojánayana: “Ndocna



te cachcá quebochatonjaye, ni canya quebocháiseboshjona ca.”<sup>6</sup> Y chca, bēnga montsobena corente añémoca jayanama:

Bēngbe Utabná endmēna nda atše šonduájabuachana; tondayama quichátauatja.

¿Ndayá canye entšá nanjobenaye átšeftaca jamama ca?

<sup>7</sup> Tšēngaftangbe amēndayēngbiana, chē Bēngbe Bētsabe buayenana soyēnga tcmojábuatambangiama, sempre šmochtsenójuabnaye. Sempre šmochtsenójuabnaye chē ntšamo chēnga imojaniyenentšana tojanóbocna tšabe soyēngama, y šmochtsiyena jtsamēse ntšamo chēnga imojanamcá, Jesucristbeñe ošbuáchiyēnga bētsemnana.

<sup>8</sup> Jesucristo cachá nyets tempo iuētsemna, tempo, mora y nyetsca tescama. <sup>9</sup> Ndoñe šmatjaleséncia ínēnga chamotsamama tšēngaftanga chē benachentšana chašmotsojuánañama, ndayá chēnga tmojtsabuátambama, y chē Cristo tojánabuátambama contra soyēngaca. Más tšabá endmēna bēnga ainaniñe añemo jtsebomnana, Bēngbe Bētsá tšabe juabna bēngbiana yobómnyeca, y ndoñe chē sanama, chē ndayá añe o ndoñe šontsamna jtsesayana soyēngama mandēnga tcojtsamēse. Chca mandēnga ndocna te chē Israeloca entšangbiana tempo tonjanoservé.

<sup>10</sup> Bēnga chē Jesucristbeñe mondošbuáchenga, canye soye mondbomna mo chē Bēngbe Bētsábioye jētschuayama altaroca juinēna soycá, bacna soyēngama perdonánēnga jtsemnana. Bēnga mondbomna chē Jesucristo bēngbiana tojanma soye, cruzoca tojanóbana ora, bēngbe bacna soyēngama; y chē nye tmojóba bayēngaca soyēnga tmojtsama bachnanga ndoñe ntsebomnana, chē Cristo tojanóbana ora, ndayá tojanmentšana tojanóbocna tšabe soyēnga. <sup>11</sup> Er chē judiēngbe más uámana bachnangbe amēndayá, chē tmojóba bayēngbe buiñe chē “más uámana ca” uabaina luaroje juabuyambana, Bēngbe Bētsá entšangbe bacna soyēngama cháuperdonama, y chē bayēngbe cuerpēnga jtsejuinēyana entšanga tmoyena luarentšana chaboca. <sup>12</sup> Cachcá, Jesúsna tojansufrí y tojanóbana bēts pueblentšana chaboca, chabe buiñe tojanábuashana ora jóbanēse, entšanga Bēngbe Bētsábenga chamotsemnana, y chabe delante mo tšabengcá chamotsemnana. <sup>13</sup> Chíyeca bēnga šontsamna Jesúsbioye jobeconana, nda entšanga tmojtsanaboté y bēts pueblentšana chaboca tojanóbana. Cha mochjuasto, y ntšamo cha tojansufricá bēngnaca mochjasúfria. <sup>14</sup> Er quem luarentše bēnga ndoñe quemátsbomna canye bēts pueblo bēngbiana, nyets tempo chauesomñe bēts pueblo, ndayá bēngna tša mondboše y puerte mondobátmana bēnga joyéanama chē celoca yochtsemna Bēngbe Bētsabe bēts pueblentše. <sup>15</sup> Chíyeca, šontsamna sempre Bēngbe Bētsábioye jtsatschuanayana, Jesucristbiajana. Bēngbe Bētsá chca tmojtsadorana ora, jtsemnana mo chábioye jētschuayama canye soye cuafjuatšēmboncá. Chcasna, jtsóyebuambnayēse cha mochtsadorana. <sup>16</sup> Sempre ntšamo tšabá yomncá šmochtsama, y chē šmobomncá ínēngbiámnaca chaotsemna. Chca šmochtsama, er chca tcojama ora, Bēngbe Bētsá oyejuayá jtsejuabnayana chca chabiana tcojama ca, y jtsinynana bēnga Bēngbe Bētsá imojtsatschuanama, ndayá cha tojamama.

<sup>17</sup> Sempre šmochtsama ntšamo chē tšēngaftanga ošbuáchiyēngcá enefjuanēngbeñe amēndayēnga tmojayancá, y sempre šmochtsiyena jtsamēse nye ntšamo chēnga tmojtsebošcá. Chēnga sempre tšēngaftangbioye jtsanēnana, tšēngaftangbe tšabiama, ntšamo cmojánanēnana Bēngbe Bētsábioye jojuama yojtsamnana chēnga jtsetatšēmbēse. Jtsayaunanēse, šmochjama chēnga chēngbe trabajo oyejuayánaca y ndoñe ngménaca chamotsamama, er ndoñe chca šmonjamēse, chē trabajo tšēngaftangbe tšabiama ndoñe nántsemna.

<sup>18</sup> Bēngbe Bētsá bēngbiana šmochtseimpadana, er bēnga ainaniñe corente fsēndētātšēmo tšabá tifjamama, y tša fsēntseboše jtsiyenana ntšamo tšabá yomncá lempe jtsamēse. <sup>19</sup> Tšēngaftanga bētscá cbontsaimpadana, Bēngbe Bētsá chašmoimpadama, atše chašolesenciana tšēngaftangtafaca cachiñe jtsatsmēnana.

*Bēngbe Bētsábioye chēngbiana jaimpádama y chēnga jacheuayama*

<sup>20</sup> Atše, Běngbe Bětsá séntseimpadana, cha chě nda endbėtsama bėnga natjėmbana chamotsiyenama, y nda tojanma Běngbe Utabná Jesús cháuatayenama, nda bėnga šondányena mo oveshėngbe tšabe abujėnyacá; y Běngbe Bětsá chca tojanma, Jesús, chabe buiñe juabuáshanėse tojanóbanayeca, chca, entšanga jinyanjyama ndegombre bėtsemnama ntšamo Běngbe Bětsá chabe entšangbiana tojanašebuachenacá njetsca tescama jamama. <sup>21</sup> Cha séntseimpadana chaoma tšėngaftanga chašmotsebomnama njetsca tšabe soyėnga ntšamo cmojtsėjabotcá, chca, lempe ntšamo cha yobošcá tšėngaftanga chašmotsamama; y cha Jesucristoftaca chaboma bėngaftaca ntšamo cha tšabá tbojtsinyancá. ¡Njetscanga njetsca tescama Cristo chamotsatschuaná! Chca chaotsemna.

<sup>22</sup> Jesucristbeyeca catšátanga, tšėngaftanga cbontsaimpadana, jábuayenama ntšamo tcbonjauyancá, puerte uantádoca tšabá chašmóyėngacñama, er nje básefta palabrėngaca chama tcbonjubuábiana. <sup>23</sup> Atše séntseboše tšėngaftanga chašmotsetátšėmbo, Timoteo Jesucristbeyeca bėngbe catšata, ya ndoñe utamená yontsemnama, y cha betesco átšbioye chaojtabėse, átšeftaca chanjėftbetše tšėngaftanga jányama chajjá ora.

<sup>24</sup> Tšėngaftanga ošbuachiyėngbeñe njetsca amėndayėnga šmochjácheuaye, y njetsca Běngbe Bětsabe entšangnaca choca. Chě Italia luaroquėnga ošbuachiyėnga tšėngaftanga cmontsacheuaná.

<sup>25</sup> Atše, Běngbe Bětsá séntseimpadana, cha chaoma tšabe bendicionėnga tšėngaftangbeñe chaotsemnama.

## Santiago

### *Jacheuayama*

<sup>1</sup> Atše Santiago, Bëngbe Bëtsá y Bëngbe Utabná Jesucristbe canye oservená, tšëngaftanga cbontsëbuabiamná, tšëngaftanga chë bnétsana uta Israeloca bëts pamíllang-bioye nyets luarëjana ujquëshenënga. Atše cbontsacheuaná.

### *Chë Bëngbe Bëtsábiocana osertánana*

<sup>2</sup> Jesucristbeyeca atšbe catšátanga, tšëngaftanga ndaye padecena soyënguiñe chašmojtseyena ora, chiñe šmochjajúaboje mo chca tšëngaftangbe tšabíama cuaftsemncá y šmochjóyejuaye; <sup>3</sup> er tšëngaftanga šmondétatšëmbo, chcañe chašmojtšajna ora, šmochtsatátšëmbo cach tšëngaftanga Jesucristbeñe puerte šmošbuaché o ndoñe. Chca ora bëts ošbuáchiyana chašmojtsebomñese, šmochanjobenaye, Bëngbe Bëtsábeñe jtsobátmanëse añémoca jtsemnana, masque padecena soyënguiñe chašmotsomñese. <sup>4</sup> Pero chca chašmojtsemñese, šmochtsentšena jashjáchama ntšamo canye entšá Bëngbe Bëtsabe soyëngama corente osertaná yomncá chašmotsemnana, ntšamo Bëngbe Bëtsá yobošcá chašmotsiyenama, chiñe ni mo canye soye jamama chacmondétsabuashebenëse.

<sup>5</sup> Nderado nda tšëngaftanguentšana ndoñe tontsobena corente osertánana jtsebomnana, cha bontsemna Bëngbe Bëtsá jaimpádana cha chaoma aíñe chana jtsebomnana, y Bëngbe Bëtsá chana bochanjátšetaye; er Bëngbe Bëtsá nyetscanga bëtscá endbët-satšatnaye y ndocnábioye jatáboyënjana. <sup>6</sup> Pero cha bontsemna, Bëngbe Bëtsábeñe puerte jtsošbuáchiyëse chama cha jaimpádana, y cha nderado ndoñe bochanjóyeunayama ntjatatëmnancá. Nda mëntšá tojtsamëse, inye ora aíñe Bëngbe Bëtsábeñe cuaftsošbuachecá y inye ora ndoñe, cha entsemna mo canye olëshcá, mar béjayoca binjia nye cátatoye jtsambayana. <sup>7</sup> Chca ama entšá ndoñe chaondëtsejuabná, Bëngbe Utabnábentšana ndayánaca jatóyëngacñama. <sup>8</sup> Cha jtsemnana canye entšá, mora canye soye juabnayá, pero chentšana inyetsá jatójuabnañana. Chca, cha jtsiyenana nyetsca soyëngama uta soye jtsejuabnayëse, y chca cha ndoñe ntsobenana tondaye puerte tšabá jamama.

<sup>9</sup> Chë Jesucristbeñe ošbuachiyá, ndbomñejema y ndoñe yapa uámana entšá tomná, corente oyejuayá chaotsemna, er Bëngbe Bëtsabe bominyiñe cha canye uámana entšá jtsemnana; <sup>10</sup> y chë bomnánaca puerte oyejuayá chaotsemna, Bëngbe Bëtsá chábioye nduámana entšá chabojábema ora, er mo chë shacuaniñe uantšefjushacá, cha ndoñe nyets tempo quem luarentše ntjéftsiyenana. <sup>11</sup> Shinye tojábocna y becá tojojënyana ora, chë shácuaana jtsebuashana, chë uantšefjúsha jtsátsatšana y chabe uabótamanana ya ndoñe más ntsebínynana. Cachcá chë bomná, echanjóbana nye cachabíama más becá crocénana onguayíñe chaojtsemna ora.

### *Bacna soye ocochënguentsana tšabá jabocnana*

<sup>12</sup> Oyejuayá chaotsemna chë entšá chë padecena soyënguentsana tšabá tojëtšbocná, cabá Jesucristbeñe ošbuachiyá; chama Bëngbe Bëtsá chabíama oyejuayá echántsemna y echanjama chë nyetsca tescama yomna tšabe vida cha chaotsebomnana, mo uacananancá chabe ošbuáchiyama. Chë soye Bëngbe Bëtsá tojašebuachená nyetscanga cha imobobonshánëngbioye. <sup>13</sup> Nderado nda bacna soye jamama tbojócochëngo, ndoñe chaondëtsejuabná Bëngbe Bëtsá chca cháftaca yojtsama ca; er Bëngbe Bëtsá ndocna te bacna soye jamama jócochënguana, y cha ndoñe ntsamana ínjenaga bacna soye jamama chaócochënguama. <sup>14</sup> Inyetsá endmëna, canya bacna soye jamama jócochënguana, bacna juabnënga tojtsebomna ora; cha chiñe nye jësejuabnayana y chë soye jtsasjayana cha chca jamama. <sup>15</sup> Nda yapa bacna soyënga tojtseboše, cabana cha pronto chë bacna

soye jamana; y nda sempre bacna soyënga tojtsama, chama Bëngbe Bëtsá nyetsca tescama bochanjacastíga.

<sup>16</sup> Atšbe bonshana catšátanga, ndoñe matenoíngñana, jtsejuabnayëse Bëngbe Bëtsá yojtsama tšëngaftanga bacna soyënga chašmotsamama ca. <sup>17</sup> Nyetsca tšabe soyënga y chë puerte tšabe soyënga tsbanánocana endobá, Bëngbe Bëtsá chë Taitábiocana. Y cha chë shinÿe, juashcona, y nyetsca chë celoca yobuashinÿinÿana soyënga tojamá, nyets tempo nÿe cachá uesomñe y ndoñe inÿa ntjátsmënana. <sup>18</sup> Cachá jamama tojánbošenayeca, bënga chábenga šojánabiamá, bënga chabe ndegombre palabrenga jouenëse. Cha chca tojama, lempe ntšamo Bëngbe Bëtsá quem luarentšë tojamentšana, bënga chë natsanënga chábenga chamotsemnama.

#### *Ntšamo ndegombre yomna Bëngbe Bëtsábioye tšabá jadórama*

<sup>19</sup> Atšbe bonshana catšátanga, quem soyama šmochtsenójuabnaye: nyetsca tšëngaftanga cmontsamna sempre jtseprontánana jouenama; pero jóyebuambayamna jobátmana y ínÿengaftaca jetnámna. <sup>20</sup> Inÿaftaca tbojetna ora, canÿe entšá ndoñe ntsamana ntšamo Bëngbe Bëtsá yobošcá, chë nyetsca soyënguiñe tšabá jtsamana. <sup>21</sup> Chcasna, šmochtsajbaná bacna soyënga jtsamëse oyenana, y amana nyetsca soyënga ndoñe ntšamo Bëngbe Bëtsá yomandacá; y chë Bëngbe Bëtsá tojama tšëngaftangbe ainaniñe chaómashënguama buayenánana, ntjatosoberbnaycá šmochjóyëngacñe. Chë buayenánana chašmojóyeunase, echanjopódia tšëngaftanga atsebácanënga jtsemnama.

<sup>22</sup> Ndoñe quecmátamna nÿe chë Bëngbe Bëtsabe buayenánana jouenana, ndayá ntšamo cha tojayancá aiñe jtsamana; ndoñe chca šmontsamëse, cach tšëngaftanga šmontsenoíngña. <sup>23</sup> Nda nÿe chë buayenánana tojouena, pero betesco tbojtsebnatjëmbe y ndoñe tontsama ntšamo chiñe tojtsayancá, cha jtsemnana mo canÿe entšá chabe jubiá espejuiñe tojtsenonÿacá: <sup>24</sup> chana cachá jtsenónÿayana, pero chë espejo tojabuertaná ora, jtsebnatjëmbana ntšamo cha bëtsemnama. <sup>25</sup> Pero nda ntšamo tojouencá ndoñe tbonjebnatjëmbe, y sempre tojtsejuabná chë entšanga játsebacama Bëngbe Bëtsabe puerte tšabe mando chabosertama, y tojtsiyena ntšamo chë mandënguentšë endayancá, lempe ntšamo chë entšá chaojtsamiñe oyejuayá Bëngbe Bëtsá bochanjábema.

<sup>26</sup> Nderado nda tojtsejuabná Bëngbe Bëtsábioye ibojtsadorana ca y chë Bëngbe Bëtsábioye adoryá ntšamo ibomncá cha yojtsama ca, pero ndoñe tontsobena bacna soye oyebuambnayana jtsajbanana, cachá yojtsenoíngña, y nyetsca soyënga ntšamo tojtsamcá Bëngbe Bëtsá jadórama, chabiamá tondaye ntsámanana. <sup>27</sup> Bëngbe Bëtsá chë Taitabe bominiñe, chë puerte tšabe y ndegombre soyënga, ndayá entšá ibojtsemna jamana endmëna: chë uajchonga y viudanga corente ngmënënga tmojtsemna ora jujabuáchana, y ndoñe bacna soyënga játamana, mo chë nÿe quem luarama enójuabnayënga mondbetsamcá.

## 2

#### *Nyetscanga tšabá jtsatenonÿayëngana*

<sup>1</sup> Tšëngaftanga, Jesucristbeyeca atšbe catšátanga, šmondošbuaché Bëngbe Utabná Jesucristo, chë puerte bëtšá y uamanábeñe; chíyeca tšëngaftanga cmontsamna nyetsca entšanga cachcá jtsatenonÿayëngana. <sup>2-3</sup> Nderado tšëngaftanga cánÿentšë šmojénefjna, y chora canÿe bomna entšá tojášhango castellano ntšabuchëtjonëfjangaca y uámana entšayéjuangaca bopormaná, cha botamana šmojúmashëngo y mëntšá šmojuayana: “Moca quëfseroca mabesótbema ca”. Pero cachca ora, canÿe ndbomnjëjema tojášhango uandocuenta entšayá uichëtjoná, y cha šmojuayana: “Acna choca tsanana cochtsemna o chafjoca mótbema ca”. <sup>4</sup> Chca tšëngaftanga ya šmontsama cach tšëngaftanguentšë báseftanga más uámanënga ínÿengbiamá chamotsemnama, y chca šmojtsama, ana bacna juabnënga šmojtsebmna causa.

<sup>5</sup> Atšbe bonshana catsátanga, quem soye šmochjouena: Bëngbe Bëtsá quem luarentše ndbomnënga imomnënga tojabacacá, chënga canye puerte uámana soye chamotsebornama, Jesucristbeñe puerte chamotsošbuáchema; y mo otocana soyca Bëngbe Bëtsabe amëndayama chamosháchiñama. Cha imobobonshánëngbiöye chë soye jatšatayama tojašebuachená; <sup>6</sup> pero tšëngaftanga chë cuenta, mo ndoñe cach tšëngaftangcá entšanga bendmëncá chëngbiöye jtsënyayana. Ndegombre, chë bomnënga mondmëna chë nye sempre cmondbëtsamëndayënga y chë sjoñnana chë pueblentša mandadëngbiöye cmondbáunatsënga. <sup>7</sup> Y cach bomnëngnaca mondmëna chë Cristbiamana podësca oyebuambnayënga, ndábenga tšëngaftanga šmondmëna, y chabe uabaina tšëngaftangbiamana puerte enduámana.

<sup>8</sup> Bëngbe Bëtsabe uabemana palabrënguiñe mëntšá endayana: “Ndëmua entšánaca cochtsebobonshana ntšamo cach aca cuenobobonshancá ca.” Tšëngaftanga ntšamo chë Bëngbe Utabnabe mandiñe endayancá ndegombre šmojtsamëse, tšabá šmochántsama. <sup>9</sup> Pero tšëngaftanga ndoñe cachcá šmontsenonýase, chcana bacna soye jtsamana y šmojama ntšamo Bëngbe Bëtsabe leyënguiñe ndoñe yondëlesenciancá. <sup>10</sup> Y mora, canye entšá nyetsca chë leyentša mandënga tojtsobedecena, pero ndoñe tontsama ntšamo nye mo canye mando ntšamo iuayancá, cha Bëngbe Bëtsabiamana jtsemnana canya ntšamo nyetsca chë leyentša mandënguiñe ndoñe yondëlesenciancá amá. <sup>11</sup> Cach Bëngbe Bëtsá, chë “acbe shema o boyábioye ínÿaftaca ndoñe cattseíngñaye ca” tojanayaná, cachá mëntšánaca tojánayana, “ínÿabioye ndoñe catjóba ca”. Chca, nda cachabe shëmbioye ínÿaftaca ndoñe tbonjaingñé, pero aíñe ínÿabioye tbojóba, chca, Bëngbe Bëtsabiamana cha jtsemnana canya nyetsca chë leyentša mandënga ndocumpliná.

<sup>12</sup> Tšëngaftanga cmonsamna jtsóyebuambnayana y jtsamana ndayá Cristo šojanamëndacá, atsebacana entšangcá, er Bëngbe Bëtsá echanjayana ntšamo tmojamcá aíñe o ndoñe tšabá bëtsemnana. <sup>13</sup> Er chë ínÿengbiama ndoñe ngmënanana bomnëngbiama, Bëngbe Bëtsá ntjongmiacá echanjayana ntšamo tmojamcá aíñe o ndoñe tšabá bëtsemnana; pero chë ínÿengbiama aíñe ngmënanana bomnëngbiama, ntšamo tmojamcá aíñe o ndoñe tšabá bëtsemnana Bëngbe Bëtsá chaojayana ora, chënga tšabá chentšana mochanjábocana.

### *Chë ndegombre ošbuáchiyana, soyëngaca jinÿanÿiyana*

<sup>14</sup> Atšbe catsátanga, ¿ndayama cánÿabioye buanjóservia jayanana aíñe Jesucristbeñe sëntsošbuaché ca, pero cha ínÿengbiama tšabe soyënga ndoñe tontsama, y chca, ntšamo cha tojtsamcá ndoñe tontsinÿanÿná cha Jesucristbeñe yošbuáchema? Ndegombre, cha nye chca tojtsichámëse, ndoñe ntso podënanana cha atsbocaná chaotsemnana. <sup>15</sup> Nderado canye boyabása o shembása ošbuachiyá entšayá tbojtsabuáshbena y saná chë te jasám-naca tbojtsebuáshbena, <sup>16</sup> y canya tšëngaftanguentšá tbojauyana: “Diošoftá, sësnama ndoñe chacondëtsepadecena y becá chacuatoshachá ca”, pero chca chaotsemnana chábioye tondaye tbonjatšetase, ¿ndayama nantsoservena chca jayanana? <sup>17</sup> Cachcá, nda tojayana Jesucristbeñe yošbuaché ca, pero ndocna tšabe soyënga tontsama, chë ošbuáchiyana bomnana jinÿanÿiyama, nye chca ošbuáchiyana jtsebornana tondayama ntsoservënanana.

<sup>18</sup> Pero nderado ndánaca mëntšá echanjayana: “Aca Jesucristbeñe icošbuaché, pero atšna ínÿengbiama tšabe soyënga séntsama ca.” Chora atše stjojuá: “Šminÿinÿé ntšamo canya nantsobena Jesucristbeñe jtsošbuáchiyana, chca chaotsinÿnana tondaye ntsamcá, y chora, ndayá tijamama atšbe ošbuáchiyana cbochjinÿinÿiye ca.” <sup>19</sup> Aca condošbuaché nye canye Bëngbe Bëtsá yomnana y chca tšabá contsama; pero chë bacna bayëjëngnaca chiñe jtsošbuáchiyana, y chë causa chënga uatjana jtsebornama y jtsangmëmnyana. <sup>20</sup> Ndoñe obëjema cattsemna; ndegombre cbochanjinÿinÿiye nderado nda Jesucristbeñe tojtsosbuaché, pero tondaye tontsama chca chaotsinÿnana, chabe ošbuáchiyana tondayama ntsoservënanana. <sup>21</sup> Bëngbe Bëtsá tojánayana chabe

bominýiñe Abraham, bēngbe tempsca bēts taitá, tšabia yojamna ca; chca tojánayana, er Bēngbe Bētsá tbojanmandá ora, yojtseprontana chabe uaquiñá altariñe jóbama, cach Bēngbe Bētsábioye jētschuayama. <sup>22</sup> Aca contsobena Abrahámbeñe jinýama, cha Bēngbe Bētsábeñe yojanošbuáchema, y soyēnga yojánama chca chaotsinýnama; y ndayá cha tojanmama entsinýinýena, cha ndegombre puerte bētsá yojanošbuáchema. <sup>23</sup> Chca tojanopasá ntšamo Bēngbe Bētsabe uabemana palabrēnguiñe endayancá, mēntšá: “Abraham Bēngbe Bētsábeñe yojtsošbuáchiye, y chama Bēngbe Bētsá tojánayana chabe bominýiñe cha tšabia yojamna ca.” Y Abraham entsanabaina Bēngbe Bētsabe amigo ca.

<sup>24</sup> Y tšēngaftanga šmontsetátšēmo, Bēngbe Bētsá ináyana canýe entšá chabe bominýiñe tšabia yomna ca, chē entšá ndayá tojtsamama, chabe ošbuáchiyana chaotsinýnama, y ndoñe nýe ošbuáchiyana tojtsebomnama. <sup>25</sup> Cachcá tojanopasá Rahab, chē bacna vida bomna shembásaftaca; Bēngbe Bētsá tojánayana chabe bominýiñe cha tšabia yojamna ca, er cha canýe tšabe soye tojanma. Cha chē noticia uambaye judiēnga posada tojanéyentšame, y chentšana tojanéjabuache inýe benachējana chamuáisebocanama, chē pueblentša soldadēngbiama chamotsachetama. <sup>26</sup> Lempe básefta palabrēnguiñe jayanamna mēntšá entsemna: ntšamo canýe cuerpo, espíritu ndbomna cuerpo, pronto jóbana, cachcá chē ošbuáchiyana, ndocna soyéngaca tontsemna, chca chaotsinýnama, tondayama ntoservénana.

### 3

#### *Bichtájaca tšabá jóyebuambayama endmēna*

<sup>1</sup> Jesucristbeyeca atšbe catšátanga, ndoñe yapa buátēmbayēnga tšēngaftangbeñe chamondétsemna; er tšēngaftanga ya šmondétatšēmo, bēnga, chē entšanga abuátambayēngbiama, chē castigo más bētsá yochtsemnama, Bēngbe Bētsá ndoñe tmonjóyenuase, ntšamo entšanga tmojamama aínē o ndoñe tšabá bétsemnama cha chaojayana ora. <sup>2</sup> Bēnga nyetscanga nyetsca bacna soyēnga mondbétsama. Nderado nda oyebuambnanyiñe ni mo canýe bacna soye tonjama, chē entšá puerte tšabia jtsemnana, ntšamo Bēngbe Bētsá yobošcá jtsiyenēse, y cha yojtsobena cachá sempre jtsenomándayama.

<sup>3</sup> Chē couayēngbioye freno tmojuayashbé ora, ntšamo bēnga tmojtsebošcá chēnga mochántsama, y bēnga cachora jtsobenana ntšamo nyets chēngbe cuérpoca tmojtsamcá jtsemándayana, y ndoñe nýe chēngbe bestšaše. <sup>4</sup> Barquēshamnaca šmochjenójuaboye. Masque tša bētsétsacuemēngá y tša jabuache binýiēnga chē barco jtsējuatsentšnayana, chē uamanéjayēnga chē barco juyambana ndayējana tmojtsebošcá, y chca, nýe canýe base soyetémaca, timón ca uabainétémaca. <sup>5</sup> Cachcá, chē bichtaja cuerpiñe canýe base soyetema endmēna, pero chē bichtájaca entšanga jtsenábotamnayana bēts soyēnga tmojamama. Šmochjouena, canýe base íñeshe jtsobenana canýe bēts tjañe juangbotjuama. <sup>6</sup> Y chē bichtaja endmēna mo canýe íñeshcá, mo canýe luare ndayentše puerte bacna soyēnga tobinýncá. Chē bichtaja jtsobenana bēngbe cuerpentše puerte bacna soyēnga bēngbiama jamama. Mo canýe íñeshe becá tojtsendbiamnacá, chē bichtájaca tcojtsichamo ndoñe tšabe soye, jtsobenana bacna soyēnga bēngbiama jamama nyets tempo quem luarentše tmuettsiyenēntscuana; y mo nda ndayá tojtsangbotjuacá, Satanás jtsobenana chē bichtaja jtsemándayana, bacna soyēnga chaotsamama.

<sup>7</sup> Entšá endobena jtsaméndayana nyetsca tjoica bayēnga, shloftšēnga, osjojnayēnga y buyeshiñe oyena bayēnga; y ndegombre mora entsamēnda; <sup>8</sup> pero ndocná tonjobená chē bichtaja jtsemándayana, chca, bacna soyēnga amana chaotsajbanama. Chē bichtaja jtsamana bētsá bacna soyēnga cada te chauétsebinýnama, y mo canýe mētšcuaycá veneno jtsebomnana jóbama, chē bichtájncaca cachcá endmēna. <sup>9</sup> Bichtájaca bēnga puerte tšabá Bēngbe Bētsá y Taitabiama jtsichámuana, y cach bichtájaca bēnga puerte bacá entšangbiama mondbétsichamo, masque Bēngbe Bētsá cachacá enoparecēnga chēnga tojábama. <sup>10</sup> Cach uayásentšana jtsóbocanana Bēngbe Bētsabiama tšabe palabrēnga y entšangbiama bacna palabrēnga. Jesucristbeyeca atšbe catšátanga,

chca ndoñe chaondétsemna. <sup>11</sup> Canye béjaye obocanentšana ndoñe ntsopodénana tšabe búyeshe chaóbocnama y cachentšana untja búyeshnaca. <sup>12</sup> Ntšamo canye higo betiyentšana ndoñe ntsopodénana olivosëshenga jashacama, y canye uvas betiyentšana ndoñe ntsopodénana higuëbenga jashacama, cachcá, atšbe catsátanga, tamona búyeshentšana ndoñe ntsopodénana tšabe búyeshe chaóbocnama.

#### *Bëngbe Bëtsábiocana óbocana osertánana*

<sup>13</sup> Nderado tšëngaftanguentše tojtsemna canye puerte tatšëmbuá y osertaná, cha bontsemna, chca yomnama entšanga jinýanýiyana, tšabe soyënga amana jtsiyenëse y chë ntjatosoberbnaycá tojama soyëngaca; y cha chca jamana, puerte osertaná bëtsemnama. <sup>14</sup> Pero tšëngaftangbe ainaniñe yapa ínýabioye šmojtšántšaboše y nye ínýenga chamotjáyana soyënga šmojtšama, as ndoñe šmattsenábotamnaye osertánënga y tšábënga šmomnama, er ndegombre Bëngbe Bëtsabe osertánana tšëngaftanga ndoñe šmontsebmna. <sup>15</sup> Er chca osertánana, Bëngbe Bëtsábiocana ndoñe ntsóbocanana, ndayá nye quem luarama enójuabnayëngbentšana, nye entšangbe juabnentšana, y canye bacna bayéjbentšana. <sup>16</sup> Ndayentše entšanga yapa tmojtšénántšaboše, y nye ínýenga chamotjáyana soyënga tmojtšama, chentše tondayama quemochátenëyuanana y nyetsca bacna soyënga mochántšama.

<sup>17</sup> Pero chë Bëngbe Bëtsábiocana óbocana osertánana bomnënga, nyetsca soyamna, natsana puerte tšabe vídaca jtsiyenana, bacna soyëngaca ndëmandánënga; y chënga jtsemnana chë ínýenga ndoñe chamondétsentsjanama amënga, tšábënga y sempre jtseprontánana ínýenga joyaunayama. Y cach quemënga jtsemnana ínýengbiama ngménana bomnënga, sempre tšabe soyënga jtsamana, cachcá nyetsca entšángbioye jtsénýayana, y ntšamo ndegombre tojtsemncá jtsichámuana y jtsamana. <sup>18</sup> Ntšamo canye jená, botamana shajuana jtsebmnama tšabe jénaye jájena, cachcá, sempre natjémbana jtsiyenama bošëngna, natjémbana ínýengaftaca jtsiyenana, chca, nyetsca entšanga chamotsamama ntšamo Bëngbe Bëtsabe bominiñe tšabá yomncá.

## 4

#### *Šmochtsiyena Bëngbe Bëtsá tšëngaftangbeñe jtsemándayëse*

<sup>1</sup> ¿Ndayentšana chë tšëngaftanga jtsentsjanayama y jtsenpenzétsiyayama yóbocana? Endóbocana chë tšëngaftangbe bacna juabnënguëntšana, nye cach tšëngaftanga tšabá jtsomñama; y chë soyënga tšëngaftangbe ainaniñe sempre chë tšabe juabnëngama contra jésemnana. <sup>2</sup> Tšëngaftanga ndayánaca jtsebmnama šmojtseboše, pero chca jtsebmnama ndoñe šmontsobena, as jtseprontánana ínýengbioye jtsëbáyama. Inýa ntšamo tobomncá tšëngaftanga tša jtsántšabošana, y chë soye jashjáchama ndoñe šmontsobena ora, ínýengaftaca jentjáyangana y jtsenpenzétsiyayana. Ntšamo šmojtsebošcá ndoñe ntjobenayana jtsebmnama, Bëngbe Bëtsá chama ndoñe šmondbotjañe causa; <sup>3</sup> y chë soye šmojtjañe ora, tšëngaftanga ndoñe ntjýëngacñana, ndoñe botamana chë soye šmondbotjañe causa, er tšëngaftanga chë soye jtsebošana nye chaoservema oyejuayënga bacna soyënguiñe jtsomñama.

<sup>4</sup> ¡Tšëngaftanga, Bëngbe Bëtsá bobonshánana šmojtšajbananga! ¿Ndoñe šmondétatšëmbo, chë jtsebošana nye quem luarama enójuabnayëngbe amigo jtsemnana y nye quem luarentša soyënga jtsebmnama, chca, canye entšá Bëngbe Bëtsabe uayayá jtsemnana? Ndánaca tojajuabó nye quem luarama enójuabnayëngbe amigo jtsemnana, chca, canye Bëngbe Bëtsábioye uayayá jóbemana. <sup>5</sup> Ndoñe nye bonamente Bëngbe Bëtsabe uabemana palabrënguiñe mëntšá endayana: “Chë Bëngbe Bëtsá tbojanichmó bëngbe ainaniñe chaotsiyenama Uámana Espiritu, puerte entseboše nye Bëngbe Bëtsá canya bëngbe amëndayá chaotsemnana ca.” <sup>6</sup> Pero Bëngbe Bëtsá, bëngbe tšabiama jtsejuabnayëse bënga jtsëjabuáchanana, chíyeca Bëngbe Bëtsabe uabemana palabrënguiñe mëntšá endayana:

Bëngbe Bëtsá chë nÿe cachënga uámanënga tmojtsenobiamnangbe contra entsemna, y chë ndoñe uámanënga montsenobiamnangbiamna, Bëngbe Bëtsá más tšabe juabna entsebmna ca.

<sup>7</sup> Asna, tšëngaftanga šmochtseprontana nÿe Bëngbe Bëtsá chacmotsamëndama; ntšamo Satanás tcmojtsamëndacá ndoñe šmattsama, y cha cachora tšëngaftangbentšana echantsachá. <sup>8</sup> Bëngbe Bëtsábioye šmochtobeconá, y cha echanjama tšëngaftanga ntšamo cha yomnama chacmotsësertánama. Tšëngaftanga bacna soye amënga, cach tšëngaftangbe cucuatšëngaca tšabe soyënga šmochtsama, bacna soyënga ndoñe. Tšëngaftanga chë inÿe ora jtsejuabnayana Bëngbe Bëtsá jtsebobonshánama, y inÿe orna, nÿe quem luarentša soyënga jtsebmnama, šmochtsajbaná bacna soyënga jamama bošana, chca, nÿe tšabe juabnënga tšëngaftangbe ainaniñe chašmotsebmnama. <sup>9</sup> Tšëngaftangbe bacna soyëngama ngménaca šmochtsemna, šmochjenóbošachna y cochtsetšenánënga šmochjóyebuambaye. Jatenbiajuayamna, šmochjenóbošachna; y joyejuayëngamna, ngménaca šmochtsemna. <sup>10</sup> Bëngbe Bëtsabe delante bëtsétsanga ndoñe šmattsenobiamnaye, y cha más uámanënga cmochanjábiana.

*Inÿengbiana ndoñe ntsichámuana ndoñe tšabá tmonjama ca*

<sup>11</sup> Jesucrístbeyeca catšátanga, inÿengbiana bacna soyënga ndoñe šmattsóyebuambaye. Nda cachabe catšatbiana bacna soye tojtsichamo o tojayana ntšamo cha tojamcá ndoñe tšabá yontsemna ca, cha chora chë leyentša mandënga ndoñe ntsocumplínana y jtsichámuana chë leyentša mandënga tondayama yontsoserverna ca. Y chë leyama chca tcojtsichámëse, cach ley jocúmplia cuenta, contsobiamná canÿe ichamuá chë ley aíñe o ndoñe yondoservénama, y chca ndoñe quecmátmëna jtsamana. <sup>12</sup> Chë ley tojuapormá cha nÿe canÿa endmëna, Bëngbe Bëtsá, y cachá endmëna ntšamo entšanga tmojamcá aíñe o ndoñe tšabá bëtsemnama ichamuá, y cachánaca entsobena entšanga játsebacama o nÿetsca tescama jácastigama. Y acna, ¿ndase cmëna ndëmua entšabiámnaca jobenayama jatichámuama ntšamo tojamcá aíñe o ndoñe tšabá bëtsemnama?

*Ndayá yëfse yochjatëchnënguama ndoñe ntsótatšëmbuana*

<sup>13</sup> Y mora quem soye šmochjouena, tšëngaftanga chë šmondbétsichamo: “Mënté o yëfse quemoye o chë inÿe bëts puebloye fchanjanga, y chentše canÿe uata fchanjéftsemna ba soyënguñe trabájayiñe, y ndegombre beca fchanjónÿena ca.” <sup>14</sup> ¡Pero ni mo ndayá yëfse tšëngaftangaftaca yochjochnënguama ndoñe quešmátstatšëmbo! Tšëngaftanga ndoñe quešmátstatšëmbo ndayëntscuana vida šmochjéftsebmna, y chca, tšëngaftanga šmondmëna mo canÿe jantšetëshcá, chëshe mora jónÿnana y nÿe ndeolpe jatenatjëmbana. Tšëngaftangaftaca cachcá echanjopása. <sup>15</sup> Tšëngaftanga mëntšá cmontsamna jayanama: “Bëngbe Bëtsá quešojalesenciase, ainënga fchántsemna y quem soye o chë soye fchanjama ca.” <sup>16</sup> Pero chë cuenta, tšëngaftanga bëts soyënga šmochjamama sempre jtsenábotamnayana, ndayá tšëngaftanga chašmomama Bëngbe Bëtsá yochjalesenciaca ntsetatšëmbcá; y chca jtsamana ndoñe tšabá quenátsmëna. <sup>17</sup> Nda tojtsobena ntšamo tšabá yomncá jamama, pero ndoñe chca tonjama, cha canÿe bacna soye jtsamana.

5

*Chë bomnënga jábuayenama*

<sup>1</sup> ¡Quem soye šmochjouena, tšëngaftanga chë bomnënga! ¡Chë tšëngaftanga šmochtsesufrínama šmochjenóbošachna y uatjananënga šmochtseyoye! <sup>2</sup> Tšëngaftangbe bomnana buajónana janguánana entsemna, tondayama quenátoserverna, y chë entsáyëjuangá mejëjonga montsasá. <sup>3</sup> Tšëngaftangbe castellano y midio tojtsengúsheshe; y chë ngúsheshna echántsinÿinÿnaye tšëngaftanga chë crocenánaca ndoñe šmonjanmama ntšamo inÿenga jujabuáchama yojamncá; chë causa, nÿetsca tescama cmochántsapochocaye, ntšamo chë íñeshe canÿe soye



endbetsepochoacá. Tšëngaftanga quem tempo bomnana šmojtsejuabá, y mora quem luare jopochócama ya entsobeco. <sup>4</sup> Tšëngaftanga chë tšëngaftangbe fshantsënguine tmojëftsetrabajanga ndoñe šmontanëbuénaye, y mora šmochjouena, chënga chama cmontsachembuanama. Bëngbe Utabná nyets obenana bomná, chë trabajayëngbe chembuanana ya tojouena. <sup>5</sup> Quem luarentše tšëngaftanga šmondoyena ba botamana soyëngaca y nye ntšamo cach tšëngaftanga šmobošcá jtsamëse. Ntšamo canye uacná jóbana, minyicá tojtsemna ora, cachcá tšëngaftangbiana entsobeco chë te, ndaye ora Bëngbe Bëtsá echanjama castigánënga chašmotsemnama, er puerte bacna soyënga šmojama. ¡Chë castigo jtsebinýnama tempo ya entsobeco! <sup>6</sup> Tšëngaftanga, chë puerte tšabá amëngbiana šmojayana jóbanama yojtsemna ca y šmojtsëbaye, chca ndoñe chaondëtsemnama chënga ndocá jamama ntsobencá.

*Chë uantado jtsemnana y chë Bëngbe Bëtsáftaca jencuéntama ora*

<sup>7</sup> Pero tšëngaftanga, catšátanga, uantádoca šmochjobátma Bëngbe Utabná yochjésabo orscama. Chë jajañe trabajayá tojtsobátmana bëtscá tšabe shajuanënga jobuátbanama, jtsotocánana natsana uantádoca jobátmana chë jajañama uaftena tempo chaóshjanguama. <sup>8</sup> Tšëngaftangnaca uantadënga šmochtsemna, y tšëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

<sup>9</sup> Jesucristbeyeca catšátanga, ntšamo ínÿenga tmojtsamama ndoñe nye šmattsoquejana, Bëngbe Bëtsá tšëngaftangbiana ndoñe chaondayanama, ntšamo šmojóye-buambama ndoñe tšabá šmonjama ca. Y nda yochjayana ntšamo entšanga tmojamcá aíñe o ndoñe tšabá bëtsemnama, ya entsebeconá. <sup>10</sup> Atšbe catšátanga, chë tempsquënga Bëngbe Bëtsabe juabna oyebuambnayënga, ndëmuanÿenga entšanga tmonjanabuayená Bëngbe Utabná jótšëmbonëse, chënga bëngbioye šonjëftsaniñanÿiye ntšamo tmojansufrima, ntšamo šojtsamna uantadënga jtsemnana tmojtsesufrina ora; y chca tšëngaftanga cmontsamna jtsamana. <sup>11</sup> Bënga chëngbiana fsëndbëtsejuabnaye oyejuayënga imojamna ca, chë tmojansufrí ora Bëngbe Bëtsábeñe imojanobátmana ainaniñe añemo jtsebomñëse. Tšëngaftanga šmojouena ntšamo Job ainaniñe añémoca Bëngbe Bëtsábeñe yojanobátmana, puerte padecena soyënguine yojasufrina ora; y šmondétatšëmbo ntšamo Bëngbe Bëtsá cabana chábioye tbojancuedama, y chca yojamna Bëngbe Utabná entšangbiana puerte ngmená yómnyeca.

<sup>12</sup> Pero masna, atšbe catšátanga, ndayá jamama chašmojašbuachená ora, chca ndoñe šmatjama jajúrase ni celocama, ni quem luarama, ni ndocna inÿe soyama. Tšëngaftanga aíñe ca jayanama šmojtsebošëse, nye aíñe ca šmochjayana, y ndoñe casna nye ndoñe; chca, Bëngbe Bëtsá ndoñe chaondayana ndoñe tšabá šmonjama ca júraye causa.

<sup>13</sup> Nderado nda tšëngaftanguentšá puerte ngménaca tojtsemna, cha bontsemna Bëngbe Bëtsá chama jaimpádama. Y nderado nda oyejuayá tojtsemna, cha bontsemna jacántana Bëngbe Bëtsá jëtschuayama. <sup>14</sup> Nderado nda šocá tojtsemna, cha bontsemna chentša ošbuachiyëngcá enefjuanéngbeñe bëtsëjemëngcá amëndayënga jáchembuana, chënga Bëngbe Bëtsá chabiana chamoimpadama, y Bëngbe Utabná jótšëmbonëse aceitiye chamuanëtjuama. <sup>15</sup> Y tšëngaftanga, puerte jtsošbuáchiyëse Bëngbe Bëtsá chašmojaimpadá ora, chë šocá salud echántinÿena, y Bëngbe Utabná echanjama cha tšabá cachiñe chaotsatsmënama; y nderado cha bacna soyënga tojamëse, Bëngbe Bëtsá bochantseperdóna. <sup>16</sup> Chíyecna, chë bacna soyënga šmojtsamama šmochjobuambaye, y Bëngbe Bëtsá nyetscangbiana šmochtseimpadana, chca, tšabá mo shnanëngcá chašmotsemnama. Canya ndabiama Bëngbe Bëtsá tojayana chabe bominiñe tšabia yomna ca, cháftaca tbojencuentá ora, chánaca ba tšabe soyënga jóyëngacñana, y jobenayana bëts soyënga jamama. <sup>17</sup> Bëngbe Bëtsabe juabna oyebuambnaya Elías, mo cach bëngcá canye entšá inamna, y puerte jtsošbuáchiyëse ndoñe chaonduaftema Bëngbe Bëtsábioye tbojanimpadá ora, quem luariñe mo unga uata y tséntsañe ndoñe tonjanafté. <sup>18</sup> Chentšana, Bëngbe Bëtsábioye cachiñe tbojtanimpadá ora, quem luariñe tojanafté y cachiñe chë jajañenache bëtscá saná yojtsatsbinýna.

<sup>19</sup> Atšbe catšátanga, nderado nda tšëngaftanguentšá tojtsajbaná chë ndegombre soyënga jtsamana, pero inya chábioye tbojuájabuache cachiñe chë tšabe benache cháuatishachama, <sup>20</sup>tšëngaftanga šmochtsetátšëmbo, ndánaca chë bacna soye amábioye tbojuájabuache chabe ndoñe tšabe videntšana cháuissebocnama, cha chë nyetsca tescama castigüentšana chábioye jatsbocana, y jamana ba bacna soyëngama cha perdonaná chaotsemnama.

## 1 San Pedro

### *Jacheuayama*

<sup>1</sup> Atše Pedro, Jesucristbe ichmoná, quem tsbuanácha sentsabiamná chë cachëngbe luarentše ndoñe mondoyenëngbiana, chë Ponto, Galacia, Capadocia, Asia y Bitinia luarënguenache ujquëshenënga imoyenëngbiana. <sup>2</sup> Sentsabiamná chë Bëngbe Bëtsá Bëngbe Taitá tojánabacacangbiana, ntšamo cachá jamama yojanjuabnacá y ntšamo jopásama yojantatšëmbcá, cabá chca ndochnëngo ora; Uámana Espíritbeyeca, Bëngbe Bëtsá tojama tšëngaftanga chabe entšanga chašmotsemnana, Jesucristo chašmotseyeunana y Bëngbe Bëtsabe delante tšabá chašmotsatsmënana, bacna soyënga abajuánënga. Y Bëngbe Bëtsá chca tojanma, Jesucristbe buiñe juabuáshanëse, cha tojanóbanayeca. Atše bëtscá séntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnana, y chaoma tšëngaftangbe ainaniñe tšabe ebionana chašmotsebomnana.

### *Bëngbe Bëtsábeñe jtsošbuáchiyëse vida jtsebomnana, atsebácanënga jtsemnana*

<sup>3</sup> Bëngbe Bëtsá y Bëngbe Utabná Jesucristbe Taitábioye matschuanga; cha puerte lastemado ínÿengaftaca yómnayeca, tojanma bënga tsëm juábnaca vida chamotsebomnana, bëngbioye bacna soyënga jabajuánase, Jesucristo cháuatayenama tonjánmayeca. Chiyeca bënga montsobena chábeñe jtsoátmanana sempre y nÿetsca tescama, ndayá cha šochjátšatayama. <sup>4</sup> Ndayá bënga šochjátšataycá ndoñe quenátsmëna jëftsoPOCHÓCAMA opodena soyënga, ndayá nÿets tempo tšabe soyënga. Y bënga mondobátmana jójëngacñama ndayá Bëngbe Bëtsá chabe entšanga jatšatayama tojašebuachenacá, ndayá celoca bëngbiana cha yojtsinÿena. <sup>5</sup> Chë soyënga tšëngaftangbiana entsemna, Bëngbe Bëtsábeñe šmošbuáchema; cha chabe obenánaca cmondánÿena, tšëngaftanga jatsebacama. Cha chca jamama ya tojaprontá y echanjínÿanÿiye, Cristo jésabama tempo chaojóshjango ora.

<sup>6</sup> Chiyeca tšëngaftanga tša oyejuayënga šmojtsemna, masque nderado jtseytana inÿe ora, nÿetsca padecena soyënguiñe jasúfriase chašmuachnënguama. <sup>7</sup> Mo chë castellanama jtsetatšëmbuama aiñe o ndoñe tšabe castellano tomnana iñiñe fjuchnëngcá, padecena soyënguiñe tšabá chašmojachnënguse, Bëngbe Bëtsá echanjínÿanÿiye tšëngaftanga ndegombre taišmošbuáchema. Chë castellano pronto endbetsopochóca, masque chca, chana puerte endbetsámana. Y tšëngaftangbe ošbuáchiyana chë castellanama puerte más enduámana. Tšëngaftanga padecena soyënguentšana bëtš ošbuachiyánaca chašmojábocnëse, Jesucristo chaojésabo ora, entšanga mochanjinÿe tšëngaftanga šmojtsomerecena chacmotsatacheuanama, más bëtšétsanga y obenënga chácmbiamama y uámanëngnaca.

<sup>8</sup> Tšëngaftanga Jesucristo šmondbobonshana, y chábioye ndoñe chešmátaninÿe; masque mora cha ndoñe quešmatonÿá, tšëngaftanga chábeñe šmontsošbuaché, y šmontsebomna canÿe puerte tšabe oyejuayana, y ntsachetšá chana yomnana ndoñe quešmátobena jayanama, tša bëtscá causa. <sup>9</sup> Chca oyejuayana tšëngaftanga šmontsebomna, er ndayá tšëngaftanga jtsošbuáchiyëse šmobatmancá, ya šmojtsosháchichana, chë Bëngbe Bëtsá tšëngaftanga jtsatsebacyana.

<sup>10</sup> Bëngbe Bëtsabe juabna oyebuambnayënga ya imojanatsjendá y imojanguá jtsetatšëmbuama, ntšamo Bëngbe Bëtsá entšanga jatsebacama, y tmojanoyebuambá ndayá Bëngbe Bëtsá tšëngaftanga jatšatayama, tšëngaftangbiana tšabe juabna cha yobómnayeca. <sup>11</sup> Chëngbe ainaniñe yojtsemna Cristbe espíritu, y ntšamo tojanëyancá, cabá chca ndochnëngo ora, yojamna Cristo jasúfriama y ntšamo chentšana Bëngbe Bëtsá chábioye puerte bëtšá bochjánbemama, Bëngbe Bëtsabe juabna oyebuambnayënga imojanjuabná y imojanatsjendá jtsetatšëmbuama chë soyënga yochjanopása ora, ndaye

tempo y ntšamo chë tempo yochtsemnama. <sup>12</sup> Pero tempo Bëngbe Bëtsá chëngbioye tojaninyänyé, chca jtsamana ndoñe cachëngbe tšabiana yonjamnama, ndayá chca jtsamana yojamna tšëngaftangbe tšabiana. Chënga tmojanoyebuambá, ntšamo chë tšabe noticiënga oyeuambnayënga tšëngaftanga tcmojauyancá. Y chca tcmojáuyana chë Uámana Espíritbe obenánaca, nda Bëngbe Bëtsá celocana tbojichmó. Chë soyënga endmëna ndayá chë angelënga muantseboše tšabá jinýama, chënga chaósertama.

*Bëngbe Bëtsá entsänga jtsachembuanana chabe entsängcá chamotsiyenama*

<sup>13</sup> Chíyeca, botamana jtsejuabnayëse tšabá jatrabájama, y cach tšëngaftanga jenomándama jtsoberëse, yejuana šmochtsobátmana, Bëngbe Bëtsá soyënga cmochjátšatayama tšëngaftangbe tšabiana jtsejuabnayëse, Jesucristo quem luaroye yochjésabo ora. <sup>14</sup> Tšëngaftanga Bëngbe Bëtsabe básenga uauenanënga quetsomñecá, ndoñe šmattsiyena ntšamo cach tšëngaftangbe bacna juabnënga yomncá nýe tšabá jtsomñama, ntšamo Bëngbe Bëtsábioye cabá nduabatma ora šmonjanbomncá. <sup>15</sup> Chamna, šmochtsiyena mo chë Bëngbe Bëtsabe entsängcá, puerte tšabe entsängcá jtsamëse, er Bëngbe Bëtsá, nda tcmojáchembo chca chašmotsemnama, sempre uamaná endmëna. <sup>16</sup> Er Bëngbe Bëtsabe uabemana palabrenguiñe mëntšá endayana: “Tšëngaftanga Bëngbe Bëtsábeñe uámanënga šmochtsemna, er atše uamaná sëndmëna ca.”

<sup>17</sup> Tšëngaftanga Bëngbe Bëtsábioye šmondbuyana “Taita ca”, šmondbótšëmbona ora. Bëngbe Bëtsabiana nyetscanga cachcá mondmëna. Chíyeca, ntšamo nyetscanga tmojamama tšabá o ndoñe tšabá yontsemna ca cha yochjayana ora, cha chca echanjama nýe ntšamo chënga tmojamcá jtsonýayëse. “Taita ca” chábioye šmondbuyánayeca, quem luarentše šmochtsiyenëntscuana sempre šmochtsejuabnaye cha nyetscangbiana más bëtsá yomnama, chë šmojtsama sóyeca chca jtsinýanýayëse. <sup>18</sup> Tšëngaftanga šmondétatšëmbo, Jesucristo, mo nda ínýengbioye játsebacama crocénana cuafjësajocá, tonjanóbana tšëngaftanga játsebacama, chë nyetsca soyënga nýe bonamente jtsamëse oyenentšana, ntšamo jtsiyenama tšëngaftangbe bëts taitángbentšana šmojanatsjinýcá. Cristo ndoñe checmatanatsebacá, yopodena jtsopochócama soyënga jëtsjájuase, mo crocénana o castellancá, <sup>19</sup> ndayá cachá jóbane, chabe uámana buiñe juabuáshanëse. Cristo chë ndocna bacna soye ndbomná, tonjanóbana ora enjamna mo canýe oveshatemcá, tondaye ndbemaná, ni tsengana ndbomná, Bëngbe Bëtsábioye jëtschuayama altaroca obaná. <sup>20</sup> Chama Bëngbe Bëtsá Crístbeñe tojanjuabó y tbojanábuayana, cabá quem luare ndëtsemna ora; pero quem tempo, Cristo entsängbeñe tonjábocna tšëngaftangbe tšabiana. <sup>21</sup> Crístbeyeca, tšëngaftanga šmondošbuaché Bëngbe Bëtsábeñe, nda tonjanma Cristo cháuatayenama y puerte uamaná tbonjábema. Mëntšá, ndábeñe tšëngaftanga šmošbuaché y šmobátmana, Bëngbe Bëtsábeñe endmëna.

<sup>22</sup> Tšëngaftanga šmojama ndocna bacna soyënga ainaniñe ntsebomnama, Jesucristbeyeca catšátangbioye ndegombre jtsababuánýeshanama, er tšëngaftanga ntšamo ndegombre yomncá jtsamëse, Bëngbe Bëtsá šmoyeunana. Chcasna, sempre nyets ainánaca nyetscanga šmochtsenbobonshana. <sup>23</sup> Bëngbe Bëtsá tojama tšëngaftanga tsëm vida chašmotsebomnama; pero tšëngaftanga tsëm vida šmontsebomna, ndoñe nýe quem luarentša entsänga ndayá tmojamama, sinó ndayá Bëngbe Bëtsá chë ndocna te jobanamá tojamama. Cha chca tojama cachabe palábraca, ndayá endoyebuambná ntšamo entsänga muantsobena tšabe vida jtsebomnama y chë palabra ndocna te queochaisopochóca.

<sup>24</sup> Ntšamo Bëngbe Bëtsabe uabemana palabrenguiñe endayancá:

Nýetsca entsänga mondmëna mo shacuancá,

y chënga imobomna tšabe soyënga, endmëna mo chë shacuanentša uantšëfjushangacá.

Chë shácuana jtsanctana y chë uantšëfjushangá jtsatquécjanana;

entsänga cachcá, nyets tempo quem luarentše ndoñe quemochátiyena;

<sup>25</sup> pero Bëngbe Bëtsabe palabra nyets tempo echanjesomñe ca —chiñe endayana.

Y chë palabra endmëna chë Jesucristbe tšabe noticiënga, chë buayenánana ntšamo ínýenga tcmojabuayenacá.

## 2

<sup>1</sup> Chcáyecna, nyetsca tescama šmochtsajbaná nyetsca bacna soyënga amana, ínÿengbioye áingñayana, bacna entsãnga chë ntšamo ndegombre šmojuabnacá ndinÿinÿ-nayënga ntsemnana, ínÿengbioye untšabošana, y ínÿengbiama uayátsenayana. <sup>2</sup> Mo cabá mora onÿnana šešoncá, tša jtsebošana chabe mamabe létšiyë, cachcá tšëngaftanga cmontsamna puerte jtsebošana nyets tempo Bëngbe Bëtsabe soyënga jtsebomnama, chë soyëngaca Jesucristbeñe corente chašmotsošbuáchema, y chca, atsebácanënga chašmotsemnana; <sup>3</sup> ntšamo Bëngbe Bëtsabe uabemana palabrenguiñe endayancá: “Tšëngaftanga šmojátatšëmbona Bëngbe Utabná puerte tšabia nyetscãngaftaca yomnama ca.”

*Cristo, chë mo aina ndëtšbecá endmëná*

<sup>4</sup> Bëngbe Utabnábioye šmochtobeconá, nda endmëna mo canÿe aina ndëtšbecá, ndëmuanyëse tojtsama entsãnga tšabe vida chamotsebomnama. Báseftanga cha tmojtsaboté, mo ntšamo chë ndëtšbéngaca canÿe yebna tmojtsejebuana ora, luaroca tmojtsejajó ndëtšbecá; pero Bëngbe Bëtsá chábioye tbojuábuayana, y chabe bominÿiñe cha puerte uamaná endmëna. <sup>5</sup> Chábioye šmochtobeconá, tšëngaftanga chë tšabe vida šmojóyëngacñënga, cánÿiñe mo aina ndëtšbéngcá, Bëngbe Bëtsabiama jajebuama canÿe yebnentšama chašmotsemnana; mo Bëngbe Bëtsabiama bachnangcá chašmotsemnana, nÿe Bëngbe Bëtsábioye jtseservénama jtsentsénëse, chábioye jtsatschuanayama. Ntšamo Bëngbe Bëtsábioye jtseservénama šmojtsamcá, chábioye tšabá jtsinÿanana, ndayá Jesucristo tojanmama. <sup>6</sup> Chca ndegombre endmëna, er Bëngbe Bëtsabe uabemana palabrenguiñe, Bëngbe Bëtsá Jesucristbiama mëntšá tojánayana:

Šmochjinÿe, atše sënjama Jerusalenentše canÿa chaotsemna, y cha endmëna mo chë canÿe yebna jajebuámentše chë más bëts uashacuanëšentše jajona ndëtšbecá.

Cha atšbe Uabuayaná endmëna, y atšbiama puerte enduámana.

Nda chábeñe tojtsošbuaché, ndocna te nÿe bonamente chábeñe queochátobatmana ca.

<sup>7</sup> Tšëngaftanga, chábeñe ošbuáchiyëngbiama, nda endmëna mo chë yebna jajebuámentše más bëts uashacuanëšentše jajona ndëtšbecá, cha puerte enduámana; pero chábeñe ndošbuáchiyëngbiama, entsopasana ntšamo Bëngbe Bëtsabe uabemana palabrenguiñe Cristbiama endayancá:

Chë yebna jebuanënga tmontsanaboté ndëtšbé, mora chë más bëts uashacuanëšentše entsejájona ca.

<sup>8</sup> Inÿoca, Bëngbe Bëtsabe uabemana palabrenguiñe mëntšánaca chabiama endayana:

Cha endmëna mo ndëtšbé ndayentše jtsojestjiamcá;

y mo peñëscá yomna chënga chamotsótsatsama ca.

Chënga Jesucristo jtsabotena, chabe buayenánana ndoñe ntjoyeunaycá; Bëngbe Bëtsá cabá chca ndopása ora tojanjuabó chca chaotsemnana.

<sup>9</sup> Pero tšëngaftanga šmondmëna Bëngbe Bëtsábeyeca bocacánënga, y mo canÿe rey tmojtserverna bachnangcá, y šmondmëna Bëngbe Bëtsabe entsãnga nÿe chabiama jtsetrabájayama, y chë nÿe Bëngbe Bëtsábënga šmomnënga. Y chca endmëna, tšëngaftanga chë bëts soyënga ntšamo Bëngbe Bëtsá tojamcá chašmotsabuayiynama. Cha endmëna nda tcmojáchembo chašmotsajbanama oyenana mo ndoñe binÿniñcá jtsejuabnayëse y jtsamëse, cháftaca jtsemnana chašmotsobenama, chë tšëngaftangbe juabnënga puerte binÿnayáftaca. <sup>10</sup> Tempo tšëngaftanga ni mo cánÿentša entsãngcá ndoñe quešmënjatsmëna, nÿe ujquëshenënga; pero mora, Bëngbe Bëtsabe entsãnga šmontsemna; tempo šmonjamna entsãnga ndocná tonjánalastemanga, pero mora, Bëngbe Bëtsá añe lastemado tšëngaftangaftaca entsemna.

*Bëngbe Bëtsá jtseservénama jtsiyenana*

<sup>11</sup> Atšbe bonshánënga, ndayentše tšëngaftangbe ndegombre luare yomna, celoca endmëna, y muentše quem luarentše, tšëngaftanga šmondmëna mo ínÿoicana ashjajnëngcá, y mo canÿe luarëjana nÿe achnëjuanëngcá, cach tšëngaftangbe luaroye

átayiñe. Chíyeca cbontsaimpadana, ndoñe chašmondétsama soyënga ntšamo chë šmobomna bacna juabnënga tomncá, ainaniñe bacna soyënga bomna causa; chca juabnënga ainaniñe jtsepenzéntsiayana, chentše jtsemándayama y Uámana Espiritu ndoñe chaondëtsemándama. <sup>12</sup> Chë Bëngbe Bëtsábioye nduabuatmëngbeñe sempre šmochtsiyena tšabá jtsamëse; chca chënga, masque mora tšëngaftangbe contra imojtsoyebuambná, tšëngaftanga mo bacá uamana entšanga cuaftsemnëngcá, chë tšabe soyënga ntšamo tšëngaftanga šmojtsamcá chamuinýama, y chca, Bëngbe Bëtsá chëngbioye chaojenonýinýé te, chábioye chënga chamotsatschuanama.

<sup>13</sup> Bëngbe Bëtsá šmoyeunanama, nyetsca entšanga mando bomnëngbioye šmochtsobedecena; chë Romoca bëts mandádbioye, cha chë quem luarentša más uámana puesto jtsemándayama endbómnyeca; <sup>14</sup> y chë tšëngaftangbeñe mandadëngbióynaca, ndëmuanýenga cha jíchamuana chë bacna soyënga amënga jácastigama, y chë tšabe soyënga amëngbiamá tšabá imojtsama ca chamuayanama. <sup>15</sup> Chë mando bomnëngbioye šmochtsobedecena, er Bëngbe Bëtsá endboše tšëngaftanga tšabe soyënga chašmot-samama, chca, chë ndosertánënga chë tšëngaftangbiamá podesca ichámënga, ntšamo ndegombre yomncá ntsetatšëmbcá, tondaye chamondëtsebmna tšëngaftangbe contra jayanama.

<sup>16</sup> Šmochtsiyena tšabá jtsamëse, mo chë ya ndoñe más bacna soyëngaca y bacna juabnëngaca ndëmandanëngcá; pero chca šmojtsemnana ndoñe šmattsejuabnaye nýe ndaye bacna soye jamama šmojtsobena ca, y nýe chca šmochjátama. Más tšabá endmëna jtsiyenana, mo chë Bëngbe Bëtsá imoservenëngcá. <sup>17</sup> Nyetscangbiamá respeto šmochtsobomna, chë Jesucristbeyeca catšátangbioye šmochtsababuánýeshana, sempre šmochtsiyena Bëngbe Bëtsabiamá jtsejuabnaye cha chë más bëtsá yomnana, y chë Romoca bëts mandado šmochtsesrespetana.

*Cristo chabe entšanga tojinýanýé ntšamo yomna jasúfriana*

<sup>18</sup> Tšëngaftanga, chë nyets tempo ínýabiamá canýe yebnentše oservénënga, tšëngaftangbe nduiñëngbioye šmochtsayaunana, puerte respeto chëngbiamá jtsebmñe; y ndoñe nýe chë tšábëngbioye y nýe tšabá mandbomnëngbioye, ndayá chë bacá mandbomnëngbioynaca. <sup>19</sup> Nderado nda, ntšamo Bëngbe Bëtsá yobošcá jamama bošama, tojoboyá chabe nduiño cha chaosufrima tojtsama ora, masque chama jasúfriama ndoñe tbondmëna, chca jamëse, Bëngbe Bëtsá corente tšabá jtsinýanana. <sup>20</sup> Er nderado tcmojtsacastigá ndaye bacna soye šmojama causa, y chora tša uantadënga chiñe šmojachnëngo, chë soye ndoñe yapa ntsámanana. Pero tšabe soyënga šmojtsama y chë causa šmojtsesufrina, y tša uantadënga chiñe šmojachnëngo, chë soye cocayé Bëngbe Bëtsá corente tšabá jtsinýanana. <sup>21</sup> Chca cmontsamna, er Bëngbe Bëtsá tcmojánachembo tšabe soyënga jamama y chca jasúfriama; chca ndegombre endmëna, er Cristo tšëngaftangbiamá tonjansufrí, y chca cha tcmonjaninýanýé, ntšamo jamama cmojtsamna, tšëngaftanga chca chašmotsamama. <sup>22</sup> Cristo ndocna te ndocna bacna soye chenáisema, ni ndocnábioye chebnaiseingñé. <sup>23</sup> Chábioye tmojtsoyenguá ora, chëngbioye ndoñe ntëyánguanguana. Cha chaosufrima tmonjanma ora, cha ndocá ntjatëtsétsnayana jaútatjayama, ndayá Bëngbe Bëtsábeñe jtošbuáchiyëse, chábeñe yojanóbátmana. Bëngbe Bëtsá ntšamo nyetscanga tmojamama tšabá o ndoñe tšabá yonjamna ca yochjayana ora, chca echanjama nýe ntšamo chënga tmojamcá jtsonýayëse. <sup>24</sup> Cristo cruciñe tonjanóbana ora, cha tonjansufrí chë castigo, chë bëngbe bacna soyëngama cach bënga šojánamna jasúfriama castigo, bënga chë bacna soyënga jamama juabnëngaca ndoñe más mandánënga chamondëtsemnana, y bënga ntšamo Bëngbe Bëtsabe bominiñe tšabá yomncá jtsamëse chamotsiyenama. Er Crístbioye chënga tmonjanlisiá chaóbanama y tonjansufrí jobanëntscuana, y chca, bënga šonjanatsebacá. <sup>25</sup> Er tšëngaftanga, tempo Bëngbe Bëtsábentšana bënoca šmonjamna, mo ótsëna oveshëngcá; pero mora Cristbe

benache šmojtishache, y cha cmontsanjēna, mo oveshēngbe canjē abuaājēnjacá, y cha entsantješna tšēngaftanga tšabá chašmotsemnana.

### 3

#### *Ntšamo iuamna chē bouamnēngbioye jtsiyenana*

<sup>1</sup> Cachcá mo chē oservenēngcá, tšēngaftāngnaca shémanga, tšēngaftangbe boyāngbioye šmochtsayaunana, chca, chē Bēngbe Bētsabe buayenana soyēnguiñe ndošbuáchiye boyāngbioye chašmobená jáyēnjanama, Jesucristbeñe chamotsošbuáchema, ntšamo tšēngaftanga šmojtsiyenama. Ndoñe queochátsiyta chē buayenánama chēnga jatētsēt-snayana, <sup>2</sup> er chēnga mochanjinjē tšēngaftanga šmojtsiyena, Bēngbe Bētsá nyētscangbiana más bētsá yomnana sempre jtsejuabnaye, y ntšamo šmojtsamcá chca yojtsinjīnāyeca. <sup>3</sup> Cach tšēngaftangbiama ndoñe mēntšá šmattsejuabnaye: “Entšanga atše botamaná tsmēna ca chamotsejuabnana atše nja mo chca chantenochquēca, chantenóbotamaye ba castellano soyēngaca o ba uámana entšayangá chantichētjo ca”; <sup>4</sup> ndayá chca chaotsemna, ntšamo tšēngaftanga chē Uámana Espiritbeyeca mandánēnga jtsemnēse ainaniñe šmojuabnana, cmēbionama y šmobošama; ndocna te ndopochócaye botamanana jtsebomnana, ainaniñe nje cach tšēngaftanga uámanēnga jenobiamama juabnēnga ntsebomncá, pero aīñe ainaniñe tšabe ebionana jtsebomnēse. Chē soyēnga Bēngbe Bētsabe bominiñe puerte enduámana. <sup>5</sup> Tempo chca, chē puerte tšabe shembásēnga, chē Bēngbe Bētsabe bocacanēnguentšēnga, imojanamana jtenóbotamayana; chēnga Bēngbe Bētsabeñe imojtsanošbuaché y chábeñe imojanobátmana, y nyētscanga chēngbe boyāngbioye imojánayaunana. <sup>6</sup> Chca yojamna Sara, Abrahámbioye ibnayeunana y chábioye “Taita ca” ibojanábobuatna. Tšēngaftanga Sarabe bembangcá jtsemnana, tšabe soyēnga šmojtsamēse, y tondayama uatjana šmontsebomnēse.

<sup>7</sup> Cachcá, tšēngaftanga boyanga, cada ona cachabe shémaftaca chaotsiyena, tšabá jtsenēyeunanēse, y cha respeto buajoná chaotsemnana jtsamēse; pero chca, ndoñe nje cha acbiama más batšá obenana bomná bētsemnana, ndayá Bēngbe Bētsá chabiama tšabe juabna yobómnayeca, ntšamo cach aca tšabe vida tcmojašbuachenacá chábioynaca tbojašbuáchenama. Chca šmochtsama, Bēngbe Bētsáftaca jencuéntama totcá chaondētsemnana.

#### *Chē tšabe soyēnga amama jasúfriama yojtsamnēnga*

<sup>8</sup> Y morna, nyētsca tšēngaftanga cachcá šmochtsejuabnaye, ínjenaga šmochtsalastemana, chē Jesucristbeyeca catšátangbioye šmochtsababuánjēshana, ínjenbiama chacmóngmiaye, y cada ona chaotsejuabná chē ínjenaga chabiama más uámanēnga imomna ca. <sup>9</sup> Injenaga tšēngaftangbiama ntšamo tcmojaborlá ora, ndoñe šmattéchenanguaye; ni chacmojtsēyanguá ora, chēngbioye ndoñe šmattoyánguango. Chca játamama cuentna, Bēngbe Bētsá šmochjaimpáda, chēngbeñe tšabe bendicionēnga chaotsemnana cha chaomama, er Bēngbe Bētsá tcmojáchembo chca chašmotsamama, y Bēngbe Bētsábíocana tšabe bendicionēnga chašmosháchināma. <sup>10</sup> Ntšamo Bēngbe Bētsabe uabemana palabrēnguiñe endayancá:

Nda toboše tšabe vida jēftsebomnana y puerte oyejuayá tempēnga jtsebomnana, yejuana chaochtsenojuabná bacna soyēngama ndoñe chaondētsóyeuambnana, y ndoñe chaondētseboosterama.

<sup>11</sup> Bacna soyēnguentšana chaotsojuánañe y tšabe soyēnga chaotsama, natjēmbana nyētscāngaftaca jtsiyenama chaotseboše, y chca chaotsemnana sempre chaotsentšena.

<sup>12</sup> Chca bontsemna jamana, er Bēngbe Utabná, chabe bominiñe tšabe soyēnga amēngbioye jtsanjēnana, chēngbiama sempre jtsantješnēse; y sempre chēngbioye jtsayaunanana, chábioye ndayámnaca tmojtsotjanañe ora; pero chē bacna soyēnga jamana uamanēngbe contra cha jtsemnana ca —chiñe endayana.

<sup>13</sup> ¿Nda nanjobenaye tšengaftangbiana bacna soyënga jamama, tšengaftanga chë tšabe soyënga jamama sempre šmojtsentšënëse? <sup>14</sup> Pero masque tšengaftanga cmojtsamna jasúfriama tšabe soyënga šmojtsamama, Bëngbe Bëtsá chama tšabe soyënga cmochántatšataye. Chë tšengaftanga chašmosufrima amëngbiana ndoñe matauatjëngana, ni ainana tsetšenánënga ndoñe matsmënëngana, <sup>15</sup> ndayá ainaniñe sempre šmochtsejuabnaye Cristbiana mo Bëngbe Utabnacá y chabiana respeto šmochtse-bomna; y sempre šmochtseprontana jojuama ndëmuanjënga tcmojtsatjaná ndáyeca tšengaftanga Bëngbe Bëtsábeñe jtsošbuáchiyëse, chabiana ainaniñe šmobátmanama. <sup>16</sup> Pero chca šmochjama tšabe ainánaca jtsënyáyëse y Bëngbe Bëtsabiana respeto jtsebomnëse. Šmochtsiyena tšabá jtsamëse, y chama ainaniñe ndoñe chašmondëtse-bomna juabnënga y chamuayana chca ndegombre ndoñe tšabá šmontsama ca, chca, ínjenaga tšengaftangbiana podësca chamojtsoyebuambná ora, tšengaftanga Crístbeñe ošbuáchiyënga quetsomñecá tšabe soyënga šmojtsamama, chënga chamotsëuatja chca tmojtsóyebuambnana.

<sup>17</sup> Más tšabá endmëna jasúfriana tšabe soyënga tcojamama, nderado Bëngbe Bëtsá chca chaotsemnana tojtsebošëse, y ndoñe chë jasúfriana ndaye bacna soye tcojamama. <sup>18</sup> Er Cristo nje canye tonjanóbana bënga bacna soyëngama jáperdonama; chë nyetsca soyënguñe tšabá amá, chë Bëngbe Bëtsabe bominyiñe ndoñe tšabá yondmëna soyënga amëngbiana, tšengaftanga Bëngbe Bëtsáftaca chašmotsatsmënana. Entšacá, Cristo tonjanóbana, pero Bëngbe Bëtsá tonjanma, cha cachiñe vida chabe espiritiñe chaotsatsbomnana. <sup>19</sup> Pero Cristo cháuatayenama Bëngbe Bëtsá cabá ndëma ora, chabe espiritiñe cha tojánana chë ndoñe tšabe entšanga imonjamnëngbe espíritënga utámenënga imojamnoye, chëngbiana castigo tojtsemnëntscuana; y cha tojanayëñjanama chënga tojanabuayená. <sup>20</sup> Quem espíritënga bayté entsemna, Bëngbe Bëtsábioye ndoñe monjánëyeunana, Noebe yojëftsiyena ora, chë bacna soyënga amënga chca amama chamotsajbanama y tšabe benache chámuatishachama Bëngbe Bëtsá bën yojanobátmana ora, barquësha canduapormantscuana. Chentšana chë barquëshañe báseftanga tmojanotsbocá, posufta entšanga, búyeshe juatsbuacá chë barquësha yojtsámnayeca. <sup>21</sup> Chë chënga chamótsbocama tojanéjabuache béjaye, enjamna mo chë mora jenábayama buyeshcá, chca, atsebácanënga bënga chamotsemnana. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojtsenóbolimpiana, ndayá bëngbe ainaniñe ndocna bacna juabnënga ntsebomnana Bëngbe Bëtsá tmojtseimpadánama; y bënga atsebácanënga mondmëna, Jesucristo cháuatayenama Bëngbe Bëtsá tojánmayeca. <sup>22</sup> Cristo celoye tojtantsjuá y Bëngbe Bëtsabe catšbioica yomna jamándama. Cha endmëna chë amëndayá angelëngbiana y espíritënga mando y obenana bomnëngbiana.

#### 4

##### *Entšanga entsamna jtsiyenana ntšamo Bëngbe Bëtsá yobošcá*

<sup>1</sup> Chcasna, ntšamo Cristo tojansufricá, chabe cuerpiñe mo entšacá játssetšenëse, tšengaftángnaca cmontsamna jtseprontánana chca jasúfriama. Er chë Crístbeñe ošbuachiyá nda chabe cuerpiñe tojasufrí, chë bacna soyënga amentšana tojtsojuánañe, <sup>2</sup> chca, chabe vidiñe, morscana y jobanëntscuana, jëftsiyenama ntšamo Bëngbe Bëtsá yobošcá, y ndoñe nje entšangbe bacna juabnëngaca, nje quem luarentše tšabá jëftsemnana. <sup>3</sup> Tempo, bayté enjamna, ndayëntscuana tšengaftanga šmonjánama soyënga, mo chë Bëngbe Bëtsábioye nduabuátmënga mondbetsamcá; nya ndoñe más. Chë tempo, tšengaftanga šmonjaninyena nyetsca bacna soyënga jtsamëse, jenomándama ntsobercá; tšengaftanga šmonjánama soyënga nje ntšamo šmojanbošcá, nje tšengaftanga tšabá jtsomñama; šmonjanamana jotmenangana y ba fiestënga jtsebomnana, y chora chë ófjanënga tša jtsetmoyana y tša jtseyoyana, y ba uabouana soyënga šmonjanamana jtsamana chë diosënga yojamna ca šmojanjuabná soyënga jadórama. <sup>4</sup> Morna, chë Bëngbe Bëtsábioye nduabuátmënga montsenjaná, tšengaftanga ya ndoñe más bacna soyënga



jtsamëse šmojtsiyenama, ntšamo tempo šmonjanienama, ntšamo chënga jtsamëse mon-doyena, jenomándama ntšobencá; y chë causa, chënga bacna soyënga tšëngaftangbiamama jtsóyebuambnayana. <sup>5</sup> Pero chënga echanjótocaye jayanama ndáyeca chca tmojamama, chë entšangbiamama, chë ainënga y chë ya mochjóbánëngbiamama, ntšamo tmojamama, aíñe o ndoñe tšabá bétsemnama jayanama entseprontanabe delante. <sup>6</sup> Chíyeca, Crístbeñe os-buáchiyënga, chë mora obanënga imojtsemnënga, ainënga monjamna ora, ínÿyënga chë tšabe noticiëngama chëngbioye monjanabuayiyiná, chënga chamobenama chë nyetsca tescama yomna tšabe vida chëngbe espíroftaca jtsebomnama, ntšamo Bëngbe Bëtsá yobomncá; masque mora quem luarentše, chëngbe cuerpo tojóbana, er Bëngbe Bëtsá tojayana nyetsca entšanga yojtsamna jóbanama ca.

<sup>7</sup> Ndoñe bayté y nyetsca soyënga echanjopochóca. Chíyeca, tšëngaftanga cmontsamna botamana jtsejuabnayana y jenomándama jtsoebenana, Bëngbe Bëtsáftaca jencuéntama chašmotsobenama. <sup>8</sup> Nyetsca soyëngama, masna, sempre nyetscanga puerte šmochtsenbobonshana, er nda ínÿyënga puerte tojtsababuanÿeshaná, sempre jtseprontánana ínÿyënga jáperdonama, chëngbiamama bacna soyënga tmojamama. <sup>9</sup> Nyetscanga šmochtsamana tšëngaftangbe yebniñe jenofjana, chca jamama totcá yojtsemna ntjatichamcá. <sup>10</sup> Nyetsca tšëngaftanga Bëngbe Bëtsá tcmojatšatá obenana tšabe soyënga jamama; chca, chë obenánaca cmontsamna jtsamana soyënga chë ínÿyëngbe tšabiamama, chë Bëngbe Bëtsá cmojatšatá nyets obenánaca ínÿyëngbioye jujabuáchama, nyets tempo tšabe soyënga jtsamëse. <sup>11</sup> Nda tojtsabuayiyiná, Bëngbe Bëtsabe palabra chaotsabuayiyiná mo Bëngbe Bëtsá chabijana cuaftsoyebuambnacá; nda ínÿyënga tojtsaserverna, chca chaotsama chë Bëngbe Bëtsá yojtsama cha chaotsebomnama obenánaca. Nyetsca soyënga ntšamo šmojtsamcá chaotsinÿanÿná Bëngbe Bëtsá puerte uamaná y obená bétsemnama, Jesucrístbeyeca. Chca šmochtsama, er Bëngbe Bëtsá puerte uamaná endmëna y obenana endbomna nyets tempo y nyetsca tescama. Chca chaotsemna.

*Puerte tšabá endmëna, Crístbeñe tcošbuáchema, jasúfriama tbojtsemnëse*

<sup>12</sup> Atšbe bonshana entšanga, ndoñe šmattsenjanaye padecena soyënguiñe šmojtsesufrínama; chiñe jtsinÿnana ntsachetšá ošbuáchiyana šmobomnama. Chca ora ndoñe šmattsejuabnaye, tšëngaftanga ndoñe cmondamna chca soyiñe jtsachnëjuanana ca; <sup>13</sup> chamna, šmochjóyejuaye chë ntšamo Cristo tojansufricá šmojtsesufrina ora, chca, Cristo corente obenánaca y uamanacá entšángbeñe chaojtonÿná te, tšëngaftanga puerte chašmotsóyejuama. <sup>14</sup> Puerte šmochtsóyejuaye, nderado nda tcmojoyánguango Crístbiamama bétsosevenayeca, er Bëngbe Bëtsabe Espíritu, chë corente bëtsá endmëná, sempre tšëngaftangbe ainaniñe iuétsemna. <sup>15</sup> Tšëngaftanguentše ndocná chabondëtsemna jasúfriama ínÿa óbanaye causa, atbëbanama, bacna soyënga ínÿyëngbiamama amama, o ínÿyëngbe soyënguiñe ontremetënama. <sup>16</sup> Pero Crístbe ustoná tomnama tojasufrí, chama ndoñe chaondëtsëuatja; chamna, Bëngbe Bëtsábioye chabotsatschuaná, cha Crístbe ustoná bétsemnama.

<sup>17</sup> Er chë tempo ya tojobuache, Bëngbe Bëtsá jayanama, cach Crístbeñe ošbuáchiyëngbiamama, chabe entšangbiamama, tšabá o ndoñe tšabá tmonjamama. Cha chca bëngbiamama jayanama tojontšese, chë chabe palabra ndobedecenëngaftaca yochjanopasacá puerte uabouana echántsemna, cha chëngbiamama chca chaojayana ora. <sup>18</sup> Y chca, chë Bëngbe Bëtsabe bominiñe tšabá amabiamama ndoñe paselo atsbočaná jtsemnama tontsemnëse, ¿ntšamo yochjópasa chë Bëngbe Bëtsábioye ndoñe adórayënga y chë bacna soye amëngaftaca? <sup>19</sup> Chcasna, chë imosufrinëngaftaca Bëngbe Bëtsá chca yobóseyeca, entsamna chë tšabe soyënga jtsamana y Bëngbe Bëtsabe cucuatšíñe chëngbe espíritu chamoboshjona cha chaotsinÿenama, er cha chënga tojánabiamama, y nyetsca soyënguiñe tšabe palabra bomná cha endmëna.

<sup>1</sup> Y mora, chë tšëngaftangbentše ošbuachiyëngcá enefjuanëngbeñe bëtsëjemëngcá amëndayënga chanjabuayená, atše cach tšëngaftangcá bëtsëjema, canya ntšamo Cristo tonjansufricá tonjaninyá y chama ínÿenga tonjanéyana, y canya ndábioye cach tšëngaftangcá Bëngbe Bëtsá bochjábema más uámana y bëtsá, Cristo entšángbeñe chaojtonýná ora; tšëngaftanga cbaruayená. <sup>2</sup> Ošbuáchiyënga šmochtsanýena; chënga chašotsanýenama Bëngbe Bëtsá chca tcmojábiana. Chca, chentša ošbuachiyëngbeñe šmochtsama ntšamo canye tšabe abujénýa chabe oveshëngaftaca endbetsamcá. Bëngbe Bëtsabe trabajo ndoñe šmattsama, nýe cmojtsétocanama, ndayá chca jamama šmojtsebóšeyeca. Chca ndoñe šmatjama nýe paselo crocénana juacánama, ndayá ínÿengbioye jujabuáchama tša šmobóšeyeca. <sup>3</sup> Chë cmojtsamna jtsanýenama ošbuáchiyënga ndoñe nýe bëtscá šmattsamëndaye, mo chëngbe nduiñënga cuafjatsmëngcá, ndayá ntšamo tšëngaftanga šmojtsiyenama, chënga šmochjínýanýiye ntšamo yojtsamna jtsiyenana. <sup>4</sup> Chca, chë bënga nýetscanga, mo chë tšabe abujénýacá šuanýená, quem luaroye yochjésabo ora, mo canye uabuashinýinýana coronésha ndocna te tontsandbemëshacá, tšëngaftanga canye bëts uacanana soye šmochanjóyëngacñe, y chë soye endmëna nýetsca tescama; Bëngbe Bëtsá uámanënga y bëtsétsanga cmochanjábiana, cháftaca nýets tempo oyejuayënga jtsemnëse.

<sup>5</sup> Cachcá, tšëngaftanga chë bobontsëngnaca cbaruayená, sempre šmochtsejuabnaye chë bëtsëjemënga tšëngaftangbe amëndayënga imomnama, y chca šmochtsama. Cada ona tšëngaftanguentšá bontsemna jtsejuabnayana chë ínÿenga tšëngaftangbiana más uámanënga cuaftsemncá, ínÿengbioye šmojtsaserverna ora; er ntšamo Bëngbe Bëtsabe uabemana palabrënguiñe endayancá:

Bëngbe Bëtsá chë nýe cachënga uámanënga tmojtsenobiamnangbe contra entsemna, y chë ndoñe uámanënga montsenobiamnangbiamna, Bëngbe Bëtsá más tšabe juabna entsebomna ca.

<sup>6</sup> Sempre šmochtsejuabnaye Bëngbe Bëtsá chë más bëtsá nýetscangbiana yomnama, y nýets mando y obenana bomná yomnama, y chabe delante ndoñe uámanënga šmattsenobiamnaye, cha más uámanënga chácmbiamama, chama chë tempo chaojobuache ora. <sup>7</sup> Nýetsca soyënga ndayama šmuénóochinýenama Bëngbe Bëtsabe cucuatšíñe šmochjáboshjona, er cha tšëngaftanga yejuana cmondánýena.

<sup>8</sup> Cach tšëngaftanga jenomándama chašmotsobena y sempre šmochtseprontana, er tšëngaftangbe uayayá Satanás, mo canye león tojtsejató, nda jtsósañama tojtsana orcá, chë diablo, sempre jtsebošana jamama, tšëngaftanga Jesucristbeñe ošbuáchiyana chašmotsajbanama. <sup>9</sup> Puerte šmochtomorócha, Jesucristbeñe bëtscá jtsošbuáchiyëse, chë uayayá tondaye chaondobená tšëngaftangaftaca jamama, cach tšëngaftangcá Jesucristbeñe ošbuáchiyënga nýets luarënguenache cachcá jasúfriama yojtsamnana jtsetatšëmbëse. <sup>10</sup> Pero tšëngaftanga baseftayté chašmojasufrí chentšana, Bëngbe Bëtsá cmochanjábiana nýetsca soyënguiñe puerte tšábënga, puerte chašmotsemorochama, bëtscá ošbuáchiyana y bonshánana bomñënga jtsemnëse, y ainaniñe corente añemo bomñënga chašmotsemnama; Bëngbe Bëtsá, chë bëngbiana tšabe juabna bomná, bënga nýetsca tšabe soyënga šonjatšatá, y nda bënga šojáchembo nýetsca tescama bëtsétsanga jtsemnama, chca echanjama. <sup>11</sup> Cha nýets obenana nýets tempo y nýetsca tescama chaotsebomna. Chca chaotsemna.

### *Jtadióšoftanama*

<sup>12</sup> Silvano, ndabiana sëndëjuabná atšbiana canye tšabe palabra bomná Jesucristbeyeca catšata yomnama, cháftaca quem base tsbuanácha tcbonjubuábiana. Atše séntseboše tšëngaftanga añemo jatšatayana y jáuyanana, ndegombre ntšamo tcbonjubuabiamcá yojtsoyebuambná ntšamo Bëngbe Bëtsá tšabe bendicionënga cmatšatnama. Chíyeca, sempre šmochjëftsiyena jtsamëse ntšamo chabe tšabe juabna tšëngaftangbiana yomncá.

<sup>13</sup> Ošbuáchiyënga muentše átšeftaca montsemnënga cmontsacheuaná. Chënga quem bëts pueblentše mondoyena bacá uamana entšángaftaca, mo chë tempo, Babilonia bëts pueblaca imojoyena entšangcá, pero Bëngbe Bëtsá muentša ošbuáchiyënga tojabacacá cach tšëngaftangbioycá. Marcos, chë atšbiama mo uaquiñacá endmëná, chánaca cmontsacheuaná. <sup>14</sup> Njetscanga Jesucristbeyeca catšatangcá šmochjenuaye, jtenámochëse tša šmojtsenbobonshánama.

Atše, Bëngbe Bëtsá séntseimpadana cha chaoma tšëngaftanga chë Jesucristoftaca cányiñe mo canyácá šmomnënga, njetscanga ainaniñe tšabe ebionana chašmotsebonama.

## 2 San Pedro

### *Jacheuayama*

<sup>1</sup> Atše Simón Pedro, Jesucristbe oserverná y chabe ichmoná, quem tsbuanácha séntsabiamná tšëngaftangbiama, ndëmuanyënga šmojashjache jtsebomnama canye ošbuáchiyana Jesucristbeñe, cach bëngbe ošbuachiyancá uámanana, er Bëngbe Bëtsá y Atsebacayá Jesucristo, jtsebošana ndánaca y nyetscanga chábeñe chamotsošbuáchema.

<sup>2</sup> Atše séntseimpadana, tšëngaftanga Bëngbe Bëtsabiama y Bëngbe Utabná Jesusbiama cada te más jtsetatšëmbëse, Bëngbe Bëtsá chaoma tšabe bendicionënga tšëngaftangbeñe chaotsemnama y chaoma tšëngaftanga ainaniñe tšabe ebionana chašmotsebomnama.

### *Chë Jesucristbeñe ošbuáchiyënga tšabe soyënga*

<sup>3</sup> Bëngbe Bëtsá chabe obenánaca tojama bënga chamobená jtsebomnama, lempe ntšamo tmojtšëjabotcá tšabe vida jtsebomnama y jtšiyenama, Bëngbe Bëtsá jadórana soyënga jtsamëse. Cha chca tojama bënga chábioye chamotsábuatmama tojanma ora. Cha bënga šojáchembo, cachá obená y uamaná bëtsemnama y bëtš soyënga jamëse, chabe entšanga chamotsemnama. <sup>4</sup> Chca, Bëngbe Bëtsá šojatšatá ntšamo bënga jatšatayama tojanašebuachenacá, bëtš y uamana soyënga, chca, quem luarentša bacna soyënguentshana chašmotsojuánañama. Chë bacna soyënga quem luarentšë jtsebínynana, entšanga nye cachëngbe bacna juabnéngaca jtšiyenama yapa bošë causa. Chánaca chë tšabe soyënga šojatšatá, tšëngaftanga cháftaca cányiñe mo canyáca chašmotsemnama, cachacá jtsemnama jashjáchëse. <sup>5</sup> Chca, ndoñe quenátsmëna nye Jesucristbeñe ošbuáchiyana jtsebomnana; chiñe šmochjenobuáshjache, bëtscá tšabe soyënga jtsamëse; chora bëtscá šmochtsama Bëngbe Bëtsabe soyëngama chacmot-sësertánama; <sup>6</sup> chora bëtscá šmochtsama cach tšëngaftanga jenomándama chašmot-sobenama; y chca, tšëngaftanga masque padecena soyënguñe chašmojtšachnějuana, ainaniñe puerte añemo jtsebomnëse, puerte uantadënga chašmotsemnama; y chentšana bëtscá šmochtsama, tšëngaftanga Bëngbe Bëtsá šmojtšadoránama jinyanñiyama; y <sup>7</sup> chca, nyetsca tšëngaftanga ošbuáchiyënga chašmotsenbobonshana; y chca, nyetsca entšanga chašmotsababuánñeshana.

<sup>8</sup> Tšëngaftanga lempe chë soyënga šmojtsebomna, y bëtscá chca šmojtšamëse, š-mochantsiyena becá oserverna soyënga jtsamëse, y chentšana puerte tšabe soyënga echantsóbocana, corente tšabá Bëngbe Utabná Jesucristo chašmotsábuatmama. <sup>9</sup> Pero nda quem soyënga ndoñe tontsama, Bëngbe Bëtsabe soyëngama ndoñe ntosertánana; y chca, cha mo canye jtaná o nduabinñnacá jtsemnana; cha tbojtsebnatjëmbe Bëngbe Bëtsá chabe tempsca bacna soyënga tbojtsebojuánama, y Bëngbe Bëtsabe delante cachiñe tšabá chaotsatsmënama tojamama. <sup>10</sup> Chíyeca, Jesucristbeyeca atšbe catšátanga, nya šmochtsentšëna chca tšabe soyënga jtsamama, y chca, corente tšabá šmochanjátatšëmbona, Bëngbe Bëtsá chabe entšanga chašmotsemnama tcmojáchembuama y tcmojábacacama; y chca jtsamëse, Jesucristbeñe ošbuáchiyana ndocna te quešmochatajbaná. <sup>11</sup> Chca, Bëngbe Bëtsá oyejuayá tšëngaftangbiama echanjama, Bëngbe Utabná y Atsebacayá Jesucristbe amëndayoye jamashënguama ndegombre chašmobenama.

<sup>12</sup> Chcáyecna, atše séntsejuabná tšëngaftangbioye sempre chë soyëngama jtsabuayiy-nayana, masque chë soyëngama ya šmotátšëmbo, y tša šmojtsošbuaché Bëngbe Bëtsabe ndegombre soyënguñe y chca šmojtšiyena, chë mora šmojtsetátšëmbo soyënguñe.

<sup>13</sup> Séntsejuabná, chajéftsainëntscuana tšabá yojtsemna jamana, ainaniñe bëtscá añemo chašmotsebomnama chë soyënga jtsamama, ntšamo tijayancá jtsabuayiyayëse. <sup>14</sup> Atše séntsetatšëmbo, ndoñe baytese y atšbe ainana Bëngbe Bëtsábioye yochtá, ntšamo Bëngbe Utabná Jesucristo šonjëftsanbuayenacá; <sup>15</sup> pero bëtscá chanjëftsema, atše

chajóbona chentsánēnaca tsēngaftanga nyets tempo chē soyēngama chašmotsenójuabnama.

*Cristo corente uamaná y obená yojamnama tmojáninŷe ora*

<sup>16</sup> Bēngbe Utabnabe obenanama y cha yochjésabama ntšamo tcbonjanabuatambacá, ndoñe quenjatsmēna entšangbe osertanánaca pormana cuenténgaca, er cach bēnga botamana fsēnjáninŷe chabe uámanana y obenana. <sup>17</sup> Bēngbe Bētsá chē Taitá, Jesucristo puerte obenana bomná bétsemnama y cha corente bētsá y uamaná bétsemnama tonjaninŷinŷé ora, bēnga fsēnjáninŷe. Chca fsēnjáninŷe Bēngbe Bētsá, chē puerte uámana y bētsábiocana oyebuambnayana Jesúsbiowe mēntšá tbonjanianya ora: “Mua atšbe bonshana Uaquiñá endmēna, atše chabiana sēntsoyejuá ca.” <sup>18</sup> Cach bēnga chē oyebuambnayana fsēnjanuena, chē celocana tonjanóbocnana, er bēnga Bēngbe Utabnáftaca fsēnjanmēna, chē uámana tjoca.

<sup>19</sup> Chē sóyeca bēnga fsēntsobena corente jtsetatšēmbuana, ntšamo chē Bēngbe Bētsabe juabna oyebuambnayēnga tmojanayancá ndegombre bétsemnama, y tsēngaftanga tšabá šmochántsama, ntšamo chēnga tmojanayancá šmojtseyeunanēse. Chca, chēngbe palabrēngaca entsopodena Bēngbe Bētsabe soyēngama tsēngaftanga jinŷanŷiyana, y echántsemna mo canŷe uajuinŷanésha canŷe ibetiñe luarentše tojtsebinŷnacá. Chē soyēnga šmochtsuenana Jesucristo yochjésabēntscuana; chora, cha nyetsca soyēnga cmochanjínŷanŷiye, mo tsēngaftangbiana canŷe tsēm te cuafjabinŷncá, y chē jabínŷnama ora bínŷnaye estrella tojábocna tsēngaftanga jabuabinŷnamcá. <sup>20</sup> Pero natsana chacmēsertá, ndocna palabra Bēngbe Bētsabe uabemana palabrēnguiñe tojayana canŷe soye yochjopása ca, cabá chca ndopása ora, nŷe cach Bēngbe Bētsabe juabna oyebuambnayēngbe juabnentsana tojanóbocnama; <sup>21</sup> er Bēngbe Bētsabe juabna oyebuambnayēnga ndoñe monjanoyebuambná nŷe chēnga chca jamama innabóseyeca, ndayá Bēngbe Bētsabe cuenta tmojanoyebuambá, chē Uámana Espiritu chēnga chca chamóyebuambama tojánmayeca.

## 2

*Chē ndoñe ndegombre soyēnga buátēmbayēnga  
(Jud 4-13)*

<sup>1</sup> Chē Bēngbe Bētsabe juabna oyebuambnayēngbe tempo, Israeloca entšangbeñe baseftángnaca imojamna, ndēmuanŷyēnga imojichamo chēnga ndegombre chca juabna oyebuambnayēnga imojamna ca, pero ndegombre ndoñe chcanga imonjamna; cachcá, tsēngaftangbeñe abuátambayēnga mochántsemna, y chēnga ndoñe ndegombre soyēnga mochántsabuatambaye, pero ndegombre soyēngaca cánŷiñe, chca, chēnga chca imojtsabuátambama entšanga ndoñe chamondétatšēmbonama. Chē buátēmbana soyēnga echanjama, entšanga ndoñe ndegombre soyēnga y bacna soyēnga chamotsamama. Ntšamo chēnga mochántsama y mochántsabuatambaye soyēngaca, mochántsama Jesucristo ndoñe chēngbe Utabná chaondétsemnama, cha nda chēnga tojatsebacá, mo nda ínŷyēnga játsebacama crocénana cuafjētsjajocá. Y chca, nŷe ndeolpe, chē Bēngbe Bētsábiocana uabouana castigo nyetsca tescama mochántsebonna. <sup>2</sup> Banga chēngbiowe mochantsésetona, nyetsca bacna soye, jenomándama ntsoyencá jtsamēse; y chēngbe causa, ínŷyēnga ndoñe tšabá quemochátoyebuambnaye chē tšabe benachama, chē ndegombre soyēngaca benache jtishachama. <sup>3</sup> Chēnga bētscá crocénana jtsebonnama yapa mochántseboše causa, ba bostero soyēngaca cmochántsaingñaye; pero Bēngbe Bētsá tempo chēngbiana tojánayana, ndoñe tšabá imojtsamama y chēngbiana castigo nyetsca tescama chaotsemnámna.

<sup>4</sup> Bēngbe Bētsá chē bacna soyēnga tmojanma angeléngbiowe ndoñe tonjanaperdoná, ndayá infiernoŷe tojtsanatsatše y puerte ibetiñe tojtsanabáshejuana, chē uabouana

tboca chamoquedama, Bëngbe Bëtsá chëngbiamana nÿetsca tescama castigo chamotsebomnana yochjayana orscama. <sup>5</sup> Y cach ndoñe quem luarentša entsángbioye tonjanaperdoná Noé yojëftsiyena ora, y chënga jácastigama aíñe tojanma chë uabouana uaftena chëngbeñe chaotsemnana, chë nduauenana y bacna entsánga jtsapochócama. Chentšana, nÿe Noébioye, tbojanatsbocá, nda entsánga yojanabuayiyiná ntšamo jtsiyenana, Bëngbe Bëtsabe bominiñe tšabá yomncá jtsamëse; cha y inÿe canÿsëftangnaca tojanatsebacá. <sup>6</sup> Bayté entsemna, Bëngbe Bëtsánaca tojánayana chë Sodoma y Gomorra bëts pueblentša entsánga, yapa bacna entsánga imojamnama, bëts castigo jtsebomnana yojánamnama; y íñesheca tojtsanapochocá, chë pueblënga y chentša entsánga jatinyá jtsabiamëntscuana. Y chë sóyeca Bëngbe Bëtsá tojaninÿanyé ntšamo bacna entsángaftaca yochjama, chë chentšana mochsiyena bacna entsángbiamana. <sup>7</sup> Pero Bëngbe Bëtsá Lótbioye tbojanatsbocá, chë bëts pueblënga pochócayntšana. Cha yojamna Bëngbe Bëtsabe bominiñe tšabá amá, y ntšamo chë luarentša entsánga imojaniyenama, nÿetscna bacna soye jtsamëse, jenomándama ntsobencá, cha puerte ngménana inabomna. <sup>8</sup> Er quem tšabe entsá, chëngbeñe oyená, chë entsánga imojtsama bacna soyënga cada te yojanonÿaye y yojanuenana ora, puerte chabe tšabe ainaniñe inasufrina.

<sup>9</sup> Chca, Bëngbe Utabná endobena chë Bëngbe Bëtsábioye adórayënga játsebacana padecena soyënguentšana y bacna soyënga jamama juabnënguentšana, y chë bacna soyënga jamama uamanëngna castigánënga jtsabamnama, chë ntšamo chënga imojaniyenëntscuana imojanamcá ndoñe tšabá yonjamna ca Bëngbe Bëtsá yochjayana tescama, y chënga nÿetsca tescama chë bëts castigo chamotsebomnana jamándama. <sup>10</sup> Chca ndegombre endmëna, y más chë ndëmuanÿenga nÿe cachëngbe cuerpëngama bacna juabnëngaca jtsamëse imoyenëngbiamana, chënga chë Bëngbe Utabnabe mando jtsaboténana. Chënga bacá buátsenanënga mondmëna y jtsebošana nÿe ntšamo cachënga tmojtsejuabnacá chaotsemnana, y ndoñe ntsauatjana chë espíritënga obenana bomnëngbiamana puerte bacna soyënga jtsóyebuambnayama. <sup>11</sup> Chamna chë angelënga, masque más añemo y obenana bomnënga mondmëna, ndoñe jenñémuana chë espíritënga obenana bomnëngbiamana chca jayanama, chëngbiamana ndoñe tšabe soyënga jtsóyebuambnayëse, Bëngbe Utabnabe delante.

<sup>12</sup> Pero chë buátëmbayënga, chë cachënga ndoñe tontsésertana soyëngama puerte bacá jtsóyebuambnayana, y chca, chënga mondmëna mo tja bayëngcá, soyënga tšabá josértama juabna ndbomnënga; chënga jtsiyenana nÿe ntšamo tojtsebiona y tmojtsebošcá, y chënga jónÿnana, chámuashebuayama y chamëbáyama. Chë buátëmbayënga mo chë bayëngcá mochántsapochocaye. <sup>13</sup> Chënga mochanjasúfria, ínÿenga chamosufrima tmojama causa. Chëngbe oyejuayana endmëna nÿe chora chënga tšabá jtsemnana soyënga. Tšëngaftangaftaca cánÿiñe mo ošbuachiyëngcá tmojttesá ora, tšëngaftangbiamana ouatjcá jtsemnana y chëngbe causa, ínÿenga tšëngaftangbiamana podescna mochántsihamo, er chënga chentše oyejuayënga jtsemnana, nÿe chënga tšabá jtsemnana jtsamëse; y chënga tšëngaftangbeñe jtsemnana, tšëngaftangbioye jtsaíngñase.

<sup>14</sup> Chënga ndoñe ntsobenana canÿe shembása jinÿana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nÿe batšá ošbuachiyana bomnënga jtsaíngñayana, y siempre jtsentšénana nÿe más soyënga jésebošama y jésebomnana, ínÿenga tmobomnana más soyënga jashjáchama; chënga montsemna pochocánënga jtsemnana. <sup>15</sup> Chënga chë tšabe benachentšana tmojtsojuánañe, y mora mo otšënéngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyebuambnayá Balaamcá, cha ndoñe tšabá tonjanma orcá; Balaam Beorbe uaqiñá. Cha yapa inaboše bëts cá crocénana juacánama ínÿëngbiamana bacna soyënga jtsamëse; <sup>16</sup> y Bëngbe Bëtsá, chábioye chabe bacna soyëngama tbojanácacana, cachabe asno chábioye chabuatsëtsama jamëse; y

chca, ndoñe tbonjanlesenciá jama chë ndocna juábnaca soye jamama.

<sup>17</sup> Entšanga jtsobátmanana chënga bëtscá tšabe soyënga chamotsamama, pero chë tmojtsama soyënga tondayama ntoservénana, y chca, chënga jtsemnana mo búyeshe obocantše tojtsebuashjá; y chënga mora canye soye jtsejuabnayana y chentšana inyetšá; chca chënga jtsemnana mo jantšetëshënga bëtš bínýiaca bonjnëshëngá. Chëngbiamama Bëngbe Bëtšá tojayana castigo chamotsebomnama, chë más íbetoca, tondaye binýiniñe luarentše. <sup>18</sup> Chënga ba botamana palabréngaca jtsenábotamnayana, pero tondayama ntoservénana; y chë cabá mora Jesucristbeñe tmojtsošbuachëngbioye jtsaíngñayama, chënga ntšamo chëngbe enutënga Bëngbe Bëtšábioye nduabuátmënga imoyencá jtsiyenama imojtsajbananga. Chë buátëmbayënga chë soye jtsamana, chëngbioye jáyëñjanase, nye cachënga tšabá jtsomñama bacna juabnéngaca soyënga chamotsamama, cachënga jenomándama ntosobencá. <sup>19</sup> Chë abuátambayënga jašebuachenana tšabe vida jónyenama, nye ntšamo chënga tmojtsebošcá jtsejuabnayëse y jtsamëse; pero cachënga mondoyena cachëngbe bacna juabnéngaca mandánënga, y chca, chënga montsajna pochocánënga jtsemnana, er ndaye entšánaca mandaná jtsemnana, chë nyets tempo tobedecena sóyeca. <sup>20</sup> Er ndëmuanýënga, Bëngbe Utabná y Atsebacayá Jesucristo tmojtsábuatmama, tmojtsajbaná oyenana mo chë nye quem luarama enójuabnaye entšangcá, nyetsca bacna soye amana y tša bacna juabnénga ainaniñe bomnana, pero mora cachiñe chë soyënguiñe tmojtésajna, y cachiñe mandánënga tmojtsemna chë bacna juabnéngaca, chënga mora más bacá tempscama jabocanana. <sup>21</sup> Chëngbiamama más tšabá manjamna ndoñe ntjobenayana jtsetatšëmbuana ntšamo Bëngbe Bëtšabe bominiñe tšabá yomncá inétsamama, chë soye jatabuátmanana y chentšana játajbanana chë buatëmbana soyënga y chë abuayiynayéngaftaca chëngbioye Bëngbe Bëtšá tojanoyé mandënga jtsobedecénana. <sup>22</sup> Pero chëngaftaca tojopasá ntšamo entšanga mondëntšayancá chca ndegombre bëtsemnana: “Chë queše chabe ashconánana tojtsemnoye jesshéconana ca” y “chë cotše cabá chora bebená, ngüichetsoye jana jetsójanduouoyama ca”.

### 3

#### *Jesucristo quem luaroye jésabama ora*

<sup>1</sup> Jesucristbeyeca atšbe bonshana catsátanga, móraca ya uta soyama cbontsëbuabi-  
amná. Quem uta tsbuanáchaca atše sënjábošena jamama tšëngaftangbe juabna nye  
ena tšabe soyéngaca chaotsemnana, y chca chaotsemnamna atše jtsabuayiynayëse chë  
tcmojanabuatambá soyëngama. <sup>2</sup> Atše séntseboše tšëngaftanga chašmotsenojuabná,  
ntšamo chë inye tempënga ora, chë nye Bëngbe Bëtšábioye jtsoservénëse, chabe juabna  
oyebuambnayënga tmojánayanama, y chë Bëngbe Utabná y Atsebacayabe buatëmbana  
soyëngama y mandëngama, ndayá chabe ichmónëngaftaca tšëngaftanga šmojanóyën-  
gacñe.

<sup>3</sup> Pero masna quem soye chacmotsésertana: Jesucristo quem luaroye jésabama tempo  
chaojtsobeco ora, mochántsemna entšanga y chënga mochantsiyena nye cachënga tšabá  
jtsomñama bacna juabnéngaca, y cmochantsébuayajuana, chë Cristo yochjésabama  
šmošbuáchema. <sup>4</sup> Chënga mëntšá mochántsi chamo: “Cristo tcmojanašebuachená quem  
luaroye jésabama. ¿Ndegombre chca? Chcase, ¿ndayentše cha yojtsemna? Bëngbe  
bëtšétsanga, ndëmuanýëngbioye cha tojanašebuachená quem luaroye jésabama, ya  
tmonjóbana, y quem luarentše lempe cachcá endesomñe, ntšamo quem luare tojanobo-  
jatšé orscana enjamncá ca.” <sup>5</sup> Chë entšanga ndoñe ntsebošana jtsejuabnayana ya bayté  
yojtsemna, Bëngbe Bëtšá tojanmandá y chca tojanma celoca y quem luare chaotsem-  
nama. Cha quem luare tojanma búyeshentšana y búyesheca; <sup>6</sup> y cach búyeshecnaca,  
chë uabouana uaftenentša béjayeca, ya bayté yojtsemna, cha lempe quem luarentše  
yojanbinýncá tojtsanpochocá. <sup>7</sup> Pero chë mora entsemna celoca y quem luare, cach

Bëngbe Bëtsabe mándoca, ndoñe quenátopodena chamotsepochochocama, chë Bëngbe Bëtsá jayanama chábioye ndoñe mondadoránënga ntšamo tmojamcá ndoñe tšabá yonjamnama, y chë bacna soyënga tmojamama nyetsca tescama castigo chamotsebomnama jamándama tempo candóshjanguëntscuana. Chora Bëngbe Bëtsá, celoca y quem luare íñesheca echantsepochóca.

<sup>8</sup> Pero, atšbe bonshánënga, canye soye endmëna y chë soye ndoñe chacmondéb-nëtjomba: Bëngbe Utabnabe juabnama, canye te endmëna mo canye uaranga uatcá, y canye uaranga uata mo canye tecá. <sup>9</sup> Ndoñe quenátsmëna, ntšamo báseftanga jtsejuabnayana, ntšamo tojašebuachenacá cha ndoñe betscó yochanjama ca, chë cha quem luaroye jésabama, ndayá chana puerte uantado tšëngaftangaftaca comna; er cha jtsebošana ndocná nyetsca tescama castigo chaondétsebomnama, ndayá nyetscanga bacna soyënga amana jtsajbanase, Bëngbe Bëtsabe tšabe benache chamuashjáchama.

<sup>10</sup> Pero Bëngbe Utabná echanjésabo ndocná chama chaondétsejuabná ora, mo canye atbëbanacá jashjanguana, ndocná chama tontsejuabná ora. Chora celoca echanjopochóca, canye jabuache shauenanánaca, y quem luare ndaye soyënguentsšana yomnana íñesheca echántsefjatëjo, y ndayá Bëngbe Bëtsá y entsánga quem luarentše tmojamcá, lempe echántsejuinje.

<sup>11</sup> Lempe chca japochócama entsémnyeyeca, ndegombre tšëngaftanga cmontsamna jtsiyenana ntšamo chë Bëngbe Bëtsabe entsánga jtsiyenana entsamncá, y nyets tempo jtsamëse chë Bëngbe Bëtsábioye jtsatschuanayama yomna soyënga, <sup>12</sup> tšëngaftanga chë Jesucristo quem luaroye jésabama chaóshjanguama šmojtsobatmanëntscuana; y nya šmochtsentsëna cha más betscó cháuesabama. Chë te íñesheca celoca echántsejuinje, y ndaye soyënguentsšana quem luare yomnana cach íñesheca echántsefjatëjo. <sup>13</sup> Pero bënga mondobátmana ntšamo cha šojašebuachenacá: canye tsëm luare, mo canye tsëm celoca y tsëm fshantscá, y chentše nyetscanga mochantsiyena ntšamo Bëngbe Bëtsabe bominjñe tšabá yomncá jtsamëse.

<sup>14</sup> Chíyeca, atšbe bonshánënga, chë soyënga chaotsemnana šmojtsobatmanëntscuana, nya chiñe šmochtsentsëna, chca, cha yochjésabo ora, chacmanýena oyeniñe tšabá Bëngbe Bëtsáftaca jtsatsmënëse, ínýengaftaca natjémbana jtsiyenëse; chacmanýena ainaniñe ndocna bacna soye ndbomnënga, y puerte tšabá jtsamëse oyeniñe; chca, ndocná chaondobená jayanama tšëngaftanga ndaye bacna soye šmojama ca. <sup>15</sup> Quem soye šmochtsejuabnaye: Bëngbe Atsebacayá ndoñe yapa betscó tonjésabëšna, chca jtsemnana cha puerte uantado nyetscángaftaca yómnyeyeca; chca cha yomna, ba entsánga chë bacna soyënga amana chámajbanama y chabe benache chámuatishachama y chca, atsebácanënga chamotsemnana. Cach quem soyëngámna, Jesucristbeyeca bëngbe bonshana catsáta Pablo tcmonjanëbuábiamana, chë Bëngbe Bëtsá tojanma cha chaotsebomnama osertanánaca. <sup>16</sup> Chë soyëngama, Pablo nyetsca chabe tsbuanáchangañe tonjanoyebuambá. Chéchangañe endmëna soyënga totcá josértama; y chë soyëngama, chë Bëngbe Bëtsabe soyëngama ndoñe tmonjuatsjínýënga, y chë mora canye soye jtsejuabnayana y chentšana inýetšá juabnayënga, jtsejuabnayana y ínýengbioye jtsabuayiyayana ndoñe ndegombre yondmëna ca. Y cachcá jtsamana inye soyëngaca, Bëngbe Bëtsabe uabemana palabrënguñe. Chca chënga montsajna pochocánënga jtsemnana.

<sup>17</sup> Chíyeca, atšbe bonshánënga, tšëngaftanga chë ya šmojtsetátšëmbo chë ndoñe ndegombre soyënga abuátambayënga mochtsemnana, yejuana šmochtsantješna; chca, chë Bëngbe Bëtsá ntšamo yomandacá ndobedecenëngbe soyëngaca ínýënga jáingñama, tšëngaftanga ndoñe chašmondétsemna mo uambanëngcá, ndoñe chašmondétsajbanama jtsebomnana chë Bëngbe Bëtsabe soyënga ntšamo šmojashjachcá. <sup>18</sup> Pero atšna, Bëngbe Utabná y Atsebacayá Jesucristo séntseimpadana, tšëngaftanga chašmotsiyena jtsamëse, chë chábentsšana šmojóyëngacñe ba soyënga ntšamo tomnama



jtsejuabnayëse, y chaoma tšëngaftanga cada te más tšabá cha chašmotsábuatmama.  
¡Njetscanga cha chamotsatschuaná, mora y njetsca tescama! Chca chaotsemna.

## 1 San Juan

*Cristo, chë nyetsca tescama yomna tšabe vida entsānga chamotsebomnama amá*

<sup>1</sup> Bēnga cbontsēbuabiamná chë Bēngbe Bētsá ndabijana inétsoyebuambnabiama, chë nyetsca tescama yomna tšabe vida entsānga chamotsebomnama iuamabiama, chë Bēngbe Bētsá cabá quem luare ndēma orscana ya yojamnabiama. Bēngbe matscuašēngaca chabe oyebuambnayana fsēnjouena y bēngbe bomínjēca cha tonjama soyēnga fsēnjinyē. Aíñe bēnga cha fsēnjinyē y bēngbe cucuatšēca fsēnjábojajo. <sup>2</sup> Cha bēngbentše tonjanonýná y fsēnjáninyē; chíyeca bēnga chabiama cbontsētsētsná y cbontsabuayiyná, nda sempre vida yobomna y nda chë nyetsca tescama yomna tšabe vida entsānga chamotsebomnama iuama. Chana, chë Taitá Bēngbe Bētsáftaca inamna, pero mora bēngbioye šojinýanjé. <sup>3</sup> Bēnga tšēngaftanga cbontsabuayiyná ntšamo tifjinýe y tifjouencá, tšēngaftanga cánýiñe mo canýacá bēngaftaca chašmotsemnama. Bēnga cánýiñe mo canýacá fsēndmēna chë Taitá Bēngbe Bētsáftaca y chabe uaquiñá Jesucristoftaca. <sup>4</sup> Bēnga quem soyēnga tšēngaftanga cbontsēbuabiamná, bēngbe oyejuayana corente bētsá chaotsemnama.

*Bēngbe Bētsá endmēna chë entsāngbiama binýnayá*

<sup>5</sup> Mēntšá entsemna ntšamo Jesucristbentšana tifjouencá y chca tšēngaftanga cbontsabuayiyná: Bēngbe Bētsábeñe lempe binýniñe, lempe tšabá endmēna, y chábeñe tondaye ndoñe chca quenátsmēna. <sup>6</sup> Bēnga tmojtsichamo cháftaca cánýiñe mo canýacá fsēntsemna ca, pero cabá ndoñe Bēngbe Bētsabe cucuatšīñe, chë binýniñe tmontsemna, y chca, bacna soye juabnayēnga y amēnga tmojtsiyena, asna, bēnga mojtsebostero y ndoñe montsama ntšamo ndegombre yomncá. <sup>7</sup> Pero bēnga chë binýniñe tmojtsiyena, tšabe soye juabnayēnga y amēnga ntšamo Bēngbe Bētsá iuamcá, as nyetscanga cánýiñe mo canýacá mochántsemna, y chabe uaquiñá Jesucristbe uabuáshanana buíñeca, Bēngbe Bētsá bēngbe bacna soyēnga sempre šochántsabujuanaye, y echanjama bēnga chabe delante tšabá chamotsatsemnama.

<sup>8</sup> Bēnga bacna soyēnga ndoñe queftsátsbomna ca tmojtsichámēse, chca cabēnga jt-senoíngñayana y ainaniñe chë ndegombre soyēnga ndoñe tmonjójyēngacñe; <sup>9</sup> pero bēnga ndegombre bacna soye amēnga fsēndmēna ca, Bēngbe Bētsá tmojauyanēse, cha bēnga šochanjínýanjíye cachá chë ntšamo šojiytsašebuachecá amá y nyetsca soyēnguiñe tšabá amá yomnama; y chca, nyetsca bēngbe bacna soyēnga šochanjáperdonaye y nyetsca bacna soyēnga šochanjábuajuanaye. <sup>10</sup> Bēnga tmojtsichamo, bacna soyēnga ndoñe chibiatsma ca, chca bēnga muattsichamo mo Bēngbe Bētsá canýe bostero cuaftsemncá, y ntšamo Bēngbe Bētsá bēnga šojauyancá ainaniñe ndoñe tmonjójyēngacñe.

## 2

*Cristo, bēngbe obuauyayá*

<sup>1</sup> Tšēngaftanga mo atšbe basengcá, er atše tconjanéjabuache Jesucristbe tšabe noticiēnguiñe chašmotsošbuáchema, quem soyēnga cbontsēbuabiamná bacna soyēnga ndoñe chašmondétsamama. Pero ndánaca Crístbeñe ošbuachiyēnguentšá bacna soye tojamēse, bēnga canýe obuauyayá Bēngbe Bētsabe delante montsebomna, y cha endmēna Jesucristo, chë nyetsca soyēnguiñe tšabá amá. <sup>2</sup> Jesucristo tonjanóbana ndoñe nýe Bēngbe Bētsá bēnga chásuaperdonama bēngbe bacna soyēngama, ndayá quem luarentša nyetsca entsāngnaca chēngbe bacna soyēngama cháuaperdonama.

<sup>3</sup> Bēnga ntšamo Bēngbe Bētsá šojtsamēndacá tmojtsamēse, ndegombre mochántsetatšēmo bēnga cha imuábuatmama. <sup>4</sup> Pero nda tojayana: “Atše Bēngbe Bētsá sēnduábuatma ca”, pero ndoñe tontsama ntšamo Bēngbe Bētsá ibuamēndacá, cha canýe bostero jtsemnana y ainaniñe chë Bēngbe Bētsabe ndegombre soyēnga ndoñe tonjójyēngacñe.

<sup>5</sup> Pero nda ntšamo Bëngbe Bëtsá ibuamëndacá tojtsama, jtsinÿanÿnayana chabe ainaniñe Bëngbe Bëtsabiama corente bonshánana yomnama, y chca, mochántsetatšëmbo bënga sempre cánÿiñe mo canÿacá cháftaca imomnama. <sup>6</sup> Nda tojtsichamo Bëngbe Bëtsáftaca cánÿiñe mo canÿacá yojtsemna ca, bontsemna jtsiyenana soyënga jtsamëse ntšamo Jesucristo yojëftsiyencá.

#### *Canÿe tsëm mando*

<sup>7</sup> Atšbe bonshana entšanga, ntšamo mora cbontsëbuabiamnacá, ndoñe canÿe tsëm mando quenátsmëna, pero aíñe canÿe tempsca mando; entsemna cach tšëngaftanga Cristbe ústonënga šmonjanobiama ora šmonjanóyëngacñe mando. Quem tempsca mando entsemna ntšamo tšëngaftanga béngbentšana šmonjouencá. <sup>8</sup> Pero masque chca endmënëse, quem cbontsëbuabiamná soye tšëngaftangbiama echántsemna mo canÿe tsëm mandcá. Cristo enjëftsiyena ntšamo quem Bëngbe Bëtsabe mando ndegombre yomncá y tšëngaftángnaca cachcá šmondoyena, er chë bacna juabnënga jtsebomnëse mo ibetiñcá jtsiyenana tempo ya echanjochnëngo, y chë entšangbe juabna ndegombre binÿnayá ya entsebuashinÿinÿana.

<sup>9</sup> Nda tojayana chë binÿnayáftaca yojtsemna ca, pero cha chabe catšátbioye tbojtsáboyënja, cha cabá tempcá, bacna juabnënga jtsebomnëse yojtsiyena, mo ibetiñcá. <sup>10</sup> Nda chabe catšátbioye tbojtsebobonshana, cha chë binÿnayáftaca jtsiyenana, y tondaye queochátsmëna cha bacna soye chaotsamama. <sup>11</sup> Pero nda chabe catšátbioye tbojtsáboyënja, cha bacna juabnënga jtsebomnëse jtsiyenana, mo canÿa ibetiñe oyenacá. Cha ndoñe ntsetatšëmbuana chë ndayá tojamama ntšamo chentšana yochjopása, er chë bacna juabnënga jtsebomnëse jtsiyenana chábioye ndoñe ntjalesénciana ntšamo tšabá yomncá chaotsamama.

<sup>12</sup> Básenga, atše cbontsëbuabiamná Bëngbe Bëtsá tšëngaftangbe bacna soyënga tcmojáperdonama, ndayá Jesús tojanma sóyeca. <sup>13</sup> Taitanga, tšëngaftanga cbontsëbuabiamná, er tšëngaftanga ya šmonjuábuatmana chë quem luare jobojátšama orscana ya inamná. Tšëngaftanga bobontsëgnaca cbontsëbuabiamná, er tšëngaftanga ya chë nyetsca bacna soyënga mandayá Satanás šmonjayëñaná.

<sup>14</sup> Básenga, tšëngaftanga tconjubuábiama, er tšëngaftanga chë Taitá ya šmonjuábuatmana. Taitanga, tšëngaftanga tconjubuábiama, er tšëngaftanga ya šmonjuábuatmana chë quem luare jobojátšama orscana ya inamná. Bobontsënga, tšëngaftángnaca tconjubuábiama, er tšëngaftanga bëtscá añemo ainaniñe šmambá, y Bëngbe Bëtsabe palabrama sempre tšëngaftangbe ainaniñe šmondëjuabná, y chë nyetsca bacna soyënga mandayá šmonjayëñaná.

<sup>15</sup> Ndoñe matsbošana oyejuayënga jtsemnana nÿe quem luarentša soyéngaca, ni nÿe chë soyënga jtsebomnana. Nda yapa tojtseboše quem luarentša bacna soyënga jtsebomnana, cha ndoñe chë Taitábioye bondbobonshana. <sup>16</sup> Er chë nÿe quem luarama enójuabnayënga mëntšá juabnënga mondbomna: yapa jtsebošana jtsebomnana ntšamo chë ainaniñe bacna juabnënga bomnënga mondbetsebošcá; yapa jtsebošana nÿe ndayá tmojatinÿe soye; y yapa jtsenábotamnayana chë tmobomna soyëngama. Chë juabnënga Bëngbe Bëtsábiocana ndoñe ntsóbocanana, ndayá nÿe chë quem luarama enójuabnayëngbentšana. <sup>17</sup> Pero quem luare echanjopochóca y nyetsca chentša soyënga, chë entšanga bacna juabnéngaca yapa imoboše jtsebomnana soyéngnaca. Pero nda ntšamo Bëngbe Bëtsá yobošcá tojtsama, cha chë nyetsca tescama yomna tšabe vida echántsebomna.

#### *Chë Cristbe contra yomná*

<sup>18</sup> Básenga, quem luare jopochócama tempo ya entsobeco. Ntšamo tšëngaftanga šmonjouencá, quem tempo echanjabo chë Cristbe contra yomná. Pero morna banga Cristbe contra imomnënga tmonjábocana. Chca bënga montsetátšëmbo chë quem luare jopochócama tempo ya yojtsobecuama. <sup>19</sup> Chënga cach béngbentšana tmonjábocana.

Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach béngaftaca matmënjoquedanga. Pero chca tonjopasá, ndegombre jtsotatsëmbuama ntšamo bënga Jesucristbeñe mondošbuachecá, chënga nyetscanga ndoñe mondošbuáchema.

<sup>20</sup> Pero Cristo, chë Uamaná, tšëngaftanga tcmonjabacacá, y cha tonjama chë Uámana Espíritu tšëngaftangbe ainaniñe cháumashënguama; y nyetsca tšëngaftanga chë ndegombre soyënga šmondétatsëmbo. <sup>21</sup> Atše cbontsëbuabiamná, ndoñe chë ndegombre soyëngama ndoñe šmondétatsëmbuama, ndayá aíñe šmotatsëmbuama; er tšëngaftanga šmondétatsëmbo chë ndegombre soyënga y ndoñe ndegombre soyënga cányiñe jtsemnama ndoñe yondopodénama. <sup>22</sup> Nda tojayana Jesús chë Bëngbe Bëtsabe Uámana Uabuayaná, chë Cristo ndoñe yondmëna ca, chana jtseboosterana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiana ndoñe ntsejuabnayana cha chë Taitá bëtsemnama. <sup>23</sup> Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca cányiñe mo canyáca ndoñe ntsemnana. Pero nda entsángbeñe tojayana, Cristo aíñe Bëngbe Bëtsabe Uaquiñá endmëna ca, chana aíñe chë Taitáftaca cányiñe mo canyáca jtsemnana.

<sup>24</sup> Tšëngaftanga, chë Cristbe ústonënga šmojanóbiana orscana šmojanuena soye, tšëngaftangbe ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cányiñe mo canyáca šmochántsemna. <sup>25</sup> Y quem soye entsemna ntšamo Cristo šojëftsasëbuachená: chë nyetsca tescama yomna tšabe vida jtsebomnana.

<sup>26</sup> Atše chca cbontsëbuabiamná, chë tšëngaftanga jáingñayama imojtsebošëngbiana chašmotsetatsëmbuama. <sup>27</sup> Pero Cristo tcmojanabacacá ora, Uámana Espíritu šmojanóyëngacñe, y mora tšëngaftangbe ainaniñe Uámana Espíritu šmontsebomna, y ndoñe quenátseyta ndocná más chacmotsabuátambama, er chë Uámana Espíritu lempe cmontsabuatambá; y cha endabuatambá ndegombre soyënga, y bostero soyënga ndoñe. Mëntšá, ntšamo chë Uámana Espíritu tcmojabuatambacá jtsiyenëse, Crísoftaca cányiñe mo canyáca šmochtsemna.

<sup>28</sup> Y mora básënga, Crísoftaca cányiñe mo canyáca šmochtsemna, chca, cha chaojabáisebocna ora, chábeñe jtsošbuáchiyëse, bënga añémoca chamotsemnana y ndoñe chamondëtsëuatjama, bënga chabe delante chamojtsemna ora. <sup>29</sup> Tšëngaftanga šmontsetatsëmbo Jesucristo nyetsca soyënguiñe tšabá amá yomnama. Chcasna, cmontsamna jtsetatsëmbuana, nyetscanga ntšamo Bëngbe Bëtsá yobošcá tmojtsamëngna, Bëngbe Bëtsabe básënga imomnana.

### 3

#### *Crístbeñe ošbuáchiyënga, Bëngbe Bëtsabe básënga*

<sup>1</sup> Menójuabonga, ntsachetšá Bëngbe Bëtsá chë Taitá šondábabuanyëshanama. Chabe bonshánana tša bëtscá endménayeca, bënga šondëubuabuatma chabe básënga ca, y ndegombre bënga chca mondmëna. Chë causa chë nye quem luarama enójuabnayënga ndoñe quenátësertana ntšamo bënga imomnana, er chënga cha ndoñe tmonjanábuatmana. <sup>2</sup> Atšbe bonshana entsãnga, mora bënga ya Bëngbe Bëtsabe básënga montsemna. Y masque cabá ndoñe quemuátstatšëmbo ntšamo más chcoye bënga mochjamnama, aíñe mondétatsëmbo, Jesucristo chaojabáisebocna ora bënga cachacá mochtsemnana, er bënga mochanjobenaye jinýama ntšamo cha ndegombre yomncá. <sup>3</sup> Y nda chca chábeñe puerte jtsošbuáchiyëse tojtsobátmana, bacna soyënga amana jtsajbanana, más tšabia jtsemnana, ntšamo cach Cristo yomncá, lempe tšabia y bacna soye ndbomná.

<sup>4</sup> Pero nda bacna soye tojama, chana ntšamo Bëngbe Bëtsá tojëftsemandacá jtsabotënana; er bacna soye jamana endmëna, jtsabotena ntšamo Bëngbe Bëtsá tojëftsemandacá.

<sup>5</sup> Tšëngaftanga ya šmondétatsëmbo Jesucristo quem luaroye tojánabo bëngbe bacna soyënga jabëtsabuajuanama, y cha ni mo canýe bacna soye ndoñe yondbomnana.

<sup>6</sup> Chcasna, nda cánjiñe mo canyacá cháftaca nyets tempo tojtsemna, ndoñe ntsiyenana bacna soyënga jtsamëse. Pero nda tojtsiyena bacna soyënga jtsamëse, Jesucristbiamana ndoñe tbonjosertá y ndoñe yondétatšëmbo ntšamo cha bétsemnana. <sup>7</sup> Atšbe básenga, ndocná chacmondaingñé: nda nyetsca soyënguiñe tšabá tojtsama, cha canye tšabá mándbomna entšá jtsemnana, ntšamo Jesucristo yomncá; <sup>8</sup> pero nda tojtsiyena bacna soyënga jtsamëse, chabe ainaniñe Satanás jtsemándayana, er Satanás quem luare jobojátšama orscana bacna soyënga iuésama. Bëngbe Bëtsabe Uaquiñá nya quem soyama tojabo: chë Satanabe soyënga jabétsepochocama.

<sup>9</sup> Ndocná Bëngbe Bëtsabe uaquiñá tojtsemná jtsiyenana bacna soyënga jtsamëse, er cha jtsebomnana chë Bëngbe Bëtsá tbojuántšame tšabe vida, y Bëngbe Bëtsá chabe Taitá endmëna. Chíyeca cha ndoñe ntsiyenana bacna soyënga jtsamëse. <sup>10</sup> Corente jtsotatšëmbuana ndëmuanýenga Bëngbe Bëtsabe básenga imomnana y ndëmuanýenga Satanabe básenga; ndëmuanýëgnaca ntšamo tšabá yomncá ndoñe tmontsama o chabe catšata ndoñe tmontsebobonshana, ndoñe ntsemnana Bëngbe Bëtsabe básenga.

### *Nyetscanga jtsenbobonshánana*

<sup>11</sup> Quem buayenana entsemna ntšamo tšëngaftanga šmojanuena, tšëngaftanga Cristbe ústonënga šmonjanobiamana orscana: nyetscanga šontsamna jtsenbobonshánana. <sup>12</sup> Ndoñe Caincá muatjama. Chabe ainaniñe Satanás yojamánda, y chíyeca, chabe uabentsábioye tbojtsanóba. ¿Y ndáyeca tbojtsanóba? Cha ndoñe tšabá yonjánama; chabe uabentsana aíñe; chíyeca tbojtsanóba.

<sup>13</sup> Jesucristbeyeca atšbe catšátanga, ndoñe šmattsenjnanaye chë nye quem luarama enójuabnayënga cmojtšëbuayënjama. <sup>14</sup> Bënga mondétatšëmbo, bënga tempo monjaniyena chë nye quem luarama enójuabnayënga mondoyencá, y chca, Bëngbe Bëtsabiamana mo obanëngcá monjamna, er bënga monjaniyena ntšamo Bëngbe Bëtsá ndoñe yondëmandacá. Pero Bëngbe Bëtsá tonjama mora bënga tsëm vida chamotsebomnana, y chca, mo ndegombre ainëngcá montsemna. Chca mondétatšëmbo, er bënga bëngbe catšátangbioye mondábabuanýeshana. Nda chabe catšátbioye ndoñe tbonsebobonshana, cha cabá mo obanacá jtsiyenana. <sup>15</sup> Nda cachabe catšátbioye tbojtsáboyënja, cha jtsemnana mo entšanga obanayacá. Y tšëngaftanga šmondétatšëmbo entšanga obanayá ndoñe ntsoyobanana jtsiyenana, chë nyetsca tescama yomna tšabe vida chabe ainaniñe jtsebomnëse.

<sup>16</sup> Ndayá chë jtsenbobonshánana bétsemnana mëntšá montsetatšëmbo: Jesucristo chabe derecho vida jtsobomñana cachcá tojanonyá y bëngbiamana tojanóbana; cachcá bënga šontsamna jtsemnana, sempre jtseprontánana chë Jesucristbeyeca bëngbe catšátangbiamana jóbanama. <sup>17</sup> Canya bomnana tojtsebomna y catšátbioye uajabotá tbojtsonyá, pero chabiamana ndoñe tbonjongmé y ndoñe tbonjuájabuache, cha ndoñe ntsoyobanana Bëngbe Bëtsabiamana ainaniñe bonshánana jtsebomnana. <sup>18</sup> Atšbe básenga, ndoñe quešnátamna nye bëngbe catšátanga imuababuánýeshana ca jatichámuana, y nye chë bonshánana jatóyebuambnayana; pero ndegombre šontsamna ndayánaca jamana, chca, jinýanýiyama, bënga ndegombre ínýëngbiamana imuababuánýeshanama.

### *Bëngbe Bëtsabe delante natjémbana ainánaca entšanga*

<sup>19</sup> Chcase bënga mochántsetatšëmbo, ntšamo chë Bëngbe Bëtsabe ndegombre soyënga yomncá bënga imojtsamama. Y bënga ndoñe quemochátenocochinýena, Bëngbe Bëtsábioica jtsemnana merecido ndoñe mondbuájona ca tmojtsejuabná ora; y bëngbe ainana natjémbana Bëngbe Bëtsabe delante echántsemna. <sup>20</sup> Bënga chca bëngbe ainaniñe tmojtsejuabná ora, bënga montsobena natjémbana ainana jtsebomnana, er Bëngbe Bëtsá corente jtsotatšëmbñana ntšamo bëngbe ainana yomnana, y cha lempe yotatšëmbo. <sup>21</sup> Atšbe bonshana entšanga, bënga ndoñe bacna soye tmonjama ca bëngbe ainaniñe tmojtsejuabnase, jtsobanana añémoca jtsemnana y tondayama ntsauatjácá Bëngbe Bëtsabe delante jtsemnana. <sup>22</sup> Y cha lempe ntšamo chamojotjañcá

šochanjátšataye, er bēnga montsama ntšamo Bēngbe Bētsá ibuamandacá y ndayá chabe bominiñe tšabá yomncá. <sup>23</sup> Y chabe mando endmēna: bēnga chabe Uaquiñá Jesucristbeñe jtsošbuáchiyana, y bēnga nyetscanga jtsenbobonshánana ntšamo Jesús šojéftsamēndacá. <sup>24</sup> Ntšamo Bēngbe Bētsá tojéftsemandacá amēnga, Bēngbe Bētsáf-taca cánjiñe mo canyáca jtsemnana, y cha sempre chéngaftaca cánjiñe mo canyáca echanjéftsemna. Y quem sóyeca bēnga montsobena jtsetatšēmbuana cha bēngaftaca iuétssemnama: Uámána Espíritu bēngbe ainaniñe cháuamashēnguama cha tojama.

## 4

*Chē Bēngbe Bētsabe Espíritu y chē Cristbe uayayabe espíritu*

<sup>1</sup> Atšbe bonshana entšanga, nyetscanga chē Bēngbe Bētsabe juábnaca imoyebuambná ca ichámēngbioye ndoñe šmattsayaunana; botamana šmochjuarrepára corente jtsetatšēmbuama chēnga añe o ndoñe chē Bēngbe Bētsabe juábnaca imóyebuambnama. Quem tempo banga Bēngbe Bētsabe ndoñe ndegombre juabna oyebuambnayēnga quem luarējana mondajna. Chē causa tšēngaftanga cmontsamna botamana chēngbiana juarrepárana. <sup>2</sup> Chē Bēngbe Bētsabe Espíritu ndegombre imobomnēngbiana tšēngaftanga mēntšá šmontsobena jtsetatšēmbuana: nda tojayana Jesucristo quem luaroye añe entšacá tojánabo ca, cha ndegombre chē Bēngbe Bētsabe Espíritu yojtsebomna. <sup>3</sup> Pero nda ndoñe chca Jesucristbiana tonjayana, cha Bēngbe Bētsabe Espíritu ndoñe yontsebomna; inyētšá, chana chē Cristbe contra yomnabe espíritu yojtsebomna. Tšēngaftanga šmojouena chē espíritu yochjabama; pero ndegombre cha ya quem luarentše entsemna.

<sup>4</sup> Atšbe básenga, tšēngaftanga Bēngbe Bētsábenga šmondmēna y ndoñe šmonjalesencia chē Bēngbe Bētsabe ndoñe ndegombre juabna oyebuambnayēnga tšēngaftangbioye chacmaingñema, er chē nyets tempo tšēngaftangbe ainaniñe vida endbomná, chē nye quem luarama enójuabnayēngbe ainaniñe mándayabiana más obená endmēna. <sup>5</sup> Chē Bēngbe Bētsabe ndoñe ndegombre juabna oyebuambnayēngna chē nye quem luarama enójuabnayēnguentšana mondmēna, chíyeca chēnga nye quem luarentša soyēngama jtsóyebuambnayana, y chē nye quem luarama enójuabnayēnga chēnga jtsayaunana. <sup>6</sup> Pero bēnga Bēngbe Bētsábenga mondmēna. Nda Bēngbe Bētsábioye tbojtsabatma, bēngbioye jtsayaunanana; pero nda Bēngbe Bētsábioye ndoñe tbontsabuatma, cha bēnga ndoñe ntsayaunanana. Chiñe bēnga montsobena jtsetatšēmbuana nda chē ndegombre soyēnga jóyebuambayama ama espíritu yobomnabiana, y nda chē ín्यēngbioye jáingñama ama espíritu yobomnabiámna.

*Chē bonshánana Bēngbe Bētsábocana yóbocana*

<sup>7</sup> Atšbe bonshana entšanga, chē bonshánana Bēngbe Bētsábocana endóbocana; chcase, bēnga šontsamna nyetscanga jtsenbobonshánana. Nda Bēngbe Bētsábioye y chē inye entšangbioye tojtsababuányeshana, cha Bēngbe Bētsabe uaquiñá jtsemnana y Bēngbe Bētsábioye jtsabatmana. <sup>8</sup> Nda ndoñe chca tontsebobonshana, cha Bēngbe Bētsábioye ndoñe ntsábuatmana, er Bēngbe Bētsá bonshanánaca nyetsca soyēnga jamana. <sup>9</sup> Bēngbe Bētsá šonjinyanýé bēnga šuababuányeshanana, cha chē nye canye Uaquiñá ibobomná quem luaroye jíchmuase; cha tbojanichmó, bēnga chábeyeca chē nyetsca tescama yomna tšabe vida chamotsebomnama. <sup>10</sup> Bēngbe Bētsabe bonshánana mēntšá endmēna: ndoñe quenátsmēna bēnga Bēngbe Bētsá imobobonshánayeca, ndayá cha bēnga šojánababuanýeshanayeca, y chabe Uaquiñá tbojanichmó, cha jóbanēse, bēnga bēngbe bacna soyēngama perdonánēnga chamotsemnama.

<sup>11</sup> Atšbe bonshana entšanga, Bēngbe Bētsá chca šuababuányeshana; chcasna, bēngnaca šontsamna nyetscanga jtsenbobonshánana. <sup>12</sup> Ndocná ndocna te Bēngbe Bētsábioye tbonjinýe. Bēnga nyetscanga tmojtsenbobonshánēse, Bēngbe Bētsá nyets tempo bēngaftaca echántsemna, y chabe bonshánana puerte bētsacá bēngbeñe echántsemna. <sup>13</sup> Bēnga mēntšá montsobena ndegombre jtsetatšēmbuana bēnga Bēngbe Bētsáf-taca

imomnama y cha béngaftaca: cha tonjanma chabe Espíritu bēngbe ainaniñe cháua-mashēnguama. <sup>14</sup> Y cach bēnga fsēnjinye y entsānga fsēntsētsētsná, chē Taitá chabe Uaquiñá tbojichmoma, quem luarentša entsānga jabátsebacama. <sup>15</sup> Ndánaca tojayana Jesús Bēngbe Bētsabe Uaquiñá yomna ca, cha Bēngbe Bētsáftaca cánýiñe echántsemna y Bēngbe Bētsánaca sempre cháftaca cánýiñe mo canýacá.

<sup>16</sup> Chcase bēnga montsetátšēmo y montsošbuaché ndegombre Bēngbe Bētsá bēnga šuababuánýeshanama. Bēngbe Bētsá nyetsca soyēnga bonshanánaca jamana y nda Bēngbe Bētsá y chē inye entsānga sempre tojtsababuánýeshana, cha Bēngbe Bētsáftaca cánýiñe mo canýacá jtsemnana y Bēngbe Bētsánaca sempre cháftaca cánýiñe mo canýacá. <sup>17</sup> Chca, Bēngbe Bētsabe bonshánana puerte bētsca bēngbeñe echántsemna, bēnga bēts añémoca y tondayama ntsauatjá chamotsemnana, chē tšabá o ndoñe tšabá tmonjamama entsāngbiana jayanama Cristo yochjésabo orscama; er bēnga Jesucristof-taca cánýiñe mo canýacá jtsemnēse, quem luarentše mondmēna ntšamo Jesucristo endmēncá. <sup>18</sup> Nda Bēngbe Bētsá y chē inye entsānga tojtsababuánýeshana, tondayama ntsauatjana; bēnga corente tmojtsebobonshana ora, ndoñe ntsopodénana uatjana jtse-bomnana. Canýe entsá tojtsauatja ora, jtsemnana mo chabe castigo ya cuafjoboatšecá. Chca, nda uatjana tojtsebomna, Bēngbe Bētsábioye y chē inye entsānga cha ndoñe corente yondábabuanýeshana, ntšamo Bēngbe Bētsá bēnga šuababuanýeshancá.

<sup>19</sup> Natsana Bēngbe Bētsá šojánababuanýeshana, y chíyeca bēnga, cha y chē inye entsānga imuababuánýeshana. <sup>20</sup> Nda tojayana: “Atše Bēngbe Bētsábioye séndbobonshana ca”, pero cachca ora cachabe catsátbioye tbojtsáboyēnja, cha canýe bostero jtsemnana. Canýa aiñe jtsobenana chabe catsáta jinýama; y cha chē catsátbioye ndoñe tbontsebobonshana, ndegombre cha Bēngbe Bētsábioye ndoñe bondbobonshana, ndábioye jinýama ndoñe ntsobenana. <sup>21</sup> Y bēnga quem mando chábentsana tmonjanóyēngacñe: nda Bēngbe Bētsábioye tbojtsebobonshana, cachabe catsátbioynaca chabotsebobonshana ca.

## 5

### *Chē Jesucristbeñe ošbuachiyá endobena Satanasbe soyēnga jayénjanana*

<sup>1</sup> Nda tojtsosbuaché Jesús chē Uámana Uabuayaná, chē Cristo yomnama, cha Bēngbe Bētsabe uaquiñá jtsemnana; y nda canýe taitábioye tbojtsebobonshana, chē taitabe uaquiñábioynaca cha jtsebobonshánana. <sup>2</sup> Bēnga Bēngbe Bētsá tmojtsebobonshana y ntšamo cha tojtsemandacá tmojtsamēse, bēnga ndegombre mochántsetatšēmo, chē Bēngbe Bētsabe basengbioynaca bēnga imuababuánýeshanama. <sup>3</sup> Bēnga Bēngbe Bētsábioye imobobonshánama quem soyiñe jtsinýnana: bēnga ntšamo Bēngbe Bētsá tomandacá tmojtsamēse. Y ndayá Bēngbe Bētsá yomandacá ndoñe yapa totcá quenátsmēna bēnga chamotsamama. <sup>4</sup> Nda Bēngbe Bētsabe uaquiñá tomna, chana jáyénjanana quem luarentša entsānga y soyēnga ntšamo Satanás yomandacá. Quem luarentša entsānga y soyēnga ntšamo Satanás yomandacá, Crístbeñe bēnga imošbuachéyeca montsobena bēnga jayénjanana. <sup>5</sup> Nye nda, Jesús Bēngbe Bētsabe Uaquiñá yomnama tojtsosbuaché, cha jtsobenana chē entsānga y soyēnga ntšamo Satanás yomandacá jayénjanana; ndocná más.

### *Bēngbe Bētsá tojinýanyé ntšamo chabe Uaquiñabiana ndegombre yomncá*

<sup>6</sup> Cach Jesucristo endmēna nda quem luaroye tojánabo y mēntšá tojanenonýinýe: býyesheca cha tmojanabaye ora, y buiñe juabuáshanēse cha tonjanóbana ora. Cha ndoñe tonjanenonýinýe nye býyesheca, ndayá býyesheca y buiñeca. Cach Uámana Espíritu entsobena jayanana chca ndegombre bétsemnana Jesusbiana, er chē Espíritu endmēna chē sempre ndegombre oyebuambnayá. <sup>7</sup> Endmēna unga soyēnga, ndayá iuinýanýná ntšamo ndegombre yomncá Jesusbiana: <sup>8</sup> Espíritu, býyeshe y buiñe; y chē unga soyēnga lempe cachcá Jesusbiana jtsinýanýnayanana. <sup>9</sup> Bēnga mondbétsejuabnaye, ndayá entsānga tmojinýe ca tmojtsichámuama mo ndegombre cuaftsemncá, pero ndayá

Bëngbe Bëtsá tojtsichamcá chë ndegombre soye jtsemnana y puerte jtsámanana, er chë ndegombre soye ntšamo cha tojtsichamcá, endmëna ndayá chabe Uaquiñabiamá iuichamcá. <sup>10</sup> Nda Bëngbe Bëtsabe Uaquiñábeñe tojtsosbuaché, cha chca nyets tempo chabe ainaniñe jtsejuabnayana; nda Bëngbe Bëtsábeñe ndoñe tontsošbuaché, cha chca jtsamana mo Bëngbe Bëtsá canye bostero cuaftsemncá, er chë Bëngbe Bëtsá chabe Uaquiñabiamá tojayana soyama cha jtsejuabnayana ndoñe ndegombre yontsemna ca. <sup>11</sup> Ntšamo Bëngbe Bëtsá chabe Uaquiñabiamá tojayancá mëntšá entsemna: Bëngbe Bëtsá bëngbiamá tojama chë nyetsca tescama yomna tšabe vida chamotsebomnama; y quem vida chabe Uaquiñábeñe entsemna. <sup>12</sup> Nda Bëngbe Bëtsabe Uaquiñáftaca cányiñe mo canyacá tojtsemna, cha chë tšabe vídnaca jtsebomnana; pero nda chë Bëngbe Bëtsabe Uaquiñáftaca cányiñe mo canyacá ndoñe tontsemna, cha chë nyetsca tescama yomna tšabe vida ndoñe ntsebomnana ca.

*Inye soyëngama jábuayenama y jtadiósoftanama*

<sup>13</sup> Tšëngaftanga, chë Bëngbe Bëtsabe Uaquiñábeñe šmošbuachëngbioye quem soyënga cbontsëbuabiamná, ndegombre chašmotsetatšëmbuama chë nyetsca tescama yomna tšabe vida šmojtsebomnama.

<sup>14</sup> Bënga bëts añémoca y ndauatjcá Bëngbe Bëtsabe delante mondmëna, er bënga mondétatšëmbo, nderado ntšamo chaotsemnana cha tojtsebošcá bënga tmojtjañe ora, cha bënga šnétsayaunanama. <sup>15</sup> Nderado ndayá chca Bëngbe Bëtsábioye tmojtsotjanañe ora, cha bënga joyaunayana; bënga mondétatšëmbo chca ndegombre yomnama, y chca, bëngnaca montsetatšëmbo, ndayánaca chábioye bënga chamojotjañcá cha šochjátšatayama.

<sup>16</sup> Nda cachabe catšátbioye tbojinye canye bacna soye tojtsamama, pero chë bacna soye tojamentšana cha perdonaná jtsemnana cabá tojtsopodénëse, chábioye bontsemna Bëngbe Bëtsá jaimpádana, y chca, Bëngbe Bëtsá echanjama chë catšata chë nyetsca tescama yomna tšabe vida chaotsebomnama, cha chca tojamentšana perdonaná jtsemnana cabá tojtsopodénëse. Pero canye bacna soye endmëna, y chca tojamama canya ndoñe ntsobenana perdonaná jtsemnana, y chca, cha jabocnana canya nyetsca tescama castiganá chaotsemnana, y atše ndoñe quetsátichamo chë bacna soyama yojtsemna Bëngbe Bëtsá jtseimpadánana chaboperdonama ca. <sup>17</sup> Nda tojtsama ntšamo Bëngbe Bëtsá ndoñe yondëmandacá, cha bacna soye jtsamana; pero nyetsca bacna soyënga ntšamo canya tojtsamcá, ndoñe ntjamana cha ndëperdonaná chaotsemnana.

<sup>18</sup> Bënga mondétatšëmbo, nda Bëngbe Bëtsábioye mo taitacá tbojtsebomna, cha ndoñe ntsiyenana bacna soyënga jtsamëse, er chë Bëngbe Bëtsábentšana Onýnaná chábioye jtsinýenana, y Satanás, chë nyetsca bacna soyënga amëndayá, tondaye ntsobenana chábioye jabórlana. <sup>19</sup> Bënga mondétatšëmbo, bënga chë Crístbeñe ošbuáchiyënga Bëngbe Bëtsábënga imomnama, y chë quem luarentša inye entšanga Satanasbe cucuatšiniñe imomnama. <sup>20</sup> Bëngnaca mondétatšëmbo Bëngbe Bëtsabe Uaquiñá tojabama, y cha iuama bënga osertánana chamotsebomnama, chë ndegombre Bëngbe Bëtsá yomná jtsabuatomama. Bënga chë ndegombráftaca cányiñe mo canyacá mondmëna, bënga chabe Uaquiñáftaca cányiñe bëtsemnayeca. Cha chë ndegombre Bëngbe Bëtsá endmëna, y nda chë nyetsca tescama yomna tšabe vida entšanga chamotsebomnama iuamá. <sup>21</sup> Atšbe básënga, ndoñe šmattsadorana cach entšangbe pormana soyënga, chë ndayama ínýënga mondbëtsejuabnaye diosënga yomna ca.



## 2 San Juan

### *Jtsiyenana ndegombre soyéngaca y nyetscanga jtsenbobonshánëse*

<sup>1</sup> Atše chë bëtsëjema, quem tsbuanácha sentsabiamná, chë uámana mamá, chë Bëngbe Bëtsabe bocacaná y chabe basengbiámna, ndëmuanyënga atše ndegombre sëndábabuanjeshana. Y ndoñe nye atše chënga quetsátababuanjeshana, ndayá nyetscanga chë Bëngbe Bëtsabe ndegombre soyënga uabuátméngnaca. <sup>2</sup> Atše cbontsababuanjeshana, chë ndegombre soyënga bëngbe ainaniñe mondbómnyayeca, y chë soyënga bëngbe ainaniñe sempre echántsemna.

<sup>3</sup> Atše séntseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tsabe bendicionënga chaotsemnama, chata tsëngaftangbioye chácmalastemama, y chaboma tsëngaftangbe ainaniñe tsabe ebionana chašmotsebomnama. Quem soyënga, bënga chë ndegombre soyënga uabuátmënga y nyetscanga mondenbobonshánëngaftaca echántsemna.

<sup>4</sup> Puerte sënjoyejuá, er atše acbe básenguentše báseftanga sënjánýena chë ndegombre soyënga ntšamo Bëngbe Bëtsá chë Taitá šojamëndacá jtsamëse. <sup>5</sup> Y mora, uámana mamá, cbontseimpadana Diosmanda nyetscanga chamotsenbobonshana. Chë cbontsébuabi-amná soye ndoñe canýe tsëm mando quenátsmëna, ndayá cach Cristbe ústonënga tmonjanobiamama ora tmonjanóyëngacñe mando. <sup>6</sup> Bënga, Bëngbe Bëtsá y chë inyë entsänga imababuanjeshanama jtsinýnana, bënga ntšamo Bëngbe Bëtsá tojamandacá jtsamëse tmojtsiyenama. Y chabe mando, ntšamo Cristbe ústonënga šmonjanobiamama ora šmojanuencá, mëntšá endmëna: jtsiyenana Bëngbe Bëtsá y chë inyë entsänga jtsababuánjeshanëse.

### *Chë entsängbioye áingñayënga*

<sup>7</sup> Quem luarëjana banga entsängbioye áingñayënga mondajna, y chënga jtsejuabnayanama Jesucristo quem luaroye ndoñe mo canýe ndegombre entsácá tonjánabo ca. Nda chca tojtsejuabná, cha jtsemnana chë aingñayá y Cristbe contra yomná. <sup>8</sup> Chëngbiama cuedado šmochtsebomna. Ndoñe chcase, tsëngaftanga ndoñe quešmochátsbomna chë Cristbiamama cach tsëngaftangbe trabajuentšana tojóbcna soyënga, y ndoñe quešmochatosháchiñe lempe ntšamo Bëngbe Bëtsá tsëngaftangbioye jatšatayama yojtsebošcá.

<sup>9</sup> Ndánaca chë Cristo tojanabuatambá soyëngama inyë soyënga tojatabuatambá, cha ndoñe Bëngbe Bëtsáftaca cánýiñe mo canýacá ntsemnana; pero nda sempre ntšamo Cristo tojanbuatëmbacá tojtsabuatambá, cha aíñe chë Taitáftaca y chabe Uaquiñáftaca cánýiñe mo canýacá jtsemnana. <sup>10</sup> Ndánaca tsëngaftangbioye tojá jabuátambama, pero ndoñe ndayá Cristo tojanabuatambacá tojtsebuátëmbase, cha ndoñe šmatjofja, ni mo šmatjachuaye. <sup>11</sup> Er nda chábioye tbojachuase, chábioye jtsajabuáchanana chë bacna soye chaomama.

### *Jtadióšoftanama*

<sup>12</sup> Atše ba soyënga séntsebomna tsëngaftanga jáuyanama, pero ndoñe quetsátsboše tsbuanáchañe jubuábiamama. Atše séntsejuabná aíñe chjobenaye tsëngaftangbioye jama, jobenayama nyetscángaftaca jencuëntama, chca, bëngbe oyejuayana puerte bëtscá chaotsemnama.

<sup>13</sup> Cristbeyeca acbe quenata, chë Bëngbe Bëtsabe bocacaná, chabe básenga cmontsacheuaná.

## 3 San Juan

### *Juan Gaybiamá puerte tšabá tojanoyebuambá*

<sup>1</sup> Atše chë bëtsëjema, quem tsbuanácha atšbe bonshana amigo Gaybiamá sentsabi-  
amná. Chábioye atše ndegombre séndbobonshana.

<sup>2</sup> Atšbe bonshaná y Crístbeyeca atšbe catšata, Bëngbe Bëtsá séntseimpadana aca  
tšabia nyetsca soyënguiñe chacotsemnana y salud bomnánaca. Atše séntsetatšëmbo  
aca ainaniñe tšabá cotsomñama, Bëngbe Bëtsabiamá bëtsá tšabe juabnënga chentše  
jtsebomnëse. <sup>3</sup> Er báseftanga Jesucristbeñe ošbuáchiyënga átšbioye tmonjabo y šmon-  
jacuentá ntšamo aca chë ndegombre soyënga yomncá icuamama, aca chë ndegombre  
soyënga jtsamëse icoyenama. Chíyeca atše bëtsá séntsoyejuá. <sup>4</sup> Tondaye jamana atše  
nyetšá oyejuayá chaitsemnana, ndayá nye jouenana chë atšbe basengcá imoquedánënga  
ntšamo chë ndegombre soyënga yomncá jtsamëse imoyenama.

<sup>5</sup> Atšbe bonshaná, aca contsama ntšamo Jesucristo tonjanbuatëmbacá, aca chë  
ínýenga Jesucristbeñe ošbuáchiyënga jujabuáchama ndayánaca tcojama ora, y masna,  
chë inýe luaroquëngocana ashjajnëngbiamá ndayánaca tcojtsama ora. <sup>6</sup> Chë át-  
šbioye tmonjabënga tmonjoyebuambá, chë Jesucristbeñe ošbuáchiyënga quem luar-  
entše mondbenenefjnëngbe delante, aca tša chënga icuababuánýeshanama. Diosmanda,  
ntšamo tojtsëjabotcá chënga cochjújabuache, chca, chënga chamobená tšabá inýe  
luarëngoye játama. Chënga mondmëna Bëngbe Bëtsabiamá trabájayënga; chcasna,  
chéngaftaca cochjama ntšamo chënga chama merecido imobuajoncá. <sup>7</sup> Chca coch-  
jama, er chënga chëngbe pueblënguentšana tmojëftsebocana Jesucristbe soyëngama  
entšángbioye jábuayenama, y chënga chama tondaye crocénana quematóyëngacañe chë  
Jesucristbeñe ndošbuáchiyëngbe cucuatšentšana. <sup>8</sup> Chíyeca bënga šontsamna chëng-  
biamá jtsantješnana y jtsëjabuáchanana, chca, bënga chamobená cánýiñe chëngaftaca  
jatrabájana, entšángbioye chë ndegombre soyëngama jábuayenama, ndayá chënga  
mondama.

### *Diótrefes ndoñe tšabá tonjanma; Demetrio aíñe*

<sup>9</sup> Atše canýe tsbuanácha chë Jesucristbeñe ošbuáchiyënga chentše mondbënëne-  
fjnëngbioye sënjubuábiamá, pero Diótrefes ndoñe yontsuenana ntšamo atše  
sentsichamcá, er cha yojtseboše chë ínýengbioye nye jtsamëndayana. <sup>10</sup> Chíyeca  
atše choye chajjá ora, ndayá cha yojtsamama chanjauácacana. Cha sempre bacá  
yojtoínýana y uayátsenaye soyënga bëngbe contra yojtsichamo. Y chë soye chábioye  
ndoñe bontsobastana; chana chë Jesucristbeñe ošbuáchiyënga chabe puebloye  
tmojáshjajnënga ndoñe ntjúbuajana, y chënga júbuajama tmojtsebošëngbioye ndoñe  
yontsalesenciana chca chamomama, y chë Jesucristbeñe ošbuáchiyënga bëtsemnana  
innétsenefjuana luarentšana yojtsatëbuacana.

<sup>11</sup> Atšbe bonshaná, ndoñe cattsama chë ndoñe tšabá yontsamacá, ndayá chë tšabe  
soyënga tmojtsamëngcá cochtsama. Nda ntšamo tšabá yomncá tojtsama, cha Bëngbe  
Bëtsábia jtsemnana; pero nda ndoñe chca tontsama, cha cabá ndoñe yondétatšëmbo  
ntšamo Bëngbe Bëtsá yomnana.

<sup>12</sup> Jesucristbeñe ošbuáchiyënga nyetscanga tšabe soyënga Demetriëbiamá  
montsichamo, y Jesucristbe ndegombre soyënga entsinýna ntšamo cha soyënga  
yojtsiyenama. Bëngnaca chabiamá tšabá fséntsichamo, y aca condétatšëmbo ntšamo  
bënga fséntsichamcá, ndegombre yomnana.

### *Jadiósoftanama*

<sup>13</sup> Atše ba soyënga séntsebomna aca jauyanama, pero ndoñe quetsátsboše tsbuanáchañe juábobemana. <sup>14</sup> Atše séntsejuabná betsko chjobenaye ácbioye jama jauatsëtsayama y jobenayana ácaftaca jencuéntama.

<sup>15</sup> Puerte tšabe ebionana ainaniñe chacotsebomna. Quem luarentša amiguënga cmontsechuaná. Diosmanda, bëngbe amiguëngbioye choca cada ona cochjácheuaye.

## San Judas

### *Jacheuayama*

<sup>1</sup> Atše Judas, Jesucristbe oservená y Santiagbe catsata, quem tsbuanácha sentsabi-  
amná, ndémuanýengbioye Bëngbe Bëtsá, chë Taitá chabe entsanga chamotsemnama  
tojáchembo, chabe bonshánënga, y ndémuanýënga Jesucristo endányëna. <sup>2</sup> Atše,  
Bëngbe Bëtsá séntseimpadana, cha puerte lastemado tšëngaftangaftaca chaotsemnama,  
cha chaoma tšëngaftanga ainaniñe tšabe ebionana chašmotsebonnama, y chaoma tšën-  
gaftanga cada te más Bëngbe Bëtsábioye y ínýengbioye chašmotsababuánýëshanama.

### *Chë ndoñe ndegombre soyënga buátëmbayënga*

<sup>3</sup> Atšbe bonshánënga, atše tša séndboše tšëngaftanga jubuábiamama, ntšamo Jesu-  
cristo bëngbe bacna soyënguentsána šojátsebacama, tšëngaftangbioye y bëngbioynaca;  
pero atše séntsejuabná atše šojtsemna tšëngaftanga jubuábiamana, jáimpadama bëtscá  
chašmotsama Jesucristbe soyëngama, chë mondošbuaché soyëngama jenujuérezama,  
ndoñe chaondopochocama. Chë soyënga Bëngbe Bëtsá chabe entsanga canye tojatsatá,  
y nyetsca tescama. <sup>4</sup> Er tšëngaftanga ntšamo ínýënga imomnama ntjatatsšëmboncá,  
básefta entsanga tšëngaftangaftaca tmojenutaná. Chënga mondmëna Bëngbe Bëtsá  
ndoñe adórayënga, y chë buátëmbana soyënga tmojtsetrocá. Bëngbe Bëtsá bëngbe  
tšabiamama juabna yobómnayeca, chënga jtsichámuana tšëngaftanga šmojtšobena nyetsca  
bacna soyënga jtsamëse jtsiyenana, jenomándama ntšobencá ca; y chca, chënga montse-  
boše jinýanýiyama, Jesucristo ndoñe bëngbe canye Nduiño y Bëngbe Utabná chëng-  
biamama yondmëna ca. Y bayté, Bëngbe Bëtsabe uabemana palabrënguñe tmojanábema,  
chë chca amëngna jtsamnana nyetsca tescama castigánënga jtsemnama ca.

<sup>5</sup> Masque tšëngaftanga lempe quem soyama ya šmondétatsëmbo, atše séntseboše  
jamama tšëngaftanga chašmotsenojuabná, Bëngbe Utabná, Israeloca entsanga Egip-  
toquëngbe cucuatšentsána tojanatsebacá chentsána, cachá chë Israeloquënguentsë  
chábeñe ndošbuáchiyënga tojánapochocama; <sup>6</sup> y cachcá chë angelëngbiámñaca, ndë-  
muanýënga ndoñe tmonjanoquedá chë tmojanóyëngacñe mándoca, pero añe chëngbe  
luarënga cachcá imojéftsonýaye. Chë causa, Bëngbe Bëtsá tojanmandá cadenéjuangaca  
nyetsca tescama chamoquedama, chë más ibetiñe, tondaye binýniñe luarentše, chënga  
bacna soyënga tmojanmama nyetsca tescama castigánënga jtsemnama yojtsamna ca,  
cha jayanama tescama. <sup>7</sup> Y chë Sodoma y Gomorra, y chë béconana pueblënguentsë  
entsangbiámñaca; chëngnaca cach angelëngcá ndoñe tšabá monjánama, y nyetsca bacna  
soyënga imojánama boyabása o shembásaftaca, y ínýëngaftaca y bayëngaftácnaca.  
Chíyeca chënga tmonjansufrí chë íñeshca castigo nyetsca tescama, y chca, nyetsca  
entsangbioye tmojaninýanjé, ndayá yochjopása chë chca Bëngbe Bëtsábioye ndoñe  
tbontsobedecenáftaca.

<sup>8</sup> Cachcá, chë ndoñe ndegombre soyënga buátëmbayëngnaca chë mo otjenayoquëcá  
tmojáninýe soyëngama jtsichámuana, y chë causa cachëngbe cuerpëngama bacna  
soyënga jtsamana, chë mando bomnéngbioye jtsébátenana, y chë espíritënga obenana  
bomnéngbiamama ndoñe tšabá ntšichámuana, mo chëngbioye cuafjoyanguangcá. <sup>9</sup> Pero  
ni mo chë angelëngbe mandayá Miguel quem buátëmbayëngcá tojanma. Cha chë  
diábloftaca ibojentsjaná ora, Moisesbe cuerpama cháftaca jabuachana ibojanenatsët-  
snaye ora, ndoñe tonjanenñemó jayanama chë diablëbiamama podësca soyënga, jóyen-  
guanguse, ndayá nye mëntšá ibojauyana: “Bëngbe Utabná chacmácacana ca.” <sup>10</sup> Pero  
quem buátëmbayëngna, chë ndoñe tontsésertana soyëngama podësca jtsichámuana,  
y ntšamo tojtsebionama y tmojtsebošama, nye mo bayëngcá, chë soyëngama tšabá

josértama juabna ndbomnënga, ndayá chentšana tmojtsësertancá jtsamëse, jamana chënga nyetsca tescama castigánënga jtsemnana chamotsajnama.

<sup>11</sup> ¡Tša lastema quem buátëmbayëngbiana! Er chënga ndoñe tšabá tmojanma, mo Caincá; cha tojanaboté ntšamo Bëngbe Bëtsá inétsama bacna soyënga japerdónama, y cabana chabe catsátbioye tbojanóba. Chënga crocénana juácánama, mo Balaam yojanamcá, Bëngbe Bëtsabe tšabe benachentšana tmojtsojuánañe, bacna soyënga jamama. Chënga chë amëndayëngcá Bëngbe Bëtsá tojanabacacángbioye ndoñe ntsayaunanana, ntšamo Coré, Moisés y Aarónbioye joyaunayama ndoñe tonjanbošencá; y chë causa chënga pochocánënga mochántsemna, ntšamo Coré pochocaná chaotsemnana Bëngbe Bëtsá tojanmcá.

<sup>12</sup> Chëngna tšëngaftangbiana jtsemnana mo canye ndëtsenga luarentše canye bëts tsengacá, tšëngaftangftaca tmojenutaná ora, cányiñe jasama mo Jesucristbeñe osbuachiyëngcá. Chënga chca jtsemnana, er chca fiestënguñe chënga oyejuayënga jtsemnana, nye chënga tšabá jtsomñama soyënga jtsamëse, y chënga chama ndoñe ntsëuatjana. Chënga nye cachëngbiana jtsantješnana, ínÿengbiana ndoñe. Chënga tša jtsašebuachiyana, pero chëngbe buátëmbana soyënga ínÿengbiana tondayama ntsoservénana; y chca, chënga jtsemnana mo chë tša jënjá ora jantšetëshëngcá, tondaye ntjuaftena, bínÿiaca ochñëjuanëshënga; y mo betiyeshënga jashtsnëshënga y buashanëshëngcá, chë jashacama tojtsemna ora tondaye shajuana causa. <sup>13</sup> Chënga nyets tempo bacna soyënga jtsamana cachëngbe bacna juabnéngaca, y chë bacna soyënga ntšamo tmojtsamcá jtsinÿanÿnayana chënga chë bacna juabnénga imobomnana. Chca, chënga jtsemnana mo mar béjayoca oleshëngcá, chentšana espumushënga bëtscá tsenguésheca jtsóbocanana. Y cabana, chënga jtsemnana mo estrellëngcá chëtemëngbe benachentšana tmojtsebocna, y chentšana jtsefsanana. Bëngbe Bëtsá tojamandá, chë buátëmbayënga ntšamo tmojamamna, chë más ibetoca, tondaye binÿiñe luarentše nyetsca tescama chënga chamoquedama.

<sup>14</sup> Adánbentšana chñënguana pamillo entšanga tmojánachñëjna chentšana Enoc tojánashjango. Chánaca Bëngbe Bëtsabe juabna tojanoyebuambá chë bacna buátëmbayëngbiana, mëntšá tojánayana ora: “Šmochjinÿe, Bëngbe Utabná echanjabo bëtscá uaranga angelëngaftaca, <sup>15</sup> nyetsca entšangbiana jabáyanama ntšamo tmojamcá tšabá o ndoñe tšabá bëtsemnana; y cha echanjamánda chë Bëngbe Bëtsábioye ndoñe adórayënga nyetsca tescama castigánënga chamotsemnana, tša bacna soyënga chabe contra tmojamama, y bacna soyënga chabe contra tmojanayama, chënga, chë puerte bacna soyënga amënga ca” —tojánayana. <sup>16</sup> Chënga mondmëna chë tšabe soyëngama nyets tempo podescá ichámënga, y ndocna te tondáyeca oyejuayënga ntsemnana. Chënga jtsiyenana bacna soyënga jtsamëse nye cachënga tšabá jtsomñama, y puerte botamana palabrenga jtsichámuana uámanënga jtsenobiamnayëse, y tšabe soyënga ínÿengbioye jtsëtsënyana, chënga tšabá joquédama y chëngbentšana ndayánaca josháchiñama.

#### *Ošbuáchiyënga jábuayenama*

<sup>17</sup> Pero tšëngaftanga, atšbe bonshánëngna, šmochtsenójuabnaye ndayá chë Bëngbe Utabná Jesucristbe ichmónënga tmojanëyanama, mëntšá: <sup>18</sup> “Jesucristo quem luare jésabama tempo chaojtsobeco ora, mochántsemna entšanga, y chënga mochantsiyena jtsamëse nye cachënga tšabá jtsomñama bacna juabnéngaca, y tšëngaftanga cmochantsëbuayajuana ca.” <sup>19</sup> Chënga mondmëna chë ošbuáchiyënguentše nyetscanga ndoñe cachcá chamondëtsejuabnama amënga; chënga mondoyena jtsamëse cachëngbe bacna juabnéngaca y ndoñe quemátsbomna Uámana Espíritu, chëngbe ainaniñe chaotsemándama.

<sup>20</sup> Pero tšëngaftanga, atšbe bonshánënga, nyets tempo, cada te más Jesucristbeñe ošbuáchiyana šmochtsebomna, chë Bëngbe Bëtsábiocana endóbocana ošbuáchiyana, y Bëngbe Bëtsáftaca šmochjencuénta, ntšamo Uámana Espíritu tmojtsamëndacá.

<sup>21</sup> Yejuana šmochtsantješna tšëngaftanga nÿets tempo chašmotsiyenama, Bëngbe Bëtsá cmababuánÿeshanama jtsejuabnayëse, y šmochtsobátmana chë tempo ndaye ora Bëngbe Utabná Jesucristo, tšëngaftanga jtsalastemánëse, yochjama tšëngaftanga chë nÿetsca tescama yomna tšabe vida chašmotsebomnana.

<sup>22</sup> Chë inÿe ora aíñe y inÿe ora ndoñe Jesucristbeñe ošbuáchiyana bomnënga šmochtsalastemana. <sup>23</sup> Bëtsá šmochtsama, báseftanga chë uabouana castigüentšana atsebácánënga chamotsemnana, mo chënga íñeshentšana cuaftëbuacancá. Inÿengbiamana chacmotsangmena, pero cuedado šmochtsebomna, chënga chašmojtsëjabuachana ora, ntšamo chënga bacna soyënga tmojtsamcá ndoñe chašmondétsamama; y chë bacna soyënga ntšamo chënga tmojtsiyena jtsamëse, chëngbe bacna juabnéngaca, nÿa tondaye chacmondétsogusetana.

*Judas, Bëngbe Bëtsá jëtschuayama*

<sup>24-25</sup> Chë nÿe canÿe Bëngbe Bëtsá, bëngbe Atsebacayá obenana endbomna tšëngaftanga jtsanÿenama, chca, tondaye chaondëma tšëngaftanga Jesucristbeñe ošbuáchiyana chašmotsajbanama; y obenana endbomna tšëngaftanga ainaniñe ndocna bacna soye ndbomnënga chašmotsemnana y puerte oyejuayënga cachabe delante chašmotsemnana, cha canÿe puerte uamaná y obená bëtsemnana chaojinÿanyé ora. Bëngbe Utabná Jesucristbeyeca, nÿetscanga Bëngbe Bëtsá chamotsatschuaná; y cha puerte bëtsá chauesomñe, nÿets obenana bomná y nÿets mando bomná, nÿets tempscana, tempo, mora y nÿetsca tescama. Chca chaotsemna.

## Apocalipsis

### *Ndayá quem librěsañe yomna*

<sup>1</sup> Quemuentše entsábemana ndayá Běngbe Bětsá Jesucristbioye tbojaninjinjé, chě Běngbe Bětsabe oservéněnga cha cháuinjanjema, ndayá jopásama yojtsobecuama chěnga chamotsetatšěmbuama. Jesucristo chama chabe ángel tbojichmó, chě soyěngama atše, Juan, chě Jesucristbe oservenábioye chašuinjinjema. <sup>2</sup> Y atše sěnjayana lempe ntšamo ndegombre yomncá lempe chě tijinje soyěngama, chě Běngbe Bětsabe buayenana soyěngama y chě Jesucristo šonjanijana ndegombre bétsemna soyěngama.

<sup>3</sup> Oyejuayá nda tojtsalía, y oyejuayěnga nděmuanjěnga botamana tmojtsuenana quem yochjopása soyěngama, chě muentše entsabemancá ndegombre tmojóyeunanga, er chca jopasa tempo entsobeco.

### *Asia luaroca ošbuachiyěngcá enefjuaněnga jacheuayama*

<sup>4</sup> Atše Juan, sěntsabiamná chě Asia luaroca canjěsěftañe ošbuachiyěngcá enefjuaněngbiamna. Atše, Běngbe Bětsá sěntseimpadana, tšabe bendicioněnga chábiocana chašmosháchinje y ainaninje puerte tšabe ebionana chašmotsebomna, Běngbe Bětsábentšana, chě canjěsěfta espíritěngbentšana y Jesucristbentšana. Běngbe Bětsá, chě mora endmėná, enjamná y sempre echantsemná; chě canjěsěfta espíritěnga, chabe uámana puesto natsanoica mondmėnėnga; <sup>5-6</sup> y Jesucristo, chě ntšamo Běngbe Bětsabiamna yotatšěmbcá ndegombre oyebuambnayá, chě natsaná ndabiamna Běngbe Bětsá tojama obaněnguentšana cháuatayenama, y njetsca quem luarentša mandaděngbe amėndayá. Cristo šondábabuanjeshana y bėngbe bacna soyěnguentšana šojatsebacá, cha tonjanóbanayeca, chabe buinje juabuáshanese. Cha tojama bėnga chamotsobena cháftaca jtsemándayana y uámaněnga chamotsemnama, y Běngbe Bětsá chabe Taitá mo bachnangcá chamotseservėnama. ¡Njetscanga njets tempo chamotsinjanjėná Cristo puerte bėtsá y uamaná bétsemnama y obenana njetsca tescama yobomnama! Chca chaotsemna.

<sup>7</sup> Moueněnga. Cristo jantšetěshėnguinje echanjėsabo.

Chábioye njetscanga mochanjinje,

chě tmonjancrucificángraca;

y quem luarentša njetsca entšana puerte ngmėnaca mochántsemna

y mochantsošachna chábeyeca.

Ndegombre, chca chaotsemna.

<sup>8</sup> “Atše sėndmėna chě njetsca soyěnga bojatšayá y pochocayá ca,” Běngbe Utabná Běngbe Bětsá tojayana. Cha chě sempre endmėná, enjamná, njets tempo echantsemná, chě njets obenana bomná.

### *Juan mo otjenayoquėcá Cristbiamna tojaninje*

<sup>9</sup> Atše Juan, Jesucristbeyeca tšėngaftangbe catšata, cháftaca cánjinje mo canjácá bétsemnama, cach tšėngaftangcá sėndėpadecena, tšėngaftangcá chanjěftsashjache Běngbe Bětsabe amėndayoye jamashėnguama, y tšėngaftangcá Běngbe Bětsabeinje jt-sobátmanese, uantado sėndmėna chě padecena soyěnguinje. Běngbe Bětsabe palabra sėnjánabuayinama y Jesusbiamna ntšamo ndegombre endmėncá sėnjanóyebuambnama, atše šmonjetsanėtsena mar bėjayoca canje fshantsentše, Patmos ca uabáinoca. <sup>10</sup> Y tonjanopasá, canje tmengo, chě ošbuachiyěnga Běngbe Utabnábioye cánjinje jětschuayama te, atše sėnjanoquedá chě Uámana Espíritbeyeca corente mandaná, mo otjenayoquėcá soyěnga sėnjėtsonjaye, y atšbe stětšoica canje jabuache oyebuambnayana sėnjanuena, mo canje trompetėfjua cuafjuajatėtcá; <sup>11</sup> mėntšá šontsanatsėtsná: “Canje librěsañe

mábema lempe ntšamo contsonyáca y cochjuíchmua chë Asia luaroca canýsëftaíne ošbuachiyëngcá enefjuanéngbioye: Efeso, Esmirna, Pérgamo, Tiatira, Sardis, Filadelfia y Laodiceoquëngbioye ca.”

<sup>12</sup> Sënjanobuértana jinýama nda chca šojtsanatsëtsná, y chca sënjanma ora, sënjáninýe canýsëfta castellano candelersënga; <sup>13</sup> y chë canýsëfta castellano candelersënguiñe tsëntsaca canýa sënjáninýe, mo entšacá inýná, canýe bën entšayá uichëtjoná, y cochóntscoca canýe tëntša castellano uasnanéjaca. <sup>14</sup> Chabe stjénashana uafjantséssha, puerte uafjantséssha mo canýe oveshabe boboshëshacá, y chabe fšnëbenga mo inëshcá enjétsinýna. <sup>15</sup> Chabe shecuatšënga enjëtsebuashinýinýana mo bronscá, ndaybé natsana inëjana tcojuchnëngo enabé chaotsemnama y chentšana entšëjuaca becá tcojajojó corente chaotsebuashinýinýanama; y chabe oyebuambnayana jabuache enjëtsebenana mo bëtscá béjaye cuaftsebuachquëcancá. <sup>16</sup> Chabe catšbioica cucuatšiniñe enjëtatsbëna canýsëfta estrellënga, y chabe uayoicana enjët sobocana canýe espadëja, nyets utoicajana puerte efsánëja, y chabe jubíá tša enjëtsebuashinýinýana, mo chë shinýe corente, lempe ntšamo tojobenacá tojtsebuashinýinýana orcá.

<sup>17</sup> Cha sënjáninýe ora, chabe shecuatšëntse mo obanacá sënjánshajaye. Pero cha, chabe catšbioica cucuatše átšbeñe jajájuase, šonjaniyana: “Ndoñe matauatjana; atše sëndmëna chë nyetsca soyënga bojatšayá y pochocayá, <sup>18</sup> chë sempre vida bomná. Atše obaná sënjamna, pero mora nyetsca tescama vida sëntse bomna. Atše obenana sënd bomna, y chë obenánaca entšángbioye ndoñe quenátamna infiernoca nyetsca tescama castigánënga jtsemnana, mo nyets tempo cuaftsobancá. <sup>19</sup> Ntšamo tconjinýcá mábema, chë quem tempo endmëna soyëngama y chë más chcoye echántsemna soyëngama. <sup>20</sup> Mëntšá endmëna chë atšbe catšbioica cucuatšiniñe tconjinýe canýsëfta estrellëngaca y chë canýsëfta castellano candelersëngaca: chë canýsëfta estrellënga montsinýinýná chë canýsëftaíne ošbuachiyëngcá enefjuanéngbeñe chamotsemándama uámana ichmónënga, y chë canýsëfta candelersëngna chë canýsëftaíne ošbuachiyëngcá enefjuanënga.”

## 2

### *Efesoca ošbuachiyëngcá enefjuanënga jábuayenama*

<sup>1</sup> Mëntšánaca cha šonjaniyana:

“Mëntšá mabobema chë Efesoca ošbuachiyëngcá enefjuanéngbeñe chaotsemándama uámana ichmonábioye:

Mëntšá entsichamo chë chabe catšbioica cucuatšiniñe canýsëfta estrellënga entsatbëná y chë canýsëfta castellano candelersënga luarëjana entsaná: <sup>2</sup> Atše lempe sëndétatšëmbo ntšamo tšëngaftanga šmoyenana; atše corente sëndétatšëmbo tšëngaftanga jabuache šmotrabájama, y ntšamo tšëngaftanga Bëngbe Bëtsábeñe jtsobátmanëse šmnétsauantana padecena soyënguiñe šmojtsemna ora. Y átšnaca sëndétatšëmbo tšëngaftanga ndoñe šmontsobena jtsëuantánana ntšamo bacna entšanga tmojtsamcá. Atšnaca sëndétatšëmbo tšëngaftanga yejuana šmojarrepará y becá šmojenojuabó jinýama chë Jesucristbe ichmónënga imomna ca tmojtsichamëngbiama; pero ndegombre chënga ndoñe chca quemátsmëna; y chca šmojamayeca, tšëngaftanga mora šmontsetátšëmbo chënga bosterënga imomnama. <sup>3</sup> Padecena soyënguiñe becá šmojoboyá y chca ora, Bëngbe Bëtsábeñe šmobátmana. Chë soyënguiñe šmojasufrí, tšëngaftanga atše šmoservénama; y tšëngaftanga chca šmondësverna, ainaniñe añemo jtse bomnama ntjajbanacá.

<sup>4</sup> Pero canýe soye sëntse bomna tšëngaftangbe contra jayanama: Tšëngaftanga mora ya ndoñe cachca bonshánana quešmát sbomna ni atšbiama ni nyetsca entšangbiama, ntšamo átšbeñe jtsošbuáchiyama šmonjanbojatšé orcá. <sup>5</sup> Menójuabonga



ntšamo chë tempo šmonjánbobonshanama, juabnayana motrocanga y cachiñe šmochtsama ntšamo chë átšbeñe jtsošbuáchiyama šmonjanbojatsé orcá. Ndoñe chcase, atše tšëngaftangbioye chanjá jabuache jetsacastígama, jtsapochócantscuana, mo chë tšëngaftangbe cuenta entsemna candelerëse chabe puestentšana cuaftsejuanacá. Chca chanjama, tšëngaftanga juabnayana ndoñe chašmonjatrocasa. <sup>6</sup> Pero tšëngaftangbe pavor quem tšabe soye šmontsebomna: Tšëngaftanga šmonduábotena lempe ntšamo chë nicolaíta ca uabaina entšanga tmojtsamcá, ndayá átšnaca sënduábotena.

<sup>7</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá. Chë padecena soyënguentsšana tšabá chamojábocana mo ayënjanayëngcá, chëngbiama chanjama chë nyetsca tescama yomna tšabe vida chamotsebomnama, y chca chënga mochántsemna mo chë nyetsca tescama yomna tšabe vida jtsebomnama betiyeshentšana cuaftsesacá, chë entšanga sempre oyejuayënga mondbetsemnoca ca” —cha šonjaniyana.

#### *Esmirnoca ošbuachiyëngcá enefjuanënga jábuayenama*

<sup>8</sup> Mëntšánaca cha šonjaniyana: “Esmirna bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë nyetsca soyënga bojatsáyá y pochocayá, chë tonjanobaná y ndabiana Bëngbe Bëtsá tonjama cháuatayenama: <sup>9</sup> Atše sëndétatšëmbo tšëngaftanga tša jabuache šmojasufrima y ndbomnjëmënga šmomnama, pero ndegombre Bëngbe Bëtsábocana bëtscá tšabe soyënga šmondëtsóomñe. Y sëndétatšëmbo tša bacá tšëngaftangbiama mondoyebuambná chë judiënga imomna ca ichámënga, pero ndoñe ntsamana mo chë Bëngbe Bëtsabe bocacana entšangcá; chca, chënga mondmëna mo Satanasbe entšangcá, nye chábioye jtseeservëse y jtsatschuanayëse.

<sup>10</sup> Ndoñe matauatjëngana chë ndoñe yapa bën y tšëngaftanga šmochjasufrima, er Satanás echanjama tšëngaftanguentsënga báseftanga cárceloye ínÿenga chacmëtámia, jinÿama ntsachetšá Crístbeñe ošbuáchiyana šmobomnama, padecena soyënguiñe šmojtsemna ora; y entsamna baseftayté jasúfria. Sempre bëtscá ošbuáchiyana, y ainaniñe bëts añemo šmochtsebomna, masque jobanámnaca chacmotsamna, Crístbiama trabájaye causa. Chca chašmojtsamëse, atše chanjama tšëngaftanga chašmotsebomnama mo canÿe uacanana soycá, chë nyetsca tescama yomna tšabe vida.

<sup>11</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá. Chë padecena soyënguentsšana tšabá chamojábocana mo ayënjanayëngcá, ndegombre chënga ndoñe queochátamna játauatjana nyetsca tescama castigánënga jatsmënama ca” —cha šonjaniyana.

#### *Pérgamoca ošbuachiyëngcá enefjuanënga jábuayenama*

<sup>12</sup> Mëntšánaca cha šonjaniyana: “Pérgamo bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë nyets utoicajana puerte efšana espadëja entsatbëná: <sup>13</sup> Atše sëndétatšëmbo ntšamo yomna tšëngaftangbe oyenentše, canÿe luare ndayentše Satanás entšángbioye puerte iuamënda. Masque chca, tšëngaftanga siempre nye atše šmondëtseserverna, y ndocna te chešmáisayana átšbeñe ndoñe šmondošbuaché ca, ni mo Antipas, chë canÿe nyets tempo atšbe ustoná y atšbiama ndegombre oyebuambnayá, ínÿenga tmonjanóba ora. Y lempe chca tojopasá tšëngaftangbe pueblentše, ndayentše Satanás bëtscá entsana.

<sup>14</sup> Pero básefta soyënga séntsebomna tšëngaftangbe contra jayanama: Chentše tšëngaftangbeñe báseftanga montsemna, soyënga montsabuatambá ntšamo bayté entsemna Balaam enjanabuatambacá. Cha rey Balácbioye tbojanbuayená ntšamo jamana Israeloca entšángbioye jáingñama, chënga chë ntšamo ndoñe tšabá yomncá

chamotsamama; y chca, Balac tojanma chë ínÿenga diosënga yojamna ca imojanajuabná soyënga jadórama uátšëmbona saná chë Israeloca entsãnga chamosama, y shembása o boyabásaftaca bacna soyënga chamotsamama. <sup>15</sup> Chéntšnaca ínÿenga montsemna, y chëngna chë nicolaitëngbe buatëmbana soyënguiñe mondošbuaché, y chca buatëmbana soyënga ndoñe tšabá quenátsmëna. <sup>16</sup> Šmochtsejuabnaye ntšamo šmojtsamama, chëngbioye tšëngaftangbeñe šmojtsëuantana ora, y chca jtsamana šmochjajbaná; er ndoñese, atše betscó tšëngaftangbioye chanjá, y chë chca buatëmbana soyënguiñe ošbuáchiyana ndoñe tmonjajbanángaftaca chanjéntsja chë atšbe uayoicana endóbocana espadéjaca.

<sup>17</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá. Chë padecena soyënguentsana tšabá chamojábocana mo ayëñanayëngcá, chëngbioye maná chanjátšataye chamosama, chë celoca tandëše, ndayá Bëngbe Bëtsá tempo entsãngbioye ndoñe tonjinÿanjé; y canÿe fiantse ndëtšëtëma chanjáyentsbuachiye, chënga oyejuayënga šmojábemama. Chiñe canÿe tsëm uabaina echantsábemana; ndocná chë uabaina quenátabuatma, ndayá nÿe chë chamojóyëngacñënga ca” —cha šonjaniyana.

#### *Tiatiroca ošbuachiyëngcá enefjuanënga jábuayenama*

<sup>18</sup> Mëntšánaca cha šonjaniyana: “Tiatira bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo Bëngbe Bëtsabe Uaquiñá, chë mo iñeshcá uafšná y mo entsëjuaca jojona puerte chaotsebuashinÿinÿanama bronze shecuatsënga bomná:

<sup>19</sup> Atše sëndétatsëmbo ntšamo tšëngaftanga šmoyenama; sëndétatsëmbo ntsachetšá tšëngaftanga Bëngbe Bëtsábioye y nÿetscãngbioye šmababuánÿeshanama, ntšamo tšëngaftanga Bëngbe Bëtsábeñe puerte šmošbuáchema, ntšamo chábioye šmoservënama, ntšamo tšëngaftanga ínÿenga šmojuabuache y ntšamo Bëngbe Bëtsábeñe jtsobátmanëse becá šmojoboyá padecena soyënguiñe; y séntsetatsëmbo mora más bëtscá tšabe soyënga šmojtsama, ntšamo tšëngaftanga átšbeñe jtsošbuáchiyama šmonjanbojatšé orscama.

<sup>20</sup> Pero canÿe soye séntsebmoma tšëngaftangbe contra jayanama: Tšëngaftangbeñe šmondëuantana chë shembása, mo chë bacna reiná Jezabelcá endmënábioye. Chë shembása entsichamo Bëngbe Bëtsabe juabna oyebuambnayá canmëna ca; pero chabe buatëmbana soyëngaca atšbe oservëngënga entsaíngña, shembása o boyabásaftaca bacna soyënga chënga chamotsamama, y chë ínÿenga diosënga yojamna ca imojanajuabná soyënga jadórama uátšëmbona saná chamosama. <sup>21</sup> Cha sënjuená atše chjacastíga ca, chca juabnayana ndoñe tonjatrocasa, y canÿe boyabásaftaca bacna soyënga amana ndoñe tontsajbanase. Cha jacastígama batšá sënjobatma, nderado chca amana nanjatróca, pero ndoñe chenátšbošena. <sup>22</sup> Mora atše chanjama bëts šocana cha chaboshachama, y chë cháftaca bacna soye tmojamënga, juabnayana ndoñe tmonjatrocá y chca jtsamana ndoñe tmonsajbanase, chëngbiama chanjama puerte chamosufrima; <sup>23</sup> y chë shembásabe básënga chantsëbaye. Chca, nÿetsquë-nache ošbuachiyëngcá enefjuanënga mochántsetatsëmbo, ndayá entsãnga juabniñe y ainaniñe tmojuabnacá atše tsuábuatmama; y cada ona tšëngaftanguentsá, chca bacna soye cháftaca tojamá, ntšamo ibojtsomerecencá chanjacastíga.

<sup>24</sup> Pero tšëngaftangbentše, ínÿenga Tiatira pueblentše šmojtsemnënga, chë shembásabe buatëmbana soyënguiñe ndoñe šmontsošbuachënga, y chë ínÿenga imuábutma Satanasbe soyënga, chë ndoñe paselo josértama soyënga ndoñe šmonjuabuátmanënga, tšëngaftanga ndoñe quebochataménda inÿe más toto soye chašmot-samama. <sup>25</sup> Pero nÿe sempre šmochtsama ntšamo mora šmojtsamcá, y šmochtsiyëna ntšamo chë Bëngbe Bëtsábocana šmojóyëngacñe soyënga yomncá, atše quem luaroye jesabámëntscuana.

<sup>26</sup> Chë padecena soyënguentshana tšabá chamojábocana mo ayëñjanayëngcá y ntšamo atše sëndëmandacá chamojtsamënga, chë quem luarentše ya ndoñe más vida jesebomnámëntscuana, atšbe obenana chanjátšataye nyetsca mándayëngbentša entsángbeñe jtsemándayama, <sup>27</sup> ntšamo atšbe Taitá chabe obenana šojatšetacá; y chënga entsángbioye puerte obenánaca mochántsamëndaye, mo canye hierro varëfjaquécá, y chëngbe contra chamojtsemnéngbioye mochántsapochocaye, mo nye matbajënga tmojtsëtsjanjnacá. <sup>28</sup> Y chë jabínynama ora bínynaye estréllnaca chanjátšataye.

<sup>29</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

### 3

#### *Sardisoca ošbuachiyëngcá enefjuanënga jábuayenama*

<sup>1</sup> Mëntšánaca cha šonjaniyana: “Sardis bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë Bëngbe Bëtsabe canyësefta espíritënga y chë canyësefta estrellënga bomná: Atše lempe sëndétatšëmbo ntšamo tšëngaftanga šmoyenama; atše sëndétatšëmbo tšëngaftangbiamá ínÿenga tša jtsichámuana Bëngbe Bëtsá jasérviamá bëtscá šmojtsama ca, pero ndegombre tšëngaftanga nye batšatema šmontsama, y chca, chabiamá mo obanëngcá šmondmëna. <sup>2</sup> Botamána šmochjenóbobonÿe y más šmochtsama chë Bëngbe Bëtsá jasérviamá cabá šmondama básefta soyënga. Ndoñe yapa quenatájamna chë tšabe soyëgnaca chašmotsajbanama, er atše sënjinÿe chë Bëngbe Bëtsábioye jasérviamá ntšamo jtsamëse šmoyencá, atšbe Bëtsabiamá ndoñe yapa tšabá quenátsmëna. <sup>3</sup> Asna, šmochtsenójuabnaye ndayá Bëngbe Bëtsábocana šmojóyëngacñama, y chabiamá šmojouena soyënguínacá. Ntšamo chë soyënga yomncá šmochtsiyena, juabnáyana šmochjatróca y šmochjónťša bëtscá jtsamána Bëngbe Bëtsá jasérviamá. Ndoñe tšabá cach tšëngaftanga chašmonjenójuabose y juabnáyana ndoñe chašmonjatrocasa, nye ndeolpe chanjá tšëngaftangbioye, mo canye atbëbanacá, chabiamá ndocná tontsejuabná ora, y ndegombre tšëngaftanga ndoñe quešmochátstatšëmbo mocna ora atše tšëngaftangbioye chjama.

<sup>4</sup> Masque chca, Sardisentše tšëngaftangbeñe básefta entsanga mondmëna, chënga ndoñe chematajbaná oyenana tšabe soyënga jtsamëse, bacna soyënga játamama. Chëngna átšeftaca mochántsañna uafjantsëjuangá uichétjonënga, chënga chca merecido montsebuajónayeca. <sup>5</sup> Chë padecena soyënguentshana tšabá chamojábocana mo ayëñjanayëngcá, chca uafjantsëjuangá uichétjonënga mochántsemna, y chëngbe uabaina ndoñe quichatsjuána chë tšabe vida mochjónÿenëngbe uabaina enduábemana librësentšana, ndayá atše, Bëngbe Bëtsabe delante y chabe angelëngbe delante, chënga atšbe entsanga imomna ca chanjayana.

<sup>6</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

#### *Filadelfioca ošbuachiyëngcá enefjuanënga jábuayenama*

<sup>7</sup> Mëntšánaca cha šonjaniyana: “Filadelfia bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë uamaná y ndegombre oyebuambnáyá, chë jtsemándayama puerte obenana bomná, ntšamo Rey David enjanbomncá, chë nda ndayá chaotsemnama tojamandá ora, ndocná ntšobenana jamama chca ndoñe chaondëtsemnama, y ndayá ndoñe chaondëtsemnama tojamandá ora, ndocná ntšobenana jamama aíñe chaotsemnama: <sup>8</sup> Atše lempe sëndétatšëmbo ntšamo tšëngaftanga šmoyenama. Minÿënga, atše sënjama tšëngaftanga bëtscá tšabe soyënga chašmotsebomnama, y ndocná quenátobena jamama chca ndoñe chaondëtsemnama; y chca entsemna

mo atše tšengaftangbiama canje bėsáša cuafjatěfjá, y chěša jtatámíama ndocná quenátobena. Atše sěndětatsěmbo tšengaftanga batšatema obenana šmombomnama, pero šmojouena ntšamo jtsamama tcbonjauyancá, y ndocna te chešmátayana atšbe entšanga ndoñe šmondmēna ca. <sup>9</sup> Atše chanjama, chě mo Satanasbe entšangcá imomnēnga, nje chábíoye jtseservénese y jtsatschuanayese, chě judiēnga imomna ca ichámēnga, pero chě Bēngbe Bětsabe bocacana entšangcá ndámēnga y bosterēnga, chēnga tšengaftangbioye chamua y tšengaftangbe delante chamoshamentšé, tšengaftangbiama respeto jinjánjyíyama, y chca, chēnga chamotsetátšēmbo atše sempre cbababuánjeshanama. <sup>10</sup> Atše tcbonjanamēndá, Bēngbe Bětsabeñe jtsobátmanese, lempe chašmotsoboyá padecena soyēnguiñe, y tšengaftanga chca šmonjama. Chíyeca, atše puerte tšabá cbochántsanjēna, chě quem luarentše oyenēnga njetscanga jasúfriama y padecena soyēnguiñe jtsemnama chaojtsemna ora, Bēngbe Bětsabeñe aíñe o ndoñe mondošbuáchema jinjánjyíyama.

<sup>11</sup> Cachiñe quem luaroye betsko chanjésabo. Sempre šmochtsama ntšamo mora šmondamcá, y Bēngbe Bětsábíocana šmojóyēngacñe soyēnga šmochtsinjēna; chca ndocná chaondobená ndayá jamana, y chě sóyeca chaoma tšengaftanga ndoñe chašmondóyēngacñe ndayá Bēngbe Bětsá chě chábíoye jtseservénama ndoñe tmontsajbanángbioye yochjatšataycá, chēngbe uacanana soye. <sup>12</sup> Chě padecena soyēnguentšana tšabá chamojábocana mo ayēnjanayēngcá, chēngbiama atše chanjama sempre Bēngbe Bětsabe delante chamuesomñama, y chca, chēnga mochántsemna mo chě Bēngbe Bětsabe bēts yebnentša ucuatjoniñcá; ndocna te Bēngbe Bětsábentšana quemocháisebocana; y chēngbeñe atšbe Bětsabe uabaina chanjuábema y atšbe Bětsabe bēts pueblentša uabaina, chě tsēm pueblo Jerusalén, chě celocana yobá pueblo, Bēngbe Bětsábíocana. Y chēngbeñnaca chanjuábema atšbe tsēm uabaina. Lempe chca chanjama jinjánjyíyama chēnga Bēngbe Bětsábēnga mochtsemnama.

<sup>13</sup> Chě jouenama tmojtsobenēnga, chamouena ndayá Espiritu chě ndayenache ošbuachiyēngcá enefjuanēnga yojtsětsěsnacá ca” —cha šonjaniyana.

*Laodiceoca ošbuachiyēngcá enefjuanēnga jábuayenama*

<sup>14</sup> Měntšánaca cha šonjaniyana: “Laodicea bēts puebloca ošbuachiyēngcá enefjuanēngbeñe chaotsemándama uámana ichmonábíoyenaca mēntšá mabobema:

Měntšá entsichamo chě sempre Ndegombrá endmēná, chě Bēngbe Bětsabe soyēngama ndegombre oyebuambnayá, y chě ndábeyeca Bēngbe Bětsá quem luare tojanmá: <sup>15</sup> Atše lempe sěndětatsěmbo ntšamo šmoyenama. Atše sěntsetatsěmbo tšengaftanga ndoñe yapa šmontseboše Bēngbe Bětsá jaserviama, pero Bēngbe Bětsabe buayenana soyēnga ndoñe lempe šmontsaboté. Y chca, nje batšatema šmojtseboše Bēngbe Bětsá jaserviama; chca, tšengaftanga šmontsemna mo tibiye buyeshcá, ni ntšniñiye, ni shécbaniye. ¡Atše sěntseboše tšengaftanga chašmotsemna mo ntšniñiye o shécbaniye buyeshcá, tšabá jtsamēse o tondaye! <sup>16</sup> Chca, tšengaftanga tibiye buyeshcá šmondmēna, y ndoñe quešmátsboše bētscá jamama, pero Bēngbe Bětsabe soyēnga ndoñe lempe šmontsaboté. Chíyeca atše sěntsejuabná jtsébatena, mo nda tibiye búyeshe tojětsbuashětjácá, chcaye ndoñe bondogustana causa.

<sup>17</sup> Er tšengaftanga jtsichámuana bomnēnga šmomna ca, puerte tšabá šmojábocana y tondaye cmontsabuáshebena ca, pero ndoñe quešmátstatšēmbo Bēngbe Bětsabe soyēnga bētscá cmojtsabuáshebena. Chca, tšengaftanga šmontsemna nja ndoñe tšabá, ínēnga ngmēnana chacmotsabamna, mo ndbomnjemēngcá, mo jtanēngcá, Bēngbe Bětsabe soyēngama ntšosertancá, y mo enašēngcá, bētscá Bēngbe Bětsabe soyēnga ntsebmncá. <sup>18</sup> Chíyeca cbabuayená, átšbentšana chašmuatsjinje chě Bēngbe Bětsabe soyēnga y uámana soyēnga, mo chě ena castellano jabemama, iñējana fjěchnēngūese castellano átšbíoye šmojtsontšabuamnañcá. Tšengaftanga Bēngbe Bětsabe delante mo enašēngcá šmondmēna, er cha endonjá chě

ba bacna soyënga ntšamo tšëngaftanga šmojtsamcá. Šmochjaleséncia atše chacbé-jabuache tšëngaftanga Bëngbe Bëtsabe bominiñe tšábenga chašmotsemnama, mo juichëtjuama uafjantse entšayá átšbioye šmojtsantšabuamnañcá. Chca šmochjama, tšëngaftanga Bëngbe Bëtsabe delante ndoñe chašmondëtsëuatjama. Šmochjaleséncia atše chacbéjabuache tšëngaftanga Bëngbe Bëtsabe soyëngama chacmósertama, mo tšëngaftanga bominye šocanama shnana átšbioye šmojtsontšabuamnañcá. Chca šmochjama, Bëngbe Bëtsabe soyëngama puerte tšabá chacmósertama.

<sup>19</sup> Atše chë sëndábabuanÿeshanënga sëndbaucácana y sëndbábuayenaye. Chíyeca, lempe ntšamo šmojobenacá šmochtsama Bëngbe Bëtsá jaserviama, y juabnayana šmochjatróca, y nÿets tempo puerte šmochtseboše Bëngbe Bëtsá jtseservénana.

<sup>20</sup> Nderado canÿe tšabe amigo yebnoye tojabo y tojachembo, tšëngaftanga šmojouenëse y bësháša šmojebiatëfjëse, cha jamashënguana, y cánÿiñe cháftaca joyejuayana y jasana. Cachcá, atše entšanga sentsachembuana chašmolesenciá chëngbe ainaniñe jtsiyenama. Nderado nda šojóyeunase, atše chanjámashëngo chabe ainaniñe jtsiyenama, y nÿets tempo cháftaca cánÿiñe mo canÿacá chanjéftsemna.

<sup>21</sup> Chë padecena soyënguentšana tšabá chamojábocana mo ayëñjanayëngcá, atše chanjama chënga puerte bëtsétsanga chamotsemnama ntšamo atše sëndmëncá, y átšeftaca chamótbemama, atšbe uámana tbemanentše jtsemándayama, ntšamo atše atšbe uayayëngbioye sënjayëñjanacá, y atšbe Taitáftaca chabe uámana tbemanentše tijotbemcá.

<sup>22</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá” —cha šonjaniyana.

#### 4

##### *Chë Ainënga Bëngbe Utabnabe uámana tbemanentša natsana imojtsechuanaye*

<sup>1</sup> Chentšana mo otjenayoquëcá sënjáninÿe. Sënjanrrepará y sënjáninÿe celoca canÿe bësháša enjétsatëfjna, y chë natsana sënjanuena oyebuambnayana, chë enjamna mo canÿe trompetëfjua cuafjuajatëtcá, mëntšá šonjétsatsaye: “Moye másëngo, atše cbochanjinÿinÿiye ntšamo más chcoye yochjopasacá ca.”

<sup>2</sup> Cachora, chë Uámana Espíritbeyeca, mo atšbe ainana celoca cuaftsemncá atše sënjanoquedá, y sënjáninÿe celoca enjëtsemna canÿe reybe uámana puesto, y chentše canÿa enjëtsetbemana. <sup>3</sup> Chentše enjëtsetbemaná enjamna, puerte tëshinÿná mo jaspe ndëtšbecá, puerte buanganá mo cornalina ndëtšbecá, y chë uámana puesto shéconana canÿe tsëfcuácuatjo enjamna, y enjëtsebuashinÿinÿana mo canÿe esmeralda ndëtšbecá.

<sup>4</sup> Chë reybe uámana puesto juachajana, inÿe uta bnëtsana y canta puesto sënjáninÿe, y chiñe uta bnëtsana y canta bëtsëjëmënga amëndayënga monjëtsetbiamana, uafjantsëjuangá uichëtjonënga, y castellano coronëshangá monjëtstabestšajona. <sup>5</sup> Chë uámana puestentšana enjëtsohocana tcuinÿëjënga, becá shauenanana y juesasanana; y chë uámana tbemaniñentša natsanoicna, canÿsëfta uajuinÿanëshashan enjëtšangbototjuana; chë uajuinÿanëshangá entsayana chë Bëngbe Bëtsabe canÿsëfta espíritënga. <sup>6</sup> Y chë uámana puestentša natsanoica enjëtsemna mo canÿe mar bejaycá, tëshinÿniye mo canÿe cristal ca uabaina ndëtšbecá.

Chë luariñe tsëntsaca, chë uámana puesto enjëtsemnentše y chë shëconánëjana monjëtsemna canta Ainënga, nÿëtsañe fšnëbéngaca, natsanoica y stëtšoica. <sup>7</sup> Chë natsana Ainá enjamna mo canÿe leoncá, chë inÿe Ainá mo canÿe toroščá, chë inÿe Ainá enjánbomna mo canÿe entšabe jubiacá, y chë inÿe Ainá mo canÿe águila tojt-songüëfjnacá. <sup>8</sup> Chë canta Ainënga, cada ona chnénguana juatëngmiášha enjanábomna, y tsoicajana y shjoicajana nÿëtsañe fšnëbénga monjánbomna. Y chënga nÿets tempo, ntjochnacá mëntšá monjánichamo:

¡Uamaná, Uamaná, Uamaná, Bëngbe Utabná,

Bëngbe Bëtsá nyets obenana bomná,  
nda enjamná, endméná y sempre echanjëftsemná ca!

<sup>9-10</sup> Chca chë Ainënga Bëngbe Bëtsá bëtsá tmontanchuá, Bëngbe Bëtsá chë uámana puestentše tbemaná, chë nyets tempo y nyetsca tescama oyená. Chënga puerte respeto chabiamá monjëtsbomna y bëtsá tmontanchuá. Cada ora chënga chca tmonjanma ora, chë uta bnëtsana y canta bëtsëjémënga améndayënga, chë uámana puestentše tbemanabe shecuatšentše joshamentšiyana y chábioye jtsatschuanayana, chë coronëshangá chë natsanoica jutšanana, y mëntšá jtsichámuana:

<sup>11</sup> Aca nyets mercedo condëtsobuájoñe, Bëngbe Utabná y Bëngbe Bëtsá, entšanga chamotsinýanýnama, aca puerte bëtsá comnama, y chamotsichamo aca nyets respeto buajoná comna, y nyets obenana bomná comna ca, er aca nyetsca soyënga tcojama; aca icnabóšeyeca chë soyënga yojtsemna y aca chca tcojanma ca.

## 5

### *Chë uabemana uándmanana tsbuanácha y chë Oveshatema*

<sup>1</sup> Chë uámana puestentše enjetsetbemanabe catšbioica cucuatšinë canýe uándmanana tsbuanáchanaca sënjáninýe, y nyëtsañe enjëtsabemana tsoicajana y shjoicajana, y canýsëfta tsengájaše sellëngaca enjëtsajandmanana. <sup>2</sup> Y canýe ángel puerte obenana bomná sënjáninýe, y cha mëntšá enjëtsayebuache: “¿Nda mercedo yobuájona, quem uándmanana tsbuanácha jutëfjonama y chë sellënga jutsécama ca?”

<sup>3</sup> Pero, ni celoca, ni quem luarentše, ni quem luarentša jashenoye, ndocná quen-jatsmëna obenánaca chë uándmanana tsbuanácha jutëfjonama, ni juinýama. <sup>4</sup> Y atše puerte sënjánenobošachna, er ndocná ntjónýnana mercedo buajoná chë uándmanana tsbuanácha chautëfjonama, ni chauinýama. <sup>5</sup> Pero canýa chë bëtsëjemënguentšá šonjaniyana: “Ndoñe más matenóbošachena; mouena, chë Judabe pamillentšá, León ca uabobainá, mando y obenana bëtsebomnama, chë rey Davidbentšana Entšá, tonjayëjaná; cha entsobena chë uándmanana tsbuanácha jutëfjonama, y chë canýsëfta sellënga jutsécama ca.”

<sup>6</sup> Chora sënjáninýe, chë uámana puesto y chë canta Ainënga y chë bëtsëjémëngbe tsëntsaca, canýe Oveshatema tsanana, pero enjëtsinýna mo cuaftsobacá. Chë Oveshatema enjánbomna canýsëfta tsëtjonëše y canýsëfta fšněbé. Chë canýsëfta fšněbé monjaninýinýná chë Bëngbe Bëtsabe canýsëfta espíritënga, chë Bëngbe Bëtsá nyets quem luarëjana tojánichamonga. <sup>7</sup> Chë Oveshatema tonjanobeconá y chë uándmanana tsbuanácha tonjanaca, chë uámana puestentše tbemanabe catšbioica cucuatšentšana; <sup>8</sup> y chabe cucuatšinë tonjanaca ora, chë canta Ainënga y chë uta bnëtsana y canta bëtsëjémënga améndayënga chë Oveshatembe shecuatšentše tmonjanoshamentšë. Nyetscanga monjëtsëtbëna arpangá y castellano copbenga jútjena inciensiýeca; chë copbenga inciensiýeca enjamna chë Bëngbe Bëtsabe entšanga tmojayana palabrënga, cháftaca jencuéntama ora. <sup>9</sup> Y quem tsëm canto montsancántaye:

Aca mercedo condëtsobuájoñe, chë uándmanana tsbuanácha chacuacama y chë sellënga chacutsécama;  
er acbe buiñe juabuáshanëse tconjanóbana, y chca enjamna mo crocénana cuafjëtšjajocá, Bëngbe Bëtsabiamá chamotsemnama,  
entšanga nyetsca cachca buiñe bomnënguentšana, nyetsca biyana bomnënguentšana,  
nyetsca canýe entšanguentšana, y nyetsca mándayëngbentša entšanguentšana.

<sup>10</sup> Aca tcojama chënga chamotsobena ácaftaca jtsemándayama y uámanënga chamotsemnama, Bëngbe Bëtsábioye mo bachnangcá chamotseservënama,  
y quem luarentše chënga montsemánda ca —chënga monjëtserversiaye.

<sup>11</sup> Y chca sënjetsonjaye ora, mallajta angelëngbe oyebuambnayana sënjanuena, y chënga monjëtsemna chë uámana puestentše, chë Ainënga y chë bëtsëjmënga amëndayëngbe shéconana. Njëtšá bëtsá angelënga monjëtsemna, corente mallajta; <sup>12</sup> y chënga mëntšá monjëtšayebuache:

¡Chë Oveshatema cuafjobacá endmëná,  
 mercedo endëtsobuájoñe, njëts obenana, njëts bomnana,  
 njëts osertánana y njëts añemo chaotsebomnana,  
 y entšanga chabiamama chamotsichamo cha njëts respeto buajoná yomna ca,  
 y chamotsinjanánama cha puerte bëtsá y uamaná yomnana,  
 y njëtscanga chamotsatschuanama ca! —chënga monjëtšayebuache.

<sup>13</sup> Y sënjanuena, lempe ntšamo Bëngbe Bëtsá tojanmcá aina soyënga, celoca, quem luarentše, quem luarentša jashenoye y chë mar béjayoca, chëngnaca mëntšá monjëtšichamo:

¡Chë uámana puestentše tbemanábioye y chë Oveshatema njëtscanga njëts tempo y njëtscama chamótsatacheuanaye  
 y chamotsichamo chata puerte uámanata y njëts respeto buajonata ibomna ca,  
 y chamotsinjanánama chata puerte bëtsétsata y obenata bëtsemnana ca!

<sup>14</sup> Y chë canta Ainëngna monjëtšichamo: “Chca chaotsemna ca.” Y chë bëtsëjmënga amëndayëngna tmonjanoshamentšé y chátbioye monjëtšatacheuanaye.

## 6

### *Chë Oveshatema chë canysëfta sellënga tonjanëtsécá*

<sup>1</sup> Chentšana más sënjaninýe; chë Oveshatema chë canysëftentšana natsana sello tonjanëtsécá ora, sënjanuena canya chë canta Ainënguentšana puerte jabuache, mo cuafjajuesascá, mëntšá enjëtšichamo: “¡Mabo ca!” <sup>2</sup> Sënjanrrepará y sënjaninýe canye fjantse couaye, y chábeñe enjetsenjaquená canye arquëja enjëtšatbëna. Chábioye canye coronëshata tmonjaninýe, y mo canye ayënjayanayacá tonjëftsanbocna, y cabá más jatsyënjánamnaca.

<sup>3</sup> Chë Oveshatema chë inýe sello tonjanëtsécá ora, sënjanuena chë inya chë canta Ainënguentšana mëntšá enjëtšichamo: “¡Mabo ca!” <sup>4</sup> Y inýe couaye tonjánbocna, canye buanganá; y chë enjetsenjaquená obenana tonjanóyëngacñe jamama chë fshantsentša natjëmbana vida chaotsopochocama, entšanga chamotsenóbama; y canye bëts espadëja tmonjanoyé.

<sup>5</sup> Chë Oveshatema chë inýe sello tonjanëtsécá ora, sënjanuena chë inya chë canta Ainënguentšana mëntšá enjëtšichamo: “¡Mabo ca!” Sënjanontjeshé y canye ftsenga couaye sënjaninýe, y chë enjetsenjaquená canye romanëša enjëtšëtbëna. <sup>6</sup> Y chë canta Ainëngbeñe canye oyebuambnayana mëntšá sënjanuena: “Nýe canye kilo trigo canye tesca trabajuama, y unga kilo cebadá canye tesca trabajuama; pero chë aceitiye y chë vínoyna ndoñe cattsepochócaye ca.”

<sup>7</sup> Chë Oveshatema chë inýe sello tonjanëtsécá ora, chë ústonoca Ainá enjëtšichamo: “¡Mabo ca!” <sup>8</sup> Sënjanontjeshé y canye shatsësiye couaye sënjaninýe; chë enjetsenjaquená Obanana ca enjanabaina, y stëtsoica bonjëtšëstona canya, Obanënga imomna luare ca uabainá; y chátbioye obenana tmonjanatšatá cántañentšana cánýentše quem luarentše jtsepochócama, chentša entšanga jtsapochócaye, entšanga tmojtsentsjanama, bëts shëntsánëngaca, šocanëngaca y quem luarentša tšátjaye bayëngaca.

<sup>9</sup> Chë inýe sello tonjanëtsécá ora, sënjaninýe chë altarentša tajsoye chë tmojanóbanëngbe espíritënga, chë Bëngbe Bëtsabe palabra entšanga abuayinayama tmojanóbanënga. <sup>10</sup> Chora chënga tmonjanontšé tša uayebuáchana: “Uamaná y ntšamo tojašëbuachenacá lempe amá bëngbe Nduiño, ¿ntseco quem luarentša entšangbiama cochjayana ndoñe tšabá tmonjamama, y chë bëngbioye obanayama cochjácastigaye

ca?” <sup>11</sup> Chentsána nyetscángbioye uafjantse entsáyá tmonjaníyé y tmonjanéyana batsatema más chamobatmá ca, chë cachëngcá Crístbeyeca catsátanga y oservénënga, chë cachëngcá mochjanóbanënga, nyetscanga choca chamojtsemnëntscuana.

<sup>12</sup> Y más sënjanínýe; chë inýe sello cha tonjanëtsécá ora, jabuache fshantse tontsanangmémana; shinýe tontsanftsénganga, mo chë obaná tojtsemnana juichëtjuama entsáyacá, y nyets juashcona mo buiñcá enjétsinýna, <sup>13</sup> y estrellatémënga celocana fshantsoye tontsantquécjana, mo canýe higo betiye jabuache bínýiaca tojtseshatíyeyna ora, chë nguëfshna higuëbënga cuafjatquécjancá. <sup>14</sup> Y celoca luare tontsanenatjëmbe mo canýe tsbuanácha cuafjuandmanacá, y nyetsca tjañe y béjayoca fshantsënga, chë ndayentšë enjamnentsána tontsanojuaná; <sup>15</sup> y nyetscanga, fshantsoca reyënga, uámanënga, soldadëngbe amëndayënga, bomnënga, obenana bomnënga, y nyetscanga chë nyets tempo nýe ínýabiama oservénënga y chë cachëngbiama trabájayëngnaca, chë cuevëshënguiñe y bëts ndëtšbenguenache tjañe tmontsanóitana; <sup>16</sup> y chë tjañëngoye y chë ndëtšbengoye montsanichamo: “¡Bëngbioye šmotsëtebuantsá y šmotsaitame, chë uámana puestentšë tbemanabe bomínýentsána, y chë Oveshatembe uabouana castigo, cha bëngaftaca tbojetnama, bëngbeñe ndoñe chaondëtsemnana! <sup>17</sup> Er chë uachuana te chabe castigo jtsebínýnama te tojóshjango; y mora ¿nda nanjobenaye chë sóyeca ndoñe chamondëtsepochocama ca?” —chënga montsanichamo.

## 7

*Chë Bëngbe Bëtsábioye oservénënga chë uabouana castigüentsána mochántsatsebacana*

<sup>1</sup> Chca tonjanopasá chentsána, canta angelënga sënjanánýe, monjétsatsana chë quem luarentša canta opochócayenache; chënga ndoñe quemënjatanleséncia chë canta binýiënga jtsebínýnama, ndoñe chaondëtsebinýiayama, ni fshantsentšë, ni mar béjayoca, ni ndocna betiyeshënguiñe. <sup>2</sup> Inýe ángelnaca sënjanínýe, shinýe bocana luaroicana enjetsabó, y chë Bëngbe Bëtsá Ainabe sello enjétsiyëboye. Chë ángelna chë inýe canta angelëngbioye, ndémuanýëngbioye obenana tmojanatšatá chë fshantsentšë y mar béjayoca lempe jtsepochócama, chëngbioye jabuache tonjánabachembo: <sup>3</sup> “¡Tondaye šmatjapochóca, ni fshantsoca, ni mar béjayoca, ni betiyeshënguiñe, chë Bëngbe Bëtsabíama oservénëngbioye chë sélloca juentsaca fchayauínýnanantscuana, ndoñe chamondëtšapochocama ca!”

<sup>4</sup> Y sënjanuena buétanga chë sélloca tmojánauinýnanayama: canýe patse, canta bnétsana y canta uaranga entsánga uinýnanánënga nyetsca Israeloquentša bëts pamíllanguentšana.

<sup>5</sup> Judabe pamillentsána, bnétsana uta uaranga uinýnanánënga;

Rubenbe pamillentsána, bnétsana uta uaranga;

Gadbe pamillentsána, bnétsana uta uaranga;

<sup>6</sup> Aserbe pamillentsána, bnétsana uta uaranga;

Neftalibe pamillentsána, bnétsana uta uaranga;

Manasesbe pamillentsána, bnétsana uta uaranga;

<sup>7</sup> Simeonbe pamillentsána, bnétsana uta uaranga;

Levibe pamillentsána, bnétsana uta uaranga;

Isarbebe pamillentsána, bnétsana uta uaranga;

<sup>8</sup> Zabulonbe pamillentsána, bnétsana uta uaranga;

Josebe pamillentsána, bnétsana uta uaranga;

y Benjaminbe pamillentsána, bnétsana uta uaranga entsánga.

*Chë mallajta entsánga uafjantsëjuangá uichëtjonënga*



<sup>9</sup> Chentsana, sënjanrrepará y mallajta entsanga sënjánanýe, ndocná quentaisobeyenaye jacúntana, nyetsca mándayënguentsana, nyetsca cachca buíñe bomnënguentsana, nyetsca canýe entsanguentsana, y nyetsca biyana bomnënguentsana; chënga monjétsatsana chë uámana puesto chë Oveshatembe natsanentše, uafjantsëjuangá uichétjonënga y ramëshangá monjétsëtbëna. <sup>10</sup> Nyetscanga tša monjétsayebuache:

¡Bënga atsebacayana endobá, Bëngbe Bëtsá,  
chë uámana puestentše entsetbemanábentsana,  
y chë Oveshatémbentsana ca!

<sup>11</sup> Y nyetsca angelënga, chë uámana puesto y chë bëtsëjemënga amëndayënga y chë canta ainëngbe shéconana monjétsatsanënga, chë uámana puestentša natsanoica tmonjanoshamentšé, fshantsóntscoñe jotsejbénase, y Bëngbe Bëtsá tmonjanadorá, <sup>12</sup> mëntšá jayanëse:

¡Chca chaotsemna!

Bëngbe Bëtsábioye nyets tempo y nyetsca tescama chamotsadorana y nyets ainánaca cha chamotsatschuaná.

Entsanga chamotsinýanýná cha puerte bëtsá y uamaná bëtsemnama;

cha endmëna nyets osertánana bomná, y nyets respeto buajoná, y nyets obenana y añemo bomná.

¡Chca chaotsemna ca! —chënga monjétsichamo.

<sup>13</sup> Chentsana, canýa chë bëtsëjemënguentsá tonjanoyebuambá y šonjantjá: “¿Ndëmuanýënga imomna chë uafjantsëjuangá uichétjonënga, y ndémocana tmojabo ca?”

<sup>14</sup> “Taita, aca chëngbiama cotátšëmbo ca” —atše sënjanjuá.

Y cha šonjaniyana: “Chënga montsemna chë jabuache ngmenënguentsana tšabá tmojábocanënga; chë Oveshatema chëngbiama tojóbana y chëngbe bacna soyëngama perdonánënga montsemna; chëngbe uichétjonëjuangá tmojtsaboshabé y chë Oveshatembe buíñeca tmojtabofjantsé.

<sup>15</sup> Chíyeca chënga chë Bëngbe Bëtsabe uámana puestentša natsanoica montsemna, y chábioye nyets tempo chabe delante mondëserveda, y chë uámana puestentše entsetbemaná,

chëngbenache jtsemnëse, chënga echántsanýëna, mo cuafjutsebotscá.

<sup>16</sup> Ya ndoñe más shëntsana, ni uajuendayana quemochátssufrina; shinýama, ni yapa jënyama ya ndoñe más quemochátssufrina;

<sup>17</sup> er chë Oveshatema, chë uámana puestentša natsana tsëntsaca entsemná,

chëngbioye mo oveshëngcá echantsabuajénýa,

y echanjunatse bójaye vida bomniye yóbocana luaroye,

y Bëngbe Bëtsá echanjama ya ndoñe más ngménana chamondétsebomnama ca” —cha šonjanjuá.

## 8

### *Chë ústonoca sello*

<sup>1</sup> Chë Oveshatema chë uándmanana tsbuanáchañe chë ústonoca sello tonjanëtsécá ora, celoca ndocá quentétsënëna mo tsëntsá hora nyetsá.

<sup>2</sup> Chora sënjánanýe chë canýsëfta angelënga, chë Bëngbe Bëtsabe delante monjétsatsanënga; chëngbioye canýsëfta trompetëfjuangá tmonjaníyë.

<sup>3</sup> Chentsana inýe ángel tonjánashjango, canýe castellano matbëtémaca incienso jajuinýiyama, y altar natsanoica tonjantsá; chábioye bëtsá incienso tmonjanoyé chaojuinýëma chë castellano altaroca, chë uámana tbemana natsanoica enjëtsemnoca. Chë ángel incienso tonjanjuinýë Bëngbe Utabná jëtschuayama, cánýiñe nyetsca chë Bëngbe Bëtsabe entsanga tmojoyebuambá palabrëngaca, cháftaca jencuéntama ora.

<sup>4</sup> Y chë incienso juinýnentša ngona, chë ángelbe cucuatšentsana Bëngbe Bëtsabe delante tonjanótsjua, cánýiñe chë Bëngbe Bëtsabe entsanga cháftaca jencuéntama

palabrëngaca. <sup>5</sup> Chentshana chë ángel chë incienso jajuinÿiyama matbëtëma tonjanca, chë altarentša chebánbengaca tonjanajutjé, y quem luaroye tonjanëtšana. Chora enjëtsemna tša juesasanana, corente shauenanana, bëts cá tcuinÿënga, y quem luare tontsanangmémana.

### *Chë trompetëfjuangá*

<sup>6</sup> Chora chë canÿsëfta angelënga, chë canÿsëfta trompetëfjua uabomnënga, tmonjanoprontá chëfjuangá juajatëtama.

<sup>7</sup> Chë natsana ángel chabe trompetëfjua tonjanájatëto, y quem luaroye tmonjanëtšana bëntstá y íneshe, cánÿiñe buiñeca. Ungañentshana cánÿëntse quem luarentse tontsanjuinÿe, úngañentshana cánÿëntse betiyeshënguiñe y nÿetsca nguëfshna shacuanënguín-naca.

<sup>8</sup> Chë inÿe ángel chabe trompetëfjua tonjanájatëto, y chora chë mar béjayoye tmonjanëtšana canÿe soye mo canÿe bëts tjañe tojtsangbototjuancá, y chë mar béjayiñe úngañentshana cánÿëntse buiñe tontsanóbema. <sup>9</sup> Chë mar béjayiñe vida imobomnëngbeñe úngañentshana cánÿëntse tontsanopochocá, y chë barquënguëntšnaca úngañentshana cánÿëntse.

<sup>10</sup> Chentshana chë inÿe ángel chabe trompetëfjua tonjanájatëto, y canÿe bëts estrella, mo canÿe uajuinÿanëshacá enjëttsangbototjuana, celocana tonjanótsatse chë úngañentshana cánÿëntse béjayënguiñe, y béjaye óbocanenache. <sup>11</sup> Chë estrella enjanabaina Untjana ca; y chë úngañentshana cánÿëntse buyeshënguiñe untjiye tontsanóbema, y chë untja búyeshe causa ba entsanga tmonjanóbana.

<sup>12</sup> Chë inÿe ángel chabe trompetëfjua tonjanájatëto, y chora tontsanóndbema chë úngañentshana cánÿëntse shinÿiñe, y chë úngañentshana cánÿëntse juashconiñe y chë estrellënguín-naca. Chca, nÿetsca chentsha úngañentshana cánÿëntse íbetiñe tonjanoquedá, y chë causa ndoñe quemëntëtsebinÿnaye posufta horëntscuana, bnëté canta hora y íbeta canta hora.

<sup>13</sup> Chentshana, sënjanrrepará y sënjanuena canÿe águila, tsbanánoca celoca enjet-songüëfjná, jabuache mëntšá enjëttsichamo: “¡Tša lastema, tša lastema, tša lastema quem luarentša entsangbiama, chë inÿe trompetëfjuangá chë inÿe unga angelënga chamouáajatëto ora ca!”

## 9

<sup>1</sup> Chentshana chë inÿe ángel chabe trompetëfjua tonjanájatëto, y sënjáninÿe canÿe ángel quem luaroye jastjanguana y enjëttsinÿna mo canÿe estrella celocana quem luaroye cuaftsotsatšancá; y moye tonjánashjango ora, tmonjanoyé chë uabouana tboca atëfj-nentša llavëfja. <sup>2</sup> Chë uabouana tboca atëfj-nentse tonjánatëfjo, y chentshana becá ngona tonjanótsjua, mo bëts hornentša ngoncá; y chë uabouana tboye atëfj-nentse ngona causa shinÿe tontsanibétata y nÿets celoca ena ngona enjëtsemna. <sup>3</sup> Chë ngonentšana ba tsát-jaye chapulinga tmonjánbocana, y nÿets quem fshantsëjana tmonjánáshana; y chéng-bioye obenana tmonjanatšatá, chánaca jándbemama, mo chë juetjuama alacranëngbe obenancá. <sup>4</sup> Chéngbioye tmonjanamëndá tondaye ntjándbemana chë shacuanënguiñe, ni ndocna nguëfshna matënguiñe, ni ndocna betiyeshiñe; nÿe chë juentsaca chë Bëngbe Bëtsabe sëlloca nduinÿnanana entsangna añe. <sup>5</sup> Pero ndoñe chematanalesenciá entsangbioye jobáyana, ndayá nÿe jamama chënga shachna shinÿëntscuana tsetšanana chamotsebomnama; y chë chënga monjánama chamotsebomnama tsetšanana enjamna mo canÿe alacranbe uetjoniñcá.

<sup>6</sup> Chca tempo chaojtsemna ora, entsanga mochánttsenguaye ntšamo jtsóbanama, chë tsetšanënga jauántama ndoñe quemochátobena causa, pero ndoñe quemochátinÿena ntšamo jamëse jtsóbanama; y masque tša mochántseboşe jóbanama, chora chéngaftaca ndoñe chca queochatopása, mo jóbanama ndoñe tmonsobencá.

<sup>7</sup> Chë tsátjaye chapulinga monjétsinýna mo couayéngcá prontánënga jama entsán-gaftaca jéntsjava; chëngbe bestšašiče monjanábomna mo castellano coronëshangacá, y chëngbe jubiá enjamna mo entsábe jubiácá. <sup>8</sup> Stjénashe monjánbomna mo shembásabe stjénashacá, y chëngbe juatsasënga mo leonbe juatsasëngcá. <sup>9</sup> Chëngbe cuer-pënga jenéuyanama cochaca monjánbomna morocho soyënga, mo hierro soyéngcá, y chëngbe juatëngmiashangá tmojtsabonjána ora, chë shauenanana bëtscá enjamna, mo ba cochëshangá couayënga cuaftsasjojnacá, chë inýengaftaca jéntsjava tmojëftsátjajo ora tojtseshauenancá. <sup>10</sup> Chënga monjanábomna mo alacranbe uascuatšëjuacá, ba uetotjéf-jangaca, y chë uascuatšëjuaca obenana monjánbomna shachna shinýëntscuana entsánga mal chamotsepasama. <sup>11</sup> Chë tsátjaye chapulinga canýe amëndayá monjánbomna, chë uabouana tboca mándaye ángel; hebreo biyañna cha uabainá Abadón ca y grieguiñna Apolión o pochocayá ca.

<sup>12</sup> Chë natsana pochócayana ya tocjochnëngo, pero más chcoye cabá inýe uta soye más pochócayana cachcá echántsemna.

<sup>13</sup> Chentsána chë inýe ángel chabe trompetéjua tonjanájatëto, y canýe oyebuamb-nayana sënjanuena, chë Bëngbe Bëtsabe delante enjëtsemna castellano altarentša juatsboica lado sibienache obocanentsána enjëtsovocana. <sup>14</sup> Y chë oyebuambnayana, chë trompetéjua tonjanájatëto y enjëtsetbëna ángelbioye tbonjaniana: “Chë canta angelënga chë Eufrates bëtš fshájaye tsachoca utsbuanënga mëjafjoná ca.” <sup>15</sup> Y chë canta angelënga tmonjanëjafjoná; y nýa chë ora, chë te, chë shinýe y chë uatama chëng-bioye tmojanaprontá, chë quem luarentša entsángbeñe úngañentsána cánýentšënga jtsébáyama. <sup>16</sup> Atše sënjanuena buétanga imojamna chë angelëngaftaca tmojána soldadënga, couayënguiñe: uta patse millonënga ca.

<sup>17</sup> Mëntšá sënjánanye mo otjenayoquécá chë couayënga y chë chëngbeñe enjaque-nënga: Chë enjaquenënga monjánbomna morocho soyënga cochaca, jenéuyanama, y chë soye buanganana enjáninýna, mo iñcá, y fchendana mo chë uámana ndëtšbé jacintcá y tsëšiyana inýnana mo azufrcá; y chë couayënga monjánbomna mo leonbe bestšašcá, y chëngbe uayoicana enjëtsovocana iñe, ngona y azufrana. <sup>18</sup> Y chë úngañentsána cánýentše entsánga tmonjanóbana quem unga uabouana pochócaye soyëngaca, chë couayëngbe uayoicana enjëtsovocanana: iñe, ngona y azufrana. <sup>19</sup> Er chëngbe obenana entsánga japochócama monjánbomna uayáshañe y uascuatšëjuañe; er chëngbe uascu-atšëjua enjuamna mo mëtšcuayéngcá, bestšašëngaca, y chëjuanga causa entsánga mal montsanpásaye.

<sup>20</sup> Pero chë inýe entsánga, chë uabouana pochócaye soyëngaca ndoñe tmon-janopochocanga, juabna ndoñe chematanrocá, y ndoñe chematanajbaná amana chë bacna soyënga ntšamo monjanamcá; ndoñe chematanajbaná adórayana chë bacna bayëjënga, ni chë mo diosënga cuaftsemncá jtsejuabnayëse imojánadorana castellano soyënga, midio soyënga, bronce soyënga, ndëtšbé y niñëbé soyënga; y chca soyënga ndoñe quemënjatobena ni jinýama, ni jouenama, ni jtsanama. <sup>21</sup> Juabna ndoñe chematanrocá y ndoñe chematanajbaná entsánga obanayana, encjuanayana, bacna soyënga boyabása o shembásaftaca jtsamëse oyenana, ni atbëbanana.

## 10

### *Chë ángel base uándmanana tsbuanáchaca*

<sup>1</sup> Chentsána sënjáninýe inýe ángel, puerte obenana bomná; celocana enjëtstajjuana, y chabe shéconana canýe jantšëtëshe enjëtsemna; chabe bestšaše tatsëtsacá canýe tsëfcuácuatjo. Chabe jubiá shinýcá enjëtsebuashinýinýana, y chabe shecuatšënga mo úcuatjona niñëbënga cuaftsoiñcá. <sup>2</sup> Chabe cucuatšiče enjëtsetbëna canýe base uándmanana y utëfjna tsbuanácha. Chabe catsbioica shecuátšëca chë mar béjayoca tonjantsá, y chë uañicuayóicatšëcna, quem fshantsentše. <sup>3</sup> Y jabuache tonjanoyó, mo

canje león cuaftseyocá; y tonjanoyó ora, canysēfta juesasanentša jabuache shauenanana sēnjanuena. <sup>4</sup>Chē canysēfta juesasana chca tmonjanoyebuambá ora, atše sēnjanoprontá ntšamo chēnga tmonjanayancá juabemama; pero canje oyebuambnayana celocana sēnjanuena, mēntšá šonjétsatsaye: “Nye aca cochtsójuabnañe ntšamo chē canysēfta juesasana tmonjayancá, ndocnábioye catjauyana, y chē soye ndoñe catjuábema ca.”

<sup>5</sup>Chora chē ángel, chē mar bėjayoca y quem fshantsentše atsaná sēnjaninyá, chabe catšbioica cucuatše celoye tonjanatsbaná, <sup>6</sup>y tonjanjurá Bēngbe Bētsabiama, chē nyets tempo y nyetsca tescama oyenabiama, chē celoca, quem luare, chē mar bėjaye, y lempe chē luarēnguiñe yobinýncá tojanmabiama. Tonjánayana: “Ya ndoñe más quemochatobatma; mora Bēngbe Bētsá echanjama ntšamo tojašebuachenacá, <sup>7</sup>er chē tempo chaojóshjango, chē ústonoye ángel chabe trompetéjua juajatētama chaojontsé ora, chora ya echanjochnēngo ntšamo Bēngbe Bētsá jamama yojuabnacá; chē soye nyetsca entšángbioye cha ndoñe chenatinýanyé, ntšamo tempo cha chabe oservénēngbioye, chē chabe juabna oyebuambnayēngbioye tojanabuayenacá ca” —cha tonjánayana.

<sup>8</sup>Chē atše sēnjanuena oyebuambnayana celocana enjétsobocanana, cachiñe šonjanatsētsá y šonjaniyana: “Motsa y mauaca chē mar bėjayoca y quem luarentše ángel entsemnabe catšbioica cucuatšiñe base uándmanana y utēfjna tsbuanácha ca.”

<sup>9</sup>As atše chē ángelbioye sēnjána; chē base uándmanana tsbuanácha chašuíyema sēnjanianyana, y cha šonjanjuá: “Quemécha, motsásañe. Acbe uayoye uamešquénēcha mo tjouangbe meloycá echántsamna, pero acbe uafsbioyna puerte uauntjécha echantsábema ca.”

<sup>10</sup>As chē base uándmanana tsbuanácha chē ángelbe cucuatšentšana sēnjanaca, y sēntsanásañe; y atšbe uayoye meloycá enjétsamna, pero sēnjanabmuaná y atšbe uafsbioyna puerte uauntjécha tontsanábema. <sup>11</sup>Chora šmonjaniyana: “Aca cmontsemna cachiñe jtétabuayenana, ntšamo Bēngbe Bētsá tojayancá chē ntšamo yochjopásama, ba canje luarentša entšángaftaca, ba mándayēngbentša entšángaftaca, ba biyana bomna entšanguentšéngaftaca y quem luarentša reyēngaftaca ca.”

## 11

### *Chē útata Bēngbe Bētsabe juabna oyebuambnayata*

<sup>1</sup>Chentšana canje medídaye niñēfja šmonjanoyé, mo jatšēmbonēfjácá, y šmonjaniyana: “Motsa y Bēngbe Bētsabe bēts yebna y chentša altar cochjamedída, y cochjácuntaye bueta entšanga chentše Bēngbe Bētsábioye imojtsadorana. <sup>2</sup>Pero chē Bēngbe Bētsabe yebnentše más shjoica luarna cachcá cochjonýaye, ndoñe catjamedída, er chiñe chē ndoñe judiēngbiama endmēna; y chēnga, chē uámana ca uabaina bēts pueblama, canta bnétsana y uta shinýēntscuana soyēnga mochántsama chiñe jtsepocho-cama, mo cuaftsebotajncá. <sup>3</sup>Pero atše, útata atšbiama tatsēmbuata y oyebuambnayata chanjichamuá atšbe cuenta entšángbioye jábuayenama, canje uaranga y uta patse y chnénguana bnétsana tentscuana. Chatna uajojēsha entšayangá uichétjonata bochantsemna, chca, ngmena bomnama jinýanýiyama ca” —chata tbonjánayana.

<sup>4</sup>Quem útata atšbiama tatsēmbuata y oyebuambnayata bontsinýinyena chē uta olivos betíyeca y chē uta candeleréšeca, ntšamo Bēngbe Bētsá, chē quem luarentše mandayabe delante endmēncá. <sup>5</sup>Nderado nda tojtseboše chatbiama bacna soye jamama, ndoñe quentatobenaye ntšámncá jáborlana, er uayoicana iñeshe nanjóbcna y chē uayayēngbioye nantsapochócaye; nderado nda tojábošena chatbiama bacna soye jamama, cachcá cha buántsemna jóbanama. <sup>6</sup>Chē útata obenana bondbomna celoca jtsachtama, ndoñe chaonduaftema, entšángbioye Bēngbe Bētsabiama chabojsabuayiná tese; obenana bėjayēnga buiñe jtsebiama, y jamama quem luarentše chaotsóndbemama, nyetscna pochócaye soyēngaca, bueta sóynaca ntšamo chata tbojtsebošcá.

<sup>7</sup> Pero ntšamo Bëngbe Bëtsabiama ibotatsëmbcá entsángbioye jábuayenama chata chabojapochocá ora, chë uabouana bayá, chë corente bëts tboicana chaojabocná, chátbioye echántsatsjaye, echantsayënjana y echantsëbaye. <sup>8</sup> Y chatbe óbana cuerpo, chë corente bëts pueblentša tsáshenañe echanjoquéda, chë chatbe Utabná tmojanrucificá luarentše, y chë bëts pueblo inyetšá juabáyamna nántsemna mo chë Sodoma y Egiptó luaroycá. Chentše endmëna mo chë bëts pueblënga Sodoma y Egiptcá, er chentše chë entsánga yapa bacna soyënga jtsamana. <sup>9</sup> Y unga y tsëntsa tentscuana, chë obanatte cuerpo mochantsonyaye, nyetsca canye luarentša entsánga, nyetsca cachca buiñe bomna entsánga, ba biyana bomna entsánguentšana y ba mándayëngbentša entsánga; ndoñe quenátslesenciana chata jutabuantsama. <sup>10</sup> Chata bochjóbanama, quem luarentše oyenënga mochanjóyejuaye; tša oyejuayënga mochántsemnama, ndayánaca mochanjénatšëtaye, er ntšamo chë Bëngbe Bëtsabe juabna oyebuambnayata tbojanayancá, tojanma quem luarentše oyenënga puerte chamosufrima.

<sup>11</sup> Pero chë unga y tsëntsa te tonjanochnëngo ora, Bëngbe Bëtsá tonjanma chë obanata chábuatayenama; chentšana tbontantsata, y chë monjétsantjeshënga tša uatjana tonjanëbuache. <sup>12</sup> Chora canye jabuache oyebuambnayana tbonjanuena, celocana mëntšá enjétsëtsënaye: “Moye mašënguata ca.” Y chatna canye jantšëtëshiñe tbonjántsjua, y chatbe uayayënga chca monjétsontyaye. <sup>13</sup> Cachora quem fshantse jabuache tontsanangmëmána, y chë bëts pueblentše bnétsanentšana cányentše tontsanáshajaye, y canyëfta uaranga entsánga tmonjanóbana. Chë ainënga tmonjanoquedanga, tša auatjanánënga, chë celoca Bëngbe Bëtsábioye montsanadorana.

<sup>14</sup> ¡Chë inye uabouana soye quem luare japochócama, mora tocjochnëngo, pero betesco chë ústonoye uabouana pochócaye soye echanjóshjango!

### *Chë ústonoye ángelbe trompetéfjua*

<sup>15</sup> Chë ústonoye ángel chabe trompetéfjua tonjanájatëto ora, celoca tša monjétsayebuache, mëntšá monjétsichamo:

Ora tocjobuache, Bëngbe Utabná y chabe Uámana Uabuayaná Jesucristbe amëndayana quem luarentše chaotsemnama,

y chë amëndayana echántsemna nyets tempo y nyetsca tescama ca.

<sup>16</sup> Y chë uta bnétsana y canta bëtsëjëmënga amëndayënga, chë chëngbe uámana puestiñe Bëngbe Bëtsabe delante monjétsëtbiamanënga, tmonjanoshamentšé, fshantsóntscoñe jotsejbénase, y Bëngbe Bëtsá tmonjanadorá, <sup>17</sup> mëntšá jayanëse:

Bëngbe Utabná, Bëngbe Bëtsá nyets obenana bomná,

aca chë mora cha condmëná y chë tempo cha conjamná cbontsatschuaná,

er nýa mora acbe bëts obenánaca soyënga cochjama, acbe amëndayana jóntšama.

<sup>18</sup> Ba luarentša entsánga ácaftaca tmonjanotšatjayaná;

pero chëngaftaca cmojetnama chë uabouana castigo jtsebínynama te tocjóshjango,

chë tempo tmojanóbanëngbiama jayanama tšabá o ndoñe tšabá tmonjéftsemama.

Tonjóshjango chë hora, uacánana jtatsatayama chë acbiama oservénëngbioye,

chë acbe juabna oyebuambnayëngbioye, chë acbe entsángbioye,

y chë acbe uabaina nyetscangbiama más bëts uabainana yomnama juabnayëngbioye, uámanënga y nduámanënga;

y chë tempo tonjóshjango, quem luare pochocayënga jtsapochócayama ca —chënga tmonjánayana.

<sup>19</sup> Chora, Bëngbe Bëtsabe bëts yebna celoca tonjantëfjo, y choye enjétsëbinýna chë cajontema, ndayëtëma yojaninýanýná ntšamo Bëngbe Bëtsá chabe entsángbioye tojanašëbuachenacá; y chora enjétsëmna tcuinýënga, tša shauenanana, juesasanana, quem fshantse tontsanangmëmána y bëtscá bëntstá tonjantquécjana.

## 12

*Chë shembása y chë uabouana bayá*

<sup>1</sup> Chentšana, canye bëts soye celoca tonjanonýná entšanga canye soye jinýanýiyama: canye shembása, shinýe mo chabe uichëtjoniaca, juashcona chabe shecuatšentša tajsoye, y chabe bestšašinië canye coronésha bnétsana uta estrelléngaca. <sup>2</sup> Chë shembása ngomamaná enjëtsemna, y chë šešona jónýnama yojétsobecuama jabuache enjëtseyoye, chë šešona jónýnama cha puerte jasúfriama ibojamna causa. <sup>3</sup> Y chora inye bëts soye celoca tonjanonýná, entšanga inye soye jinýanýiyama: canye uabouana dragón buanganá, canýsëfta bestšašéngaca y bnétsana tsëtjonëšéngaca y chë bestšašénguinië enjanábomna canýsëfta coronëshangá. <sup>4</sup> Chabe uascuatšéjuaca úngañentšana cánýentšë chë estrellatémënga celocana tontsansjojó, y quem fshantsoye chëtémënga tontsanëtšana. Y chë dragón chë šešona jtsebomnama shembásabe delante tonjantsá, chë šešonatémbioye jtsósañama, cha tojonýná ora. <sup>5</sup> Chora chë shembása canye šešona boyabásetema bontsanbomna, nda nyets luarenache entsángbioye yochtsaméndaye mo canye hierro varëfjaquécá. Pero chë šešona chábentšana tmontsanjuaná y Bëngbe Bëtsábioye, chabe uámana puestoye tmontsanámbañe. <sup>6</sup> Chë shembásana entsanga ndoyena luaroye tontsanachá, Bëngbe Bëtsá canye luare ibojabopróna choye, chentše saná chamocaredadoma, canye uaranga y uta patse y chnénguana bnétsana tentscuana.

<sup>7</sup> Chentšana celoca canye entsjanayana enjëtsemna: Miguel, chë angeléngbe amëndayá, y chabe angelénga chë dragónaftaca monjétsentsjanaye. Chë dragón y chabe angelénga monjétsatsjanaye, <sup>8</sup> pero ndoñe chematanobená jáyëñjanama, y chëngbiamaya y ndoñe más luare celoca quentëtsemna. <sup>9</sup> Chcase, chë uabouana dragón chocana tmontanábocna, chë tempsca mëtšcuaye, chë Diablo y Satanás ca uabainá, y chë bëtscá entsángbioye aingñayá; quem fshantsoye cha tmontsantsatše, y chë cha yojanaménda angeléngnaca.

<sup>10</sup> Chora canye jabuache oyebuambnayana celoca sënjanuena, mëntšá enjétsichamo: Chë Bëngbe Bëtsá entsanga játsebacama tempo ya tonjóshjango. Mora Bëngbe Bëtsá echanjínýanýiye chabe obenana y mándayana, y chabe Uámana Uabuayaná Jesucristbe obenana jtsemándayama; er chë Cristbe delante bëngbe catsátanga mal aquedayá ya tmontábocna, nda nyets tempo Bëngbe Bëtsabe delante mal enjanaquedayá.

<sup>11</sup> Bëngbe catsátanga cha tmonjayëñjaná, er Cristo, chë mo tmojóba Oveshatemcá, Bëngbe Bëtsá bacna soyëngama entsanga cháuaperdonama, tonjanóbana, chabe buiñe juabuáshanëse, y chë ndegombre soyëngama chënga monjanóyebuambnýeyeca; er chëngbe vida chëngbiamaya ndoñe quenjatámana; Jesucristo jaserviama jóbanama chënga monjanprontana.

<sup>12</sup> ¡Chcasna, celoca corente oyejuayana chaotsemna, y tsëngaftanga chë choca oyenëngbeñnaca! ¡Pero tša lastema chë fshantsoca y mar béjayoca oyenëngbiamaya, er chë diablo tsëngaftangbioye tonjástjango, corente tsátjayá, er cha entsetátšëmbo ya nye batšá yojtsábojamna chë chábioye mochjacastígama ca! — enjétsichamo.

<sup>13</sup> Chë dragón quem fshantsoye tmojtsantsatsáma tonjáninýe ora, chë šešona boyabásetema tbonjanéshjango shembásabioye tbontsanacmé. <sup>14</sup> Pero uta juatëngmiásha, chë bëtš aguilbeshá, chë shembásabioye tmonjaníyë, chabiamaya tmojanprontá luaroye chaongüefjoma, entsanga ndoyena luaroca, chë dragónbentšana bënoca; y chentše enjamna chë shembásabioye saná chamuájuatšema, unga y tsëntsa uatëntscuana.

<sup>15</sup> Chora chë dragón, chabe uayoicana bëtš béjaye tonjanbuashëtjo chë shembásabe

stëtšoica, chaobuama y chabotsambama; <sup>16</sup> pero quem fshantse chë shembásabioye tbonjanájabuache, er chë fshantse mo uayašacá tonjantëfjo, y chë dragonbe uayoicana béjaye obocniye tontsanobmuánañe. <sup>17</sup> Y chë dragón chë shembásabioye tondaye jamana chenatanobená causa, corente cacháftaca tbonjánetna, y tonjána chë ínÿenga, chë shembásabe basengcá mondmënënga játsjayama, ntšamo Bëngbe Bëtsá yomandacá imobedecënënga, y ntšamo Jesucristo tonjanabuayená ndegombre soyéngaca sempre imoyenënga. <sup>18</sup> Y chë dragón chë mar béjaye tsachañe tonjantsá.

## 13

### *Chë dragón tonjanma, chë mar béjayoca uabouana bayá chabe obenana chaotsebomnama*

<sup>1</sup> Chentšana atše sënjaninÿe, canÿe uabouana bayá chë mar bejayoicana tonjánbocna; enjánbomna canÿsëfta bestšašënga y bnétsana tsëtjonëšënga, y chëšënguiñe bnétsana coronëshangá, y chë bestšašënguiñe bañe enjétsabemana Bëngbe Bëtsabiamana contra oyeubuambnaye uabaina. <sup>2</sup> Chë uabouana bayá sënjaninÿá enjamna mo canÿe leopardcá, mo osbe shecuášangaca, y chë uayáshana mo leonbeshacá. Chora chë dragón tonjanma chë uabouana bayá chaotsebomnama chabe obenana, y chabe uámana puesto jtsemándayama, y chabe bëts mando. <sup>3</sup> Canÿe chabe bestšašënguentše enjétsinÿna mo jóbanama tëtšeniñcá; pero chentše tbontanóbema; y chora quem luarentša nÿetsca entšanga ojnánänënga monjétsamna, y chë uabouana bayábioye montsanëyeunana. <sup>4</sup> Y chë dragón montsanadorana, chë uabouana bayábioye obenana tbojánatšetama; y chë uabouana bayábioynaca montsanadorana, mëntšá jayanëse: “Ndocná obenana quenátsbomna quem uabouana bayacá, y ndocná quenátobena chábioye jayénjanama ca.”

<sup>5</sup> Chë uabouana bayábioye tbonjanlesenciá corente podesca Bëngbe Bëtsabiamana chaotsóyeubuambnama, y obenana tbonjanatšetá, canta bnétsana y uta shinÿëntscuana chaotsemándama. <sup>6</sup> Y podesca Bëngbe Bëtsabiamana tonjánayana, soyënga chabe contra, chabe bëts yebnama y chë celoca oyenëngbe contra. <sup>7</sup> Chábioynaca tbonjanlesenciá chë Bëngbe Bëtsábenga imomnënga játsjayama, jáyénjanantscuana; y obenana tbonjanatšetá chaotsemándama nÿetsca cachca buiñe bomna entšángbeñe, nÿetsca canÿe entšángbeñe, nÿetsca biyañe bomnëngbeñe, y nÿetsca mándayëngbentša entšángbeñe. <sup>8</sup> Chë uabouana bayá nÿetsca quem luarentša entšanga mochántšadorana. Chë entšanga mondmëna ndëmuanÿengbe uabaina ndoñe yontsábemana, chë Bëngbe Bëtsábioye jëtschuayama mo canÿe oveshatemcá, tojanóbanabe librëšañe. Bëngbe Bëtsá quem luare cabá ndëma ora, quem librëšañe tojanábema nÿetscanga chë tšabe vida mochjónÿenëngbe uabaina.

<sup>9</sup> Chë jouenama obenënga, chamouena.

<sup>10</sup> Chë cárceloye jama ibomná, cárceloye bochanjotóca jama; chë espadéjaca jobanamá, espadéjaca echanjóbana.

Chíyeca quem luarentše entseyta, chë Bëngbe Bëtsábenga imomnënga padecena soyënguiñe tmojtsemna ora, puerte uantadënga jtsemnana y Bëngbe Bëtsábeñe jtsošbuáchiyana, mo chë Bëngbe Bëtsabe entšangcá.

<sup>11</sup> Chentšana inÿe uabouana bayá sënjaninÿe, quem fshantsentšana enjétsabocana; uta tsëtjonëse mo oveshabešcá enjánbomna, pero mo canÿe dragoncá, mo canÿa Satanásbeyeca mandanacá enjétsoyebuambnaye. <sup>12</sup> Y enjánama soyënga chë natsana uabouana bayabe nÿets obenánaca, chabe delante. Chë fshantsentša bayá tonjanma nÿetsca luarentše oyenënga chamotsadoránama chë natsana uabouana bayábioye, chë jóbanama tëtšeniñe tbontanobemá. <sup>13</sup> Cha ba bëts soyëngnaca enjánama chabe obenana entšanga jinÿanÿiyama, entšangbe delante jamana iñe celocana fshantsoye chaótsatšamnaca. <sup>14</sup> Y cha tbonjanlesenciá chaoma chabe obenana jinÿanÿiyama chë natsana uabouana bayabe delante. Chë soyéngaca entšanga tonjanaíngñé, y quem luarentša

entšanga tonjanéyana canye soye chamopormá, y chë soye cháotsinýna mo chë natsana uabouana bayacá, chë espadéjaca tëtšená enjamná, y chora tšabá enjetsatsméná. <sup>15</sup> Y chë inye uabouana bayábioye tmonjanlesenciá obenana chaotsebomnama jamama, chë natsana uabouana bayábioye jadórama entšanga tmonjanma soye vida chaotsebomnama, y chë soye jóyebuambayama chaotsobenámnaca, y jamama chë chábioye ndoñe tmontsadoránenga chamóbanama. <sup>16</sup> Y tonjanma, nyetscángbioye, básenga y bëtset-sanga, bomnénga y ndbomnénga, cachéngbiama trabájayénga y nye ínýabiama nyets tempo oservénénga, catšbioica cucuatšíñe o juentsaca chamuínýnanama. <sup>17</sup> Y ndocná quenjátanobena ni jiyama, ni jobuámiñama, chë uinýnanánana ndoñe tontsebomnése; chë uabouana bayabe uabaina o chë chabe uabainama yomna número.

<sup>18</sup> Chë número jinýenamna bëtscá osertánana jtseytana. Chë becá osertánana bomná cháuinýena ntšamo chë uabouana bayabe número iuayancá, er canye entšabe número endméná. Chë número endméná chë chnénguana patse y chnénguana bnétsana y chnénguana.

## 14

### *Chë canye patse y canta bnétsana y canta uaranga entšangbe canto*

<sup>1</sup> Y más séntsanonýá. Sënjáninýe, chë Oveshatema, enjétsatsjabna Sión ca uabaina tjoca, y cháftaca monjétssemna canye patse y canta bnétsana y canta uaranga entšanga, y chéngbe juentsaca enjétsabemana chë Oveshatembe y chabe Taitabe uabaina. <sup>2</sup> Chora sënjanuena celocana canye shauenanana, mo bëtscá béjayénga y bëtš juesasana shauenanancá; y chë shauenanana enjamna mo chë arpésha uenanayénga chéngbe arpéshangá tmojtsabuastocá. <sup>3</sup> Chénga canye tsëm canto montsancánta Bëngbe Bëtšabe delante, chë chabe uámana puesto y chë cháftaca canta Ainénga y chë bëtšjéménga améndayéngbe natsanentše. Y ndocná quenjátanobena chë canto juatsjínýana, nye chë canye patse y canta bnétsana y canta uaranga quem luarentšéngbentšana atsebácanéngna aíñe. <sup>4</sup> Chénga monjanméná chë shembásaftaca ndocna bacna soye tmonjanménga, er chénga imojanenománda chca bacna soyénga ndoñe ntsamama; chë Oveshatema ndémoye tojtsá y chéngnaca choye jtséstonana. Chénga imojamna chë natsanénga chë quem luarentša entšanguentše atsebácanénga jtsemnama, y chénga atsebácanénga imojtsemna Bëngbe Bëtšá y chë Oveshatema jtsaservénama. <sup>5</sup> Chénga ndocna te tmonjanobosteró; ndocná quenátobena jayanama chénga bacna soye tmojanma ca.

### *Ntšamo chë unga angelénga tmojánayana*

<sup>6</sup> Chentšana inye ángel sënjáninýe, tsbanánoca celéjana enjétsongüefjnaye. Cha enjábomna canye nyets tempscama oservena buayenana soye, entšángbioye jáuyanama, nyets quem luarentše oyenénga, nyetsca mándayéngbentša entšanga, nyetsca cachca buiñe bomna entšanga, nyetsca biyañe bomnéngbeñe y nyetsca canye entšángbiama. <sup>7</sup> Y jabuache mëntšá enjétsichamo: “¡Bëngbe Bëtšabiama šmochjájuaoye cha nyetscangbiama chë más uamaná endménama, y cha šmochtsatschuanaye, er ya tonjóshjango chë tempo ntšamo entšanga tmojamama tšabá o ndoñe tšabá bëtsemnama cha cháuyanama! ¡Chë celoca y quem luare, chë mar béjaye y nyetsca chë fshantsentšana óbocana béjayénga tojamá šmochtsadorana ca!”

<sup>8</sup> Chábentšana inye ángel mëntšá enjétsichamo: “¡Ya bëtš castigo, ya bëtš castigo chë Babilonia bëtš pueblaca entšángbeñe echántsemna!, ndémuanýénga tmojinýanyé ntšamo puerte bacna soyénga shembása o boyabásaftaca jtsamama y inye corente bacna soyéngnaca, y chentšana nyets quem luarentša entšanga mo cach Babilonioquéngcá tmojama. Chë causa, Bëngbe Bëtšá echanjama chéngbiámnaca chabe uabouana castigo chaotsemnama ca.”



<sup>9</sup> Chë útatbentšana inye ángel jabuache mëntśá enjétsichamo: “Nderado nda chë uabouana bayábioye y chë chábioye jadórama pormana soye tojtsadorana, y tojalesencia chabe uinýnanana soye juentsaca o cucuatśiñe chamojajoma, <sup>10</sup> chánaca bontsemna, chë Bëngbe Bëtsabe uabouana castigo jasúfriana. Entśanga puerte bacna soye tmojamama, Bëngbe Bëtsá puerte tbojetna, y chë causa echanjama chë castigo chéngbeñe chaotsemnama. Y chë uámana angelënga y chë Oveshatembe delante, chë bayá adorayábioye puerte mochanjatsetšená, íñeshe y azúfreca. <sup>11</sup> Chca chamojtsesufrina ora, becá ngona echantsóbocana, y chë ngona nyets tempo chca echantsótsjuaye; y chënga, chë uabouana bayá y chábioye jadórama pormana soye adórayënga, y chabe uinýnanana soye bomnëngbiama, ndocna te chë tsetśanana queochatéjbana ca” —cha enjétsichamo.

<sup>12</sup> Chíyeca quem luarentşe entseyta, chë Bëngbe Bëtsabe mandënga obedecënga y Jesúsbeñe puerte oşbuáchiyana bomnënga, chë Bëngbe Bëtsabe entśanga, padecena soyënguñe tmojtsemna ora, puerte uantana jtsemnana.

<sup>13</sup> Chentšana canye oyebuambnayana celocana sënjanuena, mëntśá şonjétsatsaye: “Mëntśá mábema: ‘Tśa oyejuayënga mochántsemna chë mëntescana mochjóbanënga, Bëngbe Utabnáftaca cánýiñe mo canýacá jtsomñëse ca.’ ”

“Aíñe ca” —chë Uamana Espiritu tonjayana—, “chënga ya ndoñe más queochátamna jatrabájana, ni jasúfriana, er chënga tmojama tśabe soyënga Jesús jasérviana, y chë soyëngama chënga tśabe bendicionënga mo uacanancá celoca mochanjóyëngacñe ca.”

#### *Ndayá chë angelënga quem luarentşe tmojanatbaná*

<sup>14</sup> Chora más sënjáninýe; sënjáninýe canye fjantse jantşetëshe, y chëshiñe canya enjétssetbemana. Cha enjamna mo canye entśacá; chabe bestśaşiñe enjanábomna canye castellano coronésha, y cucuatśiñe canye puerte efšana mëntśá enjétsatbëna.

<sup>15</sup> Chentšana, chë celoca Bëngbe Bëtsabe bëts yebnentšana inye ángel tonjánbocna, y jabuache bonjétsatsaye chë jantşetëshiñe tbemanábioye: “¡Acbe mëntśtaca machbonja y shajuanënga matbaná, er chë játbanama tempo ya tonjóshjango; chë quem luarentśa shajuana ya tonjaboche ca!” <sup>16</sup> Y chë jantşetëshiñe enjantbemaná chabe mëntśtaca quem luariñe tonjánachbonja, y nyets quem luarentşe atbanániñe tonjanoquedá.

<sup>17</sup> Chentšana inye ángel chë celoca Bëngbe Bëtsabe bëts yebnentšana tonjánbocna; chánaca canye puerte efšana mëntśtaca. <sup>18</sup> Y chë altarentšana inye ángel tonjánbocna, chë mando bomná íñesheca castigo entśangbiama jamama; y chë puerte efšana mëntśá bomna ángelbioye jabuache tbonjaniana: “¡Acbe mëntśtaca machbonja y chë fshantsoca nyetsca uvas betiyeshënguentsa uvasëşangá mátabe, er ya uabochenëşangá entsamna ca!” <sup>19</sup> Y chë ángelna chabe mëntśtaca quem luariñe tonjánachbonja, y nyetsca quem luarentśa uvasëşangá tonjanátabe, y lempe chë juantşëtetjiana luaroye tonjanëtšana. Chë soye entsinýinýná ntşamo yochtsemnana Bëngbe Bëtsabe uabouana castigo. <sup>20</sup> Chë uvasëşangana, chë bëts pueblentšana chaboje tmonjanantşëtetje, y chë luarentšana tśa buiñe tonjanóbocna; tonjanojutjé couayëngbe uayashbenëshantscoñe y mo unga patse kilómetrënga tonjanábuashana.

## 15

#### *Chë angelënga chë canýsëfta pochócaye soyëngaca*

<sup>1</sup> Chentšana, inye bëts soye entśanga inye soyama jinýanýiyama, celoca sënjáninýe, canye puerte bëts soye: canýsëfta angelënga canýsëfta pochócaye soyëngaca, chë ústonoye pochócaye soyënga. Chë soyënga chaojtsemnentšana ya ndoñe inye pochócaye soye yochántsemna, er chéntscoñe Bëngbe Bëtsá yochjacistíga, lempe ntşamo cha jamama tojanjuabocá.

<sup>2</sup> Canye mar béjaynaca sënjáninýe, mo cristalca enjétsinýna íñeca enájuañe; y chë béjaye juachaca monjétsatsana chë tśabá tmojanbocnënga, y ni chë uabouana bayá, ni chë chábioye jadórama pormana soye ndoñe tmonjánadoranga, y chë uabouana bayabe

uabainama yomna número chéngbeñe chaotsemnana ndoñe tmonjanlesencianga. Njëtscanga chénga monjétsabomna Běngbe Bětsá tojanětsatá arpangá. <sup>3</sup> Chénga, canje canto monjésecantaye ntšamo Moisés, chě Běngbe Bětsabe oservená tojancantacá, y ntšamo chě Oveshatema tojancantacá. Měntšá monjésecantaye:

Puerte běts soyěnga y tšabe soyěnga entsemna lempe ntšamo aca tcojamcá,  
Běngbe Utabná Běngbe Bětsá njęts obenana bomná;  
lempe ntšamo jtsaměse aca icyoena, acbe bominjěñe puerte tšabe y ndegombre soyěnga yomna,

njęts luarěnguenache entšangbe Rey.

<sup>4</sup> Běngbe Utabná, ¿nda nanjájuaboye aca njętsangbiana ndoñe más bětsá condmēna ca,

o ndoñe cmantsatschuanaye?

Nje aca uamaná condmēna;

njętsca mándayěngbentša entšanga ácbioye mochanjabo,

ácbentše mochanjoshamentšiyē aca jadórama,

er ntšamo tcojamcá lempe entšángbioye mora tcojinyanjé,

y lempe ntšamo aca tcojamcá tšabá jtsemnana ca —monjésecantaye.

<sup>5</sup> Chca chentšana sěnjantonjěšē y sěnjáninje chě celoca Běngbe Bětsabe běts yebna tonjantěfjo, chě Běngbe Bětsá Moisésbioye tbojanijé leyěnga uajajóntěse. <sup>6</sup> Y Běngbe Bětsabe běts yebnentšana tmonjánbocna chě canjěsěfta angelěnga, chě canjěsěfta pochócayē soyěnga uambayěnga, uafjantse lino entšějuangá uabuashinjinjanějuangá uichětjoněnga, y těntša castellano uasnanějěngaca cochóntscōñe. <sup>7</sup> Chentšana, canja chě canta Ainěnguentšá chě canjěsěfta angelěngbioye tonjanoyé canjěsěfta castellano cōpbenga jútjena chě Běngbe Bětsabe uabouana castígoca; Běngbe Bětsá chě njęts tempo y njętsca tescama vida bomná. <sup>8</sup> Chorna, chě Běngbe Bětsabe běts yebna celoca becá ngónaca tonjanojutjé, y chě ngona enjětsobocana Běngbe Bětsábentšana, chabe buashinjinjanana y obenana jtsinjanjñayěse; y Běngbe Bětsabe běts yebnoye ndocná quenjátanobena jamashěnguana, chě canjěsěfta angelěngbe canjěsěfta pochócayē soyěnga candochněnguěntscuana.

## 16

### *Chě castígoca cōpbenga*

<sup>1</sup> Chentšana, canje jabuache oyebuambnayana sěnjanuena, chě celoca Běngbe Bětsabe běts yebnentšana enjětsobocana, y chě canjěsěfta angelěngbioye mēntšá enjětsětsět-snaye: “Motsajna y quem canjěsěfta cōpbenga, chě Běngbe Bětsábocana endóbocana uabouana castígoca, fshantsoca šmochjabuashcja ca.”

<sup>2</sup> Chora chě natsana ángel tonjána y chabe cōpbé quem luariñe tonjanbuashcja, y njętsca entšanga chě uabouana bayabe uinynanana soye bomněnga y chě chábioye jadórama pormana soye adórayěngbe cuerpiñe bañe bacna nguayanana tonjanóbocna, puerte tsetšénana.

<sup>3</sup> Chentšana, chě inje ángel chabe cōpbé mar bėjayoca tonjanbuashcja, y choca búyeshe buiñcá tontsanóbema, mo canje entšá obanabe buiñcá, y njętscanga chě mar bėjayoca vida bomněnga tmonsanóbana.

<sup>4</sup> Chora chě inje ángel chabe cōpbé bėjayěnguiñe y bėjaye obocaněnguiñe tonjanbuashcja, y buiñe tontsanobiana. <sup>5</sup> Chentšana sěnjanuena, chě bėjayěnguiñe mando bomna ángel mēntšá enjětsichamo:

Aca njętsca soyěnguiñe tšabá amá condmēna,

er aca tcojayana chě quem luarentša entšanga chca castigáněnga chamotsemnana.

Běngbe Bětsá, Uamaná, mora chca condmēna y chca conjamna;

<sup>6</sup> er chénga tmonjama, chě acbe entšanga

y acbe juabna oyebuambnayěngbe buiñe chauábuashanama, jtsěbáyěse;

y mora tconjama chénga buiñe chamofšema.

Njéts mercedo imobuájona chca japásama ca —cha enjétsichamo.

<sup>7</sup> Altarcánēnaca canye oyebuambnayana sēnjanuena, mēntšá enjétsichamo: “Aíñe, Bēngbe Utabná, Bēngbe Bētsá, njéts obenana bomná condmēna, y ntšamo entšanga contsacastigacá, ndegombre y tšabá entsemna ca.”

<sup>8</sup> Chentšana, chē inye ángel chabe copbé shinýiñe tonjanbuashcja; chē shinýe corente tontsanobonýaná y chíyeca entšángbioye íñesheca tontsanajuinýé. <sup>9</sup> Y njétscanga uabouancá juinýñēnga tmonjanoquedá; pero chēnga ndoñe chemátanbošena bacna soyēnga amana jtsajbanana, ni Bēngbe Bētsabe benache jtishachana, ni chábioye quemētétsatschuanaye, más chabe contra ba soyēnga montsanichamo; cha nda obenana yobomna chēngbioye chē pochócaye soyēnga jíchmuama, chēnga chamosufrima.

<sup>10</sup> Chentšana chē inye ángel chabe copbé chē uabouana bayabe uámana puestiñe tonjanbuashcja, y njéts chabe amēndayiñe ibetiñe tonjanoquedá. Chē entšanga bichtaja montsanenójantsnaye, yapa tsetše causa; <sup>11</sup> pero ni chca, chē entšanga chematanajbaná bacna soyēnga jtsamana, ndayá chē yapa tsetšama y chē chēngbe cuerpiñe bacna nguayanana causa, chē celoca Bēngbe Bētsabe contra ba soyēnga montsanichamo.

<sup>12</sup> Chentšana chē inye ángel chabe copbé chē bēts fshájaye Eufrates ca uabáiniñe tonjanbuashcja y chē bėjaye tontsanbuashjo, japróntama chē shinýe bocanoica luarēnguentša reyēnga y chēngbe soldadēnga chējana chámuachñejnama.

<sup>13</sup> Atše sēnjáninýe, chē dragonbe uayáshoicana, chē uabouana bayabe uayáshoicana y chē ndoñe ndegombre Bēngbe Bētsabe juabna oyebuambnayabe uayoicana tmonjánbocna unga bacna espíritēnga; mo sapošēngcá monjétsinýna. <sup>14</sup> Chēnga monjamna bayējēngbe espíritēnga; bēts soyēnga monjánama obenana jinýanjíyama, y montsanbocana njéts luarentša reyēnga jáchembuama, chē uámana te, ndayté Bēngbe Bētsá, chē njéts obenana bomná yochjabo entšángbiamá jabáyanama ntšamo chēnga tmojamama, chē te chēnga chabe contra chamotssetsjama.

<sup>15</sup> Bēngbe Utabná Jesucristo mēntšá tojayana: “Šmochjinýe, atše nýe ndeolpe chanjabo, mo canye atbēbanacá, chabiamá ndocná tontsejuabná ora; chíyeca oyejuayēnga mochántsemna atše jabama tmojtseprontanēnga, mo nda tojtsefšna y chabe entšayá totsaboprontañacá, nýe enašá ndoñe chaondétsemnana, y entšanga chca tmojinýe ora ndoñe chaondétsēuatjama ca.” <sup>16</sup> Y chē bacna espíritēngna chē reyēngbioye tmonjanēnatse canye luare, hebreuñe Armagedón ca uabáinoye.

<sup>17</sup> Chentšana, chē ústonoye ángel chabe copbé quem luarentša tsbanánoca tonjanbuashcja, y chē celoca Bēngbe Bētsabe bēts yebnentša uámana puestentšana canye jabuache oyebuambnayana tonjanóbocna, mēntšá enjétsichamo: “¡Chē jopásama enjamna soye ya tojchoñēngo ca!”

<sup>18</sup> Chora enjétssemna tcuinýēnga, shauenanana y juesasanana, y quem luariñe tontsanangmēmana, yapa jabuache quem luare tontsanēbanjó causa; quem luarentše entšanga imobinýna orscana, ndocna te nýa chca quem luare tontsanēbanjó. <sup>19</sup> Chē puerte bēts pueblo úngañe tontsanójatá, y njéts luarentša bēts pueblēnga tontsanáshajaye, y Bēngbe Bētsá tojanenojuabó chē puerte bēts pueblama, Babilonia ca uabaina pueblama, chentša entšanga chē uabouana castigo chamotsebomnana, Bēngbe Bētsá tša tbojánētna causa, tša bacna soyēnga chentše tmojanmama. Y chca, chē chēngbe bēts pueblo úngañe tontsanójatá ora, cha chēnga tonjanacastigá. <sup>20</sup> Mar bėjayoca njétsca fshantsēnga y quem luarentša njétsca tjañe tontsanenatjēmba. <sup>21</sup> Celocana bētsētsa bēntstbēnga entšángbeñe tonjantquécjana, chēbēnga canta bnétsana kilama más utbēnga; y entšanga Bēngbe Bētsabe contra ba soyēnga tmonjánayana, er chēnga tša montsansufrina chē bēts pochócaye bēntstá causa, y chē pochócaye bēntstá chēngbiamá puerte jabuache castigo enjamnama.

<sup>1</sup> Canya chë canysëfta angelënguentsá, chë canysëfta copbenga monjanat-bënguentsá, tonjánabo y šonjaniyana: “Mabo; cbochanjinýinye ntšamo yochtsemna chë puerte bacna vida bomna shembása, chë béjayënguine entsetbemanabe castigo. <sup>2</sup> Quem luarentša mandadënga cháftaca puerte bacna soyënga tmojama, y quem luarentša oyenënga puerte tmojóyejuanga chë cháftaca bacna soyënga amama, mo chë bacna vida bomna shembásabe vínoyeca puerte cuafjotmenangcá ca.”

<sup>3</sup> Chentšana chë ángel, atše chë Uámana Espíritbeyeca corente mandaná jtsem-nëse, šonjanánatse entšanga ndoyena luaroye. Choca sënjáninye canye shembása, canye uabouana buángana bayábeñe enjaquená; chë bayabe cuerpiñe nyëtsañe Bëngbe Bëtsabiama puerte bacá oyeuambnaye uabaina enjétsabemana, y enjábomna canysëfta bestšaše y bnëtsana tsëtjonëse. <sup>4</sup> Chë shembása enjanichétjona uámana shbuenda uafjatsenga y buángana entšayá, y entsanbotamana castellánoca, uámana botamana ndëtsëtémëngaca y pérlica. Chabe cucuatšiñe canye castellano copbé enjétsatbëna, jútjena puerte uaboyënja soyëngaca, y chë boyabásengaftaca cha tojanma puerte bacna soyëngaca. <sup>5</sup> Y chabe juentsaca canye uabaina enjétsabemana, ndoñe josërta soye, mëntšá: “Chë puerte bëts pueblo Babilonia, tša bacna entšanga chentše, mo chë puerte bacna vida bomna shembásengbe bebmá cuaftsemncá; chentšana tojanóbcna quem luarentša nyëtsca puerte uaboyënja soyënga ca.” <sup>6</sup> Atše sënjáninye chë shembása tëmiá, er cha tojanofšë chë Bëngbe Bëtsábenga imojamnëngbe buiñe, ndémuanýengbioye tmojanëbaye Jesusbiam a oyeuambnaye causa.

Chca sënjáninye ora, tša sënjanenjaná. <sup>7</sup> Chora chë ángel šonjaniyana: “¿Ndáyeca tcojenjnaná ca? Atše cbochanjauyana ntšamo yojsayana chë shembása y chë chábioye bontsambá uabouana bayá, chë canysëfta bestšaše bomná y bnëtsana tsëtjonëse; chë soye ndocná quenátstatsëmbo. <sup>8</sup> Chë tconjinýe uabouana bayá, tempo chca enjamna, pero mora ya ndoñe. Chë corente bëts tboicana cha echanjesetsjuá, pero lempe pochocaná jtsemnama chca echántsaye. Quem luarentše oyenënga, ndémuanýengbe uabaina quem luare jobojátšama orscana ndoñe yonduábemana, chë tšabe vida mochjónýenëngbe uabaina iuábemana librësañe, chënga mochanjenjaná, chë bayá chë tempo enjaniyená y mora ya ndoñe, pero cachiñe yochjésabama chamojinýe ora.

<sup>9</sup> “Muentše canye soye entsemna chë chca josértama chamojobenangbiam a: chë bayabe canysëfta bestšaše endmëna canysëfta tjañe ndayiñe chë shembása entsetbemana; chë bestšašëngnaca mondmëna canysëfta mandadënga. <sup>10</sup> Chentšana, shachnëngbe amëndayana ya tonjochnëngo, canya mora entsetbemana jtsamëndayama y chë inya cabá ndoñe tonjášhango. Y cha chaojášhango ora, ndoñe bënama cha queochaisemánda. <sup>11</sup> Chë tempo enjaniyena uabouana bayá pero mora ya ndoñe, endmëna chë canysëfta mandadënguentsana inye mandado, pero chánaca chë inye canysëftangcá endmëna y lempe pochocaná jtsemnama entsá.

<sup>12</sup> “Chë tconjinýe bnëtsana tsëtjonëse mondmëna bnëtsana mandadënga, jamëndama cabá ndoñe tmonjóyayenga; pero básefta tescama cánýiñe chë uabouana bayáftaca, mando mo reyëngcá mochanjóyëngacñe. <sup>13</sup> Quem bnëtsanënga nyëtscanga cachcá mochántsejuabnaye, y chë uabouana bayábioye chëngbe obenana y mando mochanjátsetaye. <sup>14</sup> Chë Oveshatembe contra mochántsensjanaye; pero chë Oveshatema echantsayëñjaná, er chë Oveshatema endmëna nyëtsca amëndayëngbiam a chë más uámana Utabná y nyëtsca reyëngbiam a chë más uámana Rey. Chë bnëtsana mandadënga cháftaca mochántsensjanaye ora, cha chentše chabe entšangaftaca cánýiñe echántsemna. Chënga mondmëna chë cha tojáchembo y tojubuáyanënga y chábeñe sempre ošbuáchiyënga ca” —cha šonjaniyana.

<sup>15</sup> Chë ángel mëntšánaca šonjaniyana: “Chë tconjinýe béjayënga, ndayiñe chë bacna vida bomna shembása entsetbemana, mondmëna nyëtsca canye luarentša entšanga, enutanana entšanga, nyëtsca biyañe oyeuambnayënga y nyëtsca mándayëngbentša

entsānga. <sup>16</sup> Y chē uabouana bayábeñe tcojinýe bnétsana tsétjonēse y chē uabouana bayá, chē bacna vida bomna shembásabioye mochantsáboyēnja; enasá cachcá mochanjesonýaye; chabe cuerpentša mēntšena mochantsósañe y íñesheca mochántsejuinýiye, chaopochocantscuana. <sup>17</sup> Bēngbe Bētsá tojama chē bnétsanēnga ainaniñe tša chamotseboše, ntšamo cha yobošcá chamotsamama. Chca, chēnga mochanjenóyeunaye chēngbe mando chē uabouana bayábioye jantšabuáchiyana, ntšamo Bēngbe Bētsá tojayancá chaojopasantscuana. <sup>18</sup> Chē tconjinýe shembása chē puerte bēts pueblo endmēna, chē ndayentša mandadēnga nýets quem luarentša mandadēngbeñe mando mondbomna ca” —cha šonjaniyana.

## 18

### *Babilonia japochócama*

<sup>1</sup> Chentšana inýe ángel sēnjáninýe, celocana enjétsastjajuana, puerte obenana bomná, y chabe buashinýinjanánaca nýets quem luariñe entsanbinýna. <sup>2</sup> Chē ángel jabuache mēntšá enjétsichamo:

¡Ya mochantseepochóca, ya mochantseepochóca chē uámana pueblo Babilonia!

¡Chentše tojtsóbema diablēngbe oyeniñe,

nýetsca bacna espíritēngbe oyeniñe,

y ndoñe tšabe y uaboyēnja shloftšēngbe oyeniñe!

<sup>3</sup> Er nýetsca quem luariñe mándayēngbentša entsānga puerte bacna soyēnga tmojama chentša entsāngbe causa,

mo chē bacna vida bomna shembásaftaca bacna soyēnga cuafjamcá,

mo puerte cuafjotmenangcá chē bacna vida bomna shembásabe vínoyeca.

Nýetsca luarēnguentša mandadēnga puerte bacna soyēnga tmojama,

mo chē shembásaftaca bacna soye cuafjamcá,

y quem luarentša obuámnañēnga y enēnga, bomnēnga tmojobiama chentša entsānga yapa crocénana nýe ndayíñnaca ntsejuabnaycá gástaye causa ca —cha enjétsichamo.

<sup>4</sup> Chentšana, celocana inýe oyebuambnayana sēnjanuena, mēntšá enjétsichamo:

¡Chē bēts pueblentšana maisebocana!, tšēngaftanga chē atšbe entsānga šmognēnga,

chē chentša entsānga mondbétsama bacna soyēnga ndoñe chašmondétsamama,

ni chē chēngbioye japochócama soyēnga tšēngaftangbiama cach ndoñe chaondétsemnama.

<sup>5</sup> Chēnga tša bacna soyēnga tmojama, tša bētscá nýa mo celóntscoñe cuafjotjecá,

y Bēngbe Bētsá mora entsejuabná chēnga tša puerte bacna soyēnga tmojama causa, chē soyēngama jácastigama.

<sup>6</sup> Ntšamo chentša entsānga ínýēngbiama ndoñe tšabá tmonjamcá,

chē entsāngbiámnaca cachcá chaotsemna;

ntšamo tmojamama, cabá uta soye más cachca soye chēngbiama chaotsemna;

ntšamo chentša entsānga ínýēnga chamosufrima tmojamcá,

chéngnaca cachcá uta soye más chamosufrí.

<sup>7</sup> Chēnga corente jtsenábotamnayana y yapa crocénana nýe ndayíñnaca ntsejuabnaycá jtsegástayana;

chē causa, chēnga entsamna puerte jasúfriama y becá tsetšanana jtsebomnama.

Er chēngbe ainaniñe mēntšá jtsejuabnayana:

“Muentše mo reyēngcá mondétbiámana.

Viudacá ngménaca ndoñe quemuátsmēna; tondayama quemochátssufrina ca.”

<sup>8</sup> Chíyeca, canýe ora pochócaye soyēnga chēngbiama echanjóshjango:

jóbanama šocanēnga, puerte ngménana y jabuache shēntsana,

íñesheca lempe chēngbeñe echántsejuinýe;

er Bēngbe Bētsá corente obenana bomná endmēna,

Bëngbe Utabná chë chënga chca castigo chamotsebomnama tojayaná ca —cha enjétsichamo.

<sup>9</sup> Quem luarentša mandadënga, chentša entsángaftaca puerte bacna soyënga tmojamënga, y chëngaftaca nÿe ndayíñnaca yapa crocénana, ntsejuabnycá tmojagastanga, mochanjošachna y puerte ngmenánaca mochántsemna, chë bëts pueblo chaojtsangbototjuanentša ngona chamojinÿe ora. <sup>10</sup> Chentšana bënoca mochanjoquéda antješna, chë uabouana castiguama auatja causa, y chentša entsangbiama mochanjayana: ¡Tša lastema, tša lastema tsëngaftanga chë uámana bëts pueblo, Babilonientše oyenëngbiama, chë tša obenana binÿnentše!

Canÿe ora tsëngaftangbe castigo tojóshjango ca —mochánttsichamo.

<sup>11</sup> Chë quem luarentša obuámnañënga y enéngnaca mochanjošachna y ngmenánaca mochántsemna chë pueblentša entsangbiama, er chora ya ndocná queochátsmëna chë chënga tmojúshjango soyënga chamobuámiñama: <sup>12</sup> tmojúshjango castellano soyënga, midio soyënga, uámana y botamana ndëtšbënga, perlënga, uámana lino y shbuenda uafjatsënga entsáyá y sedéjua y uámana uabuángana entsáyá; nÿetsca botamana uanguëtše betiyënga, marfiloca pormana soyënga, uámana niñëséngaca pormana soyënga, bronce soyënga, hierro y marmol soyënga; <sup>13</sup> bëts cá canela y inÿe botamana uanguëtše y tamna soyënga, botamana uanguëtše béjayënga, incienso y mirra; vínoye, aceitiye, uámana arninÿá, trigo; bayënga ndayánaca uasmëmnyënga, oveshënga, couayënga, cochëshangá y entsanga nÿets tempo nÿe ínÿabiama oservenéngnaca. <sup>14</sup> Y chë pueblentša entsangbiama mochanjayana:

¡Chë tša cmonjanogúsetana jtsebomnama soyënga, mora ya ndoñe quešmátsbomna; chë uámana y buashinÿinÿana soyënga y tša bomnana lempe šmojobuetše, y ndocna te más cachca soye quešmochátsbomna ca!

<sup>15</sup> Chë soyënga enënga, chë bëts pueblentša entsángbeyeca bomnënga tmojanobi-amënga, bënoca mochanjoquéda antješna, chë bëts pueblentša entsangbiama tša bëts castiguama auatja causa; mochanjošachna, puerte ngmenánaca mochántsemna. <sup>16</sup> Y mëntšá chentša entsangbiama mochanjayana:

¡Tša lastema, tša lastema tsëngaftanga chë uámana bëts pueblentše oyenëngbiama!

Chë enjáninÿna mo canÿe shembasacá, uámana lino entséjua uichëtjoná, uámana shbuenda uafjatsënga y uabuángana entsáyá uichëtjoná, botamananá castillánoca, perlënga y uámana botamana ndëtšbéngaca.

<sup>17</sup> ¡Y canÿe ora chabe tša bomnana lempe tojtsopochocá ca! —mochanjayana.

Nÿetsca chë barquënguentša mándayënga, chentša entsanga inÿe luaroye ajnënga y chentša trabájayënga, y nÿetscanga chë vida onguayiñe mar béjayoca trabájayëngnaca, chentšana bënoca mochanjoquéda antješna, <sup>18</sup> y chë bëts pueblo chaojtsangbototjuanentša ngona chamojinÿe ora, jabuache mochanjayana: “¡Quem uámana bëts pueblécá ndocna inÿe pueblo cachcá quenátsmëna ca!” <sup>19</sup> Chca chamojinÿe ora, ngménama bestšašniñe polvëshe mochántsenotboto, y mëntšá mochántseyona ošachiyënga y puerte cochtsetšenánënga:

¡Tša lastema, tša lastema tsëngaftanga chë uámana bëts pueblentše oyenëngbiama!

Chentša bomnánaca bomnënga tmojanobiama nÿetscanga chë mar béjayoca barco bomnënga.

¡Canÿe ora lempe tojtsopochocá ca! —chënga mochántseyona.

Chora chë ángel tonjánayana:

<sup>20</sup> ¡Celoca oyenënga móyejuanga chë pueblo chca tojapasama;

y tsëngaftángnaca móyejuanga, Bëngbe Bëtsabe entsanga, Jesucristbe ichmónënga y

Bëngbe Bëtsabe juabna oyebuambnayënga, er chca jacastígase, Bëngbe Bëtsá tojama chënga chamosufrima, ntšamo tsëngaftanga chašmosufrima chënga tmojanmcá ca! —cha tonjánayana.

<sup>21</sup> Chentšana, canje ángel puerte obenana bomná, canje ndëtsbé tonjanatsbaná, mo canje bëts nantsnëbé ndëtsbecá, mar béjayoye tonjanashbuetse y mëntsá tonjánayana: Mëntsá, nye ndeolpe y jabuache, Babilonia chë uámana bëts pueblo mochántsetsatse, y ndocna te más quem pueblo queochátsmëna.

<sup>22</sup> Chentše, ndocna te más quemochátuenana arpangá uabuástoyana, ni cantayana, flautëfjenga y trompetëfjuangá cach ndoñe; ndocna te más quemochátsmëna obrerënga, ni chë nantsnëbeñe trabájayana quemochátuenana.

<sup>23</sup> Chentše, ndocna te más ndocna uajuinýanëshá queochátsbinýnaye, ni casamento fiestentša enbouenanana quemochátuenana. Er chë bëts pueblo chca mochantsepochóca, masque chentša obuámnañënga y enënga nyets quem luarentše chë más bomnënga monjamna, y chentša bocjuanánaca nyetsca luarënguentsá entsanga ingñënënga monjamna ca — cha tonjánayana.

<sup>24</sup> Bëngbe Bëtsá chca chë bëts pueblentše echanjama, er chentše tmojinýena chë Bëngbe Bëtsabiama trabájaye causa tmojanóbanëngbe buiñe; chë chabe juabna oye-buambnayënga, chabe entsanga, y chë chábioye oservénama nyets quem luarentše tmojsëbayëngbe buiñe.

## 19

<sup>1</sup> Chentšana celoca sënjanuena mo mallajta entsanga cuaftsayebuachcá, mëntsá monjétsichamo:

¡Bëngbe Utabná matschuanga!

Bëngbe Bëtsá endmëna nda chabe entsanga tojatsebacá; cha puerte uámanana, buashinýinýana y mando endbomna,

<sup>2</sup> er ndayama cha tojayancá ndegombre jtsemnana, y ntšamo tšabá chama tojtsemncá.

Cha chë uachuana bacna vida bomna shembásabioye tbojacastigá.

Chë shembásabe puerte bacna soyënga causa, nyets luarentša entsángnaca bacna soyënga tmojama.

Chábioye chca jacastígase,

Bëngbe Bëtsá tojama ntšamo jamama ibomerecencá,

chábioye oservénënga chë shembásabeyeca tmojóbana causa ca —chënga monjétsichamo.

<sup>3</sup> Y cachiñe mëntsá tmonjánayana:

¡Bëngbe Utabná matschuanga!

¡Chë bëts pueblo japochócama uangbototjuanentša ngona nyetsca tescama chca echanjótjuaye ca!

<sup>4</sup> Y chora, chë uta bnëtsana y canta bëtsëjëmënga amëndayënga y chë canta Ainënga tmonjanoshamentšé, y Bëngbe Bëtsá, chë uámana tbemanentše enjëtsetbemanabioye tmonjanadorá, mëntsá jayanëse: “¡Chca chaotsemna! ¡Bëngbe Utabná matschuanga ca!”

<sup>5</sup> Y chë uámana puententšana canje oyebuambnayana tonjanóbocna, mëntsá:

Bëngbe Bëtsá matschuanga, nyetsca chabe oservénënga

y chë nyetscangbiamá cha chë más uamaná yomnama juabnayënga,

básenga y bëtsétsanga ca.

### *Chë Oveshatembe casamento fiesta*

<sup>6</sup> Y sënjanuena mo mallajta entsangbe oyebuambnayancá, mo bëtscá béjaye cuaft-sobonjnacá y mo bëts juesasanana shauenanancá; mëntsá monjétsichamo:

¡Bëngbe Utabná matschuanga!

Er Bëngbe Utabná, Bëngbe Bëtsá nyets obenana bomná tojontsé jamándana.

<sup>7</sup> Puerte móyejuanga y mochjínýanyiye

Bëngbe Bëtsá puerte bëtsá y uamaná bëtsemnama,  
er mora entsemna mo chë Oveshatembe casamento te cuafjoshjangcá;  
chabe shema yochjabocná puerte tojtenobotamá;

<sup>8</sup> tmojalesenciá cha chauatíchéjtjo uámana, nduatsenga uafjantse y uabuashinÿinÿana lino entšayá.

Chë shema entsinÿinÿná chë Bëngbe Bëtsabe entšanga;

y chë lino entšayá jtsichétjonana entsinÿinÿná

chënga lempe ntšamo tšabá yomncá jtsamëse imoyena ca —chënga monjétsichamo.

<sup>9</sup> Chentšana chë ángel šonjaniyana: “Mëntšá mábema: ‘Oyejuayënga chë Oveshatembe casamento fiestama ófjanënga ca.’ ” Y mëntšánaca šonjaniyana: “Chca, ndegombre Bëngbe Bëtsabe palabrënga endmëna ca.”

<sup>10</sup> As chabe shecuatšëntše sënjanoshamentšé cha jadórama, pero cha šonjaniyana: “Ndoñe, átseftaca ndoñe chca mátamana, er atše Bëngbe Bëtsabe canÿe oservená sëndmëna, ntšamo aca condmëncá, y chë Cristbeyeca acbe catšátanga, ntšamo chabiama motatšëmbcá y chabe ndegombre palabrënga nÿets tempo imabuayinanga mond-mëncá. Aca cmontsemna Bëngbe Bëtsá jadórama ca.”

Ndayá Jesús tojanma y tojanayancá, endama chë Bëngbe Bëtsabe juabna oyebuamb-nayënga chëngbe ainaniñe osertánana y añemo chamotsebomnama, chë soyëngama entšángbioye jábuayenama.

#### *Chë fjantse couayiñe enjaquená*

<sup>11</sup> Chora sënjáninÿe celoca atëfjniñe; canÿe fjantse couaye enjésemna y chë chábeñe enjaquená enjanabaina “Ntšamo tojašebuachenacá amá” y “Ndegombre oyebuambnaya ca”, er ntšamo tšabá yomncá cha tojanjuabó y tojanma entšángaftaca; y chca chabe uayayëngaftaca monjánentsjanaye. <sup>12</sup> Chabe fšnëbenga mo iñeshcá enjáninÿna, best-šasiñe ba uabuashinÿinÿana coronëshangá enjanábomna, y canÿe uabaina chábeñe enjanábemana; nÿe cha chë uabaina yojanábuatma. <sup>13</sup> Cha enjanichétjona buíñeca unétjona entšayá y chabe uabaina enjamna “Bëngbe Bëtsabe palabra ca”. <sup>14</sup> Y chabe ústonoye monjétsajna mallajta soldadënga celoquënga, nduatsenga uafjantse y uámana lino entšayá uichétjonënga, fjantse couayënguñe enjaquenënga. <sup>15</sup> Chë enjétsenatsanabe uayoicana enjanóbocana canÿe puerte efšana espadëja, chë Bëngbe Bëtsábeñe ndošbuáchiyënga játatsetšama. Cha puerte obenánaca echántsamëndaye, mo canÿe hierro varëfjaquécá. Cha echanjama entšángaftaca mo nda uvasëšangá juantšëtetjama tojtsabotajná ora cuafjamcá; y echanjama chënga chamotsebomnama chë puerte uabouana castigo, Bëngbe Bëtsá chë nÿets obenana bomná tbojetna causa. <sup>16</sup> Chabe uabonjaníyañe y chabe mëntjoca canÿe uabaina enjanábemana: “Nÿetsca reyëngbiana chë más uámana Rey, y nÿetsca amëndayëngbiana chë más uámana Utabná ca”.

<sup>17</sup> Chentšana canÿe ángel sënjáninÿe, shinÿiñe enjétsatsana, chë celoca tsbanánoca nÿetsca monjanongüefjná shloftšënga jabuache mëntšá enjétsëtsëtsnaye: “¡Mabënga, menefjna chë Bëngbe Bëtsá tojaprontá bëts saná jasama; <sup>18</sup> chašmosama reyëngbe mëntšëna, soldadënga amëndayëngbe mëntšëna y valente entšangbe mëntšëna, couayënga y chëngbeñe enjaquenëngbe mëntšëna, y nÿetsca entšangbe mëntšëna, cachëngbiana trabájayënga y nÿe ínÿabiana nÿets tempo trabájayënga, básesenga y bëtsëtsanga ca!”

<sup>19</sup> Chora atše sënjáninÿe chë uabouana bayá y quem luarentša reyënga chëngbe soldadëngaftaca tmojánenefjna, chë fjantse couayiñe enjaquená y chabe soldadëngaftaca jétsjama. <sup>20</sup> Chë uabouana bayá tmonjanotbá, y cháftaca chë Bëngbe Bëtsabe ndoñe ndegombre juabna oyebuambnaya, chë bayabe delante ba bëts soyënga tonjanmá obenana jinÿanÿiyama; y cha chë soyëngaca tojanaingñé chë uabouana bayabe uinÿnanana soye chamuayentšajoma tmojanlesencianga, y chë chábioye jadórama pormana soye



adórayënga. Y chë útatbioyna ainata tmonsanatmetše chë íñesheca uafjajónayoye, chë azufre endëjuinýinýanentše. <sup>21</sup> Chë ínýengbioyna tmonsanapochocá chë fjantse couay-iñe enjaquenabe uayoicana enjanóbocana espadéjaca, y nyetsca shloftšënga chëngbe mëntšënaca yapa tmontanoshachá.

## 20

### *Chë uaranga uata*

<sup>1</sup> Chentšana canýe ángel sënjáninýe celocana entsanastjajuana chë corente asentoye tboca llavéjaca, y canýe bëts cadenéjua entsanëtbená. <sup>2</sup> Chë ángel tbontsantbá chë dragónbioye, chë tempsca mëtšcuaye, chë Diablo y Satanás endméná, y canýe uaranga uatama tbontsanbátsëca. <sup>3</sup> Chë corente asentoye tboye tbontsantsatše, chentše tbontsanëtame, y chentše bëššá tsengájašëca tonjaninýnaná, ndotatšëmbcá jatëfjuama ndocná chaondobenama; y chca, chë dragón ndoñe chaondobená jabocnama entsanga jáingñama, chë uaranga uata candochnënguëntscuana; y chora, básefta tescama chë dragón mochanjétsboshjona.

<sup>4</sup> Uámana puestënga sënjáninýe, y chiñe tmonjanotbiama chë entsanga tšabá o ndoñe tšabá tmonjamama jayanama obenana tmojanóyëngacñënga. Chë bestšaše jtsëstjanguëse tmojanóbanëngbe espíritëngnaca sënjánanýe. Chënga chca tmojanóbana, Jesús tojánayana soyënguiñe y chë Bëngbe Bëtsabe buayenana soyënguiñe sempre ošbuáchiye causa. Chënga ndoñe tmonjanadorá ni chë uabouana bayá, ni chë chábioye jadórama pormana soye, y ndoñe tmonjanlesenciá chë bayabe uinýnanana soye juentsaca o cucuatšinë chamuayentšjajoma. Y sënjáninýe chëngna tmontanayena y Crísoftaca canýe uaranga uatama montsanmánda. <sup>5</sup> Chë entsanga mondmëna chë natsanënga jtayenama, pero chë tempo chë inýe obanënga ndoñe chemëntétanayena, ndayá nýe chë canýe uaranga uata chentšana. <sup>6</sup> ¡Oyejuayënga y Bëngbe Bëtsabe entsanga, chë tmojtayanenënga chë obanënga chámuatayenama Bëngbe Bëtsá tojanma ora! Chënga ndoñe quenátamna chë nyetsca tescama castigo jtsebomnana, ndayá Bëngbe Bëtsá y Crístbioye mo bachnangcá chënga mochántseservena, y Crísoftaca chë uaranga uatama mochántsemandaye.

### *Satanás japochócama*

<sup>7</sup> Chë uaranga uata chaojochnëngo ora, Satanás chabe utámenocana mochanjétsboshjona; <sup>8</sup> y cha echanjábcna nyets luarentša entsángbioye, chë Bëngbe Bëtsabe soyëngama contra imomnéngbioye jáingñama, chë ntšamo Bëngbe Bëtsabe contra Gog y Magog tempo ibojamncá imomnénga. Satanás, chë entsanga echanjáchembo Bëngbe Bëtsabe contra jéntsajama, y tša chéftanga cha echanjáchembo, nýa mo chë mar béjaye chënyoca cascajca mochántsemna.

<sup>9</sup> Chënga nyetscanga nyets luarëjana mochanjátsjua, y chë Bëngbe Bëtsabe entsanga oyenentše y chabe bonshana entsangbe bëts pueblo shéconana mochanjotsaye. Pero celocana iñe echanjatquécjana y chë Bëngbe Bëtsabe contra imomnénga lempe echántsjuinýe. <sup>10</sup> Y Satanás, chë aingñayá, mochántsatmetše chë íñeshe y azúfreca uafjajónayoye, ndayentše chë uabouana bayá y chë Bëngbe Bëtsabe ndoñe ndegombre juabna oyebuambnayá tmonsanatmetše. Chentše bëts castigo nyets tempo, bnëté y íbeta mochanjasufrina.

### *Chë obanëngbiama tmonjánayana ntšamo chëngaftaca jamama yojtsemnana*

<sup>11</sup> Chentšana sënjáninýe canýe bëts uámana fjantse puesto jamándama y nda chiñe enjetsetbemaná. Celoca y quem luare chabe delante lempe tonjanenatjëmbe, y ndóc-nentše más chenatanobinýná. <sup>12</sup> Y chë obanënga sënjánanýe, bëtsétsanga y básesenga, chë uámana puestentša natsanoica monjétsatsana; y chë librëšangá tmonjanëtëfjo, y inýe librëšanaca, ndëmuanýënga nyetsca tescama tšabe vida mochjónýenëngbe uabaina

uabemana librésa. Chë obanëngbiamama tmonjánayana ntšamo chéngaftaca jamama yojtsemnana, cachënga vida imojábomna ora ntšamo tmojëftsema soyéngaca, ntšamo chë librésangañe yojanabemancá. <sup>13</sup> Chë mar béjayoye tmojanóbanënga choicana tmontanbocna, y chë obanënga tmojanoqueadanga luarënguentshana tmontanbocna, y cada cánýabiamama tmonjánayana ntšamo cháftaca jamama yojtsemnana, cachënga vida imojábomna ora ntšamo tmojëftsema soyéngaca. <sup>14</sup> Chentshana ya ndoñe más obenana quentétsemna entsanga chamóbanama chaomama, mo chë obenana chë íñesheca uafjónayoye cuaftsëtsëncá; quem íñesheca uafjónayoye endmëna chë nyetsca tescama castigo jtsebomnama luare; chë choca castigánënga jtsamnama yojtsamngbiamama entsemna mo chënga cachiñe cuafjatobancá; <sup>15</sup> y ndëmuanyengbe uabaina chë tšabe vida mochjónyëngbe uabaina iuábemana librésañe ndoñe yonjanabemana, chë íñesheca uafjónayoye tmontsanatmetše.

## 21

### *Celoca tsmiñe y fshantse tsmiñe*

<sup>1</sup> Chentshana atše sënjáninýe canýe celoca tsmiñe y canýe fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentétsemna, y chë mar béjaye chora cach tondaye. <sup>2</sup> Sënjáninýe chë “uámana ca” uabaina bëts pueblo, chë tsëm bëts pueblo Jerusalén, Bëngbe Bëtsábiocana celocana enjétsostjajuana, puerte botamaniñe, mo canýe shembása puerte botamanancá, chabe boyá jábocnabiamama. <sup>3</sup> Y chora canýe jabuache oyebuambnayana Bëngbe Bëtsabe uámana puestentshana sënjanuena, mëntšá: “Mouena. Bëngbe Bëtsá entsángaftaca echántsemna y cha chéngbeñe echantsiyena. Chënga chabe entsanga mochántsemna, cach Bëngbe Bëtsá chéngaftaca echántsemna, y cha chëngbe Bëtsá echántsemna. <sup>4</sup> Cha echanjama chënga ndocna te más ngmënënga chamondétsemnama, y ndoñe más chamondóbanama, ndoñe más chamondošachema, ni ngmënaca ndoñe chamondëtsóyebuambnama y ndoñe más tsetšanana chamondétsebomnama; er ntšamo chënga entsangcá fshantsoca tempo imojëftsiyena ora enjamncá, chora ya ndoñe chca queochátsmëna ca.”

<sup>5</sup> Chë uámana puestentše enjantbemaná šonjaniyana: “Atše lempe mo tsëm soyëngcá sëndbama ca.” Y mëntšánaca tonjánayana: “Chë soyënga mábema, er chë palabrenga endmëna ntšamo ndegombre yomncá, y nyetscanga mondobena chiñe corente jtsošbuáchiyana ca.”

<sup>6</sup> Chentshana šonjaniyana: “Lempe tonjochnëngo. Atše sëndmëna chë nyetsca soyënga bojatšayá y pochocayá, chë natsaná y chë ustonoyá. Mo nda tša uajuendayana tojtsebomná canýe béjaye fshantsiñe obocanentshana cuafjofšecá, cachcá nda tša tojtseboše atšbe soyënga jtsebomnama, atše chanjama cha chë soyënga chaotsebomnama, y chë nyetsca tescama yomna tšabe vídnaca, chca jtsebomnama chábioyoye tondaye ntsotjañcá. <sup>7</sup> Nda nyetsca soyënguentshana tšabá chaojabocná mo ayëñjanayacá, lempe echanjóyëngacñe ntšamo atšbe entsángbioyoye jatšatayama tijašebuachenacá, y atšbe chabe Bëtsá chántsemna y cha atšbe uaquiñá. <sup>8</sup> Pero chë auatja causa Crístbioyoye ndoñe mondëservëngë, chábeñe ndošbuáchiyënga, chë bacna soyënga causa Bëngbe Bëtsabiamama puerte uaboyëñjanënga imomnënga, chë ínýëngbioyoye obánayënga, chë shembása o boyabásaftaca bacna soye amënga, chë bocjuana soyënga amënga, chë soyënga adórayënga diosënga yomna ca jtsejuabnyëse, y nyetscanga bosterënga imomnëngbiamna, chënga entsamna chë íñesheca uafjónayoye jasúfriana, chë azufre yojuínýinýanentše. Chentše puerte castigánënga sempre mochanjëftsemna, mo uta soyama cuafjobancá ca.”

### *Chë tsëm bëts pueblo Jerusalén*

<sup>9</sup> Chentšana canya chë angelënguentsá, chë canýsëfta copbenga bomnënga jútjena chë canýsëfta ústonoye pochócaye soyéngaca, átšbioye tonjánabo y šonjanianyana: “Mabo, cbochanjinýinye chë tojobouamá shembása, chë Oveshatembe shema ca.” <sup>10</sup> Y atše chë Uámana Espíritoftaca corente mandaná jtsemnëse, chë ángel šonjanánatse canýe bëts y tsbanana tjoye, y šonjaninýinyé chë tsëm bëts pueblo Jerusalén, chë “uámana ca” uabaina pueblo, celocana Bëngbe Bëtsábiocana enjétsostjajuana. <sup>11</sup> Chë bëts pueblo enjétsebuashinýinyana Bëngbe Bëtsabe buashinýinyánaca; enjétsebuashinýinyana mo canýe uámana botamana ndëtsbecá, mo jaspe ndëtsbecá, pero mo cristalca tëshínýinië. <sup>12</sup> Chë bëts pueblo shéconana canýe bëts y tsbanana tapiëse enjamna, chë tapiëšië bnétsana uta bëshashangá y cada bëshashentse canýe ángel, y chë bëshashangaë enjanábemana chë Israeloca bnétsana uta bëts pamíllangbe uabaina. <sup>13</sup> Shinýe bocanoica unga bëshashangá, shinýe uenatjémbambanoica ungashá, tsjuanoica unga bëshashangá, y tsmanoica ungashá. <sup>14</sup> Chë tapiëse enjanécuatjona bnétsana uta ndëtsbenguië, y chëbenguië enjanábemana Jesucristo chë Oveshatembe bnétsana uta ichmónëngbe uabaina.

<sup>15</sup> Chë ángel átšeftaca oyebuambnaya canýe castellano juinýnanëšëfja enjánatbëna jamedídama chë bëts pueblo, chentša bëshashangá y chentša tapiëse. <sup>16</sup> Chë bëts pueblo cach medida enjábomna nyets cantoica, cach medida tëntšoye y nyanëjoye. Chë ángel chabe juinýnanëšëfjaca chë bëts pueblo tonjanmedidá: enjábomna uta uaranga y uta patse kilómetrënga; tëntšoye, tsbanánoye y nyanëjoye cach medida enjábomna. <sup>17</sup> Chentšana chë tapiëse tonjanmedidá, enjábomna chnénguana bnétsana y shachna metrënga; ntšamo entšanga chca soyënga jamedídama mondëtatšëmbcá chë ángel tonjanmedidá.

<sup>18</sup> Chë tapiëse enjanpormana jaspe ndëtsbeca, y chë bëts pueblo ena castellánoca, tša chca nýa mo cristalca tëshínýinië enjáninýna. <sup>19</sup> Chë ndëtsbënga ndayië chë tapiëse enjanécuatjona enjánbotamanana nyetsca uámana botamana ndëtsbéngaca: canýebé jaspe ndëtsbeca, chë inýebé zafiroca, chë inýebé ágata ndëtsbeca, chë inýebé esmeráldaca, <sup>20</sup> chë inýebé ónice ndëtsbeca, chë inýebé cornalina ndëtsbeca, chë inýebé crisólito ndëtsbeca, chë inýebé berilo ndëtsbeca, chë inýebé topácioca, chë inýebé crisoprasa ndëtsbeca, chë inýebé jacíntoca y chë inýebena amatista ndëtsbeca. <sup>21</sup> Chë bnétsana uta bëshashangá enjuamna bnétsana uta perlënga; cada bëshášha nýe canýe pérllaca uapormanésha. Y chë más bëts tsáshenëjana enjamna ena castellánoca; mo cristalca tëshínýinië enjáninýna.

<sup>22</sup> Chë bëts pueblentse ndocna Bëngbe Bëtsabe bëts yebna chiyátaninýe, er Bëngbe Utabná, chë Bëngbe Bëtsá nyets obenana bomná y chë Oveshatema chentše bonjamna, y chata nyetscangbiama chë bëts pueblentse ndayéntsñaca adoránata bonjétsëmna. <sup>23</sup> Chë bëts pueblentse ndoë quenjatsiyta shinýe o juashcona chaotsebínýnaye, er Bëngbe Bëtsabe buashinýinyánana chentše enjétsëbinýnaye, y chë Oveshatembe buashinýinyánana mo uajuinýanëshacá enjamna chë bëts pueblama. <sup>24</sup> Chentša binýnayanaca, entšanga nyetsca mándayëngbentse mochantsiyena, y quem luarentša mandadënga chëngbe uámana y bëts soyënga chë bëts puebloye mochanjiyëbo. <sup>25</sup> Chë bëts pueblentša bëshashangá ndocna te quemochtétatame, y chentše ndocna ora ibeta queochátsmëna. <sup>26</sup> Chë bëts puebloye mochanjiyëbo chë nyetsca luarënguentsá entšangbe uámana y bëts soyënga, y chë nyetsca luarënguentsá entšangbeë bëtsétsanga y uámanënga iuabiamná soyëngnaca. <sup>27</sup> Pero ndocna te queochatómashëngo ndayánaca, y chë soye chaotsama entšanga ndoë tsábënga chamotsemnama Bëngbe Bëtsá jadórana; ni ndocná queochátamashëngo, Bëngbe Bëtsabiama nýa tondayama ogustana soyënga amá o ínýëngbioye jáingñama soyënga amá. Choye mochanjámashjna nýe chë ndëmuanýëngbe uabaina yojsábemana chë Oveshatembe librëšaë, chë nyetsca tescama tsabe vida mochjónýenëngbe uabaina uábëmanentse.

## 22

<sup>1</sup> Chë ángel šonjaninjinýé chë enjanobějna bėjaye vida bomniye. Chë búyeshe enjamna ndétsenguíye y tëshínýniye mo cristalcá. Enjanóbocana chë Bëngbe Bëtsá y chë Oveshatembe uámana puestocana, <sup>2</sup> y chë más bëts tsashená tséntsajana enjanobějna. Chë fshajayentša catoica lado enjanójuajna betiyeshënga chë nyetsca tescama yomna tšabe vida jtsebomnama, canýe uatiñe bnétsana uta soye jashájonana, canýe cada shinýe; chë betiyeshentša tsbuanáchënga josérviana nyetsca mándayëngbentša entšanga jáshnama. <sup>3</sup> Choca ndocna soye queochátsmëna chë ndayama Bëngbe Bëtsá tojayana ndoñe tšabá yondmëna ca, y ndaye bacna soye japásama chaotsemna soye. Chë Bëngbe Bëtsá y chë Oveshatembe uámana puesto chë bëts pueblentše echántsemna, y chatbe oservénënga mochántadorana. <sup>4</sup> Chënga mochanjinýe Bëngbe Bëtsabe jubíá, y chabe uabaina chëngbe juentsaca mochantsambaye. <sup>5</sup> Chentše ndocna ora ibeta queochátsmëna, y chentša oyenënga ndoñe queochátëjaboto canýe uajuinýanéshta o shinýe chaotsebínýnaye, er Bëngbe Bëtsá Bëngbe Utabnabe buashinýinýanana chëngbiana echantsebínýnaye, y chënga mochántsemna mo reyëngcá uámanënga, y Bëngbe Bëtsáftaca nyetsca tescama mochántsemandaye.

*Jesucristo jésabama entsobeco*

<sup>6</sup> Chentšana chë ángel šonjaniyana: “Quem palabrënga endmëna ntšamo ndegombre yomncá, y nyetscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oyebuambnayënga, chëngbe ainaniñe osertánana y añemo chamotsebomnama jóyebuambayama, chabe ángel tbojichmó chabe oservénëngbioye jinýanýiyama ndayá betscó yojtsemna jopásama ca.”

<sup>7</sup> Chora Jesús tonjánayana: “Mouena. ¡Atše cachiñe betscó chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyebuambana soye tojoyeuná, chë ndayama quem librëšañe entsábemana ca.”

<sup>8</sup> Atše Juan, chë soyënga sënjanuena y sënjaninýe. Y chca sënjanuena y sënjaninýentšana, chë chca šonjaninjinýé ángelbe delante atše sënjanoshamentsé, cha jadórama. <sup>9</sup> Pero cha šonjaniyana: “Ndoñe, átšeftaca ndoñe chca mátamana, er atše canýe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catšátanga, chë Bëngbe Bëtsabe juabna oyebuambnayënga y nyetscanga chë ndayá quem librëšañe endayanama tmojóyeunanga mondmëncá. Aca cmontsemna Bëngbe Bëtsá jadórama ca.”

<sup>10</sup> Chora mëntšánaca šonjaniyana: “Ndoñe mo iytëmencá catjáboshjona ndayá quem librëšañe entsabemancá, chë ndegombre jochnënguama soyënga, er chca jopásama chë tempo ya entsobeco. <sup>11</sup> Cachcá monýá chë bacna entšá bacna soyënga chaotsama; chë puerte bacna soyënguiñe jtсийenama bošá, cachca soyënga chaotsama; pero chë tšábiana ntšamo tšabá yomncá chaotsama, y chë Bëngbe Bëtsabe entšá, nyets tempo nyets ainánaca chábioye chabotseservena ca” —cha šonjaniyana.

<sup>12</sup> Chora Jesús cachiñe tonjánayana: “Mouena. Atše quem luaroye betscó chanjésabo, y átšeftaca chanjiyëbo chë uacanana soye, y cada ona tšëngaftanguentšábioye chanjoyiye ndayá tojamama ntšamo tbojtsomerecencá. <sup>13</sup> Atše sëndmëna chë nyetsca soyënga bojatšayá y pochocayá, chë natsaná y ustonoyá, chë ndábeyeca y ndabiana lempe yomna ca” —šonjaniyana.

<sup>14</sup> Oyejuayënga chë bacna soyëngama perdonánënga imojtsemnënga, mo chënga chëngbe entšayá botamana cuaftsaboshabecá. Chca chënga mochantsobena chë nyetsca tescama yomna tšabe vida jtsebomnama uacanánana jashjáchama, mo chë nyetsca tescama yomna tšabe vida jtsebomnama betiyeshentšana cuaftsacá, y mochanjobenaye chë tsëm bëts puebloye bëshásajana tšabá jamashjnana. <sup>15</sup> Pero ndoñe quemochatobenaye jamashjnana chë ba ndoñe tšabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë ínýenga

obánayënga, chë soyënga adórayënga diosënga yomna ca jtsejuabnayëse, y nyetscanga chë bostero soyënga ogusetánënga y chca jtsamëse oyenënga.

<sup>16</sup> Chora Jesús cachiñe tonjánayana: “Atše Jesús, atšbe ángel tijichmó chë ntšamo atše sëntsejuabnacá ndayenache ošbuachiyëngcá enefjuanéngbioye lempe chámabuayenama. Atše sëndmëna chë Rey Davídbentšana Entšá. Atše sëndmëna mo chë bínjanoye puerte bínynaye estrellcá ca.”

<sup>17</sup> Chë Uámana Espíritu y chë Oveshatembe shema bondbétsichamo: “¡Mabo ca!” Y nda chca chaojouená cháuyana: “¡Mabo ca!” Y mo nda tša uajuendayana tojtsebomna, tojabo y bëtscá béjaye cuafjofsecá, cachcá nda tša tojtseboše Jesusbe soyënga jtsebomnama, chábioye chaobeconá y cha echanjama chë soyënga cha chaotsebomnama y chë nyetsca tescama yomna tšabe vídnaca, chca jtsebomnama tondaye ntsotjañcá.

<sup>18</sup> Nyetscanga ntšamo quem librësañe entsabemancá, chë ndegombre echanjopásama chamojouenéngbioye šcuabuayená. Nderado nda chë soyëngama más chaojaboté, Bëngbe Bëtsá echanjama cha chaosufrí chë quem librësañe entsábemana pochócaye soyënga. <sup>19</sup> Y nderado nda ntšamo quem librësañe entsabemancá, chë ndegombre echanjopásama soyënguiñe ndayánaca tojajuaná, Bëngbe Bëtsá chábioye bochantsebojuána ntšamo chabiama yomncá chë nyetsca tescama yomna tšabe vida jtsebomnama betiyeshentšana y chë tsëm bëts pueblentšana, chë ndayama quem librësañe entsábemana.

<sup>20</sup> Quem soyënga oyebuambnayá, chë lempe ndegombre echantsemnama tonjayaná, atše, Jesús séntsichamo: “Aíñe, betsco chanjésabo ca.”

Chca chaotsemna. ¡Cochjabo, Bëngbe Utabná Jesús!

<sup>21</sup> Bëngbe Utabná Jesús chaoma tšabe bendicionënga tšëngaftangbeñe chaotsemnama.